


# Goãmұ Yare Wereripұ



Desano: Goãmұ Yare Wereripұ New Testament

**Goãmu Yare Wereripu**  
**Desano: Goãmu Yare Wereripu New Testament**

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source files dated 29 Jan 2022  
17771afc-c309-57fd-9ff3-2d5a0cd59ff1

## Contents

SAN MATEO . . . . .	1
SAN MARCOS . . . . .	65
SAN LUCAS . . . . .	104
SAN JUAN . . . . .	168
HECHOS . . . . .	215
ROMANOS . . . . .	270
1 CORINTIOS . . . . .	297
2 CORINTIOS . . . . .	323
GALATAS . . . . .	339
EFESIOS . . . . .	349
FILIPENSES . . . . .	358
COLOSENSES . . . . .	364
1 TESALONICENSES . . . . .	370
2 TESALONICENSES . . . . .	375
1 TIMOTEO . . . . .	378
2 TIMOTEO . . . . .	385
TITO . . . . .	390
FILEMÓN . . . . .	393
HEBREOS . . . . .	395
SANTIAGO . . . . .	415
1 PEDRO . . . . .	422
2 PEDRO . . . . .	429
1 JUAN . . . . .	434
2 JUAN . . . . .	440
3 JUAN . . . . .	441
JUDAS . . . . .	442
APOCALIPSIS . . . . .	445

## San Mateo

*Jesucristo Goãmtu magu ïgu acawererã iribojegue majarã erã waïre were gojamãhtañumi Mateo*

<sup>1</sup> Jesucristo ñecũ sũmarã iribojegue majarã árĩñuma. Eropigu ïgu ñecũ murũ iribojegue majagu Davi waïcũgu árĩmũriñumi. Ïgu árĩboro core erã ñecũ Abrahã waïcũgu árĩmũriñumi.

<sup>2</sup> Abrahã Isaa pagu árĩñumi. Isaa Jacobo pagu árĩñumi. Jacobo Judá sã pagu árĩñumi. <sup>3</sup> Judá porã Fares Zara sã árĩñuma. Erã pago Tamar waïcũgo árĩñumo. Fares Esrom pagu árĩñumi. Esrom Aram pagu árĩñumi. <sup>4</sup> Aram Aminadab pagu árĩñumi. Aminadab Naasón pagu árĩñumi. Naasón Salmón pagu árĩñumi. <sup>5</sup> Salmón Booz pagu árĩñumi. Ïgu pago Rahab árĩñumo. Booz Obed pagu árĩñumi. Ïgu pago Rut árĩñumo. Obed Isai pagu árĩñumi. <sup>6</sup> Isai Davi pagu árĩñumi. Davipũ Israe majarã tauro opu árĩñumi. Ïgu Uria waïcũgu murũ marapore ïgu marapocũra pũhrũ Salomo waïcũgure porãcũñumo igo.

<sup>7</sup> Salomo Roboam pagu árĩñumi. Roboam Abías pagu árĩñumi. Abías Asa pagu árĩñumi. <sup>8</sup> Asa Josafat pagu árĩñumi. Josafat Joram pagu árĩñumi. Joram Uzías pagu árĩñumi. <sup>9</sup> Uzías Jotam pagu árĩñumi. Jotam Acaz pagu árĩñumi. Acaz Ezequia pagu árĩñumi. <sup>10</sup> Ezequia Manase pagu árĩñumi. Manase Amón pagu árĩñumi. Amón Josia pagu árĩñumi. <sup>11</sup> Josia Jeconia sã pagu árĩñumi. Erã árĩrisubure Israe yeba majarãre Babilonia majarãpũ ñeagãñuma erã ya yebague peresu iimorã.

<sup>12</sup> Eropi Babilonia yeba erã ejara pũhrũ, Jeconia marapo Salatiere porãcũñumo. Salatie Zorobabe pagu árĩñumi. <sup>13</sup> Zorobabe Abiud pagu árĩñumi. Abiud Eliaquim pagu árĩñumi. Eliaquim Azor pagu árĩñumi. <sup>14</sup> Azor Zadoc pagu árĩñumi. Zadoc Aquim pagu árĩñumi. Aquim Eliud pagu árĩñumi. <sup>15</sup> Eliud Eleazar pagu árĩñumi. Eleazar Matán pagu árĩñumi. Matán Jacobo pagu árĩñumi. <sup>16</sup> Jacobo José pagu árĩñumi. José María marapũ árĩmũriñumi. Mariapũ Jesu pago árĩmo. Jesupũ masare taubu árĩgu Cristo erã arĩ piyudigu árĩmi.

<sup>17</sup> Eropirã Abrahãre mari queonũgacũ, ne Daviguere mari queotucũ, oã árĩpehrerã árĩrã catorce cururi gohra árĩñuma. Eropirã mari dipaturi Davire queocũ, ne Babiloniague Israe majarãre erã aĩgãboro core queotucũ catorce cururi gohra dipaturi árĩñuma. Eropiituhaja Babiloniague erã ejara pũhrũ mari queonũgacũ ne Cristo ïgu masa dehyoacũgue mari queotucũ catorce cururi gohra árĩñuma daja.

*Jesucristo ïgu masa dehyoarare wereñumi Mateo*

*Lc 2.1-7*

<sup>18</sup> Eropigu Jesucristo õpa masa dehyoapũ. Ïgu pago Mariapũ José mera mojoto diribo árĩpo. Eropigo igo ïgu mera marapũcũboro core Espĩritu Santo ïgu turari mera majigu bocapo. Eropigo igo basi majigu opawahgũriñere masipo igo. <sup>19</sup> Eropigu José igore mojoto diribodigu irire masigu, diaye árĩrire ïgu iigu árĩgu igore cóãbu iiripũ. Igore gũhyasũuro iidiabigu, masa erã masibiricũ ta igore cóãbu iiripũ. <sup>20</sup> Irire ïgu pepirisubu Goãmtu anyupũ quẽroque Josere dehyoagu, õpa arĩpũ.

—José, Davi murũ pãrami, María mera gũhyasĩriro mariro mojoto dirique. Igo Espĩritu Santo ïgu turari mera ne nijipo arĩ wahgãrigo ãhrimo. Eropigu gũhyasĩriro mariro igore mojoto dirique. <sup>21</sup> Igo porãcũgocumo. Ïgu igo magu ta ïgu ya maca majarãre erã ñeri iira dipuwajare taubu árĩgũcumi. Ïgu eropa taubu árĩcũ Jesu waïyegũca mũhu ïgũgãre, arĩpũ anyu Josere.

<sup>22</sup> I árĩpehreri eropa wayoro iribojegue majagu Goãmũ ya weremũhtadigu ìgu arĩ gojadiro dopa ta. Irire ìgũre Goãmũ gojadoreñumi. Òpa arĩ gojamũriñumi Goãmũ yare:

<sup>23</sup> Nómoe Ʃmũ mera árĩbigo, majigũgãre bocago porãcũgocumo igo magũgãre. Eropigu Emanuel waĩcũgũcumi ìgũgã, arĩ gojañumi Goãmũ yare gojayudigũgue.

Emanuel arĩdiaro “Goãmũ mari mera ta ãhrimi,” arĩdiaro iiaa.

<sup>24</sup> Goãmũ yagu anyu Josere eropa arĩ werera pũhrũ Josépu wahgã anyu ìgu dorediro dopa ta María mera mojoto diripũ. <sup>25</sup> Igo magũgãre igo porãcũboro core Josépu igo mera árĩnibiripũ. Igo pu porãcũpo pare. Eropigu ìgũpu igo magũgãre Jesu waĩyperũ.

## 2

### *Abe mũririropũ majarã òaro masirã Jesure ìarã ejañuma*

<sup>1</sup> Judea yeba árĩri maca Belén waĩcũri maca Jesu masa dehyoapu. Irisubu Herode Judea yeba majarã erã tauro opu árĩpu. Ìgu eropa masa dehyoara pũhrũ necãre buherã necãre òaro masirã abe mũririropũ majarã ahri, Jerusaléngue erañorã.

<sup>2</sup> Eropa erarã, masare ero majarãre serẽpiñorã:

—¿Judio masa erã tauro opu árĩbu dohpaguere nohogue masa dehyoayuri ìgu? Abe ìgu mũririropũ majarãgue árĩrã, ne necãmũ dehyoacũ ìabu. Eropa ìgu dehyoacũ ìha “Opu masa dehyoagu iicumi,” arĩ masiabũ gua. Eropa ìgu ne dehyoacũ ìarã gua yujuro mera ìgũre umupeorã arirã ìabu ògue, arĩ wereñorã necãre buheri masa masare.

<sup>3</sup> Erã eroparĩcũ pee erã opũre Herodere irire wererã wañorã. Eropigu gajigu opu masa dehyoarare erã werecũ peegu Herodepu guñaricũpu. Eropirã árĩpehrerã Jerusalén majarã sã ìgu iro dopa ta guñaricũñorã erã sã. <sup>4</sup> Eropigu Herodepu árĩpehrerã pahia oparãre, judio masare buherã sãre sihupehocãpu. Ìgu sihubeora pũhrũ erã gamenerepehrecũ ìha, erãre serẽpipũ ìgu:

—¿Nohogue masa dehyoagũcũri Goãmũ beyedigũ Cristopũ mũa pepicũ? arĩ serẽpipũ ìgu erãre. <sup>5</sup> Òpa arĩ wereñorã erã ìgũre:

—Belén, Judea yebague árĩri macague Cristo masa dehyoagũcumi. Òpa arĩ gojamũriñumi Goãmũ yare weremũhtadigu:

<sup>6</sup> Belén waĩcũri macague yujugu opu dehyoagũcumi. Ìgu Goãmũ yarãre Israe majarãre dorebu árĩgũcumi. Eropiro Belén Judea yeba árĩri macari watope bu árĩri maca árĩquerero gaji macari tauro árĩroca, arĩ gojamũriñumi Goãmũ yare gojayudigũgue, arĩ wereñorã erã Herodere.

<sup>7</sup> Erã eropa arĩra pũhrũ Herode masa erã peebiogue abe mũririropũ arinirãre sihubeopũ. Ìgu pohogue erã ejara pũhrũ, erãre ìgu serẽpira pũhrũ, erã necãmũre erã ìaranũre wereñorã erã ìgũre. <sup>8</sup> Erã eropa werera pũhrũ Herodepu erãre Beléngue obeogu òpa arĩpu erãre:

—Ìgũgãre òaro amaque. Ìgũgãre mũa bocajara pũhrũ yũ sãre wererã ariqũe mũa. Ìgũgãre umupeogu wabu iiaa yũ sã, arĩ were obeoripũ erãre Herodepu.

<sup>9</sup> Ìgu eropa arĩra pũhrũ, erã waha wañorã. Erã eropa wacũ abe mũririropũ erã ìadiru necãmũpu erã core wamũhtaniguicãyoro. Eropiro majigũgã ìgu árĩro weca dujanũgaja wayoro iriru necãmũ. <sup>10</sup> Eropirã necãmũ dujanũgajacũ ìarã, bũrigã mucubiriñorã erã. <sup>11</sup> Majigũgã ìgu árĩri wihigue eja, ñaja wañorã erã. Eropa ñajajarã majigũgãre ìgu pago mera árĩgũre ìañorã erã. Eropirã erã mereja, ìgũre umupeorã. Umupeotuhaja, erã ya comorire aĩbeo, pãgũñorã erã ìgũgãre aĩgãrirare omorã. Eropirã orore, buirire, poresuri sãre aĩwiu, ìgũgãre waja mariro

oñorã. <sup>12</sup> Irire otuhara pũhrũ carĩa wañorã erã. Erã eropa carĩcũ quẽroque Goãmu werepũ erãre: “Herode pohro dujabiricãque,” arĩ werepũ Goãmu erãre quẽroquere. Īgu eropa arĩ werera pũhrũ, erãpũ wahgãñorã. Erã eropa wahgãra pũhrũ gajĩ mague erã ya yebague dujarã dujaa wañorã.

### *José sã Jesugãre aĩ duhrigã wañuma Egiptogue*

<sup>13</sup> Erã eropa wara pũhrũ Goãmu yagũ anyu quẽroque Josere dehyoagu, òpa arĩ werepũ:

—Wahgãque. Herodepũ majigugãre wejẽbu amagucumi dohpaguere. Eropigu majigu sãre ĩgu pago sãre Egiptogue duru aĩ duhrigãque. Eroguere yũ dipaturi mũre werecãgue dujarique, arĩ werepũ anyu Josere.

<sup>14</sup> Īgu eroparĩcũ peegu, Josẽpũ ñami ta wahgã, majigu sãre ĩgu pago sãre Egiptogue aĩ duhrigã wapũ. <sup>15</sup> Egiptogue eja, Herode ĩgu ojocarropẽ ta eroguere árĩñorã erã. Eropa wayoro iribojegue majagu Goãmu ya weremũhtadigu ĩgu arĩ gojadiro dopa ta. Irire ĩgure Goãmu gojadoreñumi. Òpa arĩ gojamũriñumi Goãmu yare gojayudigugue: “Egiptogue árĩgure yũ magure sihubeobũ,” arĩ gojamũriñumi Goãmu yare weremũhtadigugue.

### *Herode majirãre wejẽdoreñumi*

<sup>16</sup> Eropigu necã buherã erã duhri dujaacũ peegu Herodepũ guatariacãpũ. Eropigu Belén majarãre, iri maca pohro majarã sãre erã porãre ũa porãgãre wejẽpehocãdorepũ ĩgu. Ne dehyoarãre wejẽnũgadore pe bojori oparãre wejẽtudorepũ ĩgu. Nere necãre buheri masa necãmũre erã ĩaranũre wereñorã Herodere. Erã eroparĩcũ peegu ĩgu Jesu masa dehyoarĩnũre masigu, “I nũcũ bojori ta ĩgu opacumi,” arĩgu majirãre pe bojori oparãre wejẽtudorepũ. <sup>17</sup> Īgu eropiicũ iribojegue majagu Jeremia Goãmu yare weremũhtadigu ĩgu arĩ gojadiro dopa ta eropa wayoro. Òpa wereyu gojañumi ĩgu:

<sup>18</sup> “Ramã waĩcũroque busuro carabũ. Bũrigã bũjawereri mera orerã carama. Raquel acawererã Israe masa marasã nome erã porãre bũrigã orerãcoma. Erã porã sĩricũ ĩarã ne bũjawere duhosome,” arĩ gojañumi iribojeguere Herode majirãre wejẽdoreboro core.

<sup>19</sup> Eropi Herode ĩgu sĩrira pũhrũ Egiptogue árĩdigũre Josere Goãmu yagũ anyu quẽroque dehyoapũ daja. Eropa dehyoagu òpa arĩpũ Josere:

<sup>20</sup> —Majigugãre wejẽdianirã mũra sĩria wahãma. Eropigu ĩgu majigũre, ĩgu pago sãre Israe yebague aĩ dujaaque mũhũ, arĩ werepũ anyu Josere.

<sup>21</sup> Īgu eropa arĩra pũhrũ wahgã, majigugãre ĩgu pago mera ta Israe yebague aĩ dujaa wapũ. <sup>22</sup> Arquelao Herode magũ ĩgu pagũre gohrotodigu ĩgu árĩcũ pee, Josẽpũ Judea yeba árĩgu gũipũ. Eropigu dipaturi ta Goãmu quẽroque ĩgũre werenemopũ. ĩgũre Judeague dipaturi dujadorebiripũ. ĩgu eropa werera pũhrũ erã Galilea yebague waha wañorã. <sup>23</sup> Iri yebaguere Nazare waĩcũri macague eja árĩñorã erã. Eropa iĩñorã erã Goãmu yare weremũhtanirã erã gojadiro dopa ta. Òpa arĩ wereyumũriñuma: “ ‘Cristo Goãmu beyedigũ Nazare majagu ta ãhrimi,’ arĩrãcoma masa,” arĩ gojamũriñuma iribojegue majarã.

## 3

### *Ñu waĩyegu masare wereñumi*

*Mr 1.1-8; Lc 3.1-9, 15-17; Jn 1.19-28*

<sup>1</sup> Eropi irisubure Ñu Goãmu yarãre waĩyeri masũ árĩpũ. Judea yeba masa mariroque ĩgu Goãmu yare werenũgapũ. <sup>2</sup> Òpa arĩ werepũ masare ĩgu pohro ejarãre.

—Múa ñero iirare bujawere duhucãque. Umaro majagu Goãmũ mua opa igu arĩboro merogã duhyaa, arĩ werepũ igu Ñu.

<sup>3</sup> Iribojegue majagu Isaia Goãmũ yare weremãhtadigu Ñu eropa waburire õpa arĩ gojayuñumi:

Masa marirogue werenigui gaguinigu õpa arĩ buhegucumi igu: “Mari Opa igu ariburi mare amuro dopa ta igu ariboro core õarã árĩyucue mua igure peemorã,” arĩ wereniguigucumi, arĩ gojañumi Isaia.

<sup>4</sup> Ihĩ Ñu camello ya gasirire suhri sañagu, waibũgu ya gasirodare tuãdiudigu árĩpũ. Eropigu poreroare bamuripũ. Eroparĩcũ nũgu majarã momere bapũ. <sup>5</sup> Jerusalén maca majarã, árĩpehrero Judea yeba árĩrã, dia Jordán waĩcũriya pohro árĩrã sã igure peerã wañorã. <sup>6</sup> Erã eropa pee, erã ñero iirare bujawere, Goãmũre irire weretarimuriñorã erã. Erã eropa werecũ peegu dia Jordán waĩcũriyague Ñu erãre waĩyepũ.

<sup>7</sup> Eropigu bajarã fariseo masa, saduceo masa sã igure waĩyedorerã ejacũ ñagu Ñu werepũ erãre:

—Múa ñero iiricũrã ãhraa mua. “Goãmũre gua ñeri dipuwaja moabiricãporo,” arĩrã, ¿mua yure waĩyedorerã ahriri? <sup>8</sup> Igu mua ñero iira dipuwajare moabiricã õpa iique mua. Diaye ta mua ñeri iirare bujawererã árĩrã, õarire gohrotorã árĩrã, õarire iique mua. <sup>9</sup> Õpa arĩ pepibiricãque: “Abrahã mari ñecu murũ árĩmuripũ. Eropirã Goãmũ mera õhaa,” arĩ pepibiricãque mua. Mũare arĩgu tiiaa. Abrahã pãramerã mua árĩri duhpiburi árĩbeaa. Goãmũ gamegu i utãyeri mera gajirãre iimasimi Abrahã acawererãre. Eropirã Abrahã pãramerã mua árĩri bu gohra ta ãhraa. <sup>10</sup> Õpa ãhraa: Mari masa yucu iro dopa ãhraa. Goãmũpũ come opagu iro dopa ãhrimi. Eropigu ñeri ducacũri yucure pa cohã, iri nuguri sãre tabetagucumi. Tabetatuhaja, peamegue cóãgucumi igu iri yucure, iri nuguri sãre. Eropa ta iigucumi mua sãre igure gamebirãre. <sup>11</sup> Yũ pũhrũ yũ tauro turagu arigucumi. Õatariagu ãhrimi. Igu iro dopa õagu árĩbeaa yũpũ. Eropigu igure pepigu “Yũ tamera bu gohra arĩgu ãhraa,” arĩ pepia yũhũ. Múa ñero iirare bujawerera pũhrũ, yũpũ deco mera waĩyea. Yũ pũhrũ arigupũ yũhũ tauro iigucumi. Espĩritu Santore ogucumi masa mera árĩniguibure. Eropigu peamegue igu ñerire soewearo dopa ta igupũ mua ñero iirire coegucumi. <sup>12</sup> Yũ pũhrũ arigu trigo gasirire cóãgu iro dopa ãhrimi. Gasirire cóãgu igu sihburu mera árĩpehreri trigo yeri gasirire sũha weami. Igu eropa sũha weara pũhrũ trigo gohra yeripure igu diburi wihigue debugucumi. Igu sũha weara gasiripure igu soegucumi. Õpa ii beyegucumi yũ pũhrũ arigupũ. Õarire gohrotonirãpũre igu mera árĩniguicũ iigucumi. Erã ñerire bujawerebirãpũre peamegue yaribiri peamegue cóãgucumi, arĩ werepũ Ñu.

### *Ñu Jesure waĩyeñumi*

*Mr 1.9-11; Lc 3.21-22*

<sup>13</sup> Pũhrũ Jesu Galileague árĩdigũ wapũ. Jordán waĩcũriyague ejapũ Ñure “Yũre waĩyeque,” arĩgu. <sup>14</sup> Negohraguere Ñu igure waĩyediabiriripũ.

—Cue, mupũ yũ tauro turagupũre yure mũ waĩyecũ õaboaya. Mũre waĩyebu árĩbeaa yũhũ, arĩ yũhrupũ Ñu Jesure.

<sup>15</sup> Jesupũ yũhrupũ igure:

—Yũre waĩyeque. Mari õpa iirã Goãmũ igu dorediro dopa ta iirã iiaa, arĩpũ Jesu. Igu eroparĩcũ peegu,

—Áũ, arĩ yũhrupũ Ñu. <sup>16</sup> Eropa arĩtuhaja Jesure waĩyepũ. Waĩyetuhajacũ Jesu diague niguidigu majanũgajapũ. Igu majanũgajacũ ta, umusi igure pãrima wayoro.



Eropigu Goãmũ yagu Espíritu Santo buja iro dopa bejagu ïgu weca ïgu dijaricã ïaru ïgu basi. <sup>17</sup> Eropiro umarogue wereniguiro cariyoro:

—Ihĩ yu magu yu mahigu áhrimi. ïgu mera buringã mucubiria, arĩro cariyoro umaroguere.

## 4

### *Watĩ ñerire iidoreriñumi Jesure*

*Mr 1.12-13; Lc 4.1-13*

<sup>1</sup> Eropi Espíritu Santopũ Jesure masa marirogue wadorepũ erogue watĩ ïgure ñerire iidoreboro dopa.

<sup>2</sup> Erogue ejagu, cuarenta nũri gohra baro mariro árĩpũ Jesu. Eropiro pũhrũguere ïgure oa pũriyoro pare. <sup>3</sup> ïgu oaboacũ ïagu watĩpũ ïgu pohrogue ejagu õpa arĩpũ:

—Mũhũ Goãmũ magu árĩgu õpa ïhmuque. Iyerire utãyerire bari poyacũ iique, arĩripũ ïgu Jesure.

<sup>4</sup> ïgu eroparĩcũ peegu Jesu gamebiripũ. Eropigu Jesu õpa arĩ yũhrĩpũ:

—Goãmũ yare erã gojarapũ õpa áhrra: “Masare bari mera dihta ojocaribiro gahmea. Árĩpehreri Goãmũ ïgu ya wereniguiro mera árĩro gahmea,” arĩmi Goãmũ, arĩ yũhrĩpũ Jesu watĩre.

<sup>5</sup> ïgu eropa arĩ yũhrira pũhrũ watĩpũ Jerusalén waĩcũri macague Jesure aĩgãpũ. Erogue eja, Goãmũ ya wihi wecague Jesure aĩ mũrijarũ ïgu. <sup>6</sup> Aĩ mũrijatuha, ïgure õpa arĩripũ:

—¿Diaye ta Goãmũ magu gohra ta áhriri mũhũ? Goãmũ yare erã gojarapũ õpa áhrra:

“Goãmũ ïgu yarã anyuare mũre ïhadibudoregũcumĩ. Eropirã erãpũ mũre ïhadiburãcoma mũgue utãye weca mehbejajari arĩrã,” arãa ïgu gojarapũ.

Erã mũre eropa ïhadibumorã árĩcũ mũhũ Goãmũ magu ta árĩgu õgue buhrima dija ïhmuque yũre. Mũre erã itamucũ ïhmuñata yũre, arĩripũ watĩpũ.

<sup>7</sup> ïgu eroparĩcũ peegu gamebiripũ Jesu. Õpa arĩ yũhrĩpũ ïgure:

—Goãmũ yare erã gojarapũ õpa arãa: “Goãmũ mũa Opũ ïgu arĩrare ‘¿Diaye ta áhriri?’ arĩ masidiarã Goãmũre ii ïhmudoremaabiricãque,” arãa Goãmũ yare erã gojarapũ, arĩpũ Jesu.

<sup>8</sup> ïgu eropa arĩ yũhrira pũhrũ umadigũgue utãgũgue Jesure aĩ mũrijarũ daja. Irigu wecague mũri bejaja, árĩpehreri macarire i mũmũ majare ïhmupũ Jesure. Erã opari sãre ïhmupũ. <sup>9</sup> Eropa ïhmuquũ Jesure õpa arĩpũ:

—Yũre mereja, “Mũhũ yu opu áhrra,” arĩ umupeoque mũhũ yũre. Mũhũ yũre eropa iicũ mũre árĩpehreri i macarire mũre ogũra, arĩ wereripũ watĩ.

<sup>10</sup> ïgu eroparĩcũ Jesu õpa arĩ yũhrĩpũ daja:

—Satana, waque mũhũ. Õpa arãa Goãmũ yare erã gojarapũ: “Mũ Opũ Goãmũ dihtare umupeoque. ïgu ya doreri dihtare iique,” arãa Goãmũ yare erã gojarapũ, arĩpũ Jesu watĩre.

<sup>11</sup> ïgu eroparĩcũ peegu watĩ waha wapũ. ïgu wara pũhrũ anyuapũ eja, Jesure itamuñorã. ïgure barire oñorã.

### *Galilea yeba Jesu buhenũgañumi*

*Mr 1.14-15; Lc 4.14-15*

<sup>12</sup> Eropi Ñure peresu erã iicũ peegu, waha wapũ Jesu. Galilea yebague ejapũ.

<sup>13</sup> Ero árĩri macague Nazaregue waha, tarigã, Capernaum waĩcũri macague ejapũ. Galilea waĩcũri ditaru pohro árĩbũ Capernaum. Iri maca Zabulón yeba pohro, Neftalĩ yeba pohro árĩbũ Capernaum. Erogue eja árĩpũ Jesu. <sup>14</sup> Eropa ta iipũ Jesu



iribojegue majagu Goãmũ yare weremuhtadigu Isaia ïgu arĩ gojadiro dopa ta. Ôpa arĩ gojajuñumi:

<sup>15</sup> Zabulón yeba pohro, Neftalí yeba pohro, ditaru waro, Jordán waĩcũriya gajipu masegue Galilea yeba ãhraa. Iri yeba judio masa árĩbirã ya yeba ãhraa.

<sup>16</sup> Ero majarã Goãmũ yare ôaro masibeama. Eropa masibiriquererã ta ôagũre ïarãgue masirãcoma. Erãpu Goãmũre ne masibeama. Eropirã peamegue wamorã ta árĩrima. Eropigu yujugu erãre Goãmũ yare masicũ iigucumi, arĩ gojañumi Isaia Jesu eraboro coregue.

<sup>17</sup> Erogue árĩgu Goãmũ yare werenugapu Jesu:

—Mũa ñeri iirare bujawereque. Eropa iirã ôaripũre gohrotoque. Ūmaro majagu Goãmũ árĩpehrerã tauro ïgu opu árĩboro merogã duhyaa, arĩ werenugapu ïgu.

*Wapicũrã wai wejẽrãre ïgu mera majarã árĩmorãre sihuñumi Jesu*

*Mr 1.16-20; Lc 5.1-11*

<sup>18</sup> Eropi Galilea waĩcũri ditaru tũrogue ejagu, Simore, ïgu pagu magu Andre mera bocajapu Jesu. Simo ta Pedro erã arĩ piyugu árĩpu. Erã wai wejẽri masa árĩñorã. Erã ya wejẽri yucũre mehyurã iĩñorã iri ditaru wũari ditarugue. <sup>19</sup> Erãre boca ôpa arĩpu Jesu:

—Yũ mera majarã árĩmorã arique mũa. Yũ mera mũa aricũ waire ñeha gameneorã mũa árĩro dopa ta, Goãmũ yarã árĩmorãre masare sihu gameneomorã árĩcũ iigũra mũare. Yũ mera mũa aricũ eropa iimorãre amugũra mũare. Eropirã yũ mera arique, arĩpu ïgu erãre.

<sup>20</sup> Eropa ïgu arĩcũ peerã ta erã ya wejẽdi yucũre apicãa, Jesu mera waha wañorã.

<sup>21</sup> Eropirã erã Jesu mera tarigã, Santiagore ïgu pagu magu Ñũ sãre bocajañorã daja. Erã Zebedeo porã árĩñorã. Erã yaru dohodirugue erã pagu mera erã sã erã ya wejẽdi yucũre amurã iĩñorã. Erã perãre ïgu sihubeopũ. <sup>22</sup> ïgu eropa sihubeocũ pee, erãpu erã pagũre, dohodiru sãre api Jesu mera waha wañorã.

*Bajarã masare buheñumi Jesu*

*Lc 6.17-19*

<sup>23</sup> Eropi árĩpehrerogue Galilea yebare Jesu buhe curipu. Judio masa gũa buheri wirigũe ôari buherire, umaro majagu ïgu opu árĩricũrũre buherũ. Eropigu dorecũrãre ôarã iigu árĩpehreri dorecũrũre cóãpu ïgu. <sup>24</sup> ïgu eropa iicũ peerã Siria yeba majarã árĩpehrerogue iri yeba árĩrã ïgũre masinũgañorã. Eropa masirã, gajiropa árĩri dore oparãre, watẽa ñajãsũnirãre, pũriri dorecũrãre, sũriri mũra dorecũrãre, dupũ turabirã sãre aĩ ejañorã Jesu pohrogue. Eropigu árĩpehrerãre erãre ôarã wacũ iipu Jesu.

<sup>25</sup> ïgu eropa iicũ ïarã, Galilea yeba majarã Decapoli yeba majarã, Jerusalén majarã, Judea yeba majarã, Jordán waĩcũriya gajipu masepu majarã, bajarã masa ïgu mera wañorã.

## 5

*Utãgũgue mũria, ero buheñumi Jesu masare*

<sup>1</sup> Masa bajarã ïgu pohro erã ejaçũ ïagu Jesu utãgũgue mũriapu. Mũrija, ero dojapu. Ero ïgu doacũ ïgu buherã ïgu pohrogue ejañorã. <sup>2</sup> Erã ejaçũ ïagu ôpa arĩ buhenũgapũ:

*Ôpa árĩrã ãhrima mucubirã, arĩ buheñumi Jesu*

*Lc 6.20-23*

<sup>3</sup> —Erã ñerire bujawererã, Goãmũre gamerã mucubirã ãhrima. Ūmaro majagu erã opu árĩroguere warãcoma erã. Ūmaro maja erã ya ãhraa. Eropirã burigã mucubirãcoma.

4 “Orerã sã mucubirirã àhrima. Erãre mucubiricũ iimi mari Pagu. Eropirã mucubirirã árĩrãcoma.

5 “Gajirãre tarinugadiabirã eropa árĩca arĩbirã mucubirirã àhrima. Goãmũ “Ogũra,” ìgũ arĩrare oparãcoma. Eropirã erã sã mucubirirã árĩrãcoma.

6 “Goãmũ ìgũ dorero dopa iidiarã, òarire iidiarã mucubirirã àhrima. Goãmũ ìgũ itamucũ erã òarire ii ojogorocurãcoma. Eropirã mucubirirã árĩrãcoma.

7 “Gajirãre mojomoro ìarã mucubirirã àhrima. Erã eropa mojomoro ìacũ Goãmũ erã sãre mojomoro ìagucumi. Eropirã mucubirirãcoma.

8 “Erã ñerire cóanirã, mucubirirã àhrima erã. Goãmũre ìarãcoma erã. Eropirã mucubirirãcoma.

9 “Gajirãre gamequeãcũ bosarã mucubirirã àhrima. Erãre “Yũ porã àhrima,” arĩgucumi Goãmũ. Eropirã mucubirirãcoma.

10 “Goãmũ dorerire erã iira waja gajirã mera ñero tarinirãpũ umaro majagũ erã opũ árĩroguere ìgũ yare oparãcoma erã. Eropirã mucubirirãcoma.

11 “Yahare mũa iira waja gajirã mũare erã turiquerecũ ta mucubirirã àhraa mũa. Mũare erã ñero iicũ mucubirirã àhraa mũa. Yaharã mũa árĩri waja mũare árĩpehreri ñeri quere goroweoquerecũ ta mucubirirã àhraa mũa. 12 Goãmũ yare weremũhtanirãre mũa core árĩnirãre erãguere ta ñero iimũhtaũuma. Mũa sãre erãre iidiro dopa iicũ mucubirique. Òaro sĩporãcũque. Eropigũ umarogue mũa ejacũ wũaro òaro iigucumi mũare Goãmũ. Eropirã mucubirique mũa, arĩ werepũ Jesu.

*Moa iro dopa, boyoro iro dopa àhrima Jesu yarã, arĩ buheñumi*

*Mr 9.50; Lc 14.34-35*

13 Eropi Jesu buhenemopũ:

—Moa waibũgũ dihire iri ñero wabiricũ iiro dopa ta mũapũ yaharãpũ árĩpehrerã gajirãre ñerire erã iidiabiricũ iiaa. Moa ñeri wacũ dipaturi òari iimasiya mara. Iri moa ne òabeaa. Iri eropa wacũ iri moare cóãcãro gahmea. Irire cóãra pũhrũ weca ejama. Ne duhpiburi árĩbeaa iri erã cóãra. Iri duhpiburi árĩbiro dopa ta árĩbiricãque mũa. Goãmũ yapũre iiniguicãque, arĩ werepũ Jesu.

14 Eropi ìgũ buhenemopũ:

—Boyoro marire ìhamasicũ iiro dopa ta mũapũre yaharãpũre i yeba majarãre Goãmũ yare wererã erãre masicũ iiro gahmea. Utãgũ weca árĩri macare duhmasiya mara. 15 Eropi sihãgodirure masa sihãgorã gajino docague dibubeama. Irure sihãgogũ umarogue duhpeomi iri wihi majarã árĩpehrerã erã ìaboro dopa.

16 Eropirã mũa sã mũa Goãmũre mũa umupeorire dibubiricãque. Òaro wereque. Eropirã òarire iique. Mũa eropa iicũ ìarã masa erã mari Pagũ umaro majagũre umupeorãcoma. “Ìgũ turagũ, òagũ àhrimi,” arĩrãcoma, arĩ werepũ Jesu.

*Goãmũ ìgũ dorerire ìgũ gojarare wereñumi Jesu*

17 Eropa arĩtuhaja, erãre werenemopũ:

—Ire mũa masicũ gahmea yũhũ. Goãmũ ìgũ dorerire Moiserẽ ìgũ apirare, ìgũ yare weremũhtanirã erã gojara sãre cóãgũ arĩgũ iibiribũ. Iri dorerire mũare òaro were amugũ arĩgũ iibũ. Goãmũ yare erã werediro dopa ta iigũ aribũ. 18 Diaye ta mũare arĩgũ iiaa. I yeba umaro árĩropẽ ta ìgũ doreri sã árĩroca. Goãmũ ìgũ dorerare iipehogucumi. 19 Eropirã iri dorerire yujurãyeri tarinugarã, gajirãre eropa ta iidorerã bu árĩrã árĩrãcoma. Umãro majagũ opũ ìgũ árĩroque bu árĩrã iro dopa árĩrãcoma. Yujuñe doreriñe árĩquerecũ ta erã tarinugarã bu árĩrã iro dopa árĩrãcoma erã. Gajirãpũ ìgũ dorerire òaro iirã, gajirãre erã iiro dopa iidorerã umãro majagũ ìgũ opũ árĩroque oparã iro dopa árĩrãcoma erã. 20 Mũare arĩgũ tiiaa yũhũ. Masare buherã, fariseo masa sã Goãmũ gamerire queoro iibeama. Erã tauro Goãmũ gamerire iique mũa. Mũa eropa iibirã, ìgũ opũ árĩroguere ne ejasome mũa, arĩ werepũ Jesu.

*Papūrire wereniguirire wereñumi Jesu*

*Lc 12.57-59*

<sup>21</sup> Eropa arītuhaja erāre werenemopu:

—Iribojegue majarā ōpa arī wererare ta peenirā árīribu mua: “Masare wejēbircāque. Masare wejēdigu erā dipuwaja moabu āhrimi,” erā arīrare peenirā árīribu mua. <sup>22</sup> I erā werera tauñariro muapure werenemogura. Īgu acaweregu mera papūridigupu masare wejēdigu iro dopa ta āhrimi. Eropigu erā dipuwaja moabu āhrimi ĩgu sã. Īgu acaweregure gameturigu dipuwaja moadorerã pohro erā aīgãbu ta āhrimi ĩgu sã. “Ñegu pee masibigu āhraa muhu,” ĩgu acaweregure arīgure peamegue wama guhyataria ĩgure.

<sup>23</sup> “Mua acaweregu muare ĩgu ĩhaturicũ ĩgu mera amumuhtaque Goãmure serēboro core. Eropirã Goãmũ wihigue mua Goãmure umupeorã waboro core, waibugure mua oboro core ōpa iique. <sup>24</sup> Goãmure mua oburire duhucānique dohpa. Mua acaweregu pohrogue waha, “Dipaturi ĩhaturibircārã. Irire iripēta duhurã,” irire arīque ĩgure. Mua eropa amura pũhrũ Goãmure umupeorã waque daja ĩgu ya wihigue.

<sup>25</sup> “Gajigu muare weresãdiagũ, dipuwaja moadoreri wihigue muare ĩgu aīgãdiacũ, ĩgu mera guaro mariro arīque. Dipuwaja moadoregu pohrogue ĩgu aĩ ejaboro core ĩgu mera ōaro ahmu wereniguique. Mua eropa iicũ ĩagu muare weresãbiribocumi. Mua eropa iibiricũ eroguerẽ muare aĩ ejacũ ĩgupu dipuwaja moadoregure weresãgucumi. Īgu eropa weresãcũ, beyegupu peresu iirãguere muare ogucumi. Eropirã erã muare peresu iirãcoma. <sup>26</sup> Erogue árīniguirãca mua. Ne erã wajayedorerare mua wajayephocũgue wirirãca mua, arī werepu Jesu.

*Gajigu marapo mera ñero iirire wereñumi Jesu*

<sup>27</sup> Ōpa arī werenemopu Jesu:

—Iribojegue majarã ōpa erã arī wererare peenirã árīribu mua. “Gajigu marapo mera ñero iibiricāque,” erã arīrare peenirã árīribu mua. <sup>28</sup> I erã werera tauñariro muare ipure werenemogura: Nomeore ñeabiriqueregu ta yujugu igo mera árīdiagũ igore ñero uaribejagu ñero guña pepigu ñero iituhami igo mera.

<sup>29</sup> “Eropirã mua cuiru diayepũ árīdiru mera ñero iirã irirure mua gorawea cóãbodiropã dopa ta iri ñerire duhucāque. Irire duhubirã peamegue warãca. Mua cuirure cóãcũ iri cuiru dihta dederea. Mua ñerire duhubirãpũ peamegue waha ñetariaro tarirãca. Eropirã iri ñerire duhucāque. <sup>30</sup> Eropirã mua mojoto diayepũ maja mojoto mera ñero iirã iri mojtore tabeta cóãbodiropã dopa ta iri ñerire duhucāque. Irire duhubirã peamegue warãca. Mua mojtore mua cóãcũ iri mojoto dihta dederea. Mua ñerire duhubirãpũ peamegue waha ñetariaro tarirãca. Eropirã iri ñerire duhucāque, arī werepu Jesu.

*Erã marasã nomere cóãrire wereñumi Jesu*

*Mt 19.9; Mr 10.11-12; Lc 16.18*

<sup>31</sup> Ōpa arī werenemopu Jesu:

—Iribojegue i sãre arīñuma: “Īgu marapore cóãdiagũ ĩgu cóãburire wereripũ mera igore cóãmasimi,” arīñuma iri bojeguerẽ. <sup>32</sup> I erã werera tauñariro muapure ire weregura: Yujugu ĩgu marapo umũ mera ñero iibiriquerecũ ta igore cóãbocumi. Īgu eropa cóãdigo gajigu mera marapucũgo ñero iigo iicumũ gajigu mera árigo. Eropigu igo marapũ igore cóãdigũ igore gajigu mera ñero iicũ iimi. Eropigu ĩgu cóãdigo mera marapocũgu igo mera ñero iigu iimi ĩgu sã, arī werepu Jesu.

*Waĩpeo arīrare wereñumi Jesu*

<sup>33</sup> Ōpa arī werenemopu Jesu:

—Iribojegue majarãre erã õpa arĩ wererare peenirã árĩribu mua: “Mua arĩdiro dopa ta eropa iique. ‘Goãmũ mera diaye ta eropa iigura,’ mua arĩdiro dopa ta iique,” erã arĩ wererare peenirã árĩbu mua. <sup>34</sup> I erã werera tauñariro muare weregura. “Umaro mera diaye ta arĩgu iiaa,” arĩ umaro mera arĩ waĩpeo arĩbircãque. Umaropũ mari Opũ ĩgu árĩro ãhraa. Bu árĩro árĩbeaa. Ero eropa árĩro árĩcũ ĩarã eropa arĩmaabircãque. <sup>35</sup> I yeba mera ne waĩpeo arĩbircãque. I yeba sã Goãmũ ya yeba ta ãhraa. Ero eropa árĩro árĩcũ ĩarã eropa arĩmaabircãque. Jerusalén mera ne waĩpeobircãque. Turagu mari Opũ ya maca ãhraa Jerusalén. Bu árĩro árĩbeaa. Eropirã eropa arĩmaabircãque. <sup>36</sup> “Yũ dipuru mera diaye arĩgu iiaa,” arĩ waĩpeobircãque. Mua poari borecũ iimasibea mua. Iri ñiri wacũ sãre iimasibea mua. Eropa iimasibirã arĩrã “Yũ dipuru mera diaye arĩgu iiaa,” arĩ waĩpeobircãque. <sup>37</sup> “Iirãra,” arĩrã waĩpeoro mariro diaye ta irire arĩniguicãque. “Iisome,” arĩrã sã waĩpeoro mariro arĩniguicãque. Mua waĩpeo arĩrã watĩ ñegũ ĩgu dorero dopa ta iirã iica, arĩ werepũ Jesu.

*Erã basi gamediarire wereñumi Jesu*

*Lc 6.29-30*

<sup>38</sup> Õpa arĩ werenemopũ daja Jesu:

—Iribojegue õpa erã arĩ wererare peenirã árĩribu mua. “Mũre gajigu mũ cuirure ĩgu patĩadiro dopa ta mũ sã ĩgure patĩa gameque. Mũ gũcũrĩrũre ĩgu panuadiro dopa ta mũ sã ĩgure ĩgu gũcũrĩrũre panua gameque,” erã arĩ wererare peenirã árĩribu mua. <sup>39</sup> Erã werera tauñariro weregura daja muare. Muare ñero iidigũre eropa ĩacãque. Yujupũ mũ wayuporãre pacũ, “Gajipũ sãre padiagu paque,” arĩque ĩgure. <sup>40</sup> Gajigu mũre dipuwaja moagũre ĩgu weresãcũ, ĩgu dipuwaja moagupũ mũhũ camisa mera mũre weresãdigũre wajayedorebocumi. ĩgu eropa wajayedorecũ ĩgure oque. Iriñere otuhaja mũ weca majañe suhriro sãre onemoque ĩgure. <sup>41</sup> Yujugũ surara gajinore yuju kilómetro mũre aĩgãbasadorecũ, gaji kilómetro aĩgãnemobasaque daja ĩgure. <sup>42</sup> Mũre serẽdigũre ĩgu serẽropẽ ta oque ĩgure. Eropigũ gajigu mũre wayudorecũ wayuque ĩgure ĩgu wayudorerare, arĩ werepũ Jesu.

*Mũare ĩhaturirãre mahique, arĩ wereñumi Jesu*

*Lc 6.27-28, 32-36*

<sup>43</sup> Õpa arĩ werenemopũ daja Jesu:

—Masa õpa arĩmũrima: “Mua mera majarãre mahique. Eropirã muare ĩhaturirãpũre ĩhaturi gameque daja,” erã arĩrãre peenirã árĩribu mua. <sup>44</sup> Erã werera tauñariro weregura muare daja: Muare ĩhaturirãre mahi umupeoque. Muare ñero iirãre õaro arĩdoreque. Muare ĩhaturirãre õaro iique. Eropirã muare ñero wereniguirãre muare ñero iirã sãre “Erã sã õaro arĩporo,” arĩrã Goãmũre serẽbasaque. <sup>45</sup> Mua eropa iirã mari Pagũ umaro majagu Goãmũ porã ãhraa mua. Goãmupũ yujuropa ta iimi masare. Ñerãre, õarã sãre abere asicũ iimi ĩgu. Eropigũ Goãmũ ĩgu dorerire iirã sãre, iibirã sãre deco merecũ iimi ĩgu. Masare yujuropa ĩgu iiro dopa ta mua sã masare iique. <sup>46</sup> Muare umupeorã dihtare mua umupeocũ ne duhpiburi árĩbeaa iri. Ñerã masa wajasea corerã sã eropa ta iima. Eropirã arĩpehrerãre umupeoque. <sup>47</sup> Mua acawererã dihtare mua õaro bocatĩricũ ne duhpiburi árĩbeaa iri. Goãmũre masibirã sã eropa ta iima. Eropirã arĩpehrerãre õaro bocatĩrique. <sup>48</sup> Ñeri marirã arĩque mua. Mari Pagũ umaro majagu ĩgu ñeri marigũ ĩgu arĩdiro dopa ta mua sã ñeri marirã arĩque, arĩ werepũ Jesu.

**6**

*Õari iirire wereñumi Jesu*



<sup>1</sup> Dipaturi ĩġu werenemopu:

—Goãmu ya árĩburire ðarire iirã árĩrã, “Goãmu yare iipehorã àhraa ġua,” arĩ werebircãque ġajirãre. Mũa eropa arĩ wererã mũa ðaro iira ne duhpiburi árĩbeaa. Eropiġu Goãmu umaro majagũ ðarire mũa iira wajare muare osome.

<sup>2</sup> “Eropirã mojomorocurãre itamurã, irire masare ii ĩhmubircãque. Masa erã ĩabiro itamuque erãre. Ģajirã iro dopa iibircãque. Erã masa bajarã watope mojomorocurãre itamuma. Mague niguirã watope mari buheri wirigue árĩrã watope sãre ii ĩhmuma. Erã eropa iiquererã erã mari purupure ñero iicorerã àhrima. Eropa masa watope ðarire ii ĩhmurã erã, “Òarã àhrima erã,” masare arĩdorerã iima. Erã eropa iirã masa umupeori mera wajatatuhama. Eropiġu Goãmuru ne wajayesome erãre. <sup>3</sup> Eropirã mojomorocurãre itamurã, irire yayarogã iique. Mũa wapi mera árĩquererã ta ĩġu ĩabiro irire iique. <sup>4</sup> Masa erã ĩabiroque mojomorocurãre itamuque. Masa ĩabiroque mũa itamuquerecũ Goãmuru ĩhami. Eropiġu mari Paguru muare wajayegucumi, arĩ werepu Jesu.

### *Goãmure serẽriñere buheñumi Jesu*

#### *Lc 11.2-4*

<sup>5</sup> Dipaturi ĩġu werenemopu:

—Goãmure serẽrã, mari purupu ñero iicorerã iiro dopa iibircãque mũa. Erã mari buheri wirigue nigui, mague sãre nigui, Goãmure serẽ ĩhmuma erã masare. Eropa serẽ ĩhmurã diaye masa erãre umupeori mera erã mucubirituhama. Eropiġu Goãmu erãpore umupeosome. <sup>6</sup> Muru Goãmure serẽmorã mũa ya taribugue biha ñajaque. Biha ñaja mari Pagu ĩasũya marigure serẽque. Mũa eropa iicũ masa erã ĩabiro árĩquerecũ ta mari Paguru muare ĩagucumi. Eropa peegu muare ðaro iigucumi ĩġu.

<sup>7</sup> “Eropirã Goãmure serẽrã, pepiro mariro mũa serẽrare ta dipaturi serẽ maji dujabircãque. Eropa ta iima Goãmure masibirã. “Bajasuburi yuju disiro ta ġua serẽcũ ġuare peegucumi,” arĩ pepima erã. <sup>8</sup> Erã iiro dopa iibircãque. Mũa serẽboro core mari Pagu mũa gamerire masituhama. <sup>9</sup> Eropirã ðpa arĩ serẽro ġahmea Goãmure.

Ģua Pagu umaro majagũ mu ðagũ árĩrire árĩpehrerã umupeoporo. <sup>10</sup> Dohpaguere árĩpehrerã weca opu árĩque. Umarguere mu dorero dopa ta erã iiro dopa ta i yeba majarã sã eropa iiporo. <sup>11</sup> Eropiġu umuri nucũ ġua baburire oniguicãque ġuare. <sup>12</sup> Ģajirã ġuare erã ñero iirare ġua cãdijiro dopa ta mu sã ġua ñero iirare cãdijique. <sup>13</sup> Eropiġu ġua ñero iiborare cãhmotaque. Eropiġu ġuare ñerire iibircãcũ iique. Mũhu ġua Opu turagu eropa árĩniguigũca. Árĩpehrerã mre eropa umupeoniguicãrãcoma, arĩ serẽque Goãmure, arĩ werepu Jesu.

<sup>14</sup> “Ģajirãre muare erã ñero iirare mũa cãdijicũ ĩagu, mari Pagu umaro majagũ mũa ñero iira sãre cãdijigucumi. <sup>15</sup> Ģajirã muare erã ñero iirare mũa cãdijibircũ mari Pagu mũa ñero iira sãre cãdijisome, arĩ werepu Jesu.

### *Goãmure umupeomorã ba duhurire buheñumi Jesu*

<sup>16</sup> Eropiġu ĩġu erãre werenemopu:

—Goãmure umupeomorã ba duhurã bujawererã iro dopa ii ĩhmubircãque. Eropa iima mari purupu ñero iicorerã. Erã erã diaporire bujawererã iro dopa àhrima. Erã eropãrĩcũ erã ba duhucũ ĩha masima masa. Diaye ta muare arĩġu iiaa. Masa erãre umupeocũ ġahmema erã. Eropirã erãre umupeocũ ĩarã mucubirituhama. Eropiġu Goãmuru erãre ðaro iisome. Eropirã erã iiro dopa ii ĩhmubircãque mũa. <sup>17</sup> Mũa sã ba duhurã mũa árĩniguiro dopa ta árĩque. Mũa ya dipure uyu mera sũcã ðaro wãapocãque. Mũa diapori sãre coecãque. <sup>18</sup> Mũa eropa iicũ mũa ba duhucũ ĩha masisome masaru. Goãmu dihta ĩha masigucumi. Mũa seyaro mũa árĩcũ ĩġuru mũa mera àhrimi. Eropa ĩagu ĩġu muare ðaro iigucumi, arĩ werepu Jesu.

*Umaro majare guñadoreñumi Jesu**Lc 12.33-34*<sup>19</sup> Jesu werenemopu daja:

—I yeba majare ai gameneobiricaque. O maja boa waboca. Iri boabiricu yajari masu aibocumi irire. Igu yajabiricu mega tuabocoma. Eropiro i yeba maja dederema guhya ahraa. Eropira i yeba majare buriga gamebiricaque. <sup>20</sup> Umaro majapure turaro gameque mua. Umaro majare mega tuamasibeama. Eroque mua opaburi ne boabeaa. Eroquere yajari masu ne aimasibeami. <sup>21</sup> Eroque mua opaburi iri aricu, umaro majare Goamu yare buriga guñaraca mua, ari werepu Jesu.

*Masa era pepiro dopa ta iiaa, ari wereñumi Jesu**Lc 11.34-36*<sup>22</sup> Eropi buhegu opa ari werenemopu erare:

—Mua cuiri mua duple sihagodiru iro dopa ta ahraa, ari werediacu opa ahraa. Mua pepiro dopa ta iiaa. Mua oaro mera pepira arira oarire iiaa. <sup>23</sup> Mua ñerire pepira arira ñeri dihtare i mua. Umaro majare mega tuamiaa. Eropira mua ñeri dihtare mua pepiniguicacu iri ñeripu ñetariari ahraa, ari werepu Jesu.

*Niyerure gamera, Goampure gamebeama, ari wereñumi Jesu**Lc 16.13*<sup>24</sup> Eropigu igu erare werenemopu:

—Yujugu Goampure guñagu niyerupure guñabeami. Niyerupure buriga guñagu Goampure guñabeami. Eropigu niyeru dihtare gamegu arigu Goampure mucubiricu iibeami. Goamu sare niyeru sare peñere gametarimaja masiya mara muare, ari werepu Jesu.

*Goamu igu porare ihadibumi, ari wereñumi Jesu**Lc 12.22-31*<sup>25</sup> Eropigu erare werenemopu:

—Eropigu muare ire arigu iiaa. Mua aricure mua barire, ihririre, suhri sare wuaro guñaricubiricaque. Muare deyro moagu bari dihtare bamore, suhri sañamorã dihtare Goamu iibiripu muare. Mua iri dihtare guñacu gamebeami. <sup>26</sup> Mirimagu porare Goamu igu ihadiburire masique mua. Era poeri moora ahrima. Eropiro era bari dihburi wiri erare mara. Mari Pagupu erare era baburire ohomi. Mirimagu porã tauro mapure mahimi Goamu. Eropigu mua sare ihadibugucumi igu. <sup>27</sup> Wuaro mua pepiri mera iri muare pagarã wacu iibeaa. Eropiro mua wuaro pepiri duhpiburi aribeaa.

<sup>28</sup> “¿Eropira duhpira mua suhri sañaburire wuaro guña bujawere pepicari? Nugu maja gori iri gorire pepique. Iri gori ne iiro mariro oari goricua. Iri gori oari suhri iro dopa oari gori dehyoaa. <sup>29</sup> Salomo opu mupu oari suhri opagu igu ariquerecu ta iri goripu igu ya suhri tauro oari gori ahraa. <sup>30</sup> Iri gorire oari gori iimi Goampu. Iri gori bajamenuriga arira puhru ñaidija pehrea wahaa. Mero ahli, gajinu peamegue soe cóacama. Iri eropa mata pehrequerecu ta iri gori iri oari gori aricu iimi Goamu. Eropigu Goamu iri gorire igu oari gori igu iidiro tauro mua sare oaro igucumi. Suhrire ogucumi. Goampure daberoga umupeoa mua. <sup>31</sup> Eropira mua baburire, mua ihriburire, mua suhri sañaburire wuaro guñabiricaque. <sup>32</sup> Goampure masibirapu irire eropa amaniguicama. Mari Pagu umaro jagu aripehreri mua gamerire masimi. Igu eropa masicu mua ya ariburire wuaro guñabiricaque. <sup>33</sup> Goamu mua Opu igu ariborore gamemuhataque mua. Mua eropa iira puhru Goampu mua gameri duhyacu ogucumi. <sup>34</sup> Eropira ñamigare mua dohpa warocuri ari wuaro bujawere ne pepibiricaque. Dohpagare mua ñero tariboro arituhaa. Eropira dohpagã maja

dihtare pepique. Gajinũ majare wũaro bujawere pepinemobiricãque. Goãmũpũ mũare itamugũcumĩ, arĩ werepũ Jesu.

## 7

*Gajirãre “Ñerã ãhrima,” arĩbiricãque, arĩ wereñumi Jesu*

*Lc 6.37-38, 41-42*

<sup>1</sup> Eropigũ ãgũ erãre werenemopũ:

—Gajirãre “Ñerã ãhrima,” arĩ erã iirare werewũabiricãque mũa. Mũa eropa arĩ werewũabiricũ Goãmũ mũa sãre “Ñerã ãhrima,” arĩsome. <sup>2</sup> Gajirãre “Õaro iibeama,” mũa arĩ pepidiro dopa ta Goãmũpũ mũa sãre eropa ta arĩ ãagũcumĩ. Mũa gajirãre beyero dopa Goãmũpũ mũa sãre eropa ta beyegũcumĩ. <sup>3</sup> Mari werenigui queori mera buhecũ õpa iirã ãhraa mũa. Mũa acaweregũ ãgũ cuirugue miri pogañegã mehñajacũ iri pogañegãre õaro ãhaa mũa. Mũa ya cuiripũre wũarimiji arĩquerecũ ta irimijire ne pepibea mũa. Eropirã gajigũre miri pogañegãre mũa ãaro dopa ta mũa acaweregũ ãgũ ñero iiripũre õaro ãhaa mũa. Mũa basi turaro ñerire iiquererã ta irire eropa pepicãa mũa. ¿Dohpa arĩronore eropa ãhriri mũa? <sup>4</sup> Õpa arĩ wereniguia mũa acawererãre: “Acaweregũ, ñerire iigũ iica mũhũ. Eropigũ irire duhucãque,” arĩ wereniguia mũa. Eropa ãgũre ñerire iidorebiriquererã mũa sã ñerire duhubeaa. ¿Duhpirã irire ñerire iinirã arĩquererã ta irire pee masibeari mũa? <sup>5</sup> Eropa iirã masa erã pũrũpũre ñero iicorerã ãhraa mũa. Mũa ñero iiripũre duhumũhtaque. Mũa eropa iira pũhrũ mũa acawererãre “Mũa ñero iirire duhucãque,” arĩ weremasia mũa.

<sup>6</sup> Diayea iro dopa arĩrãre ñetariarãre Goãmũ ya õatariarire erã umupeobiririre werebiricãque erãre. “Erãgue ñero wereya ñero arĩri,” arĩrã werebiricãque erãre, arĩ werepũ Jesu.

*Mari Pagũre mari serẽrĩre wereñumi Jesu*

*Lc 11.9-13; 6.31*

<sup>7</sup> Eropigũ ãgũ erãre werenemopũ:

—Goãmũre mari Pagũre serẽque mũa. Mũa eropa serẽrã mũa aĩrãca. Mũa serẽrĩre bocarãca. Goãmũre eropa serẽniguicãque mũa. Mũa eropa iicũ ãgũ mũare ogũcumĩ. <sup>8</sup> Arĩpehrerã Goãmũre serẽrã aĩrãcoma. Eropirã erã serẽrare bocarãcoma. Eropigũ arĩpehrerã Goãmũre eropa serẽniguicãrãre ãgũ erãre ogũcumĩ.

<sup>9</sup> “¿Mũa porã barire mũare serẽcũ utãyepũre obocuri mũa erãre? Obiriboya. <sup>10</sup> ¿Mũa porã waire mũare serẽcũ añapũre obocuri mũa erãre? Obiriboya mũa. <sup>11</sup> Mũa ñerã arĩquererã ta mũa porãre õarire omasia mũa. Eropigũ mari Pagũ mũa tauro õarire ohomi mũare ãgũ porãre ãgũre mũa serẽrĩre.

<sup>12</sup> “Gajirã mũare õaro iicũ gahmea mũa. Erãre mũa õaro iicũ gamero dopa ta õaro iique erã sãre. Erã õaro iibiriquerecũ ta mũapũ erãre õaro iique. Eropa ta iidorea Moise dorerigũ, Goãmũ yare weremũhtanirã erã gojarague sã, arĩ werepũ Jesu.

*Miri disiporogã queorire wereñumi Jesu*

*Lc 13.24*

<sup>13</sup> Eropigũ ãgũ queorire werenemopũ erãre õpa arĩgũ:

—Goãmũ pohrogue wadiarã ãgũ yare iiro gahmea mũare. Eropirã ãgũ yare eropa iimaabiricãro gahmea. Miri disiporogãque mũa wadiacũ diasa ãhraa. Eropiro diasa ãhraa Goãmũ pohrogue mũa wadiacũ. Peamegue masa erã wacũ diasabeaa. Wũari disiporogue mari ñajacũ diasabeaa. Iri disiporogue ta masa erã ñajaboro dopa ta peamegue masa erã wacũ diasabeaa. Eropirã masa bajarã erogue warã iima. <sup>14</sup> Goãmũ pohrogue wadiacũ diasa ãhraa. Bajamerãgã masa erogue warãcoma. Erogue warã mũari nũcũ Goãmũ mera arĩniguirãcoma, arĩ werepũ Jesu.



*Yucugũ dũcare masirã dipagũ sãre masiro dopa ta masa erã iirire ãarã erã áricũre masia mari, arĩ wereñumi Jesu*

*Lc 6.43-44*

<sup>15</sup> Eropigũ ãgũ werenemopũ erãre:

—Ōaro pee masique. “Goãmũ yare weremũhtarã áhrra,” arĩ gũyarãre peebiricãque mũa. Erã õarire iirã iro dopa aririma mũa pohrogue. Erã pepirigue ñerã áhrrima erã. <sup>16</sup> Erã ñero iicũ ãarã ñerã erã áricũ masirãca mũa. Erã õaro iicũ ãarã, õarã erã áricũ masirãca mũa. Aña poragũ dipatõrre dũcacũbeaa. Poracũdigũ sã higuera dipure dũcacũbeaa. <sup>17</sup> Ōadigũ yucugũ õarire dũcacũa. Ñedigũpũ ñerire dũcacũa. <sup>18</sup> Yucugũ õadigũ ñerire ne dũcacũmasibirica. Eropiro ñedigũ sã õarire dũcacũmasibirica. <sup>19</sup> Ōarire dũcacũbiriri yucũre pa cóãcã, peamegue soecãma. Eropa ta iigũcumĩ Goãmũ ãgũ gamerire iibirãre. <sup>20</sup> Eropirã “Goãmũ yare weremũhtarã áhrra,” arĩrã erã gũyacũ õpa masirãca. Erã iiricũre ãaque. Erã õarire iirã áricũ ãha “Goãmũ ya wereniguirã ta áhrrima,” arĩ ãha masirãca. Erã ñerire iirã áricũ ãha “Goãmũ ya wereniguirã áribeamã. Eropirã gũyarã áhrrima,” arĩ ãha masirãca, arĩ werepũ Jesu.

*“Mũare ne masibeaã,” arĩgũca yũhũ bajarã masare, arĩ wereñumi Jesu*

*Lc 13.25-27*

<sup>21</sup> Eropigũ ãgũ erãre werenemopũ:

—Bajarã yũre “Yũ tĩgũ,” arĩrã áricũquererã ta umaro majagũ Goãmũ ãgũ áricũroguere wasome erã. Yũ Pagũ umaro majagũ ãgũ gamerire iirã dihta ãgũ opũ áricũroguere warãcoma. <sup>22</sup> Pehrerinũ áricũ bajarã masa õpa arĩrãcoma yũre: “Gũa tĩgũ, mũ yare gũa buheabũ. Mũ waĩ mera pũririre, watẽare cóãbũ. Eropirã mũ turari mera baja deyoro moarire iiabũ gũa,” yũre arĩrãcoma. <sup>23</sup> Erã eropa arĩquerecũ õpa arĩ yũhrigũca erãre: “Mũare ne masibeaã. Ñerire iirã áhrra mũa. Yũ pohro aribiricãque,” arĩgũca yũhũ erãre. Eropirã Goãmũ gamerire iique yũ pohro aridiarã, arĩ werepũ Jesu.

*Pe wihi iira queorire wereñumi Jesu*

*Lc 6.47-49; Mr 1.22*

<sup>24</sup> Eropigũ queori mera werepũ Jesu erãre buhegũ:

—Eropi áricũpẽrerã i yũ wereniguirire peenirã yũ dorerire iirã, õaro pee masigũ wihi iidigũ iro dopa áhrrima erã. ãgũ ãhcãri goberire seha, wihire nugunũgapũ. <sup>25</sup> ãgũ wihire ãgũ tuhajara pũhrũ deco bũrigã ahri, dia miritaria wayoro. Miruñe bũrigã weãyoro. Eropa waquerecũ ta iri wihi ãhcãro ãgũ nugura wihi áricũro ne mihrua dijabiriyoro. <sup>26</sup> Eropirã áricũpẽrerã yũ wereniguirire peenirã áricũquererã ta yũ dorerire iibirãpũ pee masibigũ ãgũ wihi iigũ iro dopa áhrrima. ãgũpũ ãgũ wihire dia tũro maja imiporo weca nugu, õaro iibiripũ. <sup>27</sup> ãgũ wihire tuhajara pũhrũ, deco bũrigã ahri, dia miritaria waha, miruñe bũrigã weãyoro. Eropa weãro iri wihire weã mehpicãyoro, arĩ werepũ Jesu.

<sup>28-29</sup> ãgũ eropa arĩ buhecũ peerã, peemaria wañorã masa. “ãgũ marire opũ ãgũ buhero dopa ta buhemĩ ãgũ. Marire buherã iro dopa buhebeamĩ,” arĩ pepiñorã erã.

## 8

*Jesu camĩ boagũre õagũ wasũ iĩñumi*

*Mr 1.40-45; Lc 5.12-16*

<sup>1</sup> Jesu utãgũgue buhe doadigũ dijaa wapũ. ãgũ dijacũ ãarã masa bajarã ãgũre nũrusiañorã. <sup>2</sup> Ero ãgũ wadiro yujugũ camĩ boagũ mague ãgũre nũrusiaja eja, mereja, ãgũre serẽpũ.

—Gua tĩgu, mũhu yũre ðagu iidiagu iique, arĩpu.

<sup>3</sup> Ĩgu eroparĩcũ peegu ĩgu mojoto mera Jesu ĩgũre mohmerĩpu.

—Áu, mũre ðagu wacũ iiaa, arĩpu Jesu ĩgũre.

Ĩgu eroparĩcũ ta iri cami boara yarima wayoro. <sup>4</sup> Eropa iituhaja Jesu ĩgũre arĩpu daja:

—Yũhu mũre ðpa iirare ne gajirãre werebircãque. Mũ ya dũpũre ðarare pahire ĩhmugũ waque, “Ōaro ãhrimi,” arĩdoregu. Tuhajanugu Moise dorerire Goãmũ ĩgu apidiro dopa ta iique. Eropigu Goãmũ ya wihigue mirimagũre asũ wahgã apique mũ dore tarirare masa árĩpehrerã erã masimaja ðaro, arĩpu Jesu.

*Surara opũ ĩgu pohro majagu dorecũcũ Jesu ðagu iĩũmi ĩgũre*

*Lc 7.1-10*

<sup>5</sup> Ero pũhrũ Jesu Capernaum waĩcũri macague ĩgu ejacũ surara opũ ĩgu pohro eja, ĩgũre turaro ðpa arĩ serẽpu:

<sup>6</sup> —Gua tĩgu, yũ pohro majagu ne bũhari mera dorecũgu wamasibirinijagu, ĩgũre bũrigã pũricũ pepigu yaha wihigue oyacumi ĩgu, arĩpu ĩgu Jesure.

<sup>7</sup> Ĩgu eroparĩcũ pee:

—Áu, arĩ, ĩgũre ĩgu dorecũrre taugu wagũra, arĩpu Jesu.

Ĩgu eroparĩcũ ðpa arĩpu surara opũ:

<sup>8-9</sup> —Opũ, ðaroca. Aribita. Ñegu ãhraa yũhu. Yaha wihire mũre ñajaridorebuno árĩbeaa yũhu. Yuju diaye ta mũ turari mera dorebeoque. Mũ eropa iicũ yũ pohro majagu ðagu wagũcumi. Yũre yũ weca árĩrã gajirã oparã dorema. Yũ sã surarapũre dorea. Yujugũre “Waque,” yũ arĩcũ ĩgu wahami. Gajigũre “Arique,” yũ arĩcũ ahrimi. Yũ pohro majagũre “Ire iique,” yũ arĩcũ irire iimi. Eropigu mũ ĩgũre mũ dorero dopa ta ĩgu dorecũgu tarigũcumi, arĩpu ĩgu.

<sup>10</sup> Jesu ĩgu eroparĩcũ pee uca wa bajarã masa ĩgu mera nũrũsuarãre ðpa arĩpu:

—Diaye ta mũare arĩgu iiaa. Ihĩ surara opũ Israe masũ árĩbiriqũregũ Goãmũre bũrigã umupeomi. Ĩgu pohro majagũre yũ ðagu wacũ iiburire masituhami. Ne Israe masare ihĩ iro dopa umupeorãre ĩanibea. <sup>11</sup> Mũare arĩgu iiaa. Bajarã ihĩ iro dopa árĩrã árĩpehrero majarã umaro majagu ĩgu opũ árĩrogue eja, erogue árĩrã mera barãcoma. Mũa ñecũ sũmarã mũra Abrahã, Isaa, Jacobo mera barãcoma erã. <sup>12</sup> Masa gajirãpu “Opũ ĩgu árĩrogue wamorã ãhraa gũa,” erã arĩquerecũ ta ñerogue naitĩarogue cóãgãgũcumi erãre. Erogue ĩgu cóãnirã bũrigã ore, bũjawereri mera erã gũcũrre cũridihurãcoma, arĩ werepu Jesu.

<sup>13</sup> Irire eropa arĩtuhaja surara opũre arĩpu:

—Dujaaque mũ ya wihigue. Mũ pohro majagu tarigũcumi. “Diaye ta tarigũcumi,” arĩ mũ pepidiro dopa ta tarigũcumi, arĩpu Jesu.

Ĩgu eroparĩcũ ta ĩgu pohro majagu pu ðha warũ.

*Pedro mũñecore dorecũgore tauñumi Jesu*

*Mr 1.29-31; Lc 4.38-39*

<sup>14</sup> Pũhrũ Jesu Pedro ya wihigue eja, Pedro mũñeco dorecũcũ ĩaru ĩgu. Nĩmacũri árĩcũ oyapo igo. <sup>15</sup> Igo eropa dorecũcũ ĩanijagu igo mojotore mohmerĩpu. Ĩgu eropa mohmerĩcũ ta nĩmacũri taria wayoro. Taricũ pepigo igopũ wahgã, erãre barire ejopo.

*Jesu bajarã dorecũrãre tauñumi*

*Mr 1.32-34; Lc 4.40-41*

<sup>16</sup> Eropi ñamicague bajarã watẽa ñajasũnirãre masa aĩ ejañorã Jesu pohrogue. Erã eropa aĩ ejacũ ĩagu mata ĩgu watẽare cóãcũ masa ðha wañorã. Eropigu árĩpehrerãre dorecũrãre erã aĩ ejanirãre taupehocãpu Jesu. <sup>17</sup> Eropa ta iipu ĩgu iribojegue majagu Goãmũ yare weremũhtadigu Isaia ĩgu arĩdiro dopa ta. Ōpa arĩ gojañumi: “Mari

dorecurire taucãmi ĩgu. Marire pŭririre cohãmi ĩgu,” arĭ gojañumi Isaia Jesu ariboro coregue.

*Yujurãyeri Jesu mera majarã árĭdiariñuma*

*Lc 9.57-62*

<sup>18</sup> Jesu masa bajarã ĩgu pohro árĭcũ ĩagu,

—Wuariya gajipũ masegue ina taribujarã, arĭpũ ĩgu buherãre. <sup>19</sup> Erã taribujaboro core judio masare buhegu Jesu pohrogu eja, õpa arĭpũ:

—Buhegu, mũ mera wadiaa noho mũ waro, arĭpũ.

<sup>20</sup> Jesu õpa arĭ yũhripũ:

—Yũ mera árĭcũ diasã ãhraa. Nũgu majarã diayea erã carĭburi toreri opama. Mirimagũ porã sã erã ya suhri opama. Yũpũre Goãmũ ĩgu obeodigũpũre ne yaha wihi mara. Eropirã yũ mera árĭrã ñero tarirãca mũa, arĭ yũhripũ Jesu.

<sup>21</sup> Eropi gajigu Jesu buhegu õpa arĭpũ:

—Gũa opũ, yũ pagũ ĩgu sĭricũ yaatuhajagu mũ mera wagũra, arĭpũ ĩgu Jesure.

<sup>22</sup> Jesu yũhripũ:

—Yũre gamebirã sĭrinirã iro dopa ta ãhrima. Erãpũ sĭrinirãre yaaporo. Eropigu mũpũ yũ mera majagu árĭbu arique dohparagã, arĭpũ ĩgu.

*Jesu miruñere yũsũdoreñumi*

*Mr 4.35-41; Lc 8.22-25*

<sup>23</sup> Eropa arĭtuhaja dohodirugue ñajapũ. Eropirã ĩgu buherã sã ĩgu mera waha ñajañorã. <sup>24</sup> Ero erã taribujarisubu iriyague miruñe bũrigã ariyoro. Eropiro pãgũri dohodirure miucãriyoro. Eropa miruñe weãquerecũ ta Jesupũ carĭgu iipũ. <sup>25</sup> Eropa wacũ ĩarã erã ĩgũre wahgũñorã. Wahgũ õpa arĭñorã:

—Opũ, mirimorã iica mari. Miruñere tauque, arĭñorã.

<sup>26</sup> Erã eroparĭcũ Jesu yũhripũ:

—¿Duhpirã gũimaacãri mũa? Yũre merogã umupeorã ãhraa mũa, arĭpũ Jesu erãre.

Eropa arĭgu ta wahgãnũgaja miruñere pãgũri sãre “Yũsũque,” arĭpũ. ĩgu eroparĭcũ miruñe, pãgũri sã yũsũdijapehrea wayoro. <sup>27</sup> ĩgu eropa iicũ ĩha uca, õpa arĭ wereniguiñorã erã basi.

—¿Ñehmũno masũ ãhriri ihĭ? I miruñe, pãgũri sã yũhriũgu ãhrimi, arĭñorã erã.

*Watẽa ñajasũnirãre tauñumi Jesu*

*Mr 5.1-20; Lc 8.26-39*

<sup>28</sup> Erãre eropa wara pũhrũ taribujaja, Gerasa majarã ya yebague ejapũ. Erogue erã ejacũ perã mũa Jesure bocatĩñorã. Masa goberi watopegue árĭnirã árĭñorã. Erã watẽa ñajasũnirã árĭrã gorowererã gũhyarã árĭñorã. Eropirã erogue masa ne wabiriñorã. <sup>29</sup> ĩgũre bocatĩri õpa arĭ gaguiniguiñorã:

—¿Mũhũ Goãmũ magũ duhpibu ahriri mũhũ gũa pohroguere? ¿Gũare Goãmũ dorero ejabiriquerecũ ta dipuwaja moagu ahriri mũhũ? arĭ gaguiniguiñorã erã watẽa mera.

<sup>30</sup> Ero pohro bajarã yesea ahma barã iiñorã. <sup>31</sup> Erãre ĩanijarã, watẽapũ õpa arĭ bũrigã serẽñorã Jesure:

—Gũare oã mũmare cóãgu soã yesea pohroguere wadoreque gũare. Erã mera gũare árĭdoreque, arĭ serẽñorã erã Jesure.

<sup>32</sup> —Áũ, waque, arĭpũ Jesu.

Ĩgu eroparĭcũ watẽa perã masa mera árĭnirã waha, yesea pohroguere ejañorã. Erãre ñajacũ ta yesea gorowere, dipaturũgue oma buha, wuariyague yuriñaja yuhria, miri sĭripehrea wañorã.

<sup>33</sup> Erã eropa wacũ ïarã yeseare ïhadiburãpũ gũi, omagã wañorã. Macague eja yesea erã mirirare weresiripehocãñorã erã. Watëa erã ñajasũnirãre Jesu ïgũ cóãra sãre werepehocãñorã erã. <sup>34</sup> Erã eropa weresirira pũhrũ iri maca majarã árĩpehrerã Jesure ïarã ejañorã. Eropirã ïgũre ïara pũhrũ turaro mera wiriadoreñorã ïgũre erã ya yebare.

## 9

### *Dũpũ buhadigũre ðagũ wacũ iĩñumi Jesu*

*Mr 2.1-12; Lc 5.17-26*

<sup>1</sup> Erã eropa wadorera pũhrũ Jesu dohodirugue ñaja, wũariyague taribujaa, ïgũ ya macague ejarũ. <sup>2</sup> Erogue gajirã dũpũ buhadigũre pũgũ mera coã aĩ wahgã erañorã Jesu pohro. “Jesu ïre ïgũ dorecũrre taricũ iigũcumĩ,” arĩ pepiñorã erã. Erã eropa arĩ pepicũ masigũ Jesu dorecũgũre ðpa arĩpũ:

—Mucubirique mũhũ. Mũ ñero iirare cóãtuhabu yũhũ, arĩpũ ïgũ.

<sup>3</sup> ïgũ eroparĩcũ peerã yujurãyeri masare buherã ðpa arĩ pepiriñorã erã basi: “Ihĩ eropa arĩ ïgũ werenigũiri mera Goãmũre ñero arĩgũ iimi,” arĩ pepiñorã erã buherã.

<sup>4</sup> Erã eropa arĩ pepicũ masigũ, ðpa arĩpũ Jesupũ:

—¿Duhpirã eropa arĩ ñero pepiri mũa? <sup>5</sup> “Mũ ñero iirare cóãbũ,” yũ arĩcũ “Gũyagu ãhrimi,” arãa mũa masibiriquererã ta. ïgũre “Wahgãñugajaque. Curique,” yũ arĩcũ yũ arĩra diaye árĩri arĩcũ mata mũa ïha masirãca. <sup>6</sup> Yũhũ masũ Goãmũ ïgũ obeodigũ i yeba majarã erã ñero iirire cóãmasia yũhũ. Mũa ire masiborore ðpa ta ïgũ wahgãñugacũ iigũra, arĩpũ Jesu.

Eropa arĩtuhaja dũpũ buhadigũre ðpa arĩpũ:

—Wahgãñugajaque. Mũ pũgũre aĩ, mũ ya wihigue dujaaque, arĩpũ ïgũre.

<sup>7</sup> ïgũ eroparĩcũ ta peegu dũpũ buhadigũ wahgãñugaja, ïgũ ya wihigue dujaa warũ.

<sup>8</sup> Masa ïgũ eropa wacũ ïarã gũiñorã. Eropirã Jesure Goãmũ ïgũ turarire opacũ ïarã Goãmũre umupeo, ðaro werenigũiñorã.

### *Jesu Mateore sihuñumi*

*Mr 2.13-17; Lc 5.27-32*

<sup>9</sup> Erã eropa iira pũhrũ Jesu erogue árĩdigũ wiria, yũre Mateore bocatĩrimi. Oparã ya árĩburire masare wajasea coregũ árĩribũ. Eropigũ irisubure yũ mohmeri taribugue doabũ. Ero yũ doacũ ïagũ, ðpa arĩmi yũre:

—Yũ mera majagũ árĩbu arique, arĩmi yũre Jesu.

ïgũ eroparĩcũ pee, wahgãñugaja ïgũ mera wabũ.

<sup>10</sup> Pũhrũ yaha wihigue Jesu sã barã erama. Bajarã wajasea corerã “ñero iirã” erã arĩrã gũa mera ta bama. <sup>11</sup> Erã mera gũa bacũ ïarã, fariseo masa Jesu buherãre ðpa arĩma:

—¿Duhpigũ mũare buhegũ wajasea corerã ñero iirã mera bahari? arĩma erã gũare ïgũ buherãre.

<sup>12-13</sup> Erã eroparĩcũ peegu Jesupũ ðpa queori mera yũhrimi:

—Dorecũbirã duhturure amabeama. Dorecũrã dihta duhturure ahmaña. Dorecũrã duhturu amaro dopa ta “Ñerã ãhraa,” arĩrã yũre amarãcoma. Eropigũ “Ñerã ãhraa,” arĩrã dihtare erã ñero iirare bujaweredore ðaripũre gohrotocũ iigũ aribũ yũhũ. Erã basi “Ëarã ãhraa gũa,” arĩ pepirãre itamugũ aribiribũ. Goãmũ ïgũ arĩrãre erã arĩ gojarare masique mũa. “Waimũrãre wejẽ soemujurã yũre eropa umupeocũ ne gamebeaa. Gajirãre mũa mojomoro ïacũpũre gahmea,” arĩmi Goãmũ, arĩ gojañumi. I eropa arĩrãre masique mũa. Iirire ðaro buhenemorã waque, arĩmi Jesu fariseo masare.

### *Ba duhurire serẽpiñuma Ñũ buherã Jesure*

*Mr 2.18-22; Lc 5.33-39*

14 Pũhrũ Ñũ waĩyegũ ĩgũ buherã gũa pohro eja Jesure serẽpima:

—Gũa Ñũ buherãpũ bajasuburi Goãmũ ya árĩburire iirã ba duhua. Fariseo masa sã eropa ta ba duhuma. ¿Duhpirã mũ buherãpũ ba duhubeari? arĩma erã Jesure.

15 Jesu erãre õpa arĩ yũhrimi:

—Õpa ãhraa iri: Mojoto diridigũ ĩgũ bosenu iicũ ĩgũ mera majarã bũjawererã ba duhurã árĩbeama. ĩgũ mera árĩrã mucubiri barã iima. Eropa ta yũ buherã sã yũ mera árĩrã ba duhumasibeama. Yujunũ yũre Goãmũ aĩcãgũcumi. Eropa ĩgũ yũre aĩra pũhrũ yũ buherã mera árĩsome yũhũ. Irisubugue ta yũ buherã ba duhurãcoma, arĩ yũhrimi Jesu.

16 Erã iribojegue maja buheri mama buheri mera erã peñe buhemorediacũ ĩagu õpa arĩ werenemomi Jesu erãre:

—Ne mama gasiro suhri gasiro mera mũrañe suhrirore seretu masiya mara. Eropa seretura pũhrũ mama gasiro mari coecũ mũra suhriro árĩro yehguea wa daja, tara gameneo, wũatariaro yehgueacũ iiaa. Eropa ta mũra buheri mama buheri mera wapi moa buhebiricãro gahmea. 17 Eropirã ne igui deco imisĩri decore waibũgũ gasiro ajuro mũra ajuro mera diyebiricãro gahmea. Eropiicũ igui deco imisĩri pahmura pũhrũ mũra ajurore yeguedija wahaa. Iri ajuro yehguecũ igui deco sã, ajuro sã cohmoa wahaa. Eropirã igui deco waibũgũ gasiro mama ajuro mera diyero gahmea. Eropiicũ igui deco pahmuro õaro iri ajuro sãraa. Eropa ta mama buheri mũra buheri mera buhebiricãro gahmea, arĩ weremi Jesu erãre.

*Jairo magore õago ii, behreri opaniguigo sãre õago wacũ iĩnumi Jesu  
Mr 5.21-43; Lc 8.40-56*

18 ĩgũ eropa arĩ wererisubu gũa judio masa buheri wihi opũ Jesu pohrogue erami. Eraa, mereja, õpa arĩmi:

—Yũ mago negãgue sĩria wahámo. Igore mũ mojotore duhpeogũ arique. Mũ eropa iicũ masagocumo, arĩmi ĩgũ Jesure.

19 ĩgũ eroparĩcũ peegũ Jesu wahgãnũgaja, ĩgũ mera wami. Gũa ĩgũ buherã sã ĩgũ mera wabũ. 20 Gũa erogue waniguicũ ero nomeo Jesu pũrũpũ eja, ĩgũ suhriro ojogorore mohmepiñamo. Doce bojori gohra mũmũri nũcũ behreniguigo árĩpo. 21 Õpa arĩ pepipo igo eropa iigo: “Ĩgũ suhriro dihtare mohmepiñago õago dujagoca yũhũ,” arĩ pepipo igo. Eropigo igo mohmepicũ mata igo di wirira purumujuyoro. 22 Igo eropa iicũ masigũ Jesu majinũgaja, igore arĩmi:

—Mucubirique mũhũ. Mũhũ yũre umupeori mera õago dujaa, arĩmi ĩgũ.

Ĩgũ eroparĩcũ ta õha wamo igo.

23 Eropa iituhaja Jesu gũa mera opũ ya wihigue ejami sĩridigo pohro. Ñajajagũ bajarã masa i wihigue árĩrã turaro bũsucũ ĩami. Gajirã ñehamere orerãre gaguiniguirãre ĩami. Gajirã igogãre yaaboro core tarisu iro dopa árĩrire purirãre ĩami. 24 Erã eropa iicũ ĩagũ masare õpa arĩmi:

—Wiriaque mũa. Sĩribeamo igo. Carĩgo iimo, arĩmi erãre.

Ĩgũ eroparĩcũ peerã, “Eroparĩcãgũ iimi ihĩ,” arĩrã masa ĩayema ĩgũre. 25 ĩgũpũ erãre disiporogue wiupehocãmi. Tuhajanugu sĩridigo pohrogue eja, igo mojotore ñeapũ. ĩgũ eropa ñeañacũ ta masa bejaja, wahgãnũgajapo igo. 26 ĩgũ eropa iirare peerã, ero majarã masa árĩpehrerã masa werewũañorã.

*Perã cuiri ĩhajabirãre ĩacũ iĩnumi Jesu*

27 Ero árĩnirã gũa Jesu mera wacũ, perã cuiri ĩhajabirã ĩgũre piyu nũrũsiamã:

—Opũ Davi pãrami masare taugũ, gũare mojomoro ĩaque mũhũ, arĩ gaguiniguima erã.



<sup>28</sup> Erã eroparĩcũ Jesu gaji wihigue ñajami. Īgu eropa ñajacũ masirã cuiri ĩhajabirã ĩgu pohroque ñaja wama. Erã eropa ñajacũ ĩagu ĩgũpũ erãre serẽpimi:

—¿Marire ĩacũ iigũcumi ĩgu, arĩ pepiri mũa yũre? arĩmi ĩgu.

—Opũ, eropa ta arĩ pepia gũa, arĩ yũhrima erã.

<sup>29</sup> Erã eropa yũhricũ ta erã cuirire ñapeomi. Ñapeogu, õpa arĩmi:

—Yũre “Eropa iigũcumi,” mũa arĩ pepidiro dopa ta eropa ta iigũra, arĩmi Jesu.

<sup>30</sup> Īgu eroparĩcũ ta erã cuiri õha wabũ. Eropi Jesu õpa arĩmi erãre:

—I yũ õpa iirare gajirãre ne werebircãque, arĩrimi Jesu.

<sup>31</sup> Īgu eropa arĩquerecũ ta waha, i yeba majarãre weresirinirã árĩma ĩgu eropa iirare erã.

### *Wereniguimasibigure wereniguicũ iĩnumi Jesu*

<sup>32</sup> Iri wihire erã cuiri õha wanirã wiriarisubu gohra yujugu wereniguimasibigure aĩgãrima Jesu pohro masa. Watĩ ĩgũre ñajasũdigũ ĩgũre wereniguimasibiricũ iidi árĩmi. <sup>33</sup> Erã aĩ ejacũ ĩagu watĩre Jesu cóãmi. Īgu eropa watĩre cóãcũ wereniguimasibiridigũpũ wereniguia wami. Īgu eropa iicũ ĩarã árĩpehrerã ĩhamaria wama.

—Ne i yeba Israe yebaguere õpa iirãre ĩabirimũrabũ mari, arĩ wereniguima masa erã basi.

<sup>34</sup> Fariseo masa gajiropa arĩ wereniguima:

—Watẽa opũ ĩgu turari mera watẽare cohãmi ihĩ, arĩ wereniguima erã.

### *Masare mojomoro ĩañumi Jesu*

<sup>35</sup> Eropi árĩpehreri macari ero árĩri macarire, paga macari sãre buhe curigũ wami Jesu gũa mera. Ōari buherire erã buheri wirigue buhegu wami ĩgu. Eropigũ Goãmũ ĩgu opũ árĩborore weremi. Árĩpehreri dorecũri sãre ero majarãre taumi ĩgu. <sup>36</sup> Erã masa bajarã ñero tarirã, itamuri moorã, oveja dibuya marirã iro dopa erã árĩcũ ĩapũ Jesu erãre. Eropa ĩagu Jesu erãre mojomoro ĩami. <sup>37</sup> Eropigũ õpa arĩmi ĩgu gũare ĩgu buherãre:

—Ojodũca baja iri bugatuhajacũ baja árĩcũ mohmeri wũaro ãhraa. Mohmeri masapũ bajamerãgã ãhrima. Eropa ta õari buherire peemorã bajarã árĩcũ wũaro ãhraa mari mohmeri. Iri eropa arĩquerecũ ta mari masare buhemorã bajamerãgã ãhraa. <sup>38</sup> Eropirã õari buherire buhemorãre gajirãre ĩgu obeomorãre serẽque Goãmũre mũa, arĩmi Jesu gũare.

## 10

### *Jesu doce gohra beyeñumi ĩgu buhedoregu obeomorãre*

*Mr 3.13-19; Lc 6.12-16*

<sup>1</sup> Pũhrũ doce gũare ĩgu buherãre Jesu sihubeo, turarire omi gũare. Watẽare gũa cóãmasiburire, árĩpehreri dorere gũa taumasiburire omi gũare.

<sup>2</sup> Ōpa waĩcurã árĩbũ gũa Jesu ĩgu apinirã: Simo árĩmi. Īgũre ta Pedro arĩ piyumi Jesu. Simo pagũ magũ Andre árĩmi. Santiago ĩgu pagũ magũ Ñu mera árĩmi. Erã pagũ Zebedeo waĩcumi. <sup>3</sup> Felipe, Bartolomé, Toma, yũhũ Mateo árĩbũ gũa. Yũpũ oparã ya árĩburire masare wajaseabasa coredigũ árĩribũ. Gũa mera gajigũ Santiago árĩmi. Īgu Alfeo magũ árĩmi. Eropigũ Lebéo sã árĩmi. Īgũpũ Tadeo erã arĩ piyudigũ árĩmi ĩgu. <sup>4</sup> Simo celote ya curu majagũ, Juda Iscariote sã árĩma. Judapũ Jesure ĩhaturirãre ĩhmubu árĩmi.

### *Jesu ĩgu buherãre buhedoregu obeoñumi*

*Mr 6.7-13; Lc 9.1-6*

<sup>5</sup> Eropi gũare ĩgu buherãre docere obeogu, “Ōpa iique,” arĩ wereseremi gũare:

—Judio masa árībirā pohroguere wabiricāque. Ne Samaria yeba maja macarigue sāre wabiricāque. <sup>6</sup> Israe yeba majarā pohroguere waque. Goāmure masibirā āhrima erā. <sup>7</sup> “Ūmaro majagu opu árīboro merogā duhyaa,” arī buheque erāre. <sup>8</sup> Eropirā cami boarāre, gaji baja gajiropa árīri dore oparā sāre ōarā wacū iique. Sīrinirāre masuque. Watēa ñajasūnirāre cohā wiuque erā watēare. Mūare iri turarire ogu iiaa. Eropirā mūa sã yu eropa odirō dopa ta masare wajasearo mariro ōarā wacū eropa iicāque.

<sup>9</sup> “Mūa warā ne niyerure aībiricāque. <sup>10</sup> Ne mūa ajure, ne peñe camisare, ne peba zapaturi sāre aīgābiricāque. Mūa buheroguerē ero majarāpū mūare barire oporo.

<sup>11</sup> “Iri macariguere ejarā, mūa carīborore masa ōaro umupeogu pohroguē amaque. Eropirā īgu ya wihi ta dujanique. Ne warāguē wiriaque iri wihire. <sup>12</sup> Eropirā wihigūe ñajarā “Āhriri,” arīque iri wihi majarāre. <sup>13</sup> Mūare erā gamecū, “Goāmū mera ōaro árīque mūa,” arīque erāre. Mūare erā gamebiricū, “Goāmū mera ōaro árīque,” mūa arībiricāque erāre. <sup>14</sup> Eropirā mūare erā gamebiricū, erā mūa buherire peediabiricū ĩarā iri wihire wiria waque. Eropa wiriarā, guburi maja nicure moje siripique erā ĩaro, erā ya dipuwajare ĩhmumorā. Iri maca majarā mūare gamebiricū eropa ta iique erā sāre. <sup>15</sup> Diaye ta mūare arīgu tiiaa. I ūmū pehrecūguere Sodoma majarā Gomorra majarā mūra būrigā dipuwajacūrācoma. Erā eropa dipuwajacūro tauro mūare gamebirāpū dipuwajacūrācoma. arī weremi Jesu guare.

### *Jesu yarāre gajirā erā ñero ĩborore wereñumi Jesu*

Eropa arītuha ōpa arīnemomi guare īgu buherāre:

<sup>16</sup> —Yūre peeque mūa. Oveja iro dopa árīrāre mūare yea guarā iro dopa ta ñerā árīrā watopegue obeogu iiaa. Eropirā mūapū ōaro pee masirā árīque. Eropirā gariboro mariro ōaro árīque erā mera. <sup>17</sup> Ōaro iique mūa. Masa mūare erā oparāre orācoma mūare dipuwaja moadorerā. Erā buheri wirigūe sāre parācoma mūare. <sup>18</sup> Eropirā mūa yaharā mūa árīri dipuwaja macari majarā oparā pohroguē erā tauro oparā pohroguē sāre aīgārācoma mūare dipuwaja moadoremorā. Eropirā mūare erogūe erā aīgācū judio masa árībirā oparā sāre ōari buherire wererāca mūa. <sup>19-20</sup> Mūare oparā pohroguē erā aīgācū erāre mūa werenigūiburire wūaro pepibiricāque. Mūare erā serēpicū ta mūa erāre yūhriburire masirāca Goāmū mera. Eropa masirā mūa irire mūa gamero werenigūisome. Goāmūpū mari Pagū īgu Espīritu Santo mera mūare werenigūicū iigūcumi.

<sup>21</sup> “Īrisubure erā tīrā erā pagū porā Jesu yarā árīcū ĩha wejēdore wiarācoma oparāre. Erā pagū sūmarā erā porā Jesu yarā erā árīcū ĩha wejēdore wiarācoma oparāre. Erā porāpū erā pagū sūmarā erā Jesu yarā erā árīcū ĩha wejēdore wiarācoma oparāre. <sup>22</sup> Eropirā masa árīpehrerā yūre mūa umupeora dipuwaja ĩhaturirācoma mūare. Erā mūare erā ñero ĩiquerēcū ta mūare erā ñero ĩirare yujuro bojerā yūre duhubiricū Goāmū mūare taugūcumi. Eropigū īgu pohroguē mūare opagūcumi. <sup>23</sup> Yuju maca mūare erā ñero ĩicū gaji macague duhri wahgāque. Diaye ta mūare arīgu tiiaa. Israe yeba árīri macarire mūa buhepehoboro core, yūhū masū Goāmū īgu obeodigū i yebague dujarigūra.

<sup>24</sup> “Buherā erāre buheguere masi taribema. Eropigū pohro majagu sã īgu opu weca árībeami. <sup>25</sup> Yujugū buheguere īguere weredigū iro dopa dujaro gahmemi īgu. Pohro majagu sāre īgu opu iro dopa ta dujami. Mūapū yu buherā āhraa. Eropirā yūre ĩidiro dopa ta mūa sāre ĩirācoma. Eropirā yūre “Watī Beelzebú āhrimi,” arī weresārā, mūa sāre yaharāre ñero arī werenigūirācoma erā, arī weremi Jesu guare.

### *¿Nihinore güicū ōhari? arī wereñumi Jesu*

*Lc 12.2-7*

<sup>26</sup> Eropa arīra pūhrū Jesu ōpa arīnemomi guare:



—Eropirã mware erã ñero iidiarãre güibiricãque. Masa erã yayasãrare pũhru gajirã masirãcoma. Erã dibura sãre gajirã masirãcoma. <sup>27</sup> Eropirã mware yayarogã yũ wererare bajarã masa watope wereturiaque mwarũ. <sup>28</sup> Mware wejẽrã mwa dũpũ dihtare wejẽmasima. Mwa sĩporãpũ sĩribeaa. Eropirã mware wejẽdiarãre güibiricãque. Goãmũpũre güique. Īgũ mwa dũpũ mwa sĩporãri sãre peamegue dedeomasimi mware. Eropirã ĩgũpũre güique.

<sup>29</sup> “Perã mirua wajamarima. Erã eropa wajamariquerecũ ta Goãmũ õaro mahi ĩhadibumi erãgãre. Goãmũ dorebiricũ ne sĩribeamĩ yujugũgã. <sup>30</sup> Eropigũ mwa poarire ne yuju poadagã dũhyaro mariro masipehomi Goãmũ. Eropa ta mwa árĩricũri sãre masipehomi Goãmũ. Eropa masigũ mware ĩhadibuniguicãmi. <sup>31</sup> Miruare ĩgũ ĩhadiburo tauro mwarũpũre ĩhadibumi Goãmũ. Eropirã wũaro bũjawere guñaricũbiricãque mwa, arĩ weremi Jesu.

*Jesure mwa umupeorire wereque masare, arĩ wereñumi*

*Lc 12.8-9*

<sup>32</sup> Eropigũ gua sãre werenemomi:

—Yujugũ “Jesucristo yagũ ãhraa,” masare ĩgũ arĩ werecũ yũ sã ĩgũre “Yahagũ ãhrimi,” arĩ weregũra yũ Pagũ umaro majagũguere. <sup>33</sup> Yujugũ masare güigũ “Jesucristo yagũ árĩbeaa,” masare ĩgũ arĩ werecũ yũ sã “Yahagũ árĩbeami ĩgũ,” arĩ weregũra yũ Pagũguere umaro majagũguere, arĩ weremi Jesu.

*Jesu yũ buhecũ masa erã basi game dũca warirãcoma, arĩ wereñumi*

*Lc 12.51-53; 14.26-27*

<sup>34</sup> Eropa arĩtuhaja õpa werenemomi masare:

—¿Dohpa arĩ pepiri mwa yũre? ¿Yũhũ masare yũ buhegu aricũ yũ buheri mera masa ĩhaturisome, arĩ pepiri mwa? Eropa árĩbeaa. Masa yũ buherire peerã pe curu erã basi dũca warirãcoma. Yujurãyeri yũ buherire peerãcoma. Gajirãpũ irire gamebirã erãre ĩhaturirãcoma. Eropirã yujuro mera árĩsome masa. <sup>35</sup> Mũrã yũ buherire erã peera dipuwaja erã porã erãre ĩhaturirãcoma. Mũrã nome erã yũ buherire peera dipuwaja erã porã nome erãre ĩhaturirãcoma. Erã mũnecosã nome yũ buherire erã peera dipuwaja erã beposã nome erãre ĩhaturirãcoma. <sup>36</sup> Eropirã masa erã acawererãre yũ buherire peecũ ĩarã erãre ĩhaturirã árĩrãcoma.

<sup>37</sup> “Yũre erã mahibodiro tauro erã pagũ sumarãpũre mahitarinũgarã yaharã árĩsome erã. Yũre erã mahiborono tauro erã porãpũre mahitarinũgarã yaharã árĩsome erã. <sup>38</sup> Eropirã crusague yũ sĩridiro dopa ta yaharã erã árĩra waja ñero tarirãcoma erã sã. Eropa ñero taridiabirã yaharã árĩsome. <sup>39</sup> Masa yũre guũaro mariro erã gamero iirã peamegue warãcoma erã. Yaha árĩburipũre erã guũarã árĩpehrerĩnũri Goãmũ mera õaro árĩniguicãrãcoma, arĩ weremi Jesu.

*Mari wajataburire wereñumi Jesu*

*Mr 9.41*

<sup>40</sup> Eropa arĩtuhaja õpa werenemomi gua sãre:

—Mware yaharãre yujugũ õaro mera bocatĩrigũ, yũ sãre bocatĩrigũ iimi ĩgũ. Eropigũ yũre õaro bocatĩrigũ yũre obeodigũ sãre bocatĩrigũ iimi. <sup>41</sup> Eropigũ Goãmũ yare weredigũ wajatagũcumĩ. ĩgũre õaro iigũcumĩ Goãmũ. Eropigũ ĩgũ yahare ĩgũ weregũ árĩcũ ĩagũ yujugũ ĩgũre õaro bocatĩrigũ weredigũ iro dopa ta wajatagũcumĩ ĩgũ sã. Eropi gajigũ õaro iidigũ wajatagũcumĩ. Eropigũ ĩgũ õaro iigũ ĩgũ árĩcũ ĩagũ yujugũ ĩgũre õaro bocatĩrigũ õaro iidigũ dopa wajatagũcumĩ ĩgũ sã. <sup>42</sup> “Jesu yagũgã ta ãhrimi,” mwa arĩ ĩarã ĩgũgãre itamudiarã deco yũsari mera dihta tĩaquerecũ, diaye ta mwa sãre õaro iigũcumĩ Goãmũ, arĩ weremi Jesu.

# 11

*Ñu waīyegũ ĩgũ buherãre Jesure serēpidoregũ obeoñumi*

*Lc 7.18-35*

<sup>1</sup> Gũare ĩgũ buherãre ĩgũ eropa arĩ werera pũhrũ ero pohro árĩri macarigue buhegũ waha wami ĩgũ.

<sup>2</sup> Eropigũ Ñu peresugue árĩgũ Jesu ĩgũ iiricũrire peebeopũ. Eropa peegũ Ñu ĩgũ buherãre Jesure serēpidoregũ obeopũ. <sup>3</sup> Eropirã gũa pohrogue eja, Jesure serēpima erã Ñu buherã.

—Ñu õpa arĩ serēpidoreami mũre: “ ‘¿Yũ pũhrũ gajigũ ĩgũ arigũcumĩ,’ yũ eropa arĩdigũ ta ãhriri mũhũ? ¿O gajigũre corerãcuri gũa?” arĩ serēpi doreami Ñu, arĩma erã Jesure.

<sup>4</sup> Erã eroparĩcũ peegũ Jesu yũhrimi:

—Dohpague mũa peerare, mũa ĩarare Ñure wererã waque. <sup>5</sup> Õpa arĩque: “Jesu mera cuiri ĩhajabirã ĩhama. Curimasibirã cuhrima. Cami boanirã õarã wahama. Peejabirinirã peea wahama. Sĩrinirã masa wahama,” arĩ wereque. Eropirãmojomorocũrãre õari buherire yũ wererare wereque ĩgũre. Eropa arĩ weretuhaja õpa arĩ wereque Ñure. <sup>6</sup> “Yũre peegũ ‘Diaye ta ãhraa,’ arĩgũ ĩgũ mucubirigũ ãhrimi,” arãmi Jesu, arĩ, Ñure wererã waque, arĩmi Jesu.

<sup>7</sup> Ñu buherã erã wara pũhrũ, Jesu Ñu árĩricũrire werenũgami masa bajarãre.

—Masa marirogue Ñu pohrogue warã ero majare taare miru weãcũ ĩarã ejabiribu mũa. <sup>8</sup> Õari suhricũgũ sãre ĩabiribu mũa. Õari suhricũrã oparã ya wirigue ãhrima. <sup>9</sup> Masa marirogue ejarã Goãmũ yare weremũhtadigũpũre ĩarã ejabũ mũa. Diaye ta Ñu Goãmũ yare weremũhtagũ ãhrimi. Gajirã Goãmũ yare weremũhtanirã tauro árĩgũ ãhrimi Ñupũ. <sup>10</sup> Iribojegue Goãmũ yare erã gojarapũ õpa arĩ wereyuyoro Ñure. Mari Pagũ ĩgũ magũre õpa arĩpũ. “Mũ core mũre wereyubure obeogũ iiaa,” arĩmi Goãmũ, arĩ gojañuma Ñure.

<sup>11</sup> Mũare diaye ta arĩgũ iiaa. Masa árĩpehrerã tauro ãhrimi Ñu waīyegũ. Irisubure ĩgũ eropa arĩquerecũ ta mũmaroguerẽ Goãmũ ĩgũ opũ árĩroguere árĩpehrerã docanũgagũpũ Ñu tauro árĩgũcumĩ.

<sup>12-13</sup> “Ñu waīyegũ ĩgũ eraboro core Moisere ĩgũ apira doreri mera Goãmũ marire doremi. Goãmũ ya weremũhtanirã mũra erã gojara sã eropa ta árĩribũ marire dorera. Dohpaguepũre Ñu õari buherire, Goãmũ opũ ĩgũ árĩrire buhemi. ĩgũ eropa buhecũ pee masa erã ejatuharo erã turari mera Goãmũ erã opũ árĩcũ burigã gahmema.

<sup>14</sup> “Elia arigũcumĩ,” iribojegue erã arĩdigũ ta Ñupũ ãhrimi. “Iribojegue majarã erã arĩrare diaye ta ãhraa,” arĩdiarã Ñu ĩgũ erã eropa arĩdigũ árĩcũ masirãca mũa.

<sup>15</sup> Õaro peeque mũa ire, arĩmi Jesu.

<sup>16</sup> Eropigũ õpa arĩnemomi masare:

—¿Mũa dohpague majarã masa ñehmarano iro dopa ãhriri mũa pepicũ? Mũa majirã iiro dopa õpa ãhraa. Doberi duarogue bira doarã, õpa arĩ dũyasoma erãgã erã basi: <sup>17</sup> “Mũa bayaburire tarisu purirabũ gũa. ¿Duhpirã mũa mucubiri bayarã aribirari? Eropirã gũa burigã ñehamere orerabũ. ¿Mũapũ duhpirã gũa mera orebirari?” arĩma dũyasorã. Erã majirã arĩ dũyasorã iro dopa ta iirã õpa iiaa mũa dohpague majarã. <sup>18</sup> Ñu waīyegũ Goãmũ ya árĩburire ba duhugũ vinore ihribirimi. ĩgũ eropa ihribiricũ ĩarã “Pee masibigũ ãhrimi,” arĩribũ mũa ĩgũre. <sup>19</sup> Yũpũ masũ Goãmũ ĩgũ obeodigũ árĩgũ yũhũ baha, ihria. Yũ eropa iicũ ĩarã õpa arãa mũa yũpũre. “Īaque. Ihĩ wũaro bagũ, merericũgũ sã ãhrimi. Wajasea corerã ñero iirã erã waricũgũ ãhrimi ĩgũ,” arãa mũa yũre. Mũa gamero dopa gũa iibiricũ ero wabeaa

mũare. Mũa masibiriquererã ta gũa iirare ãarã, Goãmũa masirire gũa opacũ masirãca mũa, arĩmi Jesu erãre.

*Iri macari majarãre turiñumi Jesu erã ñerire bũjawerebiricũ ãagũa*

*Lc 10.13-15*

<sup>20</sup> Pũhrũa ero maja macari majarãre turipũa Jesu. Iri macarire gaji macari sãre Goãmũa turari mera tauro deyro moarire ii ãhmudi arĩrimi ãgũa. ãgũa eropa ii ãhmuquerecũ ta erã ñero iirire duhubirinirã arĩma erã. Eropigũa erãre õpa arĩpũa ãgũa.

<sup>21</sup> —Corazín maca majarã mũa ñero tarirãca. Betsaida majarã mũa sã ñero tarirãca. Mũa ya macaguere yũhũa Goãmũa turari mera deyro moarire iirabũa. Mũa peebirabũa. Iribojegue Tiro waĩcũri macare, Sidón waĩcũri maca sãre yũ deyro moarire yũ iicũ ãarã ero majarãpũa erã ñerire bũjawereboañuma. Eropa iirã õaripũre gohrotoboañuma. Bũjawererã bũjawereri suhrire saña, erã basi peame witũ mera mohsiripeoboañuma erã ñero iirare bũjawere ãhmumorã. Mũapũa eropa iibeaa. <sup>22</sup> Eropigũa mũare arĩgũa tiaa. Dipuwaja moarinũa arĩcũ, Goãmũa Tiro majarã mũra, Sidón majarã mũra tauro ñerã mũa arĩri waja mũare ñero gohra dipuwaja moagũcumi ãgũa. <sup>23</sup> Mũa Capernaum majarã, mũa ejatuharo Goãmũa pohrogue wadiarabũa. Mũa Goãmũa yare iidiabiricũ mũare Goãmũa peamegue cóãgũcumi. Mũa ya macague Goãmũa turari mera deyro moarire ii ãhmurabũa. Mũa yũre peebirabũa. Iribojegue Sodoma waĩcũri macare deyro moarire yũ eropa iicũ iri macapũa dohpaguere arĩboca. <sup>24</sup> Eropigũa mũare arĩgũa tiaa. Dipuwaja moarinũa arĩcũ Goãmũa Sodoma maca majarã mũra tauro, mũapũre mũa ñeri dipuwaja dipuwaja moagũcumi, arĩpũa Jesu iri macari majarãre.

*Yũ pohrogue soorã arique, arĩñumi Jesu*

*Lc 10.21-22*

<sup>25</sup> Irisubu ãgũa Pagũa mera wereniguigũa õpa arĩmi Jesu.

—Ahũa, mũhũa mũmaro majarã tauro opũa, i yeba majarã tauro opũa ãhraa. I mũ buherire “Masituhaja gũa,” arĩrãre masicũ iibeaa. Mũa yare masipehobirãpũre masicũ iiabũa mũhũa. Mũhũa eropa iicũ “Õhaa,” arãa yũhũa mũre. <sup>26</sup> Eropa ta ãhraa, Ahũa. Erã masibirãpũre erã masicũ gahmeabũa mũhũa, arĩmi Jesu ãgũa Pagũre.

<sup>27</sup> Eropigũa masare gũa sãre õpa arĩ werenemomi:

—Yũ Pagũa arĩpehreri yũ iiborore apimi yũre. ãgũa dihta yũre õaro masimi. Yũ sã ãgũre masia. Yũ beyenirã sã ãgũre masima yũ ãgũre masidorerã arĩrã. Erã nũcũ ta yũ Pagũre masia gũa. <sup>28</sup> Goãmũa mera õaro arĩdiarã baja dorerire iiraa mũa. Iri doreri nũcũrire omaro iro dopa ta ãhraa. Eropirã gariborea wahaa mũa iri dorerire iirã. Eropa gariborerã yũre serẽque. Mũare soocũ iigũra. <sup>29</sup> Yũhũa pũriro mera doregũa arĩbeaa. Nijiyajaro doregũa ãhraa. Eropirã yũ doreripũre iique. Eropa iirã dipuwaja marirã õaro arĩrãca mũa. <sup>30</sup> Eropiro yũ itamuri mera yahare iicũ diasabeaa. Eropirã yũ dorerire iirã nũcũrire pepiro mariro õaro arĩrãca, arĩmi Jesu.

## 12

*Judio masa erã soorinũa arĩcũ trigo pororire turĩñuma Jesu buherã*

*Mr 2.23-28; Lc 6.1-5*

<sup>1</sup> Merogã ãgũa eropa arĩ buhera pũhrũa Sabado arĩcũ gũa Jesu mera trigo otera pohegue ãha tariabũa. Erogue tariarã gũa ãgũa buherã oaboarã, trigo pororire turĩ aĩ babũa gũa. <sup>2</sup> Gũa eropa iicũ ãarã, fariseo masa Jesure õpa arĩma:

—Peenique gũare. ¿Duhpirã erã mari soorinũa arĩquerecũ ta mohmeri? Mari dorerire tarinũgarã iima erã, arĩma erã.

3-4 Erã eroparĩcũ peegu Jesu “Yũ buherã tarinũgarã iibeama,” arĩgu õpa arĩmi erãre:

—Iribojegue Davi ĩgu mera majarã mera oaboagu Goãmu ya wihigue ñaja, iri wihi árĩri panre bañumi ĩgu mera majarã mera. Iri pan pahia dihtare badorera árĩyoro. Goãmu doreri gajirãre iri panre badorebiriyo. ¿Davi irire ĩgu iirare Goãmu yare erã gojarapũgue buhebirari mua? Davi iri panre bagu Goãmure tarinũgarã iibiriñumi. Dohpagãre yũ buherã sã trigo yerire turĩ barã Goãmure tarinũgarã iibeama. <sup>5</sup> Eropi Goãmu ya wihi mohmerã pahia ne soobeama mari soorinũre. Eropa soobiriquerẽ Goãmu dorerire tarinũgarã árĩbeama. ¿Iri buhebirari mua Goãmu Moiserẽ ĩgu apirapũre? <sup>6</sup> Mũare arĩgu tiiaa: Goãmu wihire umupeorã iri wihi mohmerã erã soobiricũ ĩarã “Õhaa,” arãa mua. Erã tauro yũpũre umupeoro gahmea. <sup>7</sup> Goãmu yare erã gojarapũ õpa áhrea: “Waimũrãre wejẽ soerã yũre mua eropa umupeocũ gamebeaa. Gajirãpũre mua mojomoro ĩacũ gahmea yũhũ,” arĩmi Goãmu, arãa ĩgu yare gojarapũre. ĩgu eropa arĩrãre mua õaro masirã, yũ buherãre erã dipuwaja mariquerẽcũ ta erãre weresãmasibiriboya mua. <sup>8</sup> Yũhũ masũ Goãmu ĩgu obeodigu inonũ soorinũ sãre masa erã iiburire doremasia, arĩmi Jesu fariseo masare.

*Mojoto bũhadigu õaro wañumi*

*Mr 3.1-6; Lc 6.6-11*

<sup>9</sup> ĩgu eropa arĩra pũhrũ waha gũa judio masa buheri wihigue ejabũ gũa Jesu mera. <sup>10</sup> Ero mojoto bũhagu arĩmi. Eropirã fariseo masapũ Jesure weresãmorã, ĩgũre serẽpima:

—Sabadonũ mari soorinũre masare õarã wacũ iidorebeami Goãmu. ¿Eropa ta áhriri mũ pepicũ? arĩ serẽpima erã.

<sup>11</sup> Jesu yũhrimi erãre:

—Mua yagu oveja mari soorinũ árĩquerẽcũ gobegue ĩgu yuhriñajadigũre ĩgũre aĩ wiurãca mua. <sup>12</sup> Oveja tauro áhrimi masapũ Goãmu ĩacũ. Eropiro mari soorinũ árĩcũ masure taucũ õapũrica, arĩ yũhrimi Jesu erãre.

<sup>13</sup> ĩgu eropa arĩra pũhrũ mojoto bũhagũre õpa arĩmi:

—Mũ mojtore sĩsirãbeoque, arĩmi ĩgu.

Ĩgu eroparĩcũ mojoto bũhagũpũ sĩsirãbeomi. ĩgu eropa sĩsirãbeora pũhrũ ta õari mojoto dujabũ. <sup>14</sup> Erã soorinũ ĩgu eropiicũ ĩarã fariseo masa waha, erã basi õpa arĩñorã:

—¿Dohpa ii mari Jesure wejẽrãcuri? arĩñorã erã erã basi.

*Isaia Goãmu yare weremũhtadigu iribojegue majagu Jesure wereyũñumi*

<sup>15</sup> Jesu erã eropa arĩrãre masigu waha wami. ĩgu eropa wacũ bajarã masa ĩgũre nũrusiama. Eropigu ĩgũpũ árĩpehrerã erã mera majarã dorecũrãre õarã wacũ iimi.

<sup>16</sup> Eropigu dorecũnirãre erãre ĩgu taurare gajirãre weredorebirimi ĩgu. <sup>17</sup> Eropa dorecũrãre õarã wacũ iigu Goãmu yare weremũhtadigu Isaia iribojegue ĩgu arĩ gojadiro dopa ta iigu iimi Jesu. Ópa arĩ gojañumi Isaia mũrũ:

<sup>18</sup> Ópa arĩmi Goãmu: “Ihĩ yũ pohro majagu áhrimi. ĩgu yũ beyedigũ áhrimi. ĩgũre mahia. Eropigu ĩgu mera mucubiria. Yũ Espĩrĩture ĩgũre ogũra. Eropigu yũ turari mera árĩpehrerã masare diaye iirire weregũcumĩ ĩgu. <sup>19</sup> Eropigu ĩgu ne game dũyasosome. Eropigu gaguiniguisme. Eropigu masa bajarã watope ĩgu bũrigã gaguiniguĩ weresome. <sup>20</sup> Guaro mariro masare mojomorocũrãre itamugũcumĩ ĩgu. Daberogã ãjũri peamere yaubiro dopa ta masare turabirãre õaro iigu cumĩ ĩgu. Sĩporã marirãre õaro sĩporãcũcũ iigu cumĩ. Eropa ta iiniguigũcumĩ ĩgu watĩre ĩgu tarinũgaboro core. <sup>21</sup> Eropirã masa bajarã ĩgũre umupeorãcoma,” arĩmi Goãmu ĩgu magũ iiburire, arĩ gojañumi Isaia.



*Jesu watĩ turarire opami, arĩ weresãñuma masa  
Mr 3.19-30; Lc 11.14-23; 12.10*

<sup>22</sup> Yujunũ watĩ ñajasũdigũre masa aĩgãrima gũa pohrogue Jesure taudorerã. Īgũpũ watĩ ñajasũdigũ wereniguimasibirimi. Eropigũ cuiiri ĩhajabirimi. Erã ĩgũre eropa aĩ eracũ ĩha õagũ wacũ iimi Jesu ĩgũre. Īgũ eropa iicũ õaro ĩha, wereniguimi pare.

<sup>23</sup> Īgũ eropa wacũ ĩarã, masa ĩhamaria wama.

—¿Ihĩ Davi mũrũ pãrami masare taubu àhriri? arĩma erã erã basi.

<sup>24</sup> Erã eroparĩquerecũ Jesu watẽare ĩgũ cóãrare peerã fariseo masapũ õpa arĩ pepiñorã:

—Beelzebú, watẽa opũ, ĩgũ turari mera watẽare cohãmi Jesu, arĩ pepiñorã erã.

<sup>25</sup> Erã eropa arĩ pepicũ masigũ, Jesu õpa arĩ weremi erãre werenigui queori mera:

—Yuju yeba majarã erã basi gamequeãrã iri yeba majarã pehrea wabocoma. Yuju maca majarã erã basi gamequeãrã iri maca majarã pehrea wabocoma. Yuju wihi majarã sã gamequeãrã eropa ta wabocoma. <sup>26</sup> Eropigũ Beelzebú watẽa opũpũ yũre watẽare cóãdoregũ ĩgũ basi ĩgũ yarãre cóãboñumi ĩgũ. Eropirã erã sã wapehrea waboñuma. <sup>27</sup> Ōpa arĩ weresãa mũa yũre: “Īgũ Beelzebú itamuri mera watẽare cohãmi,” arĩ weresãa mũa yũre. Mũa mera majarã sã watẽare cohãma. Eropirã erã “Watĩ ĩgũ turari mera erãre cohãa gũa,” arĩbeama. “Goãmũ ĩgũ turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye árĩbircũ mũa mera majarã wererãcoma. <sup>28</sup> Eropigũ yũpũ watẽare cóãgũ Goãmũ ĩgũ Espĩritu Santo turari mera cohãa. Yũ eropa cóãcũ ĩarã õpa arĩ masirãca mũa: “Goãmũ ĩgũ opũ árĩri i yebaguere árĩtuhajaa dohpaguere,” arĩrãca mũa.

<sup>29</sup> “Ōpa ta àhraa watĩ turagũ tarinũgari werediãcũ: Wihi opũ turagũre diribigu yajagũ ĩgũ ya wihigue ñajaja yajamasibeami. Īgũre ĩgũ dirira pũhrũ tamerare yajamasimi ĩgũre, arĩ weremi Jesu.

Eropa arĩ weremi watĩre ĩgũ tarinũgarare weregũ. Watĩ turagũ árĩquerecũ ta Jesu ĩgũre tarinũgami watẽare cóãgũ.

Eropa arĩtuhaja õpa arĩ werenemomi Jesu masare gũa sãre:

<sup>30</sup> —Yujugũ yũre gamebigũ, yũre ĩhaturigũ àhrimi. Yujugũ yũre itamubigũ, yũre teboricũcũ ĩgũ iimi.

<sup>31</sup> “Eropigũ mũare diaye arĩgũ tiiaa yũhũ. Árĩpehreri ñerire masa erã iicũ erã wereniguicũ sãre Goãmũ cãdijimasimi. Eropa cãdijiqueregũ Espĩritu Santore erã ñero arĩ wereniguicũ Goãmũ iri tamerare ne cãdijisome. <sup>32</sup> Yũ masũre Goãmũ ĩgũ obeodigũre erã ñero arĩ wereniguicũ iri ñerire cãdijimasimi Goãmũ. Espĩritu Santopũre erã ñero arĩ wereniguicũ irire ne cãdijisome Goãmũ. Dohpaguere pehrerinũ pũhrũ sãre erã eropa arĩrãre ne cãdijisome ĩgũ, arĩ buhemi Jesu erãre.

*Yucũ dũcare masiro dopa ta masa erã wereniguirire peerã erã árĩricũrĩre masia mari, arĩ wereñumi Jesu*

*Lc 6.43-45*

<sup>33</sup> Eropigũ õpa arĩ werenemomi erãre werenigui queori mera:

—Ōadigũ yucũgũ õarire dũcacũa. Ñedigũ yucũgũ ñerire dũcacũa. Yucũgũ dũcare masirã “Īrigũ dũca ta àhraa,” arĩ masia mari. Mari eropa masiro dopa ta masa erã wereniguirire peerã erã árĩricũrĩre masia mari. <sup>34</sup> Añaa iro dopa ñerã àhraa mũa. Mũa ñerã árĩrã, õarire wereniguimasibea mũa. Mari guñarigue mari pepidiro dopa ta mari wereniguia. <sup>35</sup> Ōagũ õarire pepimi. Eropigũ õarire wereniguimi. Ñegũ ñerire pepimi. Eropigũ ñerire wereniguimi. <sup>36</sup> Mũare arĩgũ iiaa. Ōaro pepi wereniguirã árĩque mũa. Ōaro wereniguibirininã dipuwaja moarinũ árĩcũ, mũa eropa arĩmaacãrãre Goãmũre wererãca. <sup>37</sup> Mũa queoro wereniguirare masigũ,

“Ōarā āhrima,” arī beyegucumi Goāmũ. Eropigu mua ñero wereniguirare masigu, “Ñerā āhrima,” arī beyegucumi ĩgu daja, arīmi Jesu erāre.

*Masa ñerā Jesure deyoro moarire iidoreñuma*

*Mr 8.12; Lc 11.29-32*

<sup>38</sup> ĩgu eropa arīra pũhrũ masare buherā, fariseo masa sã ĩgũre õpa arīma:  
—Buhegu, Goāmũ ĩgu obeodigu árĩgu Goāmũ turari mera ii ĩhmuque guare, arīrima erā.

<sup>39</sup> Jesu yũhrimi:

—Mua dohpague majarā ñerā, Goãmũre gamebirā āhraa. Yũhu diaye arĩgu árĩcũ mua masidiarā Goāmũ turari mera deyoro moarire iidoreraa yũre. Mua eropa dorequerecũ Goāmũ yare weremuhtadigu Jona iribojegue majagu Goāmũ turari mera ĩgu iira dihtare ĩhmumi Goāmũ mũare. <sup>40</sup> Jona uhrenũ gohra waimũ wũagu paru pohecaguere árĩñumi. ĩgu iidiro dopa ta yũ sã masũ Goãmũ ĩgu obeodigu uhrenũ árĩguca yeba pohecaguere. <sup>41</sup> Iribojegue majarãpũ Nínive maca majarā Jona Goãmũ yare ĩgu wererare peerā, erā ñero iirare bujawereñuma. Ōarire gohrotoñuma. Dohpaguere mua watopegue Jona tauro árĩgu āhraa yũhu. Yũhu Goãmũ yare mũare werequerecũ ta mua ñero iirare bujawerebeaa. Eropirā Nínive majarā mũrapũ erā ñero iirare bujawerenirãpũ dipuwaja moarinũ árĩcũ mua ñerire bujawerebirinirãre “Ñerā āhrima,” arī weresārãcoma mũare. <sup>42</sup> Iribojegue majago, sur majago, opo bũro igo sã mua dohpague majarãre weresãgocumo dipuwaja moarinũ árĩcũ. Igo Salomo opũ ĩgu masirire peediago yorogue aridigo Salomo opũre peego ejañumo. Eropigo õaro iigo iĩñumo dohpague majarā tauro. Mũare arĩgu tiaa. Dohpaguere mua watopegue Salomo tauro masigu āhraa yũhu. Yũhu mua mera árĩquerecũ mua yũ masirire peediabeaa. Mua eropa peediabirira waja igo opo bũro mũare “Ñerā āhrima,” arī weresãgocumo, arīmi Jesu erāre.

*Watĩ dipaturi masũguere ĩgu ñajara queorire wereñumi Jesu*

*Lc 11.24-26*

<sup>43</sup> Eropigu dipaturi Jesu queori moa weremi masare.  
—Yujugu watĩ masũ mera árĩdigũ waha, ĩgu deco mariri yebague cuhri, ĩgu sooborore amariñumi. <sup>44</sup> Eropã bocabigu õpa arĩ pepiñumi ĩgu. “Masũre yũ cóãdigũ mera ta dipaturi árĩgu wagũra,” arĩ pepiñumi ĩgu. Eropã arĩ pepigu ĩgu dujaa waha ĩgu cóãdigũre ta bocañumi daja. ĩgu bocaboro core masũpũ õagu árĩriñumi. <sup>45</sup> Eropigu watĩ gajirã siete watẽare ĩgu tauro ñerãre sihugu wañumi. ĩgu eropa sihucũ erā árĩpehrerã ĩgu mera árĩñuma. Masũpũ ero core yujugu watĩre opagu ñegu árĩñumi. Pũhrũ bajarã watẽare opagu ñetariagu árĩñumi. Eropã dohpague majarã Goãmũre gamebirã, yũ buherire peediabirã ñetariarã ta warãcoma, arĩmi Jesu erāre.

*Jesu acawererã ĩgu pohro erañuma*

*Mr 3.31-35; Lc 8.19-21*

<sup>46</sup> Masare ĩgu eropa arĩ wereniguirisubũ ĩgu pago ĩgu pagũ porã mera disiporo nigui, ĩgũre weretamudiañorã. <sup>47</sup> Eropigu yujugu Jesure weremi:

—Mũ pago mũ pagũ porã mera disiporo niguima mũre weretamudiarã, arĩmi.

<sup>48</sup> ĩgu eroparĩcũ peegu ero árĩrãre õpa arĩmi Jesu erãre buhebu:

—¿Noa āhriri yũ pago gohra? ¿Noa ta yũ pagũ porã gohra āhriri mua ĩacũ? arĩmi.

<sup>49</sup> Eropã arĩgu, guare ĩgu buherãre sĩpu, õpa arĩmi:

—Oã āhrima yũ pago yũ pagũ porã iro dopa árĩrã. <sup>50</sup> Erã yũ Pagũ umaro majagu ĩgu gamerire iima. Eropã iirã yũ pagũ magũ, yũ pagũ mago, yũ pago iro dopa ta āhrima, arĩmi Jesu erãre.

## 13

### *Jesu oteri masu ya queorire wereñumi*

*Mr 4.1-9; Lc 8.4-8*

<sup>1</sup> Irinu ta Jesu wihigue árĩgu wiriami gua mera. Wiri, wuariyague waha, iriya turo pohro doami. <sup>2</sup> Īgu eropa doacũ ĩarã bajarã masa ĩgu pohrogue gamenerema. Eropa cũhñacũ ĩagu dohodirugue ñajaa, irirugue doami ĩgu. Masapu imiporogue niguima. <sup>3</sup> Eropigu baja queori mera weremi ĩgu erãre. Őpa arĩmi:

—Oteri masu otegu wañumi. <sup>4</sup> Īgu eropa otecũ gajiyeri ma turo yuri merejayoro. Ero mehmerejarayerire mirimagu porã ahri bacãñuma. <sup>5</sup> Eropi gajiyeri utã watope yuri merejayoro. Ero utã watope nicu mariñariro árĩro mata puhriyoro. <sup>6</sup> Eropa puhri ara arĩquerero, abe ĩgu burigã asicũ, nuguri marinijaro ñaiñaja sĩa wayoro. <sup>7</sup> Gajiyeri pora watope yuri merejayoro. Porapu puhri iri tiataria wa, oterayeripare wejēcayoro. <sup>8</sup> Gajiyeri ðari yebapu yurimerejayoro. Őaro puhri ducacayoro. Gajisari cien yeri, gajisari sesenta yeri, gajisari treinta yeri ducacayoro. <sup>9</sup> Irire ðaro peeque mua, arĩmi Jesu.

### *Jesu werenigui queori mera ĩgu buherire wereñumi*

*Mr 4.10-12; Lc 8.9-10*

<sup>10</sup> Īgu eropa arĩra puhru gua ĩgu buherã ĩgu pohro eja, serẽpibu ĩgure:  
—¿Ne, duhpigu masare queori mera were buheri mũhũ? arĩ serẽpibu gũa.

<sup>11</sup> Jesu yuħrimi:

—Umaro majagu masa tauro opu ĩgu arĩrire iribojegue majarã erã masibirirare muare masicũ iimi Goãmũ. Gajirãpũ eropiibeami ĩgu. <sup>12</sup> Eropigu masirãre masinemocũ iigucumi ĩgu. Eropirã erãpu ðaro masirãcoma. Masibirãpũ merogã erã masiquerecũ erãpũre masibiricũ iigucumi ĩgu. <sup>13</sup> Eropigu queori mera buhea. Yu eropiicũ ōpa waha. Dohpague majarã ĩaquererã pee masisome. Eropirã peequererã masibeamã. Irire peebirinirã iro dopa aħrimã erã. <sup>14</sup> Eropa arĩrã Isaia iribojegue majagu ĩgu arĩ gojadiro dopa ta iima erã. Őpa arĩ gojañumi:

Őpa arĩmi Goãmũ: “Goãmũ yare peerãca mua. Eropa peequererã ne masisome mua. <sup>15</sup> Mua dipuru bũri aħraa. Eropirã mua gamiro goberire bihaa peeri arĩrã. Mua cuirire cuumitĩa ĩhari arĩrã. Eropa iibirã ðaro ĩarã masiboaya mua. Eropirã peerã masiboaya mua. Mua guñarigue ðaro masiboaya. Eropirã yũre Goãmũre gameboaya mua. Mua eropa yũre gamecũ mua ñerire cãdiji, muare tauboaya,” arĩmi Goãmũ, arĩ gojañumi Isaia, arĩmi Jesu.

<sup>16</sup> Mũapu peerã masia. Eropirã mucubirirã aħraa mua. <sup>17</sup> Muare ta arĩgu iiaa. Dohpague mua ĩarire mua peerire iribojegue majarã Goãmũ yarã burigã ĩadiariñorã. Goãmũ yare weremũhtanirã sã irire burigã ĩadiariñorã. Ne ĩabiriñorã. Dohpague mua peeri sãre burigã peediariñorã erã. Ne peebiriñorã. Erã eropa masidiaquerecũ ta Goãmũ erãre masidorebiripũ irisubuguere, arĩ weremi Jesu gũare ĩgu buherãre.

### *Jesu oteri masu queorire were amũñumi ĩgu buherãre*

*Mr 4.13-20; Lc 8.11-15*

<sup>18</sup> Pũhru Jesu gũare werenemomi:

—Peeque mua. Oteri masu queorare muare were amugũra. Yũre peerã ðaro masique. <sup>19</sup> Oteriyeri ðari buheri iro dopa aħraa. Eropi ma turo mehmerejarayeri ðari buheri iro dopa ta aħraa. Eropirã masa ðari buherire peequererã ta ne masibeamã. Eropigu masa ðari buherire erã peecũ ĩagu ñegũpu watĩ ahri, iri buherire ðari buherire masidorebeamã masare. Mirimagu porã iriyerire erã dote aĩ badiro dopa ta iimi. <sup>20</sup> Eropi utã watope yuri merejarayeri ðari buheri iro dopa ta aħraa. Eropirã masa ðari buherire pee, mucubiriri mera mata irire pee aĩma.



<sup>21</sup> Eropā pee aĩquererã utã watope árĩri yucũ nuguri mariri yucũ iro dopa ta oã masa sã turabeama. Eropā turabirã yaha õari buherire erã peera dipuwaja gajirã erãre ñero iicũ yahare duhucãma. Gajirã erãre erã ñero iicũ irire yujuro bojebiri, yahare duhucãma. <sup>22</sup> Eropi pora watope yuri merejarayeri õari buheri iro dopa ta ãhraa. Eropirã masa õari buherire peequererã i yeba majare wũaro pepiri mera niyerure gametarima. Erã eropa iicũ iripũ õari buherire cãhmotaa. Iri cãhmotacũ masa Goãmũ gamerire iibeama. <sup>23</sup> Eropi õari yeba yuri merejarayeri õari buheri iro dopa ãhraa. Eropirã masa õari buherire peerã irire õaro masima. Eropā masirã árĩrã, Goãmũ gamerire iima erã. Yujurãyeri wũaro õarire iima cien yeri dũcacũro dopa ta. Gajirã erã docañariro õarire Goãmũ yare iima sesenta yeri dũcacũro dopa ta. Gajirã merogã õarire iima treinta yeri dũcacũro dopa ta, arĩ weremi Jesu guare.

### *Trigo watopegue taa tiara queorire wereñumi*

<sup>24</sup> Eropi dipaturi gajĩ queorire guã sãre weremi Jesu.

—Umaro majagu ĩgu opu árĩrĩre werediacũ õpa ãhraa: Pohe opu ĩgu ya pohegue õariyerire ĩgu otediro dopa ta ãhraa umaro majagu ĩgu opu árĩri. <sup>25</sup> Pohe opu trigo otera pũhrũ árĩpehrerã ĩgu mera majarã sã erã carĩrisubu ĩgũre ĩhaturigũ arĩñumi. Eropā arigũ trigo yeri erã oterayeri watope ñeri taare oteñumi. Otetuhaja waha wañumi. <sup>26</sup> Pũhrũ trigo sari puhri iiriyoro. Eropiro iri dũcacũboro core árĩcũ iri ñeri taa sã puhri iri pohere tiha wacũ iiyoro. <sup>27</sup> Eropirã pohe opũre mohme corerã ĩgu pohogue eja serẽpiñuma: “Opu, ¿õariyeri dihtare mũ ya pohere otequerecũ duhpiro ñeri taa sã tiari iri pohere?” arĩñuma erã. <sup>28</sup> “Yũre ĩhaturigũ ãhrañumi iri taare otegu,” arĩñumi pohe opu. “¿Taare guã curacũ gahmeri mũhũ?” arĩriñuma ĩgũre mohme corerã. <sup>29</sup> “Taare curabiricãque, taare curanijarã trigopũre curari,” arĩñumi. <sup>30</sup> “Trigo iri ñeri taa mera puhricãniporo. Iri ñairisubu dũca aĩrãre õpa arĩrã: ‘Iri ñeri taare cura gameneopimũhtaque irire soemorã. Pũhrũ trigore tũrĩque. Tũrĩpeho, irire yũ diburi wihigue apique,’ arĩrã erãre,” arĩñumi pohe opu, arĩmi Jesu queori mera weregu.

### *Mostazayegã queorire wereñumi Jesu*

*Mr 4.30-32; Lc 13.18-19*

<sup>31</sup> Eropi gajĩ queori guare õpa arĩ buhemi daja.

—Umaro majagu ĩgu opu árĩri werediacũ mostazayegã iro dopa ãhraa. Iriyegã miriyegã gohra ãhraa. Iriyegã yujugũ oteri masũ ĩgu pohegue oteami. <sup>32</sup> Iriyegãre ĩgu pohegue otera pũhrũ õaro puhria. Eropiro yucũgu wũatariadigũ wahaa. Eropā wacũ mirimagũ porã bajarã irigũ dũpũrigue suhri suama. Eropā ta umaro majagũre mari Opũre masirã bajamerãgã erã árĩmũhtaquerecũ ta pũhrũguere erã bajarã warãcoma, arĩ weremi Jesu

### *Pan bũgari queorire wereñumi Jesu*

*Lc 13.20-21*

<sup>33</sup> Eropi gajĩ queori mera guare õpa arĩ buhemi daja:

—Umaro majagu ĩgu opu árĩri pan bũgacũ iiburi iro dopa ãhraa. Yujugo nomeo panre iigo pan bũgacũ iiburi pohgare merogã moremo trigo pohga mera. Igo eropa iicũ pan bũgacũ iiburi pohga merogã árĩquerero ta trigo pohgare õaro seyapehrea wahaa. Eropā ta umaro majagũre mari Opũre bajarã masa árĩpehrero majarã masirãcoma, arĩmi Jesu.

### *Queori mera Jesu ĩgu buherãre wereñumi*

*Mr 4.33-34*

<sup>34</sup> I árîpehreri buherire queori mera weremi Jesu. Queori mariro werebirimi ïgu masare. <sup>35</sup> Eropa ta iimi ïgu Goãmũ yare weremãhtadigũ ïgu arĩ gojadiro dopa ta. Ôpa arĩ gojañumi iribojegue:  
Queori mera weregura. Goãmũre i yebare ïgu ïhacũnugura pũhrũ, ne masare ïgu werebirirare weregura, arĩ gojayuñumi Jesu iiborore.

*Jesu trigo watopegue ñeri taa tiara queorire were amupehoñumi*

<sup>36</sup> Eropi masare goeriseregũ, wihigue ñajaa wami Jesu. Eropirã gũa ïgu buherã ïgu pohrogue eja, serëpibũ gũa:

—Trigo watopegue ñeri taa tiara queorire werepehoque gũare, arĩbũ gũa ïgure.

<sup>37</sup> Jesu yũhrimi gũare:

—Pohe opũ ôariyerire otediro iro dopa ta ãhraa yũhũ. Yũhũ masũ Goãmũ ïgu obeodigũ ãhraa. <sup>38</sup> Pohepũ i yeba iro dopa ta ãhraa. Ôariyeri puhriro umaro majagũ ïgu opũ árîrogue árĩmorã iro dopa ta ãhrima. Ñeri taapũ watĩ yarã iro dopa ta ãhrima. <sup>39</sup> Pohe opũre ïhaturigũ ñeri taare otedigũ watĩ iro dopa ta ãhrimi. Iri ñairisubũ pehrerinũ iro dopa ãhraa. Eropirã trigore aĩrã anyua iro dopa ta ãhrima. <sup>40</sup> Iri ñeri taare erã curarare soe peamegue cóãdiro dopa ta pehrerinũ árĩcũ watĩ yarãre peamegue cóãrãcoma. <sup>41</sup> Yũhũ masũ Goãmũ ïgu obeodigũ yaharã anyuare obeogũra. Yũ obeocũ anyuapũ ñeri iidorenirãre, ñerire iinirãre yũ dorerogue gameneorãcoma. <sup>42</sup> Gameneotuhaja peamegue cóãrãcoma erãre. Erogue erã burigã ore, bujawereri mera gũcũri cũridihurãcoma. <sup>43</sup> Eropirã Goãmũ yarã erã Pagũ erã Opũ ïgu árîrogue árĩrãcoma. Ero árĩrã, ôaro mucubiriri mera árĩrãcoma erã. Ire ôaro peeque mũa, arĩ weremi Jesu.

*Niyeru wũaro diburare ïgu bocara queorire wereñumi*

<sup>44</sup> Eropi gaji queori mera weremi daja:

—Umaro majagũ ïgu opũ árĩri niyeru wũaro diburare bocadiro iro dopa ãhraa. Eropigũ yujugũ masũ curigũ wagũ iri niyerure guñaña mariro bocañumi yuju yebague. Eropa bocagũ burigã mucubiriñumi ïgu. Bocatuhaja waha iri yebague dipaturi dujara irire ôaro dibunemoñumi. Eropigũ ïgu bocarare aĩbu iri yebare asũdiañumi. Eropigũ ïgu yare duapeho, iri yebare asũñumi. Umaro majagũ opũ ïgu árĩri ïgu bocadiro dopa ta ãhraa. ïgu bocarare ïgu burigã gamediro dopa ta umaro majagũ masa weca opũre ôaro erã masira pũhrũ masa burigã gahmema ïgure, arĩ weremi Jesu.

*Waja pagariyere asũra queorire wereñumi*

<sup>45</sup> Eropi gaji queori mera weremi daja:

—Umaro majagũ ïgu opũ árĩri waja pagariye perla waĩcũriyere asũdigũ iro dopa ãhraa. <sup>46</sup> Iriyere amagũ ôataririyere bocañumi. Bocagũ iriyere gametarigũ árîpehreri ïgu yare duapehogũ wañumi. Eropa duatuhaja iriyere waja pagariyere asũñumi. Iriyerire burigã ïgu gamediro dopa ta umaro majagũ masa weca opũre ôaro erã masira pũhrũ masa burigã gahmema ïgure, arĩmi Jesu.

*Wejëdigũ mehyura queorire wereñumi Jesu*

<sup>47</sup> Eropi gaji queori mera Jesu weremi daja gũa sãre:

—Umaro majagũ ïgu opũ árĩri wejëdigũ erã mehyudigũ iro dopa ta ãhraa. Irigũ wejëdigũ mera bajarã waire gajiropa árĩrãre ñeama. <sup>48</sup> Irigũ ujuturia wacũ wai wejërãpũ irigũre wejëdigũre imiporogue tara majaa ôarã waire beyema. Ôarãre erã puirigue beye sãma. Ñerã waire cóãcãma. <sup>49</sup> Pehrerinũ árĩcũ ôpa ta árĩroca. Anyuapũ masare beyerãcoma. Ñerãre beye aĩ wiurãcoma ôarã watope árĩrãre. <sup>50</sup> Aĩ

wiu, erāre peamegue cóārācoma. Erogue erā ore, buřigā bujawereri mera gũcũri cũridihurācoma ñerāpũ, arĩ weremi Jesu.

*Mũra buherire, mama buheri sāre wereñumi Jesu*

<sup>51</sup> Īgũ eropa arĩ werera pũhrũ guare serēpimi ĩgũ:

—¿I árĩpehrerire peeri mũa? arĩ serēpimi ĩgũ.

—Peea gũa, arĩ yũhribũ.

<sup>52</sup> Gũa eroparĩcũ ĩgũ weremi guare:

—Judio masare buherā watope yujugũ Ʃmaro majagũ ĩgũ opũ árĩrire buhenugagũ iri mama buherire buhegũ iribojegue maja sāre masigũ weremi. Īgũ wihi opũ iro dopa āhrimi. Īgũ ĩgũ ya wihi diburare ōarire aĩ wiugũ, mamare, mũra sāre aĩ wiumi ĩgũ, arĩmi Jesu guare.

*Jesu Nazaregue ĩgũ ya macague wañumi*

*Mr 6.1-6; Lc 4.16-30*

<sup>53</sup> Iri queori bajare ĩgũ buhera pũhrũ ĩgũ mera gũa waha wabũ. <sup>54</sup> Waha, ĩgũ masara macague ejabũ. Erogue eja, gũa buheri wihigue buhemi ĩgũ. Īgũ eropa buhecũ peerā, pee Ʃca wama erā.

—¿Nohogue masiyuri ihĩ i buherire? ¿Dohpa ii ĩgũ i deyoro moarire iimasiri? arĩ wereniguima erā erā basi. <sup>55</sup> Ihĩ taboa mohmeri masũ magũ ta āhrimi ĩgũ. Eropi ĩgũ pago María āhrimo. Eropi Santiago, José, Simo, Juda ĩgũ pagũ porā āhrima. <sup>56</sup> Dohpaguere ĩgũ pagũ porā nome i maca āhrima. Eropigũ ĩgũ mari iro dopa ta árĩgũ āhrimi. ¿Eropa árĩqueregũ ta nohogue peeyuri i buherire? arĩ wereniguima erā erā basi.

<sup>57</sup> Eropirā erā ĩgũre umupeobirima. Erā eropa umupeobiricũ ĩagũ ōpa arĩmi Jesu erāre:

—Árĩpehrerogue Goāmũ yare weremũhtagure gajirā umupeoma. Īgũ ya maca majarā ĩgũ ya wihi árĩrā dihta ĩgũre umupeobeama. Eropirā yũre umupeobeaa mũa ohũ yũhũ masadigũ árĩcũ, arĩmi ĩgũ erāre.

<sup>58</sup> Eropigũ erā ĩgũre umupeobiricũ, iri macare baja deyoro moarire iibirimi Jesu.

## 14

*Ñu waĩyegũ sĩrirare werera*

*Mr 6.14-29; Lc 9.7-9*

<sup>1</sup> Irisubure Herode Galilea majagũ opũ Jesu ĩgũ iirare peebeopũ. <sup>2</sup> Eropa peegũ ōpa arĩripũ:

—Ñu waĩyeri masũ sĩridigũ dipaturi masa dehyoagũ iicumĩ. Eropa masadigũ árĩgũ ĩgũ turarire opami ĩgũ deyoro moarire iigũ, arĩripũ Herode ĩgũ pohro majarāre. Jesure “Ñu mũrũ ta āhrimi,” arĩ pepiripũ ĩgũ Ñure ĩgũ wejēdorera pũhrũ.

<sup>3-5</sup> Eropigũ Ñure ĩgũ wejēdoreboro core Herode ĩgũ pagũ magũ Felipe marapore ehma igo mera marapocũpũ. Īgũ eropa iicũ ĩagũ Ñu waĩyegũ Herodepũre ōpa arĩ wereniguipũ:

—Mũ pagũ magũ marapore marapocũgũ Goāmũ dorerire tarinugagũ iiaa mũhũ, arĩripũ Ñu ĩgũre. Īgũ eropa arĩra waja Herode ĩgũre wejēdiaripũ. “ ‘Ñu Goāmũ yare weremũtagũ āhrimi,’ arĩ pepima judio masa,” arĩgũ erāpũre gũipũ Herode. “Ñure yũ wejēcũ erā guabocoma,” arĩgũ erāre gũipũ. Eropa gũigũ Ñure wejēdiabiriripũ. Eropa wejēbiriqeregũ ta ĩgũre ñeha diridore, peresu iipũ. Īgũre eropa iicũ gamepo ĩgũ marapo Herodia. <sup>6</sup> Eropi Herode ĩgũ masa dehyoaranũ árĩcũ bosenu iipũ ĩgũ. Īgũ eropa bosenu iicũ ĩgũ marapo mago bosenu eranirā erā ihuro baya ihmupo igo. Igo eropa baya ihmucũ Herode mucubiripũ. Eropa mucubirigũ igore arĩpũ:

<sup>7</sup> —Goãmũ mera diaye ta arĩgu iiaa. Yũre mũ serẽropẽ ta ogũra yũhu mũre, arĩpu pare Herodepu ãgu marapo magore. <sup>8</sup> Ìgu eroparĩcũ ãgu marapo igo magore igo serẽburire werepo igore. Igo eropa werecũ igo magopũ õpa arĩ serẽpo Herodere.

—Ñũ waĩyegũ dipurure tabetadoreque. Eropigu soropa mera ãgu dipurure yũre oque, arĩpo igo.

<sup>9</sup> Igo eroparĩcũ peegu Herode burigã bujawerepu. Masa erã peero “Mũ serẽro mũre ogũra,” arĩtuhapũ ãgu. Eropigu ãgu ãgu eropa arĩrare guhyasĩrigũ “Mũre osome,” arĩmasibiripũ igore. Eropigu igo ãgũre dorero dopa ta Herodepu ãgu pohro majarãre Ñũre wejẽdorepu. <sup>10</sup> Eropigu Ñũ dipurure tabetadorecãpu pare peresugue arĩgũre. <sup>11</sup> Tabetatuhaja, soropa mera ãgu dipurure aĩgãriñorã erã. Ìgu marapo magore ãgu dipurure erã ocũ, igopũ igo pagoguere aĩ taupo.

<sup>12</sup> Erã eropa iira pũhrũ Ñũ ãgu buhenirã ãgu dũpu mũrarore aĩgã wañorã. Eropa yaatuhajarã, erã irire Jesure wererã arima.

*Cinco mil masare bari oñumi Jesu*

*Mr 6.30-44; Lc 9.10-17; Jn 6.1-14*

<sup>13</sup> Ñũ sĩrirare peegu Jesu gũa mera dohodirugue ñaja, masa marirogue sihu wami. Jesu erogue wacũ peerã, masa erã ya macarire wiri, marigue waha ãgu core ejatuhãnorã. <sup>14</sup> Eropiro Jesu ãgu wadiru dohodiru tuhajara pũhrũ ãgu bajarã masa arĩcũ ãha, mojomoro ãami erãre. Eropa mojomoro ãagu erã mera bajarã dorecurãre õarã wacũ iimi. <sup>15</sup> Ñamicague gũa ãgu buherã õpa arĩbũ:

—Ñamicague ãhraa. Ohõ masa marirogue ãhraa. Õgã arĩri macarigue masare wadoreque. Erã baburire asũrã waporu, arĩribũ gũa ãgũre.

<sup>16</sup> Jesu yũhrimi gũare:

—Wabiricãporo erã. Mũa basi ta barire oque erãre, arĩmi gũare.

<sup>17</sup> —Cinco pan dipurure, perã ta wai sãre iripẽta opaa gũa, arĩ yũhribũ gũa.

<sup>18</sup> —Irire yũre aĩgãrique mũa, arĩmi gũare.

<sup>19</sup> Gũa irire ora pũhrũ, taa weca masare ãgu doadoremi pare. Erã eropa doarisubu cinco pan dipurure aĩ, perã wai sãre aĩ, umarogue ãhamuju, ãgu Pagure “Õhaa,” arĩmi. Õpa arĩtuhaja iri pan dipurure nuha, gũare ãgu buherãre omi. Ìgu eropa ocũ guapũ iri barire masare guerebũ. <sup>20</sup> Eropirã arĩpehrerã õaro baha yapia wama. Erã ba dũharare doce puiiri gohra aĩ gameneo, uĩũtu dobobũ gũa. <sup>21</sup> Ero irire banirã uma dihtare queocũ cinco mil uma arĩma. Nome, majirã sã arĩma.

*Jesu deco weca curiñumi*

*Mr 6.45-52; Jn 6.16-21*

<sup>22</sup> Pũhrũ gũare ãgu buherãre Jesu dohodirugue ñajadore wũariyague taribuja yuudoremi masare ãgu goerisererisubu. <sup>23</sup> Goeriseretuhaja, ãgu basi utãgũgue mũria, ãgu Pagu Goãmũ mera serẽgu wapũ ãgu seyaro. <sup>24</sup> Irisubure wũariya deco gohra gũa taribujacũ miruñe burigã ahri, pãgũri pagari wahgã, dohodirure deco paa ñajabũ. <sup>25</sup> Eropa wacũ boyomũrriboro core cãreña wahgãrisubu Jesu deco weca cũhrapi wahgãrimi gũa pohrogue arĩgu. <sup>26</sup> Gũa pohrogue ãgu aricũ ãarã gũibũ gũa. Eropa gũirã gaguiniguiribũ.

—Sĩridi mũru watĩ ãhrimi, arĩ gaguiniguibũ gũa.

<sup>27</sup> Gũa eropa gũicũ Jesu õpa arĩmi:

—Ne yũre ãha ucabiricãque. Yũhu ta ãhraa. Gũibita, arĩmi gũare.

<sup>28</sup> Ìgu eroparĩcũ peegu Pedro arĩmi ãgũre:

—Yũ tĩgu, diaye ta mũhu ta arĩgu, deco weca curi wahgãadoreque yũre mũ pohrogue, arĩmi ãgu.

<sup>29</sup> —Arique, arĩ yũhrimi ãgũpu.

Īgu eroparīcū Pedropu dohodirugue árīdigu wiria, deco weca Jesu pohrogue niguigārimi. <sup>30</sup> Miruñe iri bariḡā aricū ĩagu güimi. Eropa güigu diha dija warimi.

—Yure tauque, arī gaguiniguimi ĩgu Jesure.

<sup>31</sup> Īgu eroparīcū ta Jesu ĩgu mojtore ñeha,

—Merogā umupeoa m̄hu yure. ¿Duhpigū yure guñaturabeari m̄hu? arīmi ĩgu Pedrore.

<sup>32</sup> Eropa arīra p̄hrū dohodirugue ñajama erā. Erā eropa ñajara p̄hrū, miruñe taria wabū. <sup>33</sup> Eropirā gua ĩgu buherā dohodirugue árīrā Jesure umupeobū.

—Diaye ta m̄hu Goāmū magū ta āhraa, arībū gua ĩgure.

### *Genesare majarā dorecūrāre tauñumi Jesu*

*Mr 6.53-56*

<sup>34</sup> Eropi taribujaja, Genesare waīcūri yebague ejabū. <sup>35</sup> Ero majarā Jesure ĩha masima. Eropa masirā erā pohro árīrāre dorecūrāre aīḡaridorema. Eropirā erā dorecūrāre ĩgu pohrogue aī erama.

<sup>36</sup> —Mū suhriro turo dihtare guare mohmepiñadoreque, arī serēma erā Jesure. Eropirā árīpehrerā dorecūrā ĩgu suhrirore mohmepiñanirā dihta ōarā wama.

## 15

### *Masa ñerā wacū iirire wereñumi Jesu*

*Mr 7.1-23*

<sup>1</sup> Eropi Jerusalén majarā, fariseo masa, masare buherā mera Jesu pohrogue erarā, serēpima ĩgure:

<sup>2</sup> —¿Duhpirā mari ñecu sūmarā m̄ra erā dorediro dopa iibeari mū buherāpū? Erā mari dorero dopa ta erā baboro core mojo coe ĩhmubeama, arīma erā Jesure.

<sup>3</sup> Jesu yuhriḡu serēpimi erāpūre:

—¿Mūapū duhpirā Goāmū doreripūre iibeari? ¿Duhpirā m̄a ya doreri dihtare iiri mūapū? <sup>4</sup> Ōpa arīmi Goāmū: “Mūa pagū sūmarāre umupeoque,” arīmi. Eropigu “Īgu pagū sūmarāre ñero werenigui coredigūre erā dipuwaja moarā wejēbu árīḡucumi,” arīmi Goāmū. <sup>5</sup> Īgu eropa arīquerecū ta mūapū ōpa arīdorea masare erā pagū sūmarāre. “ ‘Mūare itamumasibea. Mūare yū oborare Goāmū ya árīburire opehocābū,’ arīque m̄a pagū sūmarāre,” arī buheraa m̄a. <sup>6</sup> Mūa eropa buherā erā pagū sūmarāre erā umupeobiricū iiaa m̄a. Mūa eropa iirā Goāmū buherire tarinūgarā iiaa m̄a m̄a ya doreri dihtare iirā. <sup>7</sup> Masa erā ĩabiropūre ñero iicorerā āhraa m̄a. Goāmū ya weremūhtadigūgue Isaia m̄are diaye ta were gojamūriñumi iribojegūre:

<sup>8</sup> Oā masa yure ōaro wereniguiquererā yure ōaro umupeobeama. Erā ya sīporāripū gajipūgue āhraa. <sup>9</sup> Goāmū ya dorerire arībodirore erā ya werenigui dihtare buhema erā. Eropirā yure umupeo erā sībuipeori duhpihuri arībeaa, arī gojañumi Isaia, arīmi Jesu fariseo masare, masare buherā sāre yujuropa ta.

<sup>10</sup> Eropa arītuhaja ĩgu pohrogue masare sihubeo, ōpa arīmi:

<sup>11</sup> —Peeque m̄a. Mūa disirorire ñajaripū m̄a baripū masare ñerā masa wacū iibea. Mūa wereniguiripū m̄a ya disiro wiriripū m̄are ñerā árīcū iiaa, arīmi Jesu.

<sup>12</sup> Īgu eropa arī buhera p̄hrū gua ĩgu buherāpū ĩgure werebū:

—Mū eroparīcū peerā fariseo masa guama, arī werebū gua ĩgure.

<sup>13</sup> Iirire pee ōpa arī yuhrimi guare:

—Erā otera iro dopa āhrima. Yū Pagū umaro majagu árīpehreri oterare ĩgu otebirirare nuguri mera ta cura cóāḡucumi. <sup>14</sup> Erāre eropa ĩacāque. Erā Goāmū yare masibirā masa cuiri ĩhajabirā iro dopa āhrima. Cui ri ĩhajabirā seyaro erā basi game tūagā erā perāgue ta mehtua yuhridjarācoma gobegue. Eropa erā Goāmū



yare masibiriquererã ta gajirãre masibirãre buhediarima. Eropirã erã erã buherã sã peamegue warãcoma, arĩmi Jesu.

<sup>15</sup> Īgu eroparĩcũ peegu Pedro arĩmi:

—Ĩne queoriñere erã disiro wiriri queorire werenemoque guare daja, arĩmi ĩgu Jesure.

<sup>16</sup> Jesu yũhrimi:

—¿Ne, peenibeari mua? <sup>17</sup> Masa erã barire bacũ erã ya disiro ñajaa. Eropiro erã parugue ñajaja, pũhrũ erã dupũpũ ñerire cohãa. Ibu gohra ãhraa. Mari bari marire ñerã wacũ iibea. ¿Ire masibeari mua? <sup>18</sup> Masa ya disiro wiriri, erã wereniguiripũ erã pepiri ãhraa. Erã ya pepiripũ ñeri árĩro masare ñerã árĩcũ iiaa. <sup>19</sup> Erã pepirigue õpa ñeri nũgaa: Ñeri pepiri, masare wejẽri, gajigu marapo mera ñero iiri, ñero iirã nome mera ñero iiri, yajari, gũyari, masare ñero quere iiri, masa erã pepirigue nũgaa. <sup>20</sup> Iri ñeripũ masare ñerã árĩcũ iiaa. Masa erã dorerire murgue erã iimuridiro dopa ta mojoto coebiriquererã ta erã bacũ iri masare ñerã masa árĩcũ iibea, arĩmi Jesu.

### *Judio maso árĩbigo Jesure umupeoñumo*

*Mr 7.24-30*

<sup>21</sup> Eropa arĩ buhetuhaja guare sihu waha wami daja. Tiro waĩcũri maca pohrogue Sidón waĩcũri maca pohrogue ejabũ gua. <sup>22</sup> Gua erogue ejacũ Canaa yeba majago ero árĩgo Jesu pohrogue eja, turaro mera wereniguimo:

—Opũ Davi pãrami, masare taugũ yũre mojomoro ãaque mũhũ. Yũ mago watĩ ñajasũdigo ñetariaro tarimo igo, arĩmo.

<sup>23</sup> Igo eropa arĩquerecũ ta Jesu igore yũhribirimi. Īgu eropa iicũ ãarã gua ĩgu buherãpũ ĩgure õpa arĩribũ:

—Wadoreque igore. Ñe gariboro busucumo, arĩribũ gua.

<sup>24</sup> Gua eroparĩcũ peegu ĩgu yũhrimi igore:

—Israe majarã oveja dederenirã iro dopa árĩrã dihtare itamudoregũ obeomi yũ Pagũ yũre, arĩmi ĩgu.

<sup>25</sup> Īgu eroparĩcũ ta Jesu guburi pohro merejamo igo.

—Mũhũ eropa arĩqueregũ itamuque yũre, arĩmo igo.

<sup>26</sup> Jesu yũhrimi igore:

—Wihi opũ porã ya barire diayeare ocũ õabeaa. Eropa arĩgũ, Israe masa yare gaji yeba majarãre yũ ocũ õabeaa, arĩ weremi Jesu igore.

<sup>27</sup> —Eropa ta ãhraa, Opũ. Eropa arĩquerecũ barisubũ dijarire diayea sã bacohrema. Gaji yeba majago yũ arĩquerecũ ta yũ sãre itamuque mũhũ, arĩ yũhrimo igo.

<sup>28</sup> Igo eroparĩcũ ĩgu yũhrimi:

—Mũhũ nomeo, yũre bũrigã umupeoa. Mũ gamero dopa ta eropa waroca, arĩmi Jesu igore.

Īgu eroparĩcũ ta igo mago mata õago wapo.

### *Bajarã dorecũrãre õarã wacũ iĩñumi Jesu*

<sup>29</sup> Eropa arĩtuhaja guare sihu waha, Galilea waĩcũriya tũro pohrogue sihu ejami daja. Pũhrũ utãgugue mũria, erogue doajami. <sup>30</sup> Ero ĩgu doacũ masa bajarã erama. Eropirã bajarã dorecũrãre aĩ erama. Curimasibirãre, cuiiri ĩhajabirãre, yujupũ ñero guburucũrãre, apayuriri árĩrãre, wereniguimasibirãre, bajarã gajirã dorecũrãre ĩgu pohrogue aĩ erama masa. Eropa aĩ erarã Jesu guburi pohrogã apima erã. Erã eropa duhupira pũhrũ õarã wacũ iimi Jesu erãre. <sup>31</sup> Īgu eropa iicũ ãarã masa ĩhamaria wama. Wereniguimasibirinirã erã wereniguicũ ãarã, apayuriri árĩnirã erã õarã wacũ ãarã, curimasibirinirã erã curicũ ãarã, cuiiri ĩhajabirinirã erã ãacũ ãarã, ĩhamaria wama erã. Eropirã õpa arĩma:

—Mari Israe majarã mari Opu Goãmũ turagu òagu àhrimi, arĩ umupeoma erã Goãmũre.

*Cuatro mil gohrare masa bajarãre barire oñumi Jesu*

*Mr 8.1-10*

<sup>32</sup> Ìgu eropa iira pũhrũ Jesu guare ìgu buherãre sihubeo arĩmi:

—Oã masa yũ mera ùhrenũ gohra árĩtuhajama. Erãre bari pehrea waca. Eropigu erãre mojomoro ìhaa. Erã babiriquererã erã ya wirigue dujaacũ gamebirica. Mague warã erã oaboarã turabiribocoma. Eropigu erãre bari ejotudiaca, arĩmi ìgu.

<sup>33</sup> Ìgu eroparĩcũ gua ìgu buherã ìgure serẽpibũ:

—¿Duhpii mari òguere masa marioguere barire bocabocuri erã bajarã masare ejoburire? arĩbũ gua ìgure.

<sup>34</sup> —¿Dinucũ dipuru pan dipurure opari mũa? arĩmi guare.

—Siete pan dipuru, bajamerãgã waire opaa, arĩ yũhrĩbũ gua.

<sup>35</sup> Gua eroparĩcũ peegu ìgu masare taa weca doadoremĩ. <sup>36</sup> Tuhajanugu siete pan dipurure, waigã sãre aĩ, ìgu Pagure “Òhaa,” arĩ serẽtuhaja, pan dipurure nuha, guare ìgu buherãre omĩ. Eropirã gua ìgu buherã iri barire masare guerebũ. <sup>37</sup> Eropirã masa irire baha, yapia wama. Erã ba dũharare siete pui ri gohra aĩ gameneo ùjũtu dobobũ gua. <sup>38</sup> Ero banirãre ùma dihtare queocũ cuatro mil gohra árĩma. Nome, majirãgã sã árĩma. <sup>39</sup> Erã eropa batuhajacũ Jesu masare goerisere, dohodirugue ñaja, Magdala waĩcũri yebague guare sihu ejami.

## 16

*Fariseo masa, saduceo masa sã Goãmũ turari mera deyoro moarire Jesu iicũ ìadiariñuma*

*Mr 8.11-13; Lc 12.54-56*

<sup>1</sup> Eropi fariseo masa, saduceo masa mera Jesu pohrogue erama. “Ìgu Goãmũ ìgu obeodigu árĩbeami,” arĩ ìadiariñuma. Eropirã ìgure Goãmũ turari mera deyoro moarire ìgu ii ìhmucũ gamerima. Ìgu ii ìhmumasibiricũ “Goãmũ obeodigu árĩbeami,” arĩdiarima. <sup>2</sup> Erã ìgure deyoro moarire eropa iidorecũ Jesu yũhrimĩ erãre:

—Ñami wacũ necã òaro boyocũ ìarã “Òari ñami árĩroca,” arãa mũa. <sup>3</sup> Eropirã boyoropũre ñipicũ ìarã, “Deco ariroca,” arãa mũa. Ùmarore ìhamemujurã, “Òpa waroca,” arĩ masia mũa. Eropa òaro masiquererã ta dohpague Goãmũ turari mera mũare yũ ii ìhmuquerecũ ta ne irire òaro masibea mũa. <sup>4</sup> Dohpague majarã ñetariarã Goãmũre gamebirã Goãmũ turari mera ii ìhmurire ìadiarima. Deyoro moarire ii ìhmusome yũhũ. Goãmũ yare weremũhtadigu Jona mũrũ ìgure wadirore masituhaa mũa. Iri dihtare ìhmugũra mũare, arĩ yũhrimĩ Jesu.

Eropa arĩ weretuhaja guare sihu waha wami daja.

*Fariseo masa saduceo masa erã ñeri buherire wereñumi Jesu*

*Mr 8.14-21*

<sup>5</sup> Wũari ditarugue gua taribujarã panre cãdijicãnirã árĩribũ. <sup>6</sup> Eropigu Jesu guare weremĩ:

—Fariseo masa saduceo masa erã pan bũgacũ iiburire òaro masique mũa. Gũhya àhraa, arĩ weremĩ guare:

<sup>7</sup> Ìgu eroparĩcũ pee wisirã gua basi irire wereniguibũ.

—Mari panre mari aĩgãribiricũ ìagu eropa arĩcumĩ ìgu, arĩ pepiribũ gua.

<sup>8</sup> Gua eropa arĩrare masigu, guare serẽpimi:

—¿Duhpirã panre mũa cãdijirare guñari mũa? Merogã gohra yũre umupeoa mũa.

<sup>9</sup> ¿Masinibeari mũa? ¿Cinco mil ùmare cinco pan dipurure yũ nuha orare guñabeari



mua? ¿Erã baha yapira pũhrũ doce puiri gohra mua Ƴjũtu doborare guñabeari mua? <sup>10</sup> ¿Eropirã daja siete pan dipurure nuha, cuatro mil Ƴmare yũ ora sãre guñabeari mua? ¿Erã baha yapira pũhrũ dinũcũ puiri gohra mua Ƴjũtu doborare guñabeari mua? <sup>11</sup> ¿Eropirã pan bũgacũ iiburire yũ werecũ duhpirã ðaro peebeari mua? Eropa arĩgu pan gohrare arĩgu iibeaa. Fariseo masa, saduceo masa erã pan bũgacũ iiburire ðaro iique, arĩgu pan gohrare arĩgu iibeaa, arĩ weremi ĩgu guare.

<sup>12</sup> ĩgu eropa arĩ werecũ gua masibũ. “Pan bũgacũ iiburire,” arĩgu pan gohrare arĩgu iibirimi. Eropa arĩgu fariseo masa, saduceo masa erã buherire arĩgu iidi árĩrimi guare. “Erã ya buherire peebiricãque,” arĩgu iimi.

*Jesu diaye ta Cristo ĩgu árĩrire wereñumi Pedro*

*Mr 8.27-30; Lc 9.18-21*

<sup>13</sup> Eropi Jesu mera warã Cesarea Filipino waĩcũri maca pohro árĩri macague ejabũ gua. Eropigu iri macague gua ejara pũhrũ Jesu guare ĩgu buherãre serẽpiĩami:

—¿Nihino árĩcũri yũhũ masa erã pepicũ? arĩ serẽpimi ĩgu.

<sup>14</sup> —“Ñu waĩyegu ãhrimi,” arĩma mũre gajirã. Gajirã “Elia ãhrimi,” arĩma. Gajirãpũ “Jeremia árĩbocumi o gajigu Goãmũ yare weremũhtanirã mera majagu árĩbocumi,” arĩma, arĩ yũhribũ gua ĩgure.

<sup>15</sup> —¿Mũapũ pepicũ nihino árĩcũri yũhũ? arĩ serẽpimi ĩgu guare daja.

<sup>16</sup> Simo Pedropũ yũhrimi:

—Mũhũ Cristo Goãmũ obeodigu ãhraa. Goãmũ ojocarigu magũ ãhraa mũhũ, arĩ yũhrimi Simo Pedro.

<sup>17</sup> —Simo, Jona magũ, mũhũ mucubirigu ãhraa. Őpa arĩ mũ yũre yũhrira masa erã werera árĩbeaa. Yũ Pagũ Ƴmaro majagupũ irire mũre masicũ iiami. <sup>18</sup> Mũre arĩgu tiiaa. Mũhũ Pedro waĩcũgu ãhraa. (Pedro arĩgu Ƴtãye arĩgu iipũ.) Iye Ƴtãye weca wũari wihire yũ iibodiro dopa ta yaharãpũre yuju curu wũari curu árĩcũ iigũca yũhũ. Eropigu watĩ ĩgu yarã mera yaharãre tarinũgasome. Eropirã yaharã ne peamegue wasome. <sup>19</sup> Ƴmaro majagu mari Opũ ĩgu árĩro maja sawire mũre ogũra. Eropigu i yebaguere mũ iidorebiricũ yũ sã Ƴmarogue arĩgu iidoresome. I yebaguere mũ iidorecũ Ƴmarogue yũ sã iidoregũra, arĩmi Jesu.

<sup>20</sup> ĩgu eropa arĩra pũhrũ guare ĩgu buherãre weremi:

—Yũre “Cristo ãhrimi ĩgu,” ne arĩ weresiribiricãque gajirãre, arĩmi guare.

*Jesu ĩgu sĩriburiñere, ĩgu masa mũriaburiñe sãre wereñumi*

*Mr 8.31-9.1; Lc 9.22-27*

<sup>21</sup> Irisubure ta Jesu guare ĩgu buherãre ðaro werepehonũgami:

—Jerusalẽgue yũre waro gahmea dohpaguere. Eroque majarã, mũrã, pahia oparã, mari masare buherã sã yũre ñero iirãcoma. Eropirã yũre wejẽrãcoma. Eropa ta ñero tariro gahmea yũre. Eropigu Ƴhrenũ pũhrũ ta masa mũriagũca, arĩ weremi guare ĩgu.

<sup>22</sup> ĩgu eroparĩcũ peegu Pedropũ gajipũ ñarigã Jesure aĩgã, ĩgure ðpa arĩmi:

—Opũ, eropa arĩbiricãque. Mũ arĩro dopa wabiricãporo. Mũre erã wejẽbiricãporo, arĩrimi ĩgu Jesure.

<sup>23</sup> ĩgu eroparĩcũ peegu Jesu majinũgaja, ĩgure ðpa arĩmi:

—Satana iro dopa wereniguigu iiaa mũhũ. Eropa arĩbiricãque. Mũ pepiri masa ya pepiri ãhraa. Goãmũ ya pepiri árĩbeaa. Eropigu yũ iiborore cãhmotadiaa mũhũ, arĩmi Jesu Pedroro.

<sup>24</sup> ĩgu eropa arĩra pũhrũ guare weremi:

—Yujugu yũ mera majagu árĩdiagũ, ĩgu gamero iidarire duhucãgũcumi. Eropigu ĩgu yũ mera majagu árĩri dipuwaja ñero tarigũcumi. Eropa ñero tariqueregu ta yahare iiniguicãgu árĩgũcumi. <sup>25</sup> Yujugu masũ ĩgu ya árĩburi dihtare pepigu ĩgu

dederea wagucumi. Eropigu yujugu masu yaha árĩburi dihtare iigu árĩpehrerĩnuri yu mera umarogue ðaro árĩgucumi ĩgu. <sup>26</sup> Yujugu masu i yeba majare árĩpehrerire opaqueregu peamegue wagu ðarire wajatasome. Eropigu i yebague opaburi dihtare guñagu, ĩgu sĩrigu waburire guñabigu ĩgu sĩporã mera peamegue dederegucumi. <sup>27</sup> Yũhu masu Goãmu obeodigu yaharã anyua mera i yebague dujariguca. Yu Pagu ĩgu goesiriri mera dujarigu árĩpehrerã masare erã ñeri iira dipuwaja dipuwaja moagura. Erã ðaripure erã iicũ ðaro iigura erãre. <sup>28</sup> Diaye arĩgu tiiaa. Yujurãyeri mua õguere arĩrã mua sĩriboro core yure yu opu arigu arĩcũgue ĩarãca, arĩ weremi Jesu.

## 17

### *Jesu ĩgu dũpũre gohrotoñumi*

*Mr 9.2-13; Lc 9.28-36*

<sup>1</sup> Eropi seis nuri pũru Jesu Pedre, Santiagore, ĩgu pagu magu Ñu sãre umadigu utãgugue erã dihtare sihumuriapu. <sup>2</sup> Umarogue erã murijara pũru erã ĩhabeoro ĩgu dũpũre gohrotopũ. ĩgu diapo abe umu majagu iro dopa gohra goesiriyoro. Eropiro ĩgu suhri goesiriri suhri ðaro boreriñe wayoro. <sup>3</sup> Mata iribojegue majarã Moise muru Elia muru sã dehyoãnorã. Eropirã Jesu, Moise, Elia mera ĩgu weretamucũ ĩãnorã erã urerã ĩgu buherã. <sup>4</sup> Eropigu Pedro Jesure arĩpu:

—Opu, mari ohõ arĩcũ ðadiaa. Mu gamecũ uhre wihigã iirã. Mu ya wihigã, Moise ya wihigã, Elia ya wihigã iirã mari, arĩpu.

<sup>5</sup> ĩgu eropa arĩ wereniguirisubu, imica curu ðaro goesiriri curu erãre cãhmotacãyoro. Eropa wacũ imica curu pohecague Goãmu ĩgu wereniguri busuyoro:

—Ihĩ yu magu yu mahigu ãhrimi. ĩgu mera mucubiria. ĩgure peeque, arĩri busuyoro.

<sup>6</sup> Eropa arĩro caricũ peerã ĩgu buherã uca mehmereja wañorã. <sup>7</sup> Erã eropa wara pũru Jesu erã pohroque eja, erãre buacare ñahpu:

—Wahgãnugaque mua. Gũbircãque, arĩpu ĩgu erãre.

<sup>8</sup> ĩgu eroparĩcũ erã ĩhabeo, Jesu dihtare ĩãnorã. Gajirãre ĩabiriñorã.

<sup>9</sup> Eropirã utãgugue erã دچارicũ Jesu erãre turaro mera arĩpu:

—Dohparagã yure eropa warare gajirãre ne werebircãque. Yũhu masu Goãmu ĩgu obeodigu yũhu sĩri masa muriara pũru irire gajirãre wereque mua, arĩpu Jesu.

<sup>10</sup> ĩgu buherãpu ĩgure serẽpiñorã:

—“Cristo Goãmu beyedigu ĩgu ariboro core Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñorã erã ĩgure:

<sup>11</sup> Jesu yũripũ:

—Diaye ta ãhraa. Eliare arimũhtadoremi Goãmu árĩpehrerire amumũhtabure.

<sup>12</sup> Ōpa arĩgu mũare arĩgu iiaa. Elia eratumajami. ĩgu eropa eraquerecũ ta erã ĩgure ne ĩha masibirima. Eropirã erã gamero dopa ñero iinirã arĩma ĩgure. Eropa ta iirãcoma yu masure Goãmu ĩgu obeodigure. Erã eropa iicũ ñero tariguca yũhu, arĩpu Jesu.

<sup>13</sup> ĩgu eropa arĩ werecũ erã peeñorã. “Elia,” arĩgu, Ñu waĩyegure weregu iipu. Irire masiñorã pare erã.

### *Jesu ñama sĩriri mũrare dorecũgure tauñumi*

*Mr 9.14-29; Lc 9.37-43*

<sup>14</sup> Eropirã utãgugue murijanirã erã urerã Jesu mera دچارarã gua pohroque erama bajarã masa arĩroque. Erã eracũ ĩagu yujugu umu Jesu pohroque eja, merejami.

15 —Opu, yu magure mojomoro ñaque. Īgu ñama sīriri mūrare dorecugu āhrimi. Eropigu ĩgu ñetariaro tarimi. Bajasuburi peamegue mehmerejamurimi ĩgu. Yujuyerisuburi diaguere yuri ñajamurimi. 16 Eropigu ma buherā pohroque aī erarabu. Erā ĩgure oagu wacū iimasibirama, arīmi ĩgu Jesure.

17 Jesu arīmi ero arīrāre:

—Dohpague majarā ma ñerā āhraa. ¿Yure ne umupeobirigohracāri? Yoari boje maure buherabu yuh. ¿Dipē yoari boje yure ma garibori? ĩgure aīgārique yure, arīmi Jesu.

18 ĩgu majigure erā aī eratuhaJacū ĩha Jesu watire tuhri cóami. Eropigu mata oagu wami ĩgu magu.

19 Puhru gua ĩgu buherā gua seyaro arīrā Jesure serēpibu:

—¿Duhpirā guapu ĩgu magure watire cóamasibirayuri? arī serēpibu gua.

20 Jesu yuhrimi:

—Yure daberogā umupeoa ma. Diaye ta maure weregu iiaa. Goāmure “Diaye ta iigu āhrimi,” ma arī umupeorā miriyegā mostazaye pegā ma umupeoquererā irigu utāgure “Sohogue waque,” ma arīcū, waha waroca. Goāmure eropa umupeorā arīpehrerire iimasia ma. 21 Ino watire ma cóadiarā Goāmure burigā serēro gahmea maure. Eropirā ba duhuro gahmea Goāmure serēmorā, arīmi Jesu guare.

*Dipaturi Jesu ĩgu sīriburiñere ĩgu masa mūriaburiñe sāre wereñumi*

*Mr 9.30-32; Lc 9.43-45*

22 Eropi Galilea yebague gua curicū, Jesu guare weremi:

—Yuh masu Goāmu ĩgu obeodigu āhraa. Masa yure ñeha, gajirāguere yure wiarācoma. 23 Eropa yure erā wiara puhru wejērācoma erā. Eropa erā wejēdigu uhrenu puhru masagūca, arīmi ĩgu guare.

Īgu eropa arī werecū pee burigā bujawerebu gua.

*Goāmu wihi maja wajayeburire serēpiñuma gajirā*

24 Eropirā Capernaum macague gua ejacū, Goāmu wihi maja wajayeburire wajasea corerā Pedro pohroque eja, ĩgure serēpiñama:

—¿Maure buhegu Goāmu wihi maja arīburire wajayeri ĩgu? arī serēpima erā.

25 —Wajayemi ĩgu, arī yuhrimi Pedro.

Īgu eropa arīra puhru wihigue ĩgu ñajacū ta Jesu Pedore serēpimūhtami:

—Simo, ¿dohpa arī pepiri mūhu? ¿I yeba majarā oparā ñehmarāpūre waja aīri ma pepicū? ¿Erā mera majarāre wajaseari? ¿O gaji yeba majarāpūre wajaseari? arī serēpimi ĩgu Pedore.

26 —Gaji yeba majarāpūre wajaseama, arī yuhrimi Pedro.

Īgu eroparīcū Jesu weremi:

—Eropigu opu ĩgu ya yeba majarāre wajaseabirimuririmi. 27 Eropa arīquerecū ta wajasea corerāre guacū iidiabeaa mari. Eropirā wajayerāca. Ditarugue waque. Eroque eja wejericārore mehyuque. Eropigu waimu bamūhtadigūre tara suaque. Eropigu ĩgu waimu disiroque niyerusero bocajagūca mūhu. Irise queoro wajacūroca. Yure, ma sāre Goāmu wihi maja arīburire erā wajaseacū oaro queoro sihajaroca irise. Irisere bocajagu mari wajamoriñere wajayepohogu waque, arīmi Jesu Pedore.

## 18

*Jesu ĩgu buherāre erā weca opu arībure wereñumi*

*Mr 9.33-37; Lc 9.46-48*

<sup>1</sup> Irisubure gua Jesu buherā ĩgu pohroque eja serēpibu ĩgure:

—¿Umaro majagu ñgu opu áriroguere gua mera majagu nihino wabocuri áripehrerã weca opu? arĩ serẽpibũ gua.

<sup>2</sup> Gua eroparĩcũ Jesu majigugãre sihubeo, ñgugãre gua watope duhudobomi. Duhudobotuhaja guare arĩmi.

<sup>3</sup> —Diaye mũare were purumujugũra. Oã majirãgã Goãmũre erã opu gohra pepima. Eropirã mũa sã erã iro dopa ta pepirã, ðarire gohrotorã umaro majagu opu áriroguere warãca. Erã iro dopa pepibirã opu ñgu áriroguere wasome mũa.

<sup>4</sup> Eropigu umaro majagu ñgu opu áriroguere eropa pepicãgu, ihĩ majigugã dopa pepigu ta gajirã tauro opu wahami. <sup>5</sup> Eropirã yahare iimorã ðpa áriugãre gamerã, yũ sãre gahmea mũa, arĩ weremi Jesu guare.

*Ñerire iicũ guhya ãhraa arĩ wereñumi Jesu*

*Mr 9.42-48; Lc 17.1-2*

<sup>6</sup> Eropigu ðpa werenemomi:

—Ñgã dopa áriugũ yũre ne umupeogũre weregũra mũare. Yujugũ ñgã iro dopa áriugũre ñerire iidoredigũ ñgu ñetariaro tarigũcumi. Gajigũre masa ñgu wũnũgũre wũariye utãye mera dirisiu, wũariyague ñgũre cóãcũ ñero wabocumi ñgu. Eropigu ñgã dopa áriugũre ñerire iidoredigũ wũariyague erã cóãdigũ tauro ñero tarigũcumi. ñgu turaro dipuwaja moasũgũcumi. <sup>7</sup> Masare ñerire iicũ iiri ãhraa. Irire iirã i yeba majarã ñero tarima. Gajirã ñerire iidorema gajirã masare. Erã ñerire iidorenirãpũ erã tauro ñetariaro tarirãcoma.

<sup>8</sup> “Mũ mojoto mera ñero iigu iri mojtore mũ tabe cóãbodiropa dopa ta iri ñerire duhuque. Irire duhubigu peamegue wagũca. Eroguere ne peame yaribea. Mũ mojtore mũ cóãcũ iri dũca dihta cohmoboya. Eropigu mũpũ epasi áriqueregu ta pũhrũ Goãmũ mera áriugũca. Mũ pe mojoto mera áriugũre peamegue ñgu cóãcũ ñetariaro tarigũca. Eropigu iri ñeri iiripũre duhuque. Mũ guburu mera ñero iigu iri guburu sãre mũ tabe cóãbodiropa dopa ta iri ñerire duhuque. Irire duhubigu peamegue wagũca. Eroguere ne peame yaribea. Mũ guburure mũ cóãcũ irisi dihta cohmoboya. Eropigu epasi áriqueregu ta pũhrũ Goãmũ mera áriugũca. Mũhũ pe guburu mera áriugũre mũre peamegue cóãcũ mũ ñetariaro tarigũca. Eropigu iri ñeri iiripũre duhuque. <sup>9</sup> Mũ cuiru mera ñero iigu irirure mũ gorawea cóãbodiropa dopa ta iri ñerire duhuque. Irire duhubigu peamegue wagũca. Eroguere ne peame yaribea. Mũ cuirure cóãcũ iriru dihta cohmoboya. Yujupũ cuiru mariquerecũ ta pũhrũ Goãmũ mera áriugũca. Mũre pe cuiru mera áriugũre peamegue mũre cóãcũ, mũ ñetariaro tarigũca. Eropigu iri ñeri iiripũre duhucãque, arĩmi Jesu.

*Oveja dederedigu queorire wereñumi Jesu*

*Lc 15.3-7*

<sup>10</sup> Eropigu gua sãre werenemomi:

—Ne, oã majirãgãre doobiricãque. Mũare arĩgu tiiaa. Erãgãre ñhadiburã anyua umarogue yũ Pagũ pohroque eropa áriñiguima. <sup>11</sup> Yũhũ masũ Goãmũ ñgu obeodigu i yebague dederebonirãre taugũ arigu iibũ yũhũ, arĩ weremi Jesu.

<sup>12</sup> Eropa arĩtuha ðpa arĩ queorire ahmu wereniguimi.

—Ovejare ñhadibugũ cien ovejare opagu yujugũ oveja dederea wacũ ñagu ðpa iigũcumi erãre ñhadibugũpũ. Gajirã ovejare noventa y nueve ovejare erã bari campogue duhudobo, dederedigũre amagu wagũcumi. <sup>13</sup> Diaye ta arĩgu iiaa mũare. ñgũre bocagu bũrigã mucubirigũcumi ñgu. Gajirã noventa y nueve dũhyarã mera mucubiridigu áriqueregu erã tauro ñgu bocadigũpũre mucubirigũcumi. <sup>14</sup> Eropa ta mari Pagũ umaro majagu oãgã iro dopa áriã sãre erã dederecũ gamebeami, arĩmi Jesu.



*Mu acaweregu mure ñero iicũ òpa iique, arĩñumi Jesu*

*Lc 17.3*

<sup>15</sup> Eropa arĩtuhaja òpa werenemomi Jesu:

—Mu acaweregu mure ñero iicũ ìgu mera weretamugu waque. Mua seyaro irire weretamuque. Mu eropa iicũ ìgu mure peebocumi. Ìgu peecũ “Mure dipaturi ne òpa iisome yũhũ,” ìgu arĩcũ mu acaweregure dipaturi wapicu iiguca mũhũ. <sup>16</sup> Mure ìgu peediabiricũ tamerare yujugu mera wadiagu, o perã mera wadiagu, erãre wapicugã dipaturi ìgure wereniguigu waque daja “Erã sã peeporo,” arĩgu. <sup>17</sup> Eropigu mu mera majarã sãre ìgu peediabiricũ arĩpehrerã Jesu yarã mera gamenere ìgure weresãque. Eropirã Jesu yarã gamenererã sãre ìgu peediabiricũ ìarã Goãmure masibigu ñegu arĩro dopa iique ìgure.

<sup>18</sup> “Diaye ta muare arĩgu iiaa. I yeba mua yaharã yaha dorerire oparãca. Eropirã mua i yebare iidorebirirare yũ sã umarogue arĩgu iidoresome. I yeba mua iidorerare yũ sã umarogue iidoreguca.

<sup>19</sup> “Dipaturi muare ire weregura daja: Mua perã Goãmure sererã, yujuro mera pepirã arĩcũ, yũ Pagu umaro majagu irire muare ogucumi. <sup>20</sup> Perã o urerã yaharã yahare iimorã erã gamenerecũ yũ sã erã mera ãhraa, arĩ weremi Jesu.

<sup>21</sup> Pũhrũ Pedro Jesu pohroque eja serẽpimi:

—Opũ, ¿yũ acaweregu mu yagu ìgu dinucusuburi yure ñero iicũ ìagu irire cãdijitugucuri yũhũ? ¿O siete suburi ìgu iicũ cãdijitugucuri yũhũ? arĩ serẽpimi Pedro.

<sup>22</sup> Jesu yũhrimi:

—Sietesuburi dihta mure ìgu ñero iirare mu cãdijicũ ero wabeaa. Bajasuburi ìgu mure ñero iicũ sãre cãdijique, arĩmi ìgure.

*Pohro majagu gajigu ìgu wajamorare ìgu cãdijidiabirira queorire wereñumi Jesu*

<sup>23</sup> Eropigu Jesu òpa werenemomi guare:

—Umaro majagu opu arĩri werediacũ òpa ãhraa. Yujugu opu ìgu pohro majarãre erã ìgure wajamorare wajayepheho dorediarĩñumi. <sup>24</sup> Erã wajamorare ìgu queonugacũ, ìgure mohme corerãpu wũaro wajamogure ìgu pohroque aĩgãriñuma. Wajamogupu wũaro wajamoñumi opure. <sup>25</sup> Eropigu ìgu wajayemasibiricũ ìagu ìgu opu ìgure, ìgu marapore, ìgu porã sãre pohro majarã acu, erãre gajirãre duadiarĩñumi ìgu wajamorire wajaseagu. <sup>26</sup> Ìgu eropa duadiacũ wũaro wajamogupu mereja, ìgu opure turaro serẽñumi: “Opũ, guare gajirãre duabiricãque. Mojomoro ìagu corenique. Mure wajayephehoguca,” arĩñumi ìgu ìgu opure. <sup>27</sup> Ìgu eroparĩcũ peegu ìgure mojomoro ìagu, ìgu wajamorare eropa ta cãdijipehocãñumi.

<sup>28</sup> “Ìgu eropa iira pũhrũ wajamodigupu waha, gajigu pohro majagure bocañañumi. Ìgupu merogã wajamoñumi ìgure wajamodigupure. Eropa bocajagu yojaro mera ñeañumi ìgure. “Yure mu wajamorare wajaye purumujuque duru,” arĩñumi ìgu ìgu mera majagure. <sup>29</sup> Ìgu eroparĩcũ gajigu pohro majagupu mereja ìgure burigã serẽriñumi: “Yure mojomoro ìaque. Merogã corenique. Mure wajayephegura,” arĩriñumi gajigu pohro majagu ìgure. <sup>30</sup> Ìgu eropa arĩ serẽquerecũ ta ìgu yũhribiriñumi. Eropigu ìgu gajigu pohro majagupure peresu iidoreñumi ne ìgu wajayephehocũgue. <sup>31</sup> Wũaro wajamodigu ìgure merogã wajamogupure ìgu eropa iicũ ìha papũri, gajirã pohro majarãpu erã opure weresãrã wañuma. <sup>32</sup> Erã eropa arĩ weresãcũ peegu erã opu erãre weresãdigure sihubeo òpa arĩñumi: “Mũhũ ñetariagu ãhraa. Mũhũ yure burigã serẽcũ mu wajamorare cãdijipehocãrabugũ yũhũ mure.

<sup>33</sup> Mure yũ eropa iiquerecũ ta mupu merogã wajamogupure cãdijibirayoro mũhũ. Mu wajamorare yũ cãdijidiro dopa ta ìgu sãre mu cãdijicũ òatariaboya. ¿Duhpigu ìgure mojomoro ìabirari ìgure eropa iigu mũhũ?” arĩñumi ìgu opu ìgure. <sup>34</sup> Eropa



arĩgu burigã guagu, peresu iĩnumi ĩgu pohro majagure ne ĩgu wajayephocãgue, arĩ weremi Jesu.

<sup>35</sup> Eropigu õpa arĩ i queorire weretumi:

—Eropa ta iigucumi yu Pagu umaro majagu mware. Mwa arĩpehrerã mwa acawererã mware ñero iirare õaro mwa cãdijipehobicũ ĩgu mware dipuwaja moagucumi, arĩmi Jesu.

## 19

*Erã marasã nomere erã cóãcũ õabeaa, arĩ wereñumi Jesu*

*Mr 10.1-12; Lc 16.18*

<sup>1</sup> Irire ĩgu eropa arĩ werera pũhrũ ĩgu Galilea árĩdigũ Judea yebague guare sihu wami. Dia Jordán waĩcũriya gajipu masegue ejabũ. <sup>2</sup> Erogue gua wacũ bajarã masa guare nurusiagãma. Erã mera majarãre dorecũrãre õarã wacũ iimi ĩgu.

<sup>3</sup> Eropi yujurãyeri fariseo masa gua pohro erama. Jesure weresãdiarã, ñero ĩgu wereniguicũ peediarã, ĩgure õpa serẽpima:

—¿Mari marapore mari gamero cóãcũ õhari? ¿Mari doreripu eropa ta iidoreri mwa pepicũ? arĩ serẽpima erã.

<sup>4</sup> Jesu yũhrimi.

—¿Goãmũ yare erã gojarapũgue ne ire buhebiriniari mwa? Õpa arĩ gojara ãhraa: “Negohraguere i yebare ĩhacũnugudigu umũ, nomeo sãre iipũ,” arĩ gojañumi Moise.

<sup>5</sup> Õpa ãhraa ĩgu arĩ gojanemora: “Eropigu umũ ĩgu pagu sumarãre cohã wiria, ĩgu marapo mera árĩgucumi. Eropirã erã perã árĩquererã ta yuju dũpũ iro dopa ta árĩrãcoma,” arĩ gojañumi. <sup>6</sup> Eropirã erã perã iro dopa árĩbeama. Yuju dũpũ iro dopa ta árĩrã iima. Goãmũ doreri mera mojoto dirima. Eropirã duhubiricãro gahmea erãre, arĩmi Jesu erãre.

<sup>7</sup> ĩgu eroparĩcũ fariseo masa serẽpima daja:

—Mũhũ eropa werequerecũ ta õpa arĩ gojañumi Moisepũ: “Mwa marapore cóãdiagũ paperapũgue irire gojaque. Eropa gojagu iripũre mwa marapore mwa ora pũhrũ igore cóãmasia mũhũ,” arĩ gojañumi Moise. ¿Mwa arĩro dopa arĩquerecũ ta duhpigu Moisepũ eropa arĩ gojayuri? arĩ yũhrima erã ĩgure.

<sup>8</sup> Jesu yũhri gamemi erãre:

—Goãmũ dorerire mwa ñecũ sumarã erã iidiabiricũ ĩagu “Eropa ta wacuraporo,” arĩgu, “Mwa marapore cóãmasia,” arĩ gojañumi Moise. ĩgu eropa arĩ gojara arĩquerecũ ta negohraguere mwa marasã nomere cóãcũ gamebiripu. <sup>9</sup> Mware arĩgu tĩaa: Masũ ĩgu marapo igo gajigu mera ñero iibiriquerecũ ta igore cóãgu, gajigo mera marapocũgu, ĩgu gajigo mera ñero iigu iimi. Eropigu ihĩ cóãdigo mera marapocũgu sã igo mera ñero iigu iimi, arĩmi Jesu.

<sup>10</sup> ĩgu eroparĩcũ peerã, gua ĩgu buherãpũ õpa arĩbũ:

—Eropa umũ ĩgu marapo mera erã game cóãbiricũ, maripũre ne marapo marirã arĩcũ õaboca guare, arĩbũ gua.

<sup>11</sup> Jesu yũhrimi guare:

—Mwa arĩro dopa ta arĩpehrerã arĩmasibeama. Goãmũ marapocũdorebirinirã dihta eropa arĩmasima. <sup>12</sup> Ūma marapocũmasibirã yujurãyeri ãhrima. Yujurãyeri umã ero ta poyari masa mata nomere gamebirã masa dehyoama. Gajirã masa erã ãpiritõ diuri erã weanirãpũ marapocũmasibeama. Gajirã umã umaro majagu erã Opũ yare itamudiarã marapocũbeama. Eropirã oã marapocũdiabirã eropa ta pepicãrã, eropa ta erã arĩ ojogorocũcũ õhaa, arĩmi Jesu guare.

*Majirãgã ya arĩburire Goãmũre serẽbasañumi Jesu*

*Mr 10.13-16; Lc 18.15-17*

13 Eropi masa majirãgãre Jesure mohmepiñadoremorã Jesu pohrogue aĩ erama. Eropa aĩ erarã, erã Jesure ïgu mojtore erãgãre mohmepidorediama. Eropirã erãgãre erã õaro árĩburire Goãmure serẽbasadorediama Jesure. Erã eropa iicũ ïarã gua ïgu buherã erãre turiribu. 14 Gua eropa turicũ ïagu, guare Jesu õpa arĩmi:

—Majirãgã yu pohrogue ariporo. “Waque,” arĩbiricãque erãgãre. Erãgã Goãmure erã opu pepima. Eropirã ïgu umaro majagu ïgu opu árĩroguere oãgã iro dopa pepirã àhrima erogueru, arĩmi Jesu.

15 Eropa arĩtuhaja erã majirãgãre mohmepituhaja waha wami.

*Doberi opagu Jesu mera weretamuñumi*  
*Mr 10.17-31; Lc 18.18-30*

16 ïgu eropa iira pũru yujugu masu mamu Jesu pohrogue eraa, serẽpimi ïgure:  
—Ne mũhu õagu buhegu àhraa. ¿Yu árĩpehrerĩnuri Goãmu mera árĩdiagu, õarire iidiagu dinopure iibocuri yũhu? arĩmi ïgu.

17 —¿Dohpa arĩronore yure õagu arĩ piyuri mũhu? Goãmu dihta õagu àhrimi. Árĩpehrerĩnuri Goãmu mera árĩdiagu ïgu dorerire iique, arĩmi Jesu.

18 —¿Di doreripure arĩgu iiri? arĩ serẽpinemomi ïgu.

Jesu yãhrimi:

—Masare wejẽbiricãque. Gajigu marapo mera árĩbita. Yajabita. Guyabita. 19 Mu pagu sumarãre umupeoque. Mu basi mahiro dopa ta mu pohro árĩgu sãre mahique. I dorerire iiro gahmea, arĩmi Jesu.

20 —I dorerire ne tarinugabirimurabu yũhu. ¿Ñeheno duhyari yu iinemoburi yu árĩpehrerĩnuri Goãmu mera árĩdiagu? arĩmi ïgu Jesure.

21 ïgu eroparĩcũ peegu Jesu werenemomi:

—Mũhu Goãmu mera õaro árĩdiagu mu yare árĩpehrerire duagu waque. Eropa duagu árĩpehreri niyerure mu wajatarare mojomorocãre oque. Mu eropa iicũ wũaro mu ya umaroguere Goãmu pohroguere árĩyuroca. Mu eropa iira pũru yu mera majagu árĩbu arique, arĩ weremi Jesu.

22 ïgu wũaro opagu árĩpu. Eropigu Jesu ïgure eroparĩcũ peegu ïgu oparire mojomorocãre odiabigu, turaro bujawere suabiri waha wami.

23 ïgu eropa wacũ Jesu guare ïgu buherãre werenemomi:

—Diaye ta mũare arĩgu iiaa. Doberi oparã Goãmure ïgu opu árĩroguere erã wadiacũ diasa àhraa. 24 Mũare werenemogura: Camellopu awĩru gobegãgue ïgu ñajatariwereadiacũ masiya mara ïgure. Eropa ta doberi opagu Goãmu opu ïgu árĩroguere wacũ diasataria, arĩmi ïgu.

25 ïgu eroparĩcũ gua ïhamaria wa gua basi õpa arĩbu:

—Yaho. ïgu arĩro dopa ta diaye arĩcũ, ne yujugu masure Goãmu taubiribocumi ïgu pohro waborore, arĩbu gua gua basi.

26 Gua eroparĩcũ Jesu guare ïhabeo, õpa weremi:

—Masa erã bocatiuro erã õaro iira mera Goãmu pohroguere wamasibeama. Goãmuru masare peamegue wabonirãre taumasimi. ïgu árĩpehrerire õaro iimasipehocãmi, arĩmi ïgu guare.

27 ïgu eroparĩcũ Pedro ïgure arĩmi:

—Peenique. Guapu gua ya árĩpehrerire apipehocãbu mu mera warã. ¿Gua õpa iirã dohpa arĩrĩre wajatarãcuri gua? arĩmi ïgu.

28 —Mũare diaye arĩgu tiiaa: Pehrerĩnũ pũru árĩpehreri mama gohrotoroca. Irisubuguere yũhu masu Goãmu ïgu obeodigu yu opu doaro gosesiriro doaguca yũhu. Yũhu ero doacũ mua sã doce gohra árĩnirã oparã árĩri mera doarãca. Eropirã Israe masare doce cururi majarãre beyerãca õarã sãre ñerã sãre. 29 Eropirã mua

árĩpehrerã õari buherire yaha árĩburire iimorã, mua wirire, mua pagu porãre, mua pagu samarãre, mua porãre, mua poerire apicãnirã wãaro wajatarãca. Eropirã árĩpehrerinãri Goãmũ mera õaro árĩrãca. <sup>30</sup> Dohpaguere bajarã oparã árĩnirã mũra irisubuguere bu árĩrã dujarãcoma. Eropirã dohpaguere bajarã bu árĩnirã mũra irisubure oparã gohrotorãcoma daja, arĩ weremi Jesu guare ĩgu buherãre.

## 20

### *Igui pohe mohmerã queorire wereñumi Jesu*

<sup>1</sup> Eropi dipaturi Jesu queorire weremi daja õpa arĩgu:

—Umaro majagu opu ĩgu árĩri werediãcũ pohe opu iro dopa ãhraa. ĩgu pohe opu boyo pãri merejacũ ĩgu pohere mohmemorãre sihugu wañumi. <sup>2</sup> “Yujuse niyerusere yujunũ mohmeri wajare wajayegũra yujunũre,” arĩñumi. “Áũ,” arĩñuma mohmemorã. Erã eroparĩcũ pohegue mohmedoregu obeoñumi ĩgu erãre. <sup>3</sup> Eropigu mũugue nueve árĩcũ doberi duarogue wañumi daja. Erogue ejagu, gajirã mohmehirãre ĩañumi. <sup>4</sup> Eropa ĩagu erãre arĩñumi: “Mua sã yaha pohere mohmerã waque. Óaro wajayegũra,” arĩñumi ĩgu. <sup>5</sup> Eropirã erã pohegue mohmerã wañuma. Eropi pohe opu goeri boje árĩcũ, ñamicague tres árĩcũ sãre gajirãre mohmedoreñumi daja. <sup>6</sup> Eropi ñamicague cinco árĩcũgue doberi duarogue ĩgu wañumi daja. Erogue eja gajirã mohmeri moorãre ĩañumi. Erãre arĩñumi: “¿Ne gajino ĩbiriquererã yujunũre ĩaniguineacãri mua?” arĩ serẽpiñumi erãre. <sup>7</sup> “Ne guare mohmeri mara,” arĩ yũhriñuma erã. “Mua sã yaha pohere mohmerã waque,” arĩñumi erãre. Eropirã ĩgu arĩdiro dopa ta ĩgu ya pohere mohmerã wañuma.

<sup>8</sup> “Eropi ñamicague mohme duhurisubugue árĩcũ pohe opu ĩgu mohmerãre coregũre õpa arĩñumi: “Mohmerãre sihuque. Erã eracũ erãre wajayeque. Erã pũhrũgue mohmedorenirãre wajayemũhtaque. Erãre wajayetuha, gajirã sãre wajayetuha, yũ mohmedoremũhtanirãre wajaye ojogorocũque,” arĩñumi ĩgu. <sup>9</sup> Eropigu cinco árĩcũ mohmenũganirãre yujuse niyeruse wajayeñumi. <sup>10</sup> ĩgu eropa wajayecũ ĩarã, “Guare tauñariro wajayegũcumi,” arĩ pepiriñuma ĩgu doremũhtanirãpũ. Erã sãre yujuropa ta wajayecãñumi. <sup>11</sup> Eropirã erãre niyerure ĩgu wajayetuhajacũ erã opu mera papũri ĩgũre arĩñuma: <sup>12</sup> “Oã gũa pũhrũgue mũ mohmedorenirãpũ yuju hora ta mohmeama. Gũapũ yujunũ õaro mohmeneacarabũ. Nero abe asiami guare. Gũa eropa yoari boje mohmequerecũ ta gũa pũhrũgue mohmenũganirã sãre yujuropa wajayecãbũ mũhũ,” arĩ gũañuma erã ĩgu mera. <sup>13</sup> Erã eroparĩcũ peegu yujugũ erã mera majagũre pohe opu yũhriñumi: “Ne acaweregu, yujuse niyerusere wajayegũra, arĩrabũ mũare. Yũ eroparĩcũ yũhriabũ mua. Eropigu yũ arĩdiro dopa ta mũare wajayeabũ yũhũ. Queoro wajayeabũ mũare. Ne yajabirabũ mũare. <sup>14</sup> Eropigu yũ wajayerare aĩ wihigue dujaaque. ĩre pũhrũ yũ mohmedoredigu sãre mũare yũ wajayediropẽ ta wajayegũra. <sup>15</sup> Yaha niyeru ãhraa i. Eropigu yũ gamero dopa ta i mera wajayegũra. ¿Gajirãre tauñariro yũ wajayecũ ĩhaturiri mũhũ?” arĩñumi ĩgu pohe opu, arĩ weremi iri queorire Jesu.

<sup>16</sup> Eropa arĩgu werenemomi ĩgu:

—I queori arĩro dopa ta yaharã árĩmũhtanirãre erã pũhrũ yaharã árĩnirã sãre yujuro mera ogũcumi Goãmũ ĩgu ya õarire. Eropirã árĩmũhtanirãpũ “Guare onemogũcumi,” arĩmasibeama, arĩ weremi Jesu.

*Dipaturi Jesu ĩgu sĩriburiñere ĩgu masa mũriaburiñere wereñumi  
Mr 10.32-34; Lc 18.31-34*

17 Eropi Jerusaléngue warã yujuro mera ta waniguirã, gũare ïgu buherãre sihubeotuha, gajirũgue gũare gũa seyarore aĩgãmi Jesu. Gũa seyaro gũa árĩcũ weremi.

18 —Peeque yũre. Dohpaguere Jerusaléngue warã iiaa mari. Eroque yũ masũre Goãmũ ïgu obeodigũre ñeha, gajirãre orãcoma. Pahia oparãre, masare buherã sãre yũre orãcoma. Eropirã yũre wejẽdorerãcoma erã. 19 Eropa wejẽdorerã judio masa árĩbirãre yũre orãcoma. Erã eropa ora pũhrũ erãpũ yũre wereya, tãrarãcoma. Tuhaja, crusague pabiarãcoma yũre. Eropigũ yũ sĩrira pũhrũre Ʃhrenũ waboro gohra masa mũriagũca, arĩ weremi Jesu.

*Santiago, Ñu mera erã pago erãre serẽbasapo Jesure*

*Mr 10.35-45*

20 Eropigo Zebedeo marapo Santiago, Ñu igo porã mera Jesu pohrogue eja, merejapo ïgũre serẽbo arigo.

21 —¿Dohpa yũ iicũ gahmeri mũhũ? arĩpũ Jesu igore.

—Mũhũ opũ ñajagũ yũ porã sãre dorerã acũque. Eropa acũgũ mũ pepũri erãre doboque, arĩ serẽpo igo igo porã mera.

22 Jesu õpa arĩpũ:

—Mũa ñero tariborore masibiriquererã ta eropa serẽa mũa. ¿Dohpaguere yũ ñero tariboro dopa ta mũa sã ñero tarirã yujuro bojebocuri mũa? arĩpũ Jesu igo porãre.

—Yujuro bojerãca, arĩ yũhriñorã Santiago Ñu mera.

23 —Diaye ta ãhraa. Yũ ñero taridiro dopa ta ñero tarirãca mũa sã. Eropa mũa tarimorã árĩquerecũ ta yũ mera doremorãre mũare yũhũ beyemasibea. Yũ Pagũpũ amutuhami irire. Eropirã ïgu beyenirã dihta yũ diayepũre, yũ copũpũre doarãcoma, arĩpũ Jesu erãre.

24 Eropirã gũa gajirã diez ïgu buherãpũ erã oparã árĩburire Jesure serẽcũ Santiago, Ñu sã mera guabũ gũa. 25 Gũa eropa guacũ ïagũ Jesu árĩpehrerã ïgu buherãre sihu gameneo, õpa arĩ weremi gũare:

—Goãmũre masibirã oparãpũ masare dorerã, pũriro mera dorema. 26 Mũapũ eropa iisome mũa basi. Mũa mera majagũ opũ árĩdiagũ, árĩpehrerã ïgu mera majarãre itamugũ árĩporo. 27 Eropigũ árĩpehrerãre doregũ árĩdiagũ pohro majagũ iiro dopa ta árĩporo. 28 Eropa árĩgũ ta ãhraa yũ sã. Masare dorebiragũ arigũ iibiribũ. Yũhũ masũ Goãmũ ïgu obeodigũ árĩqueregũ ta i yebaguere masare itamugũ arigũ iibũ. Eropigũ bajarã masa erã ñero iira dipuwajare sĩribasagũ arigũ iibũ. Eropigũ masa peamegue wabonirãre taugũ arigũ iibũ, arĩmi Jesu gũare.

*Perã cuiri ïhajabirãre ïacũ iĩnũmi Jesu*

*Mr 10.46-52; Lc 18.35-43*

29 Eropi Jericógue árĩnirã gũa wacũ bajarã masa Jesure nũrũsiamã. 30 Eropi Jesu ïgu tarigãcũ perã cuiri ïhajabirã ma tũro doanirã peema. Eropa peerã õpa arĩ gaguiniguinemoma:

—Opũ Davi mũrũ pãrami, masare taubu, gũare mojomoro ïaque, arĩ gaguinima.

31 Erã eropa gaguiniguicũ masapũ erãre turima.

—Ejarimaricãque, arĩma masa erãre. Erã eropa arĩquerecũ ta erã gaguiniguidiro tauro gaguiniguinemoma daja.

—Opũ Davi mũrũ pãrami, gũare mojomoro ïaque, arĩ gaguiniguima daja.

32 Erã eroparĩcũ peegũ Jesu nũgaja erãre sihubeo serẽpimi,

—¿Dohpa yũ mũare iicũ gahmeri? arĩ serẽpimi.

33 —Opũ, gũare ïacũ iique, arĩ yũhriima erã.

<sup>34</sup> Erã eroparĩcũ Jesu erãre mojomoro ãami. Eropa mojomoro ãagũ erã cuirire mohmepimi. Ìgũ eropa mohmepicũ ta erã òaro ãha wama. Eropa ãanirã ãgũre nũrsia wahgãma.

## 21

### *Jerusaléngue ejañumi Jesu*

*Mr 11.1-11; Lc 19.28-40; Jn 12.12-19*

<sup>1</sup> Eropi Jerusaléngue gũa ejaboro core Betfagé waĩcũri macague ejamũhtanibũ gũa Jesu mera. Betfagé utãgũ Olivo waĩcũdigũ gubuye árĩbũ. Eroque ejaagũ, gũare perãre ãgũ buherã mera majarãre Jesu ãgũ core obeomũhtami. <sup>2</sup> Òpa doremi erãre:

—Si macague waque. Eroque ejarã, mata burrore ãgũ magũgã mera erã dirinugudigũre bocajarãca. Erãre boca, ãgũre diriradarire pãa aĩgãribasaque yũre. <sup>3</sup> Mũa eropa iicũ ãagũ, burro opũ “¿Duhpimorã burrore pãri mũa?” ãgũ arĩcũ peerã òpa arĩ yũhrique: “Mari ãgũ burrore gamebeoniami dohpa. Eropigũ dohparagã wiagũcumi ãgũ,” arĩ yũhrique ãgũre, arĩdore obeomi Jesu perã ãgũ buherãre.

<sup>4</sup> Eropa iimi Goãmũ yare weremũhtadigũ ãgũ arĩ gojadiro dopa ta. Òpa arĩ gojañumi iribojegue:

<sup>5</sup> Jerusalén majarãre òpa arĩ wereque: “Íaque mũa. Mũa Opũ mũa pohrogue ahrimi. ãgũ ta masare òaro ãgũ ahrimi. Burro magũgã weca arigũcumi,” arĩ wereque Jerusalén majarãre, arĩ gojañumi iribojegure.

<sup>6</sup> Jesu ãgũ obeonirã perã iri macague eja, ãgũ iidoreldiro dopa ta iĩnorã erã. <sup>7</sup> Burragore igo magũgã sãre aĩgãrima. Aĩgãrituhaja gũa weca maja suhrire tuwea aĩ, erã weca peobũ gũa. Gũa eropa iira pũhrũ Jesu ãgũgã weca mũribejami wabu. <sup>8</sup> Mũribejatuha, ãgũgã weca Jerusaléngue wami. ãgũ eropa aricũ ãarã masa bajarã ãgũ wari maha deco erã ya weca maja suhrire tuwea aĩ, sèopi mũhtama Jesure umupeorã. Gajirãpũ pũricũri dũpũrire mare apimũhtama “ãgũ wari maha òari maha árĩporo,” arĩrã. <sup>9</sup> Eropirã ãgũ core warã, ãgũ pũhrũ nũrsiarã mera òpa arĩ gaguĩnguima:

—Davi mũrũ pãramire marire itamubure umupeorã. Ihĩ Goãmũ ãgũ obeodigũ òaro arĩporo. Òmaro majagũre “Turagũ ahrimi,” arĩ umupeorã, arĩ gaguĩnguima masa.

<sup>10</sup> Eropirã Jerusaléngue erã eropa ejacũ ero majarãpũ ãhamaria wama.

—Cue, ¿nihino ahriri ihĩ? arĩ game serẽpima erã basi.

<sup>11</sup> Gajirã masa yũhrima:

—Ihĩ Goãmũ yare weremũhtagũ Nazare majagũ Jesu waĩcũgũ ahrimi, arĩ werema erã masare.

### *Goãmũ wihigue ejañumi Jesu*

*Mr 11.15-19; Lc 19.45-48; Jn 2.13-22*

<sup>12</sup> Pũhrũ Goãmũ wihigue ejami Jesu gũa mera. Iri wihigue eja ñaja wami. Ñajaja masa duadoarãre asũrã sãre bocajagũ erãre cohã wiucãmi iri wihigue. Eropigũ niyerure game gohroto doarã ya mesarire yomemuju, aĩ majipi beomũrimi. Bujare duarã erã doari pẽrori sãre eropa ta iimi. <sup>13</sup> Eropa ãgũ òpa arĩmi:

—Goãmũ yare erã gojarapũ òpa ahraa: Goãmũ arĩmi: “Yaha wihi Goãmũ mera werenigũiri wihi waĩcũroca,” arĩmi Goãmũ, ahraa ãgũ gojarapũ. Mũapũ i wihire Goãmũ wihire duadoarã game yajarã iiaa, arĩmi ãgũ erãre.

<sup>14</sup> ãgũ eropa iira pũhrũ cuirĩ ãhajabirã, curimasibirã sã Goãmũ wihiguere ãgũ pohrogue erama. Erã eropa eracũ erãre òarã dujacũ iimi ãgũ. <sup>15</sup> Eropa òarire ãgũ iicũ ãarã, pahia oparã, masare buherã sã guama ãgũ mera. Eropirã majirãgã sã Jesure, “Davi mũrũ pãrami, masare itamubu, turagũ ahraa mũhũ,” erã arĩ umupeocũ peerã guanemoma dipaturi erã. <sup>16</sup> Eropa guarã òpa arĩma Jesure:



—¿Erã eroparĩcũ peebeari mũhũ? Eropa arĩbircãporo, arĩ dorema erã Jesure.

—Erã eroparĩcũ peea. ¿Goãmũ yare erã gojarapũre ire ne buhebiriri mũa? Majirãgãre Goãmũre òaro umupeocũ iibũ mũhũ, ãhraa Goãmũ yare erã gojarapũ, arĩmi Jesu erãre.

<sup>17</sup> Eropa arĩtuha erãre cóãgã, Betania waĩcũri macague eja, iri ñamire ero árĩmi.

*Jesu yucũgũre higuerağũre sĩridoreñumi*

*Mr 11.12-14, 20-26*

<sup>18</sup> Gajinũ boyorogue Jerusalengue ɢua dujaacũ, oaboami Jesu. <sup>19</sup> Eropa oaboagũ, ma tũro niguidigũ higuerağũre ñhanijagũ, irigũ dũcare omagũ warimi. Dũca maribũ irigũpũ. Pũri dihta árĩbũ. Dũca maricũ ñagũ Jesu òpa arĩmi:

—Irigũ yucũgũ ne dipaturi dũcacũsome, arĩmi ñgũ.

Ñgũ eroparĩcũ irigũpũ mata ñaidija wabũ. <sup>20</sup> Irigũ eropa wacũ ñarã, ɢua ñgũ buherã ñhamaria wabũ.

—¿Duhpiro mata irigũ ñaidija wahãri? arĩ serẽpibũ Jesure.

<sup>21</sup> Jesu yũhrimi:

—Ire ɢuñaque mũa. Goãmũre òaro ɢuñatura umupeoque. “Diaye ta eropa ta iigũcumĩ ñgũ,” arĩrã, “Goãmũ iisome,” arĩbirã, yũhũ irigũre iidiro dopa ta iimasirãca mũa sã. Eropirã irigũre yũ sĩridoreldiro dopa ta tauro diasarire doremasirãca mũa Goãmũre ɢuñatura umupeorã. Irigũ utãgũ sãre “Dua aĩ, wũariyague cóãdigũ árĩporo,” Goãmũre mũa arĩcũ irigũ utãgũ dija waroca. <sup>22</sup> Goãmũ irigũ ñiague ñiacũ iigũcumĩ. Goãmũre mũa umupeocũ,” Yũ serẽro dopa ta eropa waroca,” mũa arĩ ɢuñacũ, mũa serẽldiro dopa ta Goãmũ iigũcumĩ, arĩmi Jesu.

*Jesure doredigũre serẽpiñuma pahia oparã, masare buherã, mũrã mera*

*Mr 11.27-33; Lc 20.1-8*

<sup>23</sup> Eropi Goãmũ wihigue dujaja buhemi ñgũ. Ñgũ eropa buhecũ pahia oparã, masare buherã, mũrã mera ñgũ pohroque eraa serẽpima:

—¿Noa doreri mera ire eropa iigũ iiri mũhũ? ¿Noa mũre Goãmũ wihigue árĩnirãre cóãdoreari? arĩ serẽpima erã.

<sup>24</sup> Erã eroparĩcũ Jesu yũhrimi:

—Mũare yũhũ sã serẽpigũra. Òaro mũa yũre yũhricũ yũ sã mũare yũhri gameɢura.

<sup>25</sup> ¿Ñũ masare ñgũ waĩyecũ noano ñgũre waĩyedoremũriyuri mũa pepicũ? ¿Goãmũ doreyuri? ¿O masapũ doremũriyuri mũa pepicũ? arĩ serẽpimi Jesu erãre.

Ñgũ eroparĩcũ erãpũ erã basi game wereniguima:

—¿Dohpa arĩ yũhrirãcũri mari? “Goãmũ Ñũre doreñumi,” mari arĩcũ, “¿Goãmũ Ñũre ñgũ dorequerecũ ta duhpirã ñgũ wererare peebirari mũa?” arĩbocumi Jesu marire. <sup>26</sup> Oã masapũ “Diaye ta Ñũ Goãmũ yare weremũhtadigũ árĩmi,” arĩ pepima erã. Erã eropa pepirã “Ñũ ñgũ waĩyecũ Goãmũ ñgũre dorebiriñumi,” mari arĩcũ peerã masapũ ɢuarãcoma mari mera, arĩma erã erã basi. <sup>27</sup> Erã eropa arĩ werenigui amura pũhrũ Jesure yũhrima erã.

—Ñũre waĩyedoredigũre ɢua masibea, arĩma erã.

Erã eroparĩcũ peegũ òpa arĩmi Jesu:

—Irisubu tamerare yũ sã mũa serẽpirare werebeaa mũare. Yũ iirire doreɢure werebeaa mũare, arĩmi ñgũ erãre.

*Yujugũ porã iira queorire wereñumi Jesu*

<sup>28</sup> Ñgũ eropa arĩra pũhrũ Jesu queori moa werenemomi erãre:

—¿Dohpa arĩ pepirãcũri yũ òpa arĩ werecũ? arĩmi Jesu erãre. Perã pagũ árĩñumi. Tĩɢupũre òpa arĩñumi erã pagũ: “Mahũ, poheɢue mohmegũ waque,” arĩñumi.

<sup>29</sup> “Wabeaa,” arĩ yũhririñumi ñgũ magũ negohrare. Eropa arĩquereɢũ ta pũhrũɢuere

pohegue wadiariñe árīyoro daja īgure. Eropigū wañumi īgu. <sup>30</sup> Eropigū erā pagū īgu magū dūhyagu pohrogue eja, īgu tīgure īgu arīdiro dopa ta pohegue wadorerīñumi. “Áu,” arīriñumi dūhyagupū. Eropa arīqueregu ta wabiriñumi īgu. <sup>31</sup> ¿Nihinopū īgu pagū īgu dorediro dopa ta iiyuri? arī serēpimi Jesu.

—Īgu tīgupū iīñumi, arī yūhrima erā.

Erā eroparīcū Jesu weremi:

—Mūare diaye arīgu tiiaa. “Ñetariarā āhrima,” mūa arīnirāpū Goāmū opū īgu árīroguere mūa wabodiro árīquerecū ta erāpū warācoma. <sup>32</sup> Ñu waīyeri masū buhegu arigu mūare “Ōaro iirā árīque,” arī wererimi. Eropa īgu werequerecū ta īgure peebiribū mūa. Eropirā īgu dorerire yūhribiribū. Erā ñerā arīnirāpū wajasea corerāpū, nome ñero iiricūnirāpū īgure peenirā árīma. Erā eropa pee gohrotorare īabū mūa. Mūa eropa īaquererā ta mūapū ne gohrotodiabirabū. Eropirā peebirabū mūa, arīmi Jesu pahia oparāre, mūrā sāre.

*Ñerā mohme corerā queorire wereñumi Jesu*

*Mr 12.1-12; Lc 20.9-19*

<sup>33</sup> Eropi Jesu dipaturi īgu pepiri mera ōpa arī queorire moa erāre buhenemomi:

—Gajisubū mūare werenigui queoriñere yū werēcū peeque daja, arīmi. Yeba opū árīñumi. Īgu ya pohere iguidarire oteñumi. Otetuha, sārīrore nugu, iguire erā cūhra bujuburi gobere seañumi. Pohe decogue ūmari wihigā sāre iīñumi īhadibumaja ōaro. Eropigū gajirāre īgu ya pohe deco mera apiñumi erā mohme corera waja. Eropigū iri pohere erāre mohme coredoretuhaja gaji yebague waha wañumi īgu. <sup>34</sup> Iguī ñirisubū árīcū opū īgu pohro majarāre īgu ya pohe mohme corerā pohrogue obeoñumi. Pohe maja īgu oteri dūcare īgu ya sero maja dūcare aīdoregu obeoriñumi. <sup>35</sup> Eropirā pohere mohme corerāpū īgu pohro majarāre ñero iīñuma. Yujugure turaro paa, gajigure wejē, gajigure utā mera deañuma. <sup>36</sup> Pūhrū pohe opū dipaturi īgu pohro majarāre īgu obeomūhtanirā tauñariro árīri curu majarāre obeoriñumi daja. Eropirā pohere mohme corerā mūraro ta iīñuma erā sāre daja.

<sup>37</sup> “Eropigū īgu obeotudigu īgu magū árīñumi. “Yū magupure umupeorācoma,” arīgu īgure obeoriñumi. <sup>38</sup> Īgu eropa arī pepiquerecū ta pohere mohme corerā īgu magū īgu aricū īarā, ōpa arīñuma: “Pohe opū magū ahrimi īgu. Īgure wejē cóacārā mari. Eropiro i pohe mari ya pohe dujaroca,” arīriñuma erā basi. <sup>39</sup> Eropa arīrā īgure ñeha pohe tūrogue aīgā, wejēcāñuma erā īgure, arīmi Jesu erāre. Eropa arītuhaja Jesu erāre serēpimi:

<sup>40</sup> —¿Pohe opū arigu dohpa iigūcuri īgu ya pohere mohme corerāre? arī serēpimi Jesu pahia oparāre, mūrā sāre.

<sup>41</sup> —Īgu gajirāre pohere mohme coremorāre gohrotogūcumi. Árīmūhtanirāre ñetarianirāre wejēgūcumi. Īgure dūcare queoro wiamorāpūre mohmedoregūcumi, arī yūhrima erā.

<sup>42</sup> Erā eroparīcū Jesu werenemomi erāre:

—¿Goāmū yare erā gojarapū ire yūre īgu arī gojarare buhebiriri mūa?

Īhī Cristo utāye iro dopa ta āhrimi. Masa Cristore gamebirācoma. Erā gamebiri-  
querecū Goāmū īgure beye opū acumi. Goāmupū irire iimi. Īgu eropa iicū  
īarā “Ōataria,” arī pepia mari, arī gojañuma iribojegure.

¿Irire ne buhebiriri mūa? <sup>43</sup> Eropigū mūare arīgu tiiaa yūhū. Goāmū īgu dorerire iirā īgu ōari orire opaboya mūa. Mūa iibiricū īha gajirāpūre ogūcumi Goāmū. Gajirā masapū īgu dorero dopa ta iirācoma. <sup>44</sup> Yūre gamebirāpū yū dipuwaja moamorā ñero tarirācoma, arīmi Jesu pahia oparāre, mūrā sāre.

<sup>45</sup> Iri pohe opu queorire igu arĩcũ peerã, “Ígu iri queori mera ‘Ñerã mohme corerã iro dopa ãhrima,’ marire arĩgu weresãgu iicumĩ igu,” arĩ pepiñorã erã. <sup>46</sup> Eropa arĩ pepirã, igure ñeadiariñorã oparãpu. Masapu Jesure umupeo “Goãmu yare weremuhtadigu ãhrimi igu,” arĩmuriñorã erã. Erã eropa arĩrã arĩcũ pahia oparã sã masare güirã, Jesure ñeabiriñorã.

## 22

### *Wuari bosenu queorire wereñumi Jesu*

<sup>1</sup> Eropi dipaturi gaji queori mera erãre buhenugami Jesu:

<sup>2</sup> —Ûmaro majagu igu opu arĩri werediacũ i queori iro dopa ãhraa. Yuju yeba majagu tauro opu arĩñumi. Eropigu igu magu ya arĩburi bosenu iĩñumi. Ígu mojoto diriri bosenu arĩyoro. <sup>3</sup> Eropigu opu igu pohro majarãre bosenu ñarã arimorãre sihudore obeoriñumi. Erãpu aridiabiriñuma. <sup>4</sup> Eropigu gajirãre sihudoregu obeoriñumi daja igu pohro majarãre. “Yu sihubeorãre òpa arĩ wereque. ‘Mari baburire iituhama. Wecũare, wecũagã òaro diicũrãre wejẽ amutuhajama. Eropiro arĩpehreri bosenu majare iituhajama. Eropirã bosenu majare barã arique,’ arĩ wereque erãre,” arĩ obeoriñumi igu opu igu pohro majarãre. <sup>5</sup> Erã eropa werera pũhrũ igu sihubeonirã eropa pepicãñuma. Bosenure ñarã wabiriñuma. Yujugu igu pohegue waha, wañumi. Gajigu igu mohmerire ñagu wañumi. <sup>6</sup> Gajirãpu igu pohro majarãre erãre wererã eranirãre ñeha, erãre ñero iĩñuma. Eropii wejẽcãñuma. <sup>7</sup> Erã eropa iicũ peegu, opu pu guañumi. Gua, erã eropa wejẽra dipuwaja dipuwaja moadoregu igu surarare obeoñumi. Eropirã surara erãre wejẽpehocã, erã ya macare soecãñuma. <sup>8</sup> Erã eropa iira pũhrũ, opu igu pohro majarãre òpa arĩñumi: “Bosenu majare amutuharama. Yu sihumuhtanirã yu bosenure ñabonirã aribeama. Ñerã ãhrima erã. <sup>9</sup> Eropirã macare wari marigue mu bocajarãre bosenure ñamorãre sihuque,” arĩñumi igu igu pohro majarãre. <sup>10</sup> Ígu eroparĩcũ igu pohro majarã marigue waha, arĩpehrerã erã bocajarãre, ñerãre, òarãre wereñuma. Erã eropa sihura pũhrũ ejañuma erã bajarã. Òaro bosenu erã iiri taribure masa ujuturitaria wañuma.

<sup>11</sup> “Ero erã doacũ opu opu yujugure mojoto diririnu majañe suhriro sañabigure ñañumi. <sup>12</sup> “Ne, acaweregu, ¿duhpigu mojoto diririnu majañe suhrirore sañabiriqueregu ñajarari muhu?” arĩ serẽpiñumi opu. Ígu eropa serẽpicũ masupu werebiriñumi. <sup>13</sup> Ígu eropa werebiriñũ ñagu igu pohro majarãre òpa arĩñumi opu: “Íre ñeha igu mojotorire dirique. Ígu guburi sãre dirique. Dirituha aĩ wiria, disiporogue naitiarogue igure cóaque. Erogue igu turaro ore, bujawereri mera gucũri cũridihugucumi,” arĩñumi opu, arĩ weremi Jesu.

<sup>14</sup> Ígu eropa arĩra pũhrũ òpa arĩtumi igu:

—I queori wadiro dopa ta Goãmu bajarã masa igu sihubeonirã arĩquererã ta bajamerãgã igu mera dujarãcoma, arĩ weretumi Jesu.

### *Oparã ya wajare wajayeburire gajirã serẽpiñuma Jesure*

*Mr 12.13-17; Lc 20.20-26*

<sup>15</sup> Ígu eropa arĩra pũhrũ fariseo masa waha, igure weresãburire erã basi weretamuñorã erã. Erã igure baja serẽpiri mera erãre igu gajiropa yuhricũ weresãmorã iiriñorã. <sup>16</sup> Eropirã erã mera majarãre, Herode ya curu majarã sãre, Jesure serẽpidorerã obeoñorã. Erãpu gua pohrogue eraa, Jesure serẽpima:

—Buhegu, diaye wereniguigu guyarĩ marigu mu arĩcũ masia gua. Eropigu opu arĩcũ sãre bu arĩgu igu arĩcũ sãre muhu yujuropa ñhaa. Eropigu Goãmu yare diaye mu werecũ sãre gua masia. Masa suacũ sãre erã suabiricũ sãre queoro werea.

17 Eropigu guare wereque. ¿Roma majarã árïpehrerã tauro opu árïgure gobierno majare marire wajayero gahmeri mu pepicũ? ¿Mari doreripu irire wajayedoreri? arĩ serëpima Jesure.

18 Jesupu erã ïgure ñero weresãdiarire masigu òpa arĩ yuhrimi:

—Guyaricurã àhraa mua. ¿Duhpirã yu ñero wereniguicũ peediari mua?

19 Dohparagã niyerusere oparã yare wajayeburisere aĩrique. Irisere ïarã, arĩmi ïgu.

Ïgu eroparicũ peerã niyerusere aĩgarima erã. 20 Erã irisere aĩ eracũ ïagu ïgu serëpimi erãre:

—¿Nihino gohra masu waicugu tuhyari irisere? ¿Noa waĩ tuhyari? arĩ serëpimi ïgu.

21 —César waicugu masa tauro opu masu ïgu waĩ sã tuhyami iriseguere, arĩ yuhrima erã.

Erã eroparicũ peegu Jesu weremi:

—Irisubu tamera masa tauro opu yare ïgure oque. Goãmu yare Goãmupure oque, arĩmi Jesu.

22 Ïgu eroparicũ peerã, pee uca wa, waha wama.

*Saduceo masa Goãmu ïgu sïrinirãre masurire serëpiñuma Jesure*

*Mr 12.18-27; Lc 20.27-40*

23 Eropi irinu ta yujurãyeri saduceo masa Jesure ïarã erarã gua pohroge erama. Saduceo masa “Goãmu sïrinirãre masusome,” arĩ pepirã árïma. Eropirã òpa arĩma erã ïgure:

24 —Buhegu, òpa arĩ gojañumi Moise: “Yujugu ïgu tïgu marapocugu porã mariqueregu ta ïgu sïricũ ïgu pagu magure ïgu tïgu marapo árïdigore marapocuro gahmea. Eropigu ïgu tïgu muru ïgu porãcubodiro dopa ta porãcuro gahmea ïgu pagu magure. Eropirã igo porã ïgu tïgu muru porã iro dopa ta árïrãcoma,” arĩ gojañumi Moise, arĩma erã saduceo masa.

25 Irire eropa arĩ weretuha i queorire werenemoma erã Jesure:

—Yujugu porã siete gohra árïñorã. Erã tïgupu marapocu, porã marigu ta sïria wapu. Eropigu gajigu ïgu pagu magu sã ïgu tïgu marapo árïdigore marapocupu.

26 Ïgu eropa marapocura puhru ïgu sã ïgu tïgu muru iro dopa ta porã mariqueregu ta sïria wapu. Eropigu ïgu pagu magu ïgu tïgu muru iro dopa ta porã mariqueregu ta sïria wapu. Eropa dihta wañorã yujugu porã gohra. Ne porã mariquererã ta sïripehrea wañorã erã. 27 Erã marapo sã erã puhru sïria wapo pare, arĩ òpa serëpima Jesure: 28 ¿Ne, Goãmu árïpehrerãre ïgu sïrinirãre masucũ nihino marapo árïgocuri igo? Erã siete árïpehrerã igore marapocunirã árïñorã. ¿Eropigo nihino marapo gohra árïgocuri igo? arĩ serëpima erã.

29 Jesu yuhrimi erãre:

—Goãmu yare erã gojarapũ wereniguirire ne masibea mua. Eropirã Goãmu ïgu turari sãre ne masibea mua. Eropiro mua pepiripu ne diaye árïbeaa. 30 Sïrinirã erã masa muriara puhru erã anyua iro dopa àhrima. Erã uma nome mera marapocubeama eroguere. 31 Sïrinirã mura erã masa muriaboropure weregura. ¿Goãmu iribojegue ïgu arïrare ne buhebiriri mua? Òpa arïñumi ïgu: 32 “Yuhu Abrahã, Isaa, Jacobo erã opu àhraa,” arĩ wereñumi Goãmu iribojegue. Erã sïrira puhrugue “Erã opu ta àhraa,” arĩ wereñumi Goãmu. Eropirã erã sïrinirã mura ïgu masunirã árïrã erã ojocarirã àhrima, arĩmi Jesu.

33 Ïgu eropa arĩ buhecũ peerã bajarã masa pee uca wama.

*Òtariariñere doreriñere wereñumi Jesu*

*Mr 12.28-34*

<sup>34</sup> Eropi saduceo masa Jesure erã yuhrimasibiricũ peerã, fariseo masapũ gũa pohrogue gamenerema daja. <sup>35</sup> Eropigũ erã mera majagũ, masare buhegũpũ Jesu ãgũ ñero arĩcũ peediagũ gũa serẽpirimi ãgũre.

<sup>36</sup> —Buhegũ, ¿Goãmũ ya doreri õatariaro doreripũ diñe doreripũ ãhriri? arĩ serẽpimi ãgũ.

<sup>37</sup> Jesu ãgũre yuhrimi:

—“Bũrigã mũa sĩporã mera, mũa turari mera, mũa õaro guñari mera Goãmũre mũa Opũre mahique,” arĩmi Goãmũ. <sup>38</sup> Iñe doreriñe õatariariñe ãhraa. <sup>39</sup> Iñe doreriñe pũhrũ gajiñe doreriñe sã õataria: “Mũ basi mahiro dopa ta mũ pohro árĩrã sãre mahique,” arĩmi Goãmũ. <sup>40</sup> Iñe peñe doreriñere iirã árĩpehreri gaji dorerire iipehorã iiaa mari. Goãmũ yare weremũhtanirã iribojegue erã gojara sãre iirã iiaa mari eropa iirã, arĩ weremi Jesu.

*¿Noano acaweregũ ãhriri Cristo? arĩ serẽpi ãañumi Jesu*

*Mr 12.35-37; Lc 20.41-44*

<sup>41</sup> Eropi fariseo masa ero gamenererã erã árĩcũ Jesu erãre serẽpimi:

<sup>42</sup> —“Cristo mari Pagũ ãgũ obeodigũ ãhrimi,” arãa mũa. ¿Nihino ãhriri ãgũ ñecũ iribojegue majagũ, mũa pepicũ? arĩmi ãgũ.

—Cristo Davi mũrũ pãrami árĩgũcumĩ, arĩ yuhrima erã.

<sup>43</sup> Jesu weremi:

—¿Davipũ Cristo ñecũ árĩqueregũ ta duhpigũ opũcũturiayuri Cristore? ¿Duhpigũ eropa opũcũdoreyuri Espĩritu Santo ãgũre? Õpa arĩñumi Davi mũrũ:

<sup>44</sup> Goãmũ yũ opũre õpa arĩmi: “Ohõ yũ diayepũ dorebu doaque. Eropigũ mũre ãhaturirãre mũre tarinũgabasagũra yũhũ mũ pohro majarã dopa árĩmorãre,” arĩmi Goãmũ yũ opũre, arĩ gojañumi Davi mũrũ.

<sup>45</sup> Eropa arĩ gojagũ ta Davi mũrũ opũcũñumi Cristore. Cristo Davi mũrũ opũ ãhrimi. ¿Eropigũ Davi mũrũ Cristo ñecũ árĩqueregũ duhpigũ opũcũyuri Cristore? arĩ weremi Jesu.

<sup>46</sup> ãgũ eropa arĩ werecũ erã ãgũre ne yuhrimasibirima. Eropirã iripẽta serẽpi duhucãma erã ãgũre. Eropirã ãgũre gũirã dipaturi serẽpi ãabirima ãgũre pare.

## 23

*Masare buherã, fariseo masa sã erã ñero iirire wereñumi Jesu*

*Mr 12.38-40; Lc 11.37-54; 20.45-47*

<sup>1</sup> Eropi masa bajarãre gũa sãre Jesu weremi daja.

<sup>2</sup> —Masare buherã, fariseo masa sã Goãmũ doreri Moiserẽ ãgũ apirare wererã ãhrima erã. <sup>3</sup> Erã eropa wererã árĩcũ mũare erã dorerare iipehoque mũa. Eropa iiquererã ta erãre ãhacũbircãque mũa. Erã buhero dopa ta iibeama erã. <sup>4</sup> Masare baja dorema erã bocatĩubiririre. Eropa dorequererã ta erã dorero dopa ta masa erã iimasibiriquerecũ ãarã erãre itamubeama.

<sup>5</sup> Masa erã ãacũ dihta õaro ii ãhmuma erã. Goãmũ yare erã gojarapũri erã duhsãri comogãre pagañari comogãre erã diaporire dirituma masare erãre ãadorerã. Erã dũca sãre dirituma iri comogãre. Eropirã erã suhri sãre gajirã ya tauro yoari árĩriñe ahmu sañama, “Gũa Goãmũre umupeotaria,” arĩ ãadorerã. <sup>6</sup> Eropirã bosenuri árĩcũ oparã erã doarigue doadiama. Eropirã mari buheri wirigue sãre õari doari dihtare doadiama erã. <sup>7</sup> Eropirã doberi duarogue gajirã õaro umupeori mera erãre bocatĩri serẽcũ gahmema erã. Erãre “Buhegũ,” arĩ piyucũ gahmema.

<sup>8</sup> “Mũapũre “Buhegũ,” arĩ gajirã piyucũ iibircãque. Mũa árĩpehrerã yuju curu majarã ãhraa. Eropigũ mũare buhegũ yũhũ yujugũ ta ãhraa. <sup>9</sup> Eropirã i yeba majarãre “Mari pagũ,” arĩrã erãre umupeorã iica. Ne eropa arĩ iibircãque. Õmaro



majagu dihta mari Pagu āhrimi. Īgu dihtare umupeoro gahmea marire. <sup>10</sup> Eropirā masare “Opu,” arībiricāque. Mua opu yuha Cristo yujugu ta āhraa. <sup>11</sup> Pohro majagu iro dopa muare itamugu Īgu ta arīgucumi opu arību. <sup>12</sup> Yujugu opu arīdiagu docanugaja arīcorecāro gahmea. Eropigu docanugagu “Bu arīgu āhraa yuha,” arī pepigu Īgu ta arīgucumi opu arību, arī weremi Jesu.

*Judio masare buherā, fariseo masa mera erā gūyarire wereñumi Jesu*

<sup>13</sup> Īgu eropa arīra pūhrū erāre werenemomi:

—Mua masare buherā, fariseo masa sā ñero tarirāca. Gūyaricūrā āhraa mua. Gajiropa mua arī buhecū peerāpu Goāmū Īgu opu arīroguere wasome. Mua sā eroguere wasome. Eropa arī buherā eroguere wadiarāre cāhmotaa mua.

<sup>14</sup> “Mua masare buherā, fariseo masa sā ñero tarirāca. Gūyaricūrā āhraa mua. Wapeweyarā nome erā wajamocū ĩha erā ya wirire emacāa mua erā nomere. Eropa erāre mojomoro ĩabiriquererā masa erā ĩhuro yoari boje Goāmure serē ĩhmuraa mua masare. Mua eropa iira dipuwaja gajirā tauro dipuwaja moagucumi muare.

<sup>15</sup> “Mua masare buherā, fariseo masa sā ñero tarirāca. Gūyaricūrā āhraa mua. Wuariryague taribuja, yoaro maja macarigue wahaa mua mua dorerire iibure omarā. Mua dorerire iibure boca, ĩgure buhea. Mua eropa iicū ĩgupu mua tauro ñero iinugagucumi. Eropirā ĩgure peamegue wabu arīcū iiaa mua.

<sup>16</sup> “Mua ñero tarirāca. Cuirī ĩhajabirā erā ĩhajabiro dopa ta masibirā āhraa mua. Eropa arīquererā ta gajirāre buheraa mua. Ōpa arī buheraa mua: “ ‘Goāmū wihi mera iigura,’ arī waīpeogu ĩgu arīdiro dopa ta iibiricū ōaroca,” arī buheraa mua. “ ‘Goāmū ya wihi maja oro mera iigura,’ arī waīpeodigupure ĩgu arīdiro dopa ta ii ojogorocuro gahmea,” arī iri sāre buheraa mua. <sup>17</sup> Cuirī ĩhajabirā erā ĩhamasibiro dopa ta masibirā āhraa mua. Pee masibirā āhraa. ¿Dinopure umupeoro gahmeri? Oore umupeobiricāro gahmea. Goāmupu iri oore ĩgu ya wihi arīcū ōari iimi irire. Eropirā ĩgu ya wihipure umupeoro gahmea muare. Eropiro mua buheripu queoro wabeaa. <sup>18</sup> I sāre buheraa mua: “ ‘Goāmū wihi maja mesa mera iigura,’ arī waīpeodigu ĩgu arīdiro dopa ta ĩgu iibiricū ōacāroca,” arī buheraa mua. “ ‘Iri mesa weca mari aīgā apira ta mera iigura,’ arī waīpeodigupure ĩgu arīdiro dopa ta ii ojogorocuro gahmea,” arī buheraa mua queoro buhebirā. <sup>19</sup> Cuirī ĩhajabirā erā ĩhamasibiro dopa ta masibirā āhraa mua. ¿Dipu iri gohra āhriri mua pepicū? Goāmure masu ĩgu ora mura iri gohra arībiriñaria. Iri mesa weca Goāmure ĩgu ocū, ōari wahaa iri mesa weca arīri. Eropiro iri mesa bu arīri mesa arībeaa. Goāmure erā ora weca tauro ōari mesa āhraa. <sup>20</sup> Eropigu “Goāmū wihi maja mesa mera iigura,” yujugu arī waīpeogu, iri mesa weca apira mera ĩgu eropa arīgu iicumi. Eropiro mua buheripu queoro wabeaa. <sup>21</sup> Goāmū ĩgu ya wihi majagu āhrimi. Eropigu “Goāmū wihi mera eropa iigura,” arī waīpeogu diaye ta Goāmū waī mera eropa arīgu iicumi. <sup>22</sup> Goāmū umaro majagu āhrimi. Eropigu “Umaro mera iigura,” yujugu arī waīpeogu, Goāmū mera ta eropa arīgu iicumi. Eropiro mua buheripu queoro wabeaa.

<sup>23</sup> “Mua masare buherā, fariseo masa sā ñero tarirāca. Gūyaricūrā āhraa mua. Bari sūricū iirisarire menta, anis, comina waīcūrisarire aī deara pūhrū diez quēri iiaa. Eropa iira pūhrū yujuquē ta aīgā apia Goāmū wihigue Goāmū dorerire iimorā. Mua eropa iri dorerire iiquererā ta tauro ōaro iirire guñabeaa mua. Diaye iirire, mojomoro ĩarire, Goāmure umupeorire ne guñabeaa mua. Dūcare mua aīrare merogā Goāmū wihire apicū ōhaa. Eropa iirā ōpa iinemoque: Diaye iirire, mojomoro ĩarire, Goāmure umupeorire iique. <sup>24</sup> Cuirī ĩhajabirā erā ĩabiro dopa ta diaye majare masibirā āhraa mua. Ōpa iiaa mua. Mua dorerire iidorerā arīpehrerire ōaro iidiaa yujuñegā dūhyaro marīro. Mua eropa iiquererā ñeripure dūhabeaa.

<sup>25</sup> “M̄ua masare buherã, fariseo masa sã ñero tarirãca. Ḡuyaricurã ãhraa m̄ua. M̄ua dorero dopa ta m̄ua soroparire, m̄ua ihriri parire m̄ua coeweeaa m̄ua ðarire ii ïhmurã. Eropã coequererã ta m̄ua s̄iporãripure coebeaa. Eropirã m̄ua ár̄icurire m̄ua pepiripure ne ðarire gohrotobeaa. Gajirã yare yajadiarã, m̄ua basi dihta pagarire ādiarã ár̄irã, eropa dihta pepia m̄ua. <sup>26</sup> Cuiiri ïhajibirã erã ïhajibiro dopa ta masibirã ãhraa m̄ua fariseo masa. M̄ua pepirire gohrotomuhtaque m̄ua. Eropirã ðaripure iique. M̄ua eropa iirã masa erã ïhuro sãre ðarã gohra ár̄irãca pare m̄ua.

<sup>27</sup> “M̄ua masare buherã, fariseo masa sã ñero tarirãca. Ḡuyaricurã ãhraa m̄ua. Masa comorore boreri mera erã s̄uhuma. Eropirã masa iri comorore erã ïacũ ðari comoro dehyoa. Iri comoro eropa ðaro deyoquerẽcũ ta, poheca majague ïgũ boara ḡoariguere ïaya mara. <sup>28</sup> Eropã ta m̄ua sã masa erã ïhabeoro ðarã dehyoa m̄ua. Eropã ðarã deyorã m̄ua ár̄iquerẽcũ ta m̄ua pepiriguere ñeri ḡuyaricurã ár̄itariacã boanirã iro dopa, ar̄i weremi Jesu.

*Judio masare buherã, fariseo masa sãre ïgũ dipuwaja moaborore wereñumi Jesu*

Eropã ar̄ituhaja ðpa ar̄inemomi daja:

<sup>29</sup> —M̄ua masare buherã, fariseo masa sã ñero tarirãca. Ḡuyaricurã ãhraa m̄ua. Goãmũ yare weremuhtanirã iribojegue majarã erã masa goberire ðaro amuraa m̄ua. Eropirã iribojegue majarãre ðaro iinirã m̄urare erã wéanugunirã m̄urare ðaro amuraa m̄ua. <sup>30</sup> Eropã iirã ðpa ar̄i wereniguiraa m̄ua: “Iribojegue mari ñecũ s̄umarã m̄urague erã iidiro dopa ḡuapũ iibiriboya. Irisubugue ár̄inirãre Goãmũ yare weremuhtanirãre ḡuapũ wejẽbiriboya,” ar̄i wereniguiraa m̄ua. <sup>31</sup> Eropã ar̄irã ár̄irã, m̄ua ñecũ s̄umarã m̄ura Goãmũ yare weremuhtanirã m̄urare erã wejẽnirã erã ár̄icũ wererã iica. Erã wejẽnirã pãramerã m̄ua ár̄iri sãre m̄ua basi weresãrã iica m̄ua. <sup>32</sup> M̄ua ñecũ s̄umarã m̄ura iidiro dopa ta ii ojogorocũque.

<sup>33</sup> “Añaa iro dopa ñerã ãhraa m̄ua. Añaa porã iro dopa ãhraa m̄ua. Goãmũ m̄ua ñeri dipuwajare ïgũ peamegue ïgũ cóãboro core duhrimasibeaa m̄ua. <sup>34</sup> Eropigũ Goãmũ yare weremuhtarãre, gajirã masirãre, gajirã m̄ure buhemorãre m̄ua pohro obeogura. Yũ eropa obeocũ m̄uapũ yujurãyeri erãre wejẽrãca. Gajirãre crusague pabiarãca. Gajirãre m̄ua buheri wirigue tãrarãca. Erãre macari nũcũ nũrusiarãca. <sup>35</sup> M̄ua eropa iirã ár̄ipehrerã ñeri marirãre m̄ua wejẽra dipuwaja dipuwajacurãca. Abel m̄urũre Caín ïgũ wejẽra dipuwajare dipuwajacurãca m̄uapũ. Ár̄ipehrerã ïgũ pũhrũ ár̄inirãre ðarãre erã wejẽra dipuwaja sãre dipuwajacurãca m̄ua sã. Eropirã Goãmũ wihi pohro waimurãre m̄ua soeburi mesa pohro Zacariare m̄ua acawererã m̄ura wejẽñorã. ïgũpũ Berequias magũ ár̄ipũ. Eropirã ïgũ sãre erã wejẽra dipuwaja dipuwajacurãca m̄ua. <sup>36</sup> Diaye m̄ure weregũ ta ïiaa. Erã ár̄ipehrerãre erã wejẽra dipuwaja dohpague majarã dipuwajacurãcoma, ar̄i weremi Jesu.

*Jerusalén majarãre b̄urigã b̄ujawereñumi Jesu*

*Lc 13.34-35*

<sup>37</sup> Eropã ar̄ituhaja ðpa werenemomi Jerusalén majarãre b̄ujawere ïagu:

—M̄ua Jerusalén majarã, m̄ua acawererã m̄ura Goãmũ yare weremuhtanirãre wejẽm̄urinirã ár̄ima. Eropirã Goãmũ obeonirãre, utã mera deam̄urinirã ár̄ima. Cãreña b̄uro igo igo porãre igo quẽdũpuri mera igo coã oyaro dopa ta bajasuburi opadiarabũ m̄ure. M̄uapũ irire ne yũre gamebirabũ. <sup>38</sup> Dohpaguere m̄ua ár̄iri maca cóãra maca ár̄iroca. <sup>39</sup> Diaye m̄ure ar̄igũ tiiaa. Pũhrũgue dujarigũca daja yũhũ. Eropã yũ dujaricũ ïarã m̄ua yũre “Goãmũ turari mera ar̄igũ ðaro ariporo,” ar̄irãca. Yũre m̄ua irire ar̄iboro core, dipaturi yũre ïasome m̄ua, ar̄imi Jesu.

## 24

*Goãmũ wihĩ cóãra wihĩ árĩroca arĩñumi Jesu*

*Mr 13.1-2; Lc 21.5-6*

<sup>1</sup> Eropi Goãmũ wihire Jesu ãgu wiriara pũhrũ guã ãgu buherã iri wihĩ maja wirire ãarã,

—Ôatariari wiri ãhraa. Ìaque mũ sã, arĩbũ guã ãgũre.

<sup>2</sup> Jesu yũhrimi:

—I wihĩ majare dohpaguere ãaraa mũa. Mũare weregu tiiãa. I wihĩ árĩpehreri mũa ãara i utã sã cohmopehrea waroca. Ne yujuye utãye dujasome, arĩmi ãgu guare.

*I mũmũ pehreburiñere wereñumi Jesu*

*Mr 13.3-23; Lc 21.7-24; 17.22-24*

<sup>3</sup> Pũhrũ Olivo waĩcũdigũ utãgũgue eja, erogue doami Jesu. Ero ãgu doacũ guã ãgu buherã guã seyaro ãgu pohrogue eja serẽpibũ.

—Wereque guare. ¿Dohpãricũ eropa warocuri mũ arĩdiro dopa waro? ¿Pehrerinũ coregã mũ dujariboro coregã dohpa wanũgacũ ãarãcuri guã? arĩ serẽpibũ guã.

<sup>4</sup> Jesu yũhrimi:

—Ôaro iiyuque mũa. Eropirã gajirã mũare erã guyarire peebiricãque. <sup>5</sup> Bajarã masa “Cristo ãhraa yũhũ,” arĩ guyarã árĩrãcoma. Erã eropa guyacũ peerã bajarã masa Goãmũ yare duhurãcoma. <sup>6</sup> Mũa pohrogã gajirã masa erã gamewejẽcũ peerãca mũa. Eropirã yorogue majarã erã sã erã gamewejẽcũ peebeorãca. Eropa peequererã ta ne wũaro irire pepibiricãque. Eropa ta wamũhtaroca. Eropa wacũ pehburinũ dũhyaniroca dohpa. <sup>7</sup> Irisubure yuju yeba majarã gajĩ yeba majarã mera gamewejẽrãcoma. Eropirã yujugũ opu yarã gajĩgu opu yarã mera gamewejẽrãcoma. Eropirã masa bajarã oa mera sãrirãcoma. Gajirã dorecũ ñero tarirãcoma. Eropiro bajasuburi i yeba ñohmeroca. <sup>8</sup> Eropa ñero tariquererã i yeba majarãre tauro erã ñero tariboro dũhyaa dohpa. Ñero tarinirãcoma dohpa.

<sup>9</sup> “Irisubure gajirã mũare ñeha ñero iidorerã orãcoma mũare gajirã oparãre. Erã eropa ocũ mũare wejẽrãcoma. Yaharã mũa árĩri dipuwaja árĩpehrerã mũare ãhaturirãcoma. <sup>10</sup> Irisubure bajarã yaharã árĩnirã yũre cóãrãcoma. Eropirã erã mera majarãre Jesu yarãre erã ãhaturirãcoma. Eropirã erã mera majarã erã árĩquerecũ ta ãhaturirãcoma. Eropirã erã mera majarã erã árĩquerecũ ta erãre ñero iimorãre erãre orãcoma. <sup>11</sup> Irisubure bajarã “Goãmũ yare weremũhtarã ãhraa,” arĩ guyarã árĩrãcoma. Eropirã bajarã masa erã guyarire peerã árĩrãcoma. <sup>12</sup> Irisubure ñetariaro iirãcoma masa. Eropirã erã mera majarãre mahinemosome. <sup>13</sup> Eropirã mũare erã ñero iiquerecũ ta mũare erã ñero iirare yujuro bojerã yũre duhubiricũ Goãmũ mũare taugũcumi. Eropigu ãgu pohrogue mũare opagũcumi. <sup>14</sup> Eropiro i õari buheri árĩpehreroguerẽ i yebaguere erã wereburi buheri árĩroca. Goãmũ ãgu opu árĩrĩre árĩpehrerãre wererãcoma árĩpehrerã iri buherire erã masiboro dopa. Eropa werera pũhrũ pehrerinũ nũgaroca.

<sup>15</sup> “Ñetariagu Goãmũ yare goroweogu aribure weremũriñumi iribojegue Daniel mũrũ Goãmũ yare weremũhtadigu. Irisubure ãgu ñetariagu Goãmũ wihigue ãgu niguicũ ãarãca mũa. (Irire buhegu peeporo.) <sup>16</sup> Ero ãgu niguicũ ãarã, Judea yeba árĩrãpũ utã yucũgue oma duhriporo. <sup>17</sup> Irisubure masa ñero tarirãcoma. Eropirã yojaro mera duhrirã waporo. Irisubure erã wiri weca maja pũurigue árĩrã wihĩ pohecague erã yare aĩrã ñajabiricãporo. <sup>18</sup> Eropirã irisubure gajirã erã poerigue árĩrã erã ya suhrĩre wihigue árĩri suhrĩre aĩrã pihabiricãporo. <sup>19</sup> Irisubure nijiposã nome, erã porãre mihrirãre oparã nome sã mojomorocũrã nome dujarãcoma. <sup>20</sup> Eropirã Goãmũre õpa arĩ serẽque: “Puhirõ árĩcũ guã judio masa soorinũ árĩcũ sãre guã oma duhriburinũ árĩbiricãporo,” arĩ serẽque mũa Goãmũre. <sup>21</sup> Irinũrĩre masa

ñero tarirãcoma. I yebare ïgu ïhacũnugura pũhrũ masa ñero tarimũriñuma. Iri eropa árĩquerecũ ta árĩpehreri pũriri erã ñero taridiro tauro ñetariaro tarirãcoma masa pehreburiñ coregãre. Eropa ñero erã tarira pũhrũ, dipaturi eropa ñero tarisome i yeba pare. <sup>22</sup> Eropigũ Goãmũ irinũre bajamenũrigã árĩcũ iigũcumi. ïgu eropa iibiricũ ne yujugũ masũ taribiribocumi. Eropigũ ïgu beyenirã erã tariborore bajamenũrigã ñero tariburinũre apigũcumi Goãmũ.

<sup>23</sup> Irisubure gajirãre pee masi ïaque: “Ïaque. Ohõ àhrimi Cristo,” erã arĩcũ erãre peebiricãque. “Ero àhrimi Cristo,” erã arĩcũ sãre peebiricãque. <sup>24</sup> “Cristo àhraa,” arĩ gũyarã, “Goãmũ yare weremũhtarã àhraa,” arĩ gũyarã árĩrãcoma irisubure. Eropirã Goãmũ ïgu beyenirãre gũyarã, erã deyro moarire ii ïhmurãcoma. Goãmũ yare erãre cóacũ iidiarã iirãcoma erã gũyari masa. <sup>25</sup> I árĩpehrerire wereyumũhtaa mũare iri eropa waboro core. Eropirã õaro pee masiyuque mũa. <sup>26</sup> Gajirã masa mũare õpa arĩcũ, “Masa marirogue àhrimi Cristo,” erã arĩcũ eroguerẽ ïarã wabiricãque. Eropirã erã “Ohõ iri wihigue àhrimi ïgu,” erã arĩcũ sãre erãre peebiricãque. <sup>27</sup> Yũhũ masũ Goãmũ ïgu obeodigũ guñaña mariro dujarigũra. Bupu ïgu miacũ umarore, abe mũririrogue, abe ñajarogue yojaro mera ïgu miabeoro dopa ta eropa ta dujarigũra yũhũ. <sup>28</sup> Masa erã ñeri erã iiniguirogue erogue Goãmũ erãre erã ñeri dipuwaja dipuwaja moagũcumi erãre, arĩ weremi Jesu.

*Cristo i yebague ïgu dujariborore wereñumi ïgu*

*Mr 13.24-37; Lc 21.25-33; 17.26-30, 34-36*

<sup>29</sup> Eropigũ gũare werenemomi:

—Masa ñero erã tariranũri pũhrũ abe umũ majagũ, ñami majagũ sã boyo duhurãcoma. Erã eropa wacũ necã dipu yuri dijariroca. Eropiro umaro maja sã yeba sã bũrigã ñohmeroca. <sup>30</sup> Irisubu ta yũhũ masũ Goãmũ ïgu obeodigũ yũ dehyoacũ masa ïarãcoma. Eropirã árĩpehreri cururi majarã orerãcoma. Eropirã yũ turari mera, yũ gosesiriri mera, umaro maja imica curu weca i yebaguere yũ dujaricũ ïarãcoma masa. <sup>31</sup> Corneta bũsũroca. Eropigũ yaharã anyuare árĩpehrero i yebaguere obeogũra. Eropirã árĩpehreroguerẽ yaharãre yũ beyenirãre erã aĩ gameneorãcoma.

<sup>32</sup> “Higueragũ irigũ waricũre masia mũa. Irigũ yucũgũ pũcũcũ ïarã, “Bojori merogã dũhyaa,” arĩ masia mũa. <sup>33</sup> Eropa ta irigũ waro dopa ta masique mũa. I árĩpehreri yũ arĩra eropa wacũ ïarã, “Cristo dujariboro merogã dũhyaa,” arĩ masique mũa. <sup>34</sup> Diaye arĩgu tĩaa mũare. Irisubu majarã erã sĩriboro core árĩpehreri yũ arĩdiro dopa ta eropa waroca. Umaro i yeba sã pehrea waroca. <sup>35</sup> Yũ wereniguiripũ ne pehresome. Árĩpehreri yũ arĩdiro dopa ta eropa waha ojogorocũroca.

<sup>36</sup> “Irinũre yũ dujariburinũre, iri hora sãre masibea yũhũ. Anyua sã irire masibeamã. Masa sã ne masibeamã. Yũ Pagũ dihta irire masimi.

<sup>37</sup> “Noé ïgu árĩrasubu majarã erã arĩdiro dopa ta i yeba majarã yũ dujariboro coregã eropa ta árĩrãcoma. <sup>38</sup> Yeba miriboro core masa baha, ihri, iĩñuma. Eropirã mojoto diriñuma. Noé sã erã wũadiru dohodirugue erã ñajaboro core mũraro ta iimũririñuma masa. <sup>39</sup> Mata turaro deco ahri, guñaña mariro yeba miria wayoro. Masa sã miripehrea wañuma. Guñaña mariro ero miridiro dopa ta, yũhũ masũ Goãmũ ïgu obeodigũ i yebaguere guñaña mariro dujarigũca. <sup>40</sup> Irisubure yũre umupeorãre beye gameneodoregũca. Eropigũ poheguere perã mohmerã árĩcũ yujugũre aĩrãcoma yũ mera arĩbure. Eropigũ gajigũ ero dujagũcumi. <sup>41</sup> Irisubure nome perã nome erã yujuro erã ojodũcare erã biurã árĩcũ yujugore aĩrãcoma. Eropigo gajigo ero ta dujagũcumi.

<sup>42</sup> “Õaro guñamasi coreque. Yũhũ mũa opũ yũ dujariburinũre ne masibea mũa.

<sup>43</sup> Ire guñaque. Yajari masũ ïgu wihigue ïgu ñajaa ïgu yajaborore wihi opũ masigũ,



iri ñamire ïgu carĩbiriboñumi yajari masure coregu. Eropigu yajari masure ïgu ya wihire ñajaridorebiriboñumi. <sup>44</sup> Wihì opu ïgu ya wihire corero dopa ta mua sã yu ariburire core árĩque. Yuhũ masu Goãmũ ïgu obeodigu i yebare dujarigu guñaña mariro arigũca. Eropirã yahare eropa iiniguirã yure coreque, arĩmi Jesu.

*Yujugũ mohme coregu ïgu opure òaro umupeorire, gajigũ ïgu òaro umupeobiriri sãre wereñumi Jesu*

*Lc 12.41-48*

<sup>45</sup> Eropi Jesu òpa arĩ queorire moami buhenemobu:

—Mohme coregu ïgu opure umupeogu pee masigu òpa ta àhrimi. Opu curigu wagu, mohme coregure ïgu wihire apimi. ïgu apigupu doregu árĩgucumi. Eropigu barisubu árĩcũ mohme coregu gajirã mohmeri masare barire gueremi. <sup>46</sup> Eropigu opu ïgu ya wihì dujarami. ïgu dujaracũ ïagu mohme coregu ïgu opu ïgu dorediro dopa ta iipehogu árĩgu, mucubirigu árĩgucumi. <sup>47</sup> Diaye mware arĩgu tiaa. ïgu eropa iicũ ïagu ïgu opu árĩpehreri ïgu yare ìhadibugu apigucumi ïgure. <sup>48-49</sup> Ñegu mohme coregupu òpa ta àhrimi. “Yu opu yoja deyobeami,” arĩgu, gajirã mohme corerãre paa, wũaro baha, ihri, mererã mera meregucumi. <sup>50</sup> ïgu eropa iirisubu ïgu opu guñaña mariro dujaragucumi. ïgu dujararinure ne masibeami mohme coregu. <sup>51</sup> Eropa dujaragu ñegu ïgu iirare pee ïgure turaro dipuwaja moagucumi. Eropigu gũyaricũrã erã warogue ïgure cóãgucumi. Eroguere ïgu turaro ore, bujawereri mera ïgu gũcũri cũridihugucumi, arĩmi Jesu.

## 25

*Diez nome iira queori mera buheñumi Jesu*

<sup>1</sup> Eropi Jesu dipaturi òpa arĩ queorire weremi buhenemogu daja:

—Umaro majagu ïgu opu arĩri diez nome erã wadiro dopa àhraa: Diez nome arĩñuma. Yuju ñami erã, erã sihãgori dipuru mera mojoto diridigure bocatĩrirã wañuma. <sup>2</sup> Erã mera majarã nome cinco nome pee masibirã nome arĩñuma. Gajirã nomepu cinco nome pee masirã nome arĩñuma. <sup>3</sup> Pee masibirã nomepu erã sihãgori dipurure yu dicũri dipurure aĩquererã erã gohrotoburire aĩabiriñuma. <sup>4</sup> Pee masirã nomepu erã sihãgori dipurure dicũri dipurure aĩ gaji yu dipuru sãre erã gohrotoburire aĩañuma. <sup>5</sup> Eropirã mojoto diridigu ïgu yoja deyobiricũ erã nome wũja pũricũ carĩa wañuma. <sup>6</sup> Eropiro ñami deco gaguinigũ carĩñumi: “Peeque, mojoto diridigu arigu carimi. ïgure bocatĩrirã arique,” arĩ gaguinigu carĩñumi. <sup>7</sup> ïgu eroparicũ peerã erã nome wahgã, erã sihãgori dipurure amuñuma. <sup>8</sup> Eropirã pee masibirã nomepu, gajirã nomere pee masirã nomere òpa arĩñuma: “Gua sihãgori dipuru yariro iiaa. Eropirã merogã mua ya yure oque gũare,” arĩ serẽriñuma erã nome. <sup>9</sup> Erã eropa arĩ serẽquerecũ ta pee masirã nomepu òpa yũhriñuma: “Gua ya yu mware ocũ árĩpehrerãre sihajabiriboca. Eropirã yu duarã pohro mua basi asũrã waque,” arĩ yũhriñuma pee masirã nomepu. <sup>10</sup> Eropirã pee masibirã nome asũrã wañuma. Erã eropa wara pũhrũ mojoto diridigu erañumi. ïgu eracũ ìha, erã amutuhanirã nome pee masirã nome ïgure bocatĩriñuma. ïgu mojoto diriri bosenugue ïgu mera ìarã wañuma. Eropirã erã bosenu erã iri wihigue ñajara pũhrũ, disiporore biacãñumi. <sup>11</sup> Pũhrugue pee masibirã nomepu erariñuma. “Opu, gũare pãgũque,” arĩriñuma erã nome. <sup>12</sup> “Diaye mware arĩgu tiaa. Mware masibea yuhũ,” arĩñumi ïgu erã nomere.

<sup>13</sup> Yu dujariburinure iri hora sãre ne masibea mua. Eropirã pee masirã nome erã yare òaro amutuha erã corediro dopa ta òarã, ñeri marirã àhri coreque mua sã, arĩ weremi Jesu.



### *Niyeruseri oroseri queorire wereñumi Jesu*

<sup>14</sup> Eropa arĩ weretuha õpa arĩ queorire moa buhenemomi daja gua sãre:

—Irisubu yu dujariburinu ïgu wihi opu iidiro dopa árĩroca. Wihi opu árĩñumi. ïgu gajipugue curigu wagu, ïgure mohme corerãre sihubeoñumi. Eropigu erãre ïgu yare coredoreñumi. <sup>15</sup> Eropa coredoregu erã dibu masiropẽ erãre niyeruserire wajapagariserire oñumi. Yujugure cinco mil seri oroserire oñumi. Gajigure pe mil seri oñumi. Gajigure yuju mil seri oñumi. Erãre otuha waha wañumi. <sup>16</sup> Eropigu cinco mil seri ïgu odigu mata iriseri mera gajinore asũñumi. ïgu asũra mera duagu gaji cinco mil seri wajatanemoñumi ïgu. Eropigu diez mil seri mera dujañumi. <sup>17</sup> Eropigu pe mil seri ïgu odigu mata ïgu ora puhru ta iriseri mera gajinore asũñumi. ïgu asũra mera duagu gaji pe mil seri wajatanemoñumi. Eropigu wapicuri mil seri opañumi. <sup>18</sup> Yuju mil seri ïgu odigupã gobe seha, iri gobegue dibuñumi iriserire dibugã.

<sup>19</sup> “Puhru yoara puhru erã opu goerañumi. Eropa eragu ïgu niyeruseri mera erã wajatanemorare queobu ïgure mohme corerãre sihubeoñumi. <sup>20</sup> Eropigu cinco mil seri ïgu odigu ïgu opu pohrogue eja, diez mil seri wiañumi ïgure. “Cinco mil seri yare ohabu mahu. Ìañatagu. Iriseri mera gaji cinco mil serire wajatanemoabu,” arĩñumi ïgure. <sup>21</sup> “Õaro iiaya mahu. Mahu õagu yu dorediro dopa ta iidigu ahraa. Eropigu dohpaguere wãaro mã mohmeborore apigura. Eropigu yu mera mucubirique,” arĩñumi ïgu opu ïgure. <sup>22</sup> Eropigu pe mil serire aĩdigu sã ïgu opu pohrogue eja, wereñumi ïgure: “Pe mil seri yare ohabu mahu. Ìañatagu. Iriseri mera gajiseri pe mil seri wajatanemoabu,” arĩñumi ïgu. <sup>23</sup> “Õaro iiaya mahu. Mahu õagu yu dorediro dopa ta iigu ahraa. Merogãre õaro iiaya mahu. Eropigu dohpaguere wãaro mã mohmeborore apigura. Eropigu yu mera mucubirique mahu,” arĩñumi ïgu opu.

<sup>24</sup> “Eropigu yuju mil serire aĩdigupã, ïgu opu pohrogue eja, wereñumi ïgure: “Opu, mahu turaro mohmedoregu ahraa. Eropigu gajirãre mohmedorequeregu oteri moogu arĩqueregu ta mã dihta iri ducare aĩa. <sup>25</sup> Mahu eropa arĩgu arĩcũ mãre güiabũ. Eropa güigu gobe seha, iri gobegue mã niyeruserire dibucãbu. Ìañatagu. Ohõ ahraa mã ya niyeruseri,” arĩñumi ïgu ïgure. <sup>26</sup> “Mahu ñegu butagu ahraa. Yure, ‘Mahu gajirãre mohmedorequeregu mã dihta iri ducare aĩa,’ arãa mahu yure. <sup>27</sup> ¿Mahu yure eropa arĩqueregu ta, duhpigu yu óraserire niyeru diburi wihigue dihbubirari mahu? Mã erogue dibugã iriseri mera wãaro wajatanemoboaya. Irire mahu iicũ dujaragu wajatanemoboaya yuhũ,” arĩñumi opu ïgure. <sup>28</sup> Eropa arĩgu gajirã ïgure mohme corerãre doreñumi ïgu: “Niyeruserire emaque ïgure. Diez mil seri opagupãre oque. <sup>29</sup> Árĩpehrerã baja oparãre onemogura. Moorãpãre merogã erã opaquerẽcũ ta erãre emapehocãgura. <sup>30</sup> Ihĩ mohme coregu duhpihu arĩbeami. Naitĩarogue ñerogue cóacãque ïgure. Erogue ïgu turaro ore, bujawereri mera ïgu gũcũri cũridihugũcumi,” arĩñumi opu, arĩ weremi Jesu.

### *Dipuwaja moaborore wereñumi Jesu*

<sup>31</sup> Eropi Jesu werenemomi:

—Yuhũ masũ Goãmu ïgu obeodigu arĩpehrerã anyua mera doregu dujarigũca. Eropa dujarigu opu doarogue yu gosesiriri mera doagũca. <sup>32</sup> Eropa yu doacũ, yaharã anyua i yeba majarãre arĩpehrerãre yu pohro gameneorãcoma. Erãre gameneora puhru pe curu dũca wagura erãre. Oveja ïhadibugũ ïgu iiro dopa ïgu cabrãre ïgu dũca waro dopa ta masare dũca wa dobogura. <sup>33</sup> Eropa dũca wagu oveja dopa arĩrãre õarãre yu diayepũ dobogura. Eropigu cabra dopa arĩrãre, ñerãre yu copupũ dobogura. <sup>34</sup> Yu eropa iira puhru yuhũ arĩpehrerã tauro opu yu diayepũ doarãre õpa arĩ werẽgura: “Yu Pagũ mãre õaro iigũcumi. I yebare ïhacũnugudigugue

ta mua ya árĩburire ĩgu opu árĩrore amuyutuhami Goãmũ. Eropirã dohpaguere ĩgu amuyudiroguere árĩrã arique. <sup>35</sup> Yũ oaboacũ ĩarã mua yũre barire obu. Yũ ñemesibucũ mua yũre tĩabu. Mua pohro yũ curicũ yũre ĩha masibiriquererã yũre òaro bocatĩribũ mua. <sup>36</sup> Suhri marigũ yũ árĩcũ ĩarã mũapũ yũre suhrire sãbũ. Dorecucũ mua yũre ĩarã aribũ. Peresu yũ árĩcũ sãre yũre ĩarã aribũ,” arĩgũra òarãre. <sup>37</sup> Yũ eroparĩcũ peerã òarãpũ yũre serẽpirãcoma: “Opu, ¿dohpárĩcũ mũ oaboacũ mũre barire ori gũa? ¿Dohpárĩcũ mũ ñemesibucũ mũre tĩari gũa? <sup>38</sup> ¿Dohpárĩcũ mũre ĩha masibiriquererã òaro bocatĩriri gũa? ¿Dohpárĩcũ mũ suhri marigũ mũ árĩcũ mũre suhri sãri gũa? <sup>39</sup> ¿Dohpárĩcũ mũ dorecucũ o peresugue mũ árĩcũ sãre mũre ĩarã ejari gũa?” arĩrãcoma yũre. <sup>40</sup> Erã eropa arĩ serẽpicũ peegu yũhũ òpa erãre yũhrigũca: “Diaye mũare arĩgu tĩaa. Oã yaharã mera majagũ bu arĩgu árĩquerecũ ta, mua ĩgũre eropa ta òaro iibũ. Eropa arĩgũre eropa iirã, yũre iiro dopa iirã tĩaa mua,” arĩ werẽgũra erãre.

<sup>41</sup> “Òarãre yũ eropa arĩ werera pũhrũ, copũpũ árĩrãre ñerãre yũ árĩpehrerã tauro opu òpa arĩgũra: “Goãmũ ĩgu dipuwaja moamorã àhraa mua. Yũ mera dujabiricãque. Peamegue waque mua. Iri peame ne yaribea. Watĩ, ĩgu yarã anyua sã erã árĩborore iri peamere iimi Goãmũ. <sup>42</sup> Yũ oaboacũ mua yũre barire obiribũ. Yũ ñemesibucũ mua yũre tĩabiribũ. <sup>43</sup> Mua pohro yũ curicũ yũre masibirã bocatĩribiribũ. Eropa ĩacãbũ. Suhri marigũ yũ árĩquerecũ ta, yũre suhri sãbiribũ mua. Dorecũgũ yũ árĩcũ, peresu yũ árĩcũ sãre eropa ĩacãbũ mua yũre,” arĩ werẽgũra erãre ñerãre. <sup>44</sup> Yũ eroparĩcũ peerã erã yũre serẽpirãcoma: “Opu, ¿mũ oaboacũ, mũ ñemesibucũ, gũa masibigũ mũ árĩcũ, suhri marigũ mũ árĩcũ, dorecũgũ mũ árĩcũ, peresugue mũ árĩcũ, dohpárĩcũ gũapũ mũre itamubiriri?” arĩ serẽpirãcoma yũre. <sup>45</sup> Erã eropa arĩ serẽpicũ yũhũ erãre òpa arĩ werẽgũra: “Diaye mũare arĩgu tĩaa. Oã yaharã mera majagũre bu arĩgũre mua ne itamubiribũ. Eropa arĩgũre mua itamubirã, yũre ta itamubeaa mua,” arĩ werẽgũra erãre. <sup>46</sup> Eropigũ erãre eropa dipuwaja moaniguicãgũcumĩ Goãmũ. Erã eropa dipuwajacũri ne pehresome. Eropirã òarãpũ mũmũri nũcũ òaro árĩrãcoma, arĩ weremi Jesu.

## 26

### *Pahia oparã, mũrã mera Jesure wejẽdiañuma* *Mr 14.1-2; Lc 22.1-2; Jn 11.45-53*

<sup>1</sup> Iri árĩpehrerire ĩgu buhera pũhrũ Jesu gũare ĩgu buherãre weremi:

<sup>2</sup> —Penũ pũhrũ Pascua árĩroca. Irire mua masia. Irisubure yũhũ masũre Goãmũ ĩgu obeodigũre ñearãcoma. Ñeha yũre crusague wejẽrãcoma, arĩmi ĩgu gũare.

<sup>3</sup> Irisubu ta pahia oparã, mũrã sã gamenereñorã. Caifa pahia opu ya wihi gamenereñorã erã. <sup>4</sup> Ero gamenere, erã gũyari mera Jesure ñeha erã wejẽburire game weretamurã iĩñorã.

<sup>5</sup> —Bosenũ árĩcũ ĩgũre ñeabiricãrã. Masa gũa ĩgũre ñeacũ ĩarã gũa gamenereni-jarã gamequeãbocoma, arĩrã iĩñorã erã erã basi.

### *Nomeo poresuri mera Jesure pipeopo* *Mr 14.3-9; Jn 12.1-8*

<sup>6</sup> Irisubure Simo cami boadigũ ya wihi arĩmi Jesu. Gũa sã árĩbũ. ĩgu arĩri maca Betania waĩcũri maca árĩbũ. <sup>7</sup> Iri wihi ĩgu baro watope yũjugo nomeo poresuri aĩgãri, Jesu dipuru weca pipeomo. Iri poresuri alabastro waĩcũdiru dicũri deco, igo pipeori deco wajapagari deco árĩbũ. <sup>8</sup> Igo eropa pipeocũ ĩarã gũa Jesu buherã guarã òpa arĩnũgabũ:

—¿Duhpigo igo irire eropa iisirimaacãri? <sup>9</sup> Iri poresurire duaboañumo. Eropa duago wuaro niyerure wajataboañumo. Eropa wajatago, mojomorocurãre iri niyerure oboañumo, arĩbũ gũa ãgũ buherã.

<sup>10</sup> Gũa eroparĩcũ ãagũ, Jesu gũare weremi:

—¿Duhpirã eropa arĩri mũa igore? Yũre ðaro iigo iimo. <sup>11</sup> Mojomorocurãrũ mũa mera eropa árĩniguirãcoma. Eropirã mũa erãpũre omasia. Yũrũ i yebare mũa mera eropa árĩniguisome. <sup>12</sup> Yũre erã yaaboro core yũ dũpũre amuyugo, poresuri mera sũhumo yũre. <sup>13</sup> Eropigũ diaye ta mũare arĩgũ iiaa. Árĩpehrero i yebaguere ðari buherire erã wererogue igo ðpa iirare wererãcoma. Erã eropa werẽcũ peerã masa bajarã igore guñarãcoma, arĩ weremi Jesu gũare.

*Juda Iscariote Jesure ãhaturirãre ãgũ ãhmuburire erã mera weretamuñumi*  
*Mr 14.10-11; Lc 22.3-6*

<sup>14</sup> Irisubure yujugũ gũa mera majagũ Juda Iscariote pahia oparã pohroque ejarũ.

<sup>15</sup> Eja, erãre serẽpipũ.

—¿Jesure mũare yũ ãhmucũ dipẽ wajayerãcuri yũre mũa? arĩ serẽpipũ erãre.

Ãgũ eroparĩcũ, erã ãgũre treinta seri plataserire oñorã. <sup>16</sup> Erã eropa ocũ Judarũ Jesure ãgũ ãhmuburĩnũre corenipũ.

*Jesu ãgũ buherã mera ãgũ baturinũ árĩyoro*  
*Mr 14.12-25; Lc 22.7-23; Jn 13.21-30; 1Co 11.23-26*

<sup>17</sup> Eropi bũgabiriri panre erã baburinũ bosenu árĩnũgarinũ arĩbũ. Eropirã gũa Jesu buherã ãgũ pohroque waha serẽpipũ ãgũre:

—¿Nohonogue bosenu mari baburire amudoregũ obeori mũhũ gũare? arĩbũ ãgũre.

<sup>18</sup> Gũa eroparĩcũ ãgũ gũare weremi:

—Jerusalengue waque. Ero mũa bocagũre ðpa arĩ wereque: “Marire buhegũ mũre ðpa arĩ weredoreami: ‘Yũ ñero tariboro merogã dũhyanijaa. Pascua árĩcũ yũhũ, yũ buherã mera mũ ya wihi gũa barãca,’ arĩ weredore obeomi gũare,” ðpa arĩ wereque iri wihi opũre, arĩ obeomi Jesu gũare.

<sup>19</sup> Eropirã gũare ãgũ dorediro dopa ta iirã, Pascua árĩcũ gũa baburire amubũ gũa.

<sup>20</sup> Eropi iri ñamire gũa mera doce ãgũ buherã mera bagũ árĩmi Jesu. <sup>21</sup> Gũa barisubu ãgũ gũare weremi:

—Diaye ta mũare arĩgũ iiaa. Yujugũ mari mera majagũ ta yũre ãhaturirãre ãhmugũcumi yũre, arĩ weremi ãgũ gũare.

<sup>22</sup> ãgũ eroparĩcũ peerã guarũ burigã bũjawererã, ãgũre serẽpinũgabũ gũa yu-jurãyeri.

—Opũ, ¿yũ ãhriri mũre ãhmubu? arĩ serẽpipũ.

<sup>23</sup> Gũa eropa arĩ serẽpicũ ãgũ yũhrimi:

—Yũ baripare yũ mera yoso bagũ ta ãhrimi yũre ãhaturirãre ãhmubu. <sup>24</sup> Iribojegue erã yũre arĩ gojadiro dopa ta yũhũ masũ Goãmũ ãgũ obeodigũ sãrigũca. Yũre ãhaturirãre ãhmudigũrũ ñetariaro tarigũcumi. Eropiro ãgũrũre ãgũ masa de-hyoabiricũ ðaboya. Ñero taribiriboñumi, arĩmi Jesu.

<sup>25</sup> ãgũ eroparĩcũ ãgũre ãhaturirãre ãhmubu Juda ãgũre serẽpimi:

—Buhegũ, ¿mũre ãhmubu ãhriri yũhũ? arĩ serẽpimi ãgũ.

—Ë Ʃ. Mũhũ ta ãhraa, arĩmi.

<sup>26</sup> Eropa arĩ weretuhaja gũa barisubu Jesu panre aĩ, Goãmũre “Õhaa,” arĩmi. Eropa arĩtuha irire nuha gũare ãgũ buherãre gueremi.

—Ire aĩ, baque. I yũ dũpũ ãhraa, arĩmi ãgũ.

<sup>27</sup> Eropa arĩtuha ãgũ ihriripare aĩ, Goãmũre “Õhaa,” arĩ, gũare omi.

—Múa árīpehrerã ire ihrique. <sup>28</sup> I yu di ãhraa. Bajarã ñero erã iirare cóãbu sīriguca. Eropigu yu di cóãguca. Eropa sīrigu Goãmũ yu Pagu “Masare ðaro iigura,” ĩgu arĩdiro ii ojogorocuguca. <sup>29</sup> Mũare arĩgu tiiaa. Yu Pagu ĩgu opu árĩroque mua mera igui deco mama decore ihriguca. Mari erogue ihriboro core i igui decore dipaturi ihrinemosome yũhũ, arĩmi Jesu guare.

*Pedro “Jesure masibea,” ĩgu arĩ guyaburiñere wereñumi Jesu*

*Mr 14.26-31; Lc 22.31-34; Jn 13.36-38*

<sup>30</sup> Eropirã yujuñe Goãmũre bayariñere bayatuhajarã wiriabu. Utãgu Olivo waĩcudigugue wabu gua. <sup>31</sup> Erogue gua ejacũ Jesupu guare weremi:

—Dohpagã ñami mua árīpehrerã yure cóãgãrãca. Múa yure cóãborore ðpa ta arĩ gojañuma Goãmũ yare erã gojarapũ: “Ovejare ĩhadibugure erã wejẽcũ iiguca. Yu eropa iicũ oveja ĩgu yarã ĩgure cohãgã wasiria warãcoma,” arĩ gojañuma. <sup>32</sup> Eropigu Goãmũ yure ĩgu masura pũhrũ mua core Galileague wamũhtaguca, arĩmi ĩgu.

<sup>33</sup> ĩgu eroparĩcũ peegu Pedro ðpa arĩrimi:

—Yu mera majarã árīpehrerã erã mũre cóãgãquerẽcũ ta yũpũ mũre ne cóãsome, arĩmi ĩgu.

<sup>34</sup> Jesu yũhrimi:

—Diaye arĩgu tiiaa mũre. Dohpagã ñami cãreña ĩgu wereboro core uhrẽsubu “Yũhũ Jesure masibea,” arĩgũca mũhũ, arĩmi ĩgu Pedrore.

<sup>35</sup> ĩgu eropa arĩquerẽcũ ta Pedro ðpa arĩ yũhrimi:

—Mũ mera yure erã wejẽquerẽcũ ta, “Jesure masibea,” ne arĩsome yũhũ, arĩ yũhririmi Pedro.

Eropirã gua sã gajirã ĩgu buherã Pedro ĩgu arĩro dopa ta arĩribũ gua Jesure.

*Getsemanique Goãmũre serẽñumi Jesu*

*Mr 14.32-42; Lc 22.39-46*

<sup>36</sup> Eropi Getsemanĩ waĩcũri gorogue Jesu gua ĩgu buherã mera waha, erogue eja, guare arĩmi:

—Ohõ doayũque. Múa ohõ doaropẽ sohõgue Goãmũ mera wereniguigu wagũ iiaa, arĩmi ĩgu guare.

<sup>37</sup> Eropa arĩtuha Pedrore, perã Zebedeo porãre, erã uherãre sihgãmi. Eropigu ĩgu turaro bujawere, ñero sĩporãcũpũ. <sup>38</sup> Eropa bujaweregu ĩgu mera majarãre ĩgu sihgãnirãre arĩpũ:

—Bũrigã ñero sĩporãcũa yũhũ. Yure turaro pũriro dopa ta pepigu iiaa. Sohõñari wanigu iiaa. Ohõ dujanique mua. Eropirã yu mera ta tũyũque mua sã, arĩpũ ĩgu erãre.

<sup>39</sup> Eropa arĩtuha ero core merogã wanemo, yeba mereja, Goãmũre arĩpũ:

—Ahũ, yu ñero tariburire iidiabigu iibiricãque. Yu eropa arĩquerẽcũ ta yu gamero dopa iibita. Mũpũ masia. Mũ gamero dopa iique, arĩpũ ĩgu Goãmũre.

<sup>40</sup> Eropa arĩtuha, uherã ĩgu buherã pohrogue eranijagu erã carĩ oyarãre ĩapũ. Erãre ĩagu Pedrore ðpa arĩpũ:

—¿Yuju hora gohra yu mera ta tũyũtamubirari? <sup>41</sup> Õaro iique mua. Múa pepiri mera ðarire iidiaraa mua. Múa seyaro irire iidiaquererã ta irire bocatĩubeaa. Eropirã Goãmũre serẽniguque ñero mua iibiriboro dopa, arĩ werepũ Jesu.

<sup>42</sup> Eropa arĩtuha dipaturi waha, Goãmũre serẽpũ daja:

—Ahũ, yu ñero tariburire iidiagu iique yure. Mũ gamero dopa ta iique, arĩpũ ĩgu.

<sup>43</sup> ĩgu buherã pohrogue uherã pohrogue dipaturi erapũ daja. Eropa eragu carĩ oyarãre ĩapũ daja. Wũja pũritaricãyoro erãre. <sup>44</sup> Eropigu dipaturi erãre apicã dipaturi waha, Goãmũ mera wereniguipũ daja. ĩgu ero core ĩgu arĩdiro dopa ta arĩpũ. <sup>45</sup> Eropa arĩtuha ĩgu buherã pohrogue eraa, erãre arĩpũ:



—¿Múa carĩrã soorã iiri dohpa? arĩpũ ïgũ. Eropa arĩtuha masa erã aricũ ïagũ õpa arĩpũ:

—Iripẽta ãhraa. Dohparagã yũ masũre Goãmũ ïgũ obeodigure ñerãre orãcoma yũre. <sup>46</sup> Wahgãque. Ina warã. Ìaque. Yũre ìhaturirãre obu ohõ ahrimi, arĩpũ ïgũ.

*Jesure ìhaturirã ïgũre peresu iĩnuma*  
*Mr 14.43-50; Lc 22.47-53; Jn 18.2-11*

<sup>47</sup> Ìgũ eropa arĩ wereniguirisubu gũa mera majagũ mũrũpũ Judapũ erami. Eropirã masa bajarã ñoserimijiri yucũ dũcari opanirã ïgũ mera yujuro mera erama. Erã pahia oparã, erã mũrã sã erã obeonirã árĩma. <sup>48</sup> Negohrare Jesure ìhaturirãre wiabu õpa arĩ wereseretuhapũ Juda: “Yũhũ wayuporãre mimigũ ïgũ ta árĩgũcumi mũa ñeabu. Ìgũre yũ mimira pũhrũ ñeaque,” arĩpũ Juda erãre. <sup>49</sup> Eropigũ eragũ Jesu pohrogue mata wapurumujumi.

—Buhegũ, ¿ãhriri mũhũ? arĩ ïgũre wayuporã mimimi.

<sup>50</sup> Ìgũ eropa mimicũ Jesu õpa arĩmi:

—Yũ mera majagũ, ¿duhpigũ õguere ahriri mũhũ? arĩmi ïgũre.

Eropirã erã Jesure ñeama.

<sup>51</sup> Erã eropa iicũ ïagũ Jesu mera majagũ ïgũ matamijire tuãwea aĩ, pahia opũ pohro majagũre ïgũ gamirore tabe corodijucãmi. <sup>52</sup> Ìgũ eropa iicũ ïagũ Jesu ïgũre weremi.

—Mũ matamijire dibuque. Gajirãre ñosenirã árĩrã, erã ñose gamecũ sĩrirãcoma.

<sup>53</sup> Yũ Pagũre yũ itamudorecũ ïgũpũ bajarã anyuare doce cururire yũ pohro obeobocumi. ¿Irire masibeari mũa? <sup>54</sup> Eropa itamubodiro árĩqueregũ ta ïgũre yũre itamudoresome yũhũ. Yũ eropa dorebircũ Goãmũ yare erã gojarapũ arĩdiro dopa ta eropa waroca, arĩmi ïgũ.

<sup>55</sup> Eropa arĩtuha masare weremi ïgũ:

—¿Mũa ñoserimijiri mera, yucũ dũcari mera arirã yajari masũre iro dopa mũa yũre ñearã arirã iiri? Ùmũri nũcũ Goãmũ wihigue yũhũ mũare buhe doacũ, mũa yũre ne ñeabiribũ. <sup>56</sup> Dohpaguere mũa yũre eropa iirã i árĩpehreri Goãmũ yare weremũhtanirã erã arĩ gojadiro dopa ta iiaa mũa, arĩmi Jesu erãre.

Ìgũre eropa ñeacũ ìarã gũa ïgũ buherã árĩpehrerã ïgũre cohã omagã wabũ gũa.

*Judio masa oparã Jesure serẽpiĩnuma*  
*Mr 14.53-65; Lc 22.54-55, 63-71; Jn 18.12-14, 19-24*

<sup>57</sup> Eropi ïgũre ñeanirã pahia tauro opũ Caifa waĩcũgũ ya wihigue aĩ ejañorã ïgũre. Iri wihi ta masare buherã, mũrã sã gamenereñorã. <sup>58</sup> Pedropũ yoarogue erãre ìhanũrusiapũ. Eropa ìhanũrusiagũ Caifa ya wihire cãhmotara sãrirore eja, iri sãriro pohecague ñajaa wapũ. Ñajaja, iri wihire corerã surara mera doapũ. “Jesure duhpiicũ ìagũra,” arĩgũ doapũ Pedro.

<sup>59</sup> Eropirã pahia oparã, gajirã oparã mera gamenererã Jesure wejẽdoreciarã, gũyari mera erã ïgũre ñero dipuwaja moaborore guñamaariñorã. <sup>60</sup> Erã eropa weresãburire guñabocabiriñorã. Eropa guñabocabiriquererã ta masa bajarã ïgũre eropa weresãmorã amañorã. Eropirã perã ïgũre weresãmorã erañorã. Õpa arĩñorã:

<sup>61</sup> —Ihĩ õpa arĩmi: “Goãmũ wihire cóãmasia. Eropa cóãgũ ùhrenũ pũhrũ iri wihire dipaturi iigũra,” ïgũ arĩcũ peebũ gũa, arĩ weresãmaacãñorã Jesure.

<sup>62</sup> Erã eropa arĩra pũhrũ pahia tauro opũ wahgãnũgaja, Jesure serẽpipũ:

—¿Oã mũre weresãquerecũ ta erãre yũhri gamebeari mũhũ? ¿Mũre erã weresãriro dohpa arĩ yũhri gahmeri mũhũ? arĩpũ opũ.

<sup>63</sup> Ìgũ eroparĩcũ peequeregũ ta Jesu eropa pepicãpũ. Ìgũ eropa yũhribircũ ïagũ pahia tauro opũ ïgũre dipaturi serẽpipũ daja:



—Goãmũ ojocarinigucãgũ mera diaye arĩque mũhũ. Mũhũ eropa arĩbiricũ mũre ãgũ dipuwaja moagucumi. Wereque guare. ¿Cristo Goãmũ magũ ta ãhriri mũhũ? arĩ serẽripũ daja.

<sup>64</sup> ãgũ eroparĩcũgue ta Jesu yũhripũ:

—ãgũ ta ãhraa. Mũare diaye weregũ tiiaa. Pũhrũ yũhũ masũ Goãmũ ãgũ obeodigũ Goãmũ yũ Pagũ turagũ pohro ãgũ diayepũ doacũ ãarãca mũa. Eropirã umaro maja imica weca yũ dujaricũ sãre ãarãca, arĩ yũhripũ Jesu.

<sup>65</sup> ãgũ eroparĩcũ peegũ pahia opũ, ãgũ basi ãgũ sañarañe suhrirore yeguecãpũ gajirãre “Guatariacãmi,” arĩdoregũ.

—ãre weresãrãre gajirãre gamebeaa pare. ãgũ basi Goãmũre ãgũ ñero werenigucã peea mari. Eropirã ãgũ ñero iira dipuwajare masituhãa mari. <sup>66</sup> ¿Eropirã dohpa iirãcuri mari dohpaguere ãre? arĩ serẽripũ ãgũ gajirã oparãre.

—ãgũ ñeri dipuwaja wejẽcãro gahmea, arĩ yũhriñorã erã.

<sup>67</sup> Erã eropa arĩra pũhrũ ãgũ diapore disico ehosũ, ãgũre pañorã erã. <sup>68</sup> Gajirã ãgũ cuirire diricãhmota õpa arĩ wereyañorã ãgũre:

—¿Noa mũre pari? Cristo Goãmũ beyedigũ arĩgũ ãabiriqueregũ ta wereque guare, arĩ pañorã erã.

*—ãgũre masibea, arĩ gũyañumi Pedro Jesure  
Mr 14.66-72; Lc 22.56-62; Jn 18.15-18, 25-27*

<sup>69</sup> Eropi iri wihi pohro arĩri pũũ õari pũũ Pedropũ doapũ. ãgũ eropa doacũ ãago pahia opũ pohro majago ãgũ pohrogue erago õpa arĩpo:

—Mũ sã Jesu Galilea majagũ mera ãhrabũ, arĩpo igo.

<sup>70</sup> Igo eroparĩcũ peegũ Pedro õpa arĩpũ:

—¿Dohpa arĩmaacãgo iiri mũhũ? Mũ arĩgũre ne masibea yũhũ, arĩpũ Pedro arĩpehrerã erã peero.

<sup>71</sup> Igo eropa arĩra pũhrũ iri pũũ maja sãriro disiporo pohrogue wapũ Pedro. Ero ãgũ arĩcũ gajigo pohro majago ãgũre ãago, ero arĩrãre õpa arĩpo igo sã:

—Jesu Nazare majagũ mera ãhrami ihĩ, arĩpo igo Pedrore daja.

<sup>72</sup> Igo eroparĩcũ peegũ Pedro yũhripũ:

—Goãmũ mera diaye arĩgũ iiaa. ãgũ mũ arĩgũre ne masibea yũhũ, arĩ yũhripũ Pedro.

<sup>73</sup> Eropi merogã pũhrũ ta ero niguinirã Pedro pohrogue waha, ãgũre õpa arĩñorã.

—Diaye ta ãhraa. Jesu mera majarã mera majagũ ta ãhraa mũ sã. Erã iro dopa ta werenigũia mũhũ, arĩñorã erã Pedrore.

<sup>74</sup> Erã eroparĩcũ Pedro yũhripũ:

—Diaye ta Goãmũ mera arĩgũ iiaa mũare. Yũ diaye arĩbiricũ Goãmũ yũre dipuwaja moaporo. ãgũ mũa arĩgũre ne masibea yũhũ, arĩ yũhripũ ãgũ erãre.

ãgũ eroparĩcũ ta cãreña werepũ. <sup>75</sup> ãgũ werecũ peegũ Jesu ãgũre arĩrare guñapũ. “Cãreña ãgũ wereboro core ‘Jesure masibea,’ arĩgũca mũhũ. Æhresubu eropa arĩgũca mũhũ,” Jesu ãgũre arĩrare guñapũ Pedro. Eropa guñagũ iri sãrirore wiria turaro orepũ.

## 27

*Pilato pohrogue Jesure aĩgãñuma  
Mr 15.1; Lc 23.1-2; Jn 18.28-32*

<sup>1</sup> Eropirã boyodi merero ta pahia oparã, mũrã sã Jesure erã wejẽdoreborore game weretamuñorã. <sup>2</sup> Erã eropa weretamura pũhrũ ãgũre dihri, Pilato waĩcũgũ opũ pohrogue aĩgã, ãgũre oñorã Pilatore. Pilatorũ iri yeba majarã opũ arĩmi.

### *Juda Iscariote s̄ria wañumi*

<sup>3</sup> Eropigũ Jesure erã wejẽdorecũ ãagũ Judapũ Jesure ãgũ ãhmurare guña turaro bujawerepũ. Eropa bujaweregu treinta seri niyeruserire ãgũ ñearaserire wiagũ wagũ, pahia pohrogue, mũrã pohrogue eja, õpa arĩpũ:

<sup>4</sup> —Jesu mũare yũ ãhmudigũ ñeri marigũ ãgũ arĩquerecũ ta erã wejẽdoreama ãgũre. Eropigũ mũare ãgũre ãhmugũ ñero iigũ iiaya yũhũ. Eropigũ i niyeruserire mũare wiagũ iiaa, arĩpũ Juda erãre.

Ãgũ eropa arĩ werera pũhrũ erã yũhriñorã:

—Eropa ta iicuraporo. Mũ eropa arĩri guare duhpiburi arĩbeaa. Mũ dihta eropa arĩ pepia irire, arĩ yũhriñorã erã ãgũre.

<sup>5</sup> Erã eropa arĩ yũhrira pũhrũ erã arĩri wihi Goãmũ wihigue Juda ãgũ niyeruserire mehsiripicãpũ. Mehsirituha waha wapũ. Waha, yuradare dirisiu, ãgũ basi ãgũ wũnũgũ tuhbiu, buhrimadija, s̄ria wapũ pare.

<sup>6</sup> Eropirã pahia oparã niyeruserire aĩrã õpa arĩñorã:

—I niyerure Goãmũ wihi maja comorogue niyeru diburi comorogue mari apimasi-beaa. I niyeru mera ta masure wejẽdorema. Eropiro mari doreri marire eropa arĩri niyerure dibudorebeaa Goãmũ wihigue, arĩñorã erã erã basi.

<sup>7</sup> Erã eropa arĩra pũhrũ, “Õpa iirã,” erã arĩ weretamura pũhrũ mátasorori mohmegũ ya yebare asũrã wañorã. Iriseri mera asũñorã. Gajipũ majarã iri macague eranirã s̄ricũ erãre yaaburi yebare asũñorã. <sup>8</sup> Eropirã iri yebare “Di cóãri yeba,” arĩ waĩyema masa. Dohpague sãre eropa ta waĩcũa. <sup>9</sup> I arĩpehreri eropa wayoro iribojegue majagũ Jeremia ãgũ “Eropa waroca,” ãgũ arĩdiro dopa ta. ãgũ Goãmũ ya weremãhtadigũ arĩñumi. Õpa arĩ gojañumi ãgũ: “ ‘Treinta niyeruserire plataserire iripẽta wajayerãra gua ãgũre ñeaborore,’ arĩrãcoma Israe masa. <sup>10</sup> Eropirã iriseri mera mátasorori mohmegũ ya yebare asũrãcoma erã. Õpa ta yũre iidoremi Goãmũ,” arĩ gojañumi Jeremia iribojegue.

### *Pilato Jesure serẽpiñumi*

*Mr 15.2-5; Lc 23.3-5; Jn 18.33-38*

<sup>11</sup> Eropi Pilatore erã Jesure ora pũhrũ ãgũpũ ãgũre serẽpipũ:

—¿Diaye ta judio masa erã opũ ta ãhriri mũhũ? arĩ serẽpipũ Jesure.

—Mũ arĩro dopa ta ãgũ ta ãhraa, arĩ yũhrũ Jesu.

<sup>12</sup> Eropa arĩ yũhriqueregu ta, pahia oparã, mũrã sã erã weresãcũ yũhribiripũ. <sup>13</sup> ãgũ eropa yũhribiricũ ãagũ Pilato serẽpipũ:

—¿I arĩpehreri erã weresãrere peebeari mũhũ? arĩ serẽpipũ ãgũ Jesure.

<sup>14</sup> ãgũ eropa arĩ serẽpiquerecũ ta Jesu ne yuju disiro yũhribiripũ. ãgũ eropa yũhribiricũ ãagũ Pilato uca wapũ.

### *Jesure wejẽdoreñuma*

*Mr 15.6-20; Lc 23.13-25; Jn 18.38-19.16*

<sup>15</sup> Bojori nũcũ Pascua arĩcũ peresu arĩdigũre yujugũre masa “ãgũre wiuque,” erã arĩgũre Pilato eropa wiubasamãripũ. <sup>16</sup> Irisubure Barrabã waĩcũgu peresugue arĩpũ. ãgũre masiñorã masa. <sup>17</sup> Eropigũ erã gamenerecũ Pilato serẽpipũ erãre:

—¿Nihĩpũre mũare wiubasacuri yũhũ? ¿O Barrabãre o Jesure “Cristo” erã arĩgũre wiubasacuri yũhũ? arĩ serẽpipũ Pilato Jesure wiudianijagũ.

<sup>18</sup> Jesure masa erã mahicũ ãarã judio masa oparã ãgũre ãhaturirã iĩñorã. Eropa ãhaturirã ãgũre oñorã Pilatore. Irire erã ãhaturirare masigũ Pilato Jesure wiudiaripũ.

<sup>19</sup> Eropi Pilato masare ãgũ beyeri pẽro ãgũ doacũ ãgũ marapo ãgũre quere obeopo: “Dohpagã ñamire Jesure quẽgo burigã ñero pepiabũ ãgũre ñero iiburire. Eropigũ

ĭgure ñeri marigure ne gajiropa iibiricãque mũhũ,” arĩ werebeopo ĭgu marapo Pilatore.

<sup>20</sup> Pilato Jesure eropa wiudiaquerecũ ta pahia oparã, mũrã sã masare õpa arĩdoreñorã: “Barrabãpũre wiudoreque. Jesupũre wejẽdoreque,” arĩdoreñorã masare. <sup>21</sup> Eropigũ Pilato masare serẽpipũ daja:

—¿Oã perãre nihipũre mũare wiubasacuri yũhũ? arĩ serẽpipũ.

—Barrabãpũre wiubasaque guare, arĩ yũhriñorã.

<sup>22</sup> —¿Ihĩ Jesu, “Cristo” erã arĩgũpũre dohpa iigũcuri yũhũ? arĩ serẽpipũ ĭgu.

—Crusague pabia wejẽque ĭgure, arĩ yũhriñorã masa árĩpehrerã.

<sup>23</sup> —¿Ñehenore ñerire iiari ihĩ mũa eroparĩcũ? arĩpũ ĭgu.

ĭgu eroparĩcũ peerã erã turaro mera gaguiniguinemoñorã:

—Crusague pabia wejẽque ĭgure, arĩ gaguiniguinorã daja masa ĭgure.

<sup>24</sup> Erã eropa arĩ gaguiniguicũ peegũ, ĭgure erã peediabiricũ ĭagũ, “Masa gua gamequeãbocoma,” arĩgũ, yũhriũ ta õpa iipũ Pilato. Decore aĩgãridoretuhaja masa erã ĭhuro ĭgu mojo coepũ. Eropa mojo coegũ õpa arĩpũ:

—ĭre wejẽra dipuwaja, yaha dipuwaja árĩsome. Mũa ya dipuwaja árĩroca, arĩgũ mojo coepũ.

<sup>25</sup> ĭgu eroparĩcũ peerã árĩpehrerã masa õpa arĩñorã:

—ĭre gua wejẽdorera dipuwaja gua porã sã gua ya dipuwaja ta árĩporo, arĩñorã masa.

<sup>26</sup> Erã eroparĩcũ peegũ Pilato Barrabãre peresugue árĩdigũre wiudorepũ masa erã gamegũre. Eropa iitua Jesupũre yuradari mera tãradore, ĭgure crusague pabia wejẽdoregũ wiapũ surarare.

<sup>27</sup> ĭgu eropa wiacũ Pilato ya wihigue ĭgu surara aĩ ejañorã Jesure. Eropirã erã surara árĩpehrerãre Jesu pohrogue gameneoñorã. <sup>28</sup> Eropirã ĭgu suhrire tuwea aĩ, opũ ya suhriro dopa bejariñere Jesure sãñorã. <sup>29</sup> Eropa sãtuha, pora berore iitua, ĭgu dipuru weca duhpeoñorã. Eropa duhpeotuha, yucũgũre diayepũ mohsuañorã. Mohsuatuha, õpa arĩ wereyañorã erã ĭgure ĭgu pohro merejarã:

—Umupeorã arique. Judio masa opũ õaro árĩporo, arĩ wereyañorã ĭgure.

<sup>30</sup> Eropirã ĭgure disico ehosũñorã. Erã mohsuadigũre ĭgure tuãwea aĩ, ĭgu dipurure pañorã irigũ mera. <sup>31</sup> ĭgure eropa wereyara pũhrũ erã sãra suhrirore tuwea aĩ ĭgu ya suhriropũre sãñorã daja. Eropirã crusague pabia wejẽmorã ĭgure aĩ wiria wañorã.

*Erã Jesure crusague pabia wejẽñuma*

*Mr 15.21-32; Lc 23.26-43; Jn 19.17-27*

<sup>32</sup> ĭgure aĩgã, Simo waĩcũgũre Cirene majagũre bocatĩri, ĭgure Jesu ĭgu coãra crusare coãtamudorema.

<sup>33</sup> Coãgã Gólgota waĩcũrogue ejama. Gólgota arĩro, mari ya mera “Dipu pero” arĩro iiaa. <sup>34</sup> Eropirã vinore suĩri deco mera erã morera decore Jesure orima erã. Iri decore ihriña, ihribirimi ĭgu.

<sup>35</sup> Eropirã ĭgu suhrire tuwea aĩra pũhrũ ĭgure crusague pabiama erã. Eropa pabiatuha ĭgu suhri mũrare, “¿Noa yañe árĩrocuri iñe?” arĩ masimorã erã basi game deamehtu birama. Eropa iirã Goãmũ yare weremũhtadigũ ĭgu arĩdiro dopa ta iirã iima erã. Õpa arĩ gojañumi ĭgu: “Yaha suhrire erã basi aĩmorã, ‘¿Noa yañe árĩrocuri iñe?’ arĩ masimorã erã basi game deamehtu birama erã,” arĩ gojañumi iribojeguere. <sup>36</sup> Deabiratuha ĭgure ĭhadoacurima erã. <sup>37</sup> ĭgu dipuru weca crusague õpa arĩ gojarapũre pabia tuma erã ĭgure weresãra wererapũre. “Ihĩ judio masa tauro opũ ãhrimi,” erã arĩ gojarapũre pabia tuma.

<sup>38</sup> Eropirã perã yajari mūrare Jesu pohro gajì crugarigue pabia tuma erã sãre. Yujugũ ãgũ diayerũ, gajigũre ãgũ copũ pabia tuma erã. <sup>39</sup> Crusari pohro tarigãrã Jesure ãha, erã dipure yurerã, ñero arĩ wereniguima ãgũre:

<sup>40</sup> —“Goãmũ wihire cohã, ùhrenũ pũhrũ iri wihire amugũra daja,” arĩ werenigu-idigũ árĩribũ mũhũ. Goãmũ magũ árĩgũ mũ basi dijaque. Eropigũ mũ basi itamuque. Eropigũ tari weregũca mũhũ, arĩma masa.

<sup>41</sup> Eropa ta pahia oparã, masare buherã sã eropa arĩ wereyama.

<sup>42</sup> —Ígũ gajirãre taudigũ árĩqueregũ ta ãgũ basi taumasibeami. “Israe masa opũ ãhraa,” arĩrimi ãgũ. Eropirã ãgũ basi ãgũ dijaricũ ãarã ãgũre umupeorãca. <sup>43</sup> Ígũpũ Goãmũre umupeorimi. Eropigũ “Goãmũ magũ ãhraa,” arĩrimi ãgũ. Ígũ eropa arĩgũ árĩcũ Goãmũpũ ãgũre itamuporo, arĩ wereyama erã.

<sup>44</sup> Yajari mũra ãgũ pohro erã pabianirã eropa ta ãgũre wereya ñero wereniguima erã sã.

### *Jesu sĩa wañumi*

*Mr 15.33-41; Lc 23.44-49; Jn 19.28-30*

<sup>45</sup> Eropi goeri boje árĩcũ ùhre hora gohra árĩpehrerogue naitĩa wabũ. <sup>46</sup> Eropigũ irisubu naitĩa wari subure Jesu turaro gaguinimi:

—Elí, Elí, ¿lema sabactani? arĩmi ãgũ. Eropa arĩgũ òpa arĩgũ iimi mari ya mera: “Yũ Goãmũ, yũ Goãmũ, ¿duhpigũ yũre cohãri mũhũ?” arĩgũ iimi.

<sup>47</sup> Ígũ eroparĩcũ peenirã yujurãyeri ero niguinirã òpa arĩrima:

—Goãmũ ya weremũhtadigũre Eliare sihugũ iicumĩ, arĩrima erã.

<sup>48</sup> Eropigũ yujugũ erã mera majagũ mimi aĩri yũsũ mera vino sũĩrire yosotuha, aĩ omagã, yucũgũ ojogorore diritu, Jesure simujumi. <sup>49</sup> Ígũ eropa iicũ ãarã gajirã simujugũre òpa arĩma:

—Corenique. Elia ãgũre ãgũ itamucũ ãanirã dohpa mari, arĩma erã.

<sup>50</sup> Erã eropa arĩra pũhrũ dipaturi Jesu turaro gaguinigi sĩa wami. <sup>51</sup> Ígũ sĩricũ ta Goãmũ wihi majañe suhriro ero erã cãhmotara suhriro deco mera yehguea wayoro. Eropiro yeba sã ñohmẽbũ. Eropa ñohmẽcũ utã sã pagayeri sã wahria wabũ. <sup>52</sup> Eropirã masa goberi pãricũ, bajarã Goãmũ yarã árĩnirã iribojegue sĩrinirã mũra masa wiriañorã. <sup>53</sup> Masa wiriarã iri goberire cóãcã òari macague Jerusalengue wañorã erã. Erogue erã wacũ masa bajarã erãre ãañorã.

<sup>54</sup> Eropirã yeba ñohmẽcũ ãarã, sĩrinirã mũra erã masa wiriacũ ãarã, surara opũ ãgũ surara mera ùca wama. Erã Jesure crusage árĩgũre corerã árĩma. Ùca wa, òpa arĩma:

—Diaye ta ãhraa. Ihĩ Goãmũ magũ ta ãhrañumi, arĩma erã.

<sup>55</sup> Eropirã Galileague Jesu mera arinirã ãgũre itamunirã nome árĩma. Yoarogue crusage tuyagũre ãhabeo niguibũ gũa erã mera. <sup>56</sup> Erã nome mera María Magdalena árĩmo. Gajigo María waĩcũgo sã árĩmo. Igopũ Santiago, José sã pago árĩmo. Gajigo Zebedeo marapo árĩmo.

### *Jesu dũpũre masa gobegue apiñumi José*

*Mr 15.42-47; Lc 23.50-56; Jn 19.38-42*

<sup>57</sup> Eropi ñamicague José Arimatea majagũ doberi opagu ero árĩmi. Ígũ Jesu buhegũ árĩmi. <sup>58</sup> Eropigũ Pilato pohrogue eja, Jesu dũpũre serẽpũ. Ígũ eropa serẽcũ peegũ Jesu mũrũ dũpũre odorepũ Pilato. <sup>59</sup> Ígũ eropa dorera pũhrũ Josépũ Jesu mũrũ dũpũre aĩ, diju, òari suhriro gũhrari mariri suhriro mera ãgũ dũpũre omapũ. <sup>60</sup> Omatuha, José ãgũ ya masa gobegue apipũ ãgũ dũpũre. Iri gobe erã utãyegue erã seara gobe mama gobe árĩyoro. Iri gobegue apituha, wũariye utãyere taragãpũ iriye

mera bihabu. Bihatuha, waha wapɛ. <sup>61</sup> Eropirã María Magdalena, gajigo María mera iri gobegure ñhadoo coreñorã.

*Jesure erã apira gobere surara coreñuma*

<sup>62</sup> Eropi gajinɛ, Pascua árĩburire erã amuranɛ pɛhrɛ Sabado árĩcũ pahia oparã, fariseo masa sã Pilato pohro gamenereñorã. <sup>63</sup> Gameneretuha òpa arĩñorã erã Pilatore:

—Opɛ, irire guña gɛ. Ĩgɛ gɛyaricɛgɛ Jesu ojocarinigɛ òpa arĩpɛ ĩgɛ: “Ʋhrenɛ pɛhrɛ masa mɛriagɛca yɛhɛ,” arĩpɛ ĩgɛ. <sup>64</sup> Ĩgɛ eropa arĩdigɛ árĩcũ ĩgɛ buherãpɛ ĩgɛ dɛpɛre yajabocoma. Eropa yajarã masare òpa arĩbocoma: “Jesu masa mɛriami,” arĩbocoma erã. Ĩgɛ Jesupɛ masare gɛyagɛ iimi. Ĩgɛ buherã sã “Ĩgɛ masa mɛriami,” arĩrã gɛyarã iirãcoma. Eropirã Jesu ĩgɛ gɛyadiro tauro erã gɛyaripɛ ñetariaroca. Eropa yajari arĩgɛ ɛhrenɛ gohra mɛ surarare corecoreque erã ĩgɛ mɛrɛre apidiroque, arĩñorã erã Pilatore.

<sup>65</sup> Pilato yɛhripɛ:

—Áɛ. Yaharã surara coreporo. Eropirã mɛa bocatĩuropẽ iri gobere òaro coreque, arĩpɛ ĩgɛ erãre.

<sup>66</sup> Ĩgɛ eroparĩcũ erã waha, iri gobere bihariye merague ta pihatuñorã masa erã ñajacũ ñha masimorã. Eropirã surarare iri gobere corecoreñorã.

## 28

*Jesu masa mɛriañumi*

*Mr 16.1-8; Lc 24.1-12; Jn 20.1-10*

<sup>1</sup> Eropi judio masa soorinɛpɛ Sabadonɛpɛ irinɛ taricũ, Domingo árĩcũ ñamiñarigã árĩcũ María Magdalena gajigo María mera Jesu masa gobere ñarã wañorã. <sup>2</sup> Eropiro mata yeba turaro ñohme purumujuyoro. Eropa ñohmecũ mari Opɛ ĩgɛ anyu ɛmarogue aridigɛ dijari, masa gobere bihariyere ɛtãyere tarabeo iriye weca doapɛ. <sup>3</sup> Ĩgɛ anyu bupu miaro dopa òaro goesirigɛ, ĩgɛ suhri yaji poari iro dopa òaro boreri suhricɛgɛ árĩpɛ. <sup>4</sup> Ĩgɛ eropa dehyoacũ, surara iri gobere corerã, ɛcataria wa, naragã, weca gohrare sĩrinirã iro dopa wañorã. <sup>5</sup> Eropigɛ anyupɛ erã nomere òpa arĩpɛ:

—Yɛre gũibiricãque. Crusague erã pabiadigɛre Jesure mɛa amacũ masia yɛhɛ.

<sup>6</sup> Ĩgɛ dohpaguere òre marimi. Ĩgɛ arĩdiro dopa ta ĩgɛ masa mɛria wami. Erã ĩgɛ dɛpɛre erã apidirore ñarã arique. <sup>7</sup> Tuhaja ĩgɛ buherã pohroque ɛmɛdiaro waha, òpa arĩ wererã waque: “Ĩhĩ Jesu sĩridigɛ masa mɛriami. Eropigɛ mɛa core Galileague ĩgɛ wamɛhtagɛcumi. Eroque ĩgɛre ñarãca mɛa,” arĩ wererã waque mɛa. I yɛ arĩrare guñaque mɛa, arĩpɛ anyu erã nomere.

<sup>8</sup> Ĩgɛ eropa arĩra pɛhrɛ erã nome masa gobegue arĩnirã nome yojaro mera wiria, erã ñarare gũiquererã ta, mucubiriri mera Jesu buherãre wererã warã, omañorã.

<sup>9</sup> Eropa warã nomere Jesu bocatĩripɛ:

—¿Noho wahari mɛa? arĩ serẽripɛ ĩgɛ. Ĩgɛre ñha erãpɛ ĩgɛ pohroque eja, ĩgɛ guburire ñeha ĩgɛre umupeoñorã.

<sup>10</sup> —Gũibiricãque mɛa. Yɛ pagɛ porãre “Galileague waque,” arĩ wererisa. Eroque yɛre ñarãcoma, arĩpɛ Jesu erãre.

*Masa gobere corerã surara erã ñarare wereñuma*

<sup>11</sup> Erã nome wererã warisubu surara watope yujurãyeri masa gobere corenirã surara Jerusaléngue pahia oparãre wererã wañorã. Jesu ĩgɛ masa gobegue ĩgɛ mɛriarare werepehocãñorã. <sup>12</sup> Erã eropa arĩ wererã pahia oparã, mɛrã mera gamenereñorã. Gamenerere weretamuñorã. Eropirã surarare gɛyadorerã niyerure wajayañorã.



<sup>13</sup> —Õpa arĩque mua masare: “Ñami gua carĩra puhru, ĩgu buherãpu masa gobegue eraa, ĩgu dũpũre aĩcãnirã ãhrama,” arĩ wereque masare. <sup>14</sup> Mua eropa arĩ werecũ Pilatorũ mua carĩtariare peecãbocumi. ĩgu eropa peecũ, ĩgũre wererãra gua. “Erãre dipuwaja moabiricãque,” arĩ wererãra gua ĩgũre, arĩñorã erã surarare.

<sup>15</sup> Erã eropa arĩra puhru surarapu niyerure ñeha, erãre erã guyadorediro dopa ta masare wererã wañorã erã. “Jesu buherã aĩcãnirã ãhrama ĩgu mũru dũpũre,” arĩñorã erã. Eropirã eropa Jesu ĩgu dũpu aĩrare wereniguima judio masa. Dohpague sãre eropa ta arĩ werema erã.

*Jesu ĩgu buherãre ĩgu yare ĩgu iidorera apiñumi*  
*Mr 16.14-18; Lc 24.36-49; Jn 20.19-23*

<sup>16</sup> Eropi gua Jesu buherã once buherã Galileague waha utãgũgue Jesu ĩgu wadoredigũgue wabũ gua. <sup>17</sup> Erogue eja Jesure ĩarã umupeobũ gua ĩgũre. Eropa umupeoquererã ta gua yujurãyeri “Thĩ Goãmũ magũ árĩbiribocumi,” arĩ pepiribũ dohpa. <sup>18</sup> ĩgũpu õpa arĩmi gũare:

—I yebagũere, umaro sãre Goãmũ árĩpehrerã tauro turarire omi yũre. <sup>19</sup> ĩgu eropa ocũ mũare õpa iidorea: Árĩpehrero majarãre yahare buherã waque erã yaharã erã waboro dopa. Eropirã mari Pagũ waĩ mera, yũ waĩ mera, Espĩritu Santo waĩ mera erãre waĩyeque. <sup>20</sup> Eropirã mũare yũ dorerare erã iipehoburire buheque erãre mua. Eropirã ire yũ arĩrare guñaque: Árĩpehrerinũri nũcũ mua mera árĩgũca ne i mũũ pehrecũgue, arĩ weremi gũare Jesu.

## San Marcos

*Ñu waīyegũ buhenũgañumi*

*Mt 3.1-12; Lc 3.1-9, 15-17; Jn 1.19-28*

<sup>1</sup> Goãmũ magũ Jesucristo ïgũ iirare, ðari buherire wereri ðpa árĩnũgayoro.

<sup>2</sup> Goãmũ yare weremũhtadigũ Isaia ïgũ iribojegue gojadiro dopa ta i wereri ãhraa.

Õpa arĩ gojañumi ïgũ:

Goãmũ ïgũ magũre ðpa arĩpũ: “Mũ core mãre wereyubure obeogũ iiaa. <sup>3</sup> Eropigũ ïgũ masa marirogue árĩgũcumĩ. ïgũre peerãre weregũ busũro mera arĩ wereniguigũcumĩ: ‘Mari Opũ ïgũ ariburi mare amuro dopa ïgũ ariboro core ðarã árĩyũque ïgũre peemorã,’ arĩ wereniguigũcumĩ,” arĩpũ Goãmũ, arĩ gojañumi Isaia, Ñu waīyegũ ïgũ masa dehyoaboro coregue.

<sup>4</sup> Eropigũ Ñu waīyegũ masa marirogue masare buhemũripũ. Õpa arĩpũ:

—Mũa ñero iirire bujawereque. Dohpaguere ðaripũre gohrotoque. Eropirã waīyenirã árĩque. Mũa eropa gohrotocã ïagũ mũa ñero iirare Goãmũ cãdijigũcumĩ, arĩ buhemũripũ ïgũ. <sup>5</sup> Eropirã árĩpehrero Judea yeba majarã, Jerusalén majarã mera ïgũ pohrogue peerã ejañorã. Eropigũ Ñu erãre waīyepũ Jordán waĩcũriyague. Erã ñero iirare weretarituhacã ïha ïgũ erãre waīyemũripũ.

<sup>6</sup> Eropigũ Ñu camello ya gasiro suhrirore suhricũpũ. Waibũgũ ya gasirore ta tũãdiuridacũgũ árĩpũ. Poreroa, mome sã ïgũ bari árĩyoro. <sup>7</sup> Eropigũ ðpa arĩ buhemũripũ:

—Yũ pũhrũre yũ tauro turagũ arigũcumĩ. Õatariagũ ãhrimi ïgũ. ïgũ iro dopa ðagũ árĩbeaa yũpũ. Eropigũ ïgũre pepigũ, “Yũ tamera bu árĩgũ ãhraa yũhũ,” arĩ pepia yũhũ. <sup>8</sup> Masare waīyegũ deco mera waīyee yũpũ. ïgũpũ yũ tauro iigũcumĩ. Mũare Goãmũ yarã iigũcumĩ ïgũ. Espĩritu Santore masa mera árĩniguicũ iigũcumĩ, arĩ buhepũ Ñu.

*Ñu Jesure waīyeñumi*

*Mt 3.13-17; Lc 3.21-22*

<sup>9</sup> Eropi irisubure Jesu Nazaregue, Galilea yeba árĩri maca árĩdigũ, dia Jordán waĩcũriyague ejarũ. ïgũ eropa ejacũ Ñu waīyepũ ïgũre. <sup>10</sup> ïgũ waīyetuhajacũ Jesu diague niguidigũ, majanũgaja umarogue ïhamujupũ. Umũsi pãrimaa wayoro. Ero pãrimaacũ ta Espĩritu Santo buja iro dopa bejagũ ïgũ weca dijibejarũ. <sup>11</sup> Eropiro umarogue wereniguiri busũyoro.

—Mũhũ yũ magũ yũ mahigũ ãhraa. Mũ mera bũrigã mucubiria, arĩro cariyoro umarogue.

*Satana ñerire iidoreriñumi Jesure*

*Mt 4.1-11; Lc 4.1-13*

<sup>12</sup> Irisubure Espĩritu Santo Jesure masa marirogue wadorepũ. <sup>13</sup> Eroque ejaũ cuarenta nũri gohra árĩpũ. Eroque ïgũ árĩcũ, Satanapũ Jesu ïgũ ñero iirire ïadiagũ ñerire iidoreripũ ïgũre. Eropigũ Jesu waimũrã nũgũ majarã watope árĩpũ. Eropirã anyuapũ ïgũre itamu ïgũre bari oñorã.

*Jesu Galilea yebague buheñumi*

*Mt 4.12-17; Lc 4.14-15*

<sup>14</sup> Eropi Ñure erã peresugue erã biha dohora pũhrũ, Jesupũ Galileague ðari buherire Goãmũ ïgũ opũ árĩrĩre weregũ wapũ. <sup>15</sup> Õpa arĩ wererpũ:

—Dohpaguere òpa àhraa: Goàmũ ìgũ opũ árìboro merogã duhyaa. Mũa ñeri iirire bujawereque. Eropirã òarire gohrotoque. Òari buherire peeque mũa, arĩ buhemuripũ Jesu.

*Jesu wapicũrã wai wejẽrãre ìgũ mera majarã árĩmorãre sihuñumi*

*Mt 4.18-22; Lc 5.1-11*

<sup>16</sup> Eropigũ Galilea waĩcũriya tũrogue ejagũ, Simore ìgũ pagũ magũ mera bocajapũ. Erã wai wejẽdi masa árĩñorã. Erã wejẽdi yucũre mehyurã iĩñorã erã iri ditaru wũari ditarugue.

<sup>17</sup> Erãre arĩpũ Jesu:

—Yũ mera majarã árĩmorã arique mũa. Yũ mera mũa aricũ mũa waire mũa ñeha gameneorã mũa iiro dopa ta, Goãmũ yarã árĩmorãre sihu gameneomorãre iirã árĩcũ ìgũra mũare. Yũ mera mũa aricũ eropa iimorãre apigũra mũare. Eropirã yũ mera arique, arĩpũ Jesu.

<sup>18</sup> Ìgũ eroparĩcũ peerã, erã wejẽdi yucũre apicã ìgũ mera waha wañorã.

<sup>19</sup> Eropirã erã merogã tarigã Santiagore ìgũ pagũ magũ Ñu sãre bocajañorã daja. Erãpũ Zebedeo porã árĩñorã. Erã ya dohodirugue erã wejẽdi yucũre amurã iĩñorã.

<sup>20</sup> Erã perãre ìgũ sihubeopũ. Ìgũ sihubeocũ pee erãpũ erã pagũre ìgũre itamurã mera dohodirugue apicã Jesu mera waha wañorã.

*Watĩ ñajasũdigũ Jesure bocatĩriñumi*

*Lc 4.31-37*

<sup>21</sup> Eropi erã Capernaum waĩcũri macague ejañorã. Eropigũ Sabado árĩcũ judio masa erã buheri wihigue buhegũ ñajapũ. <sup>22</sup> Eropigũ òaro masipehogũ buhegũ, judio masare erã buherã iro dopa árìbiripũ ìgũ. Ìgũ eropa buhecũ iri maca majarã pee uca wañorã. <sup>23</sup> Irisubure iri wihire yujugũ watĩ ñajasũdigũ árĩpũ. Eropigũ òpa arĩ gaguiniguiipũ Jesure:

<sup>24</sup> —Mũhũ Jesu Nazare majagũ garibobiricãque gũare watẽare. ¿Duhpibu òpa iiri gũare? ¿Mũhũ gũare dederecũ iibu iiri? Goãmũ magũ mũ òagũ árĩcũ gũa masia, arĩ gaguiniguiipũ ìgũ Jesure.

<sup>25</sup> Ìgũ eroparĩcũ peegũ Jesu turipũ watĩre:

—Ejarimaricãque. Ìgũre cohã wiria waque, arĩpũ Jesu.

<sup>26</sup> Eropigũ watĩ masure yeba mehmereja tũrucũ iipũ. Ìgũ gaguiniguiicũ ta wiriapũ ìgũre. <sup>27</sup> Eropirã árĩpehrerã iri wihi doanirã ìgũ eropa wacũ ìha ucataria waha òpa arĩñorã:

—Yaho. ¿Ñehe buheri àhriri ii? ¿Mama buheri ta àhriri? Ìgũ opũ iro dopa ta doremi watẽare. Ìgũ dorecũ watẽapũ tarinũgabeama ìgũre, arĩ wereniguiñorã iri wihi doarã erã basi.

<sup>28</sup> Eropirã bajamenurigã pũhrũgã ta, árĩpehrerã Galilea yeba majarã iirire ìgũ eropa iirare masipehrea wañorã.

*Jesu Simo Pedro mũñecore òago iĩñumi*

*Mt 8.14-15; Lc 4.38-39*

<sup>29</sup> Eropi Jesu sã judio masa erã buheri wihigue árĩnirã wiria wañorã. Erã eropa wiriara pũhrũ Jesu, Santiago, Ñu mera, Simo ìgũ pagũ magũ Andre sã ya wihigue ñajapũ. <sup>30</sup> Irisubure Simo mũñeco nimacũri dorecũgo camague igo oyacũ wereñorã Jesure. <sup>31</sup> Erã eropa werẽcũ peegũ, ìgũ igo pohrogue eja, igo mojotore ñeha, igore tara wahgũ dobopũ. Ìgũ tara wahgũ dobocũ ta igore nimacũri taria wayoro. Taricũ pepigo igopũ wahgã erãre bari ejopo.

*Jesu bajarã dorecũrãre òarã iĩñumi*

*Mt 8.16-17; Lc 4.40-41*

<sup>32</sup> Ñamicague abe ñajara pührugue masa árïpehrerã dorecürãre, gajirã watëa ñajasünirãre, püriri dorecürãre Jesu pohrogue aĩ ejañorã. <sup>33</sup> Eropirã árïpehrerã iri maca majarã gamenereñorã Jesu árïri wihi disiporore. <sup>34</sup> Eropigũ Jesu bajarã dorecürãre, baja dore oparãre òarã wacũ iipũ. Masa bajarãre watëare wiupũ. Eropigũ watëa Jesu Goãmũ magũ ïgũ árïrìre erã masicũ ïagũ Jesupũ erãre irire weredorebiripũ.

*Galilea yebague Jesu buheñumi*

*Lc 4.42-44*

<sup>35</sup> Eropigũ ñamiñarigã árïcũ boyoboro core, ïgũ wahgãra pührũ masa marirogue ïgũ Pagũ Goãmũre serëgũ wapũ. <sup>36</sup> ïgũ eropa wacũ ïarã Simo sã ïgũre amarã ejañorã.

<sup>37</sup> Eropirã ïgũre bocatïri òpa arïñorã:

—Masa árïpehrerã mure ahmama, arïñorã erã ïgũre.

<sup>38</sup> Erã eroparïcũ peegũ òpa arïpũ Jesupũ.

—I macare buhegũ ahrabũ yũhũ. Eropirã gaji macari sãre ògã maja macari sãre buherã warã mari. Yũhũ iri macari sãre buhegũra, arïpũ Jesu.

<sup>39</sup> Eropigũ árïpehrero Galilea yebare buhecuripũ. Eropigũ macari nũcũ erã ya buheri wirigue ñajaja buherũ. Püriri dorecürã sãre püririre cóãpũ. Watëare masare ñajanirãre cohã wiupũ.

*Jesu camì boagũre òagũ iĩnũmi*

*Mt 8.1-4; Lc 5.12-16*

<sup>40</sup> Eropi gajigũ camì boagũ Jesu pohrogue eja, mereja serëpũ:

—Mũhũ yũre òagũ wacũ iidiagũ, yũre òagũ wacũ iimasia, arïpũ camì boagũpũ Jesure.

<sup>41</sup> ïgũ eroparïcũ peegũ Jesu ïgũre mojomoro ïapũ. Eropigũ Jesu ïgũ mojoto mera mohmeripũ. Mohmeripũ ta òpa arïpũ:

—Iriire iidiaca. Òagũ árïque mũhũ, arïpũ Jesu.

<sup>42</sup> ïgũ eroparïcũ ta ïgũ camì boara yaria wayoro. Òagũ wapũ ïgũ. <sup>43</sup> ïgũ eropa wacũ ïagũ Jesu ïgũre turaro mera werëpũ:

<sup>44</sup> —Yũhũ mure òpa iirare gajirãre ne werebircãque. Eropa werebiriqũregũ ta mũ dũpũre òaro warare pahire ïhmũgũ waque, “Òagũ àhrimi,” arïdoregũ. Goãmũ doreri Moiserẽ ïgũ apidiro dopa ta iique. Eropigũ mirimagũgãre oque pahire mũ òagũ warare masare mũ ïhmuburire, arïpũ Jesu ïgũre. Òpa arïtuhaja waque, arïpũ ïgũre.

<sup>45</sup> ïgũ eropa masare weredorebiriqũrecũ ta ïgũpũ waha árïpehreri macari majarãre Jesu ïgũre òagũ wacũ iirare werëpũ. ïgũ eropa werera pührũ Jesu masa bajarã erã árïroguere wamasibiripũ. Eropigũ ïgũ masa bajamerãgã árïroguẽ arïpũ. Eroguẽ ïgũ árïcũ baja macari majarã ïgũ pohrogue ejañorã.

## 2

*Jesu dũpũ buhadigũre òagũ wacũ iĩnũmi*

*Mt 9.1-8; Lc 5.17-26*

<sup>1</sup> Bajamenũri pührũ Jesu Capernaumgue dujaa wapũ. Wihigue ïgũ árïcũ masa masiñorã. <sup>2</sup> Eropirã masa ero bajarã gamenere iri wihire ujutũria waha disiporogue wirinũgajañorã. Eropigũ Jesu erãre òari buherire werëpũ. <sup>3</sup> Eropirã gajirã sã Jesu pohro ejariñorã. Erã wapicũrã uma dũpũ buhadigũre aĩ ejañorã. <sup>4</sup> Eropa ejarã masa bajarã árïcũ ïarã Jesu pohrogue aĩ ñajamasibiriñorã. Eropirã erã dũpũ buhadigũre aĩ muju wihi weca aĩ weasiri ñajaa Jesu ïgũ nigũiro weca pihri dijuñorã. “Jesu ihĩ

ĩgu dorecũre taricũ iigucumi,” arĩ pepiñorã erã. <sup>5</sup> Erã eroparĩ pepicũ masigu Jesupu dorecũgure õpa arĩ werepũ:

—Mahgu, mũ ñero iirare cóãtuhabu, arĩpu Jesu dupũ buhadigũre.

<sup>6</sup> Ĩgu eroparĩcũ peerã erogue doarã judio masare buherãpu erã basi õpa arĩ pepiñorã: <sup>7</sup> “Ihĩ eropa arĩ wereniguibiricãporo. Goãmũre ñero wereniguigu iimi ihĩ. Ĩgu masũ mari iro dopa árĩgu aħrimi ĩgu sã. Eropigu ĩgu mari ñero iirare cóãmasibeami. Goãmũ dihta masa erã ñero iirire cóãmasimi,” arĩ pepiñorã erã.

<sup>8</sup> Erã eropa arĩ pepicũ ĩagu, Jesu erã pepirire masigu õpa arĩpu erãre:

—¿Duhpirã mũa eropa arĩ pepiri? <sup>9</sup> “Mũ ñero iirare cóãtuhabu,” yũ arĩcũ pee “Gũyaricũgu aħrimi,” arãa mũa yũre masibiriquererã ta. Ihĩ dupũ buhadigũre “Wahgãnũgajaque,” yũ arĩcũ ĩgu wahgãnũgajacũ ĩarã yũ arĩra diaye arĩcũ masirãca mũa. <sup>10</sup> Yũhũ masũ Goãmũ ĩgu obeodigu árĩgu i yebaguere masa erã ñero iirire cóãmasia yũhũ. Mũa irire masiboro dopa ĩgũre wahgãnũgajacũ iigũra, arĩpu Jesu judio masare buherãre.

Eropa arĩtuhaja dupũ buhadigũre õpa arĩpu:

<sup>11</sup> —Mũre arĩgu iiaa: Wahgãnũgajaque. Curique. Mũ pũgũre aĩ waque mũa ya wihigue, arĩpu ĩgũre Jesu.

<sup>12</sup> Ĩgu eroparĩcũ peegu dupũ buhadigũpu wahgãnũgaja, ĩgu pũgũre aĩ arĩpehrerã masa erã ĩhuro wiria waha wapũ. Ĩgu eropiicũ ĩarã erã arĩpehrerã ĩhamaria wañorã.

—Goãmũ õagu turagu aħrimi. Ne õpa iirire ĩabirimũrabũ mari, arĩñorã erã basi.

*Jesu Levĩre ĩgu mera majagu árĩbure sihuñumi*

*Mt 9.9-13; Lc 5.27-32*

<sup>13</sup> Eropi dipaturi Jesu ditaru tũrogue wapũ. Eropigu masa bajarã ĩgu pohrogue eja gamenerecũ ĩagu ĩgu erãre buhepu. <sup>14</sup> Eropa iituha, erogue árĩdigũ wagũ, Levĩre Alfeo magũre ĩgu mohmeri taribugue bocajapu. Gajirã mera oparã ya árĩburire wajasea corerã mera arĩpu Levĩ. ĩgũre bocajagu õpa arĩpu:

—Yũ mera majagu árĩbu arique mũhũ, arĩpu Jesu Levĩre.

Ĩgu eroparĩcũ peegu Levĩpu wahgãnũgaja Jesu mera waha wapũ.

<sup>15</sup> Pũhrũ ĩgu ĩgu buherã mera Levĩ ya wihire mesague ba doacũ bajarã wajasea corerã “Ñero iirã aħrima,” masa erã arĩrã erã mera ba doañorã. <sup>16</sup> Erogue erã doara pũhrũ, gajirã judio masare buherã, fariseo masa sã Jesu ñero iirã mera ĩgu bacũ ĩañorã. Eropa ĩarã õpa arĩñorã:

—¿Duhpigũ ñero iirã wajasea corerã mera bahari Jesu? arĩ serẽpiñorã judio masare buherã Jesu buherãre.

<sup>17</sup> Erã eroparĩcũ peegu õpa arĩ yũhripũ Jesupu:

—Dorecũrã dihta duhtũre ahmama. Dorecũrã duhtũre amaro dopa ta “Ñegũ aħraa yũhũ,” arĩrã yũre amarãcoma. Eropigu “Ñegũ aħraa,” arĩrã dihtare erã ñero iirare bujaweredore õaripũre gohrotocũ iigu aribũ yũhũ. Erã basi “Õarã aħraa gũa,” arĩ pepirãpũre itamugũ aribiribũ, arĩpu Jesu erãre.

*Ba duhũre serẽpiñuma gajirã Jesure*

*Mt 9.14-17; Lc 5.33-39*

<sup>18</sup> Irisubure Ñũ buherã, fariseo masa sã Goãmũre umupeomorã ba duhumũriñorã. Eropirã masa Jesu pohro eraa ĩgũre serẽpiñorã.

—Erã Ñũ buherã, fariseo masa buherã sã Goãmũ ya árĩburire iirã, ba duhumũrama. ¿Duhpirã mũa buherãpu ba duhubeari? arĩñorã erã Jesure.

<sup>19</sup> Erã eroparĩcũ pee Jesu erãre õpa arĩ yũhripũ:

—Õpa aħraa iri: Mojoto diridigu ĩgu bosenũre iicũ ĩgu mera majarã bujawererã ba duhũrã iibeama. ĩgu mera arĩrã mucubiri barã iima. Eropa ta yũ buherã sã yũ mera



árĩrã ba duhumasibeama. <sup>20</sup> Yujunũ Goãmũ yũre aĩcãgũcumĩ. Eropa ĩgũ aĩgãra pũhrũ yũ buherã mera árĩsome yũhũ. Eropirã irisubugue tamerare yũ buherã ba duhurãcoma, arĩpũ Jesu.

<sup>21</sup> Erã iribojegue maja buheri mera mama buheri mera erã buhe morediacũ ĩagũ õpa arĩ werenemopũ Jesu werenigui queori mera:

—Ne mama gasiro suhri gasiro mera mũrañe suhriore seretu masiya mara. Eropiicũ mama gasiro mari coera pũhrũ mũrañere suhriore taragameneo, wũatariaro yehgucũ iiaa. Eropa ta mama buherire mũra buheri mera wapi moa buhebircãro gahmea. <sup>22</sup> Eropirã ne igui decore imisĩri decore waibũgũ gasiro ajurore mũra ajurore pisãbircãro gahmea. Eropiro igui deco pahmutarirogue mũra ajurore yehgue dija wahaa. Iri ajuro yehgucũ igui deco sã cohmo, ajuro sã cohmoa wahaa. Eropirã igui decore mama ajuro mera pisãro gahmea. Eropiicũ igui deco sã cohmo beaa. Ajuro sã cohmo beaa. Eropa ta mama buheri, mũra buheri mera more buhebircãro gahmea, arĩ buhepũ Jesu erãre.

*Sabado árĩcũ Jesu buherã trigo pororire turĩũuma*

*Mt 12.1-8; Lc 6.1-5*

<sup>23</sup> Gajinũ Sabado árĩcũ Jesu sã trigo pohegue ĩha taria wañorã. Eroque tariarã ĩgũ buherãpũ trigo pororire turĩ tari wahgãñorã. <sup>24</sup> Erã eropiicũ ĩarã õpa arĩñorã fariseo masa Jesure:

—Peenique gũare. ¿Duhpirã mũ buherã Sabadonũ mari soorinũ árĩquerecũ Goãmũ ĩgũ mohmedorebiririnũre mohmeri erã? Mari dorere tarinũgarã iima, arĩñorã erã Jesure.

<sup>25-26</sup> Erã eroparĩcũ peegũ yũ buherã tarinũgarã iibeama arĩgũ õpa arĩpũ erãre:

—Iribojegue Davi ĩgũ mera majarã mera oaboagũ Goãmũ wihigue ñaja iri wihi árĩri panre Goãmũ ya panre bañumi. Eropigũ ĩgũ mera majarã sãre badoregũ iri panre oñumi. Iri panre pahia dihtare badorera árĩyoro. Goãmũ doreri gajirãre iri panre badorebiriyoro. Irisubure Abiata waĩcũgũ pahia opũ árĩñumi. ¿Davi sã irire erã iirare Goãmũ yare erã gojarare buhebirari mũa? Davi iri panre bagũ Goãmũre tarinũgagũ iibiriñumi. Dohpagãre yũ buherã sã i trigo yerire turĩ barã Goãmũre tarinũgarã iibeama, arĩpũ Jesu.

<sup>27</sup> Eropa arĩtuhaja õpa arĩnemopũ:

—Goãmũ masare iituhajagũ soorinũre doreñumi “Masa sooporo,” arĩgũ. Eropa iigũ masa inũre iiburire weregũ ãhrimi. Masapũ inũre erã iiburire wererã árĩbeama.

<sup>28</sup> Eropigũ yũhũ masũ Goãmũ ĩgũ obeodigũ inonũ soorinũ sãre masa erã iiburire doremasia, arĩpũ Jesu erãre.

### 3

*Mojoto bũhadigũ õaro wañumi*

*Mt 12.9-14; Lc 6.6-11*

<sup>1</sup> Gaji Sabado árĩcũ Jesu judio masa erã buheri wihigue eja ñajapũ daja. Eropigũ mojoto bũhadigũ sã ero arĩpũ. Eropirã iri wihi árĩrã Jesure ĩhanũrũñorã ĩgũre weresãmorã. <sup>2</sup> Sabado árĩcũ Jesu mojoto bũhadigũre ĩgũ õagũ iicũ ĩarã, “Mari soorinũre Jesu mohmegũ iimi,” arĩ weresãdiañorã Jesure. <sup>3</sup> Eropigũ õpa arĩpũ Jesu mojoto bũhadigũre:

—Wahgãnũgajaque. Arique õgue, arĩpũ.

Õpa arĩtuha iri wihi árĩrãre werepũ:

<sup>4</sup> —¿Sabado árĩcũ õarire iicũ õabeari? ¿Ñerire iicũpũre õhari mũa pepicũ? Sabado árĩcũ masũre masucũ õapũrica. Masũre wejẽcũpũre õabeaa, arĩ werepũ Jesu erãre.

Īḡu eropa arīquerecū ta yuhribiriñorā. <sup>5</sup> Erā eropa yuhribiricū ĭagu Jesu erāre ĭhamehtu erā mera guapū. Erā ĭḡure peediabiricū ĭagu Jesu erā mera bujawerepū. Eropiḡu mojoto buhadigūre arīpū:

—Mū mojotore sīsirābeoque, arīpū ĭḡure.

Īḡu eroparīcū peegū ĭḡu mojotore sīsirābeopū ĭḡu. Īḡu eropiicū ta ōari mojoto wayoro. <sup>6</sup> Īḡu ya mojoto ōari mojoto wacū ĭarā fariseo masa wiria wañorā. Wiria Herode curu majarā mera gamenere, “¿Dohpa ii ihī Jesure wejērācuri?” arī weretamuñorā erā erā basi.

### *Masa bajarā ditaru turogue árñuma*

<sup>7-8</sup> Eropi Jesu ĭḡu buherā mera ditaru turogue wapū. Erā erogue wacū ĭarā Galilea majarā masa bajarā erā pūhrū nurusiañorā. Eropirā Judea yeba majarā, Jerusalén majarā, Idumea yeba majarā, Jordán waicūriya gajipū masegue majarā, Tiro majarā, Sidón majarā ĭḡure ĭarā wañorā ĭḡu iirare peenijarā. <sup>9</sup> Eropirā bajarā árñorā Jesu pohrore. Tuucāhmota nūgajacāñorā. Eropiḡu Jesu ĭḡu buherāre gasirure amuyudorepū ĭḡu doaborore. <sup>10</sup> Bajarā dorecurāre ĭḡu ōarā wacū iicū ĭarā gajirā dorecurā sā ĭḡure pēhrediañorā. <sup>11</sup> Eropirā watēa ñajasūnirā Jesure ĭarā ĭḡu pohro mereja árñorā:

—Mūhū Goāmū magū āhraa, arī gaguiniguiñorā erā ĭḡure.

<sup>12</sup> Eropiḡu erāre Goāmū magū ĭḡu árīrire turaro mera gajirāre weredorebiripū Jesu.

### *Jesu ĭḡu buherāre doce gohra beyeñumi*

*Mt 10.1-4; Lc 6.12-16*

<sup>13</sup> Eropiḡu Jesu utāḡugue mūria ĭḡu gamerāre sihupū. Īḡu eropa sihubeocū peerā ĭḡu pohroque ejañorā. <sup>14</sup> Eropiḡu doce umare ĭḡu mera majarāre, ĭḡu obeomorāre beyepū. Gaji macarigue ĭḡu yare buherā wamorāre beyedobopū Jesu. <sup>15</sup> Eropiḡu watēare erā cóāburire apīpū erāre. <sup>16-19</sup> Oā árñorā doce gohra uma ĭḡu beyenirā. Simo, Santiago Zebedeo magū, ĭḡu pagū magū Ńu, Andre, Felipe, Bartolomé, Mateo, Toma, Santiago Alfeo magū, Tadeo, Simo celote ya curu majagū, Juda Iscariote, oā nūcūre Jesu beyedobopū. Jesu Simore Pedro waīyepū. Santiagore, Ńu mera Boanerges waīyepū. Boanerges mari ya mera “bupu masa” waicūma. Juda Iscariote Jesure ĭhaturirāre ĭhmubu arīpū. Erāre beyedobotuha Jesu dijaha wihigue ñaja wapū.

—*Jesu watī turari opami, arī weresāñuma masa*

*Mt 12.22-32; Lc 11.14-23; 12.10*

<sup>20</sup> Eropi ero dipaturi masa bajarā gamenereñorā daja erā pohro. Eropirā ĭḡu ĭḡu buherā sā ne bamasibiriñorā. <sup>21</sup> Eropirā Jesu acawererā ĭḡu iirare peebeoñorā. “Jesu gorowereḡu wagū iimi,” masa arīcū peeñorā. Eropirā ĭḡu pohroque eja ĭḡure aīgāridiariñorā.

<sup>22</sup> Gajirāpū ōpa arīñorā:

—Beelzebú ĭḡure eropa iicū iicumī. Īḡu watēare cóāḡu Beelzebú watēa opū turari mera erāre cohāmi, arīñorā Jerusalēngue arinirā judio masare buherāpū.

<sup>23</sup> Erā eroparīcū peegū Jesupū erāre sihubeo werenigui queoriñe mera werēpū erāre.

—Watī ya turari mera watēare cóāḡu iibea. Watēa erā basi cóāmasibeama.

<sup>24</sup> Eropirā yuju yeba majarā erā basi gamequeārā iri yeba majarā pehrea wacoma.

<sup>25</sup> Eropirā yuju wihi majarā erā basi erā gamequeārā iri wihi majarā pehrea wacoma.

<sup>26</sup> Eropiḡu ĭḡu Satana watēa opūpū watēare yūre cóādoreḡu, ĭḡu basi ta gamequeāḡu iibocumi. Eropiḡu ĭḡu pehrea wabocumi.

<sup>27</sup> Ōpa ta āhraa watī turagure tarinugari werediacũ: Wihi opure turagure diribigu, yajari masu ĩgu ya wihire ñajaja yajamasibeami. ĩgure ĩgu dirira pũhrũ tamerare ñajaja yajamasimi ĩgure, arĩ werepũ Jesu. Eropa arĩ werepũ watĩre ĩgu tarinugarare weregu. Watĩ turagu arĩquerecũ ta Jesu ĩgure tarinugami watẽare cohã wiugu.

<sup>28</sup> Eropigu arĩnemopũ Jesu:

—Diaye arĩgu iiaa mũare. Árĩpehreri masa erã ñeri iicũ sãre, erã wereniguicũ sãre Goãmũ cãdijimasimi. <sup>29</sup> Eropa cãdijiqueregu ta Espĩritu Santore erã ñero wereniguicũ iri tamerare ne cãdijisome. Erã eropa arĩra waja eropa dipuwa-jacũniguicãrã arĩrãcoma, arĩpũ Jesu erãre.

<sup>30</sup> Jesu Espĩritu Santo turari mera mohmequerecũ erãpũ “Watĩ turari mera mohmemi,” arĩñorã. Erã eropa arĩra waja Jesu eropa arĩ werepũ erãre.

*Jesu acawererã ĩgure sihurã erañuma*

*Mt 12.46-50; Lc 8.19-21*

<sup>31</sup> Eropirã Jesu pagu porã ĩgu pago mera erañorã. Eropa erarã disiporogue niguirã gajirãre sihudoreñorã ĩgure. <sup>32</sup> Eropirã masa ĩgu pohrogue doarã wereñorã ĩgure.

—Mũ pago mũ pagu porã mera disiporogue sihuma mũre erã, arĩñorã.

<sup>33</sup> Erã eroparĩcũ peegu õpa arĩpũ Jesu erãre buhebu:

—¿Noa āhriri yũ pago yũ pagu porã sã mua ĩacũ? arĩpũ.

<sup>34</sup> Eropa arĩgu ĩgu pohro doarãre ĩagu õpa arĩpũ:

—Oã āhrima yũ pago, yũ pagu porã dopa arĩrã. <sup>35</sup> Goãmũ gamerire iima oã. Eropa ta iirã yũ pagu magu, yũ pagu mago, yũ pago iro dopa āhrima, arĩ buhepũ Jesu erãre.

## 4

*Jesu oteri masu queoriñere buheñumi*

*Mt 13.1-9; Lc 8.4-8*

<sup>1</sup> Eropi dipaturi ta daja Jesu ditaru tũrogue buhenugapũ. Eropa eroguerer buhenugagu masa bajarã ĩgu pohrogue gamenerecũ ĩagu Jesu dohodirugue ñaja buhe payapũ. Eropirã masapũ yebague ditaru tũrogue niguiñorã ĩgure peemorã.

<sup>2</sup> Eropigu Jesu baja werenigui queorire erãre buhepũ.

<sup>3</sup> —I queoriñere peeque mua, arĩpũ erãre.

—Oteri masu otegu wañumi. <sup>4</sup> ĩgu eropa otecũ gajiyeri ma tũro yurimerejayoro. Ero mehmerejarayerire mirimagu porã ahri bacãñuma. <sup>5</sup> Eropi gajiyeri utãyeri watope yurimerejayoro. Ero utãyeri watope nicu mariñariro arĩquerecũ ta, mata puhriyoro. <sup>6</sup> Eropa puhri arĩquerero, abe ĩgu bũrigã asicũ, nuguri marinijaro ñaiñaja sĩria wayoro. <sup>7</sup> Gajiyeri poracũrogue yurimerejayoro. Porapũ puhri tiataria waha oterayeripure wejẽcãyoro. Eropiro iri dũca mariyoro. <sup>8</sup> Gajiyeri õari yebapũ yurimerejayoro. Ōaro puhri dũcacũyoro, gajisari treinta yeri, gajisari sesenta yeri, gajisari cien yeri dũcacũyoro, arĩ buhepũ Jesu.

<sup>9</sup> —Irire õaro peeque mua, arĩnemopũ Jesu.

*Jesu ĩgu werenigui queorare ĩgu buherãre wereñumi*

*Mt 13.10-17; Lc 8.9-10*

<sup>10</sup> Eropirã pũhrũ erã seyaro arĩrã, doce buherã gajirã Jesu mera arĩrã iri queorañere masidiarã Jesure serẽpiñorã. <sup>11</sup> Erã eropa serẽpira pũhrũ Jesu õpa arĩ werepũ:

—Goãmũ masa tauro opu ĩgu arĩrĩre, iribojegue majarã erã masibirirare mũare yũ buherãre masicũ iimi Goãmũ. Gajirãpũre eropiibeami ĩgu. Eropigu erãre werenigui queori mera buhea. <sup>12</sup> Eropirã erã ĩaquererã, pee masibeami. Eropirã peequererã ta masisome. Erã masirã õaripure gohrotoboñuma. Erã eropa gohrotocũ ĩagu erã

ñero iirare cóãboñumi Goãmũ. Eropã áríquerẽcũ ta erãpũ ne peediabeama, arĩpũ Jesu.

*Jesu oteri masũ queoriñere were amuñumi*  
*Mt 13.18-23; Lc 8.11-15*

<sup>13</sup> Īgũ eroparĩra pũhrũ, õpa arĩnemopũ erãre:

—¿Iñe queoriñere peenibeari mũa? ¿Mũa iñe queoriñere peebirã dohpa gajĩ queorire peerãcuri mũa? arĩpũ Jesu erãre.

Eropã arĩtuhaja õpa arĩ werepũ erãre.

<sup>14</sup> —Oteri masũ ĩgũ oteriyeri õari buheri iro dopa ãhraa. <sup>15</sup> Eropiro ma tũro mehmerejarayeri, õari buheri iro dopa ta ãhraa. Eropigũ masa erã õari buherire erã peecũ ĩagũ Satanapũ iri õari buherire masidorebeamĩ erãre. Mirimagũ porã iriyerire erã dote aĩdiro dopa ta iimi. <sup>16</sup> Eropi utã watope mehmerejarayeri õari buheri iro dopa ta ãhraa. Eropirã masa õari buherire pee, mucubiriri mera mata irire pee aĩma. <sup>17</sup> Eropã pee aĩquererã ta, utã watope árrisari, nuguri maririsari iro dopa ta oã masa turabeama. Eropã turabirã yaha õari buherire erã peera waja gajirã erãre ñero iicũ ĩarã yahapũre duhucãma. Gajirã erãre ñero iicũ irire bocatũbirã yahare duhucãma. <sup>18</sup> Eropi porã watope yurimerejarayeri õari buheri iro dopa ta ãhraa. <sup>19</sup> Eropirã masa õari buherire peequererã, i yeba majare wũaro guñaricũrã niyerure mahima. Gajino sãre baja gamenemoma. Erã eropiicũ iripũ õari buheripũre cãhmotaa. Iri eropã cãhmotacũ masa Goãmũ gamerire iibeama. <sup>20</sup> Eropi õari yeba mehmerejarayeri õari buheri iro dopa ta ãhraa. Eropirã masa õari buherire peerã irire masima. Eropã masirã árrĩrã Goãmũ ĩgũ gamero dopa ta iima erã. Yujurãyeri merogã õarire iima treinta yeri dũcacũro dopa ta. Gajirã wecañari õarire iima sesenta yeri iri dũcacũro dopa ta. Gajirã wũaro õarire iima cien yeri dũcacũro dopa ta, arĩ werepũ Jesu erãre.

*Jesu sihãgodiru queoriñere buheñumi*  
*Lc 8.16-18*

<sup>21</sup> Eropã arĩtuha õpa arĩnemopũ:

—Ne, sihãgodirure masa sihãgorã mátasorobu docague buhapibeama. Irirure sehro doca apibeama. Irirure sihãgorã umarogue duhpeoma õaro boyoweadorerã.

<sup>22</sup> Árrĩpehrerã masa erã masibirirare pũhrũ masirãcoma. Sihãgodiru boyocũ mari ĩhamasiro dopa ta, iribojegue erã masibirirare masirãcoma masa. <sup>23</sup> Irire õaro peeque mũa, arĩpũ.

<sup>24</sup> Eropigũ erãre arĩnemopũ daja:

—Merogã masidiarã merogã masirãca. Wũaro masidiarã wũaro masirãca. Eropirã peerã õaro peenũrũque. <sup>25</sup> Õaro peenũrũgũ õaro masigũcumi. Peenũrũbigũ “Merogã peea,” ĩgũ arĩquerẽcũ ta, iripũ dederea waroca ĩgũre, arĩpũ Jesu erãre.

*Jesu coye puhri queoriñere buheñumi*

<sup>26</sup> Jesu erãre werenigui queori mera buhepũ daja:

—Goãmũ ĩgũ opũ árrĩri werediãcũ ojodũcare otera iro dopa ãhraa. Yujugũ coyere ojodũcayeri otemi. <sup>27</sup> Otetuhaja mũaro ta carĩ wahgã ĩagũ wamũririmi. Irisubu ĩgũ oterayeri puhri wiriaca. “¿Dohpa puhri?” arĩ ĩha masibeamĩ irire otedigũ ĩgũ basi. <sup>28</sup> Iri otera iri yeba mera iri gamero dũcacũca. Erapũgã deyomũhta, pũhrũ dipa poro puhri wiria wahaa. <sup>29</sup> Dũca bũgatuhajacũ ĩagũ iri pororire pehami. “Pearisubuno ta ãhraa,” arĩmi. ĩgũ otera iri bũgarare ĩgũ masibiridiro dopa ta masa Goãmũ yarã erã dohpa wacũ sãre masibeama masa, arĩ buhepũ Jesu.

*Mostazayegã queoriñere wereñumi Jesu*  
*Mt 13.31-32; Lc 13.18-19*

<sup>30</sup> Eropã arĩtuha buhenemopũ:

—¿Goãmũ ïgũ opu árĩri werediacũ ñeheno iro dopa ãhriri mũa pepicũ? Iri werenigui queoriñe mera irire weregũra. <sup>31</sup> Mostazayegã iro dopa ãhraa Goãmũ ïgũ opu árĩri. Iriyegã ïgũ otecũ miriyegã gohra ãhraa. <sup>32</sup> Eropa árĩquerero iriyegã ðaro puhri wiria. Eropiro yucũgũ wuadigũ wahaa. Eropirã irigũ dupuri paga dupuri bugacũ ïarã mirimagũ porã iri dupurigue suhri suama. Mostazayegã wuatariadigũ bugaro dopa ta umaro majagũ mari Opũre masinũgarã bajamerãgã erã árĩquerecũ ta, pũhrũguere erã bajarã warãcoma, arĩpũ Jesu.

*Queori mera ïgũ buherire wereñumi Jesu*

*Mt 13.34-35*

<sup>33</sup> Eropigũ iri werenigui queori iro dopa baja queorire erã masiopẽ ðari buherire buherũ erãre. <sup>34</sup> Queoriñe mariro werebiripũ erãre. Pũhrũ erã seyaro árĩrãre ðaro were amupehocãpũ Jesu ïgũ buherãre.

*Jesu miruñere yũsũdoreñumi*

*Mt 8.23-27; Lc 8.22-25*

<sup>35</sup> Eropi irinũ ñamica Jesu ïgũ buherãre ðpa arĩpũ:

—Ina sipũ masegue, arĩpũ erãre.

<sup>36</sup> ïgũ eroparĩcũ peerã, yebague niguirãre goeriseretuhajarã dohodirugue ñajaa, Jesure aĩ taribuja wañorã. Eropirã gajirã gajĩ gasi mera erã pũhrũ taribujañorã.

<sup>37</sup> Erã taribujacũ iriyague miruñe burigã weãyoro. Eropiro miruñe ariro pãgũri dohodirure miucãriyoro. Deco turaro ñajayoro. Merogã duhyayoro erã miriboro.

<sup>38</sup> Eropa warisubu Jesu dohodiru auturogue suhri pore wecague carĩgũ iipũ. Eropirã erã ïgũre wahgũñorã.

—Buhegũ, ¿mũhũ ïabeari? Mirirari iiaa mari, arĩñorã erã Jesure.

<sup>39</sup> Erã eroparĩcũ peegũ Jesu wahgã miruñere, pãgũri sãre,

—Yũsũque, arĩpũ.

ïgũ eroparĩcũ ta miruñe pãgũri sã yũsũdija pehrea wayoro. ðaro dujayoro.

<sup>40</sup> Eropigũ Jesu arĩpũ ïgũ buherãre:

—¿Duhpirã gũimaacãri mũa? ¿Mũa yũre umupeobeari? arĩpũ Jesu erãre.

<sup>41</sup> Eropa wacũ ïarã erã ïhamaria wañorã.

—¿Ñehmũno masũ ãhriri ihĩ miruñe, pãgũri sã yũhrisũgũ? arĩñorã erã basi.

## 5

*Watẽa ñajasũdigũre ðagũ wacũ iĩñumi Jesu*

*Mt 8.28-34; Lc 8.26-39*

<sup>1-2</sup> Eropi erã sipũ masegue Gerasa majarã ya yebague taribujajañorã. Eropigũ Jesupũ dohodirugue sañadigũ majanũgajapũ. ïgũ majanũgajara pũhrũ, watẽa ñajasũdigũ masa goberi utã goberi watopegue árĩdigũ wiriri ïgũ pohrogue aripũ.

<sup>3</sup> ïgũ watẽa mera goroweregũ masa goberi watope árĩgũ árĩmũripũ. Gajirãpũ ïgũre ñeha comeda wuarida mera dirimasibirimũriñorã. <sup>4</sup> ïgũ burigã gorowerecũ ïha bajasuburi masa ïgũre guburi diriri berori mera comedari mera dirimũririñorã.

Eropigũ ïgũpũ comedarire nuha tuãtasiricãmũripũ. Eropirã ïgũ turagũ árĩro mera masapũ ïgũre ñeha dirirã bocatũbiriñorã. <sup>5</sup> Eropigũ ñami árĩcũ, umũ sãre masa goberi watopegue, utã yucũgue sãre, eropa gaguinigui curicãmũripũ ïgũ. Eropigũ utã mera ïgũ basi dotemũripũ. <sup>6</sup> Eropigũ yoarogue Jesure ïhabeo ïgũ pohrogue omagãripũ. Eraa merejapũ Jesu core umupeobu.

<sup>7-8</sup> —Watẽa, duhuque ïgũre, arĩpũ Jesu.

ïgũ ðpa arĩcũ peegũ, watẽa ñajasũdigũ ðpa arĩ gaguiniguiipũ:



—¿Jesu Goãmu turagu magu, ñehenore iibu iiri muhu yure? Goãmu ïgu ïaro serëa yuha mure. Yure ñero iibiricãque, arï gaguiniguipũ watëa ñajasüdigũ Jesure.

<sup>9</sup> —¿Dohpa waïcuri muhu? arïpũ Jesu ïgure.

—Gua bajarã ähraa. Eropirã “Bajarã watëa” waïcua, arïpũ Jesure.

<sup>10</sup> Eropigu Jesure turaro serëpũ:

—I yeba árĩrãre gua watëare gajipugue wadorebircãque, arĩñorã watëa masũ mera árĩnirã.

<sup>11</sup> Irisubure bajarã yesea árĩñorã erã pohrore. Utãgu gubuye ahma barã iĩñorã.

<sup>12</sup> Ero erã baniguicũ ïarã õpa arï serëñorã watëa:

—Soã yesea pohroque wadoreque guare. Erã mera árĩdoreque guare, arï serëñorã watëa masũre ñajanirã.

<sup>13</sup> Erã eroparicũ peegu yesea pohroque wadorepũ Jesu erãre. ïgu eropa dorecũ watëa masũre duhu yesea dos mil gohra árĩrãpũre ñajañorã. Erã pohroque erã ejara pũhrũ yeseapũ gorowere árĩpehrerã dipaturugue oma buha, ditarugue yuriñajaa sĩripehrea wañorã.

<sup>14</sup> Yesea erã eropa wacũ ïarã, erãre ïhadibunirãpũ güi omagã wañorã. Macague eja, iri maca majarãre campo majarã sãre erã ïarare weresiripehocãñorã. Erã eropa werecũ peerã masapũ bajarã Jesu ïgu iirare ïarã arĩñorã. <sup>15</sup> Eropirã Jesu pohroque erarã, watëa ñajasüdigure, suhri saña, pee masigu ïgu ero õaro doacũ ïarã ïha uca wañorã erã. <sup>16</sup> Eropirã watëa ñajasüdigure, yesea sãre erã eropa warare ïanirã gajirãre werepehocãñorã. <sup>17</sup> Erã eropa werepehocũ peerã ero majarã Jesure turaro mera wadoreñorã.

<sup>18</sup> Eropigu Jesu ïgu dohodirugue ïgu ñajacũ ïagu “Mũ mera wadiaca,” arï burigã serëripũ watëa ñajasüdigupũ Jesure. <sup>19</sup> ïgu eropa arĩquerecũ Jesu ïgure werepũ:

—Yũ mera aribita. Mũ ya wihigue waha, mũ pohro árĩrãre yuha mũ opũ mure õaro iirare weregu waque. Mure yũ mojomoro ïarare wereque erãre, arïpũ Jesu ïgure.

<sup>20</sup> ïgu eroparicũ pee watëa ñajasüdigupũ Decapoli waïcuri macague Jesu ïgure õaro iirare werenugapũ. ïgu eropa arï werecũ peerã, masa árĩpehrerã pee uca wañorã.

### *Jairo magore õago ii, ne behrego sãre õago iĩñumi Jesu*

*Mt 9.18-26; Lc 8.40-56*

<sup>21</sup> Eropi dipaturi ta Jesu gajipũ masegue ïgu taribujacũ masa bajarã ïgu pohroque wũariya turogue gamenereñorã. <sup>22</sup> Eropigu judio masa erã buheri wihire ïhadibugũ Jairo waïcugũ erapũ. Jesure ïha, ïgu guburi pohro mereja õpa arï serëpũ:

<sup>23</sup> —Yũ mago sĩrigo iiamo. Eropigu igore mũ mojoto mera duhpeogu, igore dore taugũ arique. Mũhũ eropiicũ igo masagocumo, arïpũ ïgu Jesure.

<sup>24</sup> ïgu eroparicũ pee Jesu ïgu mera wapũ. ïgu wacũ masa bajarã nũrũsiagãñorã ïgure. <sup>25</sup> Eropigo nomeo doce bojori gohra eropa umuri nũcũ behreniguigo ero árĩpo. Ero core bajarã duhturuia igore ñero taricũ iĩñorã igore ocoyerã. <sup>26</sup> Eropigo duhturuare igo niyeru árĩpehrerire wajayepituhapo igo ocoyedorego. Erã eropa ocoyequerecũ igo mũraro ta árĩniguicãpo. Eropigo igo ero core igo árĩdiro tauro ñero wapo. <sup>27</sup> Igo eropa ñero taririsubu Jesu ïgu masare õarã iirire peerã gajirã wereñorã igore. Eropigo igo Jesu pũhrũ ta masa bajarã watope aripo. Ahri Jesu suhrirore mohmepiñapo. <sup>28</sup> “Yũhũ ïgu suhriro dihtare mohmepiñago õago dujagoca,” arï pepipo igo. <sup>29</sup> Eropi igo mohmepicũ mata igo di wirira purumjudija wayoro. Igo dupũre õari dupũ wacũ pepipo. <sup>30</sup> Eropigu Jesu ïgu turari mera dorere ïgu taurare masigu, masa watope maji ïapũ.

—¿Noa yaha suhrirore mohmepiari? arïpũ.

<sup>31</sup> Īḡu eroparĩcũ peerã ĩḡu buherãpũ õpa arĩñorã.

—Cũhña ãhraa. Eropirã masa bajarã mure pẽhregãma. “¿Noa yure mohmepiñari?” arĩḡu, ¿dohpa arĩḡu iiri mũhu? arĩ serẽpiñorã ĩḡure.

<sup>32</sup> Eropigũ Jesu ĩḡure mohmepidigore amapũ. <sup>33</sup> Īḡu amaro watope igopũ igo dũpũ õaro wacũ pepigo gũi, naragã merejapo ĩḡu pohro. <sup>34</sup> Eropigo igo diaye ta werepehopo ĩḡure. Igo eropa arĩ werera pũhrũ Jesu werepũ igore:

—Mahgo, mũhu yure umupeori mera õago dujaa dohpaguere. Mucubiriri mera waque. Dore mariro árĩque, arĩpũ Jesu igore.

<sup>35</sup> Erã õpa arĩ wereniguiro watope ta Jairo ya wihi majarã erañorã,

—Mũ mago sĩria wahãmo. Eropigũ buheḡure sihubita pare, arĩñorã.

<sup>36</sup> Erã eropa arĩquerecũ ta Jesu Jairore õpa arĩ werepũ:

—Bũjawere pepibita. Yure guñaque. Umupeoque iri dihtare, arĩpũ ĩḡure.

<sup>37</sup> Eropa arĩtuha, Santiago, ĩḡu pagũ magũ Ñu, Pedro, erã dihtare “Yũ mera arique,” arĩpũ Jesu. <sup>38</sup> Eropigũ Jairo ya wihigũ ejarũ. Iri wihiguere masa bajarã bũrigã ñehamere orerã iĩñorã. Erã eropa orecũ ĩha erãre arĩpũ Jesu:

<sup>39</sup> —¿Ñero arĩ ñehamere orebircãque mũa. Igo majigo sĩribeamo. Carĩgo iimo, arĩpũ Jesu erãre.

<sup>40</sup> Īḡu eroparĩcũ peerã erã “Eroparĩcãḡu iimi ihĩ,” arĩrã ĩḡure ĩayeñorã. Īḡupũ erãre disiporogue wiupehocãpũ. Majigo pagũ sũmarã mera, Jesu ĩḡu mera majarã igo pohrogue sihuñajajapũ. <sup>41</sup> Eropigũ Jesu igo mojtore ñeha arĩpũ igore:

—Talita cumi, arĩpũ ĩḡu. Talita cumi mari ya mera “Majigo wahḡaque,” arĩdiaro ĩiaa.

<sup>42</sup> Īḡu eroparĩcũ ta igo majigo sĩridigo mũro wahḡãnũgaja curipo. Doce bojori opago árĩpo igo. Igo ĩḡu eropa iicũ ĩarã ucataria wañorã. <sup>43</sup> Eropigũ Jesu irire ĩḡu ĩirare weresiridorebiripũ. Eropiitua igore bari ejodorepũ.

## 6

### *Jesu ya maca majarã Nazare majarã Jesure umupeobiriñuma*

*Mt 13.53-58; Lc 4.16-30*

<sup>1</sup> Eropigũ ero árĩdigũ waha wa, ĩḡu buherã mera ĩḡu ya yebague ejarũ. <sup>2</sup> Eropigũ Jesu Sabado árĩcũ judio masa erã buheri wihigũ buhenũḡapũ. Īḡu eropa buhecũ masa bajarã ĩḡure ĩha masirã ĩḡure pee uca wañorã. Õpa arĩñorã:

—¿Dohpa ii masiyuri ihĩ i buherire? ¿Dohpa ii ĩḡu deyoro moarire ii masiri? <sup>3</sup> Ihĩ taboa mohmeri masũ María magũ ãhrimi. Santiago, José, Juda, Simo, erã tĩḡu ãhrimi. Eropirã ĩḡu pagũ porã nome i maca ãhrima. Eropigũ ĩḡu mari iro dopa árĩḡu ãhrimi, arĩñorã erã Jesure peenijarã. Eropirã Jesure umupeobiriñorã. <sup>4</sup> Erã umupeobircũ ĩḡu õpa arĩpũ Jesu:

—Árĩpehrerogue Goãmũ yare weremũhtadigũre gajirã umupeoma. Erã eropa umupeoquerecũ ta ĩḡu ya maca majarã, ĩḡu acawererã, ĩḡu ya wihi árĩrã dihta umupeobeama ĩḡure. Eropirã yure umupeobeaa mũa ohõ yũhu masadigũ árĩcũ ĩarã, arĩpũ Jesu erãre.

<sup>5</sup> Eropigũ iri maca árĩḡu Jesu Goãmũ turari mera baja deyoro moarire iimasibiripũ. Dorecũrã bajamerãḡã dihtare ĩḡu mohmepi taupũ erã dorere. <sup>6</sup> Eropigũ ero majarã Jesure erã umupeobircũ ĩḡu, “¿Dohpa arĩrono mera yure gamebeari erã?” arĩḡu uca wapũ ĩḡu. Eropigũ Jesu ero pohro árĩri macarigũre buheḡu waha wapũ.

### *Jesu ĩḡu buherãre buhedore obeoñumi*

*Mt 10.5-15; Lc 9.1-6*

<sup>7</sup> Eropi Jesu doce ĩḡu buherãre sihubeo perãyeri dihta obeopũ erãre macariguere buhedoreḡu. Eropigũ ĩḡu dorerire ópũ erãre watẽare masa ñajanirãre erã cóãburire.

<sup>8</sup> Eräre obeogu gajinore añadorebiripũ. Doberire, barire, niyerure aĩgãdorebiripũ eräre. Erã tuari yucũ dihtare aĩgãdorepũ eräre. <sup>9</sup> Eropigũ gajĩ zapaturire aĩdorebiripũ eräre. Yujuñe ta suhrirore sañadorepũ. Peñe sañadorebiripũ eräre. <sup>10</sup> Eropigũ õpa arĩ werepũ eräre:

—Árĩpehreri macarigue erã mũare carĩro ocũ, iri wihi ta carĩque. Ne warãgue wiriaque iri wihire. <sup>11</sup> Eropirã gajĩ macari majarã mũare erã gamebircũ, erã mũa buherire peediabircũ ìha iri macare tari wahgã waque. Eropa warã, mũa guburi maja nicure moje siripique mũa erã ya dipuwajare masicũ iimorã eräre, arĩpũ Jesu eräre.

<sup>12</sup> Eropirã erã doce buherã waha masare buherã, erã ñero iirare bujaweredoreñorã. Õaripũre iidoreñorã eräre. <sup>13</sup> Eropirã bajarã watẽare masare ñajanirãre cóañorã. Dorecurãre uyũ mera sũrã õarã wacũ iĩñorã.

*Ñu waĩyegũre gajirã wejẽñuma*

*Mt 14.1-12; Lc 9.7-9*

<sup>14</sup> Eropirã Jesu ìgu õaro iirare masa bajarã masiñorã. Eropigũ opũ Herode sã irire peebeopũ. Eropa peebeogu õpa arĩ guñapũ ìgu Jesure:

—Ñu waĩyemuridigu sĩridigu mũrũ dipaturi masa dehyoagu iicumi daja ihĩ Jesu. Eropa masadigu árĩgu ìgu turarire opami ìgu deyoro moarire iigu, arĩ pepiripũ Herode. Jesure “Ñu mũrũ ta ãhrimi,” arĩ pepiripũ ìgu Ñure wejẽdorera pũhrũ.

<sup>15</sup> Gajirã õpa arĩ pepiriñorã:

—Elia ãhrimi, arĩ pepiriñorã. Gajirãpũ:

—Goãmũ yare weremũhtadigu iribojegue majarã dopa ãhrimi ìgu, arĩ pepiñorã Jesure.

<sup>16</sup> Erã eropa arĩ pepiquerecũ, Herodepũ Jesu ìgu iirare peegu õpa arĩ pepipũ:

—Jesu Ñu mũrũ ta árĩcumi. Ñu dipurure yũ tabedigu masa dehyoagu iicumi daja, arĩ pepipũ.

<sup>17-18</sup> Ero core Herode ìgu pagũ magũ marapo Herodia waĩcũgore ehma igo mera marapocũpũ. ìgu eropa iicũ Ñu Herodepũre õpa arĩ wereniguipũ:

—Mũ pagũ magũ marapocũgũ Goãmũ dorerire tarinũgagũ iiaa mũhũ, arĩpũ Ñu Herodere.

Ìgu eropa arĩra dipuwaja Herode Ñure ñeadore peresugue acumuripũ. Ìgũre eropa iicũ gamepo ìgu marapo Herodia. <sup>19</sup> Eropigo Herodiapũ Ñure ìhaturinijago ìgũre wejẽdorediaripo. Eropiidiaquerego ta wejẽdoremasibiripo Herode opũpũ gamebircũ. <sup>20</sup> Herodepũ “Ñu õarire iigu õagu ãhrimi,” arĩ pepi Ñure güipũ. Eropigũ Herode Ñu wereniguirire ìgu peegu guñaturabiripũ. Eropa guñaturabiriqueregu ta mucubiriri mera ìgũre peegu wejẽdorebiripũ ìgu Ñure. <sup>21</sup> Irisubu ta Herodia igo ìgũre wejẽdorera ejayoro. Irisubure Herode ìgu masa dehyoaranũ árĩcũ ìgu gobierno majarãre, ìgu surara oparãre, Galilea majarã oparã sãre sihu bosenu iipũ ìgu. <sup>22</sup> Eropigo ìgu marapo mago bosenu ìago erago erã ìhuro baya ìhmupo. Igo baya ìhmucũ ìarã Herode ìgu ìhunirã mucubiriñorã. Erã eropa mucubircũ ìagu õpa arĩpũ Herode igore:

—Mũ gamerire serẽque yũre. Eropigũ mũ serẽrire mũre ogũra. <sup>23</sup> Goãmũ mera diaye arãa mũre. Mũ serẽropẽ yahare deco mera ogũra mũre, arĩpũ ìgu igore.

<sup>24</sup> Ìgu eropa arĩcũ peego igo pago pohrogue waha serẽpipõ:

—¿Ñehenore serẽgocuri yũhũ? arĩ serẽpipõ igo pagore.

—Ñu waĩyegũ dipurure serẽque, arĩpo pagopũ.

<sup>25</sup> Igo eroparĩcũ peego mũmũdiaro mera opũ Herode pohrogue eja arĩpo:

—Dohparagã Ñu waĩyegu dipurure tabetadoreque. Eropigu soropa mera ĩgu dipurure oque yare, arĩpo igo.

<sup>26</sup> Igo eroparĩcũ opu Herode burigã bujawerepu. ĩgu masa erã peero, “Mu serẽrire mre ogurã,” arĩtuhapu ĩgu. Eropigu ĩgu ĩgu eropa arĩrare guhyasĩrigu “Mre osome,” arĩmasibiripu igore. ĩgu sihunirã ĩhuro “Iibeaã,” arĩmasibiripu. <sup>27</sup> Eropigu mata surarare peresu arĩrãre coregure Ñu dipurure tabeta aĩgãridorepu. <sup>28</sup> ĩgu eropa dorecũ peegu surarapu waha, ĩgu dipurure tabeta, soropa mera aĩgãripu. Aĩgã nómeore ĩgu marapo magore opu. Eropigo igo iripare ñeha igo pagore o taupo daja.

<sup>29</sup> Eropirã Ñu buherã irire peenijarã erogue waha, ĩgu dupure aĩ masa gobegue aĩgã apiñorã.

*Jesu cinco mil masare barire oñumi*

*Mt 14.13-21; Lc 9.10-17; Jn 6.1-14*

<sup>30</sup> Eropi Jesu ĩgu buhedore obeonirã ĩgu pohrogue dujajañorã daja. Erã iirare erã buherare wereñorã erã ĩgure. <sup>31</sup> Irisubure masa bajarã eropa majiniguirã erãre ne baro iibiriñorã. Eropigu opa arĩpu Jesu ĩgu buherãre:

—Masa marirogue mari seyaro soonirã warã, arĩpu erãre.

<sup>32</sup> Eropirã erã seyaro gasiru mera masa marirogue wariñorã. <sup>33</sup> Erã eropa wacũ ĩarã masa bajarã erãre masiñorã. Eropã masirã baja macari majarã mague waha, Jesu ĩgu ejaborogue omajatuhãñorã. <sup>34</sup> Erã eropa ejacũ Jesu tuhajapa, gasirugue sañadigu majanugajagu ĩgu bajarã masare ĩapu. Oveja ĩhadibugũ moorã iro dopa arĩñorã erã Jesu ĩgu ĩacũ. Eropigu erãre mojomoro ĩagu baja buhepu erãre. <sup>35</sup> Ñamicague doce ĩgu buherã Jesu pohrogue eja opa arĩñorã ĩgure:

—Ohõ maca marirogue ahraa. Ñamicague ahraa. <sup>36</sup> Ōgã arĩri macarigue masare wadoreque. Erã baburire asũrã waporu, arĩriñorã erã Jesure.

<sup>37</sup> —Mũa basi ta barire oque erãre, arĩpu Jesu erãre.

Ĩgu eroparĩcũ peerã opa arĩ yuhriñorã:

—¿Wũaro niyerupũri mera gũa dohpa ii asũbocuri panre masa bajarã erã baburire? arĩñorã erã Jesure.

<sup>38</sup> —¿Di nucũ pan ahriri õguere? ĩarã waque, arĩpu ĩgu erãre.

Ĩgu eroparĩcũ erãpu barire boca opa arĩñorã:

—Cinco dipuru ahraa pan. Wai perã ahrima, arĩñorã.

<sup>39</sup> Erã eroparĩcũ peegu Jesu masare dipa cururi ero taa arĩro weca doadorepu masare. <sup>40</sup> ĩgu eroparĩcũ peerã erã dipa cururi doañorã. Yuju curure cien gohra arĩñorã. Gaji curure cincuenta gohra arĩñorã. <sup>41</sup> Erã doapehrecũ ĩha Jesu cinco dipuru pan dipurure aĩ, erã perã waire aĩ, umarogue ĩhamemuju Goãmure “Ōhaa,” arĩpu. Eropã arĩ serẽtuha iri pan dipurure nuha ĩgu buherãre opu masare gueredoregu. Eropigu wai perãre gueredorepu arĩpeherrerãre. <sup>42</sup> Eropirã arĩpeherrerã baha yapia wañorã. <sup>43</sup> Erã ba duarare doce puiri gohra sea gameneo ujutu doboñorã erã wai sãre eropa ta. <sup>44</sup> Eropirã panre banirã uma dihtare queocũ cinco mil gohra arĩñorã.

*Jesu deco weca curiñumi*

*Mt 14.22-27; Jn 6.16-21*

<sup>45</sup> Irisubu ta Jesu ĩgu buherãre dohodirugue ñajajadore, gajipu masegue Betsaida yebague ĩgu core taribuja yudorepu. Eropigu erã taribuja wara puhru Jesupu masare goeriserepu. <sup>46</sup> Goeriseretuhaja utãgugue muria ĩgu seyaro Goãmure serẽgu waha wapũ. <sup>47</sup> Puhru ñamicague arĩcũ dohodirupu ĩgu buherã wadiru ditaru deco arĩyoro. Erã ero payacũ Jesu yujugu ta erã taribujaridirogue arĩpu. <sup>48</sup> Miruñe durũro weã dujuyoro erãre. Eropigu erã ñero tari wejacũ ĩhabeopũ Jesu erãre. Eropigu boyo



muririboro core cãreña wahgãrisubu erã pohro wagu deco weca cãhrapi wahgã wapu. Erãre ïgu tarigãripu. <sup>49</sup> ïgu tarigãquerecũ ta, ïgu deco weca aricũ ïarã ïha uca wañorã. “Sĩridigu muru watĩ ãhrimi,” arĩ pepi gaguinigiñorã. <sup>50</sup> Erã árĩpehrerã ïgure ïarã ïha burigã uca wañorã. Erã eropa ïha ucacũ ïagu Jesu werepu erãre:

—Ne yure ïha ucabiricãque. Yuhu ta ãhraa. Güibita, arĩpu erãre.

<sup>51</sup> Eropa arĩtuha ïgu erã mera dohodirugue ñaja wapu. ïgu ñajara puhrugã ta miruñe taria wayoro. Eropa wacũ erãpu ucataria wañorã. <sup>52</sup> ïgu pan dipurure baja iirare guñabiriñorã erã. ïgure òaro masibiriniñorã.

*Jesu Genesare majarãre dorecãrãre òarã wacũ iĩñumi*

*Mt 14.34-36*

<sup>53</sup> Eropi erã taribujaja, Genesare yebague eja, turogãgue payañorã. <sup>54</sup> Eropirã erã dohodirugue árĩnirã erã majacũ ta masapu Jesure ïha masiñorã. <sup>55</sup> Eropa ïha masirã árĩpehrerogue erã ya yebague omaja, dorecãrãre erã pũyucu mera aĩgãriñorã. “Jesu erogue ãhrimi,” masa erã arĩcũ pee eroguerẽ aĩ ejañorã. <sup>56</sup> Eropirã árĩpehrero ïgu waroguere paga macariguere, mta macarigãguere, campogue, erã wari mariguere erã masa dorecãrãre aĩ apiñorã Jesure coremorã. Eropirã Jesu erã pohro ïgu ejacũ mohmepiñadiarã turaro serẽñorã ïgure.

—Mu suhriro ojogoro dihtare mohmepiñadoreque guare, arĩ serẽñorã erã.

Eropirã ïgu suhrirore mohmepinirã nucũ òarã wañorã.

## 7

*Masa ñerã wacũ iirire wereñumi Jesu*

*Mt 15.1-20*

<sup>1</sup> Eropi Jerusalengue arinirã judio masare buherã, fariseo masa mera Jesu pohrogue gamenereñorã. <sup>2-4</sup> Fariseo masa árĩpehrerã, gajirã gua acawererã judio masa mera erã ñecu sumarã dorediro dopa ta erã mojotorire coero mariro babirimuriñorã. Eropirã doberi duarã pohrogue wanirã dujajarã erã dorerire iimorã, erã mojotorire coero mariro babirimuriñorã erã. Eropirã baja gaji erã dorerire erã ñecu sumarã iidorerire iimuriñorã erã. Tasa parire yujuropa coe, mátasororire coe, comesororire coe, erã iiguaro dopa ta iimuriñorã erã judio masa “Goãmũ eropa gahmemi,” arĩrã. Eropirã Jesu pohrogue gamenererã Jesu buherã erã ñecu sumarã dorediro dopa ta erã mojo coebiricũ ïañorã fariseo masa. <sup>5</sup> Eropa ïatuhajarã Jesure serẽpiñorã:

—Mu buherã mari ñecu sumarã mura erã dorediro dopa ta erã baboro core erã mojo coebeama. ¿Duhpirã mari dorerire iibeari erã? arĩñorã erã Jesure.

<sup>6</sup> Erã eroparicũ peegu werepu Jesu erãre:

—Masa erã ïabiropure ñero iicorerã ãhraa mua. Goãmũ yare weremũhtadigu Isaia mware iribojegue diaye ta weremuriñumi. Òpa arĩ gojañumi Goãmũ ya wereniguirire:

Oã masa yure òaro wereniguiquererã ne yure umupeobeama. Erã ya sĩporãripu gajipugue ãhraa. Yure ne mahibeama. <sup>7</sup> Goãmũ ya doreri wereniguibodirore erã ya wereniguirire dihtare buhema erã. Eropirã yure umupeo erã sĩbuipeori duhpiburi árĩbeaa yure, arĩmi Goãmũ, arĩ gojañumi Isaia iribojegue.

<sup>8</sup> Iri diaye ta ãhraa. Goãmũ dorerire iibeaa mua. Mua ñecu sumarã mura árĩricuri dihtare iiaa, arĩpu Jesu erãre.

<sup>9</sup> Eropigu erãre wereniguinemopu daja:

—Mua ñecu sumarã mura árĩricurire iiduhubirã ta Goãmũ yapure cohãa mua.

<sup>10</sup> Iribojegue òpa arĩñumi Moise Goãmũ dorerire: “Mua pagu sumarãre umupeoque. Yujugu ïgu pagu sumarãre ñero werenigui coredigu ïgu wejẽbu árĩgucumi,” arĩñumi Moise. <sup>11</sup> Moise eropa arĩquerecũ ta, mupũ masare òpa arĩ weredorea erã pagu



sumarãre. “ ‘Mũare itamumasibea. Mũare yu oborare Goãmũ ya árĩburire opehocãbũ,’ arĩque mũa pagũ sumarãre,” arĩ weredorea mũa. <sup>12</sup> Eropa arĩ weredorerã erã pagũ sumarãre erã umupeobiricũ iiaa mũa erãre. <sup>13</sup> Eropirã Goãmũ ĩgu dorerire tarinũgarã iiaa mũa mũa ñecu sumarã ya doreri dihtare iirã. Gajirãre mũa buheri dihtare peedorea mũa. Baja eropa árĩrĩre iiaa mũa, arĩpũ Jesu erãre.

<sup>14</sup> Eropa arĩtuha masare sihubeo òpa arĩpũ daja:

—Mũa árĩpehrerã peeque yũre. Yu arĩrĩre òaro masique mũa. <sup>15</sup> Mũa disiro ñajaripũ mũa baripũ ñerã wacũ iibea. Mũa disiro wiriripũ, mũa wereniguiripũ mũare ñerã árĩcũ iiaa. <sup>16</sup> Yũre òaro peeque, arĩpũ Jesu.

<sup>17</sup> Eropa arĩtuha Jesu masa pohro árĩdigũ waha wihigue ñajaa wapũ. ĩgu eropa ñajacũ ĩarã ĩgu buherãpũ ĩgu wererare serẽpiñorã. Erã eropa serẽpicũ peegu òpa arĩpũ Jesu:

<sup>18</sup> —¿Ne peenibeari mũa sã? Mũa bari disiro ñajaripũ mũare ñerã masa wacũ iibea. ¿Irĩre masibeari? <sup>19</sup> Iri mũa pepirigue ñajabeaa. Mũa parugue ñajaja taria waha, arĩpũ Jesu.

Eropa arĩgu “Árĩpehreri bari òari bari ãhraa,” arĩgu iipũ. <sup>20</sup> Òpa arĩnemopũ:

—Mũa wereniguiripũ, mũa disiro wiriripũ mũa pepiri ãhraa. Mũa pepiripũ mũare ñerã masa árĩcũ iiaa. <sup>21</sup> Mũa pepirigue òpa ñeri iinũgaa: Ñero pepiri, nomere gameri, yajari, masare wejẽri, <sup>22</sup> gajigu marapo mera ñero iiri, gajirã yare turaro uaribejari, ñetariari iiri, gũyari, ñeri uaribejari, gajirã gajinore opacũ ĩhaturiri, ñero quere wereri, gajirãre tarinũgadiari, pee masibiriri iinũgaa. <sup>23</sup> Árĩpehreri i ñeri mũa pepirigue árĩnũgari mũare ñerire iicũ ñerã árĩcũ iiaa, arĩpũ Jesu.

### *Judio maso árĩbigu Jesure umupeoñumo*

#### *Mt 15.21-28*

<sup>24</sup> Eropigũ Tiro waĩcũri maca pohrogue, Sidón waĩcũri maca pohrogue wapũ. Erogue ejagũ ero árĩri wihigue ñajaa wapũ. Eropigũ gajirãre ĩgu árĩri wihire ne weredorebiripũ. ĩgu eropa duhridiaqueregu ta duhrimasibiripũ. <sup>25</sup> ĩgu ejacũ pee mata yujugo nomeo ĩgu pohro ejapo. Igo mago watĩ ñajasũdigo árĩpo. Gajirã Jesu iira querere peedigo árĩpo. Igo Jesu pohro eja ĩgu guburi pohro merejapo. <sup>26</sup> Igo judio maso árĩbigu Grecia majago árĩpo. Siro Fenicia árĩyoro igo masa dehyoara maca. Jesu pohro mereja ĩgure turaro serẽpo:

—Watĩre wiubasaque yũ magore, arĩ serẽpo igo Jesure.

<sup>27</sup> Igo eroparĩcũ peegu òpa arĩpũ Jesu igore:

—Negohrare wihĩ opũ porã bamũhtaporo. Erã porã ya barire diayeare ocũ ero wabeaa. Israe masa yare gajĩ yeba majarãre yũ omũhtacũ ero wabeaa, arĩpũ Jesu igore.

<sup>28</sup> —Eropa ta ãhraa opũ. Eropa árĩquerecũ ta barisubũ árĩcũ erã diayea sã yuhridijarĩre bacohrema. Gajĩ yeba majago yũ árĩquerecũ, yũ sãre itamuque mũhũ, arĩpo igo ĩgure.

<sup>29</sup> —Mũhũ eropa òaro arĩ yũhricũ mũ magore watĩre wiubasatuhabũ. ĩago waque, arĩpũ Jesu igore.

<sup>30</sup> ĩgu eroparĩcũ peego waha, igo ya wihigue eja, igo magore camague oyagore watĩ moogoguere eja ĩapo.

### *Peebigure, wereniguimasibigure òagũ wacũ iĩñumi Jesu*

<sup>31</sup> Irisubure Jesu sã Tiro waĩcũri maca pohrogue árĩdigũ waha, Sidón waĩcũri macare eja tarigã, Decapoli waĩcũri macare eja tarigã, Galilea waĩcũri ditarugue ejañorã pare. <sup>32</sup> Eropirã peejabigure, wereniguibigure aĩgãriñorã gajirã Jesu pohrore.

—Mũ mojoto mera mohmepiñaque ĩgure, arĩ serẽñorã erã ĩgure.

<sup>33</sup> Erã eroparĩcũ peegu Jesupu peejabigure aĩgã, masa marirogue aĩ ejaru. Erã seyaro árĩnorã. Eropigu Jesu ĩgu mujusĩri mera ĩgu gamirire pupu. Eropigu ĩgu disico mera ĩgu nerore mohmepĩnaru. <sup>34</sup> Eropiituhaja umaro ĩhamuju sĩ aĩ opa arĩpu: —Efata, arĩpu Jesu. Efata mari ya mera “Pãgũque,” arĩro iiaa. Eropa arĩgu ĩgure peedoregu iipu. Eropigu wereniguidoregu iipu.

<sup>35</sup> ĩgu eroparĩcũ ta ĩgu peejabigu peepu. ĩgu nero nĩricũ pepigu oaro wereniguinugaru. <sup>36</sup> Eropigu Jesu irire ĩanĩrãre gajirãre weredorebiripu. Eropa weredorebiriquerecũ, erãpu gajirãre burigã werepehocãnorã. <sup>37</sup> Eropirã masa pee uca waha opa arĩnorã:

—Árĩpehreri oaro iimi. Peejabirã sãre oaro peecũ iimi. Wereniguibirã sãre oaro wereniguicũ iimi Jesu, arĩnorã masa.

## 8

### *Cuatro mil masare bari oñumi Jesu*

#### *Mt 15.32-39*

<sup>1</sup> Irisubure daja dipaturi masa bajarã erã gamenerera puhru, bari moorã erã arĩcũ ĩagu Jesu ĩgu buherãre sihubeopu:

<sup>2</sup> —Oã masa uhrenu gohra yu mera arĩtuhajama. Erãre bari pehrea waca. Eropigu erãre mojomoro ĩhaa yuhu. <sup>3</sup> Gajirã erã mera majarã yoarogue arinirã aħrima. Erã babiriquererã erã ya wirigue dujaacũ gamebirica. Mague warã erã oaboarã turabiribocoma. Eropigu erãre barire odiaca, arĩpu Jesu ĩgu buherãre.

<sup>4</sup> ĩgu eroparĩcũ ĩgu buherã ĩgure arĩnorã:

—¿Duhpii mari õguere masa mariroguere barire bocabocuri erãre ejomorã? arĩnorã Jesu ĩgu buherãpu.

<sup>5</sup> —¿Di nucũ dipuru pan dipuru opari mua? arĩ serẽpipu Jesu erãre:

—Siete pan dipuru aħraa, arĩnorã.

<sup>6</sup> Eropigu ĩgu masare taa arĩro weca doadorepu. Tuhajanugu siete pan dipurure aĩ, Goãmure “Õhaa,” arĩ serẽpu. Eropa arĩ serẽtuhaja pan dipurure nuha ĩgu buherãre opu gueredoregu. <sup>7</sup> Eropirã waigã sãre bajamerãgã opañorã erã. Eropigu waigãre aĩ Goãmure “Õhaa,” arĩ serẽ, ĩgu buherãre masare gueredorepu. <sup>8</sup> Masa irire barã yapia wañorã. Erã ba duharare siete puiri gohra aĩ gameneo ujtutu doboñorã. Erã masa cuatro mil gohra arĩnorã. <sup>9-10</sup> Eropiituha Jesu masare goeriserepu wagu. Erãre goeriseretuhaja Dalmanuta waĩcũri maca pohrogue waha wapu.

### *Fariseo masa deyoro moariñere ĩadiariñuma*

#### *Mt 16.1-4; Lc 12.54-56*

<sup>11</sup> Ero puhru fariseo masa Jesu mera duyatorã erañorã. Erã Jesure Goãmũ turari mera deyoro moariñere iidoreriñorã. ĩgu ii ĩhmumasibiricũ ĩadiariñorã. ĩgu iimasibiricũ “Goãmũ ĩgu obeodigu arĩbeamĩ,” arĩdiariñorã. <sup>12</sup> Erã opa dorecũ peegu Jesu turaro bujawere siñaja opa arĩpu:

—¿Mua dohpague majarã duhpirã Goãmũ ĩgu turari mera deyoro moarire ĩadiari? Diaye arãa mũare. Dohpague majarã mũare ne deyoro moarire ii ĩhmusome yahu, arĩpu Jesu erãre.

<sup>13</sup> Opa arĩtuha waha dohodirugue ñaja gajipu masegue waha wapu ĩgu buherã mera.

### *Fariseo masa, Herode ya curu majarã sã erã ñeri buherire wereñumi Jesu*

#### *Mt 16.5-12*

<sup>14</sup> Eropa warã panre cãdijiñorã. Dohodirugue yujuru ta panrure opañorã erã.

<sup>15</sup> Eropigu Jesu guhyaro mera werepu ĩgu buherãre:

—Ōaro iique. Fariseo masa, Herode ya curu majarã sã erã pan buḡacũ iiburire ōaro iique. Ḡahya āhraa iri, arĩ werepũ erãre.

<sup>16</sup> Īḡũ fariseo masa sã erã buherire eroparĩcũ pee, ĩḡũ buherãpũ peewisirã irire erã basi wereniguiñorã.

—Mari panre mari aĩḡaribiricũ ĩaḡũ eropa arĩcumi ĩḡũ, arĩñorã erã basi.

<sup>17</sup> Erã eropa arĩrare masigũ òpa arĩpũ Jesu erãre:

—¿Duhpirã mua pan cãdijirare ḡuñari mua? ¿Mua masibeari? ¿Peenibeari mua dohpa? ¿Peediabeari mua? <sup>18</sup> ¿Cuiricurã árĩquererã ĩabeari mua? ¿Gamiricũquererã ta peebeari mua? ¿Mua yũ iirare ḡuñabeari? <sup>19</sup> ¿Yũ cinco mil umare cinco dipuru panre yũ nuha orare ḡuñabeari mua? ¿Erã yapi weorare di nũcũ puiri pan dipure mua ujutura puirire añari mua? arĩ serẽpipũ Jesu erãre.

—Doce puiri, arĩñorã erã ĩḡũre.

<sup>20</sup> —¿Eropi yũhũ siete pan dipurare cuatro mil masare yũ ora pũhrũ di nũcũ puiri ujutura puiri añari mua? arĩpũ Jesu erãre daja.

—Siete puiri, arĩ yũhriñorã erã.

<sup>21</sup> —¿Eropa irire ĩaquererã ta masibeari mua dohpa? arĩpũ Jesu erãre.

### *Jesu cuiri deyobigũre ĩacũ iĩñumi*

<sup>22</sup> Eropi erã Betsaida waĩcuri macague erã ejacũ ĩarã, masapũ cuiri deyobigũre aĩḡarĩñorã.

—Īḡũre mohmepique, arĩ turaro serẽñorã erã Jesure.

<sup>23</sup> Eropigũ Jesu cuiri deyobigũre mojoto ñeha iri maha tũroque ĩḡũre taragãpũ. Aĩ eja ĩḡũ cuirire purimetupũ disico mera. Eropigũ ĩḡũ mojoto mera ĩḡũre mohmepipũ.

—¿Mũhũ ĩacũ dehyori? arĩ serẽpipũ Jesu ĩḡũre.

<sup>24</sup> Īḡũ eroparĩcũ ĩḡũpũ ĩaḡũ òpa arĩpũ:

—Masare ĩhaa. Erãre ĩaquerecũ erã curicũ yucũ iro dopa dehyoma, arĩpũ ĩḡũ cuiri deyobigũpũ.

<sup>25</sup> Īḡũ eroparĩcũ peegũ Jesupũ ĩḡũ mojotori mera ĩḡũ cuirire mohmepipũ daja. Īḡũ eropa mohmepira pũhrũ cuiri deyobigũ ĩḡũ turaro ĩacũ ōaro deyoyoro pare. Eropigũ árĩpehrerire ōaro ĩapũ ĩḡũ. <sup>26</sup> Eropigũ Jesu ĩḡũre ĩḡũ ya wihigue omedijugũ òpa arĩpũ:

—Macague tamerare wabiricãque. Eropigũ maca majarãre i yũ iirare gajirãre weresiribiricãque, arĩpũ Jesu ĩḡũre.

### *Jesu ĩḡũ diaye ta Cristo árĩrire wereñumi Pedro*

*Mt 16.13-20; Lc 9.18-21*

<sup>27</sup> Eropi Jesu ĩḡũ buherã mera Cesarea Filipino waĩcuri maca pohro árĩri macarigue wanemoñorã. Eroque wagũ Jesu serẽpiñapũ ĩḡũ buherãre:

—¿Nihino árĩcuri yũhũ masa erã yũre pepicũ? arĩ serẽpiñapũ ĩḡũ.

<sup>28</sup> Īḡũ eropa arĩ serẽpiñacũ peerã ĩḡũ buherã yũhriñorã:

—“Ñu waĩyegũ āhrimi,” arĩma mũre. Gajirã “Elia āhrimi,” arĩma. Gajirãpũ “Goãmũ yare weremũtanirã mera majagũ āhrimi,” arĩma, arĩ yũhriñorã ĩḡũ buherã ĩḡũre.

<sup>29</sup> Erã eropa arĩra pũhrũ Jesu serẽpinemopũ erãre:

—¿Mũapũ mua pepicũ nihino árĩcuri yũhũ? arĩ serẽpipũ.

Pedropũ yũhrĩpũ ĩḡũre:

—Mũhũ Cristo Goãmũ ĩḡũ obeodigũ āhraa, arĩ yũhrĩpũ Pedro.

<sup>30</sup> Īḡũ eroparĩcũ peegũ Jesu òpa arĩpũ:

—Yũre “Cristo āhrimi ĩḡũ,” ne arĩ weresiribiricãque gajirãre, arĩpũ erãre.

*Jesu ĩgu sĭriburiñere ĩgu masa m̃riaburiñe s̃are werem̃htañumi*  
*Mt 16.21-28; Lc 9.22-27*

<sup>31</sup> Eropigu ĩgu er̃are buhenugap̃u òpa arĭ wereg̃u:

—Yũhũ masũ Goãmũ ĩgu obeodigu ãhraa. Eropigu burigã ñero tarigũca. Yũre eropa ta waro gahmea. Murã, pahia oparã, marire buherã sã yũre gamebirã yũre wejẽrãcoma. Erã yũre eropa wejẽquerecũ, ùhrenũ pũhrũ masa m̃riagũca, arĭpũ Jesu er̃are.

<sup>32</sup> Eropa arĭgu erã òaro peeboro dopa òaro wereg̃u iipũ er̃are. ĩgu eroparĭcũ peegu Pedropũ gajipũ ñarigã Jesure aĩgã ĩgũre arĭpũ. “Eropa arĭbircãque,” turaro mera arĭ werepũ. <sup>33</sup> ĩgu eropa arĭdorebircũ peegu Jesupũ ĩgu buherãre majinũgaja, turipũ Pedrore.

—Satana iro dopa wereniguigu iiaa mũhũ. Eropa arĭbircãque. Mũ pepiri masa ya ãhraa. Goãmũ ya árĭbeaa, arĭpũ ĩgu Pedrore.

<sup>34</sup> Eropa arĭtuha masare ĩgu buherã mera sihubeo òpa arĭpũ:

—Yujugũ yũ mera majagũ árĭdiagũ ĩgu gamero iidiarire duhucãgũcumĩ. Eropigu ĩgu yũ mera majagũ ĩgu árĭri dipuwaja ñero tarigũcumĩ. Ñero tariqueregũ yahare iiniguicãgũcumĩ. <sup>35</sup> Yujugũ masũ ĩgu ya árĭburi dihtare pepigu ĩgu dederea wagũcumĩ. Eropigu gajigu yaha árĭburi dihtare iigu, òari buheri sãre iigu, árĭpehrerinũri yũ mera ùmarogue òaro árĭgũcumĩ. <sup>36</sup> Yujugũ masũ i yeba majare árĭpehrerire opaqueregũ, peamegue wagũ òarire wajatasome. <sup>37</sup> Eropigu i yebague opaburi dihtare guñagũ, ĩgu sĭrigũ waburire guñabigu ĩgu sĭporã mera peamegue dederegũcumĩ. <sup>38</sup> Dohpaguere ñerã Goãmũre gamebirã erã ejatuharo iiri árĭro iiaa. Eropirã yujurãyeri yũre, yũ buheri sãre masiquererã “Masibeaa,” arĭbocoma gũhyasĭrĩrã. Erã eroparĭcũ ĩagũ yũ sã er̃are gũhyasĭrigũ “Er̃are masibeaa,” arĭgũca. Yũhũ masũ Goãmũ ĩgu obeodigu òarã anyua mera yũ Pagũ gosesiriri mera dujarigũca. Yũ dujarigu yũ waĩre arĭdia gũhyasĭrisãnirãre gũhyasĭrisãgũca yũ sã, arĭ werepũ Jesu.

## 9

<sup>1</sup> Eropa arĭtuhaja òpa arĭnemopũ Jesu:

—Diaye arĭgu tiiaa mũare. Yujurãyeri mũa òguere árĭrã, mũa sĭriboro core Goãmũ ĩgu opũ árĭroguere yũ ñajacũ ĩarãca, arĭpũ Jesu.

*Jesu ĩgu dũpũre gohrotoñumi*  
*Mt 17.1-13; Lc 9.28-36*

<sup>2</sup> Eropi seis nũri pũhrũ Jesu Pedrore, Santiagore, ĩgu pagũ magure Ñure utãgũgue ùmadigũgue erã dihtare sihu m̃riapũ. Ùmarogue erã m̃rijara pũhrũ erã ĩhabeoro ĩgu dũpũre gohrotopũ. <sup>3</sup> Eropiro ĩgu suhri gosesiriri suhri òaro boreriñe wayoro. I yeba majarã nome suhri coerã nome ne eropa borerire iimasibeama. <sup>4</sup> Mata iribojegue majarã Moise mũrũ Elia mũrũ sã dehyoãnorã. Eropirã Jesu, Elia, Moise mera weretamucũ ĩãnorã erã ùrerã ĩgu buherã. <sup>5-6</sup> Eropirã erã burigã güiñorã. Eropa güigu dohpa arĭmasibirinijagũ òpa arĭpũ Pedro:

—Opũ, mari ohõ árĭcũ òadiaa. Ùhre wihigã iirã. Mũ ya wihigã, Moise ya wihigã, Elia ya wihigã iirã, arĭpũ ĩgu Jesure.

<sup>7</sup> Eropiro erã weca er̃are imica curu cãhmotayoro. Iri eropa cãhmotacũ ta imica curu pohecague Goãmũ ĩgu wereniguiri busũyoro:

—Ihĩ yũ magũ yũ mahigu ãhrimi. Peeque ĩgũre, arĭri busũro cariyoro.

<sup>8</sup> Eroparĭcũ peerã Pedro sã maji ĩarã Moisere, Eliare ĩabiriñorã pare. Jesu dihtare ĩãnorã. <sup>9</sup> Eropi utãgũgue erã dijaricũ Jesu er̃are werepũ:

—Dohparagã yũre eropa warare gajirãre ne werebircãque. Yũhu masũ Goãmu ïgu obeodigu yũ sĩri masa mũriara pũhrũ irire gajirãre wereque mũa, arĩ werepũ Jesu.

<sup>10</sup> Eropirã erã ïgu dorediro dopa werebiriñorã gajirãre. Eropirã erã, erã basi õpa arĩ serẽpi wereniguiñorã:

—“Yũhu sĩridi masa mũriara pũhrũ,” ïgu arĩgu ¿duhpigu eropa arĩri ïgu? arĩ wereniguiñorã erã.

<sup>11</sup> Eropirã Jesure õpa arĩ serẽpiñorã:

—Cristo Goãmu beyedigu ïgu ariboro core “Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñorã Jesure ïgu buherã.

<sup>12-13</sup> Jesu yũhrĩpũ:

—Diaye ta ãhraa. Eliare arimũhtadoremi Goãmu árĩpehrerire amumũhtabure. ïgu eropa iiborore arĩ gojayura ãhraa Goãmu yare gojarapũgue. Yũ sãre arĩ gojajuñuma. Yũhu masũ Goãmu ïgu obeodigu bajasuburi ñero tarigũca. Gajirã yũre gamebirã yũre ñero iirãcoma. ¿Iri sãre masiri mũa? Eropigu õpa arĩgũra mũare: Elia eratuhami. ïgu eracũ erã ïgũre erã gamero dopa ñero iima. Iribojegue erã arĩ gojayudiro dopa iima ïgũre, arĩpũ Jesu.

*Jesu majigũre õagũ iĩñumi*

*Mt 17.14-21; Lc 9.37-43*

<sup>14</sup> Eropi dijari ïgu buherã dujanirã pohrogue eja, bajarã masare ïapũ. ïgu buherãpũ judio masare buherã mera game dũyatorã iĩñorã. <sup>15</sup> Masa Jesure ïarã árĩpehrerã ïhamaria wañorã. Eropirã ïgu pohrogue omagã ïgu pohrogue eja, “¿Ahrari?” arĩñorã ïgũre. <sup>16</sup> “Ahrabũ,” arĩtuhaja erãre serẽpipũ:

—¿Ñehenore game wereniguirã iiari mũa eropa dũyatorã? arĩ serẽpipũ ïgu.

<sup>17</sup> ïgu serẽpicũ peegũ masa watope niguidigu werepũ ïgũre:

—Buhegu, yũ magũre watĩ ñajasũdigũre mũre aĩgãrirabũ. Watĩpũ ïgũre wereniguidorebeamĩ. <sup>18</sup> Yũ magũre ïgu ñajacũ yebague mehmereja wahami. ïgu disirore sumutua, ïgu gũcũrĩre cũridihu buha wamũrami ïgu. Eropigu mũ buherãre watĩre yũ magũre ñajadigũre cóãdorerabũ. Erã cóãmasibirama, arĩ werepũ ïgũre.

<sup>19</sup> ïgu eroparĩcũ peegũ õpa arĩpũ Jesu masare:

—¿Ne yũre umupeobirigohracãri mũa? Yoari boje mũare buherabũ yũhu. ¿Dipa boje yũhu mũare yujuro bojebocuri? ïgũre aĩgãrique, arĩpũ Jesu.

<sup>20</sup> ïgu eroparĩcũ peerã watĩ ñajasũdigũre Jesu pohro aĩgãriñorã. Erã Jesu pohro aĩ ejacũ ta watĩpũ ïgu majigũre mehmerejacũ iipũ. ïgu eropiicũ ïgu yebague mehmereja warũ. Tũru, naragã, bũhacũ iipũ. Eropiĩ ïgu disiro sumutua warũ. Jesu ïgu pagũre serẽpipũ:

<sup>21</sup> —¿Dipa boje eropa ãhrari ïgu? arĩ serẽpipũ Jesu majigu pagure.

—Majigũgãgue ta ïgu eropa árĩnũgami, arĩ yũhrĩpũ ïgu pagũpũ. <sup>22</sup> Eropigu watĩpũ ïgũre peamegue, diague sãre cóãmũririmi ïgũre wejẽdiagu. Eropigu mũhu itamumasigu mojomoro ïha itamuque gũare, arĩpũ majigu pagũpũ Jesure.

<sup>23</sup> ïgu eroparĩcũ peegũ õpa arĩpũ Jesu ïgũre:

—Mũhu yũre umupeocũ ïagu Goãmu árĩpehrerire iipehocãmasimi mũ ya árĩburire iigu, arĩpũ Jesu ïgũre.

<sup>24</sup> ïgu eroparĩcũ majigu pagũ õpa arĩ gaguiniguipũ:

—Mũre umupeoa yũhu. Yũ umupeobiricũ ïagu itamuque yũre yũhu mũre umupeoboro dopa, arĩpũ ïgu.

<sup>25</sup> Eropiicũ masa bajarã erã pohro omagãriñorã. Erã gamenerecũ ïagu Jesu watĩre õpa arĩ turipũ:



—Mũhũ wereniguimasibiricũ iidigu, gamiri bihadigu ãre duhuque. Eropigu dipaturi ãgũre garibobiricãque, arĩpũ Jesu.

<sup>26</sup> ãgu eroparĩcũ peegu majigũre ñajadigu watĩ gaguinigui, majigũre yebague mehmereja, tũru naragãcũ ii duhupũ ãgũre. ãgu eropiicũ majigũpũ sĩrigũ dopa warũ.

<sup>27</sup> —ãgu sĩria wami, arĩñorã masa bajarã.

Erã eropa arĩquerecã ta Jesupũ ãgu mojtore ñeha ãgũre tara wahgũ nugupũ. ãgu tara wahgũ nugucũ wahgãñugajapũ ãgũpũ.

<sup>28</sup> Pũhrũ Jesu wihigue ñajajacũ ãarã ãgu buherã erã seyaro serẽpiñorã Jesure:

—¿Duhpirã guapũ majigũre watĩ opagũre cóãmasibirayuri mũ pepicũ? arĩ serẽpiñorã erã.

<sup>29</sup> —ãno watĩre cóãdiarã bũrigã Goãmũre serẽro gahmea. Eropirã Goãmũre serẽmorã ba duhuro gahmea mũare, arĩ yũhrĩpũ Jesu erãre.

*Dipaturi ta Jesu ãgu sĩriburiñere ãgu masa mũriaburiñe sãre wereñumi*  
*Mt 17.22-23; Lc 9.43-45*

<sup>30</sup> Eropi erogue arĩnirã waha Galilea yebague eja, tarigãñorã. Irisubu Jesu ãgu buherãre buhegu iipũ. Eropigu erã warore gajirã masicũ gamebirĩpũ Jesu. <sup>31</sup> Erogue ejagu ãgu buherãre buhepũ. Õpa arĩ buhepũ:

—Yũhũ masũ Goãmũ ãgu obeodigu ãhraa. Masa yũre ñeha gajirãguere yũre wiarãcoma. Erã wiara pũhrũ yũre wejẽrãcoma erã. Eropa erã wejẽra pũhrũ uhrenũ pũhrũ masa mũriagũca, arĩpũ Jesu.

<sup>32</sup> ãgu õpa arĩcũ õaro peebiriñorã. Eropirã gũirã ãgũre irire serẽpibiriñorã.

*Jesu ãgu buherãre erã yagu opũ arĩbure wereñumi*  
*Mt 18.1-5; Lc 9.46-48*

<sup>33</sup> Eropi erã Capernaumgue ejara pũhrũ wihigue erã arĩcũ Jesupũ serẽpipũ erãre:

—¿Maguere arirã dohpa arĩ dũyaso wereniguirã iiarĩ mũa? arĩ serẽpipũ erãre.

<sup>34</sup> ãgu eroparĩcũ erã yũhribiriñorã. Mague arirã õpa arĩ dũyaso wereniguiñorã erã basi:

—¿Nihĩ ãhriri mari arĩpehrerã wecague? arĩ dũyaso wereniguiñorã erã. Eropirã erã eropa arĩrãre Jesure werediabiriñorã. <sup>35</sup> Erã eropa yũhribiricũ ãagu Jesu doaja ãgu buherãre sihubeo õpa arĩpũ:

—Arĩpehrerã wecague opũ arĩdiagu arĩpehrerã ojogoro majagu arĩro dopa ta erã pohro majagu arĩro gahmea mũare, arĩpũ Jesu erãre.

<sup>36</sup> Eropa arĩgu majigũgãre erã watope duhudobopũ. Duhudobotuha ãgũgãre arĩ coã õpa arĩ werepũ:

<sup>37</sup> —Yahare iidiarã, ãgũgãre bu arĩgũre gamerã yũ sãre gahmea mũa. Mũa eropiirã yũre gamerã, yũre obeodigu Goãmũ sãre gahmea mũa, arĩpũ Jesu erãre.

*Marire ãhaturibigu arĩgu mari mera majagu ãhrimi, arĩ wereñumi Jesu*  
*Mt 10.42; Lc 9.49-50*

<sup>38</sup> Ero pũhrũ ãgu buhegu Ñũ õpa arĩpũ Jesure:

—Buhegu, yujugu mũ waĩ mera watẽare cohã wiucũ gũa ãhabũ. ãgu mari mera majagu ãgu arĩbiricũ ãarã, ãgũre irire iidorebirimũrabũ gũa, arĩpũ ãgu.

<sup>39</sup> ãgu eroparĩcũ peegu Jesu erãre werepũ:

—Eropa arĩbita mũa ãgũre. Yujugu yũ waĩ mera deyoro moarire iigu, pũhrũguere yũre ñero wereniguimasibeami. <sup>40</sup> Marire ãhaturibigu arĩgu, ãgu mari mera majagu ãhrimi. <sup>41</sup> Mũare diaye ta arãa. Yaharã mũa arĩcũ ãarã gajirã mũare itamucũ ãagu Goãmũ erãre õaro itamugũcumi. Yuju coaru mera decore mũare erã tĩacũ merogã arĩquerecã, erãre õaro iigũcumi Goãmũ erã õaro iira waja, arĩpũ Jesu.

*Ñerire iicũ guhya ãhraa, arĩ buheñumi Jesu*

*Mt 18.6-9; Lc 17.1-2*

<sup>42</sup> Eropigũ Jesu majigugãre ãgũ basi coã aĩ erãre werenemopũ:

— Ñgã yũre umupeogugãre weregura mũare: Yujugũ ãgã iro dopa árigũre ñerire iidoredigũ, ãgũ ñetariaro tarigũcumi. Gajigũre masa ãgũre wũnũgũre wũariye utãye mera dirisiu, wũariyague ãgũre cóãcũ ñero wabocumi ãgũ. Eropigũ ãgã dopa árigũre ñerire iidoredigũpũ wũariyague erã cóãdigũ tauro ñero tarigũcumi. ãgũ burigã dipuwaja moasũgũcumi. <sup>43-44</sup> Mũ mojoto mera ñero iigũ, iri mojotore mũ tabe cóãbodiropũ dopa iri ñerire duhuque. Irire duhubigũ peamegue wagũca. Eroguere ne peame yaribea. Eropirã beca sã ãjũquererã ne sĩribea. Mũ mojotore mũ cóãcũ iri dũca dihta cohmoboya. Eropigũ mũpũ epasi áriquererũ ta pũhrũ Goãmũ mera árigũca. Mũ pe mojoto mera árigũre peamegue ãgũ cóãcũ ñetariaro tarigũca. Eropigũ iri ñeri iiripũre duhuque. <sup>45-46</sup> Mũ guburu mera ñero iigũ mũhũ iri guburu sãre mũ tabe cóãbodiropũ dopa ta iri ñerire duhuque. Irire duhubigũ peamegue wagũca. Eroguere ne peame yaribea. Eropirã beca ne sĩribea. Mũ guburure mũ cóãcũ irisi dihta cohmoboya. Eropigũ epasi áriquererũ ta pũhrũ Goãmũ mera árigũca. Mũ pe guburu mera árigũre mũre peamegue cóãcũ mũ ñetariaro tarigũca. Eropigũ iri ñeri iiripũre duhuque. <sup>47-48</sup> Mũ cuiru mera ñero iigũ irirure mũ gorawea cóãbodiropũ dopa ta iri ñerire duhuque. Irire duhubigũ peamegue wagũca. Eroguere ne peame yaribea. Eropirã beca sã ne sĩribea. Mũ cuirure cóãcũ iriru dihta cohmoboya. Yujupũ cuiru mariquererũ ta pũhrũ Goãmũ mera árigũca. Mũre pe cuiru mera árigũre peamegue mũre cóãcũ mũ ñetariaro tarigũca. Eropigũ iri ñeri iiripũre duhuque.

<sup>49</sup> “I yeba áriã ñero tarirãca mũa. Peamegue mari ãjũcũ marire pũriropũ dopa ta ñero tarirãca mũa. <sup>50</sup> Moa õaro acaa. Moa acabiricũ usũriri iimasiya mara. Moa acabiro iri moa ne õabeaa. Iri moa acabiricũ dohpagohra iimasiya mara. Eropirã moa õaro acaropũ dopa mũa suarã árique. Eropirã gajirã mera õaro mera árique.

## 10

*Erã marasã nomere erã cóãcũ õabeaa, arĩ wereñumi Jesu*

*Mt 19.1-12; Lc 16.18*

<sup>1</sup> Eropigũ ãgũ erogue áridigũ waha, Judea yeba pohroque eja, dia Jordán waĩcũriya gajipũ masegue ejarũ. Eroque ãgũ ejacũ ãarã masa bajarã ãgũ pohroque gamenereñorã daja. Erã gamenerecũ ãagũ ero core ãgũ buhediro dopa ta dipaturu buhepũ daja. <sup>2</sup> ãgũ eropa buherisubũ fariseo masa erañorã. Jesure ãgũ ñero wereniguicũ peediañorã. Eropã peediarã erã Jesure õpa arĩ serẽpiñorã:

—¿Mari marapore cóãcũ õhari? ¿Moise doreripũ eropa ta iidone õabeaa. Iri moa acabiricũ reru mũ pepicũ? arĩ serẽpiñorã.

<sup>3</sup> —¿Dohpa doreyuru Moise mũare? arĩ yũhrupũ Jesu.

<sup>4</sup> —“Mũ marapore cóãdiagũ paperapũgue irire gojaque. Eropã gojagũ iripũre mũ marapore otuhajanijagũgue ãgore cóãmasia,” arĩ gojañumi Moise, arĩ yũhriñorã fariseo masa.

<sup>5</sup> Erã eroparicũ peegũ õpa arĩ werepũ Jesu:

—Mũa ñecũ sũmarã Goãmũ dorerire iidiabiricũ ãagũ, “Eropa ta wacuraporo,” arĩgũ, “Mũa marapore cóãmasia,” arĩ gojañumi Moise. <sup>6</sup> ãgũ eropa arĩ gojara áriquererũ ta, negohraguere Goãmũ mũa marasã nomere cóãcũ gamebiriñumi. I yebare ãhacũnugugũ mũmũ, nomeo sãre iĩñumi. <sup>7</sup> Eropigũ mũmũ ãgũ pagũ sũmarãre cohã wiria ãgũ marapo mera árigũcumi. <sup>8</sup> Eropirã erã perã áriquererũ ta, yuju dũpũ iro dopa áriãcoma. Eropirã erã perã iro dopa áribeama. Yuju dũpũ iro dopa áhriima

erã. <sup>9</sup> Eropirã Goãmũ ìgũ doreri mera mojtodirima. Eropirã game cóãbircãro gahmea erãre, arĩpũ Jesu erãre.

<sup>10</sup> Eropa arĩtuha ìgũ buherã mera wihigue ñajaa wapũ. Wihigue ñajajarã erã marasã nomere cóãrire serẽpinemoñorã daja ìgũ buherã. <sup>11</sup> Erã eropa serẽpiñacũ ìgũ yũhripũ:

—Ìgũ marapore cóãdigũ gajigo mera marapocũgũ, ìgũ igo gajigo mera ñero iigũ iimi. <sup>12</sup> Eropigo nomeo sã igo marapũre cóãgo, gajigũ mera marapũcũgo, ìgũ gajigũ mera ñero iigo àhrimo, arĩpũ Jesu erãre.

*Majirãgã ya árĩburire Goãmũre serẽbasañumi Jesu*  
*Mt 19.13-15; Lc 18.15-17*

<sup>13</sup> Eropi majirãgãre Jesure mohmepidoremorã erãgãre Jesu pohroque aĩ erañorã. Erã eropiicũ ìgũ buherãpũ erãgãre aĩgãrirãre bocatĩri turiñorã. <sup>14</sup> Erã eropa turicũ ìagũ Jesu papũrigũ òpa arĩpũ erãre:

—Eropa ìacãque. Majirã yũ pohroque ariporo. Waque, arĩbircãque erãgãre. Erã Goãmũre erã opũre masima. Eropirã Goãmũ ìgũ opũ árĩroguere oãgã iro dopa pepirã àhrima eroguerẽ. <sup>15</sup> Diaye arĩgũ iiaa mũare. Oãgã Goãmũre gamediro dopa ta mũa Goãmũre gamebirã ìgũ pohroque wasome mũa. Mũa wabircũ mũa opũ árĩsome ìgũ, arĩpũ Jesu.

<sup>16</sup> Eropa arĩtuha Jesu majirãgãre aĩ coãgũ erãre mohmepi erã òaro árĩburire Goãmũre serẽbasagũ òpa arĩpũ:

—Oãgã òarã waporõ, arĩ serẽbasapũ Goãmũre.

*Doberi opagũ Jesu mera weretamuñumi*  
*Mt 19.16-30; Lc 18.18-30*

<sup>17</sup> Eropi Jesu ìgũ mague wacũ, yujugũ masũ omagã wa ìgũ guburi pohro mereja Jesure serẽpipũ.

—Mũhũ buhegũ òagũ àhraa. ¿Yũhũ árĩpehrerĩnũri Goãmũ mera árĩdiagũ duhpigũcuri? arĩpũ ìgũ Jesure.

<sup>18</sup> Ìgũ eroparĩcũ Jesu ìgũre yũhripũ:

—¿Dohpa arĩronore yũre “Òagũ” arĩ piyuri mũhũ? Goãmũ yujugũ ta òagũ àhrimi. <sup>19</sup> Ìgũ Goãmũ dorerire masia mũhũ. “Masare wejẽbircãque. Gajigũ marapo mera árĩbircãque. Yajabita, gũyabita, gajirã yare gũya aĩbita, mũ pagũ sumarãre umupeoque,” ire doremi Goãmũ. I dorerire iro gahmea mũre, arĩ werepũ Jesu ìgũre.

<sup>20</sup> —Buhegũ, irire árĩpehrerire majigũgãque ta tarinũgabirimũribũ yũa, arĩpũ ìgũ Jesure.

<sup>21</sup> Jesu ìgũre ìhamehtu mahipũ. Eropigũ òpa arĩpũ:

—Merogã duhyaa mũre mũ iipehoboro. Árĩpehrerire mũ yare duaque. Eropigũ árĩpehreri mũ wajatarare mojomorocũrãre oque. Mũhũ eropiicũ baja òari mũarogue Goãmũ pohroguere árĩyuroca. Tuhajanugu yũ mera majagũ árĩbu arĩque, arĩpũ Jesu ìgũre.

<sup>22</sup> Wũaro opagũ arĩpũ ìgũ. Eropigũ Jesu ìgũre eroparĩcũ peegũ ìgũ oparire mojomorocũrãre odiabigũ, turaro bũjawere, suabiri waha wapũ.

<sup>23</sup> Ìgũ bũjawere wacũ ìagũ Jesu majinũgaja ìgũ buherãre ìha òpa arĩpũ:

—Doberi oparã Goãmũ ìgũ opũ árĩroguere erã wadiacũ diasã àhraa, arĩpũ erãre.

<sup>24</sup> Ìgũ eroparĩcũ peerã erãpũ pee uca waha pee masibiriñorã. Eropa arĩtuha Jesu dipaturĩ werepũ erãre:

—Yũ acawererã, árĩpehrerã “Yũ gamero yũ opari mera ta òaro tarigũca,” arĩ pepirã Goãmũ ìgũ opũ árĩroguere erã wacũ diasataria. <sup>25</sup> Camellopũ awiru gobegãque ìgũ ñajatariwereadiacũ masiya mara ìgũre. Eropa ta doberi opagũ ìgũ Goãmũ mera òaro árĩgũ ìgũ opũ árĩroguere ìgũ wacũ diasã àhraa, arĩ werepũ erãre.

<sup>26</sup> Īḡu eroparĩcũ peenijarã ĩhamaria wanijarã, erã basi õpa arĩñorã:

—Yaho. Īḡu arĩro dopa ta diaye árĩcũ ne yujugũ masũre taubiribocumi Goãmũ Īḡu pohro wamorãre, arĩñorã erã erã basi.

<sup>27</sup> Erã eroparĩcũ peegũ Jesu erãre ĩhabeo õpa arĩpũ:

—Masa erã bocatĩuro erã õaro iiri mera tarimasibeama. Goãmũ pohrogue wamasibeama. Goãmũ dihta masare peamegue wabonirãre taumasimi ĩḡu pohro wamorãre. Īḡu árĩpehrerire õaro iimasipehocãmi, arĩpũ Jesu erãre.

<sup>28</sup> Īḡu eroparĩcũ peegũ Pedro ĩḡure õpa arĩpũ:

—Peenique. Gũapũ árĩpehreri gũa yare apicãbũ mũ mera wamorã, arĩpũ ĩḡu Jesure.

<sup>29</sup> Īḡu eroparĩcũ Jesu õpa arĩpũ:

—Diaye arĩḡũ iiaa mũare. Árĩpehrerã õari buherire yaha árĩburire iimorã mũa wirire, mũa pagũ porãre, mũa pagũ sũmarãre, mũa porãre, mũa poerire apirã wũaro wajatarãca mũa dohpaguere. <sup>30</sup> Eropirã mũa wirire, mũa pagũ porãre, mũa pagosã nomere, mũa porãre, mũa poerire ero core mũa opadiro tauro dohpaguere baja oparãca mũa ñero tarirã árĩquererã. Eropirã gajirã mũare ñero iirãcoma. Eropirã pũhrũguere árĩpehrerinũri Goãmũ mera árĩrãca. <sup>31</sup> Dohpaguere bajarã oparã árĩnirã irisubure bu árĩrã dujacãrãcoma. Eropirã dohpaguere bajarã bu árĩnirãpũ oparã dujarãcoma daja, arĩ werepũ Jesu erãre.

*Dipaturi Jesu ĩḡu sĩriburiñere, ĩḡu masa mũriaburiñe sãre wereñumi*

*Mt 20.17-19; Lc 18.31-34*

<sup>32</sup> Eropi erã mague majaa, Jerusalengue majarã iĩñorã. Jesu erã coregã mũhtapũ. Īḡu eropa mũhtacũ ĩarã ĩḡu buherã ĩha uca wañorã. Eropirã erã pũhrũ nũrusiarãpũ gũiro mera ĩḡure nũrusiañorã. Eropigũ Jesu doce ĩḡu buherã seyarore sihubeo, masa ĩḡure iiburire werenũgapũ daja erãre.

<sup>33</sup> —Peeque yũre. Dohpaguere Jerusalengue warã iiaa mari. Erogue masa yũ masũre Goãmũ ĩḡu obeodigũre yũre ñeha, pahia oparãre, judio masare buherã sãre yũre orãcoma. Eropirã yũre wejẽdorerãcoma erã. Eropa wejẽdorerã judio masa árĩbirãre orãcoma yũre. <sup>34</sup> Erã eropa ora pũhrũ erã yũre wereya, disico ehosũ tãrarãcoma. Tuhaja yũre wejẽrãcoma. Eropigũ yũ sĩrira pũhrũ uhrenũ pũhrũ masa mũriagũca, arĩ werepũ Jesu.

*Santiago, Ñũ mera Jesure serẽñuma*

*Mt 20.20-28*

<sup>35</sup> Eropi Santiago, Ñũ mera Jesu pohrogã ejarã erã gamerire serẽñorã ĩḡure. Erã Zebedeo porã árĩñorã. Eropirã õpa arĩñorã:

—Buhegu, gũa serẽro dopa ta guare iique mũhũ, arĩñorã erã Jesure.

<sup>36</sup> —¿Yũhũ duhpiicũ gahmeri mũa? arĩpũ Jesu erãre.

<sup>37</sup> —Mũhũ árĩpehrerã wecague opũ árĩḡũ guare mũ waĩ mera dorerã acunque. Yujugũre mũ diayerũ, gajigũre copũ doboque guare. Mũ mera oparã gũa árĩboro dopa iique, arĩ serẽñorã erã Jesure.

<sup>38</sup> Erã eroparĩcũ peegũ õpa arĩ werepũ Jesu:

—Mũa ñero tariboro masibiriquererã õpa arĩ serẽa mũa yũre. ¿Dohpaguere yũ ñero tariboro dopa ta mũa sã ñero tarirã yujuro bojebocuri mũa? ¿Yũre erã ñero iiboro dopa mũa sãre ñero iicũ yujuro bojemasibocuri mũa? arĩ serẽpipũ Jesu erãre.

<sup>39</sup> —Yujuro bojerãca, arĩ yũhriñorã.

Erã eroparĩcũ Jesu õpa arĩ werepũ:

—Yũ ñero tariboro dopa ta mũa sã ñero tarirãca. <sup>40</sup> Eropa mũa tarimorã árĩquerecũ ta, yũ mera doremorãre beyemasibeaa yũhũ. Irire yũhũ Pagũ amutuhami. Eropirã ĩḡu beyenirã dihta yũ diayerũ yũ copũ doarãcoma, arĩpũ Jesu.



<sup>41</sup> Santiago, Ñu sã erã oparã árĩburire Jesure serêcũ gajirã diez buherã peerã, erã mera guañorã. <sup>42</sup> Erã eropa guacũ ïagu, Jesu ïgu buherãre sihu gameneo òpa arĩpũ: —Goãmure masibirã oparãpũ erã masare dorerã, pũriro mera dorema. <sup>43</sup> Mũapũ ne eropa iisome mũa basi. Mũa mera majagu opũ árĩdiagũ, árĩpehrerã ïgu mera majarãre itamugu árĩporo. <sup>44</sup> Eropigu árĩpehrerãre doregu árĩdiagũ, erã pohro majagu árĩro dopa ta árĩporo. <sup>45</sup> Eropa árĩgu tĩaa yũ sã. Masare dorebiragu arigu iibiribũ. Yũhũ masũ Goãmũ ïgu obeodigu árĩqueregu ta, i yebaguere masare itamugu arigu iibũ. Eropigu masa bajarã erã ñero iira dipuwajare sĩribasagu arigu iibũ. Eropigu erã peamegue wabonirãre taugu arigu iibũ, arĩpũ Jesu erãre.

*Bartimeore, cuiiri ïhajabigũre ïacũ iĩñumi Jesu*  
Mt 20.29-34; Lc 18.35-43

<sup>46</sup> Eropi erã Jericógue ejañorã. Eropirã iri macague árĩnirã Jesu ïgu buherã masa bajarã mera wañorã. Jesu wari maha tũrogue yujugu masũ cuiiri ïhajabigu doapũ. ïgu Bartimeo waĩcũgu Timeo magũ arĩpũ. ïgu ma tũrogue doagu umũri nũcũ masare niyerure serẽmũripũ. <sup>47</sup> Eropigu ero doanijagu masa “Jesu Nazare majagu ahrimi,” erã arĩcũ peepũ. Eropa peenijagu òpa arĩ gaguiniguipũ:

—Jesu, opũ Davi mũrũ pãrami masare taubu mojomoro ïaque yũre, arĩ gaguiniguipũ Jesure.

<sup>48</sup> ïgu eropa arĩ gaguiniguicũ peerã masa bajarã Bartimeore “Ejarimaricãque,” arĩ turiñorã. Erã eropa arĩ turiquerecũ, ïgũpũ ïgu ero core ïgu gaguiniguiddiro tauro gaguiniguipũ daja.

—Jesu, opũ Davi mũrũ pãrami masare taubu mojomoro ïaque yũre, arĩ gaguiniguipũ daja.

<sup>49</sup> ïgu eroparĩcũ peegu Jesupũ dujanũgaja:

—Sihubeoque ïgũre, arĩpũ. ïgu eroparĩcũ peerã erãpũ ïgu cuiiri ïhajabigũre sihugãñorã.

—Mucubirique. Wahgãñũgajaque. ïgu mũre sihumi, arĩñorã erã ïgũre Bartimeore.

<sup>50</sup> Erã eroparĩcũ peegu ïgu omasiariñere tuweapi, buhri tarimagã Jesu pohrogue ejanũgajapũ. <sup>51</sup> Eropigu Jesu serẽpipũ ïgũre:

—¿Dohpa yũhũ mũre iicũ gahmeri mũhũ? arĩ serẽpipũ Jesu ïgũre.

—Yũ opũ, yũre cuiiri ïacũ iique, arĩpũ ïgu cuiiri ïhajabigũpũ.

<sup>52</sup> —Mũ yũre umupeonijagu òagu wahaa. Eropigu wanisa, arĩpũ Jesu ïgũre.

ïgu eroparĩcũ ta cuiiri ïhajabigu òaro ïha wapũ. Òagu wanijagu Jesu mera mague nũrsia wahgã wapũ.

## 11

*Jerusaléngue ejañumi Jesu*  
Mt 21.1-11; Lc 19.28-40; Jn 12.12-19

<sup>1</sup> Eropii erã Jerusaléngue ejaboro coregã, Betfagé maca pohrogã, Betania maca pohrogã ejamũhtañorã. Iri macari ãtãgu Olivo waĩcũdigũ gubuye árĩyoro. Eroque ejagu perãre ïgu buherãre Jesu obeogu òpa arĩpũ:

<sup>2</sup> —Si macague waque. Eroque ejarã mata burrogãre erã dirinugudigũgãre bocajarãca. Gajirã erã peyaya marigu arĩcumi. ïgũre bocaia ïgũre diriradarire pãa yũre aĩgãribasaque. <sup>3</sup> Mũa eropiicũ ïagu burrogã opũ “¿Duhpimorã burrogãre pãri?” ïgu arĩcũ peerã òpa arĩ yũhrique ïgũre: “Mari tĩgu burrogãre gamebeoniami dohpa. Eropigu dohparagã wiagũcumi ïgũre,” arĩ wereque ïgũre, arĩ weredore obeopũ ïgu buherã perãre.



<sup>4</sup> Īḡu dorebeonirā waha, wihi pohro áriri mare burrogāre disiporo erā dirin-ugudigugāre bocañañorā. Bocaña ĩḡure erā diriradarire pāñorā. <sup>5</sup> Eropirā ĩḡure erā pācũ ĩarā ero niguinirā serēpiñorā:

—¿Duhpimorā m̄a diriradarire pāri burrogāre? arī serēpiñorā.

<sup>6</sup> Erā eroparĩcũ peerā erāp̄u Jesu ĩḡu arĩdiro dopa ta wereñorā erāre serēpirāre. Erā eropa arī werecũ peerā erā ero niguinirāp̄u “Aĩḡāque,” arĩñorā erāre. <sup>7</sup> Eropirā erā burrogāre Jesu pohroque aĩḡā wañorā. Erā aĩ ejara p̄hr̄u suhri ĩḡugā weca erā peotuhacũ ĩaḡu Jesup̄u ĩḡugā wecague m̄aribejap̄u wabu. <sup>8</sup> Eropirā masa bajarā erā peyari suhrire tuwea aĩ ĩḡu wari maha deco sēopi m̄htañorā Jesure umupeorā. Gajirāp̄u p̄uric̄ari d̄p̄urire poerigue erā aĩḡārira d̄p̄urire apim̄htañorā “Ōari maha árĩporo,” arĩrā.

<sup>9</sup> Eropirā ĩḡu core warā, ĩḡu p̄hr̄u arirā sã õpa arī gaguiniñorā:

—Īre umupeorā. Ihĩ Goām̄u ĩḡu obeodiḡu õaro ariporo. <sup>10</sup> Mari ñec̄u Davi m̄r̄u op̄u ĩḡu arĩdiro dopa ta õaro ariporo. “Ūmaro majaḡu turaḡu āhrimi,” arī umupeorā, arī gaguiniñorā erā.

<sup>11</sup> Eropiḡu Jesu Jerusaléngue ejap̄u. Ejaḡu Goām̄u ya wihigue ñajajaḡu, iri wihi majare árĩpehr̄erire ĩapehocāp̄u. ĩatuhaja “Ñamicague āhraa. Ūm̄ñarigā ta āhraa. Ina warā,” arĩp̄u Jesu. ĩḡu buherā mera Betaniague waha wañorā.

### *Jesu higeraḡu waĩc̄udiḡure s̄iridoreñumi*

*Mt 21.18-19*

<sup>12</sup> Eropi gajin̄u erā Betaniague árĩnirā Jerusaléngue dujariñorā daja. Eropa dujaricũ Jesup̄u oaboa wap̄u. Eropa oaboaḡu yoarogue niguidiḡure higeraḡure õaro p̄uric̄udiḡure ĩanijaḡu iriḡu d̄ucare amaḡu warip̄u. <sup>13</sup> D̄uca mariyoro. D̄ucac̄ur̄isub̄u árĩbiriya. P̄uri dihta opayoro. <sup>14</sup> Eropiḡu d̄uca maricũ ĩaḡu õpa arĩp̄u:

—Iriḡu d̄ucare masa ne dipaturi babiricāporo. Ne d̄ucac̄ubiricāporo, arĩp̄u Jesu.

Īḡu eroparĩcũ ĩḡu buherāp̄u peeñorā.

### *Jesu Goām̄u wihire Goām̄u mera wereniḡuri wihire iidoreñumi*

*Mt 21.12-17; Lc 19.45-48; Jn 2.13-22*

<sup>15</sup> ĩḡu eropiira p̄hr̄u erā Jerusaléngue erañorā. Eraḡu Jesu Goām̄u ya wihigue ñajap̄u daja. Ñajajaḡu doberi duarāre, as̄urāre bocajaḡu cohã wiucāp̄u. Eropiḡu niyerure game gohroto doarā ya mesarire yomemuju aĩ mehpi behom̄urip̄u. Bujare duarā erā doari p̄erori sãre eropa ta ĩp̄u. <sup>16</sup> Eropiḡu Jesu Goām̄u wihiguere gajinore aĩ ñajadorebirip̄u masare. <sup>17</sup> Eropiḡu Jesu õpa arī buhep̄u erāre:

—Ōpa āhraa Goām̄u yare erā gojarap̄uḡue: “Yaha wihi Goām̄u mera wereniḡuri wihi waĩc̄uroca. Eropi arĩpehr̄ero majarāgue ȳu mera erā wereniḡuri wihi árĩroca,” arī gojañuma Goām̄u wereniḡurire. Goām̄u eropa arĩquer̄ecũ ta, m̄ar̄u ĩ wihire Goām̄u wihire duadoarā bu game yajarā ĩaa, arĩp̄u Jesu erāre.

<sup>18</sup> ĩḡu eropa arī buhecũ árĩpehr̄erā masap̄u pee ũcapehrea wañorā. Eropirā pahia oparā, judio masare buherā mera ĩḡure güi árĩñorā. Eropirā erā ĩḡure wejēburire guñamaañorā. <sup>19</sup> Erā eropiicũ ñamicague Jesu ĩḡu buherā mera iri maca árĩnirā waha wañorā.

### *Higeraḡu s̄iria wayoro*

*Mt 21.20-22*

<sup>20</sup> Eropirā boyo dijaricũ maḡue majarirā higeraḡure ĩañorā daja. Iriḡu nugurigue s̄irin̄uga s̄iriadiḡu arĩcũ ĩañorā. <sup>21</sup> Iriḡure ĩaḡu Pedrop̄u õpa arĩp̄u:

—Buheḡu, ĩaque. Iriḡu higeraḡup̄u m̄ s̄iridorediḡup̄u s̄iria waya, arĩp̄u Pedro.

<sup>22</sup> ĩḡu eroparĩcũ Jesu werep̄u erāre:

—Goãmure umupeoturaque mua. <sup>23</sup> Diaye arĩgu tiiaa mware. Mua Goãmure ðaro umupeori mera irigu utãgure “Dua aĩ wuariyague cóãdigu árĩporo,” mua Goãmure arĩcũ, mua arĩdiro dopa ta waroca. “Yu serẽro dopa diaye ta eropa iigucumi,” mua arĩ guñacũ, “Goãmũ iisome,” arĩbiricũ, mua serẽdiro dopa ta Goãmũ iigucumi. <sup>24</sup> Eropigu irire weregura mware. Goãmũ mera wereniguirã, igure serẽrã, “Yu serẽro dopa ta eropa waroca yure,” arĩ guñaque. Mua eropiicũ ãagu Goãmũ mua serẽrire ogucumi. <sup>25</sup> Eropirã Goãmure mua serẽboro core gajirãre erã mware erã ñero iirare cãdijique. Gajirã erã ñero iicũ mua guarare duhuque. Mua eropiicũ ãagu mari Pagu umaro majagu mua ñero iirare igu sã cãdijigucumi. <sup>26</sup> Mware ñero iirare mua cãdijibiricũ igu sã mua ñero iirare cãdijisome, arĩpu Jesu erãre.

*Jesure doredigure igure serẽpiñuma pahia oparã, judio masare buherã, murã mera Mt 21.23-27; Lc 20.1-8*

<sup>27</sup> Igu eropa arĩra puhru erã Jerusalengue wañorã daja. Eropirã Jesu Goãmũ wihigue igu curicũ ãarã, pahia oparã, judio masare buherã, murã mera igu pohrogue erarã igure serẽpiñorã:

<sup>28</sup> —¿Noa doreri mera irinore igu iiri muhu? ¿Noa mure Goãmũ wihi duanirãre cóãdoreari? arĩ serẽpiñorã erã Jesure.

<sup>29</sup> Erã eroparicũ Jesu yuhripu:

—Murãre serẽpimuhtagura. Òaro mua yuhricũ yu sã mware yuhrigura. <sup>30</sup> ¿Ñu masare igu waĩyecũ noano igure waĩyedoremuriyuri mua pepicũ? ¿O Goãmũ doreyuri? ¿O masapu doremuriyuri mua pepicũ? Yure wereque, arĩpu Jesu erãre.

<sup>31</sup> Igu eroparicũ peerã erãpu erã basi game ðpa arĩ wereniguiñorã:

—¿Dohpa arĩ yuhrirãcuri mari? “Goãmũ Ñure doredigu árĩñumi,” mari arĩcũ, “¿Goãmũ Ñure igu dorequerecũ ta duhpirã igu wererare peebirari murãpu?” arĩbocumi Jesu marire. <sup>32</sup> Oã masapu “Diaye ta Ñu Goãmũ yare weremuhadigũ árĩmi,” arĩ pepima erã. Erã eropa pepirã, “Ñu igu waĩyecũ Goãmũpu igure doredigu arĩbirĩñumi,” mari arĩcũ, masapu mari mera guarãcoma, arĩñorã erã basi.

<sup>33</sup> Eropirã erã Jesure ðpa arĩ yuhriñorã:

—Ñure waĩyedoredigure gua masibea, arĩñorã erã Jesure.

Erã eroparicũ ðpa arĩpu Jesu.

—Irisubu tamerare yu sã mua serẽpirare werebeaa mware. Yu iirire iidoredigure werebeaa mware, arĩpu Jesu erãre.

## 12

*Ñerã mohme corerã iira queorire wereñumi Jesu buhebu Mt 21.33-46; Lc 20.9-19*

<sup>1</sup> Eropi Jesu queori mera buhenugapu daja erãre.

—Yeba opu árĩñumi. Iri yebare igu ya iguidarire oteñumi. Otetuha sãrirore nugu, iguire erã cuhra bujuburi gobere seañumi. Pohe decogue umari wihigã sãre iĩñumi ãhadibuma ðaro. Eropigu gajirãre igu ya pohe deco mera apiñumi erã mohme corera waja. Eropigu iri pohere erãre mohme coredoretuhaja gaji yebague waha wañumi igu. <sup>2</sup> Puhru igui ñirisubu arĩcũ pohe opu igu pohro majagure igu ya pohe mohme corerã pohrogue obeoriñumi. Pohe maja igu ya oteri ducare igu ya sero maja ducare aĩdoregu obeoriñumi igure. <sup>3</sup> Eropirã pohere mohme corerãpu igu pohro majagure ñeha pañuma. Eropiituha igu ya igui tõrire obiriquererã dujadoreñuma igure. <sup>4</sup> Eropigu pohe opu gajigu igu pohro majagure obeoriñumi daja. Eropirã pohere mohme corerãpu igure igu dipurure cami moa ñero iĩñuma igu sãre. <sup>5</sup> Gajigu

ĭgu pohro majagure obeocũ ĭgupure wejẽcãñuma. Gajirã sãre bajarãre eropa dihta iĩñuma. Gajirãre pa gajirãre wejẽñuma erã.

<sup>6</sup> Eropigu pohe opu magu dihta duhyañumi. ĭgu ta ĭgu magu ĭgu mahigu arĩñumi. Eropigu ĭgu magure obeoñumi pare erã pohrogue, “Yu magupure umupeorãcoma,” arĩgu. <sup>7</sup> ĭgu õpa arĩ pepiquerecũ, erã pohere corerãpu ĭgu magu aricũ ĭha, õpa arĩ wereniguĩñuma: “Pohe opu magu aħrimi. ĭgure wejẽcãrã mari. Eropiro i pohe mari ya pohe dujaroca,” arĩ wereniguĩñuma erã erã basi. <sup>8</sup> Eropa arĩrã ĭgure ñeha wejẽ, pohe turogue aĩgã cóãcãñuma erã ĭgure, arĩpu Jesu erãre.

Eropa arĩtuhaja Jesu erãre serẽpipu:

<sup>9</sup> —Ne, ¿pohe opu dujarigu dohpa iigucuri ĭgu ya pohere mohme corerãre? arĩpu Jesu. Õpa iigucumi erãre, arĩpu. ĭgu erãre wejẽ gajirãpуре pohere mohmedoregucumi, arĩpu Jesu erãre. <sup>10-11</sup> ¿Goãmũ yare erã gojarapũgue õpa arĩrire irire buhebiriri mua? Õpa arĩ gojañuma:

Ihĩ Cristo utãye iro dopa aħrimi. Masa Cristore gamebirãcoma. Erã gamebiriqerecũ Goãmũ ĭgure beye opu acumi. Goãmupu ire iimi. ĭgu eropa iicũ ĭarã “Õataria,” arĩ pepia mari, arĩ gojañuma iribojegure. ¿Irire ne buhebiriri mua? arĩpu Jesu erãre.

<sup>12</sup> ĭgu eroparĩcũ peerã pahia oparã, judio masare buherã, murã mera õpa arĩ pepiñorã: “Jesu i queorire weregu ‘Erã ñerã mohme corerã iro dopa aħrima,’ marire arĩ weresãgu iicumi,” arĩ pepiñorã. Eropa arĩ pepirã Jesure ñeadiariñorã. Eropa ñeadiquererã, masapu Jesure gamerã mari mera guari, arĩrã masare gui arĩñorã. Eropa guirã ĭgure cohãgã wañorã.

*Fariseo masa, Herode ya curu majarã mera gobierno maja wajayerire serẽpiñuma Jesure*

*Mt 22.15-22; Lc 20.20-26*

<sup>13</sup> Waha, erã mera majarãre yujurãyerire fariseo masare, Herode ya curu majarã sãre Jesure serẽpiñadore obeoñorã daja. Erã Jesure baja serẽpiri mera ĭgu gajiropa yuħricũ weresãmorã iiriñorã. <sup>14</sup> Eropirã Jesu pohro eja ĭgure serẽpiñorã:

—Buhegu, diaye mũ wereniguigu guyarire marigu mũ arĩcũ masia gu. Eropigu opu arĩcũ sãre bu arĩgu ĭgu arĩcũ sãre mũhu yujuropa ĭhaa. Eropigu Goãmũ yare diaye mũhu werea. Masa suacũ sãre erã suabiricũ sãre queoro werea. Eropigu guare wereque: ¿Roma majagu arĩpehrerã tauro opu arĩgure, gobierno majare marire wajayero gahmeri mũ pepicũ? ¿Mari doreripu wajayedoreri mũ pepicũ? arĩ serẽpiñorã erã Jesure.

<sup>15</sup> Erã eropa arĩ serẽpicũ peegu erã guyarire erã ñero iidiarire masigu õpa arĩ yuħripu erãre:

—¿Duhpirã yu ñero wereniguicũ peediari mua? Dohparagã niyerusere aĩgãrique irisere ĭamorã, arĩpu Jesu erãre.

<sup>16</sup> ĭgu eroparĩcũ peerã yujuse niyerusere aĩgãriñorã. Erã irisere aĩ eracũ ĭagu Jesu serẽpipu erãre:

—¿Nihino gohra masu tuhyari isere? ¿Noa waĩ tuhyari isere? arĩ serẽpipu ĭgu.

—César waĩcugu masa tauro opu masu ĭgu waĩ sã tuhyaa irisegue, arĩ yuħriñorã erã.

<sup>17</sup> Erã eroparĩcũ Jesu werepu erãre:

—Irisubu tamerare masa tauro opu arĩgu yare ĭgure oque. Goãmũ yare Goãmupure oque, arĩpu Jesu. ĭgu eroparĩcũ pee uca wañorã.

*Saduceo masa Goãmũ ĭgu sĩrinirã masurire serẽpiñuma Jesure*

*Mt 22.23-33; Lc 20.27-40*

<sup>18</sup> Eropi yujurāyeri Saduceo masa Jesu pohroguere erañorã. Saduceo masapũ “Goãmũ sīrinirãre masusome,” arĩ pepirã áriñorã. <sup>19</sup> Eropirã erã õpa arĩñorã Jesure: —Buhegu, marire õpa arĩ gojadigũ árĩmi Moise: “Yujugũ ĩgu tĩgu marapocũgu porã mariqueregu ĩgu sīricũ ĩagu, ĩgu pagũ magũre ĩgu tĩgu marapo árĩdigore marapocũro gahmea. Eropigu ĩgu tĩgu mũru ĩgu tĩgu ĩgu porãcũbodiropã dopa ta porãcũro gahmea ĩgu pagũ magũre. Eropirã ĩgu tĩgu mũru porã iro dopa árĩrãcoma,” arĩdi árĩmi Moise, arĩñorã.

<sup>20</sup> Ire erã arĩtuhaja i queorire werenemoñorã Jesure.

—Yujugũ porã siete árĩñorã. Eropii erã tĩgũpũ marapocũ, porã marigu ta sīria wapũ. <sup>21</sup> Eropigu gajigu ĩgu pagũ magũ sã ĩgu tĩgu mũru marapo árĩdigore marapocũpũ. ĩgu eropa marapocũra pũhrũ ĩgu sã ĩgu tĩgu mũru iro dopa ta porã mariqueregu ta sīria wapũ. Eropigu ĩgu pagũ magũ ĩgu ĩgu mũru iro dopa porã mariqueregu ta sīria wapũ. <sup>22</sup> Eropã dihta wañorã yujugũ porã. Ne porã mariquererã sīripehrea wañorã. Erã marapo sã erã pũhrũ sīria wapo pare, erã arĩtuhaja Jesure serẽpiñañorã. <sup>23</sup> ¿Ne, Goãmũ árĩpehorerã sīrinirãre ĩgu masucũ nihino marapo gohra árĩgocuri igo? Erã árĩpehorerã igore marapocũnirã árĩñorã. ¿Eropigo nihino marapopũ árĩgocuri igo? arĩ serẽpiñorã erã Jesure.

<sup>24</sup> Jesu yũhripũ erãre:

—Goãmũ yare erã gojarapũ wereniguirire ne masibea mũa. Eropirã Goãmũ ĩgu turari sãre ne masibea mũa, arĩpũ Jesu. Eropiro mũa pepiripũ diaye árĩbeaa. <sup>25</sup> Sīrinirã mũra erã masa mũriara pũhrũ erã anyua iro dopa ãhrima. Erã ũama nome mera marapocũbeama eroguerẽ. <sup>26</sup> Sīrinirã erã masa mũriaboropũre mũare weregũra, arĩpũ Jesu. Irire Moise õaro werepehocãñumi. Iri yucũgũgãgue ãjurisubũ árĩgu Goãmũ õpa wereñumi Moiserẽ: “Yũhũ Abrahã, Isaa, Jacobo, erã opũ ãhraa,” arĩ wereñumi Goãmũ iribojegue. <sup>27</sup> Erã sīrira pũhrũgue “Erã opũ ta ãhraa,” arĩ wereñumi Goãmũ. Eropirã erã sīrinirã mũra ĩgu masunirã árĩrã erã ojocarirã ãhrima. Eropirã “Sīrinirã masasome,” arĩ pepirã diaye pepibeaa mũa, arĩpũ Jesu erãre.

### *Õatariariñere doreriñere wereñumi Jesu*

#### *Mt 22.34-40*

<sup>28</sup> Eropigu yujugũ judio masa erã buherã mera majagu erã pohrogue eraa, erã game werenigũicũ peepũ. Jesu ĩgu õaro yũhririre peegu serẽpipũ ĩgũre.

—¿Goãmũ ya doreri õatariaro doreripũ diñe doreripũ ãhriri mũ pepicũre? arĩ serẽpipũ ĩgu Jesure.

<sup>29</sup> Jesu ĩgũre yũhripũ:

—Iñe doreriñe õatariariñe õpa ãhraa. “Israe masa peeque. Goãmũ mari Opũ yujugũ ta ãhrimi. <sup>30</sup> Bũrigã mũa sīporã mera, mũa turari mera, mũa õaro guñari mera Goãmũre mũa Opũre mahique,” arĩmi Goãmũ. <sup>31</sup> Iñe doreriñe pũhrũ gajĩ doreriñe sã õataria. “Mũ basi mahiro dopa ta mũ pohro árĩrã sãre mahique,” arĩmi Goãmũ. Iri pe doreri ta árĩpehoreri gajĩ doreri tauro ãhraa, arĩ werepũ Jesu ĩgũre.

<sup>32</sup> ĩgu eroparĩcũ judio masare buhegu õpa arĩ yũhripũ:

—Eropa ta ãhraa, buhegu. Diaye ta arãa mũhũ. Goãmũ yujugũ ta ãhrimi. Gajigu ĩgu iro dopa árĩgu marimi. Mũ arĩri diaye ta ãhraa. Goãmũre turaro mari sīporã mera, mari turari mera, mari pepiri mera, mari õaro guñari mera ĩgũre mahiro gahmea. Mari pohro árĩrãre mari basi mari mahiro dopa ta, erã sãre mahiro gahmea marire. <sup>33</sup> Mari Goãmũre umupeomorã waimũrã wejẽ soemujucũ õapũrica. I tauro Goãmũre masa sãre mari mahicũ õataria, arĩpũ ĩgu Jesure.

<sup>34</sup> ĩgu pee masiri mera yũhricũ ĩha Jesu ĩgũre arĩpũ:

—Merogã dũhyaa mũre Goãmũ mũ opũre mũ masiboro, arĩpũ Jesu ĩgũre.

Īgure eroparīcū gajirā peerā ĭgure güirā serēpinemodiabiriñorā pare.

*¿Noano acaweregū āhriri Cristo? serēpi ĭañumi Jesu masare*

*Mt 22.41-46; Lc 20.41-44*

<sup>35</sup> Eropigū Goāmū wihigue buhegū ōpa arīpū Jesu:

—“Cristo Davi mūrū pārami arigūcumī,” arī buhema marire buherā. ¿Duhpirā eropa arī buheri erā? Erā ōaro masiboro duhyania erāre dohpa. <sup>36</sup> Davi ĭgū basi Espīritu Santo ĭgure dorero dopa ta ōpa arī wereñumi:

Goāmū yū opūre ōpa arāmi. “Ohō yū diayerū yū mera dorebu doaque. Eropigū mūre ĭhaturirāre mūre tarinūgabasagūca yūhū,” arīmi Goāmū yū opūre, arī gojañumi Davi mūrū.

<sup>37</sup> Eropā arī gojagū Davi mūrū opūcūpū Cristore “Yū opū,” arīgū. Cristo Davi mūrū opū āhrimi. Eropigū Davi mūrū Cristo ñecu árīqueregū opūcūñumi Cristore, arī werepū Jesu.

Īgū eropa arī buhecū bajarā masa mucubiriri mera peeñorā ĭgure.

*Jesu masare buherā erā ñero iirire wereñumi*

*Mt 23.1-36; Lc 11.37-54; 20.45-47*

<sup>38</sup> Eropigū ĭgū buhenemogū ōpa arīpū:

—Masare buherā erā ñero iirire ōaro ĭaque. Eropirā erā iiro dopa iibiricāque. Erā yoari suhri saña erā masa erā ĭhabeoro cuhrima. Doberi duarogue gajirā umupeori mera erāre bocatīri serēcū gahmema erā. <sup>39</sup> Eropirā mari buheri wiriguere ōari doari dihtare doadiama. Eropirā bosenūri árīcū sāre oparā erā doari dihtare gahmema erā. <sup>40</sup> Eropirā erā wapeweyarā nome erā wajamocū ĭha erā ya wirire emacāma erā nomere. Eropa erāre mojomoro ĭabiriquererā erā masa ĭhurore yoari boje Goāmūre serēma, “Gūa Goāmūre ōaro umupeoa,” arī gūyarā. Erā eropa iira dipuwaja gajirā tauro dipuwaja moagūcumī erāre, arīpū Jesu erāre.

*Wapeweyo Goāmūre igo apirare wereñumi Jesu*

*Lc 21.1-4*

<sup>41</sup> Eropigū Jesu Goāmū wihi maja erā amuburi niyeru gameneori comoro pohro doapū. Ero masa erā niyeru sácū ĭapū. Doberi oparā iri comorogue niyeru pagari sāa tari wahgāmūriñorā. <sup>42</sup> Eropigo wapeweyo būro iri comorogue ahri pesegā sāpo. Pese yuju centavo maja āhraa. <sup>43</sup> Iriserire igo apicū ĭagu Jesu ĭgū buherāre sihubeo arīpū:

—Diaye arīgū iiaa mūare. Igo wapeweyo mojomorocūgo niyeru sāri comorogue igo yare sāgo gajirā árīpehrerā erā sādiro tauro sāmo igo. <sup>44</sup> Gajirā doberi oparā erā wūaro oquerecū ta erā ya wūaro duhyaa. Igo pū mojomorocūgo árīquerego ta, árīpehreri igo bari asūborare Goāmū ya árīburire opehocāmo, arīpū Jesu.

## 13

*—Goāmū wihi cóāsūroca, arī yuñumi Jesu*

*Mt 24.1-2; Lc 21.5-6*

<sup>1</sup> Eropigū Goāmū wihiguere erā wiriacū ĭagu yujugū erā buherā mera majagū ōpa arīpū:

—Buhegū, ĭaque. I wihi Goāmū wihi maja wiri utā mera erā iira wiri ōari wiri āhraa, arīpū ĭgū.

<sup>2</sup> Īgū eroparīcū Jesu werepū erāre:

—I wihi maja wiri dohpaguere ĭaraa mūa. I wihi árīpehreri mari ĭara i utā sā cohmopehrea waroca. Ne yujuye utāye dujasome iri wiri maja, arīpū Jesu.



*I mũmũ pehrebore wereñumi*  
*Mt 24.3-28; Lc 21.7-24; 17.22-24*

<sup>3</sup> Eropi Jesu Olivo waĩcudigu ıtãgugue Goãmũ wihi diaye maja árĩdigugue ejaꝑũ. Ero doapũ. Ero Pedro, Santiago, Ñu, Andre mera erã seyaro árĩrã, erã ïgũre serẽpiñorã:

<sup>4</sup> —Wereque gũare. ¿Dohpárĩcũ eropa warocuri mũ arĩdiro dopa waro? ¿Pehreburinũ coregãre dohpa wanugacũ ïarãcuri gũa? arĩ serẽpiñorã erã Jesure.

<sup>5</sup> Jesu yũhriꝑũ:

—Ōaro ii yuque mũa. Eropirã gajirã erã gũyarire peebiricãque mũa. <sup>6</sup> Bajarã masa “Cristo ãhraa yũhũ,” arĩ gũyarã árĩrãcoma. Erã eropa gũyacũ peerã masa bajarã Goãmũ yare duhurãcoma.

<sup>7</sup> Mũa pohrogã gajirã masa erã gamewejẽcũ peerãca. Eropirã yoarogue majarã erã sã erã gamewejẽcũ peeborãca mũa. Eropa peequererã ta ne irire wũaro bũjawere pepibiricãque. Eropa wamũhtaroca. Eropa wacũ pehreburinũ dũhyaniroca dohpa.

<sup>8</sup> Irisubure yuju yeba majarã gaji yeba majarã mera gamewejẽrãcoma. Eropirã yujugũ opũ yarã gajigũ opũ yarã mera gamewejẽrãcoma. Eropiro bajasuburi i yeba ñohmeroca. Eropirã bajarã masa oa mera sĩrirãcoma. Eropa ñero tariquerecũ i yeba majarãre tauro erã ñero tariboro dũhyaa dohpa. Ñero tarinirãcoma dohpa.

<sup>9</sup> Ōpa wacũ ïarã mũa basi ōaro iique. Gajirã mũare ñeha ñero iidorerã orãcoma gajirã oparãre. Eropirã mũa acawererã judio masa erã buheri wirigue sãre mũare parãcoma. Eropirã macari majarã oparã pohrogue, erã tauro oparã pohrogue sãre aĩgãrãcoma mũare mũare dipuwaja moamorã. Eropirã erã mũare erã pohrogue aĩgãcũ yaha buherire wererãca mũa erã sãre. <sup>10</sup> Eropiro pehrerinũ árĩboro core árĩpehrerãre ōari buherire weresũroca. <sup>11</sup> Eropirã mũare dipuwaja moadorerã erã oparã pohrogue erã aĩgãcũ, erã oparãre mũa wereniguiburire wũaro pepibiricãque. Mũare erã serẽpicũ mũa yũhriburire Goãmũ mera masirãca. Eropa masirã mũa gamero wereniguisme mũa. Espĩritu Santopũ mũare wereniguicũ iigũcumi. <sup>12</sup> Irisubure erã tĩrã erã pagũ porãre Jesu yarã erã árĩcũ ïha erãre wejẽdorerã oparãre wiarãcoma. Gajigupũ ïgũ tĩgũre wejẽdoregũ oparãre wiagũcumi. Eropi erã pagũ sũmarã erã porã Jesu yarã erã árĩcũ ïha erãre wejẽdoregũ oparãre wiarãcoma. Eropirã erã porãpũ erã pagũ sũmarãre erã Jesu yarã árĩcũ ïha wejẽdorerã wiarãcoma erã oparãre. <sup>13</sup> Yũre mũa umupeora dipuwaja mũare masa árĩpehrerã ïhaturirãcoma. Eropa mũare erã ñero iiquerecũ ta, mũare erã ñero iirare yujuro bojerã, yũre duhubiricũ Goãmũ mũare taugũcumi. Eropigũ ïgũ pohrogue mũare opagũcumi.

<sup>14</sup> “Eropirã ñetariagũre Goãmũ yare goroweogũre ïarãca mũa. Goãmũ wihigue ïgũ niguicũ ïarãca. Ero ïgũre árĩbiricãro gahmea. Iribojegue Goãmũ yare weremũhtayugũ Daniel ïgũre were gojañumi. (Irire buhegũ peeporo). Ero ïgũ niguicũ ïarã Judea yebague árĩrãpũ ıtã yucũgue oma duhriã waporo. <sup>15</sup> Irisubure masa ñero tarirãcoma. Eropirã yojaro mera waporo. Irisubure erã wiri weca maja pũurigue árĩrã wihi pohecaguere erã yare aĩrã wabiricãporo. <sup>16</sup> Eropirã irisubure gajirã erã poerigue árĩrã erã ya suhrire wihigue árĩri suhrire aĩrã dujabiricãporo. <sup>17</sup> Irisubure nijiposã nome, erã porã mihrirãre oparã nome sã mojomorocũrã nome dujarãcoma. <sup>18</sup> Eropirã ōpa serẽque Goãmũre: “Puhiró árĩcũ eropa wabiricãporo,” arĩ serẽque ïgũre. <sup>19</sup> Irinũrire masa ñero tarirãcoma. I yebare ïgũ ïhacũnugura pũhrũ masa erã ñero tariri árĩmũriyoro. Iri eropa árĩquerecũ ta árĩpehreri pũriri erã ñero taridiro tauro masa ñetariaro tarirãcoma pehrerinũ coregãre. Eropa ñero erã tarira pũhrũ dipaturi eropa ñero tarisome i yeba pare. <sup>20</sup> Eropigũ Goãmũ i ñero taririnũrire bajamenũrigã árĩcũ iigũcumi. ïgũ eropiibiricũ ne yujugũ masũ

taribiribocumi. Eropigu ïgu beyenirã erã tariborore bajamenurigã ñero taririre apigucumi Goãmũ.

<sup>21</sup> Irisubure gajirãre pee masi ïaque. “Õho ãhrimi Cristo,” erã arĩcũ erãre peebiricãque. “Ero ãhrimi Cristo,” erã arĩcũ sãre peebiricãque. <sup>22</sup> “Cristo ãhraa,” arĩ gũyarã, “Goãmũ yare weremuhtarã ãhraa,” arĩ gũyarã árĩcãrãcoma irisubure. Eropirã Goãmũ ïgu beyenirãre gũyarã erã deyoro moarire ii ïhmurãcoma. Goãmũ yare erã cóacũ iidiarã iirãcoma erã gũyari masa. <sup>23</sup> Ire árĩpehrerire wereyumãhtaa mũare iri eropa waboro core. Eropirã õaro pee masi yuque mũa, arĩpũ Jesu ïgu buherãre.

*Jesu i yebaguere ïgu dujariborore wereñumi*

*Mt 24.29-35, 42-44; Lc 21.25-36*

<sup>24</sup> Eropa arĩtuhagu õpa arĩ werepũ Jesu erãre:

—Irinuri erã ñero tarira pũhrũ, abe umũ majagu, ñami majagu sã boyo duhurãcoma. <sup>25</sup> Erã eropa wacũ, necã dipuru yuhridijariroca. Eropiro umaro maja sã yeba sã bũrigã ñohmeroca. <sup>26</sup> Irisubu ta yũhũ masũ Goãmũ ïgu obeodigu arigũca. Eropiro umarogue yũ turari mera yũ gosesiriri mera umaro maja imica weca i yebaguere yũhũ dujaricũ ïarãcoma masa. <sup>27</sup> Eropigu yaharã anyuare árĩpehrero i yebaguere obeogũra. Eropirã árĩpehrerogue waha yaharãre yũ beyenirãre gameneorãcoma yũ pohroque.

<sup>28</sup> “Higueragu irigu waricũrre ïarã masia mũa. Irigu yucũgu pũricũcũ ïarã, “Bojori merogã duhyaa,” arĩ masia mũa. <sup>29</sup> Eropa ta irigu waro dopa ta masique mũa. I árĩpehreri yũ arĩra iri eropa wacũ ïarã, “Cristo dujariboro merogã duhyaa,” arĩ masique mũa. <sup>30</sup> Diaye ta arĩgu iiaa mũare. Irisubu majarã erã sĩriboro core árĩpehreri yũ arĩdiro dopa waroca. <sup>31</sup> Umaro i yeba sã pehrea waroca. Yũ wereniguiripũ ne pehresome. Árĩpehreri yũ arĩdiro dopa ta eropa waha ojogorocũroca.

<sup>32</sup> “Irinũre yũ dujariburinũre, iri hora sãre ne masibea yũhũ. Anyua sã irire ne masibeamã. Masa sã ne masibeamã. Yũ Pagũ dihta yũ dujariburinũre masimi.

<sup>33</sup> “Mũa sã irinũre masibea. Eropirã õaro guñatura coreque. Goãmũre serẽque. <sup>34</sup> Õpa coreque mũa. I queoriñe mera irire mũare buhegũra. Wihi opũpũ yoarogue ïgu curiro dopa ta ãhraa i. ïgu ïgu waboro coregã ïgu pohro majarãre ïgu wihire coredoremi. Yujurãyerire ïgu mohmerire apimi. Yujugũre wihi disiporo ïhadibudoregũre õaro coredoremi ïgu dujariborore. <sup>35</sup> Eropigu wahãmi. ïgu pohro majarãpũ ïgu dujariburinũre ne masibeamã. ïgu ñamica o ñami deco, cãreña ïgu wererisubu o boyoro ïgu aribocumi. Erã õaro ïhacorebircũ ïgu guñaña mariro arigu erãre carĩrãre bocabocumi. Wihi opũre erã ïgu dujariburinũre erã masibiro dopa ta mũa sã yũ dujariburinũre masibea. Eropirã yũre õaro guña coreque. <sup>36</sup> Guñaña mariro yũ eraborore masirã, õaro guña coreque. Yũ dorerire yahare eropa iiniguirã árĩque. Eropirã yũre õaro coreque. <sup>37</sup> Eropigu mũare yũ arĩro dopa ta árĩpehrerãre eropa arãa. Õaro guña coreque, arĩpũ Jesu ïgu buherãre.

## 14

*Pahia oparã, Judio masare buherã mera Jesure wejẽdiañuma*

*Mt 26.1-5; Lc 22.1-2; Jn 11.45-53*

<sup>1</sup> Eropi irisubure Pascua bosenu core, bũgabiriri pan erã baburinũ core penũ duhyayoro. Irisubure pahia oparã judio masare buherã mera, Jesure gũyari mera erã ñeha erã wejẽburire game wereniguiñorã.

<sup>2</sup> —Bosenu árĩcũ ïgũre ñehabircãrã. Masa gua ïgũre ñeacũ ïarã gua gamenereni-jarã gamequeãbocoma, arĩrã iñorã erã erã basi.

*Nomeo poresuri mera Jesure pipeoñumo*  
*Mt 26.6-13; Jn 12.1-8*

<sup>3</sup> Eropi Jesu sã Betaniague Simo cami boadi ya wihigue árñorã. Iri wihi erã baro watope, yujugo nomeopu alabastro mera iidirure poresuri nardo waĩcari dicadirure aĩrapo. Igo aĩrara wajacuri árĩyoro. Eropigo igo irirure pãgũ Jesu dipuru weca pipeopo. <sup>4</sup> Igo eropiicũ ãarã gajirã ũrugã gua wañorã.

—¿Duhpigo igo eropa iisirimaacãri? <sup>5</sup> Iri poresurire duaboañumo. Irire duago yuju bojori mohmeri waja wajataboañumo. Eropigo iri niyerure mojomorocurãre oboañumo igo, arñorã erã erã basi. Eropirã igore turiñorã.

<sup>6</sup> Erã eroparicũ peegu Jesu erãre werepu:

—¿Duhpirã eropa arĩri igore? Garibobiricãque igore. Igo yure òaro iimo.

<sup>7</sup> Mojomorocurã mua mera eropa árñiguicãrãcoma. Eropirã mua gamero erãre omasia. Yupu i yebare mua mera eropa árñiguicãsome. <sup>8</sup> Igo masiropẽ yure iiamo. Yure erã yaaboro core yu dupure amuyugo poresuri mera sũhumo yure. <sup>9</sup> Eropigu diaye mware arĩgu iiaa. Árĩpehrero i yebaguere, òari buherire erã wereroguere igo òpa iirare wererãcoma. Erã eropa arĩ werecũ peerã masa bajarã igo iirare guñarãcoma.

*Juda Iscariote Jesure ñhaturirãre ñgu ñhmuburire erã mera weretamuñumi*  
*Mt 26.14-16; Lc 22.3-6*

<sup>10</sup> Irisubure Juda Iscariote doce buherã mera majagu pahia oparã pohro waha òpa arĩpu:

—Yuhũ mware weregura Jesu ñgu árĩrore mua ñgure ñeacũ, arĩpu. <sup>11</sup> Eropirã pahia oparã irire peerã mucubiriñorã.

—Mure niyerure orãra, arñorã erã Judare. Eropigu Juda Jesure ñhaturirãre ñgu erãre ñhmuburire corenipu.

*Jesu ñgu buherã mera ñgu baturinu árĩyoro*  
*Mt 26.17-29; Lc 22.7-23; Jn 13.21-30; 1Co 11.23-26*

<sup>12</sup> Bugabiriri panre erã baburinu bosenu árñugarinu árĩyoro. Eropiro ovejare Pascua majagu árĩbure erã wejẽrinu árĩyoro. Irisubure ñgu buherãpu serẽpiñorã Jesure:

—¿Nohonogue Pascua bosenu mari baburire amudoregu obeori mũhu gware? arñorã ñgure.

<sup>13</sup> Erã eroparicũ Jesupu perã ñgu buherã mera majarãre obeopu.

—Jerusalengue waque. Erogue mua ejacũ deco sorobu tuhpeogu mware bocatĩrigucumi. Ñgu bocatĩricũ ñgu mera waque. <sup>14</sup> Eropa warã ñgu sihu ñajari wihigue ejarã, wihi opure òpa arĩque: “ ‘¿Nohogue yuhũ, yu buherã mera Pascua maja barire bagucuri?’ arãmi gua opu,” arĩque wihi opure. <sup>15</sup> Mua eroparicũ peegu umaro maja taribure mari gameri árĩpehreri mera erã amura taribure ñhmugucumi wihi opu. Erogue mari baburire iique, arĩpu Jesu erãre.

<sup>16</sup> Ñgu eroparicũ erã perã ñgu buherã iri macague wañorã. Erã erogue erã ejacũ ñgu arĩdiro dopa ta wayoro. Eropirã erã Pascua arĩcũ baburire amuñorã.

<sup>17</sup> Eropi naidijaririsubu Jesu doce ñgu buherã mera erã bari taribugue eroguerẽ ejarpu. <sup>18</sup> Eropirã erã mesague erã ba doarisubu Jesu erãre werepu:

—Diaye arĩgu iiaa mware. Yujugu mua mera majagu ta yu mera bagu ta yure ñhaturirãre ñhmugucumi, arĩ werepu Jesu erãre.

<sup>19</sup> Ñgu eropa arĩ werecũ peerã erãpu burigã bujowererã ñgure serẽpinugañorã erã yujurãyeri.

—¿Yuhũ ta arĩbocuri mure ñhmubu? arñorã erã Jesure.

<sup>20</sup> —Mua yu doce buherã mera majagu ta ãhrimi ïgu. Yu baripare yu mera yoso bagu ãhrimi yure ïhaturirãre ïhmubu. <sup>21</sup> Iribojegue erã yure arï gojadiro dopa ta yuhũ masu Goãmũ ïgu obeodigu sïriguca. Eropigu yure ïhaturirãre ïhmudigupu ñero tarigucumi. ïgure ïgu masa dehyoabiricũ ðapũricãboya. Ñero taribiriboñumi, arïpu Jesu erãre.

<sup>22</sup> Eropigu Jesu erã mera barisubu panre aï Goãmure “Õhaa,” arï serẽpu. Eropa arïgu ta irire nuha guerepu erãre ðpa arïgu:

—Ire aï baque. I yu dupu ãhraa, arïpu Jesu erãre.

<sup>23</sup> Eropa arïtuha ïgu ihriripare aï, Goãmure “Õhaa,” arï serẽpu. Erãre ïgu ocũ árïpehrerã erã irire ihrïnorã.

<sup>24</sup> —I yu di ãhraa. Bajarã masa erã ñero iirare cóãbu sïriguca. Eropigu yu dire cóãguca. Eropa sïrigu Goãmũ yu Pagu “Masare ðaro iigura,” ïgu arïdiro ii ojogorocuguca. <sup>25</sup> Diaye arïgu iiaa mure. Goãmũ ïgu opu árïrogue mama igui decore yu ihriboro core, ðre igui decore dipaturi ihrinemosome yuhũ, arïpu Jesu erãre.

*Pedro “Jesure masibea,” ïgu arï guyaburiñere wereñumi Jesu*  
*Mt 26.30-35; Lc 22.31-34; Jn 13.36-38*

<sup>26</sup> Eropirã yujuñe erã Goãmũ bayariñere bayatuha, utãgu Olivo waïcudigugue wañorã. <sup>27</sup> Erogue sihu ejagu Jesu erãre werepu:

—Dohpagã ñami mua árïpehrerã yure cóãrãca. Mua yure cóãborore ðpa ta arï gojamuhtañuma Goãmũ yare erã gojarapũgue: “Ovejare ïhadibugure erã wejẽcũ waro dopa ta iiguca. Yu eropa iicũ oveja ïgu yarã ïgure cohãgã warãcoma,” arïmi Goãmũ, arï gojañuma. <sup>28</sup> Eropigu Goãmũ ïgu yure sïridigure masura puhũ, mua core Galileague wamuhtaguca yuhũ, arïpu Jesu erãre.

<sup>29</sup> ïgu eroparicũ peegu Pedro ðpa arïripu:

—Yu mera majarã árïpehrerã erã mure cóãquerecũ yupu mure ne cóãsome, arïpu Pedro ïgure.

<sup>30</sup> Jesu yuhripu:

—Diaye arïgu iiaa mure. Dohpagã ñamire cãreña pesubu ïgu wereboro core, ma uhresubu “Yuhũ Jesure masibea,” arïguca mũhũ, arïpu Jesu ïgure.

<sup>31</sup> ïgu eropa arïquerecũ Pedro ðpa arï turaro busuro yuhripu:

—Mu mera yure erã wejẽquerecũ ta ne mure cóãsome yuhũ, arï yuhripu ïgu Jesure.

Pedro ïgu eroparicũ peerã ïgu mera majarã ïgu arïro dopa ta arïriñorã erã sã.

*Getsemanique Jesu Goãmure serẽñumi*  
*Mt 26.36-46; Lc 22.39-46*

<sup>32</sup> Eropii erã Getsemaní waïcari gorogue wañorã. Erogue ejagu ðpa arïpu Jesu:

—Ohõ doayuque. Mua ohõ doaropẽ sohõgue Goãmure serẽniguigu wagu iiaa, arïpu ïgu buherãre.

<sup>33</sup> Eropa arïtuha Pedrore, Santiagore, Ñure sihgãpu. Eropigu ñero güinugapu Jesu. Eropigu ñero sïporãcupu. <sup>34</sup> Eropa ñero pepigu ïgu mera majarãre ïgu sihgãnirãre arïpu:

—Burigã ñero yu sïporãcuca. Yure turaro pũriro dopa pepica yu. Sohõñari wanigu iiaa. Ohõ dujanique. Eropirã yu mera ta tũyque mua sã, arïpu Jesu erãre.

<sup>35-36</sup> Eropa arïtuha ïgu ero core mero wanemo, yebague mereja, Goãmure arïpu:

—Ahũ, mũhũ árïpehrerire iimasia. Eropigu yu ñero tariburire iidiabigu iibiricãque. Yu eropa arïquerecũ ta yu gamero dopa iibita. Mu basi masia. Mu gamero dopa iique, arï serẽpu ïgu Goãmure.



<sup>37</sup> Eropa arĩtuha Ƴrerã ĩgu buherã pohrogue eranijagu erã carĩ oyarãre ĩapũ. ĩha Pedrore arĩpũ:

—Simo, ¿carĩgu iiri mũhũ? ¿Yuju hora gohra yũ mera tũyutamubirari? <sup>38</sup> Ōaro iique mũa. Mũa pepiri mera ōarire iidiaraa mũa. Mũa seyaro irire iidiaquererã ta irire bocatĩubeaa. Eropirã Goãmũre serēniguicãque ñero mũa iibiriboro dopa, arĩpũ Jesu Pedrore.

<sup>39</sup> Eropa arĩ weretuha dipaturi waha, Goãmũre serēpũ daja. ĩgu ero core ĩgu arĩdiro dopa ta arĩ serēpũ daja. <sup>40</sup> Serētuha dipaturi erã pohrogue dujaripũ daja. Eropa dujarigu carĩ oyarãre ĩapũ daja. Wũja pũritaricãyoro erãre. Eropirã erã Jesu “¿Duhpirã carĩri mũa?” erãre arĩcũ yũhrimasibiriñorã. <sup>41</sup> Eropigu dipaturi ĩgu Goãmũre serēra pũhrũ, erã pohro eraa erãre arĩpũ:

—¿Mũa carĩrã soorã iiri dohpa? Iripēta āhraa. Sihajagãriro iiaa. Dohparagã yũre masũre Goãmũ ĩgu obeodigure ñerãre erã oburisubu sihajaa. <sup>42</sup> Wahgãque. Ina warã. ĩaque. Yũre ĩhaturirãre ĩhmubu ohō ahrimi, arĩpũ Jesu erãre.

*Jesure ĩhaturirã peresu ñeañuma*  
*Mt 26.47-56; Lc 22.47-53; Jn 18.2-11*

<sup>43</sup> ĩgu eropa arĩ wereniguirisubu Juda doce buherã mera majagu erapũ. Eropirã masa bajarã ñoserimijire, yucũre opanirã ĩgu mera yujuro mera erañorã. Erã pahia oparã, judio masare buherã, mũrã sã erã obeonirã árĩñorã. <sup>44</sup> Negohrare Jesure ĩhaturirãre obu, ōpa arĩtuhapũ:

—Yũ ĩgu wayuporãre mimigu ĩgu ta árĩgũcumi mũa ñeabu. ĩgũre yũ mimira pũhrũ ñeaque. Eropirã ĩgũre ōaro ñeaque ĩgu duhribiriboro dopa, arĩ wereserepũ Judapũ erãre.

<sup>45</sup> Eropigu Jesu pohrogue eragu mata wa purumujupũ:

—Buhegu, ¿āhriri mũhũ? arĩ ĩgũre wayuporãre mimipũ.

<sup>46</sup> ĩgu eropiicũ ĩarã erã Jesure ñeañorã.

<sup>47</sup> Erã eropiicũ ĩagu ĩgu pohrogue niguinirã mera majagu ĩgu matamijire tuãwea aĩ, pahia opũ pohro majagũre ĩgu gamirore tabe corocãpũ.

<sup>48</sup> Eropigu Jesu ōpa arĩpũ:

—¿Mũa ñoserimijiri mera, yucũ dũcari mera arirã, yajari masũre iro dopa mũa yũre ñearã arirã iiari? <sup>49</sup> Ūmũri nũcũ Goãmũ wihigue yũhũ mũare buhedoacũ, mũa yũre ne ñeabiribu. Dohpagũre mũa yũre eropa iirã i árĩpehreri Goãmũ yare weremũhtanirã erã arĩ gojadiro dopa ta mũa yũre iiaa, arĩpũ Jesu erãre.

<sup>50</sup> Eropirã Jesu buherã árĩpehrerã ĩgũre cohã omagã wañorã.

<sup>51</sup> Eropigu yujugu mamũ Jesu pũhrũ nũrũsiaripũ. Omasiariñe dihta omadigu árĩpũ.

<sup>52</sup> ĩgu sãre erã ñeadiacũ ĩgu ya omasiariñere cóacã suhri marigu oma duhrigã wapũ.

*Judio masa oparã Jesure serēpiñuma*  
*Mt 26.57-68; Lc 22.54-55, 63-71; Jn 18.12-14, 19-24*

<sup>53</sup> Eropii pahia opũ pohrogue Jesure aĩ ejañorã. Iri wihiguere árĩpehrerã pahia oparã, mũrã, judio masare buherã sã gamenereñorã. <sup>54</sup> Eropigu Pedropũ Jesu pũhrũ yoarogue ĩha nũrũsiapũ. Eropa nũrũsiagu ĩgu pahia opũ Caifa waĩcũgu ya wihire cãhmotara sãriro eja, iri sãriro pohecague ñajaa wapũ. Eropigu ĩgu iri wihire corerã surara mera peame tũro sũhma doapũ.

<sup>55</sup> Eropirã pahia oparã, gajirã oparã mera gamenererã Jesure wejēdoremorã, gũyari mera erã ĩgũre dipuwaja moaborore guñamaariñorã. Erã eropa weresãburire guña bocabiriñorã. <sup>56</sup> Masa bajarã ĩgũre erã gamero weresãmaacãquererã erã weresãri diaye árĩbiriyo. Gajigu gajiropa arĩ, gajigu sã gajiropa dihta arĩñorã.

<sup>57</sup> Eropirã gajirã erogũe eja, Jesure weresãñorã:



58 —Ihĩ òpa arĩmi: “Yũhũ i wihire masa iira wihire, Goãmũ wihire cóãgũra. Eropa cóãgũ ùhrenũ pũhrũ iri wihire dipaturi iigũra. Iri wihi masa erã iira wihi árĩsome,” ìgũ arĩcũ gũa peebũ, arĩ weresãñorã.

59 Erã eropa arĩ weresãquerecũ ta iri diaye árĩbiriyo. Gajigũ gajiropa arĩ gajigũ sã gajiropa arĩpũ.

60 Erã eropa arĩra pũhrũ pahia opũ erã watope wahgãnũgaja Jesure serẽpipũ:

—¿Oã mũre weresãquerecũ ta erãre yũhri gamebeari mũhũ? ¿Mũre erã weresãrire duhpigũ erãre yũhri gamebeari mũhũ? arĩpũ ìgũ Jesure.

61 Ìgũ eroparĩcũ peequeregũ ta Jesu eropa pepicãpũ. Ìgũ eropa yũhribiricũ ìagũ pahia opũ ìgũre dipaturi serẽpipũ daja:

—¿Cristo ta ãhriri mũhũ? ¿Òagũ Goãmũ magũ ta ãhriri mũhũ? arĩ serẽpipũ daja ìgũ Jesure.

62 Ìgũ eropa arĩcũgue ta Jesu yũhripũ:

—Ìgũ ta ãhraa. Eropirã yũhũ masũ Goãmũ ìgũ obeodigũ yũ Pagũ turagũ pohro, ìgũ diayerũ yũ doacũ ìarãca mũa. Eropirã ùmaro maja imica watope yũ aricũ sãre ìarãca mũa, arĩpũ Jesu ìgũre.

63 Ìgũ eroparĩcũ ta pahia opũpũ ìgũ sañarañe suhrirore ìgũ basi yeguecãpũ gajirãre “Guataricãmi,” arĩdoregũ.

—Ìre weresãrãre gajirãre mari gamebeaa pare. 64 Ìgũ basi Goãmũre ìgũ ñero wereniguicũ peea mari. Eropirã ìgũ ñero iira dipuwajare masituhaa mari. ¿Eropirã dohpa iirãcuri mari ìre dohpaguere? arĩpũ pahia opũ gajirã oparãre.

—Ìgũ ñeri dipuwaja wejẽcãro gahmea, arĩ yũhriñorã erã árĩpeherrerã oparã.

65 Eropirã erã mera majarã Jesure disico ehosũ ìgũ cuirire diricãhmotacã, ìgũre pañorã. Patuha òpa arĩñorã ìgũre:

—¿Noa mũre pari? Ìabiriqueregũ gũare wereque, arĩ wereyañorã erã. Eropirã opũ yarã surara Jesure pañorã.

—*Ìgũre masibea, arĩpũ Pedro Jesure*

*Mt 26.69-75; Lc 22.56-62; Jn 18.15-18, 25-29*

66 Eropigũ Pedro iri wihi maja sãriro pohecague ìgũ arĩcũ pahia opũ pohro majago erapo. 67 Igo Pedro ìgũ sũhmacũ ìago ìgũ dihtare ìhaniguipo.

—Nazare majagũ mera Jesu mera mũ sã ãhrabũ, arĩpo igo Pedore.

68 Igo eroparĩcũ peegũ Pedropũ òpa arĩpũ:

—¿Dohpa arĩmaacãgo iiri mũhũ? Mũ arĩgũre ne masibea yũhũ, arĩpũ Pedro igore.

Igo eropa arĩra pũhrũ Pedro iri pũũ maja sãriro disiporo pohrogue wapũ. Eropigũ ìgũ ero niguicũ cãreña werepũ. 69 Ero ìgũ arĩcũ ìago dipaturi werepo daja ero arĩrãre.

—Ihĩ Jesu buherã mera majagũ ãhrimi, arĩpo igo.

70 Igo eroparĩcũ peegũ Pedro dipaturi arĩpũ daja.

—Ìgũre masibea yũhũ, arĩpũ daja.

Eropii merogã pũhrũ ta ero niguirã Pedore òpa arĩñorã daja:

—Diaye ta ãhraa. Mũhũ Galilea majagũ ãhraa. Eropigũ ìgũ mera majagũ ta ãhraa mũhũ, arĩñorã erã ìgũre.

71 Erã eroparĩcũ peegũ ìgũ erãre yũhripũ:

—Diaye ta Goãmũ mera arĩgũ iiaa mũare. Yũhũ diaye arĩbiricũ Goãmũ yũre dipuwaja moaporo. Ìgũre mũa arĩgũre ne masibea yũhũ, arĩ yũhripũ ìgũ erãre.

<sup>72</sup> Īḡu eroparīcū ta cāreña werepū daja. Īḡu werēcū peegu Jesu ĭḡu arīrare guñapū. “Cāreña pesubu ĭḡu wereboro core mūhū yūre ūhresubu ‘Jesure masibea,’ arīḡaca mūhū,” Jesu ĭḡu eropa arīrare guñapū Pedro. Eropa guñagū turaro orepū.

## 15

### *Pilato Jesure serēpiñumi*

*Mt 27.1-2, 11-14; Lc 23.1-5; Jn 18.28-38*

<sup>1</sup> Eropirā boyorogue mūrā, pahia oparā, judio masare buherā, árīpehrerā gajirā oparā mera gamenere weretamuñorā erā Jesure iiburire masimorā. Erā basi wereniguituha, Jesure dihri aīḡā Pilato waīcugūre opūre oñorā ĭḡure. <sup>2</sup> Erā aī ejacū ĭagū Pilato ĭḡure serēpipū:

—¿Diaye ta judio masa opū āhriri mūhū? arī serēpipū ĭḡu Jesure.

—Mū arīro dopa ta ĭḡu ta āhraa, arī yūhripū ĭḡure Jesu.

<sup>3</sup> Eropirā pahia oparā baja weresāñorā ĭḡure. <sup>4</sup> Erā eropa arī weresācū peegu dipaturī serēpipū daja ĭḡure.

—Oā mūre baja weresārā iima. ¿Erā eropa arī weresāquerecū yūhribeari mūhū? arīpū ĭḡu.

<sup>5</sup> Īḡu eroparīcū Jesu yūhribiripū. Eropigū Pilato ĭhamaria wapū.

### *Jesure wejēdoreñuma*

*Mt 27.15-31; Lc 23.13-25; Jn 18.38-19.16*

<sup>6</sup> Bojori nūcū Pascua bosenu árīcū peresu árīdigūre yujugūre masa “ĭḡure wiuque,” erā arīḡure Pilato eropa wiubasamūripū. <sup>7</sup> Irisubure Barrabá waīcugū peresugue árīpū. Īḡu oparāre cóādiarā mera majagū masare wejērā mera majagū árīpū.

<sup>8</sup> Eropirā masa bajarā Pilato pohroque eja, ĭḡure serēñorā:

—Bojori nūcū mū iidiro dopa ta iique daja guare. Yujugū peresugue árīḡure guare wiubasaque daja, arīñorā erā.

<sup>9</sup> Erā eroparīcū Pilato erāre serēpiñapū:

—¿Mūa yagū opūre judio masa opūre wiucuri? arī serēpipū Pilato erāre Jesure wiudianijagū.

<sup>10</sup> Jesure masa erā mahicū ĭarā pahia oparā Jesure ĭhaturirā árīñorā. Eropa ĭhaturirā ĭḡure wejēdorerā oñorā Pilatore. Erā ĭhaturirire masigū Pilato Jesure wiudiaripū. <sup>11</sup> Īḡu eropa wiudiaquerecū ta pahia oparā Jesu mera masare guacū iñorā. Ōpa arīdoreñorā erāre: “Barrabáre wiuque. Jesure wejēdoreque,” Pilatore arīdoreñorā masare. <sup>12</sup> Eropigū Pilatore Barrabáre erā wiudorera pūhrū Pilato erāre serēpipū daja:

—¿ĭhī “judio masa opū” mūa arīḡapūre duhpigūcūri yūhū? arī serēpipū ĭḡu.

<sup>13</sup> —Crusague pabia wejēque ĭḡure, arī gaguiniguiñorā masa.

<sup>14</sup> —¿Ñehenore ñerire iiari ĭhī mūa eropa arī gaguiniguicū? arīpū ĭḡu.

Īḡu eroparīcū peerā erā gaguiniginemoñorā daja.

—Crusague pabia wejēque ĭḡure, arīñorā daja.

<sup>15</sup> Erā eropa arī gaguiniguicū peegu Pilato Barrabáre wiudorepū masare mucubiricū iidiagū. Eropigū Jesure yuradari mera tāradore, crusague pabia wejēdoregū wiapū surarare.

<sup>16</sup> Eropi surara ĭḡu opū Pilato wihigue pretorio waīcūri wihigue Jesure aī ejañorā. ĭḡure aī ejatuha erā gajirā surara erā mera majarāre gameneremorā sihubeoñorā.

<sup>17</sup> Eropirā erā opū ya suhriro dopa bejariñere Jesure sñorā. Eropa sātuha pora berore ii ĭḡu dipuru duhpeoñorā. <sup>18</sup> Eropiituha ōpa arī wereyañorā erā ĭḡure:

—Umuporā arique. Judio masa opū ōaro árīporo, arī wereyañorā ĭḡure.

<sup>19</sup> Eropirã ïgũ dipurure yucũgũ mera padiu, ïgũre disico ehosũ, gũhyadiaro ïaro dopa ta mereja ïgũre ii birañorã. <sup>20</sup> Eropi ïgũre wereya biratuha, erã sãra suhrirore tuwea aĩ, ïgũ ya suhrirorũre ïgũre sãñorã daja. Eropirã ïgũre crusague pabia wejẽmorã aĩ wiria wañorã.

*Erã Jesure crusague pabia wejẽñuma*

*Mt 27.32-44; Lc 23.26-43; Jn 19.17-27*

<sup>21</sup> ïgũre aĩgã, Simo Cirene majagũ pohegue árĩdigũ erã pohro ïgũ eracũ ïarã surarapũ ïgũre Jesu ïgũ coãra crusare coãgãbasadoreñorã. Alejandro, Rufo sã pagũ árĩpũ Simopũ.

<sup>22</sup> Waha Gólgota waĩcũrogue ejañorã. Gólgota arĩro mari ya mera “dipu pero” arĩro iiaa. <sup>23</sup> Eropirã vinore sãĩri deco mera erã morera decore Jesure oriñorã. Iri decore ihribiripũ ïgũ. <sup>24</sup> Eropirã ïgũ suhrire tuwea aĩra pũhrũ crusague Jesure pabiañorã. Erã pabiatuhaja ïgũ suhri mũrare “¿Noa yañe árĩrocuri ïñe?” arĩ game deabirañorã.

<sup>25</sup> Jesure erã pabiara pũhrũ uñre hora dũhyayoro goeri boje ejaboro. <sup>26</sup> Eropirã crusague õpa arĩ gojarapũre pabia duhtuñorã. “Ihĩ judio masa opũ aħrimi,” erã arĩ gojaturapũ árĩyoro. Iri erã gojaturapũ Jesure erã weresãra árĩyoro. <sup>27</sup> Eropirã perã yajari mũrare Jesu pohro gajimijirigue crusarigue erã pabiatuñorã erã sãre. Yujugũ ïgũ diayerũ, gajigũre ïgũ copũ pabiatuñorã. <sup>28</sup> Erã eropiicũ iribojegue Goãmũ yare weremũhtanirã gojadiro dopa ta eropa wayoro. Õpa arĩ gojauñuma: “ ‘Dorerire tarinũgarã mera majagũ aħrimi,’ arĩ pepima masa ïgũre,” arĩ gojañuma iribojeguere.

<sup>29</sup> Eropirã crusari pohro tarigãrã Jesure ïha, erã dipurure yurerã, ïgũre ñero arĩ werenigũñorã.

—Mũhũ ta “Goãmũ wihire cohã, uñrenũ pũhrũ iri wihire amugũra daja,” arĩdigũ árĩribũ mũhũ. <sup>30</sup> Mũ basi dijaque. Eropigũ mũ basi tarique. Eropigũ tari weregũca mũhũ, arĩ wereyañorã erã.

<sup>31</sup> Erã iro dopa ta pahia oparã sã judio masare buherã sã ïgũre eropa wereyañorã. Eropa arĩ wereyarã õpa arĩñorã erã basi:

—Ïgũ gajirãre taudigũ árĩqueregũ ta ïgũ basi tarimasibeami. <sup>32</sup> “Israe masa opũ aħraa,” arĩrimi ïgũ. Eropirã ïgũ basi دچارicã ïarã ïgũre umupeorãca, arĩ wereyañorã.

Yajari mũra sã ïgũ pohro erã pabianirã eropa ta ïgũre ñero arĩ wereyañorã.

*Jesu sĩria wañumi*

*Mt 27.45-56; Lc 23.44-49; Jn 19.28-30*

<sup>33</sup> Eropi goeri boje árĩcũ uñre hora gohra árĩpehrerogue naitĩa wayoro. <sup>34</sup> Eropigũ irisubure ero naitĩarisubu Jesu turaro gaguiniguipũ:

—Eloi, Eloi, ¿lama sabactani? arĩpũ ïgũ. Ire arĩgũ mari ya mera õpa arĩgũ iipũ: “Yũ Goãmũ, yũ Goãmũ, ¿duhpigũ yũre cohãri mũhũ?” arĩgũ iipũ ïgũ Pagũre.

<sup>35</sup> Ïgũ eroparĩcũ peenirã yujurãyeri ero niguinirã õpa arĩriñorã:

—Goãmũ yare weremũhtadigũre Eliare sihgũ iicumi, arĩriñorã erã.

<sup>36</sup> Eropigũ yujugũ erã mera majagũ mimi aĩri yũsũ mera vino sũĩrire yosotuha aĩ omagã, yucũgũ ojogoro diritu, Jesure simujuripũ. Eropa iigũ õpa arĩpũ:

—Corenique. Elia ïgũre itamucũ ïanirã dohpa mari, arĩpũ ïgũ gajirãre.

<sup>37</sup> Ïgũ eropa arĩra pũhrũ dipaturi Jesu turaro gaguinigui sĩria wapũ. <sup>38</sup> Ïgũ sĩricũ ta Goãmũ wihi majañe suhriro ero erã cãhmotara suhriro gasiro deco mera yehguea wayoro. <sup>39</sup> Ïgũ eropa sĩricũ ïagũ surara opũ Jesu pohro niguidigũ õpa arĩpũ:

—Diaye ta aħraa. Ihĩ Goãmũ magũ ta aħrañumi, arĩpũ ïgũ.

<sup>40</sup> Eropirã yorogue ïhaniguinirã nome sã árĩñorã Jesure ïhaniguirã. Erã nome mera María Magdalena árĩpo. Gajigo María waĩcũgo sã árĩpo. Igotũ José ïgũ pagũ

magu Santiago erã pago árïpo. Gajigo Salomé waïcugo árïpo. <sup>41</sup> Erã nome Jesu yare òaro peerã nome árïñorã. Erã Galilea yeba ïgu árïcũ ïgure itamumuriñorã. Erã nome mera bajarã gajirã nome sã árïñorã. Jerusaléngue Jesu mera arinirã nome árïñorã.

*Jesu dũpũre masa gobegue apiñuma*

*Mt 27.57-61; Lc 23.50-56; Jn 19.38-42*

<sup>42-43</sup> Eropii irinu ïgu sïriranu Sabado core judio masa soorinu core majanu árïyoro. Eropiro Pascua maja árïburire erã amurinu árïyoro. Irinu ñamica árïcũ José Arimatea majagu güiro mariro Pilato pohrogue ejaru. Jesu dũpũre serẽgu ejaru. José oparã mera majagu oparã erã umupeodigu árïpu. Eropigu Goãmũ ïgu opu árïburire coregu iipu. <sup>44</sup> Eropigu José Jesu dũpu mũrarore ïgu Pilatore serẽcũ Pilatoru peegu, pee uca waru. “¿Jesu sirituhayuri?” arï pepipu. Eropigu surara opũre sihu õpa arïpu ïgure:

—¿Jesu sïria wayuri? arï serẽpipu ïgure.

<sup>45</sup> ïgu eroparïcũ surara opu yũhripu:

—Sïria wami, arïpu.

ïgu eroparïcũ Pilato Josére odorepu Jesu dũpu mũrũre. <sup>46</sup> ïgu odorera pũhru José òariñe suhriore asũpu. Asũtuha, Jesu dũpũre aĩ diju, iri suhriro mera omapu. Omatuhaja erã utãyegue seara gobegue ïgu dũpũre apipu. Apituha iri gobe pohro árïriye utãyẽ wũariyere taragã tubiha nugucãpu. <sup>47</sup> Eropirã María Magdalena, María José pago Jesure ïgu apidiore ïañorã.

## 16

*Jesu masa mũriañumi*

*Mt 28.1-10; Lc 24.1-12; Jn 20.1-10*

<sup>1</sup> Eropirã erã soorinu Sabadonu taricũ María Magdalena, María Santiago pago, Salomé mera poresurire asũñorã Jesu dũpũre sũmorã. <sup>2</sup> Eropirã Domingo boyorogã Jesure erã yaara gobegue wañorã erã. <sup>3</sup> Warã õpa arïñorã:

—¿Iri gobere erã biharayere noa marire pãgũbasarãcuri mari ñajaborore? arïñorã erã erã basi.

<sup>4</sup> Iri gobegue ejarã iri gobere biharayere utãyere erã pãgũ nugurayere ïañorã. Wũariye utãyẽ árïyoro. <sup>5</sup> Eropa ïarã iri gobeguere ñajañorã. Eropa ñajajarã mamũre diayeru doagũre boreri suhricũgure ïañorã. ïarã ïha uca wañorã. <sup>6</sup> Erã ucacũ õpa arïpu ïgu:

—Ucabricãque. Crusague erã pabiadigure Jesu Nazare majagũre amaraa mũa. Masa mũriatuhami. Õre marimi. Erã ïgu dũpũre apidiore ïaque. ïatuhaja ïgu buherãre Pedro sãre õpa arï wererã waque. <sup>7</sup> “ïgu mũa core Galileague wamũhtagũcumi. Eroque ïgure ïarãca mũa. Ero ïgu arïdiro dopa ta mũa ïgure ïarãca,” arï wererã waque, arï werepu mamũ erãre.

<sup>8</sup> ïgu eroparïcũ erã güi, naragã, masa gobe pohro árïnirã omagã wiria wañorã. Eropa güirã gajirãre werebiriñorã.

*Jesu María Magdalenare dehyoañumi*

*Jn 20.11-18*

<sup>9</sup> Eropii Domingo árïcũ Jesu ïgu masa mũriara pũhru María Magdalenare dehyoamũtapu. Igo siete watẽa ñajasũdigo árïpo. Jesu ïgu sïriboro core igore watẽare cóãpu. Eropigu igopũre dehyoamũtapu ïgu ïgu masa mũriara pũhũre. <sup>10</sup> Jesu igore dehyoara pũhru igo ïgu mera majarãre werego wapo. Erã ïgu sïrirare bũjawererã orerã árïñorã. <sup>11</sup> “Cristo ojocariami. ïgure ïabu,” igo arïquerecũ peediabiriñorã.

*Jesu ĩḡu buherãre dehyoañumi**Lc 24.13-35*

<sup>12</sup> Pũhrũ perã Jesu buherã mera majarã campogue wiri marirogue wañorã. Erã eropa waniguicũ Jesu gajiropa bejagũ guhyaro dehyoapũ erãre. <sup>13</sup> ĩḡu eropa dehyoara pũhrũ, waha gajirã Jesu yarãre wereñorã. “Gua Jesure ĩabũ,” erã arĩ werecũ erã peediabiriñorã daja.

*Jesu ĩḡu yare buhedoreḡu obeoñumi ĩḡu buherãre**Mt 28.16-20; Lc 24.36-49; Jn 20.19-23*

<sup>14</sup> Pũhrũ once ĩḡu buherã mesa pohrogue erã doacũ erãre dehyoapũ ĩḡu. Eropigũ ĩḡure ĩanirã “Jesu masa m̃ariapũ,” arĩ erã werecũ peediabirirare erãre turipũ Jesu. ĩḡure ðaro umupeobiriri dipuwaja erãre turipũ. <sup>15</sup> Erãre turituha ðpa arĩpũ:

—I yeba árĩpehreroguerẽ masare árĩpehrerãre ðari buherire buherã waque.

<sup>16</sup> Yũre umupeorãre erã waĩyenirãre erã peameḡue wabonirãre taugũcumĩ Goãmũ. Eropirã yũre umupeobirã Goãmũ ĩḡu dipuwaja moamorã, peameḡue wamorã árĩrãcoma. <sup>17</sup> Eropirã yũre umupeorã yũ turari mera ðpa iirãcoma: Yũ turari mera watẽa masare ñajasũnirãre cóãrãcoma. Eropirã mama disirore wereniguirãcoma.

<sup>18</sup> Eropirã añare ñeacũ, árĩpehreri nimare erã ihricũ pũrisome erãre. Eropirã dorecũrã weca erã mojotorire erã mohmepi ñeacũ ðarã warãcoma, arĩpũ Jesu ĩḡu buherãre.

*Jesu ɯmarogue m̃aria wañumi**Lc 24.50-53*

<sup>19</sup> Eropã arĩ weretuha mari Opũ Jesu ɯmarogue m̃aria wapũ. Eroḡue ejagũ Goãmũ diayerũ doapũ ĩḡu mera opũ árĩḡu. <sup>20</sup> Eropirã ĩḡu buherãpũ árĩpehreroguerẽ ðari buherire Goãmũ masare ĩḡu tauburire buherã wañorã. Erã eropa buhecũ mari Opũ erãre itamupũ. Deyoro moarire ĩḡu turari mera iimasicũ iipũ erãre masare ĩḡu ya buherire peedoreḡu. “Eropa ta árĩporo,” arãa yũhũ. Iripẽta ãhraa.



## San Lucas

1-2 Opu Teófilo, mure ipũre gojabeogu iiaa yũhũ. Jesu gua mera árĩnigu ĩgu iirare gajirã gojanugamũhtatuhanirã árĩma. Negohraguere Jesure ĩanirã, ĩgu yare buhenirã erã arĩ werediro dopa ta gajirã irire gojanugamũhtatuhanirã árĩma. <sup>3</sup> Eropigu i árĩpehrerire õaro masipehodiagu yũ sã erã arĩ wererare buhebũ. Eropigu yũ sã irire õaro gojadiaa mũa buheburi árĩburire. <sup>4</sup> Jesu yare buherã mure weretuhanirã árĩma. “Iri queoro ãhraa,” õaro mũ arĩ masiborore ipũre mure gojabeogu iiaa.

*Ñu waĩyeri masũ ĩgu masa dehyoaburire anyu wereru Zacariare Ñu pagũ árĩbure*

<sup>5</sup> Herode Judea yeba majarã opu ĩgu árĩcũ, Zacarĩa waĩcugũpũ pahĩ árĩpũ. Zacarĩa ya curupũ pahia curu Abías ya curu árĩyoro. Zacarĩa marapo sã pahĩ Aarón mũru pãrameo árĩturiagogue árĩpo. Igoũ Elisabet waĩcũgo árĩpo. <sup>6</sup> Erã perã Goãmũ dorerire ipehorã erã árĩcũ ĩagu, “Umũri nũcũ õarire iirã ãhrima,” arĩ pepidi árĩmi Goãmũ erãre. <sup>7</sup> Elisabet ne porã marigo árĩpo. Eropigo igo Zacarĩa mera porã mari muñucãpo.

<sup>8</sup> Pahia Goãmũ wihigue Goãmũ ya umupeoburire mohmerã umũri nũcũ erã gohrotomũriñorã. “Zacarĩa ya curu majarã dohpaguere iiporo,” erã arĩra pũhrũ ĩgu pahia erã iidiro dopa ta Goãmũ ya umupeoburire mohmegũ arigu iipũ. <sup>9</sup> Pahia erã ĩguaro dopa ta inciensore soebure beyerã irisubure Zacariare beyeñorã. Eropigu ĩgu Goãmũ wihigue ñajaa wapũ soegu wagu. <sup>10</sup> Goãmũ wihi pohecague ĩgu árĩrisubu, inciensore ĩgu soerisubu árĩpehrerã masapũ disiporogue Goãmũ mera serẽniguiñorã. <sup>11</sup> Irisubure Goãmũ yagu anyu incienso soero diayerũ dehyoanũgajapũ Zacariare. <sup>12</sup> ĩgu anyu eropa dehyoacũ ĩagu Zacarĩa ĩgure ĩha, uca wa, gũia wapũ. <sup>13</sup> Eropa ĩgu gũicũ ĩagu anyu ĩgure wereru:

—Zacarĩa, gũibita. Goãmũ mũ serẽrare peemi. Eropigo mũ marapo Elisabet porãcũgocumo. Mũ magũ masa dehyoagũcumi. ĩgu eropa dehyoacũ Ñu waĩyeque ĩgũgãre. <sup>14-17</sup> “ĩgu õagu ãhrimi. Turagu ãhrimi,” arĩ pepigũcumi Goãmũ mũ magure. ĩgu masa dehyoara pũhrũ vinore, siburire ihrisome. Eropigu ĩgu, ĩgu masa dehyoara pũhrũ ta Espĩritu Santo árĩri mera õaro turagu árĩgũcumi ĩgu. Eropigu bajarã Israe masare Goãmũ mari Opũre õaro gamecũ ĩgũcumi ĩgu. Goãmũ yare buhegu Elia Goãmũ yare weremũhtadigu mari Opũ ariborore ĩgu buhediro dopa ta Goãmũ ĩgu turari mera mũ magũ sã buhegũcumi. Eropa buhegu erã pagũ sũmarã erã porã mera erã õaro game mahi árĩcũ ĩgũcumi. Eropigu dorerire tarinũgarãre õaro erã umupeori mera yũhrĩcũ ĩgũcumi. Eropa buhegu mari Opũ ariboro core ĩgu yarã árĩmorãre amuyugũcumi ĩgu. Eropigu ĩgu masa dehyoara pũhrũ mũhũ mucubirigũca. Gajirã sã bajarã mucubirĩrãcoma, arĩpũ anyu Zacariare.

<sup>18</sup> ĩgu eroparĩcũ peegu Zacariapũ serẽpipũ anyure.

—Yũhũ, yũ marapo mera gua mũrã ãhraa. ¿Eropigu mũ arĩra diaye árĩcũ dohpa masigũcuri yũhũ? arĩpũ ĩgu.

<sup>19</sup> ĩgu eroparĩcũ anyupũ ĩgure wereru:

—Yũhũ Gabrie waĩcũgu ãhraa. Goãmũ pohro árĩgu ãhraa yũhũ. Goãmũ i õari querere weredoregũ, mũ pohro yũre obeoami. Yũ werediro dopa ta diaye waroca. <sup>20</sup> Yũ eropa arĩquerecũ ta yũre peediabeaa mũhũ. Eropigu mũhũ dohpaguere werenigũbigũ dujagũca. Mũ magũ ĩgu masa dehyoara pũhrũ werenigũbigũca daja, arĩpũ anyu Zacariare.

<sup>21</sup> Disiporogue masa Zacaría corerã iĩñorã. “¿Duhpigũ ãgũ Goãmũ wihigue ářĩgũ mata wiriribeari?” arĩ, corerã iĩñorã masa ãgũre. <sup>22</sup> Eropigũ ãgũ i wihigue ářĩdigũ wiria, erã mera wereniguimasibiripũ. “Goãmũ ãgũre dehyoacumi,” arĩ pepi, masiñorã erã. Eropigũ ãgũ wereniguimasibigũ ářĩgũ ãgũ mojotori mera masare wereniguipũ.

<sup>23</sup> Goãmũ wihi ãgũ mohmeri pehrecũ, ãgũ dujaa wapũ ãgũ ya wihigue. <sup>24</sup> Pũhrũ ãgũ marapo Elisabet majigũre ne bocagãrigo iipo. Eropigo ãgo cinco aberi gohra masa pohro wabiripo. <sup>25</sup> Ōpa arĩpo ãgo: “Dohpague yũre Goãmũ itamumi pare. Yũ porã marigo ářĩgo gũhyasiuro taribũ yũhũ. Goãmũ yũ porã maririre cohãmi yũre,” arĩ pepipo ãgo.

### *Jesu ãgũ masa dehyoaburire werepũ anyu Maríare*

<sup>26-27</sup> Elisabet seis aberi ãgo nijipo ářĩra pũhrũ, Goãmũpũ anyure Gabrie waĩcũgũre nómeo ðago pohrogue obeopũ. ãgo Nazare waĩcũri maca Galilea ářĩri yeba ářĩpo. Eropigo ãgo María waĩcũgo José mera mojoto diribo ářĩpo. Josépũ iribojegue majagũ mũrũ Davi mũrũ pãrami ářĩpũ. <sup>28</sup> María pohrogue ejagũ anyu werepũ:

—María, ¿ãhriri mũhũ? Goãmũ mũ mera ářĩgũ ãhrimi. Eropigũ mũre ðaro iĩgũ iimi. Ářĩpehrerã nome gajirã nome tauro ðaro iimi mũre, arĩpũ anyu ãgore.

<sup>29</sup> ãgũ eroparĩcũ peego, ãgo turaro guña pepipo. Anyu ãgũ wererare pepigo “¿Dohpa arĩgũ yũre eropa arĩcuri?” arĩ guñapo ãgo. <sup>30</sup> ãgo eropa arĩ guñacũ ãgũ anyu werepũ ãgore:

—María, mũre Goãmũ turaro mahimi. Eropigo gũibita. <sup>31</sup> Peeque. Majigũre bocagoca mũhũ. Eropigũ mũ magũ masa dehyoagũcumi. ãgũre Jesu waĩyegoca. <sup>32-33</sup> ãgũ turatariagũ ářĩgũcumi. Eropirã ãgũre “Goãmũ ãmaro majagũ magũ ãhrimi,” arĩrãcoma masa. Eropigũ mũ magũ ñecũ mũrũgue Davi mũrũ Israe masa erã opũ ãgũ ářĩdiro dopa ta mũ magũ sãre apigũcumi Goãmũ. Eropigũ ářĩpehrerinũri ãgũ Israe masare ðoregũcumi. Eropiro ãgũ opũ ářĩripũ ne pehresome, arĩpũ anyu.

<sup>34</sup> ãgũ eroparĩcũ Maríapũ serẽpipo:

—¿Duhpi ãmũ mera ářĩbiriqũre go ta porãcũbocuri yũhũ? arĩpo ãgo.

<sup>35</sup> ãgo eroparĩcũ anyupũ werepũ:

—Espíritu Santo mũre porãcũcũ iĩgũcumi. Eropiro Goãmũ ãgũ turari imica curu iro dopa ta cãhmotaroca mũre. Eropirã “Goãmũ magũ, ñerire iibigũ ãhrimi,” arĩrãcoma masa mũ magũre. <sup>36-37</sup> Goãmũ ářĩpehrerire iimasimi. Eropigo mũ acawerego Elisabet bũro ářĩquerego ta majigũre bocãmo ãgo sã. ãgo porãcũgocumo ãmũgãre. Masa ãgore “Porã marigo ãhrimo,” erã arĩdigo bũro dohpague seis aberi waha ãgo majigũre bocara pũhrũ, arĩpũ anyu Maríare.

<sup>38</sup> ãgũ eroparĩcũ María yũhripo:

—Yũre peeque. Mari Opũ ãgũ pohro majago ãhraa yũhũ. Mũ arĩdiro dopa ta yũre eropa waporo, arĩpo ãgo.

ãgo eropa arĩra pũhrũ anyu waha wapũ.

### *María Elisabere ãago wapo*

<sup>39</sup> Irinũre María ãtã yucũ ářĩri yebague Judea yeba ářĩri macague ãmũdiaro waha wapo. <sup>40</sup> Eroque ejago Zacaría ya wihi ñaja, “¿Ahriri?” arĩpo ãgo Elisabere. <sup>41</sup> ãgo eroparĩcũ Elisabet ãgo peecũ ta, ãgo magupũ niji suhrirogue ářĩdigũ ñohmepũ. Elisabet Espíritu Santo ářĩri mera ðaro pepigo wapo. <sup>42</sup> Eropigo turaro mucubiriri mera wereniguipo.

—Ářĩpehrerã nome tauro ðaro iimi Goãmũ mũre. Mũ magũ sãre ðaro iimi Goãmũ. <sup>43</sup> Cue, yũ Opũ pago yũ pohro aricũ ðaro iimi yũre Goãmũ. <sup>44</sup> Mũhũ yũre “¿Ahriri?” arĩcũ, yũ magupũ niji suhrirogue ářĩgũ mucubiriri mera ñohmeacumi

yure. <sup>45</sup> “Goãmũ ïgũ arĩdiro dopa ta iipehogũcumĩ,” arĩgo mucubirigo ãhraa mũhũ, arĩpo Elisabet Mariare.

<sup>46</sup> Igo eroparĩcũ María yũhripo:

Goãmũ õagũ, turagũ ãhrimi, arãa. Yũhũ õaro sĩporãcũ. <sup>47</sup> Goãmũ yure peamegue wabodigore itamugũ ãhrimi. Eropigũ dohpaguere yure õaro mucubiriri mera árĩcũ iimi. <sup>48-49</sup> Yure bu árĩgore ïgũ ïgũ pohro majagore guñadi ãhrami. Goãmũ turatariagũ õari dihtare yure itamumi. Eropirã “Igore Goãmũ õaro iimi,” árĩpehrerã masa dohpaguere eropa arĩ wereniguirãcoma yure. Goãmũ ñeri marigũ ãhrimi. <sup>50</sup> Árĩpehrerinũri árĩpehrerã ïgũre umupeorãre ïgũ mojomoro ïagũ ãhrimi. <sup>51</sup> Goãmũ ïgũ turari mera iigũ ãhrimi. “Gajirãre tarinũgaa yũhũ,” arĩrãre tarinũgadi árĩmi ïgũ. <sup>52</sup> Oparãre erã dorero árĩrãre cóadi árĩmi ïgũ. Eropigũ bu árĩrãpũre ïgũ oparã iro dopa ta apidi árĩmi. <sup>53</sup> Oaboanirãre ïgũ õari barire ódi árĩmi. Eropigũ baja opanirãpũre gajino moorã wacũ iidi árĩmi ïgũ. <sup>54-55</sup> Mari ñecũ sũmarã mũrãre “Masare õaro iigũra,” ïgũ arĩ werediro dopa ta iipehodi árĩmi Goãmũ. Eropigũ ïgũ pohro majarã Israe masare ïgũ itamudi árĩmi. Mari ñecũ sũmarã mũrãre, Abrahã mũrũre árĩpehrerã ïgũ acawererã ïgũ pũhrũ árĩrã sãre Goãmũ árĩpehrerinũri eropa mojomoro ïaniguigũ árĩmũridi árĩmi. “Masare õaro iigũca,” erãre ïgũ werepirare cãdijibiridi árĩmi Goãmũ, arĩpo María.

<sup>56</sup> Òrerã abe gohra Elisabet mera ãhri, igo ya macague goe dujaa wapo María.

### *Ñu masa dehyoapũ*

<sup>57</sup> Elisabet igo niji wahgũra pũhrũ igo magũ masa dehyoapũ. <sup>58</sup> Eropirã Goãmũ igore ïgũ eropa õaro iicũ igo ya maca majarã igo acawererã sã igo mera mucubiriñorã. <sup>59</sup> Ocho nũri ïgũ masa dehyoara pũhrũ, ïgũ pagũ sũmarã ïgũgãre gasiro merogã wiri aĩdorerã wañorã. Eropã erã iirisubu erã mera majarã Zacarĩa waĩyediariñorã ïgũgãre ïgũ pagũ waĩre. <sup>60</sup> Erã eropa waĩyediaquerecũ ta ïgũ pagopũ õpa arĩpo:

—Ïgũ pagũ waĩre waĩyebeaa. Ñu waĩyerãca ïgũgãre, arĩpo igo.

<sup>61</sup> —Mũ acawererã ne yujugũ Ñu waĩcũgũ marimi, arĩñorã erã igore.

<sup>62</sup> Eropirã erã mojotori mera werenigui Zacarĩare serẽpiñorã erã.

—¿Mũca dohpa waĩyediari mũ magũre? arĩ serẽpiñorã ïgũre.

<sup>63</sup> Erã eroparĩcũ ïgũ pagũ gojaburimijire serẽbeo, ñeha, gojapũ: “Yũ magũ Ñu waĩcũmi,” arĩ gojapũ Zacarĩa. Ïgũ eropa arĩ gojacũ erãpũ uca wañorã. <sup>64</sup> Ïgũ eropa arĩ gojara pũhrũ ïgũre wereniguicũ iipũ Goãmũ. Eropigũ ïgũ wereniguimasipũ daja.

—Goãmũ turagũ, õagũ ãhrimi, arĩpũ ïgũ.

<sup>65</sup> Ïgũ eropa arĩ wereniguicũ peerã ero majarã uca wañorã. Eropirã i árĩpehrerire Judea yeba majarãre utã yucũ watope árĩrãre masa weresiriñorã. <sup>66</sup> Árĩpehrerã irire peerã guñañorã. “Goãmũ turarire ïgũgã opami. ¿Eropigũ ñehmũno árĩgũcũri ïgũgã?” arĩ pepiñorã masa.

### *Zacarĩa Goãmũre umupeorũ*

<sup>67</sup> Eropigũ ïgũ pagũ Zacarĩa Espĩritu Santo árĩri mera õaro pepigũ árĩgũ Goãmũ yare werepũ:

<sup>68</sup> Mari Israe masa Goãmũre umupeorã. Ïgũ yarã ãhraa mari. Eropigũ mari pohrogue arigũ, marire itamugũ õaro taumi. <sup>69</sup> Eropigũ Goãmũ turagũre marire peamegue wabonirãre õaro taubure obeomi. Marire õaro taubu ïgũ acaweregũ Davi mũrũ ãhrimi. Davipũ Goãmũ pohro majagũ árĩmũriñumi. <sup>70</sup> Iribojegue ïgũ ya weremũhtanirã mera Goãmũ ïgũ marire taubure obeoburire wereyũmũripũ. <sup>71</sup> Marire ïhaturirã marire ñero erã iidiacũ

ĭagu “Mũare itamugũra,” arĭ apiñumi Goãmũ marire. <sup>72</sup> Mari ñecũ sũmarã mũrare, “Mũare mojomoro ĭagu itamugũra. Mũare yũ wererare guñagũra,” arĭ apiñumi Goãmũ mari ñecũ sũmarãre. Iribojegue ĭgu eropa arĭdiro dopa ta marire dohpaguere iimi. <sup>73-75</sup> Eropigũ Abrahãre õpa arĭmũriñumi: “Mũ acawererã pũhrũ árĭrã erãre ĭhaturirã árĭcũ cóãgũra. Eropigũ mũ acawererãre itamugũra. Eropirã erã güibirã ta yũ dorerire iimasima. Eropigũ erã ñerire yũ cóãcũ, erã yũ ĭhuro mũmũri nũcũ õarã árĭniguirãcoma,” arĭ werepimũriñumi iribojegue Goãmũ mari acaweregũ Abrahãre, arĭpũ Zacarĭa.

Eropa arĭtuha ĭgu magugãre õpa arĭpũ:

<sup>76-77</sup> —Mahũ, mũre õpa arĭrãcoma masa:

“Goãmũ turatariagu yare wereniguiguã ãhrimi,” arĭrãcoma mũre. Eropigũ mũhũ mari Opũ core wayugũca. Eropa wagũ õpa arĭ weregũca. “Goãmũ mũa ñerire cóãgũ, peamegue wabonirãre taugũcumi mũare,” arĭ weregũca. Eropa arĭ weregũ mari Opũ ĭgu ariborore weremũhtayugu iigũca mũhũ. <sup>78</sup> Goãmũpũ marire turaro mojomoro ĭagu marire õaro iiguã árĭgu, ĭgu marire peamegue wabonirãre taudiami. Marire taugũ arigu Cristo mari pohro arigũcumi. <sup>79</sup> Árĭpehrerã mari peamegue wabonirãre taudiami ĭgu. Eropigũ Goãmũre mari masibirã árĭcũ ĭagu marire masicũ iidiami ĭgu. Eropigũ mari õaro yujuro mera mari árĭborore weregũcumi marire, arĭpũ Zacarĭa.

<sup>80</sup> Eropi Ñu Zacarĭa magũ õaro bugapũ. Eropigũ Goãmũre turaro mahipũ. Eropigũ yoari boje masa marirogue árĭmũripũ. Te Israe masare buhenugaguã sã erogue ta árĭmũripũ.

## 2

### *Jesu masa dehyoapũ*

#### *Mt 1.18-25*

<sup>1</sup> Irisubure árĭpehreri yebari majarã tauro opũ Augusto árĭpehrerãre queodorepũ. <sup>2</sup> Oã masare erã ne queonũgarisubu árĭcũ Cirenio waĩcũgu Siria yeba majarã opũ árĭpũ. <sup>3</sup> Eropirã árĭpehrerã erã ñecũ sũmarã iribojegue majarã ya macarigue erã waĩre gojapeorã wañorã. <sup>4</sup> José sã Nazaregue Galilea árĭri yeba árĭri macague árĭnirã waha, Judea yebague Belén waĩcũri macague ejañorã. Opũ Davi iribojegue majagu ĭgu masa dehyoadiro árĭyoro Belén. José Davi mũrũ pãrami árĭgu Beléngue wapũ ĭgu waĩre gojapeoguã wagũ. <sup>5</sup> Eropigũ ĭgu Marĭa ĭgu mojoto diribo árĭcũ erogue igo mera ĭgu waĩre gojapeodoreguã wapũ. Igoũ majigũre bocatuhadigogue árĭpo. <sup>6</sup> Eropigo Beléngue ejago igo niji wahgũpo. <sup>7</sup> Erogue masa erã carĭri wihi ne sihajabiriyoro erãre. Eropirã erã wecũa ya wihigue carĭrã wañorã. Eropigo igo ĭgu ne dehyoagugãre porãcutuha ĭgugãre suhriro mera oma, wecũa erã bari coro weca ĭgure pihripeopo.

### *Anyua ovejare ĭhadiburãre dehyoañorã*

<sup>8</sup> Iri ñamire iri maca tũrogue campogue ovejare ĭhadiburã erã yarã ovejare ĭhadiburã iĩñorã. <sup>9</sup> Eropigũ Goãmũ ĭgu obeodiguã anyu erãre dehyoapũ. ĭgu eropa dehyoacũ Goãmũ ĭgu goesiriri erãre boyoweayoro. Eropa wacũ ĭarã, ovejare ĭhadiburã güia wañorã. <sup>10</sup> Erã eropa wacũ anyu erãre werepũ:

—Õari querere mũare weregũ ahraa. Árĭpehrerã masare mucubiricũ iiroca i quere. Eropirã güibiricãque mũa. <sup>11</sup> Dohpagã ñamire opũ mũrũ Davi ya macague mũare peamegue wabonirãre taubu, Cristo Goãmũ ĭgu obeodiguã mari Opũ masa dehyoatuhami. <sup>12</sup> Eropigũ suhriro mera omadiguã wecũa bari coro weca erã pihripeodiguã mũa bocaguã ĭgu ta árĭgũcumi, arĭ werepũ anyu erãre.



<sup>13</sup> Īġu eroparīcū ta bajarā ɯmaro majarā árīmɯhtadigɯ anyu mera bayapeoñorā. Ōpa arī bayapeoñorā erā:

<sup>14</sup> Goāmure ɯmaro majagure umupeorā. Eropirā Goāmɯ ĭġu mahirā güiro mariro gamequeāro mariro ðaro árīporo, arī bayapeoñorā anyua.

<sup>15</sup> Eropa bayatuhaja ɯmarogue erā mɯriara pɯhrɯ ovejare ĩhadiburāpɯ erā basi game wereniguiñorā:

—Ire Goāmɯ ĭġu marire wererare Beléngue ina ĩarā warā, arīñorā erā erā basi.

<sup>16</sup> Eropa arīrā yojaro mera wañorā erā. Maríare, Josére bocaġa, majigugāre wecɯa erā bari coro weca pihripeodigure ĩañorā erā. <sup>17</sup> Ovejare ĩhadiburā ĭġure ĩatuha anyu majigugāre ĭġu wererare wereñorā gajirāre. <sup>18</sup> Erā eropa arī werecū ta árīpehrerā erāre pee ɯca wañorā. <sup>19</sup> I árīpehrerire Maríapɯ guña pepipo. <sup>20</sup> Eropirā ovejare ĩhadiburāpɯ anyu ĭġu werediro dopa árīcū ĩañorā. “Goāmɯ turagɯ āhrimi,” arī mucubiriñorā. Eropa arī mucubiri dujaa wañorā.

### *Goāmɯ wihigue Jesu pagɯ sɯmarā ĭġure aĭgāñorā*

<sup>21</sup> Yuju semana pɯhrɯ majigure gasiro merogā wiri aĭrire erā iidoreranɯ árīcū erā ĭġugāre Jesu waĭyeñorā. Jesure ne igo bocaboro core anyupɯ “Jesu waĭyeque ĭġure,” arī werepīpɯ. Eropirā ĭġugāre Jesu waĭyeñorā.

<sup>22</sup> Goāmɯ doreri Moise ĭġu werediro dopa ta iimorā, José, María mera Jerusaléngue wañorā. Erogue María porācɯra pɯhrɯ ðago igo dɯpɯ árīrore ĩhmurā wañorā. Eropa warā erā Jesure aĭgā wañorā. ĭġugāre Goāmure “ĭġā mɯ yagɯ árību āhrimi,” arī ĩhmurā warā iñorā. <sup>23</sup> Ōpa iñorā Goāmɯ yare erā gojarapū dorero dopa ta. “Árīpehrerā mɯa porāre ne dehyoarāre Goāmure ĩhmuque. ‘ĭġā mɯ yagɯ árību āhrimi,’ arī ĩhmuque,” arī doremɯriñumi Goāmɯ ĭġu yare gojarapūgue. <sup>24</sup> Eropa ĩhmutuha Goāmɯ ĭġu dorediro dopa ta mirimagugāre erā asūtuhaja Goāmɯ wihigue apirā wañorā. Ōpa doreñumi Goāmɯ ĭġu yare gojarapūgue: “Buja borerāre perā oque Goāmure. O erā maricū buja borewĭjġārāre oque yare umupeomorā,” arī doreñumi Goāmɯ. Eropirā ĭġu dorediro dopa iñorā José María mera.

<sup>25</sup> Jerusaléngue Simeón waĭcugɯ árīpɯ. ĭġu ðagɯ, Goāmure umupeogɯ árīpɯ. Goāmɯ Israe masare itamuburire coregɯ ĩpɯ. Eropigɯ Simeón Espírĭtu Santo ĭġu mera árīcū ðaro pepigɯ árīpɯ. <sup>26</sup> Eropigɯ “Mɯ sĭriboro core Goāmɯ ĭġu obeobure Cristore ĩagɯca mɯhɯ,” arī weremɯhtapɯ Espírĭtu Santo ĭġure Simeore. <sup>27</sup> Eropigɯ Espírĭtu Santo ĭġure dorecū Goāmɯ wihigue ñajaa wapɯ. ĭġu ñajara pɯhrɯ Jesu pagɯ sɯmarā ĭġugāre aĭ ñajañorā Goāmɯ ĭġu gojarapū dorera dopa ta iirā. <sup>28</sup> Simeónpɯ ĭġugāre coā aĭ, Goāmure umupeo, “Ōhaa,” arī ĭġu mera wereniguiɯ. Ōpa arīpɯ ĭġu Goāmure:

<sup>29-32</sup> Opɯ, dohpague tamerare masare peamegue wabonirāre taubure obeoa mɯhɯ. ĭġu judio masa árībirāre buhegɯ mure ðaro masicū ĩĭġucumi erāre. Masare taubure Israe masure mɯhɯ apiyoro. Mɯ eropa iirare árīpehrerā masirā, “Israe masare ðaro ĩimi Goāmɯ,” arīrācoma masa. ĭġā marire taubu āhrimi. Eropigɯ mɯ yare arīdiro dopa ĭġāre ĩatuhabɯ. Eropigɯ dohpaguere ðaro mucubirigɯ sĭrigɯca, arīpɯ Simeón.

<sup>33</sup> Simeón ĭġugāre arīrare peerā ĭġu pagɯ sɯmarāpɯ pee ɯca wañorā. <sup>34</sup> Eropigɯ Simeón erāre “Ōaro árīque mɯa,” arīġu ĭġu Jesu pago Maríare werepɯ:

—Goāmɯ ĭġāre beyedi árīmi. ĭġu eropa beyedigɯ árīcū judio masa bajarā ĭġure tarinɯgarācoma. Eropa iirā erā peamegue warācoma. Eropigɯ judio masare bajarāre taubure beyedi árīmi Goāmɯ ĭġāre. ĭġu Goāmɯ turarire ĩi ĩhmuġu ĭġu árīquerecū masa bajarā ĭġure ñero arī wereniguirācoma. <sup>35</sup> Erā eropa ĩicū gajirā erā



ñero guñarire masirãcoma. Eropigo mũhũ turaro bujaweregoca, arĩdocaritamupu Simeón Maríare.

<sup>36</sup> Ero Goãmũ yare wereniguigo Ana waĩcũgo árĩpo. Igo Fanuel mago árĩpo. Aser mũrũ ya curu majago árĩpo. Bũro gohra árĩpo. Igo ero coregue siete bojori dihta igo marapũ mera árĩniripo. <sup>37</sup> Eropigo ochenta y cuatro bojori gohra wapeweyo árĩmũriipo igo. Eropigo mũmũre, ñami sãre Goãmũ ya árĩburire iibo, ba duhu, Goãmũ mera werenigui, Goãmũ wihire ne wiriibiripo. <sup>38</sup> Simeón ĩgu wereniguiro watope igo erã pohro erago, mucubirigo Goãmũre, “Õhaa,” arĩpo. Eropigo Jerusalén majarãre taubure corerãre igo Jesu dehyoarare werepo erã árĩpehrerãre.

*José, María mera Jesu mera Nazaregue dujaañorã daja*

<sup>39</sup> Goãmũ ĩgu dorero dopa ta iituhaja, erã ya macague Nazaregue dujaañorã. Galilea yeba árĩyoro iri maca. <sup>40</sup> Eropigu Jesu õaro bũga turagũ wapũ. Eropigu ĩgu õaro pee masigu árĩpũ. Eropigu ĩgũre Goãmũ õaro ĩpũ.

*Jesu mama mahmũa wahgãrigũ Goãmũ wihigue buherũ*

<sup>41</sup> Bojori nũcũ Jesu pagũ sũmarã Jerusaléngue Pascua bosenure ĩarã wamũriñorã. <sup>42</sup> Jesu doce bojori ĩgu opacũ erã iidiro dopa ta erã árĩpehrerã Jerusaléngue wañorã. <sup>43</sup> Eropirã bosenu pehrecũ erã erã ya macague dujaa wañorã daja. Erã eropa dujaaquerecũ ta Jesupũ Jerusaléngue dujacãpũ. ĩgu pagũ sũmarã ĩgu erogue dujarare masibiriñorã. <sup>44</sup> “Ĩgu mari mera majarã mera árĩcumĩ,” arĩ pepiriñorã erã. Eropirã erã yujunũ gohra Jesu mariro wañorã mague. Eropirã erã Jesure erã acawererã watope amariñorã. <sup>45</sup> Ne bocabiriñorã. Eropirã Jerusaléngue ĩgũre amarã dujaañorã daja.

<sup>46</sup> Ûhrenũ pũhrũ ĩgũre Goãmũ wihigue bocañañorã. Eropirã Jesure judio masare buherã watope bocañañorã. ĩgu erãre pee serẽpi doapũ. <sup>47</sup> Erã árĩpehrerã Jesure peerã õaro masigũgã ĩgu árĩcũ ĩarã, erã ĩhamaria wañorã. <sup>48</sup> ĩgu pagũ sũmarã sã eroguererã Jesure ĩarã ĩhamaria wañorã. Eropigo ĩgu pago ĩgũre õpa arĩpo:

—Mahgũ, ¿duhpigũ eropa ĩari mũhũ gũare? Mũ pagũ, yũhũ, “Ĩgu dederea wañumi,” arĩrã ahmaa gũa mũre, arĩpo igo igo magure.

<sup>49</sup> Igo eroparĩcũ ĩgu ĩgu pagũ sũmarãre werepũ:

—¿Duhpirã yũre ahmari mũa? Yũ Pagũ yũre ĩgu dorediro dopa ta ĩigu ĩiaa. ¿Irĩre masibearĩ mũa? arĩpũ ĩgu.

<sup>50</sup> ĩgu eropa arĩquerecũ erã peemasibiriñorã.

<sup>51</sup> I árĩpehreri ĩgu ĩirare Maríapũ õaro guñapo. Eropigu Jesu Nazaregue dujaa wapũ. ĩgu pagũ sũmarãre õaro yũhrigu árĩmũriipũ. <sup>52</sup> Eropigu Jesu bũga, õaro pee masigu wapũ. Eropirã Goãmũ masa sã “Õagũ aħrimi,” arĩ ĩañorã ĩgũre.

### 3

*Ñu waĩyeri masũ masare Goãmũ yare werepũ*

*Mt 3.1-12; Mr 1.1-8; Jn 1.19-28*

<sup>1</sup> Irisubure erã tauro opũ árĩgu Tiberio waĩcũgu ĩgu opũ árĩra pũhrũ quince bojori wayoro. Eropigu Poncio Pilato waĩcũgu Judea yeba majarã opũ árĩpũ. Eropigu Herode waĩcũgu Galilea yeba majarã opũ árĩpũ. ĩgu pagũ magũ Felipe Iturea yeba majarã, Traconite majarã sã erã opũ árĩpũ. Eropigu Lisania waĩcũgu Abilinia yeba majarã opũ árĩpũ. <sup>2</sup> Eropirã Ana, Caifa mera pahia oparã arĩñorã. Oã árĩpehrerã erã árĩrisubure Ñu Zacarĩa magũ masa marirogue árĩgũre Goãmũpũ ĩgu ĩgu yare weredorepũ. <sup>3</sup> Eropigu Jordán waĩcũriya tũro arĩri yeba árĩpehrerogue Ñu õpa arĩ weregũ wapũ:

—Múa ñeri iirire bujawereque. Dohpaguere ðarire gohrotoque. Eropirã waïyenirã árĩque. Múa eropa iicũ ïagu Goãmũa mua ñerire cóãgucumi, arĩ weremuripũ ïgu.

<sup>4</sup> Ñu eropa wereniguigũ Isaia iribojegue majagu Goãmũa ya weremũhtadigu ïgu gojadiro dopa ta iigu iipũ. Õpa arĩ gojajuñumi Isaia Ñu iiburire:

Masa marirogue werenigui gaguiniguigũ õpa arĩgucumi: “Mari Opũ ïgu ariburi mare amuro dopa ðarã árĩyuque mua ïgure peemorã. <sup>5</sup> Dipa gobericurore mari diaye maja maha iidiro dopa ta, mua ñero iirire duhuque. <sup>6</sup> Múa eropa iicũ Goãmũa mũare peamegue wabonirãre ïgu taucũ ïarãca árĩpehleri yeba majarã,” arĩgucumi ïgu gaguinigui weregurũ, arĩ gojamurĩñumi Isaia iribojeguere Ñu ïgu árĩboro coregue.

<sup>7</sup> Masa bajarã Ñu pohro erarã ïgu erãre waïyecũ gameñorã erã. Eropigu ïgu erãre werepũ:

—Múa ñero iiricurã ãhraa mua. Goãmure “Gũa ñeri dipuwaja moabiricãporo,” arĩrã ¿mũa yure waïyedorerã ahriri? <sup>8</sup> ïgu mua ñero iira dipuwaja moabiricũ õpa iique mua. Diaye mua ñero iirire bujawererã árĩrã, ðarire gohrotorã árĩrã, ðarire iique mua. “Abrahã mari ñecu murũ árĩmuripũ. Eropirã mari Goãmũa mera ðatuhajaa,” arĩ pepibiricãque. Mũare arĩgu tiaa. Abrahã pãramerã mua árĩri duhpiburi árĩbeaa. Goãmurũ gamegu i utãyeri mera gajirãre iimasimi Abrahã acawererãre. Eropiro Abrahã acawererã mua árĩri bu gohra ta ãhraa. <sup>9</sup> Õpa ãhraa: Mari masa yucũ iro dopa ta ãhraa. Goãmurũ come opagu iro dopa ta ãhrimi. Eropigu ñeri ducacuri yucure tabe cóã, iri nuguri sãre tabetagucumi. Tabetatuhaja, peamegue cóãgucumi ïgu iri yucure iri nuguri sãre. Eropa ta iigucumi mua sãre ïgure gamebirãre, arĩpũ Ñu masare.

<sup>10</sup> ïgu eroparicũ peerã masapũ ïgure serẽpiñorã:

—¿Dohpa iirãcuri gũa? arĩñorã erã Ñure.

<sup>11</sup> —Peñe suhriro opagu suhriro moogure yujuñe oque. Eropirã mua bari oparã gajirã sãre oque, arĩpũ Ñu.

<sup>12</sup> Bajamerãgã oparã yare wajasea corerã sã waïyedorerã erañorã. Eropirã Ñu pohro erarã ïgure serẽpiñorã:

—Buhegu, ¿guapũ dohpa iirãcuri? arĩñorã.

<sup>13</sup> —Múa oparã erã doreropẽ ta masare niyerure wajaseaque. Gũyari mera aĩnemobita, arĩ yũhripũ Ñu erãre.

<sup>14</sup> Gajirã surara ïgure serẽpiñorã daja.

—¿Gũapũ dohpa iirãcuri? arĩñorã erã ïgure daja.

—Masare erã niyerure emabiricãque. Eropirã iri niyerure gũa emabiricãque. Mũa wajatarire ïarã mucubirique, arĩ yũhripũ Ñu erãre.

<sup>15</sup> Masa Cristore Goãmũa ïgu obeobure corerã iĩñorã. Eropirã õpa arĩ pepinũgañorã erã Ñure. “Ihĩ Ñupũ Cristo árĩbocumi,” arĩ pepiriñorã erã. <sup>16</sup> Erã eropa arĩ pepicũ peegu Ñu árĩpehlerãre werepũ:

—Yũ tauro turagu arigucumi. Õatariagu ãhrimi ïgu. ïgu iro dopa árĩbeaa yurũ. Eropigu ïgure pepigu, “Yũ tamera bu arĩgu ãhraa,” arĩ pepia yũhũ. Mũa ñero iirare bujawerera purũ yurũ mũare deco mera waïyeabũ. ïgurũ yũ tauro iigucumi. Espiritu Santore ogucumi masa mera árĩniguibure. Eropigu ïgu ñerire soewearo dopa ta ïgu arigurũ mua ñerire coeweagucumi. <sup>17</sup> Yũ purũ arigu trigo gasirire cóãgu iro dopa ãhrimi. Gasiri cóãgu ïgu ya sihburu mera árĩpehleri trigo yeri gasirire sũha weami. Eropa sũha weara purũ trigo yeri gohrapure ïgu diburi wihigue apigucumi. ïgu sũha weara gasiripure ïgu soegucumi. Eropa ii beyegucumi

yꝯ pꝯhrꝯ arigꝯ. Ōarire gohrotonirāpꝯre ĩgꝯ mera árĩniguicã iigꝯcumĩ. Erã ñero iirare bujawerebirāpꝯre peamegue yaribiriri peamegue cóãgꝯcumĩ, arĩ wererꝯ Ñu.

<sup>18</sup> Bajarãre ĩgꝯ eropa arĩ wereri mera masare ōari buherire wererꝯ Ñu. <sup>19</sup> Eropigꝯ opꝯ Herodepꝯ ĩgꝯ pagꝯ magꝯ Felipe marapore ĩgꝯ emara waja, wꝯaro ñerire ĩgꝯ iira waja Ñu ĩgꝯ sãre wereripꝯ. <sup>20</sup> ĩgꝯ eropa arĩ werecã Herodepꝯ Ñure peresu iipꝯ dipaturi ñerire iigꝯ daja. Eropa iigꝯ ĩgꝯ ñerire iira dipuwajacꝯgꝯ árĩnemopꝯ.

*Ñu Jesure waĩyerꝯ*

*Mt 3.13-17; Mr 1.9-11*

<sup>21</sup> Ñure erã peresu iiboro core gajirã masare Ñupꝯ waĩyegꝯ iipꝯ. Erãre waĩyegꝯ Jesu sãre waĩyerꝯ. Eropigꝯ Jesu diague niguigꝯ Goãmꝯre ĩgꝯ serērisubu ꝯmꝯsi pãrimaa waya. <sup>22</sup> Eropa pãrimaara pꝯhrꝯ Espĩritu Santo buja iro dopa bejagꝯ Jesu weca دچارipꝯ. ĩgꝯ دچارicã ꝯmarogue wereniguiro cariyoro:

—Mꝯhꝯ yꝯ magꝯ yꝯ mahigꝯ āhraa. Mꝯ mera ōaro mucubiria, arĩro cariyoro ꝯmarogue.

*Jesu ñecꝯ sꝯmarã iribojegue majarã árĩñorã*

*Mr 1.1-17*

<sup>23</sup> Jesu ĩgꝯ buhenꝯgarasubure treinta bojori opapꝯ ĩgꝯ. “ĩgꝯ José magꝯ āhrimi,” arĩ pepiriñorã masa. Josépꝯ Elĩ magꝯ árĩñumi. <sup>24</sup> Elĩ Matat magꝯ árĩñumi. Matat Levĩ magꝯ árĩñumi. Levĩ Melqui magꝯ árĩñumi. Melqui Jana magꝯ árĩñumi. Jana José magꝯ árĩñumi. <sup>25</sup> José Matatĩas magꝯ árĩñumi. Matatĩas Amós magꝯ árĩñumi. Amós Nahúm magꝯ árĩñumi. Nahúm Esli magꝯ árĩñumi. Esli Nagai magꝯ árĩñumi. <sup>26</sup> Nagai Maat magꝯ árĩñumi. Maat Matatĩas magꝯ árĩñumi. Matatĩas Semei magꝯ árĩñumi. Semei Josec magꝯ árĩñumi. Josec Judá magꝯ árĩñumi. <sup>27</sup> Judá Joanán magꝯ árĩñumi. Joanán Resa magꝯ árĩñumi. Resa Zorobabe magꝯ árĩñumi. Zorobabe Salatĩe magꝯ árĩñumi. Salatĩe Neri magꝯ árĩñumi. <sup>28</sup> Neri Melqui magꝯ árĩñumi. Melqui Adi magꝯ árĩñumi. Adi Cosam magꝯ árĩñumi. Cosam Elmadam magꝯ árĩñumi. Elmadam Er magꝯ árĩñumi. <sup>29</sup> Er Josué magꝯ árĩñumi. Josué Eliezer magꝯ árĩñumi. Eliezer Jorim magꝯ árĩñumi. Jorim Matat magꝯ árĩñumi. <sup>30</sup> Matat Levĩ magꝯ árĩñumi. Levĩ Simeón magꝯ árĩñumi. Simeón Judá magꝯ árĩñumi. Judá José magꝯ árĩñumi. José Jonam magꝯ árĩñumi. Jonam Eliaquim magꝯ árĩñumi. <sup>31</sup> Eliaquim Melea magꝯ árĩñumi. Melea Mena magꝯ árĩñumi. Mena Matata magꝯ árĩñumi. Matata Natán magꝯ árĩñumi. <sup>32</sup> Natán Davi magꝯ árĩñumi. Davi Isai magꝯ árĩñumi. Isai Obed magꝯ árĩñumi. Obed Booz magꝯ árĩñumi. Booz Salmón magꝯ árĩñumi. Salmón Naasón magꝯ árĩñumi. <sup>33</sup> Naasón Aminadab magꝯ árĩñumi. Aminadab Admin magꝯ árĩñumi. Admin Arni magꝯ árĩñumi. Arni Esrom magꝯ árĩñumi. Esrom Fares magꝯ árĩñumi. Fares Judá magꝯ árĩñumi. <sup>34</sup> Judá Jacobo magꝯ árĩñumi. Jacobo Isaa magꝯ árĩñumi. Isaa Abrahã magꝯ árĩñumi. Abrahã Taré magꝯ árĩñumi. Taré Nacor magꝯ árĩñumi. <sup>35</sup> Nacor Serug magꝯ árĩñumi. Serug Ragau magꝯ árĩñumi. Ragau Peleg magꝯ árĩñumi. Peleg Heber magꝯ árĩñumi. Heber Sala magꝯ árĩñumi. <sup>36</sup> Sala Caina magꝯ árĩñumi. Caina Arfaxad magꝯ árĩñumi. Arfaxad Sem magꝯ árĩñumi. Sem Noé magꝯ árĩñumi. Noé Lame magꝯ árĩñumi. <sup>37</sup> Lame Matusalem magꝯ árĩñumi. Matusalem Enoco magꝯ árĩñumi. Enoco Jared magꝯ árĩñumi. Jared Mahalaleel magꝯ árĩñumi. Mahalaleel Caina magꝯ árĩñumi. <sup>38</sup> Caina Eno magꝯ árĩñumi. Eno Sete magꝯ árĩñumi. Sete Adán magꝯ árĩñumi. Adán Goãmꝯ iidigꝯ árĩñumi.

## 4

*Watĩ ñerire iidoreripꝯ Jesure*

*Mt 4.1-11; Mr 1.12-13*

<sup>1</sup> Jesu Espíritu Santo ïgu dorero dopa ta iipehogu árïgu, ïgu Jordán waïcariyague buharapu. ïgu eropa buharacũ Espíritu Santopu ïgure masa marirogue wadorepu.

<sup>2</sup> Erogue ejagu cuarenta nuri gohra árïpu. Eropigu watïpu Jesure ñerire iicũ gameripu. Eropigu ñerire iidoreripu ïgure. Irinurire ne Jesu babiripu. Eropigu irinuri pehrero gohra ïgu oaboapu.

<sup>3</sup> ïgu eropa oaboacũ ïagu watï opa arïpu Jesure:

—Muhu Goãmu magu árïgu opa ïhmuque. Iyere utãyere bari poyacũ iique, arïripu Jesure.

<sup>4</sup> ïgu eroparicũ peegu Jesu gamebiripu. Opa arï yuhripu:

—Goãmu yare erã gojarapũ opa ahraa: “Masare bari mera dihta ojocaribiro gahmea. Árïpehreri Goãmu ya ïgu ya wereniguri mera sãre árïro gahmea,” arïmi Goãmu, arïpu Jesu watïre.

<sup>5</sup> ïgu eropa arïra puhru watïpu ïgure utãgu wecague aï mariagu merogã puhru ïgu árïpehreri macari majare Jesure ïhmu purumujupu. <sup>6</sup> Eropa ïhmuogu opa Jesure arïpu:

—Árïpehreri i macari ïgu yare ora ahraa. Eropigu yu gamegure omasia. Eropigu i macarire, i macari majarã doreri sãre, erã opari mera mure ogura. <sup>7</sup> Yare “Muhu yu opu ahraa,” arï umupeoque. Mu eroparicũ i macarire árïpehreri macarire mure ogura, arï wereripu watï Jesure.

<sup>8</sup> Jesu opa arï yuhripu ïgure:

—Mure umupeobea. Opa ahraa Goãmu yare erã gojarapũ: “Mu Opu Goãmu dihtare umupeoque. ïgu ya doreri dihtare iique,” arï gojañuma Goãmu yare, arïpu Jesu watïre.

<sup>9-11</sup> ïgu eropa arïra puhru Jerusalengue watïpu ïgure aïgãpu. Erogue eja Goãmu wihi wecague aï marijapu ïgure. Aï ejatuhaja ïgure opa arïripu:

—¿Diaye ta Goãmu magu gohra ta ahri ri muhu? Goãmu yare erã gojarapũ opa ahraa:

Goãmu ïgu yarã anyuare mure ïhadibudoregucumi. Eropirã erãpu mure ïhadiburãcoma mugue utãye weca mehbejari arïrã, arï gojañuma Goãmu yare erã gojarapũ.

Erã mure eropa ïhadibumorã árïcũ muhu Goãmu magu ta árïgu õgue buhrimaa dija ïhmuque yare. Mure erã itamucũ ïhmuñata yare, arïripu watï Jesure.

<sup>12</sup> ïgu eroparicũ peegu gamebiripu Jesu. Opa arï yuhripu ïgure:

—Goãmu yare erã gojarapũ opa ahraa: “Mu opu Goãmu ïgu arïrare, ‘¿Diaye ta ahri ri?’ arï masidiarã, Goãmure ii ïhmodoremaabiricãque,” ahraa Goãmu yare erã gojarapũ, arïpu Jesu watïre.

<sup>13</sup> Eropigu watï árïpehreri ñerire Jesure iidoreripu. Jesu ïgu gamebircũ ïagu ïgure merogã duhupu.

### *Galilea yeba Jesu buhenugapu*

*Mr 4.12-17; Mt 1.14-15*

<sup>14</sup> Puhru Jesu Galileague dujaa wapu. Eropigu ïgu Espíritu Santo turari mera iipu. ïgu eropiicũ ïarã ero árïpehrero majarã masa ïgu iira quere peeñorã. <sup>15</sup> Judio masa buheri wiri Jesu sã buhemaripu. Eropirã árïpehrerã masa ïgure õaro wereniguiñorã.

### *Nazare majarã Jesure ne umupeobiriñorã*

*Mt 13.53-58; Mr 6.1-6*

<sup>16-17</sup> Puhru Nazaregue Jesu ïgu bugadoirogue ta ejapu. Erogue eja, Sabado árïcũ ïgu eropa iiniguero dopa ta ïgu judio masa erã buheri wihigue ñajajapu. Ero ïgu Goãmu yare erã gojarapũre buheddiagu niguiru. ïgu eropa nigucũ ïarã ero majarãpu Goãmu



yare weremũhtadigu Isaia ĩgu gojarapũre ĩgure oñorã. Iripũre Jesu i wererire bocagu buhepu:

<sup>18</sup> Goãmu Espĩritu Santo yu mera arĩgu yure doremi. ĩgu mojomorocurãre õari buherire weredoregu obeomi yure. Eropigu ñero siporãcurãre õaro mucubiricã iidoregu yure obeomi. Eropigu peresugue arĩrã sãre erãre ĩgu tauborore weredoregu obeomi yure. Cuirĩ ĩhajabirã erã õaro ĩhajaburire, gajirã erã ñero iibirarãre wiubure yure obeomi. <sup>19</sup> “Mari Opu ĩgu yarãre peamegue wabonirãre ĩgu tauburinuri ãhraa,” yure weredoregu obeomi, arĩ buhepu Jesu.

<sup>20</sup> Eropa buhetuha Jesu iripũre bihacã, wihi majarãre wiatuha, doapu. ĩgu doacũ ĩarã ero arĩpehrerã ĩgure ĩhanuruñorã. <sup>21</sup> Erã eropa iicũ ĩgu erãre werenugapu:

—I dohparagã ta yu buhediro dopa Goãmu ĩgu arĩdiro dopa sihajaro iiaa, arĩpu Jesu.

<sup>22</sup> ĩgu eropa wereniguicũ peerã “Ihĩ õagu ãhrimi,” arĩ pepiñorã. Eropirã erã ĩgu õaro wereniguirire peerã uca wañorã. Eropirã õpa arĩñorã erã erã basi:

—Cuena, ¿José magu arĩbeari ihĩ? arĩñorã erã erã basi.

<sup>23</sup> Erã eroparicũ masigu Jesu werepu erãre:

—Iribojegue majarã erã eropa wereniguidiro dopa ta mua sã yure õpa arĩdiarã ãhraa: “Mũhu duhturu arĩgu mu basi ocoyeque mũhu duhturu arĩrire ii ĩhmuboro dopa ta. Mũhu Goãmu ĩgu obeodigu arĩgu mu basi ĩgu turari mera ii ĩhmuque guare. Capernaumguere Goãmu turari mera ii ĩhmuayoro mũhu. Ohõ mu ya macague sãre guare ii ĩhmuque. Diaye ta mu Goãmu ĩgu obeodigu arĩrire gu masiboro dopa ii ĩhmuque,” arĩdiaa mua yure. <sup>24</sup> Ire weregura mũare. Goãmu ya weremũhtagure ĩgu ya yeba majarã umupeobeama. Eropirã yure umupeobeaa mua ohõ yu bugadigu arĩquerecũ. <sup>25</sup> Eropigu diaye arĩgu iiaa mũare. Iribojegue majarã sãre Goãmu ya weremũhtanirãre erã ya yeba majarã erãre umupeobiriñuma. Eropiro Elia Goãmu yare weremũhtadigu ĩgu arĩrasubure uñre bojori gaji bojori deco gohra ne deco aribiriyoro. Eropiro arĩpehrerogue sãre ne bari mariyoro. Irisubure ĩgu ya yeba majarã Israe majarã bajarã wapeweyarã arĩquerecũ ta Goãmu erãre Eliare itamudoregu obeobiriñumi. <sup>26</sup> ĩgu ya yeba majarãre itamudorebiriquregu gaji yeba Sidón yeba arĩri maca Sarepta waicuri maca majagore itamudoregu Eliare obeoñumi Goãmu. <sup>27</sup> Pũhrũ Goãmu ya weremũhtadigu Eliseo ĩgu ĩgu arĩrisubure Israe yebague bajarã cami boarã erã arĩquerecũ ta ne yujugu Israe majagure ĩgu ya yeba majagure õagu iibiriñumi Eliseo. ĩgu ya yeba majagure õaro iibigu ta gaji yeba majagu Naamán Siria majagu dihtare õagu iinumi ĩgu. Eropigu judio masa erã umupeobirira waja, judio masa arĩbirã dihtare itamuñumi Goãmu, arĩpu Jesu erãre.

<sup>28</sup> ĩgu eroparicũ peerã arĩpehrerã iri wihi arĩrã guataria wañorã. <sup>29</sup> Eropirã erã wahgãnugaja Jesure tara wiria, iri maca turo arĩri tuhugue ĩgure tumedijudiarĩñorã.

<sup>30</sup> Erã eropa iidiaquerecũ ta Jesu erã watope waha wapũ.

### *Watĩ ñajasũdigu Jesure bocatĩripũ*

#### *Mr 1.21-28*

<sup>31</sup> Pũhrũ Jesu Galilea yeba arĩri macague Capernaum waicuri macague eja, Sabado arĩcũ masare buhepu. <sup>32</sup> ĩgu opu iro dopa ta ĩgu buhecũ peerã masa uca wañorã.

<sup>33</sup> Iri wihi watĩ ñajasũdigu arĩgu turaro gaguiniguipũ:

<sup>34</sup> —Mũhu Jesu Nazare majagu guare garibobita mũhu. ¿Dohpa iibu iiri guare? ¿Mũhu guare dederecũ iibu iiri? Yũhu masia Goãmu magu mu õagu arĩrire, arĩ gaguiniguipũ Jesure.

<sup>35</sup> ĩgu eroparicũ peegu Jesu turipu watĩre:

—Ejarimaricãque. Duhuque ĩgure, arĩpu Jesu.



Īgu eropa arīra pūhrū watīpū masure yebague mehmereja tūrucū iipū. Īgu eropa iira pūhrū wiria wapū. Īgu masupū ōagu dujapū. <sup>36</sup> Ero árīrā árīpehrerā Īgu eropa wacū ĩha ũca wañorā. Eropirā erā basi ōpa arī wereniguiñorā:

—¿Ñeheno buheri āhriri i ōpa wacū iiri? Turaro mera opū iro dopa ta ihī watī ñajasūdigūre taumi. Eropirā erā watēa Īgu dorero dopa ta masare duhuma, arī wereniguiñorā erā erā basi.

<sup>37</sup> Īgu eropa iicū ĩarā iri yeba árīpehreroguere masa Jesu Īgu eropa iirare weresiriñorā.

*Jesu Simo Pedro muñecore ōago iipū*

*Mr 8.14-15; Mr 1.29-31*

<sup>38</sup> Judio masa buheri wihire wiria, Simo ya wihigue ñajajapū Jesu. Ero Simo muñeco dorecūgo iipo. Turaro nimacūri árīyoro. Eropirā erā igo dorecūcū wereñorā Jesure. <sup>39</sup> Erā werera pūhrū Īgu igo pohro eja, nimacūrire taridorepū. Īgu eropa taridorera pūhrū igore nimacūri tahria wayoro. Mata ōago wapo. Igo eropa wago wahgā doaja, igo ta erāre barire ejopo.

*Bajarā dorecūrāre ōarā iipū Jesu*

*Mr 8.16-17; Mr 1.32-34*

<sup>40</sup> Abe ñajara pūhrū árīpehrerā masa Īgu pohro arirā dorecūrāre Jesu pohrogue aĩ ejañorā. Dorecūrā baja gajiropa árīri dorere opañorā. Eropigū Jesu Īgu mojotori mera erā weca ñapeo, árīpehrerāre erā dorere ōaro taricū iipū. <sup>41</sup> Watēa ñajasūnirā sāre Jesu watēare wiriadorepū. Erā wiricū ōpa arī gaguiniguiñorā:

—Mūhū diaye ta Goāmū magū āhraa, arīñorā erā Jesure.

Jesu Goāmū Īgu obeodigū Īgu Cristo árīcū watēa Īgure masiñorā. Eropigū Jesu irire gajirāre werenidorebiripū.

*Galilea yeba buhepū Jesu*

*Mr 1.35-39*

<sup>42</sup> Boyomūricū Jesu iri maca árīdigū waha, masa marirogue ejapū. Īgu eropiicū ĩarā masa Īgure ahma, bocajarā, ōpa arīñorā:

—Gūa ya maca dujaque. Wabita, arīñorā erā Jesure.

<sup>43</sup> Erā eropa arīquerecū ta Īgupū erāre ōpa yūhrīpū:

—Goāmū Īgu opū árīrire ōari buherire gajī macari sāre buhedīaa yūhū. Goāmū yūre obeomi irire werebure, arīpū Jesu erāre.

<sup>44</sup> Eropigū Galilea yeba maja wiri, judio masa buheri wirigūe Īgu buhe curipū.

## 5

*Jesu Īgu buherāre bajarā waire bocacū iipū*

*Mt 4.18-22; Mr 1.16-20*

<sup>1</sup> Gajinū Jesu Genesare waīcūri ditaru tūrogue ejapū. Ero Īgu árīcū ĩarā bajarā masa Goāmū yare peediarā Īgure nūrusia ejañorā. Ōaro ũjutūri nūgajañorā masa bajarā. <sup>2</sup> Peeru gasiru imiporo payari gasire Jesu ĩapū. Iri gasi majarā wai wejēnirā majanūgaja, erā wejēdi yucūre coerā iñorā. <sup>3</sup> Eropigū Jesu Simo yarugue ñajapū. Ñajatuha iriru dohodirure dia tūro taramujupidorepū. Eropigū dohodirugue doa, masare buhebeo doapū. <sup>4</sup> Buhetuha, Jesu Simore ōpa arīpū:

—Deco ñari sīwiuque. Eropirā mūhū, mū wapi mera mūa wejēdi yucūre mehyuque wai ñeamorā, arīpū Jesu.

<sup>5</sup> Īgu eroparīcū peegū Simo Jesure yūhrīpū:

—Opu, wai wejēbutahmuarabu gua dohpagā ñamire. Eropiiquererā ta waire wejēbiraca gua. Eropa wejēbiriquererā ta mu dorero dopa ta mehyu ñarāra, arī yuħripu Simo.

<sup>6</sup> Eropa arītuha erā mehyuñorā. Erā eropa mehyucū irigu wejēdigure bajarā wai ñajañorā. Bajarā erā ñajacū wejēdigu yehguea wariyoro. <sup>7</sup> Eropa wacū ñarā erā gajiru majarā erā mera majarāre sihubeoñorā.

—Mua sã itamuque guare, arī sihubeoñorā Simo sã.

Erā eropa itamura puħru peeru gasiru ðaro miriparo bocañorā waire. <sup>8</sup> Simo Pedro eropa wai bajarā ñajacū ñagū, Jesu pohro mereja, ñgure wereru:

—Yu opu, mu mera arībogū arībeaa yuħu. Ñegu āhraa. Eropigu yure duhuque, arīpu Simo Jesure.

<sup>9</sup> Ñgu arīpehrerā ñgu mera majarā sã wai bajarā ñajacū ñarā, uca wañorā erā sã. <sup>10</sup> Perā Simo mera majarā Zebedeo porā Santiago ñgu pagu magu Ñu mera, erā sã ñha uca wañorā. Eropa ucacū ñagū Jesu Simo Pedore wereru:

—Güibita. Dohpaguere waire ñeha gameneogu mu arīro dopa ta Goāmū yarā arīmorāre sihu gameneogu arīguca muħu, arīpu Jesu Simore.

<sup>11</sup> Ñgu eropa arīra puħru erā erā gasire imiporo taramujupicā, erā ya arīpehrerire ero ta apicā, Jesu mera waha wañorā.

*Jesu cami boagure ðagu wacū iipu*

*Mt 8.1-4; Mr 1.40-45*

<sup>12</sup> Jesu gajī maca ñgu arīcū cami boagu ñgu pohrogue erapu. Eropigu ñgu Jesure ñagū mereja turaro sereru:

—Opu, muħu yure ðagu iidiagu yure ðagu iimasia muħu, arī sereru.

<sup>13</sup> Ñgu eropa arīra puħru Jesu ñgure mohmeriñagu ðpa arīpu:

—Irire iidiaa. Dohpaguere ðagu arīque muħu, arīpu.

Ñgu eroparīcū ta ñgu cami boara mura yaria wayoro. <sup>14</sup> Eropigu Jesu ñgure dorepu: —I yu mare ðpa iirare gajirāre ne werebircāque. Mu ya dūpūre ðarare pahire ñhmuḡu waque, “Ōaro āhrimi,” arīdoreḡu. Tuhajanugu Moisere Goāmū ñgu apidiro dopa ta iique. Eropigu Goāmū wihigue mirimagure asūwahḡā apique mu dore tarirare masa arīpehrerā masimaja ðaro, arīpu Jesu cami boadigure.

<sup>15</sup> “Werebita,” ñgu arīquerecū ta arīpehrerogue masa ñgu iirare weresiripehoñorā. Erā eropa quere peerā masa bajarā Jesu pohrogue ejañorā. Dorecūrā ðarā wadiarā erā sã ñgu pohrogue ejañorā. <sup>16</sup> Erā eropa ejaquerecū ta Jesu masa marirogue Goāmū ñgu Pagure sereru waha wapū.

*Jesu dūpu buhadigure ðagu wacū iipu*

*Mt 9.1-8; Mr 2.1-12*

<sup>17</sup> Gajīnu Jesu ñgu buhecū fariseo masa, judio masare buherā sã ero doañorā. Erā arīpehrerā Galilea macari majarā, Judea macari majarā, Jerusalén majarā arīñorā. Eropigu Jesu Goāmū turari mera dorecūrāre ðarā iipu. <sup>18</sup> Irisubu bajamerāḡā uma dūpu buhadigure oyariñe mera coā erañorā. Eropirā ñgure Jesu pohro apidiarā, wihigue aī ñajariñorā erā ñgure. <sup>19</sup> Eropa ñajadiaquererā masa bajarā arīcū erā ñgure aī ñaja masibiriñorā. Eropirā ñgure wihi wecague aī mūrija, miri gobe aī wea iri gobegue dūpu buhadigure oyariñe mera pihri dijuñorā Jesu pohro arīrā watope. <sup>20</sup> “Jesu ihī ñgu dorecūrire taricū iigucumi,” arī pepiñorā erā. Erā eroparī pepicū masigu Jesupu dorecūḡure ðpa arī wereru:

—Mahḡu, mu ñero iirare yuħu cóātuhabu, arīpu dūpu buhadire Jesu.

<sup>21</sup> Ñgu eroparīcū peerā fariseo masa, judio masare buherā sã erā basi ðpa arī pepiriñorā: “Ihī eropa arī wereniguiri mera Goāmūre ñero arīḡu iimi. Ñgu masu

mari iro dopa árĩgu ĩgu masa erã ñerire cóãmasibeami. Goãmũ dihta masa erã ñeri iirire cóãmasimi,” arĩ pepiriñorã erã.

<sup>22</sup> Jesu erã pepirire masĩgu õpa arĩpũ:

—¿Duhpirã eropa arĩ pepiri mũa? <sup>23</sup> “Mũ ñeri iirire yũ cóãtuha,” yũ arĩcũ, “Guyagu ãhrimi,” yũre arãa mũa masibiriquererã ta. “Wahgãnũgajaque. Curique,” yũ arĩcũ yũ arĩra diaye arĩri arĩcũ mata masirãca mũa. <sup>24</sup> Yũhũ masũ Goãmũ ĩgu obeodigu i yeba majarã erã ñeri iirire cóãmasia yũhũ. Mũa ire masiboro dopa õpa ta ĩgu wahgãnũgacũ iigũra, arĩpũ Jesu.

Eropa arĩtuha dũpũ buhadigũre õpa arĩpũ:

—Mũre arĩgu iiaa. Wahgãnũgajaque. Mũ oyarañere aĩgãque. Mũ ya wihigue waque, arĩpũ ĩgũre.

<sup>25</sup> ĩgu eroparĩcũ ta mata arĩpehrerã erã ĩhuro wahgãnũgaja, ĩgu oyarañere aĩ ĩgu ya wihigue waha wapũ. Eropa wagu ĩgu Goãmũre umupeogu mucubiriri mera õaro wereniguipũ. <sup>26</sup> ĩgu eropiicũ ĩarã masapũ arĩpehrerã ĩha uca wañorã. Goãmũre umupeorã mucubiriri mera õaro wereniguiñorã:

—Dohpagãre gajiropa arĩrĩre ĩabũ gua, arĩñorã erã.

### *Jesu Levĩre sihupũ*

*Mt 9.9-13; Mr 2.13-17*

<sup>27</sup> Eropiituha waha, Levĩ waĩcũgũre ĩgu mohmeri taribugue ĩgu arĩgũre bocajapũ Jesu. Levĩpũ oparã ya arĩburire masare wajasea coregu arĩpũ. Eropa bocajagu ĩgũre õpa arĩpũ:

—Yũ mera majagu arĩbu arique, arĩpũ ĩgu Levĩre.

<sup>28</sup> ĩgu eroparĩcũ Levĩpũ arĩpehreri ĩgu mohmerare duhucã, Jesu mera waha wapũ.

<sup>29</sup> Pũhrũ Levĩ ya wihi Jesu ya arĩburire bosenu iirã iĩñorã. Ero bajarã wajasea corerã, gajirã Levĩ sã mera ba doañorã. <sup>30</sup> Erã mera Jesu ĩgu doacũ ĩarã bajamerãgã fariseo masa, judio masare buherã mera gua ũrugã Jesu buherãre arĩ dũyasoñorã:

—¿Duhpirã ñero iirã wajasea corerã mera bahari mũa? arĩ turiñorã erã.

<sup>31</sup> Erã eroparĩcũ peegu Jesu yũhripũ erãre.

—Dorecũbirã duhturure amabeama. Dorecũrã dihta duhturure ahmama. Dorecũrã duhturu amaro dopa ta “Ñerã ãhraa,” arĩrã yũre amarãcoma. <sup>32</sup> Eropigũ “Ñerã ãhraa,” arĩrã dihtare erã ñero iirare bujaweredore, õaripũre gohrotocũ iigu aribũ yũhũ. Erã basi “Õarã ãhraa gua,” arĩ pepirãre itamugu aribiribũ yũhũ, arĩpũ Jesu.

### *Ba duhurire Jesure serẽpiñorã gajirã*

*Mt 9.14-17; Mr 2.18-22*

<sup>33</sup> Eropirã bajamerã masa Jesure õpa arĩ serẽpiñorã:

—Ñũ buherã bajasuburi Goãmũ ya arĩburire iimorã ba duhuma. Eropi erã bajasuburi Goãmũ mera wereniguima. Fariseo buherã sã erã iro dopa ta iima. ¿Duhpirã mũa buherãpũ Goãmũ ya arĩburire ba duhubeari erã? arĩñorã erã Jesure.

<sup>34</sup> Erã eroparĩcũ Jesu erãre õpa arĩ yũhripũ.

—Õpa ãhraa iri: Mojoto diridigu ĩgu bosenu iicũ ĩgu mera majarã bujawererã ba duhunirã arĩbeama. ĩgu mera arĩrã mucubiriri mera barã iima. Eropa ta yũ buherã sã yũ mera arĩrã ba duhumasibeami. <sup>35</sup> Yujunũ yũre Goãmũ aĩcãgũcumĩ. Eropa ĩgu aĩra pũhrũ yũ buherã mera arĩsome yũhũ. Irisubugue ta yũ buherã ba duhurãcoma, arĩpũ Jesu.

<sup>36</sup> Iribojegue maja buheri mama buheri mera erã buhemoresũdiacũ ĩagu õpa arĩ werenemopũ Jesu erãre.

—Ne mama suhrirore miri gasirogã yehgue aĩ, mũrañe suhrirore seretuma masiya mara. Mari eropa seretura pũhrũ mama gasirore mari coecũ, mũra gasiro arĩro tara gameneo yehgueacũ iiaa. Eropirã mũra buheri mama buheri mera wapimoo

buhebiricãro gahmea. <sup>37</sup> Eropirã ne igui decore imisĩri decore waibugũ gasiro ajurore, mura ajurore diyebiricãro gahmea. Eropa iicũ igui deco pahmuro mura ajurore yehgue dija wahaa. Iri ajuro yehgucũ igui deco iri ajuro sã cohmoa wahaa. <sup>38</sup> Eropirã igui deco mama decore mama ajuro mera diyero gahmea. Eropa ta mama buheri mura buheri mera buhebiricãro gahmea. <sup>39</sup> Vino deco mura decore masa erã ihrira pũhrũ mama decore gamebeama erã. Ōpa arĩma masa. “Vino mura deco mama decore òatarinũgaa,” arĩma masa, arĩpũ Jesu erãre.

## 6

### *Sabado árĩcũ Jesu buherã trigo pororire turĩñorã*

*Mt 12.1-8; Mr 2.23-28*

<sup>1</sup> Gajinũ Sabado árĩcũ Jesu ĩgu buherã sã trigo pohegue ĩha tariañorã. Eroque tariañã, ĩgu buherãpũ trigo pororire turĩ, gasiri cohro bañorã iriyerire. <sup>2</sup> Erã eropa iicũ ĩarã bajamerãgã fariseo masa erãre serẽpiñorã:

—¿Duhpirã mura Sabado mari soorinũ árĩquerecũ ta mohmeri? Mari dorerire tarinũgarã iiaa, arĩñorã fariseo masa.

Erã eroparĩcũ peegũ Jesupũ “Yũ buherã iri dorerire tarinũgarã iibeama,” arĩgu òpa arĩpũ erãre:

<sup>3-4</sup> —Iribojegue Davi ĩgu mera majarã mera oaboagu Goãmũ wihigue ñaja, iri wihi árĩri panre bapũ. Eropa bagũ ĩgu mera majarã sãre badoregu iri panre ópũ. Iri pan pahia dihtare badorera árĩriyoro. Goãmũ doreri iri panre gajirãre badorebiriyoro. ¿Davi irire ĩgu eropa iirare Goãmũ yare erã gojarapũgue buhebirari mura? Davi i panre bagũ Goãmũre tarinũgagũ iibiriñumi. Dohpagãre yũ buherã sã i trigo yerire turĩ barã Goãmũre tarinũgarã iibeama. <sup>5</sup> Yũhũ masũ Goãmũ ĩgu obeodigu inonũ soorinũ sãre masa erã iiburire doremasia, arĩpũ Jesu.

### *Mojoto buhadigu òagu wapu*

*Mt 12.9-14; Mr 3.1-6*

<sup>6</sup> Gajinũ Sabado árĩcũ Jesu judio masa buheri wihigue ñaja buhepũ masare. Ero mojoto diayerũ buhadigu arĩpũ. <sup>7</sup> Ero árĩrã sã bajamerãgã masare buherã, fariseo masa sã Jesure ĩhanũrũñorã ĩgure weresãdiarã. Ōpa arĩ pepiñorã: “Sabadonũ árĩcũ ĩhĩ masure òagu iibocumi Jesu. ĩgu eropiicũ ‘Mari soorinũ Jesu mohmegũ iimi,’ arĩ weresãrãra,” ari pepiñorã. <sup>8</sup> Jesu erã pepirire masigu, mojoto buhadigũre òpa arĩpũ:

—Wahgãnũgajaque. Ohõ arique, arĩpũ ĩgure.

Ĩgu eropa arĩra pũhrũ mojoto buhadigupũ wahgãnũgaja, ero niguirũ. <sup>9</sup> Eropigu Jesu erãre serẽpipũ.

—Mũare serẽpigura: ¿Mari soorinũ árĩcũ òarire iicũ òabeari? ¿Ñerire iicũpũre òhari? ¿Soorinũ árĩcũ masure masucũ òhari? ¿O soorinũ árĩcũre masure wejẽcũpũre òhari? arĩpũ Jesu erãre.

<sup>10</sup> Eropa arĩgu Jesu erãre ĩhametupeho, mojoto buhadigũre òpa arĩpũ daja:

—Mũ mojotore sĩsirãbeoque, arĩpũ ĩgu.

Ĩgu eroparĩcũ ta mojoto buhadigupũ sĩsirãbeo, òari mojoto wayoro. <sup>11</sup> ĩgu eropa iicũ ĩarã erã ĩgu mera turaro guañorã.

—¿Dohpa iirãcuri mari ĩre? arĩñorã erã basi.

### *Jesu ĩgu buherãre doce gohra ĩgu apimorãre beyepũ*

*Mt 10.1-4; Mr 3.13-19*

<sup>12</sup> Irinũrere Jesu utãgũgue Goãmũre serẽgu mũria wapu. Eroque arĩgu, ñamire Goãmũ mera werenigui butahmua wapu. <sup>13</sup> Boyorogue ĩgu buherãre ĩgu pohro sihubeopũ. Sihubeotuha erã mera majarãre doce gohra ĩgu apimorãre beyepũ. <sup>14</sup> Oã

árñnorã Jesu ïgu beyenirã: Simore Jesu Pedro piyudigu, Simo pagu magu Andre, Santiago, Ñu, Felipe, Bartolomé, <sup>15</sup> Mateo, Toma, Santiago árñnorã. Santiagopu Alfeo magu árĩpu. Eropirã Simo celote ya curu majagu árĩgu, <sup>16</sup> Juda Santiago pagu magu sã, Juda Iscariote sã árñnorã ïgu beyenirã. Juda Iscariotepu Jesure ïhaturirãre ïhmubu árĩpu.

*Jesu bajarã masare buhepu*

*Mr 4.23-25*

<sup>17</sup> Eropii Jesu ïgu buherã mera utãgu weca árñnirã dijaricũ, bajarã gajirã ïgu buherã mera õari puugue niguiñorã erã. Gajirã masa sã bajarã árñnorã. Erã árĩpehrero Judea yeba macari majarã, Jerusalén majarã, Tiro waĩcũri maca majarã, Sidón waĩcũri maca majarã, wũariya tũro árĩri macari majarã ïgu pohrogue eranirã árñnorã. <sup>18</sup> Erã Jesu buherire peerã erarã, erã dorecũri taudorerã erarã árñnorã. Watẽa ñajasũnirã sã ïgu pohrogue eraa, õarã wañorã. <sup>19</sup> Jesu ïgu turari mera õarã wacũ iipu erãre. Eropirã erã árĩpehrerã ïgure mohmepiñarã erañorã.

*Jesu mucubiririre, bujawereri sãre buhepu*

*Mt 5.1-12*

<sup>20</sup> Pũru Jesu ïgu buherãre ïha, werẽpu:

—Mũa mojomorocũrãpu Goãmũ ïgu opu árĩroguere warãca mũa. Eropirã mũa mucubirirãca.

<sup>21</sup> “Dohpaguere mũa oaboarãpu yapirã árĩrãca. Eropirã mucubirirãca.

“Mũa dohpaguere bujawere orerãpu mucubirimorã ãhraa. Eropirã pũruguerẽ ïayerãca. Eropirã mucubirirãca.

<sup>22</sup> “Yũhu masũ Goãmũ ïgu obeodigu ãhraa. Eropirã yaha árĩburire mũa iiri dipuwaja gajirã mũare ïhaturicũ mũapu mucubirirãca. Mũare erã cóãcũ sãre mucubirirãca. Mũare erã ñero wereniguiquerecũ ta, “Ñerã ãhrima,” mũare arĩquerecũ ta mũapu mucubirirãca. <sup>23</sup> Mũare erã eropa iinirãre umarogue mũa ejacũgue Goãmũ mũare wũaro õaro iigũcumĩ. Eropirã turaro mucubirirã árĩque. Õaro sĩporãcũrã árĩque. Mũare ïhaturirã ta erã acawererã mũra iribojegue majarã eropa ta ñero iimũriñuma Goãmũ yare weremũhtanirãre.

<sup>24</sup> “Eropirã mũa dohpaguere baja oparãpu i yebaguere mũa õaro árĩtuhabũ. Eropirã ñero tarirã árĩrãca mũa.

<sup>25</sup> “Dohpaguere yapirãpu mũa oaboarãca. Mũa eropa árĩrã ñero tarirãca.

“Dohpaguere mũa mucubirirã árĩrãpu pũruguerẽ bujawere orerãca. Eropirã ñero tarirãca.

<sup>26</sup> “Goãmũ yare weremũhtarã ãhraa,” arĩ gũyarãre “Õarã ãhrima,” arĩriñuma bajarã iribojegue majarã. Mũa mera majarãre eropa ta “Õarã ãhrima,” arĩbocoma masa. Eropa arĩnirã árĩrãpu ñero tarirãca mũa sã, arĩ buhepu Jesu.

*Mũare ïhaturirã erã árĩquerecũ erã sãre mahique*

*Mt 5.38-48; 7.12*

<sup>27</sup> Eropigu õpa arĩ buhenemopu Jesu:

—Yũre peediarãre, mũare arĩgu tiiaa. Mũare ïhaturirã erã árĩquerecũ erã sãre mahique. Mũare ïhaturirãre õaro iique. <sup>28</sup> Mũare ñero arĩdorerã erã árĩquerecũ ta õadoreque erãre. Mũare ñero iirã erã árĩquerecũ ta, “Erã sã õaro arĩporo,” arĩ serẽbasaque Goãmũre. <sup>29</sup> Yujugu mũa wayuporã pacũ, “Gajipu sãre padiagu paque,” arĩque ïgure. Mũa weca majañe suhrirore ïgu emacũ mũa camisa sãre ocãque ïgure. <sup>30</sup> Mũare serẽgũre ïgu serẽropẽ ta oque ïgure. Mũa yare ïgu aĩcũ ïgure dipaturi serẽpibita irire. <sup>31</sup> Gajirã mũare õaro iicũ gahmea mũa. Erãre mũa õaro iicũ gamero dopa ta õaro iique erã sãre. Erã õaro iibiriquerecũ ta mũapu erãre õaro iique.



<sup>32</sup> “Mũare umupeorã dihtare mũa umupeocũ iri ne duhpiburi árĩbeaa. Ñerã sã eropa ta iima. <sup>33</sup> Eropirã mũare õaro iinirã dihtare mũa õaro iicũ iri sã ne duhpiburi árĩbeaa. Irire ñerã sã iima. <sup>34</sup> Eropiro gajirãre wayurã “Yũre wiaque,” arĩcũ mũa wayuri sã ne iri duhpiburi árĩbeaa. Ñerã sã gajirãre wayurã ero pũhru wiapehodorerã ohoma. <sup>35</sup> Eropirã mũapũ mũare ìhaturirãre mahi umupeoque. Eropirã erãre õaro iique. Eropirã mũa yare mahibirã ta wayuque erãre. Mũa eropa iicũ Goãmũ mũare õaro iigucumi. Goãmũpũ ìgũre umupeobirã sãre, ñerã sãre õaro iimi. Eropa ta iique mũa sã. Mũa eropa iirã wũaro wajatarãca. Eropirã Goãmũ turatarigu umaro majagu porã árĩrãca. <sup>36</sup> Mari Pagũ umaro majagu ìgũ mojomoro ìadiro dopa ta mũa sã masare mojomoro ìaque.

*Gajirãre “Ñerã àhrima,” arĩbiricãque, arĩpũ Jesu*

*Mt 7.1-5*

<sup>37</sup> Eropigu erãre werenemopũ:

—Gajirãre “Ñerã àhrima,” arĩrã erã iirare werewũabiricãque. Mũa eropa arĩ werewũabiricũ Goãmũ mũa sãre “Ñerã àhrima,” arĩsome. Gajirã mũare erã ñero iirare, erã ñero arĩra sãre cãdijique. Mũa eropa cãdijicũ ìagu Goãmũ mũa sãre mũa ñero iirare cãdijigucumi. <sup>38</sup> Gajinore oparã gajirãre oque. Mũa eropa ocũ Goãmũ mũare ogucumi. Eropa ogũ mũare õaro queoro wũaro ogucumi. Òaro wajayegucumi. Gajirãre mũa orañepẽ ta mũa sãre Goãmũ ogucumi, arĩpũ Jesu erãre.

<sup>39</sup> Eropa arĩtuha Jesu buhenemogu õpa arĩpũ werenigui queori mera:

—Cuirì ìhajabirã erã seyaro erã basi game tuagãrã erã perãgue ta mehtuha yuriñaja warãcoma gobegue. Eropa ta erã cuirì ìhajabirã iro dopa ta Goãmũ yare masibirã sã gajirãre buhediarima. Eropirã erã erã buherã sã peamegue warãcoma. <sup>40</sup> Buherã erãre buhegũre masitarinũgabeara. Eropirã arĩpehrerã buherã erãre õaro buhepehora pũhru erãre buhegũ iro dopa ta masirãcoma. Eropirã erãre buherã masibirã arĩbiricãporo, arĩpũ Jesu.

<sup>41</sup> Eropa arĩtuha gajì buheri mera buhepũ daja:

—Mari werenigui queori mera buhecũ õpa iirã àhraa mũa: Mũa acaweregũ ìgũ cuirugue miri pogañegã mehñajacũ iri pogañegãre õaro ìhaa mũa. Mũ yaru cuirupũre wũarimijiro arĩquerecũ irimijipũre ne pepibea mũa. Eropirã miri pogañegãre mũa ìaro dopa ta mũa acaweregũ ìgũ ñero iiripũre õaro ìhaa mũa. Mũapũ mũa ñero iirire turaro iiquererã ta irire eropa pepicã. ¿Dohpa arĩrono eropa àhriri mũa? <sup>42</sup> Òpa arĩ wereniguia mũa acawererãre: “Acaweregũ, mũ ñerire iigũ iica. Eropigu iri ñerire duhcãque,” arĩ wereniguia mũa. Eropa ìgũ ñerire duhdorequererã mũapũ iri ñerire iirã duhubea. ¿Duhpirã mũa ñerire iiquererã ta irire eropa pepicãri mũa? Masa erã pũrũpũre ñero ii corerã àhraa mũa eropa iirã. Mũa ñero iiripũre duhumãhtaque. Mũa eropa iira pũhru mũa acaweregũre “Mũ ñero iirire duhcãque,” arĩ weremasia, arĩ buhepũ Jesu.

*Masa erã wereniguirire peerã erã arĩricũrre masia mari, arĩ werepũ Jesu*

*Mt 7.17-20; 12.34-35*

<sup>43</sup> Eropigu buhenemogu õpa arĩ werenemopũ erãre werenigui queori mera:

—Yucũgũ õadigũ ñerire dũcacũbeaa. Eropiro ñedigũ sã õarire dũcacũbeaa. <sup>44</sup> Yucũgũ dũcare masirã “Ìrigũ dũca ta àhraa,” arĩ masia mari. Poracũdigũ higuera dipure dũcacũbeaa. Eropiro aña poragu igui tũrre dũcacũbeaa. <sup>45</sup> Eropa àhrima masa sã. Òagu ìgũ pepiri õari àhraa. Eropigu ìgũ õarire wereniguimi yucũgũ õadigũ irigũ õarire dũcacũro dopa ta. Ñegũre ìgũ pepirigue ñeri àhraa. Eropigu ìgũ ñerire wereniguimi yucũgũ ñedigũ irigũ ñerire dũcacũro dopa ta. Mari pepirigue iri arĩro dopa ta wereniguia mari, arĩpũ Jesu.

*Pe wihi iira queori werepɔ Jesu**Mt 7.24-27*<sup>46</sup> Eropigu erāre werenemopɔ:

—Mɔa yɔre “Opɔ,” arāa. Eropa arīquererā ta yɔ dorerire iibeaa mɔa. ¿Duhpirā eropa iibeari mɔa? <sup>47</sup> Árīpehrerā yɔre gamerā yɔ wereniguirire peema. Eropirā yɔ dorerire tarinugabeama. Ōpa āhrima yɔre tarinugabirā: <sup>48</sup> Wihi ōaro nugudi iro dopa ta āhrima erā. Īgu ũhcāri goberire seha, wihire nugunugami. Iri wihi ōaro ĩgu ũhcāro nugura wihi árīro dia miricū turaro deco turaquerecū iri wihi ōaro turaniguia. <sup>49</sup> Eropirā yɔ wereniguirire peenirā arīquererā ta yɔ dorerire iibirāpɔ wihire ōaro nugubigu iro dopa āhrima. Iri wihire wecagā nugu, ōaro iinugabeami. Īgu eropa iira wihi árīro dia miricū deco turacū iri wihi mata cohro yuhria wahaa. Eropiro iri wihi cohmorehrea wahaa, arīpɔ Jesu.

**7***Surara opɔ pohro majagure ĩgu dorecɔcū Jesu ōagu ĩpɔ ĩgure**Mt 8.5-13*

<sup>1</sup> Iri queori masare weretuha Jesu sã Capernaumgue ejañorā. <sup>2</sup> Ero árīgu cien surara opɔ árīgu ĩgu pohro majagure turaro mahipɔ. Īgu pohro majagu dorecɔgu árīgu sīriro pohrogue arīpɔ. <sup>3</sup> Eropigu Jesu ĩgu iirare peegu, judio masa murāre sihu Jesu pohrogue obeopɔ opɔpɔ.

—Yɔ pohro majagure dorecɔgure ōacū iigu arique, arī weredoregu obeopɔ opɔ murāre.

<sup>4</sup> Erā Jesu pohrogue ejarā, ōpa arī burigā serēñorā ĩgure:

—Surara opɔ guare mɔ pohro obeoami. “Yɔ pohro majagure dore taubasagu ariporo,” arī weredoregu obeoami. Īgu opɔ ōagu āhrimi. Īgu eropa arīcū itamuque ĩgure. <sup>5</sup> Mari ya maca majarāre ĩgu mahimi. Eropigu ĩgu gɔa buheri wihire gɔa iira waja wajayemi, arīñorā murā Jesure wererā.

<sup>6</sup> Erā eropa arī werecū peegu Jesupɔ erā mera wapɔ. Surara opɔ ya wihi pohro ĩgu ejabu iicū gohra opɔpɔ ĩgu mera majarāre Jesure ōpa arī weredoregu obeopɔ:

—Opɔ, ōaroca. Aribita. Ōagu arībeaa yɔhɔ. Yaha wihi mɔre ñajaridorebuno arībeaa yɔhɔ. <sup>7</sup> Eropigu mɔ pohro wabirabɔ. Yuju diaye ta mɔ turari mera dorebeoque. Mɔ eropiicū yɔ pohro majagu ōagu wagɔcumi. <sup>8</sup> Yɔre yɔ weca arīrā gajirā oparā dorema. Eropigu yɔ sã surarare dorea. Yujugure “Waque,” yɔ arīcū ĩgu wahami. Gajigure “Arique,” yɔ arīcū ĩgu ahrimi. Yɔ pohro majagure “Ire iique,” yɔ arīcū irire ĩgu iimi. Eropigu mɔ sã mɔ dorero dopa ta ĩgu dorecɔgu tarigɔcumi, arī weredorepɔ surara opɔ.

<sup>9</sup> Jesu irire peegu, ɔca wa, bajarā masare ĩgu mera nurusiarāre majinuga werepɔ:

—Diaye ta mɔare arīgu iiaa. Ihī surara opɔ Israe masɔ arībiriqueregu Goāmure burigā umupeomi. Īgu pohro majagure yɔ ōagu wacū iiburire masituhami. Israe masare ne sihī iro dopa umupeorāre ñanibea, arīpɔ Jesu.

<sup>10</sup> Īgu eropa arīra pɔhrɔ surara opɔ Jesu pohro ĩgu obeonirā erā opɔ ya wihigue dujaa wañorā. Dujaja dorecɔdigure ōagu ĩgu arīcū ñañorā erā.

*Jesu wapeweyo magure masupɔ*

<sup>11</sup> Pɔhrɔ ñari Naín waĩcari macague Jesu wapɔ. Īgu buherā bajarā masa sã ĩgu mera wañorā. <sup>12</sup> Iri macare ñajaro pohro ĩgu ejacū sīridigure masa aĩ wiririñorā yaarā warā. Sīridigu pago wapeweyo arīpo. Yujugu ta árīgu igo magu sīria wapɔ. Eropirā ero majarā masa bajarā igo mera wañorā. <sup>13</sup> Igo eropa wacū ĩagu Jesu igore mojomoro ĩapɔ.

—Orebita, arīpɔ Jesu igore.

<sup>14</sup> Eropa arĩgu sĩridigu ĩgu masa porere eja mohmeripũ. ĩgu eropa mohmepicũ ĩarã iri porere coãrãpũ nũgajañorã.

—Mahgu, yũhũ mũre òpa arãa. Wahgã dojaque, arĩpũ Jesu.

<sup>15</sup> ĩgu eroparĩcũ ta sĩridigu mũrũ wahgã doja, wereniguipũ. Eropigu Jesu ĩgure ĩgu pagore wiapũ. <sup>16</sup> Eropirã erã árĩpehrerã güirã warã Goãmũre umupeo òpa arĩñorã:

—Goãmũ yare weremũhtagũ masitarigu dohpague tamerare mari watope ãhrimi, arĩñorã erã.

—Goãmũ marire ĩgu yarãre itamugũ eratuhami, arĩñorã gajirã.

<sup>17</sup> Eropirã árĩpehrerã Judea yeba majarãre ero turo árĩri macari majarãre Jesu ĩgu iirare masa weresiripehoñorã.

*Ñu waĩyeri masũ ĩgu buherãre Jesure serẽpidorepũ*

*Mt 11.2-19*

<sup>18</sup> Eropi Jesu ĩgu iirare ĩarã Ñure peresu árĩgure wereñorã ĩgu buherã. Eropa erã werecũ peegu perãre ĩgu pohro sihubeo, <sup>19</sup> Jesure serẽpidoregu obeopũ Ñu. Òpa arĩ serẽpidorepũ:

—“Yũ pũhrũ gajigu arigũcumi,” ¿Ñu ĩgu arĩdigu ta ãhriri mũhũ? ¿O gajigure corerãcuri gũa? arĩ serẽpidorepũ Ñu perã ĩgu buherãre.

<sup>20</sup> Eropi erã Jesu pohro eja, serẽpiñorã ĩgure:

—Ñu waĩyeri masũ mũre òpa serẽpidoregu obeoami gũare. “Yũ pũhrũ gajigu arigũcumi,” ¿Ñu arĩdigu ta ãhriri mũhũ? ¿O gajigure corerãcuri gũa? arĩ serẽpiñorã erã Jesure.

<sup>21</sup> Irisubu ta bajarã dorecurãre, watẽa ñajasũnirãre, cuiiri ĩhajabirãre òarã iipũ Jesu. <sup>22</sup> Eropigu Ñu ĩgu obeonirãre Jesu yũhripũ:

—Dohpaguere mũa ĩarare mũa peerare Ñure wererã waque: Òpa arĩque: “Jesu mera cuiiri ĩhajabirã ĩhama. Curimasibirã cuhrima. Cami boanirã òarã wahama. Peejabirinirã peea wahama. Sĩrinirã masa wahama,” arĩ wereque. Eropirãmojomorocurãre òari buherire yũ wererare wereque ĩgure. <sup>23</sup> Eropa arĩ weretuhaja òpa arĩ wereque Ñure: “Yũre peegu ‘Diaye ta ãhrraa,’ arĩgu ĩgu mucubirigu ãhrimi, arĩmi Jesu,” Ñure arĩ wererã waque, arĩpũ Jesu.

<sup>24</sup> Ñu buherã erã wara pũhrũ Jesupũ Ñu árĩricurire werenũgapũ bajarã masare:

—Mũa masa marirogue Ñu pohrogue warã, ero majare taare miru weãcũ ĩarã ejabiribũ mũa. <sup>25</sup> Òari suhricũgũ sãre ĩabiribũ mũa. Òari suhricurã waja pagarire suhri sañarã oparã ya wirigue ãhrima. <sup>26</sup> Masa marirogue ejarã Goãmũ yare weremũhtadipũre ĩarã ejabũ. Diaye ta Ñu Goãmũ yare weremũhtagũ ãhrimi. Gajirã Goãmũ yare weremũhtanirã tauro árĩgu ãhrimi Ñupũ. <sup>27</sup> Iribojegue Goãmũ yare erã gojarapũ Ñure òpa arĩ wereyuyoro:

Mari pagũ ĩgu magũre òpa arĩpũ: “Mũ core mũre wereyubure obeogu iiaa,” arĩmi Goãmũ, arĩ gojañuma iribojeguere Ñure.

<sup>28</sup> “Diaye arĩgu iiaa. Masa árĩpehrerã tauro ãhrimi Ñu. Isubure ĩgu eropa árĩquerecũ ta umaroguere Goãmũ ĩgu opũ árĩroguere árĩpehrerã docanũgagupũ Ñu tauro árĩgũcumi, arĩpũ Jesu masare.

<sup>29</sup> ĩgu eroparĩcũ peerã masa, wajasea corerã mera Ñu ĩgu waĩyenirã árĩrã òpa arĩ pepiñorã Goãmũre: “Goãmũ diaye iigu ãhrimi,” arĩ pepiñorã erã. <sup>30</sup> Fariseo masapũ, judio masare buherã sã Ñu ĩgu waĩyenirã árĩdiabirinirã árĩñorã. Eropirã Goãmũ erãre ĩgu itamudiarire erã gamebiriñorã.

<sup>31</sup> Eropigu Jesu dipaturi werepũ:

—¿Dohpague majarã masa ñehmarano iro dopa ãhriri mua pepicũ? <sup>32</sup> Erã majirã iro dopa ãhrima. Erã majirã doberi duarogue bira doarã, õpa arĩ dũyasoma erãgã erã basi: “Mua bayaburire tarisu gua purirabu. ¿Duhpirã mua mucubiri bayarã aribirari? Eropirã gua burigã ñehamere orerabu. ¿Murũ duhpirã gua mera orebirari?” arĩma dũyasorã. Erã majirã arĩ dũyasorã iro dopa ta iirã õpa arãa mua dohpague majarã. <sup>33</sup> Ñu waĩyeri masu Goãmu ya árĩburire ba duhugu, vinore ihribirimi. Igũ eropa ihribiricũ iarã “Pee masibigu ãhrimi,” arĩrabu mua igũre. <sup>34</sup> Yũru masu Goãmu igũ obeodigu árĩgu yũhu baha ihria. Yũ eropa iicũ iarã õpa arãa mua yũpũre: “Íaque. Ihĩ wũaro bagu merericũgu sã ãhrimi. Wajasea corerã ñero iirã erã wapicũgu ãhrimi igũ,” arãa mua yũre. <sup>35</sup> Eropa masibiriquererã ta gua iirare iarã, Goãmu masirire gua opacũ masirãca mua, arĩ werepũ Jesu erãre.

### *Fariseo masu Simo waĩcũgu ya wihi árĩpũ Jesu*

<sup>36</sup> Fariseo masu Simo waĩcũgu igũ ya wihigue badoregu sihupũ Jesure. Igũ eropa sihucũ Jesu igũ ya wihigue eja, erã bari mesague doajapũ. <sup>37-38</sup> Iri macaguere ñeri iigo árĩpo. Jesu fariseo masu ya wihigue igũ árĩcũ igo peepo. Eropa peego alabastro mera iidirure poresuri dicũdirure aĩ, Jesu pũrũpũ eranũgara pũhrũ orepo. Eropa orego, Jesu guburire igo codeco mera webo, igo poari mera niucóãpo. Igũ guburi bojocũ iha igo igũ guburire mihmi, iri poresuri mera pipeopo. <sup>39</sup> Igo eropa iicũ íagu fariseo masu Jesure sihudigu igũ basi õpa arĩ pepiripũ: “Ígo igũre mohmepiñago ñerire iigo ãhrimo. Ihĩ Jesu Goãmu ya weremũtagu árĩgu irire masiboñumi,” arĩ pepiripũ. <sup>40</sup> Igũ eropa arĩ pepirire masigu Jesu werepũ igũre:

—Simo, dohpague tamerare mũre werediaa, arĩpũ Jesu.

—Buhegu, ¿yũre dohpa arĩ werediari mũhu? arĩ yũhripũ Simo.

<sup>41</sup> Igũ eroparĩcũ Jesupũ õpa arĩ buhebu yũhripũ:

—Opũre perã wajamorã árĩñuma. Yujugu wũaro wajamogu quinientos niyeruseri wajamoñumi. Gajigũpũ merogã cincuenta niyeruserire wajamoñumi. <sup>42</sup> Eropirã erã wajamorire erã wajayegohrabricũ íagu igũ erã wajamorire cãdijicãñumi. ¿Ígu eropiicũ dohpague tamerare nihipũ erã opũre mahitarinũgayuri mũ pepicũ? arĩ serẽpipũ Jesu.

<sup>43</sup> Simo yũhripũ:

—Õbaa, wũaro wajamodigu merogã wajamodigu tauro igũ opũre mahibocumi, arĩpũ Simo.

—Diaye yũhria mũhu yũre, arĩpũ Jesu.

<sup>44</sup> Eropa arĩtuha igũre pipeodigore maji iha, Jesu Simore werenemopũ:

—Ígore íaque mũhu. Mũ ya wihire yũhu ñajarara pũhrũ yũ guburi coeburi decore obirabu mũhu. Igorũ igo ya codeco mera yaha guburire coemo. Pũhrũ igo ya poari mera tucoeamo. <sup>45</sup> Mũpũ yũre bocatĩri mimibirabu. Igorũ ohõ yũ doaropẽ yũ guburire mihmimo. <sup>46</sup> Mũpũ yũ dipurure uyũ mera pipeobirabu. Igorũ yũ guburire poresuri mera pipeoamo. <sup>47</sup> Eropa arĩgu mũre weregu ta iiaa. Igo igo ñero iira baja gohra ãhraa. Eropigu igo ñero iirare cãdijiabũ. Yũ eropa iicũ igo turaro mahiamo yũre. Erã ñero iirare merogã bũjawere guñarãpũ merogã yũre cãdijidorema. Eropirã erã ñero iirare merogã cãdijisũnirã merogã mahima yũre, arĩpũ Jesu Simore.

<sup>48</sup> Eropa arĩtuha igũ igo werepũ:

—Dohpague tamerare mũ ñero iirare cohãbũ, arĩpũ Jesu.

<sup>49</sup> Igũ eroparĩcũ peerã Jesu mera doarã erã basi õpa arĩ wereniguiñorã:

—Ihĩ diaye ta “Ñerire cóãgu iiaa,” arĩmi. ¿Dohpa árĩguno ãhriri igũ ñero iirire cóãgu? arĩñorã erã erã basi.

<sup>50</sup> Eropigu Jesu nomeore ðpa arĩ werepũ:

—Yũre mũ umupeocũ mũre peamegue wabodigore taua. Güiro mariro waque, arĩpũ Jesu igore.

## 8

### *Nome Jesure itamuñorã*

<sup>1</sup> Pũhrũ paga macarigue mũta macarigãgue sãre eja, Goãmũ ĩgu opũ árĩrire, ðari buherire werepũ Jesu. Doce ĩgu buherãpũ ĩgu mera árĩñorã. <sup>2</sup> Eropirã nome sã watẽa ñajasũnirã nome, dorecũnirã nome, Jesu ðarã ĩgu iinirã ĩgu mera árĩñorã. María waĩcũgo Magdalena erã arĩ piyudigo Jesu mera curipo. Igo siete watẽare Jesu ĩgu cóãdigo árĩpo. <sup>3</sup> Juana sã Cuza waĩcũgu Herodere itamudigu marapo sã Jesu mera curipo. Susana waĩcũgo sã gajirã nome mera baja erã gajino opari mera ĩgũre itamuñorã.

### *Jesu oteri masũ queorire werepũ*

*Mt 13.1-9; Mr 4.1-9*

<sup>4</sup> Eropi baja macari majarã Jesu pohrogue gamenereñorã. Erã gamenerera pũhrũ Jesu ĩgu werenigui queori mera erãre werepũ buhebu:

<sup>5</sup> —Oteri masũ otegũ wañumi. ĩgu eropa otecũ gajiyeri ma tũro yuri merejayoro. Eropirã iriyerire masa cãradiuñuma. Eropirã mirimagũ porã bajarã ahri iriyerire bañuma. <sup>6</sup> Eropi gajiyeri utã watope yuri merejayoro. Erore yeba deco mariyoro. Eropiro iriyeri puhri wiriri niguri ñañia wayoro. <sup>7</sup> Gajiyeri pora yucũ watope yuri merejayoro. Pora yucũpũ puhri tiataria wa, oterayeripũre wejẽcãyoro. <sup>8</sup> Gajiyeri ðari yeba yuri merejayoro. Õaro puhri dũcacũyoro. Eropiro baja dũcacũyoro, arĩpũ Jesu.

Eropa arĩtuha ðpa arĩnemopũ:

—Ire ðaro peeque mũa, arĩpũ ĩgu.

### *Jesu werenigui queori mera ĩgu buherire werepũ*

*Mt 13.10-17; Mr 4.10-12*

<sup>9</sup> Pũhrũ ĩgu buherã iri werenigui queorire masidiarã, Jesure serẽpiñorã:

—¿I queori mera dohpa arĩ buhegu iiri mũhũ? arĩ serẽpiñorã erã. <sup>10</sup> Erã eroparĩcũ Jesu yãhripũ:

—Goãmũ ĩgu opũ árĩrire iribojegue majarã erã masibirirare mũare masicũ iimi Goãmũ. Gajirãpũre eropa iibeami ĩgu. Eropigu erãre werenigui queori mera buhea. Yũ eropa iicũ erã yũ buherire peequererã masisome, arĩpũ Jesu ĩgu buherãre.

### *Jesu oteri masũ queorire were amupũ ĩgu buherãre*

*Mt 13.18-23; Mr 4.13-20*

<sup>11</sup> Eropa arĩtuha erãre werenemopũ:

—Õpa arĩ werea i werenigui queorire: Oteriyeri ðari buheri iro dopa ãhraa.

<sup>12</sup> Eropiro ma tũro yuri merejariyeripũ ðari buheri iro dopa ãhraa. Eropiro masa erã ðari buherire peecũ ĩagu watĩpũ ahri, iri buherire masidorebeami masare. ĩgu eropa iibiricũ erã Goãmũre umupeoboñuma. Erã eropa umupeocũ ĩagu Goãmũpũ erãre peamegue wabonirãre tauboñumi. <sup>13</sup> Utã weca yuri merejarayeri ðari buheri iro dopa ãhraa. Eropirã masa ðari buherire pee, mucubiriri mera irire pee aĩma. Eropa pee aĩquererã ta utã weca árĩri yucũ nuguri mariri yucũ iro dopa ta oã masa sã turabeama. Eropa turabirã yaha ðari buherire erã peera dipuwaja gajirã erãre ñero iicũ ĩarã yahapũre duhucãma. <sup>14</sup> Eropi pora yucũ weca yurimerejarayeri ðari buheri iro dopa ãhraa. Eropirã masa ðari buherire peequererã ta, i yeba majare wũaro pepirã, niyerure gamerã, i yeba majare gahmema erã. Eropirã iripũ ðari



buhere cāhmotaa. Iri cāhmotacũ masa Goãmũ gameripũre iibeama. <sup>15</sup> Eropi ðari yeba yurimerejarayeri ðari buheri iro dopa āhraa. Eropirã masa ðari buherire ðaro mera pee peenũrũcãma. Eropirã duhuro mariro Goãmũ ĩgũ gamero dopa ta ðarire iima, arĩpũ Jesu.

*Jesu sihãgodiru queorire buhepũ*

*Mr 4.21-25*

<sup>16</sup> Eropa arĩtuha gaji queori mera buhepũ Jesu.

—Ne sihãgodirure masa sihãgora pũhrũ mátasoro doca dibubeama. Eropirã irirure cama doca dibubeama. Ũmarogue irirure duhpeomi wihigue ñajarã erã ðaro ĩha ñajama ðaro. <sup>17</sup> Mari iiraguere Goãmũre duhmasiya mara. Pũhrũguere árĩpehleri masisũroca. Sihãgodiru ñamire boyoro dopa ta iribojegue erã masibiri-rare masirãcoma masa.

<sup>18</sup> Eropirã mũa peerã ðaro peenũrũque. Őaro peenũrũgũ, ðaro masigũcumi. Peenũrũbigũ “Merogã peea,” ĩgũ arĩquerecũ iripũ dederea waroca ĩgũre, arĩpũ Jesu.

*Jesu acawererã ĩgũre sihuñorã*

*Mt 12.46-50; Mr 3.31-35*

<sup>19</sup> Pũhrũ Jesu pagũ porã erã pago mera ĩgũ pohrogue warã iiriñorã. Masa bajarã árĩcũ ĩgũ pohro ejabiriñorã. <sup>20</sup> Eropigũ yujugũ Jesure werepũ:

—Mũ pago mũ pagũ porã mera disiporogue niguima. Mũre ĩarã ahrañorã, arĩpũ ĩgũ Jesure.

<sup>21</sup> ĩgũ eroparĩcũ ðpa arĩ werepũ Jesu árĩpehlerãre buhebu:

—Goãmũ buherire peerã, irire tarinũgabirã erã ta āhrima yũ pago yũ pagũ porã iro dopa árĩrã, arĩpũ Jesu erãre.

*Jesu miruñere yũsũdorepũ*

*Mt 8.23-27; Mr 4.35-41*

<sup>22</sup> Gajinũ Jesu ĩgũ buherã mera dohodirugue ñaja

—Ina, taribujarã, arĩ, erã árĩpehlerã iriru mera ditarugue taribuja wañorã.

<sup>23</sup> Eropa taribujagũ carĩa wapũ ĩgũ. Erã eropa taribujarisubu turaro miruñe ariyoro. Miruñe aricũ pãgũri wahgã, erãre miucãriyoro. Eropa waro mirimaja guhya árĩyoro erãre. <sup>24</sup> Eropa wacũ ĩha uca wa, Jesu pohro waha, ĩgũre wahgũñorã.

—Buhegũ, mari mirimorã iiaa, arĩñorã erã. Erã eroparĩcũ Jesupũ wahgã, miruñere “Iripẽta weã duhuque,” arĩpũ. Eropa arĩgũ pãgũrire “Yũsũaque,” arĩpũ. ĩgũ eroparĩcũ ta miruñe taria wayoro. Eropiro pãgũri sã yũsũ dija wayoro. <sup>25</sup> Eropa wara pũhrũ Jesu erãre ðpa arĩpũ:

—¿Mũa yũre umupeobeari?

Erãpũ gũi, ĩha uca, ðpa arĩ wereniguiñorã erã basi:

—Cue, ¿ñehmũno masũ āhriri ihĩ? Miruñe, pãgũri sã ĩgũ dorecũ tarinũgabea ĩgũre, arĩñorã erã basi.

*Watẽa ñajasũdigũre ðagũ iipũ Jesu*

*Mt 8.28-34; Mr 5.1-20*

<sup>26</sup> Eropirã erã gajipũ masegue Gerasa majarã ya yebague taribujajañorã. Iri yeba Galilea yeba diaye árĩyoro. <sup>27</sup> Ero Jesu ĩgũ majajanũgarisubu ero majagũ watẽa ñajasũdigũ ĩgũ pohrogue aripũ. ĩgũ yoari boje goroweregũ suhri marigũ árĩgũ, ĩgũ wihiguere ne árĩbirimũripũ. Eropigũ masa goberĩ utã goberĩ watope arĩpũ ĩgũ. <sup>28-29</sup> Eropirã bajasuburi watẽa ĩgũre ñearo mera ĩgũ bũrigã gorowerecũ ĩha masa ĩgũre bihadoboriñorã. Eropigũ ĩgũ peresugue árĩgũ ĩgũ mojotorire guburire comedari mera erã diridigũ árĩqueregũ, ĩgũ iridarire nuapũ. Eropirã watẽapũ ĩgũre

masa marirogue aĩgãñorã. Eropigu ĩgu Jesure ĩhametu turaro gaguinigu, Jesu pohro merejapu. ĩgu eropa iicũ ĩagu Jesupu watẽare dorepu:

—Ihĩ mera áribiricãque. Waque watẽa, arĩpu.

Ĩgu eroparĩcũ peegu watẽa ñajasũdigupu turaro gaguinigu, serẽpipu Jesure:

—Jesu, ɯmaro majagu Goãmu magu, ¿ñehenore iibu iiri muhu yure? Yure ñero iibiricãque, arĩpu watẽa ñajasũdigupu.

<sup>30</sup> ĩgu eroparĩcũ Jesupu serẽpipu ĩgure:

—¿Ñehmuno waĩcari muhu? arĩpu.

Bajarã watẽa ĩgu mera áriñorã. Eropigu õpa arĩpu erãre opagu.

—Watẽa bajarã waĩcua gua, arĩpu watẽa ñajasũdigupu.

<sup>31</sup> —Ehcãri gobegue guare wadorebita, arĩ, turaro serẽñorã watẽapu.

<sup>32</sup> Irisubure ero ɯtãgu gubuye bajarã yesea barã iĩñorã. Erã ero bacũ ĩarã watẽa õpa arĩ serẽñorã Jesure:

—Soã yesea pohrogue wadoreque guare. Erã mera áriđoreque guare, arĩ serẽñorã watẽa masure ñajanirã.

Erã eropa arĩ serẽcũ peegu Jesu erãre yesea pohrogue wadorepu. <sup>33</sup> ĩgu eropa wadorera puhru watẽapu masu mera árinirã waha, yesea pohrogue ejañorã. Erã pohrogue erã ejara puhru yeseapu gorowere dipatũrugue omabuha, ditarugue yuriñaja miri sĩripehrea wañorã.

<sup>34</sup> Yeseare ĩhadibunirãpu yesea eropa miricũ ĩarã, gũi omagã wañorã. Eropa omagãrã macague eja, iri maca majarãre campo majarã sãre erã ĩarare were-siripehocãñorã. <sup>35</sup> Erã eropa werera puhru masa ĩarã wañorã. Eropirã Jesu pohro eja, watẽa ñajasũdigu muru ĩgu suhri sañadigu pee masigu ĩgu ero õaro doacũ ĩañorã erã. Iri áripehrerire ĩarã erã gũi áriñorã. <sup>36</sup> Watẽa ñajasũdigu muru ĩgu õaro áricũ ĩanirã gajirãre erã ĩarare wereñorã. <sup>37</sup> Eropa pee ero majarã Gerasa yeba majarã áripehrerã burigã Jesure gũiñorã. Eropirã ĩgure wadoreñorã. Erã eropa wadorecũ Jesu dohodirugue ñajapu wabu. <sup>38</sup> Watẽa ñajasũdigu murupu Jesu ĩgu waborore ĩha turaro ĩgure serẽripu:

—Mu mera wadiaca, arĩ serẽripu.

<sup>39</sup> ĩgu eroparĩcũ Jesu ĩgure yuhripu:

—Mu ya macague waque. Eropa wagu Goãmu mure õaro iirare wereque gajirãre, arĩpu Jesu.

Ĩgu eropa arĩra puhru ĩgu ya macague ejagu Jesu ĩgure õaro iirare áripehrerãre ĩgu ya maca majarãre werepu.

*Jairo magore õago iipu. Eropa áricũ ne behrego sãre õago iipu Jesu*  
*Mt 9.18-26; Mr 5.21-43*

<sup>40</sup> Sipu masegue Jesu dipaturi ĩgu taribujajacũ ĩarã masa bajarã ĩgure corenirã bocatĩri serẽñorã ĩgure. <sup>41-42</sup> Ero buheri wihi opu Jairo waĩcugu Jesu pohro eja, ĩgu guburi pohro merejapu. ĩgu mago sĩrigo iipo. Igo yujugo ta áriigo doce bojori opago áriipo. Eropigu ĩgu ĩgu ya wihigue Jesure sihgãpu. “Áu,” arĩ, ĩgu mera wapu Jesu sã.

Ĩgu eropa wacũ masa bajarã ĩgure nurusiarã cãriro iĩñorã ĩgure. <sup>43</sup> Eropigo yujugo nomeo doce bojori gohra duhuro mariro eropa behrego ero áriipo. Ero corere duhturuare igo ya niyeru mera áripehrerire wajayeripo igo ocoyodorego. Erã eropa ocoyequerecũ ta muraro ta di waniguicãyoro igore. <sup>44</sup> Eropigo igo Jesu puhru ahri, ĩgu suhriro ojogorore igo ñeacũ igore di wiriniguicãra pehrea wayoro. <sup>45</sup> Igo eropa ñeañacũ Jesu pepigu serẽpipu.

—¿Noa yu suhrirore mohmepiari? arĩpu ĩgu.

Áripehrerã “Mohmepibea,” arĩñorã. Eropirã Pedro sã õpa arĩ yuhriñorã:

—Buhegu, cūhña āhraa. Eropirā masa bajarā mure pēhrecāma. ¿Duhpigū eropa arī serēpiri mūhū? arīñorā erā Jesure.

<sup>46</sup> Erā eroparīcū Jesu yūhripū:

—Dohparagā yū turari mera yujugore dore yūhū cóārare masia. Eropigū yure igo ñeañarare masia, arīpū īgu.

<sup>47</sup> Īgu eroparīcū peego igo duhrimasibigo, naragāgo Jesu pohro merejapo. Eropigo árīpehrerā masa erā peero igo arīpo Jesure:

—Yūhū ñeañabū mure. “Īgure ñeañacū yū dore taria waroca,” arīgo mure ñeañabū. Yū mure eropa ñeañago mata ōago wahabū, arīpo. <sup>48</sup> Igo eropa arītuhajacū Jesu igore werepū:

—Mahgo, yure mū umupeori mera ōago dujaa dohpaguere. Mucubiriri mera waque, arīpū igore.

<sup>49</sup> Īgu eropa arīrisubu Jairo ya wihi árīgu weregu erapū.

—Mū mago síria wahámo. Eropigū ihī buhegare sihubita pare, arīpū īgu.

<sup>50</sup> Īgu eroparīcū peegu Jairore ōpa arī werepū Jesu:

—Būjawerebita. Yure umupeoque. Iri dihtare iique. Mū eropa iicū ōago wagocumo, arīpū Jesu.

<sup>51</sup> Eropa arītuhā Jairo ya wihigue eja, Pedrore, Ñure, Santiagore, dorecūgo pagū sūmarāre aī ñajapū. Gajirāpūre Jesu ñajadorebiripū. <sup>52</sup> Ero árīpehrerā masa erā ñehamere orerā iñnorā. Jesu erāre arīpū:

—Orebiricāque. Iogā síribeamo. Carīgo iimo, arīpū īgu.

<sup>53</sup> Īgu eroparīcū erāpū igo síridigo árīcū masirā “Eroparīcāgu iimi ihī,” arīrā Jesure ĩayeñorā. <sup>54</sup> Eropigū Jesu igo mojtore ñeha, arīpū igore:

—Majigo, wahgāque, arīpū.

<sup>55</sup> Īgu eropa arīcū igo síridigo árīquerego igo síporā goecū masa wapo. Irisubu ta wahgānūgajapo igo. Igo eropa wahgāra pūhrū Jesu igore barire odorepū. <sup>56</sup> Igo eropa īgu masacū ĩarā igo pagū sūmarā ĩhamaria wañorā. Eropigū Jesu irire gajirāre weredorebiripū.

## 9

### *Jesu doce īgu buherāre buhedoregu obeopū*

*Mt 10.5-15; Mr 6.7-13*

<sup>1</sup> Eropi Jesu doce īgu buherāre sihubeo, īgu turarire ópū īgu erāre. Watēare erā cóāburire, dorecūrāre erā ōarā iiburire ópū īgu turarire erāre. <sup>2</sup> Eropa iituhā erāre Goāmū īgu opū árīrīre buhedoregu, dorecūrāre ōarā iidoregu obeopū erāre. <sup>3</sup> Ōpa arī dorepū Jesu erāre:

—Mūa warā gajinore aībiricāque. Tuadire, ajure, barire, niyerure aībiricāque. Yujuñe suhriro ta sañaque. Peñe sañabita. <sup>4</sup> Árīpehrerogue mūare erā carīro ocū iri wihi ta dujanique. Ne warāgue wiriaque iri wihire. <sup>5</sup> Gaji macari majarā mūare erā gamebiricū ĩarā iri macare tarigā waque. Eropa warā mūa guburi maja nicure moje siripique mūa erāre erā ya dipuwajare ĩhmumorā, arīpū Jesu.

<sup>6</sup> Īgu eropa arīra pūhrū īgu buherāpū waha, árīpehreri macarigū masare ōari buherire were curiñorā. Eropirā dorecūrāre ōarā wacū iñnorā.

### *Jesu īgu iirare Herode peepū*

*Mt 14.1-12; Mr 6.14-29*

<sup>7</sup> Eropi Herode Galilea yeba majarā opū Jesu īgu iirare peebeopū. “¿Noa āhriri īgu Jesu?” arīqueregu ne masibiripū. Yujurāyeri ōpa arīñorā Jesure. “Ñu waīyedi mūru dipaturi masa deyogu iicumī. Eropigū Jesu erā arīgu īgu ta āhrimi,”

arĩriñorã gajirã. Erã eroparĩcũ peegu Herode Jesure dohpa arĩ masibiripũ. <sup>8</sup> Eropirã gajirã “Īgu Elia mũru dohpague dehyoagu iimi,” arĩriñorã. Gajirãpũ “Goãmũ ya weremũhtanirã mera majagu árĩcumi daja masa mũrigũ,” arĩriñorã Jesure. <sup>9</sup> Erã eropa arĩ wereniguiquerecũ ta õpa arĩ pepipũ Herode: “Ñu dipurure tabetadoregu wejẽtuhabũ ĩgũpũre yũhũ. ¿Eropigu masa erã werewũagu nihino árĩbocuri ĩgu?” arĩ pepi ĩgu Jesure ĩadiaripũ.

*Jesu masa bajarãre barire ópũ*  
*Mr 14.13-21; Mr 6.30-44; Jn 6.1-14*

<sup>10</sup> Eropi Jesu ĩgu obeonirã ĩgu pohrogue dujaja, erã iirare wereñorã Jesure. Erã weretuhacũ Jesu erã dihtare Betsaidague sihu waripũ. <sup>11</sup> Īgu erã dihtare sihuquerecũ erã warare masirã, masa bajarã nũrsiagãñorã. Jesu ĩgũre erã nũrsiagacũ ĩagu ĩgu bocatĩri serẽpũ erãre. Eropigu ĩgu Goãmũ ĩgu opu árĩrire erãre were, dorecurãre õarã iipũ.

<sup>12</sup> Ñamicague doce ĩgu buherã ĩgu pohrogue eja, Jesure wereñorã:

—Ohõ masa marirogue ãhraa. Õ majaro maja wirigue oã masare obeoque. Carĩmorã erã batuburire amadoreque erãre, arĩñorã erã Jesure.

<sup>13-14</sup> Erã eroparĩcũ Jesu yũhripũ erãre:

—Mũa basi barire oque erãre, arĩpũ.

Īgu eroparĩcũ peerã erã yũhriñorã:

—Cinco pan dipurure, perã ta wai sãre iripẽta opaa mari. Oã masa bajarã erã baburire asũmasiya mara marire, arĩñorã ĩgu buherã.

Bajarã masa erã árĩcũ eropa arĩñorã ĩgu buherã. Eroguere cinco mil mũma árĩñorã. Eropigu Jesu werepũ ĩgu buherãre:

—Yujurãyeri cururi cincuenta gohra doadoreque. Gaji curu sãre erã nũcu ta doadoreque, arĩpũ Jesu ĩgu buherãre.

<sup>15</sup> Īgu eroparĩcũ ĩgu buherã ĩgu dorero dopa ta iĩñorã. Árĩpehrerã masare doadoreñorã. <sup>16</sup> Doadoretuha Jesu cinco pan dipurure, perã wai mera aĩ, mũmarogue ĩhamemuju, Goãmũre “Õhaa,” arĩpũ. Īgu eropa arĩra pũhrũ pan dipurure nuha, ĩgu buherãre masare gueredoregu ópũ. <sup>17</sup> Eropirã erã árĩpehrerã masa baha yapia wañorã. Erã ba dũharare doce puiiri gohra aĩ gameneo mũtudoboñorã ĩgu buherã.

*Mũhũ Cristo Goãmũ ĩgu obeodigu ta ãhraa, arĩpũ Pedro*  
*Mt 16.13-19; Mr 8.27-29*

<sup>18</sup> Yujunũ Jesu yujugu ta Goãmũre serẽgu iipũ. Īgu wereniguirisubũ ĩgu buherã ĩgu pohrogue árĩñorã. Eropigu Jesu serẽpipũ erãre:

—¿Nihino árĩcuri yũhũ, masa erã pepicũ? arĩ serẽpipũ.

Īgu eroparĩcũ peerã ĩgu buherã yũhriñorã:

<sup>19</sup> —“Ñu waĩyedigũ mũru árĩbocumi,” arĩma mũre. Gajirã “Elia mũru árĩbocumi,” arĩma. Gajirã, “Goãmũ ya weremũhtanirã mera majagu iribojegue majagu masa mũriadi árĩbocumi,” arĩma, arĩ yũhriñorã ĩgu buherãpũ ĩgũre.

<sup>20</sup> Erã eropa arĩra pũhrũ Jesu erãre serẽpipũ daja:

—¿Mũapũ pepicũ nihino árĩcuri yũhũ? arĩ serẽpipũ daja.

—Mũhũ Cristo Goãmũ ĩgu obeodigu ta ãhraa, arĩ yũhripũ Pedro.

*Jesu ĩgu sĩriburiñere werepũ*  
*Mt 16.20-28; Mr 8.30-9.1*

<sup>21</sup> Eropi Pedro “Cristo ãhraa mũhũ,” ĩgu arĩrare ne gajirãre Jesu weredorebiripũ.

<sup>22</sup> Eropa weredorebirituhagu õpa arĩpũ:

—Yuhũ masũ Goãmũ ãgũ obeodigũ burigã ñero tarigũca. Eropa ta tariro gahmea yũre. Eropirã pahia oparã, mũrã, judio masare buherã mera yũre gamebirã wejẽrãcoma. Erã wejẽra pũhrũ uhrenũ pũhrũ masa mũriagũca, arĩpũ Jesu erãre.

<sup>23</sup> Pũhrũ arĩpeherrerãre õpa arĩ werepũ Jesu:

—Yujugũ yũ mera majagũ arĩdiagũ, ãgũ gamero iidiarire duhucãgũcumi. Eropigũ yahagũ ãgũ arĩri dipuwaja ñero tarigũcumi. Ñero tariqueregũ ta yahare iiniguigũ arĩgũcumi. <sup>24</sup> Yujugũ masũ ãgũ ya arĩburi dihtare pepigũ dederea wagũcumi. Eropigũ yaha arĩburi yũ gameri dihtare iigũ arĩpeherrerinũri yũ mera umaroguere õaro arĩgũcumi. <sup>25</sup> Yujugũ masũ i yeba majare arĩpeherrerire opaqueregũ peamegue wagũ õarire bocasome. <sup>26</sup> Yujurãyeri yũ buherire werediarã, “Jesu yagũ ãhraa,” arĩdiarã gũhyasĩrirãcoma. Erã eropa iicũ ãagũ yũ sã erãre eropa iirãre gũhyasĩrisãgũca. Yuhũ Goãmũ ãgũ obeodigũ õarã anyua erã goesiriri mera, yũ Pagũ ãgũ goesiriri mera dujarigũ yũre gũhyasĩrinirãre gũhyasĩrisãgũca yũ sã. <sup>27</sup> Diaye arĩgũ tiiaa mũare. Dohpague yujurãyeri mũa õgue arĩrã mũa sĩriboro core Goãmũ ãgũ opũ arĩcũgue ãrãca, arĩpũ erãre.

### *Jesu dupũre gohrotopũ*

*Mt 17.1-8; Mr 9.2-8*

<sup>28</sup> Eropi ocho nũri irire ãgũ werera pũhrũ Jesu Pedrore, Ñure, Santiagore erã dihtare sihurũ. Eropi waha, Goãmũ mera wereniguirã wañorã. Utãgũre mũria wañorã erã. <sup>29</sup> Goãmũre ãgũ serẽrisubu Jesu ãgũ diapo gohrotoa wayoro. Eropiro ãgũ suhri cuimijuri suhri õaro boreri suhri wayoro. <sup>30</sup> Eropa warisubu perã uma ãgũ pohro dehyoañorã. ãgũ mera wereniguirã iĩñorã. Erã iribojegue majarã Elia mũrũ, Moise mũrũ sã arĩñorã. <sup>31</sup> Erã umaro maja goesiriri mera dehyoañorã. Jesu merogã Jerusalengue ãgũ sĩriborore erã Jesu mera wereniguirã iĩñorã. <sup>32</sup> Pedro ãgũ mera majarã sã wũja meretaria carĩrã iĩñorã. Eropa carĩquererã ta uca wahgã, Jesu goesiriri ãha, perã ãgũ mera wereniguirã sãre ãañorã. <sup>33</sup> Moise Elia mera erã warisubu Pedro Jesure õpa arĩpũ:

—Opũ, mari õre arĩcũ õadiaa. Uhre wihigã gohra iirã. Mũ ya wihigã, Moise ya wihigã, Elia ya wihigã iirãca, arĩpũ Pedro.

Eropa arĩqueregũ ta ãgũ arĩrare ne masibiripũ. <sup>34</sup> ãgũ eropa arĩ wereniguirisubu erãre imica curu cãhmotayoro. Eropa cãhmotacũ ãrã erã gũia wañorã. <sup>35</sup> Eropiro imica curu pohecague Goãmũ ãgũ wereniguirã bũsũyoro:

—Ihĩ yũ magũ yũ beyedigũ ãhrimi. Õaro peeque ãgũre, arĩri bũsũyoro imica pohecague.

<sup>36</sup> Eropa arĩra pũhrũ Jesu dihtare ãañorã erã. Pũhrũ erã ãrare gajirãre werebiriñorã. Ne yujugũre werebiriñorã dohpa irisubure.

### *Jesu watĩ ñajasũdigũre õagũ ipũ*

*Mt 17.14-21; Mr 9.14-29*

<sup>37</sup> Gajinũ erã utãgũgue erã دچارicũ bajarã masa Jesure bocatĩriñorã. <sup>38</sup> Eropigũ erã mera majagũ Jesure piyupũ:

—Buhegũ, mũre turaro ire serẽdiaa yuhũ. Yũ magũ yujugũ ta ãhrimi. Eropigũ ãgũre ãabasaque mũhũ. <sup>39</sup> Watĩ ñajasũ goroweniguicãmi. Iri watĩ ãgũre ñeha, gaguiniguicũ ii, tũru naragãcũ ii, sumutua wacũ iimũraa. Eropigũ ihĩ watĩ yũ magũre ñero taricũ ii, ne duhudiabeami ãgũre. <sup>40</sup> Mũ buherãre iri watĩre cóãdoregũ turaro serẽrabũ. Yũ eropa serẽquerecũ ta erã irire ne cóãmasibirama, arĩpũ ãgũ Jesure.

<sup>41</sup> ãgũ eroparĩcũ Jesupũ õpa arĩpũ ero arĩrãre:

—Dohpague majarã mũa ñerã ãhraa. ¿Yũre ne umupeobirigohracãri? Yoari boje mũare buherabũ. ¿Dipẽ yoari boje yũre garibori mũa? arĩ turipũ Jesu.

Eropa arĩtuha watĩ ñajasũdigũ pagũre õpa arĩpũ:



—Mũ magũre aĩgãrique, arĩpũ.

<sup>42</sup> Ĩgũ eropa arĩra pũhrũ Ĩgũ magũ Jesu pohrogue Ĩgũ aririsubu watĩ Ĩgũre yebague mehmereja, tũru naragãcũ iipũ. Ĩgũ eropa iicũ Jesu watĩre cóãpũ. Ĩgũ eropa cóãcũ watĩ ñajasũdigũ òagũ wapũ. Eropĩgũ Jesupũ Ĩgũgãre wiarũ Ĩgũ pagũre.

<sup>43</sup> Árípehrerã masa Goãmũ turari mera Ĩgũ òagũ wacũ iirire ĩarã, Ʃca wañorã.

*Dipaturi Jesu ĩgũ sĩriburiñere werepũ*

*Mt 17.22-23; Mr 9.30-32*

Masa Jesu Ĩgũ iirare ĩha Ʃca wacũ Jesupũ Ĩgũ buherãre òpa arĩ werepũ:

<sup>44</sup> —Dohparagã yũ wereburire cãdijibircãque mũa. Yũhũ masũ Goãmũ Ĩgũ obeodigũ ãhraa. Masa yũre ñeha, gajirãguere yũre wiarãcoma, arĩpũ Jesu.

<sup>45</sup> Ĩgũ eropa arĩquerecũ ta erãpũ Ĩgũ wererire òaro peebiriñorã. Ĩgũ wererare erãre masiya mariyoro. Irisubu ta Goãmũ erãre irire masidorebirinipũ. Eropirã erã gũirã irire Ĩgũre serẽpibiriñorã.

*Jesu buherã erã mera majagũre opũ acudiarĩnorã*

*Mt 18.1-5; Mr 9.33-37*

<sup>46</sup> Pũhrũ Jesu buherã werenigui dũyatorã iĩnorã:

—¿Mari mera majagũ nihinopũ opũ ñajagũcuri? arĩ dũyatorã iĩnorã erã erã basi.

<sup>47</sup> Erã eroparĩcũ Jesupũ erã pepĩrere masigũ, majĩgũre Ĩgũ pohro aĩunugu, Ĩgũ buherãre werepũ:

<sup>48</sup> —Yaha arĩburire iimorã òpa arĩgũgãre bu arĩgũre gamerã yũ sãre gahmea mũa. Eropirã yũre gamerã, yũre obeodigũ sãre gahmea mũa. Mũa mera majagũ mũa pohro majagũ arĩgũ Ĩgũ sã opũ ta arĩgũcumĩ, arĩpũ Jesu.

*Marire ĩhaturibigũ arĩgũ mari mera majagũ ãhrimi, arĩ werepũ Jesu*

*Mr 9.38-40*

<sup>49</sup> Pũhrũ Ñũ Jesure òpa arĩ werepũ:

—Buhegũ, mũ waĩ mera watĩ ñajasũnirãre taricũ iiami yujugũ. Ĩgũre gũa ĩabũ. Ĩgũ mari mera majagũ Ĩgũ arĩbircũ ĩarã Ĩgũre irire iidorebirimũrabũ gũa, arĩpũ Ñũ Jesure.

<sup>50</sup> Ĩgũ eroparĩcũ Jesu Ñũre gajirã Ĩgũ buherã sãre òpa arĩ werepũ:

—Eropa arĩbircãque mũa Ĩgũre. Marire ĩhaturibigũ arĩgũ, Ĩgũ mari mera majagũ ãhrimi, arĩpũ Jesu.

*Jesu Santiagore, Ñũ sã erã wererire gamebiripũ*

<sup>51</sup> Irisubure Jesu Ĩgũ Ʃmũsigue Ĩgũ waboro coregã “Jerusalẽngue wagũra,” arĩpũ Ĩgũ. Eropa arĩgũ wagũ iipũ. <sup>52</sup> Eropirã Jesu core Ĩgũ obeonirã waha, Samaria yeba maja macague eja, ero Jesu Ĩgũ ejaborore amuyudiarĩnorã. <sup>53</sup> Jesu Jerusalẽngue wabu iipũ. Erogue Ĩgũ wabu arĩcũ peerã, iri maca majarã Ĩgũre gamebiriñorã.

<sup>54</sup> Irire peerã Ñũ, Santiago mera wereñorã Jesure:

—Opũ, mũ gamecũ Ʃmaro maja peame mera mũre gamebirinirãre wejẽdorerãra Elia mũrũ Ĩgũ iidiro dopa ta, arĩñorã erã Ĩgũre.

<sup>55</sup> Erã eroparĩcũ maji ĩha turipũ erã perãre:

—Eropa arĩbircãque. Espĩritu Santo yarã ãhraa mũa. Dohpague mũa pepiro dopa ta Ĩgũpũ pepibeami. Yũhũ masũ Goãmũ Ĩgũ obeodigũ i yebaguere arigũ peamegue wabonirãre taugũ aribũ. Masare erã dederecũ iigũ aribiribũ, arĩ werepũ Jesu.

<sup>56</sup> Eropa arĩ weretuha gaji macague Jesu sã carĩrã waha wañorã.

*Gajirã Jesu mera wariñorã*

*Mt 8.19-22*

<sup>57</sup> Maha erã wacũ, yujugũ masũ Jesure werepũ:

—Mũ mera yũhũ wadiaa noho mũ wadiaro, arĩpũ ãgũ.

<sup>58</sup> ãgũ eropa arĩra pũhrũ Jesu yũhripũ:

—Yũ mera aricũ diasa āhraa. Nũgũ majarã diayea erã carĩburi toreri opama. Mirimagũ porã sã erã ya suhri opama. Yũ masũre Goãmũ ãgũ obeodigũpũre sooro mara. Ne yaha wihi mara. Eropirã yũ mera árĩrã ñero tarirãca mũa, arĩ yũhripũ Jesu.

<sup>59</sup> Pũhrũ gajigũre Jesu sihupũ:

—Yũ mera majagũ árĩbu arique, arĩpũ.

ãgũ eroparĩcũ ãgũ yũhripũ Jesure:

—Opũ, yũhũ yũ pagũ sĩricũ yaanigũ wagũra. Pũhrũ mũ mera wagũra, arĩpũ ãgũ.

<sup>60</sup> ãgũ eroparĩcũ Jesu werepũ:

—Yũre gamebirã sĩrinirã iro dopa ta āhrima. Erãpũ sĩrinirãre yaaporo. Eropigũ mũpũ Goãmũ ãgũ opũ árĩrire õari buherire buhegũ arique, arĩpũ Jesu ãgũre.

<sup>61</sup> Eropigũ gajigũ Jesure õpa arĩpũ:

—Opũ, mũ mera wagũra. Yũ acawererãre goeriserenigũ wanigũra dohpa, arĩpũ ãgũ Jesure.

<sup>62</sup> ãgũ eroparĩcũ werepũ Jesu ãgũre:

—Mohmebu mohmediabigũ ãgũ duhpibu árĩbeami. ãgũ iro dopa árĩgũ õpa āhrimi: “Goãmũ yare iidiaa,” arĩqueregũ irire ne iibeami. ãgũ Goãmũ yagũ árĩbodigũ árĩbeami, arĩpũ Jesu.

## 10

### *Jesu setenta buherãre buhedoregũ obeopũ*

<sup>1</sup> Pũhrũ Jesu gajirã ãgũ buherãre setenta buherãre beye, macarigue ãgũ waboro core obeoyupũ. Yujuyeri macarire perã dihta obeopũ ãgũ. <sup>2</sup> Eropa obeogũ õpa arĩ werepũ erãre werenigũ queorire buhegũ:

—Ojodũca baja iri bũgatuhaacũ baja árĩcũ baja mohmeri āhraa. Mohmeri masapũ bajamerãgã āhrima. Eropa ta õari buherire peemorã bajarã árĩcũ wũaro āhraa mari mohmeri. Iri eroparĩquerecũ ta mari masare buhemorã bajamerãgã āhraa. Eropirã õari buherire buhemorãre gajirãre ãgũ obeomorãre Goãmũre serẽque mũa. <sup>3</sup> Waque mũa. Mũare yũ obeogũ oveja iro dopa árĩrãre mũare yeea guarã iro dopa ta ñerã árĩrã watopegue obeogũ iiaa. <sup>4</sup> Niyeru ajure, paga aju sãre, zapature aĩbircãque. Mũa mague curirã gajirãre bocajarã wereniguibircãque. Diaye ta taria waque. <sup>5</sup> Árĩpehreri wirire mũa ñajari wirire i wihi majarãre, “¿Āhriri mũa?” arĩmũhtaque. <sup>6</sup> Iri wihi majarã õaro mera árĩrã gamequeãro mariro erã árĩcũ õadoreque erãre. Ōaro mera erã árĩbircũ iri wihi majarãre irire õadorebita. <sup>7</sup> Yuju wihi ñajanũgarã erã õaro árĩcũ iri wihi ta dujaque. Iri wihi majarã mũare erã ejorire baha ihrituque. Mohmegũre ãgũ wajatarire aĩro gahmea. Eropirã mũa erãre buhera waja erã bari orire aĩque mũa sã. Eropirã yuju wihi ta mũa ejara wihi ta ñajarã, iri macare gajirã ya wirigue árĩcuribircãque. <sup>8</sup> Macaguere mũa ejarã ero majarãpũ mũare gamerã árĩcũ erã bari ejori árĩcũ baque. <sup>9</sup> Ero majarã dorecũrãre õarã iique. Eropirã õpa arĩque ero majarãre: “Goãmũ mari Opũ dohpaguere ãgũ árĩborore wererã iiaa mũare,” arĩque erãre. <sup>10</sup> Gaji macague mũa ejacũ erãpũ mũare gamebiribocoma. Erã gamebircũ ñarã iri maca decogue waha, õpa arĩque erãre. <sup>11</sup> “Gũa nicu imicare guburi maja imicare wejẽsiri cóãrã iiaa mũa gũare gamebiriri dipuwaja ãhmurã,” arĩque. “Eropirã ire guña arĩque,” arĩque. “Goãmũ mari Opũ dohpaguere ãgũ árĩborore mũare wererã arirabũ,” arĩque erãre. <sup>12</sup> Mũare diaye yũhũ arĩgũ iiaa. I mũũ pehrecũguere Sodoma majarã mũra burigã dipuwajacũrãcomã. Erã eropa arĩquerecũ ta tauro mũare gamebirãpũ dipuwajacũrã árĩrãcomã, arĩpũ Jesu.

*Gaji macari majarã Goãmure tarinugarã árĩnorã**Mt 11.20-24*

<sup>13</sup> Pũhrũ Jesu õpa arĩpũ macari majarãre:

—Corazín majarã, mũa ñero tarirãca. Betsaida maca majarã mũa sã ñero tarirãca. Mũa ya macaguere Goãmũ ãgũ turari mera deyro moarire iirabũ yũhũ. Mũa peebirabũ. Iribojegue Tiro waĩcũri macare, Sidón waĩcũri maca sãre ãgũ turari mera iri deyro moarire yũ ii ãhmucũ ãarã ero majarãpũ erã ñero iirire bũjawereboañuma. Eropã iirã õaripũre gohrotoboañuma. Mata erã bũjawererã erã bũjawereri suhrire saña, erã basi pea witũ mera mohsiripeoboañuma erã ñerire bũjawererire ãhmumorã. Mũarũ eropa iibeaa. <sup>14</sup> Eropigũ mũare arĩgũ tiiaa. Goãmũ ãgũ dipuwaja moarinũ arĩcũ Tiro majarã mũra, Sidón majarã mũra tauro mũarũre mũa ñeri dipuwaja dipuwaja moagũcumĩ ãgũ. <sup>15</sup> Capernaum majarã, mũa ejatuharo mera Goãmũ pohrogue wadiaribũ. Eropirã mũa Goãmũ yarũre iidibiricũ mũare Goãmũ peamegue cóagũcumĩ, arĩpũ Jesu.

<sup>16</sup> Eropã arĩtuha ãgũ buherãre wererũ:

—Mũare peerã yũ sãre peema. Mũare gamebirã yũ sãre gamebeama. Eropirã yũre gamebirã, erã yũre obeodigũ sãre gamebeama, arĩpũ Jesu erãre.

*Setenta buherã dujarañorã*

<sup>17</sup> Pũhrũ setenta buherã mucubiriri mera dujarañorã:

—Opũ, mũ waĩ mera mũ turari mera watẽare masaguere gũa wiridorecũ erãpũ gũare yũhriama, arĩñorã erã Jesure.

<sup>18</sup> Erã eroparĩcũ Jesu yũhripũ erãre:

—Umarogue miariñe dijariro dopa ta watĩ ãgũ dijaricũ ãabũ. <sup>19</sup> Peeque. Mũare yũ turarire ohabũ yũhũ. Eropirã añare, corebare, watĩ marire ãhaturigũre arĩpehreri ãgũ turari sãre mũa tarinũgaburire mũare ohabũ yũhũ. Eropirã erã mũare ñero iimasibeama. <sup>20</sup> Yũ eropa oquerecũ ta watẽa mũare erã tarinũgabiricũ ãarã iri dihtare mucubiribita. Ipũre mucubirique. Umarogue Goãmũ yarã erã waĩre ãgũ gojaturipũgue mũa waĩre ãgũ gojatura arĩcũ masirã, iripũre mucubirique mũa, arĩpũ Jesu erãre.

*Jesu mucubiripũ**Mt 11.25-27; 13.16-17*

<sup>21</sup> Irisubure Espĩritu Santo Jesure bũrigã mucubiricũ iipũ. Eropigũ Jesu õpa arĩpũ ãgũ Pagũre:

—Ahũ, mũhũ umaro majarã tauro opũ, i yeba majarã tauro opũ ãhraa. I mũ buherire “Masituhaja gũa,” arĩrãre masicũ iibeaa. Mũ yare masipehobirãpũre masicũ iiabũ mũhũ. Mũ eropa iicũ ãagũ “Õataria,” arãa yũhũ mũre. Eropã ta ãhraa, ahũ. Erã masibirãpũre erã masicũ gahmeabũ mũhũ, arĩpũ Jesu.

Eropã arĩtuha gajirãre õpa arĩpũ:

<sup>22</sup> —Yũ Pagũ arĩpehrerire yũ iiburire apimi yũre. Yũ Pagũ dihta yũre masimi. Yũ dihta ãgũre masia. Yũ beyenirã sã ãgũre masima yũ masidorenirã arĩrã. Erã nũcũ ta yũ Pagũre masia gũa, arĩpũ Jesu.

<sup>23</sup> ãgũ eropa arĩra pũhrũ erã seyaro erã arĩcũ Jesu ãgũ buherãre õpa arĩpũ:

—I arĩpehrerire ãarã mucubirirã ãhraa mũa. <sup>24</sup> Diaye ta ãhraa. Bajarã Goãmũ ya weremũhtanirã, yebari majarã oparã sã dohpague mũa ãarire ãadiariñorã erã sã. Eropirã mũa peeri sãre peediarĩñorã. Erã eropa masidiaquerecũ ta Goãmũ erãre masidorebiripũ irisubugũre, arĩpũ Jesu.

*Õagũ Samaria majagũ queorire wererũ Jesu*

<sup>25</sup> Irisubu ta judio masare buhegũ Jesu pohro eraa, Jesure ãgũ ñero werenigũicũ iidiaripũ:

—Buhegu, ¿yu árĩpehrerinuri Goãmu mera árĩdiagu dohpa iigucuri yũhu? arĩ serẽpipu igu Jesure.

<sup>26</sup> Igu eroparĩcũ Jesu yũhripu igure:

—¿Dohpa arĩ irire wereri Goãmu yare erã gojarapũgue? ¿Goãmu igu arĩ gojarapũguere igu mera õaro árĩdiarire dohpa arĩri mu pepicũ? arĩpu Jesu igure.

<sup>27</sup> Igu eroparĩcũ igu yũhripu:

—Õpa arĩñumi Goãmu: “Turaro mu sĩporã mera, mu turari mera, mu õaro guñari mera Goãmure mahique. Eropigu mu basi mahiro dopa ta mu pohro árĩrã sãre mahique,” arĩ apiñumi Goãmu marire, arĩpu igu Jesure.

<sup>28</sup> Igu eroparĩcũ Jesu yũhripu:

—Diaye ta arãbu mũhu. Irire iique. Eropigu árĩpehrerinuri Goãmu mera árĩgũca mũhu, arĩpu igure.

<sup>29</sup> Igu masare buhegu pu “Ihĩ Goãmu ya dorerire iipehogu ãhrimi,” masa igure erã arĩ pepicũ gamepu. Eropa gamegu igu Jesure õpa arĩ serẽpinemopu:

—¿Noa ãhriri Goãmu yure mahidoregu? arĩpu igu.

<sup>30</sup> Igu eroparĩcũ Jesupu õpa arĩ yũhripu Samaria majagu igu iirare weregu:

—Yujuna Jerusalengue árĩdigu Jericogue wagu maha igu curicũ yajari masa igure ñeañorã. Eropa ñearã igu suhrirore tuwea aĩ, igure turaro pañorã. Eropa parã sĩrimerejacũ gohra duhuñorã igure. <sup>31</sup> Irisubu ta pahi iri mague aripu. Eropa arigu erã padigure ñaqueregu ta maha gajipu masepu igure ñhatarigã wapu. <sup>32</sup> Eropi Goãmu wihi mohmegu sã mojomorocugu pohro eja igure ñha gajipu masepu tarigã wapu. <sup>33</sup> Erã eropiiquerecũ Samaria majagupu ero waha yoañarirogue ñha igure mojomoro ñapu. <sup>34</sup> Eropigu igu mojomorocugu pohro eja, igui deco vino yu mera morera deco mera igu camire pisupu. Pisutuhaja suhri gasiro mera diricãhmotapu igu camire. Tuhaja, igure igu yagu burro weca duhepo, carĩri wihigue aĩ eja pu igure. Ero árĩgu igu Samaria majagu õaro ñhadibupu igure. <sup>35</sup> Gajinu igu carĩri wihi opure pese niyerusere oho, õpa arĩpu: “Ñre ñhadibuque. Iseri sihajabiricũ dipaturi dujarigu wajayepohogura,” arĩpu Samaria majagu wihi opure, arĩpu Jesu.

<sup>36</sup> Eropa arĩtuha judio masare buheguere serẽpipu Jesu:

—¿Oã urerã uma mojomorocugu pohro tarianirã nihinopu árĩyuri mojomorocugure mahigu? arĩpu Jesu.

<sup>37</sup> Igu eroparĩcũ buhegu pu Jesure yũhripu:

—Mojomorocugure itamudigu arĩñumi igure mahigu, arĩpu igu Jesure.

—Mu sã masare eropa ta iigu waque, arĩpu Jesu buheguere.

### *Marta, María sã pohro Jesu curipu*

<sup>38</sup> Eropi Jesu igu buherã mera wacũ, gaji macague erã curicũ, Marta waĩcũgo erãre igo ya wihi ñajaridorepo. <sup>39</sup> Igu ñajara pũhu igo pagu mago María waĩcũgo igu guburi pohro doa igu buherire peepo. <sup>40</sup> Igo eropa iicũ ñago Marta igo mohmeri baja árĩcũ ñago guapo. Eropigo igo Jesure werepo:

—Opu, ¿yũhu yujugo ta mohmecũ yure yu pagu mago igo itamubiricũ õhari mu ñacũ? Igo yure itamudoreque, arĩpo Marta Jesure.

<sup>41</sup> Igo eroparĩcũ Jesu yũhripu:

—Marta, baja mure mohmeri árĩcũ wũaro pepia mũhu. <sup>42</sup> Goãmu igu yare peedoremi. María õarire iibo irire beyemo. Eropigu yure igo peecũ, “Mohmetamugo waque,” arĩbea igo, arĩpu Jesu Martare.

## 11

*Jesu Goãmure serëburire buheru**Mt 6.9-15; 7.7-11*

<sup>1</sup> Yujunu Jesu igu Pagure Goãmure serëgu iipu. Igu serëtuhacũ yujugu igu buherã mera majagu òpa arĩpu:

—Opu, Ñu igu buherãre igu buhediro dopa ta Goãmure serërire gua sãre buheque muhu, arĩpu igu Jesure.

<sup>2</sup> Igu eroparĩcũ peegu Jesu erãre werepu:

—Òpa arĩ Goãmure serëque: “Gua Pagu, umaro majagu muhu òagu ãhraa. Dohpaguere arĩpehrerã weca opu ãhraa. Umaroguere mu dorero erã iiro dopa ta i yeba majarã sã iiporo. <sup>3</sup> Eropigu umuri nucu gua baburire oniguicãque guare. <sup>4</sup> Gajirã erã guare ñero iirare gua cãdijiro dopa ta mu sã gua ñero iirare cãdijique. Eropigu gua ñeri iiborare cãhmotaque. Gua ñeri iiborare tauque,” arĩ serëque Goãmure, arĩpu Jesu erãre.

<sup>5</sup> Puhruquere igu buherãre òpa arĩ buheru werenigui queori mera:

—Yujugu ñami deco igu acaweregu wihigue waha, igure serëpu: “Acaweregu, ureru pan dipure oque yure. <sup>6</sup> Gajigu yu acaweregu curigu aridigu dohparagã yaha wihi erami. Eropiro igure yu oburi mara,” arĩpu igu igu acawereguere. <sup>7</sup> Igu eroparĩcũ igu acaweregu wihi pohecague arĩgu yuhripu: “Yure garibobita. Disiporo bihadiro ãhraa. Yuhu, yu porã mera carĩgu iiaa. Wahgãro bejabirica yure mare barire obudi,” arĩpu igu acaweregu. <sup>8</sup> ¿Dohpa warocuri serëgupuere? Diaye arãa muare. Igu acaweregu arĩqueregu ta barire obudigu wahgãbiripu. Igu eropa wahgãdiabiriquerecũ ta bari serëgupu guhyasiribigu igu yoari boje serënguicũ arĩpehreri igu serëro dopa ta puhru wahgã ogucumi. <sup>9</sup> Eropigu ire muare weregu iiaa: Goãmure mari Pagure serëque. Eropa serërã mu serërire bocarãca. Goãmure eropa serënguicãque. Mu eropa iicũ igu ogucumi. <sup>10</sup> Arĩpehrerã Goãmure serërã airãcoma. Eropirã erã serërare bocarãcoma. Eropigu arĩpehrerã Goãmure eropa serënguiraere igu erãre ogucumi.

<sup>11</sup> “¿Mu porã muare erã pan serëcũ utãyepure obocuri mu? Obiriboya. ¿Erã muare erã waire serëcũ añapure obocuri erãre? Obiriboya. <sup>12</sup> ¿Eropirã mu porã cãreña diuri serëcũ corebapure obocuri mu? Obiriboya. <sup>13</sup> Mu ñerã arĩquererã ta mu porãre òarire omasia mu. Eropigu Goãmuru mu tauro òarire ohomi muare. Igu mari Pagu umaro majagu igu Espiritu Santore ogucumi igure serërãre, arĩpu Jesu igu buherãre.

*—Jesu watĩ turarire opami, arĩ weresãñorã masa**Mt 12.22-30; Mr 3.20-27*

<sup>14</sup> Irisubure Jesu watĩre cóagu iipu. Watĩpu wereniguimasibigu arĩcũ iipu masure. Eropigu watĩ masure Jesu cóacũ masupu wereniguinugapu. Igu wereniguicũ peerã masa bajarã ñhamaria wañorã. <sup>15</sup> Erã eropa ucaquerecũ ta gajirãpu òpa arĩñorã:

—Ihĩ Jesu watëare cóagu Beelzebú waicugu watëa opu igu turari mera cohãmi, arĩñorã gajirã.

<sup>16</sup> Gajirã “Muhu Goãmu igu obeodigu arĩgu Goãmu turari mera deyro moarire ii ñhmuque guare,” arĩriñorã. <sup>17</sup> Erã eropa dorecũ peegu erã pepirire masigu, erãre òpa arĩ werenigui queori werepu Jesu:

—Watĩ ya turari mera watëare cóabeaa yuhu. Yuju maca majarã erã basi gamequearã, iri maca majarã pehrea wabocoma. Eropirã yuju wihi majarã erã basi gamequearã, iri wihi majarã pehrea wabocoma. <sup>18</sup> Eropigu Beelzebú watëa opu igu turari mera igu watëare yure cóãdoregu igu basi igu yarãre cóãbocumi. Eropirã



erā sã wapehrea waboñuma. Mũa yũre òpa arãa. “Ígu Beelzebú turari mera watẽare cohãmi,” mũa yũre arĩ weresãa. <sup>19</sup> Mũa mera majarã sã watẽare cohãma. Eropirã erã “Beelzebú ígu turari mera erãre cohãa,” arĩbeama. “Goãmũ ígu turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye árĩbircũ mũa mera majarã wererãcoma. <sup>20</sup> Eropigu yũpũ watẽare cóãgu Goãmũ ígu Espíritu Santo turari mera iiaa. Yũ eropa cóãcũ ãarã òpa arĩ masirãca mũa: “Goãmũ ígu opũ árĩri i yebaguere árĩtuhaja dohpaguere,” arĩrãca, arĩpũ Jesu.

<sup>21</sup> —Watĩ turagu tarinũgari werediacũ òpa ãhraa, arĩpũ Jesu. —Wihĩ opũ turagu ígu mojo mera ígu wihire ãhadibucũ ígu yare gajirã aĩmasibeama. <sup>22</sup> Ígu eropa ãhadibuquerecũ ta gajigu turatarigu íguere gamequeã, íguere tarinũga, ígu mojore emacã, ígu yare aĩcã gajirãre gueremi. “Watĩ turagu árĩquerecũ yũhũ turatariaigu ãhraa,” arĩgu iipũ Jesu i queori mera. <sup>23</sup> Yujugu yũre gamebigũ yũre ãhaturigu ãhrimi. Yujugu yũre itamubigu yũre teboricacũ iigu iimi, arĩ buhepũ Jesu.

### *Watĩ dipaturi masũguere ñajara queorire werepũ Jesu*

#### *Mt 12.43-45*

<sup>24</sup> Eropigu ígu dipaturi werenigui queori mera òpa arĩ buhepũ:

—Yujugu watĩ masũ mera árĩdi waha deco mariri yeba cuhri, ígu sooborore amaripũ. Eropa bocabigu òpa arĩ pepipũ: “Masũ yũ cóãdi mera dipaturi árĩgu wagũra,” arĩ pepipũ ígu. <sup>25</sup> Eropa arĩgu ígu dujaa waha, ígu cóãdigũre ta masũre bocapũ daja. Íguere bocaboro core masũpũ òagu ñeri marigu arĩpũ. <sup>26</sup> Eropigu watĩ gajirã siete watẽare ígu tauro ñerãre sihugũ wapũ. Ígu eropa sihucũ erã árĩpehrerã watẽa masũ mera árĩñorã. Eropigu masũpũ ero core yujugu watĩre opagu ñetariaigu árĩripũ. Dohpaguepũre bajarã watẽare opagu árĩgu, ero core ígu árĩdiro tauro ñegu dujarũ, arĩpũ Jesu.

### *Jesu mucubirire werepũ*

<sup>27</sup> Irire ígu eroparĩcũ masa watope árĩgo Jesure arĩpo busũro mera:

—Mũre porãcũdigo, mũre mihudigo mucubirigo ãhrimo, arĩpo Jesure.

<sup>28</sup> Igo eropa arĩtuhacũ peegu Jesu igore yũhripũ:

—Goãmũ wereniguirire peerã ígu dorerire iirãpũ erã árĩrãcoma mucubirirã, arĩpũ Jesu igore.

### *Masa ñerã Jesure Goãmũ turari mera deyoro moarire iidoreriñorã*

#### *Mt 12.38-42; Mr 8.12*

<sup>29</sup> Eropi bajarã masa Jesu pohro erã eracũ, ígu erãre werenemopũ:

—Dohpague majarã ñerã ãhrima. Yũ diaye arĩgu árĩcũ mũa masidiarã Goãmũ turari mera deyoro moarire iidoreraa yũre. Mũa eropa dorequerecũ ta Jona iribojegue majagu ígu iira dihtare ii ãhmugũcumĩ Goãmũ masare. <sup>30</sup> Jona Goãmũ yare weremãhtadigu árĩgu ígu Ninive majarãre ígu masicũ iidiro dopa ta yũhũ Goãmũ ígu obeodigu masicũ iiaa dohpague majarãre. <sup>31</sup> Dipuwaja moarinũ árĩcũ iribojegue majago opo bũro sur majago bũro igo bũro wahgãnũga mũare dohpague majarãre weresãgocumo. Igo Salomo opũ ígu masirire peediago yoarogue aridigo Salomore peego aripo. Dohpague mũa watopere Salomo tauro masigu ãhraa. Yũhũ mũa mera árĩquerecũ mũa yũ masirire peediabeaa. Mũa eropa peediabirira waja igo opo bũro mũare “Ñerã ãhrima,” arĩ weresãgocumo. <sup>32</sup> Eropa ta dipuwaja moarinũ árĩcũ Ninive maca majarã mũra sã mũare dohpague majarãre “Ñerã ãhrima,” arĩ weresãrãcoma erã. Jona erãre Goãmũ yare ígu werecũ peerã, erã ñerire bũjawere, òarire gohrotonirã árĩñorã erãpũ. Dohpague mũa watopere Jona tauro árĩgu ãhraa yũhũ. Yũhũ Goãmũ yare werequerecũ mũa ñero iirare bũjawerebeaa. Eropirã Ninive majarã mũra mũare ñerire bũjawerebirãre weresãrãcoma, arĩ werepũ Jesu.

*Masa erã pepiro dopa iima, arĩ werepũ Jesu**Mt 5.15; 6.22-23*<sup>33</sup> Eropigũ buhenemogũ õpa arĩpũ erãre:

—Masa sihãgodirure sihãgorã dibubeama. Irirure sihãgorã mátasoro docague dibubeama. Irirure umarogue duhpomi wihigue ñajarirã erã ñha ñajama õaro.

<sup>34</sup> “Mari cuiiri mari dũpũre sihãgodiru iro dopa ta ãhraa,” arĩ werediacyũ õpa ãhraa. Mũa pepiro dopa ta iiaa. Mũa õaro mera pepirã árĩrã õarire iiaa. Mũa ñero pepirã árĩrãpũ ñeri dihtare iiaa. <sup>35</sup> Eropirã õaro iique. Mũa pepirigue ñero árĩbiricãporo.

<sup>36</sup> Tuhaja mũa pepirigue õari árĩcũ, ñeri ne maricũ õari dihtare pepirãca. Mũa pepirigue õari árĩcũ mũa õarire iirãca, arĩ buhepũ Jesu.

*Fariseo masare, judio masare buherã sãre Jesu tuhri werepũ**Mt 23.1-36; Mr 12.38-40; Lc 20.45-47*

<sup>37</sup> Jesu ñgũ buhetuhajacyũ ñagũ fariseo masũ ñgũre ñgũ ya wihigue badoregũ sihurũ. Eropigũ Jesu ñgũ ya wihigue ñaja, erã baro erã mera doajapũ. <sup>38</sup> ñgũ eropa dojacũ fariseo masupũ Jesure ñhanurũgũ judio masa mojo coeniguiro dopa ta ñgũ mojo coebiricũ ñagũ õpa arĩ pepirũ: “Cuena. ¿Ihĩ duhpigũ gũa iro dopa mojo coebeari?” arĩ pepirũ. <sup>39</sup> ñgũ eropa arĩ pepicũ masigũ Jesu ñgũre werepũ:

—Mũa fariseo masa mũa dorero dopa ta mũa ihririparire, soropari sãre mũa coeweaa mũa õarire iirire ii ñhmudiarã. Eropa coequererã ta mũa sĩporãripũre coebeaa. Eropirã mũa árĩricũri mũa pepiripũre ne õarire gohrotobea. Mũa pepiriguere gajirã yare yajadiarire ñeri dihta ãhraa. <sup>40</sup> Pee masibirã ãhraa mũa. Goãmũ mũa dũpũre iigu mũare pepiri sãre iipũ. ¿Iirire masibeari mũa? <sup>41</sup> Eropirã mũa Goãmũ ya árĩburire iidiarã mũa pepirire õarire gohrotomũhtaque. Mũa eropa iira pũhrũ õarire iirã árĩrãca.

<sup>42</sup> “Mũa fariseo masa ñero tarirãca. Bari õaro suriburi sarire aĩ deara pũhrũ diez quẽri iiaa. Tuhaja yujuquẽ ta Goãmũ wihigue aĩgã apia Goãmũ dorero dopa ta. Eropa iri dorerire iiquererã ta diaye iirire, Goãmũre gamerire mũa ne guñabeaa. Dũcare mũa aĩrare merogã Goãmũ wihire apicũ õhaa. Eropa iirã õpa iinemoque: Diaye iirire, Goãmũre gameri sãre iique mũa.

<sup>43</sup> “Mũa fariseo masa ñero tarirãca. Buheri wihigue árĩrã õari doari dihtare gahmea mũa. Doberi duarogue masa mũare õaro umupeori mera bocatĩri serẽcũ gahmea mũa.

<sup>44</sup> “Mũa judio masare buherã, fariseo masa sã mũa gũyaricũrã ãhraa. Ñero tarirãca mũa. Masa gobe dibura gobe iro dopa ta ãhraa mũa. Iri gobe pohro masa tarigãrã pohecague boanirã árĩcũ masibeama. Eropa ta masa mũa pohro árĩrã mũa pepirigue ñeri árĩcũ masibeama erã, arĩpũ Jesu erãre.

<sup>45</sup> ñgũ eroparĩcũ peegũ judio masare buherã mera majagũ Jesure werepũ:

—Buhegũ, irire arĩgũ, gũa sãre ñero arĩgũ iica mũhũ, arĩpũ ñgũ Jesure.

<sup>46</sup> ñgũ eroparĩcũ Jesu yũhrĩpũ:

—Diaye ta ãhraa. Mũa masare buherã sã ñero tarirãca. Mũa gajirãre erã bocatĩubiririre iidorea erãre. Eropa dorequererã mũapũ erãre ne merogã itamubeaa iri dorerire erã iiboro dopa.

<sup>47</sup> “Eropirã mũa ñero tarirãca. Goãmũ yare weremũhtanirã mũra ya masa goberire õaro amuraa mũa erãre umupeoro dopa ta iirã. Mũa eropa iiquerẽcũ ta iribojegue majarã mũa acawererãpũ erãre wejẽñuma. <sup>48</sup> Erãpũ Goãmũ ya weremũhtanirãre erã wejẽdiro dopa ta mũa sã iiboya. Eropirã dohpaguere erã masa goberire amuraa mũa. Eropa amurã mũa acawererã erãre wejẽrere guñaa mũa. Erã eropa wejẽrere guñarã “Õaro iĩñuma,” arĩraa mũa, arĩpũ Jesu.

<sup>49</sup> “Eropigu Goãmũ ïgu masiri mera õpa arĩ wereyuñumi: “Yahare weremũhtamorãre yũ buherire buhemũhtamorã sãre obeogura erãre. Eropirã erã yũ obeorãre gajirãre wejẽ, gajirãre ñero iirãcoma,” arĩyuñumi Goãmũ, arĩpũ Jesu. <sup>50-51</sup> I yebare Goãmũ ïhacũnugura pũhrũ Caĩnpũ Abelre wejẽñumi. Ero pũhrũ Goãmũ yare weremũhtanirãre wejẽñuma. Pũhrũ Zacariãre mũa acawererã mũra ta ïgũre wejẽñuma. ïgu Goãmũ wihi pohro Goãmũ ya árĩburire waimarã soeburi mesa pohro árĩcũ mũa acawererã ïgũre wejẽñuma. Árĩpehrerã erãre erã wejẽra dipuwaja dohpague majarã dipuwajacurãcoma. Eropa ta ãhraa. Mũare ta arĩgu iiaa. Árĩpehrerã erãre erã wejẽra dipuwajare dohpague majarãre Goãmũ dipuwaja moagucumi.

<sup>52</sup> “Mũa masare buherã, mũa ñero tarirãca. Goãmũ masirire ïgu gojarare opaquererã ta gajirãre werebeaa mũa. Mũa basi Goãmũ yare peebeaa. Eropirã gajirã ïgu yare erã peediaquerecũ ta irire mũa erãre peedorebeaa, arĩpũ Jesu erãre.

<sup>53-54</sup> ïgu eroparĩcũ peerã judio masare buherã, fariseo masa sã ïgu mera guarã ïgũre ñero wereniguiñorã. Eropirã Jesu ïgu ñero arĩ yũhrĩcũ peediarã, erã serẽpinũrũñorã ïgũre weresãdiarã.

## 12

### *Erã gũyarire Jesu werepũ*

<sup>1</sup> Eropi Jesu pohro masa bajarã gohra gamenereñorã. Cũhña taricãyoro. Ero Jesu ïgu buherãre õpa arĩ werepũ:

—Õaro guña masique mũa. Fariseo masa erã pan bugacũ iiburire ïarã õaro masique. Erã gũyarire weregu iiaa. <sup>2</sup> Masa erã yayasãrãre pũhrũ masirãcoma. Erã dibura sãre gajirã masirãcoma. <sup>3</sup> Eropiro gajirã peebirogue mũa wereniguirare õaro masicũ Goãmũ weregucumi. Bihara taribugue gajigũre erã yayarogã erã arĩrãre masa bajarã watope masicũ iigucumi Goãmũ.

### *Masa erã gũibure werepũ Jesu*

#### *Mt 10.26-31*

<sup>4</sup> Eropigu Jesu werenemopũ erãre:

—Diaye arĩgu iiaa mũare. Masũre wejẽrã wejẽtuha dipaturi erã wejẽdigũre ñero iimasibeama. Eropirã mũare wejẽdiarãpũre gũibiricãque. <sup>5</sup> Dohpaguere mũa gũibure mũa umupeobure weregura. Goãmũpũre gũu umupeoque. ïgu mũa sĩrira pũhrũ peamegue cóãmasimi mũare. Eropa ta ãhraa. Diaye arĩgu tiiaa. Goãmũpũre gũu umupeoque.

<sup>6</sup> Cinco mirua waja marima. Eropa waja mariquerecũ ta erãgãre Goãmũ ïhadibumi. Ne cãdijibeami erãre. Mirua tauro Goãmũ ïhadibumi mũapũre. <sup>7</sup> Eropigu mũa poari sãre ne yuju poadagã dũhyaro mariro masipehomi Goãmũ. Eropa ta mũa árĩricũri sãre masipehomi. Eropa masigu mũare ïhadibuniguicãmi. Miruare ïgu mahiro tauro mũapũre mahimi Goãmũ. Eropirã ïgũre umupeorã gũibiricãque mũa, arĩpũ Jesu.

### *Jesure mũa umupeorire wereque masare, arĩpũ Jesu*

#### *Mt 10.32-33; 12.32; 10.19-20*

<sup>8</sup> Eropi Jesu werenemopũ:

—Mũare arĩgu iiaa. Yujugu “Jesu yagu ãhraa,” masare ïgu arĩ werecũ ïagu yũhũ Goãmũ ïgu obeodigu sã “ïgu yahagu ãhrimi,” arĩgũca Goãmũ yarã anyuare. <sup>9</sup> Yujugu masare gũigu yũre “Jesucristore masibeaa,” masare arĩ weregũre yũ sã “ïgũre masibeaa,” arĩ weregũca anyuare.

<sup>10</sup> “Yũ masare Goãmu ïgu obeodigure ñero arĩ erã wereniguicũ iri ñerire Goãmu cãdijimasimi. Eropa cãdijiqueregũ ta Espĩritu Santopũre erã ñero arĩ wereniguicũ irire ne Goãmu cãdijisome.

<sup>11</sup> “Mari buheri wirigue oparã pohro gajirã mũare aĩ ñaja weresãrãcoma. Erã eropa weresãcũ mũa arĩ cãhmotaburire ne wũaro pepibircãque. <sup>12</sup> Irisubu ta Espĩritu Santo mũa wereburire mũare weregũcumi, arĩpũ Jesu.

*Doberi opũ queorire werepũ Jesu*

<sup>13</sup> Eropi masa watope árĩgu Jesure õpa arĩ werepũ:

—Buhegu, gua pagũ ïgu sĩrira pũhrũ ïgu ya árĩra guare dujaa. Eropigu yũ tĩgũre irire yũ sãre queoro dũca wadoreque, arĩpũ ïgu Jesure.

<sup>14</sup> ïgu eroparĩcũ Jesu yũhripũ:

—Ne irinore dũca wabuno árĩbeaa yũhũ, arĩpũ Jesu ïgũre.

<sup>15</sup> Eropa arĩtuha Jesu árĩpehrerãre werepũ:

—Õaro iique mũa. Doberire, gajino sãre gametaribircãque. Baja opaquererã ta iri mera ta mucubirituhajabeaa mari, arĩpũ Jesu.

<sup>16</sup> Eropa arĩtuha Jesu erãre i queori mera werepũ:

—Doberi opũ õari yebare opapũ. Eropiro iri yebare ïgu oteri õaro dũcacũyoro.

<sup>17</sup> Eropigu ïgu, ïgu basi õpa arĩ pepiripũ: “Iri dũca yũhũ diburi wihire ne sihasome. <sup>18</sup> Dohpaguere õpa iigũra. I wihi dohpague yũ dibumũhtara wihire cóãcã, dohpaguere mũra wihi tauro mama wihipũre wũari wihi iigũra. Iri wihire yaha oteri dũcare, árĩpehrerire dibugũra. <sup>19</sup> Yũ eropa iira pũhrũ õpa arĩ pepigũra yũ basi: ‘Yũ árĩpehreri opagũ ãhraa. Õaro soogũra. Eropigu baha, ihri, mucubirigũra,’ arĩ pepigũra yũ basi,” arĩ pepiripũ ïgu basi. <sup>20</sup> ïgu eropa arĩ pepiquerecũ Goãmu ïgũre werepũ: “Mũhũ ne pee masibigu ãhraa. Dohpagã ñami ta mũhũ sĩrigũca. Mũ eropa wacũ mũ ya mũ mahira dederea waroca mũre,” arĩpũ Goãmu ïgũre, arĩpũ Jesu masare.

<sup>21</sup> Irire arĩgu masare õpa arĩ werepũ Jesu:

—Eropa ta warãcoma doberi oparã erã Goãmũre guñabirã. Baja doberire, niyerure erã ya árĩburi dihtare diburã, Goãmũre guñabirã erã mojomorocũrã iro dopa árĩrãcoma erã Goãmu ïgu ïacũ. Eropigu Goãmu erãre ñhasũabeami, arĩpũ Jesu.

*Goãmũ ïgu porãre ñhadibumi, arĩpũ Jesu*

*Mt 6.25-34*

<sup>22</sup> Eropi Jesu ïgu buherãre õpa arĩ werepũ:

—Ire mũare arĩgu iiaa: Mũa barire, suhri sãre wũaro guñaricũbircãque. <sup>23</sup> Goãmũ mũare deyoro moagu bari dihtare bamorãre suhri sañamorã dihtare iibiriñumi mũare. Mũa iri dihtare guñacũ gamebeamĩ. <sup>24</sup> Mirimagũ porãre Goãmũ ïgu ñhadiburire masique. Erã poeri moorã ãhriima. Eropiro erã bari dihburi wiri erãre mara. Goãmũpũ erãre erã baburire ohomĩ. Mirimagũ porã tauro mũapũre mahimi Goãmũ. Eropigu mũa sãre ñhadibugũcumi ïgu. <sup>25</sup> Wũaro mũa pepiri mera iri mũare pagarã wacũ iibeaa. Eropiro mari wũaro pepiri duhpiburi árĩbeaa. <sup>26</sup> ¿Eropirã wũaro mũa pepiri duhpiburi árĩbiriqũrecũ ta, duhpirã mũa baburire, mũa ihriburire, mũa sañaburire wũaro guña bũjawere pepiri mũa?

<sup>27</sup> “Nũgu maja gorire pepique. Iri gori ne iiro mariro õari goricũa. Iri gori õari suhri iro dopa õari gori dehyoa. Salomo opũ mũrũ õari suhri opagũ ïgu árĩquerecũ ta iri goripũ ïgu ya suhri tauro õari dehyoa. <sup>28</sup> Iri gorire õari gori gocũ iimi Goãmũpũ. ïgu eropa iiquerecũ ta iri goripũ bajamenũrigã árĩra pũhrũ ñaidija pehrea wahaa. Merogã ãhri gajinũ peamegue soe cóãcãma. Iri eropa mata pehrequerecũ ta iri gorire iri õari gori árĩcũ iimi Goãmũ. Eropigu Goãmũ iri gorire ïgu õari gori árĩcũ ïgu iidiro dopa ta tauro mũa sãre õaro iigũcumi. Suhrire ogũcumi. Daberogã Goãmũre



umupeoa mua. <sup>29</sup> Eropirã mua baburire, mua ihriburire wuaro guñabiricãque. <sup>30</sup> Goãmure masibirãpũ i yeba majarãpũ irire eropa amaniguicãma. Mari Pagũ umaro majagũ árĩpehreri mua gamerire masimi. Īgũ eropa masicũ mua ya árĩburire wuaro guñabiricãque. <sup>31</sup> Goãmũ mua opũ Īgũ árĩborore gamemuhtaque mua. Mua eropa iira pũhrũ Goãmũpũ mua gameri duhyacũ ogũcumĩ, arĩpũ Jesu.

*Umarogue mari baja opaa, arĩ masia mua, arĩpũ Jesu*

*Mt 6.19-21*

<sup>32</sup> Eropigũ erãre werenemopũ:

—Yũ mahirã, bajamerãgã árĩquererã güibiricãque mua. Goãmũ Īgũ opũ árĩrore Īgũ mera mua árĩcũ gahmemi Īgũ. <sup>33</sup> Eropirã mua yare duapehoque. Irire duacã, iri niyerure mojomorocurãre oque. Eropirã umaro maja Goãmũ ya árĩburire mohmeque. Eropa iirã umaro maja mua wajatari ne pehresome. Umarogue mua ya árĩri ne pehrebeaa. Eroguere mua yare aĩmasibeami yajari masũ. Eropirã mega sã irire tuamasibeamã. <sup>34</sup> Umarogue mua ya árĩcũ Goãmũ ya dihtare pepirãca mua, arĩpũ Jesu.

*Jesu Īgũ dujariborore coredorepũ Īgũ yarãre*

<sup>35-36</sup> Eroparĩtuhaja erãre werenemopũ daja:

—Mua yare amuyunirã iro dopa árĩrã yahare eropa iiniguirã árĩrã coreque yũ dujariborore. Mohme corerã erã opũ mojoto diriri bosenugue Īgũ wacũ Īgũ dujariborore erã cohrema. Erã eropa corero dopa ta yũ dujariborore coreque mua sã. Opũ Īgũ ya wihigue eraa, disiporore Īgũ dotecũ peerã erã mata pãgũ acuma Īgũre. <sup>37</sup> Mohme corerã erã opũ eracũ Īgũ gamero dopa ta iiyurã árĩrã mucubirirã árĩrãcoma. Erã eropa iicũ ĩagũ erã opũpũ mohme coregũ iro dopa gohrotogũcumĩ. Eropigũ mohme corerãre doadore, Īgũ erãre barire duhpeogũcumĩ. <sup>38</sup> Īgũ erarisubu ñami deco árĩcũ, o boyorogue árĩquerecũ mohme corerãpũ Īgũ erarisubure Īgũre õaro corerã árĩrã, mucubirirã árĩrãcoma erã. <sup>39</sup> Ire guñaque mua. Wihĩ opũ yajari masũ Īgũ eraborore masigũ, Īgũ yajari masure coregũ ñajadorebiriboñumi. <sup>40</sup> Eropirã mua sã coreque. Yũhũ masũ Goãmũ Īgũ obeodigũ guñaña mariro arigũca. Eropirã yahare eropa iiniguirã árĩrã yare coreque mua, arĩpũ Jesu erãre.

*Gajigũ mohme coregũ Īgũ opũre Īgũ umupeopũ. Gajigũpũ umpeobiripũ, arĩ werepũ Jesu*

*Mt 24.45-51*

<sup>41</sup> Īgũ eroparĩcũ Pedropũ serẽpipũ Jesure:

—Opũ, ¿i queorire weregũ guare arĩgũ iiri? ¿O árĩpehrerãre eropa arĩri? arĩpũ Pedro.

<sup>42</sup> Īgũ eroparĩcũ Jesu werenigui queoriñe mera õpa arĩ buherũ erãre:

—Mohme coregũ Īgũ opũre umupeogũ pee masigũ õpa ta ãhrimi. Opũ curigũ wagũ, mohme coregũre Īgũ wihire apimi. Īgũ apigũpũ doregũ árĩgũcumĩ. Eropigũ barisubu árĩcũ gajirã mohmeri masare barire gueremi. <sup>43</sup> Eropigũ opũ Īgũ ya wihigue dujarami. Īgũ opũ eracũ mohme coregũpũ Īgũ opũ Īgũ dorediro dopa ta iipehodigũ árĩgũ, Īgũ mucubirigũ árĩgũcumĩ. <sup>44</sup> Diaye arĩgũ iiaa mũare. Īgũ eropa iicũ ĩagũ Īgũ opũ árĩpehreri Īgũ yare ĩhadibugũ apigũcumĩ Īgũre daja. <sup>45</sup> Ñegũ mohme coregũpũ õpa ta ãhrimi. “Yũ opũ yoja deyobeami,” arĩmi. Eropa arĩgũ gajirã mohme corerãre mũare, nome sãre pami. Eropigũ wuaro baha, ihri, meremi. <sup>46</sup> Īgũ eropa iirisubu guñaña mariro Īgũ opũ dujaragũcumĩ. Īgũ dujararinũre ne masibeamĩ mohme coregũ. Eropa dujaragũ ñegũ Īgũ iirare pee Īgũre ñero dipuwaja moagũcumĩ. Eropigũ Goãmũre tarinũganirãre Īgũ cóãdiroque Īgũre cóãgũcumĩ.



<sup>47</sup> “Eropigu mohme coregu ïgu opu gamerire masigu árĩqueregu ta irire ïgu iibiricũ, ïgu ðaro ïgu mohmebiricũ, ïgu opu ïgare burigã dipuwaja moa pagucumi ïgare. <sup>48</sup> Gajigu mohme coregupu ïgu opu gamerire masibigu árĩcũ ïgu opu ïgare daberogã ñari ïgu eropa árĩri dipuwajare pagucumi. Goãmu ïgu gamerire masicũ iimi masare. Eropiro masigure yũhriro gahmea. Eropiro ðaro masigure ðaro yũhriro gahmea, arĩpu Jesu.

*Jesu masare game dũca waricũ iimi*

*Mt 10.34-36*

<sup>49</sup> Eropa arĩtuha Jesu erãre werepu daja:

—Peame soewearo dopa ta yũhu i yebare masa erã ñero iirire cóãgu arigu iibu. Dohpague ta masa árĩpehreri ñeri marirã árĩcũ burigã gahmea yũhu. <sup>50</sup> Yũhu ñero tariguca. Yũ eropa ñero tariburire coregu, ñero siporãcua yũhu. <sup>51</sup> ¿Dohpa arĩ pepiri mua yure? Yũhu i yebaguere buhegu aricũ yũ buheri mera “Masa ïhaturisome pare,” ¿arĩ pepiri mua? Eropa árĩbeaa. Mũare arĩgu iiaa. Masa yũ buherire peerã, pe curu erã basi game dũca warirãcoma. Yujurãyeri yũ buherire peerãcoma. Gajirãpu irire gamebirã erãre ïhaturirãcoma. Eropirã yujuro mera árĩsome masa. <sup>52</sup> Eropirã yuju wihi majarã sã cinco masa yũ buherire peerã, pe curu erã basi game dũca warirãcoma. Yuju curu urerã, gaji curu perã árĩrãcoma. <sup>53</sup> ïgu pagu ïgu magure ïhaturigucumi ïgu yaha buherire peecũ. Gajigu magu sã ïgu pagure ïhaturigucumi. Eropigo igo pago igo magore ïhaturigocumo. Gajigo mago sã igo pagore ïhaturigocumo. Eropigo igo mũñeco igo bepre ïhaturigocumo. Gajigo bepo sã igo mũñecore ïhaturigocumo. Eropa warãcoma yaha buherire erã peecũ, arĩpu Jesu.

*Jesu “Mua yũ iirire ïaquererã yure masibea,” arĩ werepu Jesu masare*

*Mt 16.1-4; Mr 8.11-13*

<sup>54</sup> Eropi Jesu masare bajarãre ðpa arĩ werepu daja:

—Abe ñajarogue imica cururi ïarã, “Mata deco ariroca,” arãa mua. Mua eropa arĩra pũhrũ deco ahraa. <sup>55</sup> Eropirã surgue miruñe aricũ “Asirinũ árĩroca,” arãa mua. Mua eropa arĩra pũhrũ irinu asia. <sup>56</sup> Mua gũyaricũrã ãhraa. Yebare ïarã, umarore ïarã “Õpa waroca,” arĩ masia mua. Õarinũ árĩborore, ñerinũ árĩboro sãre masia mua. ¿Eropa ðaro masiquererã ta, duhpirã dohpague yũ Goãmu turari mera yũ mũare ïhmuquerecũ ta ne irire ðaro masibeari mua? arĩpu Jesu.

*Mũare ïhaturigu mera mua gamequeãrare mua basi amuque, arĩ werepu Jesu*

*Mt 5.25-26*

<sup>57</sup> Eropa arĩtuhaja ðpa arĩ werenemopu:

—¿Mua diaye iiburire masibeari mua dohpa? <sup>58</sup> Gajigu mũre weresãgu wagu dipuwaja moadoreri wihigue wadorebocumi. Erogue ejaboro core “Dipaturi mũre eropa iisome,” arĩ game amuque. Mũhu ïgare amubiricũ mũre ïgu dipuwaja moadoreri wihigue aĩgãbocumi mũre. Eropigu dipuwaja moadoregupu mũre surarare ïgu wiacũ, mũre surara peresu iirãcoma. <sup>59</sup> Mũre arĩgu iiaa. Ne erã wajayedorerare mũ wajayepohocũgue wiriguca mũhu, arĩpu Jesu.

## 13

*Mua ñeri iirare bujawere, ðarire gohrotoque, arĩ buhepu Jesu*

<sup>1</sup> Irisubure bajamerãgã masa Jesure ðpa arĩ wereñorã:

—Galilea majarã Goãmure waibugure wejẽ, erã soe muju umupeorisubu Pilatoru erãre wejẽpu. ïgu eropa wejẽcũ waibugũ di mera masa di morera wayoro, arĩ wereñorã erã Jesure.

<sup>2</sup> Erã eropa weretuhajacũ Jesu yũhripu:

—¿Galilea majarã Pilato ïgu wejënirã murare dohpa arĩ pepiri mua? ¿Erã eropa sïrirã gajirã Galilea majarã tauro ñerã árïra dipuwaja sïriyuri? <sup>3</sup> Árïbeaa. Mũare arïgu tiiaa. Mũapũ ñerire bũjawerebirã, õaripũre gohrotobirã, mua sã sïrirã peamegue warãca. <sup>4</sup> Eropirã sohõ árïnirã diez y ocho masa Siloé waïcũri wihi umari wihi erã weca yuribeja wejẽpehoyoro. ¿Eropa wa sïrirã gajirã Jerusalén majarã tauro ñerã árïra dipuwaja sïriyuri mua pepicũ? <sup>5</sup> Árïbeaa. Mũare arïgu tiiaa. Mũa ñerire bũjawerebirã õaripũre gohrotobirã, mua sã sïrirãca. Eropirã peamegue warãca, arïpũ Jesu erãre.

*Higueragu dũca maridigu queorire werepũ Jesu*

<sup>6</sup> Eropa arĩtuhaja, Jesu i queori mera werepũ erãre:

—Pohe opũ ïgu pohegue ïgu higueragure opapũ. Eropigu ïgu irigu dũcare amagu waripũ. Vocabiripũ. <sup>7</sup> Vocabirinijagu ïgu iri pohe mohmegũre werepũ. “Peeque yũre. Uhre bojori gohra higueragu dũcare amaraa. Dũca mara. Irigu dũca maricũ irigũre pa cóãcãque. Irigu yaha pohe árïcũ gajigũre otemasibeeaa,” arïpũ pohe opũ mohmegũre. <sup>8</sup> ïgu eroparïcũ peegu mohme coregu õpa arïpũ: “Opũ, irigu yuju bojori gohra niguiniporo. Yũhũ irigu gubuyere seatu nujatu iigũra. Tuhaja waibũgu gũra mera iri gobere yaagũra. <sup>9</sup> Yũ eropa iira pũhrũ irigũre gaji bojori dũcacũcũ õaroca. Dũca maricũ mãhũ padoregũca,” arïpũ mohme coregu pohe opũre, arĩ werepũ Jesu.

*Sabadonũ Jesu dorecũgore õago iipũ*

<sup>10</sup> Irisubure Sabadonũ Jesu judio masa buheri wihigue buhegu iipũ. <sup>11</sup> Ero pũriri dorecũgo diez y ocho bojori gohra pũriri dorecũgo árïpo. Eropigo opatũ niguigo árïgo, diaye niguimasibiripo. <sup>12</sup> Igo eropa árïcũ ïagu Jesu igore ïha, piyupũ:

—Noméo, mã dorecũri pehrea wahabũ, arĩ piyupũ Jesu.

<sup>13</sup> ïgu piyura pũhrũ igore ïgu mohmepicũ mata igo diaye niguigo wapo. Eropa wago “Goãmũ turagu, õagu ãhrimi,” arĩ Goãmũre umupeopo igo. <sup>14</sup> Jesu igore Sabadonũ árïcũ ïgu õago igore iicũ ïagu iri buheri wihi opũpũ ïgu mera guapũ. Eropa guagu ïgu masare õpa arïpũ:

—Seis nũri ãhraa mari mohmerinũri. Eropirã mua dore õarã árïdiarã irinũrere taudorerã arique. Sabadonũre mari soorinũre irire iibiricãro gahmea, arïpũ wihi opũ.

<sup>15</sup> ïgu eroparïcũ Jesu õpa arĩ yũhripũ:

—Mũa gũyaricũrã ãhraa. Mũa wecũare, burro sãre oparã Sabadonũ árïquerecũ erã diriradare pã, erãre aĩ buha ihridorea. <sup>16</sup> Dohpague igore Abrahã mũrũ acaweregore watĩ diez y ocho bojori gohra igore dorecũcũ iimi. ¿Sabadonũ árïcũ igore õago iidorebeari mua? arïpũ Jesu.

<sup>17</sup> ïgu eroparïcũ erãpũ gũhyasiũro wañorã. Eropirã gajirãpũ árïpehreri Jesu iirare ïha mucubiriñorã.

*Mostaza coye queorire werepũ Jesu*

*Mt 13.31-32; Mr 4.30-32*

<sup>18</sup> Eropigu Jesu werepũ daja:

—¿Goãmũ masa tauro opũ ïgu árïri werediacũ ñeheno iro dopa ãhriri mua pepicũ? I werenigui queoriñe mera weregũra yũhũ. <sup>19</sup> Mostazayegã iro dopa ãhraa. Iriyegãre oteri masũ yujugũ ïgu ya pohegue otemi. ïgu otera pũhrũ õaro puhria. Eropiro yucũgu wũadigu wahaa. Eropa wacũ mirimagũ porã bajarã irigu dũpũrigue suhri suama. Eropa ta umaro majagu mari Opũre masirã bajamerãgã erã árïmũhtaquererã pũhrũguere erã bajarã warãcoma, arïpũ Jesu.

*Pan bũgari queorire werepũ Jesu*

*Mt 13.33*

<sup>20</sup> Eropigu dipaturi Jesu werenigui queoriñe mera buhepu:

—¿Goãmũ masa tauro opu ñgu áriri werediacy ñeheno iro dopa áhriri mua pepicy?

<sup>21</sup> Pan bugacy iiburi iro dopa áhraa. Yujugo nomeo panre iigo pan bugacy iiburi pohgare merogã moremo trigo pohga mera. Igo eropa iicy pan bugacy iiburi pohga merogã áriquerero trigo pohgare ñaro seyapehrea wahaa. Eropa ta umaro majagure mari Opure bajarã masa masirãcoma, arĩpu Jesu.

*Miri disiporogã queorire werepu Jesu*

*Mt 7.13-14, 21-23*

<sup>22</sup> Eropi Jesu paga macarigue, mũata macarigãgue buhegã, Jerusalengue ejabu iipu.

<sup>23</sup> Ñgu eropa warisubu masũ Jesure ñpa arĩ serẽpupu:

—Opũ, ¿bajamerãgã dihtare peamegue wabonirãre Goãmũ taugũcuri erã ñgu pohro waboro dopa? arĩpu ñgu Jesure.

Ñgu eroparicy Jesu werenigui queoriñere buhegu ñpa arĩ werepu:

<sup>24</sup> —Yũ muare ñpa arãa: Bajarã Goãmũ pohrogue wadiaquererã wamasisome. Ñgu pohro waburi miri disiporogã ñajaro dopa áhraa. Eropirã mua i disiporogãre turaro ñajadiarã iro dopa ta ñgu yare iique. <sup>25</sup> Ñpa iigũcumĩ Goãmũ bajarã masare. Ñgu wihi opu iro dopa áhrimi. Wihi opu wahgã, disiporore bihagũcumĩ. Ñgu eropa iicy disiporogue mua niguirã disiporo biharisere doterãca. Doterã ñpa arĩrãca. “Opũ, disiporore pãgũque guare.” Mua eroparicy wihi opupu yũhrigũcumĩ. “Mua aridirore masibea yũhũ. Eropigu muare masibea,” arĩ yũhrigũcumĩ, <sup>26</sup> Ñgu eroparicy mua yũhrirãca. “Mũ mera guã baha, ihribũ. Guã ya maca buhebũ mũhũ,” arĩrãca mua. <sup>27</sup> Mua eroparicy ñgupu yũhrigũcumĩ. “Mua aridirore masibea. Árĩpehrerã mua ñeri iinirã yũ pohro aribicãque,” arĩgũcumĩ wihi opu. <sup>28</sup> Eropi Abrahãre, Isaare, Jacobore, árĩpehrerã Goãmũ ya weremũhtanirãre Goãmũ ñgu opu árĩrore erã aricy ñarã, mua disiporogue cóanirã arĩrã burigã orerãca. Eropirã mua turaro bujawererã, mua gũcũrire cũridihurãca. <sup>29</sup> Irisubure norte majarã, sur majarã, abe mũririro majarã, abe ñajaro majarã Goãmũ ñgu opu árĩroguere eja, mesa pohro doarãcoma. <sup>30</sup> Dohpague arĩrã pohro majarã arĩrã irisubure oparã arĩrãcoma. Eropirã dohpaguere “Oparã áhraa,” arĩrã irisubure pohro majarã arĩrãcoma, arĩpu Jesu.

*Jerusalén majarãre burigã mahipu Jesu*

*Mt 23.37-39*

<sup>31</sup> Irisubure bajamerãgã fariseo masa Jesu pohrogue ejarã, ñgure wereñorã:

—Herode mure wejẽdiami. Eropigu gajipu waque mũhũ, arĩñorã erã ñgure.

<sup>32</sup> Erã eroparicy Jesupu yũhripu:

—Herode gũyaricũgu áhrimi ñgu. Ñpa arĩ wereque ñgure: “Jesu watẽare cóãgu iimi. Eropigu dorecũrãre ñarã iigu iimi. Irire dohpagãre, ñamigã sãre iigũcumĩ. Eropigu ñamigã core mohmetugũcumĩ,” arĩ wereque Herodere. <sup>33</sup> Eropigu dohpagãre, ñamigãre, ñamigã core sãre Jerusalengue curigu wagura. Ero yũre Goãmũ yare weremũhtagure wejẽrãcoma masa. Goãmũ yare weremũhtagure erã wejẽbupũre Jerusalengue árĩro gahmea. Eropigu yũre i maca ta dujaro gahmea.

<sup>34</sup> “Mua Jerusalén majarã, mua acawererã mura Goãmũ ya weremũhtanirãre wejẽmũrinirã arĩma. Eropirã Goãmũ obeonirãre utã mera deamũrinirã arĩma. Cãreña bũro iigo porãre iigo quẽdupũri mera iigo coã oyaro dopa ta bajasuburi opadiaribũ muare. Mũarũ irire yũre ne gamebiribũ. <sup>35</sup> Dohpaguere mua árĩri maca cóãra maca árĩroca. Diaye arĩgu tiiaa muare. Pũhrũ dujarigũca daja yũhũ. Eropa yũ dujaricy ñarã mua yũre Goãmũ turari mera arigu “Ñaro ariporo,” arĩrãca. Yũre mua irire arĩboro core dipaturi yũre ñasome mua, arĩpu Jesu.

## 14

### *Dorecugure ðagų iipų Jesu*

<sup>1</sup> Gajinų erā soorinų Sabadonų árĩcũ fariseo masa oparā mera majagų ya wihigue Jesu bagų wapų. Iri wihi árĩrā ĩgure ĩhanurusiañorā. <sup>2</sup> Eropigų ñigagų bijigų ĩgų pohrogue ejarų. <sup>3</sup> Eropigų Jesu judio masare buherāre, fariseo masa sāre serēpipų:

—¿Mari soorinųre dorecugure ðagų iidoreri Goāmų yare erā gojarapũ? arĩpų Jesu.

<sup>4</sup> ĩgų eropa arĩ serēpiquerēcũ ta erā yuhribiriñorā. Erā yuhribiricũ ĩagų Jesu ñigagų bijigųre ðagų iipų. Tuhajanugu, “Waque,” arĩpų ĩgure. <sup>5</sup> Eropa iituhagų erāre serēpipų daja:

—¿Múa yagų burrore o múa yagų wecure gobegue yuhridijadigure mata aĩ wiubeari múa mari soorinų árĩquerēcũ? arĩpų Jesu.

<sup>6</sup> ĩgų eropa arĩquerēcũ ta erā ĩgų serēpirire yuhrimasibiriñorā daja.

### *Mojoto dirirogue sihubeonirāre werepų Jesu*

<sup>7</sup> Fariseo masų ya wihi árĩgų iri wihi majagų ĩgų sihubeonirā oparā doarire erā beyemųhtacũ ĩapų Jesu. Eropa ĩatuha ire werepų árĩpehrerāre:

<sup>8</sup> —Mojoto diriri bosenu árĩcũ ĩgų mųare sihubeocũ, ĩgų ya wihigue eja oparā doarire beye doabiricāque. Múa tauro gųhyadiarāre sihubeoñumi iri wihi opų. <sup>9</sup> ĩgų eropa iicũ múa oparā doarire doacũ “Oā gųhyadiarāre múa doarire oque,” mųare arĩbocumi wihi opų. ĩgų eroparĩcũ múa gųhyasiuro dujarāca. Eropirā bu árĩrā doarire doarā warāca. <sup>10</sup> Eropirā wihi opų mųare sihubeocũ, bu árĩrā doarire doamųhtaque. Múa eropa iicũ wihi opų mųare oparā doaripųre “Doarā arique,” arĩgųcumi ĩgų mųare. Múa eropa wacũ gajirā ĩgų sihubeonirāpų mųare umupeori mera ĩarācoma. <sup>11</sup> Yujugų ĩgų basi “Opų āhraa,” arĩ pepigų bu árĩgų árĩgųcumi. Eropigų gajigų “Bu árĩgų āhraa,” arĩ pepigų, gajirāre tarinųgadiabigų opų árĩgųcumi, arĩpų Jesu erāre.

<sup>12</sup> Eropa arĩtuha Jesu wihi opųre werepų:

—Mųhų bosenu ĩgų mų pohro árĩrāre, mų pagų porāre, mų acawererāre, doberi oparāre sihubiricāque. Mųhų erāre sihucũ mųre erā sā sihu gamerācoma daja. Eropa sihu gamerā mųre erā wajamorire wajayerācoma. <sup>13</sup> Mųhų bosenu moagųmojomorocurāre, curimasibirāre, yujupų guburu poyanirāre, cuiri ĩhajabirāre sihubeoque. <sup>14</sup> Mų eropa iicũ ĩagų Goāmų mųre ðaro ĩigųcumi. Erāpų mųre erā sihura wajamorire wajayemasibeama. Eropigų ðarā sĩrinirā erā masa mųriarisubu árĩcũ Goāmųpų mųre wajayegųcumi, arĩpų Jesu wihi opųre.

### *Wųari bosenu iira queorire werepų Jesu*

<sup>15</sup> ĩgų eroparĩcũ peegų gajigų bari mesa pohro doadigų Jesure werepų:

—Goāmų ĩgų opų árĩro ĩgų bari mesa pohro doarā turaro mucubirirā árĩrācoma, arĩpų ĩgų Jesure.

<sup>16</sup> ĩgų eroparĩcũ Jesu i queorire werepų ĩgure:

—Wųari bosenu ĩgų bajarā masare sihubeopų. <sup>17</sup> ĩgų sihubeora pųhrų bosenu árĩrinų gohra mohme coregųre ĩgų sihubeonirāre weredoregų obeopų. “Ma, árĩpehrerire bosenu maja árĩburire amutuhama. Eropigų mųare sihubeomi,” arĩ weredorepų mohme coregųre. <sup>18</sup> Mohme coregų ĩgų eropa arĩ werequerēcũ ta, ĩgų sihunirāpų “Wamasibirica,” arĩñorā erā. ĩgų sihumųhtadigų ðpa arĩ werepų mohme coregųre. “Dohparagā yebare asūabų. Eropigų iri yebare ĩagų wabu iiaa. Eropigų wamasibirica. Umupeoque yųre. Yųre masiya mara, arĩque,” arĩpų ĩgų sihumųhtadigųpų mohme coregųre. <sup>19</sup> Gajigųpų ðpa arĩpų: “Wecųare pe mojtocų majarā dohparagā ta asūabų. Eropigų wecųare queo ĩagų wabu iiaa. Eropigų wasome. Yųre wamasiya mara,” arĩpų ĩgų sā. <sup>20</sup> Gajigųpų ðpa arĩpų: “Yųhų dohpagā



mojoto dihriabũ. Eropigũ iri bosenũre wamasibirica,” arĩpũ ãgũ mohme coregũre. <sup>21</sup> ãgũ eroparĩcũ mohme coregũpũ dujaa wa, ãgũ opũre erã arĩrare werepehopũ. ãgũ eropa arĩ werecũ ãgũ opũ turaro gua, õpa arĩpũ mohme coregũre. “Yojaro mera maca árĩri marigue, mojomorocũrã erã árĩri marigue waque. Eropigũ mojomorocũrãre, curimasibirãre, cuiiri ãhajabirãre, poyari masare yojaro mera aĩgãrique erãre,” arĩpũ opũ. <sup>22</sup> Pũhrũ mohme coregũ werepũ ãgũ opũre: “Opũ, mũ dorediro dopa ta masare sihuabũ. Yũ eropa sihuquerecũ ta gajirã sã iri taribure sihajarãcoma,” arĩpũ mohme coregũ. <sup>23</sup> ãgũ eroparĩcũ opũ ãgũre dorepũ: “Campogue waque. Ero paga marigue, mũta marigãgue arĩrãre yaha wihigue aridoreque yaha wihi õaro mũtũrimaja õaro. <sup>24</sup> Diaye arĩgũ iiaa mũre. Oã yũ sihumũhtanirã yũ barire ne merogã basome,” arĩpũ opũ, arĩ werepũ Jesu.

### *Jesu mera wacũ diasa ãhraa*

<sup>25</sup> Irisubure bajarã masa Jesu mera wañorã. Eropigũ Jesu erãre maji ãha werepũ:

<sup>26</sup> —Yujugũ yũ buhegũ árĩdiagũ gajirã tauro yũpũre mahiro gahmea. ãgũ pagũre, ãgũ pagore, ãgũ marapore, ãgũ porãre, ãgũ pagũ porãre ãgũ basire ãgũ mahiro tauro yũpũre mahiro gahmea. <sup>27</sup> Yujugũ yũ buhegũ árĩdiagũ yahare eropa iiniguigũ árĩgũcumĩ. Eropigũ ãgũ yahagũ ãgũ árĩri dipuwaja ñero tariqueregũ ta yũre pihrisome. Eropa ñero taridiabigũ yũ buhegũ árĩmasisome. <sup>28</sup> Ire masiyuro gahmea mũare. Õpa ãhraa iri: Wihi iigũ ãgũ mũmari wihi ãgũ iiboro core wihi wajacũburire queomũhtanimi. Eropa iigũ ãgũ wihire pehoborore masimi ãgũ. <sup>29</sup> Wajacũburire queobigũ iri wihire iipehobiribocumi. Eropirã ãgũre ãarã wereyabocoma. <sup>30</sup> “Ihĩ ãgũ wihire iigũ bocatũbirañumi,” arĩ wereyabocoma. <sup>31</sup> Opũ sã gajigũ opũ yarã mera erã gamewejẽboro core, ãgũ yarã surarare ãgũ gamewejẽdoreboro core, ãgũ yarã surarare queogũcumĩ. “¿Yũhũ diez mil surara mera gajigũ veinte mil surara opagũ mera gamewejẽgũ wagũ bocatũbocuri?” arĩ pepigũ queogũcumĩ ãgũ. <sup>32</sup> Eropa queogũ “Bocatũsome,” arĩgũ, gajigũ opũ ãgũ surara mera gamewejẽgũ arĩgũ yoarogue ãgũ aricũ ta, “Bocatũsome,” arĩgũpũ “Gamewejẽbiricãrã,” arĩdoregũ obeobocumi ãgũ pohro majagũre. <sup>33</sup> Eropirã yũ buherã árĩdiarã mũa iiburire mũare masiyuro gahmea. Eropirã mũa gamerire duhudiabirã yũ buherã árĩmasibeaa mũa, arĩ werepũ Jesu.

### *Goãmũ yare iiniguuro gahmea, arĩ werepũ Jesu*

*Mt 5.13; Mr 9.50*

<sup>34</sup> Eropigũ erãre werenemopũ:

—Moa õaro acari ãhraa. Iri moa ñeri wacũ dipaturi õari iimasiya mara. <sup>35</sup> Iri moa mera duhpimaja masiya mara. Iri eropa árĩcũ iri moare cóãro gahmea. Eropirã mũa Goãmũ yare iiniguibirã ne duhpimorã árĩbeaa. Ire õaro peeque mũa, arĩpũ Jesu.

## 15

### *Oveja dederedigure bocara queorire werepũ Jesu*

*Mt 18.10-14*

<sup>1</sup> Eropa gajinũ bajarã wajasea corerã gajirã “Ñerã ãhrima,” erã arĩrã mera Jesure peerã ariñorã. <sup>2</sup> Erã eropa iicũ ãarã fariseo masa judio masare buherã sã Jesure ãhaturirã õpa arĩñorã erã basi:

—Ihĩ ñerã mera wapicumi. Eropigũ erã mera bahami, arĩ wereniguĩñorã erã erã basi.

<sup>3</sup> Erã eropa arĩ wereniguicũ Jesu i queori mera õpa arĩ buhepũ erãre:

<sup>4</sup> —¿Cien oveja opũ yujugũ oveja dederea wacũ ãagũ dohpa iigũcuri ãgũ? Õpa iigũcumĩ. ãgũ noventa y nueve ovejare erã bari campogue api, dederedigure amagũ



wagucumi. Ovejare bocagugue dujarigucumi. <sup>5</sup> Īgure bocagu mucubirigucumi. Eropigu ĩgure ĩgu weca coãpeo <sup>6</sup> ĩgu ya wihigue aĩ dujaa wagucumi. Aĩ dujaja, ĩgu pohro árĩrãre, ĩgu acawererãre sihu gameneogucumi. “Yũ oveja dederedigure bocabu. Eropirã yũ mera mucubirique,” arĩgucumi ĩgu erãre. <sup>7</sup> Oveja dederedigure ĩgu bocadiro dopa ta õpa arĩgu iiaa mũare. Yujugu ñerire iigu ĩgu ñerire bujawerecũ õaripure gohrotocũ ĩarã Goãmũ pohro árĩrã burigã mucubirima. Gajirãpũ bajarã masa õpa arĩ pepima: “Ñero iibeaa yũpũ. Eropiro yũ ñeri bujawereburi mara,” arĩ pepirima. Erã eropa arĩ pepicũ ĩarã umaro majarã Goãmũ pohro árĩrã mucubiribeama, arĩpũ Jesu.

*Niyeruse dedererare bocara queorire werepũ Jesu*

<sup>8</sup> Eropa arĩtuha gajĩ queori mera werenemopũ:

—¿Diez niyeruseri waja pagariseri opago yujuse dederecũ duhpibocuri igo mũa pepicũ? Õpa iigocumo igo. Sihãgodirure sihãgo, wihire oha, õaro amapehogocumo. Irisere bocagogue duhugocumo. <sup>9</sup> Irisere bocatuha, igo pohro árĩrãre, igo acawererãre sihupehogocumo. “Niyeruse yahase dedererare bocabu. Eropirã yũ mera mucubirique,” arĩgocumo igo. <sup>10</sup> Diaye arĩgu iiaa mũare. Eropa ta yujugu ñerire iigu ĩgu ñerire bujawerecũ õarire gohrotocũ Goãmũ yarã anyuapũ burigã mucubirirãcoma. Īgu dederebodigu dederebeamĩ pare. Eropirã turaro mucubirirãcoma, arĩpũ Jesu.

*Magũ dederedigu pagũ pohro dujajara queorire werepũ Jesu*

<sup>11</sup> Eropa arĩtuha Jesu gajĩ queori mera werepũ daja:

—Bugũ porã perã árĩñorã. <sup>12</sup> Duhyagupũ õpa arĩpũ ĩgu pagure: “Ahũ, mũ sĩrira pũhrũ yũre mũ oburire yũre opurumujuque,” arĩpũ ĩgu ĩgu pagure. Īgu eroparĩcũ erã pagũ perãgue ta ĩgu porãre guerepũ ĩgu oparare. <sup>13</sup> Bajamenurigã pũhrũ duhyagupũ ĩgu ya árĩpehrerire aĩ, yoarogue gajĩ yebague waha warũ. Ero eja ĩgu ya niyerure iisiripehocãpũ. <sup>14</sup> Īgu iisiripehora pũhrũ iri yebare ne bari marinũgayoro. Eropigu oaboapũ. <sup>15</sup> Eropigu iri yeba maja mohmerire amapũ. Īgu mohmerire bocacũ ĩgu opũ yesea coregũ acupũ ĩgure. <sup>16</sup> Eropigu ĩgu yeseare ejo, erã barire badiaripũ ĩgu sã. Īgu eropa badiaquerecũ ta ero majarã ĩgure barire obiriñorã. <sup>17</sup> Eropi ĩgure ero guñari ariyoro pare. “Yũ pagure mohme corerãpũ pagari barire opacoma. Erã ba duhari sã pagari árĩca. Erã õaro árĩrisubu yũpũ ohõ arĩgu oaboagu iiaa. <sup>18</sup> Dohparagã yũ pagũ pohro dujagura. Yũ pagũ pohrogue ejagu õpa arĩgura ĩgure: ‘Ahũ, Goãmũre ñero iiaabũ. Mũ sãre ñero iiaa. <sup>19</sup> Ñegũ ãhraa. Eropigu mũ magũ diaye dopa ĩabita yũre pare. Mũre mohme corerã dopa ta ĩaque yũre,’ arĩgura yũ pagure,” arĩ pepipũ ĩgu. <sup>20</sup> Eropa arĩ pepigu wahgãnũgaja, ĩgu pagũ pohrogue dujaa warũ. Erogue ĩgu ejadigu ĩgu dujaricũ ĩgu pagupũ ĩgure yoarogue ĩgu árĩcũ ta ĩgu magure ĩha masipũ.

“Īgu eropa eracũ ĩagu ĩgu magure mojomoro ĩapũ. Mojomoro ĩagu ĩgure oma bocatĩri pabua, ĩgu wayuporãre mimipũ ĩgu pagũ ĩgu magure. <sup>21</sup> “Ahũ, Goãmũre ñero iiaabũ. Mũ sãre ñero iiaa. Ñegũ ãhraa yũhũ. Eropigu mũ magũ diaye dopa ĩabita yũre pare,” arĩpũ ĩgu ĩgu pagure. <sup>22</sup> Īgu eroparĩcũ peequeregũ ta ĩgu pagupũ mohme corerãre sihupũ. “Yojarõ, õariñe suhrirore aĩgãrique. Eropirã yũ magure sãque. Sãtuha ĩgu mojtore sãri berore sã, ĩgu guburire zapature sãque. <sup>23</sup> Sãtuha diicũgũ wecure wejẽque. Bosenu iirã. <sup>24</sup> Ihĩ yũ magũ sĩrigũ dopa ta waha wami. Eropa waqueregũ ta dohpaguere ojocarimi ĩgu. Dederedigũ dopa arĩdigũre dohpaguere bocabu. Eropirã bosenu iirã,” arĩpũ ĩgu pagũ. Īgu eropa arĩra pũhrũ bosenu iinũgañorã erã.

<sup>25</sup> “Irisubure ïgu tïgupa pohegue árïpa. Pohegue árïdigu dujarigu wihi pohro eragu, erã bayarire peepu ïgu. <sup>26</sup> Peegu yujugu mohme coregure sihubeo ïgure serëpipu ïgu: “¿Dohpa iirã bayarã iiari?” arïpa ïgu mohme coregure. <sup>27</sup> “Mũ pagu magu dujarami. ïgu ðagu dujaracũ mu pagu diicugure wecure wejëdoreami,” arï yuhripu mohme coregu. <sup>28</sup> ïgu eropa arï werecũ ïgu tïgupa burigã guagu wihigue ñajabiripu. ïgu eropa ñajabiricũ ïagu ïgu pagu wiriri, “Ñajarique,” arï turaro sihuripu ïgu magure. <sup>29</sup> “Peeque, ahu. Yuhu yoari boje mure mohme coregu dopa ta itamurabu. Eropigu mu dorerire ne yujusubu tarinugabirimurabu. Yuhu mure mohme corequerecũ ta yupure ne obirabu muhu. Ne yujugu waibugure obeaa muhu yure yu mera majarã mera yu bosenu iicũ. <sup>30</sup> Eropigu ihï mu magupu ñerã nome mera mu yare iisiripehodigu árïmi. Irire iisiripehotuha, ïgu wihigue ïgu dujaracũ diicugu wecure wejëabu muhu ïgu babure,” arïpa ïgu tïgu ïgu pagure. <sup>31</sup> “Mahgu, muhu yu mera árïpehrerinari ãhraa. Eropiro árïpehreri yaha mu ya dihta ãhraa. <sup>32</sup> Mũ pagu magupu sïridigu dopa ta wahãmi marire. Eropi ïgu dohpaguere ojocarigu ãhrimi. ïgu dederedigu dopa ta wahãmi. ïgu eropa wara puhru dohpaguere ïgure bocabu. Eropiro ïgu dujaracũ mari bosenu ii mucubiricũ ðhaa,” arïpa ïgu ïgu magure, arïpa Jesu erãre iri queorire weregu.

## 16

### *Niyeru dibu coregu queorire Jesu werepu*

<sup>1</sup> Eropi i queorire ïgu buherãre werepu Jesu:

—Doberi opu ya niyerure dibu coregu niyerure ïgu ðaro dibubiricũ ïagu gajigupu weresãpu doberi opure. “Ïgu mu ya niyerure iisirigu iimi,” arï weresãpu ïgure. <sup>2</sup> ïgu eropa weresãcũ pee niyeru dibu coregure sihubeopu. Eropigu ïgu eracũ ïagu ïgure opu werepu. “Gajigu mu yaha niyerure iisirire wereami yure. Eropigu yahare dibugu dohpaguere árïsome muhu. Eropigu yahare mu iirare werepeho gojaque. Mure cóãgu iiaa,” arïpa ïgu opu ïgure. <sup>3</sup> ïgu eropa arïra puhru ðpa arï pepipu dibu coregu ïgu basi: “Yu opu yure cóãbu iicumi. Yuhu turabeaa. Eropigu turaro mohmerire bocatubeaa. Eropigu gajirãre niyeru serëgu gũhyasïutariaro tariguca yuhu. ¿Eropigu dohpa iigucuri yuhu? <sup>4</sup> Dohpague tamerare yu iiburire masia yuhu. ðpa yu iicũ yu mohmeri maricũ erã yu itamurã árïrãcoma. Eropirã erã ya wirigue ñajadorerãcoma yure,” arï pepipu ïgu. <sup>5</sup> Eropa arï pepigu ïgu árïpehrerã ïgu opure wajamonirãre sihubeopu. Sihubeotuha eramuhtagure ðpa arï serëpipu ïgu. “¿Yu opure dipë wajamori muhu?” arïpa ïgu. <sup>6</sup> ïgu eroparicũ wajamogupu yuhripu. “Cien tambore uyure olivo waicudigu maja uyure wajamoa ïgure,” arï yuhripu ïgu. ïgu eropa arï werecũ dibugupu ðpa arï werepu. “Ohõ ãhraa mu wajamorire gojaturapũ. Doaque. Eropigu mu wajamorire deco mera aĩ, deco mera gojatuque,” arïpa niyeru dibugu wajamogure. <sup>7</sup> Eropa arïtuhaja gajigu wajamogure serëpipu ïgu. “¿Mũca dipë wajamori?” arïpa daja. “Cien aju trigo ajure wajamoca yuhu,” arïpa wajamogu dibugure. “Ohõ ãhraa mu wajamorire gojaturapũ. Mũ wajamorire ochenta goja amuque,” arïpa dibugu. <sup>8</sup> ïgu eropa ðaro gũyamehrecũ ïagu “Ihï gũyamehregu árïcumu,” arï pepipu ïgu opu niyeru dibugure. Inu majarã Goãmu gamebirã erã yare gũya amurare erã niyerure erã diburare Goãmu yarã tauro masicoma erã, arïpa Jesu.

<sup>9</sup> Eropa arïtuha Jesu werenemopu:

—Eropigu mure arïgu tiiaa. Mũa oparire, i yeba majare mojomorocurãre mũa ocũ, erãpu mure mahirãcoma. Mũa eropa iicũ mũa opara pehrera puhru umusigue mũa ejacũ erogue mure ðaro mahirãcoma.

10 “Bu árĩrã ya mohmerire queoro iirã oparã ya mohmeri sãre queoro iirãca. Bu árĩrã ya mohmerire queoro iibirã oparã ya sãre queoro iibirãca. 11 Eropirã i yebague mũa opari mera mũa òaro iibirã Goãmũ mũaare iidoreri sãre òaro iisome mũa. 12 Eropirã gajigũ yare mũa òaro iibasabiricũ ïagũ mũa ya árĩburire osome mũaare.

13 “Yujugũ Goãmũpũre guñagũ bũrigã gohra niyerupũre guñabeami. Niyerupũre bũrigã guñagũ Goãmũpũre guñabeami. Eropigũ niyeru dihtare gamegũ árĩgũ Goãmũpũre mucubiricũ iibeami. Goãmũ sãre niyeru sãre yujuro mera gametarima masiya mara mũaare. Niyerure gametarigũ Goãmũpũre umupeomasibeami, arĩpũ Jesu.

14 Ìgũ eroparĩcũ peerã fariseo masapũ ïgũre wereyañorã. Erãpũ niyerure gametariñorã. Eropirã wereyañorã. 15 Erã wereyacũ peegũ Jesu erãre werepũ:

—Masa erã ïhurore mũa òaro iiraa. Mũa eropa iicũ, “Òarã diaye ta iirã ãhrima,” arĩrima masa mũaare. Goãmũpũ mũa pepirire masimi. Masa “Òatariama,” erã arĩrãre Goãmũpũ gajiropa arĩ pepimi, arĩpũ Jesu.

*Goãmũ ïgũ dorerire, ïgũ opũ árĩrĩre werepũ Jesu*

16 Eropa arĩtuhaja òpa werenemopũ Jesu:

—Ñũ waĩyegũ ïgũ eraboro core Moiserẽ ïgũ apira doreri mera Goãmũ marire doreami. Goãmũ ya weremũhtanirã mũra erã gojara sã eropa ta árĩribũ marire dorera. Dohpaguepũre Ñũ òari buherire, Goãmũ opũ ïgũ árĩrĩre buhemi. Ìgũ eropa buhecũ pee masa erã ejatuharo, erã turari mera Goãmũ erã opũ árĩcũ gahmema.

17 “Goãmũ Moiserẽ ïgũ apira dorerire erã ïgũ yare gojara sãre “Iri duhpiburi árĩbeaa,” ne arĩsome. Ëmũsi, yeba sã pehrequerecũ Goãmũ ïgũ werediro dopa ta ïpehogũcumĩ, arĩ werepũ Jesu.

*Marapore cóãrĩre werepũ Jesu*

*Mt 19.1-12; Mr 10.1-12*

18 Eropa arĩtuhaja òpa arĩnemopũ Jesu:

—Masũ ïgũ marapore cóãgũ, gajigo mera marapocũgũ ïgũ igo mera ñero iigũ iimi. Tuhaja masũ gajigũ ïgũ cóãdigo mera marapocũgũ ïgũ sã igo mera ñero iigũ iimi, arĩpũ Jesu.

*Doberi opũ, gajigũ Lázaro queorire werepũ Jesu*

19 Eropa i queori werepũ Jesu:

—Yujugũ doberi opũ árĩñumi. Suhri wajacũrĩre sañagũ árĩñumi. Eropigũ umũri nũcũ òari dihtare bagũ, baja opañumi ïgũ. 20 Eropigũ irisubure gajigũ árĩñumi. Ìgũ mojomorocũgũ Lázaro waĩcũgũ árĩñumi. Ìgũ ïgũ dũpũre baja camicũgũ árĩñumi. Eropirã gajirãpũ ïgũre doberi opũ ya wihi disiporo aĩgã apimũriñuma. 21 Eropigũ mojomorocũgũpũ doberi opũ ïgũ ba dũharire gamemũriñumi. “Ba dũhari mera yapigũca yũhũ,” arĩ pepimũriñumi ïgũ. Ero oyarisubu diayea ïgũ pohro eja ïgũ camire neremũriñuma. 22 Eropigũ mojomorocũgũ sĩria wañumi. Ìgũ sĩria wacũ, Abrahã pohrogue paraíso waĩcũrogue anyua ïgũre aĩ mũriañuma. Eropigũ doberi opũ sã ïgũ pũhrũ sĩria wañumi. Ìgũ sĩricũ ïgũre yaañuma. 23 Eropiro doberi opũre peamegue ejagũ bũrigã teboricũñumi. Eropigũ peamegue árĩgũ umũsigue árĩgũre Abrahãre ïhamujuñumi. Lázaro mũrũ sãre ïañumi. 24 Ìatuha ïgũ Abrahãre sihubeoñumi. “Ahũ, Abrahã, mojomoro ïaque yũre. Peamegue yũhũ ñero tarigũ iica. Yũ eropa wacũ Lázarore yũre obeoque. Eropigũ ïgũ decore ïgũ mujusĩru mera yoso, yũ nerore deco mera nehoporo. Irire yũsuporo ïgũ,” arĩriñumi doberi opũ mũrũ. 25 Ìgũ eroparĩquerecũ Abrahãpũ ïgũre wereñumi: “Mahũ, ojocarigũ árĩgũ árĩpehrerire òarĩre opabũ mahũ. Lázaropũ umũri nũcũ ñero tarimi. Dohpague

mũ ñero taricũ ĩgũpũ õguere mucubiriri mera árĩcãgũ iimi. <sup>26</sup> Eropiro mari watope ũhcãri waya ãhraa. Eropirã õre árĩrã eroguerere wamasibeama. Tuhaja eroguerere árĩrã õre aridiaquererã ta õguere arimasibeama,” arĩñumi Abrahã doberi opũ mũrũre. <sup>27</sup> ĩgũ eroparĩcũ doberi opũ õpa arĩnemoñumi: “Acaweregũ, turaro serẽa mũre. Lázaro yũ pagũ ya wihigue obeoque. <sup>28</sup> Yũhũ yuju mojoto majarã pehrerã pagũ porãcũa. Lázaro erãre wereporo. Õre erã ñero tariroguere aribiricãporo,” arĩñumi ĩgũ. <sup>29</sup> ĩgũ eroparĩcũ Abrahãpũ yũhriñumi: “Goãmũ dorerire Moise ĩgũ apirare, Goãmũ weremũhtanirã erã gojarare opama mũ pagũ porã. Eropirã mũ pagũ porã irire ta peeporo,” arĩñumi Abrahã. <sup>30</sup> ĩgũ eroparĩcũ doberi opũpũ yũhriñumi: “Ahũ, Abrahã, irire opaquererã ta õaro peesome. Lázaro sĩridigũ masadigũ erã pohro ĩgũ ejacũ ĩarã erãpũ erã ñero iirire bũjawere, õaripũre gohrotorãcoma. Eropirã õarire iirãcoma yũ pagũ porãpũ,” arĩñumi doberi opũ mũrũ. <sup>31</sup> ĩgũ eroparĩcũ Abrahãpũ wereñumi: “Mũ pagũ porã Moise ĩgũ apirapũ ĩgũ wererare, Goãmũ yare weremũhtanirã erã wererare peebirã ãhrima. Eropirã Lázaro mũrũ sĩridigũgue masadigũ ĩgũ árĩquererã ta erã Goãmũ yare peesome,” arĩñumi Abrahã, arĩ werepũ Jesu masare.

## 17

### *Ñerire iicũ gũhya ãhraa* *Mt 18.6-7, 21-22; Mr 9.42*

<sup>1</sup> Eropi Jesu werepũ ĩgũ buherãre:

—Mũare ñeri iidoreri baja ãhraa. Eropirã masa ñerire iima. Iri eropa árĩquererã ta masũre ñerire iidoregũpũ ñetariaro tarigũcumĩ. <sup>2</sup> Gajigũre masa ĩgũ wũnũgũre wũariye utãyere dirisiu, wũariyague ĩgũre cóãcũ ñero wabocumi ĩgũ. Eropigũ oãgã mera majarãre ñerire iidoredigũpũ wũariyague erã cóãdigũ tauro ñero tarigũcumĩ. ĩgũre bũrigã dipuwaja moasũgũcumĩ. <sup>3</sup> Õaro iique mũa. Mũa acaweregũ ñero ĩgũ iicũ ĩarã, “Iibita,” arĩque ĩgũre. Eropirã ĩgũ ñero iirire ĩgũ bũjawerãcũ, õarire gohrotocũ mũapũ ĩgũ ñeri iirire cãdijique. <sup>4</sup> Eropigũ mũa acaweregũ yujunũ ta siete suburi mũare ĩgũ ñero iibocumi. ĩgũ eropa iicũ yujuyerisubure mũare, “Yũ ñero iirire bũjawerea. Õarire gohrotogũ iiaa,” ĩgũ arĩcũ iri nũcũ suburi ĩgũ ñero iirire cãdijique, arĩpũ Jesu.

### *Goãmũre umupeorire werepũ Jesu*

<sup>5</sup> Eropi Jesu buherã ĩgũre õpa arĩñorã:

—Goãmũre gũare õaro umupeonemocũ iique, arĩñorã Jesure.

<sup>6</sup> Erã eroparĩcũ Jesu yũhriũ:

—“Goãmũre diaye ta iigũ ãhrimi,” mũa arĩ umupeorã miriyegã mostazaye pẽgã mũa umupeoquererã irigũ sicómoro waĩcũdigũre õpa iimasia: “Irigũ yucũgũ irigũ basi tara duhagãporo. Wũariyague yuriñajaporo,” arĩmasia mũa. Mũa eroparĩcũ irigũ yucũgũpũ mũa dorero dopa ta waroca, arĩpũ Jesu.

### *Mohme coregũ ĩgũ mohmerire werepũ Jesu*

<sup>7</sup> Pũhrũ i werenigũ queoriñere werepũ Jesu:

—Mũare mohme coregũ poheguere tãra, mohmemi. ĩgũ ovejare ĩhadibumi. ¿ĩgũ eropa mohme ĩgũ dujaracũ ĩarã dohpa arĩbocuri mũa ĩgũre? “Yojaro arique. Mũ bari ohõ ãhraa,” ¿arĩbocuri mũa? <sup>8</sup> Eropã arĩbeaa mũa. ĩgũre õpa arãa mũa: “Yũ baburire iique. Eropigũ yũ baha ihricũ yãre coreque. Yũ pũhrũ mũ sã baha ihrique,” arãa mũa mohme coregũre. <sup>9</sup> Mohme coregũ ĩgũ mũa mohmedorerire ĩgũ iicũ ĩgũre “Õhaa,” arĩbeaa mũa. ĩgũre mũa dorero dihtare iigũ iicumĩ ĩgũ. <sup>10</sup> Mũa sã ĩgũ iro dopa ta ãhraa. Goãmũ ĩgũ dorediro dopa ta iipehorã õpa arĩ pepique mũa. “Gũa



mohme corerã dihta ãhraa. Gũare ïgu dorero dihtare iiabũ guã,” arĩ pepique mũa, arĩpũ Jesu ïgu buherãre.

*Diez gohra cami boarãre ðarã iipũ Jesu*

<sup>11</sup> Gajinũ Jerusaléngue Jesu wagũ iipũ. Eropa wagũ Samaria yeba, Galilea yeba deco tarigãpũ. <sup>12-13</sup> Gaji macague wari mague ïgu curicũ diez cami boarãpũ ïgũre bocatĩriñorã. Eropirã yoañarirogue niguirã ta piyuñorã:

—Jesu, opũ, gũare mojomoro ïaque, arĩñorã.

<sup>14</sup> Erã eroparĩcũ erãre ïha, werepũ Jesu:

—Pahire mũa dũpũrire ðaro warare ïhmurã waque, arĩpũ erãre.

Ïgu eropa arĩra pũhrũ erã warisubu erã dũpũ ðarã wañorã. <sup>15</sup> Eropigũ yujugũ erã mera majagũ ïgu dũpũ ðari dũpũ wacũ ïagũ, Jesu pohrogue maji dujariripũ. Eropa dujarigũ turaro mera Goãmũre umupeopũ. “Goãmũ turagũ, ðagũ ãhrimi,” arĩ umupeopũ ïgu. <sup>16</sup> Eropa arĩgũ ïgu Jesu guburi pohro mereja “Õhaa,” arĩpũ. Ïgũpũ Samaria majagũ arĩpũ. <sup>17</sup> Ïgu eropa iira pũhrũ Jesu ðpa arĩ werepũ:

—Diez ãhrama masa ðarã wanirã. ¿Gajirã nueve dũhyarãpũ nohogue arĩcuri erã?

<sup>18</sup> Ihĩ gaji yeba majagũ dihta Goãmũre “Õhaa,” arĩgũ dujarami. ¿Duhpirã gajirãpũ aribirari? arĩpũ Jesu.

<sup>19</sup> Eropa arĩtuha Jesu merejadigũre arĩpũ.

—Wahgãnũgajaque. Waque. Mũ Goãmũre umupeogũ ðagũ wahabũ mũhũ, arĩpũ Jesu ïgũre.

*Goãmũ ïgu opũ árĩborore werepũ Jesu*

*Mt 24.23-28, 36-41*

<sup>20</sup> Irisubure bajamerãgã fariseo masa Jesure serẽpiñorã:

—¿Dohpãrĩcũ Goãmũ opũ árĩnũgagũcuri? arĩ serẽpiñorã erã.

Erã eroparĩcũ Jesu yũhripũ:

—Goãmũ ïgu opũ árĩnũgacũ mũa ïhamasibea. <sup>21</sup> “Goãmũ ïgu opũ árĩri ohõ ãhraa,” arĩmasibea. “Sohõgue ãhraa,” arĩmasibea. Goãmũ ïgu opũ árĩri masa erã pepirigue ãhraa, arĩpũ Jesu fariseo masare.

<sup>22</sup> Eropa arĩtuha Jesu ïgu buherãre ðpa arĩ werepũ:

—Pũhrũ yũhũ masũ Goãmũ ïgu obeodigũ yũ i yebague dujariburire bũrigã gamerãca mũa. “Ïgũre yujunũ gohra mari ïacũ ðaboaya,” arĩ quererã ta yũre ïanisome mũa. Eropa mũa gamequerecũ ta irisubure arisome yũhũ. <sup>23</sup> Gajirã mũare ðpa arĩrãcoma. “Ïgũre ïaque. Ïgu Cristo ãhrimi. Sihĩre ïaque. Cristo ãhrimi,” arĩrãcoma mũare. Erã eropa arĩquerecũ ta erãre peebiricãque. <sup>24</sup> Bupu umarore guñaña mariro miaro dopa ta guñaña mariro arigũca yũhũ masũ Goãmũ ïgu obeodigũ dujarigũ. <sup>25</sup> Ire yũ iiboro core yũhũ turaro ñero tarigũca. Eropirã yũre dohpague majarã gamesome. <sup>26</sup> Noé ïgu árĩrasubu majarã erã árĩmũridiro dopa ta yũhũ masũ Goãmũ ïgu obeodigũ yũ dujariboro coregã eropa ta árĩrãcoma masa. <sup>27</sup> Noé ïgu árĩrasubure arĩpehrerã masa eropa baha, ihri iĩnũma. Eropirã mojoto dirimũriñũma. Noé wũadĩru dohodirugue ïgu ñajaboro core Goãmũ erãre ïgu miupehoboro core iri arĩpehrerire masa mũraro ta iiniguicãmũriñorã. Eropa arĩroca yũ dujaricũ sãre. <sup>28</sup> Lote ïgu árĩrasubu majarã sã erã árĩdiro dopa ta yũ dujaricũ arĩrãcoma masa. Lote ïgu árĩrasubure masa baha, ihri, asũ, dua, ote, wirire iĩnũma. <sup>29</sup> Erã eropa iirisubu ïgu ya macare Sodoma waĩcũri maca Lote ïgu waranũ umaro maja peame ãjũ dijari erãre wejẽpehocãyoro. <sup>30</sup> Yũhũ masũ Goãmũ ïgu obeodigũ yũhũ guñaña mariro yũ dujaricũ eropa ta waroca irisubure.

<sup>31</sup> “Irisubure yujugũ ïgu ya wihi weca maja pũugue arĩgũ wihi pohecague ïgu yare aĩgũ ñajabiricãporo pobero mera duhriro dopa. Eropigũ pohegue arĩgũ



sã irisubure ïgu ya wihigue piharibiricãporo. <sup>32</sup> Lote marapo igo warare guñaque. <sup>33</sup> ïgu ya árĩburi dihtare yujugu guñagu peamegue wagucumi ïgu. Yaha árĩburipure yujugu guñagu árĩpehrerinari Goãmũ mera ðaro árĩgucumi, arĩpu Jesu.

<sup>34</sup> “Yũhu mũare werea. Irisubure yure umupeorãre beye gameneodoregũca. Eropigu eropa wari ñamire yuju camare perã carĩcũ yujugure yure umupeogure aĩrãcoma yũ mera árĩbure. Gajigu yure umupeobigu ero dujagucumi. <sup>35</sup> Eropa ta nome perã erã ya ojodũcare erã biucũ yujugore aĩrãcoma. Yujugo ero dujagocumo. <sup>36</sup> Eropigu perã poheguere mohmerã árĩcũ yujugure aĩrãcoma. Yujugu ero dujagucumi, arĩpu Jesu.

<sup>37</sup> ïgu eroparĩcũ ïgu buherãpu serẽpiñorã.

—¿Nohogue eropa warocuri? arĩ serẽpiñorã erã.

Erã eroparĩcũ Jesu yũhripũ:

—Masa erã ñeri erã iiniguirogue, erogue Goãmũ erãre erã ñeri dipuwaja moagucumi, arĩpu Jesu.

## 18

### *Wapeweyo igo dipuwaja moadorera queorire werepu Jesu*

<sup>1</sup> Eropi Jesu erãre Goãmũre serẽburire weregu ðpa arĩpu:

—Mũa Goãmũre serẽrã coreque ïgu yũhriborore. Yoari boje corequererã ta bũjawerebiricãque. ïgure serẽrã duhubita, arĩpu Jesu.

<sup>2</sup> ïgu eropa arĩrare buhebu i queori mera werepu erãre:

—Gaji macague masare dipuwaja moadoregu árĩpu. ïgu Goãmũre umupeobiripũ. Eropigu masa sãre umupeobiripũ. <sup>3</sup> Eropigo wapeweyo sã erogue árĩpo. Igo ïgu pohrogue durũro curigo ðpa arĩpo: “Yũre ïhaturigũre dipuwaja moadoreque mũhu. Yũre arĩ cãhmotaque,” arĩ serẽniguicãpo igo ïgure. <sup>4</sup> Igo eroparĩcũ ïgu bajasuburi “ĩsome yũhu,” arĩripũ igore. ïgu eropa arĩquerecũ ta igo bajasuburi ïgure eropa serẽniguicãgo garibotariaro iipo. Igo garibocũ ïagu ðpa arĩpu ïgu basi. “Yũhu Goãmũre masa sãre umupeobea. <sup>5</sup> Yũ eropa umupeobigu árĩquerecũ ta igopũ yũre garibotariamo. Yũre eropa garibogo yũre gariboreacũ iicumo yũre. Igo eropa arĩ weresãniguicũ igore ïhaturigũre dipuwaja moadoregũra,” arĩpu dipuwaja moadoregu, arĩpu Jesu.

<sup>6</sup> Eropa arĩgu Jesu erãre werenemopũ:

—Eropa arĩpu ïgu ñegu dipuwaja moadoregu. ïgu eropa arĩrare guñaque mũa.

<sup>7</sup> ïgu tauro Goãmũpu ïgu yarãre mũuri nũcu ïgure serẽrãre itamugucumi. <sup>8</sup> Mũare arĩgu tiaa. Goãmũ erãre mata iigucumi erã serẽrare. ¿ïgu eropa yũhriyũ ïgu árĩcũ ta yũhu masũ Goãmũ ïgu obeodigu i yebague dujarigu, Goãmũre umupeorãre ïgure serẽrãre bocagucuri yũhu? arĩpu Jesu.

### *Perã Goãmũ mera erã wereniguira queorire werepu Jesu*

<sup>9</sup> Eropi gaji queori mera werepu Jesu. “Gũapu ðarã ãhraa. Gajirãpu ñero iirã ãhriima,” arĩ pepirãre i queori mera ðpa arĩ werepu:

<sup>10</sup> —Goãmũ ya wihigue perã mũa Goãmũ mera wereniguirã wañorã. Yujugu fariseo masũ árĩpu. Gajigu wajasea coregu árĩpu. <sup>11</sup> Eropigu fariseo masũpu nũgaja, ðpa arĩ serẽ niguiyũ Goãmũre: “Yũhu gũya yajaricũgu, diaye iibigu, nome mera ñero iigu árĩbeaa. Gajirã iro dopa árĩbeaa. Ihĩ wajasea coregu iro dopa ñegu árĩbeaa. Eropigu mũre Goãmũre ðhaa, arãa. <sup>12</sup> Yũhu semanari nũcu mũ ya árĩburire iigu pesubu ba duhua. Eropigu diez niyuserire wajatagu yujuse mũre ohoa,” arĩpu fariseo masũ Goãmũre. <sup>13</sup> Eropigu wajasea coregũpu yoarogue niguiyũ muhri siunũgaja, ïgu ñerire bũjawere, mũarogue ïabiripũ. ïgu ñerire bũjaweredigu árĩgu ïgu coretibi pa,

wereniguipũ Goãmure: “Goãmũ, yũhũ ñegũ ãhraa. Eropigu mũhũ yũre mojomoro ãaque,” arĩpũ ĩgũ Goãmure. <sup>14</sup> Eropigu mũare arĩgũ iiaa. Ihĩ wajasea coregũpũ ĩgũ wihigue ĩgũ dujagũ ĩgũ ñerire Goãmũ mera cóãdigũ dujapũ. Gajigũ fariseo masũ ĩgũ ñerire cóãdigũ árĩbiripũ. “Yũhũ òagũ ãhraa,” arĩgũ Goãmũ ĩgũ ĩacũ ñegũ árĩmi. “Yũhũ ñegũ ãhraa. Eropigu yũ ñerire bũjawerea,” arĩgũpũre Goãmũ òagũ iigũcumĩ ĩgũre, arĩpũ Jesu.

*Majirãgã ya árĩburire Goãmure serẽbasapũ Jesu*

*Mt 19.13-15; Mr 10.13-16*

<sup>15</sup> Eropi masa erã porã majirãgãre Jesure mohmepiñadoremorã ĩgũ pohrogue aĩ erariñorã. Erã eropiicũ ĩarã Jesu buherã erãgãre aĩrarãre turiñorã. <sup>16</sup> Erã eropa turicũ ĩagũ Jesu majirãgãre sihubeopũ ĩgũ pohrogue. Sihubeo òpa arĩpũ ĩgũ ĩgũ buherãre:

—Majirãgã yũ pohrogue ariporo. “Waque,” arĩbita erãgãre. Erãgã Goãmure erã opũ iro dopa pepima. Eropirã Goãmũ ĩgũ opũ árĩroguere oãgã iro dopa pepirã ãhrima eroguerẽ. <sup>17</sup> Diaye arĩgũ iiaa mũare. Oãgã Goãmure erã gamediro dopa ta mũa Goãmure gamebirã ĩgũ pohrogue wasome mũa. Mũa wabiricũ mũa opũ árĩsome ĩgũ, arĩpũ Jesu.

*Doberi opagũ Jesu mera wereniguipũ*

*Mt 19.16-30; Mr 10.17-31*

<sup>18</sup> ĩgũ eropa arĩra pũhrũ judio masa oparã mera majagũ Jesure serẽpi erapũ.

—Ne òagũ, buhegũ ãhraa mũhũ. ¿Yũ árĩpehrerinũri Goãmũ mera árĩdiagũ dohpa iigũcuri yũhũ? arĩpũ ĩgũ.

<sup>19</sup> ĩgũ eroparĩcũ Jesu yũhrĩpũ:

—¿Dohpa arĩronore yũre “Òagũ,” arĩ piyuri mũhũ? Goãmũ dihta òagũ ãhrimi.

<sup>20</sup> I Goãmũ dorerire masia mũhũ. “Gajigũ marapo mera árĩbiricãque. Masare wejẽbiricãque. Yajabiricãque. Gũyabiricãque. Mũ pagũ sũmarãre umupeoque,” arĩ doremi Goãmũ. Eropigũ irire iique mũhũ, arĩpũ Jesu.

<sup>21</sup> ĩgũ eroparĩcũ ĩgũ Jesure yũhrĩpũ:

—Iri árĩpehrerire majigũgãgue ta iibũ yũhũ, arĩpũ ĩgũ.

<sup>22</sup> ĩgũ eroparĩcũ peegũ Jesu ĩgũre òpa arĩ werepũ:

—Yujuñe dihta dũhyaa mũre mũ iiboro. Árĩpehreri mũ yare duagũ waque. Eropa iigũ árĩpehreri niyeru mũ wajatarire mojomorocũrãre oque. Mũ eropa iicũ wũaro mũ ya òari mũhũ opaburire umaroguerẽ Goãmũ pohroguerẽ árĩroca. Eropa iituha yũ mera majagũ árĩbu arique, arĩpũ Jesu ĩgũre.

<sup>23</sup> ĩgũ eroparĩcũ peegũ ĩgũpũ baja doberi opagũ árĩgũ irire mojomorocũrãre odiabigũ, turaro bũjawere waha wapũ. <sup>24</sup> ĩgũ eropa bũjawerecũ ĩagũ Jesu òpa arĩ werepũ gajirãre:

—Doberi oparãre Goãmũ ĩgũ opũ árĩroguere erã wacũ diasataria. <sup>25</sup> Camello waĩcũgũ waibũgũpũ ĩgũpũ awiru gobegãgue ĩgũ ñajacũ masiya mara ĩgũre. Eropa ta doberi opagũ Goãmũ mera òaro árĩgũ ĩgũ opũ árĩroguere wacũ diasataria, arĩpũ Jesu.

<sup>26</sup> ĩgũ eroparĩcũ ĩgũre peerã òpa arĩñorã:

—Cue. Mũ arĩro dopa ta diaye árĩcũ, ne yujugũ masũre Goãmũ taubiribocumi ĩgũ pohro waborore, arĩñorã erã Jesure.

<sup>27</sup> Erã eroparĩcũ Jesu yũhrĩpũ:

—Masa erã bocatũuro erã òaro iira mera Goãmũ pohrogue wamasibeama. Goãmũpũ masare peamegue wabonirãre taumasimi. ĩgũ árĩpehrerire òaro iimasipehocãmi, arĩpũ Jesu erãre.

<sup>28</sup> Īġu eroparīcū Pedro ĭġure ðpa arīpū:

—Peenique. Ĝua árīpehreri ġua yare apicābū mū mera warā, arīpū ĭġu Jesure.

<sup>29</sup> Īġu eroparīcū Jesu ðpa arīpū:

—Diaye mūare arīġu iiaa. Árīpehrerā mūa Goāmū yare iimorā mūa wirire, mūa marasā nomere, mūa pagū porāre, mūa pagū sūmarāre, mūa porāre mūa apinirā mūa wūaro wajatarāca dohpaguere. <sup>30</sup> Mūa apidiro tauro wajatarāca. Eropirā mūa sīrira pūhrū árīpehrerinūri Goāmū mera árīrāca mūa, arīpū Jesu erāre.

*Dipaturi Jesu ĭġu sīriburiñere ĭġu masa mūriaburiñere werepū*

*Mt 20.17-19; Mr 10.32-34*

<sup>31</sup> Eropi doce ĭġu buherā dihtare aĭgā erāre werepū:

—Peeque yūre. Dohpaguere mari Jerusaléngue warā iiaa. Erogue yūre Goāmū ĭġu obeodigūre Goāmū ya weremūhtanirā iribojegue erā werediro dopa ta eropa waroca yūre. <sup>32</sup> Ero masa yūre ñeha, judio masa árībirāre orācoma yūre. Yūre erā ora pūhrū erā yūre wereya, ñero arī, disico ehosūrācoma. <sup>33</sup> Eropirā yūre tāratuhaja wejērācoma yūre. Eropiġu yū sīrira pūhrū ūhrenū waboro masa mūriagūca yūhū, arīpū Jesu erāre.

<sup>34</sup> Īġu eroparīcū ĭġu buherā ĭġu wererire ðaro pee masibiriñorā. Goāmū irire erāre masicū iibirinipū dohpa.

*Cuiri ĭhajabigūre ĭhajacū iipū Jesu*

*Mt 20.29-34; Mr 10.46-52*

<sup>35</sup> Eropi Jesu sā Jericó waīcūri maca pohrogue ejañorā. Īġu wari maha tūrogue yujugū masū cuiri ĭhajabigū doapū. Niyeru serēġu iipū. <sup>36</sup> Eropiġu masa bajarā ĭġu pohro aricū peegū serēpipū ero árīrāre.

—¿Duhpirā masa bajarā tarigāri? arī serēpipū ĭġu.

<sup>37</sup> —Jesu Nazare majagū arigū iimi, arīñorā gajirā ĭġure.

<sup>38</sup> Erā eropa arī werecū peegū ĭġu gaguiniguinūgarū:

—Jesu, opū Davi mūrū pārami masare taubu, yūre mojomoro ĭaque, arī gaguiniguipū Jesure.

<sup>39</sup> Īġu eroparīcū ĭġu pohro árīrāpū “Ejarimaricāque,” arī turiñorā ĭġure. Erā eropa arī turiquerecū ta ĭġu ero core ĭġu gaguiniguidiro tauro gaguiniguinemopū daja.

—Opū Davi mūrū pārami, yūre mojomoro ĭaque, arī gaguiniguipū ĭġu.

<sup>40</sup> Īġu eropa gaguiniguicū peegū Jesupū nūgaja, “Sihubeoque ĭġure,” arīpū. Īġu eroparīcū erāpū cuiri ĭhajabigūre sihugāñorā. Erā eropa sihugācū ĭġu Jesu pohrogue ĭġu ejacū Jesupū ĭġure serēpipū:

<sup>41</sup> —¿Dohpa yū iicū gahmeri mūhū? arīpū Jesu.

—Yū Opū, yūre ĭacū iique, arīpū cuiri ĭhajabigū.

<sup>42</sup> —ĭaque pare. Yūre umupeonijagū, ðagū wahaa mūhū, arīpū Jesu ĭġure.

<sup>43</sup> Īġu eroparīcū ta cuiri ĭhajabigū ðaro ĭha wapū. Eropa ðagū wanijagū ĭġu Jesu mera wapū. “Goāmū turagū āhrimi,” arī umupeopū ĭġu. Eropirā masa bajarā cuiri ĭhajabiridigū ĭġu ðagū wacū ĭarā, “Goāmū ðagū, turagū āhrimi,” arī umupeoñorā erā sā.

## 19

*Zaqueo Jesure bocatīripū*

<sup>1</sup> Eropii Jesu Jericógue eja, iri macague tarigābu iipū. <sup>2</sup> Doberi opū Zaqueo waīcūgū wajasea corerā opū ero árīpū. <sup>3</sup> Eropiġu ĭġu Jesure “¿Nihino árīcūri?” arī ĭha masibu Jesure ĭadiaripū. Eropa ĭġu ĭadiaquerecū ta ĭġu yebagūgā árīcū masa bajarā ĭġugāre cāhmotacāñorā. <sup>4</sup> Eropiġu ĭġu masare omatarigā wa, sicómoro waīcūdigū

yucugugue m̄aribejaru Jesure ĩabu. P̄hru ñarigã Jesu irigu pohro tarigãbu iip̄u. Eropigu Zaqueo irigugue coregu iip̄u. <sup>5</sup> ĩgu eropa corero watope Jesupu irigu gubuye ejanugaja, Zaqueore ĩhamuju ĩgure werepu:

—Zaqueo, dohpaguere mu ya wihi dujagura. Eropigu duru dijarique, arĭpu Jesu.

<sup>6</sup> ĩgu eroparĭcũ Zaqueopu am̄diaro mera dijari, mucubiriri mera ĩgu ya wihigue aridorepu Jesure. <sup>7</sup> ĩgu eropa bocatĭricũ ĩha, masa arĭpehrerã erã basi ōpa arĭ wereniguiñorã:

—Īhĭ Jesu ñegu ya wihigue curigu wadiami, arĭ wereniguiñorã arĭpehrerã masa erã basi.

<sup>8</sup> Zaqueopu bocatĭrituha ero nigui, Jesure werepu:

—Op̄u, peeque ȳre. Arĭpehreri yahare deco mera mojomorocurãre ogura. Eropigu ȳhu gajigure cien niyuserire ḡya aĭdigu arĭgu, cuatro cientos niyuserire wajayenemogura ĩgure, arĭpu Zaqueo Jesure.

<sup>9</sup> ĩgu eroparĭcũ Jesupu werepu ĩgure:

—Dohpagãre m̄re mu ya wihi arĭrã sãre peamegue wabonirãre Goãmu tautuhami. Mu sã Abrahã m̄ru acaweregu ta ahraa. <sup>10</sup> Ȳhu masu Goãmu ĩgu obeodigu peamegue wabonirãre amagu arigu iibu. Erogue wabonirãre ōaro taugu arigu iibu, arĭpu Jesu Zaqueore.

### *Niyuseri oroseri queorire werepu Jesu*

<sup>11</sup> Eropi ĩgure peerãre Jesu queori mera werepu daja. Merogã duhyayoro Jerusalengue ĩgu ejaboro. Eropirã ĩgure peerã ōpa arĭ pepiñorã: “Goãmu dohpaguere opu arĭnugabu iimi,” arĭ pepiriñorã erã. <sup>12</sup> Erã eropa arĭ pepicũ Jesu i queorire ōpa werepu erãre:

—Yujugu gaji yebague yoarogue wabu iĩnumi. Eroguere ero majagu erã tauro opu arĭgu ĩgure ĩgu ya maca majarã op̄re acucũ wabu iĩnumi. P̄hru ĩgu ya wihigue dujarabu iĩnumi. <sup>13</sup> Nere ĩgu waboro corere diez mohme corerãre sihubeoñumi. Eropa sihubeogu, ĩgu erãre yujurãyerire yujuse niyuseri orosere oñumi. Otuha wereñumi erãre: “Ȳu maricũ i niyeru mera m̄a wajatanemoburire amaque,” arĭñumi ĩgu mohme corerãre. <sup>14</sup> ĩgu ya yeba majarãpu ĩgure gamebiriñuma. Eropa gamebirã ĩgu opu arĭbu wara p̄hru gajirãre ĩgure weredorerã oboñuma. “M̄hu ḡa opu arĭcũ gamebea ḡa,” arĭñuma erã weredorenirãpu. <sup>15</sup> Eropa erã gamebiriquerẽcũ ta p̄hru erã opu ñajañumi ĩgu. Eropa opu ñajatuha, ĩgu ĩgu ya wihigue dujariñumi. Eropa dujaragu ĩgu mohme corerãre ĩgu niyeru mera erã wajatanemorare masibu, erãre sihubeoñumi. <sup>16</sup> ĩgu eropa sihubeora p̄hru, eram̄htagu ĩgure wereñumi: “Op̄u, mu niyuseri, mu ȳre orase mera diez seri wajatanemoabu ȳhu,” arĭñumi mohme coregu ĩgu op̄re. <sup>17</sup> “Ōaro iiahu m̄hu. Ōagu mohme coregu ahraa. Mu merogã mera ȳ dorero dopa iipehogu arĭgu dohpague diez macari majarã erã opu arĭbu waguca m̄hu,” arĭñumi opu mohme coregure. <sup>18</sup> ĩgu p̄hru eragu ĩgu mera majagu ōpa arĭñumi: “Op̄u, mu niyuseri, ȳre mu orase mera cinco seri wajatanemoabu ȳ sã,” arĭ wereñumi ĩgu op̄re. <sup>19</sup> “Cinco macari majarã opu waguca m̄hu,” arĭñumi ĩgu opu ĩgure. <sup>20</sup> ĩgu eropa arĭra p̄hru gajigu mohme coregu eraa werepu: “Op̄u, mu niyuseri ohõ ahraa. Suhri gasiro mera oma, irisere dihbuabu. <sup>21</sup> M̄hu turaro mohmedoregu ahraa. Eropigu gajirãre mohmedorequeregu oteri moogu arĭqueregu ta mu dihta iri ducare aĩa. Eropigu m̄re ḡiabu,” arĭñumi ĩgu op̄re. <sup>22</sup> “Mu ȳre eropa arĭgu ñegu ahraa. Ȳre mu eropa arĭri dipuwajare dipuwaja moagura ȳhu. Ȳhu m̄re turaro mohmedoregu arĭcũ m̄hu ȳre masia. Gajirã yare ȳhu aĩcũ ȳhu otebirira arĭquerecũ iri ducare ȳ aĩgu arĭcũ masituhabu m̄hu. <sup>23</sup> ¿Ȳu eropa arĭcũ ĩaqueregu duhpiyu ȳ orasere



niyeru diburi wihigue dibubirari mũhũ? Irire erã wayura waja wajatanemoboaya mũhũ. Irire mũ iicũ dujaragũ wajatanemoboaya yũ sã,” arĩñumi erã opũ. <sup>24</sup> Eropa arĩtuha ãgũ pohro niguirãre doreñumi: “Niyerusere emaque ãgũre. Diez seri opagũre oque,” arĩñumi ãgũ opũ. <sup>25</sup> ãgũ eroparĩcũ erãpũ wereñuma ãgũre: “Opũ, diez seri opagũ baja opatuhami,” arĩñuma erã ãgũre. <sup>26</sup> Erã eroparĩcũ opũ yũhriñumi: “Mũare arĩgũ iiaa. Árípehrerã wũaro oparãre onemogũra. Moorãpũre merogã erã opaquerẽcũ ta erãre emagũra. <sup>27</sup> Dohpagũre tamerare yũre ãhaturirãre yũre erã opũ arĩdorebirinirãre yũ pohro aĩgãrique. Eropirã yũ ãaro wejẽcãque erãre,” arĩñumi opũ ãgũ mohme corerãre, arĩ werepũ Jesu.

### *Jerusaléngue ejapũ Jesu*

*Mt 21.1-11; Mr 11.1-11; Jn 12.12-19*

<sup>28</sup> Eropa arĩtuha Jesu gajirã core Jerusaléngue wagũ iipũ. <sup>29</sup> Jerusaléngue ejaboro coregã Olivo waĩcũdigũ utãgũ gubuyegũ ejañorã pe maca arĩroque. Yuju maca Betfagé gaji maca Betania waĩcũyoro. Eroque ejagũ ãgũ buherã mera majarãre perãre obeogũ Jesu õpa arĩpũ:

<sup>30</sup> —Si macagũ waque. Ero ejarã, burrogãre erã dirinugudigũre bocajarãca. Gajirã ãgũre ne peyanibeama dohpa. ãgũre bocarã, ãgũre diriradare pã, aĩgãribasaque yũre. <sup>31</sup> Mũa eropa iicũ ãagũpũ “¿Duhpirã burrore pãri?” ãgũ arĩcũ peerã õpa arĩ yũhrique ãgũre: “Mari tĩgũ burrore gamebeoniami dohpa,” arĩ wereque ãgũre, arĩ weredore obeopũ ãgũ buherãre perãre.

<sup>32</sup> ãgũ eroparĩcũ erã perãpũ ãgũ obeodiroque ejañorã. Erã eropa ejacũ Jesu arĩpehreri ãgũ erãre arĩdiro dopa ta eropa wayoro. <sup>33</sup> Eropirã burrogãre erã pãcũ ãgũgã oparã serẽpiñorã erãre:

—¿Duhpimorã diriradare pãri burrogãre? arĩ serẽpiñorã erã.

<sup>34</sup> —Mari tĩgũ burrogãre gamebeoniami, arĩ yũhriñorã erã.

<sup>35</sup> Eropirã ãgũgãre burrogãre Jesu pohrogũre aĩ ejañorã. ãgũgãre aĩ ejatuhaja erã weca maja suhrire ãgũ weca duhpeoñorã. Eropirã ãgũ weca Jesu ãgũ mũribejacũ itamuñorã erã Jesure. <sup>36</sup> Jesu ãgũ weca ãgũ peyagũ wacũ erã masa erã weca suhri sañari suhrire tuwea aĩ magũ seõpi mũhtañorã ãgũ core. <sup>37</sup> Eropirã Jerusalén pohrogũre eja, Olivo waĩcũdigũ dijariri magũ ejañorã. Eroque ejarã Jesu buherã bajarã arĩpehrerire ãgũ deyoro moarare, ãgũ õari ãgũ iirare erã ãarare guña mucubiri Goãmũre õaro wereniguinũgañorã. Goãmũre “Õagũ, turagũ ãhrimi,” arĩ gaguinũguñorã. Eropirã bũrigã gaguinũgui Goãmũre umupeo õpa arĩñorã:

<sup>38</sup> —Ñre umupeorã. Ihĩ Goãmũ ãgũ obeodigũ, mari Opũ õaro ariporo. Ñmaro majarã õaro arĩporo. Goãmũ ãgũ turagũ arĩcũ arĩpehrerã masiporo, arĩ umupeoñorã erã.

<sup>39</sup> Erã eroparĩcũ peerã fariseo masa bajamerãgã erã watope arĩrã Jesure wereñorã: —Buhegũ, mũ buherãre ejarimaricãdoreque, arĩñorã erã.

<sup>40</sup> Erãre yũhripũ Jesu:

—Mũare arĩgũ tĩiaa. Oã yũre umupeorã erã wereniguibiricũ utãyeripũ yũre umupeoro dopa ta gaguiniboca, arĩpũ Jesu erãre fariseo masare.

<sup>41</sup> Eropa arĩtuha Jesu Jerusalén pohrogũre eja, iri macare ãhabeogũ orepũ. <sup>42</sup> Õpa arĩpũ ãgũ:

—Jerusalén majarã, dohpagũre tamerare mũare õaro arĩburire mũa masicũ õatariaboya. Eropa arĩquerẽcũ mũa dohpagũre irire ne peediabirabũ. Eropigũ Goãmũ mũare irire masidorebirimi. <sup>43</sup> Mũare ãhaturirã mũa arĩri macare cãhmotarãcoma. Eropa iirã erã mũare wiriaro iisome. <sup>44</sup> Irisubu erã mũa ya macare cóãpehorãcoma. Mũare mũa porã sãre wejẽrãcoma. Mũare ãhaturirã õaro weasirirãcoma mũa ya macare. Goãmũ peamegũre wabonirãre mũare ãgũ taubure



yure m̄aa masidiabirabũ. M̄aa masidiabirira dipuwaja m̄aare ãhaturirãre Goãmu cóãdoregũcumi m̄aa ya macare, arĩpũ Jesu Jerusalén majarãre.

*Goãmu wihigue ejapũ Jesu*

*Mt 21.12-17; Mr 11.15-19; Jn 2.13-22*

<sup>45</sup> Eropi Jerusaléngue ejagu, Jesu Goãmu wihigue ñaja wapũ. Eropigu doberi duarãre iri wihigue bocajagu, erãre cohã wiucãpũ. Ōpa arĩpũ ãgu erãre:

<sup>46</sup> —Goãmu yare erã gojarapũ ōpa ãhraa: “Goãmu arĩmi: Yaha wihi Goãmu mera wereniguiiri wihi waĩcũroca,” arĩñuma ãgu yare erã gojarapũ. ãgu eropa arĩquerecũ ta m̄apũ i wihire Goãmu wihire duadoarã bu game yajarã iiaa, arĩpũ Jesu.

<sup>47</sup> Ūmuri nũcũ Goãmu wihigue Jesu buhepũ. Eropirã pahia oparã, judio masare buherã mera, masa oparã sã, ãgure erã wejẽburire guñamaañorã. <sup>48</sup> Masa árĩpehrerã ãgure eropa peenigui, ãgu buherire ōaro peenũrũrã árĩñorã. Erã eropa ōaro peenũrũcũ Jesure wejẽdiarãpũ ãgure erã wejẽburire bocabiriñorã.

## 20

*Jesure doredigũre ãgure serẽpiñorã*

*Mt 21.23-27; Mr 11.27-33*

<sup>1</sup> Gajinu Goãmu wihigue Jesu masare ōari buherire buhegu iipũ. ãgu eropa buhecũ pahia oparã, judio masare buherã, m̄urã mera ãgu pohrogue erarã, ãgure serẽpiñorã:

<sup>2</sup> —Wereque guare. ¿Noa doreri mera eropa iiri m̄uhũ? ¿Nihino m̄ure Goãmu wihigue árĩnirãre cóãdoreari? arĩñorã erã Jesure.

<sup>3</sup> Erã eroparĩcũ Jesu yũhripũ erãre:

—Yũhu m̄apũre serẽpimũhtagura. Wereque yũ sãre. <sup>4</sup> ¿Ñu masare ãgu waĩyecũ nihinopũ ãgure waĩyedoremuriyuri m̄aa pepicũ? ¿Goãmu doreyuri? ¿O masapũ doremuriyuri? arĩ serẽpipũ erãre.

<sup>5</sup> ãgu eroparĩcũ erãpũ erã basi game wereniguiñorã:

—¿Dohpa arĩ yũhrirãcuri mari? “Goãmu Ñure doredigu árĩmi,” mari arĩcũ, “¿Goãmu Ñure ãgu dorequerecũ ta duhpirã ãgu wererare peebirari m̄aa?” arĩbocumi Jesu marire. <sup>6</sup> Oã masapũ “Diaye ta Ñu Goãmu yare weremũhtadigu árĩmi,” arĩ pepima erã. Erã eropa arĩ pepirã maripũ “Ñu ãgu waĩyecũ Goãmupũ ãgure dorebiridigu árĩmi,” mari arĩcũ masapũ marire utã mera dearãcoma, arĩ wereniguiñorã erã erã basi. <sup>7</sup> Eropa arĩ wereniguituha erã Jesure yũhriñorã:

—Ñure waĩyedoredigũre gua masibea, arĩñorã erã.

<sup>8</sup> Erã eroparĩcũ Jesu yũhripũ:

—Irisubu tamerare yũ sã yure doredigũre werebea m̄aare, arĩpũ ãgu erãre.

*Ñerã mohme corerã iira queorire werepũ Jesu*

*Mt 21.33-44; Mr 12.1-11*

<sup>9</sup> Eropi Jesu queori moa ōpa arĩ buhenũgapũ masare:

—Yeba opũ árĩñumi. ãgu ya pohere iguire oteñumi. Otetuha, iri pohere gajirãre deco mera apiñumi erã mohme corera waja. Eropa apigu erãre iri pohere ãhadibudoretuhaja gaji yebague waha wañumi. Yoari boje deyobiriñumi. <sup>10</sup> Eropigu igui ñirisubu arĩcũ pohe opũ ãgu pohro majagũre pohere mohme corerã pohrogue obeoñumi. Pohe maja ãgu oteri dũcare ãgu ya sero majare aĩdoregu obeoriñumi. Eropirã pohere mohme corerãpũ ãgu pohro majagũre bocatĩri pañuma ãgure. Eropirã erã ãgure iguitõrĩre obiriquererã dujadoreñuma ãgure. <sup>11</sup> Eropigu pohe opũ gajigu ãgu pohro majagũre iri pohe maja dũcare aĩdoregu obeoriñumi daja. Eropirã pohere mohme corerã ãgu sãre pa ñero iĩñuma ãgure. Eropa iituha ãgu iri dũcare

obiriquererã dujadoreñuma daja. <sup>12</sup> Ìgure erã eropa iira pũhrũ gajigu pohro majagure obeoriñumi daja. Eropirã mohme corerã daja ìgure cami moa, iri pohe tũro cóãcãñuma ìgure.

<sup>13</sup> “Erã eropa iira pũhrũ pohe opu òpa arĩ pepiriñumi: “¿Dohpa iigũcuri yũhũ? Òpa iigũra. Yũhũ yũ magure yũ mahigure obeogũra. Erã ìgure umupeobocoma,” arĩ pepiriñumi pohe opu. <sup>14</sup> Eropirã ìgu magure ìgu obeodigu ejacũ ìarã mohme corerãpũ erã basi òpa arĩ wereniguiñuma: “Ìhĩ pohe opu magũ àhrimi. Ìgure wejẽrã. Eropiro i pohe mari ya pohe dujaroca,” arĩriñuma erã erã basi. <sup>15</sup> Eropa arĩtuha pohe opu magure ñeha pohe tũro aĩgã, wejẽcãñuma ìgure. ¿Ne pohe opu dujaragu dohpa iigũcuri ìgu ya pohere mohme corerãre? arĩpũ Jesu.

—Òpa iigũcumi erãre. <sup>16</sup> Ìgu pohere mohme corerãre wejẽgu, gajirãpũre pohere mohme corecoregũcumi, arĩ yũhripũ Jesu ìgu basi.

Ìgu eroparĩcũ peerã masapũ òpa arĩñorã:

—Marire eropa wabiricãporo, arĩñorã erã.

<sup>17</sup> Erã eroparĩcũ Jesupũ erãre ìha serẽpipũ:

—¿Goãmũ yare erã gojarapũre òpa arĩra dohpa arĩro iiri mũa pepicũ?

Ìhĩ Cristo utãye iro dopa ta àhrimi. Masa Cristore gamebirãcoma. Erã ìgure gamebiriqerercũ Goãmũ ìgure beye erã opu erãre taubu acumi, arĩ gojañuma.

<sup>18</sup> Yũre gamebirãpũ yũ dipuwaja moamorã árĩrã ñero tarirãcoma, arĩpũ Jesu erãre.

*Oparã ya wajare wajayeburire gajirã serẽpiñorã Jesure*  
*Mt 21.45-46; 22.15-22; Mr 12.12-17*

<sup>19</sup> Ìgu eroparĩcũ peerã judio masa buherã, pahia oparã sã “Jesu iri pohe opu queori mera ‘Erã ñerã mohme corerã iro dopa àhrima,’ arĩgu marire weresãgu iicumi ìgu,” arĩ pepiñorã erã.

Eropa arĩ pepirã erã Jesure ñeadiariñorã. Eropa ñeadiaquererã ta masa Jesure gamerã mari mera guari arĩrã erã masare gũi árĩñorã. <sup>20</sup> Eropa gũirã Jesure erã ñeaburisubure corerã ìgure ìhanũrũñorã. Ìgu ñero arĩ yũhricũ ìadiarã iiriñorã ìgure weresãmorã. Eropirã Jesure gajino serẽpidorerã obeoñorã gũyarãre. Erãre diaye iirã dopa wereniguidoreñorã. Jesu ñero ìgu werenicũ peerã iri yeba majagu opũre peresu iidoremorã iiriñorã. <sup>21</sup> Eropirã erã Jesure serẽpiñorã:

—Buhegu, diaye wereniguigu, gũyari marigu mũ árĩcũ gua masia. Eropigu opu árĩcũ sãre ìgu bu árĩgu ìgu árĩcũ sãre yujuropa ìhaa mũhũ. Mũhũ Goãmũ yare diaye mũ buhecũ sãre gua masia. <sup>22</sup> Wereque gũare: ¿Roma majagu árĩpehrerã tauro opu árĩgure gobierno majare marire wajayero gahmeri mũ pepicũ? ¿Mari doreripu irire wajayedoreri? arĩñorã erã Jesure.

<sup>23</sup> Erã eroparĩcũ Jesu erã ñero iidiarire masigu erãre werepũ:

—¿Duhpirã yũ ñero wereniguicũ peediarĩ mũa? <sup>24</sup> Dohparagã niyerusere aĩrique. Irisere ìarã, arĩpũ.

Irisere erã aĩ eracũ ìagu òpa serẽpipũ Jesu:

—¿Nihino gohra waĩcũgu masũ tuhyari irisere? ¿Noa waĩ tuhyari? arĩ serẽpipũ Jesu erãre.

—César, masa tauro opu waĩ ìgu masũ sã tuhyami iriseguere, arĩ yũhriñorã erã.

<sup>25</sup> Erã eroparĩcũ Jesu werepũ:

—Irisubu tamerare masa tauro opũre ìgu yare oque. Goãmũ yapũre Goãmũre oque, arĩpũ Jesu erãre.

<sup>26</sup> Eropirã masa erã peero Jesure ñero arĩ wereniguicũ iimasibiriñorã erã. Eropirã erã Jesu yũhririre peerã erã peemaria wañorã. Eropa peemariarã, ejarimaria wañorã.

*Saduceo masa Goāmũ ĩġũ sĭrinirã masurire serēpiñorã Jesure  
Mt 22.23-33; Mr 12.18-27*

<sup>27</sup> Eropi bajamerãgã Saduceo masa Jesu pohrogue erañorã. “Goāmũ sĭrinirãre masusome,” arĭ pepirã árĭñorã Saduceo masa. Eropirã erã õpa arĭñorã ĩġure:

<sup>28</sup> —Buheġũ, marire õpa arĭ gojañumi Moise: “Yujugũ ĩġũ tĭġũ marapocũġũ porã mariquereġũ ta ĩġũ sĭricũ ĩagũ ĩġũ pagũ magure ĩġũ tĭġũ marapo árĭdigore marapocũro gahmea. Eropa iigũ ĩġũ tĭġũ mũrũ ĩġũ porãcũbodiro dopa ta porãcũro gahmea ĩġũ pagũ magure. Eropirã ĩġũ tĭġũ mũrũ porã iro dopa árĭrãcoma,” arĭpũ Moise, arĭñorã erã.

<sup>29</sup> Irire arĭtuha i queorire werenemoñorã erã Jesure:

—Yujugũ porã siete árĭñorã. Erã tĭġũpũ marapocũ porã marigũ ta sĭria wapũ.

<sup>30</sup> Eropigũ gajigũ ĩġũ pagũ magũ sã ĩġũ tĭġũ marapo árĭdigore ta marapocũpũ. ĩġũ eropa marapocũra pũhrũ ĩġũ tĭġũ mũrũ iro dopa ta ĩġũ sã porã mariquereġũ ta sĭria wapũ. <sup>31</sup> Eropigũ ihĭ pagũ magũ sã ĩġũ tĭġũ mũrũ iro dopa ta porã mariquereġũ sĭria wapũ. Eropa dihta wañorã yujugũ porã gohra. Ne porã mariquererã ta sĭripehrea wañorã. <sup>32</sup> Erã marapo sã erã pũhrũ sĭria wapo pare, arĭ, Jesure serēpiñorã: <sup>33</sup> ¿Ne, Goāmũ árĭpeherrerãre sĭrinirãre ĩġũ masucũ nihino marapo gohra árĭgocuri igo? Erã siete árĭpeherrerã igore marapocũnirã árĭñorã. ¿Eropigo nihino marapo gohra árĭgocuri igo? arĭ serēpiñorã erã.

<sup>34</sup> Erã eroparĭcũ Jesu yũhripũ:

—I yeba majarã ɯma nome mera marapocũma. <sup>35</sup> Erã eropa iiquerecũ ta ɯmũsi majarãpũ eropa árĭbeama. Dohpaguere masare ɯmare, nome sãre diaye iirãre Goāmũ õarã iigũcumi. Erã erã sĭrira pũhrũ masa mũriarãcoma Goāmũ pohrogue. Eropirã erã eroguerẽ marapocũbeama. <sup>36</sup> Eropirã erã anyua iro dopa ta ne sĭrisome daja. Erã Goāmũ ĩġũ masunirã árĭrã, Goāmũ porã ãhrima. <sup>37</sup> Dohpaguere sĭrinirã erã masa mũriaboropũre mũare wereġura. Irire masia mũa ĩġũ Moise ĩġũ arĭ gojarare. “Iri yucũġũgãgue ɯjũdigũgue árĭġũ Goāmũ õpa arĭ weremi yũre,” arĭ gojañumi Moise. “Yũhũ Abrahã, Isaa, Jacobo erã opũ ta ãhraa,” arĭ weremi Goāmũ yũre,” arĭ gojañumi Moise. <sup>38</sup> Erã sĭrira pũhrũġue “Erã opũ ta ãhraa,” arĭñumi Goāmũ. Eropirã erã sĭrinirã mũra ĩġũ masunirã árĭrã erã ojocarirã ãhrima. Árĭpeherrerã masa sĭriquererã ojocarirã ãhrima Goāmũ ĩġũ ĩacũ, arĭpũ Jesu erãre.

<sup>39-40</sup> ĩġũ eroparĭcũ erãpũ dipaturi Jesure serēpidiabiriñorã. Eropirã bajamerãgã judio masare buherã õpa arĭñorã:

—Buheġũ, mũhũ õaro yũhriabũ, arĭñorã erã ĩġure.

*Cristo Davi mũrũ opũ ãhrimi, arĭ werepũ Jesu  
Mt 22.41-46; Mr 12.35-37*

<sup>41</sup> Pũhrũ Jesu õpa arĭ werepũ masare:

—“Cristo Davi mũrũ pãrami árĭġũcumi,” arĭ buherima mũare buherã. ¿Duhpirã erã eropa arĭ buheri? <sup>42</sup> Davi mũrũ ĩġũ basi Salmo ĩġũ gojarapũġue õpa arĭ gojañumi: Goāmũ yũ opũre õpa arãmi: “Ohõ yũ diayerũ dorebu doaque. <sup>43</sup> Eropigũ mũre ĩhaturirãre mũre tarinũgabasagũra yũhũ,” arĭmi Goāmũ yũ opũre, arĭ gojañumi Davi mũrũ.

<sup>44</sup> Eropa arĭ gojagũ Davi mũrũ opũcũñumi Cristore. ¿Eropigũ Davi mũrũ Cristo ñecũ mũrũ árĭquereġũ ta duhpigũ Davipũ Cristore opũcũyuri? Cristo Davi mũrũ opũ ãhrimi, arĭ werepũ Jesu.

*Masare buherã erã ñero iirire werepũ Jesu  
Mt 23.1-36; Mr 12.38-40; Lc 11.37-54*

<sup>45</sup> Masa bajarã watope Jesupũ ĩġũ buherãre õpa arĭ werepũ:

<sup>46</sup> —Masare buherã erã ñeri iirire ñarã ðaro pee masique. Eropirã erã iro dopa iibiricãque. Erã yoari suhri sañama masa erãre ñaboro dopa. Doberi duarogue gajirã umupeori mera bocafiri serẽcũ gahmema erã. Eropirã erã mari buheri wiriguere oparã ðari doari dihtare doadiama erã. Eropirã bosenari árĩcũ sãre oparã erã doarigue dihtare doadiama. <sup>47</sup> Erã wapeweyarã nome erã wajamocũ ñha erã ya wirire ehmama erã nomere. Eropa erãremojomoro ñabiriquererã erã masa erã ñhurore yoari boje Goãmure serẽma, “Gua Goãmure ðaro umupeoa,” arĩ gũyarã. Erã eropa iira dipuwaja Goãmũ erãre gajirã tauro dipuwaja moagucumi, arĩpũ Jesu erãre.

## 21

### *Wapeweyo Goãmũ wihigue igo apirare werepũ Jesu*

*Mr 12.41-44*

<sup>1</sup> Eropa arĩ weretuha Jesu Goãmũ wihi maja erã amuburi niyeru gameneori comoro pohroge ñha doapũ. Iri comorogue doberi oparã erã niyeru sãcũ ñapũ Jesu. <sup>2</sup> Eropa ñagũ wapeweyomojomorocũgo igo pesegã igo oparaserigãre igo sãcũ sãre ñapũ. <sup>3</sup> Irire ñatuha ðpa arĩ werepũ:

—Diaye arĩgũ iiaa mũare. Igo wapeweyomojomorocũgopũ ii comorogue igo yare sãgo gajirã árĩpehrerã erã sãdiro tauro sãmo igoa. <sup>4</sup> Gajirã doberi oparã erã wũaro oquerecũ ta erãpũre erã ya wũaro duhyaa. Igoũmojomorocũgo árĩquerego ta árĩpehreri igo bari waja árĩborare opehocãmo igoa, arĩpũ Jesu.

*—Goãmũ wihi cóãra wihi árĩroca, arĩpũ Jesu*

*Mt 24.1-2; Mr 13.1-2*

<sup>5</sup> Eropi gajirã Goãmũ wihire ñarã ðpa arĩñorã:

—Ñari utã mera iira wihi, ðari wihi ãhraa. Masa Goãmũ wihire erã ora sã ðari ãhraa, arĩ wereniguirã iñorã.

Erã eroparĩcũ Jesu werepũ erãre:

<sup>6</sup> —I wihi majare dohpaguere ñaraa mũa. Gajinũ árĩcũ i wihi maja árĩpehreri mari ñara, i utã sã cohmopehrea waroca. Ne yujuye utãye dujasome, arĩpũ Jesu erãre.

*I mũũ pehreburiñũ werepũ Jesu*

*Mt 24.3-28; Mr 13.3-23*

<sup>7</sup> Ñgũ eroparĩcũ peerã erãpũ serẽpiñorã ñgure:

—Buhegũ, ¿dohpárĩcũ eropa warocuri mũ arĩdiro dopa waro? ¿Pehreburiñũ coregãre dohpa wanũgacũ ñarãcuri gũa? arĩ serẽpiñorã erã ñgure.

<sup>8</sup> Jesu yũhriũ erãre:

—Ñaro iiyuque mũa. Eropirã gajirã mũare erã gũyarire peebiricãque. Bajarã masa “Cristo ãhraa yũhũ,” arĩ gũyarã árĩrãcoma. Eropa arĩ gũyarã “Dohpaguere pehreburiñũ merogã duhyaa,” arĩrãcoma. Erã eroparĩcũ erãre peebiricãque. <sup>9</sup> Eropirã mũa pohrogã gajirã masa gamewejẽcũ, masa erã oparãre cóãcũ peerãca. Eropirã yorogue majarã sã eropa iicũ peebeorãca. Mũa irire peerã güibiricãque. Pehreburiñũ core ðpa wamũhtaroca. Eropa wamũtacũ pehreburiñũ duhyaniroca dohpa, arĩpũ Jesu.

<sup>10</sup> Eropa arĩtuha ðpa arĩ werenemopũ:

—Irisubure yuju yeba majarã gaji yeba majarã mera gamewejẽrãcoma. Eropirã yujugũ opũ yarã gajigũ opũ yarã mera gamewejẽrãcoma. <sup>11</sup> Eropi bajasuburi i yeba ñohmeroca. Eropirã masa bajarã oa mera siri, árĩpehrero majarã masa dorecũrãcoma. Eropirã umaro majare deyoro moarire gũhyadiarire masa ñarã, ñha uca warãcoma. Eropa wacũ mũapũ güibiricãque.



<sup>12</sup> “I árĩpehreri eropa waboro core, yaharã mũa árĩri dipuwaja gajirã mũare ñeha ñero iirãcoma. Eropirã mari judio masa buheri wirigue mũare weresã, peresu iirãcoma mũare. Erã eropa iicũ macari majarã oparã pohrogue erã tauro oparã pohrogue sãre mũare aĩgãrãcoma erã mũare dipuwaja moadorerã. <sup>13</sup> Erã eropa mũare aĩgãcũ mũapu erãre õari buherire wererãca. <sup>14</sup> Erã oparã pohrogue mũare erã aĩgãcũ erã oparãre mũa yuhriborore wũaro guñabiricãque mũa. <sup>15</sup> Yũhũ mũare wereniguicũ iigũra. Mũare eropa itamugũ pee masirire, õari wereniguiri sãre mũa iicũ iigũra. Mũa eropa iicũ mũare ñaturirãpu mũa wereniguiriire pee bocatũmasisome. “Iri diaye árĩbeaa,” arĩ yuhrimasisome. <sup>16</sup> Irisuburi mũa yaharã árĩcũ ñha mũa pagũ sumarã, mũa pagũ porã, mũa acawererã, mũa mera majarã sã mũare oparãre wejẽdorerã orãcoma mũare. Erã eropa iicũ mũare ñaturirã mũa mera majarãre gajirãre wejẽrãcoma. <sup>17</sup> Eropirã yaharã mũa árĩcũ ñarã, árĩpehrerã mũare ñaturirãcoma. <sup>18</sup> Mũare eropa iicũ mũapu ne dederesome. <sup>19</sup> Eropirã erã mũare ñero iiquerecũ ta mũare erã ñero iirare yujuro bojerã yũre duhubiricũ Goãmũ mũare taugũcumi. Eropigũ ñgũ pohrogue mũare opagũcumi.

<sup>20</sup> “Eropirã bajarã surara Jerusalenguere erã cãhmotacũ ñarã, Jerusalenre erã cóãborore merogã duhyacũ masirãca mũa. <sup>21</sup> Eropa wacũ ñarã Judea yeba árĩrãpu utã yucũgue oma duhriporo. Eropirã Jerusalen árĩrã sã waporo. Eropirã campo árĩrã Jerusalenguere wabiricãporo daja. <sup>22</sup> Irinũri dipuwaja moarinũri árĩpehreri Goãmũ yare erã gojarapũ erã arĩdiro dopa ta eropa waroca. <sup>23</sup> Goãmũ oã masare turaro dipuwaja moacũ árĩpehrerogue i yebaguere ñero tarirãcoma. Eropa wacũ nijiposã nome, erã porãre mihrirãre oparã nome sã mojomorocũrã nome dujarãcoma irisubure. <sup>24</sup> Gajirã i maca majarãre gamewejẽrãcoma. Eropirã gajirã i maca majarãre árĩpehreri yebarigue aĩgã peresu iirãcoma. Eropirã judio masa árĩbirã Jerusalenre ñero iirãcoma. Eropirã erã tarinũgarãcoma. Judio masa árĩbirãre “Iripẽta árĩque,” Goãmũ ñgũ arĩcũgue Jerusalenre ãhri duhurãcoma, arĩ werepu Jesu.

*Jesu i yebague ñgũ dujariborore werepu*

*Mt 24.29-35, 42-44; Mr 13.24-37*

<sup>25</sup> Eropigũ erãre werenemopũ:

—Irisubure abe umũ majagũ, ñami majagũ, necã sã guhyaro gohrotoa warãcoma. Árĩpehrerã i yeba majarã, “Cue, sĩrirãca,” arĩ pepirãcoma. Wũariya turaro busũrire pãgũri sãre turaro guirãcoma. <sup>26</sup> Irisubure umaro maja sã yeba sã burigã ñohmeroca. Eropa wacũ ñarã masapũ i yeba pehborore corerã burigã guirãcoma dedererĩ arĩrã. <sup>27</sup> Irisubu ta yũhũ masũ Goãmũ ñgũ obeodigũ Goãmũ ñgũ turarĩ mera, ñgũ gosesiriri mera umaro maja imica weca i yebaguere yũ dujaricũ ñarãcoma masa. <sup>28</sup> Yũ eropa arĩra wanũgacũ ñarã guibiricãque. Eropirã guñatura umarogue ñhamujuque. Irisubure Goãmũ mũare ñgũ tauboro merogã duhyaroca, arĩpu Jesu.

<sup>29</sup> Eropa arĩtuha i queori mera erãre werepu Jesu:

—Higueragũ baja gaji yucũ sã iri yucũ waricũrire pepique mũa. <sup>30</sup> Iri yucũ pũricũcũ ñarã, “Bojori merogã duhyaa,” arĩ masia mari. <sup>31</sup> Eropa ta i árĩpehreri yũ arĩra iri eropa wacũ ñarã, “Goãmũ ñgũ opu árĩburisubu merogã duhyaa,” arĩ pepirãca mũa. <sup>32</sup> Mũare diaye arĩgũ iiaa. Irisubu majarã erã sĩriboro core árĩpehreri yũ arĩra eropa waroca. <sup>33</sup> Umaro i yeba sã pehrea waroca. Yũ wereniguiripu ne pehresome. Árĩpehreri yũ arĩdiro dopa ta eropa waha ojogorocũroca.

<sup>34</sup> “Yũ dujariburinũre ne masibea mũa. Eropirã õaro arĩyuque. Bosenũrire pagari iiniguibiricãque. Eropirã merebiricãque. I yeba maja iiburire wũaro pepibiricãque. Mũare yũ arĩdiro dopa ta iirã, guñaña mariro i yebaguere yũ aricũ ne ucasome.

<sup>35</sup> Yũhũ masare beyegũ arigũ guñaña mariro arigũca. Waibũgũ guñaña mariro



Īġu weradague ĳġu mehsihajaro dopa ta irinũ waroca masare árĳpehrerã i yeba majarãre. I yeba majarã “Eropa waroca,” erã arĳbiririnũ eropa waroca. <sup>36</sup> Mũarũ õaro ġuñatura coreque. Eropirã Goãmũre ire serẽniguicãque: “Pehrerinũ eropa wacũ yũre itamuque. Turarire oque yũre õaro yũ tariboro dopa. Eropiġũ Cristore mũ obeogũre ġũiro mariro yũhũ ĳġũre bocatĩricũ iique yũre,” arĳ serẽque Goãmũre, arĳpũ Jesu.

<sup>37</sup> Eropi irinũrere Goãmũ wihigue Jesu buhemũripũ. Ñamiri nũcũ buhetuhajagũ Olivo waĩcũdigũgue waha irigũgue arĳboyotahmuamũripũ. <sup>38</sup> Boyocũ árĳpehrerã masa ĳġũre Goãmũ wihigue peerã wamũriñorã.

## 22

*Pahia oparã, judio masare buherã mera wejẽdiañorã Jesure*

*Mt 26.1-5, 14-16; Mr 14.1-2, 10-11; Jn 11.45-53*

<sup>1</sup> Eropi irisubure bũgabiriri pan erã baburi bosenu merogã dũhyayoro. Iri bosenu Pascua waĩcũyoro. <sup>2</sup> Eropirã pahia oparã, judio masare buherã mera Jesure wejẽdiarã, erã wejẽborore ġuñamaañorã. Jesure wejẽdiaquererã ta masapũre ġũĩñorã ġuari arĳrã.

<sup>3</sup> Eropi Judapũ watĩ ĳġũre ñero iidorecũ yũhripũ ĳġũre. Juda doce Jesu buherã mera majagũ arĳripũ. <sup>4</sup> Eropiġũ pahia oparãre, Goãmũ wihi majarã surara oparã mera sãre weretamugũ wapũ. Erã pũhrogue eja, erãre Jesure ĳġũ ĳhmuborore weretamupũ erã mera. <sup>5</sup> ĳġũ erãre eroparĩcũ pee erã mucubiri, “Mũre niyeru wajayerãca,” arĳñorã erã Judare. <sup>6</sup> Erã eroparĩcũ, “Áũ, mũare ĳġũre ĳhmugũra,” Juda arĳpũ. Eropiġũ masa erã ĳabiririsubu Jesure ĳhaturirãre ĳġũ ĳhmuborore corenipũ.

*Jesu ĳġũ buherã mera ĳġũ baturinũ arĳyoro*

*Mt 26.17-29; Mr 14.12-25; Jn 13.21-30; 1Co 11.23-26*

<sup>7</sup> Bũgabiriri panre erã baburinũ bosenu arĳĩnũgarinũ arĳyoro. Eropi Pascua majagũ arĳbure ovejare erã wejẽrinũ arĳyoro. <sup>8</sup> Irisubu ta Pedro, Ñũ sãre Jesu werepũ:

—Bosenu mari baburire amurã waque, arĳpũ Jesu erãre.

<sup>9</sup> —¿Nohonogue mari baburire amudoreġũ obeori mũhũ ġũare? arĳ serẽpiñorã erã.

<sup>10</sup> Erã eroparĩcũ Jesu yũhripũ:

—Jerusalẽngue waque. Eroque mũa ejacũ deco sorobu tuhpeogũ mũare bocatĩrigũcumi. ĳġũ bocatĩricũ ĳġũ mera waque. <sup>11</sup> Eropa warã ĳġũ sihu ñajari wihigue ejarã, wihi opũre õpa arĳique: “ ‘¿Nohogue yũhũ, yũ buherã mera Pascua maja barire barãcuri?’ arãmi buheġũ,” arĳique wihi opũre. <sup>12</sup> Mũa eroparĩcũ peegũ wũari taribure, mũmaro maja taribure, mari gameri mera erã amura taribure ĳhmugũcumi wihi opũ. Eroque mari baburire iique mũa, arĳpũ Jesu erãre.

<sup>13</sup> ĳġũ eroparĩcũ erã iri macague wañorã. Eroque erã ejacũ erãre ĳġũ arĳdiro dopa ta eropa wayoro. Eropirã erã Pascua arĳcũ baburire amuñorã.

<sup>14</sup> Erã barisubu arĳcũ Jesu doce ĳġũ buherã mera ba doapũ. <sup>15-16</sup> Eroque erã barogue doagũ Jesu erãre werepũ:

—Mũare arĳġũ iiaa. I Pascua bosenure mari iiaa Goãmũ ĳġũ yarãre ĳġũ taurare ġuñarã. Pũhrũ Goãmũ ĳġũ opũ arĳĩrogue ĳġũ yarãre tautuhagũcumi. ĳġũ eropa tauboro core inũno majare dipaturi basome yũhũ. Eropiġũ dohpaguere yũ ñero tariboro core i Pascua maja barire mũa mera turaro badiabũ, arĳpũ Jesu.

<sup>17-18</sup> Eropa arĳġũ Jesu ĳhriripare aĩ, Goãmũre “Õhaa,” arĳ serẽ, erãre werepũ:

—Mũare arĳġũ tiiaa. Goãmũ ĳġũ opũ arĳĩrogue igui decore ĳhriboro core ne dipaturi ĳhrisome yũhũ. Eropirã iri vinore aĩ mũa basi ĳhrique, arĳpũ Jesu.

19 Eropa arĩtuha panre aĩ, Goãmure “Õhaa,” arĩpũ. Eropa arĩtuha irirure nuha guerepũ erãre. Irirure gueregu ta erãre werepũ:

—I yũ dũpũ ãhraa. Yũ dũpũ yũre ãhaturirãre erã oburi dũpũ árĩroca. Mũa ñeri iira wajare cóãbu sĩrigũca yũhũ. Eropirã mũa yũre guñaburire ire baque, arĩpũ Jesu.

20 Eropa batuha eropa ta erãre ihriripa sãre ópũ. Eropigu erãre werepũ:

—Mũa ñeri iirare cóãbu sĩrigũca. Eropigu yũ dire cóãgũca. Eropa sĩrigũ yũ Pagu Goãmũ “Masare ðaro iigũra,” ãgu arĩdiro ii ojogorocũgũca.

21 “Dohpaguere peeque mũa. Yũre ãhaturirãre ãhmubu yũ mera ohõ doami.

22 Goãmũ ãgu arĩdiro dopa ta yũhũ masũ Goãmũ ãgu obeodigu sĩrigũca. ãgu eropa sĩridorequerẽcũ ta yũre ãhaturirãre ãhmudigũpũ ñetariaro tarigũcumĩ, arĩpũ Jesu.

23 ãgu eroparĩcũ erãpũ erã basi õpa arĩ serẽpiñorã:

—¿Jesure ãhaturirãre ãhmubu mari mera majagu nihino árĩcuriba? arĩ serẽpiñorã erã basi.

*“¿Mari mera majagu nihinopũ opũ árĩgũcuri?” arĩ wereniguiñorã Jesu buherã*

24 Pũhrũ Jesu buherã õpa arĩ dũyasoñorã:

—¿Mari mera majagu nihipũ árĩgũcuri opũ? arĩ wereniguiñorã erã basi.

25 Erã eropa arĩ wereniguicũ peegu Jesu erãre werepũ:

—Goãmure masibirã oparãpũ erã masare dorerã pũriro mera dorema. Eropirã oparãre “Erã masare ðaro itamurã ãhrima,” arĩrima gajirã erãre. 26 Mũapũ eropa oparã árĩdiasome mũa basi. Mũa mera majagu mũa tũgũpũ mũa pagu magũ iro dopa árĩporo. Mũa mera majagu opũ árĩdiagũ gajirã itamugũ árĩporo. 27 ¿Nihino ãhriri opũ mũa pepicũ? ¿Ba doagũpũ opũ ãhriri? ¿O barire duhpẽogũpũ opũ ãhriri? Ba doagũ ta árĩcumĩ opũ. ãgu eropa árĩquerẽcũ ta yũpũ pohro majagu iro dopa ta mũare itamugũ ahrabũ.

28 “Masa erã yũre ñero iiquerẽcũ ta mũapũ yũre duhubirabũ. 29 Eropigu yũ Pagu ãgu yũre opũ acudiro dopa ta mũa sãre oparãre acugũra yũhũ. 30 Yũ opũ árĩcũ mũa sã yũ bari mesa ta baha ihrirãca. Eropirã mũa oparã doarire doarãca. Mũa ero doarã Israe masare doce cururi majarãre beyerãca ðarã sãre ñerã sãre, arĩpũ Jesu ãgu buherãre.

*Pedro “Jesure masibea,” ãgu arĩ gũyaburiñere wereñumi Jesu  
Mt 26.31-35; Mr 14.27-31; Jn 13.36-38*

31 Eropa arĩtuhaja Pedrore Jesu õpa arĩ werepũ:

—Simo Pedro yũre peeque. Watĩ Satana mũare árĩpẽhrerãre gamegu Goãmure serẽramĩ. Mũa yũre duhu ãgu yare iicũ gamegu serẽramĩ. Trigo pohe opũ ãgu trigo gasirire cóãgu puri siriro dopa mũare goroweodiami. 32 ãgu mũare eropa gamequerẽcũ yũpũ mũre Goãmure serẽbasabũ. Yũre mũ umupeo duhubiriburire serẽbasabũ Goãmure. Eropigu mũhũ yũ mera majagu dipaturĩ árĩgu mũ acawer-erãre yaharãre guñaturacũ iique mũhũ, arĩpũ Jesu Pedrore.

33 ãgu eroparĩcũ Pedro yũhrĩpũ:

—Opũ, mũre erã peresu iiquerẽcũ ta, yũhũ mũ mera majagu árĩniguigũca. Mũre erã wejẽquerẽcũ ta mũ mera majagu árĩniguigũca, arĩpũ Pedro.

34 Jesu yũhrĩpũ:

—Pedro, mũre arĩgu iiaa. Dohpagã ñami cãreña ãgu wereboro core ãhresubu “Jesure masibea,” arĩgũca mũhũ gajirãre, arĩpũ Jesu Pedrore.

*Jesure erã ñero iinũgaboro merogã duhyayoro*

35 Eropa arĩtuha Jesu ãgu buherãre werepũ:

—¿Sohõ árĩrasubure mũa niyeru aju moorã, suhri diyeri aju moorã, zapatu moorã mũare yũ obeorasubure gajino duhyari mũare? arĩ serẽpipũ Jesu.

—Ne gajino guare duhyabirabũ, arĩ yuhriñorã erã.

<sup>36</sup> —Irisubure mũare duhyabiriquerecũ ta dohpaguepũre suhri diyeri ajure, niyeru aju sãre oparã irire aĩque. Eropirã mũare matamijiri maricũ ñarã mua suhrire duarã irimijire asũque. <sup>37</sup> Ire mũare arĩgu iiaa. Goãmũ yare erã gojarapũ erã arĩdiro dopa ta yũre eropa waro gahmea. Ōpa arĩñuma iripũgue. “ Īgu dorerire tarinũgarã mera majagu ãhrimi,” arĩrãcoma masa,” arĩ gojañuma yũre, arĩpũ Jesu. Erãpũ arĩñorã:

<sup>38</sup> —Īaque opũ. Pemiji matamijirire opaa guã, arĩñorã ĩgu buherã.

—Iripẽta árĩca, arĩ yuhripũ Jesu.

*Getsemanigue Jesu Goãmũ mera wereniguipũ*

*Mt 26.36-46; Mr 14.32-42*

<sup>39</sup> Eropi Jesu ĩgu ero core ĩgu iiguadiro dopa ta Olivo waĩcũdigũ utãgũgue waha warũ. ĩgu eropa wacũ ĩgu buherã ĩgu mera wañorã. <sup>40</sup> Erogue ejagu ĩgu erãre werẽpũ:

—Goãmũre serẽque mua ñerire iibiriboro dopa, arĩpũ erãre Jesu.

<sup>41</sup> Eropa arĩtuha ĩgu seyaro merogã yujugũ ta wanemo, mereja Goãmũ mera wereniguipũ:

<sup>42</sup> —Ahũ, yũ ñero tariburire iidiabigu iibiricãque. Yũ eropa serẽquerecũ ta yũ gamero dopa iibita. Mũpũ masia. Mũ gamero dopa ta iique, arĩ serẽpũ Jesu Goãmũre.

<sup>43</sup> ĩgu eropa arĩ serẽcũ umarogue aridigu anyu Jesure dehyoapũ ĩgũre itamugũ.

<sup>44</sup> Eropigu Jesu ñero sĩporãcũ turaro mera Goãmũ mera wereniguipũ. Eropiro ĩgu ñajasiri guari di wiriro dopa ĩgũre wiridijayoro.

<sup>45</sup> Goãmũ mera wereniguituha wahgãñugaja, ĩgu buherã pohrogue dujaa warũ. ĩgu dujajacũ ĩgu buherã burigã bujawererã árĩrã carĩrã arĩñorã. <sup>46</sup> Eropigu Jesu erãre ōpa arĩ werẽpũ:

—¿Duhpirã carĩri mua? Wahgãque. Goãmũre serẽque mua ñeri iibiriburire, arĩpũ Jesu erãre.

*Jesure ñhaturirã ĩgũre peresu iñorã*

*Mt 26.47-56; Mr 14.43-50; Jn 18.2-11*

<sup>47</sup> ĩgu eropa arĩ wereniguirisubu masa bajarã erañorã. Juda doce buherã mera majagu árĩdigũ masare mũhtagãridigu arĩpũ. Eropigu ĩgu Jesu pohro eraa, ĩgu wayuporãre mimipũ ĩgũre. <sup>48</sup> ĩgu eropa mimicũ Jesupũ ĩgũre serẽpipũ:

—Juda, ¿yũ masũre Goãmũ ĩgu obeodigũre yũre ñhaturirãre ñhmugũ yũ wayuporãre mimiri mũhũ? arĩpũ Jesu.

<sup>49</sup> ĩgu eropa arĩra pũhrũ Jesu buherã masa Jesure erã ñeaburire masirã ĩgũre serẽpiñorã:

—Opũ, ¿gũã matamijiri mera erãre gamequeãsi? arĩñorã erã.

<sup>50</sup> Erã eropa arĩra pũhrũ yujugũ Jesu buherã mera majagupũ pahia opũ pohro majagũre ĩgu matamiji mera ĩgu gamirore diayepũ árĩri gamirore tabe coro dijucãpũ.

<sup>51</sup> ĩgu eropa iicũ ĩagu Jesu ōpa arĩpũ:

—Iibita, arĩpũ.

Eropa arĩtuha pohro majagu gamiro arĩrañere mohmepipũ. ĩgu eropa iicũ pohro majagupũ mũraro ta dujapũ daja. <sup>52</sup> Eropa iituha pahia oparãre, Goãmũ wihi surara oparãre, mũrã sãre ĩgũre ñeamorãre Jesu serẽpipũ:

—¿Mũã matamijiri mera, yucũ dũcari mera arirã yajari masũre iro dopa ta yũre ñearã arirã iiari? <sup>53</sup> Ūmũri nũcũ Goãmũ wihigue mũã mera yũ árĩcũ, mũã yũre ñeabiribũ. Eropa arĩquerecũ ta dohpague mũã ñerã yanũ ta ãhraa. Watĩ ĩgu tarinũgaburisubu árĩro iiaa, arĩpũ Jesu.

*“Jesure masibea,” arĩpũ Pedro*

*Mt 26.57-58, 69-75; Mr 14.53-54, 66-72; Jn 18.12-18, 25-27*

<sup>54</sup> Erã Jesure ñeatuha pahia opũ ya wihigue aĩgãñorã erã ĩgũre. Erã aĩgãcũ Pedro yoarogue erãre ĩhanũrusiapũ. <sup>55</sup> Opũ ya wihigue ejacũ, iri wihire cãhmotara sãriro pohecague õari goro deco peame dihuñorã gajirã. Erã dihucũ ĩagu Pedro peame pohro doarã mera doapũ. <sup>56</sup> ĩgũ peame boyorogue doacũ yujugo pohro majago ĩgũre õaro ĩhanũrũ gajirãre õpa arĩ werepũ:

—Ihĩ sã ĩgũ mera ta ãhrami, arĩpo igo.

<sup>57</sup> Igo eroparĩcũ Pedro yũhripũ:

—Nomeo, ĩgũre ne masibea yũhũ, arĩripũ Pedro. <sup>58</sup> Pũhrũ ñari gajigũ Pedrore ĩha, õpa arĩ werepũ:

—Mũ sã erã mera majagu ta ãhraa, arĩpũ ĩgũ.

—Ne, arĩbeaa, arĩripũ Pedro.

<sup>59</sup> Yuju hora pũhrũ gajigũ gajirãre õpa arĩ werepũ:

—Diaye ta ãhraa. Ihĩ Galilea majagu ãhrimi. Diaye ta Jesu mera ãhrami ihĩ sã, arĩpũ ĩgũ gajirãre.

<sup>60</sup> ĩgũ eroparĩcũ Pedro yũhripũ:

—Mũ arĩgũre ne masibea yũhũ, arĩ yũhripũ.

ĩgũ eropa arĩ wereniguirisubu cãreña werepũ. <sup>61</sup> ĩgũ werecũ mari Opũ Jesu wihi pohro árĩdigũ Pedrore maji ĩapũ. ĩgũ eropa ĩacũ Pedropũ Jesu ĩgũ arĩrare guñapũ. “Dohpagã ñami cãreña ĩgũ wereboro core, uñresubu mũhũ, ‘Yũhũ Jesure masibea,’ arĩgũca mũhũ,” Jesu ĩgũ arĩrare guñapũ Pedro. <sup>62</sup> Eropigũ Pedro erogue wiriri, turaro orepũ.

*Jesure wereya, pañorã erã*

*Mt 26.67-68; Mr 14.65*

<sup>63</sup> Eropirã Jesure corerã surara ĩgũre wereya, pañorã. <sup>64</sup> Eropa parã ĩgũ cuirire diricãhmota, ĩgũre serẽpiñorã:

—¿Noa mũre pari? ĩabiriqueregu ta wereque guare, arĩ wereyañorã erã.

<sup>65</sup> Eropirã baja gaji ñero arĩ wereyañorã erã ĩgũre.

*Jesure opũ serẽpipũ*

*Mt 26.59-66; Mr 14.55-64; Jn 18.19-24*

<sup>66</sup> Eropirã boyorogue ta mũrã, pahia oparã, judio masare buherã sã gamenereñorã. Erã eropa gamenererore gajirã erã pohroque Jesure aĩgãriñorã.

<sup>67</sup> —Wereque guare. ¿Goãmũ beyedigũ Cristo ãhriri mũhũ? arĩ serẽpiñorã erã Jesure.

Erã eroparĩcũ Jesu yũhripũ:

—Mũare yũ werecũ sãre yũre peesome mũa. <sup>68</sup> Mũare yũ serẽpicũ yũre yũhrisome mũa. Eropirã yũre wiwsome mũa. <sup>69</sup> Mũa yũre wiubiriquerecũ ta pũhrũ ñari mũmũri mũcũ yũhũ masũ Goãmũ ĩgũ obeodigũ Goãmũ yũ Pagũ turagu ĩgũ diayerũ doagu árĩgũca, arĩpũ Jesu.

<sup>70</sup> ĩgũ eroparĩcũ erã árĩpehrerã serẽpiñorã daja dipaturi:

—¿Eropa arĩgũ “Yũhũ Goãmũ magũ ãhraa,” arĩri mũhũ? arĩñorã erã.

—Mũa arĩro dopa ĩgũ ta ãhraa, arĩ yũhripũ Jesu erãre.

<sup>71</sup> ĩgũ eroparĩcũ õpa arĩ erã basi wereniguiñorã erã:

—ĩre weresãrãre gajirãre mari gamebeaa pare. Erã mũcũ ta sihajama. ĩgũ Goãmũre ĩgũ ñero wereniguicũ mari basi ta mari peea. Eropirã ĩgũ ñero iira dipuwajare masituhã, arĩñorã erã erã basi.

## 23

### *Pilato Jesure serēpipu*

*Mt 27.1-2, 11-14; Mr 15.1-5; Jn 18.28-38*

<sup>1</sup> Eropa arītuha erā árīpehrerā wahgānugaja, Jesure Pilato waĩcugũ opu pohrogue aĩgãñorā. <sup>2</sup> Aĩ ejarā Jesure weresānugañorā:

—Ihĩ mari ya yeba majarāre ñero iidorecũ peeabũ. Mari opũre Césare ihĩ wajayedorebeami. Eropigu ĩgu “Yũhu opu āhraa. Cristo āhraa yũhu,” arĩ wereniguimi ĩgu basi, arĩ weresãñorā erā Jesure.

<sup>3</sup> Erā eropa arĩ weresāra pũhrũ Pilato Jesure serēpipu:

—¿Diaye ta judio masa opu ta āhriri mũhu? arĩpu ĩgu Jesure.

—Mũ arĩro dopa ta ĩgu ta āhraa, arĩ yũhripũ Jesu.

<sup>4</sup> ĩgu eroparĩcũ Pilato pahia oparāre, masa sãre werepũ:

—Īre gajino waja dipuwaja mara, arĩpu ĩgu.

<sup>5</sup> ĩgu eropa arĩquerecũ ta erā turaro weresānemoñorā:

—Īgu, ĩgu buheri mera masare gamequeãcũ iimi. Galilea yeba ĩgu irire iinugami. Eropa iinugatuha árīpehrero Judea yebague irire ĩgu iimi, arĩ weresãñorā erā.

### *Herode waĩcugũ opu Jesure serēpipu*

<sup>6</sup> Erā eropa arĩ weresãcũ peegu Pilatopũ serēpipu:

—¿Ihĩ Galilea majagu āhriri? arĩpu ĩgu.

<sup>7</sup> —Ero majagu ta āhrimi, arĩ yũhriñorā gajirā.

Erā eropa yũhricũ peegu Pilatopũ Jesu ĩgu árĩri yebare masigu opu Herode ĩgu ya yeba majagu ĩgu árĩcũ masipu. Irire masigu Jesure Herode pohro obeopũ. Irisubure Herode Jerusalén arĩpu. <sup>8</sup> Ero core Herode Jesure peemuripu. ĩgu eropa peera pũhrũ ĩgure bũrigã ĩadiaripu. Jesu ĩgu deyoro moarire ĩgu ii ĩhmucũ ĩadiaripu ĩgu. Eropigu ĩgu Jesure ĩagu mucubiripu. <sup>9</sup> Eropigu baja serēpipu Jesure. ĩgu eropa serēpiquerecũ ta Jesupu ne yũhribiripu ĩgure. <sup>10</sup> Pahia oparā, judio masare buherā sã Herode pohro nũgaja turaro Jesure weresãñorā. <sup>11</sup> Erā eropa arĩ weresāra pũhrũ Herode ĩgu surara mera wereya, Jesure ñero iñorā. Eropa wereyarā, ðariñe suhrirore opu yañe dopa bejariñere sãñorā erā Jesure. Eropa wereyatuha, iri suhrirore tuwea aĩ Pilato pohro obeoñorā daja. <sup>12</sup> Irinũre Herode, Pilato mera ðaro erā basi game iinugarā árĩnugañorā. Ero corere erā basi game ĩhaturirā árĩriñorā.

### *Masa Jesure wejēdoreñorā*

*Mt 27.15-26; Mr 15.6-15; Jn 18.39-19.16*

<sup>13</sup> Eropi Pilato pahia oparāre, gajirā oparāre, masa sãre ĩgu sihubeocũ gamenereñorā. <sup>14</sup> Erā gamenerecũ ĩagu ðpa arĩpu erāre:

—Īre yũre aĩgãrirā, “Īgu masare ñero iidoremi,” arĩraa mũa yũre. Dohpague mũa ĩhuro ĩre serēpipehoabũ daja. Yũ eropa serēpira pũhrũ mũa ĩgure weresãcũ ñeri dipuwaja mara yũ ĩacũ. <sup>15</sup> Herode sã “Īgure ne ñeri dipuwaja mara,” arãmi. Eropa arĩgu dipaturi ĩre ohõ dujuami daja. Eropiro ĩre wejēdorero mara. Mũa sã irire ĩha masia. <sup>16</sup> Eropigu ĩgure tãraradari mera tãradoregũca yũhu. Erā eropa tãrara pũhrũ ĩgure wiugũra, arĩripũ Pilato.

<sup>17</sup> Bojori nũcu Pascua bosenuri nũcu peresu árĩdigũre yujugũre masa gamegũre Pilato eropa wiubasamuripu. Eropa iiro gameyoro ĩgure. <sup>18</sup> Eropirā Pilato “Jesure wiugũra,” ĩgu arĩcũ peerā árīpehrerā masa ðpa arĩ gaguiniguñorā:

—Īgu Jesure wejēque. Gũa yagu árĩbure Barrabápũre gũare wiubasaque, arĩ gaguiniguñorā masa.

<sup>19</sup> Ero Barrabápu Jerusaléngue oparāre ĩgu cóãdorera dipuwaja, ĩgu gajirāre wejēra dipuwaja peresu iñorā ĩgure. <sup>20</sup> Pilato Jesupũre wiudiaripu. Eropigu ĩgu



masare ïgu wiabure serëpi ïapũ daja. <sup>21</sup> ïgu Jesure eropa wiudiaquerecũ ta erã ïgure arĩñorã daja:

—Crusague pabia wejëque ïgure. Wejëcãque ïgure, arĩ gaguiniñorã erã.

<sup>22</sup> Erã eroparĩcũ Pilato ùhresubu waro gohra òpa arĩripũ daja erãre:

—¿Ñehenore ñerire iari ïgu mũa eropa arĩ gaguiniguicũ? Ne ïgure ñeri dipuwaja mara. Eropigu ïgure wejëdoremasibea. ïgure tãraradari mera tãradoregũca. Iripëta iidoregũca. Eropigu ïgure wiugũca, arĩripũ Pilato.

<sup>23</sup> ïgu eroparĩcũ ta erã turaro mera gaguininemo, Jesure crusague wejëdoreñorã. Erã eropa arĩ gaguinicũ peegu Pilato erã gamero dopa ta iidorepũ. <sup>24</sup> Eropigu erã arĩro dopa ta Pilato Jesure wejëdorepũ. <sup>25</sup> Eropa doregu masa serëdigure wiupũ. ïgu peresugue árĩgure, masare gamewejëcũ iidigure, masare wejëdigure Pilato Barrabãpũre wiupũ. Eropigu masa erã gamero dopa ta Pilato Jesure crusague wejëdorepũ.

*Erã Jesure crusague pabia wejëñorã  
Mt 27.32-44; Mr 15.21-32; Jn 19.17-27*

<sup>26</sup> Eropirã erã Jesure wejërã warã, aĩgãñorã. Erã eropa warisubu Simo waĩcũgu Cirene majagu pohegue ejadigu erapũ. Jerusaléngue ïgu eracũ ïarã Jesure aĩgãrã ïgure bocatĩri, ñeha, crusare ïgure coãtamudoreñorã Jesu pũhrũ.

<sup>27</sup> Eropirã masa bajarã Jesure ïhanũrusiañorã. Eropirã gajirã nome ïgure erã eropa iicũ ïarã turaro ore nũrusiañorã. <sup>28</sup> Erã orecũ peegu Jesu erãre maji ïha òpa arĩpũ:

—Jerusalén majarã nome yure orebircãque. Mũa basi, mũa porã ya árĩburire oreque. <sup>29</sup> Gajinũri árĩcũ masa òpa arĩrãcoma. “Porã marirã nome dohpaguere mari árĩcũ òatariaboaya,” arĩrãcoma masa. <sup>30</sup> Irisubure ùtãgure òpa arĩ werenigu-irãcoma masa. “ïgu ùtãgu gũ weca yuri bejaporo. Guare wejëcãporo,” arĩrãcoma masa. <sup>31</sup> Masa yure dipuwaja marigure erã òpa iicũ, ñeri dipuwaja oparãpũ ñetariaro warãcoma, arĩpũ Jesu.

<sup>32</sup> Gajirã perã dorerire tarinũgarã erã árĩcũ erã sãre Jesu mera erã wejëmorãre aĩgãñorã erã. <sup>33</sup> Erã aĩgã dipu pero waĩcũroque eja crusague Jesure pabiañorã. Eropirã gajirã perã sãre yujugure ïgu diayepũ gajigure ïgu copũ crusariguere pabiañorã. <sup>34</sup> Erã eropa iicũ Jesu òpa arĩpũ:

—Ahũ, oã dohparagã erã ñero iirire cãdijique erãre. Erã erã eropa iirire masibeamã. Eropigu iirire cãdijique, arĩpũ Jesu ïgu Pagure.

Eropirã surara Jesu suhri mũrare “¿Noa yañe árĩrocuri ïñe?” arĩ game bira wajatañorã. <sup>35</sup> Eropirã masa ero niguirã erã ïaro judio masa oparã Jesure wereyañorã:

—ïgu gajirã masare sĩribonirãre taurapũ. Eropigu ïgu Cristo Goãmũ ïgu beyedigũ árĩgu ïgu basi tariporo, arĩ wereyañorã erã.

<sup>36</sup> Surara sã ïgure wereyañorã. Jesu pohro ejarã, vino suĩrre erã oriñorã. <sup>37</sup> Iirre iirã òpa arĩñorã erã:

—Mũhũ judio masa erã opũ árĩgu ta, mũ basi tarique, arĩñorã erã.

<sup>38</sup> Eropi ïgu weca òpa arĩ gojarapũre pabia tuñorã: “Ihĩ judio masa tauro opũ árĩgu ãhrimi,” arĩ gojaturapũ árĩyoro. Griego ya mera, Roma majarã ya mera, judio masa ya mera gojarapũ árĩyoro.

<sup>39</sup> Gajigu ïgu mera erã pabia tudigu ïgu ñero arĩ wereniguipũ Jesure:

—¿Mũhũ Cristo árĩbeari? Mũ basi, gũ sãre tauque, arĩpũ ïgu Jesure.

<sup>40</sup> ïgu eroparĩcũ peegu ïgu mera majagupũ ïgure yũhrĩpũ:

—Eropa arĩbircãque. ¿Duhpigũ Goãmũre umupeobeari mũhũ? Marire yujuro mera dipuwaja moama erã. <sup>41</sup> Maripũre mari ñeri dipuwajare dipuwaja moarã diaye iirã iima erã. Ihĩpũ ñerire iibiriñumi, arĩpũ gajigu tarinũgagupũ.

<sup>42</sup> Eropa arĩgu ĩgu Jesure õpa arĩpũ:

—Jesu, mũhũ opũ árĩrogue árĩgu yũ sãre guñaque, arĩpũ ĩgu Jesure.

<sup>43</sup> —Mũre ire arãa. Dohpagãre yũ mera paraíso waĩcũrogue yũ mera árĩgũca, arĩpũ Jesu ĩgũre.

*Jesu s̄iria wapũ*

*Mt 27.45-56; Mr 15.33-41; Jn 19.28-30*

<sup>44</sup> Eropi goeri boje gohra árĩcũ árĩpehrerogue ùhre hora gohra naitĩa wayoro.

<sup>45</sup> Naitĩaro árĩrisubu Goãmũ wihi majañe suhriro cãhmotara suhriro deco mera yehguea wayoro. <sup>46</sup> Eropigu Jesu turaro gaguinipũ:

—Ahũ, yũ s̄iporãre mũre wiaa mũ dibuboro dopa, arĩ gaguinipũ Jesu.

Eropa arĩtuha s̄iria wapũ.

<sup>47</sup> Eropa wacũ ĩagu surara opũpũ “Goãmũ turagu ãhrimi,” arĩ, “Ihĩ Jesu diaye ta õagu ãhrañumi,” arĩpũ ĩgu.

<sup>48</sup> Eropirã ero gamenererã iri eropa wacũ ĩarã, Jesu ĩgu s̄iricũ ĩarã, erã ya wihigue dujaa wañorã. Dujaa wa, bujawereri mera waha wañorã. <sup>49</sup> Árĩpehrerã Jesu mera majarã, Galileague ĩgu mera arinirã nome sã yoarogue Jesure ĩhu niguiñorã.

*Jesu dũpũre masa gobegue apiñorã*

*Mt 27.57-61; Mr 15.42-47; Jn 19.38-42*

<sup>50-51</sup> Irisubure José waĩcũgu ero arĩpũ. Judea yeba Arimatea waĩcũri maca majagu arĩpũ. Eropigu ĩgu õagu, diaye iigu árĩgu, Goãmũ ĩgu opũ árĩnũgaburire coregu arĩpũ. Eropigu ĩgu judio masa oparã mera majagu árĩqueregu ta Jesure erã wejẽdorecũ gamebiriripũ ĩgu. <sup>52</sup> Eropigu Pilato pohrogue eja, Jesu mũrũ dũpũre serẽpũ. <sup>53</sup> Serẽtuha Jesu dũpũre aĩ diju, õari suhriro mera ĩgu dũpũre omapũ. Eropa omatuha masa gobegue utãyegue erã seara gobegue apipũ ĩgu dũpũre. Iri gobere ne yujugu s̄iridigũre yaanibiriñorã dohpa. <sup>54</sup> Irinũ Sabadonũ maja árĩburire erã amuyurinũ árĩyoro. Sabado judio masa soorinũ árĩboro merogã dũhyayoro.

<sup>55</sup> Eropirã Galileague Jesu mera arinirã nome masa gobegue José wacũ ĩarã nũrusiañorã. Masa gobegue eja, iri gobere ĩha, Jesu dũpũre ĩgu apirare ĩañorã.

<sup>56</sup> Pũhrũ erã ya wihigue dujaa wañorã. Poresurire ĩgu dũpũre sũburire amuiñorã erã. Eropirã Sabado árĩcũ Goãmũ ĩgu dorerire Moiserẽ ĩgu apirare iri dorero dopa ta erã sooñorã.

## 24

*Jesu masa mũriapũ*

*Mt 28.1-10; Mr 16.1-8; Jn 20.1-10*

<sup>1</sup> Domingo árĩcũ boyorogue erã nome erã poresuri erã amurare aĩ Jesu masa gobe pohrogue aĩgãñorã. <sup>2</sup> Iri gobegue ejarã, iri gobere biharaye utãyere erã pãgũ nugurayere ĩañorã. <sup>3</sup> Eropa ĩarã erã iri gobegue ñaja wañorã. Jesu dũpũpũre ne bocajabiriñorã erã. <sup>4</sup> ĩgu dũpũre bocabirã, “¿Dohpa wayuri?” arĩ pepiñorã erã. Erã eropa arĩ pepi erã werenigui amaro gohra perã ùma gosesiriri suhricũrã erã pohro niguiñorã. <sup>5</sup> Ero erã niguicũ ĩha, nome gũirã merejañorã. Eropirã ùmapũ erãre wereñorã:

—¿Duhpimorã s̄iridigu mũrũ ĩgu árĩdirore ahmari mũa? Dohpagũre ĩgu ojocarigu ãhrimi. <sup>6</sup> ĩgu õre marimi. Masa mũriatuhami. ¿Sohõ árĩrasubure Galileague mũa mera árĩgu ĩgu arĩrãre guñari mũa? <sup>7</sup> “Yũ masure Goãmũ ĩgu obeodigũre wiarãcoma ñerãre. Erã yũre crusague pabia wejẽrãcoma erã yũre. Eropigu yũ s̄irira pũhrũ ùhrenũ pũhrũ masa mũriaguca yũhũ,” ¿mũare ĩgu arĩrãre guñari mũa? arĩñorã ùmapũ.

<sup>8</sup> Erã eroparĩcũ peerã, nomepũ ãgũ arĩrare guñañorã. <sup>9</sup> Erã eropa arĩra pũhrũ erã dujaa wañorã. Once buherãre gajirã sãre irire werepehoñorã. <sup>10</sup> Erã nomepũ María Magdalena, Juana, María Santiago pago árĩñorã. Erã nome gajirã nome sã árĩñorã Jesu buherãre eropa wererã nome. <sup>11</sup> Erã eropa arĩ werequerecũ ta Jesu buherãpũ “Erã diaye arĩbiribocoma. Eropa arĩcãrã iima oã nome,” arĩ pepiriñorã. Eropirã erã nomere peediabiriñorã.

<sup>12</sup> Erã eroparĩcũ peegũ, Pedropũ masa gobegue omagã, ãagũ wapũ. Iri gobegue eja, ãgũ muhmereja ãhame acupũ. Jesure erã omara gasiro dihtare ãapũ. “¿Dohpa wayuri?” arĩ pepigũ ãgũ wihigue dujaa wapũ.

*Emaus waĩcũri maca maja mague Jesu dehyoapũ*

*Mr 16.12-13*

<sup>13</sup> Irinũre perã Jesu buherã mera majarã Emaus waĩcũri macague warã iĩñorã. Jerusalenre once kilómetros yoaro ãhraa Emaure ejaro. <sup>14</sup> Emaugue waha, árĩpehreri Jesure eropa warare wereniguigãrã iĩñorã. <sup>15</sup> Erã eropa arĩ werenirisubu Jesupũ erã watope erã mera wapũ. <sup>16</sup> Eropirã ãgũre ãaquererã ta erã ãgũre ãha masibiriñorã.

<sup>17</sup> —¿Mũa curirã warã dohpa arĩ werenigui bujawererã iiri mũa? arĩpũ Jesu.

Ãgũ eroparĩcũ erã dujanũgañorã bujawererã. <sup>18</sup> Eropigũ Cleofa waĩcũgũpũ Jesure yũhrĩpũ:

—¿Dohpaguere Jerusalenre erã iirare mũ dihta masibeari? arĩ serẽpipũ ãgũ.

<sup>19</sup> —¿Dohpa wahãri Jerusalenre? arĩpũ Jesu.

Ãgũ eroparĩcũ Cleofa yũhrĩpũ:

—Jesure Nazare majagure erã iirare arĩrã iiaa. ãgũ Goãmũ yare weremũhtagũ arĩrimi. Eropirã ãgũ wereniguirire peerã, ãgũ iira sãre ãarã, “Turagũ ãhrimi,” arĩ pepirima masa. Goãmũ sã eropa arĩ pepicumi. <sup>20</sup> Mari pahia oparã, gajirã oparã mera ãgũre wejẽdorerã gajirãre ohama. Erã eropa ocũ gajirãpũ ãgũre crusague pabia wejẽama. <sup>21</sup> “Roma majarãre cóãbu Israe masa opũ arĩbu ãhrimi,” arĩ pepiribũ gua ãgũre. Dohpagã mera ãhrenũ wahaa ãgũ sĩrira pũhrũ. <sup>22</sup> Bajamerãgã gua mera majarã nome guare ãcacũ iiaa. Boyoro Jesu ãgũ masa gobegue erã eja, <sup>23</sup> ãgũ dũpũre erã bocabirañorã. Dũpũre bocabiri erã dujara wereama. “Gũare anyua dehyoama. Jesu ojocariapũ,” arĩ wereama nomepũ. <sup>24</sup> Erã eroparĩcũ gajirã gua mera majarãpũ iri gobegue eja nome erã arĩdiro dopa ta ãañorã. Erã sã Jesu mũrũre ãabirañorã, arĩpũ ãgũ Jesure.

<sup>25</sup> ãgũ eropa arĩra pũhrũ Jesu werepũ erãre:

—Mũa ne peebirã ãhraa. ¿Goãmũ yare weremũhtanirã mũra erã arĩrare õaro peebeari mũa? <sup>26</sup> Cristo opũ arĩboro core ãgũ ãmarogue ãgũ mũriaboro core ãgũre ñero tariro gahmeabũ. ¿Irire masibeari mũa? arĩpũ Jesu erãre.

<sup>27</sup> Eropa arĩgũ Goãmũ yare erã gojarapũguere erã ãgũre gojayurare Jesu werepehocãpũ erãre. Moise mũrũ ãgũ gojarare Jesu werenũgapũ. Eropigũ árĩpehrerã Goãmũ yare weremũhtanirã erã gojara sãre erãre werepehocãpũ.

<sup>28</sup> Erã erã wari macague erã ejacũ Jesupũ erãre tarigãgũ dopa iipũ. <sup>29</sup> ãgũ eropa ãiquerecũ ta erãpũ ãgũre wadobebiriñorã.

—Gũa mera dujaque. Ñamicague ãhraa. Nairo iica, arĩñorã erã Jesure.

Eropigũ Jesu erã mera wihigue ñaja wapũ. <sup>30</sup> Pũhrũ ãgũ erã mera erã bari mesague doaja, panre aĩ, Goãmũre “Õhaa” arĩpũ. Eropa arĩgũ iri panre nuha aĩ erãre ópũ.

<sup>31</sup> ãgũ eropa iicũ ãarã erã Jesure ãha masiñorã pare. Erã ãha masira pũhrũ ãgũ dederea wapũ. <sup>32</sup> ãgũ eropa dederecũ erã erã basi õpa arĩ wereniguĩñorã:

—Mague ãgũ marire wereniguirisubu Goãmũ ãgũ gojarare ãgũ wereniguirisubu mari sĩporã mera õaro mucubiriri mera pepiabũ mari, arĩñorã erã basi.

<sup>33</sup> Eropa arĩtuha erã mata Jerusaléngue dujaa wañorã. Erogue eja, once buherãre, gajirã mera gamenererãre bocañorã. <sup>34</sup> Erã ejacũ, once buherã õpa arĩñorã erãpũre: —Diaye ta mari Opũ masa m̄riadi ãhrami. Simo Pedro ïgũre ïapũ, arĩñorã erã.

<sup>35</sup> Erã eroparĩcũ peerã Emaus wari maha wanirã sã erã ïarare wereñorã: —Jesu ïgũ panre nuha gũare ïgũ ocũ ïha masiabũ gũa, arĩñorã gajirãre.

*Jesu ïgũ buherãre dehyoapũ*

*Mt 28.16-20; Mr 16.14-18; Jn 20.19-23*

<sup>36</sup> Erã eropa arĩ wererisubu mata Jesupũ erã pohro dehyoanũgajapũ.

—¿Áhriri m̄ua? arĩpũ ïgũ erãre.

<sup>37</sup> ïgũ eroparĩcũ erã “Sĩridigũ m̄urũre ïarã iiaa mari,” arĩ pepi, turaro gũiñorã.

<sup>38</sup> Erã eropa gũicũ ïagũ ïgũ erãre werepũ:

—¿Duhpirã gũiri m̄ua? ¿Duhpirã yũre ïarã “I diaye árĩbeaa, arĩri m̄ua? <sup>39</sup> Yũ mojotorire yũ guburi sãre ïaque. M̄ua irire ïarã, yũre ïha masirãca. Yũre mohmepique. Mohmepirã masirãca m̄ua. Sĩridigũ m̄urũ dũpũ moomi. Yũpũ dũpũcua, arĩpũ Jesu.

<sup>40</sup> Eroparĩgũ ïgũ mojotorire, ïgũ guburire ïhmupũ erãre. <sup>41</sup> ïgũ eropa ïhmuquerecũ ta erã bũrigã mucubiri uca warã “I diaye árĩbeaa,” arĩ pepiniñorã dohpa. Erã eropa arĩ pepicũ masigũ Jesu erãre serẽpipũ:

—¿Õre bari áhriri? arĩpũ ïgũ.

<sup>42</sup> ïgũ eroparĩcũ waimũ mupudigũre mome imisĩri sãre oñorã ïgũre. <sup>43</sup> Irire aĩ erã ïhuro Jesu bapũ. <sup>44</sup> Batuha Jesu werepũ erãre:

—Sohõ mari árĩrasubu m̄ua mera árĩgũ yũhũ m̄uare werediro dopa ta dohpagueere yũre eropa wahabũ. Goãmũ doreri Moise marire ïgũ apira ïgũ eropa arĩ gojadiro dopa ta yũre eropa wahabũ. Goãmũ yare weremũhtanirã, Salmopũre gojanirã sã iribojegue erã yũre arĩ were gojayudiro dopa ta dohpague yũre eropa wahabũ. Eropa ta waro gahmeabũ, arĩpũ Jesu.

<sup>45</sup> Eropa arĩtuha Goãmũ yare erã arĩ were gojarare ïgũ buherãre masicũ iipũ Jesu erãre.

<sup>46</sup> —Goãmũ yare erã gojara õpa arĩyoro: “Cristo ñero tarigũcumi. Eropigũ uñrenũ pũhrũ ïgũ sĩrira pũhrũre ïgũ masa m̄riagũcumi. <sup>47</sup> ïgũ masa m̄riara pũhrũ árĩpehreri yeba ïgũ yarã Goãmũ yare buherãcoma. ‘M̄ua ñerire bũjawererã Jesucristo mera m̄ua ñerire cãdijirã árĩrãca,’ arĩ wererãcoma masare. Eropa weremorã Jerusalén werenũgarãcoma,” arĩ gojañumi Goãmũ yare erã gojarapũ, arĩpũ Jesu.

<sup>48</sup> Eropa arĩtuhaja õpa arĩ werenemopũ:

—M̄apũ i árĩpehrerire ïanirã áhraa. Eropirã gajirãre wererãca. <sup>49</sup> Goãmũ “ïgũre m̄uare obeogũra,” ïgũ arĩdigũre yũpũ m̄uare obeogũra. Eropirã Jerusaléngue ïgũ Espĩritu Santo m̄uare ïgũ eraburire coreque m̄ua. ïgũ m̄uare turarire ogũcumi, arĩpũ Jesu ïgũ buherãre.

*Jesu uñarogue m̄ria wapũ*

*Mr 16.19-20*

<sup>50</sup> Eropa arĩtuha Jesu erãre Jerusalén árĩrãre Betaniague aĩgãpũ. Erogue eja, Jesu ïgũ mojotori mera sĩmuju, “Õaro árĩque,” arĩpũ erãre. <sup>51</sup> Eropa arĩtuha erãre api, uñarogue m̄ria wapũ. <sup>52</sup> ïgũ m̄riara pũhrũ erã ïgũre umupeo, “Õagũ, turagũ áhrimi,” arĩ, Jerusaléngue bũrigã mucubiriri mera dujaa wañorã. <sup>53</sup> Ero áhri uñm̄ri nũcũ erã Goãmũ wihigue Goãmũre serẽm̄riñorã. “M̄uhũ õagũ áhraa,” arĩ umupeonigũicãm̄riñorã erã ïgũre. Eropa ta árĩporo. Iripẽta áhraa.



## San Juan

Ñu waĩcũgũ ipũre gojadigũ Jesucristore ĩamũriĩnumi. Jesucristo i yebare buhecũ Ñu ĩgũ buhegũ árĩmũriĩnumi. Eropigũ Jesu sĩridigũ masa mũria ĩgũ Pagũ pohro mũriara pũhrũgue Ñu ipũre gojaĩnumi.

### *Cristo masũ ta árĩnũgaaĩnumi*

<sup>1</sup> Negohraguere i yeba árĩboro coregue ta Cristo mata árĩmũhtamũrituhapũ. ĩgũ Goãmũ mera árĩpũ. Eropigũ ĩgũ Goãmũ ta árĩcãgũ iipũ. <sup>2</sup> Matague ta Cristo Goãmũ mera árĩpũ. <sup>3</sup> Eropigũ i yebare, mũmũsire árĩpeherrerire ĩhacũnugudorepũ Goãmũ ĩgũre. Eropigũ masa sãre ĩhacũnugudorepũ ĩgũre. Eropigũ irire ĩhacũnugupehopũ ĩgũ Jesucristo. Eropiro irire ĩgũ ĩhacũnugupehobiricũ i ne mariboya. <sup>4</sup> Cristo ojocaririre ogũ aĩhrimi. Boyocũ mari mari basi õaro mari ĩha masiro dopa ta, ĩgũ mari Pagũre õaro ĩha masicũ iimi marire. Eropigũ i yebare eragũ mari Pagũre masicũ iimi masare. <sup>5</sup> I yeba majarã erã guĩnaricũri naitĩaro iro dopa ñeri aĩhraa. Jesucristo boyogoro dopa ta masa pohro eragũ erã Goãmũ yare masicũ iimi. Eropiro naitĩariĩne, boyoriĩnere ne tarinũgabiro dopa ta Cristore ñeripũ ne tarinũgabiriyoro.

<sup>6-7</sup> Goãmũ Ñu waĩcũgũpũre obeomũhtapũ Cristore quere aĩgã weremũhtadoregũ. ĩgũ obeodigũ Ñupũ eraa guare masare Cristo ĩgũ ariburire weremi. <sup>8</sup> Ñupũ Cristo árĩbirimi. Eropa árĩbiriqueregũ ta ĩgũ Cristore masare wereyumũhtagũ árĩmi. <sup>9</sup> Cristo boyogoro dopa ta árĩgũ árĩpeherrerã masare Goãmũre masicũ iibu i yebaguere aridigũ árĩmi. Diaye ta aĩhraa. ĩgũ masare masicũ iigũ ta aĩhrimi.

<sup>10</sup> Eropigũ Cristo i yebare árĩdigũ árĩrimi. I yebare ĩhacũnugudigũ árĩpũ. ĩgũ eropa árĩquerecũ ta i yeba majarã ĩgũre ne ĩha masibirinirã árĩma. <sup>11</sup> ĩgũ ya yeba ĩgũ masa dehyoadigũ árĩrimi. ĩgũ ya yeba ĩgũ masa dehyoadigũ árĩquerecũ ta ĩgũ ya yeba majarãpũ ĩgũre ne gamebirinirã árĩma. <sup>12</sup> Erã eropa gamebiriquerecũ ta árĩpeherrerã ĩgũre gamerãpũre erãre Goãmũ ĩgũ porã árĩcũ iimi. ĩgũre umupeorãre árĩpeherrerã Goãmũ ĩgũ porã árĩcũ iimi. <sup>13</sup> Erã Goãmũ porã ta aĩhrima. Eropirã masa erã gamero Goãmũ porã wabeama. Goãmũ gamero mera ĩgũ porã wahama.

<sup>14</sup> Eropigũ Cristo ĩgũ masũ ĩgũ árĩnũgara pũhrũ mari mera árĩmi ĩgũ. ĩgũ eropa árĩcũ ĩarã masare mahigũ, diaye majare ĩgũ wereniguigũ árĩcũ gũa masibũ. ĩgũ dihta Goãmũ magũ árĩgũ turagũ árĩmi. ĩgũ eropa árĩgũ árĩcũ gũa masibũ. <sup>15</sup> Ñu waĩyegũ ĩgũ buherogue Cristo eracũ ĩha õpa arĩ gaguiniguimi guare weregũ:

—Sihĩ aĩhrimi yũ mũare weredigũ. ĩgũ yũ pũhrũ masa dehyoadigũ aĩhrimi. Eropa árĩqueregũ ta yũ tauro turagũ aĩhrimi. ĩgũ yũ masa dehyoaboro coregue árĩtuhapũ. Eropigũ ĩgũ yũ tauro aĩhrimi. Yũhũ mũare eropa arĩ weredigũ ta aĩhrimi ihĩ, arĩmi Ñu guare.

<sup>16</sup> ĩgũ Cristopũ õagũ turaro masare mahigũ árĩgũ marire árĩpeherrerãre õaro iiniguicãmi. <sup>17</sup> Goãmũ dorerire Moisepũ apimũhtapũ marire. Jesucristopũ Goãmũ masare ĩgũ mahirire buhegũ árĩmi. Goãmũ ĩgũ diaye wereniguiri sãre buhegũ árĩmi ĩgũ. <sup>18</sup> Masa ne Goãmũre ĩabeama. ĩgũre mari ĩabiriquerecũ ta ĩgũ magũ ĩgũ turaro mahigũ yujugũ ta árĩgũpũ ĩgũ Pagũre marire masicũ iimi.

### *Gajirã Ñu waĩyegũre serẽpiĩnuma*

*Mt 3.11-12; Mr 1.7-8; Lc 3.15-17*

<sup>19</sup> Judio masa oparã Jerusalén árĩrã pahiare, Goãmũ wihi mohmerã sãre Ñu pohrogue obeoĩorã. “¿Nihino aĩhriri mũhũ?” arĩ serẽpidorerã obeoĩorã erãre. Erã



eropa arĩ serēpirã ejacũ õpa arĩ weremi Ñupũ. <sup>20</sup> Ne yayaro mariro weremi. Diaye ta werepehocãmi gũyaro mariro.

—Yũhũ Cristo Goãmu ïgu masare taudoregu ïgu obeodigu árĩbeaa, arĩmi ïgu.

<sup>21</sup> Ìgu eroparĩcũ erãpu ïgure dipaturi serēpima daja:

—¿Mũhũ Cristo árĩbigũ Eliapũ àhriri? arĩma.

—Árĩbeaa yũhũ, arĩmi ïgu.

—¿Gũa coredigu Goãmu yare weremũhtagupũ àhriri mũhũ? arĩma erã.

—Árĩbeaa yũhũ, arĩmi Ñu.

<sup>22</sup> Ìgu eroparĩcũ erã ïgure dipaturi serēpima daja.

—Gũare serēpidorenirãre gũa õaro wereboro dopa gũare wereque daja. ¿Nihinopũ àhriri mũhũ? ¿Dohpa árĩgũno àhriri mũhũ? arĩma erã Ñure.

<sup>23</sup> Erã eroparĩcũ õpa arĩ yũhrimi:

—Masa marirogue õpa arĩ gaguiniguũ àhraa yũhũ. Goãmu ya weremũhtadigu Isaia mũru ïgu werediro dopa ta werea yũ sã: “Mari Opũ ïgu ariboro core õarã árĩyuque ïgure peemorã,” arĩ masare wereyu gaguiniguũ àhraa yũhũ, arĩmi Ñu erãre

<sup>24</sup> Ñure serēpirã fariseo masa erã obeonirã árĩma. <sup>25</sup> Eropirã erã Ñure serēpima daja:

—¿Mũhũ Cristo, Elia Goãmu ya weremũhtagũ gũa coregu árĩbiriqereregu ta duhpigu masare Goãmu ya árĩburire waĩyeri mũhũ? arĩma erã.

<sup>26</sup> Erã eroparĩcũ yũhrimi ïgu.

—Yũ deco mera masare Goãmu ya árĩburire waĩyera. Gajigupũ mũa masibigupũ mũa watope árĩtuhami. <sup>27</sup> Ìgupũ yũ pũhrũ arigu yũ tauro turagu àhrimi. Õatariagu àhrimi. Ìgu iro dopa árĩbeaa yũpũ. Eropigu ïgure pepigu, “Bu árĩgu àhraa yũhũ,” arĩ pepia, arĩmi Ñu erãre.

<sup>28</sup> Eropa arĩ wereniguima erã Betaniague, dia Jordán waĩcũriya gajipũ masegue, Ñu ïgu masare ïgu waĩyerogue.

*—Jesu Goãmu ïgu obeodigu cordero iro dopa àhrimi, arĩ wereñumi Ñu masare*

<sup>29</sup> Gajinũ Jesu Ñu pohro ïgu aricũ ïagu Ñu õpa arĩmi gũare:

—Ìaque. Ihĩ Goãmu ïgu obeodigu ïgu cordero iro dopa àhrimi. Cordero mari ñeri iira dipuwajare sĩriro dopa ihĩ sĩrigũ i yeba majarãre erã ñero iirare cóagũcumĩ ïgu. <sup>30</sup> Ihĩ ta àhrimi yũ õpa arĩdigũ: “Yũ pũhrũ arigu yũ tauro turagu àhrimi. Yũhũ masa dehyoaboro core ïgu matague ta árĩtuhapũ. Eropigu ïgu yũ tauro turami,” yũ arĩdigũ ihĩ ta àhrimi. <sup>31</sup> Yũpũ ïre Goãmu magũ ïgu árĩrire masibirinibũ. Eropa masibiriqueregu ta deco mera waĩyegũ arigu iibũ yũ acawererã Israe masa ïre erã masiborore, arĩmi Ñu.

<sup>32</sup> Eropa arĩtuha Ñu werenemomi:

—Espĩritu Santo umarogue buja iro dopa bejagu Cristo weca دچارimi. Ìgu weca ïgu dujanugacũ ïabũ. <sup>33</sup> Ìgu weca dujanugajacũ ïha ïgure ïha masibũ. Ìgu yũre masare deco mera waĩyedore obeodigu Goãmupũ õpa arĩ weremũhtatuhami yũre: “Espĩritu Santo dijari ïgu weca dujanugajagu ïgu ta árĩgũcumĩ. Ìgupũ Espĩritu Santore masa mera eropa árĩniguicũ iigu árĩgũcumĩ,” arãmi Goãmu yũre. Ìgu yũre eropa werebircũ ïha masibiriboya ïgure. <sup>34</sup> Dohpaguere ïgure ïha masituhaa yũhũ. Eropa ïha masigu “Diaye ta Goãmu magũ ta àhrimi,” arãa yũhũ mũare, arĩ weremi Ñu.

*Jesu buherã ïgu ne sihunuganirã árĩñuma*

35-36 Gajinu Ñu mera gua perã igu buherã igu mera gua niguicũ, Jesu gua pohro tari wahgãgu iimi. Igu eropa tari wahgãcũ ïagu Ñu dipaturi òpa arĩmi guare:

—Ïaque. Ihĩ Goãmu ïgu obeodigu cordero iro dopa árĩgu ãhrimi, arĩmi Ñu.

37 Igu eroparĩcũ gua perã igu buherãpũ irire peerã Jesure nurusiagãbũ. 38 Gua eropa nurusiagãcũ ïagu Jesu guare maji ïha, serẽpimi:

—¿Nohogue wahari mua? arĩmi ïgu guare. Igu eroparĩcũ gua sã ïgure serẽpibũ.

—Buhegu, ¿nohogue ãhriri muhu? arĩ serẽpibũ gua ïgure.

39 —Yu mera arinijarã, ïarã arique, arĩmi guare Jesu.

Igu eroparĩcũ guapũ ïgu árĩrogue ïarã wabũ. Irisubu ñamicague cuatro hora árĩbũ. Eropirã iri ñamire ïgu mera dujabũ gua.

40 Gua perã Ñure peerã, Jesure nurusiagãrã yu mera majagu Andre mera árĩbũ. Andrepu Simo pagu magu árĩmi. 41 Eropigu ïgu mata ïgu ïgure ahma boca, òpa arĩ werepu ïgure:

—Mesiare Goãmu marire taubure Goãmu ïgu obeodigure bocabũ gua, arĩpu Andre Simore. Mesia ero majarã ya mera arĩrã, Cristo arĩrã iima.

42 Eropa arĩtuha ïgu Simore Jesu pohro aĩgãmi. Igu pohro erã ejacũ ïagu Jesupu Simore òpa arĩmi:

—Muhu Simo waĩcũgu Jona waĩcũgu magu ãhraa. Dohpaguere mure Cefa waĩyegura, arĩmi Jesu Simore. Cefa ero majarã ya mera arĩrã, Pedro arĩma. Eropigu Pedro waĩcũmi pare.

### *Felipere, Natanae sãre sihuñumi Jesu*

43 Gajinu Jesu “Galilea yebague ina warã,” arĩmi guare. Eropigu erogue eja ïgu Felipere bocatĩri òpa arĩmi:

—Yu mera majagu árĩbu arique, arĩmi Jesu.

44 Felipepu Betsaida majagu árĩmi. Igu, Andre, Pedro mera yuju maca majarã arĩma. 45 Eropigu Felipe Natanaere ahma, boca òpa arĩ weremi:

—Goãmu dorerire Moise ïgu gojarapũgue ïgu weredigure, gajirã Goãmu yare weremũhtanirã sã erã weredigure gua bocabũ. Jesu Nazare majagu José magu ïgu ta árĩcumĩ, arĩmi ïgu Natanaere.

46 —Nazareguere ne yujugu òagu marimi, arĩmi Natanaepũ.

—Ïagu arique muhu, arĩmi Felipe.

47 Eropi Natanae Jesu pohro ïgu ejacũ ïagu Jesupu òpa arĩmi Natanaere:

—Ihĩ dohpague arigu diaye ta òagu judio masu gohra ãhrimi. Iguere ne guyarĩ mara, arĩmi Natanaepure.

48 Igu eroparĩcũ peegu Natanae ïgure serẽpimi:

—¿Duhpigũ yure òaro masiri muhu? arĩmi.

—Felipe, ïgu mure ïgu sihuboro core, higuera gu doca mu árĩcũ ïhabũ yuhũ mure, arĩmi Jesu ïgure.

49 Igu eroparĩcũ Natanaepũ òpa arĩmi ïgure daja:

—Buhegu, diaye ta muhu Goãmu magu ta ãhraa. Muhu Israe masa gua opu árĩbu ãhraa, arĩmi Natanae.

50 Igu eroparĩcũ peegu òpa arĩ yuhripũ Jesu:

—Higuera gu doca yu mure ïarare masigu yure “Goãmu magu ãhraa,” arĩ umupeoa muhu yure. ¿Iri ta mure umupeocũ iiri? Mure yu eropa ïara tauro Goãmu turari mera yu iicũ ïagũca muhu, arĩmi Jesu Natanaere.

51 Eropa arĩgu òpa arĩ werenemomi:

—Diaye ta mure arĩgu iiaa. Yũhũ masũ Goãmũ ïgu obeodigu ãhraa. Ũmarogue Goãmũ yarã anyua erã yũ weca erã dijaricũ, erã m̄riacũ sãre ïagũca m̄hũ, arĩmi Jesu ïgũre.

## 2

### *Caná waĩcũri macague erã mojoto diriri bosenugue Jesu ïagũ wañumi*

<sup>1</sup> Ũhrenũ pũhrũ Caná Galilea árĩri macague mojoto diriri bosenu árĩbũ. Eropigo Jesu pago iri wihigue árĩmo. <sup>2</sup> Jesu gũa ïgu buherã sã erã mojoto dirirogue sihubeonirã árĩbũ. <sup>3</sup> Iri bosenu maja vino pehrecũ Jesu pago ïgũre weremo:

—Dohpaguere vino pehrea wahabũ erãre, arĩmo igo Jesure.

<sup>4</sup> Igo eroparĩcũ peegu Jesu õpa arĩmi:

—Meho, ¿duhpigo irire yũre wereri m̄hũ? Masa erã yũre masiboro dũhyania dohpa, arĩmi Jesu ïgu pagore.

<sup>5</sup> ïgu eroparĩra pũhrũ ïgu pagorũ mohme corerãre weremo.

—Yũ magũ ïgu dorero dopa ta ïique m̄ua, arĩmo igo.

<sup>6</sup> Irisubuguere gũa acawererã judio masa Goãmũ yare iimorã masare erã dũpũre eropa coeniguicãdorema. Eropi iri wihi seis gohra máta sorori, deco dicũri sorori árĩbũ. Iri deco Goãmũ yare iimorã erã coeri deco árĩbũ. Iri soroburire ochenta o cien litros sihabũ decore. <sup>7</sup> Eropigu erã mohme corerãre doremi Jesu:

—I soroburire deco mera pisãnemo Ƴjũtu dobopehocãque, arĩmi Jesu.

ïgu eroparĩcũ erãpũ õaro Ƴjũtu dobopehocãma iri soroburire.

<sup>8</sup> Erã eropa iira pũhrũ Jesu erãre doremi daja:

—Dohpaguere iri decore waa aĩ, sihu bosenu ïgũre tĩarã waque, arĩmi.

ïgu eroparĩcũ peerã iri decore waa aĩgã, sihu bosenu ïgũre tĩama erã.

<sup>9</sup> Erã tĩacũ ïgũpũ iri decore vino poyara decore ihriñami. Iri vinore “¿Noho majare aĩgãrayuri erã?” arĩ pepipũ ïgu. ïgu eropa masibiriquerecũ ïgũre mohme corerãpũ iri vinore tĩanirãpũ masima. Sihu bosenu ïgu eropa masibirinijagũ, mojoto diridigũre sihubeo <sup>10</sup> õpa arĩ weremi:

—Gajirã masa õari decore vino decore tĩamũhtamũrima. Masa erã õaro ihrira pũhrũ ñequeyari vino decopũre tĩama erã. Mũpũ õari vino decore dihbu, pũhrũgue gũare tĩaa, arĩmi sihu bosenu ïgu mojoto diridigũre.

<sup>11</sup> Caná Galilea árĩri macague decore vino ïgu poyacũ iira ne Goãmũ turari mera ïgu deyoro moanũgara árĩbũ. Eropa ïgu gajirãre ïgu turarire ii ïhmũmi Jesu. ïgu eropa ii ïhmura pũhrũ gũa ïgu buherã ïgũre umupeobũ.

<sup>12</sup> Pũhrũ Jesu, ïgu pago, ïgu pagũ porã, gũa ïgu buherã mera Capernaumgue sihgã wami. Eroque ejarã bajamenũrigã dujabũ gũa.

### *Jesu Goãmũ wihiguere ejañumi*

<sup>13</sup> Pascua árĩcũ gũa judio masa bosenu árĩboro merogã dũhyanijabũ. Eropigu Jesu gũa mera Jerusalengue wami. <sup>14</sup> Eroque e jagũ ïgu Goãmũ wihigue ñajajagũ, wecũare, ovejare, bujare duarãre bocajami. Eropigu niyeru gohrotorã erã mesarigue erã doacũ bocajami. <sup>15</sup> Eropa bocajagũ yuradari mera tãraridari ii, erãre árĩpehrerãre disiporogue tãranũrũ wiumi. Eropigu niyeru gohrotorã erã ya mesarire yomemuju mehpicãmi. Erã niyeru turi sãre mehsiripicãmi. <sup>16</sup> Eropa iituha bujare duarãre õpa arĩmi:

—Mũa yarã bujare aĩgãque. Yũ Pagũ ya wihire doberi duari wihi iibiricãque, arĩmi Jesu erãre.

<sup>17</sup> ïgu eropa iicũ ïarã gũa ïgu buherãpũ Goãmũ ya gojarapũ erã arĩrare guñabũ. Õpa arĩ gojanirã árĩma. “Goãmũ, m̄ wihire turaro mahia. Eropa mahigu m̄

wihire ñero erã iicũ ñagu turaro bujawerea yũhũ,” arĩ gojarare guñabũ gũa Jesu ñgu buherãpũ.

<sup>18</sup> Jesu ñgu eropa iira pũhrũ judio masa oparã ñgũre serẽpima:

—¿Duhpigũ mũhũ oãre Goãmũ wihigue árĩrãre cohã wiuari? Goãmũ irire mũre iidoregũ árĩcũ Goãmũ turari mera ii deyro moaque gũa ñaburire, arĩma erã Jesure.

<sup>19</sup> Erã eroparĩcũ Jesu yũhrimi:

—I wihire mũa cóãcũ, ùhrenũ pũhrũ tuhajagũca yũhũ, arĩmi Jesu erãre.

<sup>20</sup> —Ùhrenũ i wihire iisome mũhũ. Cuarenta y seis bojori gohra erã iira wihi ãhraa i wihi, arĩ yũhrima erã Jesure.

<sup>21</sup> Jesu ñgu eropa arĩrãre erã õaro pee masibirima. Jesu i wihire arĩgu ñgu dũpũ waburire arĩgu iirimi. <sup>22</sup> Eropi ñgu sĩrira pũhrũ, ñgu masa mũriara pũhrũ gũa ñgu buherãpũ ñgu eropa arĩrãre guñabũ. Goãmũ yare erã gojarapũre, Jesu ñgu werera sãre guña, “Iri diaye ta ãhraa,” arĩbũ gũa.

### *Árĩpehrerã erã guñarire Jesu masiñumi*

<sup>23</sup> Pascua bosenu árĩcũ Jesu Jerusaléngue árĩmi. Ero ñgu árĩcũ masa bajarã Goãmũ turari mera ñgu deyro moarire ii ñhmucũ ñarã ñgũre umupeoma. <sup>24</sup> Erã eropa umupeoquerecũ ta Jesu masa erã guñarire õaro masigu, “Yũre eropa umupeoniguicãrãcoma,” arĩ pepibiridi árĩmi. <sup>25</sup> ñgu masa erã guñarire õaro masĩmi. Eropa masigu masa ñgũre erã pepirire serẽpibirimi.

## 3

### *Jesu Nicodemo mera weretamuñumi*

<sup>1</sup> Iri maca majagu Nicodemo waĩcũgu, judio masa oparã mera majagu árĩmi. ñgu fariseo masa ya curu majagu árĩmi. <sup>2</sup> Eropigu ñgu yuju ñami ñgu Jesu pohro ahri ñgu mera weretamupũ:

—Buhegu, mũhũ Goãmũ ñgu buhedoredigu ñgu obeodigu mũ árĩcũ gũa masia. Goãmũ mũre ñgu itamubiricũ mũpũ ñgu turari mera ne deyro moarire ne iibiriboaya. Mũhũ bajasuburi Goãmũ turari mera ii ñhmua, arĩpũ Nicodemo Jesure.

<sup>3</sup> ñgu eroparĩcũ Jesu werepũ:

—Diaye mũre arĩgu iiaa. Ne masa dehyoagu iro dopa dipaturi masa dehyoagu dihta Goãmũ yagu árĩmasimi. Mũ sã eropa ta árĩmasia, arĩpũ Jesu.

<sup>4</sup> —Yaho. ¿Bũgũpũ dohpa ii dipaturi masa dehyoabocuri ñgu? ñgu pago niji suhriroguere ñajaa, dipaturi masa dehyoa masiya mariboca ñgũre, arĩpũ Nicodemo.

<sup>5</sup> ñgu eroparĩcũ Jesu yũhrĩpũ:

—Diaye ta arĩgu iiaa mũre. Ne masa dehyoagu iro dopa ta deco mera, Espĩritu Santo ñgu turari mera dipaturi masa dehyoagu dihta Goãmũ yagu árĩmasimi. <sup>6</sup> Nome nijipo sã nome árĩrã, majirãgãre masa dehyoacũ iima. Espĩritu Santopũ masare Goãmũ porã árĩcũ iimi. <sup>7</sup> “Ne masa dehyoagu iro dopa ta dipaturi masa dehyoagu dihta Goãmũ yagu árĩmasimi,” yũ arĩcũ ne pee gorowerebĩta. <sup>8</sup> Espĩritu Santo masare Goãmũ porã ñgu iicũ iiri miruñe iro dopa ãhraa. Miruñe iri ariroguere ahraa. Iri ariro caricũ mari peea. Eropa peequererã ta iri aridirore, iri waro sãre ne masibea. Eropa ta iimi Espĩritu Santo masare Goãmũ porã iigu, arĩpũ Jesu Nicodemore.

<sup>9</sup> —Mũ eropa arĩrãre õaro masibea, arĩpũ Nicodemo.

<sup>10</sup> ñgu eroparĩcũ peegu õpa arĩpũ Jesu:

—¿Mũhũ judio masare buhegu árĩqueregu ta, duhpigu yũ arĩrãre peebeari?

<sup>11</sup> Diaye mũre arĩgu iiaa. Gũa masirare, gũa ñarare gũa werea. Gũa eropa werequerecũ ta ne mũa gũa acawererã judio masa ne peediabiribũ. <sup>12</sup> I yeba majare

yũ werenigui queoñaquerecũ ta “Diaye ta ãhraa,” arĩbeaa mũa. Eropa arĩbirã Goãmũ yare yũ werecũ sãre “Diaye ta ãhraa,” arĩsome mũa.

<sup>13</sup> “Ne yujugũ ãmarogue Goãmũ pohrogue wagũ ne dipaturi dujarisome. Yũhũ Goãmũ ãgũ obeodigũ yũ dihta ãmarogue áridigũ i yebaguere aribũ. Eropigũ yũ dihta Goãmũ yare mũare weremasia. <sup>14</sup> Iribojeguere masa mariroguere Moise mũrũ añare come mera erã wéadigũre yucũgũ erã nugudigũgue duhsiupũ. Yucũgũgue ãgũ duhsiudiro dopa ta yũre Goãmũ ãgũ obeodigũre eropa ta yũ sãre duhsiurãcoma. <sup>15</sup> Yũre erã eropa iicũ áripheerã yũre umupeorã áripheerĩnũri Goãmũ mera áriniguirãcoma, arĩpũ Jesu.

### *Goãmũ áripheerãre mahimi, arĩ gojañumi Ñũ*

<sup>16</sup> Eropa arĩtuha õpa arĩnemopũ Jesu:

—Goãmũ áripheerĩ yeba majarãre turaro mahimi. Eropigũ yũre ãgũ magũre yujugũ ta árigũre Goãmũ obeomi áripheerã yũre umupeorã peamegue erã wabiriborore. Eropirã áripheerĩnũri Goãmũ mera árirãcoma erã. <sup>17</sup> Goãmũ yũre ãgũ magũre masare dipuwaja moadoregũ obeobirimi i yebaguere. Eropigũ masare peamegue wabonirãre taubure yũre obeomi.

<sup>18</sup> “Yũre Goãmũ magũre umupeorãre ne dipuwaja moasome Goãmũ. Yũre umupeobirãpũre Goãmũ dipuwaja moadoretuhami. Masa yũre Goãmũ magũre yujugũ ta árigũre erã umupeobirãra dipuwaja, dipuwaja moagũcumi Goãmũ erãre. <sup>19</sup> Yũhũ Goãmũ magũ i yebaguere arigũ boyoriñe õaro ãha masicũ iro dopa ta Goãmũ yare õaro masicũ iiaa masare. Yũ eropa masicũ iicũ ãarã yũre umupeobirã yũre gamebeama. Erã ñerire iiripũre turaro gahmema. Erã eropa gameri dipuwaja erãre dipuwaja moagũcumi. <sup>20</sup> Áripheerã ñerire iirã erã ñero iirire duhudiabeama. Eropirã boyoro iiriñe deyoro moaro dopa ta erã ñero iirare deyoro moari arĩrã yũre gamebeama. <sup>21</sup> Õarire iirãpũ yũre, yũ buheri sãre gahmema. Goãmũ yare erã iirire yũ õaro deyoro moacũ gũhyasĩribeama erã. Eropiro yũre boyoro iro dopa árigũre gahmema, arĩ werepũ Jesu.

### *Dipaturi Ñũ waĩyegũ Jesure wereñumi*

<sup>22</sup> Pũhrũ Jesu gũare ãgũ buherãre Judea yebague sihugã wami. Erogue ejagũ ero majarã mera bajamenũrigã duja, Goãmũ ya áriburire waĩyemi erãre. <sup>23</sup> Ñũ sã masare waĩyegũ iipũ Enón waĩcũri macague. Enón waĩcũri maca Salim waĩcũri maca pohro arĩbũ. Ero wũaro dia arĩbũ. Ero eropa arĩcũ ero majarã masare waĩyegũ iipũ Ñũ. <sup>24</sup> Erã ãgũre peresu iiboro core Enóngue masare waĩyegũ iipũ Ñũ.

<sup>25</sup> Irisubure Ñũ buherã mera majarã bajamerãgã judio masa mera waĩyerire wereniguirã dũyasoñorã. <sup>26</sup> Tuhaja erã Ñũ pohrogue eja irire wereñorã.

—Buhegũ, dia Jordán waĩcũriya gajipũ masegue mũ mera áridigũ “ãgũ ta Cristo ta árigũcumi,” mũ arĩdigũpũ dohpague masare waĩyegũ iimi. ãgũ eropa iicũ áripheerã ãgũ pohrogue wahama pare, arĩñorã erã Ñũre.

<sup>27</sup> Erã eroparĩcũ peegũ Ñũ yũhripũ:

—ãgũ dorerire ãgũ opacũ Goãmũ ãgũre odi arĩmi. <sup>28</sup> “Cristo arĩbeaa yũhũ,” yũ arĩcũ mũa peeabũ. Eropa Cristo arĩbiriqueregũ ta ãgũ core wereyubure Goãmũ ãgũ obeodigũ ãhraa yũhũ. <sup>29</sup> Õpa ãhraa iri: Mojoto diridigo igo marapũ mera árigũ wahamo. Mojoto diridigũ mera majagũpũ diridigũ ãgũ marapocũcũ ãagũ ãgũ werenicũ peegũ turaro mucubirimi. Eropigũ mojoto diridigũ mera majagũ ãgũ mucubiridiro dopa ta yũ sã Cristo mera masa erã wacũ ãagũ õaro mucubiria. <sup>30</sup> Cristopũre umupeoro gahmea masare. Yũpũre umupeobiricãro gahmea masare, arĩ yũhripũ Ñũ.



*Goãmũ magũ ɯmarogue aridigũ áhrimi, arĩ wereñumi Ñũ*

<sup>31</sup> Eropa arĩtuhagũ òpa arĩnemopũ Ñũ.

—Umarogue aridigũ árĩpehrerã nemoro turagũ áhrimi. Mari masa i yeba majarã áhraa. Eropirã i yeba majare wereniguia mari. Umarogue aridigũpũ árĩpehrerã nemoro turagũ áhrimi. <sup>32</sup> Īgũ ĩarare, ĩgũ peerare ĩgũ weremi. Īgũ eropa werequerecũ ta masa ĩgũre ne peediabeama. <sup>33</sup> Umarogue aridigũ ĩgũ wererire masa peerãpũ, “Goãmũ diaye árĩgũ tiimi,” arĩrã iima erã. <sup>34</sup> Ihĩ Cristore Goãmũ ĩgũ obeodigure Espĩritu Santo ya turarire opehoñumi Goãmũ. Eropigũ ĩgũ Goãmũ ya wereniguirire wereniguimi. <sup>35</sup> Goãmũ ĩgũ magũre turaro mahimi. Eropigũ árĩpehrerire, árĩpehrerã sãre erã opũ árĩdoremi Goãmũ ĩgũ magũre. <sup>36</sup> Goãmũ magũre umupeorãpũ ɯmũri nũcũ Goãmũ mera árĩniguicãrãcoma. Īgũ magũre tarinũgarãpũ Goãmũ pohro wasome. Eropirã ɯmũri nũcũ ɯmaroguere árĩsome. Eropigũ Goãmũ erãre turaro dipuwaja moagũcumĩ, arĩpũ Ñũ masare.

## 4

*Jesu Samaria majago mera weretamuñumi*

<sup>1</sup> Jesu Ñũ nemoro bajarã ĩgũ buherã ĩgũ opacũ, Ñũ nemoro masare ĩgũ waĩyecũ fariseo masa peeñorã. <sup>2</sup> Erã eropa peebeoquerecũ ta Jesupũ ĩgũ basi masare waĩyebirimi. Gũa ĩgũ buherãpũ masare waĩyebũ. <sup>3</sup> Fariseo masa erã eropa masicũ peegũ Jesupũ Judea yeba árĩdigũ Galilea yebague sihu dujaa wami gũare.

<sup>4</sup> Galileague warã gũa “Samaria yebare tarigã warãca,” arĩbũ gũa. <sup>5</sup> Eropa tarigã Samaria yebague árĩri macague Sica waĩcũri macague ejabũ. Iri maca pohro iribojegue Jacobo mũrũ ĩgũ magũ José mũrũre ĩgũ ora yeba árĩyoro. <sup>6</sup> Ero Jacobo mũrũ ĩgũ deco ihrira gobe árĩbũ. Eropigũ Jesupũ yoarogue aridigũ, ĩgũ oẽtaria wagũ iri gobe pohro doajami. Irisubu ĩgũ ero doajarisubu goeri boje gohra árĩbũ. <sup>7-8</sup> Gũa ĩgũ buherãpũ macague gũa barire asũrã wara pũhrũ yujugũ ta ĩgũ erore dujadoami. Eropigo Samaria majago iri gobegue igo deco waago eracũ Jesu igore deco serẽpũ:

—Deco oque yũre, arĩpũ.

<sup>9</sup> —Mũhũ judio masũ áhraa. Yũpũ Samaria majago áhraa. ¿Duhpigũ yũre decore serẽri mũhũ? arĩpo igo Jesure. Judio masa Samaria majarãre game ĩadiabirã árĩñorã. Eropigo igo eropa arĩpo Jesure.

<sup>10</sup> Igo eropa arĩra pũhrũ Jesu igore werepũ:

—Mũre Goãmũ ĩgũ itamudiarire masigo árĩgo, mũre decore serẽgũre masigo árĩgo, mũpũ yũpũre serẽboaya. Mũ eropa serẽcũ gajĩ decore oboaya yũhũ mũre. Iri decopũ ojocarĩniguicãcũ iiri áhraa, arĩpũ Jesu igore.

<sup>11</sup> Īgũ eroparĩcũ peego igo yũhriipo ĩgũre:

—Ne mũre sorobu mara. I gobe sã ɯhĩcãri gobe áhraa. ¿Eropigũ i ojocarĩcũ iiri decore nohogue waabocuri mũhũ? <sup>12</sup> Gũa ñecũ mũrũ Jacobo iribojegue majagũ mũrũ i gobere gũare apimũripũ. Īgũ, ĩgũ porã, ĩgũ ejorã sã i decore ihrimũriñorã. “Gajĩ decore oboaya yũhũ,” mũ arĩgũ, ¿Jacobu tauro turagũ áhriri mũhũ eropa arĩ pepigũ? arĩpo igo.

<sup>13</sup> Igo eroparĩcũ Jesu yũhriipo:

—Árĩpehrerã i decore ihrirã dipaturi ñemesiburãcoma. <sup>14</sup> Yaha decopũre ihrirã ne dipaturi ñemesibusome. Eropirã yaha decore ihrirã Goãmũ mera eropa árĩniguirãcoma. Maũ dipagãgue eropa deco wirĩniguiro dopa ta yaha deco ne pehresome, arĩpũ Jesu.

<sup>15</sup> Īgũ eroparĩcũ nomeopũ òpa arĩpo:

—Ne dipaturi yũ ñemesibubiriboro dopa iri decore oque yũre. Eropigo dipaturi õguere ne deco waasome, arĩpo igo.

<sup>16</sup> Igo eroparĩcũ Jesu igore wererũ:

—Irisubu tamerare mũ marapũre sihugo waque. Sihutuha õgue arique ãgu mera, arĩpũ Jesu igore.

<sup>17</sup> —Marapũ marigo āhraa yũhũ, arĩpo igo.

—Diaye ta arãa mũhũ. <sup>18</sup> Mũhũ cincosuburi marapũcutuharibũ. Eropigu dohpague mũ mera árĩgu mũ marapũ gohra árĩbeamĩ. Eropigo “Marapũ marigo āhraa,” arĩgo, diaye ta arãa mũhũ, arĩpũ Jesu igore.

<sup>19</sup> Ĩgu eroparĩcũ peego õpa arĩpo igo:

—Ne, Goãmũ yare weremũhtagũ āhraa mũhũ yũ pepicũ. <sup>20</sup> Gũa ñecũ samarã mũra irĩgu utãgũgue Goãmũre umupeomũriñorã. Eropirã mũapũ judio masa “Jerusalẽgue masare Goãmũre umupeoro gahmea,” arĩmũribũ mũa judio masa, arĩpo igo.

<sup>21</sup> Igo eroparĩcũ Jesu yũhripũ:

—Nomeo, yũpũre peenique. Pũhrũguere irĩgu utãgũgue, Jerusalẽgue sãre mari Pagũre umupeosome mũa. <sup>22</sup> Mũapũ mũa umupeorire masibea. Masare taubupũ judio masũ āhrimi. Eropirã gũa judio masapũ gũa umupeogũre masia. <sup>23</sup> Dohpague pũhrũgue sãre Goãmũre diaye umupeorã erã õaro pepiri mera ãgũre umupeorãcoma. Eropa mari umupeocũ gahmemi Goãmũ. <sup>24</sup> Goãmũ dũpũ marĩgu ta ãgu árĩcũ masa ãgũre ãabeama. Eropiro ãgũre umupeori mera erã õaro pepiri mera ãgũre õaro diaye umupeoro gahmea masare, arĩpũ Jesu igore.

<sup>25</sup> Ĩgu eroparĩcũ igo yũhripo:

—Mesia, “Cristo,” erã arĩgũpũ, masare taubu ãgu ariburire masia yũhũ. Ĩgu arĩgu marire árĩpehrerire buhepehogũcumĩ, arĩpo igo.

<sup>26</sup> —Yũhũ ta āhraa Cristo, arĩpũ Jesu igore.

<sup>27</sup> Ĩgu eropa arĩ weretamurisubu gũapũ ãgu buherãpũ erabũ. Jesu nomeo mera ãgu wereniguicũ ãarã uca wacarabũ. Eropa ucaquererã ta “¿Dohpa gahmeri mũhũ? ¿Dohpa arĩri mũhũ igore?” arĩ serẽpiñabiribũ. <sup>28</sup> Eropigo nomeo igo sorobure ero duhudobocã, macague waha wamo. Eja masare werego õpa arĩpo:

<sup>29</sup> —Yũ iirare werepehogũre ãarã arique mũa. ¿Ĩgu diaye ta Cristo árĩbocuri? ãarã arique mũa, arĩpo igo.

<sup>30</sup> Igo eroparĩcũ iri maca majarã Jesure ãarã arimorã iima. <sup>31</sup> Irisubure gũa Jesu buherã ãgũre turaro badoreribũ.

—Buhegu, baque, arĩribũ gũa.

<sup>32</sup> —Gajiropa árĩri barire opaa yũhũ. Iirire mũa masibea, arĩmi ãgu gũare.

<sup>33</sup> Ĩgu eroparĩcũ peerã gũa basi õpa arĩ wereniguibũ:

—¿Gajirã ãgũre barire otuhayuri? arĩbũ gũa basi. Gũa eroparĩcũ Jesu weremi:

<sup>34</sup> —Masapũ basũama. Yũre obeodigu ãgu gamerire iigu sũaa yũpũ. <sup>35</sup> “Wapicũrã aberi dũhyaa mari dũca aĩboro,” pohe opũ ãgu arĩ pepimi. Mũapũ “Goãmũ yare gũa masare wereboro dũhyania,” arĩ pepibiricãque. Diaye arĩgu iiaa mũare. Dohpague tamerare masare wererã waque. Masare ãaque. Dohpague tamerare yũ buherire masa erã peeburisubuno árĩro tiiaa. <sup>36</sup> Dũcare aĩrãre erã wajayero dopa ta, yaharã árĩmorãre aĩnirãre yahare buhenirãre wajayegũra yũhũ. Erã eropiira waja õaro wajayegũra erãre. Erã eropa buhecũ peerã yũ buherire peenirã yaharãpũ Goãmũ mera umũri nũcũ árĩrãcoma. Eropirã erãre buhemũhtanirã, pũhrũ yaharã árĩcũ iirã sã yujuropa mucubirima. <sup>37</sup> “Yujugũ otemũhtagũ āhrimi. Gajigũpũ dũcare aĩgu āhrimi,” arĩmũriñorã iribojegũre. Iri diaye ta āhraa. Erã eropa arĩdiro dopa ta yujurãyeri yahare weremũhtarã āhrima. Gajirã yahare buhe yaharã árĩcũ iirã āhrima. <sup>38</sup> Pohe opũ ãgũre mohmerã erã otebirinirã árĩquerecũ ta erãre dũcare aĩdoregu obeomi. Eropa ta masare buhemũhtabirinirã mũa árĩquerecũ ta

erã yũre umupeocũ iidoremorãre obeoa mũare. Gajirãpũ erãre buhemũtatuhama. Erã buhenirãguere dipaturi buhenemorã, yaharã árĩcũ iirãca mũapũ. Eropirã buhemũhtarãpũ erã itamuro mera gajirãre yaharã árĩcũ iirãca, arĩmi Jesu gũare.

<sup>39</sup> Irisubure Samaria majago, “Yũ iira mũrare ĩgu werepehoami,” igo arĩcũ peerã Samaria majarã bajarã Jesure umupeoma. <sup>40</sup> Eropirã Samaria majarã Jesu pohro ejarã, “Gũa mera dujanique,” arĩma ĩgũre. Erã eroparĩcũ gũa penũ ĩgu mera ero dujanibũ. <sup>41</sup> Gajirã sã bajarã Jesure peerã umupeoma. <sup>42</sup> Ōpa arĩma masa nomeore:

—Nere mũ arĩrãre peerã Jesure umupeonũgarabũ. Dohpague tamerare ĩgu wereniguirire gũa basi peerã ĩgũre ōaro umupeoa. Eropirã ĩgũpũre peerã i yeba majarãre peamegue wabonirãre taubu diaye ta ĩgu árĩcũ, dohpague gũa masia, arĩma masa Samaria majagore.

### *Opũ magũre dorecũgũre ōagũ wacũ iĩũumi Jesu*

<sup>43</sup> Penũ pũhrũ Jesu gũare Galileague sihu wami daja. <sup>44</sup> Neguere ōpa arĩmũrimi gũare Jesu: “Goãmũ ya weremũhtagũre ĩgu ya yeba majarã ĩgũre umupeobeama,” arĩmũrimi Jesu. <sup>45</sup> Eropirã gũa Galileague ĩgu mera ejacũ ero majarã ĩgũre ōaro bocatĩrima. Ero core Jerusaléngue bosenu árĩcũ Jesu ĩgu iirare ĩanirã arĩma erã.

<sup>46</sup> Eropi Caná Galilea árĩri macague ĩgu decore vino wacũ ĩgu iira macague waha wabũ gũa ĩgu mera daja. Caná pohro árĩri maca Capernaum waĩcũri maca opũ magũ dorecũgũ iipũ. <sup>47</sup> Eropigũ Jesu Judea árĩdigũ ĩgu Galileague ejari querere peepũ. Irire peegũ Jesu pohrogue erami.

—Yũ magũ sĩrigũ iiami. Eropigũ ĩgũre ōagũ wacũ iigũ arique, arĩ yojaro mera sihumi ĩgũre.

<sup>48</sup> ĩgu eroparĩcũ peegũ Jesu yũhrimi:

—Goãmũ turari mera yũ deyoro moarire ĩabirã, ne yũre umupeobeaa mũa, arĩmi Jesu.

<sup>49</sup> ĩgu eroparĩcũ peegũ opũpũ ōpa arĩmi:

—Opũ, yũ magũ ĩgu sĩriboro core arique, arĩmi ĩgu Jesure.

<sup>50</sup> —Dujaaque. Mũ magũ ojocarigũcumi, arĩmi Jesu.

ĩgu eroparĩcũ peegũ, “ĩgu arĩdiro dopa ta ojocarigũcumi yũ magũ,” arĩgũ opũ dujaa wami. <sup>51</sup> Eropa dujaniguigũre ĩgu pohro majarã ĩgũre bocatĩri wereñorã.

—Mũ magũ masa wahãmi, arĩ wereñorã erã ĩgũre.

<sup>52</sup> —¿Noho gohra abe árĩcũ ōagũ wahãri ĩgu? arĩ serẽpipũ ĩgu pohro majarãre.

—Cãrũre goeri boje pũhrũgã ta nimacũri tahriabũ ĩgũre, arĩñorã erã ĩgũre.

<sup>53</sup> Erã eroparĩcũ ōpa arĩ pepipũ ĩgu: “Jesu yũre ‘Mũ magũ masa wahãmi,’ arĩ werera pũhrũ ta nimacũri tahria waya,” arĩ pepipũ opũpũ. “Diaye ta arãũumi yũre,” arĩgũ, ĩgu árĩpehrerã ĩgu acawererã mera Jesure umupeoñorã.

<sup>54</sup> Jesu Judea árĩdigũ Galileague ĩgu ejara pũhrũ opũ magũre ĩgu ōagũ wacũ ĩgu iira mera mari queocũ pesubu Goãmũ ĩgu turari mera ii ĩhmũmi Jesu.

## 5

### *Curimasibigũre ōagũ wacũ iĩũumi Jesu*

<sup>1</sup> Pũhrũ judio masa Goãmũre gũa umupeori bosenu árĩcũ gũa Jesu mera Jerusaléngue ejabũ daja. <sup>2</sup> Ero maca ñajari disiporo oveja waĩcũri disiporo pohro guhari gobe árĩbũ. Gũa judio masa ya mera Betesda waĩcũri gobe árĩbũ. Iri deco gobe pohro cinco gohra tiaya mariri tari dipabu árĩbũ. <sup>3</sup> Iri tari dipabugue bajarã dorecũrã oyarãre ĩabũ. Cũiri ĩhajabirã, curimasibirã, gõari marirã, erã iri gobe pohro oyama. Deco ñohmeborore corerã iĩñorã. <sup>4</sup> Erogue dijarigũ iri gobe maja decore yujuyerisuburi ñohmecũ iipũ anyu. Iri gobe maja deco ĩgu ñohmera pũhrũ ñaja guhamũtagũpũ ōagũ warũ. Dohpa árĩri dorere opagũ ōagũ warũ. <sup>5</sup> Eropigũ

ero yujugu dorecugu oyami. Īgu treinta y ocho bojori gohra dorecugu árĩpu. <sup>6</sup> Ero ĩgu oyacũ ĩagu ĩgu eropa yoari boje ĩgu dorecucũ masimi Jesu ĩgure. Eropa masigu ĩgure serẽpimi:

—¿Ōari dupu dore marigu arĩdiari mũhu? arĩmi Jesu ĩgure.

<sup>7</sup> Īgu eroparĩcũ dorecugupu yũhrimi:

—Iri deco ñohmecũ yure decogue aĩ acugu marimi. Iri decogue yu ñajadiaquerecũ ta gajirãpu yu core yuu ñajamũhtama, arĩmi ĩgu Jesure.

<sup>8</sup> —Wahgãnujague. Mu omasiariñere aĩ, mu guburi mera cũhrapi wahgã waque, arĩmi Jesu ĩgure.

<sup>9</sup> Īgu eroparĩcũ ta dorecugupu wahgãnujaja ĩgu omasiariñere aĩ waha wami. Irinu Sabado gua judio masa soorinu árĩbu. <sup>10</sup> Īgu eropa ðagu wadigu ĩgu omasiariñere aĩgãcũ ĩarã judio masa gua oparãpu dorecudigure ðpa arĩ wereñorã:

—Dohpagãre Sabadonu mari soorinu arĩquerecũ mu yañe omasiariñere aĩ wahgãa mũhu. Eropa iigu mari dorerire tarinugagu iiaa, arĩñorã erã ĩgure.

<sup>11</sup> —Yure yu dorecũrere taudigupu ðpa arãmi yure, arĩpu dorecudigupu. “Mu omasiariñere aĩ, mu guburi mera cũhrapi wahgãque,” arãmi yure, arĩ yũhrĩpu dorecudigu mũrupu erãre judio masa oparãre.

<sup>12</sup> —¿Iriire mure eropa arĩdigupu nihino aħriri ĩgu? arĩ serẽpiñorã erã ĩgure.

<sup>13</sup> Ero bajarã masa erã arĩcũ ĩagu Jesupu waha wadigu arĩmi. Eropigu dorecudigupu ĩgure ðagu wacũ iidigu ĩgu waĩre masibirĩpu. <sup>14</sup> Pũhrũ Goãmu wihigüe gua ĩgure bocatĩricũ Jesu ĩgure weremi:

—Peenique mũhu yure. Dohpaguere ðaro dupũca mũhu. Ñerire iinemobiricãque. Dipaturi iinemogu mu dorecũdiro tauro wagũca, arĩmi Jesu ĩgure.

<sup>15</sup> Īgu eropa arĩra pũhrũ dorecudigu judio masa oparã ĩgure serẽpinirã pohrogue eja, werepu erãre:

—Jesu waĩcugu yure ðagu wacũ iiami, arĩ werepu ĩgu.

<sup>16</sup> Eropi Sabado arĩcũ Jesu dorecugure ĩgu dorere ĩgu taucũ masirã judio masapu ĩgure ñero iinũgañorã. Eropirã erã ĩgure wejẽdiariñorã.

<sup>17</sup> Eropa ñero erã iidiarire masigu Jesupu weremi erãre:

—Yu Pagu dohpaguere mohmenimi. Yu sã eropigu mohmenigu iiaa, arĩ weremi ĩgure ñero iidiarãre.

<sup>18</sup> Īgu eroparĩcũ judio masa gua oparã ĩgu mera turaro guarã, ero core erã arĩdiro tauro ĩgure wejẽdiañorã. Sabadonũre erã soorinũre ĩgure ðagu iicũ ĩarã erã guañorã. Eropa guarã Goãmũre ĩgu “yu Pagu,” ĩgu arĩcũ peerã erãpu tauro guañorã. “‘Yu Pagu,’ arĩgu Jesu ĩgu basi ‘Goãmũ mera yujuro mera aħraa,’ arĩ guñacumi ĩgu,” arĩ pepiñorã judio masa gua oparã.

*Jesu “Goãmũ ĩgu obeodigu aħraa yũhu,” arĩ masare wereñumi*

<sup>19</sup> Eropi Jesu erãre weremi:

—Diaye mũare arĩgu iiaa. Yũhu Goãmũ magu yu gamero iigu iibea. Yu Pagu ĩgu iirare ĩagu irire iiaa. <sup>20</sup> Yu Pagu yure ĩgu magure mahimi. Eropigu ĩgu iirare yure ii ĩhmupehomi. I dohpaguere ĩgu turari mera yu iira tauro ĩgu gajire iidoregũcumĩ yure. Īgu eropa iidorecũ ĩgu turari mera ii ĩhmugũca ĩgure yũhu. Eropa yu ii ĩhmucũ ĩha ucarãca mũa. <sup>21</sup> Yu Pagu sĩrinirãre ĩgu masuro dopa ta yu sã yu gamerãre masugura. <sup>22-23</sup> Ne yu Pagupu masa erã ñeri iira dipuwaja, ĩgu basi dipuwaja moagu moabeami. Yũpũre irire erã ñeri iira dipuwaja dipuwaja moabure apimi. Erã ĩgure umupeodiro dopa ta yu sãre umupeoborore eropa apimi. Eropirã yure ĩgu magure umupeobirã yu Pagu sãre umupeobea mũa. Īgu aħrimi yure obeodigu, arĩmi Jesu.

<sup>24</sup> Eropa arĩtuha ðpa arĩ werenemomi:



—Diaye mũare arĩgu iiaa. Yũ wereniguirire peerã yũre obeodigũre umupeorã umũri nũcu umarogue eropa árĩniguicãrãcoma. Eropigu erãre dipuwaja moasome yũhũ. Eropirã erã peamegue wabonirã tarirãcoma. <sup>25</sup> Diaye ta mũare arĩgu iiaa. Peamegue wamorã yũre Goãmũ magũre erã peeburibusu dohpague àhraa. Pũhrũ sãre erã yũre peerãcoma daja. Eropa peerã peenũrũrãpũ Goãmũ mera eropa árĩniguirãcoma. <sup>26</sup> Goãmũ yũ Pagũpũ erãre eropa árĩniguicũ iigu àhrimi. Eropigu yũre ìgu magũre erãre eropa árĩniguicũ iibure árĩdoremi ìgu yũre. <sup>27</sup> Eropigu yũhũ masũ Goãmũ ìgu obeodigu árĩcũ ìgu masare dipuwaja moadorerire apimi yũre. <sup>28</sup> Ire peerã, pee ucabiricãque mũa. Gajinũguere árĩpehrerã sĩrinirã masa goberigue árĩrã yũ wereniguicũ peerãcoma. <sup>29</sup> Eropa pee wahgãrã õarire iinirã mũra umũri nũcu Goãmũ mera árĩmorã masa mũriarãcoma. Ñeri iinirã mũrapũ ñerire erã iira dipuwaja peamegue warãcoma, arĩ weremi Jesu.

<sup>30</sup> Eropa arĩtuha õpa arĩ werenemomi:

—Yũ gamero ne gajinore iibeaa. Ne yũ basi yũ gamero iibeaa. Yũre obeodigu ìgu gamero dopa ta iiaa. Eropigu ìgu arĩdiro dopa ta dipuwaja moaa. Eropigu masare yũhũ dipuwaja moagu diaye ta iiaa. <sup>31</sup> “Yũhũ Goãmũ magũ ìgu obeodigu àhraa,” yũ basi arĩ werecũ, “Mũ wereniguirire ne diaye árĩbeaa,” arĩboca mũa. <sup>32</sup> Gajigu àhrimi yũre weregu. Ìgu Goãmũ àhrimi. Ìgu yũre werera diaye ta àhraa. Irire yũ õaro masia. <sup>33</sup> Mũa gajirãpũre Ñure yũre serẽpidore obeobũ. Eropigu ìgu sã diaye ta weremi mũare. <sup>34</sup> Masare yũre “Goãmũ ìgu obeodigu àhrimi,” arĩ weremorãre amabeaa yũpũ. Eropa amabiriqueregũ ta Ñũ masũ ìgu árĩquerecũ ta “Yũre diaye ta weremi,” arãa. Mũa yũre umupeoburire, mũa peamegue wabonirã mũa tariburire yũre ìgu werera “Diaye ta àhraa,” arĩ weregu iiaa. <sup>35</sup> Ñũ mũare buhemũhtagũ bajamenũrigã buhemi mũare. Ìgu eropa buhecũ peerã bajamenũrigã mucubiriribũ mũa. <sup>36</sup> Ñũ yũ árĩricũre weremi mũare. Ìgu wereri mera yũ árĩricũre masiquererã yũ iirire ìarã tauro masirãca. Goãmũ yũ Pagũ ìgu turari mera ìgu yũre iidorerare dohpague iigu iiaa. Ire yũ iicũ ìarã diaye ta Goãmũ ìgu obeodigu yũ árĩcũ masirãca mũa. <sup>37</sup> Eropiro yũ Pagũ yũre obeodigu ìgu basi yũhũ ìgu obeodigu árĩrĩre arĩ weremi mũare ìgu yare erã gojarapũgue. Ìgu eropa arĩ werequerecũ ta ìgu wereniguirire ne peebeaa mũa. Eropi mũa ìgũre ne ìabeaa. <sup>38</sup> Yũre Goãmũ ìgu obeodigũre mũa ne peediabeaa. Eropirã mũa ne Goãmũ yare gamebeaa. <sup>39</sup> Goãmũ yare erã gojarapũre mũa õaro buhea. Eropa buherã “Gũa ìpũre buherã umũri nũcu Goãmũ mera eropa árĩniguirãca,” arãa mũa. Iripũ ta yũre werea. <sup>40</sup> Iripũ yũre werequerecũ ta mũrapũ yũre gamebeaa. Umũri nũcu Goãmũ mera mũa árĩniguirire yũhũ ogũ árĩquerecũ yũre gamebiribũ mũa, arĩ weremi Jesu erãre.

<sup>41</sup> Eropa arĩtuha õpa arĩnemomi:

—Yũre masa erã umupeorire amabeaa yũhũ. <sup>42</sup> Eropa amabiriqueregũ ta Goãmũre mũa mahibiricũ masia yũhũ. <sup>43</sup> Goãmũ yũ Pagũ ìgu dorero dopa ta yũ arĩquerecũ ta mũa yũre gamebeaa. Gajigũpũre Goãmũ ìgu obeobiridigu ìgu árĩquerecũ ta ìgũpũre gamerãca mũa. <sup>44</sup> Gajirã masa mũare erã umupeocũ gahmea mũa. Goãmũ mũa mera ìgu mucubiririre gamebeaa mũa. Ìgu dihta Goãmũ gohra àhrimi. Eropa gamebirã yũre peebeaa mũa. Yũre umupeobeaa mũa. <sup>45</sup> Mũare yũ Pagũguere ne weresãsome yũhũ. Irire pee masique mũa. Moise ìgu gojarapũpũ mũare weresãroca. “Iripũ maja dorerire iipehorã, Goãmũ pohro warãca mũa,” arĩripũpũ mũare weresãroca. <sup>46</sup> Moise ìgu gojarapũ yũpũre weremũhtayoro. Eropirã iripũre õaro umupeorã yũ sãre umupeoboaya mũa. <sup>47</sup> Moise ìgu gojarapũre mũa õaro peebirã, yaha wereniguirire sãre peesome mũa, arĩmi Jesu erãre.



## 6

*Cinco mil umare masare bajarã gohrare bari oñumi Jesu*  
*Mt 14.13-21; Mr 6.30-44; Lc 9.10-17*

<sup>1</sup> Eropã ñgu buherã pũhrũ Galilea waĩcũri ditaru gajipũ masegue gua Jesu mera taribuja wabũ. Galilea ditaru ta Tiberia waĩcũbũ. <sup>2</sup> Ero core Galilea yeba Jesu dorecũrãre ñgu õarã ñgu iicũ masa ñanirã árĩma. Erã eropa ñanirã árĩrã Jesu ñgu taribujacũ ñarã masa bajarã ñgure nũrusia taribujama. <sup>3</sup> Eroque eja, gua ñgu buherã ñgu mera utãgũgue mũria, doabũ. <sup>4</sup> Irinũ Pascua waĩcũri bosenu árĩboro judio masa bosenu árĩboro merogã duhyabũ. <sup>5</sup> Eroque doagu, Jesu masa bajarã ñgu pohro erã aricũ ñhabeomi. Eropã ñhabeogu Felipere serẽpimi Jesu:

—¿Oã masa erã baburire nohogue asũrãcuri mari? arĩ serẽpimi.

<sup>6</sup> Jesu ñgu basi ñgu iiburire masiqueregũ ta Felipere serẽpi ñami, “¿Dohpa yũhrigũcuri?” arĩgu. <sup>7</sup> Ñgu eropa serẽpicũ Felipepũ yũhrimi:

—Doscientos niyerupũri waja mera mari asũquerecũ ta, masare yujurãyerire mutarigã barire mari guerequerecũ ta ne sihasosome, arĩmi Felipe Jesure.

<sup>8</sup> Gua mera majagu Andrepũ Simo Pedro pagũ magupũ Jesure weremi.

<sup>9</sup> —Cinco pan dipuru, perã wai ihĩ majigu ohõ opami. Iri pan dipurugã ñgu opaquerecũ ta masapũ bajarã gohra ãhrima. Eropiro i merogã bari ne sihasosome, arĩmi Andre.

<sup>10</sup> —Masare doadoreque mũa, arĩmi Jesu guare ñgu buherãre.

Ero mutarigã taacũro árĩbũ. Gua doadorecũ masa árĩpehrerã doajapehrea wama taa weca. Uma dihtare queocũ cinco mil gohra árĩma. <sup>11</sup> Erã eropa doajacũ ñagu Jesupũ panre aĩ Goãmure “Õhaa,” arĩmi. Eropã arĩtuha guare ñgu buherãre gueredoremi. Ñgu eropa gueredorecũ guapũ erã doarãre guere wahgãbũ. Perã wai sãre aĩ guere wahgãbũ. Árĩpehrerãre erã sihasaro barire guerebũ. <sup>12</sup> Eropirã masa erã yapicũ ñagu Jesu guare doremi:

—Erã ba duharire aĩque. Eropirã iri barire ne dedeosome, arĩmi.

<sup>13</sup> Ñgu eroparĩcũ guapũ cinco pan dipuru duhyarare gua gameneocũ doce pũiri gohra wiribũ. <sup>14</sup> Eropirã masa Jesu Goãmũ turari mera iri deyoro moariñere ñgu iicũ ñarã õpa arĩma:

—Diaye ta ãhraa. Ihĩ Goãmũ ya wereniguigu i yebague aridigu mari coredigu ta ãhrimi, arĩma erã.

<sup>15</sup> Eropirã erã Jesure erã opũ árĩbure acudiarima. Jesu irire masigu dipaturi yujugu ta utãgũgue waha wami.

*Jesu deco weca curiñumi*

*Mt 14.22-27; Mr 6.45-52*

<sup>16</sup> Ñamicague gua ñgu buherã dihta ditarugue buhabũ. <sup>17</sup> Eroguere buhaja dohodirugue ñaja, Capernaum waĩcũri macague taribujabũ. Gua eropa taribujacũ ñamigue árĩbũ. Eropigu Jesu gua pohroque arinibirimi dohpa. <sup>18</sup> Miruñe turaro aricũ gua taribujariyaguere pãgũri wahgãbũ. <sup>19</sup> Cinco kilõmetros gohra gua taribujara pũhrũ Jesu gua pohroque árĩmi. Deco weca nigui wahgãricũ ñabũ gua ñgure. Eropã gua pohro ñgu aricũ ñarã gua gũibũ. <sup>20</sup> Gua gũicũ ñagu ñgu guare weremi:

—Ne yũre ñha ucabiricãque. Guñaturarã árĩque. Yũhu ta ãhraa, arĩmi Jesu.

<sup>21</sup> Ñgu eroparĩcũ peerã gua ñgure mucubiriri mera bocatĩri ñajadorebũ. Ñgu ñajara pũhrũgã gua wara yebaguere taribujabũ.

*Masapũ Jesure amañuma*

<sup>22-24</sup> Gajinũ masa ero dujanirãpũ gamenerenũgañorã daja Jesure corerã. Iri ñamire gua yaru mera gua dihta taribujacũ ñanirã árĩma erã. Jesu gua mera ñgu wabiricũ

sãre ïanirã áríma erã. Eropa gamenererã Jesure bocabiriñorã. Bocabiri ero pohro Tiberiague ariri gasi tuhajacũ ïañorã. Jesu Goãmure “Õhaa,” arĩ, masare ïgu bari guerediro pohroñarigue arĩyoro. Eropirã Jesu gũa sã maricũ ïarã, iri gasigue ñaja, Capernaumgue gũare nũrusia taribujajama. Jesure ahma nũrusiagãrã iima erã.

*Yũhũ ojocaririre ogu, bari iro dopa árĩgu ãhraa, arĩ wereñumi Jesu masare*

<sup>25</sup> Ditarure taribuja, gũa árĩroque eja, Jesure bocajanijarã erã serẽpima ïgure:

—Buhegu, ¿dohpáricũ ahrari mũhũ õguere? arĩ serẽpima erã ïgure.

<sup>26</sup> Erã eropa arĩ serẽpicũ, Jesu erãre weremi:

—Diaye arĩgu iiaa mũare. Deyoro moarire yũ iiquerẽcũ ta yũpũre umupeobeaa mũa. Yũre umupeobiriquererã ta yũre ahmaa mũa. Yũ mera pagari baña, mũa yapinirã árĩrã yũre amagãrirã iiaya daja. <sup>27</sup> Bari ne árĩniguibeaa. Pũhrũ pehrea wahaa iri. Eropirã irire eropa amaniguibiricãque. Gaji bari gajiropa árĩri baripũre amaque mũa. Iri barire amarã mũuri nũcũ Goãmũ mera árĩrãca. Eropiro iri bari tamera ne pehrebeaa. Iri barire yũhũ masũ Goãmũ ïgu obeodigu mũare ogura. Goãmũ yũ Pagũ yũre irire odoregu ãhrimi. ïgu obeodigu yũ árĩrere ïhmutuhami mũare, arĩmi Jesu.

<sup>28</sup> ïgu eroparĩcũ erã serẽpima ïgure:

—¿Goãmũ iidorerire iimorã dohpa iirãcuri gũa? arĩ serẽpima erã.

<sup>29</sup> —Ire Goãmũ mũare iidoremi: “Yũre ïgu obeodigũre umupeoque,” arĩ doremi Goãmũ, arĩmi Jesu.

<sup>30</sup> ïgu eroparĩcũ peerã erã õpa arĩma:

—Goãmũ ïgu obeodigu mũ árĩgu ïgu turari mera ii ïhmuque gũare mũre gũa õaro umupeoborore. ¿Ñehenore iibocuri mũhũ? <sup>31</sup> Mari ñecũ sũmarã mũrague iribojegue majarã masa mariroque mana waĩcũri dipurure bamũriñorã. Goãmũ yare erã gojaripũgue õpa arĩ wereyoro: “ïgu erãre mũmaro maja dijuri barire omũripũ erã baburire,” arĩ gojañuma Goãmũ yare erã gojarapũgue. ¿ïgu eropa iidiro dopa ta iigu iiri mũ sã? arĩma erã.

<sup>32</sup> Erã eroparĩcũ Jesu weremi erãre:

—Diaye mũare arĩgu iiaa. Moisepũ iri mũmaro maja barire mũa acawererãre obiriñumi. Yũ Pagũpũ mũmaro maja barire diaye maja barire mũare ogu ãhrimi.

<sup>33</sup> Goãmũ ïgu bari mũmaro dijari árĩpehreri yeba majarãre ojocaririre omasia, arĩmi Jesu.

<sup>34</sup> —Opũ, mũuri nũcũ iri barire oque gũare, arĩma erã.

<sup>35</sup> Erã eroparĩcũ peegu Jesu weremi erãre:

—Yũpũ ojocaririre ogu bari iro dopa árĩgu ãhraa. Mari ya barire barã matagã ta oaboa wahaa mari. Ihriri sãre mari ihrira pũhrũgã ta ñemesibua daja. Yũre gamegũpũ, yũre umupeogũpũ, ne oaboabigu ñemesibubigu iro dopa ïgu õaro árĩri ne pehresome ïgure. <sup>36</sup> Mũarũ yũre ïaquererã ta umupeonibeaa dohpa. Irire ta mũare wererabũ yũhũ. <sup>37</sup> Árĩpehrerã yũ Pagũ yarã árĩmorãre ïgu aĩnirãpũ yũre gamerãcoma. Eropigu yũre gamerãre ne cóãsome yũhũ. <sup>38</sup> Mũarogue arigu yũ gamero iigu arigu iibiribũ. Yũre obeodigu ïgu gamero dopa ta iigu aribũ. <sup>39</sup> Ita árĩbũ yũre obeodigu ïgu gameri gohra: Árĩpehrerã yaharã árĩmorã yũre ïgu onirãre yũ dedeobiricũ gahmemi. Yũre obeodigu pehrerinũ árĩcũ erãre yũ masucũ gahmemi.

<sup>40</sup> Árĩpehrerã yũre Goãmũ magure ïarã, yũre umupeorã mũuri nũcũ ïgu mera erã árĩcũ gahmemi yũ Pagũ. Eropigu pehrerinũ árĩcũ erãre masugũra, arĩmi Jesu.

<sup>41</sup> “Yũhũ mũarogue ariri bari iro dopa árĩgu ãhraa,” ïgu arĩcũ peerã judio masa gũa oparãpũ ïgu mera guarã, erã basi Jesure ñero arĩ wereniguima.

<sup>42</sup> —¿Ihĩ Jesu José magu árĩbeari? Īgu pagu, ĩgu pago sãre mari masia. ¿Eropa árĩqueregu ta duhpigu “Ūmarogue arĩbu,” arĩ wereniguiri ĩgu? arĩ guama erã.

<sup>43</sup> Erã eroparĩcũ peegu Jesu weremi erãre:

—Mua basi yũre ñero arĩ wereniguibiricãque. <sup>44</sup> Yu Pagu yũre obeodigupu masare yũre gamecũ iimi. Īgu eropiibiricũ masapu yaharã árĩmasibiriboñuma. Pehrerinũ árĩcũ yaharãre masugũca yũhu. <sup>45</sup> Goãmu ya weremuhtanirãpu òpa arĩ gojañuma: “Goãmu erãre buhegũcumi,” arĩ gojañuma. Árĩpehrerã yu Pagu ĩgu buherire peerã ĩgure yũhrirã yũre gahmema. Eropirã yaharã ãhrima.

<sup>46</sup> “Yu Pagure ne yujungu masu ĩabeami. Yũhu Goãmu ĩgu obeodigu dihta yu Pagure ĩabu. <sup>47</sup> Diaye arĩgu ĩaa mũare. Yũre umupeogu árĩpehrerinũri yu Pagu mera árĩniguigũcumi. <sup>48</sup> Yũpu ojocaririre ogu bari iro dopa árĩgu ãhraa. <sup>49</sup> Mua ñecu sũmarã mũrague masa marirogue manare bamũriñorã. Eropa irire baquererã ta sĩria wañorã. <sup>50</sup> Ūmarogue ariri baripũre masu bagu ne sĩrisome. <sup>51</sup> Yũhu ũmarogue ariri bari ojocaririre ori bari iro dopa árĩgu ãhraa. I barire bagu mũuri nũcu yu Pagu mera eropa árĩniguigũcumi. I bari ojocaririre ori bari iro dopa árĩri yu dũpu ta ãhraa. Árĩpehreri yeba majarã Goãmu mera eropa erã árĩniguiburire yu dũpũre ogura. Eropa ogu sĩrigũca, arĩmi Jesu.

<sup>52</sup> Īgu eroparĩcũ peerã judio masapu òpa arĩ wereniguima erã basi:

—¿Ihĩ dohpa ii ĩgu dũpũre baburi ogũcuri? arĩma erã erã basi.

<sup>53</sup> Erã eroparĩcũ peegu Jesu weremi:

—Diaye arĩgu ĩaa mũare. Yũhu Goãmu ĩgu obeodigu ãhraa. Yu dũpũre babigu, yu dire ihrĩbigu Goãmu mera árĩsome. <sup>54</sup> Yu dũpũre bagure, yu dire ihrĩgure, pehrerinũ árĩcũ masugura. <sup>55</sup> Yu dũpu diaye ta bari gohra iro dopa ãhraa. Yu di diaye ta ihriri gohra iro dopa ãhraa. <sup>56</sup> Yu dũpũre bagu yu dire ihrĩgu yu mera mucubiriri mera árĩniguigũcumi. Eropigu yũhu ĩgu mera mucubiriri mera árĩniguigũca. <sup>57</sup> Yu Pagu yũre obeodigu eropa árĩniguicãmi. Eropa árĩniguigu yu sãre eropa árĩniguicũ iimi. Eropirã yũre eropa árĩniguigũre masa barã, Goãmu mera ũmaroguere eropa árĩniguirãcoma erã sã. <sup>58</sup> Ita ãhraa ũmarogue ariri bari. Mari ñecu sũmarã mũra erã bara mũra iro dopa árĩbeaa i bari. Erãpu iri barire baquererã ta sĩria wañorã. I baripũre bagu ũmaroguere eropa árĩniguicãgũcumi, arĩmi Jesu.

<sup>59</sup> Capernaum judio masa gũa buheri wihi Jesu buhegu, eropa weremi.

*Jesu ĩgu buherire peerã ũmarogue eropa árĩniguirãca mari, arĩ gojañumi Ñu*

<sup>60</sup> Īgu eropa wereniguicũ peerã bajarã gũa watope árĩrã Jesure gamerã, ĩgure nũrusianirã òpa arĩ wereniguima:

—I buheri diasã ãhraa. Eropirã mari peediabiriñaria, arĩ wereniguima erã erã basi.

<sup>61</sup> Erã eroparĩcũ Jesupu erã wereniguirire masimi. Eropa masigu ĩgu erãre serẽpimi:

—¿I buherire peerã guari mũa? <sup>62</sup> ¿Yũhu masu Goãmu ĩgu obeodigu ũmarogue dujaa wacũ dohpa wabocuri mũa? <sup>63</sup> Masu ĩgu sĩporãre opagu ojocarimi. Īgu dũpũpu ĩgure ojocaricũ iibea. Masure ĩgure ĩgu sĩporã ojocaricũ iro dopa ta yu buheripu mũare Goãmu mera eropa árĩniguicũ ĩaa. <sup>64</sup> Gajirã mũa mera majarã ne yũre umupeobeama, arĩmi Jesu.

Negohraguere Jesu ĩgure umupeobiribonirãre masituhajapu. ĩgure ĩhaturirãre wiabu sãre mata masituhapu. Eropa masigu “Gajirã mũa mera majarã yũre umupeobeama,” arĩmi Jesu guare.

<sup>65</sup> Eropa arĩtuhaja òpa werenemomi:

—Òpa arĩ wererabu mũare. “Yu Pagupu masare yũre gamecũ iimi. Īgu eropa ĩbiricũ masapu yaharã árĩmasibiriboñuma,” mũare arĩrabu, arĩmi Jesu.

<sup>66</sup> Īḡu eropa arī buhecū peerā bajarā Jesure gamenirā mura ĩḡure cohā, ĩḡu mera dipaturi wabirima. <sup>67</sup> Erā eropa iicū ĩaḡu Jesu ḡuare doce ĩḡu buherāre serēpimi:

—¿Mua sā yure cóacārācuri? arī serēpimi ḡuare.

<sup>68</sup> Īḡu eroparīcū Simo Pedro yuhrimi ĩḡure:

—Opu, ḡuare gajigū buheḡu marimi. Mu buherire peerā Goāmū mera eropa arīniguirāca ḡua. Mu buheri dihta irire werea ḡuare. <sup>69</sup> Eropirā ḡua mure umupeoa. Eropa muhū ōaḡu, Goāmū maḡu ĩḡu obeodigū mu arīcū ḡua masia. Eropirā mure cóāsoma ḡua, arīmi Simo Pedro Jesure.

<sup>70</sup> Īḡu eroparīcū peegū Jesu weremi ḡuare:

—Yupu mure doce majarāre beyebu. Yujugū mua mera majagū watī yagū árību āhrimi, arīmi ḡuare ĩḡu buherāre.

<sup>71</sup> Eropa arīḡu Judare Simo Iscariote maḡure arīḡu iimi. Judapu doce ḡua mera majagū Jesure ĩhaturirāre wiabu arīmi.

## 7

### *Jesu pagu porā ĩḡure peediabiriñuma*

<sup>1</sup> Puhru ḡua mera Jesu Galilea yeba curigū wami. Judea yeba majarā judio masa ĩḡure wejēdiañorā. Erā eropa wejēdiacū masigū ĩḡu iri yebare wabirimi. <sup>2</sup> Judio masa muta wirigā ḡua iiburinū bosenu merogā duhyabu. <sup>3</sup> Eropirā Jesu pagu porā ĩḡure werema:

—Judeague bosenure ĩaḡu waque. Ero mu yarāre deyoro moarire ii ĩhmuḡu waque muhū. <sup>4</sup> Masare deyoro moarire ii ĩhmudiagū mure dibubiricāro gahmea. Deyoro moarire iigū árīḡu árīpehrerā erā ĩhuro iique, arīma erā.

<sup>5</sup> Īḡu pagu porā arīquererā ta Jesure “Goāmū maḡu āhrimi,” arībirima. Eropirā eropa arīma erā ĩḡure. <sup>6</sup> Erā eropa arīra puhru Jesu weremi erāre:

—Masa yure erā ōaro masiburisubu duhyania dohpa. Mupu bosenure ĩadiarā waque. <sup>7</sup> Ero majarā mure ĩhaturibeama. Yupure erā ñeri iirare yu werēcū yure ĩhaturima. <sup>8</sup> Mua seyaro bosenu arīcū waque. Yupure yu waburisubu duhyania dohpa. Eropigū yupu bosenure ĩaḡu wanibea dohpa, arīmi Jesu erāre.

<sup>9</sup> Eropa arīḡu ĩḡu Galilea dujami.

### *Muta wirigā erā iirinuri bosenu arīcū wañumi Jesu Jerusaléngue*

<sup>10</sup> Bosenuḡue Jesu ĩḡu pagu porā erā wara puhru Jesu sā ḡua mera erā puhru wami. Eropa wagū masa erā ĩabiririsubu wami. <sup>11</sup> Bosenu arīrā judio masa ḡua oparā ĩḡure amañorā:

—¿Nohogue arīcuri ĩḡu? arī serēpiñorā.

<sup>12</sup> Eropirā masa bajarā Jesure werewuñorā. Gajirā, “Īḡu ōaḡu āhrimi,” arīñorā. Gajirāpu, “Īḡu ñegū āhrimi. Masare ḡuyagū āhrimi,” arī werewuñorā.

<sup>13</sup> Eropa arīquererā judio masa ḡua oparāre ḡuirā, masa erā ĩabirogue Jesure werewuñorā.

<sup>14</sup> ḡua erogue ejara puhru bosenu deco Jesu Goāmū wihigue ñajaja buhemi. <sup>15</sup> Īḡu eropa buhecū judio masa uca wa ōpa arīma:

—¿Ihī buherogue buhebigū arīquereḡu ta duhpigū ōaro masipehori ĩḡu? arīma erā ĩḡure.

<sup>16</sup> Erā eroparīcū Jesu weremi erāre:

—Yu buheri yaha wereniguri arībeaa. Yure obeodigū ya wereniguiripu āhraa i buheri. <sup>17</sup> Goāmū gamerire iidarā yu buherire “Goāmū wereniguri ta āhraa,” arī masirācoma. Yu buheri yaha wereniguri dihta arībircū sāre masirācoma. <sup>18</sup> Yujugū ĩḡu gamero ĩḡu masiri mera buheḡu árīḡu “Yu dihtare umupeoque,” arīḡu āhrimi



ĩgu. Yũre obeodigũpũre mũa umupeocũ gahmea yũpũ. Yũ eroparĩcũ peerã, “Diaye ta wereniguimi ĩgu. Ne gũyabeami,” arĩ masirãca mũa.

<sup>19</sup> “Goãmũ dorerire Moise mũrũpũ apimũriñumi mũare. ĩgu eropa apiquerẽcũ ta mũa árĩpehrerã iri dorerire ne yũhribeaa. ¿Duhpirã yũre wejẽdiari mũa? arĩmi Jesu judio masare.

<sup>20</sup> —Mũ goroweregũ ãhraa. Mũre wejẽdiarã marima, arĩ yũhrima erã Jesure. Erã eroparĩcũ Jesu yũhrimi:

<sup>21</sup> —Yũhũ soorinũ yujusubu Goãmũ ĩgu turari mera dorecũgũre ĩgu dorere yũ cóãcũ mũa ĩha uca wabũ. <sup>22</sup> Mari ñecũ sũmarã iribojegue majarãpũ erã dũpũre merogã gasirogãre wiri aĩrã erã árĩdiro dopa ta Moise wiridoreñumi. ĩgu eropa dorecũ majirãgãre ocho nũri erã masa dehyoara pũhrũ soorinũ árĩquerẽcũ ta erã dũpũre merogã erã gasirogãre wiri aĩmũria mũa. <sup>23</sup> Mari soorinũ árĩcũ majirãgãre erã dũpũre merogã gasirogãre wihria mũa Moise doreri iimorã. ¿Mũa sã soorinũ irire iiquererã ta irinũ dorecũgũre yũ taucũ duhpirã yũ mera guari mũa? <sup>24</sup> Yũ iirare mũa õaro masibiriboro core, yũre ñero pepibiricãque. Mũa õaro masira pũhrũ yũre mũa ñero pepicũ diaye ta árĩroca, arĩmi Jesu.

### *Jesu negohraguere ĩgu aridirore wereñumi*

<sup>25</sup> ĩgu eropa arĩ werera pũhrũ bajamerãgã Jerusalén majarã õpa arĩ wereniñorã: —¿Ihĩ mari oparã erã wejẽdiagũ árĩbeari? <sup>26</sup> Eropigũ ĩgũre erã wejẽdiaquerẽcũ ta árĩpehrerã masare buhegu iimi ĩgu. Eropirã ĩgũre wejẽdianirã árĩquererã ta eropa ĩacãma. Eropa ĩacãrã ĩgũre “Ĩgu diaye ta Cristo Goãmũ ĩgu obeodigũ ãhrimi,” ¿arĩ pepibocuri oparãpũ? Maripũ masia. Cristo árĩbiribocumi. <sup>27</sup> Ihĩ Jesu ĩgu aridirore gũa masia. Cristopũ ĩgu árĩcũ ĩgu aridirore masiya mara. Eropigũ Cristo gohra árĩbeami Jesu, arĩ werewũañorã erã Jerusalén majarã.

<sup>28</sup> Erã eropa arĩrãre masigũ, Jesu õpa turaro bũsũro werenigui buhemi Goãmũ wihi:

—Yũre õpa arĩ pepia mũa: “Ĩgũre masia gũa. Eropirã ĩgu aridiro sãre masia,” arĩ pepiraa mũa yũre. Mũa eropa arĩ pepiquererã ta yũ gamero aribirabũ. Yũre obeodigũ gohrare masibea mũa. Yũre obeodigũ diaye árĩgũ, diaye iigũ ãhrimi. <sup>29</sup> ĩgu ta yũre obeomi. Eropigũ ĩgu pohrogue aribũ. Eropigũ yũhũ ĩgũre masia, arĩmi Jesu judio masare.

<sup>30</sup> ĩgu eroparĩcũ peerã ĩgũre ñeadiarima. Erã eropa ñeadiaquerẽcũ ta Jesu ĩgu ñero tariburisubu árĩbiriyo dohpa. Eropirã erã ĩgũre ñeamasibirima. <sup>31</sup> Gajirã masapũ bajarã ĩgũre umupeoma. Õpa arĩma:

—“Cristo bajasuburi Goãmũ turari mera deyoro moarire ii ĩhmugũcumi,” erã arĩ werediro dopa ta ihĩ Jesupũ bajasuburi Goãmũ turari mera ii ĩhmumi. Árĩpehrerã gajirã tauro Goãmũ turari mera ii ĩhmumi ĩgu. Eropigũ Cristo Goãmũ ĩgu obeodigũ ta ãhrimi Jesu, arĩma Jesure ne umupeonũgarãpũ.

### *Fariseo masa Jesure peresu iidoreñuma*

<sup>32</sup> Masa Jesure eropa arĩ wereniguicũ peerã pahia oparã, fariseo masa mera Jesure ñeadorerã obeoriñorã surarare.

<sup>33</sup> Eropigũ Jesu masare õpa arĩmi:

—Bajamenũrigã mũa mera árĩnigũca. Eropigũ pũhrũñarigã yũre obeodigũ pohro wagũca. <sup>34</sup> Yũ árĩborore mũa wamasibea. Eropirã yũre amaquererã ta ne bocasome mũa, arĩmi Jesu masare.

<sup>35</sup> ĩgu eroparĩcũ peerã erã judio masa õpa arĩ wereniguĩñorã:

—¿Ihĩ eropa arĩgũ nohogue wagũcuri mũa pepicũ? ¿Griego masa pohrogue judio masa wasirinirã pohrogue erã árĩri macarigue Griego masaguere buhegu wabocuri ihĩ? <sup>36</sup> “Yũ árĩborore mũa wamasibea. Eropirã mũa yũre amaquererã ta ne



bocasome,” ĩġu arĳu  dohpa arĳnorenore ĩġu eropa arĳri? arĳ werenigui nor  judio masa er  basi.

### *Ojocaric  iiriyarire were numi Jesu*

<sup>37</sup> Bosen  ojogorocurinu irinu gahyadjarinu gohra  r ro iibu. Irinu Jesu ero nigui, turaro mera weremi masare:

—Nemesibur  decore turaro gamero dopa  r r   m ri n c  Go m  mera turaro  r diar  yure ser que. M a eropa ser c  ĩġu yar   r doregura m are. <sup>38</sup> Yure umupeor re  pa arĳ goja numa Go m  yare er  gojarap gue: “Er  s por rĳguere ojocaric  iiri deco eropa  r nĳguic roca,” arĳ goja numa, arĳ turaro weremi Jesu masare.

<sup>39</sup> “Er  s por rĳguere ojocaric  iiri deco eropa  r nĳguic roca,” arĳu “Yure umupeor  Esp ritu Santore opar coma” arĳu iimi Jesu. ĩġu  marogue ĩġu m rianibiric  dohpa Esp ritu Santop  arinibirimi dohpa er re.

### *Judio masa d ca wari numa pe curu*

<sup>40</sup> Jesu ĩġu eropar c  peer , masa bajar   pa arĳ werenigui ma:

—Ih  diaye ta Go m  yare werem htagu mari coredĳu ta  hrimi, arĳ werenigui ma.

<sup>41</sup>  pa ar ma gajir  s :

—Ih  Cristo marire taubu  hrimi, ar ma.

Gajir p   pa ar ma:

—Cristo  rĳu Galilea majagu  r some ĩġu. Ih  Jesup  ero majagu ta  hrimi.

<sup>42</sup> Cristo Davi m ru p rami gajisub  majagu arĳu  r bocumi. Eropĳu Davi ya maca m raro Bel n wa c ri maca masa dehyoag cumi Cristop . Eropa ta arĳ werea Go m  yare er  gojarap . Ih  Jesup  Bel n macague masa dehyoabirip . Eropĳu ĩġu Go m  ĩġu obeodĳu Cristo gohra  r beami, ar rima er .

<sup>43</sup> Eropir  Jesure peenir  gajir  umupeo gajir p  umupeobir   r nĳjar  game d ca warima pe curu. <sup>44</sup> Eropir  bajamer g  Jesure  eadiarima. Eropa  eadiaquerer  ta ĩġure  eabirima.

### *Judio masa opar  Jesure ne umupeobiri numa*

<sup>45</sup> Eropir  surara pahia opar  pohrogue fariseo pohrogue dujaa wa nor  daja. Er  dujjac   ar  er  surarare ser pi nor :

— Duhpir  Jesure  eag ribirari m a? ar  nor .

<sup>46</sup> —ĩġu  tariaro werenigui u  hrami. Gajir  ĩġu iro dopa wereniguir  ne marima, arĳ y hri nor  surara er re.

<sup>47</sup> Er  eropar c  fariseo masap   pa arĳ were nor :

— M are ĩġu g yac , “Diaye ta arĳu iimi,” ar ri m a s ? <sup>48</sup> Mari opar  Jesure ne umupeobeama. G a s  eropir  ĩġure umupeobeaa. <sup>49</sup> O  masa Go m  dorerire Moisere ĩġu apirare masibeama. Eropa masibir   r r  Jesure umupeoma. Er  eropa umupeori dipuwaja mari Pagu Go m  er re dipuwaja moag cumi, ar  nor  fariseo masa.

<sup>50</sup> Nicodemo fariseo masu Jesure weretamugu ejadĳu ero  r p  er  mera. Er  eropar c  peegu  pa ar p  ĩġu er re:

<sup>51</sup> —Jesu ĩġu  ero iirare masibeaa mari. Eropa masibir  ĩġu marire wereboru core ĩġure dipuwaja moamasibeaa mari. Eropa masibir querer  ta ĩġure dipuwaja moar , mari ya dorerire tarin gar  iiaa mari, ar p  Nicodemo er re.

<sup>52</sup> ĩġu eropar c  peer   pa arĳ y hri nor  er :

— M  s  ĩġu iro dopa ta Galilea majagu ta  hriri? Go m  ya er  gojarap re buhepehoque. Eropa buhegu, “Go m  yare werem htagu ne yujugu Galilea majagu marimi,” arĳ masĳuca m h , arĳ y hri nor  er  Nicodemore.

<sup>53</sup> Er  eropa ar ra p hr  er  ya wirigue dujaa wa nor .

## 8

*Ɛm̄m̄ mera ñero iidigore judio masa oparã dipuwaja moadiariñuma*

<sup>1</sup> Jesup̄m̄ ĩḡm̄ seyaro utãḡuḡue Olivo waĩc̄udiḡuḡue waha wami. <sup>2</sup> Gajin̄m̄ Goãm̄m̄ ya wihigue ḡm̄a wab̄m̄ daja. Jesu ejac̄ũ ĩarã masa bajarã ĩḡm̄ pohro gamenerema. Erã gamenerec̄ũ ĩḡm̄p̄m̄ doanijaḡm̄ erãre buhenugap̄m̄. <sup>3</sup> ĩḡm̄ eropa buhero watope judio masa buherã, fariseo masa mera iri wihigue nomeore aĩ ñajajama. Igo marap̄c̄uquerego gajiḡm̄ mera igo ñero iic̄ũ bocañañorã erã igore. Eropã bocañarã igore Goãm̄m̄ wihigue aĩ ñajama erã igore dipuwaja moadorerã. Aĩ ñajatuha árĩpehrerã ḡm̄a ĩaro igore duhu nuguma. <sup>4</sup> Duhunugu õpa arĩma Jesure.

—Buheḡm̄, igo marap̄c̄uogo árĩquerego gajiḡm̄ mera ñero iigo iic̄ũ bocañab̄m̄. <sup>5</sup> Moise dorerire õpa ãhraa: “Ɛm̄m̄ mera ñero iidigore utã mera dea wejẽcãque,” arĩyoro Goãm̄m̄ doreri. ¿M̄uca dohpa arĩ pepiri ire? arĩ serẽpima erã Jesure.

<sup>6</sup> Jesu ĩḡm̄ ñero wereniguic̄ũ peediarã iirima erã ĩḡm̄re weresãmorã. Erã eropa serẽp̄iquerẽc̄ũ ta Jesup̄m̄ muhm̄siu dija, yebague ĩḡm̄ mujusĩru mera gojami. <sup>7</sup> Eropiḡm̄ erã eropa serẽpiniguic̄ũ peeḡm̄ Jesup̄m̄ wahgã doaja, erãre weremi:

—M̄ua mera majaḡm̄ ñero iibiḡm̄ árĩḡm̄ igore utã mera deanugaporo, arĩmi Jesu.

<sup>8</sup> Eropã arĩtuha dipaturi muhr̄siu dija, yebague gojami daja. <sup>9</sup> Irire peerã igore aĩ ñajarinirãp̄m̄ erã ñeri iirare guñarã, erã tĩrãp̄m̄ wiria wamũhtama. Erã p̄h̄r̄m̄ erã mera majarã sã wiriap̄ehrea wama. Eropigo nomeo dihta Jesu pohro dujanugamo. <sup>10</sup> Eropiḡm̄ Jesu wahgã doaja, igore serẽpimi.

—¿Nohogue ãhr̄iri erã? ¿M̄ure dipuwaja moadianirã mariri dohpagure? arĩmi igore.

<sup>11</sup> —Marima, op̄m̄, arĩ yũhr̄imo igo.

—Yũ sã dipuwaja moabeaa m̄ure. Waque. Eropigo ñerire iinemobiricãque, arĩmi Jesu igore.

*Jesu i yeba majarãre boyoro iro dopa Goãm̄m̄re masic̄ũ iimi, arĩ gojañumi Ñu*

<sup>12</sup> Dipaturi Jesu iri wihigue árĩrãre weremi:

—Boyoro iro dopa yũh̄m̄ i yeba majarãre Goãm̄m̄re masic̄ũ iiaa. Yũre umupeoḡm̄ Goãm̄m̄ mera eropa árĩniguicãḡm̄cum̄i. Eropiḡm̄ ĩḡm̄ boyorogue árĩḡm̄ dopa ta õarire guñaḡm̄cum̄i. Eropiḡm̄ ĩḡm̄ ñerire guñadiabeami, arĩ weremi Jesu.

<sup>13</sup> ĩḡm̄ eroparĩc̄ũ peerã fariseo masap̄m̄ õpa arĩma.

—M̄uh̄m̄ m̄u basi m̄u árĩric̄urire eropa arĩ wereniguimaacãḡm̄ iiaa. M̄u õpa arĩ werenigui ne waja mara, arĩma erã Jesure.

<sup>14</sup> Erã eroparĩc̄ũ Jesu yũhr̄imi:

—Yũh̄m̄, yũ aridirore masia. Yũ waboro sãre masia. M̄uap̄m̄ ne irire masibea. Eropiḡm̄ yũ basi yũ árĩric̄urire werequereḡm̄ iri yũ werera diaye ta ãhraa. <sup>15</sup> M̄ua sihajaro m̄ua sã ĩara dihtare masia m̄ua. Eropirã m̄ua yũre werewũaa. Yũh̄m̄ m̄ua iro dopa ta werewũabeaa. <sup>16</sup> Masa erã árĩric̄urire ĩaḡm̄ yũh̄m̄ yujuḡm̄ ta ĩhamasibea. Yũ tamera yũre obeodiḡm̄ mera masia. Eropiḡm̄ yũh̄m̄ masa erã árĩric̄urire diaye ta ĩha masia. <sup>17</sup> M̄uare doreri erã gojarapũ õpa arĩ werea: “Masa perã erã yujuro mera erã werec̄ũ erã wereri diaye ta ãhraa,” arĩ were gojañuma. <sup>18</sup> Yũre wereḡm̄ mera ḡm̄a perã ãhraa. Yũh̄m̄, yũ árĩric̄urire werea. Eropiḡm̄ yũ Paḡm̄ sã weremi yũre. ĩḡm̄ ta ãhr̄imi yũre obeodiḡm̄, arĩmi Jesu.

<sup>19</sup> —¿Nohogue ãhr̄iri m̄u Paḡm̄? arĩ serẽpima erã.

—Yũre m̄ua masibea. Yũ Paḡm̄ sãre masibea. Yũre masirã, yũ Paḡm̄ sãre masiboaya, arĩ yũhr̄imi Jesu erãre.

<sup>20</sup> Jesu erāre buhegu eropa arī wereniguimi Goām̄u wihigue erā niyeru apiri comoro pohro. Īgu ñero tariburisubu ejabiribū dohpa. Eropirā erā mera Īgu arīquerecū ta Īgure ñeabirima.

*Yū waboroguere m̄ap̄u wamasisome, arīñumi Jesu*

<sup>21</sup> Dipaturi masa mera gūa árīrisubu Jesu erāre weremi daja:

—Yū aridirogue wagūca. Yū wara pūhrū yure amarāca m̄ua. Yū waboroguere m̄ap̄u wamasisome. Eropirā m̄ua ñeri dipuwajacurā sīrirāca, arī weremi Jesu.

<sup>22</sup> “Yū waboroguere m̄ap̄u wamasisome,” Īgu arīcū peerā,

—¿Ihī Īgu basi wejē sīrigūcuri eropa arīgu? arīma judio masa erā basi.

<sup>23</sup> Erā basi erā eroparīcū Jesu weremi erāre:

—M̄ap̄u i yeba majarā āhraa. Yūp̄u ūmaro majagu āhraa. I yeba dehyoanirā āhraa m̄ap̄u. Ūmarogue aridigu āhraa yūp̄u. <sup>24</sup> M̄uare yū árīricūrire yū werecū “Diaye árībeaa,” m̄ua arīrā, m̄ua ñeri dipuwajacurā sīrirāca m̄ua. Eropigu “M̄ua ñeri dipuwajacurā sīrirāca,” arīrabū m̄uare, arīmi Jesu erāre.

<sup>25</sup> —¿Noano āhriri m̄uhū? arī serēpima erā.

—Neguere yū m̄uare arīdiro dopa ta āhraa yūhū. <sup>26</sup> M̄uare yū wereburi w̄uaro dūhyania. Eropiro m̄ua ñeri dipuwajare m̄uare yū wereboro w̄uaro dūhyaa dohpa. Eropigu yure obeodigūre yū peerare i yeba majarāre werea. Īgu werera diaye ta āhraa, arīmi Jesu erāre.

<sup>27</sup> “Yūre obeodigu,” Īgu arīcū peerā “Mari Pagū árīcumi,” arī pepibirima erā. <sup>28</sup> Erā eropa arī pepibiricū Īagu Jesu weremi erāre:

—Yūre masure Goām̄u Īgu obeodigūre m̄ua crusa mera pabia aī wahgū nugurāca. M̄ua eropa iirā, “Īgu Goām̄u Īgu obeodigu ta āhrimi,” arī masirāca yure. Eropirā yū gamero dopa ta iibigu yū árīrire masirāca. Eropirā yū Pagū Īgu yure Īgu buhera dihtare weregu yū árīcū sāre masirāca m̄ua. <sup>29</sup> Eropigu yure obeodigup̄u yū mera āhrimi. Īgu gamerire ūm̄uri n̄cū iiniguia. Eropigu Īgu yure ne cóabeami, arīmi Jesu.

<sup>30</sup> Īgu eroparīcū peerā masa bajarā Īgure umupeoma.

*Goām̄u porāre, ñerire iirā sāre wereñumi Jesu*

<sup>31</sup> Eropirā gajirā judio masa Jesure umupeoma. Eropigu Jesu erāre weremi:

—Yū dorerire iipehorā árīrā, diaye ta yū buherā āhraa m̄ua. <sup>32</sup> Eropirā diaye ta masirāca m̄ua. Diaye árīrire masirā, ñero iirire duhumasirāca. Eropirā pohro majarā wiunirā iro dopa árīrāca m̄ua, arīmi Jesu erāre.

<sup>33</sup> Īgu eroparīcū peerā erā ōpa arī yūhrima daja:

—Gūap̄u iribojegue majagu m̄urū Abrahā p̄aramerā árīturiarāgue āhraa. Eropirā ne gajirā pohro majarā árībeaa gūa. Eropigu “Pohro majarā wiunirā iro dopa árīrāca,” arīgu ¿dohpa arīgu eropa arīri m̄uhū? arī serēpima erā Jesure.

<sup>34</sup> Erā eroparīcū peegu Jesu ōpa arīmi erāre:

—Diaye m̄uare arīgu iiaa. Árīpehrerā ñerire iirāp̄u erā ñeri iirire duhumasibeama. Eropiro iri ñerip̄u erāre dorea. Eropa árīrā árīrā pohro majarā iro dopa āhrima erā.

<sup>35</sup> Pohro majagup̄u Īgu op̄u magū iro dopa árībeami. Doreri opabeami. Iri wihi majagu magup̄u ūm̄uri n̄cū diaye ta Īgu pagū doreri opami. <sup>36</sup> Yūhū Goām̄u magū āhraa. Eropigu Īgu doreri opaa. Eropirā m̄ua ñerire yū duhucū iinirā árīrā diaye ta ñerire duhunirā árīrāca m̄ua. <sup>37</sup> Abrahā m̄urū p̄aramerā árīturiarā m̄ua árīcū masia. Eropa árīquererā ta yū wererip̄ure peediabeaa m̄ua. Eropirā yure wejēdiaa m̄ua. <sup>38</sup> Yū Pagū Īgu yure masicū iirare werea m̄uare. Yū eropa werequerecū ta m̄ua pagū Īgu dorerip̄ure iiaa m̄ua s̄a, arīmi Jesu erāre.

<sup>39</sup> —Abrahā m̄urū iribojegue majagu gūa pagū m̄urū árīm̄urip̄u, arī yūhrima erā.

Erã eroparĩcũ Jesu yũhrimi:

—Abrahã mũrũ porã árĩrã ĩgũ iidiro dopa ta iiboaya mũa. <sup>40</sup> Goãmũ yũre diaye ĩgũ wererire mũare yũ werequerecũ ta yũre wejẽdiaa mũa. Abrahã mũrũrũ ne eropa iibiridi árĩmi. <sup>41</sup> Mũa pagũ ĩgũ iidiro dopa ta iiaa mũa, arĩmi Jesu erãre.

Ĩgũ eroparĩcũ erã yũhrima:

—Mojoto diribiridigo porã árĩbeaa gũa. Yujugũ ta ãhrimi gũa pagũ. ĩgũ ta ãhrimi Goãmũ, arĩma erã.

<sup>42</sup> Erã eroparĩcũ Jesu yũhrimi:

—Goãmũ mera majagũ árĩdigũ ta õguere aribũ yũhũ. Eropirã Goãmũ mũa Pagũ ĩgũ árĩcũ yũre mahiboaya mũa. Yũ gamero aribiribũ yũ tamera. Yũ Pũ Goãmũ ĩgũ obeocũ aribũ õguere. <sup>43</sup> ¿Duhpirã yũ wereniguirire peebeari mũa? Yũ wererire yujuro bojebeaa mũa. Eropirã peebeaa mũa. <sup>44</sup> Mũa pagũrũ watĩ ãhrimi. Eropirã watĩ ĩgũ gameripũre iidiaa mũa. I yeba negohraguere árĩnũgacũgue, dohpague sãre ĩgũ masare wejẽgũ ãhrimi. ĩgũre diaye maja ne mara. Eropigũ ĩgũ ne diaye majare wereniguibeami. ĩgũ negohraguere gũyanũgadigũ árĩmi. Eropigũ ĩgũ eropa gũyaniguigũ árĩgũ, gũyarire weremi. <sup>45</sup> Yũrũ diaye majare werea mũare. Eropa yũ werecũ peebeaa mũa. <sup>46</sup> “Mũhũ ñero iigũ ãhraa,” arĩmasibeaa mũa yũre. ¿Diaye mũare yũ werequerecũ ta duhpirã peebeari mũa? <sup>47</sup> Goãmũ porãrũ ĩgũ wereniguirire peema. ĩgũ porã árĩbirã ĩgũ wereniguirire peebeama, arĩmi Jesu erãre.

*Abrahã mũrũ ĩgũ árĩboro core Cristo árĩmũhtatuhãñumi*

<sup>48</sup> ĩgũ eroparĩcũ peerã judio masa ĩgũre õpa arĩma:

—“Mũhũ Samaria majagũ ãhraa. Eropigũ watĩ mera goroweregũ ãhraa mũhũ,” gũa arĩra diaye ta ãhraa, arĩma erã Jesure.

<sup>49</sup> Erã eroparĩcũ peegũ õpa arĩ yũhrimi Jesu:

—Goroweregũ árĩbeaa yũhũ. Yũ Pagũre umupeoa. Mũarũ yũre umupeobea. <sup>50</sup> Yũre masa erã umupeorire amabeaa yũhũ. Yũ Pagũrũ yũre umupeocũ gahmemi masare. ĩgũ tamera yũ árĩricũrũre õaro ĩha masigũ eropa ta umupeodoremĩ. Eropigũ yũ Pagũ erã yũre gamebiriri dipuwaja, dipuwaja moagũcumĩ. <sup>51</sup> Diaye mũare arĩgũ iiaa. Yũ dorerire iigũ mũmũri nũcũ Goãmũ mera eropa árĩnũguicãgũcumĩ, arĩmi Jesu.

<sup>52</sup> ĩgũ eroparĩcũ peerã õpa arĩma erã:

—Dohpague tamerare mũ watĩ mera goroweregũ árĩcũ gũa õaro masia. Abrahã mũrũ sĩria wañumi. Goãmũ yare weremũhtanirã sã sĩria wañuma iribojegue. Eropigũ “Yũ dorerire iigũ mũmũri nũcũ Goãmũ mera eropa árĩnũguicãgũcumĩ,” arĩgũ, ¿dohpa arĩgũ eropa arĩri mũhũ? <sup>53</sup> ¿Gũa ñecũ mũrũ tauro turari mũhũ? ĩgũ, Goãmũ ya weremũhtanirã sã sĩria wañuma iribojegue. ¿Mũrũ nihino ãhriri eropa arĩ wereniguigũ? Mũ eropa arĩro dopa árĩbeaa mũhũ, arĩma erã.

<sup>54</sup> Erã eroparĩcũ peegũ Jesu werenemomi:

—Yũhũ yũ basire umupeodererĩ duhpihuri árĩbeaa. Yũ Pagũrũ yũre umupeoderegũ ãhrimi ĩgũ. “Gũa Pagũ” mũa arĩgũrũ yũ Pagũ ta ãhrimi. <sup>55</sup> Mũarũ yũ Pagũre ne masibeaa. Yũhũ ĩgũre masia. “Ĩgũre masibeaa,” arĩgũ mũa iro dopa ta gũyaricũgũ árĩboaya yũhũ. Diaye ta ĩgũre masia. Eropigũ ĩgũ dorerire iiaa. <sup>56</sup> I yebaguere yũ árĩboro coregue mari ñecũ mũrũ Abrahã mũrũ masimũhtatuhãmũriñumi yũre. Eropa masigũ ĩgũ mucubirimũriñumi, arĩmi Jesu.

<sup>57</sup> ĩgũ eroparĩcũ erã yũhrima:

—Abrahã mũrũ iribojegue majagũ ãhrimi. Mũrũ cincuenta bojori opanibeaa. ¿Eropigũ mũhũ ĩgũ mũrũre duhpigũ ĩha masiboyuri? arĩma judio masa ĩgũre.

<sup>58</sup> —Diaye mũare arĩgũ iiaa. Abrahã ĩgũ árĩboro core yũrũ árĩmũhtatuhãbũ, arĩmi Jesu erãre.

<sup>59</sup> Īḡu eroparīcū peerā erā utāyerire aī ĩḡure deadiarima. Erā eropa deadiaquerecū ta Jesupu Goāmū wihigue árīdigū duhri wiria wami.

## 9

### *Cuiri ĩhajabigūre ōaro ĩagū wacū iĩnūmi Jesu*

<sup>1</sup> Jesu gūa ĩḡu buherā mera mague tariarā gajigūre cuiri ĩhajabigūre bocajabu. Īḡu ne masa dehyoagūgue ta cuiri ĩhajabigū árīpu. <sup>2</sup> Gūa sā ĩḡure ĩarā serēpibu Jesure.

—Buheḡu, ¿ihī duhpigū cuiri ĩhajabigū masa dehyoayuri? ¿Ñerire iimūriyuri eropa wagu? ¿O ĩḡu pagū sumarā erā ñero iira dipuwaja eropa wayuri ĩḡu? arī serēpibu gūa Jesure.

<sup>3</sup> Gūa eroparīcū peegu ōpa arī yūhrimi:

—Ihī ĩḡu pagū sumarā sā erā ñerire iira sā ĩḡure cuiri ĩhajabiricū iibeaa. Goāmūpu ĩḡure cuiri ĩhajabiricū iimi. ĩḡure ĩacū iibu masare ĩḡu turarire ii ĩhmuburire apimi Goāmū. <sup>4</sup> Yūre obeodigū ĩḡu apirare yūre iiro gahmea dohpaguere. Ñamiguere mari mohmemasibiro dopa ta pūhrūgue yūre obeodigū ĩḡu apirare iimasibea yūhu. <sup>5</sup> I yebaguere i yeba majarāre Goāmūre masicū iiaa, arīmi Jesu.

<sup>6</sup> Eropa arītuha yebague disico ehomēpimi. ĩḡu disico ehomēpirare nicu mera mohmore nijagū, cuiri ĩhajabigūre ĩḡu cuirire sūmi. <sup>7</sup> Eropa sūḡu ōpa arīmi Jesu:

—Siloé waīcūri gobegue mū cuirire coegū waque, arīmi Jesu. Siloé ero majarā ya mera arīrā obeora gobe arīrā iima.

Jesu ĩḡu cuiri coedoredigūpu waha, coetuhaja, cuiri ĩagūgue dujajapu ĩḡu ya wihigue. <sup>8</sup> ĩḡu dujajacū ero majarā ĩḡure ĩañorā. Ero core niyeru serēdigū ĩḡu árīcū ĩanirā ĩḡure ōpa arīñorā erā basi:

—¿Ihī sohō árīdigū niyeru serēdoadigū árībeari? arīñorā erā.

<sup>9</sup> —Īḡu ta āhrimi, arīñorā gajirā.

—Īḡu árībeami. Eropa árībiriquereḡu ta ĩḡu iro dopa ta bejagu āhrimi, arīñorā gajirā.

Erā eroparīcū peegu cuiri ĩhajabiridigūpu ōpa arīpu:

—Īḡu ta āhraa yūhu, arīpu erāre.

<sup>10</sup> ĩḡu eroparīcū masa ĩḡure serēpiñorā:

—¿Cuiri ĩhajabiridigū árīdigū dohpa ii ĩhari mūhu? arī serēpiñorā erā ĩḡure.

<sup>11</sup> —Jesu waīcūgu disicore nicu mera mohmore yū cuirire sūami. Yūre sūtuhaja “Siloé waīcūri gobegue mū cuirire coegū waque,” arāmi yūre. ĩḡu eroparīcū coegū ejabu yūhu. Eropa yū coera pūhrū yū cuirī ōaro dehyoabu yūre, arī werepu ĩḡu masare.

<sup>12</sup> —¿Mūre eropa iidigū nohogue árīcūri ĩḡu? arīñorā erā.

—Ūba. Noho árīḡu árīcumī, arīpu ĩḡu

### *Cuiri ĩhajabiridigūre fariseo masa serēpiñuma*

<sup>13</sup> Eropa arī wereniguituha erā cuiri ĩhajabiridigūre fariseo masa pohroque aī ejañorā. <sup>14</sup> Irinū Jesu dihta nicure mohmore cuiri ĩhajabigūre ōagu iiranū Sabadonū árību. Irinū gūa soorinū árību. <sup>15</sup> Eropirā fariseo masapu ĩḡure serēpiñorā daja.

—¿Dohpa ii ĩhari mūhu? arī serēpiñorā erā.

—Nicu mera yū cuirire sūami. Eropigū yū cuirire coera pūhrū ĩhaa yūhu, arī werepu ĩḡu erāre.

<sup>16</sup> —Īḡu mari soorinū mari mohmedorebiririnūre mohmeami. Eropigū ĩḡu Goāmū yagu árībeami, arīñorā gajirā fariseo masa.

Gajirāpu ōpa arīñorā:



—Ñerire iigu árĩgu òpa ìre òagu wacũ iimasibeami. Eropigu ìgu òagu árĩbocumi, arĩnorã gajirà Jesure.

Eropirã erã, erã basi pe curu dũca wariñorã. <sup>17</sup> Eropirã dipaturi erã cuiri ìhajabiridigure serẽpinemoñorã daja.

—¿Mũre mũ cuirire òaro iidigure dohpa arĩ pepiri mũhũ Jesure? arĩnorã erã ìgure.

—Ìgu diaye ta Goãmũ yare weremũhtagũ ãhrimi, arĩpũ cuiri ìhajabiridigurepũ.

<sup>18</sup> Negohraguere judio masa òpa arĩ pepiriñorã. “Ìhĩ cuiri ìhajabiridigu árĩbeami,” arĩ pepiriñorã. Eropa arĩ pepirã cuiri ìhajabigu pagũ sũmarãre sihubeoñorã erã.

<sup>19</sup> Sihubeo ìgu pagũ sũmarãre serẽpiñorã fariseo masa oparã.

—¿Ìhĩ diaye ta mũ magũ ãhriri? ¿Mata ìgu cuiri ìhajabigu masa dehyoari? ¿Diaye ta cuiri ìhajabiridigu árĩqueregu dohpa ii ìhari dohpague? arĩ serẽpiñorã erã ìgu pagũ sũmarãre.

<sup>20</sup> —Ìhĩ gũa magũ ta ãhrimi. Eropigu mata cuiri ìhajabigu masa dehyoami ìgu.

<sup>21</sup> Irire masiquererã ta ìgu ìarare, ìgure ìacũ iidigu sãre masibea gũa. Gũa magũre serẽpique. Bũgu ãhrimi ìgu. Ìgu basi weremasimi ìgu, arĩnorã ìgu pagũ sũmarã.

<sup>22</sup> Judio masa oparã ero coreguere òpa arĩtuhañorã:

—“Jesu ta Cristo mari taubu ãhrimi,” arĩrãre mari buheri wirigue ñajadoresome gũa, arĩmũriñorã judio masa gũa oparã.

Erã eroparĩcũ peenirã cuiri ìhajabigu pagũ sũmarãpũ judio masa oparãre gũi arĩnorã. <sup>23</sup> Eropa gũirã “Bũgu ãhrimi ìgu. Ìgure ta serẽpique,” arĩnorã erã judio masa oparãre.

<sup>24</sup> Pũhrũ judio masa oparã dipaturi cuiri ìhajabiridigure sihubeoñorã. Sihubeo òpa arĩnorã ìgure:

—Goãmũ mera diaye wereque mũhũ. Jesure ìgu ñeri iigu ìgu árĩcũ gũa masia. Eropigu diaye wereque gũare, arĩnorã judio masa cuiri ìhajabiridigure.

<sup>25</sup> Erã eroparĩcũ peegu òpa arĩ yũhripũ ìgu:

—Jesure ìgu ñeri iigu ìgu árĩcũ masibirica yũhũ. Yujuñe ta masia yũhũ. Iribojeguere cuiri ìhajabigu arĩmũribũ yũhũ. Dohpaguepũre ìhaa yũhũ. Iri dihtare masia yũhũ, arĩ yũhripũ cuiri ìhajabiridigurepũ erãre.

<sup>26</sup> —¿Dohpa iiari ìgu mũre? Mũ cuirire ìhajadoregu dohpa iiari ìgu mũre? arĩ serẽpiñorã erã daja.

<sup>27</sup> —Irire ta mũare weretuharabũgu yũhũ. Yũ eropa arĩ werequerecũ ta mũa ne peediabeaa yũre. ¿Dohpa iidiarã yũ dipaturi werecũ peediarĩ mũa? ¿Mũa sã ìgu buherã arĩdiari? arĩpũ ìgu erãre.

<sup>28</sup> Ìgu eroparĩcũ peerã erã ìgure turiñorã.

—Mũhũ Jesu buhegu ãhraa. Gũapũ Moise buherã ãhraa. <sup>29</sup> Diaye ta Goãmũ Moisere wereniguimũriñumi. Jesure obeodigure gũa masibea, arĩnorã erã cuiri ìhajabiridigure.

<sup>30</sup> Erã eroparĩcũ yũhripũ ìgu:

—¿Ìgure obeodigure mũa masibiricã, yũre ìacũ iidigu árĩgu Goãmũ ìgu obeodigu árĩbiribocuri ìgu? <sup>31</sup> Goãmũ ñeri iigure ìgu serẽrire peebeamĩ. Iri tamerare mari masia. Ñerire iigure peebiriqueregu ta Goãmũre umupeogure, ìgu dorerire iigure ìgu serẽrire peemi Goãmũ. <sup>32</sup> Negohraguere i yeba árĩnũgacũguere, mata masa dehyoague ta cuiri ìhajabigure ne yujugũpũre ìhajacũ iigu marimũripũ. <sup>33</sup> Eropigu Jesu Goãmũ ìgu obeodigu árĩbigũ yũre ìacũ iibiriboñumi, arĩpũ ìgu erãre.

<sup>34</sup> Erãpũ òpa arĩ yũhriñorã:

—Mũhũ mata ñegu arĩmũriya. ¿Eropa árĩqueregu ta gũare buheri mũhũ? arĩnorã judio masa oparã.

Eropa arĩtuha erã ìgure cohã wiuñorã.

*Jesu yare gamebirã cuiri ñhajabirã iro dopa ãhrima, arĩ wereñumi Jesu*

<sup>35</sup> Eropigũ cuiri ñhajabigũre erã cohã wiurare Jesu peemi. Eropa peegũ cuiri ñhajabiridigũre gũa bocajacũ, ñgũre serẽpimi.

—¿Masũre Goãmũ ñgũ obeodigũre umupeori mũhũ? arĩmi Jesu.

<sup>36</sup> —Opũ, ¿noa ãhriri ñgũ? ñgũre masigũ umupeogũra, arĩmi cuiri ñhajabiridigũpũ Jesure.

<sup>37</sup> —Ñgũre ñhatuhabũ mũhũ. Dohpaguere mũ mera wereniguigũ ñgũ ta ãhraa yũhũ, arĩmi Jesu cuiri ñhajabiridigũre.

<sup>38</sup> —Opũ, mũre umupeoa yũhũ, arĩmi cuiri ñhajabiridigũpũ.

Eropa arĩgũ ñgũ Jesu pohro mereja ñgũre umupeomi.

<sup>39</sup> ñgũ eropa umupeocũ ñagũ õpa arĩmi Jesu masare:

—Õarã, ñerã sã erã iirare masicũ iibu aribũ yũhũ. Cuiiri ñhajabirã erã ñabiro dopa ta yũ Pagũre masibirã ãhrima. Eropa masibirãre yũ Pagũre masicũ iigũ aribũ yũhũ. “Gũa õaro masia,” arĩ pepinirã sãre õaro erã masibirirare masicũ iigũ aribũ yũhũ, arĩmi Jesu.

<sup>40</sup> ñgũ eroparĩcũ peerã bajamerãgã fariseo masa ñgũre õpa arĩma:

—“Cuiiri ñhajabirã erã ñhamasibiro dopa ta masibea mũa sã,” ¿arĩri mũhũ gũare? arĩma fariseo masa Jesure.

<sup>41</sup> Erã eroparĩcũ Jesu õpa arĩmi:

—“Cuiiri ñhajabirã erã ñha masibiro dopa ta diaye õaro masibea gũa,” mũa arĩcũ dipuwaja mariboya. “Gũa õaro masirã ãhraa,” mũa arĩrã ãhraa. Eropirã yũre peediabirira dipuwaja mũare dipuwaja ãhraa dohpaguere, arĩmi Jesu erãre.

## 10

*Oveja ñhadibugũ queoriñere wereñumi Jesu*

<sup>1</sup> Pũhrũ queoriñe mera werenigui queogũ buhebu õpa arĩmi Jesu gũare gajirã masa sãre:

—Diaye arĩgũ iiaa mũare. Oveja diburi sãriro disiporo ñajabigũpũ gajipũgue ñajagũpũ yajari masũ ãhrimi. <sup>2</sup> Disiporo ñajagũpũ ovejare ñhadibugũ ãhrimi.

<sup>3</sup> Disiporo coregũ disiporo pãgũmi ovejare ñhadibugũ ñgũ ñajariborore. Ovejare ñhadibugũ eracũ ñgũ wereniguirire peerã ãhrima ñgũ oveja. Erãre sihugũ, erã waĩ mera sihubeomi ñgũ. Eropigũ erãre sãrirogue árĩrãre sihu wiuniguimi disiporogue.

<sup>4</sup> ñgũ yarãre árĩpehrerãre sihu wiu erãre mũhtanũgajami. Ovejapũ ñgũ wereniguirire masirã, ñgũre nũrusiama. <sup>5</sup> Gajigũre erã masibigũre nũrusiabeama erã. Eropirã gajirã erã wereniguirire peerã, gũi omagã wahama, arĩmi Jesu masare.

<sup>6</sup> Iri ñgũ werequerecũ ta irire peerã masibirima erã.

*Jesu ovejare õaro ñhadibugũ iro dopa ñgũ yarãre õaro ñhadibumi*

<sup>7</sup> Eropigũ dipaturi Jesu erãre gũa sãre weremi daja:

—Diaye mũare arĩgũ iiaa. Ovejare diburi sãriro disiporo iro dopa ãhraa yũhũ.

<sup>8</sup> Árĩpehrerã yũ core arinirã gũyarire buherã yajari masa iro dopa ãhrima. Erã eropa árĩquerecũ ta oveja iro dopa árĩrã yaharãpũ gajirãre ne pee wahgãbeama.

<sup>9</sup> Yũ ovejare diburi sãriro disiporo iro dopa ãhraa. Iri disiporo ñajarã iro dopa ta ãhrima yũre umupeorã. Eropigũ erãre peamegue wabonirãre taugũra. Ovejare cãhmotari sãriro erã cãhmotaro dopa ta yũ taunirãre cãhmotagũca. Eropirã erã gamerire oparãcoma, arĩmi Jesu.

<sup>10</sup> Eropa arĩtuha õpa arĩnemomi:

—Mũare gũya buherã ovejare yajari masa iro dopa ãhrima. Gajirã yajadiarã wejẽdiagãrima. Oveja iro dopa árĩrã yaharã árĩpehrerinũri Goãmũ mera árĩcũ iigũ aribũ yũpũ. Eropigũ yaharã mũmũri nũcũ erã õaro árĩcũ iibu aribũ yũpũ.

<sup>11</sup> Ovejare ðaro ðhadibugũ iro dopa árĩgu ãhraa yũhũ. Ovejare ðaro ðhadibugũ sĩribu árĩqueregũ ta ĩgu ovejare cãhmotaniguigũcumi. Yaharã Goãmũ mera erã eropa árĩniguiburire sĩrigũca. <sup>12</sup> ĩgu mohmeri masũpũ ðaro ovejare ðhadibugũ árĩbeami. Eropirã oveja ĩgu yarã árĩbeama. Eropigu nũgu majagu diaye ovejare ñeagu ĩgu aricũ ĩagu ĩgu mohmeri masũpũ ovejare cóãcã gũi omagã wahami. ĩgu eropa cohãpigãra pũhrũ, nũgu majagu diaye ĩgu ovejare ĩgu ñeacũ ĩarã ovejarũ omasirigã wahama. <sup>13</sup> ĩgu mohmeri masũpũ ĩgu wajatari dihtare gahmemi. Eropigu ĩgu ovejare ðaro ðhadibudiabeami, arĩmi Jesu.

<sup>14</sup> Eropa arĩtuha ðpa arĩnemomi queoriñe mera:

—Ovejare ðaro ðhadibugũ iro dopa ãhraa yũhũ. Eropigu yaharãre masia yũhũ. Eropirã yaharã sã yũre masima. <sup>15</sup> Eropa ta yũ Pagũ sã yũre masimi. Eropigu yũ sã yũ Pagũre masia. Yaharã Goãmũ mera erã árĩniguiburire sĩrigũca. <sup>16</sup> Gajirã oveja gaji sãriro majarã iro dopa árĩrã gajirã masa sã yaharã árĩrãcoma. Erã sãre aĩguca. Eropirã yũ wereniguirire pee wahgãrãcoma erã sã. Eropirã yaharã árĩpehrerã yuju curu ta árĩrãcoma. Eropigu yũ dihta yaharãre ðhadibugũca, arĩmi Jesu.

<sup>17</sup> Eropa arĩtuha ðpa arĩnemomi daja:

—Yaharã Goãmũ mera erã árĩniguiburire sĩrigũca yũhũ. Yũ sĩrira pũhrũ masa mũriaguca. Yũ eropa iibu árĩcũ yũ Pagũ yũre mahimi. <sup>18</sup> Yũ wejẽdorebiricũ yũre wejẽmasibiriboñuma erã. Yũ gamero mera yũre wejẽrãcoma. Eropigu yaharã Goãmũ mera erã ya árĩburire sĩrigũca. Sĩrimasia yũhũ. Eropigu masa mũriamasia. Yũ Pagũ yũre irire ta iidoremi, arĩmi Jesu.

<sup>19</sup> ĩgu eroparĩcũ peerã judio masa pe curu dũca warima daja. Gajirã gajiropa pepi, gajirã sã gajiropa pepinirã árĩma.

<sup>20</sup> —Ĩgu watĩre opami. Eropigu goroweregũ ãhrimi. ¿Duhpirã ĩgũre dipaturi peeri mũa? arĩma gajirã bajarã judio masa.

<sup>21</sup> Gajirãpũ ðpa arĩma:

—Watĩ mera goroweregũ árĩgu eropa ðaro arĩ wereniguiriboñumi. Cuirĩ ðhajabigũre ĩacũ iimasibiriboñumi watĩre opagũ. Eropa árĩgu árĩgu ĩgu watĩre opabeami, arĩma gajirã judio masa.

### *Judio masa Jesure gamebiriñuma*

<sup>22</sup> Gajinũ Jerusalengue bosenu iirã iima dipaturi judio masa. Goãmũ wihire erã Goãmũ ya árĩburire erã apiri bosenu árĩbũ. Irisubu yura wahgũro árĩbũ. <sup>23</sup> Irinũ Salomo waĩcurĩ taribugue Goãmũ wihigue árĩri taribure Jesu gũa mera ðhacurigu iimi. <sup>24</sup> Iri taribugue ĩgu árĩcũ ĩarã judio masa ĩgu pohrogue gamenere ĩgũre serẽpima daja:

—Yoatariari boje gũare ðaro werebeaa mũhũ. Diaye gũare ðaro were purumujuque. ¿Cristo Goãmũ ĩgu obeodigu ta ãhriri mũhũ? arĩma erã ĩgũre.

<sup>25</sup> Erã eroparĩcũ peegũ ðpa arĩ yũhrimi Jesu:

—Mũare weretuhabũ yũhũ. Yũ eropa werequerecũ ta yũre peebeaa mũa. Yũ Pagũ ĩgu dorero dopa ta ĩgu turari mera ii ĩhmurabũ mũare. Eropa iigu yũ Cristo árĩrire ta mũare ĩhmugũ iirabũ. <sup>26</sup> Yũ eropa ii ĩhmuquerecũ ta yũre peebeaa mũa. Mũapũ yaharã árĩbeaa. Eropirã gajigu yarã oveja iro dopa árĩrã yũpũre peebeaa mũa. <sup>27</sup> Oveja erãre ðhadibugũre erã peediro dopa ta yaharã yũre peema. Eropigu erãre masia yũhũ. Eropirã erã yũ mera wahama. <sup>28</sup> Eropigu mũmari nũcu Goãmũ mera árĩcũ iiaa erãre. Eropirã erãpũ peamegue wasome. Eropigu yaharãre yũ ðhadibucũ gajirãpũ ne yũre emamasibeama erãre. <sup>29</sup> Yũ Pagũ yaharãre yũre odigu yũ tauro turami. Eropirã yũ Pagũ sã yaharãre ĩgu ðhadibucũ gajirã ĩgu sãre ne emamasibeama. <sup>30</sup> Yũhũ, yũ Pagũ mera yujugũ ta ãhraa, arĩmi Jesu judio masare.

<sup>31</sup> Īḡu eroparīcū peerā judio masapū ĭḡure deaburi utāre dipaturi aīma daja. <sup>32</sup> Erā eropa iicū ĭagū Jesu erāre serēpimi:

—Yū Pagū ĭḡu turari mera baja deyoro moarire ii ĭhmurabū mūare. ¿Ñehenore iira dipuwaja utā mera deadiari mūa yūre? arī serēpimi.

<sup>33</sup> Īḡu eroparīcū peerā ōpa arīma erā:

—Goāmū turari mera mū ii ĭhmuri dipuwaja mūre utā mera dea wejēdiabeaa gūa. Goāmūre mū ñero wereniguiri dipuwaja mūre utā mera dea wejēdiaa gūa. Masū árīqueregū ta mūhū “Goāmū āhraa yūhū,” mū arīri dipuwaja mūre utā mera dea wejēdiaa gūa, arī yūhrima erā.

<sup>34</sup> Erā eropa arī yūhricū peegū Jesu erāre weremi:

—Mūa sāre “Goāmarā,” arī piyumi Goāmū. Eropa ta arī gojañuma ĭḡu dorerire erā gojarapūgue. <sup>35</sup> Goāmū yare erā gojarapū queoro árīcū mari masia. “Gūyari āhraa,” iripūre arīmasibeaa mari. Eropigū ĭḡu yare pepirāre diaye ta ĭḡu “Goāmarā,” arī piyumi. <sup>36</sup> Goāmū yūre beyenijagū i yebaguere obeomi. Eropigū “Yūhū Goāmū magū āhraa,” yū arīra dipuwaja “Goāmūre ñero wereniguigū iimi Jesu,” arāa mūa yūre. ¿Duhpirā yūre eropa arīri mūa? <sup>37</sup> Yū Pagū ĭḡu gamero dopa ta ĭḡu turari mera yū ii ĭhmubiricū tamerare yū buherire “Diaye ta āhraa,” arībiriboya mūa. <sup>38</sup> Yū Pagū ĭḡu turari mera yū ii ĭhmuquerecū ta yūpūre umupeodiabiriboca mūa. Eropa umupeodiabiriquererā ta ĭḡu turari mera yū ii ĭhmucū ĭarā yū iirare “Diaye ta āhraa,” arīque mūa. Mūa eropa arīrā, yū Pagū mera gūa yujuro mera árīcū masirāca mūa. Eropirā yūhū, yū Pagū mera yujuro mera yū árīcū masirāca mūa. Eropirā peerāca mūa, arīmi Jesu erāre.

<sup>39</sup> Īḡu eroparīcū erā ĭḡure dipaturi ñeadiarima. Erā eropa ñeadiacū ĭḡu duhri wiria wami.

<sup>40</sup> Eropa wiriadigūgue ta Ñū masare ĭḡu waīyemūhtadirogue Jordán waīcūriya sipū majasegue gūa dipaturi wabū daja. Erogue dujacābū. <sup>41</sup> Eropirā masa bajarā ĭḡure ĭarā erama. Ōpa arīma erā erā basi:

—Ñū waīyegūpū Goāmū turari mera deyoro moarire ii ĭhmubirimi. Eropa ii ĭhmubiriquerecū ta árīpehreri Jesure ĭḡu wererapū diaye ta āhraa, arīma masa erā basi.

<sup>42</sup> Eropirā masa erogue bajarā umupeoma Jesure.

## 11

### *Lázaro waīcūgū sīria wañumi*

<sup>1</sup> Eropi Judea yebague Betania waīcūri maca majagū Lázaro waīcūgū arīmi. Iri maca ĭḡu pagū porā nome María, Marta mera arīma. <sup>2</sup> Maríapū Jesure poresuri mera sūbo, igo poari mera ĭḡure tucoebodigo arīmo. Igo tīḡu Lázaropū dorecūgū iipū. <sup>3</sup> Eropirā erā nome gajirāre Jesure weredorerā obeoñorā.

—Opū, mū mahigū dorecūgū iimi, arī weredorerā obeoñorā Lázaro pagū porā nome.

<sup>4</sup> Erā gūa pohrogue eraa, iri querere werēcū peegū ōpa arīmi Jesu gūare.

—Dohpaguere Lázaro ĭḡu dorecūri sīriburi árībeaa. Goāmū turarire masare ĭhmuburire dohpaguere ĭḡu dorecūmi. Eropirā yū turari opagū árīcū sāre masa ĭarācoma, arīmi Jesu.

<sup>5</sup> Jesu Martare, igo pagū mago, Lázaro sāre turaro mahími. <sup>6</sup> Eropigū Lázaro ĭḡu dorecūrire peequeregū ta ero Jesupū penū dujanimi. <sup>7</sup> Penū pūhrū Jesu ōpa arīmi gūare ĭḡu buherāre.

—Dipaturi Judea yebague dujaa warā daja, arīmi gūare.

<sup>8</sup> —Buhegū, cārūgā ta mūre judio masa utā mera dea wejēdiama. ¿Duhpigū dipaturi dujadiari mūhū? arībū gūa ĭḡure.



<sup>9</sup> Gũa eroparĩcũ peegu ĩgu erã wejẽmasibirirare weregu, werenigui queori mera guare õpa arĩmi:

—Wũaro guñaricũbiricãque. Yujunũre doce horari gohra ãhraa. Abe umũ majagu áricũ õaro ĩhaa mari. Eropirã umũre curirã ne cohresome mari. <sup>10</sup> Naitĩaro curirã cohrema. Abe umũ majagu maricũ õaro ĩabeama erã, arĩmi Jesu.

<sup>11</sup> Eropa arĩgu guare werenemomi.

—Mari mera majagu Lázaro carĩgu iicumi. ĩgu eropa carĩquerecũ ta yũhũ ĩgũre wahgũgu wagũra, arĩmi guare.

<sup>12</sup> —Opũ, Lázaro carĩgu áricũ tarigucumi, arĩbu gũa.

<sup>13</sup> Gũa eropa arĩquerecũ ta Jesupu “Carĩgu iicumi,” arĩgu, “Sĩria wami,” arĩgu iidigu arĩmi. ĩgu “Lázaro carĩgu iicumi,” arĩcũ peerã “Lázaro soogu iicumi,” arĩ pepiribu guaru. <sup>14</sup> Gũa eropa arĩ pepicũ masigu Jesu guare diaye weremi.

—Lázaro sĩria wañumi. <sup>15</sup> Yũ mariro ĩgu sĩricũ õapũricãa. Eropirã mũa yũre umupeonemorãca. Ina ta. Mari ĩarã warã ĩgu pohrogue, arĩmi Jesu.

<sup>16</sup> Toma sũhrũadigu erã arĩguaru õpa arĩmi guare:

—Mari sã Jesu mera warã. ĩgũre wejẽrã mari sãre wejẽporo, arĩmi Toma.

*Jesu “Eropa arĩniguicãcũ iigu masare masugu ãhraa,” arĩñumi*

<sup>17</sup> Eropi gũa erogue ejara pũhrũ ero majarã õpa arĩ werema Jesure:

—Wapicũrinũ taria Lázaro mũrũre masa gobegue erã apira pũhrũ, arĩ werema ĩgũre.

<sup>18</sup> Betaniaru Jerusalén pohrogã uhre kilómetros yoaro dujabũ. <sup>19</sup> Eropirã judio masa bajarã Martare, María sãre ñehamere orerã eranirã arĩma Lázaro ĩgu sĩrira pũhrũ. <sup>20</sup> Eropigu Jesu mera gũa ejaboro pohro áricũ peego Martaru guare bocatĩrigo eramo. Igo bocatĩrigo wacũ Marĩaru igo ya wihi dujadigo arĩmo. <sup>21</sup> Eropa bocatĩrigo Marta õpa arĩmo Jesure:

—Opũ, yũ tĩgu ĩgu sĩriboro core mũhũ ohõ áricũ ĩgu sĩribiriboañumi. <sup>22</sup> Dohpague sãre Goãmũre mũ serẽcũ ĩgu mũ serẽro dopa ta iigucumi, arĩmo Marta Jesure.

<sup>23</sup> —Mũ tĩgu masagucumi, arĩmi Jesu igore.

<sup>24</sup> —I yeba pehrerinũ ĩgu masa mũriaborore masia yũhũ, arĩmo igo.

<sup>25</sup> Igo eroparĩcũ Jesu weremi daja:

—Yũhũ sĩrinirãre masacũ iigu ãhraa. Masare yũ mera eropa arĩniguicũ iigu ãhraa. Yũre umupeogu sĩriqueregu ta eropa arĩniguicãgucumi. <sup>26</sup> Eropirã arĩpehrerã Goãmũ mera arĩniguirã yũre umupeorã peamegue wasome. ¿Ire masiri mũhũ? arĩmi Jesu igore.

<sup>27</sup> —Opũ, masia yũhũ. “Cristo Goãmũ magũ i yebague arigucumi,” erã arĩdigũ mũ áricũ masia yũhũ, arĩmo Marta Jesure.

*Lázaro ĩgu masa gobe pohro Jesu oreñumi*

<sup>28</sup> Marta eropa arĩtuha igo pagũ magore Marĩare sihugo wamo.

—Marire buhegu mari ya macare eranijagu iiami. Mũre sihuami, arĩ yayarogã arĩ werepo Marĩare.

<sup>29</sup> Igo eroparĩcũ peego María pobero mera wahgãnũgaja, gũa pohrogue arĩmo Jesure ĩago arigo. <sup>30</sup> Erã ya macague ejanibiricarabũ dohpa. Marta guare igo bocatĩridirogue arĩnibu gũa. <sup>31</sup> Judio masa iri wihi Marĩare ñehamere orerã iinirã arĩma. Eropirã igo pobero mera wahgã wacũ ĩarã erã igore nũrũsiagãnirã arĩma. “Igo tĩgu mũrũre erã apira gobegue orego wago iicumõ igo,” arĩ pepinirã arĩrima erã. Eropa arĩ pepirã igore nũrũsiagãnirã arĩma.

<sup>32</sup> Eropigo Marĩa gũa pohrogue erago, Jesure ĩha, ĩgu guburi pohro merejamo.

—Opũ, yũ tĩgu ĩgu sĩriboro core mũhũ ohõ áricũ ĩgu sĩribiriboañumi, arĩmo igo ĩgũre.



<sup>33</sup> Eropigu igo judio masa igo mera arinirã sã erã orecũ ïagu Jesupũ turaro bũjawere ñero sïporãcumi.

<sup>34</sup> —¿Lázaro mure nohogue opari mua? arĩ serẽpimi Jesu.

—Opũ, ïagu arique, arĩ sihugãma erã.

<sup>35</sup> Erã eroparĩcũ peegu Jesu oremi.

<sup>36</sup> Ïgu orecũ ïha judio masa õpa arĩma erã basi:

—Lázaro mure Jesu bũrigã mahirañumi, arĩma.

<sup>37</sup> Gajirãpũ õpa arĩma:

—Cuirĩ ïhajabigũre ïacũ iigu ãhrimi ihĩ Jesu. ¿Eropigu Lázaro ïgu sïriboro core masumasibiriboayuri? arĩma gajirã.

### *Lázarore masuñumi Jesu*

<sup>38</sup> Eropigu Jesu dipaturi turaro bũjoweremi. Eropirã árĩpehrerã Lázaro mure masa gobegue ejabũ. Utãyegue árĩri gobegue ïgu dũpũ mure erã sï acura gobegue árĩbũ. Eropi iri gobegue wũariye utãye mera erã bihara gobegue árĩbũ.

<sup>39</sup> —Utãyere aĩ weaque, arĩmi Jesu.

Ïgu eroparĩcũ peego Marta sïridigu mure pagũ mago õpa arĩmo:

—Opũ, dohpague wapicũrinũ wahaa ïgu sïrira pũhrũ. Eropiro ïgu dũpũ mure arĩ árĩca, arĩmo Jesure.

<sup>40</sup> —“Yũre umupeogo Goãmũ turarire ïagoca,” mure arĩrabũ, arĩmi Jesu Martare.

<sup>41</sup> Ïgu eropa arĩra pũhrũ erã utãyere aĩ weama. Erã eropa aĩ weara pũhrũ Jesu umarogue ïha Goãmũre õpa arĩmi:

—Ahũ, yũre mũ peetuhabũ. Irire mũ iicũ masigu mucubiria mure. <sup>42</sup> Yũre mũhũ mũmũri nũcũ peeniguia. Irire masia. Eropa masiqueregu ta yũhũ mũ obeodigu árĩcũ õre niguirã erã masiburire mure eropa arĩgu iiaa.

<sup>43</sup> Eropa arĩtuha Jesu turaro gaguiniguimi:

—Lázaro, arique, arĩ gaguiniguimi ïgu.

<sup>44</sup> Ïgu eroparĩcũ sïridigu murepũ ïgu mojotorire ïgu guburi sãre suhri gasiri mera erã diridigu, ïgu dipurure suhri gasiri mera erã omadigu masa gobegue wiririmi.

—Ïgure dirirare pãque ïgure, arĩmi Jesu

### *Judio masa oparãpũ Jesure ñeadiariñuma*

*Mt 26.1-5; Mr 14.1-2; Lc 22.1-2*

<sup>45</sup> Ïgu eropa masucũ ïarã bajarã judio masa mera majarã María mera árĩnirã Jesure umupeoma. <sup>46</sup> Gajirãpũ erã mera majarã fariseo masa pohrogue eja, Jesu ïgu iirare wereñorã erãre. <sup>47-48</sup> Eropirã pahia oparã, fariseo masa oparã sã gamenere, erã basi õpa arĩ wereniguñorã.

—Jesu bajasuburi deyro moarire ii ïhmumi. Ïgu eropa iicũ, “Irire iibita,” mari arĩbircũ árĩpehrerã masa ïgure umupeo, ïgu mera wabocoma. Eropirã Roma majarã oparã Goãmũ wihire cóãdorerã obeorãcoma erã yarã surarare. Mari ya yeba sãre emarãcoma erã. Mari ya yeba majarã Jesure erã opũ erã apicũ ïarã Roma majarã oparã guarã ñero iirãcoma marire. ¿Eropa iirã dohpã iirãcuri dohpaguere? arĩ wereniguñorã erã erã basi.

<sup>49</sup> Erã eropa arĩquerecũ ta gajigu Caifa waĩcũgu iri bojorire pahia opũ arĩgu erãre werepũ.

—Mũapũ ne masibea. <sup>50</sup> Judio masa árĩpehrerã mari ya árĩburire yujugũ masũ ïgu sïricũ õhaa. Ïgu sïribircũ mari árĩpehrerã judio masa pehrea waboca. Irire mua masibea, arĩmi Caifa erãre.

<sup>51</sup> Eropa arĩgu ïgu gamero eropa arĩbiriñumi. Pahia tauro opũ ïgu árĩcũ judio masa ya árĩburire Jesu ïgu sïriborore Goãmũpũ Caifare eropa arĩ weredoreñumi.

<sup>52</sup> Jesu ĩgu sĭrigu judio masa ya dihta sĭribiriñumi. Sĭrigu árĭpehrerã Goãmũ porã i yeba árĭpehrero árĭrã sãre erã ya árĭburi sãre sĭriñumi Jesu. Erã yuju curu árĭboro dopa sĭriñumi. <sup>53</sup> Caifa eroparĭcũ peerã erã “¿Jesure dohpa ii wejērãcuri mari?” arĭ wereniguirã ĩgure wejēmora iñorã.

<sup>54</sup> ĩgure erã wejēdiacũ masigu Jesu bajarã judio masa watope dipaturi curigu wabirimi. Eropigu masa marirogã Efraín waĩcũri macague guare sihu wami. Guare iri maca sihu dujanimi Jesu.

<sup>55</sup> Irisubure Pascua bosenu gua judio masa bosenu árĭboro merogã duhyabu. Eropirã bosenu core masa bajarã gaji macari majarã masa Jerusalengue gamenerema. Pascua majare erã baboro core Goãmũ ya árĭburire erã basi coemora ejanirã árĭma. <sup>56</sup> Eropirã erã Jesure amarã iñorã. Erã eropa amacũ ĩarã Goãmũ wihigue árĭrã õpa arĭ wereniguiñorã:

—¿Bosenure ĩagu aribiribocuri Jesu mũa pepicũ? arĭ wereniguiñorã erã basi.

<sup>57</sup> Eropirã pahia oparã, fariseo masa sã õpa arĭ weredoreñorã masare:

—Jesu ĩgu árĭrore mũa masirã wereque guare. ĩgure ñeamorã iiaa gua, arĭñorã oparã masare.

## 12

### *María Jesu guburire poresuri mera pipeoñumo*

*Mt 26.6-13; Mr 14.3-9*

<sup>1</sup> Pascua bosenu seis nũri gohra duhyacũ Jesu gua ĩgu buherã mera Betaniague ejabu. Lázaro Jesu ĩgu masudigu iri maca majagu árĭmi. <sup>2</sup> Gua ejara pũhrũ Jesu sã gua ya bari árĭburire iima gajirã. Eropirã Lázaro, Jesu, gua mera mesare doajabu. Gua eropa doajara pũhrũ Marta barire peomo guare. <sup>3</sup> Eropigo María poresuripure nardo waĩcũri goripure yuju kilo deco aĩgãri, Jesu guburire pipeomo. Pipeotuha igo poari mera tucoemo. Igo eropa pipeora pũhrũ iri wihi õaro posesu sehya wabu. <sup>4</sup> Igo eropa iicũ ĩha gua mera majagu, Jesure ĩhaturirãre wiabu Juda Iscariotepũ õpa arĭmi:

<sup>5</sup> —¿Duhpigo iri poresuri eropa iisiriri igoa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocũrãre oboañumo igo, arĭmi ĩgu.

<sup>6</sup> Judapũ mojomorocũrãre itamudiabiriñumi. ĩgu gua ya niyeru dibugu árĭqueregu ta yajaricũgu árĭmi. Eropigu ĩgu gua ya niyeru sãre yujuyerisuburi aĩmũrimi. Eropigu iri niyerure aĩdiagu árĭgu, eropa arĭñumi ĩgu Marĩare.

<sup>7</sup> ĩgu eroparĭcũ peegu õpa arĭmi Jesu:

—Eropa arĭbita igore. Igo poresurire yũre igo duarare yũre pipeoamo yũre erã yaaboro core yũ dũpũre amuyugo. Mojomorocũrãpũ mũa mera eropa árĭniguicãrãcoma. Eropirã mũa gamero erãre omasia mũa. <sup>8</sup> Yũpũ i yebaguere eropa árĭniguicãsome, arĭmi Jesu.

### *Pahia oparã Lázarore wejēdiañuma*

<sup>9</sup> Eropirã Jesu ĩgu Betaniague árĭcũ peerã judio masa bajarã ĩgure ĩarã arima. ĩgu dihtare ĩarã aribirima. Lázaro sĭridigu Jesu ĩgu masudigure ĩgu sãre ĩarã arirã iima. <sup>10</sup> Erã ĩarã ejarare pahia oparã masirã Lázarore wejēdiañorã. <sup>11</sup> Lázaro sĭridigu Jesu ĩgu masudigu árĭcũ ĩarã bajarã masa Jesure umupeoma. ĩgu eropa masucũ ĩarã bajarã judio masa erã pahia erã buheripure cóama. Erã eropa cóacũ ĩarã pahia oparãpũ guataria wa, Lázaro sãre wejēdiañorã.

### *Jerusalengue ejañumi Jesu*

*Mt 21.1-11; Mr 11.1-11; Lc 19.28-40*

<sup>12</sup> Pascua bosenų erā iicū bajarā masa Jerusaléngue ĩarā wanirā árĭma. Gajinų Jerusaléngue Jesu ĩgu waburire masa peenirā árĭma. <sup>13</sup> Eropirā bejepüre aĭgā, ĩgure bocatĭrirā wama. Eropa bocatĭrirā ōpa arĭ gaguiniguima erā.

—Īre umupeorā. Ihĭ Goāmų ĩgu obeodigu ōaro ariporo. Ihĭ judio masa mari opu ta āhrimi, arĭ gaguiniguima erā.

<sup>14</sup> Jesu burrogā ĩgu bocadigu weca peyami. ĩgu eropiigu Goāmų yare erā gojarapū werediro dopa ta iimi. Őpa arĭ gojañumi Goāmų yare wereyumħtadigugue.

<sup>15</sup> Jerusalén waĭcuro majarā güibiricāque mua. Īaque. Mua opu burrogā weca peyagārimi, arĭ weremħtañumi Goāmų yare erā gojarapūgue.

<sup>16</sup> Irire gua ĩgu buherā ōaro masinibiribų. Eropa masibiriquererā ta ũmarogue Jesu ĩgu mĕriara pħrų gua erā gojara mĕrare guña boca pee masibų. Őpa arĭ pepibų: “Goāmų yare erā gojarapūgue Jesure weremħtañuma. Eropiro Goāmų yare erā gojarapū arĭdiro dopa ta sihabų Jesure,” arĭ pepibų gua basi.

<sup>17</sup> Lázarore erā apira gobegue árĭgure Jesu ĩgu piyucū ĩgure ĩgu masucū ĩanirāpu weresiriniguinirā árĭma masare. <sup>18</sup> Eropirā Lázarore Jesu ĩgu masurare erā peenirā árĭrā masa bajarā Jesure bocatĭrirā wama. <sup>19</sup> Erā Jesure eropa umupeocū ĩarā fariseo masa erā basi ōpa arĭñorā.

—Árĭpehrerā Jesu yarā dihta warā iima dohpaguere. Eropirā mari dohpa iimasibea erāre, arĭñorā fariseo masa erā basi.

### *Bajamerāgā Griego masa Jesure amagāriñuma*

<sup>20</sup> Eropi bosenų Goāmų wihigue Goāmure umupeorā eranirā mera majarā bajamerāgā griego masa arĭñorā. <sup>21</sup> Eropirā erā Felipe pohrogue erañorā. Felipepu Betsaida waĭcuri maca Galilea yeba árĭri maca majagu árĭmi. Eropirā ĩgu pohrogue erarā ōpa arĭñorā ĩgure:

—Jesure ĩadiaca gua, arĭñorā erā.

<sup>22</sup> Erā eroparĭcū peegu Felipe Andreguere weregu wapų. Eropirā erā perā Jesure werema. <sup>23</sup> Erā werera pħrų Jesu guare weremi:

—Yħų masų Goāmų ĩgu obeodigu āhraa. Yure árĭpehrerā umupeoburisubu árĭro iiaa dohpaguere. Dohpaguere yų sĭriburisubu árĭro ta iiaa. <sup>24</sup> Diaye mĕare arĭgu iiaa. Oteriyere yebague yaabiricū, iriyere otebiricū yujuye ta dujaroca. Eropiro iriyere mari otera pħrų bajayeri ducasiua. Eropa ta yų sĭrira pħrų yure erā yaara pħrų bajarā masare Goāmų mera eropa árĭniguimorāre iiguca yħų. <sup>25</sup> I yeba mua árĭrire wĕaro pepiboca mua. Eropa pepirā Goāmure guñabirā peamegue warāca mua. I yeba mua árĭrire eropa pepicārā, Goāmų mera eropa árĭniguirāca. <sup>26</sup> Yahare iidiarā, yų buherire ōaro peeque mua. Mua eropa iirā mua sā yų árĭboroguere árĭrāca. Yahare iigure yų Pagupu umupeogucumi, arĭmi Jesu guare.

### *Jesu ĩgu sĭriburiñere wereñumi*

<sup>27</sup> Őpa arĭnemomi guare.

—Dohpaguere yħų ñero sĭporācua. ¿Yų Pagure dohpa arĭgucuri yħų? “¿Ahų, yų ñero tariborore tauque,” ¿arĭbocuri yħų? Irire arĭbeaa yħų. Ñero taribu ta i yebaguere aribų. Eropiro yų ñero tariburisubu dohpaguere āhraa, arĭ weremi Jesu guare ĩgu buherāre.

<sup>28</sup> Eropigu ōpa arĭmi ĩgu Pagure:

—Ahų, mų turagu árĭrire dohpaguere ĩhmuque masare, arĭmi Jesu ĩgu Pagure.

Īgu eroparĭcū ũmarogue wereniguero caribų.

—Turagu yų árĭrire masare ĩhmutuhabų. Dohpaguere eropiigu dipaturi ĩhmuğca masare, arĭro caribų.

<sup>29</sup> Eroparĭcū peerā ero niguirā masa bajarā ōpa arĭma:

—Bupu árĩcumi eropa busugũ, arĩma masa.

—Anyu Jesure weregũ iiami, arĩma gajirã masa.

<sup>30</sup> Ōpa arĩmi Jesupũ:

—Ūmarogue yũre peedorero eropa busũbiro carabũ. Muapũre peedorero eropa carabũ. <sup>31</sup> Dohpaguere i yeba majarã erã ñeri iira dipuwaja dipuwajacũrãcoma. I yeba majarã erã opũre watĩre Goãmũ cóãgũcumi. <sup>32</sup> Eropigũ crusague yũre erã aĩ wahgũ nugucũ bajarã masare yaharã árĩmorãre iigũca yũhũ, arĩmi Jesu.

<sup>33</sup> Eropa arĩgũ crusague ĩgũ sĩriborore weregũ iimi Jesu masare. <sup>34</sup> ĩgũ eroparĩcũ peerã masapũ ĩgũre ōpa arĩma:

—Goãmũ yare erã gojarapũ ōpa arãa: “Cristo árĩpehrerinũri árĩgũcumi,” arĩ gojañuma. ¿ĩgũ eropa arĩ gojacũ mũre masure Goãmũ ĩgũ obeodigure dohpa arĩronore mũre wejẽ crusague aĩ wahgũrãcuri masa? ¿Goãmũ ĩgũ obeodigũ noa ãhriri ĩgũ? ¿Cristo árĩbeari mũhũ? arĩ serẽpima erã Jesure.

<sup>35</sup> Erã eroparĩcũ ōpa arĩ yũhrimi Jesu:

—Boyoriñe iro dopa árĩgũ masare Goãmũ yare ōaro masicũ iiaa yũhũ. Pũhrũnarigã mũa mera árĩsome yũhũ. Mũare yũ buhecũ dohpaguere peeque ñerire mũa iibiriburire, Goãmũ mera mũa eropa árĩniguiburire. Yũ buherire peebirã naitĩaro curirã iro dopa erã waborore masibeamã. <sup>36</sup> Eropigũ boyoriñe iro dopa ta árĩgũ yũhũ ta ãhraa. Eropigũ mũare buhegũ Goãmũ yare ōaro masicũ iiaa mũare. Dohpaguere yũ waboro core yũre umupeoque. Eropa umupeorã yaharã árĩrãca mũa, arĩmi Jesu.

Eropa arĩ weretuha waha wami erãre duhri wahgãgũ.

### *Judio masa Jesure umupeobiriñuma*

<sup>37</sup> Bajasuburi Goãmũ turari mera erãre Jesu ĩgũ deyoro moarire ii ĩhmuquerecũ ta judio masa bajarã ĩgũre ne peediabirima. <sup>38</sup> Goãmũ yare erã gojarapũ Isaia mũrũ ĩgũ gojadiro dopa ta eropa iirã iima erã. Ōpa arĩ gojañumi Isaia:

Goãmũ, mũ buherire gũa wrecũ masa peediabeama. Mũ turarire erãre mũhũ ii ĩhmuquerecũ ta irire “Diaye árĩbeaa,” arĩma erã, arĩ gojañumi Isaia Goãmũ yare gojarapũgue.

<sup>39</sup> Erã eropa peediabiricũ ĩagũ Goãmũ erãre masibiricũ iĩnumi. Iri sãre Isaia ōpa arĩ gojañumi daja:

<sup>40</sup> Cuiiri ĩhajabirã iro dopa árĩcũ iidi árĩmi Goãmũ erãre. Eropigũ ĩgũ yare masibiricũ iidi árĩmi erãre. Eropirã ĩgũ turarire erã ĩaquererã ta erã ĩarare masibirinirã árĩma erã. Eropirã ĩgũ buherire peequererã ta irire masibirinirã árĩma erã. Goãmũ yare masirã erã ñerire cóãdoreboñuma. Eropigũ erãre tauboñumi ĩgũ, arĩ gojañumi Isaia Goãmũ yare erã gojarapũgue.

<sup>41</sup> Isaia Cristo turarire masiyudigũ eropa arĩ gojamũhtañumi.

<sup>42</sup> Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare gũirã gajirã masare Jesure erã umupeorire werebirinirã árĩma. Irire erã wrecũ peerã gũa judio masa buheri wihigue erãre ñajadorebiriboñuma fariseo masapũ. <sup>43</sup> Goãmũre mucubiricũ iidiaquererã ta erã tauro masapũre mucubiricũ iidianirã árĩma erã. Eropirã erã Jesure ne umupeorã “Jesu yarã ãhraa,” arĩ gajirãre werediabirinirã árĩma.

### *Jesu wererire erã peediabiriri dipuwaja masa dipuwajacũrãcoma, arĩ wereñumi Jesu*

<sup>44</sup> Masa bajarã gũa pohro gamenerenirãre Jesu turaro busuro mera weremi:

—Yũre umupeogũ yũ dihtare umupeobeami. Yũre obeodigũ sãre umupeomi ĩgũ. <sup>45</sup> Eropirã yũre masirã yũre obeodigũ sãre masima. <sup>46</sup> Yũhũ boyoriñe iro dopa ta árĩgũ yũhũ Goãmũ yare buhegũ ahraa i yebaguere. Eropigũ Goãmũ yare

mũare masicũ iiaa. Yũre umupeogu naitĩaro wagu iro dopa ñerire iiniguisome. Yũre umupeogu diaye pepigucumi. <sup>47</sup> Gajirã yũ wererire peequererã ta irire yũhribeama. Erã eropa yũhribiriquerecũ ta, erã yũhribirira dipuwaja moasome yũpũ dohpa. I yebaguere dipuwaja moagu arigu aribiribũ yũhũ. I yeba majarãre peamegue wabonirãre taugu arigu aribũ yũhũ. <sup>48</sup> Yũre gamebigure yũ wereri sãre gamebigure dipuwaja moari árĩroca. Īgu yũre peebirira dipuwaja i mũmũ pehrecũ dipuwajacugucumi. <sup>49</sup> Yũhũ yũ gamero werebeaa. Yũ Pagu yũre obeodigupũ yũre weredoremi. Eropiro yũ wereripũ ĩgu ya wereniguirĩ aħraa. <sup>50</sup> Īgu ya wereniguirire peerã Goãmũ mera eropa árĩniguirãca mũa. Eropigu yũ Pagu ĩgu weredoremi dopa ta werea mũare, arĩmi Jesu guare.

## 13

### *Jesu ĩgu buherãre guburire coeñumi*

<sup>1-3</sup> Eropi Pascua bosenu coregã árĩbũ. Iri ñamire Jesu guã ĩgu buherã mera iri bosenure babu árĩmi. Eropigu i yebare ĩgu wiriaborore ĩgu Pagu pohro waburire merogã dũhyacũ masidigu árĩmi Jesu.

Gũa barisubu Judare watĩ doretuhadigu árĩmi ĩgu pepirigue. Eropigu ĩgure Simo Iscariote magure Jesure ĩhaturirãre iri ñamire ĩgu wiaburire doretuhadigu árĩmi. Jesu ĩgu yarãre i yeba árĩrãre burigã mahidigu árĩmi. Eropigu ĩgu mahirare ĩhmubu guã guburire coemi. Īgu Goãmũ pohrogue ĩgu arirare, pũhrũ ĩgu mũmarogue ĩgu mũriaburi sãre masidigu árĩmi. Īgu Pagu Goãmũ ĩgure árĩpehrerã weca opu ĩgu apira sãre masidigu árĩmi. <sup>4</sup> Eropã masiqueregu wahgãnũgaja, ĩgu suhriro weca majañere tuwea suhriro gasiro mera ĩgu paru yũjũre dirimi. <sup>5</sup> Dirituha soropa mera decore pisã, guare ĩgu buherãre guã guburire coenũgami. Gũare coetuha ĩgu dirira gasiro mera tucoemi guã guburire.

<sup>6</sup> Gajirã buherãre coegã, Simo Pedroguere ejami. Īgu guburire ĩgu coeboro core, Pedropũ ĩgure õpa arĩmi:

—Opũ, ¿yũ guburire coebu iiri mũhũ? arĩmi Jesure Pedro.

<sup>7</sup> —Dohparagã yũhũ mũre iiburire masibeeaa mũhũ. Eropã masibiriqueregu ta pũhrũ masigũca, arĩmi Jesu ĩgure.

<sup>8</sup> —Yũ guburire ne coesome mũhũ, arĩmi Pedro.

—Mũre yũ coebiricũ yahagu árĩsome mũhũ, arĩmi Jesu.

<sup>9</sup> —Opũ, yũ guburi dihtare coebiricãque. Yũ guburire, yũ mojotorire, yũ dipuru sãre coeque, arĩmi Pedro.

<sup>10</sup> Īgu eroparĩcũ Jesu õpa arĩmi:

—Yũjugũ masũ guhagu ĩgu dũpũre õaro tucoepehomi. Eropiro ĩgure dipaturi tucoema masiya mara. Īgu guburi dihtare coero gahmea. Árĩpehrerã mũa ñeri iirare coenirã mũa árĩquerecũ ta yũjugũ mũa mera majagu ĩgu ñerire coeya marigu aħrimi, arĩmi Jesu.

<sup>11</sup> Jesu ĩgure ĩhaturirãre wiabure masituhãnumi. Eropã masigu “Yũjugũ mũa mera majagu ĩgu ñerire coeya marigu aħrimi,” arĩñumi ĩgu.

<sup>12</sup> Gũa guburire coetuha, suhrirore sañatuha, doajami daja ĩgu doadiro ta. Tuhaja õpa arĩmi guare:

—¿Dohparagã yũhũ mũare iirare masiri mũa? <sup>13</sup> Mũa yũre “Buhegu,” arĩ piyurã, “Opũ,” arĩ piyurã diaye ta arĩrã iiaa yũre. Mũare buhegu, mũa opu diaye ta aħraa yũhũ. <sup>14</sup> Eropirã yũhũ mũare buhegu, mũa opu árĩqueregu ta mũa guburire yũ coecũ mũa sã mũa mera majarãre guburire coeque. <sup>15</sup> Dohparagã mũa iiburire mũare ĩhmuabũ. Mũa mera majarãre mũa itamuburire mũare ĩhmuabũ. Mũare yũ iidiro dopa ta mũa sã iique. <sup>16</sup> Diaye mũare arĩgu ta iiaa. Mũa yũ pohro majarã dopa árĩrã



yū tauro árībeaa. Mũare buhedore yū obeerã āhraa mũa. Eropirã yū tauro árībeaa mũa. Eropa iigũ ta “Yū iidiro dopa ta iique,” arãbũ yũhũ mũare. <sup>17</sup> Ire mũa masirã, yū dorerire iirã, mucubirirã árĩrãca mũa.

<sup>18</sup> “Mũare árĩpehrerãre eropa arĩbeaa. Yū beyenirãre masia yũhũ. Goãmũ yare erã gojarapũ arĩdiro dopa ta eropa waroca. “Yū mera bagũ ta yũre wejẽdiami,” arĩ gojañuma Goãmũ yare erã gojarapũgue. <sup>19</sup> Ĩgũ yũre eropa wiaboro core ire wereyugũ iiaa mũare. Yũre ĩgũ eropa iira pũhrũ “Jesu ta Cristo Goãmũ ĩgũ obeodigũ āhrimi,” mũa arĩburire ire mũare wereyugũ iiaa yũhũ. <sup>20</sup> Diaye ta mũare arĩgũ iiaa. Yū obeonirãre gamegũ yū sãre gahmemi ĩgũ. Eropigũ yũre gamegũ yũre obeodigũ sãre gahmemi ĩgũ, arĩmi Jesu gũare ĩgũ buherãre.

*Juda Jesure ĩhaturirãre ĩgũ wiaborore wereñumi Jesu*

*Mt 26.20-25; Mr 14.17-21; Lc 22.21-23*

<sup>21</sup> Eropa arĩ weretuha Jesu turaro bũjoweremi. Eropa bũjaweregũ õpa arĩ weremi ĩgũ gũare.

—Diaye mũare arĩgũ iiaa. Yujugũ mũa mera majagũ yũre ĩhaturirãre wiagũcumi, arĩmi Jesu.

<sup>22</sup> Ĩgũ eroparĩcũ peerã Jesure wiabure masibirã, gũa game ĩhamehtubũ. <sup>23</sup> Yũhũ ĩgũ buherã mera majagũ Jesu ĩgũ mahigũpũ ĩgũ pohro doabũ. <sup>24</sup> Eropigũ Simo Pedro yũre ĩgũ mojoto mera sĩpu serẽpidoremi Jesure ĩgũre wiabure: <sup>25</sup> Eropigũ yũpũ Jesu pohro doadigũ serẽpiñabũ ĩgũre:

—Opũ, ¿nihire arĩgũ iiri mũhũ? arĩbũ yũhũ.

<sup>26</sup> —Iru panrure mohwa aĩ, yũhũ yoso ogũ ĩgũ ta āhrimi yũre wiabu, arĩmi Jesu.

Eropa arĩtuha iriru panrure ĩgũ mohwarañere yosotuha Judare Simo Iscariote magũre omi. <sup>27</sup> Eropigũ panre ĩgũ ora pũhrũ watĩpũ Judare ñero iidoredigũ árĩmi. Eropigũ Jesu ĩgũre õpa arĩmi:

—Mũ iiburire yojaro mera ii purumujuque mũhũ, arĩmi Jesu Judare.

<sup>28</sup> Ĩgũ eroparĩcũ peerã gũa mesague doanirã Jesu Judare ĩgũ arĩrare masibiribũ. <sup>29</sup> Yujurãyeri gũa õpa arĩ pepiribũ: “Juda gũa niyerure dibugũ āhrimi. Eropigũ bosenu gũa baburire asũdoregũ oboami Jesu Judare. Mojomorocũrãre niyerure odoregũ iiami Jesu,” arĩ pepiribũ gũa yujurãyeri. <sup>30</sup> Eropigũ Juda iri panre ñeatuha wiria wami. Ĩgũ wiriarasubure ñami árĩbũ.

*Mama doreriñere wereñumi Jesu ĩgũ buherãre*

<sup>31</sup> Ĩgũ wiriara pũhrũ gũare õpa arĩmi Jesu:

—Dohpague tamerare yũhũ masũ Goãmũ ĩgũ obeodigũ yũ turagũ árĩrire ĩhmugũcumi Goãmũ masare. Eropigũ Goãmũ ĩgũ turagũ árĩrire ĩhmugũca yũpũ.

<sup>32</sup> Eropigũ Goãmũ turarire yũ ĩhmucũ ĩgũ yũ turari sãre dohparagã ĩhmu purumujugũcumi. <sup>33</sup> Yũ porã, yũre peeque. Bajamenũrigã mũa mera árĩnigũca. Yũre amarãca mũa. Eropigũ judio masare yũ arĩdiro dopa ta mũa sãre arãa. “Yũ waborore mũapũ wamasibea,” erãre yũ arĩdiro dopa ta mũa sãre werea. <sup>34</sup> Mama doreriñere mũare weregũra. Mũa mera majarãre mahique mũa. Mũare yũ mahidiro dopa ta mũa mera majarãre mahi umupeoque. <sup>35</sup> Eropirã mũa mera majarãre mũa mahicũ ĩha gajirã yaharã mũa árĩcũ ĩha masirãcoma, arĩmi Jesu.

*“Jesure masibea,” Pedro ĩgũ arĩburire wereñumi Jesu*

*Mt 26.31-35; Mr 14.27-31; Lc 22.31-34*

<sup>36</sup> Ĩgũ eroparĩcũ Simo Pedro Jesure serẽpimi:

—Opũ, ¿nohogue wagũcuri mũhũ? arĩmi Pedro. Ĩgũ eroparĩcũ Jesu yũhrimi:

—Yũ waboroguere dohpaguere yũ mera wamasibea mũhũ. Dohpaguere wamasibiriqueregũ ta pũhrũ yũ pohro wagũca, arĩmi Jesu Pedore.

<sup>37</sup> Pedro arĩmi:

—Opɛ, ¿duhpigu dohpaguere mɛ mera wamasibiribocuri yũhɛ? Yũre erã wejẽdiaquerecũ yũhɛ mũre duhusome. Itamugɛca, arĩmi Pedro Jesure.

<sup>38</sup> —¿Mɛ eropa arĩgu diaye ta yũre itamugɛcuri? Diaye mũre weregu iiaa. “Jesure masibea,” arĩguca mũhɛ gajirãre. Ʋhresubu eropa arĩguca cãreña ĩgu wereboro core, arĩmi Jesu Pedore.

## 14

### *Jesu Goãmɛ pohrogue wari maha iro dopa ãhraa yũhɛ, arĩ wereñumi*

<sup>1</sup> Pũhrɛ Jesu guare õpa arĩ weremi:

—Ne bujawere wũaro guñaricubiricãque. Goãmũre “Diaye ta iigu ãhrimi,” arĩ umupeoque. Eropirã yɛ sãre eropa umupeoque. <sup>2</sup> Yɛ Pagɛ ĩgu árĩroguere baja wiri ãhraa. Mũa árĩborore amuyugu wagura. Iri diaye ta ãhraa. Eropigu mũare irire werea. <sup>3</sup> Eropigu mũa árĩborore amutuha, dujarigura yũhɛ. Eropigu yɛ pohrogue mũa árĩmorãre aĩgu arigura yũhɛ daja. <sup>4</sup> Eropirã yɛ waburi mare masia mũa, arĩmi Jesu guare ĩgu buherãre.

<sup>5</sup> —Opɛ, mɛ waborore masibea gu. ¿Eropirã dohpa ii mɛ waburi mare masirãcuri gu? arĩ serẽpimi Toma Jesure.

<sup>6</sup> ĩgu eropa arĩ serẽpicũ Jesupɛ yũhrimi:

—Goãmɛ pohrogue wari maha iro dopa árĩgu tiiaa yũhɛ. Eropigu diaye árĩrire weregu árĩcãgu tiiaa yũhɛ. Eropigu umaroguere ojocariniguicũ iigu árĩgu tiiaa yũhɛ. Eropirã yũre umupeorã dihta yɛ Pagɛ pohrogue warãcoma. <sup>7</sup> Nere yũre masirã árĩrã, yɛ Pagɛ sãre masiboaya mũa. Dohpaguere ĩgure ĩhaa mũa. Eropirã ĩgure masituhabu mũa, arĩmi Jesu.

<sup>8</sup> ĩgu eroparĩcũ Felipe õpa arĩmi:

—Opɛ, mari Pagure ĩhmuque guare. Iripẽta gahmea gu, arĩmi ĩgu.

<sup>9</sup> ĩgu eroparĩcũ Jesu weremi:

—Felipe, ¿yoari boje yɛ mera árĩqueregu ta, mɛ masinibeari yũre? Yũre ĩagu yɛ Pagɛ sãre ĩatuhami. “Eropigu mari Pagure ĩhmuque guare,” ¿duhpigu eropa arĩri mũhɛ yũre? <sup>10</sup> Yɛ Pagɛ mera yujugu ta ãhraa yũhɛ. Irire “Diaye árĩbea,” ¿arĩgu meje iiri mũhɛ? Mũare weregu yɛ gamero weregu iibea. Yɛ Pagure werebasagu iiaa. Eropigu ĩgu yɛ mera árĩgu ĩgu turari mera ii ĩhmumi. <sup>11</sup> Yũhɛ, yɛ Pagɛ mera yujugu ta ãhraa. Yɛ eroparĩcũ irire “Diaye ta ãhraa,” arĩ pepique mũa. Irire “Diaye ta árĩbea,” arĩdiarã, Goãmɛ turari mera deyoro moarire yɛ ii ĩhmurire ĩaque. Eropa ĩara pũhrɛ yɛ Pagɛ mera yɛ yujugu ta árĩrire “Diaye ta ãhraa,” arĩ pepique mũa. <sup>12</sup> Diaye mũare arĩgu iiaa. Yũre umupeogu yɛ iidiro dopa ta iigucumi. Eropigu ĩgupɛ yɛ tauro iigucumi. Yɛ Pagɛ pohrogue wabu iiaa dohpaguere. Eropigu yũre umupeogu yɛ tauro Goãmɛ turari mera ii ĩhmugucumi. <sup>13</sup> Eropigu yũre umupeorãre erã yɛ waĩ mera serẽropẽ ta iigura. Eropa iigu yɛ Pagɛ ĩgu turarire ii ĩhmuguca. <sup>14</sup> Yũre umupeorã mũa árĩcũ mũa serẽropẽ ta iigura, arĩmi Jesu.

### *Espĩritu Santore mũare obeogura, arĩ wereñumi Jesu*

<sup>15</sup> Eropa arĩtuha guare õpa arĩnemomi:

—Yũre mũa mahirã, yɛ dorerire ipehorãca. <sup>16</sup> Yɛ Pagure serẽgura. Yɛ eropa serẽcũ yɛ Pagupɛ gajigure mũare itamubure mũare obeogucumi. Eropigu ĩgu mũare itamubupɛ umuri nũcu mũa mera árĩgucumi. <sup>17</sup> ĩgu diaye majare weregu Espĩritu Santo ãhrimi. I yeba majarãpɛ Espĩritu Santore masibeama. Eropirã ĩgure opamasibeama. ĩgu ta mũa mera árĩgucumi. Eropirã mũa ĩgure oparãca. Eropirã ĩgure masia mũa. <sup>18</sup> Mũare cóãsome yũhɛ. Mũa mera árĩbu dujariguca yũhɛ daja. <sup>19</sup> Merogã dahyaa yɛ waboro. Yɛ wara pũhrɛ i yeba majarã yũre umupeobirinirã

yure dipaturi ñasome. M̄ar̄u yure ñar̄āca. Ȳu ojocaric̄ũ m̄ua s̄ã um̄uri n̄uc̄u Gōãmu mera ojocarir̄āca. <sup>20</sup> Irin̄u ȳu dujariburin̄ure ȳuh̄u, ȳu Paḡu mera yujuḡu ta ȳu ár̄ic̄ũ masir̄āca m̄ua. Eropir̄ā ȳu mera m̄ua ár̄ic̄ũ m̄ua mera ȳu ár̄ic̄ũ s̄āre masir̄āca m̄ua. <sup>21</sup> Ȳu dorerire iiḡu yure mahiḡu ta āh̄rimi. Eropiḡu yure mahiḡure ȳu Paḡup̄u mahiḡucumi. Eropiḡu ȳu s̄ã ñḡure mahiḡuca. Eropiḡu ñḡure yure ðaro masic̄ũ iiḡuca, ar̄imi Jesu ḡuare ñḡu buher̄āre.

<sup>22</sup> Ḡua mera majaḡu gajiḡu Juda waic̄uḡu ar̄imi Iscariote ár̄ibiḡu. Ñpa ar̄imi ñḡu Jesure.

—Op̄u, ¿dohpa iiḡucuri m̄uh̄u ḡuare eropa ar̄iḡu? ¿I yeba majar̄āre m̄ure masic̄ũ iibiḡu dohpa iiḡucuri m̄uh̄u ḡua dihtare m̄ure masic̄ũ iiḡu? ar̄i ser̄epimi Juda.

<sup>23</sup> Ñḡu eropar̄ic̄ũ Jesu ȳuh̄rimi:

—Ȳure mahir̄ā ȳu dorerire ðaro iima. Er̄ā eropa iic̄ũ ȳu Paḡup̄u er̄āre mahiḡucumi. Eropir̄ā er̄ā mera ár̄ir̄ā ár̄ir̄āca ḡua. <sup>24</sup> Ȳure mahibiḡu ȳu dorerire iibeami. Eropiro ȳu wereri m̄ua peerap̄u ȳu wereniguiri ár̄ibeaa. Ȳure obeodiḡu ya wereniguirip̄u āhraa. Ñḡu ȳu Paḡu ta āh̄rimi.

<sup>25</sup> M̄ua mera ár̄in̄iḡu ire m̄uare wereniguiḡu iiaa. <sup>26</sup> P̄uhr̄u ȳu ser̄ec̄ũ ȳu Paḡu Esp̄iritu Santore obeoḡucumi m̄uare. Eropiḡu Esp̄iritu Santop̄u m̄uare itamubu ár̄iḡu, m̄uare buhepehoḡucumi ñḡu. Eropiḡu m̄uare ȳu wererare guñac̄ũ iiḡucumi ñḡu.

<sup>27</sup> M̄uare ðaro ár̄ic̄ũ iiḡuca ȳuh̄u. Ȳuh̄u ðaro ár̄idiro dopa ta ðaro ár̄ic̄ũ iiḡuca m̄uare. I yeba majar̄ā er̄ā iidiro dopa iisome ȳuh̄u. Ȳu tamera diaye ðaro ár̄ic̄ũ iiḡuca m̄uare. B̄ujawere w̄uaro guñaric̄ubiric̄āque m̄ua. Eropir̄ā ḡuibiric̄āque m̄ua. <sup>28</sup> “Ȳuh̄u waḡuca. Eropiḡu m̄ua mera ár̄ibu dujariḡuca daja,” m̄uare ȳu eropa ar̄i werec̄ũ peetuh̄u m̄ua. Ir̄ire masir̄ā ár̄ir̄ā mucubiriboaya m̄ua. Ȳure m̄ua diaye mahinir̄ā ár̄ir̄ā mucubiriboaya m̄ua. Ȳu Paḡup̄u ȳu tauro turami. Eropir̄ā ñḡu pohrogue ȳu waborore m̄ua masira p̄uhr̄u ȳure mahir̄ā mucubiriboaya m̄ua. <sup>29</sup> Ȳure m̄ua umupeoburire ȳu waborore wereyuḡu iiaa m̄uare.

<sup>30</sup> “I yeba majar̄ā op̄u wat̄i doreḡu iimi dohpaguere. Eropiḡu ñḡu eropa dorec̄ũ ȳuh̄u m̄ua mera wereniguituboro meroḡā duhya. Ñḡup̄u ȳure tarin̄ugamasibeami. <sup>31</sup> Ȳure ȳu Paḡu ñḡu dorero dopa ta iiaa ȳuh̄u. Eropa ta iiaa ȳuh̄u ȳu Paḡure ȳu mahir̄ire i yeba majar̄ā er̄ā masiburire.

“Wahḡān̄ugajaque. Ina war̄ā, ar̄imi Jesu ḡuare ñḡu buher̄āre.

## 15

### *Jesu iguiru iro dopa āhraa, ar̄i wereñumi*

<sup>1</sup> Eropiḡu werenigui queori mera buheḡu ḡuare ðpa ar̄imi Jesu:

—Ȳuh̄u iguiru diaye majaru iro dopa ár̄iḡu āhraa. Ȳu Paḡup̄u iguirure ñhadibuḡu iro dopa ár̄iḡu āh̄rimi. <sup>2</sup> Iguirure iri d̄up̄uri games̄uriro dopa ta m̄ua yahar̄ā ȳu mera āhraa. D̄uca mariri d̄up̄urire iguirure ñhadibuḡu ñḡu peha cóāro dopa ta ȳu Paḡu ñḡu gamerire iibir̄āre coh̄āmi. D̄ucac̄uri d̄up̄urire iguirure ñhadibuḡu ñḡu amuro dopa ta ȳu Paḡu ñḡu gamerire iir̄āre itamuḡucumi ñḡu “Ȳu gamerire iinemoporo,” ar̄iḡu. <sup>3</sup> Ȳu wererire peer̄ā, “Diaye ta āhraa,” ar̄āa m̄ua. Eropiḡu ȳu Paḡu m̄ua ñeri iirare cóātuh̄ami. <sup>4</sup> Ȳure games̄uriro dopa ta ȳu mera majar̄ā ár̄ique m̄ua. Eropiḡu m̄ua mera ár̄iḡuca. Iguiru d̄up̄uri iguiru mera games̄uribiro ár̄iro iri d̄up̄urip̄u d̄uca mara. Eropa ta ȳu mera majar̄ā ðaro ár̄ibir̄ā s̄ã ȳu Paḡu gamerire iimasibeaa m̄ua.

<sup>5</sup> Iguirure iri d̄up̄uri games̄uriro dopa ta m̄ua yahar̄ā ȳu mera āhraa. Iri d̄up̄uri iguirure ðaro games̄uriro ár̄iro d̄ucac̄ua. M̄ua s̄ã ȳure ðaro games̄urir̄ā ȳu Paḡu gamerire iiaa. Ȳure games̄urir̄ā ár̄ibir̄ā ñḡu gamerire iimasibeaa m̄ua. <sup>6</sup> Ñeri d̄up̄urire turira d̄up̄ure ñḡu cóāboro dopa ta ȳu mera majar̄ā ár̄ibir̄āre ȳu Paḡu

cóãgucumi. Iri dũpũri ñaicũ ñha iguirure ñhadibugũ iri dũpũrire aĩ gameneo peamegue soecãgucumi. Eropa ta iigucumi Goãmũ yũ mera majarã árĩbirãre.

<sup>7</sup> “Yũ mera majarã árĩrã yũ buherire cãdijibiriboca mũa. Eropa cãdijibirã mũa gameropẽ ta yũre serẽque. Eropigũ mũa serẽropẽ ta ogũra. <sup>8</sup> Yũ Pagũ gamerire mũa iirã árĩcũ ñarã, “Oã Jesu yarã ãhrima,” arĩ masirãcoma gajirã masa. Eropirã mũare ñarã yũ Pagũre umupeorãcoma. <sup>9</sup> Yũ Pagũ ñgũ yũre mahidiro dopa ta yũ sã mũare mahia. Eropirã yũ mahiri mera árĩque mũa. <sup>10</sup> Yũ Pagũ ñgũ dorerire iiaa yũhũ. Eropigũ ñgũ mahigũ árĩniguia yũhũ. Eropa ta mũa sã yũ dorerire iirã yũ mahirã árĩniguicãrãca mũa.

<sup>11</sup> “Ire mũare wereabũ yũ mera mũa ðaro mucubiriborore. Eropirã turaro mucubirirãca mũa. <sup>12</sup> Õpa dorea mũare: Mũare yũ mahidiro dopa ta mũa mera majarãre mũa sã mahique. <sup>13</sup> Yujugũ masũ ñgũ mera majagũ yañe árĩborañe sĩrigũ ñgũ mera majagũre bũrigã mahiami gajirã mahidiro tauro. <sup>14</sup> Eropirã yũ dorerire iirã yũ mera majarã ãhraa mũa. <sup>15</sup> Diaye ta mũa yũ mera majarã gohra ãhraa. Mũa eropa árĩrã árĩcũ árĩpehrerire yũ iirare werea mũare. Pohro majagũ ñgũ opu iiburire masibeami ñgũ. Eropigũ “Yũ pohro majarã bu árĩrã ãhraa mũa,” arĩbeaa mũare. Yũ Pagũ ñgũ yũre wererare mũare werepehoabũ. Eropa weregũ “Yũ mera majarã ãhraa mũa,” mũare arãa dohpaguere. <sup>16</sup> Mũapũ yũre beyebiribũ. Yũpũ mũare beyebũ yũ Pagũ gamerire mũa iimorãre. Mũa eropa iicũ mũa eropa iiri ne yuju diaye gohra árĩsome. Mũa eropa iicũ yũre mũa umupeocũ yũ Pagũ mũa serẽropẽ ta mũare ogucumi. <sup>17</sup> Ire mũare dorea yũhũ: Mũa basi game mahi umupeoque, arĩmi Jesu.

### *Jesure ñgũ yarã sãre i yeba majarã ñhaturirire wereñumi Jesu*

<sup>18</sup> Eropigũ gũare werenemomi daja:

—I yeba majarã mũare erã ñhaturicũ ñarã ire guñaque mũa: “Gũare eropa ñhaturiboro core Jesupũre ñhaturinũgatuhama erã,” arĩ guñaque. <sup>19</sup> I yeba majarã gohra mũa árĩcũ, erã mera majarãre erã mahidiro dopa ta mũa sãre mahiboañuma erã. I yeba majarã mera mũa árĩnicũ mũare beyebũ. Eropirã dohpaguere i yeba majarã gohra arĩbeaa mũa. Mũa eropa árĩbircũ ñarã i yeba majarã mũare ñhaturima. <sup>20</sup> Mũa yaharã árĩrã “Yũ tauro arĩbeaa,” mũare yũ arĩrãre guñaque mũa. Eropa yũ mera majarã árĩrã yũ ñero tariboro dopa ta ñero tarirãca mũa sã. Yũre ñero iinirã ta mũa sãre ñero iirãcoma. Yũ buherire yũhrinirã ta mũa buheri sãre yũhrirãcoma. <sup>21</sup> I yeba majarã yũre obeodigũre masibeamã. Eropirã yũre umupeorã mũa árĩcũ ñero iirãcoma erã mũare.

<sup>22</sup> “Erãre yũ buhegũ aribircũ erã yũre gamebirira dipuwaja mariboaya. Dohpaguere erãre yũ buhera pũhrũ “Ñeri dipuwaja marã gũare,” arĩmasibeamã erã. <sup>23</sup> Yũre ñhaturigũ yũ Pagũ sãre ñhaturimi. <sup>24</sup> Goãmũ turari mera gajirã erã ne iibirirare ii ñhmubũ. Eropiro erãre irire yũ ii ñhmubircũ erã peebirira dipuwaja mariboaya. Goãmũ turari mera yũ ii ñhmurare erã ñara pũhrũ yũre yũ Pagũ sãre ñhaturima erã. <sup>25</sup> Eropa ñhaturirã Goãmũ yare erã gojarapũ matague ta erã arĩ gojadiro dopa ta iirã iima erã. Õpa arĩ gojañuma: “Erãre yũ ñero iibiriquerecũ ta yũre ñhaturima erã,” arĩ gojañuma matague ta Goãmũ yare erã gojarapũgue, arĩmi Jesu.

<sup>26</sup> Eropigũ werenemomi daja:

—Yũ pũhrũgue mũare itamubu, yũ Pagũ mera árĩgũ mũare yũ obeobu Espiritu Santo ta ãhrimi. ñgũ diaye majare weregũ ta ãhrimi. Eropigũ ñgũ arigũ yũ árĩricũrĩre weregucumi mũa. <sup>27</sup> Mũare yũ buhenũgacũgue mũa sã yũ mera umũri nũcũ árĩbũ. Mũa sã yũ árĩricũrĩre wererãca, arĩ weremi Jesu gũare.



## 16

<sup>1</sup> Eropā arītuha guare ōpa arī werenemomi:

—Pūhrū yū buherire yū sāre mūa cóābiriburire ōpa weregūra mūare. <sup>2</sup> Mari buheri wirigūe mūa űajadiacū űajadoresome mūare yaharā mūa árīri dipuwaja. Eropirā mūare gajisubū wejē “Goāmū gamerire iirā iiaa,” arī pepirācoma gajirā. <sup>3</sup> Yū Pagūre, yū sāre erā masibeama. Eropā masibirā mūare űero iirācoma erā. <sup>4</sup> Eropirā mūare erā űero erā iicū ĩarā, “Erā ōpa iiboro core ta Jesu guare weremūhtayutuhami,” arī guñarāca mūa. Mūa eropā arī guñaburire dohpaguere ire weremūhtagū iiaa mūare, arī weremi Jesu.

*Espíritu Santo ĩgū iiburire wereñumi Jesu*

Eropā arītuha ōpa arī werenemomi:

—Neguere mūa mera árīgū ire mūare werebiribū. <sup>5</sup> Dohpaguepūre yūre obeodigu pohrogue wagūca. “¿Nohogue wagūcuri mūhū?” arī ne yujugū yūre serēpibeaa mūa yūre. <sup>6</sup> Eropā serēpibiriquererā ta yū waborore mūare werēcū mūa űero sīporācūa. <sup>7</sup> Mūa űero sīporācūquerecū mūare ōpa diaye ta werea: Yū wara pūhrū mūare ōacāroca. Yū űmarogue wabiricū mūare itamubupū aribiribocumi. Eropā wagū eja mūare ĩgūre obeogūca yūhū. <sup>8</sup> Yū eropā obeocū ĩgū arigūcumi. Eropā eragū i yeba majarāre űerire iirā erā árīcū masicū iigūcumi ĩgū. Eropigū ōaro árīricūburire buhegūcumi ĩgū. Eropigū Goāmū ĩgū dipuwaja moaborore weregūcumi masare itamubupū. <sup>9</sup> Yūre umupeobirā āhřima i yeba majarā. Eropigū itamubupū masa erā űero iiricūre erāre masicū iigūcumi. <sup>10</sup> Yū Pagū pohrogue wagūca. Yū eropā wara pūhrū masa yūre ĩanisome. Eropigū itamubupū arigū ōaro árīricūri sāre buhegūcumi. <sup>11</sup> I yeba majarā opūre watīre Goāmū dipuwaja moadoretuhami. Eropigū Goāmū masare ĩgū dipuwaja moaburi sāre weregūcumi itamubupū.

<sup>12</sup> “Wūaro āhřaa mūare yū wereburi. Yū eropā werenemodiquerecū ta ire yū werēcū dohparagā masisome mūa. <sup>13</sup> Yū eropā werenemobiricū Espiritu Santopū irire werenemogū arigūcumi. ĩgū ĩgū gamero mūare weresome. Yū Pagū ĩgū weredorerare mūare weregūcumi. Eropigū mūare diaye majare werepehogūcumi. Eropiro pūhrūgue waburire mūare masicū iigūcumi ĩgū. <sup>14</sup> Eropigū ĩgū yare mūare weregūcumi. Eropā weregū yūre umupeocū iigūcumi mūare. <sup>15</sup> Árīpehreri yū Pagū ya sā yaha āhřaa. Eropigū “Espiritu Santo yahare weregūcumi,” arābū mūare, arī weremi Jesu.

*Būjawererā árīquererā ta pūhrū mucubirirāca mūa, arī wereñumi Jesu*

<sup>16</sup> Eropā arītuha ōpa arī werenemomi guare daja:

—Bajamenūri yūre ĩasome mūa. Eropirā pūhrūgā ta daja mūa yūre ĩarāca, arīmi Jesu.

<sup>17</sup> ĩgū eroparīcū peerā, guapū bajamerāgā ōpa arī wereniguibū guā basi:

—“Bajamenūri yūre ĩasome mūa. Eropirā pūhrūgā ta daja mūa yūre ĩarāca,” arīgū ¿dohpa arīgū eropā arāri marire? Eropigū “Yū Pagū pohrogue wagūca,” ¿dohpa arīronore eropā arāri ĩgū? <sup>18</sup> “Bajamenūri pūhrū,” arīgū ¿dohpa arīgū eropā arāri ĩgū? ĩgū wererare ōaro pee masibeaa mari, arībū guā basi.

<sup>19</sup> Guā eropā arī wereniguicū Jesu ĩgūre guā serēpidiarire masigū guare ōpa arī weremi:

—“Bajamenūri yūre ĩasome mūa. ¿Eropirā pūhrūgā ta yūre ĩarāca daja,” yū arīrare serēpidiari mūa? ¿Irire yū arīrare masibeari mūa? <sup>20</sup> Diaye mūare arīgū iiaa: Yūhū sīricū ĩarā mūa orerāca. Eropirā būrigā būjawererāca. Yūre umupeobirininirāpū mucubirirācoma. Mūapū būjawerenirā árīquererā pūhrū mucubirirāca mūa. <sup>21</sup> Ōpā āhřaa iri: Nomeo niĵi wahgūgo igo űero tariburisubū āhřaa. Eropigo igo turaro būjaweremo. Eropā būjawerequerego, igo magūgā dehyoacū



ĭago mucubirimo. Eropigo igore pŭrirare guñabeamo igo pare. <sup>22</sup> Eropa ta mŭa dohpaguere bujawererāca. Pŭhrŭ mŭa yŭre ĭarāca daja. Eropirā mŭa turaro mucubirirāca. Mŭa eropa mucubiririre gajirā mŭare bujawerecŭ iimasosome.

<sup>23</sup> “Irinŭ yŭre mŭa ĭarinŭre yŭre serēpisome mŭa. Yŭ Pagurŭ mŭa serērire ogŭcumi. Diaye ta mŭare arĭgu iiaa. Yŭre mŭa umupeocŭ ĭagu yŭ Pagure yŭ waĭ mera mŭa serērire ĭgu mŭare ogŭcumi. <sup>24</sup> Yŭ ōpa waboro core mŭa yŭre waĭpeo Goāmŭre serēnibiribŭ mŭa. Dohpaguere yŭre waĭpeo Goāmŭre serēque. Mŭa eropa serēcŭ mŭare ĭgu ogŭcumi mŭa turaro mucubiriburire, arĭmi Jesu gŭare.

### *Nerāre Jesu ĭgu tarinŭgarire wereñumi ĭgu buherāre*

<sup>25</sup> Eropa arĭtuha ōpa arĭnemomi:

—Werenigui queori mera mŭare weremŭrabŭ. Eropa werequeregu ta pŭhrŭ mŭare werenigui queori mera weresome pare yŭhŭ. Yŭ Pagurŭre mŭa ōaro peeboro dopa weregura mŭare. <sup>26</sup> Irinŭre mŭa ya arĭburire mŭare serēbasasome yŭhŭ. Yŭre umupeorā yaha waĭ mera mŭa basi ĭgure serērāca. <sup>27</sup> Mŭa yŭre mahirā āhraa. Eropirā yŭ Pagu pohrogue yŭ aridigu arĭcŭ “Diaye ta āhraa,” arāa mŭa. Eropa arĭrā mŭa arĭcŭ ĭagu, yŭre mahirā mŭa arĭcŭ ĭagu yŭ Pagu sŭ mŭare mahimi. ĭgu eropa mahicŭ mŭa ĭgure serērāca. <sup>28</sup> Yŭ Pagu pohro arĭdigu arĭgu i yebaguere aribŭ yŭhŭ. Eropigu dohpaguere i yebague arĭdigu arĭgu yŭ Pagu pohrogue dujagŭca daja, arĭmi Jesu.

<sup>29</sup> ĭgu eroparĭcŭ gŭa ĭgu buherā ōpa arĭbŭ:

—Dohpague tamerare werenigui queori mariro wereniguigu ōaro diaye wereniguigu iiaa mŭhŭ gŭare. <sup>30</sup> Mŭhŭ ōaro masipehogu mŭ arĭcŭ gŭa dohpague ta ōaro masia. Eropirā gajirā mŭre buhemasibeamo. Eropirā irire gŭa dohpaguere ōaro masia. Gŭa irire ōaro masirā arĭrā Goāmŭ pohrogue mŭ aridigu arĭcŭ “Diaye ta āhraa,” arāa, arĭbŭ gŭa Jesure.

<sup>31</sup> Gŭa eroparĭcŭ Jesu yŭhrimi gŭare:

—Dohpaguere “Diaye ta āhraa,” ĭarĭri mŭa pare? <sup>32</sup> Pŭhrŭñari mŭa ya wirigue wasirirā yŭre cóārāca mŭa. Mŭa eropa cóāquerecŭ ta yŭ Pagurŭ yŭ mera āhrimi. Eropigu yŭhŭ yujugu ta arĭbeaa. <sup>33</sup> Ire mŭare wereyubŭ yŭre mŭa guñaturari mera mŭa ōaro arĭboro dopa. I yeba arĭrisubu Goāmŭre gamebirā pohrogue mŭa arĭcŭ mŭare ñero iirācoma erā. Erā eropa iiqueracŭ ta guñaturaque mŭa. I yeba majarā erā ñero iirare tarinŭgagu āhraa yŭhŭ. Eropirā yŭre guñatura mucubirique mŭa, arĭmi gŭare ĭgu buherāre.

## 17

### *Jesu ĭgu buherā ya arĭburire ĭgu Pagure Goāmŭre serēbasañumi*

<sup>1</sup> Eropa arĭ weretuha Jesu ŭmarogue ĭhamuju ōpa arĭ wereniguimi Goāmŭre ĭgu Pagure:

—Ahŭ, dohpaguere mŭ werediro dopa ta yŭre erā ñero iiburisubu ejanijaro iiaa. Yŭre mŭ magure erā masare umupeocŭ iique. Mŭ eropa iicŭ masare mŭre umupeocŭ iigura yŭ sŭ. <sup>2</sup> Arĭpehrerā tauro opu apibŭ mŭhŭ yŭre. Eropigu mŭ yŭre onirāre mŭ mera eropa arĭniguicŭ iigŭca mŭhŭ. <sup>3</sup> Mŭ dihta Goāmŭ gohra āhraa. Yŭhŭ Jesucristo mŭ obeodigu āhraa. Eropirā arĭpehrerā mŭre masirā, yŭ sŭre masirā mari mera ŭmaroguere eropa arĭniguicārācoma, arĭmi.

<sup>4</sup> Eropa arĭgu ta ōpa arĭnemomi Goāmŭre:

—I yebaguere mŭ iidorerare ipehoabŭ yŭhŭ. Eropa iigu masare mŭ turagu arĭrere ĭhmuabŭ yŭhŭ. <sup>5</sup> I yeba arĭboro core mŭ mera yŭ arĭcŭ ōaro turari opabŭ. Eropigu dohpaguere mŭ arĭrogue irire yŭ ōaro turagu arĭrere ĭhmuque.

<sup>6</sup> “I yeba árĩrãre yũre mũ onirãre mũre masicũ iiabũ. Mũ onirã mũ yarã àhřima. Eropigũ erãre ohabũ mũhũ yũre. Eropirã mũ dorerire iiama erã. <sup>7-8</sup> Yũre mũ wererare erãre buheabũ. Yũ buhecũ peerã yũ buherire gahmeama erã. Eropirã diaye ta mũ pohro aridigu yũ árĩcũ masima erã. Eropirã mũ obeodigu yũ árĩcũ sãre “Diaye ta àhřaa,” arĩ pepima erã.

<sup>9</sup> “Erã ya árĩburi mũre serẽgu iiaa. Gajirã ya árĩburipũre serẽgu iibeaa yũhũ. Yũre mũ onirã mũ yarã àhřima. Eropigũ erã ya árĩburire serẽgu iiaa mũre. <sup>10</sup> Erã árĩpehrerã mũ yarã àhřima. Eropirã mũ yarãpũ yaharã àhřima. Yũre umupeorã yũ turagu árĩrire ìhmuma erã masare.

<sup>11</sup> “Dohpaguere i yebaguere dujasome yũhũ. Mũ pohro wabu iiaa. Yũ eropa waquerecũ ta dohpaguere yũre mũ onirã i yebaguere dujama. Ahũ, mũhũ òagu àhřaa. Yũre mũ onirãre mũ turari mera ìhadibuque. Mũ eropa dibucũ mari yujugu ta árĩdiro dopa ta yuju curu ta árĩrãcoma erã sã. <sup>12</sup> Erã mera árĩgu mũ turari mera erãre òaro ìhadibuabũ. Yujugu tamera peamegue wagucumi mũ yare erã gojarapũ werediro dopa ta.

<sup>13</sup> “Dohpaguere mũ pohrogu wabu iiaa. Eropigũ i yeba i árĩpehrerire mũ yarãre werea yũ mera erã òaro mucubiriborore. <sup>14</sup> Mũ yare wereabũ erãre. Erã yũ iro dopa ta i yeba árĩwajamorã árĩbeama. Eropirã i yeba majarãpũ erãre ìhaturima. <sup>15</sup> “I yeba árĩrãre, yaharãre aĩaque,” arĩbeaa. Eropa arĩbiriqueregu erãre òaro ìhadibuque watĩ ñerire iidoreri erãgue arĩgu. <sup>16</sup> I yeba majagu árĩbeaa. Erã sã yũ iro dopa ta i yeba árĩwajamorã árĩbeama. <sup>17</sup> Yaharãre mũ buheri mera òarã árĩcũ iique erãre. Mũ wereripũ diaye ta àhřaa. <sup>18</sup> I yebaguere yũre mũ obeodiro dopa ta yũpũ yaharãre mũ yare buhedoregu obeoa. <sup>19</sup> Mũ gamerire iibu arĩgu, sĩribu arĩgu erã ya árĩburire sĩribu àhřaa. Eropa sĩribu àhřaa yũhũ yaharã sã mũ gamerire diaye erã òaro iiburire.

<sup>20</sup> “Yaharãre dohpague árĩrã dihtare itamuque,” arĩ serẽbeaa yũhũ. Yaharã gajirãre erã buhera pũhrũ gajirã sã yũre umupeorãcoma. “Erã sãre itamuque,” arãa yũhũ. <sup>21</sup> Yaharã árĩpehrerã erã yuju curu árĩboro dopa itamuque. Yũhũ mũ mera yujugu ta àhřaa. Mari yujugu árĩdiro dopa ta erã mari mera yuju curu ta árĩporo. Yujuro mera ta árĩporo mũ obeodigu yũ árĩrire árĩpehrerã masa “Diaye ta àhřaa,” erã arĩburire. <sup>22</sup> Yũre mũ ora turarire yaharãre ohabũ. Iri turarire oparã yujugu ta mari árĩdiro dopa ta erã sã yuju curu ta árĩrãcoma. <sup>23</sup> Yũhũ erã mera àhřaa. Eropigũ mũhũ yũ mera àhřaa. Mari eropa árĩrã árĩcũ mari yarã diaye ta òaro yuju curu ta árĩrãcoma. Yuju curu erã árĩcũ ìarã mũ obeodigu yũ árĩrire i yeba majarã masirãcoma. Eropirã yũre mũ mahidiro dopa ta yaharã sãre mũ mahirire masirãcoma masa.

<sup>24</sup> “Ahũ, i yeba árĩboro core yũre mahibu mũhũ. Eropa mahigu yũ turagu árĩrire ìhmubũ mũhũ. Eropigũ yũre mũ onirã yũ mera erã árĩcũ gahmea yũ turagu árĩrire erã masiboro dopa. <sup>25</sup> Ahũ, mũhũ òagu àhřaa. I yeba majarã ñerã mũre masibeama. Yũpũ mũre masia. Eropirã yũhũ mũ obeodigu árĩcũ masima yaharãpũ. <sup>26</sup> Mũre erãre masicũ iiabũ. Pũhrũ sãre mũre erãre masicũ iigũca yũre mũ mahidiro dopa ta gajirãre erã mahiburire. Eropigũ yaharã mera árĩguca, arĩmi Jesu mari Pagũre.

## 18

### *Jesure peresu iĩnuma*

*Mt 26.47-56; Mr 14.43-50; Lc 22.47-53*

<sup>1</sup> Ìgu eropa arĩra pũhrũ Jesu gũa sã ìgu buherã Cedrón waĩcũriyare taribuja, Olivo waĩcũri gorogue ejabũ. <sup>2</sup> Bajasuburi iri gorogue Jesu mera gũa gameneremũribũ. Eropigũ Juda Jesure ìhaturirãre wiabu iri gorore masĩmi. <sup>3</sup> Eropa masigu pe curu surara mera aridi arĩmi ìgu. Yuju curu surara gohra arĩma. Gaji curu surara Goãmũ wihire corerã arĩma. Pahia oparã, fariseo masa erã obeonirã arĩma surara. Eropa

arirã sihãri dipurure, eropãricũ yucu mojóçuma erã. <sup>4</sup> Iri gorogue gúa pohrogue erã erara pũhrũ Jesu ïgu ñero tariborore masigũ, erãre bocatĩri serẽpimi:

—¿Noare amarã iiri mũa? arĩmi Jesu.

<sup>5</sup> —Jesu Nazare majagũre ahmaa, arĩ yũhrima erã.

—Ïgu ta ãhraa yũhũ, arĩmi Jesu.

Judapũ Jesure ñeadoregũ erã mera arĩmi. <sup>6</sup> Eropirã Jesu “Ïgu ta ãhraa yũhũ,” ïgu arĩcũ erãpũ uca wa yebague dusirimaagã mehmereja wama. <sup>7</sup> Erã eropa wacũ ïagu dipaturi serẽpimi Jesu:

—¿Noare amarã iiri mũa? arĩmi.

—Jesu Nazare majagũre amarã iiaa gúa, arĩ yũhrima erã daja.

<sup>8</sup> —Ïgu ta ãhraa, arĩrabugũ yũhũ mũare. Eropirã yũre ñearã oãre yũ mera majarãre peresu iibiricãque, arĩmi Jesu.

<sup>9</sup> Eropa gũare mahigũ ne yujugũre dederecũ iibirimi. Eropa iigu ero core Goãmũre ïgu arĩdiro dopa ta iigu iimi ïgu. “Yũre mũ onirãre ne yujugũre dedeobiribũ,” ïgu arĩdiro dopa ta iigu iimi Jesu. <sup>10</sup> Eropi Simo Pedro matamijire opagũ irimijire tuãwea aĩ, pahia opũ pohro majũre Malco waĩcũgũre ïgu gamirore pacoro medijucãmi. Diayerũ maja gamirore pacoro medijucãmi <sup>11</sup> Ïgu eropa pacorocũ ïagu Jesu õpa arĩmi:

—Mũ matamijire dibuque. Yũ Pagũ ïgu yũre ñero taridorero dopa ta ñero tarigũra, arĩmi Jesu Pedore.

*Pahia tauro opũ pohrogue Jesure aĩgãñuma erã*

*Mt 26.57-58; Mr 14.53-54; Lc 22.54*

<sup>12</sup> Ïgu eropa arĩtuhacũ ta surara, erã opũ mera, Goãmũ wihire corerã surara sã Jesure ñeha ïgũre dirima. <sup>13</sup> Dirituha Ana waĩcũgũ pohrogue aĩgãmũhtama erã. Anapũ Caifa mũñecũ arĩmi. Caifapũ iri bojorire pahia tauro opũ arĩmi. <sup>14</sup> “Judio masa ya arĩburire yujugũ masũ sĩricũ õhaa,” arĩdigũ arĩmi ïgu Caifapũ.

*—Jesure masibea, arĩñumi Pedro*

*Mt 26.69-70; Mr 14.66-68; Lc 22.55-57*

<sup>15</sup> Eropigũ yũhũ Simo Pedro mera Jesure yoañarirogue nũrũsiabũ. Yũpũ pahia opũ ïgu ñha masigũ arĩbũ. Eropigũ Jesu pũhrũ, opũ arĩri wihi arĩri sãriro pohecague ñajaa wabũ. <sup>16</sup> Pedropũ disiporo dujanũgajami. Eropigũ maji wiriri disiporo coregore serẽbasabũ Pedore aĩ ñajabu. Yũ eropa serẽpiñacũ igo Pedore ñajaridoremo. Igo ñajaridorera pũhrũ yũhũ Pedore aĩ ñajaa wabũ. <sup>17</sup> Yũ eropa aĩ ñajajacũ ïago disiporo coregopũ Pedore serẽpimo:

—¿Jesu buherã mera majagũ arĩbeari mũhũ? arĩmo igo Pedore.

—Arĩbeaa yũhũ, arĩ yũhrimi Pedropũ.

<sup>18</sup> Ero core ero majarã pohro majarã, surara mera erã sõhmaburi peamere dihunirã arĩma. Yũsaa arĩbũ. Eropirã erã iri peame tũro sõhma niguima. Erã sõhmacũ ïagu Pedro sã sõhmagũ wami.

*Pahia tauro opũ Jesure serẽpi ñañumi*

*Mt 26.59-66; Mr 14.55-64; Lc 22.66-71*

<sup>19</sup> Eropi pahia tauro opũ arĩgu Jesu ïgu buherire, gúa ïgu buherã sãre serẽpi ñapũ Jesure. <sup>20</sup> Ïgu eropa arĩ serẽpicũ Jesupũ yũhripũ ïgũre:

—Arĩpehrerãre buhegũ erã core niguibũ. Eropa buhegũ mari buheri wiri Goãmũ wihi sãre masa gamenererogue eropa buhe niguicãbũ. Duhrinijagũ ne buhebirabũ yũhũ. <sup>21</sup> ¿Duhpigũ yũre serẽpiri mũhũ? Serẽpidiagũ yũre peenirãre serẽpique. Yũ wererare erã masima, arĩ yũhripũ Jesu.

<sup>22</sup> Ïgu eropãricũ surarapũ ero niguidigũ ïgu mojoto mera Jesure papũ.

—Eropa arĩbiricãque pahia tauro opure, arĩpũ surara Jesure.

<sup>23</sup> Īgu eroparĩcũ Jesu õpa arĩpũ:

—Ñero arĩ yũ wereniguirare wereque yũre. ¿Diaye majare yũ mũare werequerecũ duhpigũ pari mũhũ yũre? arĩpũ Jesu surarare.

<sup>24</sup> Pũhrũ Ana Jesure erã diridigũre Caifa pahia tauro opũ pohrogue obeopũ.

*—Jesure masibea, dipaturi arĩñumi Pedro*

*Mt 26.71-75; Mr 14.69-72; Lc 22.58-62*

<sup>25</sup> Eropi Simo Pedro peame tũro sũhma niguigu iimi. Eropa ĩgu sũhma niguicũ ĩarã ero majarã ĩgũre serẽpima.

—¿Mũ sã Jesu buherã mera majagu arĩbeari? arĩ serẽpima erã Pedrore.

—Árĩbeaa yũhũ, arĩ yũhrimi Pedro.

<sup>26</sup> Eropigu pahia tauro opũ pohro majagũpũ Pedro ĩgu gamiro pacorodigu acaweregũpũ Pedrore serẽpimi:

—¿Jesure erã ñearasubu yũ árĩcũ mũ sã erã mera árĩsabũ? arĩ serẽpimi ĩgu Pedrore.

<sup>27</sup> —Yũhũ ĩgu mera arĩbirabũ, arĩ yũhrimi Pedro. Īgu eroparĩcũ ta cãreña weregũ carimi.

*Jesure Pilato serẽpiñumi*

*Mt 27.1-2, 11-14; Mr 15.1-5; Lc 23.1-5*

<sup>28</sup> Ñamiñarigã árĩcũ Caifa ya wihigue árĩnirã Jesure aĩ wiria, iri maca majarã opũ Pilato ya wihigue aĩgã wama erã. Eropa waquererã ĩgu ya wihiguere ñajabirima. Pascua árĩcũ erã bamorã árĩrã õpa arĩma: “Judio masũ árĩbeamĩ Pilato. Eropirã mari i wihigue judio masũ árĩbigũ árĩri wihire ñajarã, mari dorerire tarinũgarãca. Eropirã mari ñajacũ ĩarã ñerã dopa ĩabocoma marire. Eropirã marire bosenu barire marire badorebiribocoma,” arĩma. Eropa arĩrã opũ ya wihire ñajabirima Jesure aĩgãnrãpũ. <sup>29</sup> Erã ñajabiricũ ĩagu Pilato erã pohrogue wihi disiporogue wiriranũgaja, erãre serẽpimi:

—¿Ñehenore ĩre weresãdiari mũa? arĩ serẽpimi Pilato erãre.

<sup>30</sup> —Ihĩ õagu ĩgu árĩcũ mũre ĩgũre obiriboaya. Ñegũ ãhrimi ĩgu, arĩ yũhrima erã.

<sup>31</sup> Erã eroparĩcũ Pilato õpa arĩmi:

—Mũa basi ĩgũre aĩaque. Eropirã mũa ya doreri arĩro dopa ta ĩgũre dipuwaja moaque, arĩmi Pilato erãre.

—Gua judio masapũ masure wejẽdoremasibea, arĩma erã Pilatore. Eropa arĩrã Jesure wejẽdoremorã iima.

<sup>32</sup> Erã eropa wejẽdorecũ Jesupũ crusague ĩgu sĩriborore ero core ĩgu werediro dopa ta eropa wabũ. <sup>33</sup> Erã eropa arĩra pũhrũ Pilatopũ wihigue maji ñaja, Jesure sihubeo ĩgũre serẽpipũ:

—¿Judio masa erã opũ ta ãhriri mũhũ? arĩ serẽpipũ.

<sup>34</sup> Jesu yũhrĩpũ ĩgũre.

—¿Mũ guñaro yũre eropa arĩ serẽpiri mũhũ? ¿O gajirã mũre erã wererare peenijagu yũre serẽpigũ iiri mũhũ? arĩpũ Jesu Pilatore.

<sup>35</sup> —Judio masũ árĩbeaa yũhũ. Mũ ya yeba majarã, pahia oparã sã, mũre wiama yũre. ¿Ñehenore ñero iiri mũhũ erã eropa mũre dipuwaja moadiacũ? arĩpũ Pilato.

<sup>36</sup> —Yũ opũ árĩri i yeba maja árĩbeaa. Yũhũ i yeba majarã opũ árĩcũ, yaharã yũre itamuboñuma judio masare ñeadorebirã. Yũ opũ árĩri i yeba maja árĩbeaa, arĩpũ Jesu Pilatore.

<sup>37</sup> —¿Eropigu opũ ãhraa arĩri mũhũ eropa arĩgu? arĩpũ Pilato.

—Mũ arĩro dopa ta opũ ta ãhraa. Masa opũ árĩbu masa dehyoabũ yũhũ. Eropigu i yebague arigũ erã opũ árĩbu aribũ. Diaye majare weregũ aribũ. Árĩpehrerã diaye árĩrire peediarã yũ wererire peema, arĩpũ Jesu.

<sup>38</sup> —¿Ñeheno ãhriri diaye árĩri? arĩpũ Pilato.

*Judio masa Jesure wejẽdoreñuma*  
*Mt 27.15-31; Mr 15.6-20; Lc 23.13-25*

Eropa arĩtuha Pilato judio masa pohro maji dujaa wa erãre weremi:

—Ìre ne gajino dipuwaja mara. <sup>39</sup> Bojori nũcũ Pascuanũ árĩcũ yujugũ peresu árĩgũre mũa wiudorea. ¿Eropigũ ìre Jesure ta mũa opũ árĩbupũre mũare wiubasacuri yũhũ? arĩmi Pilato judio masare.

<sup>40</sup> Ìgũ eroparĩcũ peerã erã judio masa õpa arĩ gaguinguima:

—Ìgũre wiubiricãque. Barrabápũre gũare wiubasaque, arĩ gaguinguima judio masa Pilatore. Barrabápũ yajaricũgũ árĩdigũ árĩpũ.

## 19

<sup>1</sup> Erã eropa arĩ gaguinguira pũhrũ Pilato Jesure tãradorepũ. Eropirã ìgũ yarã surarapũ ìgũre tãrañorã. <sup>2</sup> Tãratuha pora bero iituha, Jesure ìgũ dipuru weca duhpeoñorã. Duhpeotuha, oparã ya suhrirore ìgũre sãñorã. <sup>3</sup> Eropirã ìgũ pohro nũgaja õpa arĩñorã erã õpa arĩ wereyarã:

—Õaro árĩporo. Judio masa opũ õaro árĩporo, arĩ wereya erã mojotori mera ìgũre pañorã.

<sup>4</sup> Eropigũ Pilato dipaturi waha, judio masare weremi:

—Peeque mũa. Ìre ñeri dipuwaja mara. Eropigũ irire mũa masiburire ìgũre mũa pohro aĩgãribu iiaa, arĩmi Pilato.

<sup>5</sup> Ìgũ eropa arĩra pũhrũ Jesu pora berore peyadigũ, oparã ya suhrirore sañadigũ wihigũre árĩdigũ wiririmi. Ìgũ wiriricũ Pilato õpa arĩmi:

—Ìaque. Ihĩ ta ãhrimi ìgũ, arĩmi Pilato.

<sup>6</sup> Ìgũ eropa arĩtuhacũ peerã pahia oparã, surara Goãmũ wihi ìhadibu corerã sã Jesure ìarã gaguinguima:

—Crusague wejẽque ìgũre. Crusague pabia wejẽque ìgũre, arĩ gaguinguima erã.

—Ìgũre ne ñeri dipuwaja mara. Eropirã mũa basi ta ìgũre aĩgãque. Eropirã mũa basi ta ìgũre crusague pabia wejẽque, arĩmi Pilato erãre.

<sup>7</sup> —Ìgũ, ìgũ basi “Goãmũ magũ ãhraa,” arĩmũrami. Ìgũ eropa arĩra waja gũa doreripũ ìgũre wejẽdorea, arĩma erã Pilatore.

<sup>8</sup> Erã eroparĩcũ peegũ ucataria Pilatorũ. <sup>9</sup> Eropigũ dipaturi ìgũ wihigũre Jesure aĩ majiñajagũ Jesure serẽpipũ daja:

—¿Nohogue majagũ ãhriri mũhũ? arĩpũ Pilato Jesure.

Ìgũ eropa arĩ serẽpiquerẽcũ ta Jesu ìgũre ne yũhribiripũ:

<sup>10</sup> Ìgũ yũhribiricũ ìagũ Pilato ìgũre serẽpinemopũ:

—¿Yũre yũhribeari mũhũ? Yũhũ mũre peresu árĩgũre wiumasia. Eropigũ mũre crusague pabia wejẽdoremasia yũhũ. ¿Irire masibeari mũhũ? arĩpũ Pilato Jesure.

<sup>11</sup> Ìgũ eroparĩcũ Jesu yũhripũ daja:

—Goãmũ mũre dorebiricũ ne iimasibiriboaya mũhũ. Eropigũ yũre ìhaturirãre wiadigũpũ mũ tauro ñero dipuwajacũgũcumĩ, arĩpũ Jesu Pilatore.

<sup>12</sup> Ìgũ eroparĩcũ peegũ Pilatorũ ìgũre wiudiaripũ. Ìgũ eropa wiudiaquerẽcũ ta dipaturi judio masapũ gaguinguima:



—Jesu “Opu ahraa,” arigu mari tauro opu arigure Roma majagure ihaturigu iimi igu. Eropigu igure wiugu mu sa mari tauro opu arigure ihaturigu ahraa, arı gaguiniguima judio masa Pilatore.

<sup>13</sup> Erā eroparicū peegu Jesure wihigue arigure ai wiriri, igu dipuwaja moadoregu igu doari pēro doajami Pilatoru. Igu dipuwaja moadorero judio masa ya mera gabata waicuro empedrado waicubu. <sup>14</sup> Irinu Pascuanu bosenu aricu gua baburi gua amurinu aribu. Irisubu goeri boje core aribu. Doajatuha Pilato masare opa arı weremi:

—Ihi ta ahrimi mu opu, arımi igu.

<sup>15</sup> Igu eroparicū peerā judio masa gaguiniguima daja:

—Sıriporo igu. Sıriporo igu. Crusague pabia wejēque igure, arı gaguiniguima erā.

—¿Mu opu arıquerecū ta igure crusague pabia wejēdiari mu? arımi Pilato erāre.

Igu eroparicū opa arı yuhrima pahia oparā:

—Mari arıpehrerā tauro opu Roma majagu ahrimi. Gajigu opu marimi marire, arı yuhrima pahia oparā.

<sup>16</sup> Erā eropa arı wereniguira puhru Pilato Jesure crusague pabia wejēdoregu wiami erāre pare.

*Jesure pabia wejēnuma erā*

*Mt 27.32-44; Mr 15.21-32; Lc 23.26-43*

Eropirā surara Jesure ai wiriama. <sup>17</sup> Erā ai wiriacū Jesupu crusare igu basi ai coā, dipu pero waicurogue ejami. Gua judio masa ya mera Gólgota waicubu. <sup>18</sup> Eroque eja erā Jesure crusague pabiama. Eropirā gajirā perā sare yujugu igu diayepu, gajigure igu copu pabiama erā. Eropigu Jesu erā deco arımi. <sup>19</sup> Pilato taboamijire goja, crusague Jesu weca pabia tuodorepu igu gojaramijire. Opa arı gojara arıbu: “Ihi Jesu Nazare majagu, judio masa tauro opu ahrimi,” arı gojara arıbu irimijire. <sup>20</sup> Irimijire gojagu judio masa ya mera, Roma majarā ya mera, Griego ya mera gojara arıbu. Eropiro Jesure crusague erā pabianugudiro maca pohrogā arıbu. Eropirā bajarā judio masa Pilato igu gojarare iha buhema. <sup>21</sup> Eropirā pahia oparā iri buhetuhaja opa arırā wañorā Pilatore:

—“Ihi judio masa opu ahrimi,” arı gojabita. Gua opu arıbeamı igu. Eropigu opa arı goja amuque muhu. Ihi “Judio masa opu ahraa,” arı yujugu ta igu basi ta eropa arı pepigu ahrimi, arı goja amuque, arıñorā pahia oparā.

<sup>22</sup> Pilatoru yuhrıpu erāre:

—Yu gojarare ne yu goja amosome, arıpu Pilato erāre.

<sup>23</sup> Jesure erā pabiara puhru wapicurā surarapu Jesu suhri murare erā basi game gueremorā iima. Erā eropa guerediaquerecū ta igu suhriro yoari suhriro dohori mariri suhriro arıbu. Iri suhriro suara suhriro arıbu. <sup>24</sup> Iri suhriro eropa arıcu iarā opa arıma erā basi:

—Iñe suhrirore yeguesiribiricārā. Yujugu dihta aıporo. Eropirā iñe suhriro aıbure masimorā deabırarā mari, arıma erā basi.

Eropa deabırarā Goāmu yare erā gojarapū erā gojadiro dopa ta eropa iirā iima erā. “Yu suhrirore erā basi guerema. Eropirā yaha suhrirore aıbure masıdiarā deabırama erā,” arı gojañuma Goāmu yare erā gojarapūgue. Erā gojadiro dopa ta eropa iima erā.

<sup>25</sup> Jesu pago, Jesu buamo María Cleofa marapo, María Magdalena mera Jesu crusa pohrogā iha nıguima. <sup>26</sup> Eropigu igu pago, yuhu igu mahıgu sa igu pohrogā gua nıguıcu iagu igu pagore yure weremi:

—Dohpaguere ihi mu magu arıbu ahrimi, arımi Jesu igu pagore.

<sup>27</sup> Eropa arıtuha yure opa arı weremi igu:

—Dohpaguere ıgo mu pago arıbo ahrımo, arımi Jesu yure.

Īḡu eropa arīra pūhrū Jesu pagore yaha wihigue aī opamūribū.

*Jesu sīria wañumi*

*Mt 27.45-56; Mr 15.33-41; Lc 23.44-49*

<sup>28</sup> Īḡu eropa arī werera pūhrū árīpehreri Goāmū ĩḡure mohmedoreḡu ĩḡu apirare ĩpehogū árīḡu masipū Jesu. Eropa masiḡu Goāmū yare erā gojarapū iribojegue erā arī wereyudiro dopa ta ōpa arīmi Jesu:

—Ñemesibuca yūre, arīmi Jesu.

<sup>29</sup> Ero vino sūiri deco dicūri sorobu ero doabū. Eropirā ero árīrā Jesu eroparīcū pee mimi aīri yūsare deco mera erā yosora yūsare yucūḡu hisopo waīcūdigū ojogoro dirituma. Eropirā aī muju Jesu disiro sītuma. <sup>30</sup> Iri decore Jesu mimituha ōpa arīmi:

—Iripēta árīca, arīḡu ta ĩḡu dipurure muhmusiudija sīria wami.

*Yujugū surara Jesu patore gubuye gohra ñoseñumi ñoserimiji mera*

<sup>31</sup> Irinū Pascua bosenu core árībū. Iri bosenu ḡua baburire ḡua amurinū árībū. Eropirā gajinū Sabado árīcū iri ōari bosenu árīcū crusarigue sīrinirāre judio masa apidiabirima. Irinū ta bosenu ḡua judio masa bosenu wūari bosenu árīro ĩbū. Eropirā erā sīrinirā mūra irinū crusarigue árīcū gamebirima. Eropirā pabianirā mūrare erā ñigagū ḡōarire panuadorerā judio masa serēñorā Pilatore erāre sīri purumjudorerā. Erā eropa iira pūhrū erā dūpū mūrare aīdijumorā iima. <sup>32</sup> Erā eropa dorecū surarapū crusari pohrogue eja, yajaricūḡure copū árīḡu ñigagūre panuama: Gajipū árīḡu sāre eropa ta iima erā. <sup>33</sup> Eropa ĩiquererā Jesu ñigagūre panuabonirā ĩḡu pohro eja ĩḡu sīridiḡu árīcū ĩha panuabirima.

<sup>34</sup> Eropa panuabirā yujugū surara ĩḡu patore gohra gubuye ĩḡure ñosemi. ĩḡu eropa ñosecū mata ĩḡu di, deco mera wirībū. <sup>35</sup> ĩḡu eropa wacū ĩabū yūhū. Yūhū ĩpūre gojagū diaye mūare werea. Diaye yū wereri árīcū masia yūhū. Mūare irire werea mūa sā Jesure mūa umupeoburire. <sup>36</sup> Goāmū yare erā gojarapū werediro dopa ta eropa wabū. “ĩḡu ḡōare ne yuju ḡōare panuabirima,” erā arī gojadiro dopa ta Jesu ñigagū ḡōare ne yuju ḡōa panuabirima. <sup>37</sup> Eropiro gajipū sā Goāmū yare erā ōpa arī gojayudiro dopa ta wabū: “ĩḡure erā ñosediḡu mūrare ĩarācoma erā,” erā arī gojadiro dopa ta ḡua Jesure erā ñosediḡu mūrare ĩabū.

*Jesu dūpūre masa gobegue yaañuma*

*Mt 27.57-61; Mr 15.42-47; Lc 23.50-56*

<sup>38</sup> ĩḡu sīrira pūhrū José Arimatea majagū Jesu dūpū mūrarore aī dijubu Pilatore serēḡu ejaḡu. Josépū gajirā judio masare ḡūiḡu, Jesure umupeogū ĩḡu árīriri werebiridiḡu árīmi. Eropiḡu ĩḡu dūpū mūrarore ĩḡu serēra pūhrū Pilatorpū ĩḡu dūpūre aīdoreḡu. ĩḡu aīdorecū José crusa pohro eraa Jesu dūpū mūrarore aīḡā wami. <sup>39</sup> Nicodemo sā ĩḡu poresurire mohmorerare treinta kilo nūcūrire aīḡārimi Jesu dūpū ĩḡu amuburire. Yucūḡu di pohga, mirra waīcūri poresuri, yucūḡu pohga mera árīyoro ĩḡu mohmorera. ĩḡu Jesu mera ñami weretamudiḡu árīmi. <sup>40</sup> Eropirā erā perā Jesu dūpū mūrarore aīma. Judio masa sīrinirāre yaaro dopa ta ĩḡu dūpū mūrarore poresuri sūra pūhrū suhri gasiri mera omama. <sup>41</sup> Crusague Jesure erā pabia wejēdiro pohro pohe árībū. Iri poheḡue masa gobe utāyegue erā seara gobe árībū. Iri gobere ne yujugū sīridiḡure cóānibirima doḡpa. <sup>42</sup> Pascuanū bosenu maja ḡua judio masa baburire amurinū árībū. Eropirā iri gobe pohrogā crusa árīcū ero apima erā Jesu dūpū mūrarore.

## 20

*Jesu masa m̄riañumi**Mt 28.1-10; Mr 16.1-8; Lc 24.1-12*

<sup>1</sup> Domingo ñamiñarigã árĩcũ, boyoboro coregã María Magdalena Jesu masa gobegue ejapo. Erogue ejago iri gobere erã biharayere gajipũ tunuguraye árĩcũ ñapo igo. <sup>2</sup> Eropa ñadigo árĩgo gua pohrogue omagãrimo igo. Simo Pedro mera perã árĩbu gua. Eraa õpa arĩ weremo guare igo.

—Mari Opũ dũpũ m̄rarore aĩcãnrã ãhrama. Eropirã ñgũre erã apidiore mari masibea, arĩmo igo guare.

<sup>3</sup> Igo eroparĩcũ peerã, yũhũ Pedro mera gua perã masa gobegue ñarã wabũ gua. <sup>4</sup> Eropa ñarã warã gua perã omagãabũ. Eropa omarã, yũhũ Pedre omatarigãgũ masa gobegue ejamũhtabũ. <sup>5</sup> Erogue ejagũ muhmumereja ñha acubũ iri gobere. Eropa ñha acugũ ñgũre erã omara gasiro seyarore ñabũ. Eropigũ iri gobere ñajabiribũ. <sup>6</sup> Yũ eropa ñara pũhrũgũ Simo Pedro sã erami. Eraa masa gobegue ñajaa, ñgũ dũpũ m̄rarore erã omara suhri gasirire ñami ñgũ. <sup>7</sup> Eropigũ Jesu dipurure erã omara gasiro sãre ñami daja. Iri gasiro boje oyaro, yeguera gasiro árĩbũ. <sup>8</sup> Eropigũ yũ sã masa gobegue ñajabũ. Jesu ñgũ maricũ ñagũ “Diaye ta Jesu masa m̄riañumi,” arĩ pepibũ yũhũ. <sup>9</sup> Iri gobegue gua waboro core Goãmũ yare erã gojarapũ Cristo s̄riburire erã wererare õaro gua masinibiribũ. Dohpaguepũre iri gobere yũ ñara pũhrũ, “Diaye ta Jesu masa m̄riañumi,” arĩ pepibũ yũhũ. <sup>10</sup> Eropa ñatuhajarã gua wihigue dujaa wabũ.

*Jesu María Magdalenare dehyoãñumi**Mr 16.9-11*

<sup>11</sup> Eropi masa gobe disiporo María niguigo ore niguipo. Eropa orequerego ta muhmumereja igo ñhame acupo masa gobere. <sup>12</sup> Eropa ñhame acugo perã anyuare boreri suhricũrãre Jesu ñgũ oyadiro m̄rarogue erã doacũ ñapo igo. Yujugũ ñgũ dipuru oyadiro doapũ. Gajigũ ñgũ guburi oyadiro doapũ. <sup>13</sup> Erãre igo ñacũ erãpũ igore serẽpiñorã:

—Nomeo, ¿dohpa árĩronore orego iiri mũhũ? arĩñorã erã.

—Yũ Opũ dũpũ m̄rarore aĩcãnrã ãhrama. Eropigo erã apidiore masibea yũhũ, arĩpo igo.

<sup>14</sup> Eropa arĩtuha, majinũgaja nijago Jesure ero niguigũre ñapo igo. Eropa ñaquerego ta Jesure ñha masibiripo igo.

<sup>15</sup> —Nomeo, ¿dohpa árĩrono orego iiri mũhũ? ¿Noare amago iiri mũhũ? arĩpũ Jesu igore.

“Ihĩ i pohere ñhadibugũ ãhrimi,” arĩ pepiripo igo Jesure. Eropa arĩ pepigo õpa arĩpo igo:

—Mũhũ ñgũ dũpũ m̄rarore aĩdigũ árĩgũ wereque mũ apidiore yũre. Mũ werera pũhrũ aĩgora ñgũ dũpũ m̄rarore, arĩpo igo ñgũre.

<sup>16</sup> Igo eropa arĩra pũhrũ Jesu õpa arĩpũ:

—María, arĩpũ.

Ñgũ eropa piyucũ peego, majiñabeo igo Hebreo ya mera õpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegũ,” arĩma.

<sup>17</sup> Jesu arĩpũ:

—Yũ Pagũ pohrogue m̄rianibea dohpa yũhũ. Yũ eropa m̄rianibiricũ yũre mohpiñabiricãque. Eropigo gajirã yaharã pohrogue waque. Erã pohrogue ejago õpa arĩ wereque: “Jesu õpa arĩdoremi m̄re: ‘Yũ Pagũ pohrogue wabu iiaa. Mũa Pagũ sã ãhrimi ñgũ. Goãmũ pohrogue wabu iiaa. Mũa yagũ Goãmũ sã ãhrimi ñgũ,’ arãmi Jesu,” arĩ wereque erãre, arĩpũ Jesu Marĩare.

18 Īḡu eropa arīra pūhrū María Magdalena ḡuare Jesu buherā pohroḡue eraa weremo ḡuare:

—Mari Opūre ĩabū yūhū, arī Jesu igore ḡuare weredorerare weremo igo.

*Jesu ĩḡu buherāre dehyoañumi*

*Mt 28.16-20; Mr 16.14-18; Lc 24.36-49*

19 Irinū soorinū ñamicague ḡua Jesu buherā ḡua acawererāre judio masare ḡuirā, ḡua ya wihigūe biha ñaja doabū ḡua. ḡua eropa doacū Jesu ḡua watope dehyoanḡgaja ōpa arīmi:

—¿Āhriri mūa? arīmi.

20 Eropā arītuha ĩḡu mojotorire, ĩḡu patore sāre ḡuare ĩhmúmi. Eropirā ḡua ĩḡure ḡua opūre masa mūriadigūre ĩarā mucubiribū. 21 Dipaturi Jesu ḡuare ōpa arīmi daja:

—Ōaro árīque mūa. Yū Pagū ĩḡu yūre obeodiro dopa ta yū sã mūare obeoa, arīmi ḡuare.

22 Eropā arītuhaja ḡuare ĩḡu purisāmi. Eropā purisāḡu Espírītu Santore ḡua ñeaburire ĩhmugū iimi. ĩhmutuhaja ōpa arīmi:

—Dohpagūere Espírītu Santore ñeaque mūa mūa mera árībure. 23 Masa erā ñeri dipuwajare bujawerecū ĩarā, “Mūa ñero iirare cohāa,” arīmasia mūa erāre. Erā bujawerebiricū ĩarā, “Mūa ñeri iirare cóābiribū,” arīmasia mūa, arīmi Jesu ḡuare ĩḡu buherāre.

*Jesure masa mūriadigūre Toma ĩañumi*

24 Jesu ḡua watope ĩḡu dehyoacū Toma suhrūadigū erā arīḡu ḡua mera marimi irisubure. 25 ĩḡu eropa maricū ḡua ĩḡu mera majarā ĩḡure werebū.

—Mari Opūre ḡua ĩabū, arī wereribū ḡua ĩḡure.

ḡua eropa arī werequerecū ta ōpa arīmi Toma:

—Īḡu mojotorire erā pabiara guberire ĩabigū iri guberire yū mujusīru mera puñabigū “Diaye ta masa mūriañumi,” ne arīsome. Eropigū ĩḡu patore gubuye árīri gobere yū mojoto mera sī acubigū, “Diaye ta masa mūriañumi,” ne arīsome yūhū ĩḡure, arīmi Toma.

26 Yuju semana pūhrū ḡua ĩḡu buherā ḡua ya wihigūe árībū. Irisubure Toma ḡua mera arīmi. Iri wihi bihara wihi árībū. Bihara wihi árīquerecū ta Jesu ñaja, ḡua watope dehyoanḡgaja ōpa arīmi:

—¿Āhriri mūa? arīmi.

27 Eropā arītuha ĩḡu Tomare weremi:

—Īaque yū mojotorire. Eropi mū mujusīru mera yū mojotorire erā pabiara guberire puñaque. Eropigū mū mojoto mera yū patore gubuye árīri gobere sī acūñaque. “Diaye árībeaa,” arībircāque. “Diaye ta āhraa,” arīque mūhū, arīmi Jesu Tomare.

28 ĩḡu eropa arīra pūhrū Toma yūhrimi:

—Mūhū yū Opū āhraa. Mūhū yahagū Goāmū āhraa, arīmi Toma Jesure pare.

29 —Yūre mū ĩara pūhrū yūre “Diaye ta āhraa,” arāa. Gajirāpū yūre ĩabiriquererā ta “Diaye ta āhraa,” arī umupeorācoma. Eropirā erā turaro mucubirirā árīrācoma, arīmi Jesu Tomare.

*Jesure masa erā masiburire ipūre gojañumi Ñu*

30 Eropigū baja gajī sāre Goāmū ĩḡu turari mera ii ĩhmúmi Jesu ḡua mera arīḡu. Irire ĩḡu iirare ipūre gojapehobirabū yūhū. 31 Eropā gojapehobiriquereḡu ta ipū yū wererare gojagū, “Jesu ta Cristo Goāmū ĩḡu obeodigū āhrimi. ĩḡu diaye ta Goāmū magū āhrimi,” mūa arī masiburire gojabū. Eropirā mūa ĩḡure umupeorā Goāmū mera mūa eropa árīnigūiburire gojabū ipūre.

## 21

### *Jesu siete ĩgu buherãre dehyoañumi*

<sup>1</sup> Pũhrũ Tiberia waĩcũri ditaru tũro dipaturi gũare ĩgu buherãre dehyoami daja. Gũare dehyoagu õpa iimi ĩgu daja. <sup>2</sup> Simo Pedro, Toma suhruadigu erã arĩgu, Natanae Galilea yeba árĩri maca Canã waĩcũri maca majagu, gũa perã Zebedeo porã, gajirã sã perã gũa oã nũcu gamenere árĩbu.

<sup>3</sup> Gũa eropa gamenerera pũhrũ Simo Pedro õpa arĩmi:

—Wai wejẽgu wagu iiaa, arĩmi ĩgu.

—Gũa sã mu mera warãra, arĩbu gũa ĩgure.

Eropa arĩtuha buha wabu. Eropirã dohodiru mera wabu. Iri ñamire gũa õaro boyotahmuquererã ne yjugu waimũre wejẽbiricarabu. <sup>4</sup> Boyodiji merejacũ Jesu imiporo ĩgu niguicũ ĩaribu gũa. Eropa ĩaquererã ĩgure ĩha masibiricarabu gũa.

<sup>5</sup> Eropigu gũare õpa arĩ serẽpimi:

—Ne, ¿wai wejẽari mũa? arĩmi Jesu.

—Ne wejẽbirabu, arĩ yũhribu gũa.

<sup>6</sup> —Dohodiru diayepũ wejẽdire mehyuque. Iripũ mehyurã wai wejẽrãca, arĩbeo niguimi gũare. ĩgu eroparĩcũ peerã ĩgu arĩdiro dopa ta mehyubu. Gũa mehyura pũhrũ bajarã wai ñajama. Bajarã wai ñajacũ ĩarã wejẽdigure dohodirugue aĩsã turabiricarabu gũa. <sup>7</sup> Eropigu yũhũ Jesu ĩgu mahigu Pedrore werebu:

—Mari Opũ ãhrimi sihĩ imiporo niguigu, arĩbu Pedrore.

Yũ eroparĩcũ Jesu ĩgu árĩcũ masigu, Simo Pedro ĩgu suhrirore sañami. Wai wejẽbu ĩgu suhrirore tuweadigu arĩmi. ĩgu suhrirore sañatuha diague yuriñajami.

<sup>8</sup> Eropirã gajirã gũa buherã dohodirugue árĩbu. Cien metro yoaro diaguere payabu gũa. Eropirã wejẽdigure wai bajarã ñajadigure dohodiru mera taramajaabu gũa.

<sup>9</sup> Tũrogue tuhajarã pea niti dihta gose oyari peame weca waire ĩgu mupunugupidigure ĩabu gũa. Panru sãre ĩabu gũa.

<sup>10</sup> Gũa eropa ĩacũ Jesu gũare õpa arĩmi:

—Dohparagã mũa wejẽnirãre bajamerãgã aĩgãrique, arĩmi gũare.

<sup>11</sup> ĩgu eroparĩcũ Simo Pedro Jesu mera árĩgu ĩgu sã dohodirugue ñaja, wejẽdire tara majaami imiporogue. Pagarã wai ñajanirã ciento cincuenta y tres wai árĩma. Bajarã wai ñajaquererã wejẽdire ne yehguebirima.

<sup>12</sup> —Banirã arique, arĩmi Jesu gũare.

—¿Noano ãhriri mũhũ? arĩ serẽpiñabiribu gũa ĩgure. Gũa Opũ ĩgu árĩcũ masibu gũa. <sup>13</sup> Eropigu Jesu peame pohrogue eja, panre aĩ gũare gueremi. Wai sãre gueremi.

<sup>14</sup> Eropigu Jesu ĩgu masa mũriara pũhrũ imiporo dehyoagu ẽhresubu gũare ĩgu buherãre dehyoagu iimi.

### *Jesu Simo Pedro mera weretamuñumi*

<sup>15</sup> Gũa bara pũhrũ Jesu Simo Pedrore serẽpimi:

—Simo, Jona magu, ¿oãre mũ mahiro tauro yũre mahiri mũhũ? arĩmi Simo Pedrore.

—Opũ, mũre mahia yũhũ. Mũre yũ mahirire masia mũhũ, arĩ yũhrimi Simo Pedro. Jesu arĩmi:

—Eropigu ovejagãre mari ejodiro dopa ta yaharãre buheque mũhũ, arĩmi Jesu.

<sup>16</sup> Eropa arĩtuha dipaturi ĩgu Simo Pedrore serẽpimi daja:

—Simo, Jona magu, ¿yũre mahiri mũhũ? arĩmi Jesu.

—Opũ, mũre mahia yũhũ. Mũre yũ mahicũ masia mũhũ, arĩ yũhrimi Simo Pedro. Jesu arĩmi daja:

—Ovejare ĩhadibugũ ovejare ĩgu õaro ĩhadiburo dopa ta yaharãre õaro ĩhadibuque, arĩmi Jesu Pedrore.



<sup>17</sup> Eropa arĩtuha dipaturi Simo Pedrore serēpimi:

—Simo, Jona magu, ¿diaye ta yũre mahiri mũhu? arĩmi Jesu daja.

Ʋhresubu ĩgu eropa serēpicũ peegu Simo Pedro turaro bujaweremi.

—Opũ, mũhu masipehoa. Mũre yũ mahicũ masia mũhu, arĩmi Simo Pedro.

—Ovejare mari ejodiro dopa ta yaharãre buheque mũhu. <sup>18</sup> Diaye mũre arĩgu iiaa. Mũhu mamũ árĩgu mũ suhrire saña, mũ gamerogue curimũribũ mũhu. Eropa árĩdi árĩqueregu ta pũhrũ mũhu bugũ árĩcũ, mũ mojotorire sĩbeocũ gajigu mũre mũ suhrire sãgũcumĩ. Eropigu mũ wadiabirogue mũre aĩgãgũcumĩ, arĩmi Jesu Simo Pedrore.

<sup>19</sup> Eropa arĩgu Simo Pedro dohpa wa ĩgu sĩriborore wereyugu iimi. Eropigu Simo Pedro sĩrigũ Goãmũre, “Ōagũ, turagu ãhraa,” masa erã arĩcũ ĩgu iiborore wereyugu iimi. Eropigu Pedro mera weretamutuhagu õpa arĩmi Jesu ĩgũre:

—Diaye ta yũ buhediro dopa iique mũhu, arĩmi Jesu Pedrore.

### *Jesu ĩgu mahigu ipũre gojadigu árĩmi*

<sup>20</sup> ĩgu eroparĩcũ Pedropũ yũre Jesu ĩgu mahigure erãre yũ nurũsiacũ ĩami ĩgu. Yũpũ ĩgu ĩagupũ ero core Jesu pohrogã badoagu ĩgũre õpa arĩdigũ árĩbũ. “Opũ, ¿mũre ĩhaturirãre wiabupũ nihino árĩcuri ĩgu?” arĩ Jesure serēpidi árĩbũ yũpũ. Eropa yũre ĩagũ Pedro serēpimi Jesure:

<sup>21</sup> —Opũ, ¿ihĩ Ñupũ dohpa wagũcuri? arĩ serēpimi:

<sup>22</sup> —Ire mũre werebeaa. I yebaguere yũ dujariboro core ĩgũre árĩniguicũ yũ iicũ irire masibeaa mũhu. Eropigu ĩgu waborore guñabita mũhu. Diaye ta yũ buhediro dopa iique mũpũ, arĩmi Jesu Pedrore.

<sup>23</sup> Irire ĩgu yũre Ñure wererare peerã árĩpehrerã Jesu yarã weresiririma. Irire weresirirã õpa arĩrima erã: “Jesu ĩgu mahigu buhegu sĩrisome,” arĩ weresiririma yũre Jesu yarã erã basi. Erã eropa arĩquerecũ ta “Ĩgu sĩrisome,” arĩgu iibirimi Jesu. “I yebaguere yũ dujaricũ ĩgũre árĩniguicũ yũ iicũ irire masibeaa mũpũ,” arĩmi Jesu Pedrore.

<sup>24</sup> Jesu buhegu ire weregu, ipũre gojagu ãhraa yũhu. Eropirã i wereri diaye ta árĩcũ masia mari.

<sup>25</sup> Baja gaji sãre Jesu iimi. ĩgu iirare mari gojapehocũ iripũri gojarapũri baja tariari pũri waboya. Eropiro iripũrĩre mari dibucũ sihabiriboya i yeba. Ʋjutũria waboya yũ pepicũ. Iripẽta ãhraa.

## Jesu buhedore ĩgu apinirã erã iirare wereripũ ãhraa

—*Espíritu Santo arigucumi, arĩnumi Jesucristo ĩgu buherãre*

<sup>1-2</sup> Teófilo, ero core yu gojamũhtarapũ mera Jesu ĩgu iirare, ĩgu buherare mure weretuhabu. Te umarogue ĩgu m̄riarare weretubu. Jesu ĩgu m̄riaboro core ĩgu Espiritu Santo turari mera dorepũ ĩgu apinirãre. Erã ĩgu beyenirã árĩñorã. <sup>3</sup> Eropi Jesu ĩgu crusague ĩgu s̄irira p̄hrũ yujuyerisuburi d̄p̄ucũgu dehyoapũ ĩgu apinirãre. Cuarenta n̄ri p̄hrũ dehyoatupũ. Eropigũ ĩgu ĩgu basi ojocarigũ árĩrire ĩhmupũ erãre. Eropa dehyoagũ Goãmu mari Pagũ ĩgu opũ árĩrire õari buherire werepũ erãre.

<sup>4</sup> Gajisubu Jesu ĩgu apinirã mera árĩgu õpa arĩ erãre werepũ:

—Jerusalén ta árĩnique dohpa. “Espiritu Santore m̄are obeogura,” yu Pagũ ĩgu arĩdigũre corenique. Irire ĩgu eropa arĩrare m̄are wereabu yuhũ. <sup>5</sup> Ñu m̄are waĩyegũ deco mera m̄are waĩyemi. Yũpũ ĩgu iira tauro iigũra m̄are. Espiritu Santo m̄a mera ĩgu árĩniguicãcũ iigũra m̄are, arĩpũ Jesu.

*Jesu umarogue m̄riara*

<sup>6</sup> Eropi gajisubu utãgũgue Olivo waĩcũdigũgue Jesu erãre dehyoacũ erã serẽpiñorã ĩgũre:

—Opũ, ¿i Israe yebare mari ya yebare dohpárĩcũ gũare dipaturi doreburire apibocuri m̄hũ gũare? ¿Dohpárĩcũ mari acawererã gohrare opũ acugũcuri m̄hũ? arĩñorã ĩgũre. <sup>7</sup> Erã eroparĩcũ peegũ Jesu õpa arĩpũ:

—Mari Pagũ dihta irinũrire m̄a ya yebare m̄a õaro árĩborore apimasimi. Irinũrire m̄are masiya mara. <sup>8</sup> Eropirã m̄are Espiritu Santo ĩgu eracũ Goãmu ya turarire oparãca m̄a. Iri turarire m̄a oparã Jerusalén majarãre, árĩpehrerã Judea majarãre, Samaria majarãre, árĩpehreri yeba majarãre õari buherire buherãca m̄a yaha árĩburire. Yu s̄irirare, yu masa m̄riarare erãre buherãca m̄a, arĩ werepũ Jesu erãre.

<sup>9</sup> Eropa arĩ weretuhaja, Jesu umarogue m̄ria wapũ. Erã ĩgũre erã ĩhanũrusia mujucũ imica cururi pohecague ñaja dedere m̄ria wapũ. <sup>10</sup> Eropirã erã Jesu ĩgu m̄riagũre erã ĩhanũrusia mujurisubu perã anyua boreri suhricũrã Jesu ĩgu apinirã pohro dehyoanũgajañorã. <sup>11</sup> Eropirã erãre õpa arĩñorã:

—M̄a Galilea majarã, ¿duhpĩrã ĩhamuju niguirã iiri m̄a? Ihĩ Jesu umarogue m̄riagũ, ĩgu m̄riadiro dopa ta dipaturi arigucumi daja, arĩ wereñorã anyua.

*Jesu ĩgu apinirã Judare gohrotobure beyeñorã*

<sup>12</sup> Eropiira p̄hrũ Jesu yarã utãgũgue Olivo waĩcũdigũgue árĩnirã dijari, Jerusalengũ dujajañorã. Irigũ utãgu yuju kilómetro wecañari Jerusalén ejaboro pohro árĩyoro. <sup>13</sup> Dujaja erã umarogue erã árĩri taribugue m̄ria wañorã. Oã árĩñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda árĩñorã. Santiagopũ Alfeo magũ arĩpũ. Simopũ celote waĩcũri curu majagũ arĩpũ. Judapũ Santiago acaweregũ arĩpũ. <sup>14</sup> Eropirã bajasuburi oã árĩpehrerã, nome mera, María Jesu pago mera, Jesu pagũ porã mera õaro gamenere, turaro mera Goãm̄re mari Pagũre serẽm̄riñorã.

<sup>15</sup> Eropi irinũrire masa bajarã ciento veinte ejaboro gohra gamenereñorã. Eropigũ Pedropũ ĩgu mera majarã Cristo yarã watope nũgaja, werepũ erãre.

<sup>16</sup> —Yu acawererã, Goãmu iribojegue ĩgu arĩdiro dopa ta eropa wahaa. Irire Espiritu Santo Davire weredoreñumi Juda m̄rũ eropa warare. Juda Jesure ñeha

wejemoräre ihmudi árîmi. <sup>17</sup> Juda mürü mari mera Jesu yare ii, gúa mera majagu ta árîrimi. <sup>18</sup> Judapü ïgü Jesure ihmura wajare iri niyerure ïgü wiara pührü ïgü basi wejê sîripü. Eropigü yuhridija wa, ïgü güramisida yehguea sîria wapü. ïgü wiara niyeru mura mera gajirã merogã yebare asüñorã. <sup>19</sup> Eropirã árîpehrerã ohõ Jerusalén majarã masipehrecãma Juda mürü ïgü ñero warare. Eropa masirã ïgü niyeru mera erã asüra yebare Acéldama di cóari yeba waícua, arîma iri yebare. <sup>20</sup> Iribojegue erã arî gojadiro dopa ta eropa wahãmi Juda mürü. Salmo waícüripügue õpa arî gojañuma:

Ïgü árîdirore cóãdiro árîporo. Eropirã gajirã ïgü árîdirore árîbircãporo, arî gojañuma.

Ohõ sãre õpa arî gojañuma:

Gajigü ïgü mohmerare gohrotogü árîgücumi, arî gojañuma Salmogue, arîpü Pedro.

<sup>21-22</sup> “Eropirã mari yujugü beyerã Juda mürü gohrotobure. Ñu waïyegü ïgü masare buherasubu árîdigüre, Jesu mera mari mera árîdigüre beyero gahmea mari mera majagü árîbure. Jesu masa müriacü sãre ïadigüre beyero gahmea. Eropa beyera pührü Jesu ïgü masa müriarare mari mera buhegücumi, arî werepü Pedro ïgü acawererãre Cristo yarãre. <sup>23</sup> Ïgü eroparîcü peerã perãre beyedoboñorã erã. Yujugü José Justo waícügüre beyeñorã. Ïgü Barsabã erã arî piyugü árîpü. Eropirã gajigüre Matia waícügüre beyeñorã. <sup>24-25</sup> Erã perãre beyedobotuhaja, erãre Goãmure õpa arî serëñorã:

—Mühü gúa Opü árîpehrerã masa erã pepirire masia. Oã ährima gúa perã beyerã. Juda mürü gohrotobure nihi mü gamegüre beyeque. Juda mürü Jesure cóãdigü peamegue wadigü árîmi. Eropigü ïgüre gohrotogü Jesu ïgü apidigü árîgücumi. Eropigü gúa mera õari buherire buhegücumi, arîñorã erã Goãmure.

<sup>26</sup> Eropa arîrã ta utã mera deamuriñorã beyemorã. Matia yañe õaro wiricü, Matiapü Jesu ïgü apinirã once apinirã mera majagü dujarü.

## 2

### *Espíritu Santo ïgü yarã mera árîñugapü*

<sup>1</sup> Eropii Pentecoste waícürinü árîñü erã yujuro mera árîpehrerã yuju wihi gamenereñorã. <sup>2</sup> Irisubure ta miruñe bürigã ariro dopa ta ñmarogue büsüro cariyoro. Ero eropa büsüro caricü peeñorã árîpehrerã iri wihigue gamenere árîrã. <sup>3</sup> Eropiro peame porãrigã dopa bejari erã árîpehrerã dipu wecare dehyoayoro. Iri peame porãrigã nediru dopa bejari dehyoayoro. <sup>4</sup> Eropigü Espíritu Santo erapü erãre ïgü turarire ogü arigü. Eropirã Espíritu Santo erãre ïgü itamuropë erãpü gajirã yare õaro wereniguinügañorã.

<sup>5</sup> Irinürire Jerusalén bajarã judio masa eranirã árîñorã. Goãmure umupeorã erarã árîñorã. Erã macari nücu majarã árîñorã. <sup>6</sup> Eropirã ñmarogue büsücü peerã masa bajarã Jesu buherã pohrogue gamenere wahgãñorã. Masa nücu yare Jesu buherã erã wereniguicü peeñorã. Erã eropa wereniguicü peerã, erã pee üca wañorã.

<sup>7-8</sup> —Yaho, ¿Duhpirã oã Galilea majarã árîquererã õaro mari yare wereniguiri? Erã mari masa dehyoadirogue árîñirã iro dopa ta wereniguirã iima, arîñorã erãpü.

<sup>9-10</sup> Árîpehrerã mari yare dohpaguere wereniguirã iima. Partia majarã, Media majarã, Elam majarã, Mesopotamia majarã, Judea majarã, Capadocia majarã, Ponto majarã, Asia majarã, Frigia majarã, Panfilia majarã, Egipto majarã, Africa majarã, Cirene majarã, Romague arirã ähraa mari. Yujurãyeri judio masa ähraa mari. Gajirã judio masa árîbirã judio masa ya buheripure buherãgue ähraa mari. <sup>11</sup> Creta majarã Arabia majarã sã mari mera ährima. Eropirã oã mari yare erã wereniguicü

peea mari. Erã mari ya mera Goãmũ turari mera ïgu ðaro iirare wererã iima, arĩ wereniguiñorã masa erã basi.

<sup>12</sup> Erã eropa arĩrã uca wañorã. Erã ïarare erã peerare ðaro masibiriñorã.

—¿Dohpárirono oã gajirã ya mera Goãmũ yare eropa ðaro wereniguiñorã? arĩ game serẽpiñorã erã erã basi.

<sup>13</sup> Eropirã gajirã wereyañorã.

—¿Dohpa oã siburi ihrinijarã mererã iiri? arĩ wereyañorã gajirã erã basi.

### *Pedro masare werepũ*

<sup>14</sup> Eropigu Pedro once Jesu ïgu apinirã mera wahgãñugaja, masare werepũ:

—Mũa Judea majarã, árĩpehrerã Jerusalengue árĩrã, ire yũ werecũ ðaro peeque mũa. <sup>15</sup> Mũa pepiri diaye árĩbeaa. Dohpaguere nueve ãhraa. Ëmũgue ãhraa. Eropirã oã merebeama. <sup>16</sup> Oã Goãmũ iribojegue ïgu werediro dopa ta iirã iima. Irire Joere Goãmũ ya weremũhtadigũre ire weredoreñumi Goãmũpũ.

<sup>17</sup> Ojogorocũrinũ árĩcũ ðpa árĩroca: Yũhũ Espĩriture masare árĩpehrerãre obeogũra. Eropirã mũa porã Goãmũ yare wererãcoma. Eropirã mũa mera majarã mamara Goãmũ deyoro moarire ïarãcoma. Eropirã mũa mera majarã mũrãpũ quẽrire quẽrãcoma. <sup>18</sup> Eropigu yũ pohro majarãre yũ Espĩriture obeogũra. Eropirã erã yahare wererãcoma. <sup>19</sup> Eropigu yũ turari mera iigũca mũmũsigue. Yebague sãre yũ turari mera irire ïhmũgũca. Eropigu di mera, peame mera, imica mera ïhmũgũca yũ turarire. <sup>20</sup> Yũ eropiicũ abe mũmũ majagũ naitĩa wagũcumĩ. Ñami majagũ abe diagũ gũhyaro wagũcumĩ. Òpa waroca Cristo mũa opũ ïgu dujariburinũ, yũ arĩranũ core. Irinũ ïha uca warãca mũa. Eropiro irinũ gũhyarinũ árĩroca. <sup>21</sup> Eropiro ðpa árĩroca: Árĩpehrerã masa Cristore erã ñerire cóãdore serẽnirãre ïgu erãre peamegue wabonirãre taugũcumĩ Goãmũ, arĩ gojañumi Joe, arĩpũ Pedro masare.

<sup>22</sup> “Mũa Israe masa yũhũ werecũ peeque, arĩpũ daja. Jesu Nazare majagũpũ Goãmũ ïgu obeodigu árĩmi. Jesure “Goãmũ obeodigu ãhrimi,” masa erã arĩ masiboro dopa Jesu Goãmũ turari mera deyoro moarire masare ii ïhmucũ iidi árĩmi Goãmũ Jesure. Mũa irire masia. <sup>23</sup> Mũa Jesure wejẽdorecũ Goãmũ iribojegue ïgu “Eropa waroca,” ïgu arĩdiro dopa ta eropa wahabũ. Eropirã mũa Jesure crusague wejẽdorerã wiabũ ïgũre masa ñerãre. <sup>24</sup> Goãmũpũ Jesu sĩridigũre masuami. Eropigu dipaturi ne sĩrisome ïgu. ïgu sĩri wajabeami. Eropa ojocarinigũicãbu ãhrimi. <sup>25</sup> Òpa arĩñumi Davi iribojegue majagũ Cristo ïgu arĩbodiropã dopa ta:

Yũ Opũ, yũ mera ãhraa mũhũ. Ëmũri nũcũ Goãmũ yũ Opũ yũ pohro mũhũ árĩcũ ïamũrabũ yũhũ gũibiriboro dopa. <sup>26-27</sup> Mũhũ Goãmũ yũ sĩporãre sĩrinirã erã árĩroguere ne cóãsome. Yũre mũ mahigũre ñerogue yũ sĩporãre cóãsome mũhũ. Yũhũ mũ pohro majagũ mũre umupeogu ãhraa. Yũ dũpũre boadoresome mũhũ. Eropigu bũrigã mucubiria. Mucubiriri mera werenigũia. Eropigu mũre Goãmũre bũrigã umupeogu árĩgu gũiro mariro ðaro árĩcãa. <sup>28</sup> Yũre dipaturi ojocaricũ iigũca mũhũ. Yũ mera mũhũ árĩcũ bũrigã mucubiria, arĩ gojañumi Davi Cristo ïgu arĩbodiropã dopa ta, arĩpũ Pedro.

<sup>29</sup> “Acawererã, ðpa ðaro weregũra mũare Davire mari acaweregũ mũrũre, iribojegue majagũre, arĩnemopũ daja Pedro. ïgu Davi sĩria wañumi. Eropigu ïgũre erã yaara gobe dohpaguere árĩnia. Eropigu “Yũ dũpũre boadoresome mũhũ,” arĩ gojagũ ïgu basi waĩpeo weregũ iibiriñumi. <sup>30-31</sup> Iribojegue Goãmũ Davire ðpa arĩñumi: “Diaye ta arĩgu iiaa. Mũ pãramerã arĩturiarã mera majagũ mũ iiro dopa ta i maca majarã weca opũ árĩgũcumĩ,” arĩñumi Goãmũ Davire. Davi Goãmũ yare wereyugũ arĩñumi. Eropigu Cristore Goãmũ ta opũ acuborore masigũ, Cristo ïgu masa mũriaborore weremũhtatuhañumi Davipũ. Òpa arĩ wereñumi

ĭgu: “ĭgu sĭrinirā erā árĭroguere árĭwajosome. ĭgu dũpũ ero boasome,” arĭñumi Davi. <sup>32</sup> ĭre Jesucristore Goãmũ masuami. ĭgu masudigure gũa árĭpehrerā ĭabũ. <sup>33</sup> Eropigu Cristo Ʃmarogue mari Pagũ diayerũ árĭcumi doregũ árĭgu. Eropigu ĭgu Pagũ “Espĭritu Santore yebague obeogura,” arĭpũ ĭgure. Eropigu Cristopũ Espĭritu Santore dohpaguere obeomi guare. Eropirā Espĭritu Santore ĭgu guare obeorare ĭarā ĭiaa mũa. Eropirā mũa peea. <sup>34</sup> Davipũ Jesu ĭgu mũriadiro dopa ta Ʃmaroguere mũriabiriñumi. Eropigu ĭgu ĭgu basi õpa arĭñumi:

Goãmũ arĭmi yũ Opũre: “Ohõ yũ diayerũ doaque mũhũ. <sup>35</sup> Eropigu mũre ĭhaturirāre mũre tarinũgabasagura yũhũ mũ pohro majarā dopa árĭmorāre,” arĭmi Goãmũ yũ Opũre, arĭ gojañumi Davi.

<sup>36</sup> “Eropirā árĭpehrerā Israe masa ire õaro masique mũa. Ihĭ Jesure mũa crusague wejēdigure mũa opũ acuami Goãmũpũ. ĭgure mũare taubure Cristore apiami Goãmũ, arĭ werepũ Pedro masare.

<sup>37</sup> ĭgu eroparĭcũ peerā burigā bũjawere, gũirā masapũ Pedro sāre serēpi ĭañorā: —Gũa acawererā, ¿dohpa iirācuri gũa? arĭ serēpi ĭañorā erā.

<sup>38</sup> Erā eropa arĭ serēpi ĭacũ yũhrpũ Pedro sã.

—Mũa ñero iirire bũjawererā árĭque. Őarire gohrotoque. Eropirā Jesu waĭ mera waĭyenirā árĭque mũa árĭpehrerā. Mũa eropa ĭicũ mũa ñerire cādijigũcumi Goãmũ. Mũa eropa ĭicũ Espĭritu Santo mũa mera árĭgũcumi. Goãmũ ĭgu Espĭritu Santore eropa ocāgũcumi mũare. <sup>39</sup> Mũare, mũa porāre, mũa pāramerā árĭturiarāre yoarogue majarāre, árĭpehrerā Goãmũ mari Opũ ĭgu beyenirāre “Diaye ta itamugũra mũare,” arĭ apĩñumi Goãmũ, arĭpũ Pedro masare.

<sup>40</sup> Eropa arĭtuhaja baja werenemopũ Pedro. Eropigu turaro mera werepũ erāre.

—I yeba majarāre erā ñero iira dipuwaja dipuwaja moagũcumi Goãmũ. Eropirā mũapũ Goãmũ yarā árĭque. Mũa eropa árĭcũ ĭgu mũare dipuwaja moasome, arĭpũ Pedro masare.

<sup>41</sup> ĭgu eroparĭcũ peerā bajarā ĭgu wereniguirire õaro peeñorā. Eropigu ĭgu sã erāre waĭyerũ. Eropirā Goãmũ yarā mera majarā tres mil masa wanemoñorā. <sup>42</sup> Eropirā erā masa Cristo ĭgu apinirā mera Ʃmũri nũcũ árĭmũriñorā. Eropirā erā buherire Ʃmũri nũcũ peemũriñorā. Erā barire game guere, Goãmũre serē, Cristo ĭgu apinirā mera õaro árĭcãñorā erā.

### *Jesu yarā ne árĭnũgarā erā árĭricũrere werepũ Luca*

<sup>43</sup> Eropii Goãmũ ĭgu turari mera deyoro moarire ĭi ĭhmuñorā ĭgu apinirā. Erā eropa ĭicũ ĭarā masa árĭpehrerā ĭha Ʃca wañorā. <sup>44</sup> Eropirā árĭpehrerā Jesure umupeorā gamenere, õaro árĭcãñorā. Eropirā erā yare game gueremũriñorā. <sup>45</sup> Erā yare dua, árĭpehrerāre gajinore moorāre erā nũcũ omũriñorā erā. <sup>46</sup> Eropirā Ʃmũri nũcũ erā Goãmũ wihigue gameneremũriñorā. Árĭpehrerā yujurāyeri erā wirigue yujuyeri cururi mucubiriri mera gamenere bamũriñorā. <sup>47</sup> Erā eropa gamenererisubu “Goãmũ õagũ āhrimi,” arĭ umupeomũriñorā. Eropirā gajirā masa erāre gametarimũriñorā. Eropigu Ʃmũri nũcũ Goãmũ gajirāre ĭgu yarā wacũ ĭimũripũ.

## 3

### *Curimasibigu õagũ wapũ*

<sup>1</sup> Ñamicague tres árĭcũ Goãmũre serērisubu árĭcũ Pedro, Ñũ mera Goãmũ wihigue warā ĭiñorā. Iri wihi disiporo yujugũ Ʃmũ doapũ. <sup>2</sup> Ʃmũri nũcũ iri wihi disiporo õari disiporo waĭcũri disiporo gajirā ĭgure aĭgāri duhudoboñorā. ĭgu Ʃmũpũ ne masa dehyoagũgue ta curimasibigu árĭpũ. Eropigu ĭgu iri disiporo pohro doagũ niyerure



serēmūripū iri wihire ñajarāre. <sup>3</sup> Eropii Pedro, Ñu iri wihigue erā ejanugajacū curimasibigūpū erāre ĩha, niyerure serēpū. <sup>4</sup> Eropirā erā Pedro, Ñu mera ĩgure ĩha, Pedropū ōpa arīpū:

—Gūare ĩaque mūhū, arīpū Pedro ĩgure.

<sup>5</sup> ĩgū eroparīcū peegu erāre ĩha “Niyerure orācoma yūre,” arī pepiripū. <sup>6</sup> ĩgū eropa arī pepiquerēcū ta Pedro ĩgure ōpa arī werepū:

—Niyerure opabeaa yūhū. Opabiriqueregu ta ire iigura yūhū mūre. Jesucristo Nazare majagu ĩgū turari mera curique mūhū, arīpū Pedro curimasibigure.

<sup>7</sup> Eropa arīgū ta ĩgū mojtore diayepū maja mojtore ñeha, ĩgure tarawahgū nugupū. Irisubu ta curimasibigu ĩgū guburire, ĩgū ñigarire turari ñajayoro. <sup>8</sup> Iri eropa ñajara pūhrū ĩgū wahgānugajapū. Eropigu ĩgū waha buhrima mūria “Goāmū turagu ōagu āhrimi,” ĩgū arī mucubiridiro mera erā mera Goāmū wihigue ñajaapū pare. <sup>9</sup> ĩgū eropa curicū, “Goāmū ōagu āhrimi,” arī gaguiniguicū masa árīpehrerā ĩgure ĩañorā. <sup>10</sup> Eropirā masa ĩgure ĩha masiñorā. “Ihī iri wihi maja disiporo ōari disiporo pohro ĩgū niyerure serē doagu āhrimi,” arīñorā erā. Eropirā ĩgū eropa curicū ĩarā ĩhamaria wañorā.

### *Pedro Goāmū wihigue masare buhepū*

<sup>11</sup> Eropii curimasibiridigu Pedro sāre ĩgū duhubirisubu, masa árīpehrerā ĩhamaria warā Pedro sā pohro omagā, gamenereñorā. Erā Goāmū wihigue árīrā Salomo waīcuripūgue arīñorā. <sup>12</sup> Erā eropa gamenerera pūhrū Pedropū werepū erāre.

—Mūa Israe masa, ¿duhpirā ĩre ĩha ũcari? ¿Duhpirā gūare mūa ĩhanūri? Gūapū gūa ya turari mera, Goāmūre gūa umupeori mera, gūa ejatuharo ĩre curicū iibirabū gūa. Jesu irire iiami. <sup>13</sup> Mari ñecū sūmarā mūra Abrahā, Isaa, Jacobo mūra Goāmūre umupeomūriñorā. Erā umupeodigūpū Goāmūpū ĩgū magure Jesure turagu, ōagu ĩgū árīcū ĩhmumūrimi. Mūa Jesure ĩhaturirāre ohabū. Eropigu Pilato ĩgure ĩgū peresugue wiudiacū mūapū ĩgure ĩgū wiucū gamebirabū. Pilatore Jesure ohabū mūa. <sup>14</sup> Pilato ĩgure wiudiarāmī. Mūapū Jesure ōagure, ōaro iigure gamebirā gajigure masa wejēdigūpūre wiudoreabū mūa. <sup>15</sup> Eropirā Jesure mari ojocaricū iigure wejēabū mūa. ĩgū sīricū Goāmū ĩgure masuami. ĩgure masudigure gūa ĩabū. <sup>16</sup> Eropirā gūa ĩgure umupeorā āhraa. Gūa eropa umupeocū ĩagu ĩre mūa dohpague ĩagure mūa ĩha masigure Jesupū ĩgū turari mera ĩgū curicū iiami.

<sup>17</sup> “Yū acawererā, mari oparā mera Jesure ōaro masibiriquererā ĩgure wejēabū mūa. Irire masia yūhū. <sup>18</sup> Iribojegue majarā Goāmū yare weremūhtanirā Goāmū erāre ĩgū weredoređiro dopa ta wereñuma erā sā. “Cristo ñero tarīgūcumī,” arī wereyuñuma erā. Erā eropa arī werediro dopa ta eropa wabū dohpaguere. <sup>19</sup> Eropirā dohpaguere mūa ñero iirare bājawererā árīque. Ōaripūre gohrotoque. Cristore umupeoque. Mūa eropa iicū mūa ñerire cādijīgūcumī Goāmū. Eropigu mūare mucubiririnūre apīgūcumī ĩgū. Eropirā ōaro sīñajarāca. <sup>20</sup> Eropigu Goāmū Cristore ĩgū beyedigure mūare obeogūcumī daja. Cristo Jesu ta āhrimi. <sup>21</sup> ĩgū Jesu Goāmū pohroque árīcumī dohpa. Iribojegue Goāmū ĩgū yare weremūhtanirāre wereyudoreñumi ĩgū iiburire. ĩgū werediro dopa ta árīpehrero amugū iicumī. ĩgū amutuhaja Cristore obeogūcumī daja. <sup>22</sup> Moise irire weregu ōpa arīñumi: “Mari mera majagure mari acaweregure Goāmū yare weremūhtagure Goāmū mari Opū obeogūcumī mūare. Yūre ĩgū obeodiro dopa ta obeogūcumī ĩgū sāre. Eropirā mūare ĩgū werecū peepēhrecārāca mūa. <sup>23</sup> Ōpa árīroca. Árīpehrerā ĩgure peebirā, ĩgū dorerire iibirā ĩgū cōānirā árīrācoma. Goāmū yarā mera majarā árīsome erā,” arīmūriñumi Moise iribojeque.

<sup>24</sup> “Árīpehrerã Goãmũ yare weremũhtanirã nũcũ, Samue ĩgu pũhrũ árĩrã sã i dohpague warire wereyuũma. <sup>25</sup> Mari ñecũ sũmarãre iribojegue majarãre “Masare õaro iigũra,” arĩ weremũriũnumi. ĩgu erãre werediro dopa iimi marire dohpaguere. Eropigu Abrahãre ĩgu arĩdiro dopa ta mari sãre arĩ weregu iĩnumi. Őpa arĩ wereũnumi Goãmũ Abrahãre: “Árīpehreri yeba majarãre õaro iigũra. Őpa irire iigũra: Mũ acaweregu pũhrũ árĩgũpũ masare õaro iibasagũcumĩ yũre,” arĩũnumi Goãmũ Abrahãre. <sup>26</sup> Maripũre Goãmũ Jesure ĩgu magũre ĩgu masudigũre mari pohrogue obeomũhtami mari ñero iirare cõãbure. Eropa iigu ĩgu mũare õaro iiami, arĩpũ Pedro erãre.

## 4

### *Pedro, Ñũ mera oparãre weretamuñorã*

<sup>1-3</sup> ĩgu eropa wereniguisubu pahia, Goãmũ wihire corerã surara opu, saduceo masa sã erãre peeñorã. Őpa buhepũ Pedro Ñũ mera masare:

—Jesu ĩgu sĩrira pũhrũ masa mũria wami. ĩgu eropa masa mũriacũ ĩarã, pũhrũ mari sã ĩgu yarã mari masa mũriaborore masia mari, arĩ werepũ Pedro sã. Erã eroparĩcũ peerã, oparãpũ erã mera guañorã. Eropa guarã naimerecũ ĩarã erã Pedore, gajirã Jesu apinirã sãre ñeha, peresu iĩñorã. <sup>4</sup> Oparã eropa gamebiriquerecũ ta masa bajarã Goãmũ yare Pedro sã buherire peerã “Diaye ta ãhraa,” arĩ pepiñorã erã. Eropirã Jesu yarã bajarã wañorã. Erã mũma dihtare queocũ Jesure umupeorã cinco mil masa árĩñorã.

<sup>5</sup> Eropii gajinũ iri maca majarã mũrã, oparã, judio masa buherã mera Jerusalengue gamenereñorã. <sup>6</sup> Eropigu pahia opu Ana waĩcũgu ero arĩpũ. ĩgu acawererã sã árĩñorã. Caifa, Ñũ, Alejandro, gajirã mera Ana acawererã árĩñorã.

<sup>7</sup> Eropirã erã Pedro sãre erãre gamebeocũ, surarapũ peresugue erãre aĩwiu oparã watopegue erãre aĩ ejañorã. Erã eropa iira pũhrũ oparã serẽpi ĩañorã Pedro sãre.

—¿Noa ya turari mera mũa curimasibigũre õagũ iiri? ¿Noa ãhriri mũare irire iidoregũ? arĩ serẽpi ĩañorã erã.

<sup>8</sup> Erã eroparĩcũ peegu Espĩritu Santo ĩgu itamurire õaro opagu werepũ Pedro erãre.

<sup>9</sup> —Mũa oparã, mũa mũrã, ¿gũa curimasibigũre gũa õagũ iirare serẽpi ĩarã iiri mũa guare? <sup>10</sup> Ire masique mũa árīpehrerã, Israe masa. Ire Jesucristo eropa iiami. Jesu Nazare majagu, mũa crusague wejẽdigũ, Goãmũ masudigu, ĩgũpũ ihĩ curimasibigũre õagũ wacũ iiami. Eropirã ĩre dohpaguere mũa ĩhuro ĩgu curicũ ĩhaa mũa. Őpa ãhraa Goãmũ yare erã gojarapũgue Cristore wereyuro: <sup>11</sup> “Ihĩ Cristo utãye iro dopa ta Goãmũ beyedigũ ãhrimi. ĩgu Goãmũ beyedigũ árĩquerecũ masa ĩgũre gamesome. ĩgũre erã gamebiriquerecũ Goãmũ ĩgũre opu acuami árīpehrerãre dorebure,” arĩ gojaũnumi iribojegue. <sup>12</sup> Ne gajigu masare peamegue wabonirãre taugũ ne marimi. I yebaguere Jesu dihta masare taugũ ãhrimi. Ne gajirã ĩgu iro dopa árĩrã ne marima, arĩ werepũ Pedro erãre.

<sup>13</sup> ĩgu eropa arĩ werera pũhrũ, Pedro Ñũ mera buheya marirã erã arĩcũ ĩarã, gũiro mariro erã buhecũ ĩarã, mũrã, oparã, judio masa buherã mera pee mũca wañorã. Eropirã Jesu iro dopa erã buhecũ ĩarã, õpa pepiñorã erã. “Pedro, Ñũ sã diaye ta Jesu mera majarã ta ãhrima oã,” arĩ pepiñorã erã. <sup>14</sup> Eropigu curimasibiridigu Pedro sã mera arĩpũ. ĩgu, ĩgu õagũ arĩcũ ĩañorã mũrã, oparã, judio masa buherã mera. Eropirã erã Pedro sãre “Ñero iirã iiaa,” arĩ weresãmasibiriñorã. <sup>15</sup> Eropa weresãmasibirã oparã erã gamenereri taribugue árĩrãre Pedro sãre wiriadoreñorã. <sup>16</sup> Erã wiriara pũhrũ erã basi weretamuñorã.

—¿Oãre dohpa iirãcuri mari? arĩ wereniguiñorã erã.

Õpa arĩ wereniguinemoñorã:

—Pedro, Ñu mera Goãmũ turari mera curimasibigũre curicũ iinirã ãhrama. Eropirã Jerusalén majarã árĩpehrerã erã eropa òaro iirare masiama. Eropirã maripũ “Eropa iibirama erã,” arĩmasibea mari. <sup>17</sup> Eropirã Jesu ïgũ buherare gajirãre buhedorebircãrã erãre gajirã erã buherire gameri arĩrã, arĩ wereniguiñorã erã erã basi.

<sup>18</sup> Eropa arĩ wereniguituha Pedro sãre sihubeo õpa arĩñorã:

—Jesu ïgũ buherare ne buhebircãque gajirãre. Irire ne wereniguibircãque, arĩriñorã erãre.

<sup>19</sup> Erã eroparĩcũ peerã Pedro Ñu mera õpa arĩñorã erãre:

—Mũa õpa arĩcũ mũare yũhrirã Goãmũpũre tarinũgãrã iiboca gũa. ¿Nihi yapũre gũa werecũ gahmeri mũa? ¿Mũa yapũre gũa iicũ gahmeri mũa? ¿Goãmũ yapũre gũa iicũ gahmeri mũa? <sup>20</sup> Gũapũre gũa ïarare, gũa peerare gũare yayasãma masiya mara masare, arĩ yũhripũ Pedro Ñu mera.

<sup>21</sup> Erã eroparĩcũ peerã oparãpũ dipaturi doreriñorã daja erãre.

—Jesu ïgũ buherare mũa buherã ñero tarirãca mũa, arĩriñorã oparã erãre.

Erãre “Ñu, Pedro mera ñero iirã iima,” arĩmasibiriñorã erã. Eropirã masapũ curimasibiridigũ ïgũ òagũ wacũ ïarã, “Goãmũ diaye ta òagũ ãhrimi,” arĩñorã masa. Erã eroparĩcũ peerã oparãpũ Pedro sãre dipuwaja moamasibiri, erãre wiuñorã.

<sup>22</sup> Curimasibigũ òagũ erã iidigũ cuarenta bojori opagũ árĩpũ.

### *Jesu yarã erã gũibiriburire serẽñorã Goãmũre*

<sup>23</sup> Eropii, Pedro Ñu mera erã mera majarã pohrogue eja, pahia oparã, mũrã erãre erã arĩrare wereñorã. <sup>24</sup> Erã eroparĩcũ peerã erã árĩpehrerã yujuro mera mari Pagũre Goãmũre serẽñorã.

—Gũa Opũ, mũhũ ãmarore, yebare, diarire iigũ, árĩpehrerãre ojocaricũ iigũ ãhraa mũhũ. <sup>25</sup> Mũ Espĩritu Santo gũa ñecũre Davi mũrũre mũ pohro majagũre õpa weredoreyoro mũ arĩdiro dopa ta:

¿Duhpirã judio masa árĩbirã guari? Pee masibirã ãhrima masa. <sup>26</sup> Baja macari majarã oparã gamenere, mari Opũ Goãmũre, ïgũ opũ acudigũ Cristo sãre ïhaturi, ñero iidiaama erã, arĩ weredoreyoro mũhũ Davire iribojegũere.

<sup>27</sup> Eropa ta ãhraa, arĩ serẽnemoñorã Goãmũre. I macare Herode, Poncio Pilato, judio masa árĩbirã, judio masa mera mũ beyedigũre Jesure òagũ mũ pohro majagũre wejẽdia gamenereama. <sup>28</sup> Irisubu mũ gamediro dopa ta “Eropa waroca,” mũ arĩdiro dopa ta iiaama erã. Mũ masiri mera eropa wereyoro mũhũ. <sup>29</sup> Eropigũ, gũa Opũ, erã gũare “Mũa buheri waja ñero tarirãca,” erã arĩrare guñaque mũhũ. Gũare itamuque. Eropigũ gũare mũ pohro majarãre gũiro mariro mũ buherire weredoreque gũare. <sup>30</sup> Mũhũ mũ turari mera dorecũrãre òarã iique. Eropigũ mũ buherire gũiro mariro werecũ iique gũare. Eropigũ mũ deyoro moarare Jesu mũ pohro majagũ ïgũ turari mera ii ïhmudoreque gũare. Eropigũ dorecũrãre òarã gũa wadorecũ mũ turari mera itamuque gũare, arĩ serẽñorã erã mari Pagũre.

<sup>31</sup> Erã eropa arĩ serẽra pũhrũ, erã gamenereri wihi ñohmemaa wayoro. Ero eropa ñohmecũ ta Espĩritu Santo ïgũ turari mera guñaturarã wacũ iipũ erãre. Eropa warã, Espĩritu Santo ïgũ dorediro dopa ta iinorã. Gũiro mariro Goãmũ yare wereñorã erã.

### *Jesu yarã erã yare dũca wañorã*

<sup>32-33</sup> Eropirã Goãmũ ïgũ turari mera erã Jesu ïgũ apinirã õpa arĩ wereñorã masare: Jesure Goãmũ masudigũre gũa ïabũ, arĩ wereñorã erã masare. Eropigũ Goãmũ erã árĩpehrerãre òaro itamumũripũ. Eropirã Jesure umupeorã bajarã arĩñorã. Erã yujuropa ta pepirã arĩmũriñorã. Eropirã erã erã yare erã doberire “Yaha dihta ãhraa,” ne arĩbiriñorã. Erã árĩpehrerã erã yare gajinore moorãre erã mera majarãre

dūca wamuriñorā. <sup>34</sup> Eropirā erā mera majarā mojomorocurā marimuriñorā. Erā mera majarā yeba oparā, wiri oparā erā yare duamuriñorā. <sup>35</sup> Eropa duarā erā wajasearare erā aīgāri, Jesu ĩgu apinirāre omuriñorā. Eropirā erāpū irire erā mera majarāre dūca wamuriñorā. Arīpehrerā opabirāre dūca wañorā. <sup>36</sup> Irisubure yujugu erā mera majagu José waicugu arīpū. Jesu ĩgu apinirā Josére Bernabé waīyeñorā. ĩgu waī Bernabé “Masare mucubiricū ĩgu āhrimi,” arīma Griego ya mera. ĩgu Leví ya curu majagu Chipre nūguro majagu arīpū. <sup>37</sup> Eropigu ĩgu poeri opagu arīgu irire duapū. Eropigu ĩgu wajasearare Jesu ĩgu apinirāre ōpū ĩgu gajirāre gueredoregu.

## 5

### *Ananía ĩgu marapo Safira mera gūyapū*

<sup>1</sup> Gajirā sā Bernabé iro dopa iimuririñorā. Erā Ananía waicugu, ĩgu marapo Safira waicugo arīñorā. Eropigu Ananía erā ya poerire duapū ĩgu. <sup>2</sup> Eropa duaqueregu ta ĩgu wajasearare ĩgu basi aīpū. ĩgu marapo sā ĩgu eropa iirare masipo. Eropigu erā wajasea dūharare aīgāri, Jesu ĩgu apinirāre ōpū Ananíapū. Eropa ogū, “Opehogū ĩaa,” arīripū ĩgu. <sup>3</sup> ĩgu eropa iicū ĩagu Pedro ĩgure werepū.

—Ananía, watī mure gūyadorecū mūhū gūyabū Espiritu Santore. Eropigu mūa ya poerire dua, mū wajasearare mū basi aību āhrabū mūhū. <sup>4</sup> Mū duaboro core mūa ya poeri arīribū. Eropiro mū duara pūhrū mū ya wajatari ta āhrabū. ¿Eropigu dohpā arīronore eropa gūyari mūhū? Mūhū gūa dihtare gūyabeaa. Goāmū sāre gūyabū mūhū, arīpū Pedro ĩgure.

<sup>5</sup> ĩgu eroparīcū peegu ta, Ananíapū mehmereja, sīria wapū. Eropirā arīpehrerā ĩgu eropa warare masirā, būrigā güiñorā. <sup>6</sup> ĩgu sīrira pūhrū mamarā ahri, ĩgu dūpūre suhri mera oma, disiporogue aīgā, yaañorā ĩgure.

<sup>7</sup> Eropii ūhre hora pūhrū Ananía mūgū marapo ĩgu sīrirare masibigo Pedro pohrogue ñajapo. <sup>8</sup> Eropigu Pedro igore ōpā arīpū:

—¿Mūa ya poerire duanijarā dipē wajatari mūa? arīpū ĩgu. Eropigo igo igo marapū mūgū ĩgu arīrañepē ta, “Iripēta wajatabū gūa,” arī wereripo igo sā. <sup>9</sup> Eropigu Pedro igore werepū:

—¿Duhpirā mūa yujuro mera Goāmū Espiriture gūya ĩhadiari mūa? Peeque dohpaguere. Mū marapū mūgūre yaanirā ta ahrima dāja. Mū sāre mū dūpūre aīrā ahrima, arīpū Pedro.

<sup>10</sup> ĩgu eropa arī werecū ta igo mehmereja, sīria wapo. Eropirā mamarā iri wihire ñajarā, igo ya dūpū mūrarore aī wiria wañorā. Aīgā, igo marapū mūgū dipaba yaañorā. <sup>11</sup> Eropirā Jesu yarā arīpehrerā gajirā irire peerā sā, güitariacāñorā.

### *Jesu ĩgu apinirā Goāmū turari mera ii ĩhmuñorā*

<sup>12</sup> Eropirā masa watope Jesu ĩgu apinirā bajasuburi Goāmū turari mera deyoro moarire ii ĩhumuriñorā. Eropirā erā Salomo waicuri taribugue ōari taribugue gameneremuriñorā. <sup>13</sup> Eropirā gajirā erāre güirā, erā pohrogue wabiriñorā. Eropa güiquererā erāre Jesu ĩgu apinirāre, “Ōarā āhrima oā,” arīñorā masa. <sup>14</sup> Eropirā ūma, nome bajarā Jesure umupeonugañorā. <sup>15</sup> Eropirā erā dorecurāre aīgāri, omasiariñe mera pūtāpi apigāñorā Pedro waburi mague erāre. Eropirā dorecurāre ōarā wacū gamerā Pedro erāre ĩgu ñapeocū gameñorā erā aīgānirāpū. Erāre ĩgu ñapeobiricū Pedro erā weca ĩgu watī merejariñe dihtare gameñorā erā. Iri dihtare gameñorā erā erā ōarā waboro dopa. <sup>16</sup> Eropirā Jerusalén pohro arīri macari majarā sā, dorecurāre, watēa ñajasūnirā sāre aīgāriñorā. Eropirā erā arīpehrerā erā dūpū ōaro wañorā.

### *Oparāpū Jesu ĩgu apinirāre ñero iidoreñorā*



<sup>17</sup> Īḡu eropa iicũ ĩarã pahia opu, ĩḡu mera majarã mera Pedro sãre peyocupu. Pahia opu mera majarã saduceo masa áriñorã. <sup>18</sup> Pedro sã iirare peerã erã guatarirã Jesu ĩḡu apinirãre ñehadore, peresu iinorã. <sup>19</sup> Eropiira puhrũ iri ñami ta Goãmu ĩḡu anyu pãgũpu erãre peresugue áriãre. Tuhajanugu erãre wiriridore opa arĩ werepu anyu:

<sup>20</sup> —Goãmu wihigue waque. Iri wihigue áriã Goãmu masare ĩḡu tauburire, iri õari buherire wereque masare, arĩpu anyu erãre.

<sup>21</sup> Īḡu eroparĩcũ peerã ñamigã ñari Goãmu ya wihigue ñaja, masare buheñorã erã. Irinu ta pahia opu, ĩḡu mera majarã, Israe masa oparã mera gamenere, Jesu ĩḡu apinirãre peresugue áriãre aĩḡaridoreripu surara oparãre. <sup>22</sup> Eropirã surara oparã peresugue doarãpũre aĩḡarirã wariñorã. Erãre bocabiriñorã. Bocabiri dujaa wañorã daja. <sup>23</sup> Dujaja wereñorã erã oparãre.

—Peresugue áriã disiporori bihara disiporori ahrabu. Eropirã erã iri disiporori pohro peresu iinirãre corerã niguiama. Eropa ĩabu gua. Eropirã gua disiporore pãḡũcũ, masa marabu, arĩ wereñorã erã.

<sup>24</sup> Erã eroparĩcũ peerã, surara Goãmu wihire corenirã opu, pahia oparã mera irire pee uca wa, “¿Dohpa waha ojogorocurãcuri erã eropa iirã?” arĩ pepiñorã erã.

<sup>25</sup> Eropigũ erã pohroque gajigũ ahri, erãre werepu.

—Mũa peresu iinirã Goãmu wihigue ahrama. ĩarã waque bu. Iri wihigue masare buherã iama erã, arĩ werepu.

<sup>26</sup> Īḡu eroparĩcũ pee, surara opu, ĩḡu surara mera waha, Jesu ĩḡu apinirãre dipaturi ñeagãriñorã daja. Eropa ñearã erãre surara turibiriñorã. Eropirã erãre pabonirã áriquererã, masare ḡuirã pabiriñorã erãre. “Oãre mari pacũ gajirã masapu utã mera dearãcoma marire,” arĩ pepiñorã erã surarapu. <sup>27</sup> Eropirã erãre aĩḡari, oparã core duhudoboñorã erãre. Erã eropa aĩ eraa dobocũ pahia opu erãre turipu.

<sup>28</sup> —Mũare gua weretuhabu. Jesu yare buhebiricãque, arĩrabu gua mũare. Gua eropa arĩquerecũ ta mũapu arĩpehrerã Jerusalén majarãre buhea mũa. Jesu ĩḡu sĩrira waja, ḡuare dipuwajacucũ iidiarã iica mũa, arĩpu pahia opu.

<sup>29</sup> Īḡu eroparĩcũ peegu Pedropu gajirã Jesu ĩḡu apinirã mera yuhripu.

—Goãmu ĩḡu dorerapũre iimũhtarãra. Eropirã puhrũ Goãmu gamecũ masa erã dorerire iirãra. <sup>30</sup> Goãmu mari acawererã iribojegue majarã opu Jesure masudi arĩmi. Īḡu ta ahrimi mũa crusague pabia wejẽdigũ. <sup>31</sup> Jesure masura puhrũ Goãmu ĩḡure “Oãḡu ahrimi,” arĩ, ĩḡu diayepu doadoremi Jesure ĩḡu Pagupu. Eropigũ Jesu masa opu, masare masugu arĩḡu, Israe masare erã ñeri iirare bujawererã arĩdoreḡu, erã ñerire cóadiami Jesu. <sup>32</sup> Eropirã ḡuapu Jesu ĩḡu iirare ĩanirã áriã irire werea gua. Espiritu Santo irire ĩhmugũ arĩḡu weremi ĩḡu sã. ĩḡure Espiritu Santore Goãmu oboami. Arĩpehrerã Goãmu dorerire iirãre ĩḡu Espiritu Santore ohomi, arĩ werepu erãre.

<sup>33</sup> Īḡu eroparĩcũ peerã oparãpu guatariacãñorã. Eropirã erã Jesu ĩḡu apinirãre wejẽdiariñorã. <sup>34</sup> Irisubure erore Gamalie fariseo masu ero arĩḡu erãre wejẽdoreḡu iibiripu. Īḡu oparã mera majagu, dorerire buheḡu ĩḡu arĩcũ, masa erã umupeogu arĩpu. Eropigũ Īḡu Jesu ĩḡu apinirãre merogã coredoreḡu gajipugue erãre aĩḡadorepu surarare. <sup>35</sup> Erã eropa aĩḡara puhrũ ĩḡupu werepu masare.

—Mũa Israe masa, oãre mũa iiburire õaro pepique mũague wejẽri arĩã.

<sup>36</sup> Guñaque Teuda mũurũre. ĩḡu, ĩḡu basi “Masare tarinũḡagu ahraa yuhu,” arĩmi masare. Eropirã masa bajarã cuatrocientos masa ĩḡu mera majarã dujama. Eropirã gajirãpu ĩḡure wejẽnirã arĩma. ĩḡu sĩricũ ĩha ĩḡu buherire buhenirãpu wasiria wanirã arĩma. Eropirã erã dohpaguere marima. <sup>37</sup> Puhrũ masare erã queorisubu arĩcũ Galilea majagu Juda waĩcũḡu masare ĩḡu buhecũ ĩḡu mera masa bajarã dujama.



Īgu sã sīria wadi árīmi. Eropii ĩgu yarã árīpehrerã wasiria wanirã árīma erã sã. <sup>38</sup> Eroparīgu dohpaguere mũare ire arīgu iiaa. Eropa ĩacãque oãre Jesu yare wererãre. Eropii i buheri oã erã ya buheri Goãmũ ya buheri árībiro, pehrea waroca. <sup>39</sup> Goãmũ ya buheripũ árīro, ne pehresome. I buheri Goãmũ ya árīcũ ne ire ne dederecũ iimasibea mũa. Mũa ire dederecũ iidiarã Goãmũ mera gamequeãrã iiboca mũa, arīpũ Gamalie erãre.

Īgu eropa arī werecũ peerã, “Diaye ta ãhraa,” arī, peeñorã oparã. <sup>40</sup> Eropirã erã Jesu apinirãre sihubeo, erã eracũ ĩarã erãre tãrañorã. “Jesu yare buhebircãque mũa,” arītuhaja, erãre wadoreñorã.

<sup>41</sup> Eropa wadorecũ peerã erã oparã pohroque árīnirã waha wañorã. Jesu ya árīburire ñero tarirã bũrigã mucubiriñorã Jesu ĩgu apinirã. <sup>42</sup> Eropirã mũuri nũcu erã ya wirigue, Goãmũ wihigue sãre Jesucristo yare buhe weremuriñorã erã.

## 6

### *Siete itamumorãre beyeñorã Jesu yarã*

<sup>1</sup> Irinũrire Jesure umupeorã bajarã wañorã. Eropirã griego masa judio masa mera gameturiñorã erã Jesu yarã dihta árīquererã. Griego masa wapeweyarã nomere mũuri nũcu erã barire òaro erã guerebircũ ĩarã judio masare turiñorã. <sup>2</sup> Eropirã Jesu ĩgu apinirã, docerũ Jesure umupeorãre árīpehrerãre erã pohroque sihubeo, òpa arī wereñorã:

—Gũa Goãmũ yare buherã ãhraa gũa. Barire gueremorãno árībeaa gũa. <sup>3</sup> Eropirã mũa gũa acawererã, siete mũare, gajirã “Òarã,” erã arīrãre, Espĩritu Santo oparãre amaque. Erãpũre barire gueredoreque mũa. <sup>4</sup> Eropirã gũarũ mũuri nũcu Goãmũre serẽ Goãmũ yare buherãca, arīñorã Jesu apinirã erã Jesure umupeorãre.

<sup>5</sup> Erã eroparīcũ peerã, “Áũ, eropa ta iirã,” arīñorã erã árīpehrerã Jesure umupeorã. Eropirã Estebanre Cristore umupeogũre, Espĩritu Santo turarire wũaro opagũre beyeñorã erã. Gajirã sãre beyeñorã. Felipere, Prócorore, Nicanore, Timore, Parmenare, Nicolare bari gueremorãre beyeñorã erã. Nicolapũ judio masũ árībigũ Antioquía majagũ judio masa buherire gamegũ erã mera ñajadigũ arīpũ. <sup>6</sup> Erã beyenirãre Jesu ĩgu apinirã pohro aĩ erañorã gajirã Jesu yarãpũ. Erã eropa aĩ eracũ ĩarã erã Goãmũre serẽbasañorã. Eropirã erã beyenirã weca erã mojotorire duhpeoñorã Goãmũ turarire orã.

<sup>7</sup> Eropirã iri yeba majarã Goãmũ yare masipehrenijarã iĩñorã. Eropirã Jerusalengue árīrã Jesure umupeorã bajarã wanemoñorã daja. Eropirã pahia sã bajarã Jesu yarã wañorã.

### *Gajirã Estebanre ñeañorã*

<sup>8</sup> Eropigũ Esteban Goãmũ turarire opagũ arīpũ. Īgu Goãmũ òaro iigu arīpũ. Eropigũ ĩgu Goãmũ turari mera deyoro moarire ii ĩhmupũ masa erã ĩaro. <sup>9</sup> Judio masa erã buheri wihi majarã ĩgũre ĩhaturiñorã. Eropirã ĩgu mera game dũyasonũgañorã. Erã Liberto waĩcũrã arīñorã. Eropirã erã Cirene majarã, Alejandría majarã, Cilicia majarã, Asia majarã mera bajarã arīñorã erã Esteban mera dũyatorã. <sup>10</sup> Esteban masigũ dopa ta, Espĩritu Santore wũaro opagũ ta ĩgu wereniguicũ peerã erã yujuro bojebiriñorã ĩgũre. <sup>11</sup> Eropa yujuro bojebirã erã gajirãre ahma gũyadore, wajayeñorã erãre. Erã eropa gũyadorecũ òpa arī weresãñorã erã Estebanre:

—Ihĩ Goãmũre ĩgu ñero wereniguicũ, Moiserẽ ĩgu ñero wereniguicũ sãre gũa peeabũ, arī weresãriñorã erã gũyarãpũ gajirãre.

<sup>12</sup> Erã eroparĩcũ peerã masa, judio masa buherã, murã sã ïgu mera guañorã. Eropirã erã Estebanre ñeha erã oparã pohro aïgãñorã ïgure. <sup>13-14</sup> Eropirã erã gajirãre gũyanemodoreñorã. Õpa arĩñorã erãpũ:

—Ihĩ umuri nũcu Goãmũ wihire, ïgu doreri sãre ñero wereniguigu ãhrimi. Peeabu gũa ïgure ïgu õpa arĩcũ. “Jesu Nazare majagu Goãmũ wihire cóãgũcumi. Eropigu ïgu Moise dorerare marire ïgu wererare gohrotogũcumi Jesu,” arãmi Esteban gũa peecũ, arĩ gũya weresãriñorã erã. <sup>15</sup> Eropirã árĩpehrerã ero doarã Estebanre ðaro ïhamehtu, ïgu diapore ïañorã erã. Anyu ïro dopa deyoyoro ïgu diapo.

## 7

### *Esteban Jesu yare werepũ*

<sup>1</sup> Eropii pahia opu serẽpipũ Estebanre.

—¿Oã erã arĩri diaye ta ãhriri? arĩ serẽpipũ ïgu Estebanre. <sup>2</sup> ïgu eroparĩcũ peegu, Estebanpũ erãre õpa arĩ werepũ:

—Acawererã, murã, gũa pagũ sũmarã, peeque. Abrahã mari ñecũ murũ iribojegue majagu Mesopotamiague ïgu árĩcũ, Harãngue ïgu árĩboro core, Goãmũ turagu gosesiro dopa ïgure Abrahãre dehyoãñumi. <sup>3</sup> Eropã dehyoagu Goãmũ wereñumi ïgure. “Mũ ya yebare mũ acawererã mera árĩbircãque. Eropigu gajĩ yebague waque. Mũ eropa wacũ mũre iri yebare ïhmugũra yũhũ,” arĩpũ Goãmũ Abrahãre. <sup>4</sup> ïgu eroparĩcũ peegu Abrahã sã Caldea majarã ya yeba árĩrã wañuma. Pũ Harãngue ejañuma. Eroque eja arĩñuma. Eropigu ïgu pagũ ïgu sĩrira pũhrũ i yeba dohpague mũa arĩri yeba Goãmũ ta árĩdoreñumi Abrahãre. <sup>5</sup> ïgure eropa árĩdorequeregu Goãmũ Abrahã ïgu arĩri yebare ðaro gohra apibirimũriniñumi ïgure. Ne merogã apibiriniñumi. Eropigu Abrahã ïgu porã marigu árĩquerecũ ta Goãmũpũ ïgure õpa arĩ wereñumi. “Mũre mũ pãramerã gajĩ turi majarãguere i yebare ogũra,” arĩñumi Goãmũ Abrahãre. <sup>6</sup> Eropã arĩgu ta õpa arĩ werenemoñumi Goãmũ Abrahãre. “Mũ pãramerã gajĩ turi majarãgue gajĩ yebague waha, erogue gajirã pohro árĩrã erã pohro majarã árĩrãcoma erã. Eropirã cuatrocientos bojori gohra ero majarã ñero iirãcoma mũ pãramerã arĩturiarãguere. <sup>7</sup> Eropigu ero majarãre erã eropa iira waja dipuwaja moagũra yũhũ. Yũhũ eropiira pũhrũ mũ pãramerã i yeba erarãcoma daja. Eropirã i yeba yũ dorerire iirãcoma erã,” arĩñumi Goãmũ Abrahãre. <sup>8</sup> Eropã arĩgu Goãmũ “Yũ arĩdiro dopa ta iigũra,” arĩgu Abrahã ïgu guñaburire õpa apiñumi ïgure. Merogã gasirogãre ïgu dũpũre wiri aĩdoreñumi ïgure, ïgu eropa arĩ wereraguere guñadoregu. Eropiira pũhrũ Abrahã Isaare porãcũñumi. Ocho nũri pũhrũ merogã gasirogãre wiri aĩñumi Isaa dũpũ sãre. Pũhrũ Isaa Jacobore ïgu porãcũra pũhrũ wiri aĩñumi ïgu dũpũ sãre. Eropigu Jacobo doce gohra porãcũñumi. Erã docepũ mari cururi nũcu oparãgue arĩmũriñuma.

<sup>9</sup> “Eropirã erã Jacobo porã mari ñecũ sũmarã mũra Josere erã pagũ magũre peyocũmũriñuma. ïgure cohã, duacãñuma Egiptogue warãre. Eropigu Josere Goãmũ itamũmũriñumi. <sup>10</sup> ïgu ñero taricũ ïagu Goãmũ ïgure itamũmũriñumi. ïgu eropa itamucũ Joserpũ ðaro pee masigu wañumi. Eropigu faraõ Egipto majagu opu pũpũ Josere ïgu gamecũ iĩñumi Goãmũpũ. ïgu eropiicũ faraõpũ Josere Egipto majagu opu, ïgu ya wihi majagu opu apiñumi.

<sup>11</sup> “Eropii irisubure ta Egiptogue, Canaa waĩcũri yeba sã ne deco aribiriyoro. Eropirã ero majarã ñero tariñuma. Eropirã Canaague árĩrã Jacobo porã mari ñecũ sũmarã mũra bari bocabirimũriñuma. <sup>12</sup> Eropigu Egiptogue trigo árĩcũ peegu, Jacobo ïgu porãre erogue bari asũdoregu ne obeogu iĩñumi. <sup>13</sup> Pũhrũ Egiptogue erã ejacũ José ïgu tĩrãre wereñumi. “Mũa pagũ magũ ta ãhraa yũhũ,” arĩñumi erãre. Eropigu José acawererãre ne ïagu iĩñumi opu faraõ waĩcũgu. <sup>14</sup> Pũhrũ José ïgu tĩrãre erã

pagu Jacobore sihudoregu oboñumi. Īgu acawererā setenta y cinco masa árĩñuma irisubu. <sup>15</sup> Īgu magu ĩgu sihubeocũ peegu Jacobo Egiptogue wañumi ĩgu magu pohrogue. Īgu magu pohro āhri, pũhrũ sĩria wañumi pare. Eropirā ĩgu porā mari ñecu sũmarā mũra erogue sĩripehrea wañuma erā sã. <sup>16</sup> Eropirā Siquẽ waĩcũri yebague erā dũpũre aĩ, masa goberigue seatuha yaañuma erā dũpũre. Abrahã ĩgu asũra yebague árĩyoro iri yeba erãre yaara yeba. Ero core Abrahã iri yebare Hamor porãre asũyuñumi niyeru mera.

<sup>17</sup> Eropigu Goãmu Abrahãre “I yebare ogũra mũre,” arĩmũriñumi. “Iri yebare ogũra,” ĩgu arĩrasubu ejacũ Abrahã pãramerã Israe masa bajarã masa wañuma. Egiptogue árĩñuma. <sup>18</sup> Egipto yeba erã árĩnicũ, gajigu opu ñajañumi. Eropigu ĩgu opu opu José mũrũre masibiriñumi. <sup>19</sup> Eropigu ĩgu mari acawererãre ñero iidia, erã porãre wejẽdia, erã porãre wejẽ cóãcãdoreñumi erãre. Eropigu mari ñecu sũmarãre ñero iĩñumi opu faraõpu. <sup>20</sup> Īgu eropiirisubu Moise árĩbupu masa dehyoañumi. Īgu õagu, Goãmu õaro ĩhasuagu arĩmũriñumi. Eropirã ĩgu pagu sũmarã urerã abe gohra õaro ĩhadibuñuma ĩguãre. <sup>21</sup> Moiserẽ dibunemomasibiricũ ĩgũre erã cóãra pũhrũ opu mago ĩgũre boca aĩ majaa, igo magu iro dopa ta dibuñumo ĩgũre. <sup>22</sup> Eropirã Egipto majarã õaro masirã yare buheñuma Moiserẽ. Eropigu gũiro mariro wereniguigu opu iro dopa iigu árĩñumi Moise.

<sup>23</sup> “Eropigu Moise cuarenta bojori ĩgu opaboro core ĩgu acawererãre Israe masare ĩadiagu erã pohrogue curigu wañumi. <sup>24</sup> Eropã curigu jagu Egipto majagu Moise acaweregũre ĩgu ñero iicũ Moise ĩañumi. Eropã ĩagu ĩgu acaweregũre itamuñumi Moise. ĩgu acaweregũre itamugu Egipto majagupũre pa wejẽcãñumi ĩgu. <sup>25</sup> Eropirgu Moise õpa arĩ pepiriñumi. Yũ acawererã erã acaweregũre yũ itamucũ ĩarã, ‘Goãmu marire õaro taricũ iidoregu oboñumi ĩre,’ yũ acawererã yũre arĩ pepirãcoma,” arĩ pepiriñumi Moise. Erãpu ne eropa pepibiriñuma. <sup>26</sup> Gajinu Moise ĩgu acawererãre perã erã basi gamequeãrãre ĩapu. Eropigu ĩgu erãre bosariñumi. “¿Mũa basi árĩquererã gamequeãri mũa?” arĩñumi Moise erãre. <sup>27</sup> Īgu eroparĩcũ peegu yujugu ĩgu acaweregũre ñero iigu Moiserẽ tubeoñumi. “Mũhu gũa opu árĩbeaa. Gũare doregu árĩbeaa mũhu. <sup>28</sup> ¿Carũre Egipto majagũre mũ wejẽdiro dopa ta yũ sãre wejẽdiagu iiri mũhu?” arĩñumi ĩgu Moiserẽ. <sup>29</sup> Īgu eroparĩcũ pee uca wa Moise oma duhrigã waha wapũ. Madián waĩcũri yebague waha wañumi. Eroque nomeore boca perã porãcũñumi.

<sup>30</sup> “Eropii Moise cuarenta bojori gohra ero ĩgu árĩra pũhrũ Sinaĩ waĩcũdigũ utãgu pohro masa marirogue ĩgu árĩcũ anyu ĩgũre dehyoañumi. <sup>31</sup> Eropã irigũgã ũjucũ ĩagu Moise ĩha uca wañumi. Iri peamere pohrogã õaro ĩgu ĩagu wacũ gohra Goãmu ĩgũre wereñumi. <sup>32</sup> “Goãmu āhraa yũhu. Mũ ñecu sũmarã, Abrahã, Isaa, Jacobo erã Goãmu āhraa yũhu,” arĩñumi Goãmu Moiserẽ. ĩgu eroparĩcũ peegu Moisepu naragãñumi. Ne ĩha wahgũbiriñumi. <sup>33</sup> Eropigu Goãmu wereñumi ĩgũre. “Dohparagã yũ pohro niguigu iiaa mũhu. Eropigu gũhyadiaro mera mũ zapature tuweaque. <sup>34</sup> Yaharã masa Egiptogue erã ñero taricũ ĩabu. Erã sĩwererire peeabu. Eropigu erãre itamugu ahrabu. Erã eropa wacũ ĩagu waque mũ sã. Egiptogue mũre obeogũra erãre itamudoregu,” arĩñumi Goãmu Moiserẽ.

<sup>35</sup> “Erãpu mari acawererã Israe masa Moiserẽ gamebirituhajañuma. “Mũhu gũa opu árĩbeaa. Mũhu gũare doregu árĩbeaa,” Moiserẽ eropa arĩrã gamebirã iituhajañuma. Eropã erã Moiserẽ gamebiriqũrecũ Goãmu ĩgũre Egiptogue oboñumi mari acawererãre, Israe masare itamubure, erãre dorebure. ĩgu eropa obeogu anyupũre ĩgũre yucũgũgue dehyoadigũre itamudoreñumi ĩgũre. <sup>36</sup> Moise ta mari acawererãre Israe masare Egiptogue arĩrãre wiudigu árĩñumi. Eropigu Egiptogue eja, ĩhĩ Moise Goãmu turari mera ĩi ĩmunũgañumi. Eropigu wũariya diariyague eropa ta

iiñumi daja. Puhruquere masa marirogue sãre cuarenta bojori gohra Goãmũ turari mera deyoro moarire ii ihmumuriñumi ïgu erãre. <sup>37</sup> Ihĩ Moiserũ mari acawererãre Israe masare weremuriñumi. “Yũ iro dopa ta Goãmũ yare weremũhtabure Goãmũ obeogucumi. Eropigu ïgu mũa mera majagu mũa acaweregu árigucumi. ïgu eropa eracũ ïgure ðaro peeque mũa,” arĩmuriñumi Moise erãre. <sup>38</sup> Moise masa marirogue mari acawererã Israe masa mera arĩmuriñumi. Eropigu mari ñecu sumará iribojegue majarã mera arĩñumi ïgu. Eropa árigũ Sinai waĩcudigu utãgugue ïgure weredigu anyu mera arĩñumi. Erogue Goãmũ ïgu dorerire aĩdigũ arĩñumi Moise.

<sup>39-40</sup> “Iri dorerire utãgugue Moise waha aĩrisubu mari ñecu sumará mũa Egiptogue dujadarã Moiserẽ tarinũgañuma. Erã ïgure gamebiriñuma. Eropa gamebirã Aarõre Moise tĩgure ðpa arĩñuma: “¿Ïgu Moise marire Egiptogue aĩgãridi dohpa wayuri ïgu? Masibirica mari. Eropigu goãmarã wéanirãre iique mari yarã arĩmorã. Eropirã mũa wéanirã marire doreri mari wadiari maha marire aĩgãrãcoma,” arĩñuma erã. <sup>41</sup> Eropa arĩra puhru erã wecure oro mera wéañuma. Eropa iituhaja, erã waimurãre wejẽ, erã wéadigu pohro aĩgãri umupeoñuma ïgure. Eropirã erã erã iidigure wecure ïarã, mucubiri, bosenu iiñuma. <sup>42</sup> Eropigu Goãmũ erã wéadigure erã umupeocũ ïagu, erãre cóãcãriñumi. “Erã yũre cóãrã gajirã umaro majarãpũre umupeo curaporo,” arĩgu cohãgã wariñumi. Goãmũ yare weremũhtanirã ðpa arĩ gojañuma Goãmũ wereniguirire:

Mũa Israe masa, yũre ñe ñero iiabũ. Masa marirogue cuarenta bojori gohra arĩrã waimurãre mũa wejẽnirãre mũa soenirãre yũre mũa obodiro dopa ta umupeorabu mũa. Eropirã yũpũre umupeobirabu mũa. <sup>43</sup> Eropirã mũa Molo waĩcugure umupeorã arĩrã, ïgure umupeori wihire iiabũ mũa. Eropirã “Refa gũa goãmũ ãhrimi,” arĩrã ïgu necãmũ mũa wéadigure mũa umupeoabu daja. Erã wéanirãre mũa iinirãre mũa umupeoabu. Mũa eropa iira waja mũare Babilonia sipũgue cóãbeogura yũhũ, arĩñumi Goãmũ ïgu ya weremũhtanirã mera.

<sup>44</sup> “Eropirã masa marirogue Goãmũ masa mera ïgu arĩri wihire waimurã gasiri wihire opamuriñuma mari ñecu sumará iribojegue majarã. Iri wihi Goãmũ masa mera ïgu wereniguirire wihi arĩyoro. Iri wihigue Goãmũ dorerire ïgu gojara mijiri utã mijiri arĩyoro. Iri wihire Goãmũ ïgu werediro dopa ta Moiserẽ ïgu ihmudiro dopa ta ii ïhacũdoreñumi Goãmũ Moiserẽ. <sup>45</sup> Puhrugue majarã mari ñecu sumará Josué mera iri wihire aĩgãriñuma mari arĩri yebague erarã. Erã iri yebaguere Goãmũ ïgu apira yebaguere erã eraboro core iri yeba majarã mũrare Goãmũ cóãcãñumi. Irisubure Goãmũre umupeori wihire waimurã gasiri wihire opamuriñuma mari ñecu sumará. Ne Davi mũru ïgu arĩcũgue opatuñuma iri wihire. <sup>46</sup> Eropigu Davi mũru Goãmũre mucubiricũ iiñumi. Eropigu Goãmũ ya wihi arĩburire iidigu Davipũ serẽriñumi Goãmũre. <sup>47</sup> ïgu eropa serẽquerecũ ta Salomopũ Davi magupũ Goãmũ ya wihire iiñumi. <sup>48</sup> ïgu eropa iiquerecũ ta Goãmũpũ masa erã iira wihiguere arĩbeamĩ. ðpa arĩñumi Goãmũ wereniguirire weremũhtadigu:

<sup>49</sup> ðmarogue yũ doaro ãhraa. Ero doagu dorea yũhũ. Eropiro yebapũ yũ guburire duhpeoro iro dopa ta ãhraa. Yũhũ turatariagu ãhraa. Yaha wihi arĩborore iimasibea mũa. Goãmũ yũ arĩcũ yũ arĩburi wihire mũa iimasibea.

<sup>50</sup> Yũ basi i yebare arĩpehrero iiabũ yũhũ, arĩmi Goãmũ, arĩ gojañumi Goãmũ yare weremũhtadigu, arĩpũ Esteban.

<sup>51</sup> Eropigu ðpa werenemopũ Esteban erãre:

—Mũa ne yũhridiabrã ãhraa. Goãmũ yare peequererã, ïgure yũhridiabeaa. Espĩritu Santore tarinũgataria mũa. Mũa ñecu sumará erã iidiro dopa ta iiaa mũa. <sup>52</sup> Mũa ñecu sumará arĩpehrerã Goãmũ ya weremũhtanirãre ñero iiñuma. Erã Goãmũ yare weremũhtanirãpũ “Puhru ðagu Goãmũ yare weremũhtagu arigucumi,”



arĩ erã wererã árĩcũ peeñuma mua ñecu sumarã mura. Eropa arĩ werenirã murare wejẽmuriñuma. Eropirã “Õagũ,” erã arĩgure mua sã dohpaguere ïgu ya curu majarã árĩquererã ta ïgure wejẽabũ. <sup>53</sup> Goãmũ dorerire anyuapũ wereriñuma muare. Eropirã mua iri dorerire opariyoro. Eropirã iri dorerire tarinũgabũ mua, arĩ wereniguitupũ pare Esteban.

### *Erã Estebanre utãyeri mera dea wejẽñorã*

<sup>54</sup> ïgu eroparĩcũ peerã erãpũ bũrigã guañorã. Eropa turaro guarã, guhyarã wañorã. <sup>55</sup> Erã eropa guaquerẽcũ ta ïgu Espĩritu Santo ïgu dorero dopa ta iipehogũ árĩgu, ïgu turarire ðaro opagũ árĩgu, umarogue ïhamemuju Goãmũ gosesiririre ïapũ Esteban. Jesu Goãmũ diayerũ ïgu niguicũ ïapũ ïgu. <sup>56</sup> Eropa ïagu õpa arĩpũ

—Umarogue merogã ero tuweamaacũ Jesu Goãmũ obeodigu Goãmũ diayerũ ïgu niguicũ ïhaa yũhũ, arĩpũ Esteban.

<sup>57</sup> ïgu eroparĩcũ peerã ta erã bũrigã gaguinigui, erã gamirire bihacã, yujuro mera ïgu pohrogue omagã, ïgure ñeañorã. <sup>58</sup> Ñehatuhaja, ïgure aĩgã, iri maca turo pohrogue cóañorã ïgure. Eropirã utãyeri mera dea wejẽcãñorã erã ïgure. Erã eropa wejẽboro core ïgure utãyeri mera deamorã erã weca maja suhrire tuwea, mamũre Saulo waĩcũgure iri suhrire opabasadoreñorã erã.

<sup>59</sup> Eropigu Esteban erã ïgure utãyeri mera dea wejẽrisubu õpa arĩpũ.

—Jesu yũ Opũ, yũ sĩporãre aĩque, arĩpu.

<sup>60</sup> Eropigu ïgu mereja õpa arĩpũ:

—Opũ Jesu, oã dohpague ñero erã yũre iirire erãre dipuwaja moabita mũhũ, arĩpũ Esteban.

Eropa arĩtuhajagu ta sĩria wapũ ïgu.

## 8

<sup>1</sup> Eropigu Esteban ïgu sĩricũ ïagu, “Õhaa,” arĩpũ Saulo.

### *Saulopũ Jesu yarãre ñero iipũ*

Eropirã irinũre ta Jesu yarãre Jerusalengue árĩrãre ñero iinũgañorã Jesure gamebirãpũ. Erã eropa ñero iicũ Jesu yarã Judea yebague, Samaria yebague yoarogue duhrisirigã wañorã. Jesu ïgu apinirã dihta wabiriñorã. <sup>2</sup> Eropirã gajirã Goãmũre umupeorã Esteban dũpũ murarore yaa, bũrigã oreñorã erã. <sup>3</sup> Saulopũ Jesu yarãre ñetariaro iimũriripũ. ïgu erã ya wirigue ñaja, umare, nomere ñeha, peresugue bihadobomũripũ.

### *Samariague Jesu yare buhepũ Felipe*

<sup>4</sup> Eropirã yoarogue wasirinirã Jesu yarãpũ Jesu yare buheñorã. <sup>5</sup> Eropigu Felipe Samaria waĩcũri macague eja, Jesu yare buhepũ iri maca majarãre. <sup>6</sup> ïgu eropa buhecũ ero majarã ðaro peeñorã. Eropirã Goãmũ turari mera deyoro moarire ïgu ii ïhmucũ ïañorã erã. Eropa ïarã ïgure ðaro peeñorã erã. <sup>7</sup> Bajarã watẽa ñajasũnirãre ïgu pohro erã eracũ ïagu watẽapũre wadorepũ ïgu. Watẽapũ bũrigã gaguinigui, duhugã waha wañorã erãre. Eropigu bajarã dũpũ buhanirãre, curimasibirãre dũpũ ðarã iimũripũ. <sup>8</sup> ïgu eropa iicũ ïarã iri maca majarã bajarã masa mucubiriñorã.

<sup>9</sup> Irisubure Simo waĩcũgu iri maca majagu yee árĩpũ, Eropigu yeea erã iirare ii ïhmumũripũ Samaria majarãre. ïgu eropa ii ïhmucũ ero majarã ïha uca wa ïgure guhyadiaro mera ïarã árĩñorã.

—Yũhũ masipehogũ ãhraa, arĩpũ Simopũ erãre.

<sup>10</sup> ïgu eropa iicũ ïarã masapũ õpa arĩmũririñorã:

—Ihĩ Goãmũ ya turari opagũ ãhrimi. Goãmũ iro dopa turagu ãhrimi, arĩmũririñorã masa erã oparã mera. Erã árĩpehrerã ðaro peeñorã ïgure.



<sup>11</sup> Īḡu yeea erā iiri ĩḡu purisiriri mera yoari boje ii ĩhmum̄ripu erāre. Īḡu eropa ii ĩhmucū ĩarā erā uca wam̄riñorā. Eropirā erā ĩḡure umupeom̄riñorā. <sup>12</sup> Feliperu erā ĩḡure eropa umupeoquerecū Goām̄u ĩḡu opu árĩrire, Jesucristo yare ðari buherire werepu. Īḡu eropa werecū erā ĩḡure ðaro peeñorā. Erā eropa ðaro peecū ĩaḡu ũma, nome mera waĩyeru Felipe. <sup>13</sup> Eropigu Simo ĩḡu yee sã Felipere ðaro peepu. Eropigu ĩḡu sãre waĩyeru. Īḡu eropa iira puhr̄u Felipe mera dujapu ĩḡu. Feliperu Goām̄u turari mera ii ĩhmucū ĩaḡu, dorecurā ðarā ĩḡu iicū ĩaḡu Simo ĩha uca wam̄ripu.

<sup>14</sup> Eropirā Samaria majarā Goām̄u yare erā burigā gamecū peebeom̄riñorā Jerusaléngue árĩrā Jesu ĩḡu apinirāpu. Erā eropa peebeorā Pedore, Ñu sãre obeoñorā Samariague. <sup>15</sup> Erogue erā ejara puhr̄u Pedro sã Goām̄ure serēbasañorā. “Oā Samaria majarā mure umupeorā mu Espiritu Santore opaporo,” arĩ, serēbasañorā erā Goām̄ure. <sup>16</sup> Erā Samaria majarā Jesucristo waĩ mera waĩyesunirā árĩñorā. Iri dihtare masiñorā erā. Eropirā Espiritu Santore opabiriniñorā dohpa. <sup>17</sup> Eropigu Pedro Ñu mera Samaria majarāre erā mojotorire erā weca duhpeora puhr̄u Espiritu Santore opanugañorā erā.

<sup>18</sup> Eropigu Pedro sã erā ya mojotori mera erā duhpeora puhr̄u Espiritu Santo eracū ĩapu Simo yeepu. Eropa ĩaḡu árĩḡu, erā turarire gameḡu niyeru mera wajayediariḡu.

<sup>19</sup> Ōpa arĩripu Simo:

—Yu sãre oque i turarire. Yu sã yu mojotori mera masa weca duhpeodiaca Espiritu Santore erā ñeaboro dopa. Eropigu i yu ĩiburi wajare wajayediaa, arĩripu Simo erāre.

<sup>20</sup> Īḡu eroparĩcū peegu Pedro ðpa arĩpu.

—Mu niyeru mera Goām̄u ya turarire mu asũdiara waja mu niyeru mera ta peamegue waque muhu. <sup>21</sup> Goām̄u mu pepirire masimi. Muhu ñegu árĩnia. Eropirgu ire gua iirire iimasibea muhu. I mu iirino árĩbeaa. <sup>22-23</sup> Burigā peyocua muhu. Eropigu mu ñeri iirire ne duhumasibea muhu. Eropigu ire muhu ñero iirare bujawereque muhu. Goām̄ure mu ñero pepirire ero diaye ta serēque muhu. Muhu eropa iicū ĩaḡu ĩḡu mu ñerire cãdijibocumi, arĩ werepu Pedro ĩḡure.

<sup>24</sup> Īḡu eroparĩcū peegu Simo yuhr̄ipu ĩḡure.

—Yure serēbasaque mua Goām̄ure mu arĩdiro dopa yu wabiriboro dopa. Iri waja peamegue wadiabeaa yuḡu, arĩpu Simo ĩḡure.

<sup>25</sup> Ero puhr̄u Pedro Ñu mera Goām̄u yare wereñorā. “Jesu ĩḡu masa m̄riacū ĩabu gua,” arĩ, Samaria yeba árĩri macari majarāre ðari buherire buheñorā. Erāre Goām̄u yare buhetuhaja Jerusaléngue dujaa wañorā.

### *Felipe Etiopía yeba majagure buheru*

<sup>26</sup> Eropii Goām̄u ĩḡu obeodigu anyu Felipere werepu:

—Dohpague ðdoca surgue waque. Jerusalén pohro árĩri mague Gazague wari mague waque, arĩ werepu anyu Felipere. Iri maha masa marirogue árĩyoro.

<sup>27</sup> Īḡu eroparĩcū peegu ĩḡup̄u iri mague waha wap̄u. Puhr̄u iri mague yujugu masure bocatĩribu ĩpu. Īḡu bocatĩribu árĩpu Etiopía yeba majaḡu opu. Eropigu Candace waĩc̄ugo Etiopía majago opo buro yare niyerure árĩpehr̄erire ĩhadibuḡu árĩpu. Eropigu ĩḡu Jerusaléngue mari Paḡure umupeogu ejadi árĩpu. <sup>28</sup> Īḡu ya macague tũrudiru mera dujaagu irirugue waquereḡu ta buheḡu ĩpu. Goām̄u yare werem̄htadigu Isaia ĩḡu gojarapũre buheḡu ĩpu.

<sup>29</sup> Eropigu Espiritupu Felipere ðpa arĩ werepu.

—Sihĩ tũrudirugue waḡu pohrogue waque, arĩpu Espiritu Santo ĩḡure.

<sup>30</sup> Īḡu eroparĩcū peegu, Feliperu tũrudiru pohrogue omagā, Isaia ĩḡu gojarare Etiopía majaḡu ĩḡu buhecū peepu. Eropa peegu Felipe serēripu ĩḡure.

—¿Mu buherire masiri muhu? arĩpu ĩḡu.

<sup>31</sup> Īḡu eroparīcū peegu Etiopía majagu ōpa arī yūhripu:

—Gajigu yare weretaugu maricū ōaro masibea yūhu. Ohō yare weredoagu arique yūhu dipaba, arī yūhripu ĩḡu Felipere.

—Áu, arī, doajaru ĩḡu pohro. <sup>32</sup> Eropii Goāmu yare Etiopía majagu ĩḡu buheripū ōpa árīyoro:

Ovejare erā ñeha wejēdiro dopa ta ĩḡu sāre ñeha wejērācoma masa. Eropigu ovejagāre ĩḡu poare erā seacū ĩḡu gaguiniguibiro dopa ta ĩḡu masu sā ejari mariro árīḡucumi. <sup>33</sup> ĩḡure erā wereyarācoma. Eropirā ĩḡu ĩḡu ñero iibiriquerecū ta erāpu ñero iirācoma ĩḡure. ĩḡu i yebague ĩḡu árīcū erā ĩḡure wejērācoma. Eropigu ĩḡu porā marigu sīria wagućumi, arī gojara árīyoro.

<sup>34</sup> Iripū eroparīcū ĩagu, Etiopía majagu Felipere serēpipu:

—Wereque yare. ¿Ōpa Isaia ĩḡu arīḡu nihino árīcuri ihī? ¿Isaia ĩḡu basi wereḡu iicuri? ¿O gajigūre wereḡu iicuri? arī serēpipu Etiopía majagu.

<sup>35</sup> ĩḡu eropa serēpi ĩacū peegu Felipe iripūre ĩha, Jesu yare werepu Etiopía majagūre. <sup>36</sup> Eropirā erā iriru mera waha, maḡgāḡue ejañorā.

—Īaque. Ohō maḡgā āhraa. I maḡgāḡue yare waīyeque, arīpu Etiopía majagu.

<sup>37</sup> —Jesure mūhu ōaro umupeocū ĩagu mūre waīyegura, arīpu Felipe ĩḡure.

—Jesure umupeoa yūhu. ĩḡu Cristo Goāmu magū āhrimi. Irire ōaro masia yūhu, arīpu Etiopía majagu.

<sup>38</sup> Eropa arīḡu ta ĩḡu tūrudiru autugūre yaudorepu. Iriru yūsumerejara pūhru wiriañorā erā. Wiria waha, iriyagāḡue eja, ñumu wiri nuḡajañorā. Ero ñumunḡaja, Felipere ĩḡure waīyepu. <sup>39</sup> Waīyetuhaja erā majajanḡajacū Goāmu ĩḡu Espiritu Felipere aīgā wapu. ĩḡu eropa wara pūhru Etiopía majagu ōaro mucubirigu ĩḡu ya yebague dujaa wapu. ĩḡu eropa iira uḡuḡuyacū ne dipaturi Felipere ĩabiripū. <sup>40</sup> Felipere eropa iituhaja Azotogue ejapu. Eropigu baja macarire ōari buherire buherpu masare. Pu Cesareague buhetumūripu.

## 9

### *Saulo Jesucristore ĩagu ĩḡure umupeonḡapu*

<sup>1</sup> Irisubure Saulo Jesu yarāre ĩhaturigu, “Erāre wejēgura,” arīḡu, ĩḡu opu pohrogue wapu. <sup>2</sup> Erogue ejaḡu ĩḡu gojarapūrire serēpu pahia opu. Ōpa arīpu:

—Damasco maca maja wirigūe mari buheri wirigūe Jesu yarāre, ūmare, nomere yūhu erāre bocaḡa, ñeha dihri, Jerusalēḡue aīḡarigūra. Iri wirigūe árīrāre yu erāre ñeaburipūre paperapūre yare goja oque, arī serēpu pahia opu.

<sup>3</sup> Iripūre aītuhaja, waha, ĩḡu Damasco pohro ĩḡu ejabu iicū gohra ūmaro maja gosesiri medijuyoro ĩḡure. <sup>4</sup> Eropa gosesiri medijucū ta ĩḡu yebague mehmerejagu, wereniguicū peepu.

—Saulo, Saulo, ¿duhpigu mūhu yare ñero iiri? arīro cariyoro.

<sup>5</sup> —Opu, ¿nihino āhriri mūhu? arīpu Saulo.

—Yūhu mū ñero iigu ta āhraa arīpu Jesu. Mūhu yu mera guagu yare yūhribigu, mū basi ta ñero tariāa, arīpu Jesu Saulore.

<sup>6</sup> ĩḡu eroparīcū Saulo ḡūiri mera naragānijagu ōpa serēpipu:

—Opu, ¿dohpa yūhu iicū ḡahmeri mūhu? arīpu Saulo.

ĩḡu eroparīcū ōpa arīpu Jesu ĩḡure:

—Wahḡānḡajaque mūhu. Macague waque. Iri macague ejacū ero majagu mū iiburire wereḡucumi mūre, arīpu Jesu Saulore.

<sup>7</sup> ĩḡu eroparīcū Saulo mera majarāpu ĩḡu wereniguiri dihtare peeñorā. Jesupure ĩabiriñorā. ĩḡu eropa wacū ĩarā ḡūirā erā wereniguimasibiriñorā. <sup>8</sup> Eropigu Saulo

yebague oyadigu wahgãñugaja, ïgu ïacũ ïgu cuiiri deyobiriyoro. Eropirã erã ïgu mojtore ñeha, Damascogue tãã wahgã wañorã erã ïgure. <sup>9</sup> Eropigu ïgu ùhrenu gohra ne ïabiri, babiri, ne ihribiripũ.

<sup>10</sup> Eropii Jesu ïgu buhegu Ananía waicugu Damasco arĩpũ. Eropigu Jesu dehyoapu Ananiare. Eropi dehyoagu piyupu ïgure:

—Ananía, ¿ãhriri? arĩpũ Jesu ïgure.

—Ãhraa yũ, arĩ yãhripũ Ananía ïgure.

<sup>11</sup> ïgu eroparĩcũ Jesu ïgure werepũ.

—Diaye waicuri mague waque. Eropi wagu Juda ya wihigue Tarso majagure Saulo waicugure amaque. ïgu Goãmure serëniugũ iicumi. <sup>12</sup> Eropigu quëro dopa ta ïgu ïarare ïagu iicumi eroguere. Òpa arĩrire ïagu iicumi. Mũhũ mũ mojtore ïgu weca duhpeo, ïgu cuiiri ðaro wacũ ïagu iicumi ïgure dehyoarare, arĩpũ Jesu Ananiare.

<sup>13</sup> ïgu eroparĩcũ peegu Ananiapũ ðpa arĩpũ:

—Opũ, ïgu mũ yarãre ðarãre Jerusalén majarãre ñero iiapũ. Bajarã masa yũre eropa arĩ wereama. <sup>14</sup> Eropigu ðre ïgu arĩpehrerã mũre umupeorãre peresu iigu arigu iiapũ. Pahia oparã ïgure eropa iidoreañorã, arĩpũ Ananía Jesure.

<sup>15</sup> ïgu eropa arĩquerecũ Jesupu werepũ ïgure.

—Ïgu Saulopũ yũ beyedigu ãhrimi. Ïgu yaha buherire baja macari majarãre, oparãre, Israe masa sãre buhegucumi. <sup>16</sup> Eropigu bajasuburi yahare ïgu buheri waja ïgu ñero tarigucumi. Irire ïgure masicũ iigura. Eropigu waque mũhũ, arĩpũ Jesu Ananiare.

<sup>17</sup> ïgu eropa arĩra pũhrũ Ananiapũ, waha eja, Saulo ïgu arĩri wihigue ñaja wapũ. Ñajaja, ïgu mojtore Saulo weca duhpeo, werepũ ïgure:

—Acaweregu Saulo, mari Opũ Jesupu mague mũre dehyoadigu yũre obeoami mũ cuiiri mũ ïaboro dopa. Espiritu Santore mũ opaboro dopa, ïgu dorediro dopa mũ iiboro dopa yũre obeoami mũ pohrogue, arĩ werepũ Ananía Saulore.

<sup>18</sup> ïgu eroparĩcũ ta ïgu cuirire wai nũturi dopa bejarire ïgu cuirire cohrodijacũ ïapu pare Saulo. Ïgu eropa ïatuhara pũhrũ ïgu wahgãñugajacũ gajigupũ waĩyepũ ïgure. <sup>19</sup> Eropigu ïgu, ïgu bara pũhrũ turagu wapũ.

### *Saulo Damascogue Jesu yare buhenugapu*

Eropii bajamenuri Damascogue Jesu yarã mera arĩmuri pũ Saulo. <sup>20</sup> Eropigu irisubure ta ïgu judio masa buheri wiri arĩgu, Jesu yare buhepũ masare. “Jesu Goãmũ magu ta ãhrimi,” arĩ werepũ Saulo. <sup>21</sup> ïgu eropa werecũ ïarã arĩpehrerã ïgure peerã uca wañorã.

—Ihĩ Goãmũ yarãre Jesure umupeorãre ñero iidigu ãhrimi. Eropigu ïgu erãre ñeha, dihri, pahia oparãre odiadigu arĩrimi. Eropiidiagu ðguere aridigu arĩrimi, arĩñorã masa ïgure peerã.

<sup>22</sup> Erã eroparĩquerecũ Saulo güiro mariro turaro mera buhenugapu. Judio masare Damasco majarãre ðaro werepũ. “Ihĩ Jesu diaye ta Cristo marire taubu ãhrimi,” ïgu arĩ werecũ erãpũ ïgure “Gũyagu iimi ihĩ,” arĩmasibiriñorã ïgure.

### *Saulo duhri wahgãpũ judio masare*

<sup>23</sup> Eropirã bajanuri pũhrũ judio masa ïgure wejediañorã. Eropirã erã basi gamenere ïgure erã wejëburire wereniguiñorã. <sup>24</sup> Eropirã ïgure wejëdiarã, iri maca maja disiporore mũre ñami sãre coremuriñorã. Saulo wiricũ ïha wejëmorã coreñorã. Erã eropa wejëdiaquerecũ Saulo erã wejëdiarire masipũ ïgu mera majarã mera. <sup>25</sup> Eropirã ñamigue Saulo buherã ïgure puibu wũari puibu mera aĩsã, iri maca maja sãriro pũrũpũgue duhudijucãñorã ïgure.

### *Saulo Jerusalén arĩpũ*

<sup>26</sup> Eropigu Saulo Jerusaléngue ejagu, erogue Jesu yarã mera igu árĩdiaripu. Igu eropa árĩdiacũ erã igure “Jesure umupeogu árĩbeamihĩ,” arĩñorã. Igure güi arĩñorã. <sup>27</sup> Erã eropa güiquerecũ ta Bernabépu igure aĩgãpu Jesu igu apinirã pohrogue. Eropigu Saulo mague Jesure igu ñarare, Jesu mera igu wereniguirare, Damascogue güiro mariro Jesu yare igu buhenugarare werepu Bernabépu. <sup>28</sup> Igu eropa werera puhru Saulo erã mera ñajagu, Jerusaléngue erã mera árĩmuriipu. <sup>29</sup> Eropigu igu güiro mariro Jesu yare buhepu. Eropigu igu judio masare Jesu yare weretarinugagu iipu. Erã judio masa griego masa ya wereniguirã arĩñorã. Eropirã Saulo igu eropa weretarinugari waja igure wejediañorã. <sup>30</sup> Erã eropa wejediacũ ñarã, Saulo mera majarã Jesu yarãpu igure Cesareague aĩduhriã waha wañorã. Erogue igure sihu árĩniguirã Tarsogue obeoñorã erã igure.

<sup>31</sup> Eropi árĩpehrerogue Judea yebague, Galilea yebague, Samaria yebague Goãmu yarã ñaro árĩmuriñorã. Irisubure ne masa ñero iibirimuriñorã erãre. Eropirã ñaro buheñorã erã. Eropirã erã Goãmure guhyadiaro ñañorã. Espiritu Santo erãre igu itamucũ erãpu Jesure umupeorã bajarã wañorã.

### *Pedro Eneare ñagu wacũ iipu*

<sup>32</sup> Eropii Pedro árĩpehreri macarigue wagu, Jesu yarã Lida majarã pohrogue sãre ejapu igu. <sup>33</sup> Erogue ejagu Enea waĩcugure bocajapu. Enea dupu buhadigu árĩgu, ocho bojori gohra erã pũtãpidi oyamuriipu.

<sup>34</sup> Eropigu Pedropu igure õpa arĩpu:

—Enea, Jesucristo ñagu árĩcũ iimi mure. Wahgãnugajaque. Mure pũtãpira gasirote amuque, arĩpu Pedro igure.

Igu eroparĩcũ ta igu wahgãnugaja waha wapu. <sup>35</sup> Eropirã árĩpehrerã Lida majarã, Sarón majarã igure ñarã, erã erã ñeri iirare duhu, Jesure umupeonugañorã.

### *Dorca waĩcugore masupu Pedro Jesu turari mera*

<sup>36</sup> Eropii Jope waĩcũri macague Jesure umupeogo Tabita waĩcũgo arĩpo. Igo waĩ Tabita griego ya wereniguirã mera Dorca ñhraa. Igo ñarire iigo baja omuriipo masare. <sup>37</sup> Eropigo irisubure iigo dorecu wahgũ, sĩa wamuriipo. Igo sĩaicũ ñarã, erã iigo dupu murarore ñaro coe, umaro maja taribugue apiñorã igore. <sup>38</sup> Lida waĩcũri maca Jope pohrogue arĩyoro. Ero eropa árĩcũ Jesure umupeorã Jope maca majarã Pedro Lidague igu árĩcũ peebeoñorã. Eropi peebeorã perã umare obeoñorã Pedro pohrogue. Igu pohrogue ejarã wereñorã Pedrorã erã.

—Yojaro mera waque gua árĩrogue, arĩ wereñorã erã.

<sup>39</sup> Erã eroparĩcũ peegu erã mera waha wapu igu. Erogue igure erã aĩ ejara puhru umaro maja taribugue sĩaridigo pohro aĩmuriã wañorã igure. Pedro árĩcũ ñha árĩpehrerã wapewyarã nome orerã igu pohro ejanugamuriñorã. Tabita erã mera árĩnigogue baja suhrire iibasamuriipo. Eropirã erã iigo eabasara suhri murare ñhmuñorã Pedrorã. <sup>40</sup> Pedro erãre iri taribugue arĩrãre wiriadorepu. Erã wiriara puhru igu mereja, Goãmure igore serẽbasapu. Eropigu iigo dupu murarore maji ñha,

—Tabita, wahgãque, arĩpu igu.

Igu eroparĩcũ ta igopu ñha wahgũ, Pedrorã ñha, wahgã doajapo. <sup>41</sup> Igo eropa wahgã dojacũ ñha, igu iigo mojtore ñeha tarawahgũ nugupu igore. Eropigu igu ero majarãre Jesu yarãre, wapewyarãre sihubeo, igore ojocarigore wiapu erãre.

<sup>42</sup> Igu eropa iira puhru árĩpehrerã Jope majarã irire masirã bajarã masa Jesure umupeonugañorã. <sup>43</sup> Puhru Jopegue Simo waimurã gasirote amugu mera bajaruri Pedro igu mera arĩpu.



## 10

### *Pedro Cornelio Jesu yare werenugapu*

<sup>1</sup> Irisubure Cesareague Cornelio waicugũ árĩgu. Īgu cien surara opu árĩpu. Erã surarapu erã ya curu Italiano waicũyo ro. <sup>2</sup> Cornelio ĩgu ya wihi majarã mera mari Pagure umupeorã, gũhyadiaro ĩarã árĩñorã. Eropigu ĩgu judio masa mojomorocurãre itamugu baja gajĩnore omũripũ. Eropigu ĩgu umari nũcu mari Pagure serẽmarĩpu. <sup>3</sup> Eropii ñamicague tres árĩcũgue Goãmu yagu anyu ĩgure dehyoapu. Eropa dehyoagu Cornelio pohroque ñajajapu.

—Cornelio, arĩ piyupu anyu ĩgure. <sup>4</sup> Eropigu Cornelio ĩgure ĩha güigu õpa arĩpu:

—Opu, ¿ñehenore gahmeri? arĩpu ĩgu.

—Masare mu orare, mari Pagure mu serẽniguirare Goãmu peeami. <sup>5</sup> Eropigu Jopegue mu umare obeoque. Eroque Simo Pedro waicugũ aħrimi. ĩgure aĩgãridoreque mu umare. <sup>6</sup> ĩgu gajigu Simo waimurã gasiri amugu pohro, wũariya tũro arĩri wihi ta aħrimi, arĩpu anyu Cornelio.

<sup>7</sup> Anyu eropa arĩtuhaja, wiria waha wapũ. ĩgu wiriara pũru Cornelio perãre ĩgure itamurãre yujugu ĩgu surara mera majagure sihupu. Surarapu Goãmure umupeogu árĩgu, umari nũcu Cornelio itamudigu árĩpu. <sup>8</sup> Eropigu Cornelio erãre werepeho, Jopegue obeopũ erãre.

<sup>9</sup> Eropi gajĩmu Jopegue erã warisubu goeri boje gohra árĩcũ Pedropũ wihi wecague Goãmure serẽgu wapũ. <sup>10</sup> Eropigu ĩgure oa pũricũ badiapu. Eropigu gajirã barire erã moarisubu ĩgũpu dehyoacũ ĩapu. <sup>11</sup> Umare pãrimaacũ, wũari gasiro wapicũrisubu pepũri ojogorori dirira gasiro دچارĩcũ ĩapu. <sup>12</sup> Iri gasiro pohecague bajarã waimurã nũgu majarã, yebague paha curirã, mirimagũ porã majarã árĩñorã. <sup>13</sup> Irire ĩgu ĩara pũru, Pedore wereniguiro caricũ peepũ.

—Pedro, wahgãnugajaque. Oãre wejẽ baque, arĩro cariyoro ĩgure.

<sup>14</sup> ĩgu eroparĩcũ peequeregu ta Pedro õpa arĩpu:

—Opu, ne erãre babeaa yũhu. Ñerãre, Goãmu ĩgu badorebirinirãre ne babirimũrabũ yũhu, arĩpu Pedro.

<sup>15</sup> Eropigu Pedro dipaturi wereniguiro caricũ peepũ.

—Goãmu, “Oarã aħrima,” ĩgu arĩnirãre “Ñerã aħrima,” arĩbircãque mũhu erãre, arĩro cariyoro Pedore.

<sup>16</sup> Eropii uhresubu eropa arĩ wereniguiara pũru iri gasiro umarogue mũria wayoro daja. <sup>17</sup> Eropigu Pedro bũrigã guña “¿Dohpa arĩdiari iiri yũre eropa dehyoaro?” arĩ pepĩpu ĩgu ĩgu basi. ĩgu eropa pepĩsubu Cornelio uma ĩgu obeonirãpu Pedro ya wihigue ejañorã. “¿Simo ya wihi nohogue aħriri?” arĩ, erã serẽpira pũru ĩgu ya wihigue ejañorã erã. <sup>18</sup> Eropirã erã serẽ ĩha purumujuñorã. “¿Simo Pedro waicugũ i wihire aħriri?” arĩ serẽpi ĩañorã erã.

<sup>19</sup> Eropigu Pedro ĩgu pepĩsubu Espĩritu Santo ĩgure werepu:

—Īaque. Urerã uma mũre amarã iima. <sup>20</sup> Wahgãnugajaque. Dijaque. Erã mera waque. “¿Dohparĩri?” arĩ pepĩbigũ ta waque õaro mera. Yũpu erãre õguere obeoabũ, arĩpu Espĩritu Santo Pedore.

<sup>21</sup> ĩgu eroparĩcũ peegu Pedro erã pohroque dija wa,

—Īaque. Ohõ aħraa yũhu mũa amagãrigũ. ¿Duhpirã arirã iiari mũa yũ pohro arirã? arĩpu Pedro erãre.

<sup>22</sup> ĩgu eroparĩcũ ta erãpu õpa arĩñorã.

—Cornelio cien surara opu, õarire iigu, mari Pagure gũhyadiaro mera umupeogu, arĩpehrerã judio masa “Õagu” erã arĩgu mũre sihugãridoregu obeoami guare. Goãmu õagu anyu Cornelio mũre sihudoreapu. Opa arãpu: “Pedore mũa ya



wihigue aĩgãridoreque mu umare. Eropii ĩgu mure weregucumi,” arĩ, sihudoreapu anyu Corneliore, arĩ wereñorã Cornelio Pedrore ĩgu sihudorenirãpu.

<sup>23</sup> Erã eroparĩcũ Pedropu erãre ñajaridore, bari oho, ĩgu ya wihigue carĩdorepu erãre. Eropigu gajinu Pedro wahgã, erã mera waha wapu. Eropirã gajirã Cristo yarã Jope majarã Pedrore wapicugãñorã.

<sup>24</sup> Gajinu erã Cesareague ejañorã. Eropigu Corneliopu ĩgu acawererãre, ĩgu mera majarã sãre sihu gameneo, Pedrore corepu. <sup>25</sup> Eropigu Pedro Cornelio ya wihi pohroque ĩgu aricũ ĩagu Corneliopu ĩgure bocatĩri wiria, ĩgu guburi pohro merejapu.

<sup>26</sup> ĩgu eropa iicũ Pedropu ĩgure aĩ wahgũnugupu.

—Niguique muhu. Yu sã mu iro dopa ta arĩgu ahraa. Goãmu arĩbeaa, arĩpu Pedro ĩgure.

<sup>27</sup> ĩgu eropa arĩtuhajara puhru Cornelio ĩgure aĩñaja wapu ĩgu ya wihigue. Eroque ñajajagu masa bajarã iri wihigue gamenere ĩgure corerãre ĩapu Pedro. <sup>28</sup> Eropigu Pedro erãre werepu:

—Judio masu arĩqueregu ta gaji curu majarã mera arĩgu gua dorerire tarinugagu iiaa yahu. Irire ðaro masia mua. Eropigu gaji curu majarãre “Ñerã ahrima,” arĩdorebirami Goãmu. Ōpa arĩ wereami ĩgu yure. <sup>29</sup> ĩgu eroparĩcũ peegu õguere mua pohroguere ahrabu. Mua yure sihubecũ “Ne wasome,” arĩbirabu. ¿Dohpa arĩronore yahu õgue aricũ gahmeari mua? arĩpu Pedro erãre.

<sup>30</sup> ĩgu eroparĩcũ peegu Corneliopu õpa arĩpu:

—Tres arĩcũ i horano gohra ta mari Pagu yagu anyu yure dehyoami. Wapicurinu wahaa ĩgu yure dehyoara puhru. Irinu ta mari Pagure yu serẽniquirisubu cuimijuri suhricugu yu pohro dehyonugajami. <sup>31</sup> Eropigu ĩgu yure õpa arãmi: “Cornelio, muhu mari Pagu mera mu serẽcũ ĩgu peeami. Eropigu mojomorocurãre erã gamerire mu ocũ ĩagu mari Pagu mu mera mucubirigu itamugucumi. <sup>32</sup> Eropigu Jopegue mu umare obeoque Simo Pedro waĩcugure mu pohroque erã aĩgãricũ. ĩgu gajigu Simo waimurã gasiri amugu ya wihi, wuariya turo pohro arĩri wihi ahrimi ĩgu. ĩgu mu pohro eragu mure weregucumi,” arĩ wereami ĩgu yure. <sup>33</sup> ĩgu eroparĩcũ peegu yu umare mure aĩgãridoregu obeoabu yahu. Eropigu ðaro iigu ahraya muhu gua pohroguere. Eropirã gua arĩpehrerã õre mari Pagu ĩgu ĩhabeoro arĩrã iiaa gua. Arĩpehrerire mari Pagu Goãmu mure ĩgu weredorera peediarã, cohreabu gua, arĩpu Cornelio Pedrore.

### *Pedro Jesu yare werepu Cornelio ya wihi majarãre*

<sup>34</sup> ĩgu eroparĩcũ peegu, Pedro õpa arĩ werepu:

—Dohpague masia pare. Diaye ta ahraa. Goãmu yujuropa ta ðaro iimi marire. <sup>35</sup> Eropigu arĩpehreri macari majarã Goãmure guhyadiaro erã ĩacũ, ðarire erã iicũ, Goãmupu erãre mucubirimi. <sup>36</sup> Goãmu gua judio masa pohro Jesucristore obeomi. Masa Goãmu mera ðaro erã arĩboro dopa Jesupu ðari buherire weremi. Iri buherire mua masia. Jesucristopu arĩpehrerã masa opu ahrimi. <sup>37</sup> Ñu waĩyegu “Mua ñerire bujawereque. Eropirã waĩyenirã arĩque,” masare ĩgu eropa arĩ werera puhru Galileague ðari buherire Jesupu werenugami. Puhru Judea yebague iri buherire werepehomi. <sup>38</sup> Ihĩ Jesu Nazare majagure Goãmupu ĩgu turarire, Espĩritu Santo mera ĩgu iimasiburire odi arĩmi Jesure. Eropigu Jesu ðaro iigu wami. Eropa wagu watẽa ñajasũnirãre, ñero tarirãre, arĩpehrerãre ðarã wacũ iimi. Mari Pagu Jesu mera arĩdi arĩmi. <sup>39</sup> Judea yeba, Jerusalen sãre arĩpehreri ĩgu iirare gua ĩabu. Puhru erã crusague pabia wejẽma ĩgure. <sup>40</sup> Eropigu uhrenu waboro Goãmu ĩgure masudi arĩmi. Eropigu Jesure ĩgu masura puhru gajirãre dehyoacũ iidigu arĩmi mari Pagu. <sup>41</sup> Irisubu Jesure arĩpehrerã ĩabirima. Guare bajamerãgãre dehyoami.

Mari Pagu ïgu gameräre, Jesure ïamoräre iribojegue Goãmũ guare beyepũ. Guapũ Jesu ïgu sïrïdi masara pũhrũ ïgu mera baha, ihibũ. <sup>42</sup> Eropigũ ïgu guare doremi õpa arïgu: “Masare wereque. Yũhũ Jesu árïpehrerã ojocariräre, sïriniräre eräre dipuwaja moabu yũ árïcũ iiami yũre Goãmũ. Eropirã irire wereque,” arï doremi Jesu guare. <sup>43</sup> Árïpehrerã Jesure erã umupeocũ ïagũ Goãmũ erã ñerire cãdijigucumi. Irire árïpehrerã Goãmũ ya weremũhtanirã iribojegue majarã wereyuũuma, arï werepũ Pedro.

### *Judio masa árïbirã Espiritu Santore opañagañorã*

<sup>44</sup> Iri árïpehrerire ïgu eropa arï wererisubu, árïpehrerã irire peerã mera Espiritu Santo árïñugamũripũ. <sup>45-46</sup> Eropirã erã judio masa árïbirã peeyamariri wereniguri mera mucubiriri mera wereniguñagañorã. Erã ya wereniguri mera “Goãmũ turagũ, õagũ àhrimi”, arïrã iñorã. Erã eroparïcũ peepũ Pedro ïgu acawererã judio masa mera. Eropirã Espiritu Santo judio masa árïbirã mera ïgu árïñugacũ ïarã judio masapũ uca wañorã. Eropigũ Pedro õpa arï werepũ judio masare:

<sup>47</sup> —Mari iro dopa ta Espiritu Santore opama oã sã. Erã eropa opacũ ïarã oãre waïyedoremasia mari, arïpũ Pedro eräre.

<sup>48</sup> Eropa arïtuhaja Jesu waï mera judio masa árïbirãre waïyedorepũ Pedro. Erã eropiira pũhrũ “Gua mera bajamenũrigã dujanique,” arïñorã erã Pedro sãre.

## 11

### *Pedro Jerusalén majarãre Jesu yarãre werepũ*

<sup>1</sup> Eropii judio masa árïbirã sã Goãmũ yare erã õaro gamecũ Jesu ïgu apinirãpũ erã acawererã Judeague árïrã mera peebeoñorã. <sup>2</sup> Eropirã Pedro Jerusaléngue ïgu dujajacũ ïarã judio masa Jesu yarã bajamerãgã ïgure õpa arïñorã: <sup>3</sup> —¿Judio masa árïbirã pohro duhpigũ ejari mũhũ? ¿Dohpa árïronore erã mera bahari mũhũ? arï turiñorã erã Pedrose.

<sup>4</sup> Erã eroparïcũ peegu Pedro ïgu iirare werepehopũ eräre. <sup>5</sup> Õpa arï werepũ:

—Yũhũ Jopegue árïgu Goãmũre serẽgu iibũ. Eropigũ yũre õpa dehyoabũ. Yũhũ ïacũ wũari gasiro wapicũrisubu pepũri dirira gasiro umarogue yũ pohrogue dijaricũ ïabũ. <sup>6</sup> Eropigũ iri gasirore õaro ïabũ “¿Ñeheno iri gasiroguere àhriri?” arïbũ. Eropigũ ïabũ iri gasiroguere árïrãre. Waimũrã nũgu majarãre, yebague paha curirãre, mirimagũ porã majarãre ïabũ. <sup>7</sup> Eropigũ Goãmũ ïgu yũre wereniguirire peebũ. “Pedro, wahgãnũgaque. Wejẽ baque oãre,” arïgu carimi yũre. <sup>8</sup> ïgu eroparïcũ peegu õpa arïbũ yũhũ. “Opũ, ne eräre babeaa yũhũ. Ñerãre Goãmũ badorebirinirãre ne babirimũrabũ yũhũ,” arïbũ yũpũ. <sup>9</sup> Eropigũ umarogue yũre dipaturi wereniguigu carimi daja. “Goãmũ ïgu ‘Õarã àhrima,’ ïgu arïrãre ‘Ñerã àhrima,’ arïbiricãque mũhũ,” arïgu carimi yũre. <sup>10</sup> Eropigũ uhresubu ïgu eropa arï wereniguirã pũhrũ iri gasiro dipaturi mũria wabũ daja. <sup>11</sup> Yũ eropa ïarisubu ta uñerã uma guã árïri wihigue ejanirã árïma. Erã Cesarea majagũ ïgu obeonirã árïñirã árïma. <sup>12</sup> Eropigũ Espiritu Santopũ yũre erã mera wadoregu “‘Erã ñerã àhrima,’ arïbiricãque eräre,” arï weremi ïgu yũre. Eropirã oã seis mera yũ acawererã mera Cesarea majagũ ya wihigue ñajajabũ guã. <sup>13</sup> Eropigũ ïgu guare õpa arï weremi. “Anyu yaha wihi dehyoacũ ïabũ yũhũ. Õpa weremi yũre. ‘Jopegue Simo waïcũgũre aïgãridoreque. <sup>14</sup> ïgu mũre mũ acawererã mera mũare árïpehrerãre peamegue wabonirãre mũa tariborore weregucumi,’ arïmi anyu yũre,” arï weremi yũre Cesarea majagũ. <sup>15</sup> Eropii yũhũ eräre wereniguirisubu Espiritu Santopũ erã mera árïñugami marire ïgu iimũhtadiro dopa ta. <sup>16</sup> Eropigũ Jesu ïgu wererare guñabũ yũhũ. Õpa arï weremi ïgu: “Ñu mũare waïyegu deco mera waïyemi. Yũpũ iri tauro iigũra

mũare. Pũhrũ Espíritu Santore mũa mera árĩniguicũ iigũra,” arĩ weremi. <sup>17</sup> Eropigu Jesucristo mari Opũre mari umupeocũ ĩagũ Goãmũ ĩgũ Espíritu Santore ohámi marire. Eropigũ Goãmũ marire ĩgũ Espíritu Santore ĩgũ odiro dopa ta judio masa árĩbirã sãre ĩgũ ohámi. Goãmũ ĩgũ eropa iicũ ĩagũ ĩgũre tarinũgamasibea yũhũ, arĩpũ Pedro erãre judio masare Jesu yarãre.

<sup>18</sup> ĩgũ eroparĩcũ peerã, erã ĩgũre ne arĩnemobiriñorã. ĩgũre erã turimasibiriñorã. Eropirã erã Goãmũre mucubirirã,  
—Goãmũ õagũ, turagũ ãhrimi, arĩñorã.

Õpa arĩnemoñorã erã:

—Judio masa árĩbirã sã erã ñerire bũjawererã árĩrã Goãmũ ĩgũ taunirã árĩrãcoma. Eropa ĩgũ taunirã árĩrã erã sã mũuri nũcũ ĩgũ mera árĩniguirãcoma, arĩnemoñorã erã.

### *Antioquía gajirã Jesu yarã árĩñorã*

<sup>19</sup> Eropii Estebanre erã wejẽra pũhrũ masa Jesu yarãre ñero iĩñorã. Erã eropa iicũ ĩarã Jesu yarã duhrisirigã wañorã. Eropirã erã Feniciague, Chipregue, Antioquíague waha, judio masa dihtare Goãmũ yare wereriñorã erã. <sup>20</sup> Gajirãpũ Jesu yarã mera majarã Chipre majarã, Cirene majarã Antioquíague eja, judio masa árĩbirãre Jesu yare buheñorã Goãmũ erãre ĩgũ tauboro dopa. <sup>21</sup> Eropigũ mari Opũ erãre itamupũ. Eropirã masa bajarã Jesure umupeo, õaripũre gohrotoñorã.

<sup>22</sup> Eropii “Antioquía majarãgũre Jesure gamecoma,” arĩ peebeoñorã Jerusalén majarã Jesu yarã. Erã eropa peebeora pũhrũ Jerusalén majarã Bernabé waĩcũgũre Antioquíague obeoñorã. <sup>23</sup> Eropigũ ĩgũ Antioquíague ejagũ, Goãmũ itamuri mera judio masa árĩbirã ĩgũ yarã erã wacũ ĩagũ, bũrigã mucubiripũ. Eropigũ ĩgũ ero majarãre õpa arĩ werepũ:

—Jesure eropa umupeoniguicãque. ĩgũ yare ne duhubiricãque, arĩ werepũ ĩgũ árĩpehrerãre erãre.

<sup>24</sup> Bernabé õagũ árĩgũ, Espíritu Santore wũaro opagũ árĩgũ, Jesu dorediro dopa iigũ árĩgũ Jesure õaro umupeodigũ árĩpũ. Eropirã ĩgũ buhera pũhrũ bajarã masa Jesure umupeoñorã.

<sup>25</sup> Pũhrũ ĩgũ Tarso waĩcũri macague Saulore amagũ wapũ. <sup>26</sup> Erogue ĩgũre bocajapũ. ĩgũ bocajara pũhrũ Antioquíague aĩgãpũ Saulore. Erogue erã ejara pũhrũ yuju bojori gohra erã Goãmũ yarã mera gamenere, bajarã masare buhemũriñorã erã. Eropirã Antioquíague Cristo yarã Cristiano waĩcũnũgañorã.

<sup>27</sup> Irisubure Goãmũ ya weremũhtarã Jerusalén árĩnirã waha, Antioquíague ejañorã. <sup>28</sup> Eropigũ erã mera majagũ Agabo waĩcũgũ Jesu yarã watope nigũgũ, Espíritu Santo ĩgũ turari mera werepũ erãre. “Árĩpehreri yebaguere bũrigã oanũ waroca,” arĩ weryupũ ĩgũ. Irisubure bari maririsubu árĩcũ árĩpehrerã weca opũ Claudio árĩpũ. <sup>29</sup> Eropirã Jesu yarã árĩpehrerã erã oparopẽ erã acawererãre odiarã erã basi game werenĩguĩñorã. “Judea yeba majarãre Jesu yarãre niyerure obeorã,” arĩñorã erã basi. <sup>30</sup> Erã eropa arĩra pũhrũ Bernabé Saulo mera erã iri niyerure aĩgãbasañorã. Erogue ejarã Judea majarãre Jesu yarãre wiañorã iri niyerure.

## 12

### *Pedrore peresu iĩñorã*

<sup>1</sup> Irisubu opũ Herode yujurãyerire Jesu yarãre ñero iinũgapũ. <sup>2</sup> Eropigũ ĩgũ Ñũ tĩgũre Santiagopũre matamiji mera ĩgũ wejẽdorecũ gajigũpũ ĩgũre wejẽpũ. Santiagore ĩgũ wejẽcũ judio masa mucubiriñorã. <sup>3</sup> Erã mucubiririre Herode masigũ, “Eropa dihta iicũ gahmema erã,” arĩgũ Pedro sãre peresu iipũ. Irinũrĩre bũgabiriri pan erã bari bosenu Pascua árĩyoro. <sup>4</sup> Eropigũ Herode Pedrore ñeha, peresu

iip̄. Eropiḡ diez y seis surarare îhadibudorep̄ iḡure. Wapic̄urã surara iḡure îhadibuñorã. P̄hr̄u wapic̄urã erã gohrotonirã iḡure îhadibum̄riñorã. Eropa ta iñorã erã diez y seis surara. Herodep̄ Pascua p̄hr̄u Pedroke peresugue ár̄iḡure masa core duhudobodiarip̄ iḡure wejẽdorebu. <sup>5</sup> Eropiḡ Pedro peresugue ár̄ip̄. Iḡu erogue ár̄icũ ta Jesu yarãp̄ Goãm̄re burigã serẽbasañorã iḡure.

### *Goãm̄ peresugue ár̄iḡure Pedroke wiup̄*

<sup>6</sup> Iri ñamire ta Pedro comedari peda mera erã diridiḡ perã surara watope car̄iḡu iip̄. Eropirã perã surara disiporo coreniguiñorã iḡure. Eropiḡ iri ñami boyoro Herode Pedroke judio masa core duhudobodiarip̄ iḡure wejẽdorebu. <sup>7</sup> Eropiḡ Goãm̄ anyup̄ Pedro car̄iḡu pohro iḡu niguicũ iḡu peresu ár̄iri taribu boyopehrea wayoro. Eropiḡ anyu Pedro pohro niguiḡ iḡu patorere puucarep̄ iḡure.

—Duru wahgãque, ar̄ip̄ iḡu Pedroke. Iḡu eropar̄icũ ta iḡu mojotorire erã dirira comedari p̄risiri dija wayoro. <sup>8</sup> Eropiḡ anyu iḡure werep̄:

—M̄ ya suhrire sañaque. M̄ zapatu sãre sañaque, ar̄ip̄ iḡu.

Iḡu eropar̄icũ Pedrop̄ iḡu ar̄iro dopa ta iip̄.

—M̄ weca majañe suhriore saña, ȳ mera arique, ar̄ip̄ anyu.

<sup>9</sup> Iḡu eropar̄icũ iri taribugue ár̄idiḡu wiria anyu p̄hr̄u waha wap̄ iḡu. Eropa waquereḡu ta õpa ar̄i pepirip̄ iḡu. “¿I diaye ár̄ibiricuri? ¿O quẽḡu iicuri ȳh̄u?” ar̄i pepirip̄ iḡu. <sup>10</sup> Eropirã erã iḡu ár̄iri taribu pohro niguirã surarare tarigã, gajirã yoañariro niguirã sãre tarigã, w̄ari disiporogue ejañorã. Iri disiporo macague wari mare cãhmotayoro. Iri biharise irise basi p̄ar̄icũ erã wiriañorã. Wiria wa erã mague waha wañorã. Anyup̄ waha wap̄. Eropiḡ Pedro yujuḡu ta dujap̄. <sup>11</sup> Eropa iḡu anyu iḡu wara p̄hr̄u iḡu iirare Pedro masip̄ pare. Õpa ar̄i pepirip̄ iḡu. “Anyu Goãm̄ iḡu obeodiḡu peresugue ár̄iḡure ȳre wiuḡu erami. Dohpague irire masia iḡu eropa iirare. Judio masap̄ ȳre erã ñero iidiarare Goãm̄p̄ erãre iidorebirami. Eropiḡ ȳre Herode iḡu peresu iidiḡure wiuami,” ar̄i pepirip̄ Pedro.

<sup>12</sup> Iḡu eropa ar̄i pepira p̄hr̄u María Ñu pago ya wihigue ejap̄ Pedro. Ñup̄ Marco waic̄uḡu ár̄ip̄. Iri wihigue masa bajarã gamenere, Goãm̄re serẽrã iñorã. <sup>13</sup> Eropiḡ Pedro disiporore eraa dotep̄. Rode waic̄ugo pohro majago iḡu dotecũ peego, ñago ejapo igo. <sup>14</sup> Eropigo Pedro igore piyucũ peego iḡu wereniguirire pee masi, burigã mucubiri disiporore pãgũbiripo. Eropa mucubirigo iḡure pãgũbodio cãdija wap̄. Pedro ero niguicũ ta igo majinugaja oma ñaja wap̄.

—Pedro disiporogue erami, ar̄i werego ñajapo. <sup>15</sup> Eropirã iri wihi ár̄irã igo eropar̄icũ peerã,

—Eropa ar̄imaacãgo iiaa m̄h̄u, ar̄iñorã erã igore.

—Diaye ta ãhraa. Diaye ta ar̄igo iiaa, ar̄ipo igo. Igo eropar̄icũ peerã,

—Iḡu ár̄ibiricum̄i. Iḡu s̄iporã m̄raro eraro iica, ar̄iñorã erãp̄.

<sup>16</sup> Erã eropa ar̄irisubu Pedro disiporore eropa ta doteniguicãp̄. Iḡu eropiicũ peerã, erã disiporore pãgũ, iḡure îha, uca wañorã. <sup>17</sup> Eropiḡ Pedro iḡu mojoto mera “Ejarimaricãque,” ar̄iḡu, Goãm̄ peresugue iḡure iḡu wiurare werep̄ erãre.

—Ire wereque Santiagore gajirã Jesu yarã sãre, ar̄ip̄ Pedro.

Eropa ar̄i weretuhaja, iḡu gajipugue tarigã waha wap̄.

<sup>18</sup> Eropii boyodijiricũ surara Pedroke îhadibunirã iḡu dohpa ii wiriarare ne masibiriñorã. Eropa masibirã uca wañorã. <sup>19</sup> Eropiḡ Herode Pedroke amadorerip̄. Eropiḡ iḡu surarare peresu corerãre iḡu serẽpira p̄hr̄u erãre wejẽdorep̄ Herodep̄. Eropii Herode Judeague ár̄idiḡu waha Cesareague ár̄iḡu waha wap̄.

### *Herode s̄iria wap̄*



<sup>20</sup> Ero pũhrũ Tiro waĩcũri maca majarã mera Sidón waĩcũri maca majarã mera sãre Herode guapũ. Īgũ eropa guacũ ĩarã iri macari majarãpũ Herode mera amurã wañorã. Īgũ erã mera ĩgũ guarare wereniguirã wañorã. Ejaa Herodere ĩaboro core Herode itamugũ Blasto waĩcũgũ mera weretamuñorã. Eropirã erã ĩgũ Blasto ĩgũ itamuri mera Herode pohro ejañorã. Īgũ pohro ejarã õpa arĩñorã:

—Mari õaro árĩrã. Mari basi ĩhaturibiricãrã, arĩ serẽñorã erã Herodere.

Erã ya yeba majarã Herode ya yeba barire bocamũriñorã. Eropirã Herode erãre ĩhaturicũ gamebiriñorã erã. <sup>21</sup> Eropigũ Herode erã ĩgũre ĩarinũ ĩgũ queoranũ árĩcũ, opũ ĩgũ sañari suhri õari suhrire sañamũripũ ĩgũ. Eropigũ ĩgũ ĩgũ doaro doanijagũ, masare werenigui ĩhmumũripũ. <sup>22</sup> Īgũ eropa werenigui ĩhmucũ peerã masapũ gaguiniguĩñorã:

—Ihĩ wereniguigũ masũ árĩbeamĩ. Goãmũ àhrimi, arĩ gaguiniguimũririñorã erã Herodere.

<sup>23</sup> Erã eropa arĩra pũhrũ Goãmũ ĩgũ anyu Herodere dore ópũ. “Goãmũ árĩbeaa yũhũ,” ne arĩbiripũ Herode. Īgũ eropa arĩbirira dipuwaja anyu ĩgũ dorecũcũ iipũ. Īgũ eropa dorecũcũ ĩgũre beca ba wejẽcãñorã.

<sup>24</sup> Eropii Jesu yarã masa bajarãre Jesu ya buherire buheñorã.

<sup>25</sup> Eropirã Bernabé, Saulo mera Jesu yarãre itamupehotuhaja Jerusaléngue árĩnirã Antioquíague dujaa wañorã. Eropirã Ñure Marco waĩcũgũre erã aĩgãñorã erã mera.

## 13

### *Jesu yarã Bernabére Saulo mera Goãmũ yare buhedore obeoñorã*

<sup>1</sup> Irisubure Antioquíague Jesu yarã gamenererã mera majarã, Goãmũ yare weremũhtarã árĩñorã. Masare buherã ta árĩñorã erã sã. Bernabé, Simo Negro waĩcũgũ, Lucio Cirene majagũ, Manaén, Saulo mera erã árĩñorã. Manaénpũ opũ Herode murũ mera erã perã yujuro mera ta masanirã árĩñorã. <sup>2</sup> Eropirã erã Goãmũ yare erã buherisubu, erã ba duhurisubu, Espiritu Santopũ werepũ erãre:

—Bernabére, Saulo mera apique yũ gamero dopa iimorãre. Irire iimorãre beye apigũ iiaa erãre, arĩpũ Espiritu Santo.

<sup>3</sup> Īgũ eroparĩcũ erãpũ ba duhu Goãmũre serẽ, Bernabé weca Saulo weca erã mojotorire duhpeoñorã. Eropa duhpeorã erãre buhedorerã obeoñorã.

### *Chipregue Jesu ĩgũ apinirã buheñorã*

<sup>4</sup> Eropirã erã Espiritu Santo ĩgũ obeonirã árĩrã, Seleuciague eja, iri macare tarigã, Chipre waĩcũri nũgurogue ejañorã erã. <sup>5</sup> Eropirã Salamina waĩcũri peramague ejañorã. Iri maca judio masa buheri wirigue Goãmũ yare werenũgañorã erã. Eropigũ Ñu Marco sã erã mera waha, erãre itamupũ.

<sup>6</sup> Eropirã erã iri nũguro ojogoro maja. Pafõ waĩcũri macague ejarã, yeere bocajañorã erã. Īgũ judio masũ Barjesu waĩcũgũ árĩpũ. Barjesu griego ya mera Elima erã arĩ piyugũ árĩpũ. “Goãmũ yare weremũhtagũ àhraa yũhũ,” arĩ masare gũyaniguicãgũ árĩpũ ĩgũ. <sup>7</sup> Eropigũ ĩgũ Sergio Paulo waĩcũgũ mera majagũ árĩpũ. Sergio Paulopũ iri nũguro majarã opũ masipehogũ árĩpũ. Eropigũ Goãmũ yare peediagũ erãre Bernabé, Pablo mera bocatĩripũ ĩgũ. <sup>8</sup> Eropigũ Elima yeepũ erãre buhedorebiriripũ. Īgũ Sergio Paulo Jesu yare ĩgũ umupeocũ gamesãbiripũ yeepũ. Sergio Paulore Goãmũ yare ĩgũ peecũ cãhmotadiaripũ. <sup>9-10</sup> Īgũ eropa buhedorebiriquerecũ ta Saulo, Pablo waĩcũgũ Espiritu Santore õaro opagũ árĩgũ yeere õaro ĩadihupi ĩgũre werepũ:

—Mũhũ gũyaricũgũ, ñegũ, watĩ ĩgũ dorerire iigũ, õarire ĩhaturigũ àhraa mũhũ. ¿Duhpigũ mari Opũ yare “Ñeri àhraa. Gũyari àhraa,” eropa arĩniguicãri mũhũ?



<sup>11</sup> Mũhũ eroparĩra waja Jesu mari Opũ mũre ĩgu pẽhrecũ cuiri ĩhajabigu arĩgũca mũhũ. Eropigu bajamenurigã mũhũ ĩnũre ĩarisome, arĩpũ Pablo.

Īgu eroparĩcũ ta ĩgu yeepũ imica iro dopa arĩrire ĩamũhtagũ, naitĩaro dihtare ĩaru ĩgu. Eropigu ĩgũre tuã curibure amaru ĩgu. <sup>12</sup> Īgu eropa wacũ ĩagu, Sergio Paulopũ Jesu yare “Diaye ta āhraa,” arĩ masipũ. Mari Opũ yare ĩgu pee, ũca wa, Jesure umupeonũgarũ.

*Pablo Bernabé mera Antioquía Pisidia yebague arĩri macague arĩñorã*

<sup>13</sup> Eropi Pablo sã Pafogue arĩnirã dohodiru mera waha, Pergegue ejañorã. Perge Panfilia yebague āhraa. Erogue eja, Ñu Marcopũ erãre cohã wahgã, Jerusalengue waha warũ. <sup>14</sup> Erãpũ Pergegue arĩnirã waha, Antioquíague ejañorã. Antioquía Pisidia yebague āhraa. Erogue ejarã, Sabadonũ arĩcũ erã judio masa buheri wihigue ñajaja, erogue doañorã. <sup>15</sup> Eropirã iri wihi majarã oparã Goãmũ dorerire, Moisegue marire ĩgu apirare, Goãmũ yare weremũhtanirã erã gojarare erã buhera pũhrũ erã sihubeoñorã Pablo sãre.

—Acawererã, ¿masare mũa werediarã iiri? Irire werediarã wereque dohparagã, arĩñorã iri wihi majarã oparã.

<sup>16</sup> Erã eroparĩcũ peegũ, Pablo wahgãnũgaja, “Wereniguibiricãque,” arĩgu ĩgu mojoto mera paaturũ. Erã ejarimaricũ ĩha, ĩgu òpa arĩpũ:

—Israe masa, mũa mari Pagũre umupeorã, peeque. <sup>17</sup> Mari ñecũ sumarã mũra Goãmũre umupeomũriñuma. Erã mũrare Goãmũ beyemũriñumi. Eropirã erã mari ñecũ sumarã yoari boje Egiptogue arĩmũriñuma gajirã arĩquererã. Erogue erã arĩcũ Goãmũ òaro ĩmũriñumi erãre. Eropirã bajarã masa pore arĩñuma erã. Òpa ĩñumi erãre. Erãre Egiptogue arĩrãre ĩgu turari mera aĩ wiuñumi Goãmũ. <sup>18</sup> Īgu eropa wiura pũhrũ erã cuarenta bojori gohra masa marirogue curimũriñuma. Erogue ĩgũre erã tarinũgacũ Goãmũ eropa ta pepicãñumi. <sup>19</sup> Eropigu Canaa waĩcũri yebaguere siete cururi majarãre cóatuhaja, Goãmũ iri yebare oñumi Israe masapũre. <sup>20</sup> Iri yebare otuhaja cuatrocientos cincuenta bojori gohra masare doremorãre apimũriñumi Goãmũ Israe masare.

—“Goãmũ ĩgu apinirã Samue ĩgu arĩcũgue arĩtumũriñuma. Samuepũ Goãmũ yare weremũhtagũ arĩmũriñumi. <sup>21</sup> Samue arĩrisubu Israe masapũ erã opũ arĩbure amamũriñuma. Eropirã Goãmũre serẽmũriñuma. Erã eropa serẽcũ ĩagu Goãmũ Saulore apimũriñumi. Saulo Cis magũ arĩñumi. Benjami ya curu majagũ arĩñumi. Eropigu cuarenta bojori gohra erã opũ arĩbure apĩñumi Goãmũ ĩgũre. <sup>22</sup> Eropigu Goãmũ Saulore ĩgu cóãra pũhrũ Davire apimũriñumi ĩgu. Òpa arĩñumi Goãmũ Davire. “Davi Isaĩ magũre bocabũ yũhũ. Īgũre mucubiria yũhũ. Īgu yũ gamerire ĩpehogũcumĩ,” arĩñumi Goãmũ. <sup>23</sup> Ihĩ Davi ĩgu pãrami arĩturiagu āhrimi Jesu. Goãmũ Jesure apidigu arĩmi Israe masare itamubure. “Masare òaro ĩgũca,” arĩñumi Goãmũ. Īgu arĩdiro dopa ta ĩidi arĩmi ĩgu Jesu. <sup>24</sup> Īgu eropa ĩiboro core Jesu ĩgu ariboro core Ñu waĩyegũ òpa arĩ buhepũ: “Mũa ñerire bujawereque. Òaripũre gohrotoque. Eropirã waĩyesũnirã arĩque,” arĩ buhepũ Ñu arĩpehrerã Israe masare. <sup>25</sup> Eropigu Ñu ĩgu buhetuboro core, ĩgu sĩriboro core òpa arĩ weremũripũ. “¿Nihino āhriri yũhũ mũa pepicũ? Iribojegue majagũ Goãmũ yare weremũhtadigu arĩbeaa yũhũ. Cristo arĩbeaa yũhũ. Gajigu āhraa. Cristo yũhũ arĩbiriquerẽcũ yũ pũhrũ yũ tauro turagupũ arigũcumĩ. Īgupũ òatariagu āhrimi. Īgu iro dopa arĩbeaa yũhũ,” arĩ werepũ Ñu masare, arĩpũ Pablo.

<sup>26</sup> “Acawererã, Abrahã pãramerã, arĩpehrerã mari Pagũre guhyadiaro ĩarã, marire ĩ ĩgu tauborore wereri buherire obeodi arĩmi mari Pagũ. <sup>27</sup> Jerusalén majarã erã oparã mera Jesu erãre taugu ĩgu arĩcũ masibirinirã arĩma. Sabadonũri arĩcũ

Goãmũ yare weremũhtanirã erã gojarare buhequererã ta Jesure masibirinirã árĩma. Eropa masibirã Jesure wejẽdoreñorã. Eropa iirã Goãmũ yare weremũhtanirã erã gojadiro dopa ta iirã iĩñorã. <sup>28</sup> Ìgũre erã wejẽboro core erã Jesure weresãriñorã. Ìgũ ñerire iibiriquerecũ ta erã Pilatore Jesure wejẽdoremorã serẽñorã. <sup>29</sup> Eropirã iribojegue majarã erã gojadiro dopa ta Jesure iituhaja, ìgũre crusague árìgũre aĩdiju, masa gobegue utãyegue erã seara gobegue apiñorã erã ìgũre. <sup>30</sup> Eropa erã ìgũre wejẽquerecũ ta Goãmũ masudi árĩmi ìgũre. <sup>31</sup> Eropirã Galileague arinirã Jerusalengue ìgũ mera ejanirã bajanuri ìgũre sĩri masa deyodigũre ìañorã. Eropirã dohpaguere ìgũre erã ìarare masare werema erã.

<sup>32-33</sup> Eropa masare wereniguigũ òpa arĩ werenemopũ daja Pablo:

—Eropirã òari buherire werea gũa mũare. Goãmũ mari ñecũ sũmarãre “Masare òaro iigũca,” iribojegue ìgũ arĩdiro dopa ta dohpaguere marire erã acawererãre iiami. Irire ìgũ wererare òpa iiami ìgũ. Goãmũ Jesure masudi árĩmi. Eropirã Jesure ìgũ masurare werea gũa mũare. Salmopũgue iribojegue ìgũ òpa arĩ gojadiro dopa eropa wayoro Jesure: “ ‘Mũhũ yũ magũ ãhraa. Dohpagãre mũre dehyoacũ iiabũ,’ arĩmi Goãmũ ìgũ magũre,” arĩ gojañumi iribojegue. <sup>34</sup> Eropigũ Goãmũ Jesure ìgũ masuburire dipaturi ìgũ sĩribiriborore weregũ òpa arĩ were gojadoreñumi Salmopũgue: “Davire yũhũmojomoro ìadiro dopa ta diaye ta òaro iigũra mũa sãre,” arĩ gojadoreñumi. <sup>35</sup> Eropigũ gaji Salmo sãre òpa ta arĩ wereñumi: “Goãmũ mũ òagũ ìgũ dũpũre boadorebirabũ mũhũ,” arĩ gojañumi. <sup>36</sup> Eropigũ Davi Goãmũ ìgũ gamediro dopa ta ìgũ árĩrasubu majarãre itamumuriñumi. Pũhrũ ìgũ sĩria wañumi. Ìgũ sĩrira pũhrũ ìgũ pagũ sũmarãre erã iidiro dopa ta yaañuma ìgũ sãre. Eropigũ ìgũ boa wañumi. <sup>37</sup> Eropigũ ihĩ Jesu Goãmũ ìgũ masudigũpũ ne boabiridi árĩmi. <sup>38</sup> Eropirã mũa, yũ acawererã, ire masique: Goãmũ mũa ñerire ìgũ cóãborore mũare ire werea gũa. Jesupũ mũa ñerire cóãbu ãhrimi. <sup>39</sup> Eropigũ ìgũre umupeorãre erã ñero iirare cãdijicãgũcumĩ ìgũ. Moiserẽ ìgũ apira dorerire mũa iira mera Goãmũ pohrogue wasome mũa. Eropigũ iri dorerire iiri mera taridiarãre erã ñerire cóãsome Goãmũ. <sup>40</sup> Eropirã òaro iique. Mũa òaro iibiricũ Goãmũ ya weremũhtanirã erã gojadiro dopa ta mũare waroca. Òpa arĩ gojañuma:

<sup>41</sup> Peeque mũa queoricũrã. Yũre ìhaturirã ãhraa mũa. Yũ òpa iicũ gũique mũa. Eropirã peamegue waque. Mũa árĩrinũre mũare ii ìhmugũra. Yũ eropa ii ìhmucũ ìaquererã “Diaye ta ãhraa,” arĩsome mũa. Gajigũ irire mũare ìgũ òaro werequerecũ ta “Diaye ta ãhraa,” arĩsome mũa, arĩ gojañumi Goãmũ yare weremũhtadigũ, arĩ werepũ Pablo erãre.

<sup>42</sup> Ìgũ eropa arĩ werera pũhrũ judio masa buheri wihigue erã wiriara pũhrũ judio masa árĩbirãpũ erãre serẽñorã.

—Gaji semanague Sabado árĩcũ ire buheba daja guare, arĩ serẽñorã erã Pablõre.

<sup>43</sup> Eropirã iri wihigue árĩnirã wiria, judio masa bajarã, judio masa árĩbirã sã Pablo, Bernabé sã mera wañorã. Judio masa árĩbirã judio masa yare buherã árĩñorã. Erã erã mera wacũ Pablo Bernabé mera òaro wereñorã erãre. “Goãmũ mũare mahimi. Eropirã ìgũre umupeorã árĩniguicãque,” arĩ buheñorã erã.

<sup>44</sup> Eropirã gaji semanare Sabado árĩcũ árĩpehrerã Jesu yare peediarã gamenereñorã. <sup>45</sup> Eropirã judio masapũ bajarã masa Jesu yare peediarã gamenerecũ ìarã guañorã. Eropa guarã, erã gajiropa arĩ werenigui, Pablõre ñero quere goroweoñorã. “Mũare ìgũ buheri diaye árĩbeaa,” arĩñorã erã. <sup>46</sup> Erã eroparĩcũ peerã, Pablo, Bernabé mera erãre quere goroweonirãre gũiro mariro wereñorã.

—Goãmũ ìgũ dorediro dopa ta mũare judio masare buhemũhtarabũ gũa. Mũapũ irire gamebirituhabũ. Òmuri nũcũ Goãmũ mera árĩniguicũ sãre gamebirituhabũ

mua. Eropirã guapũ judio masa árĩbirãpũre buhenũgarãca. <sup>47</sup> Ōpa ta doreñumi mari Opũ guare:

Mua judio masa árĩbirãre buherã erãre Goãmũ yare õaro masicũ iirãca mua. Eropigũ mua yoarogue árĩrãre mua buhecũ peerãre erãpũre peamegue wabonirãre taugũca yũhũ, arĩ wereñumi Goãmũ guare ĩgũ yare gojarapũgue, arĩ werepũ Pablo, Bernabé mera.

<sup>48</sup> Erã eroparĩcũ peerã judio masa árĩbirãpũ mucubiriñorã. “Mari Opũ yapũ õari ãhraa,” arĩñorã erã. Eropirã Goãmũ ĩgũ gamenirã, umũri nũcũ ĩgũ mera erã árĩniguiborore ĩgũ odianirã Jesure umupeonũgañorã. <sup>49</sup> Eropirã mari Opũ Cristo yare iri yebague werepehoñorã. <sup>50</sup> Erã eropa iicũ ĩarã judio masa sũabiria wañorã. Erogue mari Pagũre umupeorã nome, õarã nome árĩñorã. Eropirã judio masa Pablo sãre ñero wereniguĩñorã. Erã eropa wereniguicũ peerã erã nome Pablo mera Bernabé mera guañorã. Eropirã iri maca majarã oparã sã erã mera guañorã. Eropa quarã ero majarã ñero iñorã Pablo sãre. Erã eropiira, pũhrũ Pablo sãre erã ya yebague árĩrãre cohã wiucãñorã. <sup>51</sup> Erã eropa iicũ ĩarã, Pablo Bernabé mera erã guburi maja nicure pasiripiñorã iri maca majarã erã ñeri wajare ĩhmurã. Eropa iituhaja erã Iconiogue waha wañorã. <sup>52</sup> Eropirã erã Jesu yarã wũaro mucubiri, Espĩritu Santo wũaro ĩgũ dorediro dopa iirã iñorã.

## 14

### *Pablo Bernabé mera Iconiogue árĩñorã*

<sup>1</sup> Eropirã Iconiogue árĩrã Pablo Bernabé mera judio masa buheri wihigue ñaja, Jesu yare wereñorã. Eropirã judio masa bajarã Jesure umupeonũgañorã. Eropirã judio masa árĩbirã sã Jesure umupeonũgañorã. <sup>2</sup> Judio masa Jesu yare peediabirãpũ judio masa árĩbirãre Jesu yarã mera erã guacũ iñorã daja. Erã eropa iicũ judio masa árĩbirã ñero pepiñorã Jesu yarãre. <sup>3</sup> Erã eropa pepicũ ĩarã Jesu yarãpũ Pablo sã erogue yoari boje árĩrã, güiro mariro mari Opũ yare õari buherire buheñorã. Goãmũ masare ĩgũ mahirire buheñorã. Erã eropa buherisubu Goãmũ turari mera deyoro moarire ii ĩhmuñorã, “I buheri diaye ta ãhraa,” arĩ ĩhmurã. <sup>4</sup> Eropirã iri maca majarã deco mera judio masa yare gamerã dujañorã. Deco mera ta Jesu yare gamerã sã dujañorã. Erã pe curu dũca wariñorã. <sup>5</sup> Eropirã Jesu yare gamebirãpũ judio masa sã árĩbirã, judio masa sã erã oparã mera gamenere Jesu ĩgũ apinirãre ñero iidiariñorã. Utã mera dea wejẽdiariñorã erãre. <sup>6</sup> Erã eropa iidiarire masirã, Pablo, Bernabé mera Licaonia yebague duhrigã waha wañorã. Iri yeba árĩri macari tari wahgã Lистра waĩcũri macare Derbe waĩcũri maca sãre ejañorã. <sup>7</sup> Erogue ejarã, õari buherire buheñorã daja erã.

### *Listrague Pablora utã mera deañorã*

<sup>8</sup> Eropii Listrague curimasibigũ doapũ. ĩgũ ne masa dehyoagũgue ta curimasibiridigũ árĩpũ. <sup>9-10</sup> Eropigũ ĩgũ Pablo ĩgũ buhecũ peepũ. ĩgũ peerisubu Pablopũ ĩgũ dihtare ĩapũ. ĩgũre ĩanũrũ õpa arĩ pepipũ: “Ihĩ Jesure umupeomi. Eropigũ ‘Jesu yũre dũpũ õacũ iimasimi,’ arĩ pepigũ iicumĩ,” arĩ pepipũ Pablo curimasibigũre. Eropa pepigũ turaro mera õpa arĩpũ Pablo ĩgũre:

—Wahgãnũgajaque, arĩpũ Pablo ĩgũre.

ĩgũ eroparĩcũ peegũ ta curimasibigũpũ buhrimanũgaja, wapũ. <sup>11</sup> Pablo ĩgũ eropa iicũ ĩarã masa gaguiniguĩñorã. Erã Licaonia ya mera õpa arĩ gaguiniguĩñorã:

—Goãmarã masa dopa bejarã umarogue árĩrã mari pohrogue dijarama, arĩ gaguiniñorã erã.

<sup>12</sup> Eropirã erã Bernabére “Mari goãmũ Zeus ãhrimi,” arĩ piyuñorã. Eropirã Pablo buhemũhtadigũ opũ iro dopa ĩgũ árĩcũ ĩarã “Mari goãmũ Hermes ãhrimi,”

arĩ piyuñorã erã ïgure. <sup>13</sup> Eropirã Zeure umupeorã ya wihi iri maca turo pohro árĩyoro. Eropigũ Zeus yarã erã pahipũ iri wihigue árĩgũ macague ñajariri disiporo pohrogue wecũare, gori amurare aĩgãripũ. Iri mera Pablöre Bernabére “Mari goãmarã àhrima,” arĩ umupeodiariñorã. Eropirã erã wecũare soemuju Pablöre, Bernabére umupeodiariñorã. <sup>14</sup> Erã eropa iidiacũ ïarã Pablo, Bernabé mera erã basi erã ya suhrire yehguenũgañorã erã bujawererire masare ïhmurã. Erã yehguenũgara pũhrũ masa watope omagã, gaguiniguñorã erã.

<sup>15</sup> —Mũa õpa iibiricãque. Gũa sã mũa iro dopa ta masa àhraa. Mũa õpa iiri ne duhpiburi árĩbeaa. Eropirã mũare õarire buherã ahrabũ. Õpa iirire duhudorerã arirã iiabũ. Oã mũa goãmarãre mũa wéanirãre ñerãre cóacãque. Eropirã Goãmũre ojocarigũpũre umupeoque. Goãmũpũ umarore, yebare, wũariyare, árĩpehrerire, árĩpehrero majarãre iigu àhrimi. <sup>16</sup> Eropigũ ïgũ iribojegue árĩpehreri macari majarã erã gamero iirare eropa ïacãñumi. <sup>17</sup> ïgũ eropa ïacãqueregũ ïgũ árĩricũrere ïhmumi marire. ïgũ masare õarire ii, deco aricũ ii, dũcare oo, masare barire oniguimi. ïgũ eropa ocũ masa mucubirima. Eropa ta ïgũ árĩricũrere ïhmumi masare, arĩpũ Pablo, Bernabé mera.

<sup>18</sup> Eropirã erã eroparĩcũ peequererã ta masa wecũare wejẽ soemuju erãre umupeodiariñorã. Eropa erã umupeodiacũ ïarã erãre eropa iidorebiriñorã Pablo sã. Erã eropa iirire duhudiabiriquererã duhuñorã.

<sup>19</sup> Eropii gajirã judio masa Antioquía majarã, Iconio majarã sã Listrague ejañorã. Eroque ejarã, Pablöre ñero wereniguñorã ero majarãre. Erã eropa wereniguicũ peerã masa ïgũ mera guanũgañorã. Eropa guarã masapũ utã mera deañorã Pablöre. Utã mera ïgure deatuhaja, “Ihĩ sĩria wahãmi,” arĩrã, iri maca turo pohrogue ïgure taragã mehpicã, waha wañorã. <sup>20</sup> Erã eropiiquerẽcũ Jesu yarã Pablo pohro erã gamenerenũgajacũ gohra Pablo masa wahgãnũgaja, erã mera macague waha wapũ. Eropirã gajinũ ïgũ Bernabé mera Derbegue wapũ.

<sup>21</sup> Eropirã erã erogue erã õari buherire bajarã masare erã werera pũhrũ, erã Listrare eja daja iri macare tarigã, Iconiore eja daja iri macare tarigã, Antioquía Pisidia yebague árĩri macare ejañorã daja. <sup>22</sup> Iri macarigue ejarã, ero majarã Jesu yarãre õari buherire wereñorã daja. Erãre õaro sĩporãcũcũ iĩñorã. Eropirã Jesure umupeodoreniguicãrã õpa arĩ wereñorã erãre.

—Goãmũ árĩroguere mari wadiarã, bũrigã marire ñero tariro gahmea, arĩ wereñorã erã.

<sup>23</sup> Eropirã macari nũcũ majarãre Jesu yarãre erã oparã árĩmorãre apiñorã Pablo Bernabé mera. Eropirã erã ba duhura pũhrũ Goãmũre serẽñorã.

—Opũ, oã mũ yarãre ïhadibuque, arĩ serẽbasañorã erã Goãmũre erã umupeogure.

*Pablo Bernabé mera Antioquíague erã árĩmũhtara macague dujaa wañorã*

<sup>24</sup> Erã eropa iira pũhrũ erã Pisidia yebague tariara pũhrũ waha wañorã Panfilia yebague. <sup>25</sup> Eropirã Pergeguere erã buhetuhaja Atalia waĩcũri macague buha wañorã. <sup>26</sup> Eropirã iri macague eja, Antioquíague dujaarã, dohodiru mera waha wañorã. Iri maca coregue erã árĩnicũ Jesu yarã Goãmũ yare buhedorerã Pablo sãre obeoñorã. Eropa obeerã Goãmũre õpa serẽñorã:

—Goãmũ, mũ mahiri mera oãre ïhadibuque, arĩ serẽ, obeoñorã erã.

Eropirã erã buhedorerare buhepehonirã árĩrã Pablo Bernabé mera dujaniñorã iri macare. <sup>27</sup> Eropirã erã Antioquíague erã dujajara pũhrũ Goãmũ yarã mera gamenere, Goãmũ ïgũ turari mera erã iirare werepehoñorã erã. Judio masa árĩbirã sã Goãmũ yarã erã warare wereñorã erã. <sup>28</sup> Eropirã Pablo sã eroguerẽ Jesu yarã mera yoari boje árĩcãmuriñorã.



## 15

*Jerusaléngue Jesu yarã gamenereñorã*

<sup>1</sup> Eropi Judea yeba majarã bajamerãgã Antioquíague ejarã, Jesu yarãre òpa arĩ buhenũgañorã erã.

—Goãmũ ìgũ dorerire Moiserere apigũ òpa arĩ apimuriñumi. Árĩpehrerã erã dupũre miri gasirogã erã wiri aĩborore were apimuriñumi Moiserere. Mũa irire iibiricũ Goãmũ mũare tausome, arĩ buheñorã erã ero majarãre.

<sup>2</sup> Erã eropa arĩ buhecũ peerã Pablo Bernabé mera gamebiriñorã. Iri buherire burigã game duyasoñorã Judea yeba majarã mera. Erã eropa game duyasora pũhrũ Jesu yarãpũ Pablore, Bernabé, gajirã ero majarã sãre Jerusaléngue obeoñorã. Judea yeba majarã erã buherire Jesu ìgũ apinirãre Jesu yarã oparã sãre serẽpi ìadorerã obeoñorã Pablo sãre.

<sup>3</sup> Eropirã Jesu yarã erãre erã obeocũ waha, Fenicia yebare eja tarigã, Samaria yebague ejañorã. Iri macarigue ejarã, judio masa árĩbirã Goãmũ yare erã gemenũgarare wereñorã erã ero majarãre. Erã eropa werecũ peerã ero majarã Jesu yarã burigã mucubiriñorã.

<sup>4</sup> Eropirã erã Jerusaléngue ejacũ ìarã ero majarã Jesu yarã Jesu ìgũ apinirã, ìgũ yarã oparã mera mucubiriri mera òaro bocatĩriñorã erãre. Eropirã Pablo, Bernabé gajirã mera Goãmũ ìgũ turari mera erã iirare wereñorã Jerusalén majarãre. Judio masa árĩbirã Jesu yarã erã wara sãre wereñorã erã. <sup>5</sup> Erã eropa werequerecũ erogue fariseo masa Jesu yarã bajamerãgã árĩñorã. Eropirã erã eroguerere wahgãnũgaja, òpa wereñorã.

—Erãre judio masa árĩbirãre erã dupũre miri gasirogãre wiriro gahmea. “Goãmũ Moiserere ìgũ dorerare iique mũa sã,” arĩro gahmea erãre, arĩñorã erã fariseo masa.

<sup>6</sup> Erã eroparĩcũ pee, Jesu ìgũ apinirã, Jesu yarã oparã mera irire amudiarã, gamenereñorã. <sup>7</sup> Eropirã erã yoari boje erã wereniguira pũhrũ Pedro wahgãnũgaja, werepũ erãre.

—Acawererã, iribojegue yũhũ mũa mera árĩgũre Goãmũ òpa iidoregũ yũre apimi. Ìgũ yũre òari buherire judio masa árĩbirãre weredoregũ apimi. Erãre Jesure umupeodoregũ yũre erãre buhedoremi. <sup>8</sup> Eropigũ Goãmũ masa erã pepirire masimi. Eropigũ ìgũ judio masa árĩbirãre ìgũ yarãre ìgũ iirare ìhmubu ìgũ Espĩritu Santore ohãmi erãre marire ìgũ iidiro dopa ta. <sup>9</sup> Eropa ogũ ìgũ marire erã sãre yujuropa ta òaro iimi. Erã ìgũre umupeocũ erã ñerire cadijimi ìgũ. <sup>10</sup> Maripũ Moise dorerire yujuro bojebeaa. Mari ñecũ sumarã mũra sã irire yujuro bojebirimuriñuma. ¿Eropa mari yujuro bojebiriquererã duhpirã Jesu yarãre judio masa árĩbirãre irire Moise dorerire iidorediari mũa? ¿Duhpirã Goãmũ judio masa árĩbirãre ìgũ yarã wacũ ìgũ iirare “Ero wabeaa,” arĩri mũa? <sup>11</sup> Eropa arĩbirã mari òpa pepia. Dohpaguere judio masa árĩbirã iro dopa ta mari sãre mari Opũ Jesu mahiri mera Goãmũ taugũcumĩ, arĩpũ Pedro erãre.

<sup>12</sup> Ìgũ eroparĩcũ peerã árĩpehrerã ejarimaria wañorã. Eropirã Pablo Bernabé mera judio masa árĩbirã watope Goãmũ turari mera erã ii ìhmurare wereñorã erãre.

<sup>13</sup> Eropa erã weretuhajara pũhrũ Santiago sã werepũ.

—Acawererã, peeque yũre. <sup>14</sup> Goãmũ judio masa árĩbirãre ìgũ yarã árĩmorãre ìgũ ne iirare weretuhajami Pedropũ. <sup>15</sup> Iribojegue Goãmũ ya weremũhtanirã erã werediro dopa ta eropa wahabũ judio masa árĩbirãre. Òpa arĩ Goãmũ wereniguirire gojañuma erã iribojeguere:

<sup>16</sup> Iribojeque Davi mũrũ ya curu majarã erã oparã árĩra pehrea wabũ. Pũhrũ dujarigũca yũhũ. Eropigũ dipaturi ìgũ ya curu majagũre opũ acugũca. <sup>17</sup> Yũ eropa acura pũhrũ árĩpehrerã judio masa árĩbirã yũre erã opũre gamerãcoma



erã. “Yaharã árrique,” yu arĩ sihubeorãpũ yure gamerãcoma. <sup>18</sup> Eropa ta arĩmi mari Opũ. Iribojegue ãgu ire masare weremũripũ, arĩ gojañuma Goãmũ ya weremũhtanirã.

<sup>19</sup> “Eropigũ òpa pepia yũhũ, arĩpũ daja Santiago. Judio masa árĩbirãre Goãmũ yare ne gamenũgarãre baja iidorebircãrã mari. <sup>20</sup> Eropirã erãre goja, obeorã mari. Òpa arĩ gojabeorã. “Goãmarã wéanirãre erã umupeora barire babircãque. Eropirã nome mera ñero iibircãque. Nome sã ɔma mera ñero iibircãque. Eropirã wũunũgu mohwejẽnirãre waimũrãre babircãque. Dire ihribircãque,” iripẽta arĩ were gojabeorã. Iri doreri Moise apira doreri sã ãhraa. <sup>21</sup> Yoari boje judio masa buheri wirigue Sabado árĩcũ Goãmũ Moiserẽ ãgu apira dorerire buhemũrima masa. Eropii árĩpehreri macarigue Moise dorerire buhemũrima masa. Eropirã yu arĩdiro dopa ta judio masa árĩbirãre Jesu yarãre were gojabeocũ, judio masapũ pee, “Gũa ãguari ta ãhraa,” arĩrãcoma, arĩpũ Santiago.

### *Judio masa árĩbirãre erã gojarapũ obeoñorã*

<sup>22</sup> Eropirã Jesu ãgu apinirã, Jesu yarã oparã árĩpehrerã Jesu yarã mera Santiago arĩrare peerã, “Eropa ta iirã,” arĩñorã. Tuhajanugu erã mera majarãre beyeñorã erã obeomorã. Antioquíague Pablo, Bernabé mera erã wamorãre erã beyeñorã. Eropirã erã Judare, Sila mera beyeñorã erã obeomorã. Judapũ Barsabá peñe waĩcũpũ. Erã beyerã acawererã Jesu yarã erã umupeonirã árĩñorã. <sup>23</sup> Erãre erã beyera pũhrũ Jesu yarã gojabeorapũre obeoñorã erã mera. Òpa arĩ gojañorã erã:

—Jesu ãgu apinirã, Jesu yarã oparã, mũa acawererã Jesu yarã mera gũa òadorea mũare. Árĩpehrerã judio masa árĩbirã Antioquíague, Siriague, Ciliciague árĩrãre mũare Jesu yarãre òadorea gũa. <sup>24</sup> Gũa mera majarã mũa pohrogue ejarã, mũare baja dorerire iidoreañorã. Eropirã mũare gariboañorã. Erã Goãmũ dorerire Moiserẽ ãgu apiraguere, mũa dupũ merogã gasirogãre wiriri sãre iidoreañorã. Gũapũ erãre irire buhedorerã obeobirabũ. <sup>25-26</sup> Eropirã gũa árĩpehrerã mũa pohrogue obeomorãre gũa beyeabũ. Mari mera majarãre, mari mahirãre, Pablo, Bernabé mera Cristo Jesu mari Opũ yare gũiro mariro erã buhecũ bajasuburi gajirã erãre wejẽbocuriñorã. Erã eropa wejẽbocuricũ merogã mera tarimũriñorã erã. Erã Pablo, Bernabé mera gũa beyenirãre dohpaguere obeoa. <sup>27</sup> Eropirã Juda, Sila mera mũa pohrogue obeoa. Gũa gojabeorare erãpũ mũare wererãcoma. <sup>28</sup> Espíritu Santo ãgu guñaro dopa ta gũa sã pepia. Òpa ãhraa iri: Gaji doreriguere apibea mũare. I doreri dihtare apirãca mũare. <sup>29</sup> Goãmarã wéanirãre erã umupeora barire babircãque. Dire ihribircãque. Wũunũgu mohwejẽnirãre waimũrãre babircãque. Eropirã nome mera ñero iibircãque. Nome sã ɔma mera ñero iibircãque. I gũa eropa dorera iibirã òarire iirã iica mũa. Iripẽta ãhraa mũare gũa werediari, arĩ gojabeoñorã Jesu yarã Jerusaléngue árĩrã.

<sup>30</sup> Iripũre gojatuhaja, wiañorã Antioquíague warãre. Erã wiara pũhrũ waha, Antioquíague ejañorã. Erã erogue ejara pũhrũ bajarã masare gamenedore, erã gojarapũre wiañorã erãre. <sup>31</sup> Iripũre erã buhera pũhrũ, iri òarire erã werebeorare peerã, òaro mucubiriñorã. <sup>32</sup> Juda, Sila mera Goãmũ yare weremũhtarã árĩñorã. Eropirã yoari boje Jesu yarãre Goãmũ erãre ãgu weredorerare wereñorã. Erã eropa werecũ peerã, Jesu yarãpũ mucubiri òaro siporãcũñorã. <sup>33</sup> Eropirã Juda, Sila mera erogue bajamenũrigã erã árĩra pũhrũ erã dujaricũ, ero majarã erã goeriserecũ, “Òaro waque mũa,” arĩñorã Antioquíã majarã. Eropirã Juda sãre obeonirãre òadorebeoñorã. Erã eropa arĩra pũhrũ Juda waha wapũ. <sup>34</sup> Silapũ dujarũ Antioquíague. <sup>35</sup> Eropirã Pablo Bernabé sã bajamenũri dujañorã iri maca ta daja. Eropirã erã gajirã bajarã mera Jesu yare buhe wereñorã.

### *Dipaturi Pablo òari buherire buhecurigũ wapũ daja*

<sup>36</sup> Eropii bajamenuri pührü Pablo werepü Bernabére.

—Ina, árïpehreräre mari buhenuganiräre ïhacurirä warä daja, arïpü Pablo.

<sup>37</sup> Eropigü Bernabépu Ñure erä mera aïgãdiaripü. Ñu Marco peñe waïcüpu.

<sup>38</sup> Pablopü ïgure aïgãdiabiripü. Ero core ïgü erä mera Panfiliague ejagü eräre cohã dujaa wapü. Eropigü ïgü erä iirire yujuro bojebiri dujaa wapü. ïgü eropa yujuro bojebiricü ïagü Pablo dipaturi ïgure aïgãdiabiripü. <sup>39</sup> ïgü aïgãdiabiricü ïagü Bernabé Pablo mera erä basi perä bürigã arï game erä basi purumujucãñorã. Erä eropa arïra pührü Bernabépu Chipre waïcüri nügurogue Marcore aïtaribuja wapü. <sup>40</sup> Pablopü Sila mera waha wapü. Eropirã erä buherã waboro core Jesu yarã eräre obeorã, “Goãmü müare ðaro ïhadibuporo,” arïñorã. Erä eropa arïra pührü, Pablo Sila mera waha wapü. <sup>41</sup> Eropa warã, Siria yeba, Cilicia yeba säre eja, erogue Jesu yaräre ðaro sïporãcü iri erä mucubiricü iñorã erä.

## 16

### *Timoteo Pablo Sila mera wapicugãpü*

<sup>1</sup> Erä eropa iira pührü Pablo sä Derbegue, Listrague ejañorã. Erogue ejagü Timoteore bocajapü. Timoteo Jesu yagü árïgü, judio maso magü árïpü ïgü. ïgü pago sä Jesu yago ta árïpo. ïgü pagupü Griego masü árïpü. <sup>2</sup> Eropirã Listra majarã, Iconio majarã, Jesu yarã Timoteore masa “Õagu ährimi,” arï weremuriñorã. <sup>3</sup> Eropigü Pablo Timoteore aïgãdiapü. Eropirã iri yeba majarã judio masapü Timoteo pagü griego masü ïgü árïcü masiñorã. Eropigü Pablo judio masare guari arïgü, Timoteo düpüre miri gasirogã wiri aïpü. Judio masa doreri iri arïro dopa ta iipü ïgure. <sup>4</sup> ïgü eropa iira pührü waha erä ejari macari majaräre erä gojabeorapü majare wereñorã. Iripü Jesu ïgü apinirã, Jesu yarã oparã mera Jerusaléngue árïrã erä gojabeorapü árïyoro. Eropirã erä iri dorerire ðaro wereñorã ero majarã Jesu yaräre. <sup>5</sup> Erä eropa werecã peerã, Jesu yarãpü Jesure umupeonemoñorã. Eropirã Jesu yarã ümuri nüscü bajarã waniguicãñorã.

### *Pablo quëroque Macedonia majagüre ïapü*

<sup>6-7</sup> Eropigü Asia yebaguepüre ðari buherire buherã wadorebiripü Espiritu Santo eräre. Eropirã erä Frigia yebare taria, Galacia yebare taria, Misia yeba türo pohro ejañorã. Bitinia yebapü wadiariñorã erä. Eropigü Espiritu Santopü eräre eroguer wadorebiripü. <sup>8</sup> ïgü eropa dorera pührü erãpü Misia yebare tarigã, Troague erañorã. <sup>9</sup> Erogue ïgü erara pührü iri ñamire ðpa quëpü Pablo. Macedonia yeba majagü ïgü pohro niguicã ïapü ïgü. “Güare Macedonia yeba majaräre itamugü arique,” arï, sihupü ïgü Pablore. <sup>10</sup> ïgü eropa quëra pührü wahgã, gúa yare amutuhaja, Macedoniague waha wabü gúa. “Goãmü iri yebare ðari buherire buhedoregü iimi marire,” arï pepibü gúa.

### *Pablo, Sila mera Filipogue árïpü*

<sup>11</sup> Eropirã gúa Troague árïrã dohodiru mera Samotracia waïcüri nügurogue taribujajabü gúa. Eropirã gajinü Neápoligue wabü gúa. <sup>12</sup> Iri macare taria, Filipogue Roma majarã ya macague ejabü gúa. Iri maca Macedonia yeba árïri maca árïbü. Gühyadiari maca árïro iibü. Eroguere bajamenurigã gúa árïbü. <sup>13</sup> Eropirã Sabado árïcü gúa iri maca türo pohroque, dia weca pohroque ejabü. Ero Goãmü mera erä werenigüro árïbü. Ero doarã ero gamenererã nome mera weretamübü gúa. <sup>14</sup> Yujugo güare peego Tiatira majago Lidia waïcügo árïmo. Eropigo igo ðari suhri wajacüri suhrire duago árïmo. Mari Pagü Goãmü säre umupeogo árïmo. Eropigü Pablo ïgü wererire ðaro peecü iimi Goãmü igore. <sup>15</sup> Eropii igore igo ya wihi majarã mera waïyemi Pablo. ïgü eropa waïyera pührü ðpa arïmo igo:

—“Jesu yago āhraa,” arāa m̄ua s̄a ȳure. Eropirā yaha wihi ñajarinique m̄ua. Ȳu mera dujanique, arīmo igo ḡuare.

Igo eroparīcū peerā igo ya wihi dujanib̄u ḡua. <sup>16</sup> Gajin̄u Goām̄u mera erā wereniguirogue ḡua wacū watī ñajasūdigo bocatīrimo ḡuare. Igo gajirā pohro majago arīmo. Eropigo igo masare “Ōpa waroca m̄uare,” arī wereyugo arīmo. Irire masare werego w̄uaro wajatabasamo igo oparāre. <sup>17</sup> Eropigo Pablo mera ḡua wacū, ḡuare n̄ur̄asia, gaguiniguimo igo.

—Oā Goām̄u turatariḡu īḡu itumurā āhrima. Mari s̄irira p̄uhr̄u Goām̄u marire īḡu ōaro tauborore werema erā, arī gaguiniguimo igo.

<sup>18</sup> Bajan̄ari eropa arī garibomo Pablore. Igo eropa arī gaguiniguicū daja Pablo gamebiḡu maji īha, ōpa arīmi watīre:

—Jesucristo turari mera dorea m̄are. Igoire duhuque. Wanisa m̄uh̄u, arīmi Pablo.

Īḡu eroparīcū ta watīp̄u waha wap̄u.

<sup>19</sup> Watī igore eropa wara p̄uhr̄u igo ōago dujago masa erā waburire werego arībirimo pare. Eropirā igo oparāp̄u niyerure igo wajatabigo igo wacū ĩarā, erā Pablo Sila mera ñeama. Ñehatuhaja, erāre taragāma iri maca decogue oparā pohrogue.

<sup>20</sup> Eropa aīgārā, dipuwaja moadorerā pohrogue erāre apima erā ōpa arīrā:

—Oā judio masa mari ya macare gariborā iima. <sup>21</sup> Erā mari dorerire cóadorerā, gaji buherire buherā iima. Mari ya dorerire tarinugacū iidiarā iima. Mari Roma majarā arīrā oā erā wererip̄ure iimasibea mari. Eropirā erā buherire mari gamebeaa, arīma igo oparā dipuwaja moadorerāre.

<sup>22</sup> Erā eroparīcū peerā masa bajarā Pablo s̄a mera guatariacāma. Eropirā dipuwaja moadorerāp̄u Pablo Sila s̄a ya suhrire erā yehgue cóara p̄uhr̄u m̄ta yucagā mera t̄aradorema erāre. <sup>23</sup> B̄urīgā erā t̄arara p̄uhr̄u peresu iima erāre. Erā eropa peresu iira p̄uhr̄u peresure coreḡure ōaro ĩhadibudoreñorā erā. <sup>24</sup> Erā eropa dorera p̄uhr̄u erāre coreḡup̄u iri wihi poheca maja taribugue erāre api, taboamiji goberigue s̄ihacu erā guburire bihacāp̄u. <sup>25</sup> Ñami deco Pablo, Sila mera Goām̄ure serē īḡure bayapeñorā. Erā eropa bayacū peeñorā gajirā peresugue arīrā. <sup>26</sup> Erā eropa bayacū ta iri wihi b̄urīgā ñohmeyoro. Ero eropa ñohmecū yujuro mera arīpehreri disiporori p̄arimaapehrea wayoro. Peresugue arīrāre erā diriradari s̄a p̄arisiri dija wayoro.

<sup>27</sup> Eropa wacū ĩaḡu, iri wihire coreḡup̄u wahgā, īḡu ñoserimijire aībeo, īḡu basi ñosediarip̄u. <sup>28</sup> Īḡu eropa iicū ĩaḡu Pablo īḡure b̄urīgā gaguinigui ōpa arīp̄u.

—M̄u basi ñero iibiricāque. Arīpehrerā ōre āhraa ḡua, arīp̄u īḡu erāre coreḡure.

<sup>29</sup> Īḡu eroparīcū peeḡu erāre coreḡup̄u sihāgodore, erā pohrogue omagā Pablo, Sila guburi pohrogue naragā merejap̄u īḡu. <sup>30</sup> Eropiḡu īḡu erāre iri taribugue arīrāre aī wiria, serēpip̄u erāre.

—¿Dohpa iiḡucuri ȳuh̄u Goām̄u īḡu ȳure taucū gameḡu? arī serēpip̄u īḡu.

<sup>31</sup> —Jesucristore umupeoque m̄uh̄u. M̄u acawererā s̄a īḡure umupeoporo. M̄ua eropa iicū Goām̄u m̄uare tauḡucumi īḡu pohro m̄ua waboro dopa, arī wereñorā erā.

<sup>32-33</sup> Erā eropa arīrisubu ñami deco p̄uhr̄ugā arīyoro. Erā eropa arīra p̄uhr̄u erāre corediḡu īḡu ya wihigue aīgāp̄u erāre. Īḡu ya wihigue aīja, erā camire coerp̄u īḡu. Īḡu eropa coetuhajara p̄uhr̄u īḡu acawererā mera Goām̄u yare buhep̄u Pablo s̄a. Erāre īḡu buhera p̄uhr̄u waīyep̄u. <sup>34</sup> Erāre waīyetuhajara p̄uhr̄u erāre corediḡu Pablo s̄are bari peop̄u. Eropirā īḡu īḡu acawererā mera ōari buherire erā peera p̄uhr̄u b̄urīgā mucubiriñorā. Goām̄ure masinugañorā.

<sup>35</sup> Boyodiji merēcū ĩarā oparāp̄u erā surarare peresugue obeoñorā Pablo s̄are wiudorerā. <sup>36</sup> Erā eropa wiudorera p̄uhr̄u iri wihire coreḡup̄u Pablo s̄are werep̄u.

—Oparā m̄uare wiudoreañorā. Eropirā ḡüiro mariro wirique, arīp̄u īḡu Pablo s̄are.

<sup>37</sup> Eropa erā wiudiaquerecū ta Pablo werep̄u surarare:

—Gua ñero iibirabu. Eropirã gua ne dipuwaja mara. Bu gohra ta erã oparãpũ masa bajarã erã ihurore yucu mera tãrama guare. Gua Roma majarã gua árĩquerecũ ta guare tãrama. Tãratuhaja peresu iama guare. Eropirã dohpaguere masa erã ñabiro wiudiana guare, guare erã ñero iirare guhyasiuro tariri, arĩrã. Oparã erã basi ta ahri aĩ wiurã ariporo guare, arĩpũ Pablo surarare.

<sup>38</sup> Īgu eropa arĩ werecũ peerã dujaa wereñorã oparãre surarapũ. Erã eropa arĩ werera pũhrũ Pablo Sila mera Roma majarã erã árĩcũ masirã oparãpũ güi árĩñorã.

<sup>39</sup> Eropirã erã Pablo sã pohro ejarã, õpa arĩñorã:

—Ñero iiabu gua mũare. Ne eropa dipaturi iisome, arĩñorã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiridoreñorã.

<sup>40</sup> Eropirã Pablo Sila mera peresugue árĩnirã wiri, Lidia waĩcũgo ya wihigue eja, Jesu yarãre bocatĩriñorã. Eropirã erã Jesu yarãre õaro wereñorã. Õaro sĩporãcũcũ iĩñorã erãre. Erã eropa iira pũhrũ Pablo Sila mera waha wañorã.

## 17

### *Tesalónica majarã guañorã Jesu yarã mera*

<sup>1</sup> Eropirã erã Anfípoligue eja taria, Apoloniague eja taria, Tesalónicague ejañorã erã. Ero judio masa buheri wihi árĩyoro. <sup>2</sup> Eropigũ Pablo iri buheri wihigue wapũ ĩgu iiguaro dopa ta gaji macarigue árĩgu. Erogue eja, uñre semana gohra erã soorinũrire Sabadonũrire Goãmũ yare iribojegue erã gojarare masare buhe, irire erã mera wereniguipũ Pablo. <sup>3</sup> Eropigũ ĩgu Goãmũ yare werepũ õpa arĩgu:

—Judio masa, mũa Opũ mũa coregu Cristo árĩpũ masa ya árĩburire ñero taribu. Eropigũ ĩgu sĩria waha masa mũriapũ. Eropigũ ihĩ Jesu yũhũ arĩ weregu, ĩgu Cristo gohra ta aħrimi marire taubu. Īgu ta aħrimi mũa coregu. Eropa ta werea Goãmũ yare erã gojarapũ, arĩ werepũ Pablo.

<sup>4</sup> Īgu eroparĩcũ peerã bajamerãgã ero arĩrã “Diaye ta aħraa,” arĩñorã. Eropirã erã Pablo sã mera wañorã. Eropirã gajirã sã griego masa bajarã Goãmũre umupeorãpũ, Pablore peerã erã mera majarã nome sã, bajarã oparã nome sã, ĩgũre peerã Jesu yarã dujañorã. Eropirã Pablo sã mera wañorã. <sup>5</sup> Judio masapũ erã eropa iicũ ĩarã erãre ĩhaturiñorã. Eropirã erã ñerãre mohmebirãre bajarãre sihu gameneo, õpa arĩdoreñorã: “Pablo ĩgu mera majarã mera ñero iirã iima,” arĩ gaguiniguidoreñorã erãre iri maca majarãre. Eropa gaguiniguirã árĩpehrerã iri maca majarãre guacũ iĩñorã Pablo sã mera. Eropirã erã judio masa Jasõ ya wihigue ñaja Pablo sãre amariñorã erãre masaguere omorã. <sup>6</sup> Eropa amarã erãre bocabiriñorã. Eropirã Jasõre, gajirã Jesu yarã sãre ñeha tarawiriañorã erãre. Oparã pohrogue aĩ eja, õpa arĩ weresãñorã erã.

—Pablo sã masare árĩpehreroguerẽ garibotariañorã. Eropirã dohpaguere mari ya macaguere eraturajama. <sup>7</sup> Eropigũ ihĩ Jasõ erãre ĩgu ya wihigue ñajaridoreami. Erã árĩpehrerã mari weca opũ Roma majagu ĩgu dorerire tarinũgama. “Gajigu mũa opũ aħrimi. Jesu ĩgu ta aħrimi,” erã erĩcũ mari opũ César dorerire tarinũgama erã, arĩ weresãñorã judio masa erã oparãre.

<sup>8</sup> Erã eropa arĩ weresãcũ peerã, árĩpehrerã masa, oparã sã gua “¿Dohpa wahari?” arĩ pepiñorã. <sup>9</sup> Eropirã oparã Jasõre, ĩgu mera majarã sãre niyerure wajayedore, wiucãñorã.

### *Pablo Sila mera Bereague ejañorã*

<sup>10</sup> Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Erogue eja judio masa buheri wihigue ñaja wañorã. <sup>11</sup> Judio masa Berea majarãpũ Tesalónica majarã tauro Goãmũ yare õaro peerã arĩñorã. Eropirã erã Jesu yare erã peera pũhrũ “¿Diaye ta aħriri?” arĩ masidiarã, mũmũri nũcũ



Goãmũ yare erã gojarapũre eropa buheniguicãñorã erã. <sup>12</sup> Eropirã erã bajarã Jesure umupeoñorã. Griego masa sã, ɯma, oparã nome mera Jesure umupeoñorã. <sup>13</sup> Eropirã Pablo Bereague Goãmũ yare ïɣũ buhecũ sãre peebeo Tesalónica majarã judio masa Bereague ejañorã. Eroque ejarã, Berea majarãre quere goroweoñorã. Pablo sã mera guacũ iññorã erã. <sup>14</sup> Erã eropa iicũ ïarã Jesu yarã Pablöre yojaro mera wũariya turoque obeoñorã. Eropigũ Sila, Timoteo mera Bereague ta dujañorã. <sup>15</sup> Eropirã gajirã Pablöre Atenague aĩgã soñorã. Ïɣũre sotuhaja maji dujaa wañorã. Eroque ejarã,

—Yojaro mera waha, wapicũrã waque Pablöre, arĩ wereñorã Silare, Timoteo sãre. Eropa arĩ weredorepũ Pablo erãre.

### *Pablo Atenague árĩpũ*

<sup>16</sup> Eropigũ Pablo Atenague coregũ iipũ Sila, Timoteo sãre. Eropigũ Atena majarã erã goãmarã wéanirãre bajarã erã opacũ ïagũ Pablo bũrigã bũjawerepũ erã mera. <sup>17</sup> Eropa bũjaweregũ judio masa buheri wihigue judio masa mera dũyaso wereniguipũ ïɣũ. Eropigũ daja judio masa árĩbirã mera sãre wereniguipũ ïɣũ. Erã yujurãyeri Goãmũre umupeorã árĩñorã. Eropigũ Pablo iri maca deco ɯmũri nũcu ïɣũ pohroque eropa curimaji ñajarã mera wereniguipũ. <sup>18</sup> Gajirã epicũreo yare buherã, estoico yare buherã sã Pablo mera wereniguñorã.

—¿Ihĩ wereniguiri pehrebũgũ dohpa arĩ wereniguigũ iiri ïɣũ? arĩñorã erã.

Pablo Jesu yare, ïɣũ masa mũriarare ïɣũ werecũ peerã õpa arĩ pepiriñorã erã masa. “Ïɣũ gajirã goãmarãre weregũ iicumi,” arĩ pepiriñorã erã. <sup>19</sup> Erã peera pũhrũ erã wereniguĩroque Areópago waĩcũroque Pablöre aĩgãñorã.

—I buheri, mama buherire mũhũ dohpague wererare masidiaa gũa. <sup>20</sup> Mũ buheri gajiropa ãhraa. Eropirã gũa irire masidiaa, arĩñorã erã Pablöre.

<sup>21</sup> Árĩpehrerã Atena majarã ɯmũri nũcu mama buherire wereniguĩdiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo ïɣũ wererire peediañorã erã.

<sup>22</sup> Eropigũ Pablo Areópago waĩcũro wahgãnũgaja õpa arĩ werepũ:

—Atena majarã, bajarã goãmarã wéanirãre mũa bũrigã umupeocũ masia yũhũ.

<sup>23</sup> I maca mũa ya macare goãmarã wéanirãre mũa umupeori gororire ïhacuriabũ yũhũ. Eropa ïhacurigũ yũ sã yuju gorogue mũa goja apirare buheabũ. “Goãmũ, mari masibigũ yare umupeori goro ãhraa,” arĩ gojarare buheabũ mũa irire apiroguere. Mũa ïɣũre masibiriquererã ïɣũre umupeoabũ mũa. Ïɣũre ta mũa masibigũre weregũ ïiaa yũhũ mũare.

<sup>24</sup> “Goãmũ árĩpehreri yebare, yeba maja sãre deyoro moañumi. Ïɣũ ɯmarore, yebare opũ árĩgũ ïɣũ masa erã iira wiri árĩbeami. <sup>25</sup> Eropigũ ïɣũ mari árĩricũrere ogũ mari itamurire gamebeami. Ïɣũ mojomorocũgũ árĩbeami.

<sup>26</sup> “Ïɣũ yujugũ ɯmũ mera árĩpehreri yeba majarãre masare iññumi. Eropigũ árĩpehreri yebaguere marire apiñumi ïɣũ. “Ipẽ yoari boje õguere árĩrãcoma,” arĩgũ queo apiñumi marire. <sup>27</sup> “Erã amarã yũre bocarãcoma,” arĩ pepiñumi Goãmũ. Eropigũ Goãmũ yorogue árĩbeami. Mari mera ta ãhrimi. Õpa arĩ gojañumi gajigũ. <sup>28</sup> “Marire árĩcũ iimi ïɣũ. Ïɣũ maricũ mariboya mari sã. Eropigũ masa nũcũre eropa árĩniguicãmi ïɣũ,” arĩ gojañumi. Mũa mera majarã iribojegue majarã bayarire õaro gojarã erã gojara ãhraa iri. “Mari sã Goãmũ porã ãhraa,” arĩ gojañorã erã. <sup>29</sup> Eropirã mari ïɣũ porã árĩrã, goãmarã wéanirãre, oro, plata, ɯtã mera mũa gamero mũa iinirãre “Goãmũ ãhrimi,” arĩ pepibiricãque mũa. <sup>30</sup> Iribojegue masa masibirã erã árĩnicũ erã ñero iiquerecũ ta Goãmũ eropa ïacãniñumi. Eropa iiqueregũ dohpaguepũre árĩpehreri yeba majarãre erã ñerire bũjaweredoremi



Goãmũ. <sup>31</sup> Pũhrũ ãgũ queorinũ árĩpehreri yeba majarãre diaye ta beyegũcumi Goãmũ ðarãre, ñerãre. Ìgũ beyedore ãgũ apidiro dopa Jesupũ beyegũcumi. Jesure sĩridigũguere masupũ ãgũ. Eropã masugũ “Ìhĩ yũ apidigũ àhrimi,” arĩ, ìhmugũ iipũ Goãmũ masare, arĩ werepũ Pablo Atena majarãre.

<sup>32</sup> Ìgũ eroparĩcũ sĩrinirã masa mũriarare ãgũ wereniguicũ peerã gajirã ãgũre wereyañorã.

Gajirãpũ ðpa arĩñorã:

—Dipaturi ire mũ werecũ gũa peediaa daja, arĩñorã erã Pablõre.

<sup>33</sup> Erã eropã arĩra pũhrũ Pablo waha wapũ. <sup>34</sup> Eropirã bajamerãgã ãgũ mera árĩrã Jesure umupeonũgañorã. Dionisio Areópago majagũ oparã mera majagũ Jesure umupeonũgapũ. Dãmari waĩcũgo sã, gajirã mera Jesure umupeonũgapo.

## 18

### *Pablo Corintogue árĩpũ*

<sup>1</sup> Eropigũ Pablo Atenague árĩdigũ waha Corinto waĩcũri macague ejapũ. <sup>2</sup> Eroguẽ ejagũ judio masũ Aquila waĩcũgũre bocajapũ ãgũ. Arĩpehrerã weca opũ Claudio waĩcũgũ judio masare Romague árĩrãre ãgũ cóãcũ Aquilapũ ãgũ marapo Priscila mera waha, Corintogue ejapũ. Aquilapũ Ponto waĩcũri yeba masa dehyoadigũ árĩpũ. Eropirã erã Corintogue árĩcũ Pablo erã pohrogue ejapũ. <sup>3</sup> Aquila sã suhri wirire iirã árĩñorã. Pablo sã suhri wirire iigũ ta árĩpũ. Eropigũ ãgũ erã mera mohme ero dujapũ. <sup>4</sup> Eropigũ Pablo Sabado árĩcũ semanari nũcũ judio masa erã buheri wihigue judio masare, judio masa árĩbirã sãre Goãmũ yare werepũ.

—Ìhĩ ãgũ wereniguiiri diaye ta àhraa, arĩñorã masapũ erã peera pũhrũ.

<sup>5</sup> Eropigũ Sila, Timoteo mera Macedoniague árĩnirã Pablo pohrogue ejañorã. Eroguẽ erã ejara pũhrũ, Pablo suhri wiri mohmerire duhucã mũmũri nũcũ judio masare buhemũripũ.

—Jesucristo marire taubu mari coredigũ ta àhrimi, arĩ werepũ erãre.

<sup>6</sup> Ìgũ eropã arĩ buhequerecũ ta judio masapũ ãgũre peediabiriñorã. Eropirã erã ñero quere goroweoñorã ãgũre. Erã eropã iicũ Pablo erãre ãgũ turibodiro dopa ta, ãgũ suhri maja mera pasiri mehripũ.

—Mũa ya dipuwaja peamegue warãca. Goãmũ ãgũ dorediro dopa ta mũare buherabũ yũhũ. Mũapũ yũre peediabirabũ. Dohpaguere yũpũ judio masa árĩbirãre buhegu wagũra, arĩpũ Pablo judio masare.

<sup>7</sup> Ìgũ eropã arĩra pũhrũ ãgũ erogue árĩdigũ waha, Tito Justo waĩcũgũ ya wihigue ejapũ. Justo Goãmũre umupeogũ árĩpũ. Ìgũ ya wihipũ judio masa buheri wihi pohro árĩyoro. <sup>8</sup> Eropirã Crispo waĩcũgũ iri buheri wihi opũ, ãgũ marapo, erã porã mera mari Opũ Jesure umupeoñorã. Eropirã gajirã Corinto majarã bajarã Goãmũ yare peerã, Jesure umupeoñorã. Erã eropã umupeorã árĩcũ erãre waĩyerũ. <sup>9-10</sup> Yuju ñami Goãmũ quẽrogue werepũ Pablõre. Ìgũre ðpa arĩpũ:

—Mũ mera àhraa. I macare yaharã bajarã àhriima. Eropirã gajirã masa mũre ñero iimasibeamã. Eropigũ gũibita mũhũ. Eropigũ yahare bũrigã wereque. Eropã pepibiricãque, arĩ werepũ Goãmũ Pablõre.

<sup>11</sup> Eropigũ yuju bojori ðaro gajĩ bojori deco gohra ero majarãre Goãmũ yare buhe, árĩmũripũ Pablo.

<sup>12</sup> Ìgũ eropã árĩrisubu Galiõ waĩcũgũ Acaya yeba majarã opũ ãgũ árĩcũ, judio masa árĩpehrerã yujuropa ta Pablõre ñero weresãrã erañorã. Ìgũre ñehã dipuwaja moadorerã pohrogue aĩgãñorã erã Galiõ pohrogue. <sup>13</sup> Aĩgã ðpa arĩ weresãñorã ãgũre:

—Ìhĩ masare Goãmũre umupeodogũ i yeba maja doreripũre cóãdoremi, arĩ weresãñorã judio masa dipuwaja moadorerãre.

<sup>14</sup> Erã eropa arĩ weresãcũ peegu Pablopũ erãre werediaripũ. Eropigu Galiõ opũpu judio masare wereru.

—Ihĩ ñerire iidigu árĩcũ gua Romano majarã ya dorerire tarinugagu árĩcũ, mware yuhriboaya yũhũ. <sup>15</sup> Mwa ya doreripure ihĩ tarinugagu ïgu árĩcũ mwa basi ire amuque. Ire masibea yũhũ mwa mera, arĩ wereru ïgu judio masare.

<sup>16</sup> Eropa arĩgu ta erãre Pablore weresãnirãre ïgu ya taribugue árĩrãre cohã wiucãpu ïgu. <sup>17</sup> ïgu eropa cohã wiura pũhrũ árĩpehrerã iri wihi árĩrã Sóstenere judio masa buheri wihi opũre Jesu yagure ñeha, dipuwaja moadorerã pohrogue pañorã ïgure. Erã eropa pacũ ïagu Galiõ eropa ïacãpu.

### *Pablo Antioquíague dujaa wapũ daja*

<sup>18</sup> Eropigu Pablo Corintogue yoari boje árĩdigũ “Wagu iiaa,” arĩ goeriserepu ïgu Jesu yarãre.

Ïgu eropa arĩra pũhrũ ïgu Priscila, Aquila mera Siria yebague árĩri macague taribuja wapũ. Cencrea waĩcũri macague erã taribujara pũhrũ Pablo Goãmũre “Ópa mure iibasagũra,” ïgu arĩrare iituhajagu árĩpu. Eropigu eropa ïgu judio masa erã iiro dopa ta ïgu poarire wuapehocãdorepu. <sup>19</sup> Eropirã erã Efeso waĩcũri macague eja, Priscilare, Aquila sãre apipũ Pablopũ. Erãre ero api, ïgũpu judio masa erã buheri wihigue wapũ. Iri wihigue eja, Goãmũ yare wereru. Eropa wereru judio masa mera dũyaso werenigũpu. <sup>20</sup> ïgu eropa werera pũhrũ ïgure erã mera dujadoreriñorã erã. Erã eroparĩquerecũ,

—Dujabeaa mwa mera, arĩpu Pablo erãre. <sup>21</sup> Eropa arĩgu ta,

—Jerusalengue yure waro gahmea. Bosenure ïagu wabu iiaa. Eropigu wagu iiaa. Goãmũ gamecũ dipaturi dujariboca, arĩpu erãre.

Ïgu eropa arĩtuhaja Efesogue árĩdigũ taribuja wapũ. <sup>22</sup> Eropigu Cesareague taribujaja tarigã, Jerusalengue eja. Erogue eja, ero majarã Jesu yarãre “¿Ne ãhriri mwa?” arĩ, erãre ïha taria Antioquíague eja daja. <sup>23</sup> Ero bajamenũri árĩpu. Ero árĩdigũ tariapu. Galacia yeba árĩri macarigue, Frigia yeba árĩri macarigue dipaturi eja, iri macari majarãre Jesu yarãre buhe ðaro mucubiricũ iipu.

### *Apolo waĩcũgu Efesogue buherũ*

<sup>24</sup> Irisubure, judio masũ Apolo waĩcũgu, Alejandría maca majagu Efesogue eja. ïgu ðaro weremehregũ árĩpu. Eropigu ïgu Goãmũ ïgu gojarare ðaro masipu.

<sup>25</sup> Gajigu ïgure Goãmũ yare weretuhamũripũ. Eropigu ïgu Ñu waĩyegu ïgu buheri dihtare masipu. Eropa árĩqueregu ïgu bũrigã mucubiriri mera Jesu yare ðaro buherũ. <sup>26</sup> Eropigu judio masa erã buheri wihigue ïgu gũiro mariro erãre buhenugapu. ïgu eropa buhecũ erã peera pũhrũ Priscila Aquila mera ïgure erã mera aĩgãñorã. Goãmũ yare ðaro diaye ðaro ïgu werepehobiricũ ïarã diaye werepehocãñorã erã ïgure. <sup>27-28</sup> Eropigu ïgu Apolopũ Acaya yebague ïgu wadiacũ Jesu yarã ïgure “Óaro waque,” arĩ, erã gojarapũrire oñorã ïgure. Iripũri Acayague árĩrã Jesu yarãre Apolore ðaro bocatĩridoreripũri árĩyoro. Eropigu Apolo erogue eja ero majarãre Jesure umupeorãre Goãmũ mahiri mera ðaro itamupu. Judio masare iri maca árĩrãre ðpa arĩ wereru:

—Goãmũ ïgu obeodigu mwa coredigu ãhrimi Jesu. Cristo gohra ãhrimi, arĩ wereru judio masare gajirã masa erã ïaro.

Ïgu eroparĩcũ, Goãmũ werenigũri gojarapũre ðaro queroro wereru erã pee “Diaye árĩbeaa,” arĩmasibiriñorã erã. Eropigu Jesu mahiri mera Jesure umupeorãre ïgu ðaro itamupu erãre Apolo.

## 19

### *Pablo Efesogue wapu*

<sup>1</sup> Corintogue Apolo ĩgu árĩrisubu, Pablopũ utã yucũgue mũri taria, Efesogue ejarũ. Eroque eja, yujurãyeri Jesu yarãre bocajapũ. <sup>2</sup> Erãre ĩgu bocajara pũhrũ ĩgu erãre serẽpi ĩapũ.

—¿Mũa Jesure umupeora pũhrũ mũapũ Espĩritu Santore opanũgari? arĩ serẽpi ĩapũ Pablo.

Ĩgu eroparĩcũ peerã ĩgure õpa arĩ wereñorã erã:

—“Espĩritu Santo ãhrimi,” arĩ ne werebirama guare, arĩ wereñorã erã.

<sup>3</sup> Erã eropa arĩ werera pũhrũ Pablo erãre serẽpi ĩapũ daja:

—¿Noa ya buherire mũa peera pũhrũ waĩyeari mũare? arĩpũ ĩgu daja.

—Ñu ya buherire guã peera pũhrũ waĩyeama guare, arĩ wereñorã erã.

<sup>4</sup> Erã eroparĩcũ peegu õpa arĩpũ Pablo:

—Masa erã ñeri iirare erã duhucũ ĩagu waĩyerũ Ñu. Eropiro ĩgu waĩyeripũ erã ñeri iirare erã duhurare masare ĩhmuburi árĩyoro. Eropigũ gajino sãre werenemopũ Ñu. “Yũ pũhrũ aribure ĩgure umupeoque mũa,” arĩpũ Ñu masare. Eropa arĩgu Jesure ta umupeodoregu iipũ, arĩ werepũ Pablo erãre.

<sup>5</sup> ĩgu eroparĩcũ erã peera pũhrũ, Jesu waĩ mera waĩyerũ erãre. <sup>6</sup> Eropigũ Pablo erã yujurãyeri weca ĩgu mojotorire ĩgu duhpeocũ, Espĩritu Santopũ erapũ erãguere. ĩgu eropa erara pũhrũ erãpũ peeyamariri yare werenigui, Goãmũ yare wereñorã.

<sup>7</sup> Erã árĩpehrerã doce uma erã árĩñorã.

<sup>8</sup> Pũhrũ Pablo judio masa erã buheri wihigue ñaja, urerã abe gohra güiro mariro Goãmũ ĩgu opũ árĩrãre were, wereniguiũ erã mera. ĩgure erã eropa peera pũhrũ “I diaye ta ãhraa,” arĩñorã erã. <sup>9</sup> Gajirãpũ peediabiriñorã. Eropirã erã masa erã peeuro iri õare buherire ñero arĩ werenigui ĩhmuñorã. Erã eroparĩcũ peegu Pablopũ Jesu yarãre sihu wiria, gajipũgue waha wapũ. Waha, Tirano waĩcũgu ya buheri wihigue umũri nucũ masare Goãmũ yare werepũ ĩgu. <sup>10</sup> Pe bojori gohra buhepũ erãre. ĩgu eropa buhecũ árĩpehrerã Asia yeba majarã judio masa, judio masa árĩbirã mera mari Opũ Jesu yare peeñorã. <sup>11</sup> Eropigũ Goãmũ turari mera Pablo bajasuburi deyoro moarire ii ĩhmupũ. <sup>12</sup> Pablo ĩgu suhri gasirore, ĩgu suhrirore ĩgu dũpũ pẽhrera gasirore dorecũrãre aĩgãñorã gajirãpũ. Masa dorecũrã iri suhrire pẽhrerã õarã wañorã. Eropirã watẽa ñajasũnirã iri suhrire erã pẽhrera pũhrũ watẽa wiria wañorã erãre.

<sup>13-14</sup> Gajirã judio masa eropa curiniguirã watẽare cóãrã judio masa yeea árĩñorã. Esceva waĩcũgu siete ĩgu porã árĩñorã. Escevapũ judio masũ pahia opũ arĩpũ. Eropirã erã Pablo ĩgu iidiro dopa ta Jesu turari mera watẽare cóãdiariñorã. Eropirã watẽa ñajasũdigũre boca watẽare doreriñorã erã.

—Jesu Pablo ĩgu weregu ĩgu turari mera dorea mũare. Duhuque ĩre, arĩriñorã erã.

<sup>15</sup> Watẽare erã wadorera pũhrũ, watẽapũ masũguere õpa arĩñorã erãre.

—Jesure masia. Pablo sãre masia. Mũapũre masibeaa, arĩñorã watẽa erãre.

<sup>16</sup> Erã eroparĩcũ ta watẽa ñajasũdigũpũ burigã erãre ñehamaa wapũ. Eropigũ erãre ñetariaro iipũ. ĩgu eropa iira pũhrũ suhri marirã, camicũrã oma wiriañorã erã iri wihire watẽa cóãdiarãpũ. <sup>17</sup> Erã eropa iira pũhrũ árĩpehrerã Efeso majarã, judio masa, judio masa árĩbirã mera irire pee, güitariacãñorã erã. Eropirã mari Opũ Jesu yare wereyaro mariro wereniguiñorã masapũ.

<sup>18</sup> Eropirã masa bajarã Jesure umupeorã erã ñero iirare wererã arĩñorã.

<sup>19</sup> Erã mera majarã bajarã yeea árĩñorã. Eropirã erã erã gojarapũrĩre purisiriri wereripũrĩre erogue aĩgãri, masa erã ĩaro iripũrĩre soe cóãcãñorã erã. Iripũri wajacũrãre erã queocũ, árĩpehrerĩpũri cincuenta mil plata árĩripũri wajacũriyoro

iripūri. <sup>20</sup> Eropirā Goām̄ yare gamerā bajarā wañorā. Goām̄ turari mera ĩḡu yarā wañorā.

<sup>21</sup> Erā eropa wara pūhr̄ Pablo ōpa arī pepip̄: “Macedonia yeba ejam̄hta, iri yebare taria Acaya yebaguere ejaḡura. Iri yebare yu ejara pūhr̄ Jerusalēngue wagura. Iri macare yu ejara pūhr̄ Romague ĩaḡu wagura,” arī pepip̄ Pablo.

<sup>22</sup> Eropiḡu perāre ĩḡure itamurāre ĩḡu core obeom̄htap̄ Macedonia yebague. Timoteo Erasto sã árĩñorā erā. Eropiḡu Pablop̄ yujuḡu ta dujap̄ Asia yebague.

### *Efesogue masa gua gaguiniguiñorā*

<sup>23</sup> Irisubure Efesogue Jesu yare gajirā gamebirā Pablo sãre ĩhaturiñorā. <sup>24</sup> Yujuḡu platatare mohmeḡu Demetrio waĩcuḡu árĩp̄. ĩḡu plata mera erā goām̄o Artemisa waĩcugo umupeori wihi wéara wirire muta wirigāre iḡu árĩp̄. Eropiḡu ĩḡu gajirā plata mohmerā mera erā wéanirāre w̄aro dua wajatam̄riñorā erā. <sup>25</sup> Eropiḡu Demetrio gajirā plata mohmerāre sihu gameneo, werep̄ erāre.

—Peeque m̄ua. I mohmeri mera mari wéanirā mera w̄aro mari wajatarare masia m̄ua. <sup>26</sup> Ihĩ Pablo ĩḡu iirare ĩḡu buhera sãre masia m̄ua. Ōpa arī buhemi ĩḡu: “Goāmarā wéanirā masa erā iinirā ojocarirā árĩbeama,” arī werem̄rami ĩḡu. ĩḡu eroparĩcũ peerā, Efeso majarā, árĩpehrero Asia yeba majarā sã ĩḡu buherare “Diaye ta āhraa,” arāñorā irire. <sup>27</sup> Eropa arĩrā mari mohmerire mari wéarare masa gamesome. Eropirā mari goām̄o w̄ago Artemisa ya wihire cóābocoma. Eropirā árĩpehrerā Asia yeba majarā, árĩpehreri yeba majarā igore umupeosome pare. Eropirā masa igore masibirā mari wéarare asūsosome, arĩp̄ Demetrio erāre.

<sup>28</sup> ĩḡu eroparĩcũ peerā burigā gua, gaguiniguiñorā:

—Artemisa Efeso majarā yago goām̄o turago āhrimo, arī gaguiniguiñorā erāp̄.

<sup>29</sup> Erā eropa gaguiniguiçũ Efeso majarā árĩpehrerā sã gaguiniguitaria wa pee masiri pehrea wañorā. Eropa warā Gayore, Aristarco sãre ñeha, masa erā gamenererogue erāre taragāñorā. Gayo, Aristarco mera Macedonia majarā árĩñorā. Pablo mera curirā árĩñorā. <sup>30</sup> Erāre ñeacũ ĩha Pablop̄ masa pohro wereḡu wadiarip̄. Jesu yarāp̄ ĩḡure wadorebiriñorā. <sup>31</sup> Eropirā gajirā sã iri yeba majarā oparā, Pablo mera majarā arĩrā erā pohro majarāre weredoreñorā Pablore:

—Masa erā gamenererogue wabiricāque, arī weredoreñorā oparā Pablore.

<sup>32</sup> Eropirā ero gamenererā mera majarāp̄ bajarā “¿Duhpimorā mari gamenererā iiri?” arī masibiriñorā. Eropirā erā gaguiniginemoñorā. Ip̄ugue arĩrā gajiropa arī gaguinigui, gajirā sã gajiropa arī gaguiniguiñorā. <sup>33</sup> Eropirā judio masap̄ Alejandro waĩcuḡure masare weredoreriñorā. Eropiḡu Alejandro “Ejarimaricāque,” arĩḡu ĩḡu mojoto mera paatup̄. “Oã ḡuare judio masare turirā iima,” arī pepiḡu judio masare cãhmotadiaḡu wereniguirip̄. <sup>34</sup> ĩḡu eropa wereniguidiaquerecũ judio masu ĩḡu árĩcũ ĩarā masa árĩpehrerā yujuro mera pe hora gaguiniguiñorā.

—Artemisa, Efeso majarā yago mari goām̄o turago āhrimo, arī, gaguiniguiñorā erā.

<sup>35</sup> Erā eropa arī gaguiniguiçũ ĩaḡu Efeso majarā oparāre itamuḡu masare “Ejarimaricāque,” arī, werep̄ erāre.

—M̄ua Efeso majarā peeque. Mari Efeso majarā turago Artemisa ya wihi corerā mari árĩcũ árĩpehreri yeba majarā masima. Eropirā igo wéarare umarogue dijaridigore diburā mari árĩcũ sãre masima masa. <sup>36</sup> Eropirā “I diaye árĩbeaa,” arĩmasibeama. Eropirā guabiricāque m̄ua. Ōaro pepique m̄ua. <sup>37</sup> Oã m̄ua ñeagārirā mari goām̄ore ñero arī wereniguibirama. Eropirā erā goāmarā ya wiriguere ñaja, yajabirama. Eropirā ōaro iique m̄ua. <sup>38</sup> Demetrio, plata mohmerā mera oāre m̄ua ñearāre weresādiarā, dipuwaja moarop̄ure wereporo erā. Erā oparāre oāre weresāmasima. <sup>39</sup> M̄ua gajino iidiarā, ōaro mera irire gamenere iique. M̄ua iiro dopa ĩinemobiricāque. <sup>40</sup> Dohpagāre m̄ua gua, gaguinirare mari oparā peerā, erā marire



weresãbocoma. “Marire cóãrã iicoma,” arĩ pepirãcoma oparã marire. Eropirã mari arĩ gaguiniguirare erãre òaro diaye weremasibeaa mari, arĩpũ oparãre itamugũpũ masare. <sup>41</sup> Eropa arĩ weretuhaja, “Iripẽta ãhraa. Waque,” arĩpũ ãgũ masare.

## 20

### *Macedonia yebague sãre, Grecia yebague sãre Pablo ejapũ*

<sup>1</sup> Erã eropa wara pũhrũ, Pablopũ Jesu yarãre sihu gameneo werepũ. Weretuhaja, mojoto ñeha, goeriserepũ. Goeriseretuhaja, Macedoniague waha wapũ. <sup>2</sup> Eroguẽ eja were, ero majarã Jesu yarãre mucubiricũ iipũ ãgũ. Erãre weretuhaja, Greciague ejapũ ãgũ. <sup>3</sup> Erore ãgũ urerã abe gohra árĩpũ. Ero árĩgũ Siria yebague taribuja wadiaripũ. Eropirã judio masa duhri, ãgũre ñeadiariñorã. Irire pee Pablo gaji mague Macedonia wari mague waha wapũ. <sup>4</sup> Eropa wagũ Asiague ta ejapũ. Ero Berea majagũ Sópater waĩcũgũ Pablore wapicũgãpũ. Eropirã Tesalónica majarã Aristarco, Segundo sã ãgũre wapicũgãñorã. Eropirã Asia majarã Tíquico, Trófimo sã Asiague ãgũre wapicũgãñorã. Derbe majagũ Gayo waĩcũgũ Timoteo sã ãgũ mera wañorã. <sup>5</sup> ãgũ mera majarã ãgũ core waha, Troa waĩcũri macague ãgũre coreñorã. <sup>6</sup> Erã eropa corecũ bugabiriri panre bari bosenu pũhrũ gũapũ Filipogue árĩnirã dohodiru mera waha, cinco nũri taribujarã Troague gũa ejabũ. Siete nũri gohra árĩbũ gũa eroguerẽ.

### *Troague Pablo curigũ wapũ*

<sup>7</sup> Soorinũ árĩcũ Jesu yarã gamenere panre duhpeoñorã Goãmũ yare bocatĩrimorã. Erã eropa iiboro core Pablo erãre buhepũ. Eropigũ Pablo gajinũpũre wabu árĩgũ yoari boje ãgũ buhepũ. Ñami deco mera buhe duhubu iiripũ. <sup>8</sup> Eropirã erã umaro maja taribugue baja dipu sihãgori dipu árĩri taribugue gamenereñorã. <sup>9</sup> Pablore erã peerisubu mamũ Eutico waĩcũgũ ventana weca mũribejaja doapũ. Eropigũ Pablo erãre yoari boje buhenemocũ ãgũ mamũre wũja ariyoro. Eropigũ ãgũ carĩa wa uhere caya wecague doadigũ majimadija wapũ. ãgũ eropa yuhridijara pũhrũ erã ãgũre sĩriadigũguere aĩwahgũ doboñorã. <sup>10</sup> Erã eropa iicũ ãgũ Pablo dijari, mamũre papeopũ. ãgũ eropa iira pũhrũ Jesu yarãre werepũ ãgũ:

—Sĩporã ñebiricãque. Sĩribeamĩ ihĩ. Ojocarimĩ, arĩpũ Pablopũ.

<sup>11-12</sup> ãgũ eroparĩcũ mamũpũ sĩridigũpũ masa wapũ. ãgũ masacũ ãha erã mucubiritaria wañorã. Eropa mucubirirã umaro maja taribugue mũria, panre duhpeoñorã bocatĩrimorã. Erã eropa iira pũhrũ yoari boje Pablo erãre buhepũ daja. Boyoboro coregã erãre buheduhupũ. Buhetuhajacã waha wapũ Pablo.

### *Pablo Troague árĩdigũ waha, Miletogue ejapũ*

<sup>13</sup> Pablo core dohodiru mera Asogue gũapũ ejamũhtabũ. Pablopũ mague wadiami. Pablo ãgũ arĩdiro dopa ta Asogue ãgũre gũa bocatĩribũ. <sup>14</sup> ãgũre gũa bocatĩricũ, gũa mera ñajami dohodirugue. Iriru mera waha, Mitilenegue gũa ejabũ. <sup>15</sup> Eroguere eja taria gajinũ Quĩore tariabũ gũa. Gajinũ Samogue ejabũ gũa. Gũa carĩa pũhrũ gajinũpũre Miletogue ejabũ pare gũa. <sup>16</sup> Pablo Pentecostenũ gohra Jerusalenguere ejadiami. Eropigũ Asia yebague yoari boje árĩdiabirimi. Eropigũ Efesore diaye taria, Miletogue ejatuhajabũ gũa.

### *Pablo Efeso majarã Jesu yarã oparãre werepũ*

<sup>17</sup> Eropigũ Pablo Miletogue árĩgũ, Goãmũ yarã Efeso majarã Jesu yarã oparãre sihubeomĩ ãgũ. <sup>18</sup> Eropa ãgũ sihubeora pũhrũ erã Pablo pohrogue erama. Erã eracũ ãgũ erãre Pablo weremi.

—Asiague ne eragũ mũa mera yũ iirare masia mũa. <sup>19</sup> Mũa mera árĩgũ ne gajiropa arĩro mariro Jesu mari Opũ yare iimũribũ yũhũ. Eropigũ mũare mojomoro ãabũ. “Mũare tarinũgaa,” arĩbirimũribũ yũhũ. Judio masa erã yũre ñero iiquerecũ



ta Goãmũ yare iimuribũ yũhũ. <sup>20</sup> Eropigũ mua ðaro waburi dihtare muare buhephecãbũ yũhũ. Masa erã ñaro mua wirigue sãre buhebũ yũhũ. <sup>21</sup> Eropigũ judio masare, judio masa árĩbirã sãre yujuropa ta buhebũ yũhũ. “Mua ñerire bujawereque. Goãmũ yare gohrotoque. Eropirã Jesu mari Opãre umupeoque,” arĩ weremuribũ yũhũ. <sup>22</sup> Eropigũ Espiritu Santo ñgũ dorediro dopa ta dohpaguere Jerusalengue wagũ iiaa. Yũ erogue wagũ yũ gajiropa waborore masibea yũhũ. <sup>23</sup> Õpa arãmi Espiritu Santo yũre: “Jerusalengue mũhũ ñero tarigũca. Eropirã mũre peresu iirãcoma,” arãmi Espiritu Santo yũre. Dohpaguere yũ ejara macari nũcũgue eropa arĩ wereama yũre. Jerusalengue wagũ Espiritu Santo ñgũ werera dihtare masia. <sup>24</sup> Eropigũ ðari buherire, Goãmũ ñgũ mahiri buherire werebu ãhraa yũhũ. Jesu mari Opũ ñgũ ya árĩburire iipehodiaa yũhũ. Ire ñgũ árĩgũ, yũ sĩriborore gũibeaa yũhũ.

<sup>25</sup> “Eropigũ mua mera árĩgũ Goãmũ ñgũ opu árĩrare weremuribũ yũhũ muare. Mua yũ eropa arĩ buhenirãre ne dipaturi muare ñasome yũhũ. Ire masia yũhũ. <sup>26-27</sup> Eropa masigũ dohpagãre ire werea muare. Árĩpehreri Goãmũ yare werebũ yũhũ muare. Eropirã árĩpehrerã mua mera majarã Goãmũ yare gamebirã erã árĩcũ yaha dipuwaja árĩbeaa. <sup>28-29</sup> Mua basi ðaro iique. Eropirã mua Jesu yarãre Espiritu Santo muare ñgũ ñhadibudorerare ñhadibuque. Ovejare ñhadiburã ovejare erã ñhadiburo dopa ta Goãmũ yarã sãre ñhadibuque mua. Goãmũ magũ ñgũ sĩrigũ ñgũ di cóãro mera Goãmũ erãre ñgũ yarã árĩmorã iidi árĩmi. Yũhũ ðre wara pũhrũ gajirã ñerãpũ mua pohro ahri erã buheri mera muare goroweo dũca waricũ iirãcoma. Eropirã Jesu yarãre ðaro ñhadibuque. <sup>30</sup> Pũhrũguere gajirã mua mera majarã ta Jesu yarãre gũya, gajĩ buherire peedorerãcoma. Erã eropa peedorecũ erã peerãcoma. <sup>31</sup> Eropirã ðaro iique mua. ðmuri nũcũ, ñamiri nũcũ mojomoro ñari mera buhemuribũ yũhũ muare. ðhre bojori gohra ðaro buhebũ mua árĩpehrerãre. Irere yũ buhera ðaro guñaniguicãque mua.

<sup>32</sup> “Dohpaguere yũ wara pũhrũ Goãmũ muare ñhadibugũcumĩ. ñgũ mahiri buherire mua buherã ðaro árĩrãca mua. Goãmũ ñgũ buheri mera muare ñgũ yarãre ðaro ñtamumasimĩ. Eropigũ ñgũ yarã dihtare ñgũ iidiadiro dopa ta mua tamerare ðaro ñgũcumĩ. <sup>33</sup> Mua niyeru oparire, mua suhri opari sãre “Yũre oque,” arĩbirimuribũ. <sup>34</sup> Yũ basi mohme wajatabũ yaha árĩburire. Eropigũ yũ gamerire, yũ mera majarã erã gameri sãre yũ mohme wajatara mera aĩmuribũ. Yũhũ eropa iirare masia mua. <sup>35</sup> Mari ðpa burigã mohmerã gajino moorãre ñtamuro gahmea marire. Ire muare ñi ñhmumuribũ yũhũ. Jesu mari Opũ ñgũ arĩrare guñaque mua. “Ñgũ ocũ ñeadigũ tauro odigũpũ mucubirimi,” arĩpũ Jesu ñgũ basi, arĩ weremi Pablo Jesu yarãre.

<sup>36</sup> Eropa arĩtuhaja Pablo erã mera mereja, Goãmũre serẽma. <sup>37</sup> ñgũ eropa serẽtuhajacũ erã árĩpehrerã Pablõre pabua wayuporã mimi ore goeriserema. <sup>38</sup> “Muare dipaturi ñasome yũhũ,” ñgũ arĩcũ peerã burigã bujawerema erã. Eropirã erã ñgũre tuunũrsia buhama peramague. Eroque ñgũre ñhanũrsiama gũa wacũ.

## 21

### *Pablo dipaturi Jerusalengue wapũ*

<sup>1</sup> Jesu yarãre “Wagũ iiaa,” arĩ, dohodiru mera, Cos waĩcũri nũgũroque diaye waha taribujabũ gũa. Gajinũ Roda waĩcũri nũgũroque taribujaja, taria, Pátara waĩcũri macague ejabũ gũa. <sup>2</sup> Pátara árĩrã, Feniciague waburidirure dohodirure bocajabũ gũa. Eropirã iriru mera wabũ gũa. <sup>3</sup> Eropa warã Chipre waĩcũri nũgũroque diaye ta ñha tariabũ gũa. Copũ dujabũ iri nũgũro. Iri nũgũroque taria, Siria waĩcũri yebague ejabũ gũa. Eropirã dohodiru maja doberire dohodiru majagũ Tiro waĩcũri maca ñgũ durimujucũ, ero payanibũ. <sup>4</sup> Ero Jesu yarãre ñarã, siete nũri gohra dujanibũ gũa iri

maca ta. Eropirã ero majarã Jesu yarã Espiritu Santo ïgu werediro dopa ta erã Pablöre Jerusaléngue wadobiririma. <sup>5</sup> Erã eropa arïquerecũ iri macare siete nãri gũa árïra pũhrũ, waha wabũ daja. Gũa waboro coregã árïpehrerã Jesu yarã, erã marasã nome mera, erã porã mera, maca tũro pohro gũare ïhadujarã wama. Eropirã árïpehrerã gũa imiporogue eja, mereja Goãmũre serēbũ. <sup>6</sup> Gũa eropa serēra pũhrũ, “Warã iiaa,” arï, erãre pabuatuhaja goeriseretuhaja waha wabũ gũa. Gũa wacũ ïhanũrusia, erãpũ majaa wama erã ya wirigue.

<sup>7</sup> Tiro waïcũri macare maja tariabũ gũa. Eropirã Tolemaidague tuhajabũ gũa. Ero ta wũariyare watubũ. Iri macare eja, Jesu yarãre “Acawererã, ¿ãhriri mũa?” arï, yujunũ erã mera árïribũ. <sup>8</sup> Eropirã iri maca ma buharo árïcũ gajinũ daja Pablo mera mague wabũ gũa Cesarea waïcũri macague warã. Eroque eja, õari buherire weregũ Felipe waïcũgũ ya wihigue ejabũ. Eropirã ïgu mera dujabũ gũa. Felipe Jesu yarã erã siete beyenirã mera majagũ árïmi. <sup>9</sup> Eropigũ ïgu wapicũrã nome pagũ árïmi. Erã nomepũ Goãmũ yare wererã nome árïma. <sup>10-11</sup> Eroque gũa bajamenũri gũa árïra pũhrũ, Agabo waïcũgũ Goamũ yare weremũhtagũ Judeague árïgũ gũare ïagũ erami. Eropigũ ïgu Pablo yadare tuãdiuridare aĩ, ïgu basĩ ïgu guburire, ïgu mojotorire diri ïhmu wereyũmi.

—Õpa arïmi Espiritu Santo. “Idare opagũ Jerusaléngue ïgu ejacũ, judio masa eropa ta dirirãcoma ïgũre. Dirituhaja, judio masa árïbirãre orãcoma erã ïgũre,” arïmi Espiritu Santo, arï wereyũmi Agabo.

<sup>12</sup> ïgu eroparïcũ peerã, gũa Cesarea majarã mera Pablöre bũrigã mahibũ. ïgũre “Jerusaléngue wabiricãque,” arïribũ. <sup>13</sup> Gũa eroparïcũ Pablopũ yũhrimi:

—¿Dohpa arï orerã iiri mũa? Yũpũre bũjawerecũ iiaa mũa. Erã yũre peresu iicũ õaroca. Yũhũ Jerusaléngue Jesu mari Opũ yare yũ iira waja yũ sïricũ õaroca, arïmi Pablo gũare.

<sup>14</sup> “Wabeaa,” ïgu arïcũ peediarã iiribũ gũa. ïgu “Wagũra,” ïgu arïcũ, eropa pepicãbũ gũa. Õpa arïbũ:

—Mari Opũ ïgu gamero dopa ta iiporo, arïbũ gũa.

<sup>15</sup> Irire weretamutu, gũa yare ahmu, waha wabũ daja Jerusaléngue warã. <sup>16</sup> Eroque gũa wacũ bajamerãgã Cesarea majarã Jesu yarãpũ gũa mera wama. Eropirã Jerusaléngue eja erã mera majagũ Mnasón waïcũgũ ya wihigue ejabũ gũa. Mnasón Chipre majagũ ïgu yoari boje Jesu buhegũ árïmi. Eropirã ïgu ya wihĩ gũa árïguri wihĩ árïbũ. Eropirã Jerusaléngue ejabũ gũa.

### *Pablo Santiagore ïagũ warũ*

<sup>17</sup> Jerusaléngue gũa ejacũ, ero majarã Jesu yarãpũ “¿Erarari?” arï, mucubiriri mera bocatïrima gũare. <sup>18</sup> Gajinũ Pablo gũa mera Santiagore ïagũ ejami. Gũa erogue ejacũ ero árïpehrerã Jesu yarã oparã árïma. <sup>19</sup> Eropigũ Pablo erãre ïgu mojoto ñeara pũhrũ judio masa árïbirãre ïgu buherare werepehomi. Goãmũ ïgu itamuri mera ïgu iirare werepehomi Pablo Jesu yarãre. <sup>20</sup> ïgu eropa arï werecũ peerã,

—Goãmũ õagũ, turagũ ãhrimi, arï umupeoma erãpũ. Eropa arïtuhaja erã Pablöre õpa arï werema.

—Acaweregũ, dohpaguere bajarã judio masa Jesure umupeorã ãhrima. Mũhũ irire masia. Eropirã erã õpa arï pepima: “Goãmũ ïgu dorerire, Moisegue marire ïgu apirare marire iipehoro gahmea,” arïrã iima. <sup>21</sup> Õpa arïnemoma erã. “Gajipũgue árïrãre judio masa árïbirã watope árïrãre judio masare Goãmũ Moiserẽ ïgu apirare ‘Iibiricãque,’ arï doremi Pablo,” arãma õ majarã judio masa mũre. “Pablo judio masa porãre mari dorero dopa miri gasirogãre wiri aĩdorebeami,” arãma erã mũre. “Judio masa erã iidorerire Pablo duhudoremi,” arï i sãre werewũama mũre. <sup>22</sup> Eropirã mũhũ õre eracũ peerã erã gamenererãcoma mũre turimorã. Eropigũ õpa iiro

gahmea mure. <sup>23</sup> Mure gua dorero dopa ta iique. Dohpague òre wapicurã uma Goãmure umupeorã “Õpa iirãra,” arĩrã àhrama. <sup>24</sup> Erã mera waque. Eropirã Goãmũ Moiserẽ ìgu dorediro dopa ta erã basi Goãmũ yare iiburire iimorã erã ñeri iirire coerã iima. Mũ sã eropa ta iique. Eropa iigu erã eropa iira wajare wajayeque mũpũ. Mũhũ eropa wajayera pũhrũ erã poarire wuadoremāsima erã. Mũ eropa iicũ ìarã masa mure erã arĩra iri gũyara árĩcũ masirãcoma erã árĩpehrerã. Goãmũ Moiserẽ ìgu apira dorerire iigu mũ árĩcũ masirãcoma erã. <sup>25</sup> Judio masa árĩbirã Jesu yarãpũre gua gojarapũre obeotuhajabũ. Òpa arĩ gojabũ gua. “Goãmarã wéanirãre umupeora barire, dire, wũunũgu mohwejenirã waimurãre babiricãque mũa. Eropirã nome mera ñero iibiricãque. Nome sã uma mera ñero iibiricãque,” arĩ were gojabũ gua gojarapũre, arĩma erã Pablõre.

*Goãmũ wihigue judio masa Pablõre ñeañorã*

<sup>26</sup> Erã eropa arĩ wereniguirã pũhrũ gajinũ Pablõpũ wapicurã uma mera erã basi Goãmũ yare iimorã erã ñeri iirire coemorã, Goãmũ wihigue ñaja wañorã. Iri wihigue ñajajagũ, erãre werepũ Pablo: “I nũcũ nũri duhyaa mũa coeboro,” arĩ werepũ ìgu wapicurãre. Eropirã erã coeturinũ erã nũcũ Goãmure waimurãre erã oburinũ árĩbũ.

<sup>27</sup> Eropii erã coepehodiro merogã duhyacũ gohra Goãmũ wihigue Pablo ìgu árĩcũ Asia yeba majarã judio masapũ ìañorã ìgũre. Eropa ìarã gajirãre iri wihi árĩrãre Pablo mera guacũ iinõrã erã. Eropa guarã judio masa Pablõre ñeha òpa arĩ gaguiniguiñorã:

<sup>28</sup> —Mũa gua acawererã Israe masa guare itamurã arique. Ihĩ àhrimi. Moise dorerire i wihi sãre cóadore buhemi árĩpehrerãre. Eropigu ìgu Goãmũ wihiguere judio masa árĩbirã sãre añajadi àhrami. Eropigu i wihire ñeri mariri wihire ìgu gorowoadi àhrami, arĩ gaguiniguiñorã judio masa Asia yeba majarã ero majarãre.

<sup>29</sup> Ero core Jerusalén Pablo Trófimo mera ìgu árĩcũ judio masa ìañorã. Trófimo Efeso majagũ judio masũ árĩbiridigu arĩmi. Ìgu eropa árĩcũ masirã òpa arĩ pepiñorã erã: “Pablo Trófimõre Goãmũ wihire añajagũ iicumĩ,” arĩ pepiriñorã judio masa.

<sup>30</sup> Masare erã eropa arĩ were erã gaguiniguirã pũhrũ iri maca majarã árĩpehrerã burigã guañorã. Bajarã omagãri, Goãmũ wihi árĩgũre Pablõre ñeha tarawiria wañorã. Tuhajanugu iri wihi disipõre bihañorã erã ìgũgue ñajariri arĩrã.

<sup>31</sup> Eropirã erã ìgũre wejẽmorã iiriñorã. Erã eropa iicũ ìarã gajirãpũ wererã wañorã surara opũre. “Árĩpehrerã Jerusalén majarã gamenere gua, gaguiniguirã iiaama,” arĩ wererã wañorã surara opũre. <sup>32</sup> Erã eroparĩcũ peegũ opũpũ ìgu surarare, erã dorerã sãre gameneo, erã mera Pablõre wejẽdiarã pohrogue omagã ejañorã. Surara erã ejacũ ìarã Pablõre panirã pa duhuñorã. <sup>33</sup> Eropigu surara opũ Pablo pohrogue eja, ìgũre ñeha, peda comeda mera diridõrepũ. Erã dirituhajacũ ìha, opũ Pablõre serẽpipũ masare:

—¿Nihino àhriri ihĩ? ¿Ñeheno dipuwaja ìgũre eropa iiri mũa? arĩ serẽpipũ ìgu erãre.

<sup>34</sup> Ìgu eropa serẽpicũ peerã masapũ “Õpa iiami ìgu,” arĩ, gajirã sã gajiropa arĩ, gaguinigui wereñorã surara opũre. Erã eropa gaguiniguiicũ surara opũ òaro peebiripũ. Eropigu ìgu surara ya wihigue Pablõre aĩgãdõrepũ. <sup>35</sup> Iri wihigue eja, Pablo mũriariñere ìgu mũriacũ masapũ ìgũre padiarã cãhmotañorã. Erã eropa iicũ surarapũ ìgũre aĩcõã mũria wañorã. <sup>36</sup> Masa bajarã erãre nũrũsia, gaguinigui nũrũsiañorã.

—Ìgũre wejẽcãque, arĩ gaguiniguiñorã erã Pablõre.

*Pablo “Ne masare ñero iibeaã yũhũ,” arĩ werepũ*

<sup>37</sup> Eropii Pablõre iri wihigue erã peresu iiboro core, Pablõpũ opũre serẽpipũ.

—Yũhũ mũ mera weretamudiaca, arĩ serẽpipũ Pablo.

—¿Mũhu griego masa yare wereniguiri? <sup>38</sup> ¿Sohõ árĩdigũ, Egipto majagũ árĩbeari mũhu? Ìgũ masare ìgũ oparãre cóãdoregũ, cuatro mil masa gamewejêrãpũre masa marirogue aĩgãapũ. ¿Ìgũ árĩbeari mũhu? arĩpũ opũ Pablore.

<sup>39</sup> Ìgũ eroparĩcũ peegũ Pablo yũhripũ.

—Ìgũ árĩbeaa yũhũ. Judio masũ ãhraa. Tarso Cilicia yeba árĩri maca masa dehyoabũ yũhũ. Bu árĩri maca majagũ árĩbeaa yũhũ. Yũhũ oã masa mera wereniguidiaa, arĩpũ Pablo ìgũre.

<sup>40</sup> Ìgũ eroparĩcũ peegũ opũpũ wereniguidorepũ masa mera. Eropigũ Pablo mũriariñegue nigui, ìgũ mojotori mera “Ejarimaricãque,” arĩpũ masare. Ìgũ eropa iicũ ãarã, ejarimaripehrea wañorã. Erã ejarimaripehrecũ ãha, Pablo judio masa ya mera werepũ erãre.

## 22

<sup>1</sup> Yũ acawererã, yũ iirare weregũra mũare. Yũhũ werecũ peeque mũa, arĩpũ Pablo.

<sup>2</sup> Ìgũ eroparĩcũ Pablo judio masa ya mera ìgũ wereniguicũ peerã masa ejarimariro dujañorã. Eropigũ Pablo erãre werepũ:

<sup>3</sup> —Yũhũ judio masũ ta ãhraa. Tarso waĩcũri maca, Cilicia yeba árĩri maca masa dehyoabũ yũhũ. Eropigũ i maca ta Jerusalén ta masabũ yũhũ. Eropigũ yũre Gamalie waĩcũgũ buhemãrimi yũre. Eropigũ yũhũ mari ñecũ sũmarã mũra dorerire õaro buhebũ. Dohpaguere Goãmũre mũa umupeoro dopa ta yũ sã umupeoniguia. <sup>4</sup> Eropigũ Jesure umupeorãre ñero iimãricarabũ yũhũ. Yujurãyeri erãre wejêcãmãricarabũ yũhũ. Ëmare, nome sãre ñeha, peresu iimãribũ yũhũ. <sup>5</sup> Pahia opũ, mũrã mera yũ eropa arĩri “Diaye ta ãhraa,” arĩ weremasima mũre. Erã gojaripũrĩre Jesu yarãre ñeadoreburipũrĩre yũre gojabasama. Mari acawererãre Damasco majarãre iripũre ãhmubu iiribũ Jesu yarãre ñeabu. Erãre ñeha, aĩgãri peresu iibu iiribũ. Jerusaléngue erãre aĩgãdiaribũ erãre dipuwaja moabu, arĩpũ Pablo.

### *Pablo Jesu yagũ ìgũ warare werepũ*

<sup>6</sup> Eropa arĩtuhaja õpa werenemopũ:

—Jesu yarãre ñeari masũ wadigũ árĩqueregũ goeri boje árĩcũ, Damascogue yũ ejaboro pohro gohra árĩcũ ãmarogue goesiri medijubũ yũre. <sup>7</sup> Ero eropa wacũ yebague mehmerejacarabũ yũhũ. Yũ mehmerejara pũhrũ wereniguigũ carimi yũre. “Saulo, ¿duhpiğũ yũre ñero iiri mũhũ?” arĩgũ carimi yũre. <sup>8</sup> “Opũ, ¿nihino ãhriri mũhũ?” arĩ serêpibũ yũhũ. “Yũhũ Jesu Nazare majagũ, mũ ñero iigũ ta ãhraa yũhũ,” arĩ yũhrimi ìgũ yũre. <sup>9</sup> Yũ eropa wacũ yũ mera majarã boyorore ãama. Eropirã yũ mera ìgũ wereniguicũ peebirima erã. <sup>10</sup> “Opũ, ¿dohpa iigũcũri yũhũ?” arĩ serêpibũ Jesure. “Wahgãnũgajaque. Damascogue waque. Ero mũhũ wacũ, mũre árĩpehreri yũ iidoreburire gajigũ weregũcumĩ mũre,” arĩmi ìgũ yũre. <sup>11</sup> Bũrigã ero cuimijuro wacũ yũ cuiri boboa wacarabũ yũhũ. Eropirã yũ mera majarã yũ mojotore ñeha, Damascogue tũã wahgãma yũre.

<sup>12</sup> “Ero Ananía waĩcũgũ, Goãmũre umupeogũ, marire Goãmũ dorerire iipehogũ árĩmi. Ero majarã judio masa árĩpehrerã erã umupeogũ árĩmi. <sup>13</sup> Eropigũ ìgũ yũ pohro eranũgara yũre weremi. “Acaweregũ Saulo, ãaque dipaturi daja,” arĩmi ìgũ. Ìgũ eropa arĩra pũhrũ dipaturi ãabũ yũhũ daja. Eropigũ ìgũre ãabũ yũhũ. <sup>14</sup> Yũ eropa ãacũ ìgũ Ananía yũre weremi. “Mari Pagũ ìgũ gamerire õaro masibure iribojegue beyetuhapũ mũre. Eropigũ ‘Yũ magũ õagũre ãha peegũcumĩ,’ arĩ weremũhtarũ mũre mari Pagũ iribojegue mũ árĩboro core. Ìgũ ãhrimi mari ñecũ sũmarã mũra erã umupeodi. <sup>15</sup> Eropigũ mũ ãarare mũ peerare weregũca árĩpehrerãre. <sup>16</sup> Eropirã



dohpaguere yoari boje árĩbiricārã. Wahgãnuḡajaque. Eropigũ waĩyedigũ árĩque. Jesure mũ serẽcũ mũ ñerire cóãḡucumi,” arĩmi ĩḡũ yũre, arĩpũ Pablo.

*Pablo judio masa árĩbirãre ĩḡũ buherare werepũ*

<sup>17</sup> ĩḡũ eropa arĩtuhaja Pablo masare werenemopũ:

—Eropa iituhaja yũhũ Jerusalẽngue dujari, Goãmũ wihigue Goãmũre serẽḡũ ejabũ.

<sup>18</sup> Yũhũ ero árĩcũ yũ Opũ Jesu yũre dehyoami. Eropa dehyoagũ yũre weremi. “Jerusalén majarã yahare mũ werecũ peediabeama. Eropigũ duru gajipũgue waque,” arĩmi yũ Opũ Jesu yũre. <sup>19</sup> ĩḡũ eroparĩcũ peegũ werebũ ĩḡũre: “Opũ, mũ yarãre judio masa buheri wiri árĩrãre yũ ñeha para sãre, peresugue erãre iimũrirare masima Jerusalén majarã. <sup>20</sup> Eropigũ mũ yare wereḡũre Estebanpũre erã wejẽcũ ĩagũ ðaro iirã wejẽma, arĩribũ. ĩḡũre erã wejẽcũ erã ya suhrire opabasabũ yũhũ. Iri sãre masima i maca majarã,” arĩ werebũ yũhũ Jesure. <sup>21</sup> Yũ eroparĩcũ peegũ yũ Opũ yũre weremi: “Yoarogue judio masa árĩbirãre buhebure obeogũra mũre. Eropigũ waque mũhũ,” arĩmi yũre yũ Opũ, arĩpũ Pablo masare.

*Surara opũ Pablo mera weretamupũ*

<sup>22</sup> ĩḡũ weremũhtara dihtare ðaro peeriñorã masa. Eropa peequererã judio masa árĩbirã pohro Jesu Pablõre ĩḡũ obeoburire ĩḡũ werecũ peerã erã gua gaguiniguinũḡañorã daja.

—Ihĩ dohpague tamerare sĩricuraporo, arĩ gaguiniguinũorã erã.

<sup>23</sup> Eropirã erã gaguiniguinemo, guarĩ mera erã suhrire wejẽsiribeo, nicu mera deañorã. <sup>24</sup> Erã eropa iicũ ĩha surara opũ surara ya wihigue Pablõre aññajadorepũ ĩḡũ surarare. Eropigũ surara opũ “¿Duhpirã Pablo mera gua eropa siari gaguiniguirã ĩiri masa?” arĩ serẽpidiaripũ. Pablõre ĩrire serẽpibu, yuradari mera tãradoreripũ ĩḡũre. <sup>25</sup> ĩḡũ tãradorequerecũ ĩḡũre erã dirira pũhrũ, ĩḡũ pohro árĩḡũre surarare werepũ Pablo.

—Yũhũ Roma majagũ ãhraa. Eropirã “Ñero iigũ ãhrimi,” yũre arĩmasibeaã mũa. Eropirã yuradari mera tãramasibeaã mũa, arĩpũ Pablo ĩḡũre.

<sup>26</sup> ĩḡũ eroparĩcũ surara ĩḡũ opũre wereḡũ wapũ.

—Ihĩ Roma majagũ ãhrimi. Eropigũ ðaro iique ĩre, arĩ werepũ ĩḡũ ĩḡũ opũre.

<sup>27</sup> ĩḡũ eropa arĩra pũhrũ surara opũpũ Pablõre serẽpigũ wapũ.

—¿Diaye ta mũhũ Roma majagũ ãhriri? Wereque yũre ĩrire, arĩpũ ĩḡũ.

—Ĩḡũ ta ãhraa yũhũ, arĩ yũhrĩpũ Pablo.

<sup>28</sup> ĩḡũ eroparĩcũ peegũ opũpũ ĩḡũre werepũ.

—Yũhũ Roma majagũ árĩdiagũ niyeru wũaro wajayebũ, arĩpũ ĩḡũ.

—Yũhũ Roma maja macague masa dehyoabũ. Eropigũ Roma majagũ ãhraa, arĩpũ Pablo.

<sup>29</sup> ĩḡũ eroparĩcũ peerã ĩḡũre tãrabonirã waha wañorã. Eropigũ Pablo Roma majagũ ĩḡũ árĩcũ masigũ, ĩḡũre comedari mera erã dirirare guñagũ, gũĩ arĩpũ surara opũ.

*Pablo judio masa opũre werepũ*

<sup>30</sup> Eropigũ surara opũ judio masa Pablõre erã weresãrare ðaro masidiarũ. Eropa masidiagũ gajinũgue comedarire ĩḡũre ĩḡũ pãdorera pũhrũ pahia oparãre, judio masa erã mũrã mera gamenedorerũ surara opũ. ĩḡũ eropa gamenedorerũ pũhrũ ĩḡũ erogue Pablõre aĩḡã, erã core duhudobopũ ĩḡũre.

## 23

<sup>1</sup> Eropigũ Pablo judio masa mũrã oparãre ĩabocatĩunũḡaja werepũ:

—Acawererã, Goãmũ ĩḡũ ĩaro mũmũri nũcũ ðaro iiniguicãbũ yũhũ, arĩpũ Pablo.



<sup>2</sup> Īġu eroparīcū peegu árīpehrerā pahia weca árīġu opu Ananíapu Pablo disirore padorepu. <sup>3</sup> Īġu pohro niguirāre padorepu. Īġure erā para pūhrū Pablo Ananíare turipu.

—Masa erā ĩaro dihtare ōaro iigu āhraa mūhu. “Goāmū dorerire tarinūgagu iiaa,” yūre arīquereġu ta yūre padorea mūhu. Eropa padoreġu mūpu dorerire tarinūgagu iica, arīpu Pablo Īġure.

<sup>4</sup> Īġu eroparīcū peerā Pablo pohro niguirā ōpa arīñorā Īġure:

—Goāmū Īġu beyedigū pahia opūre ñero wereniguibiricāque mūhu, arīñorā erā Pablore.

<sup>5</sup> Erā eroparīcū peegu Pablo arīnemopū:

—Acawererā, Īġu, Īġu pahia weca opu Īġu árīrīre masibirabu yūhu. Eropīgu eroparīmaacābu yūhu. Goāmū ya erā gojarapū ōpa arī werea Īġure: “Mūa maca majarā opūre ñero arī wereniguibiricāque,” arī gojara āhraa, arīpu Pablo erāre.

<sup>6</sup> Eropirā ero pe curu majarā árīñorā. Yuju curu saduceo masa árīñorā. Gaji curupu fariseo masa árīñorā. Pe curu erā árīcū masīgu, Pablo erāre busūro mera werepu:

—Acawererā, yūhu fariseo masū āhraa. Fariseo masū magū ta āhraa yū sā. “Sīrinirā masa mūriarācoma,” yū arī wereri dipuwaja yūre ñero iidiaa mūa, arīpu Pablo.

<sup>7</sup> Īġu eroparīcū peerā fariseo masa, saduceo masa erā basi gameturiñorā. Eropirā erā basi pe curu dūca wariñorā. <sup>8</sup> Saduceo masa ōpa arīrā árīñorā: “Sīrinirā masa mūriasome. Espírītua anyua sā ne marima,” arīrā árīñorā. Eropirā fariseo masapu erā arīro dopa arībiriñorā. Eropirā Pablo “Sīrinirā masa mūriarācoma,” Īġu arīcū erā erā basi gameturiñorā. <sup>9</sup> Eropa gameturirā, būrigā gaguiniñorā. Eropirā fariseo masa mera majarā judio masa buherā wahgānūgaja, tuhri, wereñorā:

—Ihī Pablo ñero iibirami. Eropīgu Espírītu, o anyu diaye Īġu mera wereniguigu árībocumi. Eropirā Īġure dipuwaja moarā Goāmūre ĩhaturirā árīboca mari. Eropiibiricāque, arīñorā erā.

<sup>10</sup> Erā eropa arīra pūhrū erā árīpehrerā gameturi, būrigā guañorā. Erā eropa būrigā guacū ĩha gūisāpu Pablore surara opupu. “Pablore patasiricārācoma,” arīġu Īġu ya wihigūe aīgāridoreġu Īġu masa watope Īġu surarare obeopu.

<sup>11</sup> Gaji ñami Jesu mari Opu Pablo pohro dehyoa, werepu Īġure:

—Gūibiricāque. Dohpague ōre Jerusalēngue yaha buherire wereabu mūhu. Eropīgu Romague sāre ōpa ta iigu waque, arīpu mari Opu Pablore.

### *Judio masa Pablore wejēdiariñorā*

<sup>12</sup> Gajīnu ñamiñarīgā árīcū judio masa bajamerā gamenereñorā.

—Ōpa iirā, arīñorā. Pablore wejēcārā. Eropirā Īġure mari wejēboro core ihribiricārā. Babiricārā. Īġure wejēbirā oa mera sīrirā. Īġure mari wejēbiricū Goāmū marire wejēporo, arīñorā erā.

<sup>13</sup> Erā eropa arīrā cuarenta weca ñari judio masa árīñorā. <sup>14</sup> Erā eropa arī wereniguira pūhrū erā pahia oparāre, murā sāre wererā wañorā:

—Pablore gua wejēboro core barire babeaa gua. <sup>15</sup> Eropirā mūa, mari mūrā mera ōpa arī sihubeoque. “Pablore dipaturi serēpidiaca,” arībeoque surara opūre. Mūa eropa arīra pūhrū surara opūre aīgāridoreque Pablore. Eropirā Pablo Īġu ōre Īġu eraboro pohro gohra árīcū Īġure wejērāca gua, arīñorā erā pahia oparāre.

<sup>16</sup> Eropīgu Pablo tīgo magū erā eropa arī wereniguicū peepu. Erā eroparīcū peegu waha, surara ya wihigūe Pablore wereġu ñajapu. <sup>17</sup> Īġu eropa werera pūhrū Pablopū yujugū surarare sihubeo, werepu Īġure.

—Ihī mamūre mū opu pohroque aīgāque. Ihī mū opūre werediagu iimi, arīpu Pablo.

18 Īḡu eroparīcū peegu surarapū Pablo tīgo magure ĩḡu opu pohrogue aī eja, werepū.

—Peresugue árīḡu Pablopū yūre sihubeo, ĩre mamūre mū pohrogue aīḡāridoreami. Ihī mūre wereḡu arīḡu iiami, arīpū surara ĩḡu opūre.

19 Īḡu eroparīcū peegu opūpū mamūre ĩḡu mojtore ñeha tuāḡā, masa marirogue ĩḡure serēpi ĩapū.

—¿Dohpa arību iiarī mūhū yūre? arīpū ĩḡu Pablo tīgo magure.

20 Īḡu eropa serēpicū peegu ōpa arī werepū.

—Judio masa yujuro mera, “Ōpa iirā,” arī, wereniguiama. Ñamigāre judio masa oparā pohrogue mūre Pablore aīḡādorērācoma. “Mūrā dipaturi Pablore serēpidiama,” arī ḡuyarācoma. 21 Eropirā cuarenta weca ñari masa ĩḡure wejēdiarā mague duhrinijarā corerācoma. Erā ĩḡure wejēboro core barire basome. Eropirā ihrisome. “Īḡure mari wejēbiricū, Goāmū marire wejēporo,” arāma erā erā basi. Eropirā dohpaguere mūre Pablore aīḡāridorerā erāpū duhri coretuhajama Pablore wejēmorā. Eropiḡu erā wererā eracū erāre yūhribita mūhū, arī werepū mamū surara opūre.

22 Īḡu eroparīcū peegu surara opu ōpa arīpū:

—Yūre mū wererare gajirāre werebircāque, arī werepū mamūre. Eropa arītuhaja mamūre “Wahanisa,” arīpū.

### *Pablore opu Feli waīcūḡu pohrogue obeopū*

23 Eropiḡu surara opu perā ĩḡu surarare sihugā, erāre dorepū:

—Doscientos surarare, setenta cabayu peyarāre, doscientos ñoseri mijiri oparāre Cesareague wamorāre erā yare amudorerā waque. Eropirā dohpagā ñami nueve árīcū mūa waborore coreque. 24 Eropirā Pablore cabayuare ĩḡu peyamorāre amubasaque. Opu Feli pohrogue, Cesareague ōaro sorā waque ĩḡure, arīpū surara opu.

25 Eropa arītuhaja papera gojapū. Ōpa arī gojapū ĩḡu: 26 “Yūhū Claudio Lisia mūre turagū opu Felire ōadoreā. 27 Judio masa ĩre ñeha, wejērama. Eropiḡu ĩḡu Roma majagū ĩḡu árīcū masiḡu, yū surara mera ĩḡure itamugū ejabū. 28 Eropiḡu ĩḡure erā weresārare masidiagū judio masa oparā pohro aīḡābū ĩḡure. 29 Eropiḡu ĩḡu judio masa ya doreri dihtare ĩḡu tarinūḡacū, mari ya dorerire ĩḡu tarinūḡabiricū ĩagū, ĩḡure peresugue apidiabirabū. Ñeha dipuwaja sīriro mara ĩḡure. 30 Eropiḡu judio masa ĩḡure wejēdiarā, erā duhri corecū ĩagū gajīḡu wereami yūre. Īḡu eropa werera pūhrū Pablore dohpaguere mū pohro obeoḡu iiaa. Eropiḡu ĩḡure weresānirāre ĩḡu ñero iirare mūre weredoretuhajabū yūhū,” arī gojapū surara opu.

31 Eropirā surara erā opu ĩḡu dorediro dopa ta iīñorā. Iri ñamire Antípatri waīcūri macague Pablore aī ejañorā. 32 Gajinū gajirā surara cabayua weca peyabirā iri maca ta dujariñorā erā ya macague. Gajirā surara cabayua peyarā dihta ĩḡure aī tarigāñorā. 33 Pū Cesareague aī ejañorā Pablore. Eropirā surara opu ĩḡu obeorapūre opu Felire wiañorā. Eropirā Pablore aī ejañorā opu pohrogue. 34 Erā eropa wiara pūhrū iripūre ĩḡu ĩara pūhrū ĩḡu gajirāre serēpi ĩapū:

—¿Di yeba majagū āhriri ihī Pablo? arī serēpi ĩapū.

—Cilicia yeba majagū āhrimi, arī wereñorā ĩḡure.

35 Erāre serēpituhaja, Feli Pablore werepū:

—Mūre weresānirā ōre erā eracū mū wererire peḡura, arīpū Feli Pablore.

Īḡu eropa arīra pūhrū Herode ya wihigue ĩḡure apipū. Eropiḡu ĩḡu umare ĩḡure coredorepū ĩḡu opu.

## 24

### *Pablo “Ñero iibirabũ,” arĩ werepũ Felire gajirã weresãra pũhrũ*

<sup>1</sup> Cinco nũri pũhrũ Ananía pahia opũ, judio masa erã mũrã, dorerire weremehregũ Tértulo waĩcũgũ mera Cesareague ejañorã. Eropirã erã Pablöre weresãdiarã, opũ Feli pohrogue ejañorã. <sup>2</sup> Eropigũ Pablöre erã gamenererogue erã aĩ ejara pũhrũ Tértulo ïgũre weresãnũgapũ. Eropa weresãnũgagũ õpa arĩpũ Felire:

—Mũhũ ðaro masigũ, gũa opũ mũhũ ðaro dorecũ gũa i yeba majarã ðaro árĩcãa gũa gamequeãro mariro. Mũ doreri mera ðaripũre gohroto iiaa i yeba. <sup>3</sup> Eropirã gũa ðaro árĩcãrã mucubiria. Eropirã mũ mera ðaro mucubiria. <sup>4</sup> Dohpague merogã mũre garibogũra yũhũ. Merogã mũ mera weretamudiaca. Gũare peenique dohpa. <sup>5</sup> Ihĩ gũare garibotariami. Árĩpehreri yebari majarãgue judio masare erã gũa gaguiniguicũ iimi ihĩ. Eropigũ masa erã basi gameturicũ iimi ihĩ. “Oparãre cóãrã,” arĩrã mera majagũ ãhrimi ihĩ. Eropigũ nazareno waĩcũri curu opũ ãhrimi. <sup>6</sup> Eropigũ Goãmũ wihire ñero ïgũ iidiacũ ïarã gũa ñeabũ ïre. Gũa ñeara pũhrũ gũa ya dorerire ïgũ tarinũgagũ árĩcũ ïgũre dipuwaja moadiarabũ gũa. <sup>7</sup> Eropa moadiaquerecũ surara opũpũ Lisia waĩcũgũ ïgũre gũare turaro mera emacãmi. <sup>8</sup> Pũhrũ ïgũre weresãnirãre mũ pohrogue wadoreami Lisia. ïgũ eroparĩcũ peerã ahrabũ gũa. Mũ tamera ïre serẽpigũ, árĩpehrerire ïgũ ya dipuwajare masigũca mũhũ, arĩpũ Tértulo Felire.

<sup>9</sup> ïgũ eropa arĩra pũhrũ gajirã judio masa Tértulo ïgũ arĩdiro dopa ta “Diaye ta ãhraa,” arĩñorã erã sã. <sup>10</sup> Erã eropa arĩ weresãra pũhrũ opũ Feli Pablöre weredorepũ. Õpa arĩ werepũ Pablo:

—Baja bojori i yeba majarãre mũ dorerare masia yũhũ. Eropigũ yũ iirare mũre weregũ mucubiria. <sup>11</sup> Doce nũri ta wahaa Jerusaléngue Goãmũre yũ umupeora pũhrũ. Mũhũ i diaye árĩcũ masidiagũ gajirãre serẽpi ïaque. <sup>12</sup> Judio masa yũre Goãmũ wihiguere boca erã ñeacũ masare arĩ gaguiniguigũ iibirabũ. Eropigũ “Oparãre cóãque,” arĩgũ iibirabũ. Eropigũ judio masa buheri wirire, erã ya maca sãre ne ñero iibirimũrabũ. <sup>13</sup> Eropirã yũre weresãnirãpũ erã weresãrãre “Õpa iiami ihĩ,” arĩ weremasibeamã mũre. <sup>14</sup> Dohpague yũ iirare weregũra mũre. Matague ta gũa ñecũ sũmarã erã umupeodiro dopa ta Goãmũre umupeoa yũ sã. Eropigũ Goãmũ yare iiaa Jesu ya ðari buheri iri arĩro dopa ta. Oã “Jesu ya gũyabirari ãhraa,” arĩ wereniguima oã judio masa. Eropigũ Goãmũ doreri, Moiseguere ïgũ apirare iri sãre umupeoa yũhũ. Eropigũ Goãmũ ya weremũhtanirã erã gojara sãre umupeoa yũhũ. <sup>15</sup> Oã gajirã judio masa mera ta “Goãmũ árĩpehrerã masare sĩrinirãre ðarã, ñerã mera erã masa mũriacũ iigũcumĩ,” erã arĩ pepiro dopa ta yũ sã eropa ta arĩ pepia. <sup>16</sup> Eropigũ dipuwaja mara yũhũ. Goãmũ irire masimi. Eropirã masa sã irire masima. Eropigũ diaye ta werea yũhũ mũre.

<sup>17</sup> “Gaji bojorire gajipũgue yũhũ curigũ árĩgũ dujarabũ Jerusaléngue. Yũ acawererã Jerusalén majarã mojomorocũrãre niyeru ogũ arigũ iiabũ. <sup>18</sup> Dujara, Goãmũre umupeobu ïgũ ya wihigue ejarabũ. Eropigũ Goãmũ ïgũ coedorero dopa yũ basi iira pũhrũ waibũgũre odiarabũ Goãmũre umupeobu. Erogue yũ árĩcũ oã judio masa yũre bocama. Erã bocacũ gajirã yũ mera majarã marama. Gũa gaguiniguirã marama. <sup>19</sup> Eropirã gajirã judio masa Asia yeba majarã ero ãhrama. Erã yũ ñero iicũ ïanirã arĩrã weresãrã ariporo õguere. <sup>20</sup> Oã õgue arĩrãpũ judio masa oparã gamenererogue yũ árĩcũ ïanirã yũ erogue ñero iirare masirã, erã sã weresãporo. <sup>21</sup> Gaji tamerare yũre erã weresãmasima: Erã mera árĩgũ õpa arĩ bũrigã gaguiniguibũ yũhũ: “ ‘Sĩrinirã masa mũriarãcoma,’ yũ arĩra waja dipuwaja moaa mũa,” arĩbũ erãre, arĩ werepũ Pablo Felire “Ñero iibiribũ,” arĩgũ.

<sup>22</sup> ïgũ eropa arĩ werera pũhrũ Feli õpa arĩ werepũ Pablöre:

—Dohpaguere iripēta āhraa. Surara opu Lisia ĩgu erara pūhru mure yu iiborore masigūca yūhu, arīpu Feli Pablora. Filipu Jesu yarā erā iirare ōaro masipehogu arīpu.

<sup>23</sup> Eropa arītuhaia, Pablora coregure surarare Feli ōaro ĩhadibudorepu peresugue arīgu duhriri arīgu. Eropa ĩhadibudorequeregu ōaro iidorepu ĩgure. Eropigu merogā opu ĩgu curiborore. Pablo mera majarāre ĩgure peresugue arīgure itamudoregu eropa dorepu Feli.

<sup>24</sup> Bajamenuri pūhru Feli ĩgu marapo Drusila waicūgo mera ahri, Pablora sihuñorā daja. Feli marapopu judio maso arīpo. Pablora erā sihura pūhru, Jesucristore ĩgu umupeorire Pabloru werepu erāre. <sup>25</sup> Eropa weregu, ōarire, ōaro guñamasirire, ñerire gamebiririre, pehrerinu arīcū masare Goāmu dipuwaja moaborore werepu Pablo. ĩgu eropa arī werecū peegu Feli güigu, Pablora werepu:

—Dohpaguere waque. Pūhru yure mohmeri maricū sihgura daja, arīpu Pablora.

<sup>26</sup> Eropa arīgu, Pablo ĩgure niyeru ocū gameripu Feli. Eropigu ĩgu niyerure gamegu, bajasuburi Pablora sihu, ĩgu mera wereniguimuripu Feli. Niyerure ĩgu wajayecū ta Pablora wiuboñumi gajisubu arīgu. <sup>27</sup> Pe bojori pūhru Porcio Festo waicūgu Felire gohrotogu arīpu. Eropigu Filipu opu arīgu judio masare mucubiricū iidiapu. Eropigu ĩgu Palora peresu arīdorepu dohra.

## 25

### *Festore Pablo ĩgu iirare werepu*

<sup>1</sup> Eropii Festo iri yebague uhrenu ĩgu opu ñajara pūhru, Cesareague arīdigu waha, Jerusalēgue eja pu. <sup>2</sup> Ero ĩgu ejacū ĩha pahia oparā, judio masa oparā mera Pablora erā weresārare wereñorā Festore. <sup>3</sup> Pablo ĩgu mague wacū iri mague ĩgure cohre, wejēdiariñorā ĩgure erā. Jerusalén mague aricū gameriñorā ĩgure wejēmorā. Eropirā erā ōpa Festore uputu serēriñorā:

—Pablora ōguere Jerusalēgue obeoque, arī serēriñorā erā Festore Pablora wejēdiarā.

<sup>4</sup> Erā eroparīcū peegu, Festo werepu erāre:

—Dohpaguere Pablo Cesareague peresu āhrimi. Dohpaguere yūhu erogue wabu iiaa. <sup>5</sup> Pablo ĩgu ñero iigu arīcū, muu oparā Cesareague yu mera waha, ĩgure weresāque, arīpu Festo.

<sup>6</sup> Eropigu Festo ocho o diez nuri erā mera ĩgu arīra pūhru Cesareague dujaa wapu. Gajinu ĩgu dipuwaja moadoreri wihi doagu, Pablora aīgāridorepu. <sup>7</sup> Eropirā Pablo Festo pohrogue ĩgu eracū, judio masa Jerusalēgue arinirāpu Pablo pohro nigui, ĩgure burigā weresānugañorā. Eropa weresāquererā “Ihī ĩgu ñero iicū ĩabu,” arī weresāmasibiriñorā. <sup>8</sup> Erā eropa arī weresāra pūhru Pablo ĩgu iirare werepu:

—Judio masa erā dorerire, Goāmu wihi maja dorerire, Roma opu ĩgu dorerire ne tarinugabirabu, arīpu Pablo.

<sup>9</sup> Festopu judio masare mucubiricū iidiagu, Pablora serēpipu.

—¿Jerusalēgue wadiari muhu? Mu iirare yure erogue weregūca muhu, arīpu Festo Pablora.

<sup>10</sup> ĩgu eroparīcū Pablo yūhripu:

—Arīpehrerā weca opu ĩgu ya wihi dipuwaja moadoreri wihi āhraa dohpaguere. I wihino ta ohō sā āhraa. Eropigu yu iirare ohō ta amu purumujuque. Judio masare yu ñero iibirirare ōaro masia muhu. <sup>11</sup> Ñerire iigu dorerire tarinugagu arīgu “Yure wejēbiricāque,” arībiriboaya. Eropigu oā weresāripu guyaririri arīcū yure weresānirāre yure omasibea muhu. Yu iirare arīpehrerā weca opure Césare weregu wadiaca yūhu, arīpu Pablo.

<sup>12</sup> ĩgu eroparīcū peegu Festopu ōaro masi wererāre serēpituhaja, werepu Pablora.



—Mũhũ árĩpehrerã weca opũre mũ iirare mũ werediacyũ, ĩgu pohrogue Romague obeorãra mũre, arĩpũ Festo Pablore.

*Pablo opũ Agripare ĩgu iirare werepũ*

<sup>13</sup> Festo opũ ñajara pũhrũgue opũ Agripa, Berenice waĩcũgo mera Cesareague Festore ĩarã ejañorã.

—¿Ne, erarari mũ sã? arĩñorã erã Festore bocatĩri serẽrã. <sup>14</sup> Ero bajamenũrigã erã árĩra pũhrũ Festo werepũ Agripare Pablore erã iirare.

—Õre Feli ĩgu peresu iidigu añhrimi. <sup>15</sup> Eropirã Jerusalengue yũ wacyũ judio masa erã pahia oparã, erã mũrã mera ĩre weresãma. “Ĩgu ya dipuwajare wejẽque ĩgũre,” arĩ serẽama erã yũre. <sup>16</sup> Erã eroparĩcũ peegũ yũ õpa wereabũ: “Gũa Roma majarãpũ peresu erã iinirãre masare eropa ta ocãbirimũribũ. Eropigu ĩgũre osome mũare. Gũa ñeadigũre ĩgũre weresãnirã gũare wereniguiboro core ĩgũre dipuwaja moamasibea gũa. ĩgu basi sã ĩgu iirare ĩgu werenibiricũ ĩgũre dipuwaja moamasibea gũa,” arãbũ erãre. <sup>17</sup> Eropigu õre erã weresãrã eracũ ĩagu yoari boje iibirabũ yũhũ. Eropigu gajinũre masa dipuwaja moadoreri wihi yũ doagu, erã weresãdigũre sihubeobũ. <sup>18</sup> Eropirã iri wihi ĩgu eracũ ĩarã ĩgũre ĩhaturirã wahgãnũgajama. Erã eropa wahgãnũgajacyũ ĩagu ñetariaro arĩ weresãrãcoma arĩ pepirabũ yũhũ erãre. ĩgũre weresãdiaquererã weresãmasibirama erã. <sup>19</sup> Eropirã ĩre Goãmu yare ĩgu werera dipuwaja judio masa ĩgũre ĩhaturiamã. “Jesu waĩcũgu ĩgu sĩridigu masa mũriadi árĩmi,” arĩ ĩgu werera waja weresãma ĩre. I dihtare weresãma. <sup>20</sup> Ire masibigu ĩgũre õaro serẽpi ĩabũ. “¿Jerusalengue wadiacuri yũ mera? Eroguere wereque mũ iirare yũre,” arĩrabũ ĩgũre. <sup>21</sup> Yũ eroparĩcũ peegũ ĩgũpũ wadiabirami. “Yũ iirare árĩpehrerã weca opũre werediaca,” arãmi ĩgu yũre. ĩgu eropa arĩra pũhrũ ohõ ta ĩgũre coredoreabũ árĩpehrerã weca opũ pohro ĩgũre yũ obeoboro core, arĩpũ Festo Agripare.

<sup>22</sup> —Yũ basi peediaca ĩgũre, arĩpũ Agripa Festore.

—Ñamigã ta ĩgũre peegũca mũhũ, arĩ yũhripũ Festo.

<sup>23</sup> Eropirã gajinũ árĩcũ Agripa, Berenice mera masa dipuwaja moadoreri wihigue eja, “Oparã añhraa gũa,” arĩrã gũhyadiaro ii ĩhmuñorã erã, surara oparã, iri maca majarã oparã mera. Eropa ii ñajarã iri wihiguere ñajañorã. Erã ñajajara pũhrũ Pablore sihubeopũ Festo. <sup>24</sup> Eropigu Festo õpa werepũ:

—Opũ Agripa, mũa árĩpehrerã i wihire gamenererã peeque. Õre ihĩ bajarã judio masa erã weresãgu añhrimi. Jerusalengue Cesareague sãre erã ĩgũre weresãma. “Ĩgũre wejẽque,” eropa arĩniguicãrã iima erã. <sup>25</sup> Erã eropa arĩquerecũ ta õpa arĩ pepia yũhũ. Ihĩ ne ñero iidigu árĩbeamĩ. ¿Ñehe dipuwaja mari wejẽbocuri ĩgũre? Eropigu árĩpehrerã weca opũre César Augustore ĩgu iirare ĩgu werediacyũ árĩpehrerã opũ pohrogue obeogũra ĩre. <sup>26-27</sup> Eropigu ihĩ ĩgu iirare masibirinica yũhũ dohpa. Eropa masibirinigu mari opũre were gojamasibirica. Eropigu mũare ĩgu werecũ peedoregu iiaa dohpaguere. Opũ Agripa, dohpague tamerare ihĩ añhrimi mũ serẽpi ĩabu. Mũ serẽpi ĩatuhaja mari masira pũhrũ ĩre erã weresãrãre õaro were gojagũra. Ihĩ ĩgu ñero iirare yũ masibiriqueregu ta opũ pohrogue ĩgũre yũ obeocũ õabeaa. Eropigu dohpaguere erã weresãrãre õaro masidiagu iiaa, arĩpũ Festo erãre.

## 26

*Pablo Agripare ĩgu iirare werepũ*

<sup>1</sup> ĩgu eropa arĩra pũhrũ Agripa Pablore arĩpũ:

—Mũ basi ta wereque, arĩpũ ĩgu Pablore. ĩgu eropa arĩra pũhrũ Pablopũ, “Ejarimaricãque,” arĩgu ĩgu mojotorire aĩ wahgũbeo, ĩgu iirare werenũgarũ:



<sup>2</sup> —Opu Agripa, yure judio masa erã weresãrare, yu iirare mure weregu, dohpaguere ðaro siporãcã. <sup>3</sup> Gua judio masa gua iiricãrire, gua buheri sãre mũhu ðaro masicũ tamerare mucubiria yũhu. Eropigu mũhu yure ðaro peeque, arĩnugaru Pablo.

*Pablo Jesu yagu igu arĩboro core igu arĩricãrare werepu*

<sup>4</sup> Eropa arĩtuhajagu ðpa arĩnemopu igu:

—Mamu arĩgu yu arĩricãrare arĩpehrerã judio masa masima. Umuri nucu yu masa dehyoara pũru yaha yebaguere, Jerusalengue sãre yu arĩrare masima erã. <sup>5</sup> Negohraguere fariseo masu arĩribu. Eropigu fariseo masa erã dorerire, erã iirinore yũhu ipehodigu arĩcũ erã masima. Erã mure werediarã, irire weremasima erã. <sup>6</sup> I dipuwaja ta yure weresãmurima. Gua ñecu sũmarãre “Sĩrinirãre masugura,” Goãmu igu arĩ apirare “Diaye ta ãhraa,” yu arĩri waja oã yure weresãmurima. <sup>7</sup> Yu acawererã judio masa, arĩpehrerã doce cururi majarã Goãmu masare igu masuborore mucubiri cohrema. Eropirã Goãmure umupeoniguicãma. Eropa corerã arĩrã yu iiro dopa ta iima erã sã. Opu Agripa, eropa yujuropa gua iirã arĩquerecũ ta erãpu yũhu igu masuborore ii coreri waja yure weresãmurima judio masa. <sup>8</sup> ¿Duhpirã sĩrinirãre Goãmu igu masuborore peediabeari mua judio masa? arĩ werepu Pablo.

*Pablo Jesu yarãre igu ñero iirare werepu*

<sup>9</sup> Eroparĩtuhaja ðpa werenemopu:

—Jesu Nazare majagure ñanibigu dohpa ñeri dihtare iidiaribu yũhu igu yarãre. <sup>10</sup> Eropigu Jerusalengue eropa iimuribu yũhu. Pahia oparã yure erã dorera pũru bajarã Jesu yarãre peresu iimuribu yũhu. Eropigu oparã erãre erã wejẽdorecũ, wejẽmuribu yu sã. <sup>11</sup> Bajasuburi arĩpehreri judio masa erã buheri wirigue Jesu yarãre ñero iidoremuricarabu. Eropigu Jesu yarã Jesure erã cóacũ iidiaribu yũhu. Erã mera burigã guabu yũhu. Eropigu gaji macarigue sãre erãre ñero iigu ejamuricarabu yũhu, arĩ werepu Pablo.

*Pablo Jesu yagu igu warare werepu*

<sup>12</sup> Eropa arĩtuhaja ðpa werenemopu:

—Eropigu Damascogue Jesu yarãre ñero iidiagu ejaribu. Erãre yũhu ñero iidiacũ ñarã pahia oparã yure wadorema. <sup>13</sup> ðpa arĩbu, opu Agripa: Goeri boje arĩcũ gohra mague yu wacũ umaro maja gosesiriri, abe umu majagu tauro yure yu mera warã sãre gosesiribu. <sup>14</sup> Gua arĩpehrerã yebague mehmerejabu. Judio masa ya mera yure igu wereniguicũ peebu. “Saulo, Saulo, ¿duhpigu mũhu yure ñero iiri? Mũhu yu mera guagu yure yũhribu, mu basi ñero taria,” arĩmi yure. <sup>15</sup> “Opu, ¿nihino ãhriri mũhu?” arĩ serẽpibu yũru. “Yũhu Jesu ta ãhraa mu ñero iigu. <sup>16</sup> Wahgãnugajaque mũhu. Yu pohro majagu mure iibu dohpague dehyoa yũhu. Dohpagãre mũhu yure ñarare, pũru mure yu ñmuburi sãre gajirãre weredorebu apiguca mure. <sup>17</sup> Judio masare, judio masa arĩbirã sãre mure buhedoregu obeogura. Erã pohro mu arĩcũ, mure erã ñaturicũ mure itamugura. <sup>18</sup> Yahare erãre masicũ iique mũhu. Eropigu erã ñerire duhucũ iique mũhu. Òaripure gohrotocũ iique erãre. Watire erãre gamebiricũ iique mũhu. Eropigu Goãmu yapure iicũ iique mũhu erãre. Mũhu eropa iicũ erã yure umupeorãcoma. Erã eropa umupeocũ ñagu erã ñeri iirare cãdijiguca. Eropirã erã Goãmu igu beyenirã mera majarã mera arĩrãcoma. Igu oburire opamorã arĩrãcoma erã,” arĩmi Jesu yure, arĩ werepu Pablo.

*Pablo igu iirare igu mohmerire werepu*

<sup>19</sup> Eroparĩtuhaja ðpa werenemopu:

—Opu Agripa, umaro maja yu peerire tarinugabiribu. <sup>20</sup> Damascogue buhemahatabu. Puhru Jerusalén buhebu daja. Puhru Judea yeba, judio masa árībirā pohroque säre masare erā ñero iirare bujaweredore, Goāmū yare gamedorebu. “Ōarire mua iicū ĩarā mua ñeri iirare mua bujawererare gajirā masirācoma,” arīgu, erāre ōarire iidoregu buhebu. <sup>21</sup> Goāmū ya wihi yu árīcū yu eropa arī wereri waja judio masa yure ñeha wejēdiarima. <sup>22</sup> Eropigu umuri nacu Goāmū ĩgu itamuro mera eropa buheniguicāa. Eropigu dohpaguere mua árīpehrerāre oparāre bu árīrā säre ĩgu yare weregu iiaa. Iribojegue majarā Goāmū yare weremūhtanirā Moise mera erā wereyudiro dopa ta werea yu sã. Ōpa arī wereyuñorā erā: <sup>23</sup> “Cristo Goāmū ĩgu obeodigupu ñero tarigucumi. Eropigu sīrigu masa mūriamūhtagu árīgucumi ĩgu. Eropigu masare ĩgu itamuborore judio masare judio masa árībirā säre masicū iigucumi,” arī wereyu gojamūriñuma iribojegue majarā. Yu sã erā werediro dopa ta werea, arī werepu Pablo Agripare.

### *Pablo Agripare Jesu yagu iidiaripu*

<sup>24</sup> ĩgu eropa arī werera puhru Festo ĩgure burigā gaguiniguui wereniguipu:

—Pablo, mūhu goroweregu āhraa. Mūhu baja buhegu goroweregu wahaa, arī gaguiniguipu Pablöre.

<sup>25</sup> ĩgu eroparīcū peegu ōpa yūhripu Pablo Festore:

—Opu, goroweregu árībeaa yūhu. Yu wereri diaye ta āhraa. Eropigu yūhu ire guhyadiaro mera arāa. <sup>26</sup> Opu Agripapu i yu wererire ōaro masimi. Eropigu yūhu ĩgure güiro mariro werea. I wererire árīpehrerā masa masima. Eropigu árīpehreri ire yu arīrare opu Agripa ĩgu masicū masia yūhu, arīpu Pablo Festore.

—ĩgu eropa arītuhaja ōpa arīpu Agripare:

<sup>27</sup> —Opu Agripa, Goāmū ya weremūhtanirā erā wererare peea mūhu. Erā wererire mū peecū masia yūhu, arīpu Pablo Agripare.

<sup>28</sup> —¿Ire yure weregu merogā mū wereri Jesu yagu yu wacū iidiaгу iiri mūhu? arīpu Agripa Pablöre.

<sup>29</sup> ĩgu eroparīcū Pablo yūhripu.

—Merogā wereniguigu o yoari boje wereniguigu mua árīpehrerāre yūhu árīro dopa ta Jesu yarā árīcū gahmea. Irire serēbasaa Goāmure. Eropigu yu iro dopa ta peresugue mua árīcū tamerare gamebeaa yūhu, arīpu Pablo.

<sup>30-31</sup> ĩgu eropa arīra puhru Agripa, Festo, Berenice árīpehrerā gajirā mera wahgānuga wiria, erā basi wereniguñorā:

—Ihī ĩgu iira waja ne peresu iimasibeeaa mari. ¿Eropirā mari ñeheno dipuwaja ĩgure wejēbocuri? arī wereniguñorā erā erā basi.

<sup>32</sup> —Ihī “Árīpehrerā weca opure yu iirare werediaca,” ĩgu arībiricū mari wiuboaya ĩgure peresugue árīgure, arīpu Agripa Festore.

## 27

### *Pablo ĩgure weresārare Romague weregu wapu*

<sup>1</sup> Pablöre Italiague árīpehrerā weca opu pohroque dohodiru mera obeorā, ĩgu mera gajirā peresu árīrā säre obeoñorā. Eropirā Julio waicugure erāre ĩhadibudorerā obeoñorā erā. Julio cien surara opu arīpu. ĩgu ya curu Augusto yarā surara waicūñorā. <sup>2</sup> Yu sã Pablöre wapicugābu. Eropirā Adramitio waicuro majaru dohodiru mera ñajabu gua. Iriro Asiague waburidiru árību. Ñajatuhaja, iriru mera wabu. Aristarco Tesalónica waicuri maca majagu gua mera wami. Tesalónica Macedonia yeba árību. <sup>3</sup> Gajinu gua Sidóngue ejabu. Erogue jagu Julio Pablöre ōaro iimi. Eropigu Pablöre ĩgu mera majarā pohroque ĩagu wadoremi. Eropigu Pablo

mera majarã ãgure ãgu gamerire erã ocũ “Õaroca,” arĩmi Julio. <sup>4</sup> Dohodirugue ñajarã daja gũa taribujacũ bũrigã miruñe gũare gajipugue weãtaribujubũ. Eropirã Chipre waĩcũri nũgũro cãhmotarogue diayerũ wabũ gũa. <sup>5</sup> Pũ Ciliciare taria, Panfilia sãre taria, Mira waĩcũri macague Licia yebague árĩri macague tuhajabũ gũa.

<sup>6</sup> Erogue ejarã, Alejandrĩague aridirure, Italiague wadirure dohodirure bocabũ. Eropigũ surara opũ gũare irirugue wadoremi. <sup>7</sup> Bajanũri dabero waro waha, “Ñe yeboca,” arĩ, waha, Gnido waĩcũri maca diaye ejabũ gũa. Erogue eja taria, miruñe bũrigã weã, gũa wadiadirore gũare weãbeobiribũ. Eropirã gũa copugue majipa wabũ. Eropirã Creta waĩcũri nũgũro iri nũgũro cãhmotari masepũ gũa taribuja waha, Salmón waĩcũri ñorore tariabũ gũa. <sup>8</sup> Erogue tari, iri nũgũro pohro waha, “Ñe yeboca,” arĩ waha, “Õari peramaha” waĩcũroque tuhajabũ. Peramaha Lasea waĩcũri maca pohroque árĩbũ.

<sup>9</sup> Erogue gũa yoari boje árĩra pũhrũ, gũa waboropũ gũhyataribũ. Eropiro erã ba duhurinũ bosenu tarira pũhrũ, Pablo dohodiru majarãre weremi.

<sup>10</sup> —Peeque mũa. Ba duhurinũ bosenu pũhrũ mari wacũ marire mirimaja gũhyataria. Iru dohodiru, dohodiru maja, mũa doberi sã mari mera majarã sã mari dedereboca warã, arĩrimi Pablo.

<sup>11</sup> ãgu eroparĩquerecũ surara opũ dohodiru opũpũre peegu, autugũ sãre peegu, Pablo ãgu wereripũre peediabirimi wadiagu. <sup>12</sup> Erã payari peramaha puhiró árĩcũ õari payari peramaha árĩbiribũ. Ero eropa árĩri peramaha árĩcũ dohodiru majarã bajarã wadiarã, Fenicegue mũriadiarima puhiró waboro core. Fenice Creta waĩcũri nũgũro maja peramaha árĩro, miruñe ero aridirogue abe mũririroguepũ copugue diayerũgue sãre ñhabeo miruñe aricũ õaro cãhmotari maca árĩbũ. Ero eropa árĩri peramaha árĩcũ masirã erã erogue yuju puhibũgu árĩrisubu árĩdiarima.

### *Wũariyague miruñe, deco wũaro ariyoro*

<sup>13</sup> Eropii docapũ surgue daberogã miruñe arinũgabũ. “Dohpagãre õarinũ mari waburinũ ãhraa,” arĩ pepiriñorã erã. Miruñe ero aricũ erã comeyere tarawahgũ, Creta nũgũro pohrogã mũriabũ gũa. <sup>14</sup> Eropii pũhrũñari miruñe gohroto noreste waĩcũri miruñe bũrigã weãbũ. <sup>15</sup> Eropiro dohodirure miruñe bũrigã weã erabũ. Miruñe ero weãbeero wamasibiri, majipa, miruñe mera wabũ gũa. <sup>16</sup> Claudia waĩcũri nũgũrogã pohroque docapũgue waha, iri nũgũrogã gũare merogã cãhmotabũ. “Marire yebo ãhraa,” arĩrã erore dohodiru majaru miridirugã gasirure õaro tarapeo diribũ gũa. <sup>17</sup> Irirure dohodirugue gũa tarasã diripehora pũhrũ wũarida mera erã waĩñea peoma. Libia yeba tũro pohro árĩri imipororire “Iriu gasiru dohodiru iri mehtuhajari,” arĩrã gũi árĩma erã. Eropirã erã miru ñeari suhrire erã aĩdijura pũhrũ dohodiru dihtare miruñe weãbeobũ. <sup>18</sup> Miruñe, deco mera bũrigã aribũ. Gajinũ sãre miruñe mũraro ta daja aricũ ñarã erã erã doberire diague duhrimeyura pũhrũ taribujabũ gũa. <sup>19</sup> Gajinũ dohodiru majare diague cóãma erã erã basi. <sup>20</sup> Bajanũri ñĩpirinũri árĩcũ, abe umũ majagu necã sã ne deyobirima. Eropiro bũrigã miruñe aribũ. Eropirã “Miria waha mari. Eropirã sĩria warãca,” arĩ pepiribũ gũa.

<sup>21</sup> Eropigũ Pablo yoari boje erã ba duhura pũhrũ ãgu erã core nũgaja, weremi erãre. —Mũare yũ werecũ peebirabũ mũa. “Cretague árĩrã mari wacũ gũhya árĩca,” yũhũ arĩcũ peebirabũ mũa. Yũre peerã, iru maja árĩpehrerire dedeobiriboaya mũa. <sup>22</sup> Eropigũ dohpague mũare werea. Guñaturaque. Eropirã gũibiricãque. Árĩpehrerã mari tarirãca. Iru dohodiru dihta marire wahribasaroca. <sup>23</sup> Dohpagã ñamire Goãmũ anyu yũre dehyoami. Goãmũ yagu ãhraa yũhũ. Eropigũ ãgure umupeoa yũhũ. Anyupũ yũ pohro arigũ wereami. <sup>24</sup> “Pablo, gũibita. Árĩpehrerã weca opũre mũ iirare mũre werero gahmea. Goãmũ õagu ãhrimi. Eropigũ ãgure mũ serẽro dopa ta dohpague mũa mera majarã sãre itamugũcumĩ,” arãmi yũre anyu. Eropirã gũibirãta

mua. <sup>25</sup> Anyu yure ĩgu arĩdiro dopa ta eropa waroca. Goãmure umupeoa yũhũ. Eropigũ ĩgu werediro dopa ta “Diaye ta āhraa,” arĩ pepia yũhũ. <sup>26</sup> Marire nũgurogue miruñe weãbeo cóãroca, arĩ weremi Pablo erãre.

<sup>27</sup> Yuju ñami pe semana pũhrũ wuaria Adria waĩcũriya miruñe guare burigã weãbũ. Irisubure ñami deco dohodiru majarã ɯmapũ “Tũrogue āhraa mari,” arĩ pepima erã. <sup>28</sup> Erã eropa arĩ pepirã yurada nũcũdiru comerure dihri, duhmiumediju queoñama. Treinta y seis metro gohra ɯhcãbũ. Mero ta waha, queoma daja. Irisubure veintisiete metro gohra ɯhcãbũ. <sup>29</sup> Eropirã ɯtãre mehtuhajari arĩrã dohodiru auturogue wapicũriye comeyerire dirimiu dijuma erã diague dabero wacũ gamerã. Eropirã “Yojarõ boyoporo,” arĩrã, burigã serẽma erã. <sup>30</sup> Dohodiru majarã ɯmapũ erã dihta duhririma. Erã miridirugãre dohodiru majarure diague taradijupo dohodiru ĩguiru come dipure erã dijudio dopa ta iirima erã miridirugã marire ĩhari arĩrã. <sup>31</sup> Erã eropa duhridiaquerecũ Pablo erã eropa iicũ masigũ surara opũre, ĩgu surara mera weremi:

—Oã, ɯma miridirugã mera erã wacũ mua árĩpehrerã sĩrirãca, arĩmi Pablo.

<sup>32</sup> ĩgu eroparĩcũ peerã surarapũ miridirugãre diriridarire wirita, irirure cóãcãma.

<sup>33</sup> Boyoboro coregã Pablo erãre badoremi.

—Pe semana gohra mua ne babeaa. <sup>34</sup> Eropirã dohpaguere barã arique. Eropigũ muare badorea. Mua ojocaridiarã baque. Árĩpehrerã mua tarirãca, arĩmi Pablo erãre.

<sup>35</sup> ĩgu eropa arĩra pũhrũ Pablo panre aĩ, árĩpehrerã erã pohro Goãmure “Õhaa,” arĩ, duhpeo, irire bami ĩgu. <sup>36</sup> ĩgu eropa bacũ ĩha erã sĩporã turarã waha, árĩpehrerã erã sã bama. <sup>37</sup> Gũa árĩpehrerã doscientos setenta y seis masa dohodirugue árĩbũ gũa. <sup>38</sup> Eropirã erã árĩpehrerã yapia waha “Iru dohodiru nũcũ árĩca,” arĩ, baja trigo barire diague cóãma daja.

### *Dohodiru imiporogue mehbejayoro*

<sup>39</sup> Boyocũ dohodiru majarã ɯma nũgurore ĩarã, “Õpa waĩcũri nũguro āhraa i nũguro,” arĩ ĩha masibirima. Eropirã erã dipatũgure imiporo árĩcũ ĩarã, “Mari iritũgugue warã, erogue mehmejaboca imiporogue,” arĩma erã. <sup>40</sup> Eropa arĩrã, come dipure diriridarire wirita medijucãma erã. Erã eropa iira pũhrũ dohodiru ĩguiru maja suhriro aĩ wahgũ nuguma diaye miruñe weãbeocũ gamerã. <sup>41</sup> Eropiro dohodirupũ ĩguirupũ imiporogue sĩmaja merejamasibiribũ. Eropiro auturore burigã pãgũri pamehtucũ iriru auturo wahria wabũ.

<sup>42</sup> Eropa wacũ ĩarã õpa arĩma surara.

—Iru miricũ mari peresu iinirã tũrogue baatuhaja duhricãrãcoma. Eropirã erãre wejẽpehocãrã, arĩrima surara.

<sup>43</sup> Eropigũ surara opũpũ Pablõre wejẽdiabigũ árĩpehrerã peresu arĩrãre wejẽdorebirimi. Eropigũ árĩpehrerã baamasirãre surara opũ mata tũrogue baatujadoremi. <sup>44</sup> Eropirã gajirã dohodiru maja wahria mijiri mera yuuriñaja, iri mijiri weca peya baa majama. Gũa eropa iirã gũa árĩpehrerã tũrogue tuhajabũ õaro.

## 28

### *Pablo Malta waĩcũri nũguro árĩpũ*

<sup>1</sup> Eropii iri nũgurogue gũa árĩpehrerã majajanugajara pũhrũ iri nũguro waĩre masibũ. Malta waĩcũri nũguro árĩbũ. <sup>2</sup> Iri nũguro majarã masa õarã arĩrã, õaro iima guare. Eropirã deco gũa weera pũhrũ yusatariabũ guare. Eropirã ero majarãpũ peame dihutuhaja, guare sõhmadorema. <sup>3</sup> Pablo peare aĩgãri aĩtĩami. ĩgu aĩtĩara pũhrũ iri pea pohecague arĩdigũ aña coñorpore wirigũ, Pablo mojoto curĩtuhajami yahawearo mariro. <sup>4</sup> ĩgu curĩtuhajacũ ĩarã, iri nũguro majarã erã basi wereniguima:



—Ihĩ masa wejēdigu árĩbocumi. Eropigo mari turago dipuwaja moago umaro majago igure dipuwaja moago, ojocaridorebeamo. Igũ wuariyague mirigu tarituhajadigu árĩrami. Dohpaguere igopu igure ojocaridorebeamo, arĩrima erã basi.

<sup>5</sup> Eropigu Pablo añare peamegue wejēsiri mehpeomi. Igũ aña pũribirimi. <sup>6</sup> “Bijiroca,” arĩrã, corerima erã. Ne bijibiribu igure. “Igũ sĩria wagucumi,” arĩrã erã iha corerima. Igure pũribirimi. Yoari boje ero bijibiricũ iarã, igure pũribiricũ iarã, gajiropa pepirima erã. “Ihĩ goãmarã mera majagu árĩbocumi,” arĩrima erã.

<sup>7</sup> Erã baa tuhajadiro pohro Publio waĩcugu ya poeri árĩbu. Igũ iri nũguero majagu opu árĩmi. Eropirã igũ guare òaro iicũ uhrenũ gohra igũ ya wihigue árĩbu gũa. <sup>8</sup> Publio pagũ yojorocũ, nimacuricũgu árĩmi. Eropigu igũ camague oyami. Eropigu Pablo dorecũgu ya taribugue ñaja, Goãmure serẽ, igũ mojotorire igũ weca duhpeo, òagu wacũ iimi igure. <sup>9</sup> Igũ òagu wacũ iarã árĩpehrerã gajirã iri nũguero majarã dorecurãre Pablo pohrogue aĩgãrima. Erã eropa aĩ eracũ iagu Pablo erãre òarã wacũ iimi erã sãre. <sup>10</sup> Pũhrũ erã baja sãre waja mariro oma. Gũa waboro coregã árĩpehreri gũa gamerire, gũa warã gũa baburire dohodirugue durisãbasama erã.

### *Pablo Romague ejarũ*

<sup>11</sup> Urerã abe iri nũgurogue gũa árĩra pũhrũ dohodiru mera wabu gũa daja. Iriru dohodiru iquiru perã goãmarã Cástro, Pólux waĩcurã erã wéanirã niguima. Alejandriague aridiru árĩbu iriru. Puhirópẽ iri nũgurogue iriru dohodiru payabu. <sup>12</sup> Waha, Siracusa waĩcuri macague ejarã, uhrenũ gohra iri macare árĩbu gũa. <sup>13</sup> Iri macare wiri waha, Regio waĩcuri macague ejabũ gũa. Gajinũ surgue miruñe ahri guare weãbeobũ. Penũ pũhrũ Puteoli waĩcuri macague ejabũ. <sup>14</sup> Eroque Jesu yarã bajamerãgã guare bocatĩrima.

—Yuju semana gohra gũa mera dujaque, arĩma erã guare.

Erã eroparĩcũ peerã yuju semana gohra erã mera dujanibu. Pũhrũ mague majaa, Romague ejabũ gũa pare. <sup>15</sup> Ero majarã Jesu yarãpũ gũa ejarare peerã, Apio waĩcurogue doberi duarogue guare bocatĩrima. Gajirã Jesu yarã “Uhre wihi” waĩcurogue guare bocatĩrima erã sã. Erã eropa bocatĩricũ iagu Pablo mucubiriri mera Goãmure “Õhaa,” arĩ, òaro sñaja wami. <sup>16</sup> Romague gũa ejara pũhrũ erã peresu erã iinirãre ero majagu peresu corerã opure weremi. Eropirã Pablopure yujugũ ta apima ero majarã oparã. Eropigu igure yujugũ surara coremi.

### *Pablo Romague buhepu*

<sup>17</sup> Uhrenũ pũhrũ Pablo judio masa buherã mera gamenerebu, erãre sihumi. Erã gamenerera pũhrũ igũ erãre weremi:

—Acawererã, mari acawererãre, mari ñecu sumarã erã iimurirare, marire erã buhera sãre tarinũgabirimurabu yũhũ. Yu eropa tarinũgabiriquerecũ ta Jerusalén yure ñehama Asia majarã judio masa. Erã eropa iira pũhrũ Roma majarãre yure peresu iidorema erã. <sup>18</sup> Erã eropa iicũ Roma majarã yure serẽpi, yũhũ ñero iibigu yũ arĩcũ yure “Dipuwajacũgu ahrimi,” arĩmasibirama. “¿Ñehe dipuwaja dipuwaja wejēbocuri mari igure?” arãma erã yure. Eropirã yure serẽpirãpũ yure wiudiarãma. <sup>19</sup> Judio masapũ yure wiudorebirãma. Eropigu yũ acawererãre judio masare weresãdiabiriqueregu ta, “Árĩpehrerã weca opure yũ iirare diaye werediaca yũhũ,” arĩ serẽabu. Judio masa yure erã wiudorebiricũ iagu “Roma majagu opure weregu waro gahmea yure,” arãbu. <sup>20</sup> Eropii mũare ire werediagu sihuabu. Cristo marire taubu judio masa erã coredigu igũ yare yũ wereri waja yũhũ peresugue ahraa. Eropigu irire mũare werebu sihuabu, arĩmi Pablo judio masa oparãre.

<sup>21</sup> Igũ eroparĩcũ peerã erãpũ igure werema.



—Judio masa mure quere wereripũre guare ne obeobirama. Eropirã erogue arinirã sã gua acawererã guare mure eropa warare werebirimurama. Erã “Ïgu ñero iigu ãhrimi,” arĩ mure werebirimurama. <sup>22</sup> Mure ya curure árĩpehrerogue masa erã ñero wereniguicũ gua masia. Eropa masirã mure buherire mure werecũ peediaa gua, arĩma erã ïgure.

<sup>23</sup> Eropa arĩtuhaja, “Gajinũ árĩrã,” arĩma erã. Gajinũgue Pablo mera gameneremũhtanirã tauro masa bajarã ïgu árĩroguere erama. Ñamiñarigã Goãmũ ïgu opu árĩrare õari buherire ïgu buhenũga, pũ ñamigue buhe duhumi. Goãmũ dorerire Moisegue ïgu apirare, Goãmũ ya weremũhtanirã erã gojarare buhemi. Eropa buhegu, erãre Jesure masicũ iidiagu iirimi Pablo. <sup>24</sup> Yujurãyeri ïgu buherire gamema. Eropirã gajirãpũ peediabirima. <sup>25</sup> Eropirã erã basi pe curu game dũca wari wama. Erã wiriaboro core Pablo Isaia ïgu wereniguirare weremi. Õpa arĩmi erãre:

—Isaia Goãmũ yare weremũhtadigu ïgu werera diaye ta ãhraa. Mari ñecu sumarãre weregu árĩgu Espĩritu Santo Isaiare õpa arĩ were gojadoreñumi:

<sup>26-27</sup> Ire oãre weregu waque: “Dipu burirã ãhraa mure. Eropirã yahare peediabeaa mure. Gamiri toyobirã dopa ta peediabeaa mure. Eropirã yahare peequererã peesome mure. Mure eropa árĩbirã õaro peeboaya mure. Eropirã õaripure gohrotoboaya mure. Eropigu mure peame wabonirãre tauboaya yũhũ,” arĩmi Goãmũ, arĩ gojañumi Isaia, arĩmi Pablo erãre.

<sup>28</sup> Ïgu eropa arĩra pũhrũ Pablo werenemomi:

—Ire masique mure. Goãmũ buherire masare ïgu õaro taurire judio masa árĩbirãre buherãca gua. Erãpũ peerãcoma, arĩmi Pablo judio masare.

<sup>29</sup> Ïgu eroparĩcũ peerã judio masa irire erã basi burigã game dũyaso wiriama.

<sup>30</sup> Pe bojori gohra Pablo ïgu eropa wajayeniguirĩ wihigue árĩpũ. Ero árĩgu, árĩpehrerã ïgu ya wihigue warãre mucubiriri mera bocatĩrimuripũ ïgu. <sup>31</sup> Eropigu ïgu güiro mariro Goãmũ ïgu opu árĩrare, mari Opu Jesucristo ya sãre buhemuripũ. Ïgu eropa buhequerecũ ta ne gajirã ïgure “Buhebircãque,” arĩbiriñorã.

## Romanos

### *Pablo Roma majaräre Jesu yaräre gojabeoñumi*

<sup>1</sup> Yuhũ Pablo mũare Roma majaräre gojabeoa. Yuhũ Jesucristo pohro majagu ähraa. Eropigu õari buherire buhedoregu apimi igũ yũre.

<sup>2</sup> Iri õari buherire iribojegue Goãmũ “Õpa masare õaro iigũra,” arĩ wereyuñumi igũ yare weremũhtanirã merague. Erã irire gojañuma. <sup>3</sup> Iri buheri ta igũ magũre wereri ähraa. Igũ Jesucristo masa dehyoagu árĩgu Davi mũru pãrami árĩturiagu árĩdigũ árĩmi. <sup>4</sup> Igũ ta Goãmũ magũ igũ árĩrĩre ìhmudigu árĩmi Goãmũ igũ Espĩritu Santo mera. Eropigu igũ Jesu sĩrira pũhrũ Goãmũ igũ turari mera igũre masa mũriacũ iidigu árĩmi. Eropigu Jesucristo diaye ta Goãmũ magũ igũ árĩrĩre ìhmudigu árĩmi masare. Igũ Goãmũ magũ ta mari Opũ Jesucristo ährimi. <sup>5</sup> Igũ ta gũare mojomoro ñagu gũau magũre wereri ähraa. Igũ Jesucristo masa dehyoagu árĩre igũ yare buhedoregu obeomi árĩpehrero majaräre igũ yare pee masi, Jesucristore erã umupeocũ iimoräre. <sup>6</sup> Eropirã mũa sã Jesucristo yarã árĩmorã igũ beyenirã ähraa.

<sup>7</sup> Mũare Goãmũ igũ mahiräre, igũ yarã árĩmoräre iidi árĩmi igũ mũare. Eropigu mũare Romague árĩrãre ipũre gojabeoa. Eropigu Goãmũ mari Pagũ mari Opũ Jesucristo mera mũare õadore. Igũ itamuri mera õaro árĩque mũa.

### *Pablo Romaguere ñagu wadiarica, arĩ gojañumi*

<sup>8</sup> Ire weremũhtagũra mũare. Árĩpehrerogũre Jesucristore mũa umupeora querere werema. Erã eropa arĩ werecũ peerã “Õhaa,” arĩ serẽa yuhũ Goãmũre. Jesucristo igũ itamuro mera eropa arĩ serẽbasaa. <sup>9</sup> Goãmũre serẽgu mũa ya árĩburire árĩpehrerinũri serẽbasaniguicã. Mũa ya árĩburire eropa yũ serẽbasaniguicũ Goãmũ masimi. Igũ dorerire turaro mohmea igũ magũ ya buherire buhegu. <sup>10</sup> Eropa serẽgu Goẽrã judio masa árĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yuhũ. Eropa bajasuburi wadiaqueregu ta wamasibirimũrabũ yuhũ. <sup>11</sup> Goãmũ yare mũare buhediacã Jesure mũa umupeonemoburire. Eropigu mũare bũrigã ñadiaca yuhũ. <sup>12</sup> Jesucristore umupeorã ähraa mari. Eropigu mũare ñadiaca Jesucristore mari umupeori mera pepũri majarã mari game mucubiricũ iiborore. <sup>13</sup> Yũ acawererã, ire mũa masicũ gahmea. Gajipũgue õari buherire yũ buhera pũhrũ gajirã mũa acawererã judio masa árĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yuhũ. Eropa bajasuburi wadiaqueregu ta wamasibirimũrabũ yuhũ. <sup>14</sup> Árĩpehrerãre õari buherire buhero gahmea yũre. Wũari maca majaräre, noho gamero árĩrãre, masirãre, masibirã sãre buhebu árĩgu iiaa yuhũ. <sup>15</sup> Eropa arĩgu, árĩgu mũa sãre Roma majaräre õari buherire bũrigã buhediaa.

### *Õari buherire masa peerã Jesure umupeonũgama, arĩ gojañumi Pablo*

<sup>16</sup> Õari buherire peerã masa Jesure umupeonũgama. Eropigu árĩpehrerãre Jesure umupeorãre Goãmũ igũ turari mera erã peamegue wabonirãre tuami. Igũre umupeorã õaro waborore masigu iri buherire õari buherire buhegu gũhyasiũro taribeaa. Iri buherire judio masapũre buhemũhtanirã árĩma. Pũhrũ judio masa árĩbirã sãre gũa buheabũ. <sup>17</sup> Iri buheri õpa werea: Jesucristore umupeiorãre “Ñeri marirã õarã ährima,” arĩ ìhami Goãmũ. Jesucristore umupeorã dihtare eropa arĩ ìhami Goãmũ. Igũ eropa arĩ ñarire iribojegue erã arĩ gojadiro dopa ta arãa: “ ‘Õarã

ãhrima,' arĩ ĩgu ĩarã Goãmure 'Diaye ta iigu ãhrimi,' arĩ umupeorã ãhrima. Eropa umupeorã árĩpehrerĩnerĩ Goãmũ mera árĩrãcoma," arĩ gojañuma.

*Masa erã ñero iiri mera dipuwajacurã ãhrima, arĩ were gojañumi Pablo*

18-19 ĩgu árĩricurire masare õaro masicũ iipũ Goãmũ. Eropirã ĩgure ĩgu árĩrire masicũ diasabeaa masare. ĩgu árĩrire masare masicũ iiquerecũ masapũ erã ñerire iirã Goãmure masidiabeama. Erã iri ñeri iiri mera gajirãre Goãmũ yare peebiricũ iima erãpũ. Eropigu Goãmũ umarogue árĩgu masa árĩpehrerã erã ĩgure tarinũgarire, eerã ñero iiri sãre ĩagu eerã eropa iiri dipuwaja guami. Eropa ĩgu guarire masicũ iimi erãre. <sup>20</sup> Goãmũ umaro majagu ĩgu árĩrire turagu ĩgu árĩrire mari ĩabiriquerecũ ta, ĩgu basi ĩgu árĩrire masicũ iimi ĩgu marire. I yebare ĩgu iira pũhrũ árĩpehrerire ĩgu ĩhacũnugurare ĩarã, "Goãmũ ĩgu iira ta ãhraa. ĩgu turagu ta ãhrimi," arĩ guñama masa. Eropirã "Goãmũ ãhrimi," arĩ masima masa árĩpehrerã. Eropirã masa "Goãmũ ãhrimi," arĩ masiquererã eropa ñerire iiniguicãrã, dipuwajacũma. "Mũre masibirabũ. Eropigu ñerire iiabũ," masa arĩmasisome Goãmure. <sup>21</sup> Goãmũ ĩgu árĩricurire masiquererã ta erã ĩgure umupeobeama. "Mũhũ Goãmũ, turagu ta ãhraa," arĩbeama. Eropirã ĩgu erãre õaro iiquerecũ ta "Õhaa," arĩbeama ĩgure. Eropirã pee masibirã árĩrã, ñeri dihtare pepima erã. <sup>22</sup> "Pee masirã ãhraa," arĩquererã ta pee masibirã wahama erã. <sup>23</sup> Eropa warã Goãmure eropa árĩniguigũre õagũre umupeobeama. Eropa umupeobirã "Goãmũ ãhrimi," erã arĩrãpũre erã wéanirãpũre umupeonũgama erã. Eropirã masare, mirimagũ porãre, pĩruare, waimũrãre wéanugu umupeoma erã, "Mari Goãmũ ãhrimi," arĩrã.

<sup>24</sup> Erã eropiicũ ĩagu "Erã gamero dopa ta ii curaporo," arĩgu Goãmũ erãre cohãmi. ĩgu eropa cóara pũhrũ, erã ñeri dihtare uribejarã erã basi ñeri dihtare iiniguicãma. <sup>25</sup> Eropirã Goãmũ yare peebiri, gũyaripũre õaro peema. Goãmũ yapũre gũyari iro dopa ta wacũ iima erã. "Diaye ta Goãmure árĩpehrerãre iidigũre umupeoro gahmea," mari arĩquerecũ erãpũ ĩgure umupeobeama. Eropa Goãmũ gohrare umupeobirã ĩgu iirãpũre umupeoma erã.

<sup>26</sup> Erã eropiiniguicãcũ ĩagu "Erã gamero ñerire ii curaporo," arĩgu Goãmũ cohãmi erãre. Eropirã erã mera majarã nome marapũcurã nome iro dopa arĩbeama. Eropirã erã nome seyaro ñero iima erã basi. <sup>27</sup> Erã iro dopa ta árĩrã umã sã nomere gamebirã erã basi ta erã dũpũre uribejarã ãhrima. Eropirã erã basi ta erã ñero iira dipuwaja erã dũpũre ñero goroweoma.

<sup>28</sup> Eropa Goãmure masidiabirã ĩgure gamebirira dipuwaja Goãmũ "Erã gamero ii curaporo," arĩgu erãre cohãmi. ĩgu eropa cóacũ erãpũ ñerire guñanigui, ñerire uribejarire iiniguicãma. <sup>29</sup> Eropirã erã burigã ñero iiniguima. Nome mera ñero iiniguirã, erã ñerire uribejaniguirã, gajirã yare gametarirã, gajirãre ñero iiniguirã, gajirã gajinore opacũ ĩhaturirã, masare wejẽrã, game dũyasarã, gũyaricũrã, masare ĩhaturirã, ñeri quere iirã ãhrima erã. <sup>30</sup> Gajirã erã iibiriquerecũ ta ñero arĩ werewũarã, Goãmure ĩhaturirã, gajirãre papũro yũhrirã, "Gũa tamera gajirãre tarinũgarã õarã ãhraa," arĩ pepirã, gajirãre eropa arĩ weremaacãrã, gajĩ ñerire iinũgarã, erã pagũ sumarãre tarinũgarã ãhrima. <sup>31</sup> Pee masibirã ãhrima. Erã werediro dopa ta iibirã, masare ne umupeobirã, erãre ñero iirare ne cãdijibirã, ne gajirãremojomoro ĩabirã ãhrima. <sup>32</sup> Eropa árĩrãre Goãmũ erãre dipuwaja moa peamegue cóagũcumĩ ĩgu erãre. Eropa ĩgu cóaburire masiquererã erã ñerire iiniguicãma. Eropirã gajirã erãre ĩhacũcũ, erã iiro dopa ta ñero iicũ ĩarã "Gũa iiro dopa ta iima," arĩ mucubirima.

## 2

*Masare erã ñero iira dipuwaja moadoregũ irire diaye ta iigũcumi Goãmũ, arĩ were gojañumi Pablo*

<sup>1</sup> Erã eropa ñerire iicũ ñarã gajirã õpa arĩbocoma: “Erã ñetariarã àhrima. Goãmũ erãre dipuwaja moaporo,” arĩbocoma. Eropa arĩrãre õpa arĩ werediaca. Mũa sã erã iiro dopa ta iiaa. Eropirã “Erã ñetariarã àhrima,” gajirãre arĩ werewuabiricãro gahmea mũare. Eropa arĩ wererã mũa basi ta erã ñerire iiro dopa ta iirã dipuwajacurãca. Iri ñerire masiquererã iirã mũa ñero dipuwajacurãca. <sup>2</sup> “Goãmũ diaye ta dipuwaja moagũ àhrimi,” arĩ masia mari. Árĩpehrerãre ñerire iirãre dipuwaja moagũcumi. <sup>3</sup> Eropigũ mũa ñero iira dipuwaja árĩcũ mũa sãre dipuwaja moagũcumi. “Gajirã dipuwajacurãcoma,” arĩ werewuarã, “Gũapũre dipuwaja moasome,” arĩ pepiboca mũa. Árĩbeaa. Mũa sãre mũa ñero iira pũhrũ dipuwaja moagũcumi. <sup>4</sup> Goãmũ mũare mojomoro ñagũ mata dipuwaja moabeami. Eropirã “Goãmũ yũ mera guabeami,” arĩ pepiboca mũa ñerire iira pũhrũ. Árĩbeaa. Goãmũ mũare mojomoro ñagũ mata mũa ñero iira pũhrũre dipuwaja moabeami. Mũa ñero iirire bũjawerecũ ñadiagũ, ñgũre mũa yũhricũ gamegũ mata dipuwaja moabeami. <sup>5</sup> Eropa mata dipuwaja moabiriqueregũ. mũa Goãmũre peebiriniguicãcũ, mũa ñero iirire bũjawerebiricũ ñagũ dipuwaja moagũcumi. Mũa eropa ñero iiniguirãre ñgũ dipuwaja moarinũ árĩcũ bũrigã dipuwaja moagũcumi mũare Goãmũ. Irinũre Goãmũ masare dipuwaja moacũ árĩpehrerã ñarã “Diaye ta erã ya dipuwaja àhraa,” arĩ masirãcoma. <sup>6</sup> Eropigũ árĩpehrerã nũcũ erã ñero iira dipuwajare dipuwaja moagũcumi Goãmũ. Eropigũ erã õarire iirã sãre õarire erãre ogũcumi. <sup>7</sup> Yujurãyeri õarire iima. Erã õarã árĩdiarã, Goãmũ ñgũ gamero dopa iidiarã mũmũri nũcũ Goãmũ mera árĩdiarã àhrima. Erã tamerare mũmũri nũcũ ñgũ mera erã árĩborore iigũcumi Goãmũ. <sup>8</sup> Gajirãpũ erã iro dopa árĩbeama. Erã erã gamero iirã árĩcãma. Diaye majare gamebirã ñerire iiniguirã àhrima. Goãmũ erã mera turaro guagũcumi. <sup>9</sup> Árĩpehrerã ñerire iirã ñero tarirãcoma. Judio masare eropa wamũhtaroca. Eropirã judio masa árĩbirã sãre eropa ta waroca. <sup>10</sup> Árĩpehrerã õarire iirãpũre “Õaro mũa iiaa,” arĩ ñagũcumi Goãmũ. Eropirã erãpũ Goãmũ mera õaro mera árĩrãcoma. Judio masare eropa ta wamũhtaroca. Eropiro judio masa árĩbirã sãre eropa ta waroca. <sup>11</sup> Goãmũ mari iirare ñagũ queoro beyemi árĩpehrerãre. Judio masare, judio masa árĩbirãre Goãmũ yujuropa ñhami marire. <sup>12</sup> Gajirã Moise dorerire erã mooquererã erã ñerire iicũ erãre dipuwaja moagũcumi Goãmũ. Iri doreri oparãpũ ñerire erã iicũ erã dorerire erã tarinũgari waja dipuwaja moagũcumi Goãmũ erã sãre. <sup>13</sup> Moise dorerire peequererã ta yũhribirãre “Õarã àhrima,” arĩbeami Goãmũ. ñgũ dorerire iirãpũre “Õarã àhrima,” arĩ ñhami Goãmũ. <sup>14</sup> Judio masa árĩbirã Moise dorerire mooquererã erã pepiro mera õarire iirã Goãmũ dorerire iirã iima. Eropirã Moise dorerire gojarapũre mooquererã erã, erã pepirigue iri dorerire opama. <sup>15</sup> Eropirã Goãmũ dorerire erã pepirigue diaye opama. Eropa oparã ñerire ii mata erã ñero iirare masima erã basi. Eropigũ ñerire iidigũ, “¿Duhpigũ ñerire iayuri yũhũ?” arĩ pepimi ñgũ. Eropigũ õari sãre ñgũ iirare masimi ñgũ. <sup>16</sup> Eropigũ Goãmũ Jesucristore ñgũ obeocũ masa erã iirare ñagũcumi. Masa erã iiricũrere gajirãre werebirirare erã duhrare Jesucristo masipehogũ ñgũ erã iiricũrere ñagũcumi. Eropa ta ñha beyegũcumi, arĩ buhea yũhũ ñgũ ya õari buherire buhegũ.

*Goãmũ Moisere ñgũ apira dorerire were gojañumi Pablo*

<sup>17</sup> Mũa pũ judio masa árĩrã, Goãmũ Moisere ñgũ apira dorerire umupeorã árĩrã, “Goãmũ yarã àhraa gũa,” arĩ pepiraa mũa. <sup>18</sup> Eropirã Goãmũ dorerire masirã árĩrã, ñgũ gamerire masia mũa. Eropa masirã árĩrã “Õarire gũa iiborore beyemasia,”

arĩ pepiraa mua. <sup>19</sup> Eropa arĩ pepirã õpa arĩ pepinemoa mua judio masa: “Gajirã ne masibirãre õaro masicũ iiaa gua. Erãre gua buhebiricũ ne Goãmure masibiriboñuma. Eropirã ñerire ne duhubiriboñuma,” arĩ pepiraa mua. <sup>20</sup> Eropirã “Pee masibirãre õarire buhea gua judio masa. Majirãgã sãre buherã ãhraa gua,” arĩ pepiraa mua. Eropirã “Goãmũ dorerire oparã diaye árĩrere masipehoa gua,” arĩ pepiraa mua. <sup>21</sup> ¿Mua eropa arĩ pepirã árĩquererã ta duhpirã muaꝑũ mua buhediro dopa ta iibeari? ¿Gajirãre yajadorebiriquererã duhpirã muaꝑũ yajari? <sup>22</sup> ¿Gajigũ marapo mera ñero iidorebiriquererã duhpirã muaꝑũ gajigũ marapo mera ñero iiri? “Goãmũ ãhrimi,” erã arĩ wéanirãre umupeorire doorã árĩquererã ¿duhpirã Goãmũ gohrapũre õaro umupeobeari muaꝑũ? <sup>23</sup> “Goãmũ Moiserẽ ãgũ apira dorerire opaa guaꝑũ,” arĩrã árĩquererã ta ãgũ dorerire tarinũgaa mua. Eropa tarinũgarã Goãmure erã umupeobiricũ iirã iica mua gajirãre. <sup>24</sup> Eropa ta werea Goãmũ yare erã gojarapũgue: “Judio masa árĩbirãpũre ñero Goãmure wereniguicũ iiaa mua judio masapũ,” arĩ gojañuma Goãmũ yare erã gojarapũgue.

<sup>25</sup> Mua judio masa Goãmũ dorerire iiniguirã árĩrã gasiro merogã wiri aĩsũnirã circuncisión iinirã árĩcũ õapũrica. ãgũ dorerire iibiricũ mua judio masa árĩricũri duhþiburi árĩbeaa. <sup>26</sup> Eropiro judio masa árĩbirã merogã gasirogãre wiri aĩsũbirinirã erã árĩquerecũ ta Goãmũ dorerire erã iirã árĩcũ ãagũ, “Yaharã masa ta ãhrima,” arĩ ãabocumi Goãmũ erãre. Judio masapũre ãgũ eropa arĩ ãadiro dopa ta judio masa árĩbirã sãre eropa ta arĩ ãabocumi. <sup>27</sup> Bajarã judio masa Goãmũ yare gojarapũre Moise dorerire opaquererã irire iibeamã erã. Eropirã gajirã judio masa árĩbirãpũ Moise dorerire opabiriquererã gasiro merogã wiri aĩsũbirinirã árĩquerera Goãmũ dorero dopa ta iima. Eropa iirã árĩrã judio masare erã ñero iirire masicũ iirã iima. <sup>28</sup> “Gua judio masa Goãmũ yarã ãhraa,” arĩ pepiraa mua. Eropigũ Goãmũ yagũ gohra árĩgũre weregũra muaere. ãgũ duþupũre merogã gasirogãre wiri aĩsũdigũ árĩqueregũ ta Goãmure umupeobigũ árĩgũ diaye ta Goãmũ yagũ árĩbeami. Judio masũ gohra árĩbeami. <sup>29</sup> Espĩritu Santore opagupũ, ãgũre yuhrigũ ãgũ ta judio masũ gohra Goãmũ yagũ gohra ãhrimi. Eropirã Goãmũ yarã gasiro merogã wiri aĩsũnirã dihta árĩbeama. Erã Espĩritu Santo mera erã pepirigue õari mera gohrotorã ãhrima Goãmũ yarã. Eropa árĩrãre “Õarã ãhrima,” arĩ ãhami Goãmũ. Masa erãre eropa arĩ ãabiriquererã ta eropa arĩ ãhami Goãmũpũ erãre.

### 3

<sup>1</sup> Yũ eropa arĩquerecũ judio masa erã árĩricũri, gasiro merogã wiri aĩsũnirã erã árĩri õapũricãa. <sup>2</sup> Judio masa erã árĩri yuju diaye gohra árĩbeaa. Goãmũ ãgũ wereniguirã judio masare were apimãhtatuhañumi. Erã ãgũ yare erã gojarapũre opamãhtañuma. Eropirã judio masa erã árĩcũ õapũricãa erãre. <sup>3</sup> Eropirã bajarã judio masa Goãmure erã peebiriquererã ta ãgũ werera diaye ta ãhraa. Eropigũ ãgũ arĩ werediro dopa ta iigũcumi ãgũ. <sup>4</sup> Eropa ta ãhraa. Árĩpehrerã masa erã gũyaricũrã erã árĩquerecũ ta Goãmũpũ ne gũyabeami. ãgũ yare gojarapũgue eropa ta arĩ gojara ãhraa: Diaye ta eropa ta arĩ wereniguigũ ãhraa mũhũ Goãmũ. Eropirã masa mũre ne weresãmasibeama, arĩ gojañuma iribojeguerẽ.

<sup>5</sup> Masa erã pepiri mera õpa arĩ pepimaacãbocoma: “Mari ñeri iiri árĩcũ, Goãmũ ãgũ õari iiripũ deserea. Eropiro mari ñeri iiri mera Goãmũ ãgũ õaro iiri deserecũ ãgũ marire mari ñeri iiri dipuwaja moagũ queoro iibeamã,” arĩ pepimaacãbocoma. <sup>6</sup> Eropa árĩbeaa. Mari ñeri iirapũ õari árĩcũ Goãmũ mari ñeri iira waja dipuwaja moamasibiriboañumi.

<sup>7</sup> Masapũ gũyaricũrã ãhrima. Goãmũpũ ne gũyari marigũ ãhrimi. Gũyari marigũ ãgũ árĩcũ õaro masia mari. Eropirã masa yujurãyeri õpa arĩ pepirima: “Gua gũyari mera Goãmũ ãgũ diaye árĩripũ deserea. Eropiro gua gũyaripũ õha ãhraa. ¿Eropiro



gua gɥari ðacũ duhpigu gua gɥari waja dipuwaja moabocuri guare Goãmũ?” arĩ pepimaacãma yujurãyeri erã basi. <sup>8</sup> Eropirã ðpa arĩ gɥama yujurãyeri guare: “Mari ñerire iiri mera Goãmũ ïgu ðagũ árĩripũ deserea. Eropirã ñerire iiro gahmea,” arĩma. “Pablo sã eropa ta arĩ buhemi,” arĩ gɥya weresãma erã guare. Erã eropa arĩ gɥari dipuwaja Goãmũ erãre dipuwaja moagucumi. Eropa ta iiporo erãre.

*Árĩpehrerã ñeri iira dipuwajacurã áhrra mari, arĩ gojañumi Pablo*

<sup>9</sup> ¿Eropirã dohpa pepiri mũa? ¿Mari judio masa gajirã tauro ðarã árĩcuri? Árĩbeaa mari. Judio masa, judio masa árĩbirã sã árĩpehrerã dipuwajacurã áhrra mari. Eropa ta áhrra yũ árĩpehrerãre arĩ buhediro dopa ta. <sup>10</sup> Eropa ta arĩ gojara áhrra Goãmũ yare erã gojarapũgue sã. Òpa arĩ gojañuma:

Ne yujugũ masũ ðagũ marimi. <sup>11</sup> Mari árĩpehrerã masa peediabirã dihta áhrra. Eropirã árĩpehrerã mari masa Goãmũre ne guñabeaa. <sup>12</sup> Eropirã mari Goãmũ yare gamebirã árĩpehrerã ñerire iirã áhrra. Ne yujugũ ðarire iigu marimi. <sup>13</sup> Mari wereniguiri, ñeri dihta wiria mari disirore. Burigã gɥaricua. Eropa wereniguirã aña gũcũrire ïgu pũriri wiuro dopa ta pũriro mera wereniguiwiua mari. <sup>14</sup> Eropirã mari gajirãre ñero wereniguirã, papũro wereniguirã áhrra. <sup>15</sup> Eropirã mata guarã masare mata wejẽa mari. <sup>16</sup> Eropirã noho mari waro, masare ñero ii, ñero taricũ iiaa mari gajirãre. <sup>17</sup> Eropirã gajirã masa mera ðaro árĩbeaa mari. <sup>18</sup> Eropirã Goãmũre ne umupeobeaa, arĩ gojamuriñuma iribojeguerẽ mari masare.

<sup>19-20</sup> Eropirã ðpa masia mari: “Mari masa ñerã áhrra,” eropa arĩ gojarã judio masa sãre Moise doreri iirã sãre arĩ wereniguimuriñuma. Eropirã árĩpehrerã mari judio masa sã “Gua tamera ñeri dipuwaja mara guare,” arĩmasibeaa. Goãmũ doreripũre mari masa ne iibeaa. Eropirã iri dorerire iibirã Goãmũ mera ðamasibeaa mari. ïgu dipuwaja moamorã áhrra. Eropiro mari ñerã árĩrire ïgu doreripũ masicũ iiaa marire. Iri dorerire masirã “Gua iiricũri ñeri áhrra,” arĩ masia.

*Jesucristore ðaro umupeocũ Goãmũ marire “Óarã áhrrima,” arĩ ïhami, arĩ gojañumi Pablo*

<sup>21</sup> Dohpaguerẽ Jesucristore umupeorãre “Dipuwaja moorã, ðarã áhrrima,” arĩ ïhami Goãmũ pare. ïgu eropa arĩ ïaborore Goãmũ yare weremũhtanirã Moise sã weremũhtañuma. Eropigu masare erã ñero iira wajare ïgu taurare weremi marire Goãmũ. Moise dorerire mari iira mera mari ñerire taubeami. Òpa áhrra: <sup>22</sup> Árĩpehrerã Jesucristore umupeorãre, ïgu yare peerãre, “Óarã áhrrima,” arĩ ïhami Goãmũ. Erã ñero iira dipuwajare taumi. Eropa iigu árĩpehrerãre yujuropa ðaro iimi. <sup>23</sup> Mari masa árĩpehrerã ñerire iirã áhrra. Eropirã Goãmũ ïgu gamero dopa ne iibeaa mari. <sup>24</sup> Mari eropa iiquerẽcũ Goãmũ árĩpehrerã masare ïgu mojomoro ïadigu árĩmi. Eropigu Jesucristo mari masa ñeri iirare wajayebasadi árĩmi. ïgu eropa iira pũhrũ “Dipuwaja moorã áhrrima,” arĩ ïhami Goãmũ Jesure umupeorãre. Waja gamero mariro mari ñerire cohãmi. <sup>25</sup> Iribojeguerẽ majarã erã ñero iirare ïagũ Goãmũ mata dipuwaja moabiriñumi erãre. ïgu eropa dipuwaja moabigu erã ñero iirare bu gohra pepicãgu iibiriñumi. Eropigu erã ñerire cãdijibu ïgu Jesucristore obeodigu árĩmi árĩpehrerã masa erã ñeri dipuwajare sãribasabure ïgu di cóãbure. Eropigu mari masa Jesucristore umupeocũ Goãmũ mari ñeri iirare cãdijigucumi. Eropa iigu “ïgu diaye iigu áhrrimi,” marire arĩ masicũ iidi árĩmi. <sup>26</sup> ïgu magure obeodigu árĩmi dohpague majarã sã erã ñeri iira dipuwajare wajayebasabure. Eropiidigu árĩmi “ïgu ðaro diaye iigu áhrrimi,” mari masa arĩ masiborore. Jesure umupeorãre “Óarã áhrrima,” ïgu arĩ ïaborore eropiidi árĩmi.

<sup>27</sup> Eropirã dohpague mari ejatuharo “Óarã áhrra mari,” ne arĩmasibeaa mari. “Moise dorerire iirã ðarã áhrra,” iri sãre arĩmasibeaa mari. Òpa arĩmasia mari:

“Diaye ta yu ñerire ĩgu cohãmi,’ mari Jesucristore arĩ umupeocũ, ‘Õarã åhrima,’ arĩ ĩagucumi marire Goãmuru,” arĩmasia mari. <sup>28</sup> Õpa masia mari: Moise dorerire mari iiquerecũ, iri mera “Õarã åhrima,” Goãmuru arĩ ĩabeami marire. Jesucristore mari umupeocũ ĩagu marire “Õarã åhrima,” arĩ ĩhami ĩgu.

<sup>29</sup> Goãmuru judio masa opu dihta arĩbeami. Judio masa arĩbirã opu sã åhrimi. <sup>30</sup> Eropa arĩgu Goãmuru yujugu ta arĩgu, arĩpehrerã wecague opu åhrimi. Eropa arĩgu judio masa Jesure erã umupeocũ, “Erã dipuwaja moorã åhrima,” arĩ ĩagucumi. Eropigu judio masa arĩbirã sãre Jesure erã umupeocũ, erã sãre “Dipuwaja moorã åhrima,” arĩ ĩagucumi Goãmuru. <sup>31</sup> ¿Eropirã Jesucristore umupeoturã Goãmuru Moisere ĩgu dorerire cóarã iibocuri mari? Irire cóãbeaa mari. Jesure umupeorã tamera Goãmuru dorerire diaye ta iirã iiaa mari.

## 4

### *Abrahã Goãmure ĩgu umupeorare were gojañumi Pablo*

<sup>1</sup> Mari ñecu arĩmũhtadigu Abrahã Goãmure “Diaye iigu åhrimi,” arĩ umupeorĩñumi ĩgu sã. ĩgu eropa umupeori mera õañumi Goãmuru mera. <sup>2</sup> Abrahã õaro ĩgu iiquerecũ “Õagu åhrimi,” arĩ ĩanibirĩmũriñumi Goãmuru ĩgure. ĩgu Goãmure umupeocũ tamerare “Õagu åhrimi,” arĩ ĩamũriñumi ĩgure. Eropigu ĩgu ejatuharo õarire iiqueregũ ta ñegu arĩnigu “Yu tamera õagu åhraa,” arĩmasibirĩñumi Abrahã Goãmuru ĩgu ĩacũ. <sup>3</sup> Goãmuru yare gojarapũ õpa åhraa: “Abrahã Goãmuru ĩgure arĩrare õaro ĩgu peecũ, ĩgure ĩgu umupeocũ ĩha Goãmuru ĩgure ‘Õagu ñeri iira dipuwaja moogu åhrimi ĩgu,’ arĩ ĩañumi ĩgure,” arĩ gojara åhraa. <sup>4</sup> Õpa åhraa: Mari masare yuju diaye wajayebeama. Mari õaro mohmera waja marire wajayema. Goãmuru eropa iibeami. <sup>5</sup> Mari gamero õarire iiro mariro mari Jesucristore umupeocũ ĩha marire yuju diaye ĩgu õarire ocãmi. Eropigu marire “Õarã åhrima,” arĩ ĩhami marire Jesucristore umupeorãre. Ñerire iinirãre erã ñeri iira dipuwaja maricũ iigu åhrimi. Eropirã masa Jesucristore umupeocũ ĩagu “Dipuwaja moorã åhrima,” arĩ ĩhami Goãmuru erãre. <sup>6</sup> Masa erã gamero mera õaro iirare Goãmuru ĩabeami. Erã ĩgure umupeocũ tamerare ĩhami. ĩgure umupeorãre “Õarã åhrima,” arĩ ĩhami. ĩgu eropa arĩ ĩadiguru ĩgu mucubiririre õpa arĩ gojañumi Davi muru iribojegue majagu:

<sup>7</sup> Erã ñerire ĩgu cãdijinirã tauro mucubirima.

<sup>8</sup> “Õarã åhrima. Erã ñero iirare guñasome yuhũ,” arĩmi Goãmuru erãre. Eropirã burigã mucubirima, arĩ gojañumi Davi.

<sup>9</sup> Judio masare merogã gasirogãre wiri aĩsũnirã dihtare erã ñero iirare cãdijibeami Goãmuru. Judio masa arĩbirã sãre erã ñero iirare cãdijimi ĩgu. Dipaturi Abrahãre guñaque mua. ĩgu Goãmure umupeocũ ĩagu ĩgu ñero iirare cãdiji, “Õagu åhrimi,” arĩñumi Goãmuru. <sup>10</sup> ¿Dohpãricũ eropa arĩyuri Goãmuru Abrahãre mua pepicũ? ĩgu merogã gasirogãre ĩgu wiri aĩboro coregue ta ĩgure “Õagu åhrimi,” arĩ ĩañumi Goãmuru. Eropigu gasirogãre wiri aĩgu ĩgu ñerire cóatuhadigugue wiri aĩñumi. <sup>11</sup> Eropigu gasiro merogã wiri aĩboro coregue Goãmure umupeonũgatuhãñumi Abrahã. ĩgu eropa umupeocũ “Õagu åhrimi,” arĩ ĩañumi Goãmuru ĩgure. Eropa ĩgu umupeorire, ĩgu yagu ĩgu arĩrĩre ĩhmudoregu Goãmuru ĩgu dũpũre merogã gasirore wiri aĩdoreñumi. Eropigu Abrahã ĩgu gasirogã wiri aĩboro core Goãmuru “Õagu åhrimi,” arĩ ĩatuhãñumi ĩgure. Eropigu Abrahã Goãmure “Diaye ta iigu åhrimi,” ĩgu arĩ umupeodiro dopa ta arĩpehrerã Goãmure eropa arĩ umupeorãre “Õarã åhrima,” arĩ ĩhami Goãmuru. Eropigu judio masa arĩbirãre gasirogã wiri aĩsũya marirã sãre

“Ōarã àhrima,” arĩ ìhami Goãmũ. Eropirã erã Abrahã pãramerã iro dopa ta dujama. <sup>12</sup> Erã iro dopa ta judio masa sã gasirogã wiri aĩsũnirã sã, Goãmũre erã umupeorã árĩrã Abrahã pãramerã diaye ta àhrima. Ìgũ gasirogã wiri aĩboro coregue, Goãmũre umupeo ìgũ mera òañumi. Eropirã ìgũ umupeodiro dopa Goãmũre umupeorã òaro àhrima Goãmũ mera.

*Goãmũ Abrahãre ìgũ werepira diaye ta árĩcũ masiñume Abrahã, arĩ gojañumi Pablo*

<sup>13</sup> Iribojegue òpa arĩñumi Goãmũ Abrahãre: “I yebare mũre, mũ pãramerã árĩturiarã sãre ogũca,” arĩ werepiñumi Goãmũ Abrahãre. Moise dorerire Abrahã òaro iira waja eropa arĩbiriñumi Goãmũ ìgũre. Abrahãpũ Goãmũre “Diaye ta iigũ àhrimi,” arĩ umupeora pũhrũ eropa arĩ werepiñumi. Ìgũ eropa arĩ umupeocũ ìagũ Goãmũ ìgũre “Ōagũ àhrimi,” arĩ ìañumi. <sup>14</sup> Goãmũ oburire Moise dorerire iirã dihta aĩbeama. Erã dihta aĩcũ mari Goãmũre umupeori ñehe árĩburi árĩbiriboya maripũre. Eropiro Goãmũ ìgũre umupeorãre “Mũare ogũca,” ìgũ arĩ werepira duhpiburi árĩbiriboya. <sup>15</sup> Goãmũ Moiserẽ ìgũ apira dorerire iirã bocafũbeaa mari. Ìgũ dorerire mari pee tarinũgara waja, dipuwaja moasũmorã àhraa mari. Iri doreri maricũ tamera ìgũ dorerire tarinũgaro mariboya.

<sup>16</sup> Eropirã Goãmũre umupeorã dihta ìgũ oburire aĩrãcoma. Abrahã Goãmũre “Diaye ta iigũ àhrimi,” arĩ umupeomuriñumi. Eropirã árĩpehrerã Abrahã Goãmũre umupeodiro dopa ta umupeorã ìgũ pãramerã iro dopa dujama. Eropigũ “Ire mũre mũ pãramerã sãre ogũca,” Goãmũ Abrahãre arĩgũ árĩpehrerãre ìgũre umupeorãre arĩgũ iĩñumi. Eropirã Moise dorerire iirã dihta Goãmũ ìgũ oburire aĩsome. Árĩpehrerã Abrahã iidiro dopa Goãmũre umupeorã erã ìgũ oburire waja mariro aĩrãcoma. <sup>17</sup> Irire Abrahãre ìgũ arĩdiro dopa ta arĩ gojañuma iribojeguerẽ: “ ‘Baja yebari majarã ñecũ árĩbu apibũ mũre,’ arĩ, apipũ Goãmũ Abrahãre,” arĩ gojañuma iribojegue ta. Eropigũ ìgũ Goãmũre “Diaye ta iigũ àhrimi,” arĩ umupeomuriñumi. Ìgũ eropa umupeocũ Goãmũre umupeorã ñecũ iĩñumi Goãmũ ìgũre. Goãmũpũ sĩrinirãre masugũ, árĩpehrerire ìhacũnugudigũ àhrimi.

<sup>18</sup> “Baja macari majarã mũ pãramerã árĩturiarã árĩrãcoma,” arĩmuriñumi Goãmũ Abrahãre. Goãmũ ìgũ eroparĩcũ Abrahãpũ porã marigũ árĩqueregũ, “Diaye ta àhraa,” arĩ pepimuriñumi. <sup>19</sup> Eropigũ cien bojori opagũ árĩqueregũ, ìgũ marapo sã buru ne porã marigo árĩquerecũ, “Porãcũsome gũca,” arĩ ne pepibiriñumi Abrahã. Eropigũ Goãmũ ìgũre arĩ werepira “Diaye ta àhraa,” arĩ pepiñumi Abrahã. <sup>20</sup> “Goãmũ ìgũ arĩdiro dopa ta ne iisome,” arĩ ne pepibiriñumi Abrahã. Eropigũ ìgũ Goãmũ ìgũre werepirare òaro peeñumi. Ìgũ eropa arĩrare peenijagũ, “Goãmũ turagũ àhrimi,” arĩ umupeogũ iĩñumi. Eropigũ Goãmũre “Diaye ta iigũ àhrimi,” arĩ umupeonemoñumi ìgũ. <sup>21</sup> “Goãmũ ìgũ arĩdiro dopa ta òaro iigũcumĩ,” arĩ pepi òaro masiñumi Abrahã. <sup>22</sup> Ìgũ eropa masicũ, Goãmũre ìgũ umupeocũ ìha Goãmũpũ “Dipuwaja moogũ àhrimi,” arĩ ìañumi Abrahãre. Eropa ta arĩ gojañuma Goãmũ yare erã gojarapũgue.

<sup>23</sup> Abrahã Goãmũre ìgũ umupeora pũhrũ Goãmũ òaro ìañumi ìgũre, arĩ gojañuma. Eropa gojarã “Mũa sãre Goãmũre umupeorãre òaro ìagũcumĩ,” arĩ mari sãre gojajuñuma. <sup>24</sup> Irire mari masiburire gojañuma. Eropigũ Goãmũre “Diaye ta iigũ àhrimi,” mari arĩ umupeocũ “Dipuwaja moorã àhrima,” arĩ ìagũcumĩ Goãmũ mari sãre. Ìgũ tamera mari Opũ Jesu ìgũ sĩricũ masudigũ àhrimi. <sup>25</sup> Jesupũ mari ñeri iira dipuwaja sĩridigũ árĩmi. Ìgũ sĩrira pũhrũ masa muriadigũ árĩmi ìgũ Goãmũ marire “Dipuwaja moorã, òarã àhrima,” arĩ ìgũ marire ìaburire.

## 5

*“Dipuwaja moorã áhřima,” Goãmũ ĩgũ arĩ ĩacũ õpa waroca marire, arĩ gojañumi Pablo*

<sup>1</sup> Jesucristore mari umupeoturacũ ĩagũ “Dipuwaja moorã, õarã áhřima,” arĩ ĩhami Goãmũ marire. ĩgũ eropa arĩ ĩacũ Goãmũ mera mari õaro árĩcũ iimi marire mari Opũ Jesucristo. <sup>2</sup> Eropirã mari ĩgũre umupeocũ ĩagũ Goãmũ marire mahigũ, marire aĩmi ĩgũ mera mari õaro árĩboro dopa. Goãmũ tamera õatariagũ áhřimi. Eropigũ ĩgũ iro dopa ta õarã árĩcũ iigũcumi ĩgũ marire. ĩgũ eropiiburire õaro masia mari. Eropirã mucubiria. <sup>3</sup> Eropirã ñero tariquererã mucubiria mari. Ñero tarirã irire yujuro bojemasia mari. Eropa yujuro bojerã ñero tariquererã õaro Goãmũre guñaturarã wahaa mari. Eropirã Goãmũ yare duhubeaa mari. <sup>4</sup> Mari eropa árĩcũ ĩagũ, “Õaro ĩiabũ mũa,” arĩgũcumi Goãmũ marire. ĩgũ marire eroparĩcũ, marire ĩgũ tauborore õaro masia mari. Eropirã ñero tarirã sã mucubirimasia mari. <sup>5</sup> Eropigũ Goãmũ marire Espĩritu Santore obeomi mari mera árĩdoregũ. Eropigũ Espĩritu Santopũ mari mera árĩgũ Goãmũ marire eropa mahiniguicãřire masicũ iimi. Eropirã “Goãmũ õaro taugũcumi marire,” arĩ “ĩgũ mera árĩniguicãřãca,” arĩ masia mari.

<sup>6</sup> Eropigũ ero core mari ñeri iirare mari basi mari cóãmasibiricũ ĩagũ, ĩgũ queodiro sihjacũ mari ñerã árĩra dipuwaja Cristo sĩřipũ. <sup>7</sup> Mari masa gajigũ ya árĩburire sĩřibasadiabeaa. Őagũ árĩgũre yujugũ sĩřibasabocumi gajisubu arĩgũ. <sup>8</sup> Maripũ ñerã mari árĩquerecũ Jesucristo sĩřibasadi árĩmi mari ya árĩburire. ĩgũ eropiicũ Goãmũ turaro marire ĩgũ mahirare masia mari. <sup>9</sup> Mari ya árĩburire ĩgũ sĩřicũ, ĩgũ di cóãcũ, Goãmũpũ marire “Dipuwaja moorã áhřima,” arĩ ĩhami. ĩgũ eropa arĩ ĩara pũhrũ dohpaguepũre marire peamegue wabonirãre taumi Jesucristo. Eropigũ ĩgũ yarã marire ĩgũ iira pũhrũ marire dipuwaja moasome Goãmũ. <sup>10</sup> Eropirã Goãmũre gamebirã mari árĩquerecũ ta ĩgũ magũ sĩřigũ mari ñeri iira dipuwaja wajayebasadigũ árĩmi. Eropa wajayebasagũ ĩgũ Pagũre Goãmũre guabiricũ iimi ĩgũ mari mera. Eropirã ĩgũ yarã wahaa mari. Dohpague tamerare tauro õaro iigũcumi marire. ĩgũ yarã mari árĩcũ, Jesu ĩgũ masa mũriara mera marire peamegue wabonirãre õaro taugũcumi ĩgũ. <sup>11</sup> Pũhrũgue mari tariborore mucubiria mari. Goãmũpũre guña mucubiria. Mari Opũ Jesucristo mari ñeri dipuwaja ĩgũ sĩřira pũhrũ Goãmũ yarã áhřraa mari. Eropirã mucubiria.

*Adãre Cristo sãre wereñumi Pablo Roma majarãre*

<sup>12</sup> Jesucristo taunirã árĩrã õpa masia mari: Adãn ĩgũ ñerire iinũgarasubugue i yebare ñeri árĩnũgayoro. Ñeri árĩnũgacũ masa sĩřinũgañuma. Mari árĩpehrerã ñerire iiaa. Eropirã árĩpehrerã mari ñerã árĩri waja sĩřirãca. <sup>13</sup> Goãmũ ĩgũ dorerire Moisere apiboro core diaye ta i yeba majarã ñerire iimũriñuma. Eropa ñerire iiquerecũ ĩri doreri maricũ ĩgũ doreri tarinũgari waja dipuwaja moamasibiriñumi dohpa. <sup>14</sup> ĩgũ eropa dipuwaja moamasibiriquerecũ ta Adãnpũ ĩgũ pũhrũ árĩrã ĩri doreri mariquerecũ ta sĩřimũriñuma. Moise ĩgũ árĩboro core ĩri doreri mariquerecũ ta masa sĩřimũriñuma. Gajirã ñerire iirã Adãn ĩgũ ñero iimũridiro dopa gohra iibirimũriñuma. Eropiibiriquererã erã sã sĩřimũriñuma. Eropigũ Adãn ñerire iinũgadigũ árĩñumi i yebare. Yoara pũhrũgue i yeba arigũ Jesucristopũ õarire iinũgadigũ árĩmi.

<sup>15</sup> Adãn ĩgũ iira Jesucristo iira dopa árĩbeaa. Adãn yujugũ ta ĩgũ ñeri iira dipuwaja bajarã masa sĩřinũgañuma. Goãmũpũ marire mahigũ Jesucristore obeodigũ árĩmi. Eropigũ Jesucristopũ ĩgũ yujugũ ta mari ya árĩburire sĩřibasagũ mari bajarã ĩgũ yarã Goãmũ mera mũmũri nũcũ árĩniguiborore iidi árĩmi. <sup>16</sup> Eropigũ Goãmũ masare ĩgũ mojomoro ĩadiro Adãn ĩgũ Goãmũre tarinũgadiro dopa árĩbeaa. Adãnpũ ĩgũ yujugũ



ta ñerire ïgu iira dipuwaja árïpehrerã masa dipuwaja opama. Erã eropa dipuwaja opaquerẽcũ, masa wũaro erã ñerire iiquerẽcũ dohpaguere masare mojomoro ïagu Goãmũ erã ñerire cohãmi. Eropa cóãgu “Dipuwaja moorã, õarã àhrima,” arĩ ïhami ïgu Jesucristo sïrira mera. <sup>17</sup> Adán yujugu ta ïgu dipuwaja mera ta árïpehrerã masa sïrimorã dihta wañuma. Goãmũ ïgu iirañepũ õataria. Dohpaguere masare mojomoro ïagu Jesucristo ïgu yujugu sïrira mera iri ñeri dipuwaja cóãgu marire “Õarã àhrima,” arĩ ïhami. Eropirã árïpehrerã ïgu eropa arĩ ïanirã ïgu mera õaro árïniguicãrãcoma.

<sup>18</sup> Yujugu Adán ïgu ñerire iinugacũ árïpehrerã ñerire iinugañuma. Erã eropiicũ ïagu Goãmũ erãre “Dipuwajacurã àhrima,” arĩ ïañumi. Gajigu Jesupũ ïgu õarire ïgu iicũ masa erã ñeri iira dipuwaja sïribasacũ, árïpehrerã mari ñeri dipuwaja cóãdigũ árïmi Goãmũ. Mari ñerire ïgu cóãnirã árïcũ “Õarã àhrima,” arĩ ïagucumi Goãmũ marire. Eropirã árïpehrerĩnũri ïgu mera árïniguicãrãca mari. <sup>19</sup> Yujugu Adán Goãmũre tarinũga nũgañumi. ïgu eropiicũ bajarã masa ñerire iiricurã wañuma. Jesucristopũ Goãmũ ïgu dorediro dopa iipũ. ïgu eropiicũ bajarã masa ïgu ñerire cóãnirã warãcoma. Erã eropa wacũ “Õarã àhrima,” arĩ ïagucumi Goãmũ erãre. <sup>20</sup> Goãmũ ïgu dorerire Moiserẽ apiñumi árïpehrerã masa erã ñero iirare erã masiburire. Mari masa burigã ñerire mari iiquerẽcũ Goãmũpũ marire burigã mahimi. Eropa mahigu Jesucristo sïrira mera mari ñerire cóãdigũ árïmi. <sup>21</sup> Ero core mari árïpehrerã mari ñeri iira dipuwaja sïrimorã árïmũrĩribũ. Goãmũ marire turaro mahigu mari Opũ Jesucristore ïgu obeocũ ïgu marire ñeri dipuwaja marirã wacũ iimi dohpaguere. Eropirã erã “Dipuwaja moorã àhrima,” Goãmũ ïgu marire arĩ ïacũ mari árïpehrerĩnũri ïgu mera eropa árïniguicãrãca.

## 6

### *Cristo yarã ñerire iiniguibeama, arĩ gojañumi Pablo*

<sup>1</sup> ¿Goãmũ eropa marire mahicũ ïarã dohpa iirãcuri mari mũa pepicũ? ¿Goãmũre marire mahicũ iinẽmodiarã ñerire iinemorãcuri mari? <sup>2</sup> Árïbeaa. Ñerire iibiricãrã mari. Jesucristo marire sïribasadi árïmi mari ñerire cóãgu. Eropirã Cristo yarã árïrã marire ñerire iibiricãro gahmea. <sup>3</sup> Eropa ta Jesucristo yarã mari árïrĩre masa erã ïha masiborore deco mera waïyesũbũ. Jesu mari ñeri iira dipuwaja sïridigu árïmi. Eropirã ïgu yarã árïrã, waïyesũnirã árïrã mari ñeri iirare duhucãbũ. <sup>4</sup> Mari waïyeri õpa ïhmua: Jesucristo sïrira mera mari ñerã árïdiro pehrea. Eropa wacũ mari Pagũ ïgu turari mera Jesucristo sïridire masudiro dopa iri turari mera marire õaripũre gohrotomi. Eropirã õarire iirã wahaa.

<sup>5</sup> Eropirã Cristo yarã árïrã Cristo sïrira mera mari ñerã árïdiro pehrea. Eropirã mari ñeri iirare duhua mari. Eropirã Cristo yarã árïrã ïgu masa mũriara mera õaripũre gohrotorã àhraa mari. Iri diaye ta àhraa. <sup>6</sup> Jesucristo crusague sïrigũ mari ñerã árïrãre pehrecũ iidi árïmi. Mari ñeri mũaribejarire duhumasicũ iidi árïmi dipaturi mari ñerire iibiriboro dopa. <sup>7</sup> Mari ñeri mũaribejarare cóãnirã árïrã ñerire iiniguirã árïsome pare mari. Irire mari masia. <sup>8</sup> Eropirã mari gohrotonirã árïrã mari Jesucristo mera õarire iinugarã árïrãca. “Iri diaye ta àhraa,” arĩ pepia mari. <sup>9</sup> Ire mari masia: Cristo ïgu sïri, masa mũriara pũhrũ dipaturi sïrisome. ïgu sïribodirore tarituhadigu árïmi. <sup>10</sup> Eropigu Cristo yujusubu sïrigũ, masa ñerire cóãgu sïrimi. ïgu masa mũriadigu dohpaguere Goãmũ gamerire iigu àhrimi. <sup>11</sup> “ïgu iidiro dopa ta yũ sã àhraa,” arĩ pepique mũa: “Jesucristo mari ñerire cóãdiro dopa ta mari sã mari ñerire cohãa. Ñerire iibirã Jesu yarã árïrã Goãmũ gamerire iimorã árïrã tiaa mari,” arĩ pepique mũa sã.



<sup>12</sup> Eropirã ñeri iiniguirã árĭbiricãque. Eropirã ñerire ɯaribejabiricãque. <sup>13</sup> Ñerire iirã árĭbiricãque. Mũa peamegue wabonirãre Jesucristo ĩgu taunirã áhraa. ĩgu eropa iinirã árĭrã ōpa arĭque Goãmure: “Mũhũ, yũ Opũ áhraa. Eropigu yũhũ mũ gamero dopa iigu, mũ dorerire iiniguicãgũca ɯmũri nũcũ pare,” arĭque Goãmure. Eropirã ōarire iirã Goãmũ ĩgu gameri dihtare iirã árĭque mũa. <sup>14</sup> Dohpaguere Goãmũ mera ōaro árĭborore Moise doreri mũare dorebeaa. Jesucristo mũa ya árĭburire sĭribasara mera Goãmũ mera ōarã áhraa. Eropiro mũa ñeripũ mũare dorebeaa pare. Eropirã ñerire iiniguisme pare mũa.

*Mũa ñerire iiniguicũ iri ñeri mũa opũ iro dopa áhraa, arĭ gojañumi Pablo*

<sup>15</sup> ¿Yũ eroparĭcũ dohpa arĭ pepiri mũa? ¿Jesucristo yarã árĭrã, Moise dorerire umupeobirimorã árĭrã, ñerire iiniguibocuri mari? Ñerire iiniguibiricãrã. <sup>16</sup> Mũare doregũ mũa opũ áhrimi. Eropirã ĩgu pohro majarã áhraa mũa. Eropa ta ñerire iiniguirã mũa árĭcũ iri ñeri mũa opũ iro dopa áhraa. Eropirã ñerire duhumasiya mara mũare. Eropirã peamegue wamorã áhraa mũa eropa iirã. Goãmure ōaro yũhrirã árĭrã tamera ĩgu pohro majarã áhraa. Eropirã ĩgu yarã ōarire iirã áhraa mũa. Irire masia. <sup>17</sup> Iribojegue ñerire iiniguirã mũa árĭcũ, iri ñeri mũare doremũriyoro. Dohpaguepũre ōari buherire peerã, Jesure umupeorã, Goãmũ dorerire ōaro iirã wahabũ mũa. Eropa árĭrã Goãmure “Ōhaa,” arĭro gahmea. <sup>18</sup> Eropa warã dohpaguere ñerire doresũrã árĭbeaa mũa. Eropirã Goãmũ doresũrã árĭrã ōarire iiaa. <sup>19</sup> Irire mũare ōpa arĭ gojaa mũa ōaro peeboro dopa. Iribojegue ñerire iipehorã, ñerire iiniguicãrã mũa árĭdiro dopa ta dohpaguepũre ōarire iiniguicãrã árĭque mũa. Eropirã Goãmũ gameri dihtare iirãca mũa.

<sup>20</sup> Iribojeguere ñeri dihtare iirã árĭrã, ōaripũre iibirimũriyoro mũa. <sup>21</sup> Irisubure ñerire iira waja ōarire bocabiriyoro mũa. Iri mũa ñeri iirare guñarã dohpaguere gũhyasĭrica mũa. Iri ñerire mũa iira dipuwaja peamegue wabonirã árĭribũ. <sup>22</sup> Dohpaguepũre Jesucristo mũare ñeri doresũnirãre wiucãmi pare. Eropirã Goãmũ dorerire iirã wahabũ mũa. Eropirã Goãmũ gameri dihtare iirã árĭrãca. Eropirã árĭpehrerinũri Goãmũ mera árĭrãca. <sup>23</sup> Ñerire mari iira dipuwaja peamegue wabonirã áhraa mari masa árĭpehrerã. Mari eropa árĭquerrecũ Goãmũpũ mari Opũ Jesucristore mari umupeocũ ĩagũ, árĭpehrerinũri ĩgu mera árĭcũ iigũcumĩ. Waja mariro marire eropa iigũcumĩ.

## 7

*Moise dorerire were gojanemoñumi Pablo*

<sup>1</sup> Yũ acawererã, Goãmũ Moisere ĩgu dorerare ōaro masia mũa. Masure iri doreri ĩgu ojocaribusu dorea. ĩgu sĭrira pũhrũ ĩgũre dorebeaa iri. Iri sãre masia mũa. <sup>2</sup> Ōpa áhraa: Nomeore igo marapũ mera dihta árĭdorea Moise ĩgu doreripũ. Iri eropa dorequerrecũ ta igo marapũ sĭrira pũhrũ igopũ gajigũ mera marapũcũmasimo. Eropa ta arĭ werea iri doreri. <sup>3</sup> Eropigo igo marapũ árĭquerrecũ ta gajigũre marapũcũgo, ñero iigo iimo igoa. Igo marapũ ĩgu sĭrira pũhrũgue ta gajigũre marapũcũgo, Moise dorerire tarinũgabeamo igo. Eropigo ñero iigo iibeamo igo.

<sup>4</sup> Eropa ta mũa sã yũ acawererã, Jesucristo sĭrira mera Jesu yarã warã, iri doreri iiri mera Goãmũ yarã wabeaa mũa. Eropirã sĭrinirã mũrare iri doreri mera dorebiro dopa ta mũa sãre iri doreri dorebeaa. Mũa Cristo ya curu majarã áhraa. Eropirã dohpaguere ĩgu yarã áhraa mũa. ĩgũpũ ĩgu sĭrira pũhrũ masa mũriadigũ árĭmi Goãmũ gamerire mari iiboro dopa. <sup>5</sup> Jesucristo yarã árĭbirirasubuguere ñerire mari ɯaribejarire iimũribũ. Eropirã Moise dorerire mari masira pũhrũ iri dorerire tarinũgadiaribũ. Eropa tarinũgã ñerire iirã, mari peamegue wamorã ta árĭmũribũ.

<sup>6</sup> Dohpaguere Cristo yarã árĩrã iri doreri docague árĩbeaa pare mari. Goãmũ ïgu mera õaro mari árĩborore iri dorerire iidorebeami pare. Espíritu Santo mari mera árĩgu marire õarire gohrotocũ iimi. Eropirã Goãmũ gamerire iirã mari iribojegue maja doreri gojara mera árĩmasibeaa pare.

*Mari ñeri iidiarire were gojañumi Pablo*

<sup>7</sup> ¿Eropirã Goãmũ Moiserẽ ïgu dorerare dohpa arĩ pepibocuri mari? ¿Iri doreri ñeri árĩcuri mua pepicũ? Árĩbirica. Iri ïgu doreri ta ñerire yũre masicũ iibũ. Eropirã ïgu doreri maricũ ñerire mari iirare masibiriboya mari. ïgu doreri õpa arãa: “Gajirã yaguere turaro ùaribejabiricãque,” arãa Moise doreri. Iri eroparĩbiricũ, gajirã yare ùaribejariñe iri ñeri árĩcũ masibiriboya mari. <sup>8</sup> Eropigũ iri dorerire yũ masira pũhrũ gajirã yare burigã ùaribejamũribũ. Iri dorerire masibirinigu gajirã yare burigã yũ ùaribejara iri ñeri árĩcũ masibiriboya yũhũ. <sup>9</sup> ïgu dorerire yũ masiboro core eropa pepicãnibũ dohpa. Dipuwajacũborore guñabiriribũ. Eropigũ ïgu dorerire yũ masira pũhrũ yũ ùaribejari ñeri árĩcũ masibu yũhũ. Eropigũ yũ dipuwajacũborore masibũ. <sup>10</sup> Iri doreri mera mari Goãmũ mera õaro árĩbonirã árĩquerẽcũ mari iri doreri mera dipuwajacũrã dederebonirã árĩribũ. <sup>11</sup> ïgu Goãmũ Moiserẽ dorerare masira pũhrũ tarinũgadiaribũ. Ñerire ùaribejagu árĩcũ iri ñeri yũre goroweobũ. Ñerire iirã iri dorerire tarinũgara waja dipuwajacũmorã árĩribũ mari. Eropirã iri doreri tarinũgari mera peamegue dederebonirã árĩribũ.

<sup>12</sup> Eropiro Moise doreri Goãmũ ya õari ãhraa. Eropiro queoro árĩro iiaa. <sup>13</sup> ¿Eropa árĩquerero iri õari doreripũ peamegue marire wacũ iiri mua pepicũ? Wadorebeaa. Mari ñeri iiri dipuwaja marire peamegue ñero wacũ iiaa. ïgu dorerire mari masira pũhrũ iri dorerire tarinũgarã, “Ñerire iiaa mari,” arĩ masia. Eropirã mari ñerã árĩrĩre masirã mari peamegue waboro sãre masia mari. Eropirã ïgu dorerire masirã, mari tarinũgara iri ñeri árĩcũ masia mari.

<sup>14</sup> Moise doreri Goãmũ ïgu apira iri árĩcũ masia mari. Irire masiquererã maripũ ñeri ùaribeja iirã i õaripũre iibeaa. Eropirã ñerire iiniguirã ãhraa. <sup>15</sup> Mari õarire iidiaquererã iibeaa mari. Eropirã mari ñerire iidibiriquererã ta iiniguicãa. Eropirã mari iirire pee masibeaa mari. <sup>16</sup> Eropirã ñerire iidibiriquererã ñerire iiaa mari. Iri ñerire iidibirã Moise ïgu dorerire “Õari doreri ãhraa,” arĩdiarã iiaa. <sup>17</sup> Eropirã “Yũ basi ñerire dipaturi iisome pare,” arĩquererã ta ñerire iiniguia. Mari pepirigue árĩripũ ñerire marire iicũ iiaa. <sup>18</sup> Óarire turaro iidiaquererã ta, ne bocatiubirica. Eropirã õpa masia. Ñeripũ marire goroweomũraa. Mari pepirigue ñeri dihta ãhraa. Ne õari mara. <sup>19</sup> Óari mari iidiaripũre ne iibeaa. Ñerire mari iidibiriripũre iiaa. <sup>20</sup> Eropirã “Yũ basi ñerire dipaturi iisome pare,” arĩquererã ta ñerire iiaa daja. Mari pepirigue árĩripũ marire ñerire iicũ iiaa.

<sup>21</sup> Eropiro õpa wahaa marire. Óarire mari iidiaquerẽcũ ta mari ùaribejari mari pepiri ñeri ãhraa. Eropirã õaripũre iibeaa mari. <sup>22</sup> Goãmũ dorerire mari turaro yũhridiarica. <sup>23</sup> Eropirã mari ire masia: Goãmũ dorerire gamequererã mari ñeri pepiri mari ùaribejari ãhraa marire. Mari ñeri pepiri tarinũgaa mari õari iidiaripũre. Eropirã mari ñerire duhumasibeaa.

<sup>24</sup> Eropa ñerire duhumasibirã ñero dujaa mari. ¿Mari ñeri ùaribejarire duhuboro dopa, mari ñeri pepiri marire dorebiriboro dopa noa marire taugũcuri? <sup>25</sup> Jesucristore mari guñaturacũ ïgũpũ mari ñerire iibiriboro dopa taugũcumĩ. ïgu mari Opũ mari ñeri ùaribejarire tautuhajadi árĩmi. ïgu eropiicũ Goãmũre “Õhaa,” arãa mari. Eropirã dohpaguere mari Goãmũ dorerire yũhridiarã ãhraa. Eropa yũhridiaquererã ta mari pepirigue ñero pepiri ãhraa dohpa. Mari eropa árĩrãre Jesucristo marire taumi.

## 8

*Espíritu Santore oparã erã árĩricũre were gojañumi Pablo*

<sup>1</sup> Dohpaguere Jesucristo yarãre erã dipuwajacuboro mara. Erã ñerire erã ùaribejarire iiniguibeama. Eropirã Espiritu Santo ïgu dorero dopa ta iiniguicãma erã.

<sup>2</sup> Eropigu Jesucristo yarã mari árĩcũ Espiritu Santo ñero iirire duhucũ iimi marire. Eropigu Espiritu Santo árĩpehrerinũri Goãmũ mera árĩcũ iimi marire. Ñerire marire duhucũ iigu, marire peamegue wabonirãre taumi. <sup>3</sup> Moise dorerire mari gamero iirã ne bocatĩusome. Eropirã iri doreri mera mari Goãmũ mera õaro árĩmasibiribũ. Mari eropa árĩrã árĩquerecũ ta õpa Goãmũ marire õarã árĩcũ iidigu árĩmi. Irire mari ñeri dipuwajare wajayebasabure ïgu magũre obeodigu árĩmi. ïgu magũ mari iro dopa ta dũpũcũdigũ árĩmi. Eropigu wajayebasagu mari pepirigue ñeri árĩire cóadigu árĩmi.

<sup>4</sup> Marire eropa ta iidigu árĩmi Goãmũ ïgu dorerire õarire ïgu turari mera mari iiboro dopa. ïgu dorerire iirã árĩrã mari ùaribejarire iibeaa mari. Eropirã Espiritu Santo ïgu itamuri mera ïgu dorero dopa ta iiaa mari.

<sup>5</sup> Erã gamero ñerire iidiarã, ñeri dihtare ùaribejama. Espiritu Santo ïgu dorero dopa ta iiniguirãpũ õari dihtare iidiamã erã. <sup>6</sup> Erã gamero ñeri dihtare iidiarã, iri dihtare ùaribejarã peamegue warãcoma. Espiritu Santo ïgu gamerire turaro iidiarãpũ árĩpehrerinũri Goãmũ mera árĩrãcoma. Eropirã erã õaro árĩcãrãcoma. <sup>7</sup> Erã gamero iirã Goãmũre gamesũribirã àhriima. Erã Goãmũ dorerire ne yũhribeama. ïgu dorerire ne yũhrimasisome erã. <sup>8</sup> Eropirã erã gamero iirã Goãmũre ïhasũacũ iimasibeama.

<sup>9</sup> Mũapũ mũa gamero iibeaa. Espiritu Santo mũa mera árĩcũ ïgu gamerire iiaa. Eropirã Espiritu Santore moorãpũ Cristo yarã árĩbeama. <sup>10</sup> I mũmũre masa ñerire iira dipuwaja mari árĩpehrerã sĩrimorã dihta àhraa. Mũa sĩrimorã árĩquererã ta Cristo yarã mũa árĩrã ïgu mera eropa árĩniguirãca mũa. Goãmũ mũare “Õarã àhriima,” ïgu arĩ ïacũ ïgu mera eropa árĩniguirãca mũa. <sup>11</sup> Goãmũ Jesure masudigu árĩmi. Eropã masudigu árĩgu, Espiritu Santo mũa mera ïgu árĩniguicũ mũa sĩrira pũhrũ Goãmũ mũa sãre masugũcumĩ. Eropã masugũ õaro árĩcũ iigũcumĩ mũare. Jesure ïgu masudiro dopa ta eropa masugũcumĩ mũare.

<sup>12</sup> Yũ acawererã, “ïgu eropa ta iigũcumĩ,” arĩrã mari gamero iibiricãrã. <sup>13</sup> Mari gamero ñerire iirã, peamegue wamorã árĩcãrã tiiaa mari. Espiritu Santo ïgu itamuri mera mari ñeri iiricũre duhurã, árĩpehrerinũri Goãmũ mera árĩrãca.

<sup>14</sup> Árĩpehrerã Espiritu Santore yũhrirã Goãmũ porã ta àhriima. <sup>15</sup> Espiritu Santo mari mera ïgu árĩnũgacũ Goãmũ porã árĩnũgabũ mari. Eropigu ïgu porã árĩcũ marire dipuwaja moasome. Peamegue wadoresome. Eropirã gũibeaa mari iribojeguere mari gũidiro dopa. ïgu porã árĩrã, Espiritu Santo ïgu itamuri mera dohpaguere “Ahũ,” arãa mari Goãmũre mari Pagũre <sup>16</sup> Eropigu Espiritu Santo mari pepirigue õpa masicũ iimi: “Diaye ta Goãmũ porã àhraa mari,” marire arĩ masicũ iimi ïgu. <sup>17</sup> Eropirã ïgu porã árĩrã, Goãmũ árĩpehrerire ïgu porãre “Ogũra,” ïgu arĩrare maripũ oparãca. Jesucristo mera irire oparãca mari. Cristo yare mari iira waja gajirã mera ñero tarinirã árĩrã, mari ïgu mera ùmarogue õaro árĩcãrãca. Eropirã Goãmũ ïgu porãre “Ogũra,” ïgu arĩrare oparãca mari.

<sup>18</sup> Dohpaguere i yebare ñero taria mari. Pũhrũguere ùmaroguere õaro árĩcãrãca. Eropirã dohpaguere ñero tarirã wũaro bũjawere pepibiricãque. Mari ñero tarirãpũ pehrea waroca. Pũhrũ õaro árĩcãrãca Goãmũ pohrogue. Eropirã mucubirirãca mari. Iri mucubiriripũ ne pehresome marire. <sup>19</sup> Eropirã Goãmũ porã Goãmũ pohrogue õaro árĩrãcoma. Mari eropa wacũ, árĩpehreri Goãmũ ïgu ïhacũnugura sã mama dihta gohroto pehrea waroca. <sup>20</sup> Dohpaguere ïgu ïhacũnugura árĩpehreri ñero taria. Iri gamero eropa wabiriyororo. Adãn ñeri iinũgara pũhrũ Goãmũ ïgu ïhacũnugurare

ñero wacũ iĩnumi. Eropigũ Goãmũ ìgũ ìhacũnugurare eropa ta ñero árdoreniĩnumi dohpa. Pũhrũ ìgũ ìhacũnugurare òaripũre gohrotogũcumi daja ìgũ. <sup>21</sup> Eropigũ Goãmũ ìgũ ìhacũnugura boapehreaborare òaripũre gohrotogũcumi. Goãmũ porãre òarã erã gohrotoro dopa ta, i ɸmũ maja ìgũ ìhacũnugura sãre árìpeherrerire òari dihta gohrotogũcumi. <sup>22</sup> Ire mari masia: Ñerire masa iinũgara pũhrũ árìpeherrerì Goãmũ ìgũ ìhacũnugura ñeri wayoro. Eropiro Goãmũ òarire ìgũ gohrotoborore corero iiaa. <sup>23</sup> Maripũ Espíritu Santore oparã àhraa. Ìgũ yarã mari wacũ Goãmũ Espíritu Santore mata omi marire. Ìgũ ìhacũnugura iro dopa ta mari sã ñero taria. Eropirã òaripũre gohrotoborore bũrigã gamerã cohrea. Eropirã ìgũ porã mari ìgũ pohro waboro sãre bũrigã gamerã cohrea mari. Mama dũpũre ìgũ marire ìgũ oboro sãre bũrigã gamerã cohrea. <sup>24</sup> Mari eropa corerã árìcũ, ìgũ ta marire peamegue wabonirãre taugũcumi. Ìgũ pohrogue árìnirã árìrã ìgũ pohrogue mari waborore corebiriboya mari. Marire ìgũ tautuhara pũhrũ árìcũ irire corenemobiriboya. <sup>25</sup> Eropirã ìabiriquererã ta dohpa, Goãmũ marire ìgũ tauborore corerã eropa coreniguia òaro yojaro mariro.

<sup>26</sup> Eropirã mari Goãmũre òaro guñaturabirã ìgũ gamerire òaro masibirã árìcũ ìha Espíritu Santo marire itamumi. Eropirã Goãmũre queoro serẽmasibiriquerecũ Espíritu Santopũ mari ya árìburire Goãmũre serẽbasami. Marire mojomoro ìagũ mari ya árìburire Goãmũre serẽbasami. <sup>27</sup> Goãmũ ìgũ gamero dopa ta, mari Jesu yarã árìborore serẽbasami ìgũ Espíritu Santo. Ìgũ eropa arì serẽbasacũ Goãmũ mari pepirire masipehogũ árìgũ Espíritu Santo ìgũ serẽrare masimi.

*Cristo ya turari mera ñeri iirire tarinũgarãca mari, arì gojañumi Pablo*

<sup>28</sup> Ire masia: Árìpeherrerã Jesure mahirã mari árìcũ ìgũ gamerire iimorãre beyepũ ìgũ marire. Eropa beyegũ Goãmũ eropa ìhadibuniguicãmi marire. Eropigũ mari ñero taricũ ìagũ Goãmũpũ marire òaro wacũ iigũcumi. <sup>29</sup> Goãmũ marire ìgũ yarã árìmorãre matague ta mari ne masa dehyoaboro coregue ta guñatuhapũ. Eropa guñagũ ìgũ magũ ìgũ òagũ árìro dopa ta marire òarã árìrare guñapũ. Ìgũ magũ iro dopa marire árìdorepũ bajarã masa ìgũ magũre mari tìgũcũborore. Eropigũ árìpeherrerore marire eropa wara mera marire òarã gohrotocũ iimi. <sup>30</sup> Matague ta ìgũ yarã ìgũ árìdorenirã mari árìcũ, ìgũ porã mari árìmorã sãre beyepũ marire. Eropigũ marire ìgũ beyenirãre “Dipuwaja moorã, òarã àhrima,” arì ìhami. Marire ìgũ eropa “Òarã àhrima,” arì ìagũ ìgũ mera ɸmaroguere òaro árìcũ iigũcumi.

<sup>31</sup> Irire masirã òpa pepia mari: Goãmũ marire ìgũ mahinirãre, ne gajirã ìhaturirã bocatĩubeama. <sup>32</sup> Goãmũ mari ya dipuwaja sĩribure ìgũ magũre obeodigũ árìmi. “Yũ magũre mahia. Eropigũ ìgũre obeobeaa,” arìbiridi árìmi. Eropigũ mari ya árìburire ìgũ magũre obeodigũ árìgũ Jesucristo mera árìpeherrerire òari dihtare ogũcumi ìgũ marire. <sup>33</sup> Goãmũ beyenirã mari árìcũ, ìgũ marire “Dipuwaja moorã, òarã àhrima,” arì ìhami. Mari ìgũ eropa arìnirã árìcũ, gajirã marire “Ñerã àhrima,” ne arì weresãmasibeama. <sup>34</sup> Cristo mari ya dipuwajare sĩrira pũhrũ masa mũriadi árìmi. Eropigũ Goãmũ diayepũ dohpaguere ìgũ àhrimi dorebu. Eropigũ ìgũ mari ya árìburire diaye ta ɸmũri nũcũ serẽbasagũ iimi Goãmũre. Eropirã gajirãpũ ne marire “Erã ñeri iira dipuwaja moaque,” arìmasibeama. <sup>35</sup> Cristo marire ìgũ bũrigã mahicũ gajirãpũ “Erãre ne mahibiricãque,” arìmasisome ìgũre. Eropigũ mari ñero tariquerecũ ta, mari gũiquerecũ ta, gajirã marire erã ñero iiquerecũ ta, mari oaboaquerecũ ta, suhri marirã mari árìiquerecũ ta, gũhyaro marire árìiquerecũ ta, marire erã wejẽquerecũ ta, Cristo marire eropa mahiniguicãgũcumi. <sup>36</sup> Goãmũ yare erã gojarapũ marire eropa waburire werero òpa arì werea:



Goãmũ, mũ yarã gũa árĩri waja erã wejësũmorã ta árĩniguirã tiiaa gũa. Oveja erã wejẽmorã erã árĩro dopa ta, gũa sãre eropa ta wahaa, arĩ gojañuma Goãmũ yare erã gojarapũgue.

<sup>37</sup> Eropirã mari ñero tariquererã ta, Cristo marire mahigũ ãgũ itamuri mera, turaro mera ñerire tarinugarãca mari. <sup>38-39</sup> Goãmũ marire ãgũ mahirare ãhmudi árĩmi mari Opũ Jesucristo mari ya árĩburire sĩricũ. Eropigũ ãgũ marire burigã mahigũ ne duhusome. Mari sĩricũ sãre, mari ojocaricũ sãre mahi duhusome. Dohpaguere, pũhrũgue sãre, marire ãgũ ne mahi duhusome. Eropirã anyua, watẽa oparã umaro majarã, i yeba majarã oparã, ñerã deyobirã sã marire Goãmũre “Mũ yarãre mahibiricãque,” arĩrã, bocatĩusome. Eropiro ne yujugũ ne yujuñe ãgũ ãhacũnugura marire ãgũpũre mahi duhudoreri ne mara. Marire ãgũ ne mahi duhusome.

## 9

### *Judio masa Goãmũ ãgũ beyenirã ãhřima, arĩ gojañumi Pablo*

<sup>1-2</sup> Yũ acawererã Israe masare guñagũ burigã bujawerea. Cristore gamebeama erã. Eropigũ ñero sĩporãcũ pepia yũhũ. Iri yũ eropa arĩri diaye ta ãhřaa. Yũhũ Cristo yagũ ãhřaa. Eropigũ mũare diaye arĩgũ iiaa. Espĩritu Santo yũ mera árĩcũ dohpaguere yũ acawererãre yũ arĩri iri diaye árĩcũ õaro masia yũhũ. ãgũ yũre irire õaro masicũ iimi. <sup>3</sup> Israe masa yũ acawererã, yaha curu majarã Jesucristore gamebirã peamegue warãcoma, arĩ guñaricũa. Eropigũ yũhũ erãre peamegue wamorãre taumasigũ õpa arĩboya Goãmũre. “Erã ya dipuwajare yũpũre peamegue wadoreque,” arĩboya. Eropigũ “Erã ya dipuwajare yũpũre cóãporo Cristo,” arĩboya. Yũ eropa arĩborañe wajaye masiya mara erã ya dipuwajare. <sup>4</sup> Erã yũ acawererã Goãmũ yare õarire mata opamũhtanirã árĩma. Israe mũrũ pãramerã árĩturiarã ãhřima. Eropigũ Goãmũ ãgũ porã erã árĩburire mata apiñumi Goãmũ erãre. Eropigũ Goãmũ ãgũ goesiriri mera erã watope árĩñumi. Eropiro árĩpehrerire ãgũ masare õaro iiburire weremũriñumi erãre. Eropigũ Moiserẽ ãgũ dorerare mata apimũhtañumi Israe masare. Eropirã Goãmũre umupeoburi wihire iimũhtañuma erã. Eropigũ erãre ãgũ õaro itamuborore weremũriñumi Goãmũ. <sup>5</sup> Gũa ya cururi gohra doce cururi ãhřaa. Eropirã gũa ñecũ sumarã Abrahã sã mũrague, erã pãramerã árĩturiarãgue ãhřaa gũa Israe masa. Eropigũ Cristo masa dehyoanijagũ gũa acaweregũ Israe masũ gohra árĩmi Cristo. ãgũ Goãmũ ta ãhřimi. Eropigũ ãgũ árĩpehrerã weca opũ ãhřimi. Árĩpehrerĩnũri ãgũre õaro umupeorã mari. Eropa ta iirã.

<sup>6</sup> Israe mũrũ ãgũ pãramerã árĩturiarã árĩquererã árĩpehrerã Goãmũ yarã gohra árĩbeama. Eropirã árĩpehrerã Goãmũ õaro oburire opamorã árĩbeama. Eropirã Israe masare “Õaro iigũra,” arĩdigũ árĩqueregũ Goãmũ erãre árĩpehrerãre õaro iibiricũ ãarã “Goãmũ ãgũ arĩdiro dopa ta iibeami,” arĩ pepibiricãro gahmea. <sup>7</sup> Õpa ãhřaa: Gajirã Israe masa Abrahã pãramerã árĩturiarã erã árĩquerecũ ta, “Abrahã pãramerã gohra yaharã gohra ãhřima,” arĩ ãabeami Goãmũ erãre. Eropigũ õpa arĩñumi Goãmũ Abrahãre. “Mũ magũ Isaa pãramerã árĩturiarã erã tamera diaye ta mũ pãramerã árĩturiarã árĩrãcoma,” arĩmũriñumi Goãmũ Abrahãre. <sup>8</sup> ãgũ eropa arĩ werecũ ire masirãca mari: Árĩpehrerã Abrahã pãramerã erã masa dehyoara pũhrũ, mata Goãmũ porã wasome erã. Goãmũ ãgũ arĩ werepirare õaro peerã ãgũre umupeorãpũ erã dihta árĩrãcoma Goãmũ porã. Eropirã erã ta ãhřima Abrahã pãramerã árĩturiarã gohra. <sup>9</sup> Õpa arĩñumi Goãmũ Abrahãre: “Gaji bojori inosubu ta yũ dujaricũ mũ marapo Sara majigũgãre opagocumo mũ magũre,” arĩñumi Goãmũ Abrahãre. Eropa ta arĩ werepiñumi ãgũre Abrahã magũ Isaa masa dehyoaborore. Eropigũ ãgũ magũ Isaa masa dehyoañumi. <sup>10</sup> Pũhrũ Isaa Rebeca mera marapocũcũ



igo uma perã sũhruanirã porãcuñumo. Erã pagu Isaa gua ñecu muru árĩñumi. <sup>11-12</sup> Eropirã erã porã erã masa dehyoaboro core, òarire, ñeri sãre erã iibiricũ ta Goãmũ erã pago árĩbore òpa arĩmuriñumi: “Ìgu pagu magupu ìgu tĩgure doregucumi. Eropigu ìgu opu árĩgucumi,” arĩmuriñumi igore igo porãcũboro core. Goãmũ ìgu gamero dopa ta beyemi ìgu. Eropa árĩgu, árĩgu ìgu dehyoaboro core Jacobore Esaú pagu magu árĩgure opu árĩbure beyemuriñumi. Eropigu masa erã iirire ìaboro core ìgu gamero dopa ta ìgu yarã árĩmorãre beyemi. <sup>13</sup> Eropa ta arĩ gojañuma ìgu yare erã gojarapũgue: “Jacobopũre mahimuriũ. Eropigu Esaúpũre mahibirimuriũ,” arĩmi Goãmũ, arĩ gojañuma iribojegure.

<sup>14</sup> ¿Iirire peerã dohpa arĩ pepibocuri mari? “¿Erã iiricũre ìaboro core yujugure eropa beyegu Goãmũ queoro iibeami,” ¿arĩ pepibocuri?” Árĩbeaa. Queoro iigu ta àhrimi. <sup>15</sup> Òpa arĩñumi Goãmũ Moise sãre: “Yũ gamegu dihtare mojomoro ìagura,” arĩmuriñumi ìgu Moiserẽ. Eropigu yujugũre ìgu gamero beyegu queoro iigu iimi Goãmũ. <sup>16</sup> Eropirã mari gamero Goãmũre marire mojomoro ìadoremasibea mari. Eropirã mari òarire iira waja sãre ne mojomoro ìabeami ìgu. Ìgu gamero dopa ta mojomoro ìhami. <sup>17</sup> Eropigu eropa ta ìgu gamero dopa iĩñumi Egipto majarã opu sãre. Òpa arĩñumi Goãmũ ìgure faraõre: “Egipto majarã opu árĩbure apigu iibũ mũre yũ turarire árĩpehrerãre ìhmubure. Eropigu árĩpehreri yeba majarãre, yũre erã masiborore opu acugu iibũ yũhũ mũre,” arĩñumi Goãmũ ìgure, arĩ gojara àhraa Goãmũ yare erã gojarapũgue. <sup>18</sup> Eropigu ìgu gamerãre mojomoro ìhami ìgu mari masare. Eropigu ìgure erã gamebiricũ ìagu ìgu gamero erãre yũhribiricũ iimi ìgu. Eropigu Goãmũ ìgu gamero dopa ta iimi.

<sup>19</sup> Ìgu eropiigu árĩcũ ìarã òpa arĩboca mũa: “¿Goãmũ erãre ìgure yũhribiricũ iidigu duhpigu ero pũhrũ erã ìgure yũhribirira dipuwaja moayuri erãre?” arĩ papũri serẽpiboca mũa. <sup>20</sup> Eropa arĩbiricãque. Mari masa bu árĩrã àhraa. Goãmũ mera papũrimasibea. Mátasoro wéagore “¿Duhpigo yũre eropa iiri mũhũ?” iri soro arĩ serẽpimasibea. Eropa ta mũa sã Goãmũre ìgu gamero iigure “¿Duhpigu eropa iiri mũhũ?” arĩ serẽpimasibea. <sup>21</sup> Mátasoro wéago máta mera igo gamero dopa iimo. Eropigo òarire dibuburi sorore iimasimo igo. Iri máta mera ta bu árĩri dibuburi soro sãre iimasimo igoa. Igo iiro dopa ta Goãmũ sã ìgu iidiaro dopa ta iimi.

<sup>22</sup> Eropigu Goãmũ peamegue ìgu cóãmorãre erã ñero iirare ìha guagu, erãre dipuwaja moadiaqueregu ta yoari boje erã ñeri iirire eropa ìacãnimi. Árĩpehrerãre ìgu turarire ìhmubu, mata erãre dipuwaja moanibirimi. <sup>23</sup> Eropa ta iimi marire ìgu mojomoro ìarãre, ìgu òatariagu ìgu árĩrĩre, ìgu turari sãre marire masidorebu. Matague ta marire, “Erãre mojomoro ìagura yũhũ. Yũ òarire ogura erãre,” arĩ apiñumi Goãmũ marire. <sup>24</sup> Eropirã maripu ìgu beyenirã árĩrã iiaa. Eropirã ìgu beyenirã judio masa dihta árĩbeama. Judio masa árĩbirã sã àhrima ìgu beyenirã. <sup>25</sup> Eropa ta àhraa judio masa árĩbirãre Goãmũ yare Osea waĩcũgu ìgu òpa arĩ gojadiro dopa ta:

Ero coregue yaharã árĩbirinirãre pũhrũ erãre “Yaharã àhrima,” arĩgura. Eropigu ero coregue yũ mahibirinirãre pũhrũgue erãre “Yũ mahirã àhraa mũa,” arĩgura, arĩpu Goãmũ. <sup>26</sup> “Yaharã árĩbeaa mũa,” Goãmũ ìgu arĩra yeba majarã Goãmũ ojocarinigucãgu porã ta árĩrãcoma, arĩ gojamũhtamuriñumi Osea iribojegure.

<sup>27-28</sup> Eropigu iribojegue majagu Isaia Israe masare òpa wereñumi: “Mari Opu i yeba majarãre bajarã masare yojaro mera diaye ta dipuwaja moa purumujugucumi. Eropirã wũariya maja imipayeri iro dopa Israe masa bajarã gohra erã árĩquerecũ ta bajamerãgã tarirãcoma erã,” arĩmuriñumi Isaia. <sup>29</sup> Eropigu dipaturi ta wereyugu òpa arĩ gojañumi Isaia:

Mari Opu árīpehlerã weca opu bajamerãgã mari mera majarãre taubigu, marire judio masare árīpehlerãre dederecũ iiboñumi igu. Sodoma majarãre, Gomorra majarã sãre igu dedeopehocũ iidiro dopa ta mari sãre dederecũ iiboñumi igu, arĩ gojamuriñumi Isaia.

*Judio masa òari buherire gamebirima, arĩ gojañumi Pablo*

<sup>30</sup> Eropa ta àhraa. Eropirã ire masique mua: Judio masa árībirãpu Goãmure amabiriquerẽ igure bocama. Jesucristore erã umupeocũ, “Òarã àhrima,” arĩ ìhami Goãmure erãre. <sup>31</sup> “Goãmure dorerire Moiserẽ igu apirare mari iicũ igu marire òarã ìagucumi,” arĩriñorã judio masapu. Eropa igu dorerire erã iiquerẽcũ ta Goãmure ìha suabirimuripu erãre. Eropirã òarã árīdiaquerẽ bocatĩubirimuriñorã. <sup>32</sup> Erã Jesucristore umupeoro mariro erã gamero Moise dorerire iidiarima Goãmure mera òaro árīdiarã. Eropirã Cristore erã ñeri iirare cóãbure gamebirã Goãmure pohrogue ne ejasome. <sup>33</sup> Eropa ta arĩ gojamũhtañuma Goãmure igu magure wereyurire:

Utãye iro dopa árīgure, yu beyedigure dohpague Jerusalengue apigu iiaa. Igure umupeobirã, igure tarinugarã yu pohrogue ne ejasome. Eropirã igure umupeorãpu igu mera òaro mucubiriniguirãcoma. Yu pohro warãcoma, arĩmi Goãmure, arĩ gojañuma Goãmure yare erã gojarapũguere.

## 10

<sup>1</sup> Yu acawererã, Israe masare Goãmure igu tauborore burigã gahmea yuhũ yu siporã mera. Eropigu Goãmure erãre igu tauburire serẽbasaa yuhũ. <sup>2</sup> Diaye ta erã Goãmure gamerire iidiarima. Eropa iidiaquerẽ ta igu gamerire masibeama. <sup>3</sup> Eropirã Goãmure erãre òacũ iiburire masibeama. Eropa masibirã erã gamero òarire iiquerẽrã bocatĩubirima. Erã eropiicũ, erã Goãmure Jesucristore umupeodorediro dopa erã iibiricũ, igupũ erãre “Òarã àhrima,” arĩ ìabirimi. <sup>4</sup> Cristore umupeorãre “Dipuwaja moorã, òarã àhrima,” arĩ ìhami Goãmure. Eropirã “Mari ñeri iira dipuwaja Goãmure tauboro dopa Moise dorerire iiro gahmea daja,” arĩ pepibiricãro gahmea. Cristore umupeorã igu mera taria.

<sup>5</sup> Moise iribojegue majagu òpa arĩ gojañumi: “Goãmure dorerire mari dũhyaro mariro iipehocũ Goãmure marire ‘Dipuwaja moorã, òarã àhrima,’ arĩ ìagucumi,” arĩ gojañumi igu. <sup>6</sup> Igu eropa arĩ gojaquerecũ ta dohpaguere masa Cristore erã umupeocũ Goãmure erãre “Òarã àhrima,” arĩ ìhami. Iri buheri “Cristore umupeoque,” i arĩ buheri òpa arĩ werea: “Òpa arĩ pepibiricãque mua: ‘¿Noa Cristore umaroguere árīgure aĩdijugucuri marire igu buhecũ daja?’ arĩ pepibiricãque mua. Cristo eraturhadigu arĩmi marire taugu eragu i yebaguere. <sup>7</sup> Eropirã daja ‘¿Noa sirinirã pohrogue Cristore masu aĩgãribocuri?’ arĩ pepibiricãque mua. Igu siridigu masa muridigu arĩmi,” arĩ werea i buheri. <sup>8</sup> Eropiro òpa arĩ werea Goãmure yare erã gojarapũgue: “Goãmure ya buherire mari amacũ igu buheri ohõ àhraa. Igu buherire masituhã mua. Eropirã igu buherire wereniguimurabũ,” arĩ gojañuma. Iri buherire “Cristore umupeoque,” arĩ buherire masare werea gua. <sup>9</sup> Iri buheri òpa arĩ werea: “Jesu yu opu àhrimi,” arĩ mari disiro mera werecũ, “Goãmure Jesure siridigure diaye ta masuñumi,” arĩ mari pepicũ ìha Goãmure marire peamegue wabonirãre taugucumi. <sup>10</sup> Jesure mari umupeocũ ìha Goãmurũ marire “Òarã àhrima,” arĩ ìagucumi. Eropigu gajirãre “Yuhũ Jesucristore umupeoa,” mari arĩ werecũ ìha igu marire peamegue wabonirãre taugucumi.

<sup>11</sup> Òpa arãa Goãmure yare erã gojarapũ: “Ìgure umupeorã, ìgure erã umupeorare ne bujaweresome. ‘Ìgure umupeobiricũ òaboya yure,’ ne arĩsome,” arĩyoro Goãmure yare erã gojarapũgue. <sup>12</sup> Judio masare, judio masa árībirã sãre Goãmure yujuro mera

ta itamumi. Mari Opu árîpehrerã tauro opu àhrimi ìgu. Eropigu árîpehrerãre ìgure serêrãre itamugucumi ìgu. <sup>13</sup> Eropã ta arî gojañuma Goãmũ yare gojarapũgue òpa arî gojarã: “Yũ ñerire cóãque. Eropigu yure tauque,” masa erã serêcũ erãre peamegue wabonirãre mari Opu taugucumi,” arî gojañuma. <sup>14</sup> Eropirã masa Cristore “Diaye ta marire taugũ àhrimi,” arî umupeobirã ìgure eropa serêmasibeama erã. Eropirã ìgu buherire Jesucristo erãre tauburi buherire peebirã ìgure umupeomasibeama. Eropirã ìgu buherire erãre weregu maricũ Goãmũre erã masisome. <sup>15</sup> Eropirã ìgu buherire weremorãre erã obeobiricũ ìgu buherire weremasibeama. Òpa arî gojañuma Goãmũ yare erã gojarapũgue: “Òari buherire marire òarã wacũ iiburi buherire weremorã erã eracũ ìarã òaro mucubiria mari,” arî gojañuma iribojegure.

<sup>16</sup> Eropã arîquerecũ ta masa bajarã Jesucristo yare òari buherire peediabeama. Eropã ta arî gojamuriñumi Isaia: “Opu, erãre mari wererare ne peediabeama,” arî weremuriñumi Isaia Goãmũre. <sup>17</sup> Eropirã masa Jesucristo yare òari buherire peerã peeñarã Cristore umupeoma.

<sup>18</sup> Eropigu ire serêpidiaca mũare: ¿Israe masa Jesucristo yare peebiriyuri mũa pepicũ? Yuju diaye ta erã peemuriñuma. Eropã ta àhraa Goãmũ yare erã gojarapũ sãre:

Goãmũ yare wererã árîpehreroguerẽ weresirirã wama. Eropirã árîpehrero majarãgue ìgu yare peema, arî gojañuma iribojegue.

<sup>19</sup> Dipaturi mũare serêpidiaca daja: ¿Israe masa peequererã òaro masibiriyuri mũa pepicũ? Masiriñuma. Masiquererã Jesucristore umupeodiabiriñuma. Erã eropa peediabiricũ gaji yeba majarã Goãmũ yarã wahama. Ìrire werenemogu Moise ìgu arîrãre weremũhtagura: Òpa arî gojañumi ìgu:

Òpa arî weremi Goãmũ Israe masare: “‘Bu árîrã àhrima,’ mũa arî ìanirãre yaharã árîmorã iigura. Yũ eropiicũ mũapũ erãre ìhaturirãca. Eropigu mũare erã mera guacũ iiguca yũhũ, arî weremi Goãmũ,” arî gojañumi Moise.

<sup>20</sup> Isaia sã doyarõ mariro òpa arîmuriñumi:

Òpa arîmi Goãmũ: “Yũre amabirãpũ yure bocama. Eropigu yure masibirãre erãre yure masicũ iibũ yũhũ,” arîmi Goãmũ, arî gojañumi Isaia. Judio masa árîbirã Goãmũ yarã erã waburire weregu eropa ari gojañumi.

<sup>21</sup> Israe masa pũre òpa ari gojañumi Isaia: “Òpa arimi Goãmũ: ‘Mũa ñeri iirare bujawereque yaharã wamorã, arimuriribũ erãre. Erãpũ yure tarinũgarã yure yũhribirimurima,’ arimi Goãmũ,” arî gojañumi Isaia.

## 11

### *Yujurãyerire Israw masare taugucumi Goãmũ, ari gojañumi Pablo*

<sup>1</sup> ¿Eropigu Israe masare Goãmũ igu beyenirãre erã tarinũgacũ erãre cóãpehocãyuri igu mũa pepicũ? Áribeaa. Erãre cóãbirimi ìgu. Yũ sã Israe masũ, Abrahã pãrami árîturiagu àhraa. Eropigu Benjami ya curu majagu àhraa.

<sup>2</sup> Iribojegue Goãmũ Israe masare beyemuriñumi. Ìgu eropa beyenirãre cóãbeami. Goãmũ yare erã gojarapũ Elia ìgu iirare werea. Iripũ Israe masare Elia Goãmũre ìgu arî weresãrãre masica mũa. Òpa arî weresãñumi ìgu: <sup>3</sup> “Opu, erã Israe masa mũ yare weremũhtanirãre wejêpehocãma. Eropirã mũre umupeori mesarire cóãpehocãma. Eropigu erã watope yũ dihta mũ yagu dujaa dohpaguere. Yũ eropa árîcũ ìarã yũ sãre wejêdiama dohpaguere,” arîñumi Elia Goãmũre. <sup>4</sup> Ìgu eroparîcũ peegu òpa arî yũhriñumi Goãmũ Eliare: “Mũhũ yahagu yujugu ta árîbeaa. Siete mil ãma yaharã àhrima dohpaguere. Erãre dihbuabũ yũhũ. Erã sã yure òaro umupeoma. Baal waicũgu wéadigure ne umupeobirimurama erã sã. Eropigu güibita mũhũ,” arîñumi Goãmũ Eliare iribojegure. <sup>5</sup> Irisubure Elia ìgu árîrisubure ìgu yarã árîmorãre

Goãmũ ïgũ dibudiro dopa ta dohpague sãre bajamerãgã Israe masare ïgũ yarã árĩmorãre dihbumi. Goãmũ erãremojomoro ïagũ dihbumi. <sup>6</sup> Õarire erã iicũ ïagũ dibubirimi. Erãremojomoro ïagũ dibugũ beyemi. “Õarire mũa iira pũhrũ mũare beyegũra,” arĩgũ, ïgũ diaye ta erãremojomoro ïagũ iibiriboñumi. Õarire erã iira pũhrũ erãre ïgũ beyecũ erãre wajatari árĩboya. Õarire erã iibiriquerecũ ta erãre diaye tamojomoro ïagũ Goãmũ beyemi erãre. <sup>7</sup> Eropa iri õpa ãhraa: Israe masare Goãmũ erãre, “Õarã ãhrima,” ïgũ arĩ ïacũ gamequererã ta erã yujuro bojebeama. Goãmũ ïgũ basi ïgũ beyenirãpũ õarã wahama ïgũ mera. ïgũre yujuro bojebirãpũ ïgũ yare peediabeama. <sup>8</sup> Eropa ta arĩyoro Goãmũ yare erã gojarapũ: “Goãmũ ïgũre gamebirãre ïgũ yare peebiricũ iimi. Eropigũ diaye árĩrire erã peequerecũ erãre õaro peebiricũ iimi Goãmũ. Eropa ta árĩniguicãma dohpague sãre,” arĩ gojañuma iribojegure.

<sup>9</sup> Eropigũ õpa arĩñumi Davi mũrũ iribojegue majagũ Goãmũre:

Erã Israe masa erã bosenũri mucubiririnũri iirã ñero iima erã. Erã eropa iicũ ïagũ dipuwaja moaque mũhũ erãre. <sup>10</sup> Erãre õaro peebiricũ iique mũhũ. Eropirã eropa dipuwajacũrã árĩniguicãporo erã. Eropirã eropa bũjawereniguicãrãcoma, arĩñumi Davi Goãmũre.

*Judio masa árĩbirãre peamegue wabonirãre taugũcumi Goãmũ, arĩ gojañumi Pablo*

<sup>11</sup> ¿Judio masa Cristore erã gamebiricũ ïagũ Goãmũ erãre cóãcãyuri mũa pepicũ? Cóãgohracãbiriñumi. Eropa erã Cristore erã gamebiricũ dohpaguere judio masa árĩbirãpũ Goãmũ ïgũ taumorã wahama. Dohpaguere ïgũ yarã iimi Goãmũ erãre. ïgũ eropiicũ ïarã yujurãyeri judio masapũ erãre ïhacũ erã sã Jesucristore umupeodiana. <sup>12</sup> Judio masa erã Goãmũre tarinũgacũ judio masa árĩbirãpũ Goãmũ ïgũ õari buherire peema. Eropirã árĩpehrero majarã judio masa árĩbirã Goãmũ taumorã wañorã õaro warã. Pũhrũ judio masapũ Cristore erã umupeonũgara pũhrũ tamerare i yeba majarãre õatariaro waroca.

<sup>13</sup> Dohpaguere mũare judio masa árĩbirãre werebu iiaa. Cristo apimi yũre mũare judio masa árĩbirãre buhebure. Eropa buhegũ bu gohra iigũ iibeaa. <sup>14</sup> Yũre eropa buhedoredigũ arĩgũ masare weremũra. Yũ acawererãre judio masare mũa Jesucristo umupeorare ïhacũcũ iidiagũ werea. Goãmũ taunirã mũa arĩcũ ïarã erã sã Cristore gahme ïgũ taumorã wabocoma, arĩgũ werea. <sup>15</sup> Dohpaguere judio masare Goãmũ boje apigũ, gajirãguere õari buherire Goãmũ weredoremĩ ïgũ mera erã õaro árĩmorãre. Eropiro judio masare ïgũ boje apicũ õaro wahabũ i yeba majarãre judio masa árĩbirãre. ïgũ eropiidiro tauro judio masa sãre ïgũ yarã árĩmorãre ïgũ iicũ tamerare õatariaro waroca i yeba majarãre. Goãmũ mera erã õaro arĩcũ bajarã masa Jesure umupeorãre peamegue wabonirãre taugũcumi. <sup>16</sup> Õpa ãhraa: Abrahã gũa ñecũ mũrũ Goãmũ mera õaro ïgũ arĩdiro dopa ta ïgũ pãramerã árĩturiarãgue sã Goãmũ mera õaro árĩrãcoma Cristore umupeorã arĩrã.

<sup>17</sup> Yujurãyeri erã eropa arĩrã árĩquerecũ ta gajirã erã acawererãpũre judio masare Goãmũ boje apinimi dohpa. Judio masa Goãmũ ïgũ beyemũhtanirã olivo waĩcũdigũ otedigũ dũpũri iro dopa ãhrima. Mũa judio masa árĩbirã ïgũ beyemũhtanirã árĩbirã nũgũ majagũ dũpũri iro dopa ãhraa. Olivo otedigũ dũpũrire yujuyeri dũpũri ïgũ tabe cóãdiro dopa ta gajirã judio masapũre Goãmũ cóãmi. Eropa cóãgũ ïgũ yarã árĩbirã wacũ iimi erãre. ïgũ cóãra dũpũrire gajĩ dũpũrire nũgũ majagũ dũpũrire gohroto tuhboro dopa, Goãmũ judio masare judio masa árĩbirã mera gohrotomi. Eropa gohrotogũ mũare judio masa árĩbirãre ïgũ yarã wacũ iimi. <sup>18</sup> Mũare ïgũ eropa gohrotocũ, “Judio masa tauro õarã ãhraa pare gũa,” arĩ pepibiricãque. Ire guñaque:



Judio masapure beyemuhтары Goãmұ. Mұарұ erã pұhrұ Goãmұ yarã árĩrã mұa sã Goãmұ ðari oburire opa. Eropirã “Judio masa tauro ðarã ãhraa,” arĩ pepibircãque.

<sup>19</sup> Mұa judio masa árĩbirãpұ ðpa arĩboca: “Yujurãyeri dұpұrre ĩgұ cõãdiro dopa ta Goãmұ judio masare cõãmi yujurãyerire. Eropa cõãgұ ĩgұ gajı dұpұrre gohroto ĩgұ tuhdiro dopa ta ĩgұ yarã mari wamorãre apimi,” arĩboca mұa judio masare tarinugadiarã. <sup>20</sup> Õpa ãhraa. Erã Jesure umupeobirira dipuwaja cõãpұ Goãmұ erãre. Eropigұ mұa sãre Jesure mұa umupeobiricũ ĩgұ yarã árĩmorãre mұare apibiriboañumi. Eropirã “judio masa tauro ðarã ãhraa gұa,” arĩ pepibircãque mұa. Eropa arĩbirã ta Goãmure ðaro umupeoque. <sup>21</sup> Mұhtari dұpұri iro dopa judio masa Goãmұ yarã árĩmұhtañuma. Iri gohroto tuhra dұpұri iro dopa ta erã pұhrұ mұa Goãmұ yarã wabұ. Eropigұ Goãmұ ĩgұ yarã árĩmұhtanirã ĩgұre umupeobiricũ ĩagұ cõãpұ erãre. ĩgұ erãre eropiidiro dopa ta mұa sãre cõãgұcumı mұa ĩgұre umupeobiricũ. Eropirã Goãmure ðaro umupeoque mұa. <sup>22</sup> Goãmұ mұare ðaro iigұ ĩgұ árĩcũ masique mұa. Eropirã gұhyadiaro mera, ĩgұ dipuwaja moagұ ĩgұ árĩcũ sãre masique mұa. ĩgұre umupeobirãre ĩgұ dipuwaja moagұcumı. Eropa árĩqueregұ ta mұa ĩgұre umupeonigucũ mұare ðaro iigұcumı ĩgұ. ĩgұre umupeobiricũ ñeri dұpұrre ĩgұ tabe cõãdiro dopa ta mұa sãre cõãgұcumı Goãmұ. <sup>23</sup> Masapұ erã tabe cõãra dұpұrre tuhumasibeama daja. Goãmұpұ árĩpehrero iimasigұ ãhrimi. Eropigұ judio masa ĩgұ cõãnirã Cristore erã umupeodiacũ Goãmұ ĩgұ yarã árĩcũ iigұcumı daja erãre. <sup>24</sup> Mұa judio masa árĩbirã Goãmұ yarã árĩbirimұriyoro. Eropa árĩbirã mұa árĩquerecũ ta Goãmұ mұare ĩgұ yarã árĩcũ iigұcumı. Eropigұ ĩgұ beyemұhtanirã mұa árĩbiriquerecũ ta ĩgұ yarã árĩcũ mұare iidiami ĩgұ. Eropigұ judio masare ĩgұ beyemұhtanirãpұre ĩgұ yarã árĩcũ ĩgұ tauro iidiağұcumı.

### *Pұhrұ Israe masare tağұcumı Goãmұ, arĩ gojañumi Pablo*

<sup>25</sup> Yұ acawererã, ire masa erã masibirirare mұare weregұra. Mұa ðpa arĩboca: “Dohpaguere gұa dihtare beyemi Goãmұ. Gұapұ masipehocã,” mұa arĩ pepiboca. Mұa irire arĩ pepibiriboro dopa ire weregұra mұare. Õpa ãhraa masa erã masibirira: Dohpaguere bajarã judio masa Goãmure peediabirã ãhrima. Eropirã bajarã judio masa árĩbirãre Goãmұ ĩgұ queodiropẽ ĩgұ yarã wacũ iigұcumı. Ero pұhrұ judio masapұ ĩgұre gamerãcoma daja. <sup>26</sup> Erã eropa gamecũ árĩpehrerã Israe masare Goãmұ tağұcumı erã peamegue wabonirãre. Goãmұ yare erã gojarpūgue eropa ta arĩ gojañuma:

Jerusalén waĩcұri macague judio masa ya macague erãre taubu arigұcumı. Eropigұ Jacobo mұrұ pãramerã árĩturiarãre erã ñerire ĩgұ cõãgұcumı. <sup>27</sup> Eropigұ erãre tağұ iribojegue yұ arĩ erãre werepirare iigұcumı, arĩmi Goãmұ, arĩ gojamұhtañuma Goãmұ yare erã gojarapūgue.

<sup>28-29</sup> Dohpaguere erã judio masa Cristo yare umupeobirã Goãmure gamebeama. Erã eropiicũ dohpaguere mұapұ judio masa árĩbirãpұ Cristore umupeonugabұ. Judio masapure Goãmұ beyemұhtañumi. Goãmұ ĩgұ arĩ werepidiro dopa ta masare ĩgұ beyediro dopa ta diaye iimi ĩgұ. Eropigұ judio masa ñecұ sұmarã mұra ĩgұ beyenirã erã árĩcũ dohpague erã árĩturiarã sãre ĩgұ mahimi. <sup>30</sup> Iribojegue mұa sã Goãmure tarinuganirã árĩriyoro. Dohpaguere judio masa Goãmure erã tarinugacũ ĩagұ ĩgұ mұapұre mojomoro ĩagұ taumi. <sup>31</sup> Dohpaguere judio masa ĩgұre tarinugarã ãhrima. Erã eropa árĩquerecũ ta Goãmұ dohpamasapure Goãmұ beyemұhtañumi. Goãmұ ĩgұ arĩ werepidiro dopa ta masare ĩgұ beyediro dopa ta diaye iimi ĩgұ. Eropigұ judio masa ñecұ sұmarã guere mұare mojomoro ĩadiro dopa ta erã sãre pұhrұ mojomoro ĩagұcumı. <sup>32</sup> Õpa ãhraa: Árĩpehrerã masare Goãmұ ĩgұre erã tarinugara waja



yujuro mera dipuwajacudoremi. Eropigu árĩpehrerã erã dipuwajacurã erã árĩcũ ìha árĩpehrerãre yujuro mera mojomoro ìagacumi ìgu.

<sup>33</sup> Òatariagu àhrimi mari Goãmũ. Turatariagu àhrimi. Òaro masipehogu àhrimi ìgu. Eropiro ìgu guñarire, ìgu iiburire marire òaro masiya mara. <sup>34</sup> Òpa arĩ gojañuma Goãmũ yare erã gojarapũgue: “Goãmũ mari Opũ ìgu guñarire ne masa òaro masibeama. Eropirã masa ìgure ‘Òpa iique,’ arĩ weremasibeama. <sup>35</sup> Eropirã masa Goãmũre erã gajino ora pũhrũ ‘Ìgu marire wajamomi,’ arĩ masiya mara masa,” arĩ gojañuma iribojeguerẽ. <sup>36</sup> Goãmũ árĩpehrerire iidi árĩmi. Eropigu ìgu turari mera árĩpehrerire árĩcũ iidoredi árĩmi ìgu. Eropiro árĩpehreri ìgu iiburi àhraa. Eropirã árĩpehrerinũri ìgure umupeorã mari. Eropa ta iirã mari.

## 12

### *Goãmũ gamerire marire iiniguicãdoreñumi Pablo*

<sup>1</sup> Goãmũ marire turaro mojomoro ìhami. Ìgu eropa mojomoro ìagu árĩcũ ìarã, yu acawererã, mũa basi ta Goãmũ gamerire iiniguicãrã árĩque. “Mũhũ yu opũ àhraa,” arĩque ìgure. Eropirã òaripũre gohrotonirã, ñeri marirã árĩque. Eropa ta iiro gahmea marire Goãmũre umupeorãre. Mũa eropa árĩrã árĩcũ ìgu mucubirigucumi. Eropigu mũare irire bũrigã iidorea. <sup>2</sup> Iyeba majarã erã gamero dopa ta pepibiricãque mũa. Eropirã mũa pepiriguere Goãmũ gamerire gohrotoque mũa. Eropirã òaripũre gohrotonirã árĩrãca mũa. Eropa gohrotorã Goãmũ mũare ìgu iidorerire masirãca mũa.

<sup>3</sup> Goãmũ yũre mojomoro ìagu mũare buhedoregu beyemi yũre. Eropigu árĩpehrerãre mũare òpa dorea yũhũ. “Òatariagu àhraa yũhũ,” arĩ pepibiricãque. Eropa pepicãque. Jesucristore mũa umupeorã “Goãmũ yũre ìgu itamuro mera iimasia yũhũ ìgu yare,” arĩ pepique. <sup>4</sup> Òpa arĩ werenemogũra yũhũ: Mari mojotori, guburi, cuiri, árĩpehreri mari dũpũ árĩri baja àhraa. Mari dũpũ árĩri sã yuju dũpũ árĩquerero gajiropa árĩri mohmeri opaa. Mari dũpũ mari Jesu yarã iro dopa àhraa. Cristo dũpũ iro dopa árĩrã yuju curu ta àhraa mari. <sup>5</sup> Mari eropa árĩcũ ìagu gajiropa árĩri dihta mohmerire apimi Goãmũ marire. Eropirã bajarã masa árĩquererã ta Cristore umupeorã árĩrã ìgu dũpũ iro dopa yuju curu àhraa mari.

<sup>6</sup> Eropigu marire mari nũcũre gajiropa árĩri mohmerire mari iimasiburire ìgu turari mera apidigu árĩmi. Ìgu eropiicũ maripũ ìgu apirare òaro iiro gahmea. Eropirã Jesu yarã òpa game itamuporo: Yujurãyerire Goãmũ ìgu yare weretaumasimorãre apidi árĩmi. Eropirã erã Cristore erã masiropẽ ìgu yare òaro weretauporo gajirãre. <sup>7</sup> Gajirãre Goãmũ yarãre erã itamumasimorãre apidi árĩmi. Eropirã erãpũ masare òaro mera itamuporo. Gajirãpũre Goãmũ yare buhemorãre apidi árĩmi. Eropirã erã masare òaro buheporo. <sup>8</sup> Gajirãre masare mucubiricũ iimorãre apidi árĩmi. Eropirã irire òaro iiporo. Gajirãre erã ya erã gamerire omorãre apidi árĩmi. Eropirã gajinore orã, òaro mera mucubiriri mera oporo. Eropirã gajirãre doremasimorãre apimi. Erã dorerã òaro mera doreporo. Eropigu daja mojomorocurãre itamumasimorãre apidi árĩmi. Erãre itamurã mucubiriri mera itamuporo, arĩ werea mũare.

### *Jesu yarã árĩrã òpa iirã àhrima, arĩ gojañumi Pablo*

<sup>9</sup> Gajirãre mahi umupeorã, diaye ta mahi umupeoque. Eropirã ñero iirire doorã árĩque mũa. Eropirã òaripũre gameniguicãque. <sup>10</sup> Mũa pagũ porãre mũa umupeoro dopa ta Jesu yarã mũa mera majarã sãre umupeoque. Eropirã mũa mera majarã erã gameripũre itamumũhtaque. Pũhrũ mũ yare iique.

<sup>11</sup> Goãmũ gamerire iirã ne tebiricãque. Eropirã mari Opũ ìgu dorediro dopa ta òaro mucubiriri mera iique.

<sup>12</sup> Goãmũ mũare peamegue wabonirãre ïgu taunirã ãhraa mũa. Irire masirã mucubirique mũa. Eropirã ñero tarirã Cristo yare duhuro mariro yujuro bojeque mũa. Eropirã Goãmũre eropa serënikuicãque.

<sup>13</sup> Gajino Jesu yarãre duhyacũ ïarã oque erãre. Eropirã mũa ya wirigue masa erã ejacũ òaro siporãcũ erãre bocatirique.

<sup>14</sup> Mũare ñero iirãpũre erã òaro árĩburire serëque Goãmũre. Eropa òadorerã erãre ujapeobiricãque.

<sup>15</sup> Gajirã mucubiricũ ïha erã mera mũa sã mucubirique. Gajirã orecũ ïha erã mera oreque.

<sup>16</sup> Mũa mera majarã mera òaro árĩque mũa. Eropirã “Gajirã tauro òagu ãhraa,” arĩ pepibiricãque. Bu árĩrã mera sãre òaro árĩque. Eropirã “Masitarinugarã ãhraa gũa,” arĩ pepibiricãque.

<sup>17</sup> Gajirã mũare ñero iiquerẽcũ ta, erãre ñero ii gamebiricãque. Eropirã òarire iique. Eropirã òarã mũa árĩrĩre árĩpehrerã masa ïha masirãcoma. <sup>18</sup> Mũa masiropẽ turaro mera òarire iique árĩpehrerã mera mũa òaro árĩcãboro dopa. <sup>19</sup> Mũa yũ mahirã, yũ acawererã, gajirã mũare erã ñero iiquerẽcũ ta erã iro dopa ñero ii gamebiricãque. “Erã ñero iira dipuwaja Goãmũpũ dipuwaja moagũcumĩ,” arĩ guñarã ñero ii gamebiricãque erãre. Goãmũ yare erã gojarapũgue eropa ta arĩ gojañuma: “Yũpũ masa erã ñero iira dipuwaja moagu ãhraa. Eropigũ diaye ta dipuwaja moagũra, arĩmi mari Opũ,” arĩ gojara ãhraa. <sup>20</sup> Eropirã òpa iique mũa: Mũare ïhaturidigũ ïgu oaboacũ ïarã ejoque ïgũre. ïgu ñemesibucũ deco tĩaque ïgũre. Eropa iirã mũare ïhaturidigũ ïgu ñero iirare guhyasĩricũ iirãca. <sup>21</sup> Eropirã gajirã mũare erã ñero iiquerẽcũ mũapũ erãre ñero ii gamebiricãque. Eropirã erãre òaro iique. Eropa iirã ñeripũre tarinugarã iirãca mũa.

## 13

<sup>1</sup> Árĩpehrerã oparãre Goãmũ dihta apimi. Eropigũ mũa tauro oparã sãre Goãmũ ta beye apidigũ arĩmi. ïgu eropa apinirã erã árĩcũ ïarã árĩpehrerã mũa erãre yũhrique. <sup>2</sup> Mari tauro oparã árĩrãre tarinugarã Goãmũ ïgu apinirãre tarinugarã iirãca mari. Eropa tarinuganirãre Goãmũpũ dipuwaja moagũcumĩ. <sup>3</sup> Òarire iirãre gũicũ iimorã árĩbeama oparã. Ñerire iirãpũre gũicũ iirã ãhrima oparã. Eropirã òarire iique mũa oparãre mũa gũibiriburire. Eropa iirã gũisome mũa. Òarire mũa iicũ, opũpũ “Òarire iiabũ,” arĩgũcumĩ mũare. <sup>4</sup> Oparã Goãmũre itamurã ta ãhrima mũa òaro árĩcãborore. Erã eropa árĩquererã ta erã dorerire tarinugarãpũre dipuwaja moamorã ta ãhrima. Árĩpehrerã ñerire iinirãre dipuwaja moadoregũ Goãmũ erãre apidi arĩmi. <sup>5</sup> Eropirã mari oparãre yũhrique. Goãmũ ïgu dipuwaja moaborore gũiro mera yũhrique. Eropirã umupeori mera “Òaro iiro gameca yũre,” arĩ pepiri mera òaro yũhrique erãre. <sup>6</sup> Mũa oparãre iri mohmerire apidi arĩmi Goãmũ. Eropirã iri mohmerire erã iicũ ïarã mũa oparã ya árĩburire wajaseabasaa mũa erãre.

<sup>7</sup> Árĩpehrerãre mũa oparãre òaro yũhrique. Eropirã oparã erã wajaseadorerare wajayeque mũa. Eropirã oparã gajire wajayedorecũ sãre wajayeque. Eropirã árĩpehrerã oparãre umupeoque, arãa yũhũ mũare.

<sup>8</sup> Gajirãre wajamobiricãque. Erãre mahi umupeoro gahmea. ïgu pohro árĩgũre mahigũ Goãmũ dorerire iipehocãgũ ãhrimi. Eropirã mũa pohro árĩrã sãre mahiro gahmea. <sup>9</sup> Òpa arãa Goãmũ doreri: “Gajigũ marapo mera ñero iirã árĩbiricãque. Masare wejëbiricãque. Yajabiricãque. Gajirãre gũya ñeri quere iibiricãque. Gajirã yare turaro uaribejabiricãque,” arĩ werea ïgu doreri. Gaji ïgu doreri sã ãhraa. Iri eropa árĩquerẽcũ ta yujuñe dorerĩñere mũare werebu iiaa. Òpa ãhraa: “Mũ basi

mahiro dopa ta mũ pohro árĩrãre mahique,” arĩ werea ãgu doreri. Mũa pohro árĩrãre mahirã Goãmũ dorerire árĩpeherrerire yũhrirã tiiaa. <sup>10</sup> Gajirãre mahirã erãre ñero iisome. Eropirã erãre mahi umupeorã Goãmũ dorerire yũhripehorã ãhraa mũa.

<sup>11</sup> Eropa gajirãre mahique õpa masirã: Jesu marire ãgu dujariboro merogã duhyanijaa. ãgure mari ne masinũgarã õpa arĩ pepiribũ: “Yoara pũhrũgue marire taugũ arigũcumi Jesu,” arĩ pepiribũ. Mari eropa arĩ pepiquerecũ ta merogã duhyaa Jesu marire ãgu taugũ ariboro. Eropirã carĩrã iro dopa árĩbircãque. ãgu yare õaro guñanũrũque. Jesu ariboro corere õaro pee masi yuque. <sup>12</sup> Dohpaguere ñerã erã iirinũri árĩro iiaa. Cristo ãgu aririnũ iri ñeri peherreroca. ãgu ariboro merogã duhyaa. ãgu ariboro merogã duhyacũ ãarã ñerire iibircãrã mari. Eropirã Goãmũ gameripũre iirã mari. Eropa Goãmũ yare iirã ñeripũre duhcãrãca mari. <sup>13</sup> Eropirã õaripũre iirã. Eropa iirã bosenũri árĩcũ mari ãaribejarire ñeri iibirabircãrã. Eropirã merebircãrã. Eropirã nome mera ñero iibircãrã. Gajirã mera game ãhaturirã árĩbircãrã. Nome sã ãma mera ñero iibircãporo. <sup>14</sup> Eropirã mari Opũ Jesucristo ãgu itamuri mera ãgu gamero dopa ta õaro árĩcãque. Eropirã mũa ãaribejarire ñerire ne iibirabircãque.

## 14

*Mũa acawererãre Jesu yarãre “Ñero iirã iima,” arĩ werewũabircãque, arĩ gojañumi Pablo*

<sup>1</sup> Jesure umupeogũre, Jesu gamerire ãgu õaro masinibircũ dohpa, ãgure õaro bocatĩrique. Eropa bocatĩrirã Jesu gamerire ãgu masinibircũ ãarã ãgu masibiririre duyasobircãque ãgure. <sup>2-3</sup> Gajirã “Goãmũ árĩpeherrerire badoremi marire,” arĩ pepima. Eropirã gajirãpũ õaro masinibirã “Waibũgu dihipũre bacũ Goãmũ gamebeami,” arĩ pepima. Eropirã oteri dihtare bahama. “Dihire bamasia,” arĩrã, “Dihire bamasibea,” arĩrã sã erã Jesucristore umupeorã árĩcũ ãha Goãmũ õarã ãhami erãre. Eropirã “Árĩpeherrerire Goãmũ badoremi,” arĩrãpũ “Iri dihire bamasibea,” arĩrãre ãhaturibircãporo. Eropirã dihire babirãpũ dihire barãre “Ñero iirã iima,” arĩ werewũabircãporo. <sup>4</sup> Mũa Jesure umupeorã yujugũ dorero doca ãhraa mũa. Mũa eropa árĩcũ ãarã mũa basi game werewũamasibea. Jesucristo mũa Opũ ãgu gamerire mũa iibiricũ ãagũ ãgu dihta irire weresãmasimi. Mũa õaro iicũ sãre irire ãgu weremasimi mũare. Eropigũ ãgu dorerire iirãre õarire bocatĩrucũ iigũcumi mari Opũ.

<sup>5</sup> Yujurãyeri yujunũre “Irinũ dihta soorinũ gamenere Goãmũre umupeorinũ ãhraa,” arĩ pepima. Gajirãpũ “Ûmuri nũcũ gamenere Goãmũre umupeoro gahmea,” arĩ pepima. Eropigũ õpa werea mũare yũhũ: Mũa nũcũ mũa pepirire “¿Dinũ ãhriri mari gamenere umupeorinũ? ¿Dinũ árĩbeari?” arĩ pepi masique mũa.

<sup>6</sup> Gajigũ yujunũ iimi ãgu Goãmũre umupeoburinũre. Eropigũ ãmuri nũcũ gamenere umupeobiriqueregũ, Goãmũre õaro umupeomi ãgu sã. Eropigũ árĩpeherrerire bagũ sã “Õhaa,” arĩ serẽmi Goãmũre. Eropigũ ãgu sã Goãmũre umupeogu ta ãhrimi. Eropigũ gajinore babi sã ãgu sã umupeomi Goãmũre. Eropigũ ãgu sã Goãmũre “Õhaa,” arĩ serẽmi.

<sup>7</sup> Mari gameri dihtare iirã árĩmasibea mari. Cristo ãhrimi mari Opũ. Eropigũ mari ojocaricũ, mari sĩricũ mari Opũ ãhrimi ãgu. <sup>8</sup> Dohpaguere mari ojocaripõ Cristo yare iimorã dihta ãhraa mari. ãgu yarã ãhraa. Mari sĩrira pũhrũgue sãre ãgu yarã árĩniguicãrãca. Eropigũ mari ojocaricũ mari sĩricũ sãre Cristo mari Opũ ta ãhrimi. <sup>9</sup> Eropa ta ãhraa. Cristo sĩri, masa mũria, ojocarimi sĩrinirã sãre erã opũ árĩbu.

<sup>10</sup> ¿Duhpirã mũa acaweregũre Jesu yagũre “Ñero iigũ iimi,” arĩ werewũadiari mũa? ¿Duhpimorã mũa acaweregũre caradiupidiari mũa? Mari árĩpeherrerã Cristo core

mari niguicũ ĩɣurɸu mari iirare masipehogu, mari iirare ĩagucumi. ĩɣu eropa ĩabu ĩɣu árĩcũ mɸa acaweregure “Ñerire iigu áhrimi,” arĩ werewɸabiricãque. <sup>11</sup> Goãmu yare erã gojarapũgue oɸa arĩ gojañuma:

Õɸa arĩmi mari Opɸu: “Yɸhɸu ojocarigu áhraa. Iri diaye ta áhraa. Eropirã árĩpehrerã yure gamerã, gamebirã sã yɸ core merejarãcoma. Eropirã árĩpehrerã ‘Mɸhɸu turagu gɸa Goãmu ta áhraa,’ arĩ, yure umupeorãcoma,” arĩmi mari Opɸu, arĩ gojañuma.

<sup>12</sup> Eropigu mari árĩpehreri mari iirare Goãmu serẽpigucumi. ¿Duhpirã eropa iiari? arĩ serẽpigucumi. ĩɣu eropa serẽpicũ yuhrirãca mari.

*Mɸa acaweregu ñero dujacũ iibiricãque mɸa, arĩ gojañumi Pablo*

<sup>13</sup> Eropirã mari mera majarã sãre “Ñerã áhrima,” arĩ werewɸabiricãrã. Eropirã mari acaweregure Jesu yagure ñero dujacũ iibiricãrã. ĩɣu Goãmu yare duhucũ iibiricãrã. <sup>14</sup> Yɸhɸu Jesucristo yagu áhraa. Eropigu oɸa oaro masia yɸhɸu: “Árĩpehreri Goãmu ĩɣu badorera áhraa,” arĩ masia. Gajigɸu eropa arĩmasibeami. ĩɣurɸu gajinore bagu “Ñero iigu iiaa,” arĩ pepimi. Eropiro ĩɣu irire arĩ pepiqueregu bagu diaye ta dipuwajacɸgu dujami. <sup>15</sup> Iri diaye ta áhraa. Mɸa dihire mɸa bacũ mɸa acaweregu “Iri Goãmu badorebirira áhraa,” arĩɣurɸu ĩhacũbocumi mɸare. Eropigu irire bagu, “Ñero iigu iica yɸhɸu,” arĩ wɸaro guñaricubocumi ĩɣu. Eropirã mɸa bari mera ĩɣu ñero pepicũ ĩha irire dipaturi babiricãro gahmea mɸare. Mɸhɸu mɸraro ta bagu mɸ acaweregure umupeosome. Mɸa acaweregu yañe árĩborañe sãre sĩridi arĩmi Jesucristo. Eropirã mɸa irire badiaquererã mɸa acaweregure Goãmu yare duhucũ iibiricãque. Eropirã irire babiricãque. <sup>16</sup> “Ire gɸa eropa iicũ oapũricãca,” mɸa arĩ pepiquerecũ gajirã mɸare ĩha werewɸabocoma. Erã eropa werewɸacũ ĩarã dipaturi irire ĩnemobiricãque guare werewɸari arĩrã. <sup>17</sup> Goãmɸu mari opɸu áhrimi. ĩɣu eropa árĩcũ, mari badiari mari ihridiari sã eropa árĩcãro iiaa. Bu gohra áhraa. Eropiro mari Opɸu ĩɣu dorerire oarire mari iicũ iri oari gohra árĩro tĩiaa. Eropiro gajirã mera mari oaro árĩcãcũ oari gohra árĩro iiaa. Eropiro Espĩritu Santo ĩɣu ĩtamuri mera mari mucubiricũ oari gohra árĩro iiaa. <sup>18</sup> Eropa ta Cristo yare oarire iicũ ĩarã Goãmu sã, masa sã “Õaro iiabu mɸhɸu,” arĩrãcoma.

<sup>19</sup> Eropa ta iirã mari tamera mari oaro árĩcãborore, mari basi mari game ĩtamuburire. Eropa iiricãrã Jesure umupeonemorãca. <sup>20</sup> Eropirã mɸa bari mera Jesu yarãre Goãmu yare duhucũ iibiricãque. Gajigu Jesu yagu “Goãmu badorebirira bari áhraa,” ĩɣu arĩra barire mɸa bacũ ĩagu ĩɣurɸu Goãmu yare duhubocumi. Eropirã irire babiricãque. Diaye ta árĩpehreri bari Goãmu ĩɣu badorera bari áhraa. Iri eropa árĩquerecũ gajigu “Iri barire Goãmu badorebeami,” arĩ pepimi. Eropigu mɸa iri barire bacũ ĩagu ĩɣurɸu ĩhacũ babocumi ĩɣu sã. Eropa bagu “Ñero iigu iiaa,” arĩ pepi Goãmu yare duhubocumi. Eropirã marire ĩɣu ĩhacũ bacũ iirã mari sã ñero iirã tĩiaa. Eropirã iri barire babiricãro gahmea marire. <sup>21</sup> Waimɸrã dihire mɸa bacũ vinore mɸa ihricũ ĩagu, gajigu Jesu yagu ĩabocumi. Eropa ĩagu ĩhacũ babocumi daja. “Irire bagu ñero iigu iica yɸhɸu,” arĩ pepibocumi. Eropa arĩ pepigu tamera bagu ñero iigu iimi. Eropirã ĩɣu ñero ĩɣu iibiriborore waimɸrã dihire, vino sãre mɸarɸu ba duhucũ oacãroca. Jesure ĩɣu umupeo duhubiriborore iibiricãro gahmea marire. <sup>22</sup> Eropirã mɸa baburire, ihriburire game dɸyasobiricãque. “Árĩpehreri barire Goãmu marire badoredigu arĩmi,” arĩ pepirã irire Goãmu dihtare wereque. “Ñerire iibigu, oaro iigu iica,” ĩɣu pepirigue arĩ masigu mucubirigu áhrimi. <sup>23</sup> Gajigɸu iri barire bagu, “Ñero iigu iiboca yɸhɸu,” arĩ pepigu árĩqueregu iri barire bagu, dipuwajacɸgu áhrimi ĩɣu. ĩɣu ta “Ire bagu diaye ta oarire iigu iiaa,” ĩɣu pepirigue arĩmasibeami.



Eropa arĩmasibigu irire bagu, igu bara waja dipuwajacumi igu. “Ōarire iigu iiaa,” arĩmasibirinijagu irire iigu dipuwajacugu āhrimi.

## 15

### *Mari pohro árĩrãre òaro umupearã, arĩ gojañumi Pablo*

<sup>1</sup> Eropirã Jesucristore òaro mari umupearãpũ, òaro umupeaturabirãre itamuro gahmea. Eropirã mari ya árĩburi dihtare iibiricãro gahmea. <sup>2</sup> Mari pohro árĩrãre erã gamero dopa ta iiro gahmea erã òaro árĩcãborore. Goãmure erã òaro guñaturanemoburire iiro gahmea. <sup>3</sup> Jesucristo sã igu ya dihtare iibiridi árĩmi. Eropa ta arãa Goãmũ yare erã gojarapũ. Ōpa arĩ gojañuma: “Cristo òpa arĩmi Goãmure: ‘Mũpure ñero wereniguibonirã yũpure ñero wereniguima,’ arĩmi Cristo Goãmure,” arĩ gojañuma iribojeguerẽ. <sup>4</sup> Iribojegue erã Goãmũ yare gojañuma mari òaro buheborore. Eropirã iri erã gojarapũre buherã sĩporã turarã wahaa mari. Eropa buherã ñero tarirã yujuro bojerãca. <sup>5</sup> Goãmũ mũare turacũ iigu sĩporã turacũ iigu mũare game òaro árĩcãcũ iiporo Jesucristo igu gamediro dopa ta. <sup>6</sup> Eropa ta iiporo igu mũa árĩpehrerã yujuro mera Goãmure umupeoborore, mari Opũ Jesu Pagure “Ōagu āhrimi. Turagu āhrimi,” mũa arĩborore.

### *Judio masa árĩbirãre òari buherire werenugama, arĩ gojañumi Pablo*

<sup>7</sup> Cristo igu mũare iidiro dopa ta mũa mera majarãre òaro game bocatĩrique. Mũa eropiicũ iarã “Diaye ta Goãmure òagu masa yujuro mera òaro árĩcãcũ itamugu āhrimi,” arĩ iarãcoma masa. <sup>8</sup> Mũare ire arĩgu iiaa: Igu Pagu igu arĩ werediro dopa diaye ta iigu igu árĩcũ ihmugu, judio masare itamubu aridigu árĩmi Cristo i yebaguere. Eropigu Goãmũ Abrahã sãre arĩ wrepidiro dopa ta iigu aridigu árĩmi. <sup>9</sup> Masare Cristo igu itamucũ igu Pagu Goãmũ mojomoro ïagu iidigu árĩmi erãre. Igu eropa mojomoro ïacũ iarã judio masa árĩbirã sã Goãmure “Ōagu āhrimi. Turagu āhrimi,” arĩ umupeoma dohpaguere. Erã sãre igu yarã árĩcũ iigu aridigu árĩmi Cristo. Goãmũ yare erã gojarapũgue eropa ta arĩ gojañuma: Cristo òpa arĩmi igu Pagure: Judio masa árĩbirã watope mũare umupeogũra. “Goãmũ òagu āhrimi,” arĩgũra. Eropigu erã watope bayagu mũ ya árĩburire bayagũra, arĩmi Cristo igu Pagure, arĩ gojañuma iribojeguerẽ.

<sup>10</sup> Eropirã òpa arĩ gojañuma daja:

Goãmũ igu beyenirã mera judio masa mera game mucubirique mũa sã judio masa árĩbirã, arĩ gojañuma iribojeguerẽ.

<sup>11</sup> Eropirã òpa arĩ gojañuma daja:

Judio masa árĩbirã árĩpehrerã Goãmure umupeoporo. Eropirã árĩpehrero majarã ïgure “Ōagu āhrimi. Turagu āhrimi,” arĩ umupeoporo, arĩ gojañuma.

<sup>12</sup> Eropigu Isaia mũrũ sã òpa arĩ gojañumi:

Davĩ pagu Isaĩ mũrũ pãrami árĩturiagu arigũcumi. Eropa arigu judio masa árĩbirã tauro opũ arĩgũcumi igu. Eropirã erãpũ ïgure umupearã erãre peamegue wabonirãre igu tauborore masirãcoma, arĩ gojajuñumi iribojeguerẽ.

<sup>13</sup> Goãmũ marire taugu árĩbu òaro mũare mucubiricũ iiporo. Eropigu Jesure mũa guñaturacũ mũare òaro árĩcãcũ iiporo igu. Mũare igu eropiicũ “Igu pohro mari warãca,” arĩ mucubiri masinemorãca mũa Espĩritu Santo igu turari mera, arãa yũhũ mũare.

<sup>14</sup> Yũ acawererã, òaro mera mũare guñaã. Mũa òarã āhraa. Eropirã Jesu yare òaro masia. Eropa masirã mũa mera majarãre game òaro were, buhemasia. <sup>15</sup> Mũa eropa masirã mũa árĩquerecũ ta ipũguere mũare gũiro mariro irire òaro werepehobũ yũhũ erãgue cãdijiri arĩgu. Goãmũ yũre mahigu mũare buhedoregu apimi yũre. Eropigu igu apidiro dopa ta mũare guñacũ iigu iiaa. <sup>16</sup> Yũre igu apicũ Jesucristo



yare òari buherire judio masa árĩbirãre buhea yũhũ. Eropa buhecũ peerã judio masa árĩbirã Jesure umupeorãcoma. Erã eropa umupeocũ ïagũ Goãmũ erãre “Òarã àhrima,” arĩ ïagũcumi. Eropigũ erãre gamegũcumi. Eropigũ Espĩritu Santopũ Goãmũ yarã wacũ iigũcumi erãre.

<sup>17</sup> Eropigũ Jesucristore umupeogũ árĩgũ Goãmũ yãre buhedore apirare mucubiriri mera werea masare. <sup>18-19</sup> Judio masa árĩbirãre Cristo itamuri mera erãre yũ buhecũ peerã, Cristore umupeoma. Eropirã masa árĩbirãre buhea yũhũ. Eropa buhecũ peerã judio masa árĩbirã Jesure umupeorãco yũ òaro iiricũrre ïarã, Goãmũ turari mera yũ deyoro moarare ïarã, Espĩritu Santo ïgũ turari mera erã Cristore umupeoma. I árĩpehrerire mũare diaye werediaca. Gajirã erã iirare werebeaa. Jerusalengue ne yũ buhenũgara pũhrũ árĩpehreri macarigue buhe curibũ. Yoarogue, Iliria yebague sãre Jesucristo ya buherire òari buherire buhegũ ejabũ. <sup>20</sup> Eropigũ Cristo yare masibirã dihtare òari buherire turaro buhediabũ. Yũ mera majarã erã buhenirãguere buhediabiribũ. <sup>21</sup> Eropa arĩ gojañuma Goãmũ yare erã gojarapũguere. Òpa arĩ gojañuma:

Iribojegue ïgũre ne masibirinirã ïgũre masirãcoma. Eropirã ïgũre ne peebirinirã ïgũ yare òaro peerãcoma, arĩ gojañuma Goãmũ yare erã gojarapũgue.

### *Pablo Romague ïgũ waborore wereñumi*

<sup>22</sup> Eropigũ árĩpehrero majarãre buhegũ árĩgũ bajasuburi mũa pohro wadi-aqueregũ ta wamasibirimũrabũ. <sup>23</sup> Dohpaguere i yebaguere a árĩbirã Jesure umupeorãcoyũ mohmeri pehrea wahaa. Eropa pehrecũ ïagũ baja bojori mũa pohro wadianiguigũ árĩgũ, mũa pohrogue wagũra. <sup>24</sup> Eropigũ Espaãague wagũ mũare ero ïhatari wahgãgũra. Eropigũ mũa mera mucubirigũra. Eropigũ mũa mera árĩdigũ wagũ mũa yãre itamuri mera wagũra daja. <sup>25</sup> Dohpaguere Jerusalengue wanibu iiaa. Ero majarãre yũ acawererãre Jesu yarãre niyeru sonigũ wagũ iiaa. <sup>26</sup> Macedonia majarã, Acaya majarã, òaro mera Jesu yarã Jerusalengue árĩrãre mojomorocũrãre niyerure obeoama erãre itamurã. Eropigũ erãre obeorare sogũ wagũ iiaa. <sup>27</sup> Iri niyerure orã òaro mera ohãma. Erã eropiicũ òapũrica yũ pepicũ. Erãre judio masa árĩbirãre, gũa judio masapũ Goãmũ yare buhemũhtabũ. Eropirã erãre ïgũ tauboro sãre buhemũhtabũ gũa judio masa erãre. Gũa eropa buhecũ ïagũ, Macedonia majarã, Acaya majarã mera judio masapũre Jerusalén majarãre itamucũ òapũrica yũre. Erãre erã buhera waja àhraa iri niyeru yũ pepicũ. <sup>28</sup> Eropigũ Jerusalén majarãre iri niyerure yũ ora pũhrũ Espaãague wagũca. Erogue wagũ mũare ïhatari wahgãgũra. <sup>29</sup> Eropigũ mũa pohrogue yũ wacũ Cristo yare yũ mũare buhecũ Cristo marire òaro sĩporãcũcũ iigũcumi.

<sup>30</sup> Mũa, yũ acawererã, mari Opũre Jesucristore umupeoa. Eropirã Espĩritu Santo ïgũ turari mera gajirãre umupeoca mũa. Mũa eropiirã árĩrã yũ sãre turaro serẽbasaque Goãmũre. <sup>31</sup> Òpa arĩ serẽbasaque: Judea yeba majarã Jesure umupeobirã yũre erã ñero iidiacũ Goãmũ yãre itamuboro dopa serẽque. Eropirã Jerusalén majarãre iri niyerure yũ ocũ erã irire mucubiriri mera erã ñeaboro dopa serẽque. <sup>32</sup> Mũa eropa serẽcũ Goãmũ gamecũ mucubiriri mera mũa pohrogue wagũca. Eropigũ mũa mera árĩgũ mucubiriri mera soogũra. <sup>33</sup> Goãmũ marire òaro árĩcãgũ ïgũ mũa mera árĩporo. Eropa ta iiporo.

## 16

### *Pablo òadoreñumi*

<sup>1</sup> Mari acawerego Febe waĩcũgo mũa pohrogue wabo iimo. Igo Cencrea waĩcũri macague Jesu yarãre itamugo àhrimo. <sup>2</sup> Eropigo bajarãre yũ sãre itamugo àhrimo igo. Eropirã mũa igo mera yujuro mera mari Opũre umupeorã àhraa. Eropirã igore

ōaro mera bocatīrique. Eropa ta iiro gahmea marire Jesu yarāre. Eropirā igore igo gamerire gajino dūhyacū igore oque mūa.

<sup>3</sup> Aquila, Īgu marapo sã Priscila sã ōaporo. Jesucristo yare yu buhecū erã sã yu mera mohmeama. <sup>4</sup> Erãre mero wejēbocurima gajirã erã yure wejēdiacū itamuri waja. Eropigu erã mera mucubiria yuhū. Eropirã judio masa árībirã Jesu yarã árīpehrerã erã sã erã mera mucubirima. <sup>5</sup> Eropirã Aquila ya wihi gamenererã sã Jesu yarã ōaporo. Yu mahigu Epenéta sã ōaporo. Īgu Asia majagu ero árīgu Cristore umupeomūhtadigu árīmi. <sup>6</sup> María sã ōaporo. Igo mūa mera turaro mohmeapo. <sup>7</sup> Yu acawererã Andrónico, Junia sã ōaporo. Peresu yu árīcū erã ta yure wapicūnirã āhrama. Eropirã yu core Cristore umupeonūgañorã erāpū. Gajirã Jesu ĩgu apinirāpū erãre “Diaye ta ōarã āhrima,” arī wereniguima.

<sup>8</sup> Amplia sã yu mahigu Jesu yagu āhrimi. Īgu ōaporo. <sup>9</sup> Eropigu Urbano sã ōaporo. Īgu sã mari mera Cristo ya árīburire mohmeami. Eropigu yu mahigu mera majagu Estaqui ōaporo. <sup>10</sup> Eropigu Apele sã ōaporo. Īgu diaye ta ōaro Jesucristore umupeomi. Īgu iiricūre ĩarã irire masia mari. Eropirã Aristóbulo ya wihi majarã árīpehrerã ĩgu marapo ĩgu porã sã ōaporo. <sup>11</sup> Yu acaweregu Herodión ōaporo. Eropirã Narciso ya wihi majarã Jesu yarã ōapehrecāporo. <sup>12</sup> Eropirã Trifena, Trifosa sã ōaporo. Erã nome mari Opū Jesu mohmerire iama. Mari mahigo Pérsida sã ōaporo. Igo mari Opū Jesucristo yare turaro mohmemo. <sup>13</sup> Eropigu Rufo mari Opū Jesure ōaro umupeogu, Īgu yare ōaro iigu ōaporo. Īgu pago sã ōaporo. Igo yu pago iro dopa ta árīgo āhrimo. <sup>14</sup> Asíncrito, Flegonte, Herma, Patroba, Herme, gajirã Jesu yarã erã mera majarã sã ōaporo. <sup>15</sup> Eropirã Filólogo, Julia, Nereo, ĩgu pagu mago sã Olimpa, gajirã erã mera majarã sã Jesu yarã ōaporo.

<sup>16</sup> Eropirã mūa mera majarãre bocatīrirã mucubiriri mera mojoto ñeaque. Árīpehrerã Jesu yarã árīpehrero majarã mūare ōadorema.

<sup>17</sup> Yu acawererã, mūa mera yujurāyeri mūare game ĩhaturicū iirã game dūca waricū iirã árīcoma. Eropirã mūare Jesu ya buherire goroweoma. Eropirã eropa iirãre ōaro iique goroweori arīrã. Eropa árīrãre wapicūbircāque. <sup>18</sup> Eropa iirã mari Opū Jesucristo yare iibeamā. Ñerire erã ũaribejari dihtare iima. Eropirã ōaro wereniguirã iro dopa guyama masibirãre erã. Erã eropa guyacū erãre ōaro peenurūma. Eropirã erãre wapicūbircāque mūa. <sup>19</sup> Mūapū Jesure ōaro yūhrirã āhraa. Irire árīpehrerã masima. Eropa ōaro mūa yūhrirã mūa árīcū pee mucubiria yuhū. Eropigu ōaro mūa iiborore masicū gahmea yuhū. Eropigu ne ñeri sãre mūa iibiricū gahmea yuhū. <sup>20</sup> Eropigu Goāmū marire ōaro árīcācū iigu merogã pūhrū watīre tarinūgagu iibasagūcumī mūare. Mari Opū Jesucristo ōaro mūare itamuniguicāporo.

<sup>21</sup> Timoteo yu mera majagu mūare ōadoremi. Yu acawererã Lucio, Jasō, Sosípate mūare ōadorema.

<sup>22</sup> Yuhū Tercio ipūre gojabasagu āhraa Pablöre. Yuhū Jesu yagu árīgu mūa Jesu yarãre ōadorea.

<sup>23</sup> Gayo ya wihi árīcāgu iiaa yuhū Pablo. Īgu ya wihigue Jesu yarã gamenerema Goāmūre umupeomorã. Īgu sã mūare ōadoremi. Eropigu Erasto i maca majarã oparãre niyeru dibubasagu mūare ōadoremi. Mari acaweregu Jesu yagu Cuarto sã mūare ōadoremi.

<sup>24</sup> Mari Opū Jesucristopū mūare árīpehrerãre ōaro iiporo. Eropa ta iiporo.

*Pablo Goāmūre umupeori mera gojatuñumi*

<sup>25-27</sup> Mari Opū Jesucristo ya buheri mera ōari buheri mera Goāmū mūare ĩgure guñaturanemocū iimasimi. Iribojegue iri ōari buheri ne masa masibiriri buheri

árĩriyoro. Dohpaguere Goãmũ yare weremũhtanirã erã gojara mera iri buherire masidoregũ iimi. Yũ sã irire buhea. Iri buherire árĩpehrero majarã dohpaguere masima. Goãmũ eropa árĩniguicãgũ dorero dopa ta erã masima. Iri buherire ãgũ ta weredorepũ masa ãgũre erã yũhriborore, ãgũre erã umupeoboro sãre. Eropirã ãgũre “Diaye ta õagũ, turagũ ãhrimi,” arĩ umupeorã. ãgũ yujugũ ta Goãmũ õaro masipehogũ ãhrimi. Jesucristo ãgũ itamuri mera Goãmũre eropa umupeoniguicãrã mari. Eropa ta iirã. Iripẽta ãhraa.

# 1 Corintios

## *Pablo Goãmũ yarãre Corinto majarãre gojabeoñumi*

<sup>1-2</sup> Yũhũ Pablo, Jesucristo yare ìgũ buhedore apidigũ àhraa. Goãmũ ìgũ gamero dopa ta Jesu ìgũ apibure yũre beyepũ ìgũ. Sostene Jesu yagũ mari acaweregũ mera mũare Goãmũ yarãre Corinto majarãre gojabeoa gũa. Jesucristo mera majarã mũa árĩcũ Goãmũ yarã árĩmorãre beye aĩdi árĩmi Jesucristo mũare. Eropirã árĩpehrero majarã gajirã mari Opũ Jesucristore serẽrã árĩrã, erã sã Goãmũ yarã ta àhrama. Jesucristopũ erã opũ mari Opũ sã àhrimi. <sup>3</sup> Eropirã Goãmũ mari Pagũ, mari Opũ Jesucristo mera mũare òadoreã. Ìgũ itamuri mera òaro árĩque mũa.

## *Jesucristopũ mũare òaro iibasadigũ árĩmi Goãmũre, arĩ gojañumi Pablo*

<sup>4</sup> Jesucristo mũare òaro iibasadigũ árĩmi Goãmũre. Ìgũ eropa iicũ ìagũ, Goãmũre yũ mahigure, Òhaa,” arãa yũhũ mũuri nũcũ. <sup>5</sup> Cristo yarã mũa árĩcũ ìagũ Goãmũpũ mũare òaro árĩcũ iimi. Eropigũ ìgũpũ ìgũ yare mũare gajirãre weremorãre iimi ìgũ. Eropigũ ìgũ, ìgũ yare òaro masicũ iimi mũare. <sup>6</sup> “Cristo mũare òaro iigũcumĩ,” mũare gũa arĩ werediro ta wahabũ mũare Cristo yarã mũa wacũ. <sup>7</sup> Eropigũ árĩpehreri ìgũ ya árĩburire mũa iimasicũ iimi Goãmũ mũare. Eropiro ne dũhyabeaa mũare. Mari Opũ Jesucristo i yebague ìgũ dujariborore mũa corerisubũ Goãmũpũ mũare eropa itamuniguicãgũcumĩ. <sup>8</sup> Eropigũ Jesucristopũ mũa ìgũre umupeoniguicũ iigũ àhrimi. Ìgũ eropa árĩgũ árĩcũ mũapũ i mũũ pehrecũ mũa ñeri iira dipuwaja moorã árĩcũ iigũcumĩ. <sup>9</sup> Goãmũ “Òpa iigũra,” ìgũ arĩdiro dopa ta ìgũ iimi. Eropigũ ìgũ, ìgũ magũ mari Opũ Jesucristo mera yujuro mera árĩmorãre marire beyedi árĩmi.

## *Jesu yarã Corinto majarã erã game dũca warirare Pablo arĩ gojañumi*

<sup>10</sup> Yũ acawererã, mari Opũ Jesucristo ìgũ dorero mera mũare burigã serẽbu iiaa: Mũa basi game dũyasobiricãque. Eropirã mũa basi game dũca waribiricãro gahmea. Yuju curu ta árĩque mũa. Eropirã yujuropa ta òaro árĩniguicãque. Eropã iirã mũa iiburire pepirã, yujuropa iique mũa. <sup>11</sup> Yũ acawererã, mũa basi game dũyasorã iayoro mũa. Eropã arĩ wereama Cloé ya wihi majarã yũre. <sup>12</sup> Gajirã mũa mera majarã òpa arãñorã: “Pablo ya curu majarã àhraa gũa,” arĩ wereniguiayoro gajirã mũa. Eropirã gajirã “Apolo ya curu majarã àhraa gũa,” arãyoro gajirã. Eropirã gajirãpũ daja, “Pedro ya curu majarã àhraa gũa,” arãyoro mũa. Eropirã gajirãpũ daja, “Gũa tamera Cristo ya curu majarã àhraa gũa,” arãyoro mũa. <sup>13</sup> Mũa eropa arĩquerecũ ta yũhũ òpa werea mũare: Cristo ya curu majarã yuju curu ta àhraa mari. Eropirã mari basi yujurãyeri dũca warimasibeaã mari. Yuju curu ta árĩrã iiaa mari. Yũhũ Cristo árĩbeaa. Ìgũ iidiro dopa mũa ya dipuwajare crusague sĩridigũ árĩbeaa. Eropigũ mũare gajigũ waĩyegũ yaha waĩ mera waĩyebemi. Cristo ya waĩ mera waĩyecumi mũare. <sup>14</sup> Mũare mũa mera majarã sãre waĩyebiribũ yũpũ. Crispore, Gayo sãre erã dihtare waĩyebũ yũhũ. “Pablo waĩyenirã dihta àhraa,” arĩmasibeaã mũa. Eropigũ gajirãre waĩyebiridigũ yũ árĩgũ “Òhaa,” arĩ pepia Goãmũre. <sup>15</sup> Bajarã masare waĩyedigũ yũ árĩcũ “Pablo ya waĩ mera ìgũ waĩyemi guare,” arĩboaya mũa. Eropã arĩrã Jesucristore umupeobirã mũa yũpũre umupeoboaya. Eropigũ irire gamebirabũ. <sup>16</sup> Estéfana ya wihi majarã sãre waĩyebũ yũhũ. Erã nũcũ ta waĩyebũ yũhũ. Gajirã yũ waĩyenirãre guñabirica. <sup>17</sup> Cristo yũre obeogũ, gajirãre waĩyebure apibirimi ìgũ yũre. Òari buherire werebupũre apimi ìgũ yũre. Iri òari buheri “Cristo ìgũ crusague sĩriñumi,” arĩ buheri masare gohrotori buheri àhraa Goãmũ yare erã iiburire. Eropigũ yũhũ irire buhegũ gajigũ òaro masitarigũ iro dopa

buhebeaa. Masa erã masiri mera buhebeaa. Yũhũ eropa yũ ejatuharo mera buhecũ mũa ðari buheripũre umupeobiriboaya.

*Goãmũ ïgũ turarire ïgũ masiri sãre opagũ ãhrimi Cristo, arĩ gojañumi Pablo*

<sup>18</sup> Peamegue dederemorãpũ iri buheri “Cristo crusague ïgũ sĩridi árĩmi,” arĩ buherire peerã õpa arĩma: “Pee masibirã ya buheri ãhraa,” arĩmaacãma. Maripũ Cristo ïgũ taumorã árĩrã õpa arãa: “ ‘Crusague ïgũ marire sĩridi árĩmi,’ arĩ buheri tura ãhraa. Iri buheri mera Goãmũ marire gohrotomi,” arãa mari. <sup>19</sup> Eropa ta arĩñumi Goãmũpũ ïgũ yare erã gojarapũgue:

Eropirã i yeba majarã masare “Õaro masirã ãhraa,” erã basi arĩrãre erã masiripũ duhpiburi árĩbeaa, arĩ ïhmugũca yũhũ, arĩñumi Goãmũ.

<sup>20</sup> Eropirã i yeba majarã õaro masirã duhpimorã árĩbeama. Erã pepiro dopa buherã sã duhpimorã árĩbeama. Dohpaguere wereniguimehrerã sã duhpimorã árĩbeama. I yeba majarã “Õaro masirã ãhrima,” arĩnirã erã árĩquerecũ ta “Pee masibirã erã ãhrima,” arĩ ïhmumi Goãmũ erãre. <sup>21</sup> Goãmũ tamera õaro masigũ ãhrimi. ïgũ eropa árĩcũ i yeba majarã erã ya masiri mera Goãmũ yare ne masisũya mariroca erãre. Goãmũ “Erã masiri mera yũre masisome,” ïgũ arĩdiro dopa ta eropa wahabũ erãre. Õpa arĩñumi: “Yaha ðari buherire werẽcũ masa yũre masirãcoma,” arĩñumi. Eropigũ “Iri buheri pee masibirã ya buheri ãhraa,” gajirã arĩquerecũ, gajirãpũre erã ðari buherire peerãpũre Goãmũ taumi. Cristore erã umupeocũ ïagũ “Erãre peamegue wabonirãre taugũra,” arĩmũhtapũ.

<sup>22</sup> Judio masa deyoro moarire ii ïhmudorema erã iri buherire umupeoboro core. Eropirã griego masa judio masa árĩbirã árĩrãpũ erã pepiro dopa buhecũ gahmema.

<sup>23</sup> Maripũ “Jesucristo mari ñeri iira dipuwaja crusague sĩridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri ãhraa,” arĩma. <sup>24</sup> Goãmũ ïgũ yarã árĩmorã ïgũ beye aĩnirãpũ iri buherire pee õpa arĩ masima: “Goãmũ masipehogũ turagũ ãhrimi. Cristo marire sĩribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã. <sup>25</sup> Goãmũ õaro masipehogũ ãhrimi. “Goãmũ pee masibigũ ãhrimi,” masa arĩ pepiquerecũ ta i yeba majarã tauro õaro masipehogũ ãhrimi. Eropigũ “Turabigũ ãhrimi,” masa arĩ pepiquerecũ ta erã wecague turatarinũgagũ ãhrimi ïgũ. <sup>26</sup> Yũ acawererã, Goãmũ mũare ïgũ beyeboro core mũa arĩmũhtarare guñaque. I yeba majarã “Õaro masirã ãhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tĩrã oparã sã arĩnirã bajamerãgã ãhraa mũa Jesu yarã. <sup>27</sup> I yeba majarã “Pee masibirã ãhrima,” erã arĩnirã watopepũre mũare Goãmũ beye aĩdi árĩmi. Eropa beyedi árĩmi “Õaro masirã ãhrima,” erã arĩnirã erã masibirã dujaboro dopa. Eropigũ i yeba majarã “Turabirã, doyarã ãhrima,” erã arĩnirãre Goãmũ aĩdigũ árĩmi doyarãpũ erã doyarã dujaro dopa. <sup>28</sup> Masa erã ïadiabirãre “Duhpimorã árĩbeama,” arĩma. Erã eropa arĩnirãre bu árĩrãre Goãmũ ïgũ yarã árĩmorãre aĩdigũ árĩmi mũare. Eropa aĩgũ i yeba majarã oparãre, gũhyadiarãre, “Gũapũ bu árĩrã ãhraa,” erã arĩcũ ïigũ iimi Goãmũ erãre. <sup>29</sup> ïgũ eropa iicũ i yeba majarã ne yujugũ ïgũ gamero mera “Yũ tamera turagũ, õaro masigũ ãhraa,” arĩ tarinũgamasibeami Goãmũ ïgũ ïacũ. <sup>30</sup> Goãmũpũ marire Jesucristo yarã árĩcũ iimi. ïgũ yarã árĩrã mũuri nũcũ Goãmũ mera árĩrãca mari. Jesucristopũ Goãmũre õaro masicũ iimi marire. Eropigũ mari ñerire cóãgũ marire ðarire gohrotocũ ïigũ ãhrimi. Eropigũ marire peamegue wabonirãre taubu ãhrimi. <sup>31</sup> ïgũ eropa iicũ Goãmũ yare erã gojarapũ ïgũ arĩ gojadiro dopa ta eropa wahaa. Õpa arĩ gojañuma: “ ‘Yũ gamero masipehogũ ãhraa,’ arĩgũ irire arĩbiricãporo. Õpa



arĩporo: ‘Mari Opurũ masipehogũ ta ãhrimi,’ arĩporo ãgu,” arĩ gojañuma Goãmũ yare erã gojarapũgue.

## 2

### *Cristo crusague ãgu sĩrira buheri ãhraa i, arĩ gojañumi Pablo*

<sup>1-2</sup> Yũ acawererã, mũa pohro wabu õpa arĩ pepibũ yurũ: “Erã mera árĩgu Jesucristo crusague sĩridigu waĩpeo ãgũre erã masiburi dihtare buhegũra erãre,” arĩ pepibũ mũare. Eropigu mũa pohro árĩgu Goãmũ yare mũare buhebũ. Goãmũ yare mũare buhegu, weretarinũgagũ iro dopa “Masitarigu ãhraa,” arĩ buhegu iibiribũ. <sup>3</sup> Eropigu mũa mera árĩgu bu árĩgu iro dopa árĩbũ yũhũ. Eropigu yũre umupeori arĩgu doyañariro dopa buhebũ yũhũ. <sup>4</sup> Eropigu Goãmũ yare buhegu “Masipehoa yũhũ,” arĩgu weretarinũgagũ iro dopa buhebiribũ. ãgu yare buhecũ Espĩritu Santo ãgu turari mera mũare iri buherire umupeocũ iimi. <sup>5</sup> Eropa ta arĩ buhebũ yũhũ mũare masa erã gamero erã ya masiripũre mũa gamebiriboro dopa. Goãmũpũre mũa umupeoburire eropa arĩ buhebũ yũhũ “Goãmũ turagũ ãhrimi,” mũa arĩboro dopa.

### *Espĩritu Santopũ Goãmũ ãgu árĩricũrre buhemi marire, arĩ gojañumi Pablo*

<sup>6</sup> Eropirã Goãmũ ya buherire Jesure õaro umupeorãguere werea gũa. Iri buheri masiri ta ãhraa. I mũmũ maja masa erã gamero erã masiri iro dopa árĩbeaa i mũare gũa buheri. I yebare dorerã ya masiri sã árĩbeaa. Erã masiri i mũmũ mera pehrero iiaa. <sup>7</sup> Goãmũ ya masiripũre werea. Iribojegue i buherire ne masisũya mariyoro. Negohraguere mari õaro árĩborore Goãmũ arĩ pepituhajamũripũ. Marire peamegue wabonirãre ãgu tauborore, ãgu mera mari arĩboro sãre “Masare eropa ta iigũra,” arĩ pepiyurũ. <sup>8</sup> ãgu masare õaro arĩ pepirare i mũmũre dorerã masibiriñuma. Irire õaro masirã, mari Opũre Goãmũ magũ gohrare crusague pabia wejẽbiriboañuma erã. <sup>9</sup> Erã eropa masibirirare Goãmũ yare erã gojarapũgue õpa ãhraa:

Árĩpehrerã Goãmũre mahirã ya árĩburire Goãmũ õaro amubasayutuhapũ. Iri ãgu amubasarapũre masare masima masiya mara. Ne gajino iro dopa ãaya mara irire, arãa Goãmũ yare erã gojarapũgue.

<sup>10</sup> Iri eropa arĩquerecũ ta Espĩritu Santopũ Goãmũ yare, masisũya marirare masicũ iimi marire. Árĩpehreri Goãmũ yare ãgu pepira sãre Espĩritu Santo masipehomi. Eropa masigu ãgu marire irire masicũ iimi.

<sup>11</sup> Ne gajirãpũ masũ ãgu pepirire masibeamã. Masurũ ãgu seyaro ãgu guñarigue ãgu pepirire masimi. Eropa ta masa Goãmũ ãgu pepirire ne masibeamã. Espĩritu Santo dihta ãgu pepirire masimi. <sup>12</sup> Eropirã mari Jesu yarã árĩrã erã i mũmũ majarã Jesu yarã árĩbirã erã pepiro dopa pepibeamã. Goãmũ ãgu Espĩriture ohomi maripũre ãgu pepiro dopa mari pepiburire. ãgu marire õaro ãgu orare masicũ iimi Espĩritu Santopũ. <sup>13</sup> Eropirã Goãmũ yare mũare buherã, masa ya masiri mera gũa gamero buhebeaa gũa. Espĩritu Santo ãgu gamero dopa ãgu gũare wereniguidoreripũre mũare buhea. Eropa buherã Espĩritu Santo gamero dopa Goãmũ yare õaro buhea gũa ãgu yarãre.

<sup>14</sup> Espĩritu Santore opabirãpũ irire Espĩritu Santo yare erãre buhecũ, “Pee masibirã wereniguirĩ ãhraa,” arĩma erã. Eropirã gamebeama. Espĩritu Santo ãgu itamuro mariro ãgu yare masima masiya mara masare. Eropirã erã ãgu yare ne masibeamã.

<sup>15</sup> Espĩritu Santore oparãpũ Goãmũ yare õaro masima. Gajirãpũ erãre “Pee masibirã ãhriima,” arĩmasibeamã Espĩritu Santore oparãre. <sup>16</sup> Ópa arãa Goãmũ yare erã gojarapũgue: “Ne yujugũ ãgu gamero mera mari Opũ ãgu guñarire masigu ne marimi. Eropirã ãgũre masa ne buhemasibeamã,” arãa ãgu yare erã gojarapũgue. Maripũ Cristo yarã árĩrã, Cristo iro dopa masia.

## 3

*Jesu yarã yujuro mera Goãmũ mohme corerã àhrima, arĩ gojañumi Pablo*

<sup>1-2</sup> Yũ acawererã, mũare buhegu Espíritu Santore ðaro yũhrirãre yũ buhediro dopa buhemasibiribũ mũapũre. Mũa pepiri Espíritu Santo opabirã pepiro dopa árĩbũ. Cristo yarã mũa árĩquererã ta ìgũre ðaro yũhrirã árĩbirã majirãgã erã pee masibiro dopa ta Goãmũ yare ðaro pee masibiribũ mũapũ dohpa. Eropa mũa pee masibiricũ ìagũ Goãmũ yare ðarire buhenemomasibiribũ mũare. Eropigũ majirãgãre apĩco dihtare mari oro dopa ta diasabiriri buheri dihtare buhebũ daja mũare. Dohpague sãre mũraro ta masinibea dohpa mũa. <sup>3</sup> Òpa iirã iiaa mũa Espíritu Santore yũhribirã. Mũapũ mũa mera majarãre ìadiabirã, erã gajinore opacũ ìhaturirã, mũa basi yujurãyeri cururi Yũ acawererã, mũare buhegu Educa warirã iiaa. Eropirã Espíritu Santore opabirã Cristore gamebirã iro dopa iirã iiaa mũa. Eropirã Goãmũ yare ðaro peebeaa mũa. <sup>4</sup> Òpa àhrayoro mũa. “Pablo ya curu majarã àhraa gũa,” arãyoro mũa yujurãyeri. Eropirã gajirã mũa mera majarãpũ “Apolo ya curu majarã àhraa gũa tamera,” arãyoro mũa. Eropa arĩ dũyasorã Espíritu Santore opabirã iro dopa arĩ wereniguia mũa.

<sup>5</sup> ¿Yũhũ Pablo, Apolo mera duhpimorã àhriri gũa mũa pepicũ? Árĩbeaa. Goãmũre mohme corerã àhraa gũa. Gũare ìgũ iidorero dopa iimorã àhraa. Eropirã gũa mũare buhecũ peerã Jesucristore umupeonũgabũ mũa. <sup>6</sup> Òari buherire buherã pohegue mohme corerã iro dopa àhrima mari werenigui queori mera buhecũ. Pohegue ìgũ otemũhtadiro dopa ta yũhũ mũare Goãmũ yare buhemũhtabũ. Eropigũ gajigũ ìgũ pohere ìhadiburo dopa ta Apolopũ yũ pũhrũ mũare buhenũrusiami. Gũa eropa buhequerecũ ta pohe maja yucũre iri bũgacũ ìgũ iidiro dopa ta Goãmũpũ mũare ìgũ yare masinemocũ iimi. <sup>7</sup> Eropigũ yũ buhemũhtadi árĩqueregu ta bu árĩgũ àhraa. Eropigũ Apolo yũ pũhrũ buhenemodi sã bu árĩgũ ta àhrimi. Goãmũ tamera ðagũ àhrimi. Ìgũpũ mũare ìgũ yarã árĩcũ ìgũre masinemocũ iimi. Eropirã Goãmũpũre umupeoro gahmea mũare. <sup>8</sup> Otemũhtagũ pũhrũ pohere ìhadibugũ yujuro mera mohme corerã àhrima erã. Eropirã erã nũcũ erã mohmediropẽ ta wajatama erã. Eropa ta àhraa gũa Apolo mera. <sup>9</sup> Eropirã gũa Goãmũ yare mohme corerã àhraa. Eropa gũa mohme corerã Apolo yũ mera majagũ àhrimi. Mũapũ Goãmũ ya pohe iro dopa ta àhraa. Mũa eropa árĩcũ Goãmũ ya pohe iri maja yucũre ìgũ bũganemocũ iidiro dopa ta mũare ìgũ yare masinemocũ iimi ìgũ.

Eropigũ Goãmũ mũare ìgũ yarãre ðarã árĩcũ iigũ iimi. Eropirã mũa Goãmũ mohmeri wihi iro dopa àhraa mũa gaji werenigui queori mera werediacũ. <sup>10</sup> Yũre Goãmũ ìgũ itamuro mera yũpũ wihi iimehregũ borari ìgũ nugumũhtaro dopa ta Jesucristo yare mũare buhemũhtabũ. Eropigũ iri weca gajigũ ìgũ peoturia mũriaro dopa ta gajigũ yũ pũhrũ buhenemogũ iimi. Eropa buhenemogũ ðaro gũhyadiaro mera Goãmũ yare buhero gahmea ìgũre. Queoro buhero gahmea. <sup>11</sup> Wihire iirã borarire nugumũhtabiricũ wihi iima masiya mara. Eropa ta Cristore buhebiricũ ìgũ yarã wacũ iima masiya mara. Cristo mari ya dipuwajare sĩribasarare mũare buhetuhajabũ. Eropirã mũa Jesucristore umupeorã Goãmũ yarã watuhajabũ. Mũa eropa árĩrãguere gaji buherire buhema masiya mara mũa Goãmũ yarã wamorãre. <sup>12-15</sup> Goãmũ yarãre buhenemorã àhrima. Erã watope gajirã queoro buhema. Gajirã queoro buhebeama. Queoro buheri oro, plata, waja pagari utãyeri iro dopa àhraa. Queoro árĩbiriri buheripũ yucũ, taa, ñaira pũri iro dopa àhraa. I mũmũ pehrerinũri árĩcũ Jesucristo dujarigũ mari buhera queoro árĩcũ ìhmugũcumĩ. Mari buherare soeñagũ iro dopa ta queoro árĩcũ ìhmugũcumĩ. Eropiro oro, plata, waja pagari utãyeri soecũ ãjubiro dopa ta mari buhera queoro ta árĩro dujaroca ìgũ ìacũ. Eropa mari queoro buhenirã mari árĩcũ ðaro mari buhera waja wajayegũcumĩ. Eropa ta

yucu, taa, ñaira pūri soecũ ũjupehrero dopa ta mari buhera queoro árĩbiro pehreroca ĩgu ĩacũ. Eropĩgu queoro buhebirinirã mari árĩcũ ĩagu marire wajayesome. Erã eropa árĩrã erã wajatabiriquerecũ Goãmũ erãpure taugucumi. Eropirã eropa queoro ðaro buhebirinirã merogã mera tarirãcoma. Eropirã wihi ũjũrisubu tariro dopa tarirãcoma.

<sup>16</sup> Mũa Jesu yarã mera Espĩritu Santopũ mũa mera ãhrimi. Eropirã mũa Goãmũ ya wihi iro dopa ãhraa. ¿Irire masibeari mũa? <sup>17</sup> Eropirã mũa Goãmũ ya wihi árĩro dopa árĩrã ĩgu yarã gohra ãhraa. Eropĩgu ĩgu yarãre yujugu ĩgu goroweocũ Goãmũ peamegue dedeogucumi ĩgupũre.

<sup>18</sup> Irire ðaro masique mũa. Mũa basi pee wisibiricãque. I mũu maja buherire opagu “Masitarinũgagu ãhraa,” arĩ pepibocumi. Eropa arĩ pepĩgu mũa mera majagu árĩgu, “Yũhũ Goãmũ masiri mariro pee masibĩgu ãhraa,” arĩ pepiporo ĩgu. ĩgu eropa arĩ pepĩgu diaye ta ðaro masĩgu wagucumi. <sup>19</sup> I mũu maja masa erã gamero erã basi masiri “Bu gohra ta ãhraa,” arĩ pepimi Goãmũ. Eropa ta werenemoa Goãmũ yare erã gojarapũ. Őpa arĩ gojara ãhraa: “Erã gamero masirã erã pepiri mera ‘Őpa iirãra,’ erã arĩrare gajiropa wacũ Goãmũ iimi,” arãa Goãmũ yare erã gojarapũ. <sup>20</sup> Eropi gajipũgue ōpa arãa daja: “Masa erã gamero ‘Masipehorã ãhraa,’ erã arĩ pepiri duhpiburi árĩbiricũ masimi mari Opũ Goãmũpũ,” arãa Goãmũ yare erã gojarapũgue. <sup>21-22</sup> Eropirã “Pablo ya curu majarã ãhraa gua,” arĩrã, “Apolo ya curu majarã ãhraa gua,” arĩrã, “Pedro ya curu majarã ãhraa gua,” arĩrã arĩbiricãque mũa pare. Gua árĩpehrerã mũa ya árĩburire iirã dihta ãhraa. Goãmũ árĩpehreri mũa ya árĩburire otuhajadĩgu árĩmi. ĩgu ĩhacũnugurare mũa ya árĩburire odĩgu árĩmi mũare. Mũare ojocaricũ iimi mũa ya árĩburire. Eropĩgu sĩricũ sãre iĩgucumi mũa ya árĩburire. Dohpague mũa árĩrire, pũhrũgue mũa árĩburi sãre ogucumi. Eropirã árĩpehreri mera ãhraa. <sup>23</sup> Eropirã mũapũ Cristo yarã ãhraa ĩgu ya árĩburire iimorã. Eropĩgu Cristopũ Goãmũ yagu ãhrimi ĩgu ya árĩburire iibu. Eropirã “Gua tamera Pablo ya curu majarã ãhraa,” arĩbiricãque mũa pare.

## 4

### *Cristo ĩgu yare ĩgu buhedoregu ĩgu apinirã erã mohmerire werepũ Pablo*

<sup>1</sup> Őpa arĩ pepique mũa yũre, Apolo sãre: Eropa ta erã Cristore mohme corerã ãhrima. Eropirã “Masa erã masibirirare Goãmũ yare buhedore ĩgu apinirã ãhrima,” arĩ pepique mũa. <sup>2</sup> Yujugu ĩgu ya árĩburire iidore apinirãre ĩgu gamero dopa ta ii corero gahmea erãre. Yũ sãre eropa ta ii corero gahmea Cristo ĩgu gamerire. <sup>3</sup> Mũa yũre werewũaquerecũ eropa pepicãa yũhũ. Gajirã masa erã yũre werewũacũ sãre eropa pepicãa yũhũ. Yũ iirire ĩarã “I ðari ãhraa. I ñeri ãhraa,” arĩ beyemasibea mũa yũre. Yũ basi árĩqueregu yũ iirire ðaro beyemasipehobea yũ sã. <sup>4</sup> Őpa arĩ pepia yũhũ. “Mari Opũ yũre ĩgu apidiro dopa ĩgu gamerire iipehorabu yũhũ,” arĩ pepia yũhũ. Yũ ōpa arĩ pepiquerecũ ta yũ arĩ pepiri diaye árĩbiriboca. Mari Opũ Cristo dihta yũ iiricũrire ĩagu ðaro masimi yũ ĩgu yare ðaro iicũ. <sup>5</sup> Eropirã mari Opũ ĩgu dujariboro core masare erã iirare arĩ werewũabiricãque. ĩgu dujarĩgu masa erã iirare iribojegue gajirã erã masibirirare Cristo deyoro moagucumi. Eropirã mari iidiarare ĩgu masicũ iĩgucumi gajirã masare. Irisubu ta mari nũcũre ĩgu yare mari iidiro dopa ta “Irire ðaro iĩabu,” arĩgucumi Goãmũ marire.

<sup>6</sup> Yũ acawererã, yũhũ Apolo mera gua árĩricũrire werebũ yũhũ mũare buhebu. Eropa werebũ Goãmũ ĩgu yare ĩgu gojarapũ ĩgu arĩdirore mũa tarinũgabiriboro dopa. Eropa tarinũgabirã árĩrã mũa yujurãyerire umupeobiricãque. Mũa eropa iibirã árĩtarinũgadiarã iiaa. <sup>7</sup> Mũa eropa iibiriboro dopa gua iirare werebũ mũare. Mũa eropa tarinũgadiaquererã mũapũ gajirã tauro ðarã árĩbeaa mũa. Goãmũ mũare

Īgū ora dihtare opaa m̄ua. Eropirā ĭgū m̄uare masicū iira dihtare masia m̄ua. ĶM̄ua gamero oparā, m̄ua bocatīuro masirā árĭbiriq̄uererā ta, duhp̄irā “Masipehorā āhraa,” arĭri m̄ua? Eropa arĭrā “Goām̄u ḡuare obirimi. Eropigū ḡuare masicū iibirimi,” arĭdiarā dopa ta iiaa m̄ua.

<sup>8</sup> M̄uap̄u “Árĭpehrerire opaa ḡua. Ḡuare ñehe d̄uhyabeaa,” arĭraa m̄ua. Eropirā ḡua m̄ua pohro árĭbirićū ōpa arĭ pepiraa: “Oparā iro dopa masirā āhraa ḡua,” arĭ pepiraa m̄ua. Diaye ta oparā iro dopa m̄ua masipehorā árĭćū m̄uare ōatariaboya. M̄ua eropa árĭćū m̄ua mera ḡua s̄a oparā iro dopa masipehorā árĭboya. “Masirā āhraa ḡua,” arĭ pepirā, Ķōaro arĭ pepiri m̄ua? Ōaro pepibeaa yū ĭacū. <sup>9</sup> Ōpa arĭ pepia yū tamera: Goām̄u ḡuare Jesu ĭgū yare buhedore apinirā doca maja curu apimi ḡuare. I yeba majarā masa, anyua s̄a ḡua ñero taricū ḡuare ĭam̄urima eropa wacū. <sup>10</sup> Cristo yare ḡua buhecū ĭarā, “Pee masibirā āhrima,” arĭma masa ḡuare. ĶM̄uap̄u Cristo yare ōaro pee masirā āhriri m̄ua? “Turabirā, bu árĭrā āhrima,” arĭma masa ḡuare. ĶM̄uap̄u ōaro turarā āhriri m̄ua? M̄ua basire umupeoa. Ḡuap̄ure masa ne umupeobeama. <sup>11</sup> Ḡuap̄u dohpague ñero tarirā, oaboarā, ñemesiburā, ñeri suhricurā, wiri moorā āhraa. Eropirā ḡuare gajirā umupeobirā, ḡuare pabiram̄urima. <sup>12</sup> Eropirā ḡua buheniguiq̄uererā teboricurā árĭrā ḡua árĭburi majare ḡua baburi s̄are mohmea. Eropirā gajirā ḡuare erā ñero wereniguiq̄uerēcū ta ḡuap̄u Goām̄ure ōaro erā árĭburire serēbasaa. Eropa iirā gajirā ḡuare ñero iimorā erā n̄ur̄uq̄uerēcū ta eropa pepicāa ḡua. <sup>13</sup> Eropirā “Ñero iirā āhrima,” ḡuare erā werew̄uq̄uerēcū ta ḡuap̄u erāre ōaro wereniguia erā ōaro árĭburire. Eropirā erā b̄urĭgā dohoma ḡuare. Iribojegue eropa iin̄ugama. Dohpague s̄are m̄uraro ta iima ḡuare.

<sup>14-15</sup> M̄uare ōari buherire buhem̄uhtabu. Eropa buhecū m̄ua peecū Jesucristo m̄uare ĭgū yarā wacū iidi árĭmi. Eropa m̄uare buhedigū m̄ua pagū iro dopa ta wahab̄u ȳuh̄u. Bajarā m̄uare Cristo yare buherā erā árĭq̄uerēcū ta m̄uare buhem̄uhtagū ȳuh̄u yujugū ta āhraa. Eropigū ȳuh̄u yujugū ta m̄ua pagū iro dopa āhraa. Eropigū m̄uare ḡuhyasĭricū iibu ire gojagū iibeaa. Yū porā yū mahirāre m̄uare werebu ire gojaa ȳuh̄u. <sup>16</sup> Eropigū ire turaro m̄uare werebu iiaa ȳuh̄u. Ȳure ĭhacūque m̄ua s̄a.

<sup>17</sup> M̄ua eropa iicū gamegū m̄ua pohro Timoteore obeogū iiaa. Īgū yū magū iro dopa yū mahigū mari Op̄u Jesucristo yagū āhrimi. Eropigū Cristo gamero dopa iin̄iguigū āhrimi ĭgū. Timoteo m̄ua pohro ejagū Jesucristo yare yū iidiro dopa m̄uare guñacū iiḡucumi m̄ua s̄a eropa iiboro dopa. Jesu yarā pohrogue noho wagū Jesucristo yare erā iiburire buheniguićā. <sup>18</sup> Yujurāyeri m̄ua mera majarā oparā arĭdiarā ōpa arāñorā: “Pablo mari pohrogue arisome,” arĭ pepirañorā erā. <sup>19</sup> Goām̄u gamecū m̄ua pohrogue dohparagā ta ejagūca. Eropa ejagū erā oparā arĭdiarā m̄ua mera majarā erā eropa arĭrare ĭagura. Eropigū erā Goām̄u turari opacū ĭagura ȳuh̄u. <sup>20</sup> Goām̄u mari Op̄u āhrimi. Mari arĭ weretarin̄ugaq̄uerēcū ta ĭgū yare mari iibiricū mari wereniguiiri duhp̄iburi árĭbeaa. Īgū turari mera ĭgū gamero dopa iicū gahmemi. <sup>21</sup> ĶM̄ua pohrogue m̄ua ya dipuwaja dipuwaja moagū yū wacū gahmeri m̄ua ȳure? ĶO m̄ua ōaro iira waja mucubiriri mera waro gahmeri m̄ua ȳure?

## 5

### *Corinto majarā erā ñeri iirare werep̄u Pablo*

<sup>1</sup> Gajirā ōpa arĭ q̄uerēcuma ḡuare: Yujugū m̄ua mera majagū ĭgū buamore ta marapoc̄u waĭćmi. Eropa ta arĭ werema masa ḡuare. Erā eroparĭćū peemaria wahab̄u. Gajirāp̄u Goām̄ure masibirā árĭq̄uererā erāp̄u eropa iirā árĭbeama. <sup>2</sup> M̄ua mera majagū ĭgū eropa iiquerecū ta m̄uap̄u “Ōatariarā āhraa ḡua,” arĭ pepiraa.



¿Duhpirã ïgu eropa ñeri iirare masiquererã ta guhyasĩrisãbeari mua ïgure? Eropa ñero iigure mua Jesu yarã mera majagure cóãcãque mua. <sup>3-4</sup> Yũhũ mua mera árĩbiriqueregu ta yũ guñari mera mua mera árĩgu iro dopa ãhraa yũhũ. Eropigu mua mera árĩgu yũ árĩbodiropo dopa ta ñero iigure ïgu eropa ñero iira dipuwaja, dipuwaja moadoretuhaa yũhũ. Jesucristo ïgu dorero mera ta eropa iidorea. Eropa mua Jesu yarã gamenererã yũ guñabeori merague yũhũ mua mera árĩcũ, mari Opũ Jesu ïgu turari mera <sup>5</sup> ïgure ñero iigure cóãque. Watĩ mera ïgu ñero tariborore apique. Eropa ta cóãque ïgure ïgu ñero tariri mera ñerire ïgu ñaribejarire ïgu gohrotoboro dopa. Mari Opũ Jesucristo ïgu dujaririnũ ñero iidigu mũũ Jesu mera ïgu ñero tariboro dopa dohpaguere ïgure eropa apinique, arãa yũhũ.

<sup>6</sup> “Ñero ãhraa guã,” mua arĩquererã ta ñero iirã iica mua. Ñero iigu ïgu ñerire mua eropa ïacãrã, árĩpehreri ñeri mũare ii ïhmucũ árĩpehrerã ñero iirãca. Eropiro árĩpehreri ñeri sehya wa mua árĩroque. Panre bugacũ iiri pohga ñero seyanugajaro dopa ta iri ñeri ñero seyaroca mũaguere. ¿Irire masibeari mua? <sup>7</sup> Yũ acawererã judio masa Pascua árĩcũ ovejare wejẽmũrima erã ñeri iira dipuwajare Goãmũre cãdijidorerã. Oveja sĩridiro dopa ta Cristo mari ñeri dipuwajare sĩribasadi árĩmi. ïgu eropa sĩribasarañe mera mua ñerire cóãñirã ãhraa. Irire guñarã mũapũ ñero iigure mua mera majagure cóãque ñeri mua watope mariboro dopa. <sup>8</sup> Iribojegue ñerire ïhacũ iinirã árĩribũ mari. Eropirã dohpaguere mari ñerire cóãñirã árĩrã mari ñerire ñaribejaro mariro, ñero iiro mariro árĩrã. Iribojegue mari ñerire iimũridiro dopa ta iibiricãrã. Eropirã diaye maja ñero werenigũiri mera, ñero iiricũri mera árĩrã pare.

<sup>9</sup> Mũare yũ gojabeorapũre nome mera ñero iirã, ñerire iimajiñajarã mera ne wapicũdorebiriribũ. <sup>10</sup> Eropa arĩgu “Jesu yarã árĩbirã mera árĩbiricãque,” arĩbiribũ. Eropigu “Nome mera ñero iirã mera, gajinore turaro gamenemocãrã mera, yajaricũrã mera, goãmarã wãanirãre umupeorã mera árĩbita,” arĩbeaa. I yebare eropa árĩrã mariro Jesure gamebirã mariro mari dihta árĩmasibeeaa. Árĩpehrerogue ãhrima erãpũ ta. <sup>11</sup> Eropigu mũare gojabeogu ñero arĩ doreribũ: “Mũare mera majarã Jesu yarãpũ erãpũ ñerire iicũ ïha erãpũre wapicũbiricãque,” arĩ goja doreribũ. Eropirã mua mera majagu “Jesu yagu ãhraa,” ïgu arĩgu árĩqueregu ta nome mera ñero iigu, gajinore turaro gamenemogu, goãmarã wãanirãre umupeogu, ñero quere moa coregu, merericugu, yajaricugu ïgu árĩcũ ïgũpũre wapicũbiricãque. Eropirã eropa iigu mera ne babiricãque. <sup>12-13</sup> Jesu yarã árĩbirãpũre Goãmũpũ dipuwaja moagũcumĩ. Eropigu Jesu yarã árĩbirãre erã ñero iiri dipuwaja moadoregu arĩbeaa yũhũ. Eropa iibiricãro gahmea yũre. Eropa arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mua Jesu yarãpũ mua mera gamenererã mua basi mua iirare ïha masiro gahmea mũare. Eropirã yujugu mua mera majagu ïgu ñero iicũ ïarã ïgure dipuwaja moadorero gahmea mũare. Eropirã Goãmũ yare gojarapũgue arĩdiro dopa mũapũ mua mera majagure ñero iigure dipuwaja moaro dopa iirã ïgure cóãque.

## 6

### *Jesu yarãre weresãrãre werepũ Pablo*

<sup>1</sup> ¿Mũare basi game dũyãsorire duhpirã Jesu yarã árĩbirã pohroque amudorerã wahari mua? Jesu yarãre mua mera majarãre weresãdiarã gajirã Jesu yarãre irire werero gahmea mũare. Eropirã Jesu yarãpũ amubasaporo. <sup>2</sup> Pehrerinũ árĩcũ mari Jesu yarãpũ mari árĩpehrerã masa erã iirare beyerãca. ¿Irire masibeari mua? Eropirã pehrerinũ árĩcũ masa árĩpehrerãre beyemorã árĩrã, dohpague sãre amumasia mari. Eropirã dohpague gajiropa wacũ sãre amumasia mari. <sup>3</sup> Anyua



erã iira sãre beyerãca mari. ¿Irire masibeari mua? Mari eropa anyuare beyemorã árĩrã diaye ta dohpague sãre Jesu yarã erã iirare ãarã beyemasica mari. <sup>4</sup> ¿Eropirã duhpirã mua mera majarãre weresãdiarã Jesure gamebirã, “Bu árĩrã” mua arĩrã pohrogue amudorerã wahari mua? <sup>5</sup> Ire arĩgu iiaa mua guhyasiuro mua tariborore. Mua duyasorire werebu ðaro masigu árĩcumi mua watopere, yu arãa. <sup>6</sup> Ĩgu eropa árĩquerecũ ta mua mera majagu Jesu yagu gajigu ĩgu acaweregure weresãdiagu Jesu yarã árĩbirãre beyedoregu wahami.

<sup>7</sup> Masare beyegu pohrogue mua acawererãre weresãrã Goãmu gameripure tarinugarã iiaa mua. Gajigu mua mera majagu muare ñero ĩgu iicũ eropa ãacãboaya mua. Jesu yarã árĩbirãre mua weresãbiriborore mua acaweregure muare ĩgu ñero iirare mua eropa ãacãcũ ðatariaboaya. Jesu yagu muare ĩgu yajacũ ĩgure mua weresãboro core ĩgu muare yajarare mua eropa ãacãcũ ðaboaya. <sup>8</sup> Mua eropiibea. Gajirãre ñero iirã ãhraa mua sã. Yajarã ta ãhraa mua sã. Jesu yarã mua acawererã erã árĩquerecũ ta erãre ñero iirã, yajarã iiaa mua.

<sup>9</sup> Eropa iirã Goãmu ĩgu opu árĩroguere wamasibeama. ¿Irire masibeari mua? Pee wisibiricãque mua. Òpa iirã Goãmu pohroguere wasome: Gajirã nome mera ñero iirã, goãmarã wéanirãre umupeorã, gajigu marapore marapocurã, gajigu marapu mera ñero iirã nome, uma seyaro erã dupuri mera ñero iirã, nome sã eropa ta iirã, <sup>10</sup> yajarã, gajinore turaro gamenemorã, merericurã, gajirã masare ñero quere moa corerã, guyarã mera yajarã ne Goãmu ĩgu opu árĩroguere wamasibeama. <sup>11</sup> Iribojeguere mua yujurãyeri eropa iirã árĩyoro. Eropa iinirã mua árĩquerecũ ta dohpaguere mua ñero iirare cóãtuhami Jesucristopu. Eropa ĩgu taunirã mua árĩcũ ĩgu yarã árĩmorã iimi Goãmu muare. Eropa iigu “Õarã ãhrima,” arĩ ĩhami ĩgu muare. Eropa ta iimi muare mari Opu Jesucristo mera, Espiritu Santo mera.

*Mari dupu ðarire iiburi dupu árĩro iiaa, arĩ gojañumi Pablo*

<sup>12</sup> “ ‘Goãmu iidorebirira árĩpehleri iimasiri ãhraa yare,’ arĩmi Pablo,” arãa mua yare. Yu iimasipehoqueregu ta, yu iiri yare gajirã sãre itamubiricũ ĩha irire iibea. Eropa ta árĩpehleri iimasiri ãhraa yare. Eropa iimasiqueregu ta yujuyerisuburi irire eropa iipogu duhumasibiriboca, arĩgu irire iisome yuh. <sup>13</sup> Mari bari mari paru maja árĩburi ta ãhraa. Eropiro “Mari paru bari dicuburiduru paru ãhraa,” arãa mua yujurãyeri. Mua eropa arĩquerecũ ta puhru Goãmupu mari barire mari paru sãre iri pehrea wacũ iigucumi. Eropirã mua yujurãyeri “Mari dupupu mari ñaribejari iiburi dupu ãhraa,” arĩraa mua. Eropa árĩbeaa. Mari dupu ñaribejari iiburi dupu árĩbeaa. Mari dupupu mari Opu ya árĩburire iiburi dupu ãhraa. Eropigu mari Opu mari mera ãhrimi mari ĩgu yare ðaro iiboro dopa. <sup>14</sup> Eropigu Goãmu ĩgu turari mera mari Opu Cristo dupu murarore masupu. Eropa ĩgure masudiro dopa ta mari dupu sãre masugucumi ĩgu.

<sup>15</sup> ¿Mua ya dupu Cristo ya dupu árĩri iro dopa árĩcũ masibeari mua? ¿Cristo ya dupu árĩri iro dopa árĩrã nomeo ñero iiricugo mera mari árĩcũ ðhari mua pepicũ? Òabirigohracãca. <sup>16</sup> Ñego mera yujugu igo mera árĩcũ ĩgu dupupu igo ya dupu mera árĩro yuju dupu iro dopa ta ãhraa. ¿Irire masibeari mua? Eropa arĩ gojara ãhraa Goãmu yare erã gojarapũgue. Òpa arãa: “Nomeo umu mera árĩrã perã árĩquererã yuju dupu iro dopa wahama,” arĩ gojamuriñumi. <sup>17</sup> Mari Opu ĩgu yarã mera ãhrimi. Eropigu yujugu ĩgu mari Opu mera perã árĩquererã yujugu iro dopa ãhrima erã guñari mera.

<sup>18</sup> Eropirã nome mera ñero iirire, uma mera ñero iirire ñaribejabiricãque. Irire mua ñaribejabiriboro dopa ta irire duhrigã waque. Gaji ñerire mari iira mari dupurire mari goroweobea. Nomeo mera ñero iigupu ĩgu dupure ñetariaro goroweomi. <sup>19</sup> Espiritu Santore marire ohomi Goãmu. Eropigu mari dupu mera

wihicami Espiritu Santo. ¿Irire masibeari mua? Eropirã mua ðupũ mua ya ðupũ gohra árĩbeaa. Goãmũ ya ðupũ ãhraa. <sup>20</sup> Mua ïgũ yarã árĩmorãre mua ñeri dipuwajare wajayedigũ árĩmi Cristo. Eropirã ïgũ yarã árĩrã mua ðupũ mera Goãmũ ïgũ gamero dopa ta ïique. Eropa iirã Goãmũre umupeorã iiaa mua. Eropirã gajirã sãre ïgũre umupeocũ iirã iiaa.

## 7

### *Mojoto diririre werepũ Pablo*

<sup>1</sup> Dohpaguere mua yũre serẽpi gojarare yũ sã mũare yũhrigura. Masũ marapo maricũ sãre õhaa yũ ïacũ. <sup>2</sup> Iri eropa árĩquerecũ ta ero mua árĩro baja ñaribejari ãhraa. Eropirã ñma erã nũcũ nome marapocũporo gajirã nome mera erã ñero iibiriboro dopa. Eropirã nome sã erã nũcũ marapocũporo gajirã ñma mera erã ñero iibiriboro dopa. <sup>3</sup> Eropigũ marapocũgũre ïgũ marapore õaro iiro gahmea. Igo marapũ sãre eropa ta iiro gahmea. <sup>4</sup> Marapocũgo igo ðupũ igo ya dihta árĩbeaa. Igo marapũ ya sã ãhraa ïgũ ïhadiburo dopa. Igo marapũ sãre ïgũ ðupũ ïgũ ya dihta árĩbeaa. ïgũ marapo ya sã ãhraa igo ïhadiburo dopa ta. <sup>5</sup> Mua perã árĩburire “Iibiricãrã,” arĩbita. Gajisubũ mua perã Goãmũ mera mua wereniguidiarã “I nũcũ nũri duhunirã dohpa, Goãmũ mera wereniguirã dohpa,” yujuro mera eropa arĩrã duhumasia mua. Mua eropa duhura pũhrũgã mua dipaturi mua eropa árĩniguidiro dopa ta árĩque daja watĩ ñero mũare iidorebiriboro dopa. “Gajirã mera ñero iiboca,” arĩrã mua basi duhubita. Mua árĩmũhtadiro dopa ta árĩniguicãque daja.

<sup>6</sup> Ire mũare dohpague yũ arĩrare arĩgũ mũare dore gohrari mera dorebeaa. Eropa weregũ iiaa mua iiburire mua masima õaro. <sup>7</sup> “Õma marapocũporo,” arĩquerecũ, árĩpehrerã mua yũ iro dopa ta marapo marirã mua árĩcũ õaboaya yũre. Mua eropa árĩcũ gamequerecũ ta Goãmũ mari árĩpehrerãre yujuropa iimasiburire apibeami. Yujurãyerire marapocũmasiburire marapocũmasiburire apimi Goãmũ. Eropigũ ïgũ gajirãpũre marapocũmasibiriburire marapocũmasibiriburire apimi.

<sup>8</sup> Eropigũ marapo marirãre, marapũ marirãre, wapeweyarãre õpa arãa: Marapo marirã, marapũ marirã mua árĩmasirã, yũ árĩro dopa árĩcũ õhaa. <sup>9</sup> Eropa árĩmasibirã turaro nomere gahmema. Irire turaro ñaribejarã diaye ta marapocũcãporo. Nome sã marapocũporo. Mua eropa ñaribejarã mua marapocũcũ õapũricãa. Eropiro marapocũcũ sãre õapũricãa.

<sup>10</sup> Mua marapocũrãre, marapocũrã nomere õpa dorea: Yaha doreri gohra árĩbeaa i. Mari Opũ Cristo ire doredi árĩmi. Mua nomerũ mua marapũ sũmarãre cóãbircãque. <sup>11</sup> Mua marapũ sũmarãre cóãrã, marapũ marirã dujaque. Dipaturi mua marapũ árĩdigũ mera ahmu õaro árĩbiricũ daja marapũ marirã dujaque. Eropirã mua ñma sã mua marasã nomere cóãbircãque.

<sup>12</sup> Eropigũ mua sãre gajirã sãre õpa arãa yũhũ. Mari Opũ ïgũ dorediro árĩbeaa i. Yũhũ ïgũ apidigupũ õpa arãa mũare: Yujurãyeri mua mera majarã Jesu yarãpũ Jesure umupeobirã nomere marapocũrã ãhraa. Eropigũ õpa arĩ werea mũare: Mua marasã nome mua mera erã dujadiacũ erã nomere cóãbircãque mũapũ. <sup>13</sup> Eropirã yujurãyeri mua mera majarã nome Jesu yarã nome Jesure umupeobirã mera marapocũrã nome ãhraa. Mua marapũ sũmarã mua mera erã dujadiacũ erãre cóãbircãque. <sup>14</sup> Mua marapũ sũmarã Jesure umupeobirã erã árĩquerecũ ta Jesu yarã nomere erã marapocũcũ, Goãmũ õarã ñma iro dopa ïhami erãre. Eropirã mua ñmarũ Jesu yarã mua árĩcũ mua marasã nome Jesure umupeobirã nome árĩbocoma. Erã eropa árĩquerecũ ta mua mera erã nome marapocũcũ Goãmũ õarã nome iro dopa ïhami erãre. ïgũ eropa ïabircũ mua porã Jesure umupeobirã porã iro dopa árĩboñuma. Eropigũ mua porã sãre õarã iro dopa ïhami Goãmũ. <sup>15</sup> Eropirã mua

umarure mua marasã nome Jesure umupeobirã nome erãpũ muare cóãcũ ðaroca. Mua nome sãre mua marapũ sumarã Jesure umupeobirã erãpũ muare cóãcũ ðaroca. Mari ðaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeami Goãmũ. Eropirã mua erã marasã nome erã marapũ sumarã árĩbeaa pare. <sup>16</sup> Mua uma mua marasã nome mua mera dujaquerecũ erã peamegue wabiriborore Jesure umupeocũ iimasibiriboca. Mua nome sã eropa ta Jesucristore umupeocũ iimasibiriboca mua marapũ sumarãre. Eropirã erã muare cóãdiacũ ðaroca.

<sup>17</sup> Òpa ta iiro gahmea muare: Árĩpehrerã mua mari Opũ Cristo muare ïgũ arĩdorero dopa ta árĩque. Goãmũ muare ïgũ apirare iique mua. Irire árĩpehrero Jesu yarã gamenererãre eropa doreniguica yũhũ. <sup>18</sup> Jesu yarã mua árĩboro core circuncisión iinirã gasiro mero wiri añirã árĩrã eropa ta dujaque. Eropirã Jesu yarã mua árĩboro core gasiro merogã wiri añibirinirã árĩrã mua árĩro dopa ta dujaque. <sup>19</sup> Dohpaguere gasiro mero wiri añirã mua árĩcũ duhpiburi árĩbeaa. Irire iibirinirã mua árĩcũ sãre gajiropa wasome. Goãmũ dorerire mari iicũpũre iri tamera ðhaa. <sup>20</sup> Eropirã Goãmũ Jesu yarã muare ïgũ aĩcũ irisubu mua árĩmũhtadiro dopa ta dujaque.

<sup>21</sup> Goãmũ muare Jesu yarã añboro core gajirã pohro majarã mua árĩcũ ðaroca. Eropa ta dujanique. Mua Opũ ïgũ muare wiudiacũ wirique mua. Mua wiricũ sãre ðaroca muare. <sup>22</sup> Òpa arĩ pepique mua: “Yũhũ masũ pohro majagũ wiribiriqueregũ ta dohpaguere Jesu yagũ árĩgũ, ïgũ wiudigũ iro dopa ãhraa ïgũ yare iiboro dopa,” arĩ pepique. Eropa ta gajirã Goãmũ Jesu yarãre aĩcũ masa pohro majarã mua árĩbiriquererã ðpa arĩ pepique: “Dohpaguere Jesu pohro majagũ ãhraa yũhũ,” arĩ pepique. <sup>23</sup> Mari ñeri dipuwajare mari ïgũ yarã árĩmorãre wajayetuhadi árĩmi Cristo. Eropirã ïgũ dorero dopa iique. Mua iiburire masa dorebircãporo. <sup>24</sup> Eropirã yũ acawererã, Jesu yarã árĩmorã Goãmũ muare ïgũ aĩcũ irisubu mua árĩmũhtadiro dopa ta dujaque. Eropa dujarã Goãmũ mera ðaro árĩque.

<sup>25</sup> Dohpaguere marapo marirãre, marapũ marirã sãre werediaa muare. Yũ wereburi mari Opũ weredoreiro gohra árĩbeaa. Eropa árĩbiriquerecũ yũhũ ïgũ mojomoro ïadigũ, ïgũ itamudigũ árĩcũ mua yũ wererire ðaro mera peerãca. Òpa werea muare. <sup>26</sup> Dohpaguere mari ñero tarirã iica. Eropirã mua árĩro dopa mua dujacũ ðhaa yũre. <sup>27</sup> Eropirã marapũ marapocũrã, marapũcũrã sã eropa ta dujaque. Erãre cóãbircãque. Marapo marirã, marapũ marirã sã mua árĩrã eropa ta dujaque. Marapore o marapũre amabita. <sup>28</sup> Eropa yũhũ muare arĩquerecũ “Marapocũgũra,” arĩcũ gajiropa árĩbeaa umare. Eropirã mua nome sãre marapũcũdiacũ ðaroca. Òpa ãhraa. Irisubu ñero taririsubu marapocũrã, marapũcũrã muare teboricũburi dujaroca. Eropigũ muare eropa teboricũri arĩgũ, marapo marirã, marapũ marirã dujaque, arãa yũhũ.

<sup>29</sup> Yũ acawererã, eropa arĩgũ ðpa arĩdiagũ iiaa. Mari ñero tariboro merogã duhyaa. Eropirã dohpaguere marapo marirã Goãmũ yare erã ðaro mohmemasiro dopa ta, ðaro mohmero gahmea marapocũrã sãre. Eropirã marapũcũrã nome sãre eropa ta Goãmũ yare ðaro mohmero gahmea. <sup>30</sup> Eropirã mari ñehamere orequererã Goãmũ yare mohmeboropũre guñaro gahmea. Bosenũ árĩrã mucubiriquererã Goãmũ yare mohmeboropũre guñaro gahmea. Mari asũrãre opaquererã irire guñabircãro gahmea. Goãmũ yare mohmero gahmea. <sup>31</sup> I yeba dohpague árĩro dopa pehrero iiaa. Eropirã i yeba majare iiburire wũaro guñabircãro gahmea.

<sup>32</sup> Mua gajinore wũaro mua guñaricũcũ gamebeaa yũhũ. Marapo marigũ Jesu yagũ arĩgũ mari Opũ Jesu yare ïgũ gamerire guñaniguimi. <sup>33</sup> Marapocũgũpũ Jesu yagũ i yeba maja sãre ïgũ marapo gamerire guñami. <sup>34</sup> Eropigũ peñe guñami. Marapũ marigo mari Opũ Jesu yare iiburire guñaniguimo. Eropa guñago igo igo dũpũ, igo

pepiri mera ta mari Opu yago ðaro árĩdiamo. Marapucugoru i yeba majare igo marapu gameripure burigã iidiamo.

<sup>35</sup> Ire mware arĩgu iiaa mware itamubu. Teboricuri dorerire mware cãhmotadiabeaa. Eropa cãhmotadiabiriqueregu ta ðaro mua iicũ gahmea. Eropigu baja guñaricuro mariro Jesu mari Opu ĩgu gameri dihtare mua turaro iidiacũ gahmea yũhũ.

<sup>36</sup> Mua mera majagu ĩgu mago igo buro wacũ ĩagu marapucudoreporo ĩgu igore. “Igre ðaro iibeaa. Marapucuro gahmea igore,” arĩ pepigu ĩgu arĩdiro dopa ta nomesoporo. Eropigo igo marapucumasimo. Eropa igore marapucudoregu ñero iibeami. <sup>37</sup> Gajiguru ĩgu magore “Marapucubiricãporo,” arĩbocumi. Yujugu umure wereyudiro mariro, yujuñe ta pepigu arĩgu, “Igre marapucubiricãporo,” arĩgu ðaro iimi. <sup>38</sup> Eropigo ĩgu mago marapucudoredigo ðaro wagocumo. ĩgu mago marapucudorebiridigoru gajigo tauro ðaro wagocumo dohpaguere ñero taririsubu arĩcũ.

<sup>39</sup> Marapucugore igo marapu mera árĩniguicãdoremi Goãmũ. Igo marapu sĩrira purũ igo gajigu mera igo gamegu mera marapucumasimo daja. Jesure umupeogure marapucuro gahmea igore. <sup>40</sup> Igo marapu marigo dujago tauro ðaro mucubirigo arĩgocumo igo. Eropa ta arĩ pepia yuru. Eropa arĩgu Espĩritu Santo ĩgu gamero dopa ta arĩgu iiaa.

## 8

*Goãmarã wéanirãre erã umupeomorã waimurã wejẽ erã apira barire Jesu yarã asũ baburire werepu Pablo*

<sup>1-4</sup> “Gua tamera ðaro masia,” arĩ pepiraa mua. Eropa arĩ pepirã mua masiri mera gajirãre masitarinugadiarã iiaa mua. Eropa iirã gajirãre itamubeaa mua. Gajirãre umupeori mera mahirãpu erãre itamua erã Jesucristore umupeonemoboro dopa. “Masipehocãa yũhũ,” arĩbiricãro gahmea marire. Eropa arĩrã ðaro masibea mari. Eropirã “Õaro masinibirica dohpa,” arĩ pepiro gahmea marire. Mari Goãmure mahirãpore marire masicũ iimi.

Eropigu goãmarã wéanirãre umupeorã erã pohro apira barire “¿Mari bamasicuri?” arĩ weregura mware: Goãmarã wéanirã ne duhpimorã arĩbeama. Diaye ta erã wéanirãre ne sĩporãri mara. Eropigu Goãmũ yujugu ta aħrimi. Gajirã goãmarã marima. Ire mari masia. <sup>5</sup> Gajirã masa õpa arĩma. “Mari goãmarã bajarã aħrima. Erã mari oparã aħrima,” arĩ pepirima. “Umũsiguere, i yeba sãre goãmarã aħrima,” erã arĩquerecũ ta maripure yujugu ta Goãmũ gohra aħrimi. <sup>6</sup> ĩgu mari Pagu arĩpehrerãre, arĩpehrerire arĩdoredigu aħrimi. Eropirã ĩgu ya arĩburire iimorã aħraa mari. Eropigu mari Opu Jesucristo yujugu ta aħrimi. ĩgu arĩpehrerire mari Pagure ĩhacũnugubasadigu aħrimi. ĩgu yarã arĩmorãre iipu ĩgu marire. Eropirã ĩgu mera eropa árĩniguirãca mari.

<sup>7</sup> Yu arĩdiro dopa ta eropa arĩquerecũ gajirã Jesu yarã irire masibeama. Iri-bojegue erã goãmarã wéanirãre umupeorã “Oã goãmarã ojocarirã aħrima,” arĩ pepimuriñorã. Irisubuguere eropa arĩponirã arĩrã dohpague sãre erã wéanirãre erã apira barire barã “Goãmarãre umupeorã iiaa,” arĩ pepirima. Eropirã iri barire barã, “Mari ñero iirã iiaa,” arĩ pepirima ðaro masibirã. Eropirã “Ñerire iirã iiaa,” arĩ pepiquererã erã irire iicũ erã pepiri gajiropa waca. <sup>8</sup> Eropigu õpa arĩ werea mware: Iri barire mari bacũ mari babiricũ sãre Goãmũ mera ðaro arĩcũ iibeaa marire. Irire mari babirã ñero iibeaa. Mari irire barã sã gajirã tauro ðarã arĩbeaa mari, arĩ werea yũhũ. <sup>9-10</sup> Eropa mware werequerecũ ðaro iique mua. Iri barire barã mua arĩcũ gajirã Jesu yarã mware ĩabocoma. Mware ĩarãpu ðaro masinibirã “Iri barire barã



Goãmure umupeobeamã,” arĩ pepirã árĩrãcoma. Eropa arĩ pepiquererã mware ìhacũ erã sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mua. Eropirã õaro iique. <sup>11</sup> Mwapũ masirã árĩrã, “Gua iri barire gua bacũ õaroca,” mua arĩ pepirã árĩrã gajirã õaro masibirinirãre ñero iicũ iiboca mua mware erã ìhacũcũ. Erã ya árĩburi sãre sĩridi árĩmi Cristo. Eropirã mua bari mera mua Cristo yarãre mua acawererãre ñero iicũ iirã erãre goroweoboca mua. <sup>12</sup> Õaro masibirãre mua acawererãre erã arĩ pepiro dopa iibiricũ erã pepiri gajiropa wacũ iiboca mua. Eropa iirã Cristo sãre ñero iirã iiaa mua. <sup>13</sup> Eropigũ wéanirãre erã ora barire yũ bagũ yũ acaweregũre ñero iicũ iiboca yũhũ. Jesu yarã erã ñero iicũ gamebeaa. Eropigũ yũhũ “¿Erãre ñero iicũ iiri?” arĩgũ, iri barire ne dipaturi basome yũhũ.

## 9

### *Pablo Jesu ìgũ apidigũ ìgũ árĩrare werepũ*

<sup>1</sup> Jesu ìgũ yare buhedore ìgũ apidigũ àhraa. Eropigũ gajirã ìgũ apinirã erã iiro dopa ta iimasia yũ sã. Jesu ìgũ apidigũ ta àhraa yũ sã. Mari Opũ Jesure ìadigũ ta àhraa yũ sã. Eropirã Jesu yare yũ buhecũ mwapũ irire õaro peenirã árĩrã ìgũ yarã wahuu mua. Mua eropa ìgũ yarã wara pũhrũ Jesu ìgũ apidigũ yũ árĩrare masituhabu mua. <sup>2</sup> Gajirã yũre werewuarã “Ìgũ Jesu ìgũ apidigũ árĩbeami,” arĩbocoma. Erã eropa arĩquerecũ ta mwapũ eropa arĩmasibea. Mware yũ buhera pũhrũ Jesu yarã warã, “Jesu ìgũ apidigũ àhrimi,” arĩ yũre masituhaa mua. Eropirã gajirã erã werewuquerecũ ta mwapũ ìgũ apidigũ yũ árĩricũre mua masia.

<sup>3</sup> Yũre werewuarãre õpa ta arĩ yũhrigura. <sup>4</sup> Mware yũ buheri waja yũ baburire, yũ ihriburire yũre oro gahmea mware. <sup>5</sup> ¿Eropigũ marapocũgũ árĩgũ yũ marapo Jesu yago igo árĩcũ igo mera aĩ curimasibiribocuri yũhũ mua pepicũ? Gajirã Jesu ìgũ apinirã, Jesu pagũ porã, Pedro sã erã marasã nome mera erã curiro dopa ta yũ sã curimasiboaya. Yũ eropa curicũ yũ marapocũgũ árĩcũ, igo sãre barire oboaya mua. <sup>6</sup> Yũhũ Bernabé mera mware õari buherire gua buhequerecũ ta guare ne gajinore obeaa mua. Eropirã gua basi ta gua baburire mohme wajatabũ gua. Gajirã Jesu apinirãpũre erã buheri waja oayoro mua. ¿Gua dihta eropa buherã, waja mariro buhero gahmeri mua pepicũ? <sup>7</sup> Yujugũ surara ìgũ mohmecũ ìgũ oparã ìgũ árĩburire wajayemũrima. Ìgũ basi wajayebeami. Barire otegũ sã ìgũ otera dũcacũcũ irire ta tea aĩ bamasimi. Eropigũ ovejare ìhadibugũ ìgũ ejorã apĩcore aĩmasimi ihribu ìgũ sã. <sup>8</sup> Eropa arĩgũ masa erã doreri dihtare mware werebeaa. Goãmũ ìgũ dorerigue ìgũ arĩra sãre mware weregũ iiaa. <sup>9</sup> Ìgũ dorerire erã gojarapũgue õpa arĩ werea: “Wecũ trigo yerire ìgũ guburi mera ìgũ suhri wearisubu ìgũ badiacũ ìgũ disirore cãhmotabiricãque,” arĩyoro Moise dorerigue. Goãmũ eropa doregũ wecũare ìhadiburire arĩgũ iibiriñumi. <sup>10</sup> Eropa doregũ guare Goãmũ yare buherãre itamudorerore weregũ iĩñumi marire buhebu. Pohere séanirã sã iri dũcare aĩnirã sã erã mohmera pũhrũ, dũcacũrisubu iri dũca wajataborore cohrema. Eropa mohmerãre barire oro gahmea marire. <sup>11</sup> Mware Goãmũ ya buherire õari buherire buhebu gua. ¿Gua eropa buheri waja mwapũre guare barire obiro gahmeri mua pepicũ? Oro gahmea mware. Mua ocũ õaboaya guare. Eropa arĩquerecũ mua obirimũribu guare. <sup>12</sup> Eropa guare obirã arĩquererã ta gajirã buherã mware irire odorecũ mua erãpũre ohayoro. Erã mware odorecũ guapũ erã tauro odoremãsiboaya mware turaro gua buheri waja.

Eropa dorebonirã arĩquererã ta guapũ “Guare oque,” ne arĩbiribu. “Cristo ya buherire gamebiribocoma gua dorecũ,” arĩrã guare dũhyaquerecũ ta mware ne odorebiribu. <sup>13</sup> Masa Goãmũre umupeorã Goãmũ wihigue bari aĩ apima. I wihĩ



mohmerã iri barire aĩ bahama. Eropirã Goãmure erã umupeori mesa pohro mohmerã waibugure erã soedigure masa erã aĩ apidigure merogã aĩ bahama erã sã. ¿Irire masibeari mũa? <sup>14</sup> Eropa erã iidiro dopa ta õari buherire buherãre erã buhera waja oro gahmea erã baburire. Eropa ta iidorepu mari Opu Jesu. <sup>15</sup> Eropigu mũare serẽbodi árĩqueregũ ta yũhũ gajinore ne serẽbiribũ mũare. Eropigu ire dohpaguere gojagu gajinore waja gamebu gojagu iibea. Mũare ne waja seadiabeaa. Sĩribu árĩqueregũ ne waja gamesome yũhũ mũare. Waja mariro buhegu sũa. Eropigu mũare iri buhera waja ne wajata basome.

<sup>16</sup> Õari buherire buhedoregu apimi yũre Goãmũ. Irire buheri masũ árĩgu tiiaa yũhũ. Õari buherire buhebigũ ñero waboaya yũhũ. Eropigu iri buherire buhegu “Gajirã masitarinugagu ãhraa,” arĩbodigu ne arĩbeaa yũhũ. <sup>17</sup> Õari buherire yũ gamero buhegu yũ buheri waja wajaseaboaya yũhũ. Yũ gamero buhebeaa. Goãmũ ĩgu yare buhedoregu apimi yũre. <sup>18</sup> Õari buherire buhegu mũare yũ buhera waja serẽmasiboaya yũhũ. Eropa serẽmasiqueregũ ne gajinore serẽbigũ waja mariro iri buherire buhea mũare. Yũhũ eropa ĩgu árĩgu “Õaro wajatagũca Goãmũ mera,” arãa. Iri ta ãhraa yũ wajatari.

<sup>19</sup> Eropigu yũhũ masare buhegu erã yũ buherire peediacũ õpa ĩgu iiaa Jesu yarã erã waboro dopa. Ne masa pohro majagu arĩbiriqeregũ ta arĩpehrerãre pohro majagu iro dopa iiaa yũhũ erã yũ buherire peediacũ ĩgu. <sup>20</sup> Eropigu yũ acawererã judio masa mera árĩgu, judio masa iiro dopa ta iiaa yũhũ yũ buherire erã peediacũ ĩgu. Goãmũ ĩgu dorera Moiserẽ ĩgu apira yũre iri dorebiriqerẽcũ ta, iri doreri dihtare umupeorã mera árĩgu erã dorerire umupeogu iro dopa ta ãhraa yũ sã. Eropa ta iiaa yũhũ erã yũ buherire erã peediacũ ĩgu Jesu yarã erã waboro dopa. <sup>21</sup> Moise dorerire umupeobirã mera árĩgu iri dorerire umupeobigu iro dopa ta iiaa. Yũ buherire erã peediacũ eropa ta ĩgu iiaa yũhũ erã Jesu yarã erã waboro dopa. Eropa iiqueregũ Goãmũ dorerire umupeoniguia. Cristo dorerire iiaa. <sup>22</sup> Eropigu õaro masibirã mera árĩgu erã iro dopa ta ãhraa. “Masipehogũ ãhraa,” ne arĩbeaa yũhũ erãre. Eropa ta iiaa yũhũ erã sã Jesu yarã erã waboro dopa. Eropigu arĩpehrerã masa erã arĩricũro dopa ta iiaa yũhũ erãre yũ buherire peediacũ ĩgu. Yujurãyeri Jesu taurã erã waboro dopa iiaa. <sup>23</sup> Eropa iiaa õari buherire arĩpehrerã erã õaro peeburire. Erã eropa peera pũhrũ Jesucristo erãre peamegue wabonirãre taumi. Eropigu yũhũ erã mera õaro mucubiriborore eropa iiaa.

<sup>24</sup> Mũare werenigui queori mera õpa werea. Omabirarã erã omarã arĩpehrerã omama. Erã eropa omapehrequerẽcũ ta bũrigã omaturagũpũ omajamũhtami. Eropa ejamũhtagu wajatami. Eropirã erã bũrigã omadiro dopa ta mũa sã Goãmũ gamerire bũrigã iique mũa wajataboro dopa. <sup>25</sup> Arĩpehrerã omamorãpũ yũ dupũre gajiroa ĩiri arĩrã gajinore duhucãma erã omaboro core. Eropa ta iima erã pũri berore erã wajataboro dopa. Iri pũri bero erã dipuru peyama masa erã wajatarare ĩaboro dopa. Eropiro erã eropa ĩi erã wajatara bero mata pehrea wahaa. Mari sã Goãmũ yare õaro buhemorã gajinore duhucãrã mari wajataboro dopa. Iri mari wajatari tamera ne pehrebeaa. <sup>26</sup> Eropigu omabiragu ĩgu noho gamero omaro dopa iibea yũpũ. Yũ gamero iimaacãbeaa. Goãmũ gamerire masigu iiaa gajirãre itamuboro dopa. <sup>27</sup> Eropigu yũ gamero dopa iibea. Yũ ãaribejari yũre dorebeaa. Masa erã Goãmũ mera taricũ itamuburi dihtare iiaa. Eropa iibigu gajirãre Goãmũ yare buhedigu yũ árĩquerecũ ta Goãmũ yũre “Õaro ĩbũ,” arĩbiribocumi.

## 10

*“Goãmũ ãhrimi,” erã arĩ goãmarã wéanirãre umupeodorebiripũ Pablo*

<sup>1</sup> Eropirã yu acawererã, ire masique mũa. Mari ñecũ sũmarã mũa iribojegue majarã árĩpehrerã mũrague mera Goãmũ árĩmũriĩnumi. Ĩgũ imica curu mera erãre wamũhtaĩnumi. Erã ĩgũre eropa nũrusia wahgãrã wũariya deco diariya waĩcũriya eja õaro taribuja waĩnuma. <sup>2</sup> Erã árĩpehrerã imica curu doca árĩnirã wũariya taribujanirã Moise yarã waĩnuma. <sup>3</sup> Eropirã erã árĩpehrerã umaro maja dijuri barire bamũriĩnuma. Goãmũ ĩgũ orire bamũriĩnuma. <sup>4</sup> Eropa barã erã árĩpehrerã Goãmũ ĩgũ ori deco sãre ihrimũriĩnuma. Irisubugue erã ihriburi decore Goãmũ ĩgũ apira utãyegue iri decore wiridoreĩnumi. Erã iri deco ihridiro dopa Cristo iri utãye iro dopa ĩgũ ta erãre ojocariro odi árĩĩnumi. Ĩgũ erã mera árĩmũriĩnumi. <sup>5</sup> Erã eropa wanirã erã árĩquerecũ ta erã mera majarã bajarã ñero erã iicũ ĩagũ Goãmũ erãre ĩhasũabiriĩnumi. Eropigũ erãre masa marirogue boacũ iĩnumi Goãmũ.

<sup>6</sup> Erãre eropa wara marire gũisãburi ãhraa erã iidiro dopa ta mari ñerire mũaribejabiriborore. <sup>7</sup> Eropirã goãmarã wéanirãre erã umupeodiro dopa iibita mũa. Wecũre erã wéadigũre erã umupeodirore Goãmũ yare erã gojarapũ werero õpa arãa: “Masa erã ba doaja ihrituha, wahgãnũgaja, bosenu iĩnuma,” arĩ gojamũriĩnumi iribojegue. <sup>8</sup> Pũhrũ gajirã erã mera majarã nome mera ñero iĩnuma. Erã iidiro dopa iibiricãro gahmea marire. Erã eropa ñero iira dipuwaja yujunũ ta erã veintitrẽs mĩl gohra masa sĩria waĩnuma. <sup>9</sup> Gajisubugue gajirã erã yujurãyeri Goãmũ erã gamero dopa iicũ gamerã õpa ĩgũre arĩ turiĩnuma. “Mari Opũ itamumasibeami marire,” arĩĩnuma Goãmũre turirã. Eropa arĩ turirã ĩgũre guacũ iĩnuma. Erã iidiro dopa iibiricãro gahmea marire. Erã eropa iira dipuwaja Goãmũ erãre añaa mera cũri wejẽdoreĩnumi. <sup>10</sup> Gajisubu daja erã mera majarã gajirã ñerã erã basi Goãmũ iirare dũyasocũ anyu masare wejẽgũpũ erãre wejẽĩnumi. Eropirã erã iidiro dopa iibiricãro gahmea.

<sup>11</sup> Eropa iĩnumi Goãmũ marire buhebu. Maripũ pehrerinũ coregã árĩrã ãhraa. Mari eropa árĩrã árĩcũ iribojegue majarã erã eropa warare Goãmũ gojadoreĩnumi marire gũisãgũ. <sup>12</sup> Eropirã mũapũ “Yu tamera õaro iiaa yũhũ,” arĩ pepirã árĩrã õaro iique ñerire iiri arĩrã. <sup>13</sup> Mari árĩpehrerã yujugũ dũhyaro mariro yujuyerisuburi ñerire guñaa. Eropa guñarã iri ñerire iidiaa. Mari eropa iidiaquerecũ ta Goãmũpũ marire itamuniguicãgũ iimi. Ĩgũ arĩdiro dopa iigũ ãhrimi. Eropigũ marire iri ñerire iidiarare tarinũgacũ itamumi. Marire guñaturacũ iimi. Eropa guñaturarã warã iri ñerire iideasome. Eropirã árĩpehreri ñeri iidiaquererã iri ñerire tarinũgarãca.

<sup>14</sup> Eropirã mũa yu mahirã yũre peeque. Ne merogã goãmarã wéanirãre ne umupeobiricãque. <sup>15</sup> Mũa õaro pee masirã mũa árĩcũ mũare werea. Eropirã yu arĩri diaye árĩcũ masique mũa. <sup>16</sup> Mari gamenere bocatĩrirã Goãmũre “Õhaa,” arĩra pũhrũ iri vino deco dicũripare ihria mari. Eropa ihrirã “Cristo mari ya ñero iira dipuwajare ĩgũ di cóãra mera ĩgũ mera árĩrã ãhraa mari,” arĩ masia. Eropirã panrure mari Cristo yarã nuha barã iiaa mari. Eropa barã “Mari ya árĩburire ĩgũ dũpũ crusague sĩria mera mari ĩgũ mera árĩrã yuju dũpũ iro dopa ãhraa mari,” arĩ masia. <sup>17</sup> Eropirã mari yujuru panrure nuha baro dopa árĩpehrerã mari Cristo yarã yuju dũpũ iro dopa ãhraa. Eropirã yuju curu ta ãhraa.

<sup>18</sup> Moise dorerire iirã erã iirire guñaque mũa. Goãmũ wihigue erã waibũgũre wejẽ soema Goãmũre umupeomorã. Erã eropa wejẽ soera pũhrũ erã soedigũre bahama. Eropa barã yuju curu ta Goãmũ yarã árĩrã ta iima. <sup>19</sup> Õpa ta arĩgũ goãmarã wéanirã diaye ãhrima, arĩbeaa. Goãmarã marima, arãa. Eropirã goãmarã wéanirã eropárĩcãrã iima. Eropiro goãmarã wéanirã pohrogue erã apira baripũ bu gohra ta ãhraa. Iri bari bacũ marire gajiropa iibeaa, arãa yũhũ. <sup>20</sup> Yũhũ eropa arĩqueregũ ta iri barire mũa bacũ gamebirica. Õpa ãhraa iri: Jesu yarã árĩbirã goãmarã wéanirã pohrogue waibũgũre wejẽburire apirã Goãmũre umupeobeama. “Gũa goãmarãre

umupeorã iiaa,” arĩrã watẽapũre umupearã iima erã. Erã eropa umupecũ erã umupeiuri wihigue erã mera mũa batamurã watẽa mera árĩrã iro dopa iirã iica mũa. Mũa eropa iicũ tamerare ne gamebeaa. <sup>21</sup> Bocatĩrirã vino deco dicũripare ihrirã panrure nuha barã “Cristo mera ãhraa,” arãa mari. Mari eropa iirã árĩrã, watẽa yapũre ihri, bamasibeaa mari. Eropirã goãmarã wéanirã pohro apira barire erãre umupearã mera iri barire batamumasibeaa mari.

<sup>22</sup> Mari Opũ ĩgũ yarãre mahimi. Eropirã eropa barã watẽa yarã iro dopa iirã ĩgũre guacũ iirãca. ĩgũ guacũ mũa turabeaa ĩgũ dipuwaja cãhmotaboro dopa.

*Goãmũ ĩgũ gameri dihtare iique, arĩ gojañumi Pablo*

<sup>23</sup> “Goãmũ iidorebirira árĩpehreri iimasiri ãhraa yũre,” arĩboca mũa. Mũa iiri ñeri iri árĩbiriqurercũ ta irire iirã gajirãre itamubiriboca mũa. Eropirã Jesure umupeonemocũ iibiriboca mũa gajirãre. <sup>24</sup> Mari ya õaro árĩburi dihtare iibiricãro gahmea. Gajirã ya árĩburi sãre õaro itamuque mũa.

<sup>25-26</sup> Eropirã gajirãre itamuburire õpa iique: Bari duaroguere barire asũrã warã “¿I bari goãmarã wéanirã pohroque erã apira bari ãhriri?” arĩ, serẽpiñabiricãque. “¿Ñerire iiri?” arĩrã, serẽpiñaboca mũa. Goãmũ yare gojarapũgue õpa ãhraa: “I yeba árĩri árĩpehreri Goãmũ ya ãhraa,” arĩ gojañuma. Eropirã iri barire “Goãmũ badorebirira bari ãhraa,” arĩbiricãque.

<sup>27</sup> Jesure umupeobigũ mũare badoregũ ĩgũ sihucũ wadiarã waque. Eropa warã mũare ĩgũ ejorire baque. “¿I bari goãmarã wéanirã pohro erã apira bari ãhriri?” arĩ serẽpiñabita. <sup>28</sup> Gajigũ ero árĩgũ õpa arĩbocumi mũare: “I bari goãmarã wéanirãre erã wejẽ apira dihi ãhraa,” arĩbocumi ĩgũa. ĩgũ eropa arĩ werẽcũ iri bari tamerare babita. Mũare eropa arĩ werẽdigũ “Iri barire barã ñerire iirã iica,” arĩ pepibocumi. ĩgũ eropa arĩ pepibiriboro dopa “Babita,” arãa yũhũ mũare. <sup>29</sup> Eropa arĩgũ mũa ya árĩburire werẽgũ iibeaa. Mũare iri barire werẽdigũ ya árĩburipũre arĩgũ iiaa mũare. Iri mũa bacũ ĩha mũare ĩhacũ ĩgũ sã babocumi. ĩgũpũ eropa bagũ “Ñero iigũ iiaa,” arĩ pepibocumi. Eropirã “¿Eropa iibocuri ĩgũ?” arĩ iri barire babita.

“Babita,” yũ arĩcũ õpa arĩ yũhriboca mũa yũre: “¿Dohpa árĩrono gajigũ gajirope pepiri arĩrã gũa gamero iimasibiribocuri gũa? <sup>30</sup> Goãmũre gũa ‘Õhaa,’ gũa arĩra pũhrũ gũa bacũ gajigũ irire gũa barare gũare werẽsãmasibeami,” arĩboca mũa yũre. Yũpũ õpa yũhria. <sup>31</sup> I árĩpehrerire mũare yũ wererare werẽgũ õpa arĩgũ iiaa mũare: Õmũri nũcũ mũa mohmerã, barã, ihrirã, árĩpehrerire iirã irire Goãmũ ya árĩburi dihta iique. Eropirã árĩpehrerã masa Goãmũre “Õagũ, turagũ ãhrimi,” erã arĩ umupeoboro dopa iique. <sup>32</sup> Ne mũa iiri mera judio masare, judio masa árĩbirãre, Goãmũ yarã sãre goroweobiricãque. <sup>33</sup> Õpa iiaa yũpũ. Masa árĩpehrerã erã sũaboro dopa iiaa árĩpehreri mera. Eropigũ yũ gamero dopa iiniguicãbeaa yũa. Gajirã masa ya árĩburipũre õaro iiaa. Erãre Jesucristore umupeoborore eropa iiaa. Erã ĩgũre umupeora pũhrũ erãre peamegue wabonirãre taugũcumi.

## 11

<sup>1</sup> Cristo gajirã ya árĩburire árĩpehrerire iimi. Eropirã Cristore yũ ĩhacũdiro dopa ta mũa sã yũ iidiro dopa ta yũre ĩhacũque.

*Corinto majarã erã gamenererogue nome erã iiborore werẽpũ*

<sup>2</sup> Mũare yũ árĩpehrerire buherare, buhe turiarare guñapeo waĩcuabũ. Eropa guñarã mũare yũ arĩrãre yũ iidorediro dopa ta ii waĩcuabũ mũa. Eropa iirã õaro iiaa mũa. <sup>3</sup> Dohpaguere i sãre mũa masicũ gahmea: Árĩpehrerã ẽma opu Cristo ãhrimi. Eropigũ nomeo opu ẽmũ ãhrimi. Eropigũ Cristo opu, ĩgũ Pagũ Goãmũ ãhrimi. <sup>4</sup> Mũa Goãmũre umupeo gamenerercũ yujugũ Goãmũre serẽgũ dipuru bũa serẽgũ õaro

ĩgu opũre umupeogu iibeami. Goãmũ yare weretaugu sã dipuru buagu ĩgu opũre umupeobeami ĩgu sã. Eropirã ɔmarũ Goãmũre serẽrã dipu buabiricãporo. <sup>5</sup> Eropigo nomeopũ dipuru buabigo Goãmũre serẽgo igo marapũre umupeogo iibeamo. Goãmũ yare werego sã dipuru buabigo eropa ta igo sã umupeobeamo. Eropirã nomepũ Goãmũre serẽrã dipu buaporo. Dipuru buabigo igo poarire erã õaro wũapehodigo iro dopa ta ãhrimo igo. <sup>6</sup> Dipuru buadiabigore igo poarire seapehoporo. “Yũ poarire sea wũapehodiabeaa. Guhyasĩriboca,” arĩgo igo dipurure buaporo. <sup>7</sup> Mũa ɔmarũ Goãmũ iro dopa oparã ãhraa. Eropirã Goãmũ õagu, turagu, ĩgu árĩricũre ĩhmuma erãpũ. Eropirã erã dipu buabiricãporo. Nomepũ “Gũa oparã ɔma ãhrima,” arĩ ĩhmuma. Eropirã erãpũ dipure buaporo. <sup>8</sup> Goãmũ ɔmũre iigu, nomeo ya dũpũ mera ɔmũre iibiriĩnumi. Nomeopũre iigu, ɔmũ ya dũpũ mera igore iĩnumi. <sup>9</sup> Eropigu ɔmũre iigu sã nomeo yagu árĩbure iibiriĩnumi. Nomeopũre iigu ɔmũ yago árĩbore iĩnumi Goãmũ igore. <sup>10</sup> Eropirã mũa Goãmũre umupeorã gamenerecũ nome dipure buaporo anyua sã erã ĩhasuaboro dopa. Eropa buarã “Yma gũa oparã ãhrima,” arĩ ĩhmurã iima. <sup>11-12</sup> Goãmũ nomeore iigu, ɔmũ dũpũ maja mera iĩnumi. Dohpaguere ɔma masa dehyoarã nome dũpũgue masa dehyoama. Eropiro ɔmũ ĩgu árĩmũhtabiricũ nome mariboĩnuma. Eropi nome maricũ ɔma sã mariboĩnuma. Eropirã erã Jesu yarã árĩrã, ɔma seyaro nome seyaro árĩmasibeama. Goãmũpũ árĩpehrerire apidi árĩmi. I yeba árĩrĩre i yeba iiburire apidi árĩmi.

<sup>13</sup> ¿Mũa basi dohpa pepiri? ¿Nomeo igo dipuru buabigo, Goãmũre igo serẽcũ õhari mũa pepicũ? Õabeaa. <sup>14</sup> Eropirã ɔmũ ĩgu poa ñapo ĩgu ómacũ ĩha masa werewũama. Árĩpehrerã masa irire masima. <sup>15</sup> Nomeopũ poa ñapo ómago árĩcũ õapũrica. Igo poari igo dipuru buari iro dopa ta ãhraa. Iri sãre árĩpehrerã masima. <sup>16</sup> Mũa mera majagu ire yũ wererare dũyasodiagu õpa masiporo ĩgu: Irire yũ arĩdiro dopa ta eropa dihta iiniguicãa mari. Gajirã Jesu yarã sã erã gamenererogue eropa dihta iiniguicãa.

### *Bocatĩrirã erã barisubu goroweoñorã Corinto majarã*

<sup>17</sup> Dohpaguere mũare gajinore werebu, “Õaro iirã ãhraa,” arĩbeaa yũhũ mũare. Mũa gamenererã õaro iirã iibeaa. Eropirã mũa gamenererore goroweorã iiaa. <sup>18</sup> Õpa arĩ weremũhtagũra mũare: Mũa gamenererogue eropa game dũyasorã mũa basi yujurayeri cururi dũca wariayoro mũa. Gajirã yũre irire erã eropa arĩ werecũ “Diaye ta árĩca,” arĩ pepia yũhũ. <sup>19</sup> Eropa dũca warirã õpa arĩca mũa: “Dũca wari wiriario gameca marire Jesu yarã gohra árĩrãpũre ĩhmuborore,” arĩca mũa basi. <sup>20</sup> Mũa basi gamenere barã mũa yujuro árĩbirã mari Opũ Jesucristo dorediro dopa diaye ta bocatĩrirã iibeaa. <sup>21</sup> Mũa gamenere barã yujurãyeri mũa seyaro bamũhta, ĩhrimũhta gajirãre corero mariro. Mũa eropiicũ gajirã oaboa wahama. Gajirãpũ merea wahama. <sup>22</sup> ¿Mũa seyaro badiarã duhpĩrã mũa ya wirigue babeari? ¿Eropirã duhpĩrã dohpaguere Goãmũ yarã gamenererore “Duhpiburi árĩbeaa,” arĩdiari? ¿Eropirã duhpĩrã Jesu yarãre mojomorocũrãre bari moorãpũre mũa guhyasĩuro taricũ iiri? ¿Dohpa arĩ weregũcuri yũhũ mũare? Õaro iirã iiaa mũa, arĩbeaa yũhũ.

### *Goãmũ yare bocatĩrirã diaye erã iiburire werepũ Pablo*

<sup>23</sup> Goãmũ yare bocatĩriburire mari Opũ Jesu weremi yũre. Eropa ĩgu wererare yũpũ mũare irire werebu. Iri õpa ãhraa: ĩgũre ĩhaturirãre Juda ĩgu sihurisubu iri ñami ta mari Opũ Jesucristo panrure aĩ, <sup>24</sup> Goãmũre “Õhaa,” arĩpũ. ĩgu eropa arĩra pũhrũ iriru panrure nuha, ĩgu buherãre guerepũ. Eropa gueregu õpa arĩpũ: “I yũ dũpũ ãhraa. Mũa ya árĩburire sĩrigũca. Yũre mũa guñaburire yũhũ dohpaguere mũare ĩhmuro dopa aĩ baque,” arĩpũ Jesu mari Opũ. <sup>25</sup> Erã bara pũhrũ ĩgu panrure aĩdiro dopa ta ĩhrĩrĩpare aĩgu õpa arĩpũ: “Mũa ñeri iirare cóãbu sĩrigũca. Eropa



iigu yu dire cóãgũca. Yu di cóãra mera Goãmũ masare ‘Mũa mera amugũra,’ ïgu arĩdiro ojogorocũroca. Ipa dicũrire ihrirã yu di cóãrare guñarãca. Ire ihrirã mũa yũre guñaburire yũhũ mũare ïhmudiro dopa iique,” arĩpũ Jesu. <sup>26</sup> Yu werediro dopa ta iru panrure mũa barã, ihririre ihrirã, Jesu mari Opũ mari ya árĩburire ïgu sĩrirare ïhmurã iiaa mũa. Eropa ïhmuniguirãca mũapũ ne ïgu i yebague ïgu dujaracũgue.

*Goãmũ yare bocatĩrimorã õpa iique, arĩ gojañumi Pablo*

<sup>27</sup> Mũa Goãmũ yare bocatĩrimorã gamenere baha, ihrirã, umupeoro mariro guhyadiaro mariro iirã dipuwajacũrãca. Eropa iirã mari ya árĩburire Jesucristo ïgu dũpũre ïgu di cóãra sãre wereyaro dopa iirã iiaa mũa. <sup>28-29</sup> Õpa arĩ guñarõ gahmea: “Mari Jesu yarã gamenererã yuju curu yuju dũpũ iro dopa ãhraa. Mari Jesucristo yarã ãhraa,” arĩ guñarõ gahmea. Irire queoro guñabirã, mari iri panrure baha, ihriripare ihrirã queoro iibirã mari dipuwajacũmorã árĩrãca. Eropirã mari bocatĩriboro core mari árĩricũrire guñamũhtarõ gahmea ñero iiri arĩrã. Eropa iira pũhrũ bocatĩri ihri bamasia mari. <sup>30</sup> Eropa guña amubirira waja bajarã mũa mera majarã dorecũrã árĩcoma. Erã yujurãyeri turabirã árĩcoma. Eropirã gajirã erã eropa iira dipuwaja sĩria wañuma. <sup>31</sup> Erã baha, ihriboro core erã árĩricũrire õaro guña, erã ñeri iirire duhunirã, erã ñeri dipuwajare dipuwajacũbiriboñuma. <sup>32</sup> Mari Opũpũ marire ïgu yarãre dipuwaja moagu mari ñeri iirire duhucũ iigu iimi. Jesure gamebirãre ïgu dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpaguere marire dipuwaja dabero moami mari Opũ.

<sup>33</sup> Eropirã yu acawererã, bocatĩrimorã gamenererã, mũa basi corenique. <sup>34</sup> Eropirã mũa mera majarã oaboarã, erã ya wihigue bamũhtaporo. Eropirã bocatĩrimorã õaro gamenere baque mũa ñero dipuwajacũrã wabiriborore. Gajĩnore werediarabũ mũare. Pũhrũ yu basi ejagu mũare weregũra irire.

## 12

*Goãmũ ya árĩburire mari mohmeburire apigu marire irire iimasicũ iimi Espĩritu Santo, arĩ gojañumi Pablo*

<sup>1</sup> Yu acawererã, õpa mũare weregu ire mũare masicũ gahmea. Goãmũ ya árĩburire mari mohmeburire apigu marire árĩpehrerãre irire iimasicũ iimi Espĩritu Santo.

<sup>2</sup> Mũa Jesu yarã árĩnibirã gajiropa árĩri buherire pee nũrũrã árĩrã, mũapũ goãmarã wéanirãre umupeoyoro. Noho mũa bocarãre wereniguibirãre umupeoyoro. Irire masia mũa. <sup>3</sup> Eropa árĩnirã mũa árĩcũ dohpaguere õpa arĩ werediacã mũare. Espĩritu Santo itamuri mera wereniguirã “Jesu ñero waporõ,” ne arĩmasibeama. Eropirã Espĩritu Santo itamuri mariro wereniguirãpũ “Jesu árĩpehrerã wecague opũ mari Opũ ãhrimi,” arĩmasibeama.

<sup>4</sup> Goãmũ ya árĩburire mohmemasiburi baja ãhraa. Irire marire iimasicũ iigũpũ yujugũ ta ãhrimi. ïgu Espĩritu Santo ãhrimi. <sup>5</sup> Eropiro Goãmũ ya árĩburire iimasiri mera mari mohmeburi baja ãhraa. Irire mari iiburire doregu yujugũ ta mari Opũ Jesu ãhrimi. <sup>6</sup> Mari ïgu yarã ïgu ya árĩburire iimasiri mera mari mohmeri yujuropa ta árĩbeaa. Iri mohmeri õaro wacũ iigu yujugũ ta Goãmũ ãhrimi. <sup>7</sup> Espĩritu Santo marire Jesu yarã nũcũre mari iimasiburire apigu Goãmũ turarire ïhmugũ iimi. Õpa ta iimi ïgu Jesu yarãre árĩpehrerã mari õaro mohmeborõ dopa. <sup>8</sup> Yujurãyerire õaro masiri mera werecũ iimi Espĩritu Santo ta. Eropigu gajirãre Goãmũ yare õaro buhecũ iimi ïgu Espĩritu Santo. <sup>9</sup> Eropigu gajirãre “Mari Goãmũ mera õaro iimasia,” arĩ Goãmũre guñaturacũ iimi Espĩritu Santo ta. Eropa iigu gajirãre turarire Espĩritu Santo ta ohomi ïgu. Iri turarire ïgu ocũ erãpũ dorecũrãre õarã wacũ iima. Espĩritu Santo yujugũ ta árĩgu iri turarire ohomi. <sup>10</sup> Eropigu ïgu gajirãre deyoro moarire iimasicũ iimi ïgu. Eropa iigu Goãmũ yare õaro weretaumasicũ iimi ïgu gajirãre.



Eropa iigu gajirã Jesu yarãre buherire ðaro beyemasicũ iimi ïgu. Eropa masirã watĩ ya buheri árĩcũ masima erã. Espíritu Santo gohra ya iri buheri árĩcũ sãre masima erã. Eropigu gajirãre erã peeyamarirã yare wereniguimasicũ iimi ïgu. Eropigu peeyamarirã yare erã wereniguicũ gajirãre weretaumasicũ iimi. <sup>11</sup> Iri árĩpehrerire iimasirire apigu ta Espíritu Santo ta yujugu ta ãhrimi. ïgu gamero dopa ta marire yujurãyerire mari mohmeburire apimi.

*Cristo yarã árĩrã yuju curu ta ãhraa mari, arĩ gojañumi Pablo*

<sup>12</sup> Werenigui queori mera mũare weregura: Mari dũpũ yuju dũpũ árĩquerecũ ta, mojotori, cuiri, guburi, gamiri, iri tamera baja ãhraa mari dũpũre árĩri. Eropa ãhraa mari Cristo yarã. Bajarã árĩquererã ta yuju dũpũ iro dopa ta yuju curu ta ãhraa ïgu mera. <sup>13</sup> Eropirã Cristo yarã árĩrã ïgu dũpũ iro dopa yuju curu ta ãhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugu árĩgu ïgu dũpũ iro dopa yuju curu ta ãhraa mari. Espíritu Santo yujugu ta árĩgu ïgu turari mera waĩyesũnirã marire yuju curu Cristo yarã árĩcũ iimi. Eropirã mari árĩpehrerã yujugu Espíritu Santore opaa Cristo ya curu majarã árĩrã.

Eropirã mari Cristo yarã yuju dũpũ iro dopa ãhraa. <sup>14</sup> Mari dũpũ yuju dũpũ árĩquerecũ ta mojotori, cuiri, guburi, gamiri iri mari dũpũ árĩri baja ãhraa. <sup>15</sup> Mũ guburo werenigui guburo árĩro ðpa arĩboya mũre gajiropa arĩro: “Mũ mojoto árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa arĩquerero ta mũ dũpũ maja árĩro ta iiaa. <sup>16</sup> Mũ gamiro werenigui gamiro árĩro ðpa arĩboya mũre: “Mũ cuiru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquerero ta mũ dũpũ maja gamiro árĩro ta iiaa. <sup>17</sup> ¿Mari dũpũ cuiru dihta árĩcũ dohpa peebocuri mari? Masiya mara. ¿Eropirã mari dũpũ gamiro dihta árĩcũ dohpa ii wĩji pepibocuri mari? Masiya mara. <sup>18</sup> Eropa árĩbeaa mari dũpũ. ðpa ãhraa. Mari dũpũ árĩrinore árĩpehrerire Goãmũ ïgu gamero dopa ta apidi árĩmi mari dũpũre. <sup>19</sup> ¿Mari dũpũ árĩri maricũ dohpa waboyuri mari dũpũ? Mariboya. <sup>20</sup> Mari dũpũ ðpa ãhraa: Yuju dũpũ árĩquerecũ ta mari dũpũ árĩri baja ãhraa. Eropa ta mari Jesu yarã yuju dũpũ iro dopa árĩquererã bajarã ãhraa mari basi game itamumorã.

<sup>21</sup> Eropiro mũ cuirupũ mũ mojtore “Mũ itamucũ gamebeaa,” arĩmasibea. Eropiro mũ dipuru mũ guburire “Mũ itamucũ gamebeaa,” arĩmasibea. <sup>22</sup> Gaji mari dũpũ árĩrãre “Bu árĩñariri ãhraa,” mari arĩripũre upũtũ gahmea mari. <sup>23</sup> Eropirã gaji mari dũpũ árĩrãre “Bu árĩñariri ãhraa,” arĩ pepia. Eropirã irire ðaro deyoporo arĩrã ðaro ahmua. Eropirã gaji mari dũpũ árĩrãre mari gũhyasĩrisãrãre ðaro ahmua ðaro árĩboro dopa. <sup>24</sup> Gaji mari dũpũ árĩrãre mata ðari deyoripũre eropa amubeaa mari. Goãmũ mari dũpũ árĩri yujuñe gajĩñere gamebircũ iibiridi árĩmi. ïgu mari dũpũ árĩrãre árĩpehrerire ðaro amudigu árĩmi yuju dũpũ ðaro dũpũcũburire. Eropa iigu “Bu árĩñariri ãhraa,” mari arĩripũre mari ðaro gamecũ iimi. Eropa ta ne yujugũre Jesu yagũre “Bu árĩgu ãhrimi,” arĩmasibea mari. <sup>25</sup> Eropa ta árĩdoredi árĩmi Goãmũ mari dũpũ árĩri yujuro mera iri basi game itamuboro dopa. <sup>26</sup> Mari dũpũ árĩri yujuñe ñero taricũ gaji mari dũpũ árĩri sã ñero taria. Eropiro mari dũpũ árĩri yujuñe ðaro árĩcũ mari dũpũ árĩpehrero ðaro pepia.

<sup>27</sup> Eropa arĩgu ðpa arĩdiagũ iiaa mũare: Mũapũ Cristo ïgu dũpũ iro dopa árĩrã yuju curu ta ãhraa. Eropirã árĩpehrerã mũa ïgu dũpũ árĩri iro dopa ãhraa ïgu yarã árĩrã. <sup>28</sup> Eropigu Jesu yarã gamenererã watope mari game itamuburire apidigu árĩmi Goãmũ marire. ðpa apipũ ïgu marire: Yujurãyeri gũare buhedoregu Cristo apimũhtadigu árĩmi. Ero pũhrũ gajirãre ïgu yare weretaumorãre apidi árĩmi. Ero pũhrũ gajirãre Jesu yarãre buhemorãre apidi árĩmi. Eropigu

gajirãre deyoro moarire iimorãre, gajirãre dorecurãre erã taricũ iimorãre, erã pũhrũ gajirãre masare itamumorãre, gajirãre oparã árĩmorãre apidi árĩmi. Ero ojogoro peeyamarirã yare wereniguimorãre apidigũ árĩmi marire. <sup>29</sup> Eropa ãgũ apicũ árĩpehrerã yujuropa iimorã árĩbeaa mari. Mari árĩpehrerã Jesucristo yare buhedore ãgũ apinirã árĩbeaa mari. Eropirã Goãmũ ãgũ yare weretaurã mari árĩpehrerã árĩbeaa. Eropirã árĩpehrerã masare buherã árĩbeaa. Eropirã mari árĩpehrerã deyoro moarire iimasirã árĩbeaa mari. <sup>30</sup> Eropirã mari árĩpehrerã dorecurãre taumasirã árĩbeaa mari. Eropirã mari árĩpehrerã peeyamarirã yare wereniguimasimorã árĩbeaa. Eropirã gajirã erã wereniguirire weretaumasimorã mari árĩpehrerã árĩbeaa. <sup>31</sup> Eropirã Goãmũ ya árĩburire mohmemasiburiñere gamerã ðaripũre turaro gameque mũa. Eropigũ árĩpehreri yũ arĩra tauro ðaro mũa iiburire dohpaguere weregũra yũhũ.

## 13

### *Gajirãre erã ðaro mahiburire, umupeoburire wereñumi Pablo*

<sup>1</sup> Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã árĩbiriboya mari. Eropiro mari wereniguiri sã eropa bũsumaacãboaya mari gajirãre mahibirã árĩrã. <sup>2</sup> Goãmũ yare ðaro weremũhtamasiquererã ta gajirãre mahibirã bu árĩmaacãrã árĩboya mari. Eropirã masa erã masibirirare Goãmũ yare árĩpehreri masiri masipehoquererã ta gajirãre mahibirã, bu árĩmaacãrã árĩboya mari. Goãmũre ðaro umupeotariri mera Ʃtãgũ “Gajipũgue waporu,” arĩrã wadoremasicquererã, mari gajirãre mari mahibirã bu árĩrã árĩboya. <sup>3</sup> Mari yare árĩpehrerire mojomorocurãre oquerecũ ta erãre mahibiricũ iri mari ora duhpiburi árĩbiriboya. Eropirã Goãmũ ya árĩburire mari iira dipuwaja mari dupũre gajirãpũ soequerecũ ta, gajirãre mari mahibiricũ iri duhpiburi árĩbiriboya.

<sup>4</sup> Gajirãre mahirã mata guabeaa erã mera. Erãre mahirã ðaro iiaa. Eropirã gajirãre mahirã erã marire opanemocũ ihaturibeaa. Eropirã mari mahigũ mera árĩrã “Mũ tauro árĩgũ ãhraa yũhũ,” arĩrã iibeaa mari. Gajirãre mahirã, “Erãre masitarinũgaa,” arĩ pepibeaa. <sup>5</sup> Eropirã gajirãre mahirã erãre umupeori mera queoro iiaa mari. Gajirãre mahirã mari ya árĩburi dihtare guñabeaa. Erã ya ðaro árĩburi sãre guñaa. Eropirã erãre mahirã disitĩri wereniguibeaa mari. Eropirã marire erã ñero iicũ sãre erã mera guawajabeaa mari. <sup>6</sup> Gajirãre mahirã erã ñero iirire mucubiribeaa mari. Diaye majapũre erã iicũ ãrã bũrigã mucubiria erã mera. <sup>7</sup> Gajirãre mahirã erã ñeri iicũ gajirãre ne quere moabeaa. Eropirã gajirãpũ erãre erã werewũacũ peequererã ta irire peediabeaa mari. Õari dihtare peediaa mari. Gajirãre mahirã “Õarire iirãcoma,” arĩ cohrea mari erãre. Gajirãre mahirã erã iira mera mari ñero tariquererã ta erãre mahi duhosome mari.

<sup>8</sup> Gajirãre game mahiri ne pehresome. Goãmũ yare weretauripũ pũhrũ duhpiburi árĩsome. Peeyamarirã ya wereniguiri sã pehrea waroca. Goãmũ yare masitariri wajamariroca pũhrũgue. Mari masipehora pũhrũgue duhpiburi gohra árĩsome iri. <sup>9</sup> Dohpaguere Goãmũ yare mari merogã masia. Eropirã mari ãgũ yare wererã mari merogã weremasia. <sup>10</sup> Pũhrũgue ta mari masipehorãca. Eropiro mari merogã masira duhpiburi árĩsome. Irisubugue masipehorãca.

<sup>11</sup> Iri ðpa ãhraa: Majigũ árĩgũ majigũ dopa wereniguiribũ yũhũ. Eropigũ majigũgã dopa pepiribũ. Eropigũ bũgũ wagũ majigũ iro dopa árĩrãre duhucãbũ. Eropa ta pũhrũguere mari dohpaguere merogã masirare duhura pũhrũ masipehorãca. <sup>12</sup> Diuru ðaro masũre deyocũ iibiro dopa ta dohpaguere ðaro masipehonibeaa dohpa mari. Pũhrũ Goãmũre mari ðaro ãhamasirãgue mari masipehorãca. Dohpaguere

mari merogã dihta masia dohpa. Goãmũ marire ïgũ masipehodiropã dopa ta pũhru mari sã õaro masipehorãca.

<sup>13</sup> Eropirã dohpaguere mari iimasiburi ùhrene dujaroca. Goãmũre “Diaye ta árïgũ àhrimi,” arï umupeoniguirãca. Eropirã marire ïgũ mera õaro árïniguiburire mucubiri coreniguirãca. Eropirã gajirãre game mahiniguirãca. Goãmũre umupeori, ïgũ mera árïborore mucubiri coreri tauro àhraa game mahiripũ.

## 14

### *Peeyamarirã yare wereniguirire wereñumi Pablo*

<sup>1</sup> Eropirã gajirãre game mahirã árïque mũa. Eropirã Goãmũ ya árïburire mũa mohmemasiburire Espiritu Santo ïgũ apirare turaro gameque. Goãmũ yare mũa weremasiburi tamerare bũrigã gameque mũa. <sup>2</sup> Peeyamarirã yare wereniguigũ Goãmũ dihta peeborore wereniguimi. Eropã arï wereniguigũ masa peeborore wereniguigũ iibeami ïgũ. ïgũ eropa arï wereniguicũ peerã masapũ ne peebeama ïgũre. Masa erã masibiririre Espiritu Santo ïgũ turari mera wereniguigũ iimi ïgũ. <sup>3</sup> Goãmũ yare weretaugũpũ masapũ peeburire weremi. Eropã weregũ ïgũ masare itamugũ iimi ïgũ. Eropigũ erãre Jesucristore umupeonemocũ iimi. Eropigũ ïgũ erã ñero taricũ ïgũ erãre õaro sïporãcũcũ iimi. <sup>4</sup> Peeyamarirã yare wereniguigũ ïgũ basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmũ yare weretaugũpũ gajirãre Jesu yarã gamenererãre Jesucristore umupeonemocũ itamumi ïgũ.

<sup>5</sup> Peeyamarirã yare árïpehrerã mũa wereniguicũ õaboya yũ pepicũ. Eropã árïquerecũ ta Goãmũ yare mũa weretaucũ tamerare turaro gahmea. Goãmũ yare weretaugũpũ peeyamarirã yare wereniguigũ tauro õagũ àhrimi. Eropã árïquerecũ ta peeyamarirã yare wereniguigũ ïgũ wereniguirire gajigũ ïgũ weretaucũ ïgũ sã õagũ dujami. ïgũ wereniguirire weretaugũ Jesu yarã gamenererãre Jesucristore umupeonemocũ iimi. <sup>6</sup> Eropigũ, yũ acawererã, yũhũ mũa pohrogue peeyamarirã yare wereniguigũ wagũ mũare itamumasibiriboya yũhũ. Goãmũ ïgũ yũre wererare weregũ itamua. ïgũ yare Espiritu Santo yũre masicũ iirare buhegũ mũare itamugũ iiaa.

<sup>7</sup> Peeyamarirã ya wereniguigũ ïgũ wereniguiri mari peebiro õpa iro dopa àhraa. Tarusure purirã, mari buamutẽriñere irire mari queoro iibiricũ, iri bayarire gajirãre masima masiya mara. <sup>8</sup> Eropigũ cornetare purigũ surara árïgũ erã gamewejẽboro corere queoro ïgũ puribiricũ gajirã surarapũ masisome erã gamewejẽboro gamenererore. Eropirã erã gamewejẽboro core erã wejẽburi mojore amuyubirã àhrima erã. <sup>9</sup> Eropã ta mũa sã peeyamarirã yare wereniguicũ peerã gajirã irire peebeama. Eropã peebiricũ mũa wereniguiri duhpiburi árïbeaa erãre. <sup>10</sup> I yebare baja wereniguiri árïca. Eropirã irire wereniguirã erã basi erã eropa wereniguirire õaro peema. <sup>11</sup> ïgũ ya wereniguirire yũ peebiricũ ïagũ irire wereniguigũpũ “Gajirã yare wereniguimi,” arï pepicumĩ yũre. Eropigũ yũ sã eropa ta arï pepica ïgũre. <sup>12</sup> Eropirã mũa peeyamarirã yare wereniguirã, Espiritu Santo ïgũ yare mohmemasi apira mera turaro mohmediaraa mũa. Irire eropa iidiarã Jesu yarã gamenererãre õaro itamuburipũre bũrigã mohmediaque mũa.

<sup>13</sup> Eropigũ peeyamarirã yare wereniguigũ “Yũ wereniguirire gajirãre õaro were-taumasiburire itamuque yũre,” Goãmũre arï serẽporo ïgũ. <sup>14</sup> Peeyamarirã ya mera Goãmũre serẽgũ yũ pepiri mera serẽgũ iiaa. Eropã serẽgũ yũ pepirire masibigũ yũ wereniguirire masibea. Eropã iigũ gajirãre itamubeaa yũhũ. <sup>15</sup> Ire masirã, õpa iirãca mari: Espiritu Santo ïgũ turari mera peeyamarirã ya mera Goãmũre serẽrãca. Eropirã gajisubu õaro masi pepirã gajirã erã õaro peeboro dopa erã

ya mera Goãmure serērã iri sãre serērãca mari. Espíritu Santo ìgu turari mera peeyamarirã ya mera Goãmũ yare bayarãca. Eropirã gajisubu òaro masi pepi gajirã erã òaro peeboro dopa erã ya mera Goãmure bayarãca. <sup>16</sup> Mari eropa iibiricũ peeyamarirã ya mera wereniguirã Espíritu Santo ìgu turari mera Goãmure, “Òagu turagu àhrimi,” mari arĩquerecũ ta gajirã ne peebeama. Erã eropa peebirã “Diaye ta àhraa,” arĩmasibeama. <sup>17</sup> Peeyamarirã ya mera Goãmure “Òhaa,” arĩmasia mari. Mari eropa arĩri òaro árĩquerecũ ta gajirã peebeama. Eropirã erãre Jesucristore umupeonemocũ itamubeaa mari. <sup>18</sup> Árĩpehrerã mũa tauro yũpũ peeyamarirã yare wereniguia. Eropigu Goãmũ yũre eropa wereniguimasigu ìgu iicũ ìgure “Òhaa,” arãa yũhũ. <sup>19</sup> Eropa wereniguigũpũ yũ árĩquerecũ Jesu yarã gamenererã watope peeyamarropa peebirã “Diaye ta àirã ya mera yoari boje yũ wereniguiquerecũ duhpihuri árĩbeaa erãre. Yũhũ masa erã òaro peemasiboro dopa buhegu merogã yũ buhequerecũ ta iri tamera òapũrica erãre.

<sup>20</sup> Yũ acawererã, majirãgã pee masibirãgã iro dopa árĩbiricãque mũa. Mũrã erã pee masirã árĩro dopa árĩque mũa. Eropirã ne masa dehyoarã erã ñeri iirire erã masibiro dopa ta árĩque mũa. <sup>21</sup> Goãmũ yare erã gojarapũ òpa àhraa Goãmũ wereniguirire: “Gajirã ya queo wererãre oã masare yahare weredoregũra. Eropigu gaji yeba majarã masare òarire yahare weredoregũra oã masare. Yũ eropa weredorequerecũ ta erã yũre peesome yũ wererire,” arĩmi Goãmũ mari Opũ, àhraa Goãmũ yare erã gojarapũgue. <sup>22</sup> Peeyamarirã yare wereniguirã Goãmure umupeobirãre erãre ìhmuri àhraa. Eropiro peeyamarirã yare wereniguirã Jesu yarãpũre Goãmũ turarire ìhmuri árĩbeaa. Eropiro Goãmũ yare wereripũ Jesure gamebirãre Goãmũ turarire ìhmuri árĩbeaa. Goãmũ yare wereripũ Jesu yarãpũre Goãmũ turarire ìhmuri àhraa. <sup>23</sup> Eropirã mũa Jesu yarã gamenererã, peeyamarirã yare mũa árĩpehrerã wereniguicũ, Goãmũ yare masibirã gajirã Jesure umupeobirã sã ñajari peebocoma. Mũa eropa wereniguicũ peerã, erã mũare “Cue, goroweorã wahama,” arĩbocoma erã. <sup>24</sup> Árĩpehrerã mũa Goãmũ yare mũa werecũ tamera Goãmũ yare masibigu, Jesure umupeobigu sã ñajari peegu, ìgu ñero iirare masigũcumi ìgu. Eropigu ìgu ñeri iirare bũjawerebocumi ìgu. <sup>25</sup> Eropigu ìgu árĩricũre ìgu pepiri sãre guñagũcumi ìgu. Eropigu mereja Goãmure “Yũ opũ àhrimi,” arĩgu umupeogũcumi. Eropigu “Goãmũ diaye ta mũa mera àhrimi,” arĩgu cumi ìgu mũare Goãmũ yare werecũ peegu.

*Mũa gamenererã òaro ìique gorowero mariro, arĩ gojañumi Pablo*

<sup>26</sup> Eropigu, yũ acawererã, mũare ire arĩgu iiaa: Mũa gamenererã yujurãyeri mũa mera majarã Goãmũ yare bayadama. Eropirã mũa gajirã buhediaa. Eropirã gajirã Goãmũ mũare ìgu wererare werediaa. Eropirã mũa gajirã peeyamarirã yare wereniguidiaa. Eropirã mũa gajirã iri wereniguirire weretaudiaa. Mũa eropa iirã gajirãre erã Jesucristore umupeonemoboro dopa irire ìique. <sup>27</sup> Eropirã peeyamarirã yare mũa wereniguirã mũa perã o urreã, erã nũcu ta wereniguique mũa gamenererisubu. Eropirã yujurãyeri wereniguique. Mũa eropa wereniguicũ, yujugu mũa mera majagu mũa wereniguirire gajirãre weretauporo. <sup>28</sup> Mũa wereniguirire weretaubu maricũ mũa gamenererogue peeyamarirã yare wereniguibiricãque. Eropirã mũa seyaro peeyamarirã yare Goãmũ mera wereniguique. <sup>29</sup> Eropirã Goãmũ yare werediarã perã o urreã iripẽta wereque mũa. Mũa eropa werecũ gajirã mũare peerã mũa wererire Goãmũ ya árĩcũ òaro masiporo. Eropirã Goãmũ ya árĩbiricũ sãre òaro masiporo. <sup>30</sup> Eropigu Espíritu Santo Goãmũ yare gajigũre ero doagũre ìgure wereri ocũ, ìgu sã Jesu yarãre werediami. ìgu werediacũ ìha Goãmũ yare weremũhtagũpũ werenigui duhuporo. <sup>31</sup> Eropirã mũa árĩpehrerã Goãmũ yare wererã, yujurãyeri wereque mũa árĩpehrerã gajirã erã òaro peeboro dopa, erã òaro mucubiriboro dopaa. <sup>32</sup> Eropirã Goãmũ yare wererã árĩrã, òaro pee masirã, òaro



peeñanugu wereniguirã árĩque. <sup>33</sup> Goãmũ ĩgu yarã erã gamenererogue erã game wisicũ gamebeamĩ ĩgu. Goroweoro mariro erã õaro árĩcũ gahmemĩ ĩgu. Eropirã õaro iique mũa árĩpehrerogue Jesu yarã gamenererã.

<sup>34</sup> Árĩpehrero Jesu yarã gamenererore nomere wereniguibiricãro gahmea. Erã nomere maripũ wereniguidorebeaa. Goãmũ yare erã gojarapũ sã arĩro dopa ta nomere mũare õaro yũhrirã nome arĩro gahmea. Eropirã mũa gamenererore nome masare werebiricãporo. <sup>35</sup> Jesu yarã erã gamenererore nome erã wereniguicũ õabeaa. Eropigo gajinore masidiago nomeo igo ya wihigue ta igo marapũre serẽpiporo.

<sup>36</sup> Ire yũ wereburi õaro masique mũa. Goãmũ yare weremuhtarã árĩbeaa mũa. Eropirã ĩgu yare peenirã mũa dihta árĩbeaa. Gajirã sã ĩgu ya buherire opama. <sup>37</sup> Mũa mera majagũ “Yũ tamera Goãmũ yare weregũ ãhraa,” arĩ pepibocumi. Eropa arĩ pepigũ i yũ mũare gojarare “Goãmũ doreri ta ãhraa,” arĩ masiporo ĩgu. Eropigũ gajigũ, “Espĩritu Santo iimasiburire ĩgu apirare õaro opaa yũhũ,” arĩ pepibocumi. Eropa arĩ pepigũ ĩgu sã i yũ mũare gojarare “Goãmũ ya doreri ta ãhraa,” arĩ masiporo. <sup>38</sup> Irire ĩgu masidiabiricũ yũ gojarare “Diaye árĩbeaa,” ĩgu arĩcũ ĩgũre duhucãque. Peebiricãque ĩgũre.

<sup>39</sup> Eropirã yũ acawererã, Goãmũ yare weremasiburire burigã gameque mũa. Eropirã mũa mera majarã mũa gamenererogue peeyamarirã ya erã wereniguidiacũ, “Wereniguibiricãque,” arĩbiricãque erãre. <sup>40</sup> Eropa iirã õaro iique. Eropirã gamenererã õaro game, goroweoro mariro iique mũa.

## 15

### *Cristo ĩgu masa mũriarare werepũ Pablo*

<sup>1</sup> Dohpaguere yũ acawererã, õari buherire yũhũ mũare wererare mũare guñacũ iidiaca. Iri buherire õaro peebũ mũa. Eropa peerã iri buherire umupeonijarã õaro ãhraa mũa. <sup>2</sup> Mũa eropa umupeocũ irire mũa cóãbiricũ Cristo mũare peamegue wabonirãre taugũcumi. Mũa eropa peera pũhrũ Cristo yare mũa duhucãcũ iri mũa peera duhpiburi árĩbiriboya.

<sup>3</sup> Õpa arĩ weremuhtagura mũare. Bu gohra árĩbeaa. Mũare buhegũ yũre Cristo ĩgu wererare õpa arĩ werebũ: Goãmũ yare erã arĩ gojayudiro dopa ta mari ñeri wajare Cristo sĩripũ. <sup>4</sup> Eropigũ Goãmũ yare erã arĩ gojayudiro dopa ta Cristo ĩgu sĩrira pũhrũ gajirã ĩgũre erã yaara pũhrũ uhrenũ waboro ĩgu masa mũriarũ. <sup>5</sup> ĩgu eropa masa mũriara pũhrũ Pedrore dehyoapũ. ĩgu eropa dehyoara pũhrũ ĩgu buherãre doce mera majarãre dehyoapũ daja. <sup>6</sup> Erãre dehyoara pũhrũre yujusubu ta quinientos weca árĩrãre ĩgu yarãre dehyoapũ daja. Gajirã ĩgũre ãanirã sĩrituhañorã. Gajirã ĩgu ãanirã bajarã erã mera majarã árĩnirã dohpaguere árĩnima. <sup>7</sup> Pũhrũ Cristo Santiagore dehyoapũ daja. Eropa ĩgu dehyoara pũhrũ árĩpehrerã ĩgu buhedore apinirãre dehyoapũ daja.

<sup>8</sup> Árĩpehrerã gajirãre ĩgu dehyoara pũhrũ yũ sãre dehyoami daja. Majigugã queoro masa deyobigugã ĩgu masa dehyoanũrsiadiro dopa ta yũ sã Jesure umupeo nũrsiagũ ãhraa. Yũ eropa árĩcũ erã pũhrũre dehyoami Jesu yũ sãre. Yũre ta ĩgu dehyoatumi pare. <sup>9</sup> Ero coregue Jesu yarãre ñero iiribũ. Eropa iidigũ árĩgũ gajirã Jesu ĩgu apinirã árĩpehrerã erã docague gohra ãhraa yũhũ. Eropigũ dohpague sãre Jesu ĩgu buhedore ĩgu apibodigũ árĩbiriribũ yũhũ. <sup>10</sup> Eropa árĩqueregũ ta Goãmũ ĩgu yũre mahicũ dohpaguere Jesu ĩgu apidigũ ãhraa yũ sã. Eropigũ ĩgu yũre mahicũ dohpaguere ĩgu gamerire iipehoa. Eropigũ ĩgu yũre mahicũ ĩgu yagũ eropa árĩcãgũ iibeaa. Árĩpehrerã gajirã ĩgu apinirã tauro yũpũ turaro mohmeabũ. Eropa mohmegũ yũ gamero iri mohmerire iibirabũ. Goãmũ yũre mahigũ yũre itamuami. <sup>11</sup> Yũhũ

mũare õari buherire buhegu yu árĩcũ erã mũare buherã árĩcũ sãre yujuropa ãhraa. Gũapũ ire buherã árĩquererã ta bu gohra árĩrã iiaa. Gũa buheripũ bu árĩri árĩbeaa. Eropirã mũapũ i buherire õaro peeabũ.

*Sĩrinirã mũra erã masa mũriaborore wererũ Pablo*

<sup>12</sup> Cristo ĩgu sĩrira pũhrũ ĩgu masa mũriarare gũa buhequerecũ “Sĩrinirã mũra ne masa mũriabeama,” arĩma mũa mera majarã yujurãyeri. ¿Dohpa arĩrono eropa arĩri erã irire? <sup>13</sup> Ōpa masiporo erã. Sĩrinirã mũrare Goãmũ masa mũriacũ iibigu Cristo sãre ne masa mũriacũ iibiriboñumi. <sup>14</sup> Eropigu Cristo ĩgu masa mũriabiricũ õari buherire gũa werera ne waja mariboya. Mũa ĩgũre umupeori sã waja mariboya. <sup>15</sup> Masa mũriari maricũ gũapũ Goãmũ yare wererã gũyarã iiboya. Sĩrinirã mũra erã masa mũriabiricũ Goãmũpũ Cristore masa mũriacũ iibiriboñumi. ĩgu eropa iibiricũ gũa “Goãmũ Cristore masa mũriacũ iipũ,” arĩrã gũyarã iiboya. <sup>16</sup> Sĩrinirã mũrare Goãmũ masubigu, Cristo sãre ĩgu masubiriboñumi. <sup>17</sup> Eropiro Cristo ĩgu masa mũriabiricũ ĩgũre mũa umupeori waja mariboya. Eropiro mũa ñeri dipuwajacurã árĩboya dohpa peamegue wamorã. <sup>18</sup> Masa mũriariñe maricũ Cristo yarã mũra sĩrimũhtanirã mũra peamegue wamorã árĩboñuma. <sup>19</sup> Cristore mari umupeora pũhrũ mari sĩrirãgue mari masa mũriamasibirimorã árĩrã árĩpehrerã masa tauro mojomorocurã árĩboya maripũ. Eropirã ĩgũre umupeorã bu gohra árĩrire umupeorã iiboya mari.

<sup>20</sup> Eropa árĩbeaa. Diaye ta Goãmũ Cristore õaro masa mũriacũ iicãdi arĩmi. Cristo ĩgu masa mũriara pũhrũ mari sã sĩrirãgue masa mũriamorã ta ãhraa. ĩgu eropa masa mũriagu, Cristo masa mũria gubuyecũñumi marire. <sup>21</sup> Ōpa ta ãhraa i: Adán masũ árĩmũhtadigu ĩgu ñerire iinũgara pũhrũ masa sĩrinũgañuma. Eropigu gajigu masũ Jesucristo õarire ĩgu iira pũhrũ sĩrinirã mũra masa mũriamasima. <sup>22</sup> Adán yarã árĩnũrũsĩarãgue mari árĩpehrerã sĩrirãca. Eropa ta Cristo yarã mari árĩcũ mari sĩrira pũhrũ marire masa mũriacũ iigũcumi Goãmũ. <sup>23</sup> Yujurãyeri cururi marire Goãmũ sihurisubu masa mũriarãca. Cristo marire árĩmũhtadigu masa mũriamũhtapũ. Pũhrũ ĩgu i yebague dujaricũ ĩgu yarã sã masa mũriarãcoma. <sup>24</sup> Irisubu ta i mũmũ pehrerĩnũ árĩroca. Eropigu árĩpehrerã ñerã oparãre, dorerãre, turarãre Cristo cóãgũcumi. ĩgu eropa iira pũhrũ árĩpehrerã weca opũ ĩgu árĩrare wiagũcumi Goãmũre mari Pagũre. <sup>25</sup> ĩgu wiaboro core mari Pagũ Cristore ĩhaturirãre ĩgu tarĩnũgapehoboro core Cristo tamera árĩpehrerã weca opũ árĩgũcumi. Eropa iibu ta árĩro gahmea ĩgũre. <sup>26</sup> ĩgũre ĩhaturirãre ĩgu cóãra pũhrũ sĩririñe sãre pehrecũ iigũcumi ĩgu. <sup>27</sup> Goãmũ yare gojarapũgue õpa ãhraa: “Árĩpehrerã weca dorebure apipũ Goãmũ Cristore. Árĩpehreri sãre apipũ ĩgũre.” Eropa ta arãa Goãmũ yare erã gojarapũgue. “Árĩpehrerã weca dorebure apipũ Goãmũ Cristore,” arĩ gojagu, “Goãmũ weca doregũ Cristo ãhrimi ĩgu,” arĩdiabirĩñumi. Goãmũpũ Cristore eropa apiñumi. <sup>28</sup> Árĩpehrero Goãmũre ĩhaturirãre ĩgu cóãra pũhrũ árĩpehrerã weca doregũ Cristo Goãmũ magũ ĩgu árĩtuhagu ĩgu opũ árĩrare Goãmũre ĩgũre apidigũpũre wiagũcumi. Eropiigũcumi “Goãmũpũ árĩpehrerã weca opũ árĩpehreri opũ gohra ãhrimi,” árĩpehrero árĩpehrerã arĩmasiboro dopa.

<sup>29</sup> “Sĩrinirã masa mũriasome,” arĩma gajirã. ¿Erã arĩri diaye árĩcũ duhpimorã gajirã masa sĩrinirã mũra ya árĩburire erã waĩyebasanirã ãhriri mũa pepicũ? Sĩrinirã mũra masa mũriabiricũ erã ya árĩburire gajirã waĩyebasara duhpiburi árĩbiriboya.

<sup>30</sup> Gũapũ gũa buheri dipuwaja mũmũri nũcũ gajirã gũare erã ñero iidiacũ gũhya ãhraa gũa sãre. Gũare eropa gũhyaquerecũ ta masa mũriari árĩcũ masirã eropa buheniguicãa gũa. <sup>31</sup> Mari Opũ Jesucristo yarã mũa árĩcũ ĩgũre umupeonemorã mũa

wacũ yũpũ turaro mucubiri pepia yũhũ mũare. Iri diaye ta āhraa. Eropigũ “Yũre noho erã gamerinũ wejẽmaja gũhya āhřima,” yũ arĩcũ iri sã diaye ta āhraa. <sup>32</sup> Efeso majarã guarã õari buherire yũ buhera waja yũre pama. Masa mũariariũe maricũ Jesu yagũ yũ arĩbiricũ, yũ ñero tarira waja duhpiburi arĩbiriboya. Sĩrinirã mũra erã masa mũriabiricũ õpa arĩboya mari: “Pũhrũñari sĩrirãca. Dohpa wasome mari. Eropirã bania, ihrirã, mari gamero dopa iirã,” arĩboya mari.

<sup>33</sup> Eropa arĩ gũyarire pepibiricãque mũa. “Ñerãre wapicũrã, õarire mũa iirare cãdijirãca mũa,” arĩma masa. Iri diaye ta āhraa. <sup>34</sup> Õarire pepirã arĩque mũa. Eropirã õarire iirã arĩque daja. Eropirã ñerire iinemobiricãque daja. Gajirã mũa mera majarã ne Goãmũre masibeama. Mũa gũhyasĩriburire mũare eropa arãa.

*Sĩrinirã mũra erã masa mũriaborore werenemopũ Pablo*

<sup>35</sup> Eropi mũa mera majagũ õpa arĩ serẽpibocumi yũre: “¿Dohpa ii sĩrinirã mũra masa mũriarãcuri? ¿Dohpa bejari dũpũcũrã masa mũriarãcuri? arĩ serẽpibocumi yũre. <sup>36</sup> Eropa arĩ serẽpigũ pee masibigũ āhřimi. Oteriyere mari oterã iriye boacũ gohra puhri wiria. Boabiricũ ne puhri wirimasibeaa. Irire masia mũa. <sup>37</sup> Puhřitaridigũ yucũgũguere otebeaa mari. Dipayeri dihtare otea mari. Iriyeri trigo yeri arĩro āhři, o gajiyeri arĩro arĩca. <sup>38</sup> Iriyerire mari otera pũhrũ Goãmũpũ ĩgũ gamediro dopa ta iriyerire bũga mũriacũ iimi. Eropigũ ojodũcayerire ojodũcaũu wacũ iimi ĩgũ. Trigo yerire trigo sari wacũ iimi. Eropa ta puhřidoremi Goãmũ. <sup>39</sup> Arĩpehrerã dũpũcũri yujuropa deyobeaa. Masa dũpũpũ yujuropa ta āhraa. Waimũrã dũpũ sã gajiropa ta dehyoa. Mirimagũ porã dũpũ sã gajiropa ta dehyoa. Eropirã wai sã gajiropa ta dũpũcũma. <sup>40</sup> Eropirã umaro majarã sã āhřima. Eropirã i yeba majarã sã āhřima. Eropirã umaro majarã dũpũ gajiropa dehyoma. Eropiro i yeba majarã umaro majarã iro dopa arĩbeama. <sup>41</sup> Õpa ta āhraa. Abe umũ majagũ gosemi. Eropi ñami majagũ sã boje āhřimi ĩgũ sã. Yuju diaye ta boyomi. Eropirã necã sã gajiropa bejari gosesirima. Necã majarã sãre mari ĩacũ gaji dipu daberogã gosesiriri dipu dehyoa. Eropiro gaji dipu turaro gosesiriri dipu dehyoa. <sup>42</sup> Eropa ta āhřima sĩrinirã mũra erã masa mũriacũ. Masũ ĩgũ dũpũre mari yaara pũhrũ ĩgũ dũpũ boa waroca. Eropiro gaji dũpũ gajiropa arĩri dũpũ umũri nũcũ ojocariburi dũpũ masa mũriaroca. <sup>43</sup> ĩgũ dũpũre mari yaacũ sĩridigũ dũpũ ñeri dũpũ āhraa. Goãmũ ĩgũre masucũ ĩgũ dũpũ õatariari dũpũ arĩroca. Eropiro ĩgũ dũpũ mari yaara dũpũ turari mariri dũpũ āhraa. Eropiro Goãmũ ĩgũre ĩgũ masucũ dũpũ turatariari dũpũ arĩroca. <sup>44</sup> I yeba maja dũpũre mari yaarãca. ĩgũ sĩridigũ mũrũ ĩgũ masa mũriacũ ĩgũ dũpũ umaro maja dũpũ ta arĩroca. I yeba maja dũpũre mari opaa dohpagũre. Pũhrũ umaro maja dũpũ sãre oparãca.

<sup>45</sup> Eropa ta arĩ werea Goãmũ yare erã gojarapũgue: “I yeba arĩmũhtadigũ Adãn waĩcũgũ Goãmũ ĩgũre iicũ ojocarigũ wañumi,” arĩ gojañuma. Adãn iro dopa arĩgũpũ Ʃjũtũyagũpũ Cristopũ ojocaririre ogũ āhřimi. <sup>46</sup> I yeba maja dũpũ arĩmũhtara dũpũ āhraa. Pũhrũgue umaro maja dũpũ arĩroca. <sup>47</sup> Õpa ta āhraa: Arĩmũhtadigũ Adãnũpũ i yeba maja nicu mera Goãmũ ĩgũ iira dũpũre dũpũcũñumi. ĩgũ pũhrũ aridigũpũ Cristopũ umaro majagũ arĩpũ. <sup>48</sup> Nicu mera dũpũcũmũhtadigũ Adãn arĩdiro dopa ta mari arĩpehrerã nicu mera iira dũpũcũrã āhraa mari. Eropirã umarogue aridigũ Jesucristo ĩgũ arĩdiro dopa ta ĩgũ yarã arĩpehrerã ĩgũ iro dopa dũpũcũrãca mari. <sup>49</sup> Mari Adãn iro dopa ta dũpũcũrã arĩrã pũhrũ Cristo iro dopa dũpũcũrãca.

<sup>50</sup> Yũ acawererã, mũare ire werediaa: I yeba maja dũpũ di mera diro mera arĩri dũpũ Goãmũ ĩgũ opũ arĩroguere umaroguere ne wasome. Mari dũpũ boaburi dũpũ āhraa. Eropiro umarogue umũri nũcũ mari arĩboroguere i dũpũ wasome. <sup>51-52</sup> Iribojũguere masa erã masibirirare dohpagũre mũare werediaa: Mari mera

majarã yujurãyeri sîrisome. Eropirã mata erã dũpũre gohrotorã árîrãcoma. Corneta ïgũ puriturinũ eropa ta waroca marire. Őpa waroca: Corneta busũra pũhrũ sîrinirã mũrare Goãmũ masugũcumi mũmũri nũcũ erã árîmorãre. Eropirã dũpũre gohrotonirã árîrãca mari sã. <sup>53</sup> Dohpaguere mari dũpũ boaburi dũpũ ãhraa. Eropigũ mari Goãmũ mera árîniguicãburire mari dũpũre gohrotogũcumi Goãmũ. Eropigũ mari sîriburi dũpũre gohrotogũcumi mari ne sîribiriburi dũpũpũre. <sup>54</sup> Mari dũpũre ne boabiriburi dũpũre gohrotogũcumi. Eropigũ marire sîribiriburi dũpũre eropa árîniguiburi dũpũre gohrotogũcumi. Iri eropa marire gohrotocũ iribojegue Goãmũ yare gojarapũgue arĩ gojadiro dopa ta eropa waroca: Goãmũ sîririñere cóãcãmi. <sup>55</sup> Dohpaguere ne dipaturi sîrisome. Eropiro sîririñe mera dipaturi mari ñero tarisome. <sup>56</sup> Mari ñeri iira waja árîcũ tamera sîririñe mera ñero tarirãca. Eropiro Goãmũ doreri mari iimasibirira waja dipuwajacũa mari. Eropa dipuwajacũrã peamegue mari masa wamorã ãhraa. <sup>57</sup> Mari eropa árîquerecũ ta mari Opũ Jesucristopũ marire peamegue wabiricũ iimi. ïgũ eropa iigũ árîcũ masirã Goãmũ mera mucubiri “Őhaa,” arãa mari.

<sup>58</sup> Eropirã yũ acawererã, yũ mahirã, Cristore mũa umupeorire duhubiricãque. Eropirã gajirã mũare õari buherire erã cóãdorecũ ne cóãbiricãque irire. Eropirã mũmũri nũcũ mari Opũ Jesucristo ïgũ iidorerare õaro iiniguicãque mũa. Mari Opũ Jesucristo yare mari iicũ bu gohra ta ne árîbeaa. Ire masirã ïgũ iidorerire õaro iiniguicãque mũa.

## 16

### *Gajirãre Jesu yarãre Corinto majarã niyeru erã oburire werepũ Pablo*

<sup>1</sup> Dohpaguere gajirãre Jesu yarãre mũa niyeru oburire weregũra mũare. Galacia yeba majarãre Jesu yarãre yũ dorediro dopa ta mũa sã iique. <sup>2</sup> Semanari nũcũ soorinũ árîcũ árîpehrerã mũa Jesu yarãre gajirãre mũa oburi niyerure merogã gameneoque. Merogã oparã merogã oque. Eropirã wũañariro oparã wũañariro oque. Semanari nũcũ mũa eropa iique mũa pohrogue yũ ejacũ mũa obeoburi niyeru opayutuhaboro dopa. Eropigũ erogue ejagũ iripẽ niyeru wahasõ arĩripũre gojabasagũra. <sup>3</sup> Eropigũ iripũre iri niyeru aĩgãmorãre mũa beyenirãre ogũra. Eropa otuhagũ Jesu yarãre mũa obeoburi niyerure aĩgãmorãre erãre obeogũra Jerusaléngue. <sup>4</sup> Iri macaguere yũ iiburi árîcũ yũ sã wagũca. Yũ eropa wacũ yũ mera ta erã sã warãcoma iri niyeru orã warã.

### *ïgũ erogue curiborore werepũ Pablo*

<sup>5</sup> Macedonia yeba majarãre ïhatari wahgãgũca yũhũ erãre. Tariagu mũa pohro Corintogue ejagũca. <sup>6</sup> Erogue ejagũ mũa mera bajamenũri árîboca yũhũ gajisubu iigũ. Yoañariri boje puhiró dihta mũa mera árîboca yũhũ. Eropirã gajipũgue yũ wacũ mũa sã yũre itamubeomasia. <sup>7</sup> Mũare bajamenũrigã ïdiabirica yũhũ. Eropigũ Goãmũ gamecũ yoañariri boje mũa mera árîgũca yũhũ. <sup>8</sup> Eropa árîdiaqueregũ ta pentecoste bosenu árîcũgue Efeso árînigũca dohpa. <sup>9</sup> Ohõ Efesogue dohpaguere mari Opũ Jesu yare peediarã bajarã ãhrima. Erã eropa árîrã árîcũ erãre werea. Yũhũ erãre eropa werecũ yũre ïdiabirã bajarã ãhrima. Eropigũ Efesogue árînigũca dohpa.

<sup>10</sup> Timoteo yũ iro dopa ta mari Opũ yare iimi. ïgũ eropa iigũ árîcũ mũa pohrogue ïgũ ejacũ õaro mera ïgũre bocatĩri, ïgũ mera õaro mucubiriri mera árîque mũa.

<sup>11</sup> Eropirã ïgũre tarinũgabiricãque mũa. Eropirã ïgũ mũare goeriserecũ õaro mera ïgũre itamuque ïgũ yũ pohrogue dujaricũ. Gajirã Jesu yarã mera gũa ïgũre corerã iiaa. Eropirã õaro mera itamubeoque ïgũre.

<sup>12</sup> Apolo mari acaweregũ Jesu yagũ mũare ïgũ ïagũ wacũ turaro gamerabũ. Eropigũ ïgũre wadorerabũ gajirã Jesu yarã mera ïgũ waborore. Yũ eropa wadorequerecũ



ta ĩḡu dohpaguere wadiabeami. Eropiḡu p̄hru ĩḡure iiri maricũ m̄a pohrogue wagucumi ĩḡu daja.

*Pablo ðadoretup̄*

<sup>13</sup> Ōaro pee masiyurã áriḡue m̄a. Cristore umupeorã duhubiricãque. Ōaro guñaturarã áriḡue. Eropirã Goãmu ya turari mera turarã áriḡue m̄a.

<sup>14</sup> Áriḡehrerore iirã gajirãre mahiri mera irire iique.

<sup>15</sup> ¿Estéfana ĩḡu ya wihi majarã mera guñari m̄a? Erã Acaya yeba majarã ðari buherire peemuhtarã, iri yebare Cristore umupeomuhtanirã áriḡma erãp̄. Eropirã gajirãre mari acawererãre Jesu yarãre erã ðaro itamuniguicãma. <sup>16</sup> Eropiḡu erã iro dopa áriḡãre, gajirãre Cristo yare itamurãre m̄a ðaro yuhricũ gahmea yuh̄.

<sup>17</sup> ĩḡu Estéfana, Fortunato, Acaico sã yu pohrogue eratumama. Ohõ erã áriḡũ w̄aro mucubiria yuh̄. M̄a maricũ m̄a mera mucubirimasibirib̄u yuh̄. Eropiḡu erã eracũ mucubiria yuh̄. <sup>18</sup> Erã mera áriḡu ðaro s̄iporãcuḡu wahabu yuh̄. M̄a sãre eropa ta mucubiricũ iiañuma yu pepicũ. M̄a pohrogue erã dipaturi wacũ daja erãre ðaro umupeoque m̄a. Eropirã gajirãre erã iro dopa áriḡã sãre umupeoro gahmea m̄are.

<sup>19</sup> Asia majarã Jesu yarã m̄are ðadorema. Eropirã Aquila, Priscila, erã ya wihi gamenererã mera Cristo ĩḡu mahiri mera m̄are w̄aro ðadorema. <sup>20</sup> Ō majarã Jesu yarã áriḡehrerã m̄are ðadorema. M̄a mera majarãre bocat̄irirã ðaro mera mojoto ñeaque.

<sup>21</sup> Yuh̄ Pablo, yu basi i dihtare gojaa. M̄are ðadorea.

<sup>22</sup> Mari Op̄u Jesucristore gajiḡu ĩḡu mahibiricũ, Goãmu ĩḡure dipuwaja moaporo. Mari Op̄u duru dujariporo.

<sup>23</sup> Mari Op̄u ĩḡu mahiri mera m̄are ðadorea. <sup>24</sup> M̄are áriḡehrerãre burigã mahia Jesucristo mera. Eropa ta áriḡoro. Irip̄eta ãhraa.

## 2 Corintios

### *Ōpa gojabeoñumi Pablo Corinto majarāre*

<sup>1</sup> Yũhũ Pablo Jesucristo yare ĩgu buhedore ĩgu apidigu āhraa. Mari Pagũ ĩgu gamero dopa ta apimi yũre Jesu. Yũhũ, mari acaweregu Timoteo mera mũare Goãmũre umupeorāre Corinto majarāre gojabeoa. Áripehrerā Jesucristo yarāre Acaya majarāre mũa sāre gojabeoa. <sup>2</sup> Eropirā Goãmũ mari Pagũ, mari Opũ Jesucristo mera mũare òadoreo. ĩgu itamuro mera òaro árĩque mũa.

### *Pablo ĩgu ñero tarirare òpa arĩ wereñumi*

<sup>3</sup> Mari Opũ Jesucristo Pagũ Goãmũ marire mojomoro ĩhami. Eropigu ĩgu dihta marire árĩpehrerinũri òaro sĩporācũcũ iimi. “Ōatariagu āhrimi ĩgu,” arāa mari. <sup>4</sup> Mari ñero taricũ ĩagu marire ĩgu yarāre itamumi ĩgu gajirāre mari itamuboro dopa. Eropirā gajirā erā ñero taricũ erāpure itamuro gahmea marire. Goãmũ marire ĩgu itamuro dopa ta mari sã erāre itamurā. <sup>5</sup> Cristo yarā mari árĩrā ĩgu ñero taridiro dopa ta mari sã bũrigā ñero taria. Mari ñero taridiro dopa ta ĩgu itamurire wũaro opaa. <sup>6</sup> Gũapũ mũare itamurā ñero taria. Eropirā Cristo mera mũa òaro árĩboro dopa gũa mũare werera dipuwaja gajirā ñero iima gũare. Gũa ñero tariquerecũ Cristo gũare itamumi. Eropirā Cristo gũare itamucũ gũapũ mũa sãre itamumasia. Eropirā gũa ñero taridiro dopa ta mũa sã ñero tarirā òaro mera yujuro bojerāca. <sup>7</sup> Ōaro mera mũa yujuro bojerā árĩborore gũa masia. Gũa ñero taridiro dopa ta ñero taria mũa sã. Eropirā Goãmũ ĩgu itamuri mera gũa yujuro bojediro dopa ta mũa sã yujuro bojerāca.

<sup>8</sup> Gũa acawererā, dohpaguere ire mũa òaro masicũ gũa gahmea. Asia yebaguere ñetariaro taribũ gũa. Gũa gamero iirā ne bocatĩubiriboya. Ōpa arĩ pepiribũ gũa: “Ne bocatĩusome mari. Eropirā mari sĩrirāca,” arĩ pepiribũ gũa. <sup>9</sup> Eropirā “Marire wejēcārācoma,” arĩ pepiribũ gũa. Gũa eropa ñero taribũ Goãmũ dihtare gũa guñaturaboro dopa. ĩgũpũ sĩrinirāre masugu āhrimi. Eropa ĩgũre guñaturarā gũa gamero gũa bocatĩubirirare masia. “Goãmũ ta marire itamumi,” arāa pare. <sup>10-11</sup> Gũare gũhyaquerecũ ta ĩgu itamuro mera taribũ. Pũhrũgue sãre dipaturi gũare taugũcumi. Mũa sã gũare itamumorā mũa Goãmũre serēbasacũ sãre ĩagu ĩgu gũare taugũcumi. “ĩgu ta gũare taugũcumi,” arĩ masia mari. Eropirā ĩgu gũare taucũ ĩarā, ĩgũre “Ōhaa” arĩrāca mũapũ. Mũa bajarā serērare ĩgu yũhricũ ĩarā “Ōhaa, diaye ta āhraa,” arĩrāca mũa bajarā Goãmũre.

### *Pablo Corintogue ĩgu wadiarare wereñumi*

<sup>12</sup> Eropirā gũa iirare guñarā mucubiriri mera òpa arĩ pepia gũa: I yebare Goãmũ ĩgu itamuro mera ñeri mariro òari mera masare wapicũ buhebũ. Mũa sãre òaro wapicũ buhebũ. Ōpa iirā gũa masiri mera iibiribũ. Goãmũ gũare ĩgu mahicũ ĩgu turari mera eropa iibũ gũa. <sup>13-14</sup> Eropirā òaro were mũare gojabeorā diaye ta werebũ mũare òaro mũa masiburire. Dohpague gũare òaro masinibea mũa. Gũa árĩricũre mũa turaro masicũ gahmea gũa. Eropirā mari Opũ Jesucristo dujaricũ gũa mera mucubirirāca mũa. Mũa mera gũa mucubiridiro dopa ta mũa sã gũa mera mucubirirāca.

<sup>15-16</sup> Eropa arĩ pepigu Macedonia yebague wagũ mũa pohrogue wamũhtadiarabũ. Eropigu mũare ĩhatariwahgāboya. Eropigu erogue ejadigu dujarigu dipaturi mũa mera bajamenũrigā árĩboya yũhũ. Eropirā pesubu mũa mera yũ árĩcũ ĩarā turaro mucubiriboya mũa. Mũa pohrogue yũ árĩcũ ĩanirā Judea yebague yũ wacũ ĩarā yũre

itamuboya mua. <sup>17</sup> “Wagura,” yu arĩcũ peenirã árĩrã, yu wabiricũ ãarã “Pablo Jesure umupeobirã iro dopa gũyagu iĩnumi,” ¿arĩ pepiri mua? “ ‘Wagura,’ arĩqueregu ãgu gamero mari pohro aridiabiriĩnumi ãgu,” ¿arĩ pepiri mua yure? “ ãgu arĩdiro dopa iibeami,” ¿arĩ pepiri mua? <sup>18</sup> Eropã arĩ gũyagu iibeaa yũhũ. Eropigu “ ãgu,” arĩgu yu arĩdiro dopa ta diaye ta iiaa yũhũ. Irire masimi Goãmũ. <sup>19</sup> Yũhũ, Sila, Timoteo mera Jesucristo Goãmũ magu yare mũare werebũ. ãgu Jesucristo “ ãgu,” arĩgu, diaye ta iigu ãhrimi. Goãmũ ãgu arĩdiro dopa ta Cristo iimi. <sup>20</sup> Árĩpehreri ãgu Pagu ãgu masare “ ãgu ãaro iigu,” arĩ wererare Cristo iipehocãdi árĩmi. ãgu eropa iigu arĩcũ guã ãgu yare gajirãre werea Goãmũre erã umupeoboro dopa. <sup>21</sup> Cristo yarã marire árĩniguicũ iigu Goãmũ ta ãhrimi. Eropigu ãgu yare weremorãre marire apimi ãgu. <sup>22</sup> Eropigu ãgu yarã mari arĩcũ ãagu irire marire masicũ iimi ãgu. Eropigu ãgu Espĩritu Santore mari mera árĩdoremi ãgu. Mari mera arĩcũ ãha Goãmũ ãgu marire ãaro iiburire masia mari.

<sup>23</sup> Dohpaguere yũhũ mua pohro wabirirare diaye ta weregura mũare. Yu wereri diaye arĩcũ Goãmũ masimi. ãgu ta yu pepirire masimi. Mua ñero iira dipuwaja turidiabigu mua pohroguere wadiabiribũ. Erãre bũjawerecũ iiri, arĩgu mua pohroguere Corintoguere wabiribũ. <sup>24</sup> Eropirã “ Mũare dorerã ãhraa guã,” arĩrã iibeaa. Eropirã “ ãgu Cristore umupeoro gahmea mũare,” arĩrã iibeaa guã. Mua Cristore ãaro umupeotuhabũ. Mũare umupeonemocũ iirã mua ãaro mucubirirã arĩcũ iidiaca guã.

## 2

<sup>1</sup> Wabigu ãpa arĩ pepibũ: “ Dipaturi erãre bũjawerecũ iidiabeaa. Eropigu dohpaguere wabeaa,” arĩ pepibũ. <sup>2</sup> Mũare bũjawerecũ iidiabeaa. Mua bũjawerecũ ãagu yũpũ mucubiribiriboya. Eropirã yure mucubiricũ iimorã árĩbiriboya mua sã. <sup>3</sup> Eropigu mua pohroguere wabiribũ. Wabigu mua arĩricũre amuboro dopa mũare gojabeobũ. Mua yure mucubiricũ iibonirã árĩquererã ta yure bũjawerecũ iiboya mua mua pohroguere yu wacũ. Mua mera yu mucubiricũ mua sã yu mera mucubirirãca. Irire masia yũhũ. Eropigu mua mera bũjawerediabigu “ Wabeaa,” arĩ, carta gojabeobũ. <sup>4</sup> Eropigu mũare gojagu wũaro pepigu ñero sĩporãcũgu, turaro co deco wiriri mera mũare gojabeobũ. Eropã gojagu mũare bũjawerecũ iidiabiribũ. Mũare yu bũrigã mahirare mũare masicũ iidiagu mũare eropa gojabeobũ.

### *Erã mera majagu ãgu ñero iirare cãdijidoreñumi Pablo Jesu yarãre*

<sup>5</sup> Mua mera majagu ãgu ñero iira mera yure bũjawerecũ iimi ãgu. Mũare ãgu turaro bũjawerecũ iidiro dopa ta yu sãre wũaro bũjawerecũ iimi ãgu. ãgu marire eropa bũrigã bũjawerequerecũ ta wũatariaro dipuwaja moadorebeaa dohpaguere. <sup>6</sup> Bajarã mua mera majarã ãgu ñero iira dipuwaja moatuhañorã. Iripẽta dipuwaja moa duhuro gahmea ãgũre. <sup>7</sup> ãgũre mua dipuwaja moaniguicũ bũrigã bũjawerebocumi ãgu. Eropigu Cristo yare duhubocumi. Eropirã ãgu ñero iirare cãdijique mua. ãgũre itamuque ãgu ãaro sĩporãcũboro dopa. <sup>8</sup> Eropirã ãgũre ãaro iique mua ãgũre mua mahirare ãgu masiboro dopa. Mua eropa iicũ bũrigã gahmea yũhũ. <sup>9</sup> Ero core mũare gojabeogu “ ¿Diaye ta yure yũhrirãcuri?” arĩ pepigu gojabeobũ mũare. Yure mua yũhricũ ãdiagu gojabeobũ. <sup>10-11</sup> Dohpaguere ãgu ñero iirare mua cãdijicũ ãagu yu sã ãgu ñerire cãdijigura. Yure ñero iibirimi ãgu. Mũapũre ñero iidi árĩmi. ãgu eropa iidigu arĩquerecũ ta ãgu ñero iirare cãdijia yu sã. Mũare ãaro itamudiagu Cristo ãgu ãhabeoro ãgu ñero iirare cãdijia. Irire cãdijia Satana marire ãgu tarinũgabiriboro dopa. ãgu mari ñerire iicũ gahmemi. Irire ãaro masia. Eropirã Jesu yarã erã ñeri iirare guñaniguibeaa mari Satana yapũre iiri arĩrã.

*Troa waĩcũri maca árĩgu Titore bocabigu wũaro bujawere pepiũumi Pablo*

<sup>12</sup> Eropigu Troa waĩcũri macague Cristo yare buhegu ejaribũ. Erogue yũ ejacũ bajarã masa õari buherire peediarã árĩma. Mari Opũ ĩgu itamuri mera ĩgu yare yũ buherire peerã bajarã masa árĩma. <sup>13</sup> Eropa árĩquerecũ ta mari acaweregu Titore bocatĩbirinijagu wũaro bujawere pepigu erore árĩmasibiribũ, Eropigu ero majarãre goeriseretuhagu Macedonia yebague waha wabũ ĩgũre amagu.

*Goãmũ marire tarinũgacũ iimi, arĩ gojaũumi Pablo*

<sup>14</sup> Goãmũre mucubiriri mera “Õhaa,” arãa. Goãmũ ñerire árĩpehrerire tarinũgagu ãhrimi. Cristo yarã mari árĩcũ ĩagu marire tarinũgacũ iimi. Poresudiro poresu sehyaboro dopa ta ãhraa mari. Poresu sehyaro dopa ta Goãmũ dorero mera árĩpehreroguerere Cristore masicũ iiaa mari. Eropa ĩgũre masirã erã õaro pepima. <sup>15</sup> Cristo yarã árĩrã masare Cristore guñacũ iiaa mari. Mari eropiicũ ĩha Goãmũ mucubirimi. Masare Cristore guñacũ iicũ erã ĩgu árĩrĩre masima. Goãmũ ĩgu taumorã Cristo árĩrĩre masima. Gajirã erã peamegue wamorã sã Cristo árĩrĩre masima mari mera. <sup>16</sup> Cristo árĩrĩre masirã erã peamegue wamorãpũ peamegue erã waborore masima erã. Goãmũ ĩgu taumorãpũ árĩpehrerĩnũri ĩgu mera erã árĩburire masima. Eropirã ire Cristo yare mari mari gamero mera buhe ojogorocũmasibea. Goãmũ ĩgu itamuri mera ta mari ĩgu yare buhe ojogorocũmasia. <sup>17</sup> Bajarã gajirã Goãmũ yare buhemaacãma niyerure wajatadiarã. Gũapũ erã iro dopa ta iibea. Gũyaro mariro Cristo ĩgu turari mera ĩgu yare buhea gũa. Goãmũ gũare ĩgu obeorã árĩrã ĩgu ĩhurore õaro buhea gũa.

### 3

*“Õpa iigũra,” Goãmũ ĩgu arĩ werepirare mama buherire wereũumi Pablo*

<sup>1</sup> ¿Dipaturi gũa árĩricũrĩre mũare wererã iiri gũa mũa pepicũ? Gajirã mũare erã buheboro core erã buheri queoro árĩrĩre masidiarã erã gojarapũre serẽmũhtabũ mũa erãre. ¿Gũare masituaquererã ta iripũnore serẽri mũa gũare? ¿O gajirã pohrogue gũa buherã warã iripũnore gũare aĩgãro gahmeri mũa pepicũre? <sup>2</sup> Iripũnore gamebeaa gũa. Mũapũre õari gohrotonirãre árĩpehrerã gajirã ĩarã mũare gũa õaro buherare masirãcoma. Mũare gũa buhecũ Cristore umupeorã ĩgu yarã árĩnũgabũ mũa. <sup>3</sup> Cristo yarã mũa árĩcũ ĩarã masa mũare Goãmũ ya buheri gohrare gũa queoro buherare masituhama. Mũare buherã Goãmũ yagu Espĩritu Santo ĩgu itamuri mera buheabũ. ĩgu Goãmũ ojocarigu gohra ãhrimi. Gũa eropa buhecũ peerã Cristore õaro gahmeabũ mũa. Eropa gamerã mũa árĩcũ gajirã mũare ĩarã Cristo yarã mũa árĩrĩre õaro masima. Eropa masirã mũare Goãmũ ya buheri gohrare gũa queoro buherare masima masa.

<sup>4</sup> Eropa wacũ masia gũa Goãmũre guñaturari mera. Cristo ĩgu itamuri mera eropa guñaturaniguia mari. <sup>5-6</sup> “Gũa gamero i mohmerire iiaa gũa,” arĩmasibea. Goãmũ ĩgu itamuri mera ire iiaa gũa.

Eropigu dohpaguere ĩgu wererire õari buherire Goãmũpũ õaro gũare buhemasicũ iimi. Eropa buherã iribojegue ĩgu doreri Moisere ĩgu apira dorerire buhebeaa. Espĩritu Santo mera mari Goãmũ mera õaro árĩburipũre buhea gũa. ĩgu dorerare mari gamero mera ne bocatĩubeaa. Eropa mari bocatĩubirira dipuwaja peamegue waboya mari. Espĩritu Santopũ mari Goãmũ mera árĩpehrerĩnũri õaro árĩnũguicũ iimi. Õari buheri buhecũ peeñanirãre õaro árĩnũguicũ iimi.

<sup>7</sup> Goãmũ ĩgu dorerire utãmijirigue gojanijagu Moisere apiũumi. ĩgu eropa apira pũhrũ ĩgu árĩro goesiriri dehyoamũriyoro Moisere “Goãmũ ĩgu apira õari ãhraa,” arĩro dopa. Eropiro Moise diapo bũrigã goesiriyoro. Cuimiju árĩyoro. Pũhrũ ĩgu goesiriri pehrerĩsubu ĩgu árĩquerecũ ta masa ĩgũre ne ĩamehtumasibiriũuma. Iri



dorerire ïgu apira pũhrũ iri dorerire iibirã masa dipuwajacurã peamegue wamorã wañuma. Eropiro iri doreri masare peamegue wadorequerero ta, Goãmũ ïgu árĩro gosesiriri mera árĩnũgayoro. <sup>8</sup> Iri doreri tauro õari buheripũ “Jesucristo masare taumi,” arĩ buheri õataria. Iri buherire gajirãre mari buhecũ erã õaro peecũ Goãmũ ta erã mera árĩgũcumi ïgu Espĩritu Santo mera. Eropiro iribojegue maja doreri tauro Cristo ya buheripũ õataria. <sup>9</sup> Goãmũ Moisere apira doreri iribojegue maja masare peamegue wadoreyoro. Eropa dorequerero Goãmũ ïgu gosesiriri mera árĩnũgayoro. Iri tauro õari buheripũ Goãmũ ïgu turari mera ãhrea. Iri buheri mera õarã wahama masa Goãmũ ïgu ïacũ. <sup>10</sup> Iribojegue Goãmũ ïgu doreripũ turari árĩquerero dohpaguere bu gohra ta ãhrea. Õari buheripũ iri tauro turatariari ãhrea. Iri buheri mera umaroguere mari wamasia. <sup>11</sup> Iribojegue Goãmũ ïgu doreri Moisere ïgu apira doreri Goãmũ gosesiriri mera árĩnũgaquerero ta pehreburi árĩyoro. Õari buheripũ “Jesu marire taugũcumi,” arĩ buheripũ árĩniguicãroca. Eropiro “Iri doreri tauro õari buheripũ õataria,” arĩ masia mari.

<sup>12</sup> Irire eropa masirã, gũiro mariro õari buherire õaro werepehocãa gũa. <sup>13</sup> Moise gũa iro dopa árĩbiriñumi. Ìgũre Goãmũ ïgu gosesiriri pehrerore yũ acawererã masiri arĩgũ dopa ïgu diapore suhri gasiro mera cãhmotacãñumi Moise. <sup>14</sup> Moise ïgu diapore ïgu cãhmotacũ Goãmũ gosesiririre ïgu õarire erã ñecũ sumarã ïhamasibiridiro dopa ta erã dohpaguere õari buherire õaro masibeama. Goãmũ wererire iribojegue erã gojarapũrĩre erã buherã ne masibeama erã Israe masapũ. Cristore gamebirã masisome erã. Ìgũre umupeorã tamera ïgu yare masirãcoma. <sup>15</sup> Dohpague sãre Israe masa Goãmũ dorerire Moisere ïgu apirare buhequererã, erãre cãhmotaro dopa ta ne masibeama erã. <sup>16</sup> Erã mari Opũre Jesucristore erã gamecũ ïgu ta erãre masicũ iimi. Iri cãhmotariñere aĩro dopa ta mari Opũ marire ïgu yare õaro masicũ iimi. <sup>17</sup> “Mari Opũ,” arĩrã Espĩritu Santore arĩrã iiaa. Mari Opũ ïgu Espĩritu Santo mari mera ïgu árĩcũ ïgu yarã ãhrea. Eropa arĩrã “Iribojegue maja dorerire iiro gahmea Goãmũ yarã árĩmorã,” arĩbeaa mari. <sup>18</sup> Eropirã Jesu yarã árĩrã, Jesucristo ïgu õarire ïhmurã iiaa mari. Eropigũ mari Opũ Espĩritu Santo marire gohrotocũ iimi. Ìgu eropa iicũ Cristo õagũ árĩdiro dopa ta õarã warã iiaa mari sã.

## 4

<sup>1</sup> Goãmũ gũare mojomoro ïagũ, õari buherire weremorãre apimi gũare. Ìgu eropa apicũ masirã ïgu yare buherã duhudiabeaa. <sup>2</sup> Masa ïabiro ñerire iicoreri gũhyasĩuri ãhrea. Irire gũapũ ne iibeaa. Ìgu yare buherã gũyarire buhebiribũ. Eropirã gũa Goãmũ yare ne gohrotobeaa. Eropa iibirã õari buherire õaro diaye buhea gũa Goãmũ ïgu ïhuro árĩrã. Gũa eropa árĩricũrĩre árĩpehrerã õaro masima gũare ïarã gohra. <sup>3</sup> Gũa iri buherire õari buherire werea. Gũa irire buhequerecũ ta gajirã masibeama. Eropa masibirãpũ peamegue wamorã ãhrima. <sup>4</sup> Satana ñegũ i yeba majarã opũ erãre Goãmũ yare masibiricũ iimi. Cuirĩ ïhajabirã erã ïhajabiro dopa ta masibirã wacũ iimi erãre. Õari buherire Cristo ïgu turarire erã masibirã wacũ iimi ïgu erãre. Cristo Goãmũ ïgu árĩricũrĩre opami. Ìgu Cristo Goãmũ gohra ta ãhrimi. <sup>5</sup> Gũa buherã “Gũapũre umupeoque,” arĩ buhebeaa. Õpa arĩ buhea gũa: “Jesucristopũ ãhrimi mari Opũ,” arĩ buhea gũa. Gũapũ Jesure yũhrirã ãhrea. Eropirã mũare itamurã ãhrea gũa. <sup>6</sup> Negohraguere õpa arĩ dorepũ Goãmũ i umũ naitĩaro árĩcũ: “Boyoro árĩque,” ïgu arĩcũ boyoa wayoro. Eropigũ dohpaguere ïgu ta iri turari mera marire masicũ iimi boyoro árĩro dopa. Eropa marire masicũ iigũ ïgu õaro árĩricũrĩre marire masicũ iimi. Jesucristore masirã ïgu Pagũ ïgu õaro árĩricũrĩre masia mari.

*Cristo turari mera mari ãhrea, arĩ gojañumi Pablo*

7 Eropa masirã árĩrã, Goãmũ ìgũ turarire gajirãre masicũ iiaa. Eropa iirã árĩquererã ta turabirã àhraa gũapũ. Mátasoro mata wahrirasoro iro dopa ta gũa sã turabirã àhraa. Gũa eropa turabirã árĩquererã ta gũa masare Goãmũ yare werecũ ìarã, gũa gamero mera iimasibirare ìarã òpa arĩ masirãcoma erã. “Goãmũ turari mera eropa arĩ wereniguima marire,” arĩrãcoma masa. Eropirã Goãmũpũre umupeorãcoma. 8 Árĩpehrerã gajirã gũare ñero iiquererã ta Goãmũ gũare taucũ erã gũare tarinũgabeama. Eropirã gũa gariborequererã ta ne Goãmũ yare buhe duhudiabeaa. 9 Gũare erã ñero iiniguiquerecũ ta Goãmũ gũare eropa itamuniguicãmi. Gũare erã pamehpiquerecũ ta ìgũ itamuri mera sĩribeeaa gũa. 10 Erã wejēsũmorã árĩcãrã tiiaa gũa Cristo i yebaguere ñero ìgũ taridiro dopa ta. Erã wejēsũmorã árĩquererã eropa árĩniguirã tiiaa gũa sã Cristo ìgũ ojocaririre ìhmumorã. 11 Eropirã umuri nũcũ gajirã gũare wejẽmaja gũhya àhrima Cristo yarã gũa árĩri dipuwaja. Òpa ta ñero tariquererã árĩniguia gũa Cristo ìgũ ojocaririre ìhmumorã. 12 Eropirã mũare gũa buheri dipuwaja gũare gajirã wejẽmaja gũhya àhrima. Gũa buherire mũa peenirãpũ umuri nũcũ Goãmũ mera árĩmorã àhraa.

13 Goãmũ yare erã gojarapũ òpa àhraa: “Goãmũre umupeobũ. Eropigũ ìgũ yare werebũ,” arĩ gojañumi iribojegue majagũ. Gũa sã yujuropa ta àhraa. Goãmũre umupeorã ìgũ yare werea. 14 I sãre òaro masirã ìgũ yare werea gũa. Cristo ìgũ sĩrira pũhrũ Goãmũ ìgũre masudi árĩmi. Eropigũ Cristo yarã mari árĩcũ ìagũ ìgũ mari sãre masugũcumi. ìgũ eropa masura pũhrũ ìgũ pohrogue aĩgãgũcumi marire. 15 Eropirã mũare itamudiarã ñero taria gũa. Eropirã Cristo yarã mũa bajarã warã, bajarã mũa Goãmũre mucubiriri mera umupeorãca. ìgũre “Òhaa,” arĩrãca.

16 Mũa eropa umupeocũ ìarã, gũa ñero tariquererã ta bũjawerebeaa. Eropirã Cristo yare were duhubeaa. Gũa dũpũ umuri nũcũ turabiri wahgãro iiaa. Eropa turabiri wahgãquererã ta òaro sĩporãcũa Jesucristore guñaturari mera. 17 Dohpaguere ñero tariquererã ta pũhrũ ñero tarisome. Eropirã Cristo yare were duhubeaa. Iri ñero mari tariri pehrea waroca. Eropirã marire merogã ñero tariro gahmea. Eropa mari ñero tarinirã árĩrã, pũhrũguere wũaro mucubiriri mera árĩniguirãca Goãmũ mera. Eropirã mari ñero taridiro tauro bũrigã mucubiriri mera eropa árĩniguicãrãca. 18 Eropirã mari ìarire dohpaguere mari warore guñanũrũbeaa. Mari ìabiriripũre pũhrũ mari Goãmũ mera árĩniguiburire guñanũrũa. Mari dohpaguere ìari pehrea waroca. Mari ìabiriripũ árĩniguicãroca.

## 5

1 I sãre masia mari: Wihire mari cóãdiro dopa ta mari dũpũre cóãrãca. Eropigũ mama wihi iibodiro dopa ta Goãmũ mama dũpũre iigũcumi. Eropigũ iri dũpũre marire ogũcumi. Eropirã umaroguere eropa árĩniguirãca iri dũpũ mera. Irire masirã ñero tariquererã Goãmũ yare duhubeaa. 2 Eropirã iri dũpũre umaro maja dũpũre turaro gamerã, mari eropa coreniguirã iiaa. 3 Suhrirore turaro mari sañadiaro dopa ta iri dũpũre turaro gahmea mari. Eropa ta cohrea mari iri dũpũ marirã árĩdiabirã. 4 Dohpague maja dũpũre cóãdiabiriquererã umuri nũcũ Goãmũ mera mari árĩburi dũpũre bũrigã gahmea mari. Eropirã i mari dũpũ sĩriburi dũpũ iri árĩcũ masirã, mama dũpũ mera Goãmũ mera eropa árĩniguidiaa mari. 5 Mari ìgũ mera árĩniguiborore amuyudi árĩmi Goãmũpũ. Eropa amuyugũ ìgũ Espĩritu Santore omũhtami marire. Eropigũ ìgũ Espĩritu Santo mari mera árĩcũ ìha marire Goãmũ ìgũ iiborore, “Diaye ta àhraa,” arĩ masia mari.

6 Eropirã Goãmũ mera sĩporã turarã àhraa. Gũiro mariro àhraa mari. I sãre mari masia. I dũpũ mari árĩmũhtara dũpũ mera árĩrã, mari Opũ pohro árĩnibeaa. 7 Umuro majare Goãmũ sãre mari ìabiriquererã ta “Ìgũ diaye ta àhrimi,” arĩ masia

mari. Eropirã ĩgũre umupeoa. <sup>8</sup> Eropirã mari Goãmũ pohro waborore masia. Mari dũpũre i yeba maja dũpũre cóãrã mari Opũ mera Ʃmarogue mari árĩdiaa. <sup>9</sup> Eropirã Cristore mucubiricũ iidiaa mari. I yeba maja dũpũ mera árĩrã ĩgũre mucubiricũ iidiaa mari. Ʃmarogue árĩrã sã ĩgũre mucubiricũ iidiaa. <sup>10</sup> Árĩpehrerã Cristo pohrogue mari wacũ ĩagũ ĩgũ mari iirare beyegũcumi. Eropiro mari iira masisũroca. Eropigũ marire õarire mari iira wajare ogũcumi. Ñerire mari iira waja sãre ogũcumi. ĩgũ eropa beyegũ árĩcũ masirã ĩgũre mucubiricũ iidiaa mari.

*Goãmũre mari mera õaro árĩcũ iimi Cristo, arĩ gojañumi Pablo*

<sup>11</sup> Eropirã gũhyadiaro mera mari Opũre umupeoro gahmea marire. ĩgũ marire eropa beyeburire masirã, Cristo yare masicũ iiaa gũa masare. Erãre gũisãrã, ĩgũre umupeocũ iidiaa gũa. Gũa õarã árĩrĩre Goãmũ õaro masimi. Gũa eropa iirire mũa sãre õaro masicũ gahmea yũhũ. <sup>12</sup> Dipaturi gũa õarã árĩrĩre mũare wererã iibea. “Gajirãre tarinũgaa,” arĩmaacãnĩrãre mũa wereburire eropa wererã iiaa gũa mũare. Erã basi eropa arĩ pepirãpũ erã pepiriguere ñerã, gũyaricũrã árĩquererã ta masa erã ĩhuro dihtare õarã iro dopa iirima. Eropirã mũa gũare mucubiriboro dopa, “Õaro iirã iima,” gajirãre mũa gũare arĩ cãhmotaburire i árĩpehrerire mũare were gojarã iiaa. <sup>13</sup> ¿Gũa õpa arĩ wererã pee masibirã ãhriri gũa mũa ĩacũ? Masa gũare ĩarã pee masibirã iro dopa ĩhama gũare. Goãmũ yare gũa werecũ ĩarã eropa ĩabocoma gũare. Erã eropa arĩ ĩabonirã árĩquererã ta pee masirã ta ãhraa gũa mũare eropa itamumorã. <sup>14</sup> Cristo ĩgũ gũare mahicũ ĩarã masare eropa itamua. ĩgũ eropa mahicũ ĩarã ĩgũ yare eropa buheniguia gũa. Marire mahigũ yujugũ ta Cristo mari árĩpehrerã ya ñeri dipuwajare sĩridi árĩmi. Eropigũ árĩpehrerã mari ñeri dipuwajare sĩrimorã árĩnĩrãre sĩribasadi árĩmi. Irire guñarã ĩgũ yare iiniguia gũa. <sup>15</sup> Árĩpehrerã mari ñeri dipuwajare sĩridi árĩmi ĩgũ mari gamero dopa mari iibiriboro dopa. Eropigũ ĩgũ gamerĩpũre iidoregũ sĩridigũ árĩmi ĩgũ. Maripũre Goãmũ pohrogue mari ejaborore eropa sĩridi árĩmi. ĩgũpũ mari ya árĩburire sĩrira pũhrũ masa mũriadi árĩmi. Eropirã mari gamero dopa mari Ʃaribejarire iibirã ĩgũ yare iiro gahmea pare marire. <sup>16</sup> Eropirã dohpaguere Jesure gamebirã gajirã erã árĩricũrĩre ĩha werewũaro dopa ne arĩ ĩabeaa gũa. Iribojeguere gũa Cristore eropa ĩaquererã dohpaguere ĩgũre õaro masia. <sup>17</sup> Eropirã árĩpehrerã Cristo yarã warã õaripũre gohrotoa mari. Iribojegue mari gamero mari árĩrĩre duhucãa mari. Dohpaguepũre õaripũre corerã iiaa mari. <sup>18</sup> Goãmũpũ marire õarire gohrotocũ iimi. Iribojegue mari Goãmũ mera õaro árĩbirimũrĩribũ. Eropigũ Jesucristo mari ñeri iira dipuwaja sĩribasara mera Goãmũ marire ĩgũ mera õaro árĩcũ iidi árĩmi. Eropa iigũ gũare ĩgũ yare buhedoregũ apimi. Eropa buherã, gajirãre Goãmũ mera erã õaro árĩcũ iiaa gũa sã. <sup>19</sup> Õpa arĩ masare weredoremi Goãmũ gũare: “Mari masa ĩgũ mera õaro árĩbirinĩrã árĩquerecũ Goãmũ Cristo sĩrira mera marire ĩgũ mera õaro árĩcũ iimi. Eropigũ Cristore mari umupeocũ ĩagũ mari ñeri dipuwajare dipuwaja moabeami Goãmũ marire,” arĩ weredoremi Goãmũ gũare. <sup>20</sup> Eropirã Cristo yare weremorã ĩgũ obeonirã ãhraa gũa. Goãmũ ĩgũ basi mũare ĩgũ werebodiropo dopa ta gũapũ mũare õpa arĩ werea: Cristore werebasarã iiaa. Eropirã mũare werea. Goãmũre mũa ĩhaturĩrĩre irĩpẽta duhuque. <sup>21</sup> Cristo ĩgũ ñerire iibiriquerecũ ta Goãmũ ĩgũre mari ñeri dipuwajare sĩridoredi árĩmi. Eropa iigũ mari ñeri dipuwajare dipuwaja moadi árĩmi Goãmũ ñeri dipuwajare dipuwaja moabeami Goãmũ marire,” arĩ Jesucristore. ĩgũ eropa iidi árĩmi Cristo yarã mari wacũ, Goãmũ iro dopa õarã mari árĩboro dopa.

## 6

<sup>1</sup> Goãmũ eropa iigũ ĩgũ mũare ĩgũ õaro mojomoro ĩarare ĩhmumi. Eropirã Goãmũ yare mohmebasarã árĩrã ire turaro mũare iidorea gũa. Goãmũ õaro iirare õari

buhere m̄a peediro dopa ta iique m̄a. M̄a peediro dopa ta m̄a iibiric̄a m̄a peera duhpiburi ár̄ibeaa. <sup>2</sup> Ōpa ar̄imi Goãm̄u ïgu yare er̄a gojarapũgue: beami Goãm̄u marire,” ar̄i M̄are yu ōaro iiburin̄ari ár̄ic̄a m̄a ser̄ere pee yuhrigura. Eropigu m̄are peamegue wabonir̄are yu tauburin̄ari ár̄ic̄a itamugura, ar̄imi ïgu.

Peeque m̄a. Dohpaguere Goãm̄u masare ïgu ōaro iiburin̄ari āhraa. Dohpaguere masa Jesucristore umupeoburin̄ari āhraa Goãm̄u er̄are tauboro dopa. Eropir̄a dohpaguere ïgure umupeoro gahmea, ar̄i werea gua.

<sup>3</sup> “¿Ōari buherip̄ure gamebiribocuri?” ar̄ir̄a, ne meroḡa gajir̄are ñero iibeaa gua. Gajir̄are ne ñero ar̄i wereniguibeaa. <sup>4</sup> Irire iibir̄a Goãm̄u pohro majar̄a gua ár̄ir̄ire m̄are masic̄a iidiaa. Eropir̄a ïgu yare buher̄a ōpa āhraa gua: Ñero tarir̄a gajino moor̄a bocat̄ua. Guare er̄a ñero iiquerec̄a ta guaro mariro āhraa. <sup>5</sup> Ōpa ñero tarib̄u gua: Masa guare pac̄u, peresu er̄a iic̄u, masa bajar̄a guare wej̄ediar̄a er̄a gaguiniguic̄u peer̄a ñero tarib̄u gua. Gua turaro mohme ōar̄a s̄a, w̄aja p̄uriquerec̄u ta car̄ibir̄a s̄a, oaboar̄a s̄a ñero tarib̄u. <sup>6</sup> Eropir̄a ōaro ár̄ir̄icuri mera diaye buheb̄u. Eropir̄a Goãm̄u yare buher̄a ōaro masiri mera buheb̄u m̄are. Eropir̄a ne guabirib̄u gua. Eropir̄a ōaro mera buheb̄u gua m̄are. Eropa iir̄a Goãm̄u pohro majar̄a gua ár̄ir̄ire ïhmur̄a iib̄u gua m̄are. Esp̄iritu Santo ïgu itamuri mera eropa ta Goãm̄u pohro majar̄a gua ár̄ir̄ire ïhmur̄a iib̄u gua m̄are. Eropir̄a diaye m̄are gua mahic̄u ïar̄a ïgu pohro majar̄a gua ár̄ir̄ire masia m̄a. <sup>7</sup> Eropir̄a ōari buherire diaye m̄are werec̄u ïar̄a, Goãm̄u turari mera gua iic̄u ïar̄a, ïgu pohro majar̄a gua ár̄ir̄ire masia m̄a. Ōarip̄u ár̄ipehreri gua iira gua mojo iro dopa āhraa gua ōaro c̄ahmotaboro dopa. Iri ōarire iir̄a gua wat̄ire c̄ahmotar̄a iiaa. Eropir̄a iri ōari gua iira mera gua ïgure tarin̄ugaa. <sup>8</sup> Eropa iir̄a gajir̄a guare umupeoma. Gajir̄ap̄u guare umupeobeama. Gajir̄a ōaro wereniguima guare. Gajir̄ap̄u ñero ar̄i wereniguima guare. Diaye gua werequerec̄u ta “Ḡayar̄a āhrima,” ar̄i weres̄ama gajir̄a guare. <sup>9</sup> Gajin̄urire guare masir̄a dopa iima. Gajin̄urire guare masibir̄a dopa iima. Guare er̄a wej̄ediaquerec̄u ta ojocar̄inia gua. Er̄a bur̄iḡa panir̄a ár̄iquerer̄a ta ojocaria gua. <sup>10</sup> Gua yujuyerin̄ari bujawerer̄a ár̄iquerer̄a ta, eropa mucubirin̄igua. Mojomorocur̄a ár̄iquerer̄a ta er̄are ōari buherire buher̄a er̄are w̄aro doberire gua obodiro dopa ta iir̄a iiaa er̄are. Gajino moor̄a ár̄iquerer̄a ta, diaye ta Goãm̄u yare opapehoc̄a gua.

<sup>11</sup> Corinto majar̄a, yu acawerer̄a, m̄are ōaro mera werepeho gojab̄u gua m̄are. M̄are turaro mahir̄a eropa wereb̄u. <sup>12</sup> Ḡap̄u m̄are mahi duhubirab̄u. M̄ap̄u guare mahibiriñaria. <sup>13</sup> Eropigu yu por̄are yu werebodiro dopa ta m̄are weregura: M̄are gua pepidiro dopa ta m̄a s̄a eropa ta ōaro pepique guare. Eropir̄a guare mahique m̄a.

### *Cristore umupeobir̄are wapic̄udorebiriñumi Pablo*

<sup>14</sup> Eropir̄a Cristore umupeobir̄a mera eropa wapic̄uniguibir̄ic̄aque. Er̄a mera majagu ár̄ibita. Yujuro mera ár̄ibeaa m̄a. Ōarire iigu, ñerire iigu mera ōaro ár̄imasibeami. Boyoro iro dopa ár̄ir̄a Goãm̄ure gamer̄a āhrima. Nait̄iaro iro dopa ár̄ir̄a Goãm̄ure gamebir̄a āhrima. Eropir̄a er̄a per̄a game wapic̄umasibeami. <sup>15</sup> Eropigu Cristo wat̄i mera yujuro pepibeami. Eropigu Cristo yagu, Cristore umupeobigu mera ōaro game wapic̄umasibeami. <sup>16</sup> Goãm̄ure umupeori wihigue goãmar̄a w̄anir̄are mari apic̄u queoro wabeaa. Eropa ta Cristo yar̄a Cristore gamebir̄a mera wapic̄uniguic̄u queoro wabeaa. Er̄a pe curu majar̄a yujuro mera er̄a ár̄imasibeami. Goãm̄u wihi iro dopa āhraa mari. ïgu wihi ar̄iro dopa ta mari mera āhrimi ïgu. Ōpa ar̄iñumi Goãm̄u ïgu yare er̄a gojarapũgue: Er̄a mera ta ár̄igura yuh̄u. Eropigu er̄a watope ta eropa ár̄iniguigura. Yuh̄u Goãm̄u er̄a opu ár̄igura. Eropir̄a er̄ap̄u yahar̄a masa ár̄ir̄acoma, ar̄iñumi ïgu.



<sup>17</sup> Eropigu òpa arĩnemoñumi ìgu mari Opu:

Erã ñerã mera ne dujabita. Eropirã erãre wapicubita. Yure gamebirã yare ñerire ne iibiricãque. Eropigu yuru muare wapicugura. <sup>18</sup> Eropigu mua pagu árĩgura. Mupuru yu porã árĩrãca, arĩñumi mari Opu turatariagu.

## 7

<sup>1</sup> Yu acawererã, yu mahirã, muare ire weregura: I árĩpehrerire Goãmũ marire ìgu eropa arĩ werecũ ìarã árĩpehrerire mari dupure goroweorire duhurã. Eropirã mari pepiri sãre goroweorire duhurã. Eropirã Goãmure òaro umupeori mera ñero iiro mariro árĩrã mari.

### *Pablo mucubiriri mera wereñumi Corinto majarãre*

<sup>2</sup> Òaro guare mahique. Ne merogã mera ñero iibiribu gua muare. Eropirã gua buheri mera muare ñero iicũ ne iibiribu gua. Ne yujugure mua mera majagure guyarĩ mera waja gamebiribu. <sup>3</sup> Eropa arĩgu “Dipuwajacurã ãhraa mua,” arĩgu iibea muare. Muare mahia gua. Irire muare weretuhabu. Ojocarirã yuju curu ta ãhraa mari. Mari sĩrira purugue sãre yuju curu ta árĩrãca mari. <sup>4</sup> Òaro mua iirare masia yuhu. Eropigu muare guñabeogu mucubiria. Eropirã gua ñero tarisubure mua òaro iira quererere pee burigã mucubiribu yuhu.

<sup>5</sup> Eropi Macedonia yebague gua ejara puru, erogue ejarã ne soobiribu gua. Eroguere ñero taribu gua. Gajirã gua mera game duyasoma. Eropirã “Cristo yare duhubocoma,” arĩrã Cristo yarãpore wuro guñaricubu gua. <sup>6</sup> Gua eropa ñero taricũ Goãmuru guare òaro siporãcucũ iimi. Ìgu marire bujawererãre mucubiricũ iigu ãhrimi. Eropigu Tito gua pohrogue ìgu dujariro mera guare mucubiricũ iimi Goãmũ. <sup>7</sup> Tito ìgu eracũ ìarã mucubiribu. Iri dihtare mucubiribiribu. Muare ìgu òari quere werecũ sãre turaro mucubiribu. Yure mua ìadiarare weremi guare. Yure mua bujawerera sãre weremi ìgu. Yure “Goãmũ yare iigu iimi Pablo,” mua gajirãre arĩ werera sãre weremi ìgu. Ìgu eropa arĩcũ peegu turaro mucubiribu yuhu.

<sup>8</sup> Ero core yuhu mua ñero iirare were gojabeorapũ mera muare merogã bujawerecũ iiribu. Eropa iidigu árĩqueregu ta “Iri carta mera ñero iibu,” arĩbeaa. Iripure mua buhera puru bujawereyoro mua. Eropigu ne gojabeora puru ta “¿Ñero iiari yuhu?” arĩ pepiribu. Eropa arĩqueregu ta “Ñero iibu,” arĩbeaa dohpaguere. <sup>9</sup> Dohpague tamerare mucubiria yuhu. Mua bujawererare peegu mucubiribea. Mua bujawererã òaripure gohrotorapure peegu mucubiria yuhu. Mua ñero iirare bujawerecũ ìagu Goãmuru muare òarire gohrotocũ iidi arĩmi. Eropirã muare bujawerecũ iirã ñero ii goroweorã iibiribu gua muare. <sup>10</sup> Eropirã Goãmũ ìgu gamero dopa ta bujawererã, mari ñerire bujawere òaripure gohrotorãca. Eropa ta mari bujawerecũ ìagu mari peamegue wabonirãre taumi Goãmũ. Eropiro mari eropa bujawerecũ òha ãhraa marire. Cristore gamebirãre erã bujawerequererã erã ñerire duhubirã peamegue wamorã árĩnima. <sup>11</sup> Mupuru Goãmũ ìgu gamero dopa ta bujawereayoro. Mua eropa bujawererã òpa iirã waĩcuabu mua: Dohpaguere ñerire iirãre eropa ìacãbirã waĩcuabu mua. Ne iri ñerire gamebirigohracãyoro mua. Erã ñeri iira mera guayoro. Erãre ñerire iirire duhudorerã waĩcuabu mua. Eropirã erã ñerire guirã waĩcuabu mua erã iro dopa iiri arĩrã. Eropirã yure mahirã yure ìadiayoro mua. Eropirã ñeri iigure dipuwaja moayoro. Iri árĩpehrerire mua iira mera iri ñeri dipuwaja marirã mua árĩrãre ìhmuabu mua guare. <sup>12</sup> Iribojegue ñero iigure muare were gojabeoqueregu ta ìgure itamubu eropa arĩ gojabeobiribu yuhu. Ìgu ñero iidigu sãre itamubu eropa arĩ gojabeobiribu. Mupure itamubu iripure gojabeobu. Goãmũ ìgu ìhurore guare òaro umupeoa mua. Irire mua umupeorare mua òaro gunãboro

dopa iripũre gojabeobũ muare. <sup>13</sup> Eropirã Tito mua iira quere guare werecũ peerã burigã mucubiria gũa.

Tito sã mua mera turaro mucubiricũ ãha gũa sã mucubiribũ. Ìgũre mua ðaro mera bocatĩricũ peerã, mua mera ãgũ mucubirirare peerã, gũa sã ðaro mucubiribũ. <sup>14</sup> Negohraguere mua pohro ãgũ waboro corere mua mera yũ mucubirirare, ðarã mua árrare werebũ ãgũre. Eropirã yũ arĩdiro dopa ta ðaro iiayoro mua ãgũre. Eropigũ ãgũre yũ arĩrare guhyasĩribirabũ. Titore muare gũa werera diaye ta áribũ dohpaguere ãgũ ãadiro dopa ta. <sup>15</sup> Mua pohrogue ãgũ ejacũ umupeori mera bocatĩriayoro mua. Eropirã guhyadiaro mera ãarã tarinũgaro mariro mua yũhrirã áricũ ãapũ ãgũ. Eropigũ muare mahinemogu iimi ãgũ. <sup>16</sup> Dohpaguere ðaro yũhrirã Goãmũ ãgũ gamero dopa ta mua ðaro mua ipehorã áricũ ðaro masia yũhũ. Eropa masigũ burigã mucubiria.

## 8

### *Cristo yarã árrã gajirãre eropa ocãro gahmea marire, arĩ gojañumi Pablo*

<sup>1</sup> Gũa acawererã, ire muare masicũ gahmea gũa. Cristo yarã Macedonia yeba majarã Goãmũ mahiri mera ãgũ mojomoro ãari mera erã iirare muare weregũra. <sup>2</sup> Erã ñero tariquererã ta, niyeru moorã árriquererã ta mahiro mariro eropa ocãma gajirãre. Cristo mera turaro mucubirirã árrã, erã gajirãre ðaro mera erã oparire eropa ocãma. <sup>3</sup> Muare arĩgũ iiaa. Erã erã oparopẽ orã, tauñariro oma. Erã gamero oma erã. <sup>4</sup> Goãmũ yarãre mojomorocũrãre turaro itamudiarã, erãre erã obeorire aĩdorema guare. <sup>5</sup> “Ipẽ orãcoma erã,” arĩ gũa pepidiro tauro oma erã. Õpa iima erã: Negohraguere niyerure erã oboro core mari Opũ ãgũ gamerire iidiarã árituhama. Eropirã Goãmũ ãgũ gamero dopa ta gũa sãre umupeori mera yũhrinirã árima. Eropa iirã árrã erã niyeru sãre oma. <sup>6</sup> Erã eropa ocũ ãarã Titore guapũ ðpa arĩbũ: “Erãre mũ buhenũgadiro dopa ta Corinto majarã sãre erã mojomorocũrãre oburire wereque,” arĩbũ gũa ãgũre. Mua sã gajirãre mojomoro ãarã mua itamuboro dopa eropa arĩbũ ãgũre. <sup>7</sup> Eropirã muapũ árrĩpehrerire ðaro iirã árituhaa. Cristore diaye ta ðaro umupeoa mua. Eropirã ãgũ yare ðaro werea. Eropirã Goãmũ yare ðaro masia mua. Eropirã Goãmũ ãgũ gamero dopa ta turaro iidiaa. Eropirã guare mahia mua. Eropa ta ðaro iirã árituhaa mua. Mua eropa ðaro iirã árriquererã ta merogã duhyania mua ipehoburi. Mojomorocũrã tamerare mua mojomoro ãacũ gahmea gũa. Eropirã erãre mua ðaro mera wũaro ocũ gahmea gũa.

<sup>8</sup> Eropa arĩgũ muare doregohragũ iibea yũhũ. Eropa arĩ weregũ iiaa muare. Gajirã mojomorocũrãre erã turaro itamurare muare weregũ iiaa. ¿Mua diaye ta gajirãre mojomoro ãhari? arĩ masidiagũ iiaa. <sup>9</sup> Mari Opũ Jesucristopũ marire ãgũ mojomoro ãarare masia mua. Iri diaye ta ãhraa. ãgũ mũaroguere wũaro opagũ árriquererã ta i yebaguere arĩgũ mojomorocũro wapũ. Eropigũ mua ya arĩburire sĩrigũ sã mojomorocũro wapũ. Õpa ta wapũ muapũ mua wũaro opaboro dopa, ãgũ mera mua ðaro árrĩnguicãborore.

<sup>10</sup> Muare weregũ iiaa. Õpa pepia yũpũ: Yuju bojori wahaa mua mojomorocũrãre odiara pũhrũ. Muapũ mojomorocũrãre odiamũhtaribũ. Eropirã erãre omũhtabonirã áribũ mua. <sup>11</sup> Eropirã mua odiarare dohpaguere oho ojogorocũque. Mua odiamũhtadiro dopa ta dohpaguere ðaro opehoque. Eropirã pagari oparã árrã wũaro oque. Merogã oparã árrã merogã oque. <sup>12</sup> Burigã mua odiari mera irire mua orare Goãmũ mucubirigũcumĩ. Eropirã ðaro mua omasiropẽ oque. Mua oropẽ ta mucubirigũcumĩ. Mua opabirirare mua ocũ gamebeamĩ ãgũ.

<sup>13</sup> “Mojomorocũrãre oque,” arĩgũ erãre wũaro opadoregũ iibea. Eropigũ muapũre mojomorocũrã dujacũ iidiaa. <sup>14</sup> Muare yujuro mera opadoregũ eropa arĩgũ iiaa.

Dohpaguere mũapũ wũaro opaa. Eropa oparã gajinore moorãre omasia mũa. Pũhru mũare gajino moocũ erã sã mũare omasima. Mũa eropa game orã yujuropa oparãca árĩpehrerã Cristo yarã. <sup>15</sup> Eropa ta ãhraa Goãmũ yare erã gojarapũ: “Wũaro aĩgu sã gajigu tauro opabeami. Merogã aĩgu sãre ne merogã duhyabeaa,” arãa Goãmũ yare erã gojarapũ.

*Tito ĩgu mera majarã mera Corintogue wañumi*

<sup>16</sup> Eropi mũare yũ itamudiro dopa ta Tito sã mũare itamudiami. Goãmũpũ ĩgu itamudiacũ iimi ĩgũre. ĩgu eropa iicũ ĩagu “Õhaa,” arãa Goãmũre. <sup>17</sup> Titore gũa mũa pohrogue wadorecũ ĩgu ðaro mera yũhriami. Eropigu ĩgũre mũa pohrogue gũa wadoreboro coregue ta mũa pohroguere “Wagũra,” arĩ guñatuhadi ãhrami ĩgu.

<sup>18</sup> ĩgu gajigu Jesu yagu mera wapimoa obeobũ gũa. Tito mera majagu árĩpehrerã gajirã Jesu yarã erã umupeogu ãhrimi. Õari buherire ðaro ĩgu mohmegũ árĩcũ ĩarã ĩgũre ðaro umupeoma. <sup>19</sup> Eropirã Jesu yarã ĩgũre ta gahmeama gũa mera curibure. Iri niyerure mojomorocũrã pohrogue gũa aĩcũ gũa mera curibure gahmeama ĩgũre. Iri niyerure mũa gameneorare gũa mojomorocũrãre orã wacũ ĩarã mojomorocũrãpũ “Marire mari Opũ itamugũ iimi,” arĩrãcoma. Gũa eropa ocũ, erãre bũrigã mari itamudiarare masirãcoma. <sup>20</sup> Eropirã i niyerure wũaro Jesu yarã erã odorere gũa aĩrã ðaro ĩhadiburãca erã orare gũare weresãri arĩrã. <sup>21</sup> Mari Opũ ĩgu ĩhabeoro diaye ðaro iidiaa gũa. Eropirã masa erã ĩhuro sãre ðaro iidiaa.

<sup>22</sup> Eropa iimorã gajigũre mari acaweregũre obeorãca Tito sã mera. Gũa ĩgu mera obeogũre bajasuburi gajirãre ĩgu ðaro itamucũ ĩabũ gũa. Eropigu dohpaguere mũapũ gajirãre mũa itamudiacũ ĩagu ero core ĩgu iidiro tauro ðaro mũare itamudiami. <sup>23</sup> Tito sãre mũare weregũra. ĩgu yũ mera majagu ãhrimi. Mũare yũ itamucũ ĩgu yũ mera mohmegũ ãhrimi. Gajirã ĩgu mera wamorã Jesu yarã erã beyenirã erã obeorã ãhriima. Erã Cristo yare iima gajirã Cristore erã umupeoboro dopa. <sup>24</sup> Erã eropa arĩrãre mahiri mera ðaro erãre bocatĩrique mũa. Mũa eropa iicũ ĩarã gajirã Jesu yarãpũ ðarã mũa arĩricũre masirãcoma. Mari obeonirãre “Õaro mera bocatĩrirãcoma Corinto majarã,” arĩ weretuhabũ gũa mera majarãre. Mũa eropa ðaro bocatĩricũ ĩarã gũa werera diaye árĩcũ ĩha masirãcoma gajirã Jesu yarã.

## 9

*Jesu yarãre mojomorocũrãre erã oburire wereñumi Pablo*

<sup>1</sup> Eropirã Goãmũ yarãre mũa itamuborore mũa oburire masituhaa mũa. <sup>2</sup> Gajirãre mũa itamudiarire masia yũ sã. Eropa masigu Macedonia majarãre ðpa arĩ werebũ: “Corinto majarã Jesu yarãpũ gajirãre itamudiatuhama. Yuju bojori taria erã itamudiadiro,” arĩ weretuhabũ erãre mũare. Mũa eropa itamudiacũ peerã bajarã erã sã mojomorocũrãre itamudiana. <sup>3</sup> Mũa mojomorocũrãre oborare gajirãre werequeregu “Iri niyerure gameneobiribocoma yũ ejaboro core,” arĩ pepia mũare. Eropigu dohpaguere oãre mari acawererãre mũa pohrogue obeomũhtagũ iiaa. Mojomorocũrãre mũa oburire gameneo mũa opayuboro dopa oãre obeomũhtagũ iiaa. <sup>4</sup> Erãre obeobigu Macedonia yeba majarã mera mũa pohrogue yũ ejagu, mũa oburire mũa opabiricũ ĩagu guhyasĩrisãboya yũhũ mũare. “Mojomorocũrãre orãcoma,” yũhũ mũare arĩra pũhru mũa obiricũ ĩagu guhyasĩrisãboya yũhũ mũare. Mũa sã guhyasĩriboya. <sup>5</sup> Eropigu mũa pohrogue yũ ejaboro core erãre mari acawererãre obeomũhtagũ iiaa. “Mojomorocũrãre wũaro orãca,” mũa arĩrare mũa opayuboro dopa erãre obeomũhtagũ iiaa. Mũa oburire mũa gameneocũ erãpũ mũare weresererãcoma. Eropigu yũpũ eja mũa oburire mũa opayutuhacũ ĩha mucubiriri mera mũa odiarare masigura. Mũare gũa odorera arĩsome iri.

<sup>6</sup> Eropirã ire guñaque mua: Bajameyerigã otedigu bajamegã ducare aigucumi. Bajayeri otedigu baja ducã Eropigu mua pohrogue yu ejaboro core erãre mari acawererãre obeomhtagu iiaa. “Mojomorocurãre wuaro orre aigucumi. Eropa ta ahraa mojomorocurãre mari ocũ. Merogã mari ocũ, Goãmũ merogã ogucumi marire. Wuaro mari ocũ wuaro marire ogucumi. <sup>7</sup> Eropirã yujurãyeri mua “Ipẽ ogura,” arĩ oque. Mahiñari obiricãque. “Marire odoreama,” arĩro mariro oque. Mucubiriri mera orãre gahmemi Goãmũ. <sup>8</sup> Igupũ mua gameri tauro mware ogucumi. Eropirã arĩpehrerire mua gameri duhyarire opapehorãca. Eropirã gajirãre mua oburi sã õaro sihajaroca mua opari. <sup>9</sup> Eropa ta ahraa Goãmũ yare erã gojarapũ:

Mojomorocurãre wuaro ohomi igũ. Õaro mera masare itamuniguimi igũ, ahraa igũ yare erã gojarapũ.

<sup>10</sup> Eropiro oteri ducacura puhru oteri masu igũ oteburi coyere ohomi Goãmũ. Puhru igũ oterare ducacucũ iimi igũ baburire. Mojomorocurãre mua wuaro ocũ oteri masure igũ coyere oro dopa ta mua sãre wuaro ogucumi Goãmũ. Eropa ta mware ogucumi mojomorocurãre mua onemoboro dopa. <sup>11</sup> Eropa ta ahraa. Wuaro ogucumi gajirãre wuaro mua eropa oniguicãboro dopa. Eropirã mua iri niyerure odorerare gua ocũ erã ñearãpũ mucubiriri mera Goãmũre “Õhaa,” arĩrãcoma. <sup>12</sup> Eropirã mojomorocurãre Goãmũ yarãre orã, erãre itamurã iiaa mua. I dihtare iibeaã mua. I sãre iirã iiaa mua. Mua eropa orã bajarã masa Goãmũre mucubiriri mera “Õhaa,” arĩcũ iirãca mua. <sup>13</sup> Eropa mua gajirãre itamucũ iarã, Goãmũre umupeori mera wereniguirãcoma masa. Eropirã erãre gajirã sãre wuaro mua ocũ iarã Goãmũre “Õatariagu ahrimi,” arĩrãcoma masa. Eropa arĩrãcoma Cristo ya buherire õari buherire mua õaro yuhricũ iarã. <sup>14</sup> Eropirã Goãmũ igũ mojomoro iadiro dopa ta mua sã erãre mojomoro iacũ erãpũ mware gamerãcoma. Eropa gamerã mware serẽbasarãcoma Goãmũre. <sup>15</sup> Goãmũ marire õatariaro iigucumi. Igũ eropa iiborore masirã “Õataria,” arãa mari igũre.

## 10

### *Jesu igũ apidigu igũ arĩrĩre wereñumi Pablo*

<sup>1</sup> Dohpaguere yuhũ Pablo mware weregura. Cristopũ ne guabigu, masare õaro iigu arĩñumi. Igũ iidiro dopa ta yu sã mware werediaa õari mera. Yujurãyeri mua mera majarã õpa arãyoro yure. “Mari mera arĩgu eropa pepicãgu bu arĩgu iro dopa arĩmi Pablo. Eropa arĩqueregu ta gajipugue arĩgu marire doyarõ mariro turibeomi,” arãyoro mua yujurãyeri yure. <sup>2</sup> Eropigu mware ire burigã dorea: Mua pohrogue yu ejacũ õaro iique mua, “¿Pablo guare turiri?” arĩrã. Yujurãyeri yure õpa arãyoro: “Igũ, igũ gamero, Goãmũ dorebiriqrecũ iimi,” arãyoro mua yure yujurãyeri. Eropa arĩrã tamerare turiboca yuhũ. <sup>3</sup> Gua sã i yeba majarã ta arĩrã iiaa. Eropa arĩquererã ta i yeba majarã erã gamero iiro dopa ta iibeaã gua. <sup>4</sup> Surara erã tarinũgaro dopa ta guapũ ñerire tarinũgadiaa. Surara erã mojo oparo dopa ta gua sã mojo opaa. Gua mojo i yeba majarã erã masiri, erã wereniguitarinũgari, erã turari arĩbeaa. Gua mojo Goãmũ ya turaripũ ahraa. Iri turari mera masa Goãmũre erã umupeodorebirirare duhucũ iiaa gua. Eropirã erã gamero erã masirire iri duhpiburi arĩbiricũ masicũ iiaa gua iri turari mera. <sup>5</sup> Eropirã arĩpehrerã erã gamero pepirare Goãmũre erã masidorebirirare duhucũ iiaa gua. Eropirã iri turari mera Goãmũre gamebirãre Cristore õaro yuhrirã erã arĩcũ iiaa gua. Cristo igũ gamero dopa ta erãre pepicũ iiaa gua. <sup>6</sup> Eropirã gajirã mua mera majarã Cristore tarinũgacũ iarã erãre dipuwaja moamorã arĩrãca gua. Mua õaro yuhhira puhru Cristore tarinũgarãpũre eropa dipuwaja moamorã arĩrãca gua.



<sup>7</sup> Yũ árĩricũri dihtare masia mũa. Yũ pepiripũre ne masibea mũa. “Cristo yarã ãhraa,” arĩrã árĩrã õpa masique mũa: Gũa sã mũa iro dopa ta Cristo yarã ta ãhraa. <sup>8</sup> “Mari Opũ ya buherire õari buherire buhedoregũ apimi gũare,” arĩgũ bajasuburi mũare iri dihtare eropa arĩ werequeregũ ta gũhyasĩribeaa yũhũ. Gũare eropa buhedoregũ mũare itamumorãre apimi gũare. Mũare goroweomorãre apigũ iibirimi gũare. <sup>9</sup> I yũ gojabeoripũre mũa ãha Ʃcacũ gamebeaa yũhũ. <sup>10</sup> Yujurãyeri mũa mera majarã õpa arãyoro: “Pablo gojabeogũ pũriro dihta gojabeomi marire. Eropã árĩqueregũ ta mari mera arĩgũ eropa árĩcãgũ ãhrimi. Bu arĩgũ iro dopa ãhrimi. Eropiro ãgũ marire wereniguiri duhpiburi árĩbeaa,” arãyoro mũa yujurãyeri. <sup>11</sup> Eropã arĩrãre õpa arĩ weregũra: Mũa arĩdiro dopa ta iibeaa gũa. Mũare gũa arĩ gojabeodiro dopa ta eropa ta arĩ wererãca mũa pohro árĩrã. Eropirã “Õpa iirãca,” gũa arĩ gojabeodiro dopa ta eropa ta iirãca mũa pohro árĩrã sã.

<sup>12</sup> Yujurãyeri mũa mera majarã “Õaro masipehorã ãhraa gũa,” arĩ werenigu-imaacãma erã basi. Erã game ãha bocatĩrirã “Maripũ õatariarã ãhraa,” arĩma erã. Eropã arĩmaacãrã “¿Gajirã õarã iro dopa ãhriri mari?” arĩbeama erã basi. Gũapũ erã iro dopa iisome. <sup>13</sup> Goãmũ gũare ãgũ buhedore ãgũ apira dihtare werea gũapũ mũare. Gajirã erã mohmerare “Iibũ gũapũ,” arĩrã iibeaa. Goãmũ mũa sãre buhedoregũ gũare apimi. <sup>14</sup> Eroparĩrã gũyarã iibeaa gũa. Õari buherire Cristo yare mũare buhemũhtarã ta ejabũ gũa. Eropirã Goãmũ gũare buhedore ãgũ apira dihtare wererã iiaa mũare. <sup>15</sup> Eropirã gajirã mũare itamucũ ãha “Gũapũ irire iibũ,” ne arĩbeaa gũa. Cristore mũa umupeonemocũ iiburipũre gahmea gũa. Eropã gamerã mũare buhenemodiaa gũa. Eropã gũa buherã Goãmũ ãgũ apirañe pẽta buhediaa gũa mũare. <sup>16</sup> Eropã buhediaa mũa ya yeba core majarãre õari buherire peebirãre õari buherire wererã waboro dopa. Eropã warã gajirã erã buherã pũhrũ ejarã, “Gũapũ erãre buhemũhtabũ,” arĩsome gũa.

<sup>17</sup> Goãmũ yare gojarapũgue õpa ãhraa: “Mari iirire ãarã mucubiribiricãro gahmea. Mari Opũ ãgũ iiripũre ãarã mucubiriro gahmea. Iripũre gajirãre werero gahmea,” arĩ gojara ãhraa. <sup>18</sup> Masa erã basi “Gũapũ iiabũ,” erã arĩcũ ãha mucubiribeami Goãmũ. Mari Opũ Cristo Goãmũre “Oã õaro iima,” ãgũ arĩrãpũre sũami Goãmũ.

## 11

*“Jesu ãgũ apinirã ãhraa gũa,” arĩ gũyarãre wereñumi Pablo*

<sup>1</sup> Yũ basi yũ árĩricũrĩre weregũ pee masibigũ iro dopa weregũ iiaa, arĩ pepia. Yũ árĩricũrĩre mũare weregũ gũhyasĩriñaria. Yũ eropa arĩ werecũ peenique mũa yãre dohpaguere. <sup>2</sup> Goãmũ mũare ãgũ mahiro dopa ta turaro mahia yũ sã mũare. Nõmeo gajigũ Ʃmũ mera igo ñero iibigo igo yujugũre ta gamedigo iro dopa mũa Cristo dihtare gamecũ gamerabũ yũhũ mũare. <sup>3</sup> Eropã gamequeregũ “Erã Cristo yare cóãbocoma,” arĩ guñaricua mũare. Gajirã ñerã mũare gũyarã, gajiroppã arĩri buherire gamecũ iibocoma mũare. Pĩru ãgũ masiri mera Evare gũyacũ igo Goãmũre tarinũgañumo iribojegũre. ãgũ eropa iidiro dopa ta dohpaguere ñerã mũare gũyarã, Cristore mũa õaro umupeorire goroweobocoma. Eropigũ mũare gũisãa. <sup>4</sup> Erã gũa mũare buhediro dopa ta buhebiriquerecũ mũa peeraa. Eropirã erã “Õpa arĩdi arĩmi Jesu,” erã gamero gajiroppã arĩ werequerecũ ta peea mũa. Watĩ ãgũ pepiro dopa arĩ erã werequerecũ ta peea mũa. Mũare gũa weregũ Espĩritu Santo gohra ãhrimi. ãgũpũre erã werebiriquerecũ ta mũare gũya buherãre peea mũa. Erã gajiroppã arĩri buherire erã buhecũ õari buherire erã buhebiriquerecũ ta irire peea mũa. <sup>5</sup> Erã “Jesu ãgũ apinirã ãhraa,” arĩnirã yãre masitarinũgabeama. “Erãre doca merebeaa,” arĩ pepia yũhũ. <sup>6</sup> Õaro weretarinũgagũ árĩbiriboca yũhũ. Õaro weretarinũgabiriqueregũ Goãmũ yare õaro masia. Yũ eropa masirire bajasuburi mũare masicũ iibũ.

<sup>7</sup> Ōari buherire Goām̄ yare m̄are buheḡu ne waja gamebirib̄u. M̄are itamudiagu waja gamebirib̄u. Bu ár̄iḡu iro dopa ár̄ib̄u ȳuh̄u. ¿Ȳu eropa waja gamebirc̄ũ òabeari m̄aa pepic̄ũ? <sup>8</sup> M̄are ȳu buhec̄ũ gaj̄i macari majar̄ã Jesu yar̄ã ȳure itamuma. Er̄ã eropa orare ñeab̄u m̄are itamubu. M̄aa ȳure oborare er̄ãp̄u ȳure oma. <sup>9</sup> M̄aa mera ár̄iḡu gaj̄ino ȳure ðuhyaquerec̄ũ ta m̄are niyerure ne serēbirib̄u. Mari acawerer̄ã Macedonia yeba majar̄ã Jesu yar̄ã ár̄ipehrer̄ã ȳu gamerare aĩ erama ȳure. Iribojeguere m̄are ne garibobirib̄u ȳuh̄u. P̄uhr̄ugue s̄ãre m̄are ne garibosome. <sup>10</sup> Cristo diaye ïḡu werediro dopa ta ȳu s̄ã m̄are dohpaguere diaye wereḡu iiaa. Ár̄ipehrero Acaya yeba ár̄ir̄ãre i m̄are ȳu serēbirirare eropa wereniguiḡura. <sup>11</sup> ¿M̄are ȳu serēbirirare gajir̄ãre ȳu eropa wereniguic̄ũ peer̄ã dohpa pepiri m̄aa? “Pablo ḡuare eropa ar̄i wereḡu ḡuare umupeobiḡu iimi,” ¿ar̄i pepiri m̄aa? Ár̄ibeaa. M̄are umupeoa. Goām̄u irire masimi.

<sup>12</sup> Waja mariro ȳu m̄are buhenugadiro dopa ta buhe ojogorocuḡura. “Jesu ïḡu apinir̄ã ãhraa,” ar̄i ḡuyanir̄ãre ȳure tarinugac̄ũ iibiriboro dopa waja mariro buheniguiḡura. Er̄ãp̄u “Ḡua s̄ã Pablo iro dopa Jesu yare buher̄ã ãhraa,” ar̄ima. Eropa ár̄ibeama. Ȳup̄u waja mariro buhea. Er̄ãp̄u waja gamer̄ã buhema. <sup>13</sup> Er̄ã diaye ta Jesu ïḡu apinir̄ã gohra ár̄ibeama. Er̄ãre ne apibiriñumi ïḡu. “Jesu ïḡu apinir̄ã ãhraa,” ar̄i ḡuyar̄ã ḡua iro dopa ár̄ir̄ima er̄ã. <sup>14</sup> Er̄ã eropa iic̄ũ ïaḡu ïhamariabeaa ȳuh̄u. Satana s̄ã anyu Goām̄u yaḡu òaḡu iro dopa dehyoacumi masare. <sup>15</sup> Eropiḡu er̄ã Satanare itamur̄ã òar̄ã Goām̄ure itamur̄ã iro dopa er̄ã iic̄ũ ïaḡu, ïhamaria wabeaa ȳuh̄u. Dohpaguere er̄ã eropa iiquerec̄ũ ta pehrerin̄u ár̄ic̄ũ ár̄ipehreri er̄ã ñero iira dipuwaja dipuwaja moagucumi Goām̄u er̄ãre.

### *Ïgu ñero tarirare wereñumi Pablo*

<sup>16</sup> Dipaturi m̄are ire wereḡura. Ne “Pee masibiḡu ãhrimi,” ȳure ar̄ibiric̄ãque. Ȳu eropa ar̄idorebiriquerec̄ũ ta ȳure m̄aa eropa ar̄i pepic̄ũ òaroca ȳure. “Pee masibiḡu ãhrimi,” ar̄i ȳure pepiquerer̄ã ta peenique m̄aa ȳure. Meroḡã ȳu ár̄ir̄ic̄ur̄ire ȳu basi werec̄ũ peenique m̄aa. <sup>17</sup> M̄are eropa wereḡu ḡuhyas̄iriñaria ȳuh̄u. Pee masibiḡu iro dopa iiḡu iiaa, ar̄i pepia. Mari Op̄u Jesu ȳure irire “Eropa wereque,” ar̄ibirimi. <sup>18</sup> Ïḡu eropa ar̄ibiriquerec̄ũ ta ire wereḡura m̄are. Er̄ã gamero “Ōar̄ã ãhraa,” ar̄imaac̄ãr̄ã er̄ã ár̄ic̄ũ ïaḡu ȳu s̄ã ȳu ár̄ir̄ic̄ur̄ire m̄are wereḡura. <sup>19</sup> M̄ap̄u eropa ar̄imaac̄ãr̄ãre peer̄ã mucubiriri mera ïhaa m̄aa er̄ãre. ¿Ōaro masir̄ã ãhriri m̄ap̄u eropa peer̄ã? <sup>20</sup> M̄are er̄ã pohro majar̄ã moac̄ũ, m̄aa yare er̄ã emac̄ũ eropa ïac̄ãa m̄aa. Eropir̄ã m̄are er̄ã docapic̄ũ m̄aa wayupor̄ãre er̄ã pac̄ũ eropa pepic̄ãa m̄aa. <sup>21</sup> ¿Ōap̄ur̄ic̄ãri m̄are er̄ã eropiic̄ũ? Cue, ¿turatar̄iar̄ã ãhriri er̄ã? Ḡup̄u er̄ã iro dopa turar̄ã ár̄ibeaa. Eropir̄ã er̄ã iro dopa ñerire iibea.

Er̄ã iro dopa ar̄ibiriquereḡu ta er̄ã “Ōpa ár̄ir̄ã ãhraa,” er̄ã ar̄ic̄ũ peeḡu ȳu s̄ã eropa ar̄i wereboca. Dipaturi ḡuhyas̄iriquereḡu ta òpa ar̄iḡura m̄are. <sup>22</sup> Er̄ã “Hebreo masa ãhraa,” ar̄ima gajir̄ãre tarinugadiar̄ã. Hebreo mas̄u ta ãhraa ȳu s̄ã. “Israe masa mari Paḡu ïḡu beyenir̄ã ãhraa,” ar̄ima daja er̄ã. Er̄ã iro dopa ta ïḡu beyediḡu ta ãhraa ȳu s̄ã. “Abrah̄ã p̄ãramer̄ã ãhraa,” ar̄ima daja er̄ã gajir̄ãre tarinugadiar̄ã. Er̄ã iro dopa ta Abrah̄ã p̄ãrami ta ãhraa ȳu s̄ã. <sup>23</sup> “Cristo yare itamur̄ã ãhraa,” ar̄ima daja er̄ã. Ȳu s̄ã Cristo yare itamuḡu ta ãhraa. Er̄ã tauro Cristo yare òaro iiaa ȳuh̄u. Eropa ȳu basi ar̄i wereniguiḡu ḡuhyas̄iriñaria ȳuh̄u. Pee masibiḡu iro dopa wereniguiḡu iiaa, ar̄i pepia ȳu basi. Er̄ã tauro mohmeb̄u ȳuh̄u Cristo yare iiḡu. Bajasuburi er̄ã tauro Cristo yaḡu ȳu ár̄iri dipuwaja peresu iima ȳure gajir̄ã. Er̄ã tauro bajasuburi t̄ãrama masa ȳure. Er̄ã tauro Cristo yare ȳu iira dipuwaja masa ȳure wejēdiar̄ima. Eropiḡu meroḡã mera tarib̄u ȳu s̄ir̄ibodirore. <sup>24</sup> Cinco suburi judio masa ȳure ñeama. Ȳure er̄ã ñeari n̄ac̄u suburi treinta y nueve suburi ȳure t̄ãrama. <sup>25</sup> Ëhresubu gajir̄ã ȳure ñeama.

Eropa ñearã erã tamera yũre ñero yucũgu mera pama. Gajisubu yũre gajirã utã mera deama. Æhresubu dohodiru mera utãyegue mehtuhaja miribũ. Eropigũ yujunũ, yuju ñami taboamiji wecague wũariya decoguere baa payabũ. <sup>26</sup> Bajasuburi macariguere buhe curigũ ejabũ. Yũ eropa buhe curicũ guhyatariacãbũ yũre. Yũre mirimaja guhya áribũ. Yũre yajamaja guhya árima. Yaha yeba majarã judio masa, judio masa áribirã sã yũre ñero iimaja guhya árima. Macarigue, masa marirogue, wũariyague sãre yũre sirimaja guhya áribũ. “Mũ mera majarã ãhraa,” arĩ guyarã sã yũre ñero iimaja guhya árima. <sup>27</sup> Cristo yare iibu bũrigã mohmebũ. Eropa mohmegũ ñero wabũ. Bajasuburi wũja yũre ñero pũriquerẽcũ ta eropa mohmeniguicãmũribũ. Ñero oaboamũribũ. Eropiro yũre ñemesibumũribũ. Bajasuburi barire bocabirimũribũ. Yũhu yũsaro sãre pepimũribũ. Suhri sañaburi sã ne marimũribũ yũre.

<sup>28</sup> Eropa ñero tarigũ ta umũri nũcũ gajirã Cristo yarãre, mũa sãre bũrigã guñaã. <sup>29</sup> Eropigũ Cristo yagũ ãgu turabiricũ ãagũ bũjawerea yũhu. Gajirã Cristo yagure ñero iidorebocoma. Erã eropa iicũ ãagũ Cristo yagure guhyasirisãgu, erã ñero iidorerã mera guaa yũhu. <sup>30</sup> Werediabiriqueregu ta yũ áricũre weregu, yũhu turabigu yũ áricũre mũa masiboro dopa mũare weregũra. <sup>31</sup> Goãmũ mari Opũ Jesu Pagũ umũri nũcũ mari umupeobu ãgu ta mũare yũ guyabiricũ masimi. Ire mũare diaye weregũra. <sup>32</sup> Damasco waicũri macague yũhu Jesucristo yare buhecũ ãagũ áripheerã masa tauro opũ Areta waicũgu ãgu doca árigũ opũ yũre ñeadiaripũ. Eropa ñeadiaqu iri maca maja sãriro disiporori nũcũ surarare coredoreripũ. <sup>33</sup> Erã eropa corero watope ta yũ mera majarã wũari puibugue yũre duhusã iri sãriro pũrũpũgue yuju gobegue yũre duhu dijuma. Erã eropa duhu dijura pũhrũ duhrigã wabũ.

## 12

### *Cristo ãgure ãhmurare wereñumi Pablo*

<sup>1</sup> Yũ áricũre mucubiriri mera yũ werecũ duhpiburi áribëaa. Duhpiburi áribiriquerecũ ta werenemogũra mũare. Mari Opũ Jesu ãgu yũre ãhmurare ãgu yũre masicũ iirare weregũra mũare. <sup>2</sup> Õpa ãhmunũgami ãgu yũre: Catorce bojori gohra wahaa yũre Cristo yagure umarogue ãgu aĩ mũriara pũhrũ. Æmarogue necã wecague yũre aĩ mũriami. Yũ sãporã dihtare ãgu aĩgãcũ masibëaa yũhu. O yũ dũpũ sãre ãgu aĩgãcũ sãre ne masibëaa yũhu. Goãmũ dihta irire masimi. <sup>3-4</sup> Eropigũ paraíso waicũrogue yũre aĩ mũrijami. Irire masia yũhu. Yũ sãporã dihtare ãgu aĩgãcũ masibëaa yũhu. O yũ dũpũ sãre ãgu aĩgãcũ masibirica. Goãmũ dihta irire masimi. ãgu eropa aĩ mũriacũ e jagũ eroguere ãgu wererire peebũ. Iri yũ peerare masa ne masibëama. Iri wererire gajirãre weredorebirimi yũre. <sup>5</sup> Eroguere ãgu yũre eropa wererare mũare weregu, “Yũhu yujugũ ta gajirãre tarinũgagũ ãhraa,” arĩboya yũhu. Eropigũ irire werebëaa yũhu. Yũ masibirira dihtare yũ turabirira dihtare mucubirigũ mũare weregũra. <sup>6</sup> “Gajirãre tarinũgaa yũhu,” mũare arĩ werediãcũ yũ arĩra diaye áriboca. Eropigũ eropa arĩ weregu eropa arĩmaacãbiriboya yũhu. Eropa áribiriqueregu ta “Õpa gajirãre tarinũgaa,” arĩ weresome yũhu mũare, guhyadiaro yũre ãhari arĩgu. Yũ arĩro tauro mũa yũre umupeocũ gamebëaa.

<sup>7</sup> Cristo õatariarire umaroguere ãgu yũre ãhmucũ ãadigũ arĩgu, “Gajirãre tarinũgaa yũhu,” arĩboca yũpũ. Eropa yũ arĩbiriboro dopa Satana ãgu yũre dore moacũ ãagũ “Õaroca,” arĩ apidi árimi Goãmũ. Eropigũ yũ ñero tariboro dopa yũre dore moadi árimi Satana. Iri dore poraru ñajaro dopa ta yũre pũribũ. <sup>8</sup> Iri dore yũre taridoregu serẽmũribũ mari Opũre. Æhresubu serẽribũ. <sup>9</sup> Yũ eropa serẽquerecũ ta i dore tamerare yũre taricũ iibirimi ãgu. Õpa arĩ yũre yũhrimũrimi ãgu: “Mũre mahia. Yũ mahiri mera õaro arĩgũca mũhu. Pũriniguicãsũgu, turabigu arĩgu yũ turarire õaro ãhmũgũca mũhu. Turarã tauro mũhu yũ turarire masare masicũ

iiguca,” arĩ yuħrimurimi Goãmu yure. Īgu eroparĩcũ peegu turabigu yu árĩrare masigu mucubiria. Eropigu yu turabirare masare mucubiriri mera weregura. Eropa arĩ wereguca Cristo ĩgu turaripare yuħu gajirãre ðaro masicũ iiboro dopa. <sup>10</sup> Eropigu Cristo yagu yu árĩri dipuwaja yure pũriro árĩquerecũ ta, gajirã ñero yure wereniguiquerecũ ta, ñetariaro tariqueregu ta, yure erã ñero erã iiniguiquerecũ ta, yure bujawerecũ erã iiquerecũ ta mucubiria yuħu. Eropa ñero tariqueregu ta, eropa turabigu árĩqueregu ta Cristo turari mera bocatĩua ĩgure guñaturagu. Eropigu mucubiria.

*Corinto majarãre Cristo yarãre wuaro guñaricũñumi Pablo*

<sup>11</sup> Yu árĩricurire yu basi weregu guhyasĩriñaria yuħu. Pee masibigu iro dopa weregu iiaa, arĩ pepia yuħu. Yu eropa werequerecũ ta iri mua ya dipuwaja ãhraa. Muapũ yu árĩricurire gajirãre ðaro werecũ yu basi werebiriboaya. Yuħu bu árĩgu árĩqueregu ta “Jesu ĩgu apinirã ãhraa,” arĩ guyarãre doca merebeaa yuħu. <sup>12</sup> Diaye ta ñero tarigu árĩqueregu muare Goãmu turari mera deyro moarire ii ĩhmuribu. Eropa ii ĩhmuqu Cristo ĩgu apidigu yu árĩrire ĩhmuqu iiribu muare. <sup>13</sup> Gaji macari majarãre Jesu yarãre mua sãre yujuro mera ĩhmuribu yuħu. Muapure gajiropa ñari iiribu. Mua dihtare garibobiribu. Mua dihtare gajinore yaha árĩburire serẽbiribu. ¿Yuħu muare itamurire serẽbiricũ ñehe árĩri muare? Iri ñeri árĩcũ irire cãdijique mua yure.

<sup>14</sup> Ire peeque mua. Pesubu mua pohrogue yu ejara puħru dipaturi wadiaa daja. Erogue ejagu muare garibosome yuħu. Gajinore serẽsome yuħu muare. Mua yare gamebeaa yuħu. Cristo yapure mua yuħrirã árĩcũ gahmea yuħu. Masa porãpu erã pagu sumarãre erã gamerire obeama. Erã pagu sumarãpu erã porã gamerire ohoma. Eropa ta mua yu porã iro dopa árĩrã yu gameripure osome mua. <sup>15</sup> Eropigu yu tamera yu oparipure odiaa muare itamubu. Mua pohro majagu iro dopa árĩdiaa muare itamubu. Muare yu turaro mahiquerecũ ta muapũ yure daberogã mahia yu pepicũ.

<sup>16</sup> Eropigu mua mera árĩgu muare garibobiribu. ¿Eropa ta iiari yuħu mua pepicũ? Eropa iiquerecũ ta yujurãyeri mua mera majarã ðpa arĩrãcoma: “Pablo gajinore marire aĩdiagũ guyami,” arĩrãcoma. <sup>17</sup> ¿Erã arĩro dopa ta iigu árĩgu dohpa irire iiboyuri yuħu? ¿Mua pohrogue yu obeonirã ñehenore yure guyabasayuri erã muare mua ĩacũ? <sup>18</sup> Sohõ arĩrasubugue Titore mua pohrogue wadoretuhabu ĩgure. Eropigu gajigure Jesu yagure ĩgu mera obeobu. ¿Tito muare gajinore guya aĩri mua ĩacũ? Īgu yu iro dopa ta Goãmu ĩgu gameri dihtare iigu ãhrimi. ¿Eropigu yu iro dopa ta iibiriri ĩgu mua ĩacũ?

<sup>19</sup> ¿Ipũ mera guã basi arĩ cãhmotarã iiri guã mua pepicũ? Árĩbeaa. Cristo yarã ãhraa. Eropirã Goãmu ĩgu ĩhuro muare wererã iiaa. Yu acawererã, yu mahirã, muapure eropa arĩ werea muare itamudiarã. <sup>20</sup> Yu erogue ejacũ yu gamero dopa iirã árĩbiriboca mua. Eropigu muare turaro guñaricua. Eropigu mua gamero dopa iigu árĩbiriboca yu sã erogue ejagu. Gajiropa mua iicũ ĩagu wereguca muare. Erogue yu ejacũ muapũ mua basi game duyatorã, gajino erã opacũ ĩarã ĩhaturirã, mata guarã, mua gamero gajirãre tarinugadiarã, gajirãre ñero wereniguirã, ñeri quere moarã, “Guã tamera gajirãre tarinugaa,” arĩrã, mua gamenererore goroweorã árĩboca mua. Mua eropa iicũ bocaboca arĩgu, guñaricua yuħu muare. <sup>21</sup> Erogue yu ejacũ muare yure guhyasĩrisãcũ iibocumi Goãmu yure. Eropigu árĩpehrerã iribojegue ñero iinirãre erã ñerire bujawerebiricũ ĩagu turaro bujawereguca yuħu. Nome mera ñero iirãre, ñerire uaribejarãre ĩagu bujawereguca yuħu.

## 13

*Pablo weretuñumi*



<sup>1</sup> Dohpaguere mua pohrogue wagu uhresubu ejaguca eroguerere. Pesubu ero coreguere ejatuhabu. Eropigu muare ire weregura. Ōpa ahraa Goamu yare erā gojarapū: “Yujugure mari dipuwaja moaboro core perā, urerā igure weresāro gahmea. Erā eropa weresāra pūhrū dipuwaja moamasia mari,” ahraa Goamu yare erā gojarapū. <sup>2</sup> Iribojeguere ñero iirā mua árĩcũ muare árĩpehrerā gajirā ñero iirā säre dipaturi gahyadiaro mera weregura. Yujusubu ejadi mua pohro dipaturi ejagu muare ire werebu. Dohpaguere mua mera árĩbigu dipaturi muare ire werebeogu iiaa daja: Dohpaguere mua pohrogue erejagu, ñero iirāre diaye ta dipuwaja moagura yuhu. <sup>3</sup> Yu eropa iicũ iarā, Cristo igu apidigu igu turari mera yu buhecũ masirāca masidiarā. Cristopu muare doregu turatariagu ahrimi. Eropigu igu turarire ihmumi muare. <sup>4</sup> Mari iro dopa dūpucugu, igu turabigu árĩgu, crusague sīripu. Eropā sīriquereru ta Goamu igu turari mera ojocarimi igu dohpaguere. Gua sã igu iidiro dopa ta turabirā ahraa. Eropā turabirā árĩquererā Cristo mera ojocarirā Goamu ya turari mera árĩrāca muare itamumorā.

<sup>5</sup> Eropi mupū mua basi ōpa arĩ pepique. “¿Diaye ta Cristore umupeogu ahriiri yuhu?” arĩ pepique mua. Diaye ta Cristo mua mera majagu igu árĩbiricũ igu yarā gohra árĩbeaa mua. <sup>6</sup> ¿Mua guapure “Jesu yarā igu apinirā árĩbeama,” arĩ pepiri? Igu yarā gohra ahraa gua. Irire mua masicũ gahmea yuhu. <sup>7</sup> Eropigu mua ñero iibiriboro dopa Goamure serēbasaa muare. Eropā serēbasaa gua mua ōarire mua iiboro dopa. Mua Goamu itamuri mera eropa ōarire iicũ iarā ōpa arĩboca: “Guapū erāre ōarā wacũ iibu,” arĩboca gua gajirāre guare umupeocũ iimorā. Eropā arĩ umupeodorebeaa gua. Iri duhpiburi árĩbeaa. Eropirā muare eropa Goamure serēbasarā mua ya árĩburire serēbasarā iiaa. Ōarire mua iicũ tamerare gahmea gua. <sup>8</sup> Eropā dihta gahmea gua. Goamu ya diaye árĩrire goroweomasibeaa gua. <sup>9</sup> Eropirā mua ōarire iicũ gamerā turabirā iro dopa árĩquererā gua mucubiria. Ōarire iirāpū mupū turarā árĩcũ ōhaa. Eropirā mua ōarā waborore Goamure serēbasaniguicārāca gua muare. <sup>10</sup> Eropigu mua mera árĩbigu muare ipūre gojabeoyugu iiaa. Mua pohrogue ejagu mua ñero iirā árĩcũ iagu muare dipuwaja moaguca. Cristo yure igu dorediro dopa ta muare dipuwaja moaguca. Yu eropa dipuwaja moabiriboro dopa ipūre muare gojabeoyugu iiaa. Mua ōarire gohrotocũ iadiagu gojabeoyugu iiaa. Cristo igu dorediro dopa muare itamudiaca. Muare dipuwaja moadiabeaa.

<sup>11</sup> Dohpaguere yu acawererā, muare ōadorea. Cristore guñaturanemoque. Eropā iirā ōarā árĩque. Muare yu wererare ōaro peenurūque. Mua mera majarā mera yujuro mera pepique. Mua basi ōaro mera árĩque. Mua eropa árĩcũ iagu mua mera Goamu árĩgucumi. Igu marire game mahicũ iigu, marire ōaro mera árĩcũ iigu ahrimi. <sup>12</sup> Eropirā mua mera majarāre bocatīrirā erāre ōaro mera mojoto ñeaque mua. <sup>13</sup> Árĩpehrerā ō majarā Goamu yarā muare ōadorea.

<sup>14</sup> Mari Opū Jesucristo mera muare árĩpehrerāre ōadorea. Eropigu Goamu igu mahiri mera árĩpehrerā muare ōadorea. Eropigu Espiritu Santo árĩpehrerā mua mera ōaro ahrimi. Eropā ta árĩporo. Iripēta ahraa.

## Gálatas

### *Pablo Galacia majarãre Jesu yarãre gojabeopu*

<sup>1-2</sup> Yuhu Pablo mua Galacia majarãre ipũre gojabeogu iiaa. Yuhu Goãmu yare buhedore Jesucristo igu apidi ahraa. Masa ne yure buhedore apibirima. Jesucristopu igu Pagu Goãmu mera yure apimi. Goãmu ahrimi Jesucristo siridire masudigu. Eropigu yuhu yu mera majarã mera Jesucristo yarã mera muare odorea. <sup>3</sup> Goãmu mari Pagu mari Opu Jesucristo mera muare odorea. Igu muare itamuri mera oaro arique mua. <sup>4</sup> Jesucristo, igu Pagu Goãmu gamediro dopa ta iigu, igu basi mari ñeri iira dipuwaja siribasadigu arimi. Eropiidi arimi i umu majarã ñero ariricũre mari iibiriboro dopa. <sup>5</sup> Igu eropiicũ iha mari Goãmure "Muhu oagu oaro iiaa," umuri nucũ ariro gahmea. Eropa ta iirã.

### *Jesucristo masare igu tauburi yujuñe ta buheriñe ahraa, arĩ werepu Pablo*

<sup>6</sup> Mua mata Goãmu yare duhurã iica. Goãmu muare igu yarã arimorãre aĩdigu arimi Jesucristo igu marire siribasara mera. Igu muare eropa aĩquerecũ muapu igure duhu gajirã ya buherire peenugarã iica. "Gaji ahraa marire tauburi buheri," erã arĩ werecũ peerã iica mua gajirãre. Mua eropiira querere peegu pee uca wahaa yuhu. <sup>7</sup> Opa waro iica mua arirore. Gajirã mua pohro eja muare were goroweorã iicoma. "Jesucristo marire taumi," arĩ buherire gohrotodiarã, "Gaji ahraa marire tauburi buheri," arĩ buherã iicoma muare. Eropigu muare ire werediaca. Gaji buheri marire tauburi buheri marica. <sup>8</sup> "Gaji buheri ahraa mari tauburi buheri," muare arĩ were goroweorãre Goãmu burigã dipuwaja moagu peamegue wadoreporo. Yu basi ta were gorowecũre Goãmu yu sãre dipuwaja moaporo. Anyu umaro majagu igu eropa buhecũ igu sãre dipuwaja moaporo. <sup>9</sup> Gua gajisubu arirare dipaturi yuhu werea daja muare. Yujugu muare oari buherire gajiropa buhecũ, gua muare buhediro dopa werebigure igure Goãmu burigã dipuwaja moaporo. Peamegue wadoreporo.

<sup>10</sup> Yuhu masare buhegu Goãmu gamero dopa ta diaye majare buhea. Masa peesnacũ, peesabiricũ sãre buhea. Eropigu dohpaguere yuhu masa peediari dihtare wereniguibeaa. Cristo gamero dopa ta buhediacã. Igu pohro majagu oagu aridiagu eropa buhea yuhu.

### *Pablo igu Jesucristo yare buhebure apirare werepu*

<sup>11</sup> Opa weregura muare: Yuhu muare oari buheri eropa arĩ buhera masa ya pepiri aribeaa. <sup>12</sup> Ne yujugu masu iri buherire yure weredorebirimi. Ne yujugu masu yure buhebirimi iri buherire. Jesucristo igu basi yure irire masicũ iimi.

<sup>13</sup> Iribojegue yu ariricũre yuhu judio masa buherire peenururasubu yu iirare mua peetuhabu. Yuhu Jesucristo yarãre burigã ihaturigu nurusiamuribu erãre ñero iibu. Eropigu Jesu yarãre burigã ñero iigu erãre wejẽpehocãdiaribu. <sup>14</sup> Eropigu gua judio masa ya buherire yu mera masanirã tauro umupeomuricaribu. Gua ñecũ sumarã ariricũre burigã iimuricaribu. <sup>15</sup> Yu eropa iirisubu opa wabu yure. Goãmu igu oaro mahiri mera yure sihumi pare. Igu yu dehyoaboro coregue beyetuhapu yure. <sup>16</sup> Eropigu igu magure Jesucristore yure masicũ iimi. Igure masicũ iigu yure judio masa aribirãre buhebure apimi. "Jesucristo marire taumi," arĩ buherire werebure apimi yure. Eropa Goãmu yure masicũ iira puhru gajirãre serẽpigũ wabiribu. <sup>17</sup> Jerusalengue arirãre yu core Jesu igu apinirã sãre serẽpigũ wabiribu. Erote eropa wabigu Arabia yebaguepũre diaye wabu. Puhrugũre Damascogue dujaa wabu.

<sup>18</sup> Ûhre bojori pũhrũ Jerusaléngue wabũ. Pedrore ïagũ wabũ. Pe semana ta árĩbu ïgũ mera. <sup>19</sup> Gajirã Jesu ïgũ apinirãre ne ïabiribũ irisubure. Mari Opũ Jesucristo pagũ magũ Santiago dihtare ïabũ. <sup>20</sup> Yũhũ mũare eropa arĩgũ diaye weregũ iiaa. Yũ õpa arĩrire Goãmũ masimi. Eropa arĩgũ õpa arĩdiaca mũare. Jesucristo dihta yũre masicũ iimi ïgũ buherire.

<sup>21</sup> Jerusaléngue árĩra pũhrũ Siria yebague Cilicia yebague ejabũ. <sup>22</sup> Irisubu Judea yeba majarã Jesucristo yarãpũ yũre ïha masibirima dohpa. <sup>23</sup> Yũhũ Jesucristo yagũ árĩri querere peenirã árĩma. “Ïgũ Pablo marire Jesu yarãre ñero iidianũrũ curidigũ dohpaguere Jesucristo yare buhegũ ãhrimi. Mari Jesucristore umupeorire dedeodiadigũ dohpaguere irire Jesucristore umupeoburire buhegũ wahami,” gajirã erãre eropa arĩ werecũ peenirã árĩma Judea yeba majarã. <sup>24</sup> Eropa peerã Goãmũ mera mucubiriñorã.

## 2

### *Gajirã Jesucristo ïgũ apinirã gameñorã Pablo buherire*

<sup>1</sup> Catorce bojori pũhrũ Jerusaléngue wabũ daja. Bernabé wami yũ mera. Tito sãre aĩgãbũ. Goãmũ yũre wadoremĩ Jerusaléngue. Eropigũ erogue wabũ. <sup>2</sup> Eropigũ erore eja Jesure umupeorã gamenererogue yũhũ erã oparãre boje sihuu werebũ erãre. Judio masa árĩbirãre Jesucristo marire tauburi buherire yũ buherare werebũ oparãre. Eropa weregũ erã yũ buherire õaro masicũ erãre “Õapũrica,” arĩcũ iidiabũ erãre. Erã yũ buherire gamebirã yũ buheri sãre “Waja mariri ãhraa,” arĩbocoma, arĩ pepirabũ yũhũ. Erã gamema. <sup>3</sup> Eropirã erã Titore ïgũ judio masũ árĩbiriqueregũ ïgũ Jesure umupeogũ arĩcũ ïha erã judio masa dorero dopa iidorebirima ïgũre. Eropirã ïgũre gasiro merogã wiri aĩdorebirima ïgũre. <sup>4</sup> Gajirãpũ Jesure umupeorã gamenererogue ñajajanirãpũ ïgũre circuncisión gasiro merogã wiri aĩcũ gamerima. Erã Jesure umupeorã gohra árĩbirima. Erã gũa sihubiriquerecũ gũa pohrogue peedurirã ñajajanirã árĩma. Gũare weresãdiana. “Erã Jesu yarã Moise dorerire iibirã ãhrima,” arĩdiama gũare. “Goãmũ pohro wadiarã gũa dorerire iiro gahmea marire,” arĩ dorediarima daja. Gũa Jesucristo yarãpũre Jesucristo tautuhajami gũa Goãmũ mera õaro árĩborore. <sup>5</sup> Eropirã erã eropa gũare dorecũ ïarã erãre ne yũhribiribũ. Erãre yũhrirã iri Jesucristo marire tauburi buherire queoro buhemasibiriboaya mũare. Eropirã erã dorediarire cãhmotacãbũ.

<sup>6</sup> Eropirã Jesu yarã oparã yũ buherire erãre weretuhajara pũhrũ “Mũ buheri õhaa,” arĩrã, yũ buherire yũre gohrotodiabirima. Gũa judio masa dorerire iiburi sãre buhedorebirima. Erore erã oparãre masa umupeoquerecũ erã iiro dopa iibiribũ. Goãmũ arĩpehrerãre oparã árĩrã sãre bu árĩrã sãre yujuropa ta ïhami. “Erãre beyediro dopa ta yũ sãre Goãmũ beyemi,” arĩ pepibũ. <sup>7</sup> Eropirã oparã yũ buherire gohrotodiabirã judio masare árĩbirãre yũ buhe curirare peema. Eropirã yũhũ Jesucristo ïgũ yare buhebure apidigũ arĩcũ ïha masima yũre. Eropirã õpa arĩma yũre: “Ïgũ Goãmũ judio masare iri õari buherire buhebure ïgũ Pedrore apidiro dopa ta mũ sãre apiñumi. Judio masa árĩbirãpũre iri buherire buhebure mũre apiñumi,” arĩma yũre. <sup>8</sup> Eropigũ ïgũ Goãmũ Pedrore judio masare buhebure obeodigũ ta yũ sãre obeomi judio masa árĩbirãre buhebure.

<sup>9</sup> Eropirã erã oparã ƣrerã Santiago, Pedro, Ñũ mera yũre ïha masima. Goãmũ ïgũ mahiri mera ïgũ yũre beyedigũ yũ arĩcũ masima. Eropirã yũre Bernabé sãre õaro bocatĩrima. “Eropa ta iirã mari. Mari yujuro mera buherã. Mũapũ judio masa árĩbirã pohrogue buherã warãca. Gũapũ judio masare buherã warãca,” arĩma yũre Bernabé sãre. <sup>10</sup> “Iri dihta iiro gahmea,” arĩma gũare. “Mojomorocũrãre itamuniguicãro gahmea,” arĩma. “Eropa ta iiaa,” arĩbũ gũa erãre. Eropigũ eropa

ta yu buhe curirogue Jesu yarã mera niyerure gameneo erã mojomorocurãre ohaa dohpa.

*Antioquíague Pablo Pedrore werepu ïgu òaro iibirirare*

<sup>11</sup> Ero pũhrũ gua Antioquía macague árcũ Pedro curigu erami gua árirore Jesure umupeorã gamenererogue. Erogue erara pũhrũ Pedro queoro iibiricũ ïha ïgu eropa iira dipuwaja bũrigã werebũ ïgure Jesure umupeorã peeuro. <sup>12</sup> Eropigu Pedro Antioquíague ne eragu gamenere bamurimi judio masa áribirã Jesure umupeorã mera. Irisubu gajirã judio masa Santiago obeonirã erama. Erã eranirã òpa arĩ pepirã árĩma. “Áripehrerã Jesure umupeorã judio masa áribirã sã gua dorerire iiro gahmea Goãmũ erãre òaro ïaborore. Eropirã áripehrerã judio masa iiro dopa gasiro merogã wiri aĩro gahmea. Eropa áribirã mera babiricãro gahmea,” arĩrã árĩma eranirãpũ. Eropigu Pedro erã eracũ ïha judio masa áribirãre dũca wami. Erã gasiro merogã wirisũbirinirã árcũ erãre dũca wami erã eranirã weresãrire güigu. Erã mera babirimi pare. <sup>13</sup> ïgu eropiicũ ïha ero majarã gajirã judio masa erã sã dũca wama judio masa áribirãre. Bernabé sã erã iiri queoro áribiricũ masiqueregu erãre ïhacũ ïgu sã dũca wami erãre. <sup>14</sup> Erã eropiicũ ïha gamebirigohracãbũ yũhũ. Erã judio masa áribirãre dũca warã “Jesu dihta marire taumi,” arĩ ïhmubirima. “Moise doreri sãre umupeoro gahmea,” arĩ ïhmurima erã judio masa áribirãre. Eropigu yũhũ áripehrerã Jesure umupeorã peeuro bũrigã arĩbũ Pedrore. “Mũhũ judio masũ áriqueregu òguere ne eragu judio masa áribirã mera yujuro mera bagũ gua judio masa áricurire guñabirabũ. ¿Duhpigũ mũhũ dohpaguere gohrotodiari? ¿Eropigu duhpigũ dohpaguere erã judio masa áribirãpũre gua áricurire iidorediari?” arĩ werebũ ïgure ïgu queoro iibirira waja.

*Áripehrerã Jesure umupeocũ Goãmũ taumi erãre, arĩ werepu Pablo*

<sup>15</sup> Gua judio masa porã ãhraa. Eropa arĩrã gajirã Moise dorerire tarinũgarã iiro dopa árĩbeaa. <sup>16</sup> Eropa áribiriquererã gua Jesure umupeorã dohpaguere òpa masirã ãhraa. Yujugũ Moise dorerire iicũ Goãmũ pohro waburi árĩbeaa. ïgu Jesucristore umupeonijagu ïgu ñeri iira dipuwajare cãdijisũdigũ wahami. Iri mera dihta òhami Goãmũ mera. Eropirã gua judio masa áriquererã Goãmũ mera òaro árĩmorã Jesucristore umupeobũ. Goãmũ mera òaro árĩmorã Moise dorerire iibiribũ. ïgu mera òaro árĩmorã gua dorerire umupeorã Goãmũ mera òaro áribiriboaya. Eropirã Jesucristore umupeobũ gua ñeri iira dipuwaja pehbororo dopa.

<sup>17</sup> Eropirã gua Jesucristore umupeori mera gua Goãmũ mera òaro arĩrãca. Eropa Jesucristore umupeorã Moise dorerire iibiriquererã Goãmũ dorerire tarinũgarã iibeaa. Jesucristo sã Goãmũ dorerire tarinũgadoregu ne árĩbeami. <sup>18</sup> Eropigu masare òpa arĩ buhea yũhũ. Goãmũ mũare “Òarã ãhrima,” ïgu arĩ ïaboro dopa Jesucristopũre umupeoro gahmea. Eropigu “Mũa Goãmũ mera òaro arĩdiarã Moise doreri sãre umupeoro gahmea,” arĩbeaa. Yũhũ Moise dorerire doregu Goãmũ dorerire tarinũgagu arĩboya. <sup>19</sup> Ero corere Moise dorerire iimuriribũ Goãmũ mera òaro arĩdiagũ. Eropa iiqueregu dipuwajacũgu arĩmuriribũ. Dohpaguere Jesucristo mera dipuwajacũbeaa. Eropigu “Iri Moise dorerire iiro gahmea,” arĩbeaa pare. Eropigu yũhũ Goãmũ ïgu dorero dopa ta iigu iiaa. <sup>20</sup> Jesucristo crusague sĩrigũ yũ ñegũ arĩrãre gohrotodigu árĩmi. Eropigu yũ ero coregue arĩdiro dopa árĩbeaa pare. Cristo yũ mera arĩgu yũre ïgu dorerire òaro iimasicũ iimi. Eropigu yũ áricurare iibeaa. Jesucristo yapũre iiaa. ïgu Jesucristo yũre mahitarigu yũre yũ ñero iira dipuwaja sĩribasadi árĩmi. Eropigu ïgure guñaturagu ïgu dorerire iiaa. <sup>21</sup> Goãmũ mera òaro árĩmorã mari ñecũ samarã áricurire, Moise dorerire iicũ Jesucristo



mari ñero iira dipuwaja s̄ribasara wajamariboya. Eropigu ne umupeogu duhosome “Jesucristo marire taumi,” ar̄i buherire.

### 3

*Jesucristore umupeori mera Goãm̄ marire “Õarã àhrima,” ar̄i ìhami, ar̄i werep̄u Pablo*

<sup>1</sup> M̄ua pee masibirã àhraa dohpaguere. M̄uare Jesucristo ìgu basi mari ñeri iira dipuwajare s̄ribasarare m̄uare werecũ m̄ua òaro ìha masiribũ. ¿M̄ua eropa òaro masicũ noa m̄uare goroweoari dohpaguere iri diaye maja m̄ua umupeoborañere? <sup>2</sup> Eropigu òpa serēpidiaca m̄uare. ¿M̄ua Moise dorerire umupeori mera Esp̄ritu Santo m̄uare eranugari? Erabirimi. M̄ua “Jesucristo marire taumi,” ar̄i buherire peecũ Jesucristore umupeocũ ìgu Esp̄ritu Santo m̄uare erami. Ìgu yarã m̄ua ár̄imorã ár̄icũ erami. <sup>3</sup> ¿M̄ua duhp̄irã pee masibirã iiro dopa wahari dohpaguere? M̄ua ne Jesucristore umupeorã Esp̄ritu Santo itamuri mera ìgu yare iim̄aribũ. ¿Eropirã duhp̄irã dohpaguere m̄ua turari mera iidari? <sup>4</sup> ¿M̄ua Jesucristo yarã ár̄inugarã m̄ua Jesucristore umupeora waja m̄ua ñero tarirare guñabeari? ¿M̄ua eropa umupeora “Bu gohra àhraa,” ar̄i pepiri m̄ua dohpaguere? <sup>5</sup> Òpa òaro guñaro gahmea. Goãm̄ m̄uare ìgu Esp̄ritu Santore odigu ár̄imi. Esp̄ritu Santo m̄ua mera ár̄igu m̄ua watope deyoro moarire m̄uare òarire iimi. Ìgu eropiigu Moise dorerire m̄ua umupeori mera eropa iibeami. M̄ua “Jesucristo marire taumi,” ar̄i buherire òaro pee ìgure umupeocũ eropa iimi.

<sup>6</sup> Gua judio masa ñecũ Abrahãp̄u Goãm̄re “Diaye ta ár̄igu àhrimi,” ar̄i òaro umupeoñumi. Ìgu eropa umupeocũ ìha Goãm̄ ìgure “Ñeri dipuwaja marigu òagu àhrimi,” ar̄i ìañumi. <sup>7</sup> Eropirã òpa masique m̄ua. Goãm̄ òpa ar̄imi: “Ár̄ipehrerã masa judio masa ár̄ibirã sã Abrahã umupeodiro dopa ta yure umupeorã Abrahã p̄amerã àhrima. Eropirã yaharã àhrima,” ar̄imi Goãm̄. <sup>8</sup> Iribojegue irire Goãm̄ ar̄i wereyutuhanumi. Ìgu werepira òpa àhraa ìgu yare gojarapũgue: “Ár̄ipehrerã masa judio masa ár̄ibirã sã yure umupeorãre ‘Õarã àhrima,’ ar̄i ìagũca. Ñero iira dipuwaja marirã ìagũca erãre,” ar̄iñumi. Eropigu iri òari buherire Abrahãre ar̄i wereyuñumi. “Ár̄ipehrerã masa m̄uhũ yure umupeoro dopa ta yure umupeocũ ‘Õarã àhrima,’ ar̄i ìagũca yuhũ erãre. Erãre òaro iigũca,” ar̄iñumi Goãm̄ Abrahãre. <sup>9</sup> Abrahã Goãm̄re ìgu umupeocũ Goãm̄ òaro iinumi ìgure. Eropigu ár̄ipehrerã masa mari sã ìgure umupeocũ Goãm̄ òaro iigũcumi mari sãre.

<sup>10</sup> Gajirã òpa ar̄irã àhrima. “Moise dorerire òaro iicũ Goãm̄ ‘Õarã àhrima,’ ar̄i ìagũcumi marire,” ar̄irima. Eropa ar̄irã dipuwajacurã àhrima dohpa. Goãm̄ yare gojarapũgue òpa ar̄i werea. “Moise dorerire iirã erã iri dorerire ár̄ipehrerire queoro iipehobirã dipuwajacurã àhrima,” ar̄i gojara àhraa. Eropirã iri dorerire iipehomasibirira waja dipuwaja moasũmorã àhrima ár̄ipehrerã. <sup>11</sup> Ne yujugure iri dorerire iipeho masiya mara. Eropirã Moise dorerire iiri mera Goãm̄ mera òamasibeama. Òpa ar̄i gojañuma Goãm̄ yare gojarapũgue. “Ìgure umupeorãre Goãm̄ ‘Õarã àhrima,’ ar̄i ìhami. Ñero iira dipuwaja marirã ìhami. Eropirã erã òaro ár̄iniguicãrãcoma Goãm̄ mera,” ar̄i gojañuma. Eropirã mari masia. Ne yujugure iri dorerire ìgu iiri mera Goãm̄ ìgure “Õagu àhrimi,” ar̄i ìabeami. Goãm̄re umupeogu dihta òaro ár̄igũcumi ìgu mera. <sup>12</sup> Goãm̄re umupeogup̄u, “Goãm̄ yure yũ ñero iira dipuwaja maricũ iigũcumi,” ar̄imi. Moise dorerire iigup̄u “Yũ basi iri dorerire iigu ñero iira dipuwaja mariro òaro ár̄igũca,” ar̄irimi. Eropigu ìgu iri dorerire iipehomasibigu ár̄igu ñero iira dipuwajacugũ dujami.

<sup>13</sup> Eropirã mari árĩpehrerã iri doreri mera ñero iira dipuwajacurã dujamuriribũ. Mari eropa árĩcũ ñha, Jesucristo mari ñero iira dipuwaja ñgu basi wajayemi ñgu crusague sĩrigũ. Goãmũ yare gojarapũgue õpa werea: “Ñgu yucũgũgue dirisiudigũ Goãmũ ñgu ñero iira dipuwaja moadigũ aħrimi,” arĩ gojañuma iribojegue. Eropigũ Jesucristore crusague dirisiudigũre mari ñero iira dipuwajapũre Goãmũ ñgũre dipuwaja moadigũ árĩmi. Eropirã maripũ ñero iira dipuwaja marirã dujaa pare. <sup>14</sup> Jesucristo eropiicũ Goãmũ Abrahãre õaro ñadiro dopa ta judio masa árĩbirã sãre õaro ñanũgami. Eropigũ ñgu arĩdiro dopa ta ñgu obeodigũ Espĩritu Santopũ eramĩ marire Jesucristore umupeorãre.

### *Ñgu buherare werenemopũ Pablo*

<sup>15</sup> Mari masa mari iiro dopa ta weremũhtagura mũare. Perã “Õpa iirãca,” erã arĩ weretamura pũhrũ gajigũ gohrotomasibeami. <sup>16</sup> Eropigũ Goãmũ Abrahã mera weretamura pũhrũ Abrahãre ñgu arĩrare gohroto masiya mara. Õpa arĩ werepiñumi ñgũre: “Mũ pãrami árĩturiagũ mera árĩpehrerã masare õaro iigũra,” arĩ wereñumi. Eropa arĩgu ñgu pãramerã árĩturiarãgue mera arĩgu iibiriñumi. Yujugũ ta ñgu pãrami árĩturiagũ dihtare arĩgu iĩñumi. Eropa arĩgu ñgu pãrami árĩturiagũ Jesucristo ariburire arĩ wereyugũ iĩñumi. <sup>17</sup> Eropigũ õpa arĩ werea mũare: Iribojegue Goãmũ Abrahã mera weretamugũ masare ñgu õaro iiburire wereñumi. Ñgu eropa weretamura pũhrũ yoari boje pũhrũ cuatrocientos treinta bojori árĩturiagũ mera árĩpehrerã masare õaro iigũra,” arĩ wereñumi. Eropa arĩgu ñgu pãramerã árĩturiarãgue mera arĩgu iibiriñumi. Yujugi pũhrũ Moiserẽ ñgu doreri apiñumi. Moise doreri árĩnũgaquerecũ Goãmũ Abrahãre werepira pehrecũ iibiriyoro. <sup>18</sup> Goãmũ Abrahãre mahigũ õpa ñgũre arĩ weretuhãñumi. “Árĩpehrerã masare mũ yũre umupeoro dopa ta yũre umupeorãre õaro iigũca,” arĩ weretuhãñumi. Eropiro Moise doreri árĩnũgaquerecũ Goãmũpũ iri dorerire iiri mera masare taubeami. Moise doreri iiri mera mari taricũ Goãmũ mũare “Waja mariro õaro iigũ mera arĩgu iibiriñumi. Yujugũca,” ñgu arĩrapũ duhpiburi árĩbiriboaya.

<sup>19</sup> ¿Eropigũ duhpiburire iri dorerire Moiserẽ apiyuri Goãmũ? Masa erã ñerire masiborore apiñumi iri dorerire erã ñero iira dipuwaja masiborore. Abrahã pãrami árĩturiagũ Jesucristo ñgu eracũgue árĩtuya iri doreri. Eropigũ Jesucristo ñgu eracũ Goãmũ Abrahãre ñgu werediro dopa ta masare õaro iĩñumi. Goãmũ iri dorerire apigũ anyuare weremũhtañumi. Erã anyua wereñuma Moiserẽ. Ñgu Moiserũ masare wereñumi. <sup>20</sup> Ñgu masare õaro iiburire Goãmũ ñgu basi ta werepiñumi Abrahãre. Gajirã mera werebeobiriñumi ñgu iri dorerire apidiro dopa ta. Eropigũ ñgu Abrahãre werepirapũ Moise doreri tauro õhaa.

### *Moise dorerire werepũ Pablo*

<sup>21</sup> Goãmũ Moiserẽ ñgu dorerire apigũ, ero coregue Abrahãre ñgu arĩrare “Yũ arĩdiro dopa iisome pare yũhũ,” arĩgu iibiripũ ñgu. Abrahãre ñgu arĩmũhtadiro dopa iibu iipũ. “Masare õaro iigũca,” ñgu arĩrare iibu iipũ dohpa. Moise dorerire iiri mera mari Goãmũ mera õaro árĩmasirã mari iri dorerire õaro iirã ñero iira dipuwaja opabiriboya. <sup>22</sup> Eropa árĩquerecũ Goãmũ yare gojarapũgue õpa aħraa: “Masa árĩpehrerã erã ñero iira dipuwaja opama, arĩ gojara aħraa. Eropa dipuwajacurãre erã Jesucristore umupeocũ Goãmũ õaro iigũcumi erãre. Ñgu Abrahãre werediro dopa ta iigũ erãre ñero iira dipuwaja marirã ñagũcumi.

<sup>23</sup> Jesucristore umupeori mera masare tauburi árĩboro core gũa Moise doreri doca árĩmũribũ. Eropa Moise dorerire iirã peresugue árĩro dopa árĩmũribũ. Jesucristo guare tauboro core eropa árĩmũribũ. <sup>24</sup> Õpa sã árĩburi árĩbũ Moise doreri: Moise doreri mera Jesucristore mari masiburi erabũ. Mari porãre erã buherogue soro dopa

ta Moise doreri marire Jesucristore masicũ iibũ. Eropirã mari Jesucristore umupeocũ ïgu marire taumi. Mari ñero iira dipuwaja maricũ iimi. <sup>25</sup> Eropirã dohpaguere mari Jesucristore umupeorãre Goãmũ “Õarã àhrama,” arĩ ìhami. Gũa Jesucristore masirã ïgũre umupeorã árrĩã dohpaguere Moise doreri doca árĩbeaa pare.

<sup>26</sup> Mũa sã árĩpehrerã Jesucristore umupeorã ïgu yarã árĩã Goãmũ porã àhraa. <sup>27</sup> Eropirã mũa árĩpehrerã Jesucristore umupeorã ïgu waĩ mera waĩyesũnirã árĩã Jesucristo ïgu iro dopa ta àhraa. Jesucristo Goãmũ magũ árĩro dopa ta mũa sã Goãmũ porã àhraa. <sup>28</sup> Eropirã árĩpehrerã Jesucristo yarã yujuro mera àhraa. Yujugũ porã iro dopa àhraa. Eropigũ gũa judio masare mũa judio masa árĩbirã sãre Goãmũ yujuro pa ta ìhami. Masa pohro majarãre erã oparã sãre yujuro pa ta ìhami. Ùmare nome sãre yujuro pa ta ìhami. <sup>29</sup> Eropirã mũa Jesucristo yarã árĩã Abrahã pãramerã sã àhraa. Eropigũ Goãmũ Abrahãre “Mũre òaro iigũra,” arĩrare mũa sãre iimi. Cristo yarã mũa árĩcũ ïagũ mũare òaro iigũcumi.

## 4

<sup>1</sup> Mari iri doreri doca árĩbiriborore mari Jesu yarã árĩborore weregũra daja. Yujugũ majigũ ïgu pagũ yare wũaro opapehobu árĩqueregũ majigũ árĩgu pohro majagũ iro dopa àhrimi. Gajirã dorero doca àhrimi dohpa. <sup>2</sup> Gajirã ïgu pagũ apinirã ïgu ya árĩburire ìhadibuma dohpa. ïgu pagũ gameranũ árĩcũgue ïgu basi ïgu yare doremi pare. <sup>3</sup> ïgu majigũ gajirã dorero doca ïgu árĩro dopa ta mari masa mari ñecũ sũmarã árĩricũri doreri doca árĩmũriribũ. Pohro majarã iro dopa ta árĩmũriribũ. <sup>4</sup> Mari eropa árĩnirãre mari Pagũ Goãmũ ïgu gameranũ ejacũ ïgu magũre ïgu pohro árĩdigũre obeodigũ árĩmi. ïgũre obeocũ ïgu nomeoguere dehyoadigũ árĩmi. Eropa dehyoagũ judio masũ árĩdigũ árĩmi Moise dorerire iigũ. Eropigũ Goãmũ obeodigũ árĩmi ïgu magũre. <sup>5</sup> Gũa iri doreri doca árĩãre taubure obeodigũ árĩmi ïgu magũre. ïgu marire taugũ mari pohro majarã iro dopa árĩnirãre wiugũ ïgu porã árĩcũ iimi.

<sup>6</sup> Eropiituhaja mũa sã ïgu porã árĩcũ ïgu Jesucristo mera Espĩritu Santore obeomi mũare. Eropirã Espĩritu Santo marire ïgu itamuri mera Goãmũre mari Pagũre “Ahũ,” arãa mari pare. <sup>7</sup> Eropirã mũa Goãmũ porã ta àhraa. ïgu porã árĩã mũa ñecũ sũmarã doreri doca, pohro majarã iro dopa árĩbeaa pare. Goãmũ magũ Jesucristo wiunirã àhraa. Mũa eropárĩã ïgu porã árĩã Goãmũ oburire oparãca mũa árĩpehrerire.

### *Pablo Galacia majarã Jesu yarãre guñaricũpũ*

<sup>8</sup> Mũa ero core Goãmũre masibirã árĩã gajirã goãmarãre umupeomũriribũ. Eropirã erã pohro majarã iro dopa árĩmũrirabũ. Goãmũ gohrare umupeobirimũriribũ. <sup>9</sup> Eropa árĩquererã ta dohpaguere Goãmũre masia. Goãmũpũ mũare ìha masimi. ¿ïgu eropa masiquerecũ ta duhpirã i yeba majarã erã pepirire gahmeri daja? ¿Duhpirã iribojegue mũa ñecũ sũmarã doreri mũa iidiro dopa ta mũraro ta Cristo mariro dopa ta iidiari daja? ¿Eropirã duhpirã dohpaguere Moise dorerire mũa iinũgarã, pohro majarã iro dopa árĩdiari daja mũa? <sup>10</sup> Judio masa erã bosenũri iro dopa mũa sã iica Goãmũ mera òadiarã. Soorinũri nũcũ, aberi nũcũ, bosenũrere eropiica. Bojori nũcũ bosenũrere òaro iica. Mũa eropiiri queoro árĩbeaa. <sup>11</sup> Mũa eropiicũ pee ñero sĩporãcũca yũpũ. Mũare yũ turaro buhequerecũ ta “Iri waja mariboca,” arĩ pepia.

<sup>12</sup> Eropigũ yũhũ mũare bũrigã òpa arĩ werea. Mari Jesucristore umupeoturadiro dopa ta umupeoque daja. Yũ Jesucristore umupeogũ gũa judio masa doreri yũre taubiricũ ìha irire umupeobiribũ pare. Eropirã mũa sã Jesucristore umupeorã iri dorerire umupeobiricãro gahmea Goãmũ mera òaro árĩmorã. Yũhũ mũa pohro ne árĩcũ mũa ne ñero iibiribũ yũre. <sup>13</sup> Mũa masia yũhũ mũa pohro ne árĩdirore. Yũhũ

Jesucristo marire tauburire ne mũare buhegu ejagu dorecugu árĩbu. <sup>14</sup> Yu dorecugu ñero tarĩbu. Yu eropa dorecugu árĩquerecũ mua yũre doobirĩbu. Yũre ðaro umupeo ðaro bocatĩribũ. Goãmũ obeodigu anyu árĩro dopa yũre ĩabũ. Yũre Jesucristore iiro dopa ðaro iibũ. <sup>15</sup> Yũre burigã gamebũ. Yũre burigã gamerã yũ serēropē ta árĩpehrerire omorã árĩbu yũre. ¿Mũa eropa árĩcũ dohpa wahari dohpaguere? Mũa negohraguere yũre mucubiridiro dopa ta dohpaguere mucubiribea. <sup>16</sup> ¿Mũare diaye majare yũ werera waja mũa ĩhaturĩgu wahari dohpaguere?

<sup>17</sup> Mũa pohrore gaji buherire buherã mũare ðaro umupeocoma. Erã eropa umupeoquererã mũare sĩporã mera mahibiricoma. Mũa yũre yũ buheri sãre gamebircũ gahmema erã. Mũa erãpũre umupeocũ gahmema. Eropirã mũare umupeocoma. <sup>18</sup> Masare umupeocũ ðapũrica. Erã weca dihta umupeocũ ðabeaa. Yu árĩcũ dihtare umupeocũ ðabeaa. Árĩpehrerãre yujuropa ta ðari mera umupeoniguicãro gahmea. <sup>19</sup> Mũa yũ porã iro dopa ãhraa. Eropigu mũare guñaricua. Mũare burigã guña teboricua. Yujugo porãcũbo teboricuro dopa ta yũ sã teboricua mũare guñagu. Igo magu ðaro dehyoacũ gamego teboricũmo. Mũa Goãmũ porã ðaro árĩcũ gamegu teboricua yũ sã. Mũa Jesucristo árĩricũre ðaro opacũ gahmea. <sup>20</sup> Mũa pohro burigã wadiarica. Yu mũa mera árĩgu yũ basi mũare ðaro weremasiboya gojaripũ gojaro mariro. Eropigu mũare dohpaguere ĩabigu mũa Jesucristore ðaro umupeoturanemoborore masibirica.

*Agar Sara mera erã árĩrare werequeogu mari Goãmũ porã árĩrare werepũ Pablo*

<sup>21</sup> ¿Mũa Goãmũ mera ðaro árĩmorã Moise dorerire iiniguicãdiarã mũa Moise arĩ gojarare masibeari? <sup>22</sup> Ōpa arĩ gojañumi Moise: Abrahã porã ũma perã árĩñuma. Īgu marapo pohro majago Agar waĩcũgo yujugu porãcũñumo. Pũhrũ Abrahã marapopũ Sara waĩcũgo gajigu porãcũñumo. <sup>23</sup> Īgu pohro majago magu mari masa iro dopa ta masa dehyoañumi ĩgu. Abrahã igore porã moara pũhrũ mata nijipo ãhri porãcũñumo. Īgu marapopũ mata porã bocamasibiriñumo. Eropigu Goãmũ ĩgu arĩdiro dopa ta igore porã bocacũ iĩnumi. <sup>24-25</sup> Erã perã nome iribojegue eropa warare ðpa buhegũra mũare. Goãmũ Abrahãre wererare iirã Sara árĩro dopa ãhrima. Gajirã Moise dorerire iirã Agar iiro dopa ãhrima. Agar igo porã sã gajirã dorero doca árĩmũriñuma. Pohro majarã árĩmũriñuma. Erã arĩdiro dopa ãhrima Moise dorerire iirãpũ. Eropirã Moise doreri doca árĩmũrirã ãhrima pohro majarã iro dopa árĩrã. Iri dorerire iirã “Goãmũ mera ðaro árĩrãca,” arĩmũririma. Iri dorerire Goãmũ Moiserẽ apiñumi Sinaĩ waĩcũdigu utãgugue Arabia yebague. Dohpaguere iri dorerire Jerusalengue judio masa umupeoma. Eropirã iri doreri doca ãhrima. <sup>26</sup> Ōpa ãhrima Goãmũ Abrahãre wererare iirãpũ. Erã Jesucristore umupeorã ãhrima. Sara arĩdiro dopa ãhrima. Sarapũ pohro majago árĩbirimũriñumo. Mari Jesucristore umupeorã “Moise doreri mera taribea,” arãa. Jesucristo marire taucũ Goãmũ porã árĩrã mama Jerusalén maca majarã ãhraa. <sup>27</sup> Eropirã Jesucristore umupeorã Goãmũ porãpũ bajarã árĩrãcoma. Moise dorerire iirãpũ bajamerã árĩrãcoma. Eropa ta arĩ werea Goãmũ yare gojarapũgue:

Mũhũ ne porã opabigo, porãcũri pũririñe pepibigo ðaro mucubirique. Gajigo igo marapũ mera árĩgo igo porã árĩquerecũ igo pãramerã arĩturiarã bajamerã árĩrãcoma. Mũpũre dohparagã mũ porã mariquerecũ mũ pãramerã arĩturiarã tauro bajarã árĩrãcoma. Eropigo mucubirique, arĩñumi Goãmũ.

<sup>28</sup> Isaa Abrahã magu arĩdiro dopa mari Goãmũ porã ãhraa. Isaa Abrahã magu dehyoagu Goãmũ ĩgu werediro dopa ta dehyoañumi. Mari Goãmũ porã árĩrã Goãmũ ĩgu werediro dopa ta ĩgu porã ãhraa. <sup>29</sup> Eropirã Abrahã porã perã árĩñuma. Pohro majago magu Ismael árĩpehrerã masa iro dopa dehyoañumi. Isaapũ ĩgu pago igo porã bocamasibiricũ Espĩritu Santo itamuri mera porãcũñumo. Erã dehyoara pũhrũ



Ismaerpu pohro majago magurpu Isaare Abrahã marapo magure igu ñero taricũ iimuriñumi. Igu iidiro dopa dohpaguere eropa wahaa. Erã Moise dorerire iidorerãpu marire ñero taricũ iima. Mari Espiritu Santo itamuri mera Goãmũ porã àhraa. Mari eropa árĩrãre marire ñero taricũ iima. <sup>30</sup> Eropã wacũ Goãmũ yare gojarapũgue irire dohpa arĩrere buherãca. Òpa Goãmũ arĩñumi Abrahãre. “Mũ pohro majago magũ mũ oparire ne opasome, arĩñumi. Mũ marapo magũ dihta opapehogucumi. Eropigũ mũ pohro majago igo magũ mera cóãque mũ pohrore,” arĩ wereñumi Goãmũ Abrahãre. <sup>31</sup> Eropirã, yũ acawererã, mari Goãmũ porã árĩrã pohro majago magũ iro dopa árĩbeaa. Igu pagũ oburire opamasibiriñumi. Maripũ mari Pagũ Goãmũ igũ oburire opamasirãca. Marire igũ mera ðacũ iimi.

## 5

### *Cristo marire igũ taura pũhrũ turarã árĩro gahmea marire, arĩ gojarũ Pablo*

<sup>1</sup> Eropigũ marire mari ñecu sũmarã árĩricuri dorero doca árĩnirãre Jesucristo tautuhajami. Mari ñero iira dipuwajare Jesucristo igũ basi wajayebasami mari Goãmũ mera ðaro árĩboro dopa. Eropirã mari Goãmũ porã árĩrã Jesucristore guñaturaniguicãro gahmea. Eropirã peebiricãro gahmea erã Moise dorerire iidorerãre.

<sup>2</sup> Òaro peeque yũre. Yũhũ Jesucristo igũ apidigu àhraa. Eropigũ mũare ðpa werea. Mũa Goãmũ mera ðaro árĩmorã mũa gasiro merogã wiri aĩcũ Jesucristo mũare igũ sĩribasara waja mariboya. <sup>3</sup> Eropigũ gũhyadiaro mera werea daja. Goãmũ mera ðaro árĩborore erã gasiro merogã wiri aĩrã Moise dorerire árĩpehrerire iiro gahmea erãre. <sup>4</sup> Eropirã mũa “Goãmũ marire taugucumi Moise dorerire iicũ,” mũa arĩdiarã, mũa Jesucristore cóãrã iiboca. Mũa eropiirã Goãmũ igũ mera ðaro árĩburire mũare ðaro igũ iiburire cóãrã iiboca. <sup>5</sup> “Maripũ Goãmũ mera ðhaa,” arĩmasia Jesucristore umupeori mera, Espiritu Santo igũ itamuri mera. “Goãmũ gũare ‘Ñero iira dipuwaja mariro ðarã àhrima,’ arĩ iagucumi,” arĩmasia. <sup>6</sup> Eropiro gasiro merogã wiri aĩnirã árĩcũ sãre, wiri aĩbirinirã árĩcũ sãre iabeami. Mari Jesucristore umupeorã árĩcũ gajirãre mari mahi umupeocũ ihami Goãmũ.

<sup>7</sup> Mũa ne Jesucristore umupeorã igũ yare ðaro diaye iimuribũ. Eropirã dohpaguere mũa Jesucristo yare diaye majare ðaro iibiricũ gajirã mũare cãhmotañorã. <sup>8</sup> Goãmũerũ eropa iibirimi. Igu mũare Jesucristo yarã árĩmorãre beyegu àhrimi. <sup>9</sup> Eropigũ ðpa werea mũare. Yujugũ masũ igũ gũyarire buhenũgacũ peerã masa árĩpehrerã igũre peerã gũyarire umupeorã wahama ðaripũre peediabirã. <sup>10</sup> Igu mũare eropa gũyarire buhenũgaquerecũ ðpa arĩ pepia. “Erã Jesucristore umupeorire oparã erã iri gũya buherire umupeosome,” arĩ pepia yũhũ mũare. Mũare goroweocoregũre noho árĩgũre igũ eropa iira dipuwajare Goãmũ dipuwaja moagucumi igũre.

<sup>11</sup> Òpa arĩ werewuañorã gajirã yũpũre: “ ‘Mari Goãmũ mera ðaro árĩmorã mari gasiro merogã wiri aĩro gahmea,’ arĩ buhemi Pablo,” arãñorã yũre. Yũhũ eropa arĩ ne buhebeaa. Yũhũ dohpaguere “Gasirogã wiri aĩro gahmea,” yũ arĩ buhecũ irire iidorerãpu yũre ñero taricũ iibiriboañuma. Yũ ðpa arĩ buhea: “Mari ñero iira dipuwajare Jesucristo wajayebasadi árĩmi crusague sĩrigũ. Eropirã mari Goãmũ mera ðaro árĩmorã Jesucristore umupeoro gahmea,” arĩ buhea yũhũ. Yũ eropa arĩ buhecũ judio masa pee guama. Yũre ñero taricũ iima. <sup>12</sup> Erãpu mũare goroweorãpu gasiro merogã wiri aĩdorerãpu erã basi wiri aĩpehocãporo.

<sup>13</sup> Mũapũre Goãmũ mũa igũ porã árĩmorãre aĩgu mũa Moise dorerire iimorãre beyebiripũ. Mũare iri dorerire iidorebiriquerecũ mũa mũa uaribejarire iibiricãro gahmea. Òpa iiro gahmea. Mũa árĩpehrerãre ðaro mahi umupeorã erãre

itamuniguicãro gahmea. Mũa gajirãre umupeorã Moise dorerire árĩpehrerire iirãca. <sup>14</sup> Eropa ta arĩ gojara ãhraa: “Mũa basi mahiro dopa ta mũa pohro árĩrãre mahique,” arĩ gojara ãhraa. <sup>15</sup> Eropirã mũa game ìhaturicũ, papũri, mũa disitĩri wereniguicũ mũa basi òaro mũa game umupeoro pehboca. Eropirã mũa basi òaro árĩro gahmea.

*Masa erã gamerire iirire Espĩritu Santo ìgũ gameri sãre werepũ Pablo*

<sup>16-17</sup> Òpa arĩ werediaca mũare. Mari Jesucristo yarã árĩcũ mari pepirigue òpa ãhraa. Mari ñeri ùaribejari ãhraa. Espĩritu Santo ìgũ gameri sã ãhraa. Mari ùaribejari Espĩritu Santo ìgũ gameri mera yujuro mera árĩbeaa. Eropiro marire masiya mariro wahaa. Eropirã mũa Espĩritu Santopũre yũhrirã mũa ùaribejari pũre iisome. Eropirã Espĩritu Santo ìgũ gamerire iiniguicãque. <sup>18</sup> Eropirã Espĩritu Santo gamerire iirã árĩrã “Moise doreri mera mari tarirãca,” arĩ pepibeaa mũa.

<sup>19</sup> Masa erã ñeri ùaribejari erã iicũ òaro ìhamasica mari. Òpa iima erã ùaribejari iirã: Òma gajirã nome mera ñero iima. Nome sã gajirã ùma mera ñero iima. Diayea iiro dopa iiricũma. Ñerire pepima. Ñerire wereniguima. <sup>20</sup> Eropirã goãmarã wéanirãre umupeorã “Mari goãmũ ãhrimi,” arĩ umupeoma. Gajirãre dojama. Eropirã masare doho ãhrima. Ìhaturima. Disitĩri wereniguima. Gajirãre doéma. Mata guama. Gajirãre tarinũgadiama. Yujuro mera árĩdiabeama. Yuju curu majarã gajĩ curu majarãre ìhaturima. <sup>21</sup> Eropirã gajirãre gajinore erã opacũ ìhaturima. Gajirãre wejẽdiarã wejẽma. Merericurã ãhrima. Mererã ñerire ùaribejama. Eropa iirã gajino ñeri sãre iima. Eropigũ yũhũ mũare werediro dopa ta werea daja gũhyadiaro mera. Iri ñerire iiniguigũ Goãmũ ìgũ opũ árĩroguere ejamasisome.

<sup>22</sup> Espĩritu Santo yapũ òpa ãhraa. Erãre òpa iirã árĩcũ iimi. Árĩpehrerãre mahi umupeoma. Mucubirĩma. Gũiro mariro ãhrima. Gajirã erãre ñero iiquerecũ erã mera guabeama. Mojomoro ìhama. Duhuro mariro Goãmũ ìgũ gamerire òaro iima. Erã mohmediarire erã mohmediabiriri sãre òaro iima. <sup>23</sup> Eropirã nijiyajaro mera iima. Erã ñero iidiaquererã iibeama. Eropa ta iima Espĩritu Santore yũhrirã. Eropa iirãre “Eropa iibiricãque,” ne arĩbeami gajigũ. <sup>24</sup> Eropirã mari Jesucristo yarã árĩrã mari ñero árĩdirõre òhucã mari gamerire mari ùaribejari iiniguicãbeaa. <sup>25</sup> Eropirã mari Espĩritu Santo itamuri mera iirã árĩrã ìgũre yũhriniguicãro gahmea. <sup>26</sup> Eropirã mari “Yũhũ gajirãre tarinũgaa,” arĩ pepibiricãrã. Eropirã gajirãre game ìhaturicũ iibiricãrã. Gajirã erã òari oparire obobiricãrã.

## 6

*Mũa mera majarãre itamuque, arĩ werepũ Pablo*

<sup>1</sup> Acawererã, mũa mera majagũ Jesu yagũ ìgũ ñerire iicũ ìha ìgũre itamuro gahmea mũa Espĩritu Santo dorerire iirãpũre. ìgũ iri ñerire òhucũ òaro mera werero gahmea. Eropa itamurã mũa òaro pee masique mũa sã ñerire iiri arĩrã. <sup>2</sup> Eropirã mũa basi game itamuque árĩpehrero. Mũa eropa itamurã Jesucristo dorediro dopa ta iirãca.

<sup>3</sup> Yujugũ “Yũpũ òarire iigũ ãhraa,” arĩ pepigũ, ìgũ òarire iibiriqueregũ òpa arĩgũ ìgũ basi gũyagũ iimi. <sup>4</sup> Eropirã marire òpa iiro gahmea. Mari basi mari iiricũre òaro queoñanũrusiario gahmea. Eropa ìara pũhrũ mari árĩricũri òari árĩcũ ìha “Yũhũ òarire iiaa,” arĩmasia. Eropirã mari òari árĩricũri mera mucubirimasia gajirã árĩricũre ìaro mariro. <sup>5</sup> Eropigũ mari árĩricũre Goãmũ beyegũcumĩ. Eropirã mari gajirã erã iiricũre ìhanũrubiricãro gahmea. Eropirã mari yujurãyeri iiripũre ìaro gahmea.

<sup>6</sup> Eropirã Jesucristo yare òari buherire peerãpũ erãre buherãpũre erã gamerire itamuporo árĩpehrerire òarire.

<sup>7</sup> Eropirã “Goãmũ yũ ñerire iira dipuwaja dipuwaja moasome yũre,” arĩ pepi masiya mara. Õpa arĩ pepirã mũa diaye arĩ pepibirica. Eropiro Goãmũre gũya masiya mara. Eropirã mari dohpaguere iira waja pũhrũgue bocarãca. <sup>8</sup> Eropirã mari ùaribejarire iiniguirã iri ñeri iira waja dipuwajacurãca. Eropirã peamegue warãca. Mari Espĩritu Santo gameripũre iirã õaro wajatarãca. Eropirã Goãmũ mera ùmũri nũcũ õaro árĩniguirãca. <sup>9</sup> Eropirã mari Espĩritu Santo gamerire iinigucãrã. Gariborebircãrã. Goãmũ gamerĩnũ mari wajatarãca õarire duhubirã. Eropirã õarire iinigucãro gahmea. <sup>10</sup> Eropirã árĩpeherrerisubure õaro umupeoro gahmea árĩpeherrerãre. Eropirã Jesucristore umupeorãre bũrigã mahi umupeoro gahmea yujugũ porã iro dopa.

*Pablo ãgu weretura*

<sup>11</sup> Ìata. Yũ basi mũare gojagũ pagari deyori mera gojagũ iiaa. <sup>12</sup> Eropigũ õpa werea mũare. Erã mũare gasiro merogã wiri aĩdorerãpũ õpa gahmema. Erã dorerire mũa iicũ ìha gajirã judio masa erã mera õaro árĩbocoma. Eropirã erãre ñero taricũ iibiribocoma daja erã Jesucristo yare umupeoquerẽcũ. <sup>13</sup> Erã basi gasiro merogã wiri aĩquererã Moise dorerire gajire iibeama. Erã eropa iibiriquererã, mũapũre erã dorerire iidorerã mũa gasiro merogã wiri aĩcũ gahmema erã. Eropa gahmema gajirã judio masare õpa erã arĩboro dopa mucubiriri mera. “Gũa dorero mera Galacia majarã judio masa árĩbirã mari árĩricurire iiaama,” erã arĩboro dopa mũare erã dorerire iicũ gahmema. <sup>14</sup> Yũ tamera erã eropa mucubiridiaro dopa ta ne mucubirissime. Mari Opũ Jesucristo iira mera dihta mucubiria. Ìgu mari ñero iira dipuwajare wajayebasadigũ árĩmi crusague sĩrigũ. Iri dihtare mucubiria. Jesucristo eropa iira mera yũhũ ãgu taudigũ árĩgu masa erã ùaribejarire guñabeaa pare. I ùmũ maja masa erã ùaribejari sã doremasibeaa yũre. <sup>15</sup> Eropiro gasiro merogã wiri aĩcũ, wiri aĩbircũ sãre Goãmũ ìabeami. Masa Jesucristo mera õari mera gohrotorã árĩcũ ìhami. <sup>16</sup> Erã eropa gohrotonirã árĩpeherrerã iri buherire Jesucristo yare yũhrrãre “Erã õaro árĩporo,” arĩ serẽa Goãmũre. “Erãre mũ ya curu majarã gohra árĩrãre mojomoro ìaque,” arĩ serẽbasaa yũhũ Goãmũre.

<sup>17</sup> Yũhũ Jesucristo dorediro dopa ta iigu ãgu yare buhera dipuwaja gajirã yũre ñero taricũ iima. Erã eropa iira camĩ mũra ãhraa yũre yũ dũpũre. Eropigũ õpa gahmea: Iripẽta yũre bũjawerẽcũ iiporo Jesucristo yarãre goroweorã.

<sup>18</sup> Mũare árĩpeherrerãre õaro árĩcũ gahmea. Mari Opũ Jesucristo mũare árĩpeherrerãre õaro iiporo. Eropa ta iiporo. Iripẽta ãhraa.

## Efesios

### *Efeso majarãre gojabeoñumi Pablo*

<sup>1</sup> Yũhũ Pablo Goãmũ ïgũ gamero dopa ta Jesucristo yũre ïgũ yare buhedore apidigũ ãhraa. Eropigũ mũare Efeso majarãre gojabeoa. Mũare Jesucristore ðaro umupeorãre gojabeoa yũhũ. <sup>2</sup> Goãmũ mari Pagũ mera Jesucristo mari Opũ mera mũare ðadore. Ïgũ mũare itamuri mera ðaro árĩque mũa.

### *Cristo yarã mari árĩcũ ïagũ Goãmũ ðaro iimi marire, arĩ gojañumi Pablo*

<sup>3</sup> Goãmũ mari Opũ Jesucristo Pagũ marire ðaro iiniguicãmi. Árĩpehreri ïgũ ya ðari mera ïgũ mari pepirire ðarire ohomi mari ïgũ pohro árĩro dopa. Marire sĩporã turacũ iimi. Cristo yarã mari árĩcũ ïagũ eropa marire ðaro iimi. Gũa ïgũ eropiicũ ïha ðaro umupeoa. Ïgũre ðaro wereniguia. <sup>4</sup> Õpa iipũ ïgũ marire ïgũ yarãre: I yeba árĩboro coregue ïgũ yarã árĩmorãre beyemũhtarũ ïgũ marire. Eropa beyegũ ïgũ marire ïgũ ïarore ñeri iiro marirã mari árĩmorãre iipũ. Eropigũ ïgũ marire “Ñerã ãhrima, arĩsome. <sup>5</sup> Marire mahigũ mojomoro ïagũ iribojegue ðpa arĩmũhtarũ ïgũ marire: “Yũ magũ Cristo ïgũ itamuro mera erã yũ porã ðaro árĩrãcoma,” arĩ apipũ marire iribojegue ta. Ïgũ gamediro dopa ta eropa iipũ ïgũ marire. <sup>6</sup> Marire ïgũ eropa ðaro iicũ ïarã umupeoa. Ïgũre ðaro wereniguia. Ïgũ magũ ïgũ mahigũ Jesucristo yarã mari árĩcũ ïagũ, ðaro iimi ïgũ marire. <sup>7-8</sup> Eropigũ ïgũ magũ Jesucristo ïgũ di cóãgũ sĩrigũ mari ñeri iira dipuwajare wajayebasadi árĩmi. Ïgũ eropa wajayebasacũ mari ñeri iirare cãdijidi árĩmi Goãmũ. Eropigũ marire turaro mahigũ, marire mojomoro ïagũ eropa iipũ Goãmũ. Eropigũ marire peamegue wabonirãre taudi árĩmi. Ïgũ ðaro masipehori mera eropiipũ ïgũ. Eropirã ïgũre ðaro wereniguia. <sup>9-10</sup> Eropigũ ïgũ marire ïgũ iiborore marire masicũ iimi. Iribojegue majarãre irire masicũ iibirimãripũ ïgũ. Õpa ãhraa marire ïgũ iiboro. Ïgũ gamediro dopa ta ïgũ pepidiro dopa ta árĩpehrerãre Cristo dorero doca árĩcũ iigũcumi. Eropigũ árĩpehrerire ïgũ ya árĩcũ iigũcumi. Ïgũ queorasubu árĩcũ mũmaro majarãre, i yeba majarã sãre ïgũ dorero doca árĩcũ iigũcumi ïgũ. Eropigũ mũmaro maja sãre i yeba maja árĩcũ sãre ïgũ ya dihta árĩcũ iigũcumi. Eropigũ Jesucristopũ árĩpehrerã weca opũ árĩgũcumi. Eropiro árĩpehreri ïgũ ya dihta árĩroca. Eropa árĩbure árĩdorepũ Goãmũ ïgũre.

<sup>11</sup> Eropi Cristo yarã mari árĩborore masiyugũ Goãmũ marire beyetuhapũ ïgũ yarã árĩmorãre. I árĩpehrerire apipũ ïgũ, ïgũ pepidiro dopa ta ïgũ gamediro dopa ta iibu. <sup>12</sup> Ïgũ eropiipũ ïgũ yare gũa iiborore. Ïgũ yare gũa ðaro iicũ ïarã gajirã sã ïgũre umupeorã “Turagũ ãhrimi,” arĩrãcoma. Gũapũ judio masa Cristore gamenũganirã árĩrã ïgũre umupeomũhtanirã árĩbũ. <sup>13</sup> Mũa sã diaye wereniguirire, ðari buherire peeabũ. Iri buheri mera ta Goãmũ pohroque warãca mũa. Irere peerã ïgũre umupeoa. Eropirã ïgũ yarã wahabũ mũa. Õpa arĩpũ Cristo: “Yũre umupeorãre Espĩritu Santore obeogũra,” arĩ werepipũ. Eropigũ ïgũre mũa ũa iiborore. Ïgũ yare gũa ðaro iicũ ïarã gajirã sã ïmũpeocũ ïagũ ïgũ Espĩritu Santore odigũ árĩmi mũare. Eropigũ ïgũre mũa opacũ, “Jesucristo yarã ãhraa,” arĩ masicũ iimi ïgũ mũare. <sup>14</sup> Goãmũ marire taricũ iiami. Eropigũ pũhrũ ïgũ pohroque aĩagũcumi marire ïgũ oburire marire obu. Marire aĩaboro core Espĩritu Santopũ mari mera ãhrimi. Ïgũ mari mera árĩcũ Goãmũ mera mari árĩborore ðaro masia. Goãmũ marire ïgũ eropiicũ ïarã ïgũre umupeori mera, “Õagũ ãhrimi,” arãa mari.

### *Pablo Goãmũre serẽbasañumi Jesu yarãre*



15-16 Eropigu Jesucristore umupeorã mũa árĩcũ peebeo, árĩpehrerã ïgu yarãre mũa umupeo mahirire peebeogu Goãmure “Õhaa,” arãa. Eropigu umuri nucũ serēbasaa mũare Goãmure. 17 Mari Pagũ umaro majagu ïgu yare mũare õaro masicũ iidoregu serēbasaa. Eropigu ïgure mũa õaro masinemoboro dopa serēbasaa. ïgu Goãmũ Jesucristo mari Opũ Pagũ ãhrimi. 18 Eropigu mũa õaro masiboro dopa mũare serēbasaa Goãmure. ïgu mũare taugũ, ïgu yarã árĩmorãre iimi ïgu mũare. Eropigu mũare ïgu yarãre ïgu pohro õaro wacũ iigucumi. Irire mũa õaro masiboro dopa serēbasaa yũhũ Goãmure. Eropigu ïgu marire oburi sãre “Õataria ãhraa,” iri mũa arĩ mũa masiboro dopa serēbasaa. Õpa mũa masiboro dopa serēbasaa mũare Goãmure. 19 Mari Jesucristore umupeorãre ïgu itamugũ, ïgu turari mera ïgu iimi. ïgu gajirã tauro turagu ãhrimi. Mũare iri sãre õaro masiboro dopa serēbasaa mari Pagũ Goãmure. 20 ïgu turari mera Cristo sĩridigũre masudigu árĩmi. Eropigu ïgu turari mera umarogue ïgu diayepũ Cristo ïgu doacũ iidi árĩmi Goãmũ árĩpehrerãre ïgu doreboro dopa. 21 Ero doagu árĩpehrerã umaro majarã oparã weca, árĩpehrerã dorerã weca ãhrimi Cristo. Eropigu i umũ majarã weca opũ, gajipũ majarã sã weca opũ, árĩpehrerã dohpague majarã, gajisubũ majarã sã, pũhrũgue majarã sã erã weca opũ árĩbu ta ãhrimi ïgu. 22 Eropigu árĩpehrerã weca, árĩpehreri weca apipũ Goãmũ Cristore. Eropigu árĩpehrerire opũcũcũ iipũ ïgure. Eropiro Cristo yarã yuju curu árĩrã erã opũ árĩbure acupũ ïgure. Erã dipuru iro dopa árĩgu ãhrimi ïgu. 23 Cristo yarã yuju curu árĩrã ïgu dupũ iro dopa árĩrã ãhraa mari. Cristo árĩpehrerogue árĩniguimi. Eropigu mari ïgu yarã mera árĩniguiguũ marire itamuniguicãmi.

## 2

### *Goãmũ marire mahigũ, mojomoro ïagu taupũ marire, arĩ gojañumi Pablo*

1 Ñeri dipuwajacubonirã peamegue dederebonirã árĩquerecũ ta Goãmũ mũare taumi. 2 Iribojeguere i yeba majarã Goãmũ tarinũgarã iro dopa iimũrinirã árĩribũ mũa. Eropirã watĩ ïgu gamero dopa ta iimũrinirã árĩbu mũa. ïgu watĩ i yeba doregu Goãmure tarinũgarã opũ ãhrimi. 3 Iribojegue árĩpehrerã mari õpa dihta iinirã árĩribũ. Mari ñeri dihtare ãaribejaribũ. Mari ejatuharo mari pepiro dopa iimũriribũ. Eropa árĩrã gajirã árĩpehrerã iro dopa ta mari sã ñerã árĩmũriribũ. Mari árĩpehrerã masa mera Eropa árĩrã árĩcũ ïagu Goãmũ mari mera guagu dipuwaja moadiaripũ. 4 Eropa iidiaqueregu ta marire turaro mahigũ mojomoro ïapũ. 5 Eropa mahitarigũ mari ñeri iira waja peamegue dederebonirã mari árĩquerecũ ta marire ïgu mera árĩniguimorã árĩcũ iimi. Jesucristo ïgu sĩribasara mera mari ïgu yarã árĩcũ marire iimi. Marire mojomoro ïagu taumi ïgu marire. 6 Goãmũ Jesucristo sĩridire masugũ ïgu pohro apidigu árĩmi árĩpehrerãre dorebu. Eropigu ïgu mari sãre ïgu yarãre Cristo dorerire opacũ iimi. Eropirã ïgu pohro ïgu mera árĩrãca mari. 7 Eropiimi ïgu pũhrũgue majarã marire ïgu mojomoro ïarare erã masiboro dopa. Jesucristo marire ïgu õaro itamura mera ïgu masare turaro ïgu mahirire ïhmumi. 8 Cristore mari umupeocũ Goãmũpũ marire taricũ iimi. Marire mahigũ ïgu pohro ejacũ iigucumi. Mari gamero õaro iiricuri mera Goãmũ pohro ejadiarã ejamasisome. Mari iibiriquerecũ apimi mari ïgu pohro ejaburire. Eropiro waja mariro umuri nucũ ïgu mera mari árĩburire ohomi marire. 9 Mari basi tarimasibirica. Mari iiri mera mari gamero mera tarirã mari “Gũa basi taria,” arĩboca. Goãmũpũ marire taumi ïgu pohro mari wamorãre. 10 Jesucristo yarã árĩcũ iimi marire Goãmũpũ. Eropigu Jesucristo yarã mari árĩcũ ïagu õarire iirã dihta wacũ iimi marire. Iribojegue ïañumi marire õarire iimorãre.

### *Cristore oparã õaro ãhraa, arĩ gojañumi Pablo*

<sup>11</sup> Eropirã mũa ero coregue árřricurare dohpague sãre guñaque. Mũare judio masa árřbirãre gũa judio masapũ řhaturimuribũ. Gũa circuncisi3n iinirã gasiro merogã wiri añnirãpũ mũare gasiro merogã wiri añbirãre “Goãmũ yarã árřbeaa mũapũ,” arřmuribũ mũare. <sup>12</sup> Irisubure mũa Cristo yarã árřbirã boje majarã arřmuribũ. Goãmũ beyenirã judio masa iro dopa árřbirimuribũ mũapũ. Mũa eropa arřnirã řgu beyenirã mera pepũri majarã řhaturirã arřmuribũ. Goãmũ mũare “Masare õaro iigura,” řgu arř apinirã árřbirinirã arřribũ mũa. Mũa ñeri dipuwaja peamegue wabonirã arřrã arřribũ mũa. Goãmũ moorã arřnirã peamegue dederebonirã arřnirã arřribũ. <sup>13</sup> Dohpaguepũre Jesucristo yarã ãhraa pare mũa. Iribojegue boje majarã arřnirã arřquererã, dohpaguere řgu yarã ãhraa pare mũa. Cristo mũa ñeri dipuwaja crusague řgu di cóara pũhrũ Goãmũ yarã arřcũ iimi mũare. <sup>14</sup> Eropigũ judio masare mũa řhaturirã arřcũ Cristo marire bosadigũ arřmi. Masare bosagũ ãhrimi řgu. Judio masa, judio masa arřbirã mera pe curu mari arřcũ řagu řgu marire yuju curu ta arřcũ iidĩ arřmi. Mari řhaturiri duhucũ õaro mera arřcũ iimi řgu marire. <sup>15-16</sup> Őpa iimi řgu marire. Mari ñeri dipuwaja crusague sřrigũ, marire peamegue wabonirãre taugũ iimi. Eropa taugũ řgu yarã řgu iimi marire. Eropigũ mari řgu yarã wacũ pe curu mari arřquerecũ ta yuju curu ta mama curu iimi marire. Eropigũ iribojegue mari game řhaturinirã arřquerecũ ta marire crusague sřribasagũ bosadigũ arřmi. Eropigũ judio masa doreri pehrecũ iimi řgu. Erã doreri marire dũca wayoro pe curu majarã wacũ. Eropigũ yuju curu ta arřcũ iimi pare. Eropigũ Cristo Goãmũ yarã arřcũ iimi marire.

<sup>17</sup> Eropigũ marire bosagũ arigũ õari buherire Goãmũ mera õaro arřburire weregũ aridi arřmi. Mũa judio masa arřbirã Goãmũre opabirã boje majarã arřnirã arřribũ. Mũa eropa arřcũ řagu mũare õari buherire weregũ aridi arřmi. Gũa judio masa sãre Goãmũ yare oparã sãre weregũ aridi arřmi. Eropigũ arřpehrerãre marire bosagũ aridi arřmi řgu. <sup>18</sup> Dohpagueere arřpehrerã gũa judio masa, mũa judio masa arřbirã sã mari Pagũ mera õaro arřmasia mari. Espřritu Santo řgu itamuri mera Cristopũ marire eropa arřcũ iimi. <sup>19</sup> Eropirã dohpagueere mũa boje majarã arřbeaa. řgu ya curu majarã ta ãhraa. Goãmũ yarãre řhaturirã arřbeaa. Goãmũ yarã mera majarã ãhraa pare. <sup>20</sup> Goãmũ yare weremũhtanirã iribojegue majarã řgu ya wereniguirire goja, masare weremũriũma. Gũa sã řgu yare buhedore apinirã Jesucristo ya õari buherire werea masare. Gũa arřpehrerã eropa werecũ peerã Cristore umupeonũgabũ mũa. Cristopũ ãhrimi mari arřpehrerãre řgu yarã arřcũ iigũ. řgu eropa iibiricũ mari řgu yarã arřmasibiriboya. <sup>21</sup> Eropigũ řgu turari mera marire řgu yarãre yuju curu ta arřcũ iimi řgu marire. Eropirã řgu turari mera õarã wahaa mari. Mari eropa arřcũ řagu řgu mari Opũ ta mari mera ãhrimi. <sup>22</sup> Eropirã Cristo yarã arřrã arřpehrerã gajirã mera řgu yarã mera yuju curu wahabũ mũa sã. Mũa eropa wacũ Goãmũ řgu Espřritu Santo mũa mera ãhrimi.

### 3

#### *Judio masa arřbirãre õari buherire wereũumi Pablo*

<sup>1</sup> Mũa judio masa arřbirã eropa řgu ya curu majarã arřburire yũ werera dipuwaja peresugue ãhraa yũhũ. <sup>2</sup> Mũare judio masa arřbirãre Jesucristo yare buhebure Goãmũ yũre apimi. Yũre mojomoro řagu, yũre mahigũ õari buherire yũre weredoregũ, yũre apimi. Irire peetuhabũ mũa. <sup>3</sup> Iribojegue masa erã masibirirare Goãmũ dohpagueere yũre masicũ iimi. Ire merogã were mũare gojabeotuhabũ. <sup>4</sup> Yũ eropa gojabeorare buherã Cristo řgu yare yũ masirare masirãca mũa sã. <sup>5</sup> Iri řgu wererare iribojegue majarãre řgu erã masipehocũ iibiripũ. Dohpaguepũre gũare Jesu řgu apinirãre Goãmũ yare weremũhtarã sãre irire masipehocũ iimi Goãmũ. řgu

Espíritu Santopu guare masicũ iibasami. <sup>6</sup> Ōpa āhraa ĩgu werera gajirā masibirira: Judio masa dihtare Goāmũ itamubeami. Judio masa árĩbirā sãre ĩgu itamumi. Ōari buherire erā ōaro peecũ itamugũcumĩ ĩgu erãre. Eropirā gũa judio masa, mũa judio masa árĩbirā mera yuju dũpũ iro dopa yuju curu ta āhraa mari. Eropirā mari árĩpehrerā Jesucristo yarā árĩrā yujuro mera Goāmũ ĩgu masare “Ōaro iigũra,” ĩgu arĩ werepirare oparãca mari.

<sup>7</sup> Goāmũ mojomoro ĩagũ yũre mahigũ ire ōari buherire werebure yũre apimi. ĩgu masiri mera apimi ĩgu yũre. <sup>8</sup> Árĩpehrerā gajirā Jesucristo yarā erā doca árĩrā erā docague majagũ gohra āhraa yũhũ. Yũ eropa árĩquerecũ ta judio masa árĩbirãre ōari buherire werebure apimi Goāmũ yũre. Iri buheri Cristo ōatariagũ ĩgu árĩrire, ōatariari ĩgu oparire, ōaro ĩgu oburire werebure apimi yũre. <sup>9</sup> Yũre eropa apigũ Goāmũ “Ōpa masare taugũca,” arĩgũ, árĩpehrerā masare dohpa ĩgu itamuborore ōaro werepehobure apimi yũre ĩgu. Goāmũ árĩpehrerire ĩhacũnugudigũ āhrimi. Iribojegue majarãre irire masare ĩgu tauborore masare werepehobirinipũ Goāmũ. Dohpaguere yũre iri ōari buherire weredoregũ apimi masare ĩgu ōaro tauborore masicũ iibu. <sup>10</sup> Eropirā iri buheri mera masa ĩgu yarā wahama. Erā eropa wacũ ĩha umaro majarã oparã anyua Goāmũ masipehogũ ĩgu árĩricũrire masima. Erā eropa masicũ gamepũ Goāmũ. <sup>11</sup> Eropigũ i yeba árĩboro coregue ta “Masare peamegue wabonirãre taugũra,” arĩtuhapũ Goāmũ. Eropa arĩdigũ árĩgũ dohpague mari Opũ Jesucristo ĩgu sĩriro mera ĩgu arĩdiro dopa ta marire taudi árĩmi. <sup>12</sup> ĩgu eropa taucũ dohpaguere Cristore umupeorã ĩgu yarā wahaa mari. ĩgu yarā árĩrā gũiro mariro Goāmũ mera wereniguimasia mari. Eropirā gũibiricãque mũa. <sup>13</sup> Eropirā ōari buherire yũ wereri waja dohpaguere peresugue árĩgũ yũ ñero taricũ ĩarã bujawerenijarã Goāmũ yare duhubiricãque. Ōari buherire yũ werecũ peerã Goāmũ yarā wahabũ mũa. Yũhũ eropiira dipuwaja peresugue āhraa. Eropa árĩgũ mũa ĩgu yarā árĩburire ñero tarigũ iiaa. Eropigũ turaro mucubiridorea mũare.

### *Cristo masare turaro mahimi, arĩ gojañumi Pablo*

<sup>14</sup> Eropigũ i árĩpehrerire mari Opũ Jesucristo Pagũ ĩgu iirare guñagũ mereja ĩgũre serēbasaa mũare. <sup>15</sup> Árĩpehrerā ĩgu yarā Pagũ āhrimi. ĩgu árĩpehreri cururi majarã ĩgu yarā ĩgu pohrogue árĩrã i yeba árĩrã sã erã Pagũ āhrimi. <sup>16</sup> ĩgu masipehogũ āhrimi. Turatarigũ āhrimi. Eropigũ ĩgũre ōpa serēbasaa mũare. Mũare sĩporã ĩgu masiri mera ōaro turacũ iiboro dopa serēbasaa mũare. Eropigũ Espĩritu Santo ĩgu itamuri mera eropa iigũcumĩ. <sup>17</sup> Eropigũ Cristore “Diaye iigũ āhrimi,” mũa arĩ umupeonemoboro dopa ĩgu mũa mera ōaro árĩboro dopa serēbasaa mũare. Eropigũ gajirãre ōaro mahirã mũa árĩboro dopa, Cristo ĩgu turaro mahirire mũa masiboro dopa serēbasaa mũare. <sup>18-19</sup> Mũa árĩpehrerā gajirã Goāmũ yarā mera “Cristo ĩgu marire turaro mahimi,” mũa arĩmasiborore serēbasaa mũare. ĩgu mari masare turaro mahigũ āhrimi. ĩgu mahiri eropa ōatariari árĩcũ mũa ōaro masiboro dopa serēbasaa mũare. Eropigũ ĩgu mahirire mũa masicũ gahmea Goāmũ mũa mera ĩgu ōaro árĩboro dopa. Eropigũ irire serēbasaa mũare Goãmũre.

<sup>20</sup> Eropirã Goãmũre wũaro umupeori mera “ĩgu turagũ āhrimi,” arĩrãca. ĩgu turari mera ōaripũre gohrotomasimi ĩgu marire. Marire ōarã árĩcũ iimasimi. Mari serēra tauro iimasimi ĩgu. Mari gamerire, mari pepira tauro iimasimi ĩgu. <sup>21</sup> Jesucristo yarā mari árĩcũ ĩha Cristo ĩgu árĩricũri sãre ĩha árĩpehrerĩre. Eropigũ ĩgu mahirire mũa masicũ gahmea Goāmũ mũa mera ĩgu ōaro árĩboro dopa. Eropigũ irire serēbasaa mũarũri árĩpehrerã Goãmũre umupeoporo. Eropa ta iiporo.

## 4

*Cristo yarã árĩrã yuju curu ta ãhraa mari, arĩ gojañumi Pablo*

<sup>1</sup> Mari Opure yu itamuri waja peresugue árĩgu mũare turaro werea yũhũ. Goãmũ ãgu yarã árĩmorãre mũare beyepũ. Eropirã ãgu beyenirã árĩrã ãgu árĩdoreldiro dopa ta õarã árĩque mũa. Irre mũare werea yũhũ. <sup>2</sup> Õpa iirã õarã árĩque mũa: “Gajirãre masitarinũgaa yũhũ,” arĩ pepibircãque. Gajirãre õaro mera iique. Eropirã guabircãque. Mũa mera majarã mũare gariboquerecũ ta erãre umupeori mera yuju diaye ãacãque. <sup>3</sup> Eropirã Espĩritu Santo ãgu itamuri mera õaro mera yujuro mera árĩniguique mũa. Eropirã gamequeãro mariro árĩcãque mũa. <sup>4</sup> Yuju dũpũ iro dopa yuju curu ta ãhraa mari. Eropigu Espĩritu Santo yujugu ta ãhrimi marire. Eropigu Goãmũ ãgu yarã árĩmorãre marire beyemãripũ marire itamubu. Eropirã ãgu itamubore masia mari. Iri mari masirañe yujuñe ta ãhraa. <sup>5</sup> Mari Opũ Cristo mari umupeogu yujugu ta ãhrimi. ãgu buheri sã yujuñe ta ãhraa. ãgu yarãre waĩyeriñe sã yujuñe ta ãhraa. <sup>6</sup> Eropigu Goãmũ yujugu ta ãhrimi. ãgu árĩpehrerã Pagũ ãhrimi. Eropigu árĩpehrerã weca mari Opũ ãhrimi. Eropigu árĩpehrerãre marire itamumi ãgu. Árĩpehrerã mari mera ãhrimi ãgu. Eropigu árĩpehrerogue ãhrimi ãgu.

<sup>7</sup> Yuju curu mari árĩquerecũ ta árĩpehrerã marire yujurãyerire mari mohmemasiburire apidi árĩmi marire Cristo. ãgu eropa apidiro dopa ta mohmemasia mari. ãgu marire eropa apigu gajinore ãgu eropa ocãbodiropo dopa ta apidi árĩmi ãgu marire.

<sup>8</sup> Eropo ta ãhraa Goãmũ yare erã gojarapũgue sã:

Goãmũre ãhaturirãre ãgu tarinũgara pũhrũ ãgu dipaturi mũria wagũcumĩ. Eropigu masare baja eropa ocãgũcumĩ, arĩ gojañuma iribojegue Jesucristo ãgu eraboro coreguere.

<sup>9</sup> Erã eropa arĩ gojarã õpa werediarã iiriñuma: Jesucristo mũmũsigue mũria wadigu árĩgu ãgu ero coreguere dijarimũhtadigu árĩmi. I yebaguere dijaridigu árĩmi.

<sup>10</sup> Eropigu ãgu dijaridi mũria wadi ta árĩmi Goãmũ pohrogue. Árĩpehrero weca mũria wadi árĩmi ãgu árĩpehrerogue árĩbu. <sup>11</sup> Eropigu ãgu yarãre baja eropa ocãgu erã Goãmũ ya árĩburire mohmemasiburire apidigu árĩmi. Erã mohmemasiburire õpa apidigu árĩmi ãgu yarãre. Yujurãyerire Cristo ãgu buherare buhemorãre apidi árĩmi. Gajirãre Goãmũ yare weretaumorãre apidigu árĩmi. Õari buherire buhe curimorãre gajirãre apidi árĩmi. Cristo yarã gamenererã oparã árĩmorãre erãre õaro buhemorãre apidi árĩmi gajirãre. <sup>12</sup> Eropo dihta apidigu árĩmi marire gajirã ãgu yarãre mari game itamuboro dopa. Eropo apidigu árĩmi marire ãgu yarãre, ãgure mari umupeonemoboro dopa, sĩporã turarã mari waboro dopa. <sup>13</sup> Eropirã mari árĩpehrerã õaro mera, yujuro mera árĩrãca. Eropo ta árĩro gahmea marire Cristore umupeorã árĩrãre. Eropirã mari árĩpehrerã Goãmũ magure Jesucristore õaro masirãca. Eropirã Cristo turagu, pee masigu ãgu árĩro dopa ta, mari sã pee masia warãca. <sup>14</sup> Mari eropa warã majirãgã iro dopa árĩsome mari. Majirãgã iro dopa ta árĩrã õaro pee masinibeama dohpa. Eropirã gajirã guyarã erãre buherã eracũ “I diaye ãhraa,” erã arĩcũ erã peema. Pũhrũ gajirã gajiropa árĩri buherire buherã eracũ erã sãre peema. Erã iro dopa árĩsome mari. <sup>15</sup> Eropo árĩbirã mari mera majarã mera game mahirã diaye ta wererire game wererãca mari. Eropirã majirãgã erã bũga erã pee masirã erã waro dopa ta mari sã Goãmũ yare pee sĩporã turarã Goãmũ yare õaro masirã warãca. Cristo ãgu árĩro dopa ta warãca. ãgu ãhrimi mari dipuru. <sup>16</sup> ãgu yarã árĩrã ãgu dũpũ iro dopa yuju curu ta ãhraa mari. Mari bajarã árĩquererã ta yujuro mera õaro árĩrã iiaa. Mari eropa árĩborore Cristo itamumi. Eropirã mari yuju dũpũ iro dopa õaro gamesurirã mari õaro itamua gajirãre Cristo yarãre. Eropirã mari mera majarãre Cristo yarãre õaro mahirã, erãre õaro itamurã, turarã, Cristore umupeonemorã árĩrãca mari.



*Cristo yarã warã mari ñerire duhu, ðaripure gohrotoa mari, arĩ gojañumi Pablo*

<sup>17</sup> Eropi mari Opũ Cristo ĩgu dorero mera ðpa werea mũare. Goãmure gamebirã gohra iiro dopa iibiricãque mũa. Erã, erã pepiripũ ñeri dihta áhraa. Eropiro erã pepiri duhpiburi árĩbeaa. <sup>18</sup> Eropigu watĩpũ Goãmũ yare erãre peebiricũ iimi. Eropirã Goãmũ yapure peebirigohracãma. Peediabeama erã. Eropirã Goãmũ ĩgu ðaro árĩdoreldiro dopa ta árĩbeama erã. <sup>19</sup> Eropirã erã ñerire iirã ne gahyasĩribirigohracãma. Eropirã ne bujawerebeama. Ñerire erã uaribejari dihtare iiniguicãma. Árĩpehreri ñerire erã iirire ne duhudiabirã iinemoniguicãma. <sup>20-21</sup> Mũapũ diaye ta ĩgu yare peerã mũa árĩcũ, Jesucristo yare ðaro masirã mũa árĩcũ mũapure erã ñero iiro dopa iidorebeamĩ Goãmũ. <sup>22</sup> Iribojegue ñerire iiniguicãrã mũa árĩcũ iri ñeripũ mũare goroweoro iidiro árĩbũ. Iri ñeri iiri mera mucubiridiaquererã ta ne mucubirimasibirimũribũ mũa. Eropirã “Iribojegue mũa árĩrare duhucãque,” yũ mũare arĩ buhecũ peebũ mũa. <sup>23</sup> Eropirã mũa pepiripure ðaripure gohroto gahmea mũare. <sup>24</sup> Ero core mũa ñero iirare duhucãque. Eropirã ðaripure gohrotonirã árĩque mũa. Goãmũ ĩgu ðagu árĩldiro dopa mũare ðarã árĩcũ iimi. ĩgu eropa iinirã árĩrã ðarire iiniguicãrãca. Eropirã ñerire gamebirãca.

<sup>25</sup> Mari yuju dũpũ iro dopa yuju curu majarã ta árĩrã iiaa. Eropirã mũa basi gũyabita. Mũa mera majarãre diaye wereque gũyaro mariro.

<sup>26</sup> Gajirã mera guarã, erãre ñero iibiricãque. Mata irinũ ta amucãque gua wajaro mariro. <sup>27</sup> Yoari boje guarã watĩ ĩgu gamero dopa iirã iiaa. Eropa iibiricãque.

<sup>28</sup> Gajirã mũa mera majarã Jesu yarã erã árĩboro core yajari masa árĩnirã árĩñorã. Dipaturi yajabiricãporo. Eropirã dohpaguere ðaro mohmeporo. Mojomorocũrãre oburire mohmeporo.

<sup>29</sup> Ne ñero wereniguibiricãque. Òarire wereniguirã gajirãre itamua mũa. Erã bujawererã erã árĩcũ ĩarã eropa ta mucubiricũ iicãque erãre. Eropirã ðari dihtare wereniguique. <sup>30</sup> Ñerire iirã Espĩritu Santore bujawerecũ iirã iiaa mũa. Eropa iibiricãque. Dohpaguere ne i mũũ pehrerinũ core, Cristo marire ĩgu aĩgãboro core, Espĩritu Santo marire ĩhadibumi. Ñerire mari iibiriboro dopa ĩhadibumi. Eropigu Cristo yarã mari árĩrere masicũ iimi ĩgu marire. Eropirã ĩgure bujawerecũ iibiricãque mũa.

<sup>31</sup> Eropirã ne papũriniguibiricãque. Guanemobiricãque. Game dũyasonemobiricãque. Erãre ñero arĩ gaguiniguibiricãque. Gajirãre quere moanemobiricãque. Gajirãre ĩhaturinemobiricãque. <sup>32</sup> Eropi mũa mera majarãre ðaro mera ðaro iique. Cristo yarã mũa árĩcũ ĩagu mũa ñerare cãdijicãmi Goãmũ. Eropa ta mũa sã gajirã mũare erã ñero iicũ ĩarã erã ñerire cãdijicãque.

## 5

*Goãmũ porãre ðpa árĩro gahmea, arĩ wereñumi Pablo*

<sup>1</sup> Eropirã Goãmũ porã ĩgu mahirã árĩrã ĩgure ĩhacũque mũa. <sup>2</sup> Eropirã gajirãre mahi umupeoniguicãque. Cristo marire mahigu, mari ñeri iira waja sĩripũ. Eropa sĩrigũ Goãmure mucubiricũ iipũ ĩgu. Eropirã marire ĩgu mahldiro dopa ta mũa sã gajirãre game mahique.

<sup>3</sup> Eropirã Goãmũ yarã árĩrã ne nome mera ñero iibiricãque. Nome sã mũa mera ñero iibiricãque. Gaji ñerire eropa árĩrere ne iibiricãque. Gajinore gametaribiricãque. Ne eropa iibiricãro gahmea Goãmũ yarã árĩrãre. <sup>4</sup> Eropirã gahyasĩuro wereniguibiricãro gahmea mũare. Pee masibirã iro dopa wereniguibiricãro gahmea mũare. Eropirã ñero arĩ wereyabiricãro gahmea. Ipure iiro gahmea mũare: Goãmure serẽro gahmea mũare. Eropa serẽrã ĩgure, “Òaro iabũ mũhũ gũare,” arĩro gahmea. <sup>5</sup> Gajinore gametarirã goãmarã wãnirãre erã umupeoro dopa iirã iiaa mari

irire. Eropirã nome mera ñero iirã, ñeri dihtare pepirã, gajinore gametarinugarã Goãmũ Cristo mera ĩgu opu árĩroguere ne wasome erã. Irire ðaro masia mari. <sup>6</sup> Ōpa iirãre erã iira dipuwaja, turaro dipuwaja moagũcumi ĩgure tarinuganirãre. Eropirã gajirã mware gajiropa arĩmaacãcũ erã gũyarire peebiricãque. <sup>7</sup> Eropirã eropa ñerire iiniguicãrãre wapicubiricãque.

<sup>8</sup> Cristo yarã mwa árĩboro core mwa sã eropa ta iinirã árĩribũ. Dohpaguepũre ĩgu yarã árĩrã, Goãmũre ðaro masia mwa. Goãmũ yarã ðarire iima. Eropirã eropa ta iiro gahmea mware. <sup>9</sup> Eropirã Cristo yarã árĩrã ðarire, Goãmũ gamerire, diaye maja árĩrire iirãca mwa. <sup>10</sup> Ōarire mari iicũ ĩagu mari Opu Cristo mucubirimi. Eropa ðarire iiburire ðaro masique mwa. Eropa masirã irire iique. <sup>11</sup> Cristore gamebirã ñeri erã iimaacãri ñeri gohra āhraa. Eropa erã iiro dopa ta mwapũ iibiricãque. Ōari buherire Cristo yare wereque erãre. Eropirã erã ñeri iirare erãre masicũ iique. <sup>12</sup> Masa erã ĩabiro erã ñero iicorema. Erã eropa iirare mari wereniguirã guhyasĩriboca. Eropirã ñetariaro iirã iima erã. <sup>13</sup> Eropirã erãre ðari buherire mari wererã, ñetariarã erã árĩricũre erãre masicũ iirã iiaa mari. Erã ñeri iirire erãre masicũ mari iicũ erã ñeri iirire bujawerebocoma. Eropirã ðaripũre gohrotobocoma. <sup>14</sup> Iri diaye ta āhraa. Eropirã ōpa wereñorã Goãmũ yare wererã:

Ne, yũre peediabirã, yũre peeque. Mwa ñero iirare bujawereque. Irire ñero iirire duhuque. Eropigũ Cristo mwa ñeri iirire masicũ iigu, mware ðarire masicũ iigũcumi, arĩñorã.

<sup>15</sup> Eropirã umuri nũcu ðaro iique mwa. Pee masibirã iro dopa árĩbiricãque. Pee masirã árĩque. <sup>16</sup> Dohpague majarã masa ñetariaro iiniguima. Eropirã mwapũ ðarire, Cristo yare mwa iiniguirã mata erã Cristo yarã árĩcũ itamuque. <sup>17</sup> Eropirã pee masibirã árĩbiricãque. Goãmũ ĩgu gamerore ðaro masique. Eropirã irire iique. <sup>18</sup> Eropirã ne merebiricãque. Mererã erã basi ñero goroweoma. Eropirã merediabirã, Espĩritu Santopũre burigã gameque. ĩgure ðaro yũhrirã árĩque. <sup>19</sup> Eropirã mwa basi Goãmũre umupeori bayarire game bayaque. Eropirã Salmo gojaripũre, Goãmũ yare bayarire, gaji ĩgure umupeori bayari sãre ĩgure bayapeoque. Ōaro guña umupeori mera bayapeoque. Eropirã mari Opũre “Ōagu āhrimi,” arĩ ðaro umupeoque. <sup>20</sup> Goãmũ mari Pagũ árĩpehrerire mware ĩgu ðaro iirire guñaniguicãque mucubiriri mera. Mari Opu Jesu yarã árĩrã ĩgure “Ōhaa,” arĩniguicãque mwa.

*Mwa yuju wihĩ majarã Jesu yarã árĩrã, ōpa iique, arĩ wereñumi Pablo*

<sup>21</sup> Mwa mera majarãre game umupeo yũhrique. Mwa eropa game umupeo yũhrirã Cristo sãre umupeo yũhrirãca.

<sup>22</sup> Mwa marasã nomere weregũra dohpaguere. Mari Opũre Cristore mari yũhriro dopa ta mwa marapũ sumarãre ðaro yũhrique. <sup>23</sup> Jesucristo marire taudigũ árĩmi ĩgu ya curu majarã mari árĩboro dopa. Eropirã mari ĩgu ya curu majarã árĩcũ mari Opu ĩgu árĩro dopa ta mwa marapũ sumarã mwa marasã nomere weca oparã āhrima. <sup>24</sup> Eropirã Cristo yarã árĩrã ĩgure yũhria. Eropirã mari Cristore yũhriro dopa ta mwa marapũcũrã nome mwa marapũ sumarãre ðaro yũhrirã nome árĩque.

<sup>25</sup> Mwa marapũ sumarã sãre weregũra dohpaguere. Cristo marire ĩgu yarãre mahigũ mari ya árĩburire sĩridigũ árĩmi. Eropirã marire ĩgu mahidiro dopa mwa sã mwa marasã nomere eropa mahiniguicãque. <sup>26</sup> Cristo marire ĩgu yarã árĩcũ iibu sĩripũ mari ñeri marirã árĩcũ iibu. Eropigũ mari ñerire coeweadi árĩmi ĩgu wereniguri mera deco mera ĩgu waĩyeri mera. <sup>27</sup> Eropa coeweadi árĩmi ĩgu marire ĩgu yarã ðarã árĩmorãre iigu. ĩgu eropiicũ ñeri dipuwaja marirã árĩrãca ĩgu ĩacũ. Ne merogã eropa árĩri ñeri árĩsome marire. Eropirã ðarã Cristo iro dopa árĩrãca.

<sup>28</sup> Eropirã mwa marasã nomere mahi umupeorã, mwa basi mwa dũpũre mwa umupeoro

dopa ta m̄a m̄a marapore umupeoque. Īḡu marapore umupeogu ĩḡu basi umupeogu iimi. <sup>29-30</sup> Ne mari d̄up̄are ñero wac̄ũ gamebeaa mari. Mari basi mari ya d̄up̄are ĩhadibua. Cristo yarã árĩrã ĩḡu d̄up̄u iro dopa āhraa. Eropiḡu marire ĩḡu ðaro ĩhadibumi. Eropirã Cristo marire ĩḡu ðaro iidiro dopa ta mari sã mari d̄up̄are ðaro iiaa. Mari marasã nome sãre eropa ta ðaro iiro gahmea marire. <sup>31</sup> Eropã ta āhraa Goãm̄u yare erã gojarapũgue: Ōpa gojara āhraa: “Eropi um̄u ĩḡu paḡu s̄umarãre wiriḡu, ĩḡu marapo mera árĩcãḡucumi. Eropirã erã perã árĩquererã ta yuju d̄up̄u iro dopa árĩrãcoma,” arĩ gojañumi iribojegue. <sup>32</sup> I gojarare ðaro peebirinirã árĩma. Eropiḡu irire ðaro wereḡura m̄uare. Ōpa werero iica: Cristo ĩḡu yarã mera yuju d̄up̄u iro dopa ta yuju curu ta āhrima. <sup>33</sup> Eropiḡu m̄uare ðpa arĩ werenemoḡura daja: M̄u basi m̄u mahiro dopa ta m̄u marapo sãre mahi umupeoque. Eropirã nomer̄u m̄u marap̄u s̄umarãre ðaro ḡuhyadiaro mera umupeoque m̄u.

## 6

<sup>1</sup> Dohpaguere majirãre wereḡura: Mari Op̄u Cristo yarã árĩrã m̄u paḡu s̄umarãre ðaro ȳhrirã árĩque. M̄u eropiirã ðaro iirã iiaa. <sup>2-3</sup> Ōpa arĩñumi Goãm̄u doreḡu: “M̄u paḡu s̄umarãre ðaro umupeoque,” arĩ doreñumi ĩḡu. I doreriñe mera Goãm̄u werenemoñumi. Ōpa arĩñumi: “M̄u paḡu s̄umarãre umupeorã i yebaguere yoari boje mucubiriri mera árĩrãca m̄u,” arĩ wereñumi. Eropã arĩḡu ĩñe doreriñe mera, “M̄u eropã iirã ðaro árĩrãca,” arĩ werem̄htañumi Goãm̄u. Eropirã ĩḡu arĩdiro dopa m̄u paḡu s̄umarãre umupeoque m̄u.

<sup>4</sup> Dohpaguere erã paḡu s̄umarãre wereḡura. M̄u porãre eropã turiniguibiricãque guac̄ũ iiri arĩrã. Mari Op̄u Cristo ĩḡu mahiri mera ĩḡu itamuri mera erãre ðaro mera masuque. Eropirã erãre masurã ðaro wereque.

<sup>5</sup> Dohpaguere pohro majarãre wereḡura. Ḡuhyadiaro mera umupeori mera i yeba majarãre m̄u oparãre ðaro ȳhrirã árĩque. Ḡuyaro mariro ðaro ȳhrirã árĩque. Cristore m̄u ȳhribodiro dopa ta ȳhrique erãre m̄u. <sup>6</sup> Erã ĩhuro dihtare ȳhrirã árĩbiricãque ȳre ĩhasuaporo arĩrã. Erã ĩhurore m̄u ȳhriro dopa ta erã ĩabiro sãre ðaro iirã árĩque. Cristo ĩḡu pohro majarã m̄u árĩbodiro dopa ta m̄u oparã sãre eropã ȳhriniguicãque. Eropirã Goãm̄u ĩḡu gamero dopa ta ðaro mucubiriri mera m̄u oparãre ðaro ȳhrirã árĩque. <sup>7</sup> Eropirã “Cristop̄re ȳhrirã iiaa,” arĩ pepirã mucubiriri mera ȳhrique m̄u oparãre. <sup>8</sup> Eropirã ire guñaque: Árĩpehrerã mari árĩpehreri ðarire mari iic̄ũ ĩaḡu Goãm̄u ðaro iiḡucumi marire. Pohro majarãre, pohro majarã árĩbirã sãre ðaro iiḡucumi ĩḡu.

<sup>9</sup> Eropiḡu oparã sãre wereḡura: M̄u pohro majarãre ðaro iique. Erãre ðaro ȳu iidoreldiro dopa ta iique erãre ðaro. Ōpa masique. Um̄usi majaḡu Goãm̄u diaye ta erã op̄u āhrimi. M̄u yaḡu op̄u āhrimi ĩḡu. Eropirã m̄u árĩpehrerã ĩḡu pohro majarã dihta āhraa. Eropiḡu ĩḡu yujuropa ĩhami m̄uare árĩpehrerãre. Eropirã turibiricãque m̄u pohro majarãre.

### *Cristo yarã watĩre erã cãhmotarire wereñumi Pablo*

<sup>10</sup> Ōpa weretuḡura m̄uare. Ōaro guñaturarã árĩque m̄u. Mari Op̄u Cristo m̄u mera āhrimi. Eropirã ĩḡu ya turari mera guñaturarã árĩque. <sup>11</sup> Watĩ marire ĩḡu pepiri mera ḡuyaḡu ñero iidoremi marire. Mari Jesucristore umupeorire goroweodiami. Goãm̄up̄u marire cãhmotami ñerire mari iibiriboro dopa. Marire ĩḡu cãhmotaro surara ĩḡu cãhmotari suhriro come suhriro iro dopa āhraa. Eropirã iri suhri mera erã cãhmotaro dopa ta Goãm̄u ĩḡu yare iirã cãhmotaque watĩ ĩḡu ñero iidorerire. <sup>12</sup> Jesu yarã mari árĩc̄ũ marire goroweodiarã masa gohra árĩbeama. Erã bajarã umaro majarã, ñerã, turarã, oparã erãp̄u āhrima. Watĩ ĩḡu mera majarã mera i um̄u majarãre Jesucristo yarã árĩbirãre dorema erã.

Eropirã erã mari Jesucristo yarã árĩcũ marire goroweodiana. <sup>13</sup> Eropirã erã marire goroweobiricũ dohpaguere Goãmũ yare opapehoque mũa cãhmotaborore. Eropirã watĩ mũare ñero goroweodiacũ, mũare ãgũ ñero iidorecũ ãgũre cãhmotarãca. Eropirã tarinũgarãca. Eropa ãgũre tarinũgarã, turarã dujarãca mũa. <sup>14-17</sup> Eropirã turarã árĩque Goãmũ ya mera. Surara gamewejẽrã warã erã come suhri sañarã erã dupure õaro cãhmotama. Erã coretihbi cãhmotama erã come suhriro sañarã. Come zapatu sañama. Erã diapore cãhmotama comese mera. Come sãpea peyama. Noserimijire opama erã cãhmotaboro dopa. Erã surara cãhmotaro dopa ta mũa watĩre õaro cãhmotapehoborore õpa Goãmũ yare iique. Diaye majare Goãmũ yare õaro peeque. Eropirã Goãmũ gamero dopa õarire iiniguicãque mũa watĩre cãhmotamorã. Jesucristo ya õari buherire peerã õaro ãhraa. Eropirã iri õari buherire õaro wererã waque gajirãre. Watĩ mũare ñero iidorediarimi. Eropirã ãgũre cãhmotamorã Jesucristore “Diaye iigũ ãhrimi,” arĩ umupeoniguicãque. Cristopũ marire peamegue wabonirãre taumi. Mũa ãgũ taunirã árĩrã watĩ ñero iidorerire yũhibiricãque. Eropirã watĩre tarinũgamorã Goãmũ yare õaro masique mũa Espĩritu Santo ãgũ itamuri mera. <sup>18</sup> Eropirã mũa watĩre cãhmotarã Goãmũre eropa umũri nũcu serẽniguicãque. Espĩritu Santo ãgũ itamuri mera serẽniguique. Eropirã õaro guña masique. Eropa serẽrã gariborebiricãque. Árĩpehrerã Goãmũ yarãre eropa serẽbasaniguicãque. <sup>19</sup> Eropirã yũ sãre serẽbasaque Goãmũre. Õpa arĩ serẽbasaque: Õari buherire iribojegue masa erã õaro masibirirare õaro erãre masicũ yũ iiborore serẽbasaque. Eropirã gũiro mariro yũ wereborro dopa serẽbasaque yũre. <sup>20</sup> Cristo ãgũ yare weredoregũ yũre obeomi. Yũ eropa werera waja peresugue ãhraa dohpaguere. Yũhũ ohõ árĩqueregũ ta gũiro mariro ãgũ yare yũ wereborro dopa serẽbasaque yũre. ãgũ yare werebu árĩgũ tiiaa.

*Pablo õadoretuñumi*

<sup>21</sup> Tiiquico yũ mera majagũ mũa pohrogue ejagũ yũ árĩricũre mũare werepehogũcumi. ãgũ mari acaweregũ mari mahigũ ãhrimi. Eropigũ mari Opũ yare õaro itamugũ eropa árĩniguicãmi. <sup>22</sup> Gũa árĩricũre mũare weredoregũ ãgũre obeogũ iiaa mũa pohrogue mũa õaro mucubiriboro dopa.

<sup>23</sup> Goãmũ mari Pagũ mari Opũ Jesucristo mera mũare árĩpehrerãre gũa acawererãre õadorea. Cristore mũa õaro umupeori mera mũa game mahiboro dopa Goãmũre serẽbasaa mũare. <sup>24</sup> Árĩpehrerã mari Opũ Jesucristore eropa mahiniguicãrãre Goãmũ mera õadorea. Eropa ta árĩniguicãporo. Iripẽta ãhraa.



## Filipenses

### *Peresugue árĩgu ipũre gojabeopu Pablo*

<sup>1</sup> Gũa Pablo Timoteo mera Jesucristo pohro majarã áhraa. Eropirã árĩpehrerãre mũare ðarãre Jesucristo yarãre Filipino majarãre gojabeoa gũa. Mũa oparã sãre mũare itamurã sãre gojaa. <sup>2</sup> Eropirã Goãmũ mari Pagũ mari Opũ Jesucristo mera mũare ðadorea. Ĩgu itamuri mera ðaro árĩque mũa.

### *Pablo Jesu yarãre Goãmũre serẽbasapu*

<sup>3-6</sup> Goãmũ mũare ðaripũre gohrotocũ iigu iimi. Eropigu mũare ĩgu iinũgadiro dopa ta ii ojogorocũgũcumi. Eropirã Jesucristo i yebaguere ĩgu eracũguere ñeri marirã árĩrãca mũa. Negohraguere Jesu yarã mũa wara pũhrũ, dohpague sãre itamua mũa yũre ðari buherire yũ buhecũ. Mũa eropa iirã árĩcũ Goãmũre “Õhaa,” arãa yũhũ. Mũaare guñagu ðpa dihta arãa yũhũ. Mũaare Goãmũre serẽbasagu mucubiriri mera serẽbasaa. <sup>7</sup> Eropigu mũare yũ ðaro mera eropa pepicũ ðapũrica. Õari buherire “Diaye ta áhraa,” oparãre yũ arĩtarinũgacũ mũa yũre itamubũ. Iri buherire diaye ta iri árĩrĩre masare yũ werecũ itamubũ mũa. Peresu yũ árĩcũ sãre itamubũ. Eropa mũa itamucũ mari yujuro mera Goãmũ itamurire opaa. Eropigu yũ sĩporã mera turaro mahia yũhũ mũare. <sup>8</sup> Jesucristo ĩgu mahiri mera bũrigã mũare guñaa yũhũ. Yũ eropa guñacũ Goãmũ irire masimi. <sup>9</sup> Mũaare ðpa arĩ serẽbasaa yũhũ Goãmũre. Goãmũ yare ðaro masiri mera ðaro pee masipehori mera Goãmũre masa sãre mũa mahinemoburire serẽbasaa yũhũ Goãmũre. <sup>10</sup> Õarire mũa masiburi sãre serẽbasaa mũare. Mũa eropa masirã Cristo i yebague ĩgu dujaricũ ðarire iinirã árĩrã, dipuwaja marirãca mũa. <sup>11</sup> Eropa ðarire iirã Goãmũ gamerire iirãca mũa. Eropa iimorã wacũ iigũcumi Jesucristopũ mũare. “Goãmũ ðagu, turagu áhrimi,” árĩpehrerã ĩgũre erã arĩ umupeoburire ĩgu gamerire mũa iicũ iigũcumi mũare.

### *Pablo Jesucristo yagu ĩgu warare werepu*

<sup>12</sup> Yũ acawererã, ire mũa masicũ gahmea. Yũ dohpaguere peresu yũ árĩquerecũ ta ðari buheripũ eropa mũhtaniguicãa. <sup>13</sup> Eropigu Cristo yagu yũ árĩri waja peresu yũ warare masipehrema opu ya wihi majarã surara. Árĩpehrerã gajirã sã ðre irire masima. <sup>14</sup> Eropirã peresu yũ árĩcũ ĩarã, bajarã mari acawererã Jesu yarã mari Opũre Jesure umupeonemoma. Eropa umupeorã gũiro mariro ðari buherire gajirãre buhema erã.

<sup>15</sup> Yujurãyeri Cristo yare buhebonirã árĩquererã yũre ĩhaturima. Cristo yare buherã erãpũre masa ĩhasũacũ gahmema. Gajirãpũ ðaro mera Cristo yare buhema. <sup>16-17</sup> Õari buherire yũ werenigui turaburire Goãmũ yũre ĩgu apirare ðaro masima. Oãpũ eropa masirã yũre umupeorã Cristo yare buhema. Gajirãpũ yũre ĩhaturirã masare erãpũre ĩhasũacũ gamerã Cristo yare buheama. Eropirã yũ peresu árĩcũ erã yũre bũjawerecũ iidiama. <sup>18</sup> Õaroca. Cristo yare ta buherã iima. Erã yũre umupeobiriquererã Cristo yare buhema. Gajirãpũ ðari mera buhema. Árĩpehrerã erã ĩgu yare buhecũ mucubiria.

<sup>19</sup> Eropigu mucubiriniguicãgũca yũhũ. Goãmũre mũa yũre serẽbasara mera, Jesucristo ĩgu Espĩritu Santo itamuri mera Goãmũ yũre ðaro taricũ itamugũcumi. Irire masia. <sup>20</sup> Õpa ta bũrigã iidiaca yũhũ dohpa. Ne yũ iirare ñero pepidiabeaa. Ñero pepibigu árĩgu doyarõ mariro árĩgũpũ masare Cristore ðaro umupeocũ bũrigã iidiaa. Æmuri nũcu yũ iidiro dopa ta dohpague sãre erã Cristore “Õagu, turagu

ãhrimi,” erãre arĩ umupeocũ iidiaa. Ojocarigu gohra eropa ta iidiaa. Erã yãre wejẽdiaquerecũ ta eropa ta iidiaa. <sup>21</sup> Ojocariniguigu gohra Cristo yare iiniguica dohpa. Siringue tamera ojocarirã tauro òaro dujagũca yũhũ. <sup>22</sup> Ojocariniguigu Cristo yare yũ inemoboro dopa ojocariniguicãdiaca. Eropa iidiaqueregũ ta sãriri sãre gahmea. ¿Dipũre yũ gamebocuri? Masibirica yũhũ. <sup>23</sup> Yũ òpa arĩ wereniguicũ masisũya mara yãre. Cristo mera burigã árĩdiaa. Eropigu dohpaguere igũ pohrogue wadiaca. Ojocariri tauro sãriripũ òatarinugacãroca. <sup>24</sup> Eropa árĩquerecũ ta mũare yũ itamuboro dopa ojocarinemoro gahmea yãre. <sup>25</sup> Irire masigũ ohõ mũa mera yũ árĩborore masia yũhũ. Eropa árĩniguicãgũca yũhũ mũa Cristore umupeonemoboro dopa, iri umupeoturari mera mũa mucubiriborore. <sup>26</sup> I yebague árĩnigũ mũa pohrogue dipaturi yũ wacũ mũa mucubirirãca. Eropa yũhũ mũa pohro ejacũ Cristo Jesu yãre igũ itamurire masirã, “Turagũ ãhrimi igũ,” arĩ umupeorãca mũa igũre.

<sup>27</sup> Dohpaguere i dihtare iique. Cristo ya buheri iri arĩro dopa ta árĩricũque mũa. Guñaturarã árĩque. Eropirã game dũca wariro mariro òari buherire yujuro mera burigã buheque. Eropa ta yũ mũa pohro wabiricũ sãre yũ wacũ sãre mũa eropa iicũ gahmea. Eropa mũa yujuro mera árĩrã árĩcũ peebeodiaa yũhũ. <sup>28</sup> Mũare ìhaturirãre gũibiricãque. Mũa eropa gũibiricũ ìarã Goãmũ yarã mũa árĩcũ masirãcoma erã. Eropa masirã erã peamegue waboro sãre masirãcoma. Eropirã Goãmũ igũ tauboro sãre masirãcoma. Òpa ta masicũ iimi Goãmũ masare. <sup>29</sup> Cristore mũa umupeobure Goãmũ apidi árĩmi. I sãre apidi árĩmi. “Cristo yare mũa werera waja ñero tarirãca,” arĩ apidi árĩmi Goãmũ mũare. <sup>30</sup> Eropirã Cristo yarã mũa árĩri waja gajirã mũare ñero iima. Mũare erã iidiro dopa ta yũ sãre ñero iima erã. Mũa mera yũ árĩcũ yãre erã eropiicũ ìabũ. Dohpague sãre erã yãre eropiicũ pee waĩcũca mũa. Eropirã mari yujuropa ta ñero taria.

## 2

*Cristo bu árĩgũ iro dopa eradigũ árĩpehrerã weca opũ árĩbu wapũ, arĩ gojañumi Pablo*

<sup>1-2</sup> Cristo mũare òaro sãporãcũcũ iinirã, Cristo igũ mahiri mera mũa mucubirirã, yũpũre òaro mucubiricũ iique. Eropirã Espĩritu Santo árĩpehrerã mũa mera igũ árĩcũ gajirãre mahirã, mojomoro ìarã árĩrã, yãre òaro mucubiricũ iique mũa. Ire mũa iicũ mucubirigũca. Yujuropa ta òaro sãporãcũque mũa. Eropirã mũa basi game mahique. Òari mera árĩricũque. Eropirã árĩpehrerã yuju diaye òaro árĩque.

<sup>3</sup> Gajirãre tarinugadiarã árĩbiricãque. Eropirã eropa ta pepi árĩcãque. Eropirã gajirãre òaro umupeo òpa arĩ pepique: “Erãpũ yũ tauro òarã ãhrima,” arĩ pepique.

<sup>4</sup> Gajigũ gajirãre itamudiabiribocumi. Igũ iro dopa iibiricãque. Gajirã sãre itamuque.

<sup>5</sup> Jesucristo igũ eropa pepicãdiro dopa ta mũa sã eropa ta pepicãque. <sup>6</sup> Igũpũ Goãmũ gohra árĩqueregũ ta “Goãmũ yũ árĩrire ne duhosome yũhũ,” arĩbiripũ igũ.

<sup>7</sup> Eropigu igũ Goãmũ igũ árĩrare duhu, masũ ta masa dehyoadigũ pohro majagu iro dopa árĩnũgapũ i yebaguere. <sup>8</sup> Eropigu igũ masũ dũpũcũgũ bu árĩgũ gohra árĩnũgapũ. Eropa árĩnũgagũ “Crusague wejẽque igũre,” erã arĩcũ igũ Goãmũre yũhrigũ tarinũgabiripũ. Crusague ta gũhyasũuro mera sãribu árĩqueregũ ta igũ tarinũgabiripũ igũ Pagũre. <sup>9</sup> Eropigu igũ eropiicũ ìha mari Pagũ árĩpehrerã masa erã umupeobure apipũ Jesure. Eropigu árĩpehrerã gajirã weca opũ acupũ Goãmũ igũre.

<sup>10</sup> Eropirã árĩpehrerã mũamaro majarã, i yeba majarã, sãrinirã mũara sã Jesu waĩre peerã erã mereja muju igũre umupeorãcoma pare. <sup>11</sup> Eropa igũre opũ acugũcumĩ mari Pagũ árĩpehrerã Jesucristore “Mari Opũ ãhrimi,” erã arĩbure. Eropa arĩrã mari Pagũ Goãmũre umupeorãcoma.

*Cristo yarã òarire wererã masare masicũ iima*

<sup>12</sup> Eropirã, yu mahirã, mua mera yu árĩcũ mua yuhridiro dopa ta, dohpaguere yu yoarogue árĩcũ sãre ðaro yuhrique yure. Eropirã peamegue wabonirã mua Goãmũ taunirã árĩrã Cristo ĩgu itamuro mera ĩgu gamero dopa ii purumujuque. Eropirã umupeori mera biraro mariro Goãmũ yare iique. <sup>13</sup> Goãmũ ðaripure muare gamecũ iigu iimi. ĩgu eropa gamero dopa ta mua iiborore iimi. Eropigu irire mua ĩgu yare ðaro iiborore itamuniguicãmi Goãmũ. ĩgu eropa iicũ irire yu arĩdiro dopa ta iique mua.

<sup>14</sup> Árĩpehrerire iirã turiro mariro, mua basi gajinore werericuro mariro iique. <sup>15</sup> Eropiique mua ñeri dipuwaja marirã, ñerire iibirã Goãmũ porã ðaro mua árĩmorã. Eropiique mua masa guyarã, ñerã watopere goroweoro mariro mua árĩmorã. Erã ñerã watope mua árĩrã ðari buherire buherã masicũ iiaa mua i yeba majarãre. <sup>16</sup> Iri buherire mua peeñanirã Goãmũ mera eropa árĩniguimorã wabu mua. Iri buherire i yeba majarãpũre mua eropa buhecũ ĩagu mua mera mucubirigũca yuhũ. Eropigu yu muare buherare guñagu, “Bu gohra ta muare buhebiriya yuhũ,” arĩguca yuhũ. Eropigu Cristo ĩgu i yeba ĩgu dujaricũ mua mera mucubirigũca yuhũ. Eropigu guhyasiuro tarisome yuhũ. <sup>17</sup> Cristore mua umupeoturacũ Goãmũ muare ĩhasuagucumi. ĩgu eropa ĩhasuacũ ĩagu muare Cristo yare yu buheri waja yure erã wejediaquerecũ ta mucubirigũra. Eropirã mari árĩpehrerã yujuropa ta mucubirirãca. <sup>18</sup> Eropa ta mua sãre yu mera mucubiriro gahmea pũhrũ yu sĩricũ ĩarã.

### *Timoteore, Epafrodito sãre werepũ Pablo*

<sup>19</sup> Mari Opũ Jesu ĩgu gamecũ yojaro mera Timoteore mua pohrogue obeodiaa yuhũ mua árĩricũre masibu. Eropa masigũgue ta mucubirigũca. <sup>20</sup> ĩgu Timoteo mua ðaro árĩborore diaye ta bũrigã guñami muare. Gajigu ĩgu iro dopa ta árĩgu marimi yure. <sup>21</sup> Gajirãpũ árĩpehrerã erã gameri dihtare iidia, Jesucristo ĩgu gameripũre iidibeama. <sup>22</sup> Timoteopũ ĩgu ðaro iirire masia mua. Yu magũ iro dopa ta árĩgu ĩgu yu mera ðari buherire weremurimi. Eropirã gũa yujuropa ta Cristo yare buhemurabu. <sup>23</sup> Eropigu ð majarã oparã yure erã duhpiburire masira pũhrũ, Timoteore mua pohrogue obeodiarã. <sup>24</sup> Eropigu mari Opũ Jesu ĩgu itamuri mera yojaro mera yu sã mua pohrogue wagũca.

<sup>25-26</sup> Yure itamudorerã mua Epafroditore obeoabu yu pohrogue. ĩgu yu acaweregu, yu mera mohmegũ, yu wapi, Goãmũ yare buheturagu ahrimi. ĩgu muare turaro guñabeomi. Eropigu ĩgu dorecurare mua peecũ masigu ĩgũpũ “Erã yure guña bujawerecoma,” arĩ guñaricũmi. Eropa ĩgu wũaro guñaricũcũ ĩagu ĩgũre mua pohrogue omedujuro gahmea yure, arĩ pepia yuhũ dohpaguere. <sup>27</sup> Árĩro ta ĩgu turaro dorecũami. Mero sĩribocuri tariami ĩgu. ĩgu eropa dorecũquerecũ ta, Goãmũ ĩgũre mojomoro ĩagu taricũ iiami. ĩgu sĩricũ yũpũ bũrigã bujawereboaya. Eropigu yu sãre Goãmũ mojomoro ĩami ĩgũre taricũ iigu. <sup>28</sup> Eropigu dohpague tamerare yojaro mera ĩgũre mua pohrogue obeodiaa dipaturi mua ĩgũre ĩha sĩñajaboro dopa. Mua eropa mucubiricũ peegu yu sã mucubirigũra. <sup>29</sup> Eropirã ĩgũre Epafroditore mari Opũ yagũre ðaro mucubiriri mera bocatĩrique. Eropirã gajirãre ĩgu iro dopa árĩrãre umupeoque. <sup>30</sup> ĩgu Cristo yare itamudiagu sĩrirami. Mũapũ yure itamumasibiricũ ĩgũpũ yure itamubasamũrami. Eropigu dorecũ sĩrirami ĩgu.

## 3

### *Õaro árĩri gohrare wereñumi Pablo*

<sup>1</sup> Dohpague tamerare ire weregũra. Mari Opũ mera mucubirique. I buherire ero coregue yu wererare dipaturi ðpa arĩ gojabeogu mucubiria yuhũ. Eropigu ire

werenemogu itamugu iiaa muare. <sup>2</sup> Gorowerebirã ta árĩque mua. Ñerire iiniguicãrã, diayea iro dopa ta árĩrã, ñerã, gasiro merogã wiri aĩdorerã mua ya dupare wiridiana. Eropa iidorerã árĩcũ ìha “Queoro buheri árĩbeaa,” arĩrã òaro iique mua. <sup>3</sup> Erã circuncisión gasiro merogã aĩdoreciarã “Deyoro maja mera Goãmure umupeocũ òhaa,” arĩrima. Maripũ eropa arĩbeaa. Espĩritu Santo ìgu itamuri mera diaye ta Goãmure umupeoa mari. Mari deyoro maja iiri mera mucubiribea. Jesu yarã mari arĩri mera mucubiria mari. <sup>4</sup> Eropa mucubiriqueregu ta, yũ iirare erã iro dopa arĩdiagũ, erãre docapicãboya yũ sã. Gajigu òpa ta arĩ tarinugacãdiami. Yũpũ ìgu tauro eropa arĩboaya. <sup>5</sup> Òpa iigu arĩribũ yũhũ: Ocho nũri yũ masa dehyoara pũhrũ gasiro merogã wiri aĩnirã arĩma yure. Israe masũ arĩgu Benjami ya curu majagu ãhraa yũhũ. Yũ pagũ sumarã hebreo masa erã árĩcũ diaye ta hebreo masũ gohra ta masa dehyoabũ. Moise dorerire diaye ta iipehodiagu fariseo curu mera ñajaribũ yũhũ. <sup>6</sup> “Goãmũ ya árĩsaca,” arĩgu òaro iiribũ yũhũ. Eropigu Jesu yarãpũre ñero iimuricarabũ yũhũ. Diaye ta Moise dorerire iigu irire tarinugaro mariro iipehomuriribũ yũhũ. <sup>7</sup> Iribojegure “Iri òari árĩsaca,” arĩ pepimuriribũ. “Iri yũ eropa arĩ pepira iribojegue yũ eropa arĩra duhpiburi arĩbirigohracãdiro arĩbũ,” arĩ pepia dohpaguere. Òpa ta arĩ pepinugabũ yũhũ Cristore umupeonugagu. <sup>8</sup> Jesucristo yũ Opũre yũ masicũ tamerare òataria. Eropigu gajĩ doreripũre duhpiburi arĩbeaa, arĩ pepia yũhũ. Iri arĩpehrerire cóacãbũ Cristo yapũre iibu. Eropigu iribojegue yũ iirare cóãgu “Ñeri gohra ãhraya,” arĩ pepia. Cristo yare òaro masibu ìgu mera majagu arĩbu eropa pepia. <sup>9</sup> Eropigu yũ ejatuharo òaro yũ iira waja “Òagu ãhrimi,” arĩ ñabeami Goãmũ. Eropiro Goãmũ dorerire Moiserẽ ìgu apirare yũ iira waja sãre “Òagu ãhrimi,” arĩ ñabirami. Cristore yũ umupeora pũhrũ “Òagu ãhrimi,” arĩ ñami pare ìgu yure. Goãmũpũ marire dipuwaja marirã árĩcũ iimi ìgure mari umupeocũ. <sup>10</sup> Eropigu ero coregue yũ arĩmũhtarare duhcãbũ Cristore òaro masigu wabu. Goãmũ ìgu turari mera Cristo masa mũriapũ. Iri turari mera arĩdiaca yũhũ. Eropigu iri turari mera òarire iidiaca. Cristo crusague sĩripũ mari ñeri iirare cóãbu. Eropigu ìgu yare iigu ìgu iidiro dopa ta ñero taridiaa yũ sã. <sup>11</sup> Eropigu Cristo ìgu masa mũriadiro dopa ta, yũ sã masa mũriadiaca.

<sup>12</sup> I arĩpehreri eropa arĩgu “Cristo iro dopa ñeri marigu arĩtuhajaa,” arĩ pepibea. Yũ eropa arĩ pepibiriquerecũ ta Cristo ìgu yagu arĩbure òagu arĩbure iiami yure. Eropigu ìgu yare ìgu sãre òaro masinemodiagu turaro mera ìgu yare iidiaa yũhũ. <sup>13</sup> Yũ acawererã, yũhũ muare eropa arĩgu, “Jesucristore òaro masipehotuhajaa yũhũ,” arĩgu iibea. Eropa arĩbiriqueregu ta i tamerare iiaa. Yũ iribojegue iirare cãdijigu dohpaguere “¿Goãmũ dohpa iicũ gahmeri yure?” arĩgu bũrigã irire iidiaa. <sup>14</sup> Omabiragu pohbegũ ejamũhtadi ìgu wajatadiaro dopa ta bũrigã iiaa yũhũ yũ wajataborore yũ ñeaboro dopa ta. Cristo ìgu yagu yũ árĩcũ ñagu yũhũ wajataborore obu umarogue sihubeomi yure.

<sup>15</sup> Òpa yũ arĩro dopa ta pepique mua sã Cristore òaro masirã arĩrã. Eropirã muare yũ wererare mua peediabiricũ gajiropa mua pepicũ Goãmũ muare òaro masicũ iigucumi. <sup>16</sup> Eropirã ìgu yare mari masirare òaro ìi ojogorocũrã.

<sup>17</sup> Yũ acawererã, mua arĩpehrerã yure ñhacũque. Eropirã gajirã gũa iiro dopa iirãre ñhanũruque mua erã sãre mua ñhacũboro dopa. <sup>18</sup> Bajasuburi gajirãre ñerãre wereabũ yũhũ muare. Dohpague sãre bũrigã bũjaweregu erãre ta werea muare daja. Erã ñero iiri mera “Cristo crusague ìgu sĩridi arĩmi,” arĩ buherire ñhaturirã ãhrima. <sup>19</sup> Erã peamegue wamorã ta ãhrima. Erã ñaribejaripũre bũrigã gahmema. Eropirã iri muare gũhyasĩrisãborare erãpũ “Mari iiri òari ãhraa,” arĩma erã. I umũ maja dihtare pepima erã. <sup>20</sup> Maripũre mari ejaburi maca umarogue ta ãhraa. Eropigu erogue ta marire taubu mari Opũ Jesucristo dujarigucumi. Eropirã ìgu



dugariborore corerã iiaa mari. <sup>21</sup> Īḡu dujarigũ mari dũpũre bu árĩri dũpũre gajiropa árĩri dũpũre gohrotogũcumĩ ĩḡũ. Eropigũ ĩḡũ ya dũpũ iro dopa ta õari turari dũpũre gohrotogũcumĩ marire ĩḡũ turari mera. Árĩpehrerã opu ñajami ĩḡũ iri turari mera. Eropigũ árĩpehreri Opu ãhrimi ĩḡũ iri turari mera.

## 4

### *Ʋmũri nũcu mari Opu mera mucubirique, arĩ gojañumi Pablo*

<sup>1</sup> Eropirã yũ acawererã, yũ mahinirã, bũrigã yũ guñarã, yũre mucubiricũ iirã, mũa guñaturadiro dopa ta mari Opuere bũrigã guñaturaniguique mũa.

<sup>2</sup> Ire wereḡura mũare Evodiare, Síntique sãre: Jesu yarã nome ãhraa mũa. Eropirã mũa game dũyatorire duhu õaro mera árĩricũ árĩque mũa basi. <sup>3</sup> Mũpu diaye ta yũ wapi gohra ãhraa. Mũ sãre wereḡura: Erã nome yũ mera, Clemente mera, gajirã yũ wapicũrã mera mohmeama õari buherire ḡua buhecũ. Goãmũ erã waĩ sãre gojatutuhañumi ĩḡũ yapũḡue. Ʋmũri nũcu ojocariburire ĩḡũ onirã waĩre ĩḡũ gojaturipũḡue gojatutuhañumi erã waĩ sãre. Eropigũ erã nomere bosaque mũhũ.

<sup>4</sup> Mũa árĩpehrerã Ʋmũri nũcu mari Opu mera mucubirique. Dipaturi ta wereḡura daja: Mucubirique. <sup>5</sup> Őaro iiniguicãque mũa õaro iinirã árĩrare árĩpehrerã masa ĩhamasiborore. Mari Opu Cristo ĩḡũ ariboro merogã dũhyaa.

<sup>6</sup> Mũa árĩricũre ne bũjawere guñaricubiricãque. Mũa guñaricũ bũjowererire Goãmũre õaro werepehocãque. Eropirã ĩḡũre õaro serẽque. Eropirã mũa serẽrã ĩḡũre “Őhaa,” arĩque ĩḡũre. <sup>7</sup> Mũa eropiicũ, õaro árĩcũ guñaricũro mariro iigũcumĩ Goãmũ mũare. ĩḡũ eropa iiri õataria. I mari õaro árĩri õataria. Eropiro Jesucristo yarã mari árĩcũ marire õaro árĩcũ iigũcumĩ Goãmũ. Marire õaro sĩporãcũcũ iigũcumĩ. Eropigũ bũjowererire guñaniguicãcũ iisome ĩḡũ marire mari ĩḡũre serẽra pũhrũ.

### *Őarire pepique, arĩ gojañumi Pablo*

<sup>8</sup> Acawererã, ire weretubu iiaa mũare. Queoro árĩrire, masa erã umupeorire, õaro iirire, ñero marirore, suarire, masa “Őari ãhraa,” erã arĩrire pepique mũa. Őataritari iri árĩcũ iripũre pepique. Masa õarire ĩarã erã mucubiririre mũa sã mucubiri pepique. Iri árĩpehrerire guñaque irire mũa iiboro dopa.

<sup>9</sup> Mũare yũ buhediro dopa ta eropa ta iiniguicãque mũa. Eropirã yũre ĩhacũque mũa. Mũa eropa iicũ Goãmũ mũare õaro árĩcũ iigũ mũa mera árĩḡũcumĩ.

### *Filipo majarã Pablora erã orare wereñumi ĩḡũ*

<sup>10</sup> Dohpague tamerare yoara pũhrũḡue mũa dipaturi yũre guñarã mũa itamurare mucubiria. Eropa mucubirigũ mari Opu Cristore “Őhaa,” arãa. “Yũre cãdijia wabũ mũa,” arĩbeaa yũhũ. Iriboḡeure yũre itamudiaquererã itamumasibirinirã árĩbũ mũa. <sup>11</sup> Yũre mũa itamurare wereḡu “Yũre dũhyaa dohpa,” arĩ werebu iibeaa yũhũ. Mũare gajinore gameḡu eropa arĩḡũ iibeaa. Yũ opari mera árĩmasia yũhũ. <sup>12</sup> Gajinore moogũ sã õaro árĩmasia yũhũ. Eropigũ baja opagũ sã õaro árĩmasia yũhũ. Ʋmũri nũcu oaboagũ sã oare nũḡapoa waca. Yapigũ arĩḡũ sã õaro árĩpoa waca. Dabero opagũ sã árĩpoa waca. Yũre gajino maricũ sãre õaro árĩpoa waca. <sup>13</sup> Cristo yũre turacũ iigũ mera árĩpehrerire yũ eropa warire ii bocatĩumasia yũhũ. <sup>14</sup> Yũ eropa árĩpoadigũ árĩquerecũ ta yũ ñero taricũ mũa itamurã yũre õaro iiabũ mũa.

<sup>15</sup> Őari buherire yũ buhediacũ Macedonia yeba mũa ya yeba árĩdigũ yũ wacũ gajĩ maca majarã Jesu yarã yũre itamubirama. Mũa dihta yũre itamuabũ. Irire masia mũa. Mũare yũ buhecũ yũpũre mũa itamucũ mari yujuropa ta Cristo yare iirã iiabũ. <sup>16</sup> Eropirã Tesalõnicague yũ árĩnicũ ĩarã yũre itamubeobũ. Yujuyerisuburi yũre dũhyacũ ĩha yũ gamerire obeoabũ mũa. <sup>17</sup> Gajinore serẽḡu eropa arĩḡũ arĩbeaa.

Gajirãre mua itamucũ Goãmũ mware ðaro itamugucumi. Igũre mua itamuri waja Goãmũ mware igũ ðaro iicũ gahmea yũhũ. Mua eropa itamurã guñaturarã wacũ sãre gahmea yũhũ. Eropigũ yũre mua itamurare guñacũ iiaa mware. <sup>18</sup> Dohpaguere yũre ðaro opehoabũ mua. Yũ gamera tauro ohabũ mua yũre. Yũre Epafrodito mera mua obeora pũhrũ gajino ne duhyabeaa yũre. Mua yũre ora Goãmũre ora iro dopa ãhraa. Yũre mua ora Goãmũre ðaro suacũ iiaa. <sup>19</sup> Jesucristo marire ðaro iidi árĩmi. Eropigũ árĩpehrerire mware duhyarare ogucumi mari Pagũ mware. Ôatariari igũ oparire ogucumi. <sup>20</sup> Ëmũri nũcũ mari Pagũre Goãmũre umupeorã. Eropa ta iiporo.

*Pablo ðadorepũ*

<sup>21</sup> Árĩpehrerã Goãmũ mera árĩrã Jesucristo yarã ðaporo. Mari acawererã Jesu yarã yũ mera majarã sã mware ðadorema. <sup>22</sup> Árĩpehrerã õ majarã ðarã Jesu yarã ðadorema. Roma majarã weca opũ ya wihi majarã tamera burigã ðadorema.

<sup>23</sup> Mari Opũ Jesucristo mera mware ðadorea. Eropa ta árĩniguicãporo. Iripẽta ãhraa.

## Colosenses

### *Colosa majarãre gojabeoñorã Pablo sã*

1-2 Yũhũ Pablo Jesu yagũ mari acaweregũ Timoteo mera mũare Colosa majarãre gojabeoa gũa. Jesucristo ãgũ yare buhedoregũ ãgũ apidigũ ta ãhraa yũhũ. Goãmũ ãgũ gamero dopa ta Jesucristo yũre ãgũ yare buhebure apimi. Eropirã mũare gũa acawererãre Cristore umupeorãre gojabeoa. Eropirã mari Pagũ Goãmũ mera mũare ðadoreã. Eropirã ãgũ mera ðaro árĩque mũa.

### *Jesu yarãre Pablo serẽbasapũ Goãmũre*

3-8 Mũa ya árĩburire Goãmũre serẽrã mucubiriri mera eropa serẽbasaniguicãa gũa. ãgũ mari Opũ Jesucristo Pagũ ãhrimi. Árĩpehrerĩnũri mũa mũmũsigue ðaro árĩcũ iigũcumĩ Cristopũ. ãgũ eropa iibu árĩcũ mũa mucubirimũhtarã waĩcũa. “Jesucristo diaye iigũ ãhrimi,” arĩ ãgũre umupeorã waĩcũa mũa. Eropirã ãgũ yarãre mahi waĩcũa mũa. Mũa eropa árĩrã árĩcũ Goãmũre “Õhaa,” arĩ mucubiriri mera serẽbasaa gũa. Árĩpehrerogũere Jesu yarã diaye árĩri buherire ðari buherire erã werecũ peerã masa ðaripũre gohrotoma. Goãmũ yare masinemorã wahama. Õpa ta mũa sãre Epaфра ðari buherire weredi árĩmi. ãgũ gũa mera Cristore mohme coregũ ãhrimi. Iri mohmerire duhubeami ãgũ. Mũare ãgũ eropa werecũ peerã, mata Goãmũ yare ðaro iiniguicãmũrayoro mũa. Eropirã Goãmũ mũare mahirire diaye ta masirã mata ðaro iiaýoro mũa. Mũa eropa iirare ãagũ Epaфра weremi gũare. Espĩritu Santo itamuri mera Jesu yarãre mũa mahirare weremi ãgũ gũare. ãgũ eropa arĩ werecũ peerã “Õhaa,” arãa gũa Goãmũre.

9 Eropirã mũare guñarã eropa Goãmũre serẽbasaniguicãa. Goãmũ ãgũ gamerire mũa masipehoboro dopa serẽbasaa gũa. ãgũ yare ðaro masirã mũa árĩboro sãre serẽbasaa gũa. 10 Õpa ta serẽbasaa gũa mari Opũ Cristo ãgũ gamero dopa ta ðaro mũa iiburire. Mũa eropa iicũ ãagũ ãgũ mũare sũagũcumĩ. Eropa ta mũa árĩpehrerire ðarire mũa iiburire serẽbasaa. Goãmũre mũa masinemoboro dopa serẽbasaa. 11 I sãre serẽbasaa gũa. Goãmũ ãgũ ðaro turari mera mũa ðaro sĩporã turarã árĩboro sãre serẽa. Eropa ta serẽa ñero tariquererã mũa Goãmũ mera yujuro bojeboro dopa. Ñero tariquererã mũa eropa pepicãburire mũa mucubiriri mera eropa árĩniguiboro sãre serẽbasaa daja gũa. 12 Goãmũ ãgũ yarã árĩcũ marire iimi. Eropa iigũ ãgũ orire mari opamorã mari árĩcũ sãre iimi ãgũ. ãgũ árĩroque ðarogue mari árĩborore amutuhajami ãgũ. ãgũ eropa iicũ ãarã mucubiriri mera mari Pagũre “Õhaa,” mũa árĩborore serẽbasaa gũa mũare. 13 ãgũ ta marire peamegue wabonirãre taricũ iidi árĩmi. Iribojegue ñerire duhumasibiriribũ mari. Ñegũpũ marire doredi árĩnirimi. Eropigũ Goãmũpũ marire taudi árĩmi. ãgũ magũ ãgũ mahigũre opũ acugũ ãgũ dorero dopa marire árĩcũ iimi. 14 ãgũ magũ mera marire peamegue wabonirãre taudi árĩmi Goãmũ. ãgũ magũ ãgũ sĩrirañe mera mari ñeri iirare cãdijidi árĩmi Goãmũ.

### *Masa Goãmũre gamebiricũ ãha Cristo amupũ, arĩ gojañumi Pablo*

15 Goãmũre mari Pagũre ãaya mara. Cristo ãgũ magũ ãgũ Pagũ ãgũ árĩricũrĩre ãhmudigũ árĩmi masare. ãgũ ãgũ magũ árĩpehrerã core, árĩpehreri core árĩtuhadigũ árĩmi. Eropigũ tauro opũ ãhrimi ãgũ. 16 Goãmũ ãgũ dorecũ ãgũpũ ãgũ Pagũ mera árĩpehrerire ãhacũnuguñumi. Õmũsigue árĩrĩre i yebague árĩri sãre ãhacũnuguñumi. Mari ãarire mari ãabiriri sãre ãhacũnuguñumi. I yeba majarãre, mũmũsi majarã oparãre, árĩpehrero dorerãre, mari ãarãre, mari ãabirã sãre,

árīpehrerāre īhacūnuguñumi. Īgu árīpehrerire, árīpehrerāre īhacūnuguñumi. Eropirā árīpehrerā ĩgu iinirā āhrima. Árīpehrerigue ta ĩgu iira āhraa. <sup>17</sup> Árīpehrerā core árīpehreri core Cristo árīmūhtañumi. Eropiro ĩgu turari mera árīpehrerā dohpaguere árīrā iima. Árīpehreri sā árīro iiaa. <sup>18</sup> Mari ĩgu yarā árīpehrerā ĩgu ya curu majarā árīrā ĩgu dūpū waīcua. Eropigū ĩgūpū mari dipuru āhrimi. Īgu sīrigū masa mūriamūhtadigū árīmi árīpehreri weca árīpehrerā weca árību. <sup>19</sup> Cristo mari Pagū Goāmū mera yuju dūpū ta árīro dopa ta āhrimi. Īgu eropa árīcū ta gamepū mari Pagūpū. <sup>20</sup> Árīpehrerā masa erā ĩgūre gamebirimūricū ĩagu erā ĩgu mera amubure Cristore obeopū. Īgūre eropa obeogū ĩgu Cristo crusague sīri ĩgu di cóāra mera amupū. Eropigū ūmūsi majarāre, i yeba majarā sāre ĩgu mera ōaro árīcū iipū. Ūmūsi maja i yeba árīri sā ōaro árīcū iipū. Eropigū ĩgu guñadiro dopa iipū.

<sup>21</sup> Mūa sāre eropa ta ĩgu mera ōaro árīcū iidi árīmi. Mūa sā űerire iiniguinirā Goāmūre boje majarā árīrā mūa pepiri mera ĩgūre gamebirinirā árīmūriribū. <sup>22</sup> Mūa eropa árīnirāre Cristo sīriro mera ĩgu Pagūre mūa ĩgu mera ōaro wacū iipū ĩgu. Eropa iipū ĩgu mūa ĩgu yarā ōarā űeri marirā, dipuwaja marirā mūa árīboro dopa. Mūa eropa árīcū ĩgu árīroguere mūa árīborore eropa iipū. <sup>23</sup> Eropa ta iigūcumi ĩgu mūa ĩgūre duhuro mariro umupeoturanguicācū. Mūa ōari buherire mūa Goāmū mera árīniguiborore mūa cādijibiricū, ĩgu mera mūa árīcū iigūcumi mūare. Iri mūa peera buherire ōari buherire árīpehrerā i yeba majarā peenirā árīma. Eropigū yūhū Pablo sā iri ōari buherire weregū ta āhraa.

### *Jesu yarāre itamubure apipū Goāmū Pablōre*

<sup>24</sup> Cristo mari ĩgu yarā árīborore crusague sīrigū űero taripū. Eropigū yū sā mūa ĩgu yarā árīburire űero tarigū mucubiria. Eropa űero tarigū Cristo marire ĩgu apirare ii ojogorocūgū iiaa. Eropigū mucubiria. Cristo yare mari iira dipuwaja mari űero tarinemoboro dūhyania dohpa. Eropigū ĩgūre mūa guñaturaborore űero tari mucubiria yūhū. Īgu dūpū iro dopa árīrā ĩgu ya curu majarā āhraa mūa. <sup>25</sup> Jesu yarāre itamubure apimi Goāmū yūre. Mūa ya árīburire iibure yūre apimi ĩgu. Īgu yare mūare werepehobure apimi ĩgu yūre. <sup>26</sup> Iri ĩgu yare iribojegure baja cururi majarāre erā masipehocū iibirimūriñumi mari Pagū. Dohpaguere dohpague majarāre ĩgu yarāre irire ōaro masipehocū iimi pare. <sup>27</sup> Eropigū “Judio masa árībirā sāre yaha buheri ōataria,” arī ĩgu yarāre irire weremi. Iribojegue erā masibirirare weremi Goāmū. Ōpa āhraa dohpaguere ĩgu werera: Cristo ĩgu yarā mera āhrimi. Īgu eropa árīcū ĩgu yarā ūmūsiguere ōatariaroguere árīrācoma. Iri āhraa iribojegue erā masibirira mari Pagū ya.

<sup>28</sup> Cristore ta werea. Árīpehrerāre gūisāgū erāre werea yūhū. Ōaro masiri mera buhea yūhū ōaro Cristore masare masicū iibu. Eropa buhea yūhū erā ĩgu yare ōaro iirā erā árīcū iibu. <sup>29</sup> Iri ta āhraa yū mohmeri. Jesucristo ĩgu ya turari mera yūre ĩgu ora turari mera turaro mohmea yūhū ĩgu yare buhegū.

## 2

<sup>1</sup> Ire mūa masicū gahmea. Mūa ya árīburire, Laodicea majarā ya árīburire, árīpehrerā ya árīburire turaro mohmea yūhū. Árīpehrerā masa yūre ĩabirā ya árīburi sāre turaro mohmea yūhū. <sup>2</sup> Ōpa ta mohmea yūhū mūa árīpehrerā ōaro sīporācūborore. Mūa mera majarāre mūa yujuro mera game umupeoburi sāre eropa mohmea yūhū. Iribojegue majarāre Goāmū werebirira Cristore masicū iiri āhraa. Īgu yare masirā Cristore umupeoa mūa. Mūa ĩgūre ōaro masiborore mūa ĩgu mera ōaro árīborore burigā itamua yūhū mūare. <sup>3</sup> Cristo dihta masipehocāmi gajirā masibirirare. Īgu árīpehrerire ōaro masigū āhrimi. Īgu masiri ōatariaro



ãhraa. <sup>4</sup> Irire werea mũare gajirã mũare peesuari wereniguiri mera gũyari arĩgu. <sup>5</sup> Yũhũ mũa watope árĩbiriqeregu yũ guñari mera mũa watope arĩgu dopa ãhraa. Eroque árĩbiriqeregu Cristore mũa õaro umupeoniguirare mũa õaro iirare peegu mucubiria yũhũ.

<sup>6</sup> Eropirã mari Opũ Jesucristore opamorã ãgure mũa umupeonugadiro dopa ta umupeoniguicãque. “Eropa ta yũre itamugũcumi,” arĩrã mũari nũcũ ãgu mera õaro árĩniguicãque. <sup>7</sup> ãgure õaro masirã árĩque mũa. Eropirã mũari nũcũ ãgure masinemoque gajirã erã ero core mũare erã buhediro dopa ta. Eropirã Cristore mucubirirã “Õhaa,” arĩniguicãrã árĩque mũa.

*Cristo yarã árĩrã õaripũre gohrotoa mari, arĩ gojañumi Pablo*

<sup>8-10</sup> Õaro pee masique mũa. Masa erã gamero erã buherire erã gũyarire peebiricãque. Erã iribojegue majarã árĩricũrare buhema. Masa erã pepiro dopa pepirã árĩrã i doreri dihta buhema. Cristo yapũre buhebeama. Cristo mari Pagũ árĩro dopa ta arĩgu Goãmũ gohra ta ãhrimi. Eropigũ Jesucristo Goãmũ arĩgu i yebague masa dehyoadigũ Goãmũ ta árĩmi. Eropirã ãgu yarã árĩrã Goãmũ mera õaro árĩniguia mari. ãgu ta árĩpehrerã deyobirã oparã tauro opũ arĩgu ãhrimi. Õmũsi majarãre i yeba majarãre árĩpehrero majarãre doremi. Eropirã gũyari buherãre peebiricãque. <sup>11</sup> Eropirã Cristo yarã árĩrã circuncisiónre iinirã gasiro merogã wiri aĩnirã iro dopa árĩrã ãhraa mũa. Masa erã dũpũre merogã gasirogãre erã wiri cóãro árĩbiriya. Mũa pepiripũre Cristopũ mũa ñeri mũaribejarire cóãmi. <sup>12</sup> ãgu yarã árĩra pũhrũ waĩyesũnirã árĩnirã árĩbũ mũa. Eropa waĩyesũnirã árĩrã õpa ãhmurã iinirã árĩbũ mũa: Iribojegue mũa ñero iirare duhurare ãhmurã iibũ mũa. Jesucristo sĩridigũ mera mũa mũaribejarare cóãnirã árĩbũ mũa. Eropirã Jesucristo sĩridigũ masa mũariara mera õaripũre gohrotonirã árĩbũ mũa. ãgu Goãmũpũ Cristore masudigũ árĩmi. “ãgu turagu ãhrimi,” arĩrã ãgure umupeorã árĩrã õaripũre gohrotonirã árĩbũ mũa. <sup>13</sup> Iribojegue mũa ñerã árĩra dipuwaja peamegue wabonirã árĩriyoro mũa. Eropa wabonirã árĩriyoro mũa Goãmũ yarã árĩbirã. ãgu dorerire opabirã árĩriyoro mũa. Dohpaguere mari Pagũ marire ãgu mera eropa õaro árĩniguimorã iimi. Cristo ãgu sĩridiro mera eropa iimi ãgu marire. Eropa iigu mari árĩpehreri ñeri iirare cãdijicãdi árĩmi ãgu. <sup>14</sup> Goãmũ ãgu dorerire gojarare mari tarinũganirã mari árĩquerecũ ta ãgu marire dipuwajacũdorebeami. Cristo crusague ãgu sĩridiro mera Goãmũpũ mari ñeri dipuwajare cãdijipehocãdi árĩmi. <sup>15</sup> ãgu Cristo crusague sĩricũ watẽa ya dorerapũre Goãmũpũ tarinũgacãpũ. Eropirã bu árĩrã dujacãñorã erã watẽapũ. Eropa iigu erãre gũhyasiũro wacũ iipũ erã ãhuro.

*Õmũsi majare Goãmũ yare gameque, arĩ gojañumi Pablo*

<sup>16</sup> Eropirã gajirã erã dorerire dorediaricoma mũare. “Mũare irire barã, irire ihrirã ñerire iirã iiaa mũa,” arĩ werewũama mũare. Erã eropa arĩ werewũacũ eropa ãacãque erãre. Bojori nũcũ árĩrinũri, aberi nũcũ árĩrinũri, semanari nũcũ árĩrinũri, bosenari mũa iidiabiricũ werewũama. Erã eropa werewũacũ eropa pepicãque erãre. <sup>17</sup> Erã mũare doreri iribojegue Goãmũ apira doreri Jesucristo mari ñeri iira dipuwaja sĩriburire ãhmũmũhtarañe árĩyoro. Dohpaguere Cristo arĩmi marire. Eropirã ãgure umupeorã iri doreripũre umupeobeaa pare. <sup>18</sup> Erã dorerire iidorerã mũare dipuwajacũrã dujacũ iidiama erã. Erã eropiicũ eropa ãacãque erãre. “Gajiropa dehyoarire ãabũ gũa,” arĩmaacãrã erã anyuare umupeorima Goãmũre umupeoboro dopa. Erã eropa pepicãrã iro dopa iirima. Gajirã masa iro dopa erã ñeri mũaribejarire pepirima erã. Eropa pepirã árĩrã “Masipehocãa gũa,” arĩ pepirima erã. <sup>19</sup> Eropa iirã árĩrã Cristopũre umupeobeama. Cristo dihta ãgu yarãre doregu ãhrimi. Cristopũ mari ãgu yarã dipuru ãhrimi. ãgu yarãpũ ãgu ya curu majarã árĩrã ãgu dũpũ waĩcũa.

Mari dipuru mari dũpũre gamesũriro dopa ta āhrimi Jesucristo ĩgu yarāre. ĩgu yarāre ĩtamugũ marire ĩgũre umupeonemocũ iimi. Goāmũ gamero dopa ta ĩgu yarāre ĩgũre masinemocũ iimi.

<sup>20</sup> Marire ñero iira dipuwajacũnirāre Cristo taudigu árĩmi crusague sĩrigũ. Eropirā Cristore umupeorā ĩgu yarā āhraa. Mũa eropa árĩrā i yeba maja buherire anyuare umupeori buherire gamebiro gahmea mũare. ¿Duhpirā gajino buherā erā dorerire iidiari mũa? <sup>21</sup> Őpa arĩ dorema erā basi erā gamero: “Irinore babiricāque. Irinore pēhrebiricāque,” arĩma. ¿Erā eropa arĩdorecũ duhpirā yũhriri mũa? <sup>22</sup> Erā doreriñe bari iro dopa ta pehrea waroca. Erā doreriñe i mũmũ maja dihta āhraa. Masa erā sũaro erā buheri dihta āhraa i buheri. Eropiro duhpiburi árĩbeaa. <sup>23</sup> Erā dorerire iirā Goāmũre umupeorā iro dopa árĩrima. Eropirā eropa pepicārā iro dopa ii ĩhmuma. Erā dũpũre ñero taricũ iirā “Goāmũre umupeorā iiaa,” arĩrima. Erā eropa iirā erā doreripũ masipehorā ya doreri iro dopa iirima. Eropa árĩbeaa. Erā dorerire iiquererā erā ñeri Ʃaribejarire duhubeama. Eropiro erā doreripũ duhpiburi árĩbeaa.

### 3

<sup>1</sup> Eropirā Cristo yarā āhraa mũa. Eropirā mũa ero core mũa ñeri iirare duhunijarā õaripũre gohrotonirā āhraa mũa. Eropa gohrotorā árĩrā mũmũsi majare Cristo yare gameque mũa. Eroque Cristo ĩgu Pagũ diayepũ doagu árĩpehrerore doregu āhrimi. <sup>2-3</sup> Mũa Ʃaribejari cóānirā árĩrā Cristo gamerire opaa. ĩgu Cristo mũa õaro iiborore õaro ĩhadibumi. Eropirā iri ñerire guñabeaa mũa. Eropirā mũmũsi majare Goāmũ yare guñamũhtaque. I yeba majare guñaniguibiricāque. <sup>4</sup> Eropirā mũmũsigue Cristo marire eropa árĩniguimorāre aĩgu ĩgu aricũ ĩgu mera warāca. Eropa warā ĩgu mera mũmũsigue Goāmũ yare oparāca.

#### *Cristo yarā árĩbirā ñerire iiribũ mari, arĩ gojañumi Pablo*

<sup>5</sup> Eropi i yeba maja ñerire duhucāque. Ne yujugũ mojoto diribiriqueregu nomeo mera árĩbiricāque. Ne yujugo mojoto diribiriquerego mũmũ mera árĩbiricāque. Eropa ñeri mũa iirire iripēta duhucāque. Ñeri Ʃaribejarire iibiricāque. Mũa opaburire gajinore gametaribiricāque. Mari gajinore burigā gamerā goāmarā wéanirāre erā umupeoro dopa iirā iiaa mari irire. <sup>6</sup> Iri ñerire iirā Goāmũre tarinũgarā āhriima. Erā eropa árĩcũ ĩagu ĩgũpũ erāre gamebeami. Eropigu erāre burigā dipuwaja moagũcumi. <sup>7</sup> Iribojeguere mũapũ iri ñerire iinirā mera majarā árĩriya mũa. <sup>8</sup> Dohpaguere i ñerire duhupehrecāque mũa. Guarire, disitĩri wiarire, gajirāre ñero arĩ pepirire, gajirāre ñero quere wereniguirire, ñero wereniguirire iri árĩpehrerire duhucāque. <sup>9-10</sup> Mũapũ Jesu yarā warā ñerā mũa árĩdiro dopa ta iri ñeri Ʃaribejarire duhutuhajanirā árĩbũ. Eropirā õaripũre gohrotonirā āhraa mũa. Mũare õaripũre gamecũ iigu iimi Goāmũ. ĩgu árĩro dopa mũa árĩboro dopa eropa iimi. Eropa ta iimi ĩgu mũa ĩgũre õaro masiboro dopa. Eropirā ĩgu eropiicũ mũa mera majarāre gũyabiricāque. <sup>11</sup> Cristo yarā mũa árĩrā judio masa, judio masa árĩbirā sã yujuropa dihta āhraa mũa Goāmũ ĩgu ĩacũ. Gasiro merogā wiri añirā, irire aĩbirinirā sã Cristo yarā árĩrā yujuropa āhraa Goāmũ ĩgu ĩacũ. Gaji yeba majarā sã, masibirā sã, mũa ya yeba majarā sã Cristo yarā árĩrā yujuropa āhraa Goāmũ ĩgu ĩacũ. Pohro majarā, erā pohro majarā árĩbirā sã, Cristo yarā árĩrā yujuropa ta āhriima Goāmũ ĩgu ĩacũ. Jesucristo tamera árĩpehrerā ĩgu yarā mera āhrimi. ĩgu yarā erā ĩacũ bu árĩgu árĩbeami ĩgu.

<sup>12-13</sup> Eropi Goāmũ ĩgu beyenirā, õarā, ĩgu mahirā árĩrā õpa árĩque mũa: Gajirāre mojomoro ĩarā, gajirāre õaro iirā árĩro gahmea. Mũare ñero iiquerecũ ta eropa pepicārā árĩro gahmea mũare. Mũa mera majarā mera guarā, erāre quere iirā árĩbiricāro gahmea mũare. Eropirā “Yũhũ bu árĩgu āhraa,” arĩ pepique. Mari Opũ

mua ñeri iirare cãdijimi. Īḡu eropa cãdijidiro dopa ta mua sã mua mera majarã erã ñero iirare cãdijique. <sup>14</sup> I doreri tauro õpa arĩ dorea mũare: Gajirãre mahi umupeoque. Mua eropa iirã árĩpehrerã gajirã mera yujuro mera árĩrãca. <sup>15</sup> Cristo marire õaro árĩcũ iimi gajinore mari wereniguibiriboro dopa. Īḡu eropa iicũ õaro árĩque mua. Mari ĩḡu yarã yuju curu ta ãhraa. Mari eropa árĩrãre mari Pagu marire õaro árĩmorãre ta apimi. Īḡu eropa iicũ õaro árĩque mua mua basi. Eropirã Goãmure “Õhaa,” arĩ mucubirirã árĩque mua Goãmure mera.

<sup>16</sup> Cristo ya buherire õaro guñaniguicãque mua. Õaro pee masiri mera ĩḡu yare gajirãre buheque. Gũhyadiaro irire wereque. Eropirã Salmo gojaripũre, Goãmure yare bayarire, gaji ĩḡure umupeori bayarire ĩḡure bayapeoque. Õaro guña umupeori mera bayapeoque. Eropa bayarã ĩḡu yare õaro guñaque mua. Eropirã Goãmure “Õhaa,” arĩ mucubirirã árĩque mua Goãmure mera. <sup>17</sup> Árĩpehreri mua iirire õaro sĩporãcũ iique mari Opũ Jesu ĩḡu mucubiriboro dopa. Mua wereniguirã ĩḡu ya árĩburi dihtare wereniguique. Eropirã Cristo ĩḡu itamuri mera Goãmure mari Pagure serẽrã “Õhaa,” arĩ mucubirique ĩḡure.

*Jesu yarãre yujuro mera árĩburi doreri õpa ãhraa, arĩ gojañumi Pablo*

<sup>18</sup> Mua marapucurã nome, mua marapũ sumarãre õaro yũhrique. Eropa ta iiro gahmea mari Opũ yarã Cristo yarã nome árĩrã. <sup>19</sup> Mua marapocurã, mua marasã nomere mahi umupeoque. Iгоре turibiricãque. <sup>20</sup> Mua erã porã sã mua pagu sumarãre tarinũgabirã dihta árĩque. Mua eropa iicũ ĩagũ mari Opũ õaro suagũ árĩḡucumi. <sup>21</sup> Mua erã pagu sumarã sã mua porãre eropa turiniguibiricãque bujawerecũ iiri arĩrã. <sup>22</sup> Mua pohro majarã, mua oparãre i yeba árĩrãre eropa yũhrirã árĩque. Erã ĩhurore erã dorero dopa ta mohmeque. Erã maricũ sãre mohmeque. Mari Opũre Cristore gũhyadiaro mua ĩadiro dopa ta õaro mera yũhrique mua oparã sãre. <sup>23</sup> Diaye ta Cristo yarã árĩrã õaro yũhrirã ãhraa mua ĩḡure. Eropirã mua oparãre õ majarã sãre yũhrirã, Cristore mua yũhriro dopa ta yũhrique mua. Eropirã mua oparã erã dorero dopa ta turaro mera mohmeque “Cristo ya doreri ãhraa,” arĩrã. <sup>24</sup> Mua eropa iicũ Cristo mũare wajayegucumi. Mũare ĩḡu oburire mũare ogucumi mari Opũ. Irire masia mua. Mari Opũ Cristo ĩḡu pohro majarã ãhraa mua. Eropigũ ĩḡupũ mua Opũ gohra ãhrimi. <sup>25</sup> ĩḡure tarinũgarãre dipuwaja moagucumi mari Opũrũ. Árĩpehrerã tarinũgarãre ne yujugũ dũhyaro mariro yujuro mera dipuwaja moagucumi ĩḡu. Eropa yũre iiri arĩrã õaro yũhrique mua.

## 4

<sup>1</sup> Mua oparãrũ, mua pohro majarãre diaye ta õaro iique erãre. Mua sã opũ opaa. Mua opũrũ mũusi majagũ Goãmure ãhrimi.

<sup>2</sup> Mua árĩpehrerã mũuri nũcũ Goãmure serẽniguique. Õaro guña pee masi serẽniguique. Eropirã mari Pagu õaro iirare guñaque. <sup>3-4</sup> Gũa ya árĩburipũre serẽque daja. Cristo yare iribojegue majarã erã masibirirare buherã iiaa gũa. Masare gũa õaro buheborro dopa serẽbasaque mari Pagure. Yũhũ Goãmure yare wereniguiuri waja dohpaguere peresugue ãhraa. Eropigũ mua eropa serẽcũ gahmea ĩḡu yare yũ õaro iiboro dopa. Cristo ĩḡu dorediro dopa ta yũ wereburire serẽque.

<sup>5</sup> Jesu yarã árĩbirã mera árĩrã õaro iique mua. Cristo yare wereque erãre. Erã mera mua árĩropẽ ta eropa ta õaro iique erã Jesu yarã árĩborro dopa. <sup>6</sup> Gajirã mera weretamurã õaro suaro mera weretamuque. Õari dihtare wereniguique. Mua eropiirã gajirã erã Jesucristo yare mũare serẽpicũ õaro masiri mera yũhrirãca erãre.

*Õadoretupũ Pablo*

<sup>7</sup> Tíquico mari acaweregũ Jesu yagũ ãhrimi. Ĩgũ yũ árĩricũre mũare weregũcumi. Ĩgũ mari mahigũ ãhrimi. Cristo yare buhegũ, gũa mera mohmegũ ãhrimi. Ne iri mohmerire duhubeami ĩgũ. <sup>8</sup> Mũa pohrogue ĩgũre obeogũ iiaa yũhũ gũa árĩricũre mũa masiboro dopa. Ĩgũre obeogũ iiaa yũhũ mũare mucubiricũ iibure. <sup>9</sup> Onésimo mari acaweregũ mera wapimoa obeogũ iiaa. Ĩgũ sã Cristo yare ne duhubeami. Mũa mera majagũ ãhrimi. Erã perã yũ dohpa tarirare wererãcoma mũare.

<sup>10</sup> Aristarco peresugue árĩgũ yũ mera majagũ mũare õadoremi. Marco sã õadoremi. Ĩgũ Bernabé pagũ magũ ãhrimi. Mũa pohrogue ĩgũ ejacũ õaro mera ĩgũre bocatĩrique yũ mũare werebeodiro dopa ta. <sup>11</sup> Jesu waĩcũgũ “Justo,” erã arĩ piyugũ õadoremi ĩgũ sã. Oã ta yũ mera mohmerã judio masa gohra ãhrima. Judio masa gohra erã dihta Goãmũ yare yũ mera buhema. Őpa buhea gũa Goãmũ yarã masa waboro dopa. “Jesucristo yũ Opũ ãhrimi,” erã arĩboro dopa buhea gũa. Erã yũre õaro itamunirã ãhrima. <sup>12</sup> Epafra mũa mera árĩdigũ mũare õadoremi. Ĩgũ Jesucristo dorerire õaro iigũ ãhrimi. Goãmũre serẽgũ, turaro mũa ya árĩburire serẽbasaniguicãmi ĩgũ. Goãmũre õaro guñaturaniguimorãre, ĩgũ gamero dopa iimorã mũa árĩboro dopa eropa Goãmũre serẽbasaniguicãmi ĩgũ. <sup>13</sup> Ĩgũ mũa ya árĩburire turaro serẽbasami. Laodicea majarã ya árĩburire, Hierapoli majarã ya árĩburi sãre ĩgũ turaro serẽbasami. Ĩgũ eropa iigũ árĩcũ ĩagũ mũare weregũ iiaa. <sup>14</sup> Duhturu Luca waĩcũgũ mari mahigũ mũare õadoremi. Dema sã õadoremi.

<sup>15</sup> Őaporo mari acawererã Laodicea majarã. Ninfa sã õaporo. Jesu yarã igo pohro gamenererã sã õaporo. <sup>16</sup> Ipũre yũ gojabeorapũre buhetuha Laodicea majarã sãre obeoque. Eropirã erãre Laodicea majarãre yũ gojabeorapũre mũa sã buheque. <sup>17</sup> Eropirã õpa arĩque Arquipore: “Mari Opũ Jesu yagũ mũ árĩcũ ĩgũ mohmerire apidi árĩmi mũre. Ĩgũ eropa apicũ iri mohmerire õaro mohme ojogorocũque mũhũ,” arĩque ĩgũre.

<sup>18</sup> Yũhũ Pablo, yũ mojoto mera ire gojaa. Mũare õadorea yũhũ. Peresugue yũ árĩrĩre guña serẽbasaque Goãmũre. Őaro arĩque mũa. Goãmũ ĩgũ mahiri mera mũare õadorea. Iripẽta ãhraa.



# 1 Tesalonicenses

## *Pablo gojañumi Jesu yarãre Tesalónica majarãre*

<sup>1</sup> Yũ Pablo, Silvano, Timoteo mera ipũre mũare gojabeoa. Mũapũ Tesalónica majarã mari Pagũ Goãmũ yarã árĩrã mari Opũ Jesucristo yarã sã ãhraa mũa. Eropigũ Goãmũ mari Pagũ, Jesucristo mari Opũ mera mũare òadoreo. Īgũ itamuri mera òaro árĩque.

## *Jesu yarã Tesalónica majarãpũ Jesure erã òaro umupeorare wereñumi Pablo*

<sup>2</sup> Goãmũre serẽrã mũa árĩpehrerãre guña mucubiriri mera. Mũa Jesure umupeorire guñarã “Òatariari ãhraa,” arĩ serẽniguicãa gũa Goãmũre. <sup>3</sup> Mũa Jesucristore “Diaye iigũ ãhrimi,” arĩ umupeoniguicã waĩcũa. Eropa umupeoniguicãrã Jesucristo ya árĩburire òaro iirã waĩcũa. Jesucristore, gajirã sãre mũa òaro mahi umupeorã waĩcũa. Eropa mahirã Jesucristo ya árĩburire bũrigã iirã waĩcũa mũa. Eropirã Jesucristo ĩgũ itamurire corerã waĩcũa mũa. Īgũre eropa corerã ĩgũ yare iirã duhubirã waĩcũa. Eropa iirã mũa Goãmũ mari Pagũ ĩacũ òaro iiaa. Goãmũre gũa serẽrã irire mũa eropa òaro ii waĩcũrare guñaniguicãa. <sup>4</sup> Gũa acawererã, òpa peeque. Mũare Goãmũ mahimi. Eropigũ mũare ĩgũ yarã árĩmorãre beyepũ. Irire masia gũa. <sup>5</sup> Gũa sohõ árĩrasubu mũa mera árĩrã òari buherire mũare gũa wererã gũa pepiri mera werebirabũ. Espĩritu Santo ĩgũ doreri mera ĩgũ yare wereabũ gũa mũare. Eropa wererã iri buheri diaye ta árĩrãre òaro masiabũ mũa.

<sup>6</sup> Eropa masirã mũa iri òari buherire òaro pee ñeabũ mũa mucubiriri mera. Eropirã mũa eropa peecũ ĩha gajirã gamebirã mũare ñero iima. Erã mũare ñero iiquererã ta mũa Espĩritu Santo itamuri mera òaro mucubiriabũ. Eropirã gũa mũa watope árĩrã gũa òaro árĩricũre masiabũ mũa. Eropirã mũa gũa diaye maja iirare ĩarã gũare ĩhacũbũ. Eropirã Jesu mari Opũ ĩgũ iidiro dopa ta iiabũ mũa. <sup>7</sup> Mũa eropĩcũ pee Jesu yarã Macedonia yeba majarã, Acaya yeba majarã sã mũa eropa òaro iirare peeañorã. Eropa peerã erãpũ mũa iidiro dopa ta iiañorã erã sã. <sup>8</sup> Eropirã mũaguere Jesucristo mari Opũ yare peesũyoro. Goãmũre mũa umupeorare Macedonia majarã Acaya majarã sã peeañorã. Erã dihta peebirañorã. Árĩpehrero majarã mũa umupeorare peeañorã. Eropirã gũa mũa umupeorare gajirã masituhajacũ ĩha werebirica erãre gũapũ. Erãpũ gũare werema. <sup>9</sup> Òpa arĩma gũare mũa iirare wererã. “Tesalónica majarã mũare òaro bocatĩriñorã mũa erogue ejacũ. Erã Jesucristo yare pee erã goãmarã wéanirãre umupeonirã árĩrã gohrotoañorã. Gohrotorã Goãmũ gohra ojocarigũre diaye iigũre umupeonũgañorã. Eropirã dohpague Goãmũ yare iirã iiañorã. <sup>10</sup> Eropirã Goãmũ magũ Jesucristo ĩgũ mũũsigue ariburiñe òaro corerã ãhrañorã,” arĩ werema gũare. Jesure sĩridigũre Goãmũ masupũ. Eropigũ Jesupũ marire ñetariaro dipuwajacũbonirãre taudigũ ãhrimi.

## 2

### *Pablo Tesalónicaque ĩgũ buherare wereñumi*

<sup>1</sup> Mũa pohro gũa árĩrã eropa árĩcãrã iibirabũ. Mũare òaro itamurã árĩmũrabũ gũa. Irire òaro masia mũa, gũa acawererã. <sup>2</sup> Ero core Filipino maca gũa árĩrã ñero taribũ. Gũare ñero erã iirare masia mũa. Gũare erã eropa ñero iiquererã ta Goãmũ itamuri mera gũiro mariro Goãmũ yare òari buherire wereniguirã gũa ejabũ mũa pohroguere. Mũa árĩro sãre gũare masa bajarã erã ĩhaturiquererã òari buherire buheabũ gũa mũare. <sup>3</sup> Eropirã mũa pohro árĩrã mũare gũa werera òaro diaye majare buheabũ gũa mũare. Eropa wererã mũare ñero iidiarã árĩbirimũrabũ gũa. Mũare

guyadiarã buhebirimurabu gua muare. <sup>4</sup> Goãmũ gamero dopa ta buhea gua. Ōari buherire buhemorãre Goãmũ beyemi guare. Eropa beyegu ïgu ya buherire guare weredoremi. Eropirã masa guare erã ïhasuaburire buherã iibeaa gua. Goãmũpũ guare ïgu ïhasuaburire ïgu yare buhea gua. Goãmũ mari pepirire dohpa mari iidiarire ōaro masimi. <sup>5</sup> Eropirã gua muare ōari buherire wererã gajinore amarã ejabirimurabu. Eropirã werenigui guyarã iibirimurabu gua muare. Eropirã gua buherã muare niyerure aĩmorã iibirimurabu. Irire gua mua pohro eropa ōaro iirare mua masia. Goãmũ sã irire masimi. <sup>6</sup> Gua eropa buherã mua guare umupeoburire dorebirimurabu. Gajirã sãre eropa ne dorebirimurabu. <sup>7</sup> Gua Cristo ïgu apinirã árĩrã muare doremasiboaya. Ne eropa dorebirabu gua. Gua dorebirã majirãre nijisoro dopa ta muare ōaro iimurabu mahiri mera. <sup>8</sup> Eropirã muare ōaro gamerã Goãmũ yare ōari buherire weremurabu gua muare. Gua basi ta árĩpehrero gua iimasiburire muare itamumurabu. Gua mahirã mua árĩcũ eropa itamuabu muare. <sup>9</sup> Eropirã muare mahirã buriã itamumurabu. Irire guñaã mua, gua acawererã. Goãmũ yare ōari buherire wererã árĩrã, mua oparire serẽ garibobirimurabu muare. Eropirã gua basi mohmemurabu gua baburire wajatamorã. Eropirã umure, ñamigue sãre mohmemurabu gua.

<sup>10</sup> Eropirã ōaro Goãmũ gamero iirã ñeri dipuwaja mariro diaye ta iimurabu muare Jesu yarãre. Eropirã gua mua mera eropa queoro árĩrãre masia mua. Goãmũ sã irire masimi. <sup>11</sup> Eropirã erã pagu ïgu porãre ïgu ōaro were ïgu mucubiricũ iidiro dopa ta gua mua sãre árĩpehrerãre wererã mucubiricũ iiaabu muare. Irire masia mua. <sup>12</sup> Goãmũ muare ïgu opu árĩroque ïgu ōatariaro árĩroque mua árĩmorãre beyedigũ árĩmi. Eropirã mua ïgu yarã árĩrã ïgu árĩro dopa ta ōaro iiniguicãro gahmea, arĩmurabu.

<sup>13</sup> Eropirã Goãmũ yare muare gua wererare mua peerã ōpa pepibu mua: “Masa erã pepiri mera iri buheri árĩbeaa. Goãmũ ya buheri ta aĩhraa,” arĩ pepibu mua. Irire mua eropa pepicũ masirã mucubiria gua. Eropirã Goãmũre serẽrã, “Ōhaa,” arãã gua ïgure. Eropa ta aĩhraa. Muare gua buheri, Goãmũ werenigui diaye ta árĩri aĩhraa. Eropigu mua Goãmũ yare ta peecũ ïgu ya buheri mera ōaripure gohrotocũ iimi muare. <sup>14</sup> Eropirã Jesucristo yarã mua árĩcũ ïarã i yeba majarã Jesure gamebirãpũ ñero iiañorã muare. Mua eropa wadiro dopa ta Judea yeba majarã sãre wayoro. Eroque sãre Jesucristore umupeorãre erã ya yeba majarã sã ñero iiañorã. Judio masa Jesure gamebirã erãre ñero taricũ iiañorã. <sup>15-16</sup> Mata judio masapũ iribojegue majarã Goãmũ ya weremũhtanirãre wejẽmurinirã árĩma. Eropirã mari Opu Jesucristo sãre wejẽñorã erã. Eropirã erã Jesucristo yare gamebirã gua sãre ñero ii cohãma guare erã ya yebare. Eropirã erã judio masa árĩbirãre erã dederebiribore gua erãre Goãmũ yare werẽcũ guare judio masa cãhmotamurima. Goãmũ yare weredorebirima guare. Erã Jesu yarãre ïhaturi árĩmurima. Erã eropiirare Goãmũ gamebirigohracãmi. Eropiro erã judio masa ñero iira dipuwaja wũaro árĩtuhaya. Erãre Goãmũ buriã dipuwaja moagucumi.

*Pablo Tesalónica majarã pohroque dipaturi curigu wadiaripu*

<sup>17</sup> Gua acawererã, mua mera dohpaguere árĩbiriqererã ta muare guñarã iiaa. Eropirã muare buriã ïadiarã mua pohroque wadiarabu gua. <sup>18-19</sup> Bajasuburi yũhũ muare ïagũ wadiarabu. Watĩpu gua wabodirore goroweoami. Eropirã gua wabiricarabu. Guare mucubiricũ iirã mua árĩcũ muare ïadiarabu. Mari Opu Jesucristo i yebague dujaricũ turaro mucubirirãca mua mera. Eropirã mucubirirã mua mera Jesu core niguirãca. <sup>20</sup> Eropa ta aĩhraa. Muare ïagũ Jesupu “Ōaro buhenirã aĩhraa mua,” arĩgucumi guare. Eropirã ōaro mucubirirãca gua.

### 3

1-2 Eropii m̄are yoari boje ḡa ĩabir̄a m̄are b̄uriḡa peediar̄a irire guñar̄a Timoteore m̄a pohrogue obeoab̄u. Ĩgu mari acaweregu Jesu yagu Goãm̄u pohro majagu ḡa mera õari buherire buhegu āhrimi. Eropir̄a ĩgure obeoab̄u Jesucristore m̄a õaro umupeoburire m̄a mucubiriburi s̄are. ĩgure obeor̄a ḡa seyaro Atena maca dujab̄u. <sup>3</sup> M̄a Jesucristore umupeora waja gajir̄a m̄are ñero iiañor̄a. Eropir̄a m̄a Jesu yare m̄a cóãbiriboro dopa itamubure obeoab̄u Timoteore m̄a pohrogue. Mari Jesu yar̄a árĩr̄are eropa ta gajir̄a marire ñero taricũ iir̄acoma. Irire masia m̄a. <sup>4</sup> M̄a mera ero coreguere árĩr̄a õpa arĩ weretuhajab̄u m̄are: “Mari Jesucristore umupeora waja gajir̄a marire ñero iir̄acoma,” arĩ weretuhajab̄u m̄are. Eropir̄a ḡa werediro dopa ta er̄a ñero iima m̄are. Irire m̄a õaro masia. <sup>5</sup> Eropigu m̄are mahitariagu m̄are yoari boje ĩabigu m̄are b̄uriḡa peediab̄u ȳh̄u. Eropigu Timoteore obeoab̄u ȳh̄u m̄a Jesure umupeorire masibu. “Watĩ m̄are ñero iidoreri,” arĩgu, “M̄are ḡa buherare m̄ague duhuri,” arĩgu ĩgure obeoab̄u ȳh̄u.

<sup>6</sup> Eropigu dohpaguere Timoteo m̄a pohrogue árĩdi ḡa pohrogue dujarami. Eropa dujaragu õari querere ḡare wereami ĩgu. Jesure m̄a õaro umupeorare m̄a gajir̄a mera õaro mahira s̄are ĩgu wereami ḡare. Eroparĩgu ḡare m̄a õaro guñara s̄are wereami. “Er̄a s̄a m̄are b̄uriḡa ĩadiama,” arĩ wereami ĩgu ḡare. ĩgu eropa arĩ werẽ peer̄a mucubiria. <sup>7</sup> Eropir̄a ḡa dohpaguere ñero tarir̄a árĩquerer̄a m̄a Jesure õaro umupeocũ peer̄a ḡa mucubiria. <sup>8</sup> Jesure m̄a õaro umupeorare pee ĩgu yare m̄a cóãbirirare peer̄a õaro pepia ḡa. <sup>9</sup> Eropa pepir̄a Goãm̄u ĩaro ḡa b̄uriḡa mucubiria. Eropa mucubirir̄a Goãm̄ure ser̄ea, “Õhaa,” arĩr̄a. <sup>10</sup> Eropir̄a ḡa basi m̄are ĩaburire Goãm̄ure ser̄eniguia. ðm̄uri ñamiri s̄are ser̄eniguic̄a. M̄are ĩadiar̄a Jesucristo yare m̄a õaro masipehocũ itamudiaca ĩgure m̄a õaro umupeonemoboro dopa.

<sup>11</sup> Goãm̄u mari Pagu ĩgu basi mari Op̄u Jesu mera ḡare itamuporo m̄a pohrogue ḡa waburire. <sup>12</sup> Eropigu mari Op̄u Jesu árĩpehrer̄a m̄a mera majar̄are árĩpehrer̄a gajir̄a s̄are mahinemoburire iiporo m̄are. Ḡa m̄are mahi umupeodiro dopa ta m̄a s̄a b̄uriḡa mahinemocũ iiporo m̄are. <sup>13</sup> M̄are ĩgu õaro itamuri mera m̄a dipuwaja marir̄a ñeri marir̄a árĩr̄aca Goãm̄u mari Pagu ĩacũ. Eropa ta árĩr̄aca m̄a mari Op̄u Jesu dujaricũ árĩpehrer̄a ĩgu yar̄a õar̄a mera i yebague.

### 4

#### *Goãm̄ure mucubiricũ iidiar̄a õpa iique, arĩ were gojañumi Pablo*

1-2 Dohpaguere Jesu mari Op̄u ĩgu dorero mera m̄are õpa werea: “Goãm̄ure mucubiricũ iidiar̄a õpa iique,” arĩ buheabu ḡa m̄are. Ḡa eropa buhera p̄h̄ru ḡa buhediro dopa ta iayoro m̄a. Iri buherire õaro masia m̄a. Eropir̄a m̄a Goãm̄u yare õaro iir̄a āhraa. Eropir̄a m̄a eropa iidiro dopa ta duhubir̄a ta. M̄araro ta iinemoque daja. Irire b̄uriḡa werea m̄are.

<sup>3</sup> Irire m̄are werenemogura. M̄a õpa árĩcũ gahmemi Goãm̄u. Ñerire iibir̄a Goãm̄u yare iir̄a árĩque. Eropir̄a nome mera ñero iiro mariro árĩque m̄a ðma. M̄a nome s̄a ðma mera ñero iiro mariro árĩque. <sup>4</sup> Ñero iibiraro mariro umupeori mera m̄a maras̄a nomere opaque. M̄a irire masicũ gahmemi Goãm̄u. <sup>5</sup> Goãm̄ure gamebir̄a Goãm̄ure masibir̄a ñerire ðaribejar̄a nomere er̄a gamero dopa ta iibiric̄aque m̄a. <sup>6</sup> Õpa ta m̄a iibiricũ gahmemi Goãm̄u: Ne yujugu m̄a acaweregu marapore yajabiric̄aporo. Eropa yajagu ĩgu acaweregure umupeobigu iimi ĩgu. Eropigu eropa iigure mari Op̄u iri ñerire ĩgu ya dipuwaja moabu arĩgu tiimi. Eropir̄a m̄are ḡuis̄ar̄a irire wereabu m̄are. <sup>7</sup> Ñerire pepimor̄are, ñerire iimor̄are beyebirimi marire Goãm̄u. Ñerire iibirimor̄are õarire iimor̄are beyemi Goãm̄u

marire. <sup>8</sup> Eropigu òarire mari iimorã áricũ ìgu Espíritu Santo odigu árimi marire. Eropirã iri ñerire iibiricãro gahmea. Eropigu yujugu i gña wererare yãhribigu Goãmũ yapũ sãre yãhribigu àhrimi.

<sup>9-10</sup> Mũa acawererãre, Jesu yarãre mũa game mahiburire Goãmũ mũare buhetuhajami. Ìgu eropa buhecũ mũa diaye ta Jesu yarãre Macedonia majarã sãre áripehrerãre òaro mahi umupeo waĩcna. Mũa eropa mahicũ peegu “Mũa acawererãre mahique,” arĩ buhebeaa daja mũare. Eropigu òpa dorea daja yũhũ. Mũa gajirãre mahiro dopa ta erãre mahinemoque. <sup>11</sup> Eropirã mũa basi game ìhaturiro mariro árique. Gajirãre gajiropa arĩ wereniguibiricãque. Eropa ìacãque erãre. Eropirã mũa ya mohmeripũre òaro mohmeque. Ero coregue ta mũare eropa iidoreabũ. <sup>12</sup> Mũa eropa mohmerã gajirãre barire amasome. Eropirã erã mũare òaro wereniguirãcoma.

### *I yebaguere Jesucristo ìgu dujariborore werepũ Pablo*

<sup>13</sup> Jesure gamebirã Jesu pohroguere wasome. Eropirã erã mera majarã erã sĩricũ ìarã burigã bũjawerema. Sĩrinirã mũra erã waborore diaye ta òaro mũa masicũ gahmea gña. Gajirã erã bũjawerediro dopa mũa bũjawerebiriboro dopa mũare masicũ iidiaa. <sup>14</sup> Jesu ìgu sĩrira pũhrũ masa mũriadigu árimi. “Iri diaye ta àhraa,” arãa mari. Eropa arĩrã árĩrã i sãre “Diaye ta àhraa,” arãa mari. Goãmũpũ ìgu yarã sĩrinirã mũrare erã masa mũriacũ Jesu mera aricũ iigucumi. Iri sãre “Diaye ta àhraa,” arãa mari.

<sup>15</sup> Mari Opũ ìgu buhediro dopa ta ire werea. Jesucristo ìgu dujaricũ ìgu yarã ojocarirã sĩrinirã core masa mũriamũhtasome. Sĩrinirã mũrapũ ojocarirã core masa mũriamũhtarãcoma. <sup>16</sup> Òpa áriroca Jesu ìgu dujaricũ: Mari Opũ ìgu basi dijarigucumi umũsigue áridigu. Dijarigu bũsũro mera werenigui, doregucumi. Ìgu dorecũ ìgu anyua opũ burigã piyugucumi. Eropa ìgu piyucũ Goãmũ ya corneta bũsũmũriroca. Erã eropiicũ Cristore umupeonirã sĩrinirã mũra masamũria mũhtarãcoma. <sup>17</sup> Erã pũhrũ mari ojocarirãre sĩrinirã masanirã mera Goãmũ aĩ mũriagucumi. Ìgu eropa iicũ mari Opũ Jesure bocatĩrirãca mari. Eropirã mari Opũ Jesu mera árinigucãrãca. <sup>18</sup> Eropirã i yũ wererare mũa mera majarãre wereque. Eropa arĩ wererã mucubirirãca mũa áripehrerã. Mari Opũ Goãmũ ìgu wereri ta àhraa i.

## 5

<sup>1</sup> Jesu ìgu dujariburinũre “Inũri áricũ ìgu dujarigucumi,” arĩ mũare were gojabeosome. <sup>2</sup> Ìgu dujaririnũre marire masima masiya mara. Yajari masũ ñamigue guñaña mariro ìgu yajagu ariro dopa ta i yebaguere mari Opũ guñaña mariro dujarigucumi. Iri sãre masia mũa. <sup>3</sup> Eropirã masapũ “Dohpaguere mari òaro áricãa. Gũhyari mara marire,” erã eropa arĩ pepirisubu mata ñero waroca erãre. Ero eropa wacũ ne nohogue gohra duhri wiria masisome. Dederea warãcoma. Niji wahgũgo guñaña mariro igo pũriro pepiro dopa guñaña mariro eropa waroca masare Jesu ìgu dujaricũ. <sup>4</sup> Yũ acawererã, mũapũre eropa wasome. Yajari masũ wihi opũre ìgu ucudiro dopa ta mũapũre eropa wasome. Jesu arigu mũare ucusome. Naitĩarore erã ìha masibiro dopa gajirã Jesure ne masibeama. Mũapũ erã iro dopa áribeaa. <sup>5</sup> Mũa áripehrerã Jesu yarã àhraa. Eropirã boyorore erã ìha masiro dopa ta Jesu ìgu ariborore masia mũa. Gajirã ìgure masibirã iro dopa áribeaa mũa. Eropirã ucasome ìgu dujaricũ. <sup>6</sup> Eropirã carĩrã iro dopa áribiricãro gahmea. Òaro pee masirã àhri Goãmũ yare òaro pepiro gahmea. Eropirã Jesucristo dujariborore òaro corero gahmea. <sup>7</sup> Ñamire carĩrã dopa áribiricãro gahmea. Ñamire mererã dopa áribiricãro gahmea. <sup>8</sup> Umũre áriro dopa òaro pee masi áriro gahmea. Eropirã marire watĩ ñero



iidoreburire iibiricāro gahmea. Surara gamewejēgu wagu come suhriro saña, come sãpea peya ĩgu cãhmotaboro dopa mari sãre watĩ ñero goroweoborore cãhmotaro gahmea. Ōpa iiro gahmea watĩre cãhmotabure: Jesucristore “Diaye iigu añhrimi,” arĩ umupeoniguicāro gahmea. Goãmure masa sãre mahiniguicāro gahmea. Eropirã Jesu mera mari Goãmũ pohro mari árĩburire masi corero gahmea. Mari eropiirã ñero iibiriburire cãhmotarã árĩrãca. <sup>9</sup> ĩgu dipuwaja moamorãre marire beyebiripũ Goãmũ. Jesucristo mari Opũ marire dipuwaja marimorãre, peamegue wabonirãre ĩgu taumorãre beyepũ marire. <sup>10</sup> ĩgu Jesu mari ya árĩburire ta sĩribasadiqu árĩmi ĩgu mera mari árĩburire. Eropirã ĩgu dujaricũ ojocarirã árĩrã sĩrinirã sã yujuropa ta ĩgu mera árĩrãca mari ĩgu yarã árĩrã. <sup>11</sup> Eropirã mũa mera majarãre dohpague mũa mucubiricũ iidiro dopa ta mũa basi mũa mucubiricũ iique daja. Eropirã mũa basi ta Goãmure umupeonemocũ iique mũa mera majarãre Goãmũ yare wererã.

### *Jesu yarãre Pablo weretuñumi*

<sup>12</sup> Jesucristo yare buherã mũa òaro iiburire wererã añhriima mũa pohro. Erãre mari Opũ Jesucristo buhedoregu beyeñumi. Erã ĩgu beyenirã árĩcũ òaro umupeoque erãre. Mũa erãre eropa umupeocũ gamegu burigã dorea mũare. <sup>13</sup> Erã mohmerire erã iicũ erãre mahiri mera òaro umupeoque. Eropirã gamequeãro mariro árĩrã gahmea.

<sup>14</sup> Gũa acawererãre, mũare, òpa burigã werea daja. Mohmediabirãre mohmedoreque mũa. Duhudiarãre “Goãmũ itamuri mera duhubiricãque,” arĩque erãre. Jesure merogã umupeorã sãre itamuque. Erã mata pee masibiricũ ĩha guabiricãque erã mera.

<sup>15</sup> Yujugũ mũare ĩgu ñero iiquerecũ mũapu dipaturi ĩgure ñero ii gamebiricãque. Mũa mera majarãre árĩpehrerã gajirã sãre òaro mera umupeoque.

<sup>16</sup> Eropirã umuri nũcũ Goãmũ mera eropa mucubiriniguicāro gahmea mũare. <sup>17</sup> Eropirã Goãmure eropa serēniguicāro gahmea. <sup>18</sup> Mũa òaro tarirã, mũa ñero tariquererã Goãmure “Ōhaa,” arĩro gahmea. Goãmure “Ōhaa,” arĩrã, Goãmũ ĩgu gamediro dopa ta iirãca mũa Jesucristo yarã árĩrã.

<sup>19</sup> Eropirã Espĩritu Santo mũare ĩgu wererire yuhribirã árĩbiricãque. <sup>20</sup> Espĩritu Santo ĩgu masiri mera gajirã mũare buheama. Erã eropa buhecũ erã buherire gamebirã árĩbiricãque. <sup>21</sup> Eropirã gajirã mũare gajiropa erã arĩ buhecũ iri Goãmũ ya árĩbiricũ masique mũa. Eropirã Goãmũ ya buheri iri árĩcũ sãre masique mũa. Eropirã òari dihtare gameque. <sup>22</sup> Eropirã iri ñerire árĩpehreri ñerire gamebiricāro gahmea.

<sup>23</sup> Eropigũ Goãmũ marire òaro iirã árĩcũ iigu añhrimi. ĩgu ĩgu basi mũare ĩgu yarãre mũa òarã ñeri marirã árĩcũ iinemoporo mũare. Mũa ðupũ sãre mũa siporã sãre òaro ĩhadibuporo mũare. Mari Opũ Jesucristo i yebaguere ĩgu dujariboro core Goãmũ mũare òaro ĩhadibuporo mũa ñerire iibiriboro dopa. ĩgu eropa iicũ Jesucristo dujaricũ ñeri marirã árĩrãca mũa. <sup>24</sup> Eropa ta iigucumi Goãmũ. ĩgu mũare beyedigũ ĩgu arĩdiro dopa ta iimi.

### *Pablo erãre òadorebeoñumi*

<sup>25</sup> Gũa ya òaro árĩburire Goãmure serēbasaque mũa sã, gũa acawererã.

<sup>26</sup> Jesu yarãre bocatĩrirã árĩpehrerãre mahiri mera mojoto ñeaque mũa.

<sup>27</sup> Jesu mari Opũ ĩgu doreri mera mũare werea yuhũ. Árĩpehrerã Jesu yarã gamenererãre ipũre buheque mũa.

<sup>28</sup> Jesucristo mari Opũ ĩgu mahiri mera mũare burigã òadorea. Eropa ta arĩniguicāporo. Iripẽta añhraa.

## 2 Tesalonicenses

*Pablo ĩgu mera majarã mera gojabeoñumi daja Jesu yarã Tesalónica majarãre*

<sup>1</sup> Yũhũ Pablo, Silvano mera, Timoteo mera ipũre mũare gojabeogu iiaa. Mũa Tesalónica majarã mari Pagũ yarã ãhraa. Mari Opũ Jesucristo yarã ãhraa mũa. <sup>2</sup> Eropigu mari Pagũ Goãmũ, Jesucristo mari Opũ mera mũare ðadorea. ĩgu itamuri mera ðaro árĩque mũa.

*I yebaguere Jesucristo dujarigu dipuwaja moagũcumi, arĩ gojañumi Pablo*

<sup>3</sup> Mũa Jesucristore “Diaye ta iigu ãhrimi,” arĩ umupeorã umupeonemorã árĩ waĩcuabu. Eropirã mũa gajirãre mahi umupeorã turaro mahi waĩcuabu. Mũa eropa árĩcũ pee Goãmũre ðaro mera serẽro gahmea gũare. “Mũhũ erã mera ðaro iiaa,” arĩro gahmea Goãmũre. <sup>4</sup> Mũa Jesure umupeora waja gajirã mũare erã ñero iiquerecũ mũa ñero tariquererã Jesure umupeonigui waĩcuabu. ĩgũre umupeorã duhubirã waĩcuabu. Mũa eropa iicũ pee mucubiriri mera werea gũa gajirãre Goãmũ yarãre. <sup>5</sup> Eropirã mũa Jesure umupeora waja gajirã mera ñero tariquererã Goãmũre umupeoniguicã waĩcuabu. Goãmũrũ diaye iigu ãhrimi. Eropigu ĩgu mũa ĩgũre eropa umupeocũ ĩha ĩgu Opũ árĩroguere wadoregũcumi mũare.

<sup>6</sup> ĩgu Goãmũ diaye iigu árĩgu gajirãpũre mũare ñero iinirãpũre erãpũre ñero taricũ iigũcumi Goãmũ. <sup>7</sup> Eropigu mari ñero tarinirãre marire soocũ iigũcumi mari Opũ Jesu dujarigu. ĩgu dujarigu anyua turarã mera peame ãjũro iro dopa dehyoagu arigũcumi umarogue. <sup>8</sup> Eropa arigu Goãmũre masibirãre erã ya dipuwaja moagũcumi. Mari Opũ Jesucristo ĩgu ðari buherire tarinũganirãre dipuwaja moagũcumi erãre. <sup>9</sup> Eropirã erã erã ya dipuwaja dedererãcoma. Peamegue ñero tariniguirãcoma. Eropirã erã mari Opũ Jesu ĩgu dorerogue ĩgu ðari árĩroguere ne wamasisome. Eropa ta waroca irinũre Jesucristo ĩgu dujaricũ. <sup>10</sup> Irinũ ta ĩgu aricũ ĩgu yarã ĩhamariarã “Diaye ta turagu, ðagu ãhrimi,” arĩ wereniguirãcoma. Eropirã ĩgũre ðaro peenirã ĩgũre ĩarã umupeorãcoma ðaro ĩgũre. Mũarũ Jesu yare gũa buherare ðaro peeabu. Eropirã mũa sã ĩgu mera árĩrãca.

<sup>11</sup> Eropirã Goãmũre serẽniguica gũa mũa ya árĩburire. Őpa arĩ Goãmũre serẽbasaa ĩgũre mũare itamudorerã. “Erã mũ beyenirã mũ arĩro dopa ta erã árĩcũ iique,” arĩ serẽbasaa. “Goãmũ, mũ doreri mera erã ðaro iidiarire erã iicũ itamuque. Erã mũre umupeorã mũ gamerire erã iicũ iique,” gũa arĩ serẽbasaa Goãmũre. <sup>12</sup> Mũa eropa Goãmũ gamerire iicũ ĩha gajirã sã umupeorãcoma mari Opũ Jesucristore. Eropigu Jesucristorũ mũare ðaro ĩagũcumi. Eropigu Goãmũ marire mahigu gũa arĩ serẽbasaro dopa ta iigũcumi mari Opũ Jesucristo mera.

## 2

*Ñeri mera masare weresãgu dehyoagũcumi, arĩ gojañumi Pablo*

<sup>1</sup> Dohpague mari Opũ Jesucristo i yebaguere ĩgu dujariborore werenemodiaca yũhũ mũare. ĩgũre mari gamenere bocatĩriburire werediaca. Eropigu ōpa arĩ burigã werea mũare, gũa acawererãre. <sup>2</sup> Gajirã mũare ōpa arĩbocoma: “Mari Opũ ĩgu dujariburinũ, pehrerinũ árĩroguere iiaa,” arĩbocoma mũare. Erã eroparĩcũ peerã pee ucabiricãque. Eropirã peerã peewisibiricãque. “Goãmũ yũre eropa ta arĩdi árĩmi,” arĩbocumi mũare gajigu. Gajigu sã mũare buhegu eropa ta arĩbocumi. Gajigu sã eropa ta arĩ gojabeobocumi, “Yũhũ Pablo ta ãhraa,” arĩ gũya gojabeogu. Irire mũare weregũre masibea yũhũ. <sup>3</sup> Eropirã gajirã mũare gũyacũ ne peebiricãque. Irinũ

Jesucristo dujariburinu árĩboro core õpa waroca. Bajarã masa Goãmure cóarãcoma. Eropigu ñeri mera masare weresãgu dehyoamũhtagucumi. Ìgu dederebu árìgu àhrimi. <sup>4</sup> Ìgu Goãmure umupeorire, goãmarã sãre umupeorire gamebigucumi. Ìgu dihtare umupeodoregu “Árĩpehreri weca opu àhraa yũhũ,” arìgucumi Ìgu. Eropigu Ìgu Goãmũ ya wihi doagu, “Yũhũ ta Goãmũ àhraa,” arìgucumi Ìgu masare Ìgure umupeodoregu.

<sup>5</sup> Yũhũ mũa mera árĩrasubure irire ta werebũ. ¿Irire guñari mũa? <sup>6</sup> Dohpaguere Ìgure ñeri mera masare weresãgure árĩdorebeami dohpa. Ìgure árĩdorebigure masica mũa. Queorinu árĩcũ Ìgu ñeri mera masare weresãgu dehyoagucumi. <sup>7</sup> Dohpaguere ìaro mariro Ìgu ñerire mohmenugatuhajacumi. Ìgu ñeri iidiarire árĩpehrerire iimasibeami dohpa. Ìgure árĩdorebigu Ìgu wara pũhrũ árĩpehrerire ñerire iigu Ìgu ñeri mera masare weresãgu dehyoagucumi. <sup>8</sup> Eropiira pũhrũ mari Opu Jesucristo Ìgu wereniguri mera Ìgure wejẽcãgucumi. Eropigu Jesupu dujarigu Ìgu dehyoari mera Ìgure wejẽ dedeocãgucumi Ìgure. <sup>9</sup> Ìgu ñeri mera masare weresãgupu watĩ dorero mera arìgu baja deyoro moaro dopa árĩrire ii guyagucumi masare. <sup>10</sup> Ìgu eropa árĩpehrerire ii guyacũ peamegue wamorãpu Ìgure peerãcoma. Erã diaye árĩrire gamebirã àhrima. Erã eropa gamebircũ Goãmũ erãre dederemorãre tausome. <sup>11</sup> Eropigu diaye árĩrire gamebirãre Goãmũ erãre guyaripũre peecũ iigucumi. <sup>12</sup> Goãmũ árĩpehreri diaye árĩrire peidiabirinirãre, ñerire iidianirãre erã ya dipuwaja moagucumi.

### *Goãmũ mũapũre beyeñumi Ìgu taumorãre, arĩ gojañumi Pablo*

<sup>13</sup> Acawererã, mari Opu mahirã, matague ta Goãmũ mũapũre dederebonirãre Ìgu taumorãre beyepũ mũare. Mũa Espĩritu Santo itamuri mera ñeri mariro mũa árĩmorã sãre beyepũ. Mũa Ìgu yare peemorã árĩmorãre beyepũ. Eropirã Ìgu mũare beyerare guñarã Goãmure serẽrã “Õhaa,” arĩniguicãro gahmea guare. <sup>14</sup> Eropigu iri õari buherire gũa buhera mera Goãmũ mũare Ìgu yarã árĩcũ iimi mari Opu Jesucristo Ìgu õari oparire mũa sã opaboro dopa.

<sup>15</sup> Eropirã õaro guñaturarã árĩque mũa. Eropirã gũa wereniguri mera gũa gojabeorapũri mera iri buherire õaro guñaque mũa. Eropirã iri buherire tarinugabircãque. <sup>16</sup> Mari Opu Jesucristo Ìgu basi Goãmũ mari Pagũ mera marire mahigu, mũari nũcũ marire mucubircũ iimi. Marire mahigu peamegue wabonirãre taugucumi marire. Eropirã Goãmũ Ìgu tauborore õaro masi mucubiria mari. <sup>17</sup> Eropigu Jesucristo mari Pagũ mera mũare sĩporã turaniguicũ iiporo. Eropigu mũa Ìgu yare duhubircũ iiporo. Árĩpehreri õari iirire õari wereniguri sãre mũare iicũ iiporo.

## 3

### *Gũa ya árĩburire Goãmure serẽbasaque, arĩ gojañumi Pablo*

<sup>1</sup> Acawererã, dohpague gũa ya árĩburire Goãmure serẽbasaque. Mari Opu buheri cãhmotaro mariro bajarã masare buheburire serẽbasaque. Eropirã Ìgu buherire mũa õaro gamediro dopa ta gajirã bajarãpu iri buherire umupeori mera erã gameboro dopa serẽbasaque mũa Goãmure. <sup>2</sup> Gajirã Jesure umupeobeama. Eropirã erã Jesure umupeobirã ñerã masa guare erã ñero iidiarire Goãmure serẽbasaque guare Ìgu itamuboro dopa. <sup>3</sup> Mari Opu õagu Ìgu werediro dopa ta iimurimi Ìgu. Eropigu mũare Ìgure umupeocũ iigucumi. Eropigu mũa ñero iibiriburire Ìgu mũare cãhmotagucumi. <sup>4</sup> Ìgu mũare Ìgu eropa cãhmotarare masia gũa. Eropirã mũare gũa dorediro dopa ta iiaa mũa. Eropirã irire iirãca daja mũraro ta. Iri sãre masia gũa. <sup>5</sup> Eropigu mari Opu Goãmũ Ìgu mũare mahirire mũare masicũ iiporo. Eropigu Cristo

ñero taririsubu ïgu sïporã turadiro dopa ta mua sãre sïporã turaniguicã iiporo mari Opu.

*Marire turaro mohmero gahmea, arï gojañumi Pablo*

<sup>6</sup> Jesucristo mari Opu ïgu dorero mera õpa dorea muare: Mua Jesu yarã mera majarã mohmediabirãre gua dorerire iibirãre wapicubiricãro gahmea. Eropa ïacãque erãre. <sup>7</sup> Sohõ árïrasubu mua mera gua árïrasubure gua turaro mohmecã ïabu mua. Eropirã gua iidiro dopa ta mua sãre mohmero gahmea. Mua basi irire õaro masia. <sup>8</sup> Eropirã mua barire waja mariro ne babirabu. Eropirã umuri nucu, ñamiri sãre burigã mohmemurabu gua muare barire serëri arïrã. <sup>9</sup> Gua muare buhera waja muare wajayedoreboaya gua. Wajayedorebirã gua basi burigã mohmeabu mua guare ïhacuburire. <sup>10</sup> Mua mera árïrasubu õpa arï buheabu muare: “Mohmebigu babiricãporo,” arï buhemurabu gua muare. <sup>11</sup> Yujurãyeri mua mera majarã ne mohmebirañorã. Eropirã gajirãre serërã garibotariañorã erã. <sup>12</sup> Eropirã mohmediabirãre mari Opu Jesucristo dorero mera õpa arãa: “Erã yare ïha erã basi mohmeporo erã baburire,” arãa yuhu.

<sup>13</sup> Gua acawererã, muapu õarire iiniguirã gariborebiricãque. <sup>14</sup> Eropirã ero majarã yujugu ire gua gojabeo dorerare tarinugacã ïha masi ïgure wapicubiricãque. ïgu ñero iira mera ïgu guhyasiuro pepiboro dopa ïgure wapicubiricãque. <sup>15</sup> ïgure wapicubiriquererã ïgure ïhaturibiricãro gahmea. ïgu mua acaweregu Jesu yagu ta ahrimi. Eropirã ïgu tarinugagure õaro wereque ïgure ïgu dipaturi irire iibirimaja õaro dopa.

*Pablo gojatuñumi*

<sup>16</sup> Mari Opu marire õaro árïcã iigu mera umuri nucu õaro árïque mua. Eropigu “Mari Opu mua árïpehrerã mera árïporo,” arïgu muare õadorea.

<sup>17</sup> Dohpaguere yu basi ta gojatugu iiaa. Eropigu muare õadorea. Árïpehreri pũrire yu gojabeori pũrire õpa ta arï gojatuhaa yuhu. Eropa gojatura puhru yu basi iripũre arï gojagu árïcã masirãca mua. <sup>18</sup> Mari Opu Jesucristo ïgu mahiri mera burigã õadorea muare árïpehrerãre. Eropa ta árïniguicãporo. Iripëta ahraa.



# 1 Timoteo

## *Pablo Timoteore gojabeorũ*

<sup>1</sup> Yũhũ Pablo mũre Timoteore ire gojabeogũ iiaa. Goãmũ marire peamegue wabonirãre taudigũ ãhrimi. Jesucristo yare buhedoregũ ãgũ apidigũ ãhraa yũhũ. Mari Pagũ Jesu mera ãgũ dorediro dopa ãgũ apidigũ ãhraa. Jesu ta marire itamumi. Eropirã marire ãgũ tauborore masirã irire mucubiri cohrea mari. <sup>2</sup> Yũhũ mũre Jesucristo yare buhecũ peegu Jesure umupeonũgabũ. Eropigũ mũhũ diaye ta yũ magũ iro dopa árĩgũ ta ãhraa. Eropigũ Goãmũ mari Pagũ mera, mari Opũ Jesucristo mera õadoreã mũre. Eropigũ ãgũ itamuri mera õaro árĩque mũhũ.

## *Pablo gũya buherire buhedorebiripũ*

<sup>3</sup> Sohõ arĩrasubure Macedonia yebague wagũ mũre Efeso macague api tari wahgãbũ. Ero yujurãyeri gaji buherire gũya buherã árĩma. Iri buherire buhedorebiribure apibũ yũhũ mũre. <sup>4</sup> Erã gũyarã erã gamero buhemaacãma. Erã acawererã iribojegue majarã erã arĩ bocarare eropa buheniguicãma. Iri buheri mera gajirãre dũyasocũ iima. Eropirã Goãmũ ãgũ dorere gajirãre iicũ iibeama erã eropa buherã. “Goãmũ yũre itamugũcumi,” arĩ umupeorã ãgũ dorere iima. Eropigũ erã gamero buhedorebiribure apibũ yũhũ mũre.

<sup>5</sup> Goãmũ õpa gahmemi. Ñeri dipuwaja mariri mera, õari guñari mera, diaye Jesucristore umupeori mera, gajirãre mari mahi umupeoburire gahmemi. Iri erã iiboro dopa apibũ mũre. <sup>6</sup> Erã yujurãyeri i õari buheripũre cóãtuha gaji buheripũre gahmema daja. Eropirã iri buheripũre dũyaso gorowerema. Iri erã buheri erã game dũyasori duhpiburi árĩbeaa. <sup>7</sup> Erã Moise dorere masare buherã árĩdiaquererã ta erã basi ne õaro masibeama. Eropirã gũhyadiaro mera buhequererã erã buherire ne masibeama erã.

<sup>8</sup> Moise dorere diaye ta mari buhecũ õari dorere ãhraa. Iri mari õaro masia. <sup>9</sup> Iri dorere buherã ire masiro gahmea: Iri dorere õaro iirãre erãre buheburi árĩbeaa. Ñero iirãpũre erãre buheburi ãhraa. Õpa ta iirãre buheburi ãhraa: Dorere tarinũgarãre, Goãmũre tarinũgarãre, ñeri dihtare iirãre, Goãmũre gamebirãre, ñero werenigui corerãre, erã pagũ sumarãre wejãrãre, erã pago sã nomere wejãrãre, gajirã masare wejãrãre, <sup>10</sup> nome mera ñero iirãre, ũama mera ñero iirã nomere, ũama seyaro ñero iirãre, nome seyaro árĩquererã ñero iirãre, masa porãre yaja duarãre, gũyaricũrãre, Moise dorere erãre buheburi ãhraa ii. Eropiro gajirã árĩpehrerãre õari buherire tarinũgarãre buheburi ãhraa Goãmũ ãgũ dorere. <sup>11</sup> Goãmũ õagũ ãgũ õari buheri mera iri ñeri iirare cóãdoremi. Iri buheripũre yũre Goãmũ buhedoremi.

## *Goãmũ ãgũ marire mojomoro ãarire werepũ Pablo*

<sup>12</sup> Eropa yũ buhecũ, Jesucristo mari Opũ turarire ãgũ ogũ itamumi. “Pablo õaro buhegũcumi yahare,” arĩ pepiñumi Jesu yũre. Eropigũ yũre beyegũgue ta ãgũre itamubure apimi yũre. ãgũ eropa iicũ “Õhaa,” arãa yũhũ ãgũre. <sup>13</sup> Iribojegue yũ Jesucristore ñero wereniguiquererã ta, ãgũ yarãre ñero iiquererã ta ãgũ yũre beyemi. Eropigũ ãgũre masinibigũ ãgũ yarãre ñero iigũ “Ñero iigũ iica,” arĩ pepibirimũricarabũ. Yũ eropa masibiricũ ãgũ ãgũ mojomoro ãami yũre. <sup>14</sup> Eropigũ Goãmũ mari Opũ yũre burigã mahigũ õaro iimi yũre. Eropigũ Jesucristore umupeocũ iimi ãgũ yũre. Eropigũ ãgũre masa sãre mahicũ iimi yũre.

<sup>15</sup> Yũ gajirã tauro ñetariagũ árĩribũ. Ñerã mari árĩquererã ta Jesucristo mari ñerire cóãbu i yebagũere erami. Marire peamegue wabonirãre taubu erami. Iri

diaye ta āhraa. Īḡu eropa árīḡu árīcũ árīpehrerā irire masiporo. <sup>16</sup> Ńetariagu yu árīquerecũ ta ĩḡu yure mojomoro ĩami. Eropa mojomoro ĩagu Jesucristo guaro mariro, ĩḡu yure ōaro iirare masicũ iḡu iimi. Pũhrũ ĩḡure umupeomorā erā sã ĩḡu ōaro mojomoro ĩaburire erā masiboro dopa ōaro iimi yure. Īḡure eropa umupeorā árīpehrerinũri ũmaroguere eropa ōaro árīniguicārãcoma. <sup>17</sup> Goãmũ árīpehrerinũri masa tauro opu āhrimi. Īḡu ne sīribeami. Mari mera ĩḡu árīquerecũ ta ĩḡure ĩabeaa mari. Eropiḡu ĩḡu dihta Goãmũ gohra āhrimi. Eropirā “Diaye ta ōagu, turagu āhrimi ĩḡu,” arĩrā ĩḡure. Ũmũri nũcũ ĩḡure umupeorā. Eropa ta iirā.

<sup>18</sup> Timoteo yu magũ iro dopa ta āhraa mũhũ. Eropiḡu dohpaguere ire mũre dorea. Jesu yarā Goãmũ ya weremũhtarā erā mũre werediro dopa ta mũre dorea. Cristo yare ōaro wereniguique. Eropiḡu ñero tariquereḡu ta ĩḡure umupeo duhubiricãque mũhũ. <sup>19</sup> Jesure eropa umupeoniguicãque. Ńeri dipuwaja mariro árīque. Eropiḡu ōari dihtare iique. Yujurãyeri irire iibirā Jesu yare erā cohãma. Eropa cóarã ĩḡure umupeo duhucãma. <sup>20</sup> Eropa ta iiama Himeneo, Alejandro mera. Eropiḡu “Watĩ ĩḡu gamero erãre iiporo,” arĩḡu eropa apicãbũ erãre Goãmũre erā ñero wereniginemobiriboro dopa.

## 2

### *Goãmũre serēbasarire werepũ Pablo*

<sup>1</sup> Dohpaguere ōpa arĩ doremũhtaa mũare: Árīpehrerā ya árĩburire Goãmũre serēbasaque. Eropa serērā “Ōhaa,” arĩque Goãmũre. <sup>2</sup> Oparā, gajirā masa tauro dorerā sãre, erā ōaro doreburire Goãmũre serēbasaque erãre mari ōaro árīricũ árĩboro dopa. Eropirā gamequeãro mariro ñeri marirā Goãmũre umupeorā mari ōaro árĩboro dopa erãre serēbasaque. <sup>3-4</sup> Eropa ta gajirā ya árĩburi sãre mari Goãmũre serēbasacũ ōapũricãa. Irire mari iicũ ĩagu Goãmũ marire taubupũ marire ōaro ĩhasũami. Árīpehrerā masa peamegue wabonirãre ĩḡu taumorā dihta árīcũ gahmemi Goãmũ. Eropiḡu ōari buherire diaye majare erā masicũ gahmemi ĩḡu. Eropiḡu gajirā ya árĩburire mari ĩḡure serēbasacũ mucubirimi Goãmũ. <sup>5</sup> Yujugũ ta āhrimi Goãmũ. Eropiḡu Goãmũ mera mari ōaro árīcũ amubasagu yujugũ ta āhrimi. Īḡu āhrimi Jesucristo. Jesucristo sã masũ ta āhrimi. <sup>6</sup> Eropiḡu árīpehrerā erā ñeri iira dipuwajare wajayebasadigũ árĩmi ĩḡu crusague sīridigũ. Eropiḡu Goãmũ ĩḡu queorasubu masare ire masicũ iimi. <sup>7</sup> Masa masicũ iibure ĩḡu yare werebure irire Goãmũ yure apimi. Eropiḡu judio masa árĩbirãre Jesure umupeoburire ōari buherire buhebure beyemi yure. Diaye ta mũre wereḡu iiaa yũhũ. Gũyabeaa.

<sup>8</sup> Árīpehrero majarãpũ Goãmũ yare ōaro iirã Goãmũre erā serēcũ gahmea. Eropa Goãmũre serērā erā guaro mariro, game dũyasoro mariro erā árīcũ gahmea. <sup>9-10</sup> Nomezũre Jesu yarā erā ōaro árīricũre iicũ gahmea. Eropirā queoro erā ejatuharo suhri sañarā árĩporo. Eropirā gajiropa bejari poaricũ “Yũhũ ōago āhraa,” arĩ ĩhmubiricãporo. Eropirā ōari dari oro dari waja pagari bũyarire, ōari suhri waja pagari suhri sañarire guñabiricãporo. Eropirā ōaro erā iira mera, erā ōarã nome Jesu yarã nome erā árĩrĩre ii ĩhmuporo. <sup>11</sup> Ejarimariro umupeori mera peerā ōari buherire peeporo erā nome. <sup>12-14</sup> Eropirā nome mũa gamenererogue ũmare buhebiricãporo. Eropirā ũmare dorebircãporo. Erã nomezũ ejarimarirã nome árĩporo. Goãmũ Adãre ĩhacũnugumũhtaũmi. Īḡu pũhrũ Evare ĩhacũnuguũmi. Eropiḡu watĩ ĩḡu gũyacũ peedigũ Adãn árĩbiriũmi. Īḡu gũyacũ peedigopũ Eva árĩũmo. Eropa ĩḡu gũyacũ peego Goãmũre tarinũgago waũmo igo. Eropirã nomezũ ũmare dorebircãporo. <sup>15</sup> Nomeo árĩmũhtadigo igo tarinũgaquerecũ ta nome erã porãre ōaro opacũ ĩagu erãre Goãmũ peamegue wabonirãre taugũcumi. Eropirã

nomeꝑu Goãmure erã umupeoniguicãcũ, Goãmũ erãre itamugũcumi. Eropigu masare Goãmũ sãre erã mahiniguicũ pee masirã nome erã árĩniguicũ Goãmũ itamugũcumi erãre.

### 3

#### *Jesu yarã tauro oparã erã iiburire wereꝑu Pablo*

<sup>1</sup> Jesu yarã doregũ árĩdiagũ ðarire iidiagũ àhrimi ìgũ. Iri diaye ta àhraa. Eropigu Jesu yarã doregure apigu òpa árĩgũꝑure beyeque. <sup>2</sup> Dipuwaja marigũre beyeque. Eropirã gajirã ìgũre weresã masiya mara. Eropigu yujugore ta marapocũgũ árĩgũre beyeque. Eropigu ðaro pee masigũre, gũhyadiagũre, masare ðaro mera ìgũ wihire ñajaridoregũre, gajirãre ðaro buhemehregũre beyeque mũa. <sup>3</sup> Eropa beyegũ ne merebigũre, gamequeãbigũre, masare ðaro iigũre, game dũyasobigũre, niyerure gamebigũre beyeque. <sup>4</sup> Ìgũ porãre ìgũ marapo sãre ìgũre umupeori mera erã yũhrirã árĩcũ iigũre beyeque Jesu yarãre dorebure. <sup>5</sup> Ìgũ porãre ìgũ marapo sãre ðaro yũhricũ iimasibigũ árĩgũ Goãmũ yarã sãre ðaro yũhricũ iimasibiribocumi. <sup>6</sup> Jesu yarã opu árĩbure beyegũ ne Jesu yagũ ñajagũre beyebita. Ne ñajagũre beyecũ ìgũ “Jesu yarãre tauro àhraa yũhũ,” arĩ pepibocumi. Ìgũ eropa arĩ pepicũ Goãmũ ìgũre dipuwaja moadorebocumi watĩre ìgũ iidiro dopa ta. Watĩ Goãmũ tauro árĩdiari waja Goãmũ ìgũre dipuwaja moapũ. Eropigu ne Jesure umupeogu árĩgũre beyebita. <sup>7</sup> Jesu yarã doregũre beyegũ Jesu yarã árĩbirã “Òagũ àhrimi,” erã arĩgũ dihtare beyeque erã ìgũre werewũabiriborore. Òaro iigũ ìgũ árĩbiricũ ñarã gajirã ìgũre werewũabocoma. Eropigu ìgũ watĩ gamero dopa ta iigũ árĩbocumi.

#### *Jesu yarãre itamurã diáconoare erã iiburire wereꝑu Pablo*

<sup>8</sup> Eropirã Jesu yarãre itamurãꝑure beyerã ðarã árĩrã sãre beyeque. Erã gũhyadiaro árĩrãre, ðaro diaye ta wereniguirãre, merebirãre, niyerure gamebirãre beyeque mũhũ. <sup>9</sup> Eropa ta Jesucristore ðaro umupeorã “Goãmũ yare ðaro diaye ta àhraa,” arĩrã árĩrãre beyeque. <sup>10</sup> Eropirã Jesu yarãre itamurã árĩdiarãre erã iirare ñamũhtaque mũa. Mũa eropa ñara pũhrũ erãꝑũ dipuwaja marirã árĩrã Jesu yarãre itamurã ñajaporo erã. <sup>11</sup> Eropirã erã marasã nomeꝑu ðpa árĩporo: Pee masirã nome, ñeri quere iibirã nome, gũhyadiarã nome árĩporo erã nome sã. Eropirã árĩpehreri ðarire iiniguirã nome árĩporo erã nome. <sup>12</sup> Eropirã Jesu yarãre itamurãre beyerã yujurãyeri nome ta marapocũrã árĩrãre beyeque. Erã porãre gajirã erã ya wihi majarã sãre ðaro ñhadiburã árĩrãre beyeque. <sup>13</sup> Mũ eropa beyenirã Jesu yarãre ðaro erã itamucũ gajirã erãre ðaro ñhasuarãcoma. Eropirã ðari buherire, Jesucristore erã umupeoburi sãre gũiro mariro buherãcoma erã.

#### *Goãmũ ya buherire wereꝑu Pablo*

<sup>14-15</sup> Dohpaguere mũa pohrogue wadiagũ iiraa. Eropa wadiaqueregũ dohpaguere wanibigũ ipũ mera mũre were gojabeogu iiaa. Jesu yarã gamenererã watope mũa dohpa iiborore mũre were gojabeogu iiaa, “Dohparagãre wabiriboca,” arĩgũ. Jesu yarã Goãmũ ojocarigũ yarã àhrima. Ìgũ yarã diaye árĩri buherire Goãmũ ya buherire ðaro opama. Eropa oparã irire buheniguima. <sup>16</sup> I diaye àhraa. Marire Goãmũ ìgũ buhera mari ðaro iiburi buheri àhraa. Goãmũ iri buherire marire masicũ iimi. Iribojegue mari masibirira mũa ðatariari buheri àhraa. I buheri ðpa àhraa:

Ìgũ Cristo mari dũꝑũ iro dopa ta dũꝑũcũgũ masa dehyoadigũ árĩmi. Òagũ ñeri marigũ ìgũ árĩcũ ñhmudi árĩmi Espĩritu Santopũ. Anyua sã ìgũre ñanirã árĩma. Eropirã gũa ìgũ buhedore apinirã gaji yeba majarãre ìgũ yare buhebũ. Eropirã i yebare masa bajarã ìgũre umupeoama. Pũhrũ umarogue Goãmũ aĩadi árĩmi ìgũre. Iri ta àhraa ðari buheri.

## 4

*Ōari buherire cóārācoma arī werepū Pablo Timoteore*

<sup>1</sup> Espiritu Santo ire ōaro weremi: Pehrerinū coregā yujurāyeri masa Jesu ya buherire cóārācoma. Eropirā gūyari buheripūre watī yare buherāpūre peenūrūrācoma erā. <sup>2</sup> Iri buherire buherā gūyaniguirā wererācoma masare. Erā gūyaniguirāpū “Gūa tamerare dipuwaja mara,” arī pepirā árīrācoma. Erā ñero iirapūre ne guñasome. <sup>3</sup> Ōpa arī buherācoma erā: “Marapocubiricāque. I barire babiricāque,” arī buherācoma erā. Erā eropa badorebiriqerēcū ta Goāmū barire īhacūnugudi árīmi mari baburire apigū. Mari Cristore umupeorā árīcū ōari buherire mari masirā árīcū, mari ya árīburire ōarire iri barire apipū īgū. Iri barire oparā īgure “Ōhaa,” mari arīcū gahmemi īgū. <sup>4</sup> Árīpehleri Goāmū īgū īhacūnugura ōari āhraa. Eropirā īgū īhacūnugurare barire aīrā. Goāmūre “Ōhaa,” arīrā, “Irire basome,” arībiricāro gahmea. Iri barire basūaro gahmea marire. Eropirā “Irire babiricāque,” gajirā erā arīcū peebiricāque erāre. <sup>5</sup> Īgū īhacūnugura iri ōari árīcū weretuhapū Goāmū. Eropirā īgure “Ōhaa,” mari arīra pūhrū “Iri bari ōari bari āhraa,” arī baro gahmea marire.

*Jesu pohro majagū ōagure werepū Pablo Timoteore*

<sup>6</sup> I yū wererare diaye majare Jesu yarāre buhegū Jesucristo pohro majagū ōagu āhraa mūhū. Eropa buhegū ōari buherire peenūrūgū árīgūca. Ōaro mū peerare peenūrū masipehogū árīgūca mūhū. <sup>7</sup> Eropigū eropa erā arī bocarare, Goāmū ya maja árībirirare peebiricāque. Eropigū Goāmū gameri dihtare iiniguicāgū árīque mūhū. <sup>8</sup> Mū mohmepocū ōañaria. Mū mohmepodiro tauro Goāmū gamerire mū iipocū ōataria mūre. Goāmū gamerire iipogū dohpaguere ōaro āhraa mūhū. Eropigū mū sīrira pūhrūgue sāre masa mūriagū ōaro árīgūca mūhū. Eropigū Goāmū gamerire iiniguicāque. <sup>9</sup> Iri diaye ta āhraa. Árīpehlerā irire yū arīrare masirā, “Diaye ta āhraa,” arīro gahmea erāre. <sup>10</sup> Eropigū árīpehlerā yū arīrare masirā “Diaye ta āhraa,” erā arīburire Goāmū gahmemi. Eropirā erā eropa iiburire mari turaro mohmea. Eropirā ñero taria mari gajirā marire ñero erā iicū. Goāmū ojocarigū árīpehlerāre peamegue wabonirāre taugū āhrimi. Īgure umupeorā tamerare īgū taumi. Goāmū marire ōaro iiburire masirā īgure mucubirirā iiaa. Eropa mucubirirā Goāmū gameripūre masa iiburire būrigā buhe mohmea mari.

<sup>11</sup> Iri árīpehleri yū arīrare doreque Jesu yarāre. Eropigū irire buheque mūhū. <sup>12</sup> Mamū mū árīcū īarā gajirā Jesu yarā mūre peediabiribocoma. Erā mūre peeboro dopa ōpa ii īhmuque erāre: Masare mahique. Eropigū Jesure umupeoturaniguicāque. Eropa árīgū dipuwaja marigū árīque. Mamū árīqueregū ta mū irire iicū īarā mūre peerācoma erā. Eropirā mū wereniguirire peerā, mū iirare īarā mūre īhacūrācoma. <sup>13</sup> Eropigū mū pohrogue yū ejaboro core ōpa ii ōaro mohmeyuque. Jesu yarā gamenererāre Goāmū yare gojarapūre buhe īhmuque erāre. Eropigū erāre irire buhetuha werenemoque daja. Eropigū erāre ōaro masinemocū iique. <sup>14</sup> Ero core Jesu yarā oparā Goāmū dorecū erāpū mū weca erā mojotorire duhpeoma. Erā mūre eropa duhpeocū Goāmū īgū turarire odi árīmi mūre. Eropigū Goāmū ya árīburire mū mohmemasiburire apidigū árīmi mūre Goāmū. Īgū mūre eropa mohmemasiburire apirare cādijibita.

<sup>15</sup> Yū eropa wererare guña eropa iiniguicāque mūhū. Mū eropiira pūhrū ōarire mū iinemocū árīpehlerā īarācoma. <sup>16</sup> Mūpū ōaro iique. Eropigū ōaro buheque mūhū gajiropa buheri arīgū. Mūhū eropiigū īgū taudigū árīgū Goāmū mera árīniguicāgūca. Eropirā mūre peenirā sā īgū taunirā árīrā Goāmū pohro árīrācoma.



## 5

*“Jesu yarãre òpa iique m̃h̃h̃,” arĩp̃h̃ Pablo Timoteore*

<sup>1</sup> Ne buḡare turibiricãque. M̃h̃ pagure m̃h̃ òaro iidiro dopa ta, buḡu sãre òaro mera wereque. Eropig̃u m̃h̃ pagu porãre m̃h̃ òaro iidiro dopa ta, mamarã sãre òaro umupeori mera erãre wereque. <sup>2</sup> Eropig̃u m̃h̃ pagore m̃h̃ òaro iidiro dopa ta m̃urã nome sãre òaro umupeori mera wereque. Eropig̃u m̃h̃ pagu porã nomere m̃h̃ òaro iidiro dopa ta, nóme sãre ñero ùaribejaro mariro òaro umupeori mera wereque erãre.

<sup>3</sup> Eropig̃u wapeweyarã nomere diaye ta mojomorocurã nomere umupeori mera itamuque erã nome sãre. <sup>4</sup> Wapeweyo porãcũgo igo árĩcũ pãramerãcũgo igo árĩcũ sãre, erãp̃h̃ igure itamuporo erã masura waja. Eropa itamurã Goãm̃h̃ masare erã acawererãre ìḡu itamudoreldiro dopa ta iirã iima erã. Erã eropiicũ ìḡu òaro Goãm̃h̃ mucubirimi. <sup>5</sup> Mojomorocũgo wapeweyo acawererã moogo árĩgo, Goãm̃h̃ igure itamuburire cohremo igoa. Eropigo ñamiri ñc̃h̃, ùm̃uri ñc̃h̃ igo Goãm̃h̃ eropa serẽniguicãmo. <sup>6</sup> Gajigop̃h̃ wapeweyo árĩgo eropa iimaacãgo árĩgo ojocarigo árĩquerego igo sĩporã dederebo sĩridigo iro dopa ta iimo. <sup>7</sup> Eropig̃u i árĩpehreri yu werera wapeweyo itamuburire Jesu yarãre iidoreque m̃h̃h̃. Òpa wereque erãre òari dihtare erã iiburire gajirã erãre werewuabiriburire. <sup>8</sup> Eropig̃u yujug̃u ìḡu acawererãre ìhadibubig̃u, ìḡu porã erã pago sãre òaro ìhadibubig̃u “Jesu yag̃u ãhraa,” arĩmasibeami. Goãm̃h̃ dorediro dopa iibeami. Eropig̃u Goãm̃h̃ ya buherire yuhribig̃u ãhrimi. Jesure gamebirã tauro ñetariag̃u ãhrimi ìḡup̃h̃.

<sup>9</sup> Wapeweyarã nome m̃h̃a itamumorã árĩcũ erã waĩre gojaturãca. M̃h̃a eropa gojaturã òpa árĩrãre erã waĩre gojatuque. Sesenta bojori ejabigo igo waĩre gojatubiricãque. Eropirã wapeweyo yujug̃u ta marap̃c̃udigore gojatuque. <sup>10</sup> “Igo òarire iigo ãhrimo,” masa erã arĩgore gojatuque. Eropirã igo porãre òaro masugo árĩdigore gojatuque. Eropirã igo ya wihire gajirãre òaro mera ñajaridoregore gojatuque. Eropirã pohro majago iro dopa Jesu yarãre itamugore ñero tarirãre itamugore, árĩpehrerãre mojomoro ìḡagore, òari dihtare iidiagore gojatuque. Eropa árĩrãre ìḡu iripũ ta erã waĩre gojatuque m̃h̃a erã m̃h̃a itamumorã árĩborore.

<sup>11</sup> Wapeweyarã nóme, nómeñari erã árĩcũ erã waĩre gojatubiricãque erã Jesu yarãre itamumorãre. P̃h̃r̃h̃ erã waĩre m̃h̃a gojatura p̃h̃r̃h̃ erã gamero iidiarã Cristo yare duhu, dipaturi mojoto diribocoma. <sup>12</sup> Eropirã erã mojoto dirirã Cristore “M̃h̃ yarãre itamugora,” erã arĩdirore iibiribocoma. Erã eropa iibirira dipuwaja dipuwajacurãcoma. <sup>13</sup> Erã nómeñari eropa itamurã árĩrã tericurã nome wahama. Eropirã wirigue ñajacurirã ñeri querere werenigui curima. Erã weredorebirirare werema erã nome. <sup>14</sup> Eropirã erã Jesu yarãre itamumorã ñajabiricãporo. Eropig̃u erã òpa iicũ gahmea yuh̃h̃: Wapeweyarã nome, nómeñari árĩrã mojoto diriporo ðaja. Eropirã erã porãc̃uporo. Eropirã erã ya wihi majare òaro ìhadibuporo. Erã nome wapeweyarã nome eropa ta iicũ marire Jesu yarãre ìhaturirã “Ñerire iirã iima,” arĩmasibeami marire. <sup>15</sup> Dohpague tamerare yujurãyeri nome wapeweyarã nome Cristo yare duhu watĩ gamerip̃ure iinugatuhama. Eropig̃u òpa werea m̃ure.

<sup>16</sup> Jesu yarã erã acawerego wapeweyo igo árĩcũ erã igo acawererãp̃h̃ igure itamuporo. Gajirã Jesu yarãp̃ure igure itamudorebiricãporo. Eropirã erã Jesu yarã igure acawererã opagore itamubirã, gajirã nome wapeweyarã nomep̃ure itamumasima.

<sup>17</sup> Jesu yarã oparãre erã mohmerire erã òaro iicũ ìarã umupeoque erãre. Eropirã òaro wajayeque. Yujurãyeri m̃h̃a mera majarã Goãm̃h̃ yare wererã m̃ure buherã sã ãhrima. Erã tamerare tauro umupeo wajayeque. <sup>18</sup> Goãm̃h̃ yare erã gojarapũgue mohmegure m̃h̃a wajayeborore òpa werea: “Wec̃u trigo yerire c̃uhratĩacũ ìḡu disirore cãhmotabiricãque. ìḡu gamero baporo,” arĩ gojañorã. Eropiro gajipũ

õpa arãa: “Mohmegure ïgu mohmeri wajare oro gahmea,” arãa Goãmũ yare erã gojarapũgue. Goãmũ ya gojarapũ eropa arĩcũ peerã oparãre õaro umupeoque mũa. Eropirã õaro wajayeque erãre.

<sup>19</sup> Jesu yarã mera majagu opure yujugu ta ïgure weresãcũ peebiricãque. “Opũ ïgu õpa ñeri iirare ïabũ,” perã o ðrerã arĩ weresãra pũhrũ peeque. <sup>20</sup> Eropa peerã ïgu ñero iira arĩcũ ïatuhaja Jesu yarã gamenererogue turique ïgure, gajirã ïgure ïha masi güiporo arĩrã.

<sup>21</sup> Eropigũ Goãmũ Jesucristo ïgu beyerã anyua erã ïhabeoro ire dorea mũre. Dohpague yũ mũre dorerare ipehoque. Eropa iigu gajigure gajiropa, gajigũ sãre gajiropa iibiricãque. Yujuropa ta iique arĩpehrerãre Jesu yarãre. <sup>22</sup> Gajirãre Goãmũ mohmerire mũ beyemorãre erã weca mũ mojotorire duhpeoboro core õaro ïaque mũhũ ïha masiri mera yojaro mariro. Ñerire iirã arĩbocoma. Eropigũ mũ erãre beyera pũhrũ erã ñerire iicũ erã ñeri iira dipuwaja opagũca mũ sã. Eropigũ erãre beyeboro core erã arĩricũre õaro masique. Eropigũ arĩpehreri ñeri mariro arĩque mũhũ.

<sup>23</sup> Bajasuburi paru pũrisũgu ãhraa mũhũ. Eropigũ dohpaguere deco dihtare ihrigu arĩgu, merogã vino sãre ihrique mũhũ ococũgu.

<sup>24</sup> Yujurãyeri erã ñerire iicũ mari ïhaa. Eropirã Goãmũ erãre dipuwaja moaborore masia mari. Gajirãpũre erã ñeri iirare mari ïha masibea. Pũhrũ erã ñeri iirare masirãca Goãmũ dipuwaja moarinũ arĩcũ. <sup>25</sup> Eropa ta yujurãyeri õarire erã iirare masia mari. Gajirã erã õarire erã iirare dohpaguere masibiriquererã ta pũhrũ masirãca mari. Mari ïabirirare arĩpehrerã erã iirare pũhrũ iri dehyoacũ ïarãca.

## 6

<sup>1</sup> Pohro majarã Jesu yarãpũ erã oparãre õaro umupeoporo. Erã eropa umupeocũ ïarã gajirã Goãmũre mari arĩ buheri sãre ñero werewũamasibeamã. <sup>2</sup> Erã oparã Jesu yarã arĩcũ ïarã erã pohro majarãpũ gũa oparã sã Jesu yarã ta ãhrima. Eropirã “Erãre umupeobiricũ õaroca,” arĩbocoma. Eropa iibiricãro gahmea. Erã oparã Jesu yarã arĩrã erã mahirã yujugu porã iro dopa ãhrima. Eropirã erã tamerare turaro itamuporo.

### *Goãmũre umupeori sãre, õaro arĩri sãre werepũ Pablo*

<sup>3</sup> I yũ wererare buheque. Eropigũ ire doreque. Gajiropa arĩrire gũyarire buherã mari Opũ Jesucristo ya buherire umupeobeamã. Erã Goãmũre umupeori buherire gamebirã õpa iirã ãhrima. <sup>4</sup> “Masipehogũ ãhraa,” arĩquererã ta diaye majare ne masibeamã. Eropirã pee masibirã iro dopa ta turaro game dũyasodiama erã. Eropirã Goãmũ yare arĩmaacãa dũyatorã ãhrima. Eropa dũyatorã, game ïhaturirã wahama. Eropirã gajirãre ñero quere moamasibiriquererã masare ñero arĩ pepima erã. <sup>5</sup> Eropirã erã ñeri dihtare pepinquirã, diaye arĩrire ne masibirã eropa dũyasoniguicãma. Eropirã “Goãmũ yare buherã niyerure wajatarãca,” arĩ pepirima. Erã eropa arĩrãre wapicũbiricãro gahmea. <sup>6</sup> Mari ya mari opari mera mucubirirã Goãmũre umupeorã diaye ta wajatarã ta iiaa. <sup>7</sup> I yebaguere masa dehyoarã ne gajinore aĩgãribiribũ mari. Eropirã mari sirirã warã ne gajinore aĩgãmasibea mari daja. Eropirã mũa opari mera dihta mucubirique. <sup>8</sup> Eropirã mari barire, mari suhri sãre oparã, gajire gamenemobiricãrã. Iri nũcũ mera ta mucubiricãrã mari. <sup>9</sup> Niyerure gamerã doberi wũaro oparã arĩdiarã watĩ ñerire ïgu iidorerire arĩpehreri ñerire iirã arĩbocoma. Eropirã erã bajasuburi pee masibirã iro dopa ta gajinore gametarirã, ñeri ðaribejari duhubirã, erã basi ta ñero tarima. Eropa dedererã wacãrã iima. <sup>10</sup> Niyerure gametarirã arĩpehreri ñerire iinũgama masa. Yujurãyeri niyerure gametarirã, Jesure umupeo duhura pũhrũ bajasuburi erã ñero

iira waja turaro bujowerema erã. Eropirã mari opariñepẽ ta mucubiro gahmea marire.

*Goãmũ ya árĩburire iiboro dopa ñerire tarinũgaque, arĩ gojañumi Pablo*

<sup>11</sup> Mũ tamera Goãmũ yagũ ta áhraa. Eropigũ i ñerire iibiricãro gahmea. Eropigũ òaripũre gameque. Goãmũ yare iique. Eropa iigũ Jesure “Diaye iigũ áhrimi,” arĩ umupeoque. Eropigũ gajirãre mahique. Ñero tariqueregũ ta bocatũuque. Nijiyajagũ árĩque masa mera. Eropigũ gajirãre tarinũgadiagũ árĩbiricãque. <sup>12</sup> Ìgũ mera árĩpehrerinũri mũ òaro árĩniguicãburire Goãmũ beyemi mũre. Eropigũ Jesucristore mũ umupeorire bajarã masare òaro werebũ mũhũ. Eropigũ ñero tariqueregũ ta ìgũre umupeo ìgũ yare duhubita umarogue ìgũ mera eropa mũ árĩniguicãboro dopa. <sup>13</sup> Goãmũ árĩpehrerãre árĩpehrerire árĩcũ iigũ áhrimi. Jesucristopũ Poncio Pilatore Goãmũ yare òaro werepũ. Eropigũ Goãmũ Jesucristo sã erã ìhabeoro ire mũre iidoregũra: <sup>14</sup> Mũre Goãmũ ìgũ dorere iipehocãque. Jesucristo ìgũ dujariboro core ñeri mariro, dipuwaja mariro ìgũ dorero dopa ta iiniguicãque. <sup>15</sup> Ìgũ queoranũ árĩcũ Goãmũ Cristore dujaricũ iigũcumĩ. Goãmũpũ òagũ ìgũ dihta masare doregũ áhrimi. Eropigũ árĩpehrerã gajirã oparã erã tauro opũ árĩgũ áhrimi. <sup>16</sup> Eropigũ ìgũ dihta ne sĩribigũ áhrimi. Ìgũ gosesiriri mera árĩgũ áhrimi. Eropirã masa ìgũ gosesirirogue ejamasibeama. Eropigũ masa erã ne ìabigũ áhrimi. Eropirã dohpague sãre ìgũre ìabeama. Ìgũ eropa árĩgũre umupeorã. Eropirã árĩpehrerinũri “Turagũ áhrimi ìgũ,” arĩrã ìgũre. Eropa ta iirã.

<sup>17</sup> Eropigũ i yeba majarãre doberi oparãre òpa arĩ doreque mũhũ: “Gajirãre tarinũgaa yũhũ,” ne arĩ pepibiricãporo. Erã doberi erã opari pehrea waroca. Eropirã “Yũhũ wũaro opari mera òaro árĩgũca,” arĩ pepibiricãporo. “Goãmũ yapũ mera òaro árĩgũca,” arĩ pepiporo. Árĩpehreri diaye ta mari gameripũre ogũ áhrimi ìgũ Goãmũ. Ìgũpũre umupeoturaporo erã doberi oparã. <sup>18</sup> Eropirã erã òaripũre iiporo òarire erã iirã árĩboro dopa. Eropirã erã oparire mojomorocũrãre orã árĩporo. <sup>19</sup> Erã eropiicũ umũsigue Goãmũ pohrogue erã ya árĩroca. Erogue árĩcũ iri ne pehresome. Eropirã erogue òaro árĩniguicãrãcoma erã.

*Pablo Timoteore doretupũ*

<sup>20</sup> Mahgũ, mũre Goãmũ ìgũ apirare ìgũ buhedorerare duhubita. Yujurãyeri masa Goãmũre gamebirã iro dopa ta gũyarire, pee masibirã ya buherire wereniguima. Eropa wereniguirã “Òaro masirã buheri áhraa,” arĩrima erã. Eropa erã wereniguirire peenũrũbiricãque. <sup>21</sup> Gajirã yujurãyeri erã wereniguirire peenũrũrã Cristo ya buheripũre cóacãma.

Goãmũ ìgũ mahiri mera mũre turaro òadorea. Eropa ta árĩniguicãporo. Iripẽta áhraa.

## 2 Timoteo

### *Pablo Timoteore dipaturi gojabeopa*

<sup>1-2</sup> Mũhũ Timoteo yũ magũ iro dopa ta yũ mahigũ āhraa. Yũhũ Pablo mũre ire gojabeoa. “Árĩpehrerã Jesucristore umupeorã umũsigue ðaro árĩniguicãrãcoma,” arĩ apimi marire Goãmũ. Ĩgũ eropa arĩ apirare werebure yũre beye apimi Jesucristo Goãmũ ĩgũ gamero dopa ta. Eropigũ Goãmũ mari Pagũ Jesucristo mari Opũ mera mũre ðadorea. Eropigũ ĩgũ itamuri mera ðaro árĩque mũhũ.

### *Masare Cristo yare erã wererare werepũ Pablo*

<sup>3</sup> Goãmũ mera wereniguigũ mũ ya árĩburire serẽniguicãa umũri nũcũ. Eropa serẽgũ Goãmũre “Õhaa,” arãa yũhũ. Iribojegue majarã yũ acawererã ñeri dipuwaja mariro ĩgũ Goãmũre ta umupeoñuma. Erã umupeodiro dopa ta dohpaguere yũ sã ĩgũ Goãmũre ta umupeoa. Ĩgũ Goãmũ gohra ta āhrimi yũ mũre serẽbasagũ. <sup>4</sup> Sohõ árĩrasubure yũ wacũ mũ orenũrusiarare guñagũ mũre turaro ĩadiaca daja mũ mera ðaro mucubiridiagũ. <sup>5</sup> Eropigũ Jesure diaye ta mũ umupeorire guñaa yũhũ. Mũ ñeco bũro Loida, mũ pago Eunice sã Jesure umupeomũhtama mũ core. Eropigũ dohpaguere ĩgũre mũ umupeocũ ðaro masia yũhũ.

<sup>6</sup> Eropigũ ire mũre guñacũ iidiaa. Mũ dipuru weca yũ duhpeocũ Goãmũ ĩgũ ya turarire omi mũre. Ĩgũ ya árĩburire mũ mohmemasiburire mũre omi. Iri mohmemasiburi mera mohmeque mũhũ. <sup>7</sup> Goãmũ marire ĩgũ Espĩritu Santore omi. Mari mera árĩgũ masare marire guicũ iibeami Espĩritu Santo. Eropigũ turarã, masare mahirã, pee masirã mari árĩcũ iimi ĩgũ. <sup>8</sup> Eropigũ mari Opũ ya árĩburire gajirãre weregũ gũhyasĩribita mũhũ. Yũhũ ĩgũ yare iicũ ĩha gajirã gamebirã yũre peresugue doboma. Peresu yũ árĩcũ sãre ĩagũ yũre gũhyasĩrisãbiricãque. Mũhũ sĩporãguere ñero bũjawerebiricãque. Õari buherire mũ buheri dipuwaja mũ sã eropa wagũ “Õaroca,” arĩ pepique mũ sã. Mũ eropa ñero taricũ ĩagũ Goãmũ mũre itamugũcumi. <sup>9</sup> Eropigũ Goãmũpũ marire peamegue wabonirãre taumi. Eropigũ ðarã ĩgũ yarã árĩmorãre beyepũ ĩgũ. “Õarã āhrima erã. Eropigũ erãre beyegũra,” arĩbiripũ marire beyegũ. Ĩgũ marire mahigũ ta negohraguere marire beyepũ ĩgũ gamero dopa ta iigũ. “Eropigũ Jesucristore erãre taubure obeogũra,” arĩ beyepũ marire. <sup>10</sup> Eropigũ dohpaguere Jesucristore marire taubure obeodigũ árĩmi marire diaye ta ĩgũ mahirire ĩhmugũ. Eropigũ Jesucristo marire taugũ marire ĩgũ yarãre dederebiricũ iimi. Eropa iigũ “Yũre umupeorã Goãmũ mera ðaro árĩniguicãrãcoma,” arĩgũ ðari buherire marire weregũ aripũ ĩgũ.

<sup>11</sup> Eropigũ i ðari buherire werebure ĩgũ apimi yũre. <sup>12</sup> Eropa ĩgũ yare buhegu árĩgũ dohpaguere ñero taria yũhũ. Eropa ñero tariqueregũ ta sĩporã mucubirigũ āhraa. Yũ guñaturagũre Jesure masia yũhũ. Turagũ āhrimi ĩgũ. Eropigũ ĩgũ yare buhedore apigũ ðaro itamugũcumi. Eropigũ ĩgũ yũre apirare yũre buhe ojogorocũcũ ĩhadibugũcumi yũre. “Yũre itamugũcumi,” arĩ irire ðaro masigũ sĩporã mucubirigũ āhraa.

<sup>13</sup> Mũre yũ wererare iipehocãque. Jesucristo mũre ĩgũre ðaro umupeocũ iimi. Eropigũ ĩgũre gajirã sãre ðaro mahicũ iimi mũre. Eropigũ “Diaye āhraa,” arĩ irire guñaniguicãque mũhũ. <sup>14</sup> Eropigũ Espĩritu Santo mari mera árĩgũ ĩgũ itamuri mera ðari buherire ðaro buheque. Queoro buheque gajiropa arĩro mariro.

<sup>15</sup> Yũ peresugue árĩcũ ĩarã yũre cóãgãpehrea wama. Árĩpehrerã Asia yeba majarã Jesu yarã yũre itamudiabirã cóãgãpehrea wama. Erã mera majarã perã Figelo,



Hermógene eropa ta iima erã sã. Erã eropa cóãgãrare masituhaca mũhũ. <sup>16-17</sup> Erã eropa cóãquerecũ ta Onesíforopũ bajasuburi yũre itamugũ ðaro siñajacũ iimi. Eropigũ ïgũ yũ peresu árĩcũ ïgũ yũre guhyasĩrisãbeami. Eropigũ Romague eragũ yũre amaniguicãdi árĩmi. Eropa amaniguigũ yũre bocami. Efesogue sãre ïgũ marire itamurare ðaro masia mũhũ. ïgũ eropiira waja ïgũ porãre, erã pago sãre mojomoro ïagũcumĩ mari Opũ Jesucristo. Goãmũ eropa iiboro dopa ïgũre serẽbasaa. <sup>18</sup> Eropigũ i yebague Jesu mari Opũ dujaririnũ arigũ ïgũre mojomoro ïagũcumĩ. ïgũre eropa iiboro dopa ta serẽbasaa Goãmũre.

## 2

### *Ñero tariqueregũ ta Jesu yagũre bocatũuro gahmea*

<sup>1</sup> Mũpũ yũ magũ iro dopa ta Jesucristo ïgũ itamuri mera turagũ árĩque. <sup>2</sup> Eropigũ bajarã masare yũ buherare mũ peerare gajirã sãre wereturiaque mũhũ. Erã mũ buherã Goãmũ gamerire iiniguicãrã árĩporo. Eropirã gajirãre buheturiarã árĩporo erã sã.

<sup>3</sup> Surara ñero tarigũ ïgũ yujuro bojero dopa ta Jesu yagũ árĩgũ ñero tariqueregũ yujuro bojeque. Eropa iigũ gajirã Jesu yarã iiro dopa iigũ iiaa mũhũ. <sup>4</sup> Surara ïgũ opũ ïgũ doreripũre iimi. Eropigũ ïgũ surara árĩbirã erã iiripũre iibeami ïgũ. Mũ sã eropa ta mari Opũ ïgũ dorera dihtare iique. <sup>5</sup> Omabiragũ erã doreldiro dopa queoro iibigũ ïgũ omatariara waja wajatabeamĩ. Eropa ta mũ sã Goãmũ doreldiro dopa ta iibigũ Goãmũ mera wajatasome. <sup>6</sup> Eropigũ pohere ðaro mohmedigũpũ ïgũ mohmera waja iri pohe majare aĩmũhtami. Eropa ta mũ sã Goãmũ yare ðaro mohmera waja Goãmũ oburire aĩmũhtagũca. <sup>7</sup> Irire ðaro masicũ iigũcumĩ Jesu mari Opũ mũre. Eropigũ dohpaguere yũ mũre arĩldirore ðaro guñaque.

<sup>8</sup> Jesucristore guñaque. ïgũ opũ Davi mũrũ pãrami ïgũ árĩpũ. Eropigũ sĩridigũ masa mũriapũ ïgũ. ïgũ eropa sĩri masa mũriara marire tauburi buheri ta ãhrra. I ðari buherire buhegũ iiaa. <sup>9</sup> Iri buherire buhegũ ñero taria yũhũ. Eropirã irire yũ buhecũ ïha gajirã gamebirã ñegũ iro dopa ta yũre dipuwaja moa yũre peresugue doboama. Masa yũre cãhmotaquererã Goãmũ ya ðari buherire cãhmota masiya mara. <sup>10</sup> Eropigũ Goãmũ ïgũ beyenirãre buhegũ bajasuburi ñero taria yũhũ erã Jesucristo yarã erã árĩburire. ïgũ yarã árĩborore erã peamegue wabonirãpũ tauborore ñero tarigũ yujuro bojea. Eropigũ erã Goãmũ mera ðaro árĩniguicãborore ñero taria ïgũ yare buhegũ.

<sup>11</sup> I diaye ta ãhrra:

Cristo ya árĩburire mari iira dipuwaja gajirã marire wejẽquerecũ ïgũ mera umũsigue ðaro árĩniguicãrãca. <sup>12</sup> Eropirã ïgũ yare mari iira dipuwaja ñero tariquererã ta ïgũ yare duhubirã árĩrã ïgũ opũ árĩroguere ïgũ mera dorerã árĩrãca mari sã.

“Cristore yũ masibea,” mari gajirãre arĩcũ ïgũ sã marire eropa ta arĩgũcumĩ.

<sup>13</sup> ïgũre mari tarinũgacũ ïagũ ïgũ arĩldiro dopa ta marire dipuwaja moagũcumĩ. ïgũ arĩro dopa ta iigũ ãhrimi ïgũ. Ne guyabeami ïgũ. I árĩpehreri ïgũ werera diaye ta ãhrra.

### *Goãmũ ïgũ ïhasũarãre, ïgũ yare buherãre werepũ Pablo Timoteore*

<sup>14</sup> Ire yũ wererare mũ mera majarãre masicũ iique. Erã ejatuharo game dũyaso wereniguiri duhpiburi árĩbeaa. Eropirã erãre peerãre ñero wacũ iima. Eropigũ mari Opũ ïgũ ïhuro ðpa arĩ wereque erãre. “Mũa eropa wereniguiri dopa wereniguibiricãque,” arĩque erãre. <sup>15</sup> Mũpũ Goãmũ yare ðaro buheque. Eropigũ Goãmũ ya árĩburire turaro iique. Mũ eropa iicũ ïagũ “ðaro iibũ mũhũ,” arĩgũcumĩ Goãmũ mũre. Eropigũ mũ buherare ïgũ ïacũ guhyasĩrisome mũhũ. ïgũ buheri diaye ãhrra. Eropigũ ïgũ buherire ðaro masique. Eropigũ ire queoro buheque. <sup>16</sup> Erã

ejatuharo bu árĩrire wereniguirã ñerire eropa iiniguicãma. Eropigũ erã eropa arĩ wereniguirire ìha gamebircãque mũhũ. <sup>17</sup> Erã wereniguirire camiro boagãro iro dopa ta ãhraa. Erã wereniguirire gajirã Jesu yarãre ñerã wacũ iiaa. Eropa wereniguirã mera majarã Himeneo, Fileto sã ãhrima. <sup>18</sup> Eropirã erã òari buherire cóãrã, “Jesu yarã sĩrinirã erã ya dũpũ mũra masa mũriatuhanirã ãhrima,” arĩ buhemaacãma. Eropa gajiropa buherã bajamerãgã Jesu yarãre goroweorã iima. <sup>19</sup> Erã eropa ñero buhequerecũ ta, Goãmũ ya buheripũ ne gohrotobea. Ìgũ ya diaye maja árĩro pehrebeaa. Òpa arĩ gojara ãhraa: “Mari Opũ Ìgũ yarãre masimi. Eropirã árĩpehrerã ‘Jesu yarã ãhraa,’ arĩrã ñerire duhucãporo,” arĩ gojañuma.

<sup>20</sup> Jesu yarã watope ãhrima Goãmũ yare òaro iirã. Gajiropa iirã sã ãhrima ñeri buherire wereniguirã. <sup>21</sup> Eropigũ yujugũ Goãmũ ya árĩburire òaro itamudiagũ iri ñeri buherire peebircãporo. Árĩpehreri ñerire duhucãporo. Ìgũ eropiigũ òagũ árĩgũ árĩpehreri Goãmũ yare òaro iimasimi. Goãmũ gamegũ òaro árĩgũcumĩ.

<sup>22</sup> Eropigũ mũ mamũ árĩgũ mamarã erã ñeri ñaribejari iro dopa iibircãque. Eropigũ òarire iique. Jesure umupeoturaniguicãque. Eropigũ Ìgũre masa sãre mahi umupeoque. Eropigũ gamequeãro mariro gajirã mera òaro árĩque mũhũ. Eropa ta iique gajirã ñeri dipuwaja marirã mera Goãmũre game serẽniguirã mera árĩgũ. <sup>23</sup> Eropigũ pee masibirã erã arĩ dũyasorire mũ sã peenũrũbita. Eropigũ mũ sã dũyasobita. Eropa arĩ dũyasorã masa game gameturinũgama. <sup>24</sup> Mari Opũ pohro majagũre dũyasobircãro gahmea. Eropigũ árĩpehrerãre òaro iigũ buhemehregũ, mata guabigũ Ìgũre árĩro gahmea. <sup>25</sup> Eropigũ gajirã Ìgũ mera dũyasocũ Ìgũ erãre weregũ òaro mera yojaro mariro mera yũhriro gahmea Ìgũre. Ìgũ òaro yũhricũ Ìarã erãpũ Goãmũ Ìgũ itamuri mera erã ñeri iirire bujawerebocoma. Eropirã òari buherire diaye majare masinũgabocoma. <sup>26</sup> Erãre watĩ oparimi Ìgũ gamerire iimorãre. Eropirã erã ñero iirare bujawerera pũhrũ òari buheripũre masirã, watĩre cóãrãcoma.

### 3

#### *Pehreburinũ majare werepũ Pablo Timoteore*

<sup>1</sup> I mũmũ pehreburinũ coregã ñero tarirãcoma masa. Irire òaro masique mũhũ. <sup>2</sup> Irisubure masa gajirãre guñabirã, erã ya árĩburi dihtare guñarã, niyerure gamerã, “Gajirãre tarinũgaa gũa,” arĩ erã basi pepirã, masare ñero turirã, erã pagũ sũmarãre tarinũgarã, erãre oquerecũ ta “Òhaa,” arĩbirã, Goãmũre umupeobirã árĩrãcoma. <sup>3</sup> Eropirã masare mahibirã, mojomoro Ìabirã, ñeri quere iirã, ñeri ñaribejarire duhumasibirã, masare eropa paniguirã, òarire gamebirã árĩrãcoma. <sup>4</sup> Erã mera majarãre ñero iirã, pepiri moorã, “Masipehorã ãhraa,” arĩ pepirã árĩrãcoma masa. Eropirã erã, erã ñaribejarire iisũarã árĩrã Goãmũre umupeo sũabeama. <sup>5</sup> Eropirã erã masa erã ìhabeoro Goãmũre umupeoquererã ta “Goãmũ duhpibu árĩbeamĩ,” arĩ pepirima erã.

Eropa árĩrãre wapicũbircãque mũhũ. <sup>6</sup> Erã mera majarã pee masibirã nome pohro ñaja, erã nomere gũyarire buhema. Erã nomepũ turaro ñerire iiniguirã árĩrã, turaro ñerire iidiarã ãhrima. <sup>7</sup> Erã nome eropa peeniguirã nome árĩquererã ta, diaye majapũre ne masibeama. <sup>8</sup> Iribojegue Jane, Jambre sã yeea árĩnirã Moise wererare gamebiridiro dopa ta erã sã òari wereniguirire diaye majare gamebeama. Erã ñeri dihtare pepirã ãhrima. Eropirã Jesure umupeorã gohra árĩbeama. <sup>9</sup> Eropa iirã gũyari mera erã iidiarire yujuro bojesome. Pũhrũ erã gũyarire, erã pee masibiriri sãre árĩpehrerã ìha masirãcoma. Jane, Jambre mera erã gũyarire iribojegue masa erã ìha masidiro dopa ta eropa ta masirãcoma masa pehreburinũ coregã árĩrã erã gũyarire.

#### *Pablo Timoteore doretupũ*

<sup>10</sup> Mupɔ yɔ buherare, yɔ árĩricurare, yɔ iidiarare, Jesure yɔ umupeorare òaro ìhabɔ. Eropigɔ guaro mariro yɔ iirare, masare yɔ mahi umupeorare, ñero tariqueregɔ yɔ yujuro bojerare masia mɔhɔ. <sup>11</sup> Eropigɔ Jesucristo yare yɔ iira waja yɔre erã ñero iirare, yɔ ñero tarirare masia mɔhɔ. Eropigɔ Antioquíague, Iconiogue, Listrague yɔre ñetariaro erã iira sãre masia mɔhɔ. Eropa yɔ wacɔ ìha mari Opɔ Jesucristopɔ yɔre itamumɔrimi. <sup>12</sup> Árĩpehrerã Jesucristo yarã árĩdiacɔ Goãmɔ gamerire iiniguidiacɔ gajirã erãre ñero iirãcoma. Iri diaye ta àhraa. <sup>13</sup> Eropirã ñerãpɔ, gɔyarã sã, ñetariarã árĩniguicãrãcoma erã. Gajirãre gɔyarã, erã basi sã gɔyarire peerã eropa ta ñetariarã árĩniguicãrãcoma.

<sup>14</sup> Mupɔ yɔhɔ mɔre buherare òaro mɔ peerare eropa iiniguicãque. Mɔre buhenirãre masia mɔhɔ. <sup>15</sup> Mɔ majigɔ árĩgugue ta, Goãmɔ yare erã gojarapɔre masinugayoro. Ìgɔ yare erã gojarapɔ mɔ buhegɔ masia Jesucristo marire tauburire. Eropa buhegɔ “Jesucristore umupeorã dihtare peamegue wabonirãre taumi Goãmɔ,” arĩ masia. <sup>16</sup> Goãmɔ yare erã gojarapɔre árĩpehrerire Goãmupɔ gojadorepɔ erãre. Eropirã iripɔre buherã mari masinemoa. Iripɔre buherã mari òaro iiburire masia. Eropirã mari ñeri iirire masia iripɔre buherã. Eropiro iripɔ marire òaripɔre gohrotodorea. Eropiro ɔmuri nɔcɔ mari òarire mari iiniguiburire werea iripɔ. <sup>17</sup> Eropigɔ Goãmɔ yagɔ ìgɔ yapɔre buhegɔ, masipehocãgɔcumi. Eropa masigɔ árĩpehrerire òarire iimasigɔcumi ìgɔ.

#### 4

<sup>1</sup> Jesucristo árĩpehrerãre doregɔ arigɔ dujarigɔcumi. Eropa dujarigɔ ojocarirãre, sĩrinirã sãre dipuwaja moagɔcumi. Eropigɔ ìgɔ ìhabeoro ire mɔre dorea yɔhɔ: Goãmɔ sã ìgɔ ìhabeoro ire dorea mɔre. <sup>2</sup> ɔmuri nɔcɔ masa erã peediacɔ, erã peediabiricɔ sãre Goãmɔ yare wereque. Eropa weregɔ masare erã ñeri dipuwajare masicɔ iique erãre. Eropigɔ “Mɔa ñeri iirire iinemobiricãque,” arĩ wereque erãre. Òaripɔre iidoreque. Eropa weregɔ ne guabigɔ gariborebigɔ árĩque mɔhɔ. Eropigɔ gajirãre buhe duhubita. <sup>3-4</sup> Pãhrɔ, gajisubugure masa òari buherire peediasome. Eropa peediabirã erã gamero dopa ta iirã, erã peediari dihtare buhemorãre amarãcoma erã. Eropirã gɔyari buherire buherã bajarã oparãcoma erã. Erã eropa iirã òari buheri diaye majapɔre cohã, erã eropa arĩ bocara buheripɔre peenurãrãcoma. <sup>5</sup> Eropigɔ mupɔ diaye majare buhe duhubita. Eropa iigɔ ɔmuri nɔcɔ òaro pee masigɔ árĩque. Eropigɔ ñero tariqueregɔ ta yujuro bojeque. Eropigɔ òari buherire eropa buheniguique masa Jesu yarã waboro dopa. Goãmɔ mɔre ìgɔ iidorerare iipehocãque mɔhɔ.

<sup>6</sup> Yɔhɔ Goãmɔ yare yɔ iira dipuwaja yɔ sĩriboro merogã dɔhyaa. Eropigɔ bajamenurigã árĩnigɔca. Eropigɔ dohpaguere mɔre dorea. <sup>7</sup> Yɔ sĩriboro coregã ire weregɔra: Jesucristo yɔre òari buherire buhedoregɔ ìgɔ apirare òaro buhe ojogorocɔabɔ. Ìgɔ dorerire òaro iipehocãbɔ. Eropigɔ ñero tariqueregɔ ta ìgɔre ne umupeo duhubiribɔ. <sup>8</sup> Yɔ eropa òarire iira wajare ɔmɔsigue dibugɔcumi yɔre. Eropigɔ mari Opɔ árĩpehrerãre masipehogɔ, diaye ta dipuwaja moabu árĩgɔ, queoro weregɔ ìgɔ dujaririnɔ yɔ wajatarare ogɔcumi yɔre. Gajirã sãre ìgɔ dujariborore corerãre, ìgɔre mahirãre erã wajatarare ogɔcumi Jesu.

#### *Pablo werenemopɔ Timoteore*

<sup>9</sup> Yɔ pohroque yojaro ìagɔ arique mɔhɔ. <sup>10</sup> Dema waĩcɔgɔ i yeba majare árĩpehrerire gamegɔ yɔre cóãgã waha wami Tesalónicague. Crescentepɔ yɔre cóãbiriqueregɔ Galacia yebague wahãmi Goãmɔ yare buhegɔ. Tito sã eropa ta Dalmaciague wahãmi. <sup>11</sup> Luca dihta yɔ mera àhrimi. Marco yɔre òaro itamubu àhrimi. Eropigɔ ìgɔre aĩgãrique mɔhɔ. <sup>12</sup> Tíquicore Efeso macague obeobɔ.

<sup>13</sup> Eropigu mũhũ ògue arigu, yũ weca sañari suhrirore, Troa maca Carpo ya wihi yũ apirañere aĩgãrique. Eropi sohõ árĩa gojara turirire aĩgãrique. Sohõ árĩa gojara gasiri tamerare turaro gahmea yũhũ. Eropigu iri gasiri sãre aĩgãrique.

<sup>14</sup> Alejandro comere mohmegũ yũre ñetariaro iimi. Eropigu ïgũ eropa iira dipuwaja Goãmũ dipuwaja moagũcumi. <sup>15</sup> ïgũ Alejandro mari buherire ne gamebirimi. Eropigu mũare ñero iiri arĩgũ òaro ïgũre guña masique.

<sup>16</sup> Peresu iidoregũre yũ iirare ïgũre yũ ne werecũ ne yujugũ Jesu yagũ yũre itamudiabirimi. Árĩpehrerã yũre itamubirã cóãgãpehrea wama. Erã eropa cóãquerecũ ta yũre erã cóãra dipuwaja Goãmũre “Erãre dipuwaja moabita,” arĩbũ.

<sup>17</sup> Yũ yujugũ ta arĩquerecũ ta Goãmũ òaro ãhrimi yũ mera. Eropigu ïgũ buherire yũ òaro wereburire weremasicũ ïgũ turari mera itamumi yũre. Árĩpehrerã Judio masa árĩbirã iri buherire erã peeburire werecũ itamumi. Eropigu masa erã yũre ñero iidiaquerecũ ta yũre erã ñero iibodigure itamumi mari Opũ. <sup>18</sup> Árĩpehrerire erã yũre ñero iirire yũre taugũcumi mari Opũ. Eropigu mũsigue ïgũ Opũ árĩroque yũ árĩborore itamugũcumi ïgũ. Eropirã “Mari Opũ òatariagũ, turatariagũ ãhrimi,” árĩpehrerinũri arĩrã mari. Eropa ta arĩrã.

*Pablo òadorepũ Timoteo pohro árĩrãre*

<sup>19</sup> Priscila, igo marapũ Aquila, Onesíforo ya wihi majarã sã òaporo. <sup>20</sup> Erasto Corintogue dujami. Trófimo dorecua wahámi. Eropigu Miletogue apiabu ïgũre.

<sup>21</sup> Puhiró core yojaro arique mũhũ. Eubulo, Pudente, Lino, Claudia sã, árĩpehrerã Jesu yarã mũre òadorema.

<sup>22</sup> Mari Opũ Jesucristo mũ mera árĩporo. Eropigu mũare Goãmũ mera turaro òadorea. Eropa ta árĩniguicãporo. Iripẽta ãhraa.



## Tito

### *Pablo Titore gojabeopu*

<sup>1</sup> Yuhu Pablo mure Titore gojaa. Goamu pohro majagu, Jesucristo yare igu buhedore igu apidigu ahraa. Goamu igu beyenira Jesure era umupeoburire, oari buherire era masiburire Jesu buhedoregu yure apimi. Iri buheri Goamu igu dorediro dopa ta mari iiburire werea. <sup>2</sup> Eropigu aripehrerinari Goamu yarã umarogue era oaro ariniguiboro sare buhea era. Goamu ne guyarari marigu i yebare igu ihacunuguboro core "Yu pohrogue eropa oaro ariniguicãrãcoma," arã apipu marire. <sup>3</sup> Eropigu igu queoranu aricu igu eropa arã apirare masidoredigu arimi masare. Eropa ta masidoregu yure era weredoremi igu marire taugu. <sup>4</sup> Mure Jesu yare buhebu. Yu eropa buhecã peegu, Jesure umupeonugabu mahu yu umupeoro dopa. Eropigu mahu yu buhedigu arigu diaye ta yu magu iro dopa arigu ta iiaa. Mure ire gojabeogu iiaa. Eropigu Goamu mari Pagu, Jesucristo marire taugu itamuri mera mure oadorea. Igu itamuri mera oaro arique mahu.

### *Creta waicuri nuguero majarã Tito igu wereburire werepu Pablo*

<sup>5</sup> Creta waicuri nuguero yu mure apicu Jesu yarã era buheboro duhyanibu irisubure. Eropigu era iiburire werebure apibu yuhu mure. Eropigu macari nucu majarã Jesu yarã oparã arimorãre beyedoregu apibu mure. <sup>6-8</sup> Era oparã Goamu pohro majarã ahrima. Eropigu era beyegu oarãre beyeque gajiropa iibirãre. Eropigu yujugo ta marapocurã arirãre beyeque. Eropigu "Bu arigu ahraa yuhu," arã pepirãre beyeque. Eropigu mata guabirãre, merebirãre, masa mera gamequeãbirãre, niyerure gamebirãre beyeque. Eropa beyegu era ya wihire ñajarãre oaro ihadiburãre, oaripure suarãre, pee masirãre, oaripure iiniguirãre, ñeri marirãre, era uaribejarire iibirãre, teboru mariru mohmerãre, oarire iiniguirãre beyeque. Eropirã mua beyerã porãre opa ariro gahmea. Jesure umupeorã, oarire iiniguirã, aripehrerãre oaro yuhrirã ariro gahmea oparã porãre. <sup>9-10</sup> Eropirã oari buherire queoro mari buhediro dopa ta ne duhubirã ariporo oparã mu beyenirã. Eropirã oari buherire wererã arirãcoma. Eropa iirã oari buherire gamebirãre buherã era ya guyarari aricu masicã iirãcoma era. Eropigu oaro beyeque Jesu yarã weca oparã aripehrerãre.

Bajarã era oparãre tarinugarã, oaro pepi wereniguibirã, guyarã ahrima dohpaguere. Eropa iirã yujurãyeri Moise dorerire idorerã tamera ñetariaro iirã iima. Era buheri iri diaye aribiricã era masicã iiro gahmea. <sup>11</sup> Era Moise dorerire idorerãpu guyarire buherã niyerure wajatadiarã buhema. Eropa buherã yujuyeri wiri majarãre aripehrerãre Goamu yapure cóacã iirã iicoma era. Era eropa iicã era idorebiricãro gahmea.

<sup>12</sup> Iribojegue weredigu Creta majagu ariqueregu ta opa arã werepu: "Creta nuguero majarã eropa guyaniguirã waicuma. Ñerire iirã diayea iro dopa iirã ahrima. Eropirã pagari barã arirã ne mohmediabeama," aripu igu igu ya nuguero majarãre. <sup>13</sup> Igu eropa arira diaye ta ahraa. Era eropa aricu iagu era turaro wereque Jesu ya buheripure era oaro pee masiboro dopa. <sup>14</sup> Eropigu "Judio masa iribojegue majarã era arã bocarare peebiricãque," arã wereque era. Jesu yare gamebirã era doreri sare Creta majarã era peenurubiriborore wereque era.

<sup>15</sup> Opa ahraa. Dipuwaja marirã oari dihtare pepima. Ñerire iiniguirãpu ñeri dihtare pepima. Era pepiripu ñetaria. Eropirã oaripure beyemasibeama. <sup>16</sup> Era "Goãmure masia gua," ariquererã ta ñerire iima. Eropa iinirã era aricu iarã

Goãmure masibirã erã árĩcũ masia mari. Eropirã erã ñetariarã, Goãmũ yare tarinugarã àhrima. Eropirã òarire iimasibeama.

## 2

### *Òari buherire weredorepũ Pablo Titore*

<sup>1</sup> Mũpũ buhegũ òari buheri arĩdiro dopa ta òaro buheque. <sup>2</sup> Mũrãpũre òpa wereque: “Mũa gũhyadiarã, masa erã umupeorã, pee masirã, ‘Goãmũ diaye iĩgũ àhrimi,’ arĩ umupeorã, òari buherire òaro iirã, Jesure masa sãre mahirã, ñero tariquererã ta yujuro bojerã árĩque,” arĩ wereque erãre. <sup>3</sup> Mũrã nome sãre eropa ta arĩ wereque: “Gũhyadiarã nome, ñeri quere werewũabirã nome, merebirã nome árĩque,” arĩ wereque erã nome sãre. Eropirã erã nome òarire gajirãre buheporo. <sup>4</sup> Eropa iirã òpa arĩ buheporo mũrã nome nómeñaripũre: “Mũa marapũ sũmarãre mũa porã sãre mahique,” arĩ buheporo. <sup>5</sup> “Eropirã mũa pee masirã nome, gajirã mũa mera ñero iibirã nome, mũa ya wihi majare òaro ìhadiburã nome, òaro iirã nome, mũa marapũ sũmarãre òaro yũhrirã nome árĩque,” arĩ buheporo mũrã nome nómeñaripũre. Erã eropiicũ ìarã gajirãpũ “Goãmũ yare umupeorã ñero iirã àhrima,” arĩmasibeama mũare.

<sup>6</sup> Eropigũ mamarã sãre òpa wereque: Pee masirã árĩporo erã. <sup>7</sup> Eropigũ mũpũ òari dihtare iiniguicãque mũre erã ìhacũburire. Buhegũ ne gũyaro mariro buheque. Eropa buhegũ gũhyadiaro mera buheque mũhũ. <sup>8</sup> Eropa buhegũ òaro pee masiri mera buheque ne gajirã mũre erã weresãmasibiriburire. Mũ eropa buhecũ ìarã marire ìhaturirã árĩquererã ta marire bu gohra ta werewũamasibeama. Marire eropa werewũamaacãrã gũhyasũuro warãcoma erã.

<sup>9</sup> Eropigũ pohro majarãre òpa doreque: Erã oparãre òaro yũhrirã árĩporo. Eropirã erã oparãre òaro mucubiricũ iiporo. Eropa dihta iiporo. Eropirã erã oparãre pũriro mera yũhribiricãporo. <sup>10</sup> Eropirã erã oparã yare yajabiricãporo. Eropirã òarã erã oparã dorerire òaro iiniguicãrã árĩporo. Erã eropa òaro yũhrirã árĩcũ ìarã Goãmũ marire taugũ ìgũ buherire pee sũarãcoma gajirã.

<sup>11</sup> Masare ìgũ mahirire Goãmũ mari masare masicũ iituhajami. Mari masare eropa mahigũ árĩpehrerã peamegue wabonirãre Goãmũ turaro taudiami. <sup>12-13</sup> Masare eropa mahigũ Goãmũ marire òpa doremi: Ñeri iirire, ñerire ùaribejarire duhucãdoremi marire. Goãmũ turagũ, Jesucristo marire taugũ ìgũ òarire mari ìaburinũre, ìgũ òaro mera dujariburinũre mari corerã iiaa. Eropigũ mari corerinũ mari corerisubu, mari pee masirã, òarire iiniguirã, Goãmũre umupeoniguirã marire arĩdoremi Goãmũ. <sup>14</sup> ìgũ Jesucristo mari ya arĩburire ta sĩridi árĩmi. Árĩpehrerã mari ñeri iirire duhucũ iibu, marire ìgũ yarã wacũ iibu sĩridi árĩmi. Mari ñerire ìgũ eropa cóãcũ mari ñerire iira dipuwaja marirã arĩrãca. Eropirã turaro òarire iidiarã arĩrãca.

<sup>15</sup> Ire arĩpehrerire iri nũgũro majarãre Jesu yarãre buheque mũhũ. Erã opũ árĩgũ ta iiaa mũhũ. Eropigũ erãre wereque. Eropigũ erã ñerire iicũ ìagũ wereque erãre. Eropirã árĩpehrerã gajirã mũre cóadiabiricãporo.

## 3

### *Jesu yarã erã iiburire werenemopũ Pablo*

<sup>1</sup> Òpa guñacũ iique ero majarã Jesu yarãre: Erã oparãre òaro yũhrirã árĩporo. Eropirã árĩpehrerire òari dihtare iirã árĩporo. <sup>2</sup> Eropirã gajirãre ne quere goroweobiricãporo. Game dũyasobiricãporo. Eropirã masa òarã, árĩpehrerãre umupeorã árĩporo.

<sup>3</sup> Iribojegue mari sã pee masibirã, tarinugarã, gɥayarire peenururã, ñerire iisuarã, ñerire ɥaribeja duhumasibirã, ɥmuri nɥcu ñerire iiniguirã, gajirãre erã gajinore opacũ ñaturirã árĩmurihibu mari sã. Eropirã marire gajirã ñaturimurima. Eropirã mari sã erãre ñaturimurihibu. <sup>4-5</sup> Eropa árĩnirã árĩquerecũ ta Goãmu marire peamegue wabonirãre taumi. Eropa taugu ñgu ñgu ðagu árĩrere, masare ñgu mahirire marire ñhmudi árĩmi. Õaro mari iira mera taubirimi marire. Marire mojomoro ñagu mari ñeri iirare coegu Espiritu Santo mera marire taumi. Eropa iigu marire ñgu porã wacũ iimi. Eropigu Espiritu Santopu mari ðarã árĩburire marire gohrotomi. <sup>6</sup> Jesucristo mari ñeri iira dipuwaja ñgu siri, masa muriaa mera Goãmu ñgu Espiritu Santore omi marire wuaro ñgu turarire mari opaboro dopa. <sup>7</sup> Marire mahigu, marire ðaro iidiami. Eropigu ñgu, ñgu Espiritu Santore omi, ñeri iira dipuwaja marirã mari árĩborore, ɥmarogue mari eropa ðaro árĩniguicãborore. Mari eropa árĩniguiburire masirã irire mucubiri corerã iiaa mari.

<sup>8</sup> Iri yu werera diaye ta ahraa. Eropigu irire yu werediro dopa ta masare buhegu iri dorerire ipehodoreque muhu. Eropigu Goãmure umupeorãre irire buheque ðarire erã ðaro iiboro dopa. I yu arĩ buhera ðari buheri ahraa. Eropirã masa i buherire erã peenurucũ ðaro itamuri árĩroca erãre. <sup>9</sup> Gajirã wereniguiripu duhpiburi árĩbeaa. Erã masibiriquererã ta erã arĩ dɥyasoma. Erã ñecu sumarã arĩ bocarare game dɥyasoma. Moise dorerire arĩ dɥyasoma. Erã eropa arĩ dɥyasori iri árĩpehreri duhpiburi árĩbeaa. Eropigu irire peenurubiricãque. Mu sã dɥyasobiricãque.

<sup>10</sup> Mua mera majagu eropa game dɥyasogu mua basi game duca wacũ ñgu iicũ ñagu "ñibiricãque," arĩque ñgure. Yujusubu, pesubu irire ñgure mu iidorebirira puhru ñgu yuhribiricũ ñagu ñgure wapicu duhucãque. <sup>11</sup> Eropa dɥyasogu ñeri dihtare ɥaribejaniguigu ahrimi. Eropa ñgu iicũ ñarã ñgu ñegu árĩcũ masi, ñgure wapicubiricãro gahmea.

### *Pablo doretupu*

<sup>12</sup> Nicopoligue puhirópẽ árĩbu iiaa. Eropigu Artemare o Tíquicore mu pohroque yu obeomhtacũ erogure yure bocatirigu arĩque muhu. <sup>13</sup> Eropigu dorerire ðaro mehregure Zena waicugure, Apolo sãre ðaro itamuque erã waborore. Eropigu erã gamerire árĩpehrerire oque erãre duhyaro mariro. <sup>14</sup> Eropirã Jesu yarã mari mera majarã ðarire iipoporo. Gajinore opapehobirãre erã itamuboro dopa, ðarire iiniguirã erã árĩboro dopa eropa iipoporo.

### *Pablo ðadorebeopu Jesu yarãre*

<sup>15</sup> Árĩpehrerã yu mera majarã mre ðadorema. Ero árĩrã Jesu yarã guare mahirã ðaporo. Árĩpehrerãre mre Goãmu ñgu mahiri mera turaro ðadorea. Eropa ta árĩniguicãporo. Iripeta ahraa.

## Filemón

### *Pablo Filemo waĩcũgũre gojanũgarũ*

<sup>1</sup> Yũhũ Pablo Jesucristo yagũ yũ árĩri dipuwaja peresugue árĩgũ iiaa. Yũhũ, mari acaweregũ Jesu yagũ Timoteo mera mũre Filemore gojabeoa gũa. Mũhũ gũa mahigũ Cristo yare gũare mohmetamugũ āhraa mũhũ. <sup>2</sup> Eropirã Jesu yarã mũ ya wi gamenererã sãre gojabeoa gũa. Mari mahigo mari acawerego Jesu yago Apia sãre gojabeoa gũa. Arquipo sãre gojabeoa gũa. Arquipopũ gũa iro dopa Cristo yare weregũ āhrimi. <sup>3</sup> Eropirã Goãmũ mari Pagũ, mari Opũ Jesucristo mera mũare òadorea. Īgũ itamuri mera òaro árĩque mũa.

### *Filemo gajirãre ĩgũ mahirire, Cristore ĩgũ umupeorire werepũ Pablo*

<sup>4-5</sup> Yũ acaweregũ, Filemo, mũre guña Goãmũre mũre serēbasamũraa. Eropa serēbasagũ “Ōhaa,” arãa yũhũ ĩgũre. Cristore mũ mahicũ ĩgũre mũ umupeocũ gajirã Jesu yarãre mũ mahicũ peeabũ yũhũ. Eropigũ Goãmũre “Ōhaa,” arĩ mucubiria. <sup>6</sup> Cristore mari umupeorire gajirãre weregũ āhraa mũhũ. Mũ eropa árĩgũ árĩcũ i sãre serēbasaa Goãmũre. Jesucristo yarã árĩrã wũaro òarire oparãca mari. Irire mũ opaburire òaro mũre masipehodoregũ serēbasaa Goãmũre. <sup>7</sup> Acaweregũ, gajirãre mũ mahicũ peegũ mucubiria yũhũ. Árĩpehrerã Goãmũ yarãre òaro sĩporã turacũ ĩgũ waĩcũa mũhũ. Mũ eropa iicũ peegũ mucubiria yũhũ.

### *Pablo Onésimo ya árĩburire serēpũ Filemore*

<sup>8-10</sup> Eropigũ dohpaguere Onésimore mũ pohro majagũ árĩdigũre mũre serēbasadiaa. Peresugue gũa árĩrã Cristo yare werebũ yũhũ ĩgũre. Irire peegũ Cristore gahmeami ĩgũ. Eropigũ ĩgũ Goãmũ yagũ wahámi. Eropa wagũ yũ magũ iro dopa āhrimi. Eropigũ yũ bugũ árĩgũ Cristo yare yũ buhera dipuwaja peresu árĩgũ mũre Onésimo mera werebeogũra ĩgũre mũ iiburire. Cristo ĩgũ buhedore ĩgũ apidigũ āhraa yũhũ. Eropa árĩgũ, árĩgũ ĩgũre mũ iiburire mũre dorebu āhraa yũhũ. Eropa árĩgũ árĩqueregũ ta mũre doresome yũhũ. Mahiri mera mũre werebeogũra iripēta.

<sup>11</sup> Cristo yagũ ĩgũ árĩboro core Onésimo mũ pohro majagũ árĩgũ duhpibu árĩbiridigũ árĩmi. Mũre òaro itamubiridigũ árĩmi. Dohpague tamerare yũre òaro itamugũ āhrimi. Mũ sãre òaro itamugũ árĩgũcumi. Dohpaguere bu árĩgũ gohra árĩbeami. <sup>12</sup> Eropigũ dohpaguere ĩgũre mũre wiagũ iiaa. ĩgũre turaro mahia. ĩgũ yũ turaro mahigure mũre wiagũ iiaa. <sup>13</sup> ĩgũre mũre wiabiricũ ĩgũ yũ pohro dujaboñumi. Ōari buherire yũ buheri dipuwaja peresu yũ árĩrisubu ĩgũre yũre itamudoreboya yũhũ. Eropigũ yũ mera dujadoreboya yũhũ. Mũpũ yũre itamumasibiricũ ĩgũpũ mũre gohrotogũ árĩboñumi. <sup>14</sup> Eropa árĩquerecũ mũre wiagũ iiaa ĩgũre. Mũhũ ĩgũre “Dujaque,” mũ arĩbeocũ, ĩgũre dujadoreboya. Yũpũ mũre “Yũ pohro ĩgũre apique,” arĩdiabirica. Eropigũ ĩgũre mũre wiagũ iiaa. <sup>15</sup> ĩgũ Onésimo mũre bajamenũrigã ĩgũ mũre duhrigãra pũhrũ dipaturi mũ mera árĩgũcumi daja. ĩgũ mũre duhricũ Goãmũ gamero dopa ta wahabũ, arĩ pepia yũhũ, ĩgũ Jesu yagũ ĩgũ árĩborore. Eropigũ mũ pohro árĩgũ daja òaro árĩniguigũcumi. <sup>16</sup> Eropigũ ĩgũ dohpaguere mũ pohro majagũ gohra árĩbeami. Pohro majarã tauñariro árĩgũ āhrimi ĩgũ yũ pepicũre. Dohpaguere ĩgũ mũ acaweregũ Jesu yagũ āhrimi. Eropigũ ĩgũre turaro mahia. Mũpũ yũ tauro ĩgũre mahique. Mũ eropa mahigũ mũ pohro majagũ ĩgũ árĩqueregũ ta mũ pohro majagũ gohra árĩbeami ĩgũ. ĩgũ mũ acaweregũ Jesucristo yagũ āhrimi.



<sup>17</sup> Eropigu yure mu bocatĩridiro dopa ta ĩgu sãre ðaro bocatĩrique. Mu mera majagu yu arĩcũ ĩgu sãre ðaro bocatĩrique. <sup>18</sup> Eropigu gajiropa mure ĩgu iicũ, mure ĩgu wajamogu arĩcũ yupu irire wajayegura. <sup>19</sup> Yuhu Pablo yu basi ire were gojagura: Yupu wajayegura mure. Mure yu buhera puhru Cristo yagu mu wacũ arĩpehrerinuri Goãmu mera arĩbu ãhraa muhu. Mure yu eropa buhera waja mu sã yure wuaro wajamogu arĩboca. Mu eropa arĩquerecũ ta mure wajayegura ĩgu mure wajamorire. <sup>20</sup> Eropigu yu acaweregu, yu mahigu, mari Opu Cristo yagu ãhraa muhu. Mu eropa arĩgu Onésimore ðaro bocatĩrique. Cristo yagu arĩgu yu acaweregu ãhraa muhu. Eropa arĩgu, arĩgu yure ðaro mucubiricũ iique.

<sup>21</sup> I yu wererare ðaro iiguca muhu. Eropigu yu werera tauro iiguca muhu. Irire masigu mure gojabeogu iiaa. <sup>22</sup> I sãre weregura mure: Mua pohrogue yu waborore Goãmure mua serēbasarare ĩgu yuhribocumi. “Áu,” ĩgu arĩcũ gahmea yuhu. Eropigu mua pohrogue yu ejaburi toëre amuyuque muhu.

*Pablo ðadoretupu Filemore*

<sup>23</sup> Epafra mure ðadoremi. ĩgupu Cristo yare ĩgu iira dipuwaja yu mera peresu arĩgu ãhrimi. <sup>24</sup> Eropirã Marco, Aristarco, Dema, Luca yu mera mure ðadorema. Cristo yare yu buhecũ erãpu yure itamurã ãhrima.

<sup>25</sup> Mari Opu Cristo mera ðadorea muare. ĩgu muare ðaro iigucumi. Eropa ta iiporo. Iripēta ãhraa.

## Hebreos

### *Goãtm̃ magu Goãtm̃ yare werem̃ marire*

<sup>1</sup> Iribojegue Goãtm̃ masare werenugap̃. Īgu bajasuburi mari ñec̃u s̃umarãre iribojegue majarãre ĩgu gamerire werem̃urip̃. Īgu yare werem̃htanirã mera erãre werem̃urip̃ ĩgu. Gajirãre ĩgu dehyoa werem̃urip̃. Gajirãre ĩgu bocat̃iriro werem̃urip̃. Gajirãre quẽroque werem̃urip̃. Eropa werem̃urip̃ ĩgu mari acawererãre. <sup>2</sup> Dohpaguere pehreburi coregã ár̃irinurire ĩgu magure ĩgu yare ĩgu weredore obeoc̃ũ ĩgup̃ marire wereami. Jesucristo ĩgu Pagu iidorero mera i yebare umaro sãre iidigu ár̃imi. Īgu Pagup̃ pehrerinu ár̃icũ ár̃ipehrerire opabure apip̃ ĩgure. <sup>3</sup> Eropigu ĩgu magup̃ ĩgu Pagu ðarire opagu ár̃igu, ĩgu turari mera marire ii ĩhmudi ár̃imi. Eropigu yujuro mera ĩgu Pagu mera ár̃igu, ĩgu Pagu ár̃icurire marire ĩhmudi ár̃imi. Eropigu ĩgu turari mera ĩgu dorecũ i yeba, umaro sã eropa ár̃iniguia. Eropiro dederebeaa ĩgu doreri mera. Eropigu mari ñero iirare ĩgu coera p̃hr̃u ĩgu Pagu turatarigu diayer̃u doap̃ ĩgu op̃ ĩgu ár̃irire ĩhmubu.

### *Goãtm̃ magu anyua tauro ãhrimi*

<sup>4</sup> Īgu Goãtm̃ magu waic̃umi. Eropa waic̃ugu gajirã tauro op̃ ãhrimi. Eropigu ĩgu anyua weca tauro op̃ ãhrimi. <sup>5</sup> Īgu anyuare Goãtm̃ ne ðpa ar̃i werebirim̃urip̃ ĩgu magure werediro dopa ta:

Ỹu magu ãhraa m̃h̃u. Dohpagãre m̃re dehyoac̃ũ iab̃u, ar̃ip̃ Goãtm̃ ĩgu magure. Anyuap̃re ne eropa ar̃i werebirim̃urip̃. Eropigu erãre i sãre ne werebirim̃urip̃:

Īgu pagu ãhraa ỹh̃u. Eropigu ĩgu ỹu magu ár̃igucumi, ar̃ip̃ Goãtm̃ ĩgu magure. Anyuap̃re ne eropa ar̃i werebirim̃urip̃. Eropigu ĩgu magu anyua tauro ár̃ip̃. <sup>6</sup> Eropigu gajisubu ĩgu magure masa dehyoagure i yeba ap̃õpa aig̃u ðpa ar̃ip̃ Goãtm̃ ĩgure:

Ár̃ipehrerã yaharã anyua ỹu magure mereja, ĩgure umupeorãcoma erã, ar̃ip̃ ĩgu.

<sup>7</sup> Eropigu ĩgu anyuap̃re werebu ðpa ar̃ip̃ ĩgu:

Yaharã anyuare miruñe iro dopa d̃ur̃uc̃urãre iiaa ỹh̃u. Erã ỹu pohro majarã ãhrima.

Eropigu erãre peame iro dopa ár̃icũ iiaa ỹh̃u, ar̃i werem̃u Goãtm̃ mari Pagu.

<sup>8</sup> Erãre ĩgu eropa ar̃iquereg̃u ta ĩgu magup̃re ðpa ar̃ip̃:

M̃h̃u Goãtm̃ ár̃ipehrerã tauro op̃ eropa ár̃iniguicãg̃uca. Diaye ta doreg̃uca m̃h̃u m̃u yarãre. <sup>9</sup> Diaye ár̃irire, ðaro iirire turaro gahmea m̃h̃u. Eropigu ñero iirire gamebeaa m̃h̃u. M̃h̃u eropa ár̃igu ár̃icũ ĩagu, ỹh̃u m̃u Pagu ár̃ipehrerã gajirã tauro m̃re mucubiricũ iab̃u, ar̃ip̃ Goãtm̃.

<sup>10</sup> I sãre ar̃ip̃ ĩgu ĩgu magure “Op̃,” ar̃i piyug̃u:

Op̃, negohraguere i yebare, umaro sãre ĩhac̃unugub̃u m̃h̃u. <sup>11</sup> Iri ár̃ipehreri pehrea waroca. M̃ur̃u eropa ár̃iniguig̃uca. I yeba ár̃ipehreri suhriro iriñe boaro dopa ta pehrea waroca. <sup>12</sup> Iri ár̃ipehreri i yebare umaro sãre gohrotocũ iig̃uca m̃h̃u. M̃urañe suhrirore m̃u cohã gajĩñe mera gohrotoro dopa ta ár̃ipehrerire gohrotocũ iig̃uca m̃h̃u. M̃ur̃u m̃u ár̃idiro dopa ár̃iniguicãg̃uca. Eropigu ne gohrotosome. Eropa ár̃iniguig̃uca m̃h̃u, ar̃ip̃ Goãtm̃ ĩgu magure.

<sup>13</sup> Gajisubu ðpa ĩgu magure ar̃igu iri sãre anyuap̃re ne werebirim̃urip̃ Goãtm̃:

Ỹu diayer̃u doaque m̃h̃u. Eropigu m̃re ĩhaturirãre tarinugabasadoreg̃ura. Eropigu erã weca op̃ ár̃ique m̃h̃u, ar̃ip̃ Goãtm̃ ĩgu magure.

<sup>14</sup> Ár̃ipehrerã anyuap̃ Goãtm̃ pohro majarã dihta ãhrima. Eropiro Cristo ĩgu taumorãre itamudoreg̃u Goãtm̃ obeom̃urimi erãre.

## 2

*Goām̄ yare ðari buherire marire eropa pepibiricãro gahmea*

<sup>1</sup> Eropigū Goām̄ magū gohra marire weregū ĩgū árĩcũ masirã ĩgū wererare mari peerare ðaro guñaro gahmea marire irire cãdijiri arĩrã. <sup>2-3</sup> Anyua masare erã wererare masapū erã tarinugacũ ĩagū Goām̄ masare dipuwaja moapū. Eropigū erã anyua werera iri diaye árĩcũ ĩhmugū iipū. Eropiro anyua erã werera iri diaye árĩcũ marire irire peero gahmea. Erã tauro Cristopure peero gahmea marire. ĩgū mari Opū ĩgū marire tauborore weremūhtarū. Eropirã ĩgure peenirãpū ĩgū wererare marire wereturiañorã marire ðaro masicũ iirã. Eropigū iri buherire “Jesucristo marire ĩgū taugūcumī,” arĩ buherire mari eropa pepicãcũ Goām̄ marire dipuwaja moagūcumī. ĩgū dipuwaja moaborore duhrimasibea mari. <sup>4</sup> Irire peemūhtanirã erã buhe weca peoro watope Goām̄pū iri buherire diaye ta árĩcũ ĩhmudi árĩmī. Eropigū erã irire buherã ĩgū turari mera baja deyoro moari erã ii ĩhmucũ iri buherire diaye ta árĩcũ ĩhmudi árĩmī masare. Eropigū ĩgū Espĩritu Santo mera iri buheri diaye ta árĩcũ ĩhmudi árĩmī. Espĩritu Santo Jesu yarãre yujurãyerire Goām̄ yare erã mohmemasiburire apidi árĩmī erã game itamuboro dopa. ĩgū gamediro dopa ta apidi árĩmī erã mohmemasiburire erãre.

*Jesucristo mari iro dopa ta dūpūcūgū masa dehyoapū, arĩ gojañumi*

<sup>5</sup> I ũmū pehrerinū árĩcũ Goām̄ pohro árĩrã tauro oparã árĩsome anyuapū. Erãre oparã acusome Goām̄. <sup>6</sup> Anyuare oparã acubiriquerecũ Goām̄ yare weremūhtadigū ðpa arĩ gojañumi iribojegure Goām̄ ĩgū oparã acumorãre:

Gua masa bu gohra gua árĩrã árĩquerecũ ta guare guña mūhū. Gua masare ðaro árĩcũ iiaa mūhū. <sup>7</sup> Bajamenūrigã anyua doca masare apiyoro mūhū. Eropa apiqueregū ta guare turari ogū oparã acuyoro mūhū. <sup>8</sup> Mūhū eropa acucũ i yeba maja weca árĩpehreri weca āhraa gua masa, arĩ gojañumi iribojegue majagū mari Pagure.

Goām̄ masare apigū i yebaguere árĩpehrerã waimūrã sãre masa dorero doca árĩmorãre apiñumi. Masare ĩgū eropa oparã acuquerecũ ta erã waimūrãre árĩpehrerãre doremāsibeama dohra. <sup>9</sup> Jesupū árĩpehrerã weca opū āhrimi. Bajamenūrigã anyua doca mari Pagū ĩgū sãre apipū. Mari yañe árĩborañere sĩribasabure ĩgure eropa apidi árĩmī. Mari Pagū marire mahigū Jesure mari ya árĩburire ĩgū sĩricũ gamepū. Eropigū ĩgū eropa sĩricũ ĩagū ĩgure turarire ogū, opū acupū ĩgure pare árĩpehrerã ĩgure umupeoborore.

<sup>10</sup> Goām̄ árĩpehrerire ĩhacūnuguñumi. Eropiro árĩpehreri ĩgū ya dihta āhraa. Eropigū Jesure sĩridoregū masa erã ñerire cãdijicũ iipū ĩgure. ĩgū masa bajarã ĩgū porã árĩmorãre ũmarogue ðarogue aĩgãbu eropa iipū. ĩgū eropiicũ tamera ðapūrica. Eropigū Jesupū marire taugū mari opū ta āhrimi. <sup>11</sup> Árĩpehrerã masa erã ñerire cóãdi árĩmī Jesucristopū. Eropigū ĩgū ñerire cóãnirã mera Pagūcumī Goām̄re. Eropigū mari Pagū yujugū ta āhrimi. Mari Pagū ĩgū árĩcũ Jesu marire ĩgū ñerire cóãnirãre “Yū acawererã āhrima,” arĩ piyugū ne guhyasĩribeami. <sup>12</sup> Őpa arĩgū iipū ĩgū Pagure:

Mū árĩricurire weregura yū acawererãguere. Árĩpehrerã yaharã gamenererã pohro mure umupeogu “Turagū āhrimi,” arĩ weregura yūhū erãre, arĩpū ĩgū ĩgū Pagure, arĩ gojara āhraa.

<sup>13</sup> Eropigū ðpa arĩpū daja:

Yū Pagure guñaturagūca yūhū, arĩpū, arĩ gojara āhraa.

I sãre arĩpū ĩgū Jesucristo:

Ohõ ãhraa yũhũ. Goãmũ porã ãgũ yũre apinirã yũ acawererã mera ohõ ãhraa, arĩpũ ãgũ. ãgũ yarãre “Yũ acawererã,” arĩ piyugũ eropa arĩpũ.

<sup>14</sup> “Yũ acawererã,” ãgũ arĩ piyurã dũpũcũrã mari árĩcũ ãgũ, Jesupũ mari ya dũpũ mari iro dopa árĩgũ aripũ. Eropa árĩgũ arigũ ãgũ crusague sĩrigũ aripũ watĩre dederecũ iibu. ãgũ watĩpũ sĩridoregũ ãhrimi marire. <sup>15</sup> Eropa ii ãgũre dederecũ iidi árĩmi marire tauboro dopa. Maripũ umũri nũcũ mari sĩriborore gũiribũ. Eropa gũirã gũiro doca árĩrã, ñero sĩporãcũrã árĩribũ mari. Eropa árĩrã mari árĩcũ ãgũ ãgũ marire taumi. <sup>16</sup> Eropa taugũ anyuapũre itamugũ aribiripũ ãgũ. Abrahã pãramerãre maripũre itamugũ aripũ. <sup>17</sup> Eropigũ ãgũ mari acaweregũ iro dopa aripũ. Yujuropa ta mari iro dopa ta dũpũcũgũ aripũ. Eropa arigũ mari masa ya árĩburire sĩribasagũ mari ñeri iirare Goãmũre cóãdoregũ aripũ. Eropigũ pahia oparã erã Goãmũ ya árĩburire serẽbasaro dopa ta õaro itamuboro dopa mari iro dopa dũpũcũgũ arigũ iipũ. Erã tauro marire ãgũ mojomoro ãhãmi. Eropigũ marire õaro itamuniguicãmi. <sup>18</sup> ãgũ ñero taripũ. Eropigũ watĩ ãgũre ñero iidoreripũ. Iibiripũ ãgũ. Eropa ñerire tarinũgadigũ árĩgũ, ãgũ mari sãre ñerire tarinũgacũ iimasimi. Watĩ ãgũ ñerire iidorecũ ãgũ marire ñerire iibiricũ iimasimi.

### 3

#### *Jesu Moise tauro árĩgũ ãhrimi*

<sup>1</sup> Jesu ãgũ eropa árĩgũ árĩcũ ãrã ãgũre bũrigã guñaque mũa. Yũ acawererã, Jesu yarã, Goãmũ ãgũ yarã árĩmorãre mũare beyedigũ árĩmi ãgũ. ãgũ Jesupũ Goãmũ ãgũ apidigũ árĩgũ mari pahia opũ ãhrimi. I yeba majarã pahia oparã tauro ãgũpũ mari ya árĩburire Goãmũre serẽbasagũ ãhrimi marire. Eropirã ãgũre õaro guñaque mũa umupeodigũre. <sup>2</sup> Goãmũ ãgũre marire ãgũ tauborore ãgũ apicũ ãgũpũ ãgũ apidiro dopa ta iipũ. Ne tarinũgabiripũ. Moise sã iribojegue majagũ Goãmũ yarã Israe masare itamugũ ne tarinũgabiripũ. Eropa ta iipũ Jesu sã. <sup>3</sup> Eropiro Moisere erã umupeodiro tauro Jesupũre umupeoro gahmea marire. Õpa ãhraa iri. Wihire mari “Õari wihi ãhraa,” arĩro tauro wihire iidigũpũre “Õapũricãmi,” arĩro gahmea marire. Eropigũ Jesupũ wihi iidigũ iro dopa ãhrimi. ãgũ eropa árĩgũ árĩcũ ãgũpũre Moise tauro umupeoro gahmea marire. <sup>4</sup> Masapũ wirire iirã ãhrima. Goãmũpũ árĩpehãrere iigũ ãhrimi. <sup>5</sup> Moisepũ Goãmũ mohme coregũ árĩgũ Goãmũ ya curu majarãre itamuniguigũ árĩmũripũ. Pũhrũgue Goãmũ ãgũ masare wereborore weremũripũ masare. <sup>6</sup> Cristopũ Goãmũ magũ árĩgũ ta, Goãmũ yare iiniguicãgũ árĩgũ Goãmũ ya curu majarã tauro opũ ãhrimi. Eropirã Moise tauro Cristopũre umupeoro gahmea marire. Eropirã maripũ Cristore guñatura duhubirã árĩrã marire ãgũ tauborore eropa mucubiri coreniguicãrã ãgũ ya curu majarã ãhraa mari.

#### *Goãmũ ãgũ yarãre ãgũ mera õaro soocũ gameñumi*

<sup>7</sup> Eropirã Jesucristore mari umupeo duhubiriborore õpa iro gahmea marire. Irire weremũ Espĩritu Santo Goãmũ yare gojarapũguere.

Dohpagãre yũhũ Goãmũ mũare yũ werecũ yũhridibirã árĩbiricãque mũa. <sup>8</sup> Eropirã õaro yũhrique yũre mũa. Iribojegue Israe masa masa marirogue árĩrã yũ werequerecũ ta umupeodiabirã yũre yũhribirimũrima. Eropa iirã yũre ãhasũabiricũ iima. Eropirã erã iidiro dopa iibiricãque mũapũ yũre. <sup>9</sup> Eroguere cuarenta bojori gohra erãre deyoro moarire ii ãhmũribũ erãre itamugũ. Yũ eropa ii ãhmuquerecũ ta erãpũ õpa arĩ pepimũrima yũre dũyãsorã. “Goãmũ marire itamumãsisome,” arĩ pepimũrima. Eropa arĩ pepirã ñero iimũrima. <sup>10</sup> Erã eropiicũ ãgũ erã mera guabũ. Eropa guagũ õpa arĩbũ: “Erã yahare peediabirã gãjiropa árĩri buherire eropa guñamaacãrã ãhrima,” arĩbũ.



“Yahapure ne buhediabeama,” arĩbu eräre. <sup>11</sup> Eropigu erã mera guagu õpa arĩ werebu: “Erã yu mera majarã ne árĩsome. Eropirã yu mera õaro soosome erã,” arĩ werepu Goãmũ.

<sup>12</sup> Eropirã, yu acawererã, õaro iique mua Goãmure cohori arĩrã. Mua ñerire pepirã, Goãmũ ojocarigure “Diaye iimi ĩgu,” arĩ umupeobirã, ĩgure cóãboca mua. Ne yujugu mua mera majagu eropa iibiricãporo. <sup>13</sup> Eropirã ipure iiro gahmea: Mua mera majarã umuri nucũ Goãmũ yare mua basi game wereniguique ñerire iiri arĩrã. Ñerire iirã “Iri mera mucubiria,” arĩrã, gũyarire pepirã iiaa mari. Eropa pepibiricãque. Ñeripure iiniguirã Goãmũ yapure suabeaa mari. Eropa iirã ñerire duhudiabirã wahaa. Eropa iiri arĩrã mua mera majarãre Goãmũ yare mua basi game wereniguique. Jesucristo ĩgu dujariboro core eropa game wereniguique. <sup>14</sup> Eropirã negohrare Cristore mari umupeonugadiro dopa ta eropa ta mari umupeoniguicãrã, mari ojocaripõ ĩgu yare duhubirã ĩgu mera majarã ãhraa.

<sup>15</sup> Goãmũ yare erã gojarapũ yu dohparagã werediro dopa werea daja mũare Goãmũ wereniguirire:

Dohpagãre yũhũ Goãmũ mũare werecũ õaro yũhriique mua yũre. Iribojegue majarã Israe masa eräre yu werequerecũ ta umupeodiabirã yũre yũhridiabirima. Eropirã erã iidiro dopa iibiricãque mua, arĩmi Goãmũ, arĩ gojañuma iribojegure.

<sup>16</sup> Eropirã Goãmũ ĩgu wererare peenirã árĩquererã erã ĩgure yũhribirimũriñorã. Erã árĩpehrerã Egiptogue ñero tarinirãre Goãmũ Moise mera ĩgu wiunirã árĩñorã. Erã eropa árĩquererã ĩgure ne yũhribiriñorã. <sup>17</sup> Eropigu erã ñero iicũ ĩagu cuarenta bojori gohra Goãmũ erã mera guapũ. Erã ñero iira dipuwaja erogue masa marirogue eräre dujadorepu. Eropirã erore sĩria wamũriñorã erã. <sup>18</sup> ĩgure erã eropa yũhridiabiricũ ĩagu õpa gũhyadiaro mera arĩpu ĩgu: “Erã yu mera majarã ne árĩsome. Eropirã yu mera ne õaro soosome erã,” arĩpu ĩgu. <sup>19</sup> ĩgu eropa arĩcũ peerã ire masia mari: Erã Goãmure erã umupeobiriri waja, ĩgu mera majarã árĩmasibiriñorã. Eropirã ĩgu mera õaro soomasibiriñorã.

## 4

<sup>1</sup> Eropigu iribojegue majarãre ĩgu mera õaro erã sooborore gamegu eräre “Yu mera soorãca,” arĩ apĩpu Goãmũ. Mari sãre eropa ta arĩ apĩpu ĩgu. Eropirã gũhyadiaro mera Goãmure õaro yũhrirã mari wieri marigue arĩrã. Eropa wierã ĩgu mera õaro soosome mari. <sup>2</sup> Iribojegue majarã Goãmũ yare erã peediro dopa ta mari sã õari buherire peebu. Erãpu peerã “Goãmũ diaye iigu ãhrimi,” arĩ pepibirimũriñorã. Goãmure umupeobirimũriñorã. Eropiro Goãmũ yare peequererã yũhribiricũ erã peera ñehe árĩburi árĩbiriyoero eräre. <sup>3</sup> Marĩpu ĩgure umupeorã dihta Goãmũ mera majarã árĩrãca. Eropirã ĩgu mera õaro soorãca. Goãmũ õpa arĩpu:

Erã mera guagu gũhyadiaro mera õpa arĩ werebu: “Yu mera ne soosome erã,” arĩ werebu, arĩyoero Goãmũ yare erã gojarapũgue.

Eropa arĩpu ĩgu. I yebare ĩgu ĩhacũnugura pũhrũ soorũ ĩgu. Eropigu masa sã ĩgu mera sooborore amuyupu. Amuqueregu erãpũre “Yu mera ne soosome erã,” arĩpu Goãmũ. <sup>4</sup> Seis nũri ĩgu ĩhacũnugura pũhrũ ĩgu soorare õpa arĩ gojañuma Goãmũ yare erã gojarapũgue:

Seis nũri pũhrũ árĩpehrerire ĩgu iirare pehogũ, Goãmũ mohmeduhu soorũ, arĩ gojañuma ĩgu yare erã gojarapũgue.

<sup>5</sup> Eropiro Goãmũ yare erã gojarapũ õpa arĩ werea daja ĩgu mera õaro árĩbirinirãre: Yu mera majarã ne árĩsome erã. Eropirã ne yu mera soosome, arĩpu Goãmũ.

<sup>6</sup> Eropirã õari buherire peemũhtanirã, ĩgure erã tarinũgara dipuwaja ĩgu mera majarã árĩbirã ĩgu mera soobiriñorã erã. Gajirãpu ĩgu mera majarã árĩrãcoma.

Īḡu mera soorā árĩrācoma. <sup>7</sup> Eropigū masa ĩḡu mera ōaro árĩburire erā ĩḡu mera sooburire apigū daja, “Dohpaguere āhraa,” arĩ apipū Goāmū. Israe masa Goāmūre erā tarinūgara pūhrū baja bojori pūhrū irire weredorepū Davire. Davi were gojarare mūare weretuhajaquereḡu wereḡura daja yūhū. Eropigū ōpa arĩ gojañumi Davi Goāmū wereniguirire:

Dohpagānūre yūhū Goāmū mūare yū werecū, tarinūgaro mariro ōaro yūhrique mūa yūre, arĩ gojañumi iribojeguerē.

<sup>8</sup> Ero coregue Josué Israe masare Goāmū ĩḡu ora yebague aĩ ejapū. “Yū mera soorā árĩrācoma,” arĩḡu iri yebague erā sooborore arĩḡu iibiripū Goāmū. Iri yeba soodoreḡu gajinū erā sooburire apibiriboñumi ĩḡu. <sup>9</sup> Seis nūri pūhrū i yebare ĩḡu iira pūhrū Goāmū ĩḡu mohmeduhu soodiropā ta mari ĩḡu yarā sā ĩḡu mera mari sooburiñe āhraa. ĩḡu mera mari ōaro árĩburiñe āhraa. <sup>10</sup> Eropigū Goāmū soogū, ĩḡu mohmerare duhcānipū. Eropā ta ĩḡu mera soorā mari gamero mera iirire duhcārāca. <sup>11</sup> Eropirā mari ĩḡu yarā ōaro iirā. Goāmū yare ōaro yūhrirā ĩḡu mera mari sooboro dopa. Iribojegue majarā mari acawererā erā tarinūgara pūhrū Goāmū mera majarā ne árĩmasibirimūriñorā erā. Erā iidiropā dopa iibiricārā mari.

<sup>12</sup> Goāmū ya wereniguirire marire Goāmū mera ōaro árĩniguicū iiaa. Ōaripūre marire gohrotocū iiaa. Eropiro ĩḡu ya wereniguirire bu árĩri árĩbeaa. Eropiro matamiji pepūripū usirimiji mera dirore erā wiri ĩha erā masiro dopa ta, ĩḡu ya wereniguirire mari árĩricūre mari pepirire ōaro masicū iiaa marire. Eropā masirā mari iiricūri ōaro árĩcū, ōaro árĩbircū sāre masia ĩḡu wereniguirire peerā. Iri mari buhecū mari árĩricūre ōaro masipehocū iiaa marire. <sup>13</sup> Ne Goāmūre mari árĩricūre mari iirare duhmasibeaa mari. Árĩpehrerire ĩḡu ĩhacūnugurare ĩḡu ĩhacūnugunirā sāre ĩhami ĩḡu. ĩḡu tamerare mari iirare mari pepirire werepehorāca mari.

### *Jesu turagū mari pahia opū āhrimi*

<sup>14</sup> Jesu Goāmū magū ĩḡu sīrira pūhrū ĩḡu Pagū pohrogue dujadigū árĩmi. ĩḡu turagū mari pahia opū āhrimi. Eropigū mari ya árĩburire Goāmūre serēbasami. ĩḡu eropā árĩḡu árĩcū ĩarā maripū ĩḡu yare ōaro yūhrirā árĩrā ĩḡure ōaro umupeoniguicārā.

<sup>15</sup> ĩḡu Jesucristo mari pahī árĩḡu mari ñero taricū ōaro mojomoro ĩagū āhrimi. Mari ñerire ũaribejarire masimi ĩḡu. Watĩ árĩpehreri ñerire ĩḡu marire iidorero dopa ta Jesu sāre ñerire iidoreripū. ĩḡu eropā iidorequerecū ĩḡu ñerire iibiripū. ĩḡu eropā ñerire iidorerire iidoredigū árĩḡu marire mojomoro ĩagū marire itamumasimi.

<sup>16</sup> Eropirā “Yūre yūhrigūcumī,” arĩrā Goāmūre serērā. ĩḡu marire mahimi. Eropigū mari ĩḡure serēcū marire mojomoro ĩagū marire itamugūcumī. Eropigū mari ñero iidiacū sāre ĩḡu marire itamugūcumī.

## 5

<sup>1</sup> Árĩpehrerā pahia oparā, masa mera majarā āhrima. Beyenirā āhrima erā mera majarā yare Goāmūre serēbasamorā. Eropirā masa ñerire erā iira dipuwajare Goāmūre serēbasama erā mera majarāre. Eropā serēbasarā waibūḡure wejē soe mujuma Goāmūre. <sup>2</sup> Pahia oparā gajirā masa iro dopa ōaro masipehobirā āhrima. Gajisubū ōarire iibirā āhrima erā sā. Eropā masibirā árĩrā gajirā masibirāre itamumasima nijiyajaro mera. Eropirā ōarire iibirā sāre ōaro mera itamumasima. <sup>3</sup> Eropirā ōaro masipehobirā ñeri iira dipuwajacūrā āhrima erā sā. Eropirā erā basi erā ñerire erā iira dipuwaja waibūḡure wejē soe mujuma Goāmūre. Gajirā masa ya árĩburire erā ñeri iira dipuwaja erā serēbasadiropā dopa ta, erā basi erā ya árĩburi sāre serēma Goāmūre.

<sup>4</sup> Eropigū ĩḡu ĩḡu gamero pahia opū ñajabeami. Goāmūpū ĩḡure beyegū, pahia opū acumi. Iribojegue majagū Aarō mūrūre ĩḡu apidiropā dopa ta gajirā pahia oparā sāre

apimi ĩġu. <sup>5</sup> Eropa ta Cristo sã ĩġu basi ĩġu gamero pahia opu ñajabiripũ. Goãmũpu ĩġure opu acugũ õpa arĩpu:

Yũ magũ ãhraa mũhũ. Dohpagãre mũre dehyoacũ iiabu yũhũ, arĩpu Goãmũ.

<sup>6</sup> Gajisubũ õpa arĩpu Goãmũ Cristore:

Árĩpehrerinũre pahi árĩniguicãgũca mũhũ. Melquisede ĩġu árĩdiro dopa ta pahi árĩniguicãgũca mũhũ, arĩpu ĩġu magũre.

<sup>7</sup> Cristo i yeba árĩġũ burigã gaguinigui, co deco mera Goãmũre turaro serẽpu ĩġu, “Yũre masuque,” arĩġũ. Mari Pagũpu Goãmũpu ĩġure sĩridigũre masumasigũ árĩpu. ĩġu eropa serẽcũ Goãmũ peepũ ĩġure. Goãmũ gameri dihtare ĩġu iidiacũ ĩagũ Goãmũpu ĩġu serẽrare peegũ yũhrĩpu. <sup>8</sup> Eropĩġũ Cristo Goãmũ magũ árĩqueregũ ñero tarĩpu ĩġu. Eropa ñero tarĩġũ yũhrĩpu Goãmũre. Eropa yũhrĩġũ õaro yũhrĩre masituhapũ. <sup>9</sup> Eropa yũhrĩdĩġũ crusague sĩrĩġũ masa erã ñerire cãdijĩġũ árĩpehrerã ĩġure yũhrĩrãre taubũ warũ. <sup>10</sup> Eropĩġũ Goãmũpu ĩġure pahia opu masa yare serẽbasabure apĩpu. Eropĩġũ Melquisede pahia opu ĩġu árĩdiro dopa ta ãhrĩmi Cristo.

### *Cristo yarã ĩġure umupeo duhucã ġũhya ãhraa*

<sup>11</sup> Baja õpa árĩrĩre mũare werenemodiaa ġũa. ġũa eropa werenemodiaquerecũ ta mũapũ peediabirã ãhraa. Eropirã mũare ġũa werecũ mmasumasigũ árĩpu. ĩġu eroasiya mara. <sup>12</sup> Yoari boje Cristo yarã árĩraa mũa. Eropa árĩrã dohpaguere gajirãre buherãgue árĩboca mũa. Mũa eropa árĩbonirã árĩquerecũ ta gajirã mũapũre buherãcoma. Goãmũ yare mũare buhemũhtarare mũare buhero ġahmea daja. Ne buhenũgarã iro dopa ta ãhraa mũa. <sup>13</sup> Apĩco mihrirã majirãġã árĩnima. Erã iro dopa ta mũa sã ãhraa õaro masibirã árĩrã. “I ñeri ãhraa. Ipu õari ãhraa,” arĩ ĩha masibea mũa. <sup>14</sup> Barire barãpu mũrã ãhrĩma. Erã iro dopa árĩrã õaro buhenirã õaro pepi masirã mũa árĩcũ õaboaya. “I ñeri ãhraa. I õari ãhraa,” mũa arĩ ĩha masirã árĩcũ õaboaya.

## 6

<sup>1-2</sup> Eropirã Goãmũ yare õaro masirã, õaro yũhrĩrã árĩrã. Cristo yare negohraguere buhenũgarã õpa masinũgabũ mari: Mari gamero mera mari iiri duhpiburi árĩbeaa. Mari iiri mera tarisome mari. Tarimorã Goãmũre umupeoro ġahmea marire. Ire negohraguere buhenũgama marire. Eropirã marire waĩyema. Mojotorire marire erã duhpeorire buhe, sĩrinirã erã masa mũriborore buhe, i mũmũ pehrera pũhrũ Goãmũ ĩġu dipuwaja moaborore buhe, ĩġu dipuwaja moamorã erã ñero tarĩniguiboro sãre buhe, i sãre marire negohraguere buhenũgama. Eropa árĩri buherire mari masituhajarare buhenemobirã gajĩ buherire õaro buhenemorã. <sup>3</sup> Eropirã Goãmũre, ĩġu ya sãre masinemorã. Goãmũ ĩġu gamecũ eropa ta iirãca mari.

<sup>4</sup> Goãmũ yare masinirã irire duhurãre ne dipaturi erãre erã ñeri iirare erãre bujawerecũ iimasiya mara daja. Eropa árĩrã, Cristo ĩġu taunirã árĩrã Espĩritu Santore oparima. <sup>5</sup> Eropirã Goãmũ ya wereniguirire peerã õari wereniguirĩ irĩ árĩcũ masirima. Eropirã pehrerĩnũ pũhrũgue Goãmũ ĩġu turari mera mari eropa árĩniguiborore, masare ĩġu dipuwaja moaboro sãre erã masirima. <sup>6</sup> Eropa árĩrã Cristo yare erã duhurã Goãmũ magũre dipaturi crusague erã pabiadiro dopa ta ĩġure iirã iima. Erã eropiicũ ĩarã gajirã masa Cristore wereyama. Eropirã dipaturi erãre, erã ñeri iirare erã bujawere õarire gohrotocũ iimasiya mara. <sup>7</sup> Õpa ãhraa irĩ mari werenigui queori mera buhecũ: Õari yebare wũaro deco aricũ erã oteri õaro puhri dũcacũa. Eropĩġũ irĩ pohe opu dũcare opami ĩġu baburire. Iri yeba õari yeba árĩcũ ĩha mucubirimi. Eropa ta Goãmũ iimi ĩġu yare peenirã sãre. Erã ĩġu yare õaro iicũ ĩha mucubirimi erã mera. <sup>8</sup> Gajĩ yebapũ añapora mera, taa mera irĩ yeba tiaro

duhpihuri yeba árĩbeaa. Eropa árĩri pohere cóãcãro gahmea. Eropa ta Goãmũ iimi ìgũ ìgũ yare peequererã iibirãre. Erãre dipuwaja moa peamegue cóãgũcumi.

*Cristore eropa umupeoniguirãre taumi Goãmũ*

<sup>9</sup> Yũ mahirã, mũare eropa arĩ werequeregũ ta mũapũre “Cristore duhuristo yare erã duhurã Goãmũ mã ãhraa,” arĩgũ iibeaa. Mũapũ Cristo ìgũ taurã ãhraa. Eropirã òarire iirã iica mũa. Irire masia yũhũ. <sup>10</sup> Mari òaro iira waja Goãmũ queero marire òaro iigũ ãhrimi. Eropigũ ìgũ ya árĩburire mũa turaro mohmerare cãdijisome ìgũ. Mũa ìgũre mahirã ìgũ yarãre itamuabũ mũa. Dohpague sãre erãre itamuniguia mũa. Ìgũre mũa eropa mahirare cãdijisome ìgũ. <sup>11</sup> Mũa ojocarinigucãropẽ gajirãre mũa umupeocũ, mũa itaisto yare erã duhurã Goãmũ mmuniguicũ sãre gahmea gũa. Mũa eropiicũ ìagũ òaro iigũcumi mari Pagũ mũare. <sup>12</sup> Eropirã mũa tericũrã árĩcũ gamebeaa gũa. Gajirã Cristo yarã ñero tariquererã Goãmũre “Ìgũ diaye ta arĩgũ ãhrimi,” arĩ umupeonigucãma. Erã eropiicũ ìagũ Goãmũ “Masare òarire ogũra,” ìgũ arĩdiro dopa ta erãre opehogũcumi. Eropirã mũa sã erãre ìhacũrã erã iro dopa ta iiniguicãque.

<sup>13-14</sup> Iribojegue Goãmũ Abrahãre òpa arĩ apipũ: “Yũ waĩ mera diaye ta ire arĩgũ iiaa mũre. Mũre òaro iigũra. Eropigũ mũ pãramerã arĩturiarãre bajarã masa árĩcũ iigũra,” arĩ werepipũ Goãmũ. Eropa arĩ werepigũ ìgũ ya waĩ mera waĩpeopũ. Gajigũ ìgũ tauro arĩgũ ne maricũ ìgũ ya waĩ mera eropa waĩpeopũ. <sup>15</sup> “Mũre òaro iigũra,” Goãmũ ìgũ arĩ apirare Abrahãpũ òaro ìgũ umupeoyura pũhrũ Goãmũ ìgũ arĩdiro dopa ta ìgũre òaro iipũ. <sup>16</sup> “Goãmũ mera diaye arĩgũ iiaa,” masapũ arĩrã, erã erã tauro arĩgũ waĩ mera waĩpeorã iima. “Goãmũ mera diaye arĩgũ iiaa yũhũ,” yujugũ ìgũ arĩcũ gajigũ peegũ “Diaye ãhraa,” arĩgũcumi. Dũyasomasibeami. <sup>17</sup> Eropigũ Goãmũ Abrahãre “Mũre òaro iigũra,” arĩ apigũ “Yũ waĩ mera diaye ta arĩgũ iiaa,” arĩ waĩpeopũ. Ìgũ eropa waĩpeo wererare peerã “Diaye ta ãhraa iri,” arĩ masia. Eropirã “Ìgũ arĩrare ne gohrotosome,” arĩ masia mari. Irire mari masiboro dopa ìgũ arĩ apira mera ìgũ waĩpeogũ eropa werepipũ. <sup>18</sup> Eropigũ ìgũ arĩ apira mera, ìgũ waĩpeora mera diaye ìgũ arĩrare masicũ iipũ Goãmũ marire. Eropiro ìgũ waĩpeocũ ìgũ arĩ apira ne gohrotosome. Eropigũ Goãmũ ne gũyabeami. Ìgũ eropa arĩgũ árĩcũ masirã, mari marire ìgũ tauborore mucubiri corerãca, “Eropa ta iigũcumi,” arĩrã. <sup>19-20</sup> Eropa ìgũ tauborore corerã guñaturarã ãhraa mari. Eropa arĩrã “Mari sĩrirã Goãmũ pohro warãca,” arĩ masirã gũibeaa. Pahia opũ Goãmũ ìgũ árĩri taribu gohrague ñajagũ, cãhmotariñe suhriro pohecague tariñajami. Eropa ñajagũ masa ya árĩburire serẽbasami Goãmũre. Ìgũ eropiidiro dopa ta Jesu sã umarogue Goãmũ arĩroque ñajamũhtadi arĩmi. Eropa ñajamũhtagũ mari sãre erogue ñajaburire ahmu serẽbasami. Eropigũ arĩpehrerinũri nũcũ serẽbasagũ iimi pahia opũ arĩgũ. Melquisede pahi ìgũ arĩdiro dopa ta pahia opũ ãhrimi ìgũ Jesu.

## 7

*Melquisede pahi ìgũ arĩdiro dopa ta Jesu pahia opũ ãhrimi, arĩ gojañumi*

<sup>1</sup> Melquisede iribojegue majagũ Salem waĩcũri maca majagũ opũ arĩmũripũ. Eropigũ pahi arĩgũ Goãmũ turagure umaro majagure masare serẽbasagũ arĩmũripũ. Eropigũ gajirã oparãre Abrahã gamewejẽtuha, ìgũ dujaricũ gohra, Melquisede ìgũ ya maca arĩdigũ waha, Abrahãre bocatĩripũ. Eropa bocatĩrigũ ìgũre serẽbasapũ Goãmũre: “Òaro iique ìre,” arĩ serẽbasapũ Abrahãre. <sup>2</sup> Abrahãpũ ìgũ gamewejẽ tarinũgara pũhrũ gajirã oparã yare aĩ dujarũ. Ìgũ eropa aĩ dujarare merogã duhapũ ìgũ Melquisedere. Diez ìgũ aĩ dujara árĩcũ yujuñe ópũ Melquisedere. Melquisede ìgũ waĩ mari ya mera arĩro “Tauro opũ òaro iigũ ãhrimi,” arĩdiaro iiaa. Eropigũ



Īgu Salem waĩcũri maca majarã opu ĩgu áricũ iri maca maja waĩre waĩcũpu. Salem waĩ õpa arĩdiaro iiaa: “Tauro opu masare õaro game mahicũ iigu áhrimi,” arĩdiaro iiaa. <sup>3</sup> Ne Melquisede pagu sumarãre, ĩgu core árimũhtanirãre, ĩgu acawererãre erã were gojatura mara. ĩgu masa dehyoarare, ĩgu sĩrira sãre were gojatura ne mara. Eropigu eropa árniguigu iro dopa árĩpu ĩgu. ĩgu eropa árĩgu áricũ Goãmu ĩgu magu ĩgu pahi ĩgu árĩrare marire buhemi. Melquisede pahi eropa árniguigu iro dopa ta áhrimi ĩgu Jesucristo Goãmu magu. ĩgu iro dopa ta Cristo sã pahi árĩgu eropa árniguicãgu áhrimi.

<sup>4</sup> Eropigu Melquisede turagu árĩrare guñaque. Abrahã mari ñecu muru opu gohra árĩqueregu ta Melquisedepure ĩgu duja aĩrare dũhapu. Diez ĩgu duja aĩra áricũ yujuñe õpu Melquisedere. Eropa ta ĩgu duja aĩ ĩgu dũharare õpu ĩgure. <sup>5</sup> Eropiro Moise ĩgu doreri mera árĩpehrerã gajirã Israe masare iripẽta wajayedorepu erã pahiare. Eropa doregu Levĩ pãramerã árĩturiarãre erã acawererã árĩturiarã erã wajayerire ñeadoregu apimurĩpu. Levĩ pãramerã ya curu majarã pahia dihta wamurĩnorã. Eropirã gajirã ya curu majarã sã Levĩ pãramerã mera Abrahã pãramerã árĩturiarã árĩmurĩnorã. Erã acawererã árĩquererã erã Levĩ pãramerãre wajayemurĩnorã. <sup>6</sup> Melquisedepu Levĩ pãrami árĩturiagu árĩbiriqueregu ta wajaseapu Abrahãre. Eropigu “Mure õaro iigura,” ĩgu Goãmu arĩ apidigu árĩqueregu Abrahãpu Melquisedere wajayeru. Eropigu Melquisedepu Goãmure Abrahãre serẽbasagu õaro árĩdoremurĩpu. <sup>7</sup> Õaro árĩdoregu Melquisedepu ĩgu õaro árĩdoredigu Abrahã tauro árĩpu. Irire mari õaro masia. <sup>8</sup> Mari mera majarã pahia marire merogã wajasearã mari iro dopa ta masa áhrima. Eropa árĩrã sĩrimorã ta áhrima erã sã. Ihĩ Melquisedepu iribojegue Abrahãre merogã wajaseadigu eropa árniguigu iro dopa áhrimi ĩgupu. “ĩgu sĩria wañumi,” arĩ werera ne mara. Eropa ta áhraa Goãmu yare erã gojarapũgue. <sup>9</sup> Dohpague majarã Levĩ pãramerã árĩturiarã pahia árĩrã masare merogã wajaseamurima. Eropa árĩrã erã árĩquerecũ ta Abrahã erã ñecu árĩgu Melquisedere merogã wajayegu árĩpehrerã Levĩ pãramerã ya árĩburi sãre wajayebasagu iimurĩpu. Eropirã Levĩ pãramerã sã Melquisedere wajayenirã iro dopa áhrima. <sup>10</sup> Melquisedere Abrahã ĩgu wajayerasubure Levĩpu masa dehyoanibirĩpu dohpa. Eropa masa dehyoabiriqueregu ta ĩgu ñecu Abrahã dũpũgue ĩgu árĩbodiropu dopa ta Levĩpu árĩtuhagu iipu. Eropigu Melquisede Abrahãre ĩgu bocatĩricũ Levĩ sã ĩgu ñecu mera ĩgu árĩboro dopa árĩgu iipu. Eropa árĩgu Levĩ, ĩgu pãramerã mera Melquisedere merogã wajayenirã iro dopa árĩrã erã ĩgu doca árĩrã iĩnorã.

<sup>11</sup> ĩgu dorerire apigu Goãmu Aarõ pãramerã árĩturiarã Levĩ ya curu majarãre pahia árĩdoremurĩpu. Eropirã ĩgu doreri dorediro dopa ta erã pahia waimurãre soe mujurã masa ya árĩburire serẽbasamurĩnorã Goãmure. Erã pahia erã eropiiquerecũ masa Goãmu mera õaro wamorã árĩbirimurĩnorã dohpa. Erã pahia erã iira mera masa õarã wacũ Goãmu erãre gohrotobure Cristore obeobiriboñumi. Eropigu ĩgu obeodigu marire Goãmu mera õaro áricũ iigu aridi árĩmi Cristopu. ĩgu Levĩ ya curu majagu Aarõ muru iro dopa árĩbirĩpu. Melquisede iro dopa árĩpu. <sup>12</sup> Eropigu pahiare gohrotogu, marire doreri sãre gohrotoro gãmemi ĩgure. Pahia erã itamuri mera mari taribiro dopa ta iri doreri mera mari taribea. Eropiro iri dorerire gohrotopohoro gãmemi. <sup>13</sup> Aarõ Levĩ sã, erã ya curu majarã dihtare pahiare acumurĩpu Goãmu ĩgu dorerire apigu. ĩgu eropa acuquerecũ ta dohpaguere mari Opure Cristore pahire Goãmu ĩgu acudigu gajĩ curu majagu áhrimi. <sup>14</sup> ĩgu mari Opu Cristo Judá ya curu majagu masa dehyoapu. Moise pahiare acugu, Judá ya curu majarãre ne acubirimurĩpu. Irire õaro masia mari.

<sup>15</sup> Ire masirã, õpa mari õaro masia: Dohpaguere ne ĩgu acudigu pahi Cristo

Melquisede iro dopa árĩgu āhrimi. <sup>16</sup> Iribojegue maja doreri dorediro dopa ta Leví ya curu majarā dihta pahia ñajamuriñorā. Jesucristopu Goāmũ ne ĩgu acudigu gajirā pahia erā iro dopa pahi ñajabiridigu árĩmi. ĩgu Goāmũ turari mera árĩpehrerinuri árĩgu āhrimi. Eropigu iri turari mera pahi ñajadi árĩmi ĩgu. <sup>17</sup> Ōpa āhraa Goāmũ yare weremũhtanirā erā gojarapũgue:

Árĩpehrerinurire pahi árĩniguigũca mũhu. Melquisede ĩgu pahi ĩgu árĩniguiddiro dopa pahi árĩniguicāguca mũhu, arĩpu Goāmũ ĩgu magũre, arĩ gojañuma iribojeguere.

<sup>18</sup> Goāmũ ĩgu doreri Moiserẽ ĩgu apimũhtara doreri turari árĩbiribu. Eropigu iri dorerire duhucādi árĩmi Goāmũ. <sup>19</sup> Moiserẽ ĩgu apira doreri mera ne ōaro tariburire opabirimuribu mari. Eropigu dohpaguepũre Goāmũ marire ĩgu tauborore marire apidigu árĩmi. ĩgu eropiicũ dohpaguere ĩgu pohrogue wamasia mari. Eropirā ĩgu mera wereniguimasia.

<sup>20</sup> Eropigu Cristore pahi acugu, “Yũ waĩ mera mũre acugu iiaa,” arĩpu Goāmũ. Gajirā pahia ñajacũ ĩgu iro dopa waĩpeo acubiripu erāre. <sup>21</sup> Cristopu ĩgu Pagu waĩ werepira mera pahi ñajapu. Ōpa arĩ werepiru ĩgu Pagu Cristore:

Yũhu mũ opu yũ waĩ mera mũre weregu diaye weregũra. Eropigu ire ne gohrotoro mariro werea mũre. Árĩpehrerinurire pahi árĩniguicāguca mũhu, arĩ werepiru Goāmũ ĩgu magũre.

<sup>22</sup> Eropu werepigu mama buherire marire apigu, marire ĩgu tauborore apigu iipu. Iribojegue maja doreri tauro mari ōaro árĩborore apigu iipu. Eropigu Goāmũ masare “Ōaro iigũra,” ĩgu arĩdiro dopa ta iibu, Jesure obeodigu árĩmi marire taubure.

<sup>23</sup> Árĩmũhtanirā pahia erā sĩricũ ĩarā gajirā gohroto ñajamuriñorā daja. Eropirā erā bajarā pahia wañorā. <sup>24</sup> Jesupu eropa árĩniguicāmi. Eropirā ĩgũre gohrotorā ne marima pahia. <sup>25</sup> Eropigu ĩgu eropa árĩniguigu, Goāmũre eropa serēbasaniguicāmi ĩgu ĩgu yarā ya árĩburire. Eropigu Goāmũ mera erā eropa árĩniguiboro dopa masare taumasimi ĩgu. Árĩpehrerā ĩgũre umupeorā Goāmũ pohrogue warāca. Eropigu Jesu āhrimi mũputu marire taubu.

<sup>26</sup> Eropigu Jesu āhrimi mari pahia opu. ĩgu tamerare bũrigā gahmea mari. Ne ñeri dipuwaja marigu āhrimi ĩgu. Eropigu masa iro dopa ñerire iibiridi árĩmi. Eropigu Goāmũ ĩgũre ñerā watope arĩdigũre aĩgu, umarogue api, árĩpehrerā gajirā tauro árĩgu opu acupu. <sup>27</sup> Gajirā pahia iro dopa árĩbeami ĩgu. Erāpu mũuri nũcu waibũgũre wejẽ, soe muju serēmũrima Goāmũre masa ñeri iira dipuwaja cādiidorerā. Erā basi erā ñeri dipuwajare serēmũhtamũrima. Pũhru gajirā ñeri dipuwaja sãre serēbasamũrima erā. Eropirā erā bajasuburi eropa Goāmũre serēbasamũrima. Jesupu pahi árĩgu, yujusubu ta masa ñeri dipuwajare Goāmũre serẽpu. ĩgu waibũgũre wejẽbiri ĩgu basi sĩridigu árĩmi mari masa ñeri iira dipuwajare taubu. <sup>28</sup> Goāmũ doreri Moiserẽ ĩgu apira mũra pahia oparā ñajadorea. Eropu erā ñajaquererā, ñeri marirā árĩbeama pahia ñajarā. Iri doreri pũhru Goāmũ ĩgu magũre pahire acugu “Diaye ta pahi árĩniguicāguccumi,” arĩ acupu. ĩgũpu ñeri mariro eropa árĩniguicāmi.

## 8

*Goāmũ masare “Mũare taugũra,” arĩ apipu daja ĩgu Moiserẽ arĩ apirare gohrotogu. ĩgu mama apirare werebasagu āhrimi Jesu*

<sup>1</sup> Iri árĩpehrerire arĩ wererā i tamerare mũare arĩrā iiaa: Mũare gũa weredigu pahia opu ĩgu tamera mari yagu gohra āhrimi. Mari ya árĩburire Goāmũre serēbasagu ta āhrimi. Ūmarogue Goāmũ turatarigu ĩgu opu doaro pohro ĩgu

diayeru doami igu Cristo mari pahia opu. <sup>2</sup> Eropigu Goamu wihi i yeba maja wihi, masa era iira wihigue mohmebeami. Umarogue ariri wihire mari Opu igu iira wihire Goamu ya ariburire mohmebasami. Iri wihi tamera Goamu ya wihi gohra ahraa.

<sup>3</sup> Eropira aripehrera i yeba majara pahia opara waimura weje soe muju Goamure omurima masa nero iira dipuwajare cadidorerara. Eropa ta iimora apidigu arimi Goamu. Eropigu mari yagu pahi Cristo sare apigu Eropa ta iidorepu. Eropigu mari neri iira dipuwajare Jesucristo igu basi siridi arimi. <sup>4</sup> Moise doreri doreldo dopa ta i yebague pahia masa era neri dipuwaja coburire mohmebasama. Eropira i yebague pahia arituhama. Era Eropa arituhajacu Jesupu mari yagu pahi i yeba ariniguigu, pahi aribiribonumi igu. <sup>5</sup> I yeba majara pahia era mohmerire i yeba maja wihi ta Goamu wihi mohmera arituhajama. Goamu wihi gohra umarogue ahraa. Eropiro Goamu wihi i yeba maja wihi umaro maja wihi ihacu iira wihi ahraa. Eropigu Moise iri wihire i yeba maja wihire igu moaboro corega Goamu opa aripu igure. "Utugue arigu mare ya ihmudiro dopa ta yaha wihire opa iique. Yuhu doreldo dopa ta yaha wihire queoro iique," arimuripu Goamu igure. <sup>6</sup> Dohpaguepure Jesu pahi arigu igure apira mohmeri i yeba majara pahia mohmeri tauro oaro ahraa. Bu gohra aribeaa. Goamu masare "Cristo mera mare oaro igura," igu ar apira iribojegue maja doreri Moise doreri tauro oari ahraa. Marire igu ar were apira iri doreri tauro marire oaro aricu iiroca. Eropigu marire Goamu mera amubasagu arigu, Cristopu gajira tauro pahi ahrimi.

<sup>7</sup> Negohrague Moise dorera mera mari Goamu mera oamasibirimuribu. Iri doreri mera mari oacu gaji buherire apibiribonumi Goamu. Iri doreri mera mari oacu, "Cristo mera mare oaro taugura," ar werebiribonumi marire. <sup>8</sup> Iri dorerire era bocatubirirare weregu opa aripu igu yarae Israe masare:

Opa araa yuhu mua Opu: "Oaro peeque. Puhrague gaji buherire weregura yaharare Israe masare, Judá ya curu majara sare. <sup>9</sup> Iri buheri era necu sumarae erae werepira iro dopa ne arisome. Yu basi erae Egipto yebague arinirare wiugu erae werepiribu. Yu Eropa ar werepirare tarinugama era. Era eropiacu igu negohrare erae ya wererare duhucabu. <sup>10</sup> Eropigu puhrague Israe masare opa ar weregura: Yu dorerire erae guñacu igura. Erae ya dorerire yuhridiacu iguca. Eropigu ya Goamu era opu arigura. Eropira erapu yahara masa ariracoma, ar weregura. <sup>11</sup> Eropira irisubure era mera majarae era acawererae ne era opa era basi game arisome: 'Dohpaguere mari Opure Goamure masique mua,' ne ar game buhesome. Era aripehrera yure masituharacoma. Majiraga, mura sa yure masira dihta ariracoma. <sup>12</sup> Eropigu era neri iirare cadijiguca yuhu. Eropigu erae dipuwaja moasome yuhu," araa yuhu mua Opu, aripu Goamu igu ya wereniguri era gojarapugue.

<sup>13</sup> Eropa arigu mama buherire apigu, iribojegue maja dorerire duhucu igu iimi. Eropiro mura doreri igu duhucu iira puhru iri doreri mura gohrotopehrea waro iiaa.

## 9

### *I yeba maja taribure umaro maja taribu sare Goamure umupeori taribure werepu*

<sup>1</sup> Negohraguere Goamu igu dorerire Moiser apigu masa igure umupeoburi sare werepiru. Eropigu Goamure era umupeoburi wihi sare iidore apipu. <sup>2</sup> Iri wihi waimura gasiri wihi ariyoro. Pe taribu opayoro. Wuri taribu era najamuhari taribu Goamu ya taribu waicyoro. Iri taribure era sihagori yuca duhpeodigu ariyoro. Eroparicu mesa sa ariyoro. Iri mesa weca Goamure era ori pan peyayoro. <sup>3</sup> Gaji taribu suhri mera era cahmotara taribu ariyoro. Iri taribu Goamu igu ariri taribu gohra waicyoro. <sup>4</sup> Iri taribugue oro mera era iira mesa, incienso era soeri mesa ariyoro. Eropiro oro oari mera era sura comoro ero oyayoro. Iri comoro waicyoro

Goãmũ arĩ werepira gojara dicuri comoro. Iri comoro pohecague dicũyoro. Yuju coro oro coro dicũyoro. Īgũ masare ejorañegã mana waĩcuriñegã dicuri coro arĩyoro. Eropiro iri comoro pohecague Aarõ yagũ Īgũ tuadigũ pũcũdigũ arĩyoro. Eropiro pemiji utãmiji Goãmũ Īgũ doreri Īgũ gojatura mijiri iri comoro pohecague dicũyoro. <sup>5</sup> Iri comoro weca perã anyua wéanirã árĩñorã. Erã wéanirã Goãmũ Īgũ gosesiriri mera, “Iri taribure Īgũ àhrimi,” arĩ werero iiyoro. Iri comoro buariñe erã quẽdupuri mera buasũyoro. Iri comoro buariñe weca masa ñero erã iira dipuwajare cãdijidoregũ waimurã di Goãmure erã orare wejèsiripeopũ pahĩ opũ. Iripẽta weregura i wihi majare dohpaguere.

<sup>6</sup> Eropirã iri wihire eropa erã õaro erã amura pũhrũ pahia umuri nũcũ erã ñajajamũhtari taribu erã mohmerire iimuriñorã. <sup>7</sup> Eropigũ pahia opũpũ dihta gajĩ taribuguerẽ ñajapũ. Bojori nũcũ Īgũ iri taribure yujusubu ta ñajapũ Īgũ. Eropa ñajagũ erã wejẽdigũ waibugũ dire aĩ ñajagũ, Goãmure umupeopũ. Iri di mariro ne ñajabiripũ. Īgũ basi Īgũ ñeri iira wajare, árĩpehrerã gajirã Israe masa erã ñero iira dipuwaja sãre cãdijidoregũ dire aĩ ñaja apimuripũ Īgũ Goãmure. <sup>8</sup> Árĩpehreri i mera Espĩritu Santo marire õpa arĩ buhebu iimi: Iri wihi Moisere Īgũ apira wihigue Goãmure umupeoburi árĩrisubu masapũ Goãmure umupeorã iri wihigue ñajamasibiriñorã. Pahia opũ dihta Goãmũ Īgũ árĩri taribu gohraguere ñajamasimi masare serẽbasagũ. <sup>9</sup> I árĩpehreri Goãmure umupeori wihi majare masare apira, marire dohpague majarã buheburi dihta arĩyoro. Pahia erã ñeri dipuwajare waimurãre wejẽra mera masa ne Goãmũ mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã. <sup>10</sup> Goãmũ Moisere apira doreri deyoro maja iiri dihta àhraa. Erã õpa baburi, erã õpa ihriburi, erã õpa coeburi, erã õpa iiri dihta arĩyoro. Eropiro iri doreri marire õarã wacũ iibiriyoro. Goãmũ iri dorerire masa erã iiburire apiñumi Cristo ariboro core.

<sup>11</sup> Dohpague Cristopũ mari pahĩ opũ árĩgũ arituhadigũ àhrimi. Eropigũ marire sĩribasara mera marire õarã wacũ iituhadi arĩmi. Eropigũ Goãmure mari ñeri dipuwajare cóãdoregũ Goãmũ árĩrogue ñajaja i yeba maja taribure ñajabiripũ. Umaro maja wihi ñajapũ. Iri wihi i yeba maja wihi tauro àhraa. Eropiro masa erã iira wihi árĩbeaa. <sup>12</sup> Eropigũ Cristo umarogue Goãmũ Īgũ árĩro gohrague yujusubu ta mari ñeri dipuwajare ñajatupũ. Eropa ñajagũ cabritoa dire, wecũa dire Goãmũ árĩri taribugue erã aĩ ñajaro dopa iibiripũ Īgũ. Īgũ basi sĩrigũ Īgũ di gohrare cóãgũ árĩpehrerinuri Goãmũ mera mari õaro árĩniguicãborore iipũ. <sup>13</sup> Ñeri oparãre gũhraricũrãre coewearã erãre wejèsiripeomuriñorã cabritoa di mera, wecũa di mera, wecũare erã soera niti mera. <sup>14</sup> Eropa iĩñorã masa erã dupure ñerire coewea cóãrã. Iri tauro Cristopũ Īgũ di mera mari pepirigue mari ñerire õaro coewea cóãcãdi arĩmi. Iri ñeri dipuwaja oparã peamegue wabonirã árĩribũ mari. Jesucristopũ ñeri marĩgũ árĩgũ ta Īgũ basi crusague sĩrigũ Goãmure opũ. Espĩritu Santo eropa árĩniguigũ Īgũ itamuri mera eropa opũ Īgũ Īgũ basi. Eropigũ Īgũ mari ñerire Īgũ coeweadĩ arĩmi, Goãmũ ojocarigũ ya árĩburire mari õaro iimasiboro dopa.

<sup>15</sup> Eropigũ “Õpa mũare õaro iigũra,” Goãmũ arĩ Īgũ mama werepidiro dopa ta Cristopũ iidigũ arĩmi. Eropa iidi arĩmi Īgũ Goãmũ Īgũ beyenirãre taubu. Īgũ eropa taucũ árĩpehrerinuri Īgũ mera õaro árĩrãca mari Īgũ yarã. Eropirã Goãmũ Īgũ yarãre Īgũ oburire oparãca mari. Moise doreri dihta árĩcũ masa erã ñeri iira dipuwajacurã árĩmuriñorã dohpa. Eropa ñeri iira dipuwajacurãre taubu Īgũ crusague sĩribasadi arĩmi. Īgũ eropa sĩricũ mari Īgũ yarãre Īgũ oburire oparãca. <sup>16-17</sup> Õpa àhraa mari masare. Yujugũ Īgũ sĩriboro core Īgũ acawererã Īgũ yare aĩ gueremasibeamã. Eropiro Īgũ oparire Īgũ acawererãre Īgũ oburire Īgũ gojatuyurapũ Īgũ sĩriboro core iripũ wajacubeaa dohpa. Īgũ sĩricũ ñarã iripũ Īgũ arĩ gojadiro dopa



ta ĩgu yare guererãcoma erã. <sup>18</sup> Eropa ta Goãmũ masare werepimũhtara Moiserẽ ĩgu apira doreri sĩriro mariro di cóãro mariro ne duhpiburi árĩbiriyo. Eropigu wabũgu dire Moise wejẽsirira pũhrũ ĩgu dorerire diaye ta iigu iipũ. <sup>19</sup> Eropigu õpa iimũhtapũ Moise: Goãmũ ĩgu apira dorerire masare werepehopũ. Pũhrũ cabritoa dire, wecua dire deco mera morepũ. Eropigu isopo waĩcũdigũ dupũ mera oveja poari diari poari mera erã ñimurare turãpũ. Iri dupũ mera dire yosogu, Goãmũ dorerire ĩgu gojarapũ weca wejẽsiripũ. Árĩpehrerã masa weca sãre wejẽsiripeopũ. <sup>20</sup> Eropa iigu õpa arĩpũ ĩgu: “Goãmũ marire ĩgu werepira ĩgu dorera i di mera iri diaye árĩcũ masia mari. I dire ĩarã diaye ta ĩgu arĩdiro dopa ta ĩgu marire iiburire masia. Maripũre irire yũhridoremi,” arĩpũ Moise. <sup>21</sup> Eropigu masare ĩgu iidiro dopa ta Goãmũ umupeori wihi waimurã gasiri wihire, árĩpehreri iri wihi árĩri sãre wejẽsiripeopũ. <sup>22</sup> Eropa ta ãhraa. ĩgu doreri iri dorediro dopa ta baja ñerire di mera coeweadoreyo. Eropigu di cohoro mariro Goãmũ mari ñeri iirare ne cãdijisome.

*Cristo ĩgu dire cóãgu, ĩgu yarã erã ñeri iirare coewepũ*

<sup>23</sup> Eropiro i yeba maja wihire, iri wihi árĩri sãre ñerire coewearo dopa ta waimurã di mera wejẽsiripeomuripũ. Eropiro iri tauro umarogue wamorãre erã ñeri dipuwaja oparare coero gahmea. Eropiro waimurã di tauro árĩgu ya di mera erã ñerire coero gahmea. Eropirã Jesucristo ya di mera coenirã wabũ maripũ. <sup>24</sup> Eropigu Cristo mari ñeri iira dipuwajare Goãmũre cóãdoregu Goãmũre erã umupeori wihi masa erã iira wihire ñajabiripũ. I yeba maja wihi umaro maja wihi ĩhacũ iira wihi ãhraa. Goãmũ ya wihi gohra umaro maja wihi ãhraa. Eropigu mari ñeri iira dipuwajare cóãdoregu Goãmũ arĩro gohrague ñajapũ Cristo. Umarogue wapũ ĩgu Goãmũ core mari ya árĩburire serẽbasabu. <sup>25</sup> Pahia opũ bojori nucũ Goãmũ ĩgu árĩri taribugue erã ñeri iira dipuwajare cóãdoregu ñajamuripũ waimurã di mera. Cristopũ sĩrigũ ĩgu dire cóãdigũ Goãmũre mari ñeri iira dipuwajare cóãdoregu erã iiro dopa bajasuburi ñajabiripũ. <sup>26</sup> Bajasuburi ĩgu dire cóãbu árĩgu, i yeba árĩropẽ bajasuburi ĩgu ñero sĩriniguicãboñumi. Yujusubu ta dehyoapũ ĩgu i yebaguere i umũ pehrerinũ coregã. ĩgu dehyoagũ ĩgu yujusubu ta sĩribasara mera mari árĩpehrerã ñeri iirare cóãbu dehyoapũ. <sup>27</sup> Árĩpehrerã mari masa sã yujusubu ta sĩrirãca. Mari eropa sĩrira pũhrũ, õarãre, ñerã sãre beyegucumi Goãmũ. <sup>28</sup> Yujusubu ta mari sĩriro dopa ta Cristo sã yujusubu ta sĩripũ bajarã masa erã ñero iirare cóãbu. Pũhrũ dipaturi dujarigucumi. Mari ñerire cóãdigugue dujarigucumi. Eropigu irire dipaturi cóãgu arisome. Eropa arigu mucubiriri mera ĩgure corerãre taugu arigucumi. ĩgu pohrogu erãre aĩgãbu arigucumi.

## 10

<sup>1</sup> Moise doreri pũhrũ Cristo masare ĩgu õaro iiburire ĩhmura dihta árĩbũ. Eropiro Cristo masare erã ñeri iirare õaro cóãboro dopa iri doreri erã ñerire cóãmasibiriyo dohpa. Eropiro iri doreri iri iidorero dopa ta pahia bojori nucũ Goãmũre waimurãre wejẽ, soe muju, iiniguiquerẽcũ masa erã ñerire cóãmasibiriyo. Goãmũre umupeomorãre õarã árĩcũ iimasibiriyo iri doreri. <sup>2</sup> Iri mera masa erã ñerire cóãcũ, yujusubu ta Goãmũre erã waimurã wejẽ di cóãra pũhrũ erã ñerire cóãpehosũboñuma. Eropirã irisubu majarã, “Dipuwaja mara guare,” arĩ pepiboñuma masa. Eropirã iripẽta dipaturi Goãmũre waimurã wejẽburire duhcãboñuma. <sup>3</sup> Õabirimuriñorã dohpa. Eropirã bojori nucũ Goãmũre waimurãre wejẽ di cóãcũ masa erã ñeri dipuwajare guñaniguicãñorã. <sup>4</sup> Wecua di mera, cabritoa di mera ne mari ñeri dipuwajare cóãmasiya mariyo dohpa.

<sup>5</sup> Iri eropa árĩcũ ĩagu Cristo i yebaguere ĩgu ariboro core õpa arĩpũ Goãmũre ĩgu Pagure:

Waimuräre erã soe muju ocũ, trigo pogare erã ocũ sãre mu ãagu ãhasuabea mũhũ. Eropigu masa dehyoacũ iibu mũhũ yure. Mũhũ yure iira dũpu mure mucubiricũ yũ iiburi dũpu árĩroca. <sup>6</sup> Ñerire erã cóãborore waimuräre wejẽ erã soe mujucũ ãagu ãhasuabirabu mũhũ. <sup>7</sup> Mu eropa ãhasuabiricũ ãagu õpa arĩbu mure: “Mu gamerire yebague iigu wagura. Yũ eropiiburire arĩ gojara ãhraa mu yare erã gojarapũgue,” arĩbu yũhũ, arĩmuripu Cristo ãgu Pagure.

<sup>8</sup> Negohraguere Goãmũ ãgu doreri waimuräre trigo poga sãre erã ori mera erã ãgure umupeodorequerecũ ta õpa arĩpu Cristo ãgure. “Waimuräre soe muju erã ocũ, trigo pogare erã ocũ sãre gamebiribu mũhũ,” arĩpu ãgu. <sup>9</sup> Eropa arĩtuhaqu õpa arĩnemopũ: “Mu gamerire yebague iigu wagura,” arĩpu. ãgu eroparĩcũ õpa masia mari. Iribojegue Goãmure erã ñerire cóãdorerã waimuräre wejẽ di cóãrare gohrotogu iipu Goãmũ. Eropa gohrotogu Cristo ãgu sĩridiro mera masare erã ñeri dipuwajare taugucumi Goãmũ. <sup>10</sup> Jesucristo ãgu dũpũre ogu sĩrigu arĩpehrerã mari ñero iirare cóãdigu arĩmi. Yujusubu ta Goãmure ãgu dũpũre ogu marire dipuwaja maricũ iidi arĩmi. Eropa iigu Goãmũ ãgu gamediro dopa ta iidi arĩmi.

<sup>11</sup> Arĩpehrerã pahia umuri nucũ Goãmure umupeori wihi mohmeniguima. Eropa mohmeniguirã muraro ta waimuräre wejẽ soe mujuma Goãmure masa ñerire cãdijidoremorã. Erã eropa iiquerecũ ta erã ñero iirire cãdijibeami ãgu. <sup>12</sup> Cristopũ yujusubu ta mari ñeri dipuwajare sĩrigu, mari ñero iirare õaro cãdijipehocãcũ iidigu arĩmi. Irire cãdijipehocũ iituha waha wapũ ãgu Pagũ pohrogue ãgu diayepũ doagu wagu. Opũ arĩgu erogue doacumi. <sup>13</sup> Eroguere doagu coregu iimi. ãgure ãhaturirãre ãgu Pagũ ãgu tarinugabasaborore coregu iimi. <sup>14</sup> Yujusubu ta ãgu sĩridiro mera ãgu coenirãre õarã ñeri mariro erã arĩniguicũ iidi arĩmi. Eropigu Goãmũ pohro doami pare. <sup>15</sup> Jesucristo eropa iiboro core erã arĩ gojamũhtarare arĩ weremi Espĩritu Santo marire. Õpa arĩ weremi ãgu:

<sup>16</sup> Õpa arĩmi mari Opũ: “Pũhrũguere õpa arĩ weregũra Israe masare. ‘Yũ dorerire erã yũhridiacũ iigu erã pepirigue apigũra,’ arĩ weregũra,” arĩmi ãgu.

<sup>17</sup> Õpa arĩnemomi Goãmũ:

“Erã ñero iirare dipaturi guãanemosome yũhũ,” arĩmi ãgu, arĩ weremi marire Espĩritu Santo Goãmũ yare gojarapũgue.

<sup>18</sup> Mari ñeri iirare ãgu cãdijicũ dipaturi mari ñeri dipuwajare sĩribure gamebea mari.

*Goãmũ pohro mari ejaro dopa ta ãgu mera gũiro mariro mari wereniguimasia*

<sup>19</sup> Cristo ãgu sĩriro mera ãgu di cóãro mera mari sã dohpaguere gũiro mariro Goãmũ mera wereniguimasia. Eropirã ãgure serẽmasia. <sup>20</sup> Iribojegue Goãmũ ãgu arĩri taribugue Goãmure serẽbu pahia opu dihta ñajamasimi. Iri taribure Goãmũ arĩrore cãhmotara suhrirore ãgu dihta tari ñaja serẽmasimi. Dohpague ta mari basi Goãmũ arĩro ñajaro dopa ta Goãmure serẽmasia. Pahia opu ãgu iri taribugue ãgu dire aĩ ñajaro dopa ta Cristopũ Goãmũ pohrogue ejaqu mari ñeri iirare cãdijidoregu ejaqu. Eropa iigu Goãmũ mera mari wereniguibodirore cãhmotadirore cóãdi arĩmi. <sup>21</sup> Goãmũ pohrogue serẽbasagu mari Goãmũ yarã yagu pahia opu turatariagu ãhrimi Jesucristo. <sup>22</sup> Eropirã, yũ acawererã, Cristo mari pahia opu arĩcũ ãha mari Goãmũ mera wereniguimasirã arĩrã Goãmure serẽrã. Diaye pepirã arĩrã, “ãgu yũhriugumi,” arĩ umupeorã ãgure serẽrã. Cristo mari ñerire ãgu di mera coenirã ãhraa. Eropirã “Dipuwajacurã ãhraa,” arĩ pepirã arĩbea mari. Eropirã guhrari mariri deco mera coeweasũnirã iro dopa ãhraa. Eropa arĩrã Goãmure serẽrã. <sup>23</sup> “Mũare taugũra,” ãgu arĩdiro dopa ta iigucumi. Eropirã ãgu marire ãgu tauborore õaro mucubirimũhtayua mari. Irire mucubirimũhtayurã ne cãdijibiricãrã. Goãmure eropa guãaturaniguicãrã. Eropa guãaturãrã irire gajirãre wererã mari. <sup>24</sup> Mari

mera majarãre mahirã itamurã mari árĩpehrerã mari game mahi mari itamuboro dopa. <sup>25</sup> Eropirã òaro gamenererã Goãmure umupeomorã. Gajirãpũ gamenerebeama Goãmũ yare buhemorã. Erã iiro dopa iibiricãrã. Mari mera majarãre Jesucristore umupeonemocũ iirã. I yebaguere mari Opũ Ìgũ dujariboro merogã duhyaa. Irire masirã turaro itamurã mari mera majarãre, Jesu yarãre erã Jesucristore umupeorire.

<sup>26</sup> Diaye árĩri buherire mari masiquererã ta irire cóãrã ñerire mari eropa iiniguiçã, Jesucristo sĩrira mera mari ñerire cóãnemoboro ne mara. <sup>27</sup> Eropiro eropa iirãre guhyaro dujaa. Árĩpehrerã Ìgũre ìhaturirãre dipuwaja moagũ turaro ùjurogue cóãgũcumi Goãmũ erãre. Eropirã Ìgũ dipuwaja moaborore güirã dihta àhrima Ìgũ yare cóãnirã. <sup>28</sup> Moise dorerire tarinũganirãre dipuwaja moarã erãre wejẽmuriñorã. Ne mojomoro ìaro mariro wejẽmuriñorã erãre. Ùrerã erã ñero iirare weresãcũ peerã erã tarinũgarare masima. Ùrerã maricũ perã erã ñero iirare weresãcũ peerã erãre wejẽmuriñorã Goãmũ dorero dopa ta. <sup>29</sup> Erã iidiro tauro Goãmũ magũre ìhaturirã dipuwaja moasũmorã árĩrãcoma. Cristo Ìgũ di cóãro mera marire mari ñeri iirare cóãdi árĩmi Goãmũ. Ìgũ eropa cóãborore wereyupũ Ìgũ. Eropirã Ìgũ cóãnirã erã árĩquererã ta, pũhrũ Ìgũ di cóãrãre “Bu gohra àhraa,” arĩrã Ìgũ dipuwaja moamorã gohra árĩrã ta iirãcoma. Eropã árĩrã Espĩritu Santore ñero arĩ wereniguirã àhrima. Ìgũ erãre mahigũ àhrimi. Erã eropa ñero wereniguiçã ìagũ turaro dipuwaja moagũcumi Goãmũ erãre. <sup>30</sup> Goãmũ eropa iigũ árĩgũre masia. Goãmũ Ìgũ basi ta òpa arĩpũ: “Yũhũ àhraa dipuwaja moabu. Erã ñerire iira dipuwaja, dipuwaja moagũra yũhũ,” arĩpũ Ìgũ. Òpa arĩnemopũ: “Yaharãre ñero iirãre dipuwaja moagũra,” arĩpũ Ìgũ, arĩ gojañuma Ìgũ yare gojarapũgue. <sup>31</sup> Goãmũ ojocarigũ marire dipuwaja moacũ guhyataria.

<sup>32</sup> Iribojegue mũa árĩrãre guñaque mũa. Irisubure Goãmũ yare ne masinũgarã ñero tariquererã bajasuburi ñero tariquererã ne Ìgũ yare cóãbiribũ mũa. <sup>33</sup> Yujuyerisuburi masa erã ìhuro gajirã mũare ñero arĩ, ñero pabirama mũare. Eropirã gajirã Jesu yarãre erã ñero ìicũ ìarã erãre mojomoro ìabũ mũa. <sup>34</sup> Erã Cristo yarã erã árĩra waja erã peresugue árĩrãre mojomoro ìabũ mũa. Eropirã mũa yare erã emaquerecũ ta mucubiriri mera “Òaroca,” arĩmũribũ mũa. I yeba maja tauro òarire ùmarogũre mũa opaburire masimũribũ. Iri òari pehrebiriboro masibũ mũa. Irire masirã mũa oparire erã emacũ bujawerebiribũ mũa. <sup>35</sup> Eropirã irire guñatura duhubiricãque. Goãmure eropa umupeoniguiçãque. Mũa eropa iira waja mũare òaro iigũcumi. <sup>36</sup> Goãmũ yare òaro iiniguiçãro gahmea ne duhuro mariro. Goãmũ yare iirã bocatũuro gahmea. Eropã iirã árĩrã Ìgũ gamerire mũa iira pũhrũ Ìgũ “Mũare òpa ogũra,” Ìgũ arĩ apirare oparãca. <sup>37</sup> Òpa àhraa Goãmũ yare erã gojarapũgue:

Merogã duh, ñero pabirama mũare. Eropiryaa Cristo Ìgũ eraboro. Eropã eragũ mata erapurumujugũcumi. <sup>38</sup> Yaharã òarãpũ yũre umupeoniguiçãrãcoma. Eropirã yaharã árĩniguiçãrãcoma. Yũ mera eropa árĩniguirãcoma. Yahare cóãnirãpũre ìhasuasome yũhũ, arĩmi Goãmũ, arĩ gojañuma.

<sup>39</sup> Maripũ Goãmũ yare cóãrã árĩbeaa mari. Eropirã peamegue wamorã árĩbeaa mari. Goãmure umupeoa mari. Eropirã Ìgũ taunirã àhraa Ìgũ pohro wamorã.

## 11

### *Umupeorire wererũ*

1 Òpa àhraa umupeori: Goãmure umupeorã, marire Ìgũ òaro iiburire òaro masia. Ìgũre ìabiriquererã Ìgũre umupeorã “Diaye ta iigũ àhrimi,” arĩ pepia mari. <sup>2</sup> Iribojegue majarã Goãmure “Diaye ta iigũ àhrimi,” erã arĩ umupeocũ ìagũ ìhasuarũ Goãmũ.

<sup>3</sup> Goãmũ ïgu wereniguirire mera árïpehrerire ïhacũnugupũ. Eropigũ ïgu mari ïabirirare árïpehrerire mari dohpague mari ïari sãre ïhacũnugupũ. ïrre mari õaro masia Goãmũre umupeorã.

<sup>4</sup> Goãmũre umupeogũ Abelpũ cordero wejẽ, soe mujupũ Goãmũre umupeogũ. Eropa iigu ïgu tïgu tauro õaro umupeorũ ïgu Goãmũre. Eropigũ Goãmũ ïgu orare mucubiripũ. Eropa mucubirigu “Õagũ àhrimi,” arï ïapũ ïgu Abelre Goãmũre umupeogũre. Abel iribojegue sïridigu mũrũ árïquerecũ ïgu Goãmũre eropa ii umupeorare guñaã mari sã. Eropa guñarã. Goãmũre umupeoa mari sã.

<sup>5</sup> Enoco Goãmũre ïgu umupeocũ ïagũ mucubirimũripũ Goãmũ. Eropa mucubirigu ïgũre ïgu pohrogue aïmũriapũ. Eropa ta werea Goãmũ yare wereniguirire erã gojarapũgue. ïgu eropa aïmũriara pũhrũ masa ïgũre ne bocabiriñorã. ïgu eropa aïmũriadigu árïgu ne sïribiripũ. <sup>6</sup> Goãmũre umupeobirã ïgũre mucubiricũ iimasibeaã mari. Goãmũre serẽdiarã õpa ïgũre arï pepiro gahmeã marire. “Diaye ta ïgu Goãmũ gohra àhrimi. Eropigũ ïgũre mari umupeocũ marire õaro iimi ïgu,” arï pepiro gahmeã. Mari eropa arï pepibirã mari ïgũre serẽmasibeaã.

<sup>7</sup> Noé Goãmũre umupeogũ ïgũre ïgu wererare õaro yũhripũ. Pũhrũ erã ñero waborore Goãmũ ïgũre werecũ peegu õaro yũhripũ ïgu. Eropa yũhrigu wuadiru dohodiru iipũ ïgu acawererã dia miririñere tarimorã. Noé eropa umupeogũ árïgu i yeba majarã ñerã erã umupeobirirare, erã taribiriboro sãre ïhmugũ iimũripũ. Eropigũ ïgu umupeocũ ïagũ “Õagũ àhrimi,” arï ïamũripũ Goãmũ ïgũre.

<sup>8</sup> Abrahã sã Goãmũre umupeogũ ïgũre yũhripũ. Gaji yebaguere ïgũre ïgu oburi yebaguere Goãmũ ïgũre wadorecũ ïgũre yũhripũ. ïgu ya yebare wirigãgu ïgu masibiriri yebague ejarũ. <sup>9</sup> “I yebare mũre ogũra,” Goãmũ ïgu arïcũ peegu ïgũre umupeogũ iri yebague eja árïmerejarũ ïgu. Ero arïmerejaqueregu ïgu gaji yeba majagũ árïro dopa waimũrã gasiri wiri mera wihicũ curimũripũ mũrano árïbirinijagu árïgu. ïgu magũ Isaa sã ïgu pãrami Jacobo sã ïgu iiro dopa ta iimũriñorã. “Mũare i yebare ogũra,” arï weremũripũ Goãmũ erã sãre. <sup>10</sup> Eropigũ i yebare curigu macari iibirimũripũ Abrahã. Gaji macague Goãmũ ïgu árïri macague umarogue ïgu waborore coregu iipũ Abrahã. Iri maca Goãmũ iira macaũ. Eropigũ ïgu umupeocũ ï arïyoro. Eropigũ iri macare ne pehrebiriburi macare coregu iipũ.

<sup>11</sup> Goãmũre umupeogo Sara waicũgo, bũro gohra árïquerego porã marigo árïquerego ta porãcũpo. “Goãmũ ïgu arïdiro dopa ta iigũcumi,” arïgo ïgũre umupeogo porãcũpo. <sup>12</sup> Eropigũ Abrahã bũgu gohra árïqueregu ta porãcũpũ. Eropirã ïgu pãramerã árïturiarãgue bajarã wacãñorã. Necãre, imipa yerire mari queorã yujuro bojeya mariro dopa ta, ïgu pãramerã árïturiarã sãre queo bocatũya mariñorã.

<sup>13</sup> Árïpehrerã oã yũ werenirã mũrague Goãmũre umupeotuhajanirãgue sïriñorã. Goãmũ “Mũare ogũra,” ïgu arïrare opanibirãgue sïriñorã. Eropa opabiriquererã “Goãmũ ïgu arïdiro dopa ta pũhrũgue ogũcumi guare,” arï masiñorã. Eropa masirã mucubirimũhtañorã. Eropirã õpa arïñorã erã: “I yebague curirã àhraa. Gaji yeba majarã àhraa,” arïmũriñorã erã. <sup>14</sup> Eropa arïrã gaji yebare erã ya yeba árïborore corerã iñorã. ïrre õaro masia mari. <sup>15</sup> “Gaji yeba majarã àhraa,” erã arïrã iribojegue erã cóãra yebare guñarã iibirinorã. Iri yebague dujaa wadiarã dujaa waboñuma. <sup>16</sup> Õari yebapũre gahme corerã iñorã. Iri yeba umarogue àhraa. Erã eropa gahme corecũ ïagũ Goãmũre “Gũã opu àhrimi,” erã arïcũ peegu ne guhyasïribiripũ Goãmũ. ïgu pohro erã ya maca árïborore iibasatuhadi árïmi ïgu. Eropigũ guhyasïribiripũ.

<sup>17-18</sup> Goãmũ Abrahãre ïgu magũre Isaare wejẽ soe mujudorepũ. ïgũre ïadiagu eropa dorepũ, “¿Diaye ta yũre umupeori?” arïgu. Eropigũ Goãmũre umupeogũ ïgu arïdiro dopa ta iiripũ Abrahã. “Mũ magũ Isaa mera mũ pãramerã árïturiarãre



opaguca mahu,” Goamu igu aridiro ariquerecu igu magure wejebu iiripu Goamu dorero dopa ta. <sup>19</sup> “Yu magure Isaare yu wejecu Goamu igure masugacumi,” arı pepigu igure wejebu iiripu. Eropigu Goamu igure cahmota igure wejedorebiripu. Igu pagu igu eropa wejebu arıgu Isaa siribudigu arıpu. Eropigu siridi masadigu iro dopa arıpu igu. Eropigu Abrahã igure ojocarigu dipaturi opapu igure.

<sup>20</sup> Isaa Goamure umupeogu igu porare Jacobore, Esaú sare “Puhrugue Goamu mure oaro iigacumi,” arıpu.

<sup>21</sup> Goamure umupeogu Jacobo igu siriboro coregã wahganugaja igu tuadigu mera tuañanugaja Goamure serẽ umupeopu. Eropu serẽgu José porare umare “Goamu mure oaro iigacumi,” arıpu Jacobo.

<sup>22</sup> Goamure umupeogu José igu siriboro coregã Israe masa Egipto arıra erã wiriaborore weremhapu. Eropu erã wiriaborore masiyugu igu sirira dupu murarore aigadorepu igu porare.

<sup>23</sup> Goamure umupeora urerã abe gohra Moiserẽ dibunora igu pagu sumarã igu masa dehyoara puhru. Oagugã igu arıcu ıarã igugare dibunora. Iri yeba majagu tauro arıgu opu igu majirare wejedorerire tarinugarã igure dibunora erã. Erã erã opure guibiriñora. <sup>24</sup> Moiserẽ masudigo i yeba majarã opu mago arıpo. Eropu igo masudigu arıqueregu, Goamure umupeogu “Opu mago magu ahrimi,” erã arı piyucu gamebiripu igu Moise. Oparã mera majagu arıdiabigu Goamu yarã mera majagu arıdiapu. <sup>25</sup> Goamure tarinugadiagu arıgu igure masudigo pohrogue bajamenurıgã oaro arıboñumi. Eropu oaro arıbu arıqueregu igu Goamu yarã mera ñero tarıdiapu. <sup>26</sup> Eropigu Egipto majarã ya oarire tauro Cristo ya arıburire ñero tarıburire gamepu. Puhrugue Goamu igure igu oarire oborore masıgu ñero tarıdiapu. <sup>27</sup> Goamure umupeogu Egipto majagu tauro opu, igu mera igu guacu guibiripu. Eropu guibigu iri yeba arıdigu iri yebare cóacã waha wapu. Goamure ıabirıqueregu “Goamu arıcumi,” arı pepıpu igu. Eropıgu igu iıborore ne duhubiripu.

<sup>28</sup> Goamure umupeogu Moise Israe masare Goamu igu tauborore masıpu. Eropu masıgu Goamu igu doređiro dopa ta Israe masa erã disıpororire erã tura mijirire di mera wejẽsiri tuhdorepu. Eropu dorepu anyu masare wejẽgu erã masa tırare wejẽbodıgu Israe masa erã masa tırare wejẽbiriboro dopa. <sup>29</sup> Goamure umupeora Israe masa deco diariya waıcurıya deco watope arıri maha deco mariri maha tarıbujañora. Erã eropa tarıbujacu ıarã Egipto majarãpu erãre nurısiarã erãre ıhacu tarıbujanırã miri siria wañora.

<sup>30</sup> Goamure umupeora Israe masa Jericó maca sãriro, wuri sãriro purupu majısora curiñora. Siete nuri gohra iri macare majısora curiñora erã. Iri nucı nuri erã majısorara puhru iri sãriropu dijapehrea wayoro. <sup>31</sup> Iri maca majago uma mera ñero iidigo Rahab waıcugo Goamure umupeogo Israe masare itamupo. Iri macare erã cóaboro core bajamerãgã Israe masa erogue erã ñaja duhrıcu ıha igo erãre itamupo. Eropırã Israe masa iri maca majarãre Goamure tarınuganırãre wejẽpehoquererã ta igopure wejẽbiriñora.

<sup>32</sup> Gajırãre Goamure umupeonırãre werenemoboya yuhı. Eropu werediaqueregu ta bajarãre eropa Goamure umupeora sare were gojapehomasıbirıca yuhı. Gedeo, Baraca, Sanso, Jefte, Davi, Samue, Goamu yare weremhtanırã sã arıpehrerã yu werebonırã ahrima. <sup>33</sup> Goamure umupeora yujurãyeri gajı yebarıgue arıri macarı majarãre gamewejẽ tarınugañora. Eropırã gajırã diaye dorenırã arıñora. Gajırã Goamu erãre “Mure itamugura,” igu arıđiro dopa ta igu itamurire bocañora. Eropu igure umupeora yea erãre badiacu erãre erã babıricu iıñora erã. <sup>34</sup> Turaro ıjuri peameri arıquerecu ta ıjubiriñora erã Goamure umupeonıjarã. Gajırã erãre ñose wejẽdiacu duhrıgã wañora erã Goamure umupeora. Turabırã arıquererã Goamure umupeo, turarã wañora. “Goamure umupeora ahraa. Gamewejẽ turarã ahraa,”

eropa arĩrã árĩcũ gaji yebari majarã surara erã wejẽrã arirã ne yujuro bojebiriñorã. <sup>35</sup> Goãmure erã umupeocũ ãagũ yujurãyeri nome erã acawererã sĩricũ ãagũ Goãmũ erãre masupũ.

Gajirãpũre “Goãmure gamebircãque,” erã arĩ peresu iicũ erãpũ Goãmure duhubiriñorã. “Mũa Goãmure duhucũ mũare taurãca,” arĩñorã erãre. Erãpũ duhubiriñorã Goãmũ mera erã õaro masaborore gamerã. Eropirã erãre erã ñero iicũ sĩria wañorã. <sup>36</sup> Gajirãre Goãmure umupeorãre ñero arĩ wereya erãre tãramuriñorã. Eropirã gajirãre guburire, mojotorire diricãa peresu iĩñorã. <sup>37</sup> Goãmure umupeorãre ñerã utã mera dea wejẽmuriñorã. Gajirãre erã dupũre seroti mera wiritamuriñorã. Gajirãre ñoserimijiri mera ñose wejẽmuriñorã. Erãre Cristore cóãdorerã erã ñero iimuriñorã. Gajirã erãre ñero iicũ oveja gasiri mera, cabra gasiri mera suhricũrã mojomorocũrã árĩmuriñorã. <sup>38</sup> Erã õatariarã erã árĩcũ i yeba majarã ñerã erã mera majarã árĩbonirã árĩbeama. Wiri marirã arĩrã, masa marirogue utã yucũgue árĩgãri siaricãmuriñorã. Eropa árĩgãri siarirã utã yucũgue árĩri goberigue, yebague árĩri goberi sãre carĩgãri siaricãmuriñorã. <sup>39</sup> Oã árĩpehrerã Goãmure erã umupeocũ ãagũ mucubiripũ ãgũ. “Õaro iĩabũ mũa,” arĩpũ. Erã eropa õaro umupeoquerẽcũ Goãmũ erãre “Mũare taugũra,” ãgũ arĩdiro ejanibiriya dohpa. <sup>40</sup> Õpa arĩ pepipũ Goãmũ: “Oãre yaharãre, pũhrũgue arĩrã yaharã mera yujuro mera taugũra,” arĩ pepipũ. ãgũ eropa arĩ pepidiro dopa ta iigũcumi. ãgũ eropiicũ õatariaro árĩroca ero core ãgũ iidiro tauro.

## 12

### *Jesure eropa umupeoniguicãrã mari*

<sup>1</sup> Eropirã oãre yũ werenirãre bajarã Goãmure umupeonirãre, ñerire iibirinirãre masirã árĩpehreri ñero iirire duhucãrã mari sã. Õpa ãhraa mari queoriñe mera werẽcũ: Nũcũrĩre opagũ omari masũ turaro omamasibeami. Eropa ta mari Goãmũ gamerire iimasibea mari ñerire iicũ. Eropirã irire duhucãrã mari. Eropirã Goãmũ ãgũ gamero dopa ta õarire iiniguicãrã. <sup>2</sup> Eropirã Jesure eropa guñaniguirã. ãgũ ta ãhrimi marire umupeo guñaturacũ iigũ. Eropigũ marire umupeonemocũ sãre iimi ãgũ. Crusague sĩrigũ yujuro bojepũ. Pũhrũ ãgũ mucubiriborore masigũ crusague sĩripũ. Eropa sĩrigũ gũhyasĩribodigũ árĩqueregũ gũhyasĩribiripũ ãgũ. Eropa iira pũhrũ dohpaguere Goãmũ ãgũ opũ ãgũ doaro diayerũ doanijagũ ãgũ dorebu iimi.

<sup>3</sup> Ñerã masa ãgũre ñero erã iicũ yujuro bojepũ ãgũ. ãgũ eropa iidigũre guñaque mũa, mũa sã ñero tarirã “Yujuro bojebiriboca,” arĩrã. Irire guñaque mũa ãgũre umupeo duhuri arĩrã. <sup>4</sup> Ñerire mũa tarinũgaboro dopa Jesu iro dopa ñetariaro gohra tarinibea mũa. Ñerã mũare wejẽnibeama. <sup>5</sup> ¿Goãmũ mũare ãgũ porãre ãgũ wererare cãdijicãri mũa? Õpa arĩpũ ãgũ:

Yũ magũ, yũhũ mũre werẽcũ eropa pepicãbita. Yũhũ mũre turicũ peegu bũjawerebita. <sup>6</sup> Árĩpehrerã yũ mahirãre werea. Eropigũ árĩpehrerã “Yũ porã ãhraa mũa,” yũ arĩ ãarãre tarinũgadorebeaa. Eropigũ erã tarinũgacũ ãha erãre yũ porãre merogã dipuwaja moaa, arĩpũ Goãmũ.

<sup>7</sup> Ñero tarirã yujuro bojeque “Goãmũ yũre werẽgũ iimi,” arĩrã. ãgũ yare duhubiricãque. Goãmũ mũare ãgũ porãre merogã dipuwaja moagũ iimi. Erã pagũ sũmarã erã porãre eropa werema. Eropirã erãre dipuwaja moama. Eropa ta iimi Goãmũ sã marire ãgũ porãre. <sup>8</sup> Goãmũ árĩpehrerãre weremi. Goãmũ mũare ãgũ werebircũ ãgũ porã gohra árĩbeaa mũa. Eropirã ãgũ porã árĩbirã yujugũ majigũ ãgũ pagũre ãgũ masibiro dopa ta ãgũ weresũya marigũ árĩro dopa ta ãhraa mũa. Eropirã Goãmure “Yũ pagũ gohra ãhrimi,” arĩmasibea mũa ãgũ mũare werebircũ. <sup>9</sup> Mari

pagu sumará marire erã werecũ peerã erãre umupeoa mari. Mari pagu sumaráre mari umupeoro tauro umupeoro gahmea mari Pagu Goãmũ ìgu werecũ. Eropirã ìgure yũhriro gahmea marire. Eropa yũhrirã árìpehrerinuri ìgu mera árìrãca. <sup>10</sup> Bajamenurigã mari pagu sumará erã gamero dopa marire were dipuwaja moama. Goãmũpũ marire òaro weremi. Eropigu ìgu masiri mera marire dipuwaja moami marire òarã masadoregu. Eropa iimi ìgu marire ìgu iro dopa òarã mari árìboro dopa. <sup>11</sup> Marire ìgu dipuwaja moacũ mucubiribea mari. Mari bu bũjawerea. Eropa bũjawerequererã ta ìgu eropa dipuwaja moara pũhrũ òarã árìrãca mari. Eropirã ìgu wererire peenirã árìrã gajiropa iiro mariro òaro árìrãca.

*Goãmũ marire ìgu dorerire mari yũhribiricũ guhya àhraa marire*

<sup>12</sup> Eropirã guñaturabirã árìquererã ta Goãmũre òaro guñaturarã árìque. Ìgure duhubiricãque. <sup>13</sup> Òaro diaye maja mare mũa waro dopa ta pee gorowerero mariro òaro diaye ta Goãmũre yũhrique. Mũa eropiicũ ìhacũrã gajirã Jesu yarã gajiropa árìrãre iisome. Eropirã turabirã turarã warãcoma.

<sup>14</sup> Árìpehrerã masa mera òaro árìque gamequeãro mariro. Eropirã ñero iibiricãque. Ñeri marirã dihta mari Opũ Cristore ìarãcoma. <sup>15</sup> Òaro iique mũa. Goãmũ mũare ìgu itamucũ òaro yũhrique. Ñeri tiari iri oterire iri goroweoro dopa ta mũa sã Cristo yare duhu ñerire guñaniguibiricãque gajirãre goroweorã arìrã. <sup>16</sup> Ne nome mera ñero iirã árìbiricãque. Eropirã Goãmũ yare gamebirã árìbiricãque. Eropa árìgu árìpũ Esaú. Ìgu masa tìgu árìripũ. Eropigu ìgu pagu yare ìgu sìrira pũhrũ opabu árìripũ. Eropa árìqueregu yujunũ barire gametarigu iri bari mera ìgu pagu magure ìgu tìgu opaborore bu gohrotopũ. <sup>17</sup> Pũhrũ ìgure warare masia mũa. Ìgu eropiira pũhrũ ìgu pagu ìgure Esaúre òaro árìdoreburire Goãmũre serẽbasarire turaro gameripũ daja Esaúpũ. Ìgu eropa gamequerecũ ta ìgu pagu magupũre ìgu tìgu opaburire gohrotora dipuwaja ìgjiropa árìrãre iisome. Eropirã pagu ìgure obiripũ. Eropa gamegu turaro orequeregu ìgu pagure serẽqueregu irire opamasibiripũ Esaú.

<sup>18</sup> Goãmũ dorerire Moiserẽ ìgu apicũgue mari acawererã Israe masa mũa Goãmũ pohro ejaboro guhya árìyoro. Dohpaguere mũapũre eropa árìbeaa. Òpa wayoro erãre. Goãmũ ìgu dorerire Moiserẽ iri dorerire apigu erã árìri yeba majagu utãgũgue árìpũ. Irigupũ Sinaí waicũdigũ árìyoro. Eropiro erã Goãmũ pohro ejamorã irigũgue erã ejacũ turaro peame ùjũyoro. Eropiro naitũaro, imica curu, turaro miru sã árìyoro irigu utãgũre. <sup>19-20</sup> Eroque erã ejacũ corneta bũsũyoro. Eropiro wereniguiro cariyoro. Ìgu eropa wereniguiro ejaricacũ peerã masa yujuro bojebiriñorã. Goãmũ erãre guhyaro mera òpa arì dorepũ erãre: “Árìpehrerã irigu utãgũre pẽhrerãre utã mera dea wejẽque erãre. Irigu utãgũre pẽhregũ waibugũ gohra ìgu árìquerecũ ìgu sãre utã mera dea wejẽcãque. O ñoserimiji mera ñose wejẽque ìgure,” arìpũ Goãmũ. Ìgu eroparicũ peerã yujuro bojebiriñorã erã. <sup>21</sup> Eropigu árìpehrerire utãgũguere guhyaro árìrãre ìagu òpa arìpũ Moise: “Bũrigã gũigu naragãgu iiaa,” arìpũ ìgu.

<sup>22</sup> Iribojegue Israe masa Goãmũ ìgu árìdigũ utãgũgue ejamasibiriñorã sìriri arìrã. Dohpaguere mũapũ Jesu yarãpũ Goãmũ árìdigũ utãgũgue, Sión waicũdigũgue, umaro majagũgue mũrijaro dopa ta diaye ta Goãmũ mera wereniguimasia. Goãmũ ojocarigu ìgu ya macague mũrijaro dopa ta diaye ta ìgu mera wereniguia mũa. Iri maca gaji maca mama maca Jerusalén umaro maja maca àhraa. Ero anyua bajarã gohra àhrima. Goãmũre umupeorã mucubiriri mera gamenererã àhrima. <sup>23</sup> Eropirã mũapũ ìgu ya maca majarã árìrã, erogue Goãmũ porã árìmũhtarã mera mũa gamenere árìbodiropã dopa ta àhraa. Ìgu porã erã waire ìgu gojaturapũgue umarogue erã waire gojatunirã àhrima. Ìgupũ mari Pagupũ árìpehrerã beyebu àhrimi. Ìgu mera majarã àhraa mũapũ. Eropirã gajirã òarã Goãmũ yarã mera

gamenererã dopa ta ãhraa mũa sã. Erãre ta ñeri marirã iituhapũ Goãmũ. <sup>24</sup> Eropirã Jesu mera majarã ãhraa mũa. Negohraguere ãgũ dore apirare gohrotogũ “Mũare ðaro iigũra yũhũ,” arĩ apipũ Goãmũ marire. ãgũ eropa arĩ apidiro dopa ta iidigũ árĩmi Jesu. ãgũ dire cohã ãgũ sĩrirañe mera marire ðaro taricũ iimi ãgũ. Abelre ãgũ di cóarare ãagũ Goãmũ Abelre wejẽdigũre dipuwaja moapũ. Jesucristo ãgũ di cóarapũre ãagũ marire dipuwaja marirã árĩcũ iipũ. Eropiro Abel ãgũ di cóara bu gohra árĩya. Cristopũ ãgũ di cóara pũhrũ ðatariaro iipũ Goãmũ marire. Eropiro Cristo ãgũ di cóara bu gohra árĩbiriya.

<sup>25</sup> Eropirã ðaro iique mũa. Goãmũ yare mũaare weregũre ðaro yũhrirã árĩque. Iribojegue i yeba árĩdigũ Moise Goãmũ yare ãgũ werecũ peerã, bajarã irire peediabiriñorã. Erã eropa peediabirira dipuwaja, dipuwaja moapũ Goãmũ erãre. Erã tauro dipuwaja moagũcumĩ Cristore cóarãre. Cristopũ umarogue árĩgũ Goãmũ yare weregũ ãhrimi. <sup>26</sup> Irisubure Moiserẽ ãgũ dorerire ãgũ apirasubure Goãmũ ãgũ werenigũro mera yeba ñohmecũ iipũ. Dohpaguepũre ðpa weremi ãgũ: “I yeba ñohmecũ yujusubu ta iinemogũra. I yeba dihta ñohmecũ iisome yũhũ. Umarogue sãre ñohmecũ iigũra,” arĩ werepũ ãgũ. <sup>27</sup> “I yeba ñohmecũ yujusubu iinemogũra,” arĩgũ, “Árĩpehrerire yũ ãhacũnugurare cóãgũra,” arĩgũ iipũ. Goãmũ ãgũ opũ árĩroguerpũre cóãmasiya mara. Eropiro ãgũ ãhacũnugurare ãgũ cóãcũ ãgũ opũ árĩro dihta dujaroca. <sup>28</sup> ãgũ opũ árĩroguere warãca mari. Eropirã ãgũ opũ árĩrore ãgũ cóãbircũ ãarã, Goãmũre “Õhaa,” arĩrã mari. Eropirã umupeori mera, gũhyadiaro mera ãgũ yare iirã mari ãgũre mucubircũ iimorã. <sup>29</sup> Peame ãjũro gũhyaro dopa ta Goãmũ gũhyaro dipuwaja moagũ ãhrimi. Eropirã ãgũre gũhyadiaro mera umupeorã.

## 13

### *Õpa Goãmũre mucubircũ iique*

<sup>1</sup> Mũa mera majarãre mahi duhubircãque. <sup>2</sup> Masa mũa masibirã árĩquerecũ erãre ðaro mera mũa ya wirigue ñajaridoreque. Gajirã eropiirã, masibiriquererã anyuare erã ya wirigue ñajaridoreñorã. Eropirã mũa sã eropa ta iique.

<sup>3</sup> Peresu árĩrãre mojomoro ãaque. Mũaapũ erã mera peresugue árĩrã mũa árĩboro dopa ta erãre mojomoro ãaque. Gajirã erã ñero tarirã sãre mojomoro ãaque. Erã iro dopa mũa sã ñero tariro dopa ta erãre mojomoro ãaque.

<sup>4</sup> Mũa mojoto dirinirãre árĩpehrerã ðaro game umupeoque mũa. Eropirã mojoto dirinirã gajirã mera ñero iirã árĩbircãque. Árĩpehrerã uma nome mera ñero iinirãre, nome uma mera ñero iinirã sãre dipuwaja moagũcumĩ Goãmũ.

<sup>5</sup> Niyerure gamerã ne árĩbircãque. Õpa arĩpũ Goãmũ: “Mũaare ne cóãsome. Eropa itamuniguigũra,” arĩpũ ãgũ. Eropirã mũa opari mera iripẽta mucubirique. Wũaro gamenemobircãque. <sup>6</sup> Eropirã gũiro mariro ðpa arĩ pepirãca marmera mũa ya wirigue ñajaridori:

Mari Opũ marire itamugũ ãhrimi. Eropirã ne gũisome mari. Masa marire erã ñero iiborore gũisome mari, arĩ pepirãca mari.

<sup>7</sup> Goãmũ yare mũaare werenirãre mũaare dorenirãre guñaque mũa. Eropirã ðaro erã árĩricũrãre guñaque. Eropa guñarã, Cristore erã umupeorare ãhacũque mũa.

<sup>8</sup> Jesucristo ne gohrotobeami. Iribojegue, dohpague sãre, pũhrũgue sãre ãgũ árĩdiro dopa ta árĩniguicãgũcumĩ ãgũ. <sup>9</sup> Baja buheri gajiropa árĩri buherire peebircãque ðari buherire gũague cohãri arĩrã. “Ire baque. Ire babircãque,” arĩ buhemaacãma gajirã. Eropa arĩrire mari yũhricũ iri marire itamubeaa. Eropiro eropa arĩ buherire mari iicũ bu gohra ta ãhraa. Iri marire guñaturarã árĩcũ iibeaa. Goãmũ marire guñaturacũ iimi.



<sup>10</sup> Cristo mari ñeri dipuwajare sīridi árīmi mari ñerire cóābu. Pahiapū ōpa arīrā āhrima: “Waibugū yū Goāmure wejē soe mujucū, Goāmū mera tarīgūca,” arīrā iirima erā. Eropa arīrā erā ñeri iirare ne cóānirā árīmasibeama. <sup>11</sup> Pahia opū Goāmū ĩgū árīri taribu gohrague waibugū wejēdigū dire aī ñajagū Goāmure ōpū masa erā ñerire cóādoregū. Eropigū ĩgū wejēdigū waibugūre iri maca turogue soe cóácāñorā. <sup>12</sup> Eropa ta Jesu sã maca turogue sīripū. ĩgū di cóāri mera masa ñeri marirā wacū iibu sīripū. <sup>13</sup> Maca turogue ĩgū sīricū ĩarā, erā buherire ĩgū cóācū ĩarā judio masa ĩgūre ĩhaturiñorā. Eropirā mari sã ĩgū mera majarā árīrā. Mari eropa árīcū ĩarā masa mari sãre ĩhaturirācoma. <sup>14</sup> Erā marire ĩhaturiquerēcū āhraa. I yebague mari árīwajaburi maca árībeaa. Mari pūhrugue árīburi macare corerā iiaa mari. <sup>15</sup> Eropirā Jesu ĩgū itamuro mera ĩgū Pagū mera wereniguia mari. Eropirā ĩgūre ōaro serēniguicārā. “Mari Pagū turagū āhrimi,” arī umupeoniguirā gajirāre wererā. Mari eropa arī werēcū ĩgū mucubirīgūcumi. <sup>16</sup> Mūa mera majarāre ōaro iique. Mūa oparire gajirā sãre oque. Irire cādijibiricāque. Mūa eropa ōaro iirā Goāmure umupeorā iica. Eropa iirā ĩgūre mucubiricū iirāca.

<sup>17</sup> Mūa oparāre ōaro yūhrique. Erā dorero dopa ta yūhrique. Goāmū mūare ĩhadibu buhedoregū apimi erā oparāre. ĩgū eropa apinirā árīrā eropa mūare ĩhadibuniguirā iima Goāmure tarinugadiabirā. Eropirā erāre ōaro yūhrique mūa erā mucubiriri mera mūare itamuboro dopa ta. Mūa yūhribiricū ĩarā erā bujawererācoma. Eropa yūhribirā ōaro árīsome mūa.

<sup>18</sup> Gūare serēbasaniguique Goāmure. Ūmuri nūcū ōari dihtare iidiaa gūa. Eropirā “Ñerire iirā iiaa,” arī pepibeaa gūa. <sup>19</sup> I tamerare turaro serēbasaque Goāmure yūre: Yojaro mera yū mūa pohrogue wamasiborore serēque Goāmure.

### *Ipū gojabeodigū ōadoretupū*

<sup>20</sup> Goāmū marire ōaro árīcū iigū āhrimi. ĩgū mari Opū Jesucristo sīridigūre masupū. ĩgū “Mūare ōaro iigūra,” marire arī apidigū āhrimi. ĩgū eropa arīrare iinijagū Jesupū marire taugū āhrimi. Mari ñeri dipuwajare ĩgū di cohā sīripū ĩgū. Eropigū ĩgū turagū, ovejare ĩhadibugū iro dopa árīgū, marire ĩgū yarāre ōaro ĩhadibumi. <sup>21</sup> Eropigū Goāmū ĩgūre masudigū mūa sãre itamuporo árīpehreri ĩgū gamerire mūa iiboro dopa. Eropigū Jesucristo ĩgū itamuri mera Goāmū ĩgū gamero dopa ta árīpehrerā marire ōarire gohrotocū iiporo. Eropirā árīpehrerinuri Cristore umupeorā. Eropa ta iirā.

<sup>22</sup> Yū acawererā, ire turaro mūare doregūra: Ipū mūare yū wererare ōaro mera peeque mūa. I yū mūare gojabeoripū wuaripū árībeaa. Eropirā ire ōaro peeque. <sup>23</sup> I sãre mūare weregūra: Mari acaweregūre Timoteore peresu árīdigūre wiuañorā. Dohpagohragā ĩgū aricū yūhū ĩgū mera mūare ĩagū wagūra.

<sup>24</sup> Mūa oparāre, árīpehrerā gajirāre Goāmū yarāre ero árīrāre ōadorea. Italia majarā Jesu yarā sã mūare ōadorema.

<sup>25</sup> Árīpehreri mera Goāmū mūare ōaro iiporo. Eropa ta iiporo. Iripēta āhraa.

## Santiago

### *Santiago Israe masare macari wasirinirãre gojabeoñumi*

<sup>1</sup> Yũhũ Santiago ipũ mera mũare òadore gojabeogũ iiaa. Goãmũ mari Pagũ pohro majagũ àhraa. Mari Opũ Jesucristo yare mohmegũ ta àhraa yũhũ. Eropigũ mũare Israe masare doce cururi majarãre Jesu yarãre macari wasirinirãre yũ acawererãre gojabeogũ iiaa.

### *Goãmũ òaro pee masirire ohomi marire, arĩ gojañumi Santiago*

<sup>2</sup> Yũ acawererã, baja árĩroca mũa ñero tariburi. Mũa ñero tariquererã òaro mucubiriri mera pepicãque. <sup>3</sup> Eropã ñero tarirã, Jesure mũa umupeorire diaye ta árĩcũ ìhmurã iica. Eropirã ñero tariquererã Jesure mũa òaro umupeoniguicãnirã ìgũre umupeonemorã warãca. Eropã warã mũa ñero taririre bocatĩurãca. <sup>4</sup> Eropirã eropa bocatĩurã árĩque mũa duhuro mariro òaro pee masirã mũa árĩboro dopa.

<sup>5</sup> Goãmũ duhyaro mariro árĩpehrerãre ohomi. Eropã ogũ ìgũre serẽrãre turibeami ìgũ. Ìgũ eropa árĩgũ árĩcũ masirã mũare pee masiri duhyarire ìgũre serẽque. Mũa eropa serẽcũ mũa masiburire onemogucumi ìgũ mũare duhyaro mariro. <sup>6</sup> Eropã serẽrã Goãmũre òaro guñaturanijarã serẽque mũa. “Gũa serẽcũ Goãmũ guare obiribocumi,” arĩ pepibiricãque. Eropã arĩ pepirã wũariya maja pãgũri iro dopa àhrima. Pãgũri iri dũrũro gohrotoro dopa ta erã sã erã guñarire dũrũro gohrotoma. Eropirã Goãmũre “Diaye ta iigũ àhrimi,” arĩ umupeobeama. <sup>7</sup> Eropã arĩ pepirãre erã serẽquerecũ ta ne merogã erã serẽrãre osome erãre mari Opũ. <sup>8</sup> Dohpagãre ire gamedigũ árĩqueregũ daja ñamigãre gajiropa guña wahgãmi daja. Eropã guñağũre ero wabeaa.

<sup>9</sup> Jesu yarã bu árĩrãre mojomorocũrãre Goãmũrũ oparã iro dopa ìhami erãre. Ìgũ eropa ìarã árĩrã mucubiriri mera árĩporo. <sup>10</sup> Eropirã Jesu yarã doberi oparã árĩrãrũ erã doberi pehrebore masirã mucubiriporo. Erã doberi bu árĩri àhraa Goãmũ ìgũ ìacũ. Doberi oparã erã doberi taa gori iro dopa pehrea waroca. Eropirã erã sã mucubiriporo. <sup>11</sup> Abe mũririgũ ìgũ turaro asicũ taapũ ñañia wahaa. Eropiro goripũ ñañi dija wa, òari gori iri árĩra pehrea wahaa. Eropã ta waroca doberi oparã erã doberire erã aĩ gameneoro watope. Erã iri doberi mera ta dederea warãcoma.

### *Ñero iidorerire tarinũgagũ mucubirigũ àhrimi, arĩ gojañumi Santiago*

<sup>12</sup> Ñero tarigũ bocatĩugũ, ñero iidorerire tarinũgagũ mucubirigũ àhrimi. Ìgũ eropa bocatĩucũ, ìgũ ñerire tarinũgacũ árĩpehrerinũri nũcũ umaro maja ojocaririre ìgũre ogucumi Goãmũ. “Iri ojocaririre ogũca,” arĩ apipũ Goãmũ árĩpehrerã ìgũre mahirãre. <sup>13</sup> Mũa ñerire iidiarã “Goãmũ yũre ñero iidoregũ iimi,” arĩ pepibita. Ñerire iidorebeami Goãmũ marire. Eropigũ ìgũrũ masare ñero iidoregũ árĩbeami. <sup>14</sup> Masa erã turaro ñerire erã waribejari ta iri ta erãre ñero iicũ iiaa. <sup>15</sup> Eropirã iri ñerire waribejama masa. Eropirã iripũre pepima. Eropã pepirã iri ñeripũre iiniguicãma erã. Erã eropa iiniguiri dipuwaja Goãmũ erãre peamegue cóãgũcumi.

<sup>16</sup> Eropirã yũ acawererã, yũ mahirã, ne yujugũ mũ basi gũyabita. “Goãmũ yũre dorecũ ñero iiabũ,” arĩ pepibita. Diaye árĩbeaa iri. <sup>17</sup> Mari Pagũ umaro majagũ marire òari dihtare ohomi. Ìgũ tamera abe mũmũ majagũre, ñami majagũre, necã sãre ìhacũnugudigũ árĩgũ, ìgũrũ ne gohrotobeami. Eropigũ ìgũ árĩniguicãmi. <sup>18</sup> Ìgũ gamediro dopa ta ìgũ òari buheri mera marire ìgũ porã wacũ iimi mari ìgũ yarã árĩmũhtarã árĩboro dopa.

*Diaye maja Goãmure umupeori òpa àhraa, arĩ gojañumi*

<sup>19</sup> Yũ mahirã, yũ acawererã, ire òaro peeque mũa. Goãmũ yare òaro peeque mũa. Eropa peerã, pepiro mariro wereniguibiricãque. Eropirã guabiricãque. <sup>20</sup> Yujugũ ìgũ guagũ áricũ sũabeami Goãmũ. <sup>21</sup> Eropirã áripheereri mũa ñeri iirire, mũa ñerire Ƴaribejarare duhuque mũa. Eropirã Goãmure òaro yũhrirã árirã ìgũ buherire peeñaque mũa. Ìgũ ya buherire mũa peecũ Goãmũrũ mũare peamegue wabonirãre taugũcumĩ.

<sup>22</sup> Ìgũ yare peequererã ta yũhribirã ñerire gũyarire pepirã iiaa mũa. “Yũhribiricũ òaroca,” arĩ pepirã gũyarire pepirã iica mũa. Eropirã ìgũ yare peerã iripũre iique. <sup>23</sup> Goãmũ yare peequererã ta yũhribirã, ìgũ diapore diuru mera aĩ ìaro dopa àhraa mũa. <sup>24</sup> Ìgũ ìgũ diapore ìara pũhrũ waha, ìgũ ìarare cãdijiro dopa ta mũa Goãmũ yare peequererã irire cãdija waha. <sup>25</sup> Eropigũ gajigũrũ ìgũ peerare cãdijibigũrũ Cristo ìgũ dorerare òaro guñagũ irire iigũ mucubirigũ árigũcumĩ. Ìgũ tamera ìgũ peerare iicũ Goãmũ òaro iimi ìgũre. Iri doreri “Cristo ìgũ mahiri mera masare taumi,” arĩ buheri àhraa. Iri buherire ne cóãbigũ mucubirigũ árigũcumĩ.

<sup>26</sup> Yujugũ ìgũ gamero arĩmaacãgũ, diaye ta Goãmure umupeobeami. “Goãmure òaro umupeoa,” arĩ pepibodigũ áriquerẽgũ ta ìgũ basi ta gũyagũ iimi. “Goãmure umupeoa,” arĩgũ áriquerẽgũ ìgũ Goãmũ yare yũhribiricũ ìgũ umupeori ne duhpiburi áribeaa. <sup>27</sup> Diaye ta Goãmũ mari Pagũre mari umupeorã, ìgũ gamero dopa ta umupeorã òpa iiaa mari: Pagũ sũmarã marirãre, wapeweyarã sãre erã ñero taricũ ìarã, erãre ìtamua mari. Eropirã i yeba majarã ñeri erã iirinore iidiabeaa mari. Eropa iirã diaye ta Goãmure umupeorã iiaa mari.

## 2

*Masare yujuropa òaro iiro gahmea marire, arĩ gojañumi*

<sup>1</sup> Yũ acawererã, òatariagũre Jesucristo mari Opũre peerã, ìgũre umupeorã àhraa mũa. Eropa umupeorã árirã masare yujuropa òaro iiro gahmea mũare. <sup>2-3</sup> Eropi doberi opũ oro berorire, mojoto sañari berorire opagũ, wjacũre suhricũgũ mũa Jesu yarã gamenerero pohrogue ìgũ aricũ ìarã ìgũre òaro mera bocatĩriboca. “Ohõ doaro àhraa,” arĩboca mũa ìgũre. Eropa ìgũre arĩquererã ta irisubu ta gajino moogũ mojomorocũgũ sã ñeriñe suhricũgũ sã mũa pohro ìgũ aricũ ìarã ìgũrũre òaro bocatĩribiriboca mũa. “Ohõ niguique. Ohõ yeba doaque,” arĩboca mũa ìgũre. <sup>4</sup> Mũa eropa iirã masare yujuropa iibirã iiaa mũa. Eropirã ñerire pepirã masare beyerã iro dopa árirã iica mũa. “Ìrũ niyerucũgũ òagũ àhrimi. Ìrũ gajino moogũ ñegũ àhrimi,” arĩ beyea mũa.

<sup>5</sup> Yũ acawererã, yũ mahirã, yũre peeque. Bajarã mojomorocũrũrũre Goãmure erã òaro umupeomorãre, ìgũ opũ áriroguere árimorãre beyerũ Goãmũ. “Eroguere warãca mũa,” arĩ apirũ Goãmũ ìgũre mahirãre. <sup>6</sup> Erãre ìgũ beyequerẽcũ ta mũarũ mojomorocũrũre òaro umupeobeaa. Doberi oparãrũ mũare ñero iimũrima. Eropirã erã opũ pohrogue mũare aĩ taragãma mũare weresãmorã. <sup>7</sup> Mũarũ “Cristo òagũ yarã,” masa erã arĩrã àhraa. Baja doberi oparãrũ Cristore ñero arĩ wereniguima.

<sup>8</sup> Goãmũ mari Opũ doreri tauro doreri òpa arãa: “Mũ basi mahiro dopa ta mũ pohro árirã sãre mahique,” arãa. Iñe doreriñere iirã, òarire iiaa mũa. <sup>9</sup> Masare yujuropa umupeobirã ñero iirã iiaa mũa. Eropa iirã Goãmũ dorerire tarinũgarã àhraa mũa. Eropa ta arãa Goãmũ yare erã gojarapũ. <sup>10</sup> Goãmũ dorerire iirã áriquererã ta yujuñe doreriñegãre mũa iibirã ñeri dipuwajacũrã waha. Mũa yujuñegãre tarinũgarã áripheereri ìgũ dorerire tarinũgarã waha. Eropa iirã ñeri dipuwajacũrã arĩnia mũa dohpa. <sup>11</sup> “Gajigũ marapo mera ñero iibita,” arĩgũ Goãmũ ta àhrimi. “Masare wejẽbita,” arĩ doregũ ìgũ ta àhrimi Goãmũ. Gajigũ marapo

mera ñero iibiriqueregu ta masure wejëgu Goãmũ ïgu dorerire tarinugagu ãhrimi ïgu. <sup>12</sup> Cristo marire turaro mahigu, marire doremi taubu. ïgu dorerare mari iirare, mari iibirira sãre ïagu marire beyegu arigucumi. ïgu eropa beyemorã árĩrã ïgu dorerire ðaro iirã. Eropirã ïgu gamero dopa ta wereniguirã mari. <sup>13</sup> Dohpaguere mari gajirãre mojomoro ïabiricũ Goãmũ mũare ïgu masare beyerinũ árĩcũ mũare mojomoro ïasome. Eropigu mari mojomoro ïacũ ïagu Goãmũpũ marire dipuwaja moasome.

*Cristore umupeorãpũ ðarire iima, arĩ gojañumi*

<sup>14</sup> Yũ acawererã, peeque mũa yũre. “Cristore umupeoa yũhũ,” yujugu ïgu arĩ pepiquerecũ ta gajirãre ïgu ðaro itamubiricũ ïgu “Cristore umupeoa yũhũ,” ïgu arĩrapũ ne duhpiburi árĩbeaa. Eropa arĩ pepimaacãgure Goãmũ tausome. <sup>15-16</sup> ¿Jesu yagu, Jesu yago ñeri dihta erã suhri opacũ ïarã erã bari moocũ ïarã dohpa iiri mũa erãre? “Õaro árĩque mũa. Eropirã ðaro suhricũque. Õaro bari mera yapĩ wahgãque,” arĩquererã erã gamerire mũa obiricũ mũa eropa arĩri ne duhpiburi árĩbeaa. <sup>17</sup> Eropirã “Cristore umupeoaa yũhũ,” mũa arĩquererã ta ðarire mũa iibiricũ Cristore mũa umupeori ne duhpiburi árĩbeaa.

<sup>18</sup> Gajigu i yũ wererire ïgu peediabiricũ ðpa arĩnemoboya yũhũ ïgure. Õarire iibiriqueregu ta “Cristore umupeoa yũhũ,” arĩraa mũhũ. Mũhũ ðarire iibigu Cristore mũ umupeorire ïhmupiburi árĩbeaa. Eropa arĩ pemasibea mũhũ. Yũpũ yũ ðari iiri mera Cristore yũ umupeorire ïhmua, arĩnemoboya yũhũ ïgure. <sup>19</sup> “Goãmũ yujugu ta ãhrimi,” arĩ pepima masa. Mũa eropa arĩ pepicũ ðapũricãa. Eropa árĩquerecũ ta iripëta mũa Goãmũre yũhribiricũ “ïgu Goãmũ ãhrimi,” mũa arĩri duhpiburi árĩbeaa. Watëa sã mũa pepiro dopa ta “Goãmũ ta ãhrimi yujugu ta,” arĩ pepima. Eropirã Goãmũ ïgu árĩricũre masima erã. Eropa masirã gũi naragãma. <sup>20</sup> Yujugu ðarire iibiriqueregu ta “Cristore umupeoa,” arĩ pepigu árĩgu pee masibigu ãhrimi. “Cristore umupeoa,” arĩgũno gajirãre ðaro iibigu diaye ta Cristore umupeobeami. Õpa arĩ weregura mũare irire: <sup>21</sup> Iribojegue Abrahã mari ñecũ ïgure umupeorire Goãmũ masidiañumi. Eropigu ïgu magure Isaa waĩcũgure aĩgã wejëdoreñumi. “Yũre umupeogu yũre yũhribocumi,” arĩ ïgu árĩricũre masima erã. Eropa masirã gũi naragãmagũ wejëdoreñumi. Eropigu Abrahã Goãmũ ïgu dorediro dopa ta ïgu magure aĩgã Goãmũre obu ïgure wejëbu iiriñumi. ïgu eropa yũhricũ Goãmũ ïgure “Wejëbita,” arĩñumi. ïgu dorediro dopa ta iibocuricũ ïagu “Diaye ta ðagu ãhrimi,” arĩ ïañumi Goãmũ ïgure. <sup>22</sup> ïgu eropa arĩ ïacũ ire masia mũa: Abrahã Goãmũre umupeogu ïgu dorerire yũhriñumi. Eropa yũhrigu Goãmũre ïgu umupeorire ii ïhmuñumi. <sup>23</sup> Eropigu erã Goãmũ yare erã gojarapũ erã arĩ gojadiro dopa ta eropa wayoro: “Abrahã Goãmũre umupeorũ. ïgu eropa umupeocũ ïagu “Õagu ãhrimi ïgu,” arĩ ïapũ Goãmũ ïgure,” arĩ gojañuma Goãmũ yare erã gojarapũguere. ïgu eropa arĩ ïacũ masirã “Abrahã Goãmũ mera majagu ãhrimi,” arĩñuma masa ïgure.

<sup>24</sup> Eropirã ire masia mũa: “Goãmũre umupeoa,” arĩgu, ïgu ðarire iibiricũ ïagu Goãmũpũ ïgure “Õagu ãhrimi,” arĩ ïabeami. Goãmũre umupeogũpũ diaye ta ïgu ðaro iicũ ïagu “Õagu ãhrimi,” arĩ ïhami Goãmũ ïgũpũre. <sup>25</sup> Eropa ta arĩ ïañumi Goãmũ Rahab waĩcũgore mũa mera ñero iimũridigore. Josué ïgu obeonirãre ðaro bocatĩri “Õaro ñajarique,” arĩñumo igo erãre. Eropa iigo erã dujadiacũ igopũ erãre gajĩ mare ïhmuñumo erãre ïhaturirã wejëri arĩgo. Eropa Goãmũ yarãre itamugo Goãmũre igo umupeorire ïhmuñumo. Igo eropa iicũ ïagu “Õago ãhrimo,” arĩ ïañumi Goãmũ igore. <sup>26</sup> Eropa ta ãhraa. Mari dũpũre sĩporã maricũ ojocaribea mari. Eropiro sĩporã mariro mari dũpũ duhpiburi dũpũ árĩbeaa. Eropa ta “Goãmũre umupeoa,” arĩquererã ta gajirãre ðaro iibirã mari árĩcũ diaye árĩbeaa



mari umupeori. Eropiro mari umupeori duhpiburi árĩbeaa. Sĩporã mariro erãre ìhaturirã wejẽri arĩgo. Eropa Goãmũ yarãre itami dũpũ iro dopa ta ãhraa.

### 3

#### *Mari disiro wiririre wereñumi*

<sup>1</sup> Goãmũ yare masare buherãre ìgu yare erã buhemaacãcũ, erã õaro iibiricũ ìagu erã tamerare gajirã tauro dipuwaja moagũcumĩ Goãmũ. Irire mũa masia. Eropirã mũa mera majarã masare buherã bajarã árĩbita. <sup>2</sup> Árĩpehrerã mari bajasuburi ñerire iiaa. Yujugũ ñerire ne wereniguibigũ Goãmũ gamerire õaro iigu ãhrimi ìgu. Eropigu gajĩ ñeri sãre iibeami. <sup>3</sup> Mari werenigui queori mera buhecũ õpa ãhraa i: Cabayure ìgu disiro comemiji ìgu nerore ñehadiuburimijire mari apia ìgure majinugacũ iimorã. Eropirã irimiji comemiji mera ìgure ìgu waborore mari taramajinugua. Irimijigã mirimijigã árĩquerecũ ta irimiji mera ìgu dũpũre wacũ iiaa. Eropa ta mari disiro mera miri disirogã árĩquerecũ ta wũaro wacũ iiaa mari. <sup>4</sup> Dohodiru queoriñere werenemogura mũare: Gasiru wũadiru iriru árĩquerecũ ta irirure miruñe turaro weãquerecũ ta autugũpũ miri mijigã mera iriru waborore autumi. <sup>5</sup> Eropa ãhraa mari wereniguiri. Mari disiro miri disirogã árĩquerecũ ta baja wereniguiri wiria. Miri peamegã wũaro ãjũ wahgũro dopa ta mari disiro mera wũaro ñero wacũ iiaa. <sup>6</sup> Eropiro mari wereniguiri peame iro dopa ãhraa. Mari wereniguiri árĩpehrerire ñerire iicũ iiaa marire. Peame ãjunũgaro <sup>4</sup> Dohodiru queoriñere werenemogura mũare: Gasiru wũadiru iriru árĩquerecũ ta irirure m dopa ta mari wereniguiri mera mari õaro árĩbodirore goroweoa mari. Mari ñerire wereniguirã watĩ dorero dopa ta eropa iirã iiaa. <sup>7</sup> Árĩpehrerãre nũgu majarãre waimurãre, mirimagũ porãgãre, waimurã paharãre, waire mari masa seyacũ iimasia. Eropirã mari bajarã erãnore masa seyacũ iituhabũ. Eropirã erã õaro masa seyacoma. <sup>8</sup> Erãre masa seyacũ iiquererã ta mari wereniguiri mera mari basi pee masiri mera wereniguicũ iimasibea. Marriru árĩquerecũ ta irirure mi ejorãre nijiyajaro dopa ta mari disiropũ ne nijiyajabirigohracãa. Mari wereniguiri ñetariari ãhraa. Eropiro aña gajirãre ìgu wejẽro dopa ta marire gajirã sãre ñetariaro wacũ iiaa mari disiro. <sup>9</sup> Mari disiro mera mari Pagũ mari Opũ Goãmũre mari õaro arĩ wereniguia. Eropa wereniguiquererã ta masapũre ñero arĩ wereniguia. Goãmũ iro dopa árĩrã ìgu ìhacũnugunirã árĩquerecũ ta erãre ñero arĩ wereniguia mari. <sup>10</sup> Yuju disirorriru árĩquerecũ ta irirure me ta ñeri wereniguiri sã, õari wereniguiri sã wiria. Yũ acawererã eropa arĩ wereniguibiricãro gahmea. <sup>11</sup> Maugã dipa ohma wiuri gobere yuju gobere õari dihta wiria. Gajĩ gobere ñeri dihta wiria. Eropirã Goãmũ yarã sãre õari dihtare wereniguiro gahmea. <sup>12</sup> Yũ acawererã, iguigu poegu dũcare dũcacũmasibea. Eropiro poegũpũ iguigu dũcare dũcacũmasibea. Eropi maugã dipa ohma wiuri gobere moayũari deco wiricũ, imisĩri deco sã wirimasibea. Eropa ta mari disirore õari wereniguiri, ñeri wereniguiri mera wiricũ gamebircãro gahmea.

#### *Diaye maja masiri õpa ãhraa, arĩ gojañumi Santiago*

<sup>13</sup> Yujurãyeri mũa mera majarã masirã ãhrima. Eropirã “Gajirã tauro gũa masirã ãhraa,” arĩbiricãporo. Eropa arĩbirã ta õarire iique mũa. Eropa õarire iirã diaye ta masirã ãhraa mũa. <sup>14</sup> Eropirã gajigu gajinore ìgu opacũ ìhaturirã, mũa ya arĩburi dihtare iidiarã árĩrã, “Goãmũ yare õaro masia gũa,” arĩbiricãque. Mũa eropa arĩrã árĩrã gũyarã ãhraa mũa. <sup>15</sup> Eropa ñerire pepirã erã ya pepiri Goãmũ ya pepiri árĩbeaa. Erã pepiri i yeba majarã erã ñero pepiri ãhraa. Erã pepiripũ watĩ ya ãhraa. <sup>16</sup> Masare ìhaturirã, erã ya arĩburi dihtare iidiarã eropa game dũyasoniguicãma. Árĩpehreri ñerire iima. <sup>17</sup> Gajirãpũ Goãmũ yare õaro masiri oparãpũ erã tamera eropa iimaacãrã iibeama. Eropirã erã ne game dũyasobeama. Eropa iirã masa õarã,

dorerire òaro yùhrirã, mojomoro ïarã, masare itamurã, masare yujuropa iirã àhrima erã. Irire iirã gùyaro mariro iima erã. Eropirã pee masirã gohra àhrima. <sup>18</sup> Eropirã gamequeãro mariro árĩrã, gajirãre “Gamequeãbircãrã mari,” arĩ bosarã òarã wacũ iirã iiaa mari masare.

## 4

### *I yeba maja ñerire gamerã, Goãmure gamebirã àhraa mũa, arĩ gojañumi ïgu*

<sup>1</sup> ¿Duhpirã mũa game dũyasori? ¿Eropirã duhpirã gamequeãri mũa? Ñerire ùaribejarã gamequeãdiaa mũa. <sup>2</sup> Gajinore mũa gahmea. Eropa gamerã masare wejẽa mũa mũa erã yare emamorã. Eropirã gajigu gajinore ïgu opacũ ïarã irire mũa bũrigã gahmea. Eropa gamerã irire aĩmasibea mũa. Eropirã irire game dũyaso gamequeãa mũa. Goãmure serẽbirã, mũa gamerire bocabeaa. <sup>3</sup> Eropirã serẽrã mũa ya árĩburi dihtare serẽa mũa mũa gamero dopa ta iiniguicãmorã. Eropa mũa serẽcũ Goãmũ mũa serẽrere obeami. <sup>4</sup> Goãmure cóarã ùa mũa. I yeba maja ñerire gamerã, Goãmupure gamebirã àhraa mũa. ¿Irire masibeari mũa? Eropigu i yeba majarã ñerire gamegu Goãmure gamebigu árĩtuhami. <sup>5</sup> Òpa arĩñumi Goãmũ yare erã gojarapũ: “Goãmũ ïgu Espĩritu Santore mari mera árĩbure apimi. Eropigu Espĩritu Santopũ marire mahigu ñerire mari ùaribejarire gamesãbeami ïgu. Eropigu doero dopa ta marire turaro mahimi erãgue ñerire iiri arĩgu,” arĩ gojañumi iribojeguerẽ. ïgu eropa arĩ gojara bu gohra árĩbeaa. Diaye árĩro tiiaa. <sup>6</sup> Eropigu Goãmũ marire òaro itamumi mari ñerire iibiriburire. Òpa àhraa Goãmũ yare erã gojarapũ: “ ‘Yũ tamera gajirãre masi tarinũгаа,’ arĩgure Goãmũ ïhaturimi. Gajigupure ‘Ñegu bu arĩgu àhraa yũhũ,’ arĩgupure Goãmũ itamumi ñerire ïgu iibiriborore,” arãa ïgu yare erã gojarapũ. <sup>7</sup> Eropirã Goãmure òaro yùhrirã árĩque mũa. Eropirã watĩre yùhribircãque. Mũa eropa yùhribircũ ïagu ïgupũ mũare duhcãgũcumi. <sup>8</sup> Goãmure òaro yùhrique mũa. Mũa eropa iicũ ïgupũ mũare mahi itamugũcumi. Ñerã àhraa mũa. Eropirã ñerire iinemobircãque. Ñeri sãre gahme, òari sãre gamerã àhraa mũa. Eropirã mũa ñeri iirare bũjawereque. Mũa eropa iicũ ïagu Goãmũ mũa ñeri iirare cãdijigũcumi. <sup>9</sup> Mũa ñeri iirare turaro bũjawereque. Eropirã mũa ñeri iira dipuwajare oreque. Mucubirirã árĩbircãque. Eropirã mũa ñeri iirare ñero sĩporãcũ, irire gũhyasĩriñariro pepique. <sup>10</sup> “Ñegu bu arĩgu àhraa yũhũ,” arĩrã Goãmure umupeoque. Mũa eropa iicũ ïagu ïgupũ mũa ñeri iirare cóãgu “Òarã àhraa,” arĩ ïagũcumi mũare.

### *Erã acawererãre Jesu yarãre erã basi ñeri quere iidorebiriñumi*

<sup>11</sup> Yũ acawererã, Jesu yarã árĩrã, mũa basi ñeri quere iibiricãque. Mũa acaweregure ñeri quere iirã ïgure dipuwaja moadorediarã árĩca mũa. Cristo doreripũ masare dipuwaja madoreri árĩtuhaa. Eropirã masare ñeri quere iirã Cristo ya dorerire òpa arĩrã iica: “Marire òaro dorebeaa Cristo ya. Eropirã mari gamero dipuwaja madorerã,” arĩrã iica masare ñero werewuarã. Eropa arĩrã Cristo dorerire ñero arĩ wereniguirã dujaa mũa. Eropirã iri dorerire yùhribirã dujaa. <sup>12</sup> Masare dorerire ogũ, masare beyegu Goãmũ ta àhrimi. Eropigu masare peamegue wabonirãre ïgu ta taumasimi. Eropigu ïgu ta masare peamegue cóãmasimi. Eropirã maripũ masare “Ñerã àhrima,” arĩmasibea. Mari acawererãre beyebu Goãmũ dihta àhrimi.

### *Ñamigãguere dohpa marire waborore masibea mari*

<sup>13</sup> Dohpaguere yure peeque mũa. Òpa arĩboca mũa Goãmure guñaro mariro: “Dohpagãre o ñamigãre gaji macague árĩrã warãca. Eroguere yuju bojori árĩrã, gajinore dua, asũ iirãca. Eropa iirã wajatarãca mari,” arĩboca mũa. Eropa arĩrã

árĩrã, yũpũre peeque mũa. Eropa arĩrãre ire werebu iiaa: <sup>14</sup> Ñamigãguere dohpa marire waborore masibea mari. Imica ãhri, mata pehremaaro dopa ta ãhraa mari árĩricũri. Imica merogã árĩniguiiri pehrea wahaa. Eropa mari sã merogã árĩniguiiri sĩria warãca. <sup>15</sup> Eropirã õpa arĩ pepiro gahmea mũare: “Goãmũ ĩgu gameropẽ árĩrãca mari. Eropirã ĩgu gamero mera iirãca mari,” arĩ pepiro gahmea mũare. <sup>16</sup> Mũarũ “Dohpagueere mari gamero õpa iirãca,” arĩniguiraa mũa Goãmũre guñaro mariro. Eropa arĩ wereniguirã ñerire iirã iiaa mũa. <sup>17</sup> Eropirã õarire mari iiburire masiquererã ta irire iibirã ñerire iirã iiaa mari.

## 5

### *Doberi oparãre wereñumi Santiago*

<sup>1</sup> Doberi oparã mũa dohpagueere peeque yũre. Pũhrũguere mũa ñero tarirãca. Eropirã gaguinigi orerãca mũa. <sup>2</sup> Mũa doberi boapehrea waroca. Eropiro mũa suhrire sũrirã sã bapehocãrãcoma. <sup>3</sup> Mũa niyerure mũa wũaro dibura ne duhpiburi árĩbeaa. Mũa eropa dibucũ ĩagu mũa niyerure mahicũ masimi Goãmũ. Eropirã niyerure mũa mahira dipuwaja ñero tarirãca. Iri dipuwaja peamegue warãca. <sup>4</sup> Mũa ya poerire mohme corerãre wajayebeaa mũa. Eropirã mũa erãre gũyaa. Eropigu erãre mũa wajayebirira niyerure ĩagu, mũa gũyarare masimi Goãmũ. Mũare mohme corerã wajaseadiarã, gaguiniguima erã. Erã eropa arĩ gaguiniguicũ mari Opũ turatarigu peemi erãre. <sup>5</sup> I yebaguere baja doberi mera árĩricũa mũa. Árĩpehrrerire oparã mũa gameri dihtare mũa ãaribejarire iiaa mũa. Eropirã wũagu wecũ erã õaro ejogu iro dopa árĩricũa mũa. Eropirã wũagu wecũ ĩgu diserecũ ĩarã ĩgũre erã wejẽburi gorogue aĩ wahgãma. Eropa ta mũa sãre wũaro mũa opara pũhrũ mũare ĩgu dipuwaja moarogue aĩgãgũcumĩ Goãmũ mũare. <sup>6</sup> Õarãre peresu iidore wejẽdorebũ mũa erãre. Mũa eropa iicũ erãpũ duhri wiriamasibirama.

### *Cristo ĩgu dujariborore õaro coredeopũ marire Santiago*

<sup>7</sup> Eropirã yũ acawererã, mari Opũ Cristo ĩgu i yeba ĩgu dujariborore õaro coreyuque. Pohe opũ ĩgu oterĩ dũcacũburisubure ĩgu õaro corero dopa ta õaro coreyuque Cristo dujariborore. ĩgu oteriguere “Deco ariporo,” arĩgu ĩgu pohere õaro puhriburire õaro cohremĩ ĩgu. <sup>8</sup> Eropa ta mũa sã õaro coreyuque. Mari Opũ ĩgu dujariboro merogã dũhyaa. Eropirã Goãmũre eropa guñaturaniguicãque mũa. Eropirã eropa coreniguicãque mũa.

<sup>9</sup> Yũ acawererã, mũa basi dũyasobiricãque Goãmũ mũare dipuwaja moabiriboro dopa. Eropirã ire guñaque mũa. Dipuwaja moabu ĩgu dujariboro merogã dũhyaa. <sup>10</sup> Yũ acawererã, ñero tariquererã ta yujuro bojeque Goãmũre cóãro mariro. Goãmũ yare weremũhtanirã mũra erã Goãmũ ya árĩburire iirã ñero tariquererã duhubirimũriñuma. Erã duhubiridiro dopa ta duhubiricãque mũa sã. <sup>11</sup> Eropirã ire guñaque mũa. Ñero tariquererã ta Goãmũre duhubirãre Goãmũ õaro iigũcumĩ. Iribojegue majagu Job waĩcũgũre peebũ mũa. ĩgu ñero tariquereru ta Goãmũre duhubiriñumi. Eropigu ĩgu ñero tarira pũhrũ, Goãmũ ĩgũre õaro iĩñumi. Goãmũ mari Opũ marire õaromojomoro ĩagu arĩgu eropa iĩñumi ĩgũre. Iri árĩpehrrerire masia mũa.

<sup>12</sup> Yũ acawererã ire masique. Õpa arĩma waĩpeo piyurã: “ũmaro majagu mera diaye arĩrã iiaa,” arĩ waĩpeoma masare peedorerã. Erã iro dopa arĩ waĩpeo piyubiricãque. Ire mũare turaro dorea. Mũa gajirãre wererã, õaro diaye wereque erãre gũyaro mariro. Arĩnemopeobiricãque. Eropa mũa diaye werecũ ĩagu Goãmũ mũa gajiropa arĩra dipuwajare dipuwaja moasome.

<sup>13</sup> Mũa mera majagu ñero tarigu arĩgu, Goãmũre serẽporo ĩgu. Gajigu mucubirigu arĩgu Goãmũre mucubiriri mera bayaporo. <sup>14</sup> Mũa dorecũrã, Jesu yarã oparãre

sihubeoque m̄ua. M̄ua eropa sihubeocũ erãp̄u m̄uare uyu mera sũrãcoma. Eropã iirã Goãm̄ure mari Op̄ure m̄ua dorecũrare serẽbasarãcoma erã. <sup>15</sup> Eropã arĩ serẽbasarã “Mari serẽro dopa ta ĩgu iigũcumĩ,” erã arĩ pepicũ m̄uare dorecũrãre Goãm̄u itamugũcumĩ. Eropã iigu m̄uare õarã wacũ iigũcumĩ mari Op̄u. Eropigu m̄ua ñeri iira dipuwaja m̄ua dorecũrã árĩcũ ĩarã m̄uare serẽbasarãcoma. Erã eropa serẽbasacũ ĩagu m̄ua ñeri iirare cãdijigũcumĩ Goãm̄u. <sup>16</sup> Eropirã m̄ua mera majarãre m̄ua ñeri iirare game pep̄uri weretarique. Eropirã m̄ua basi Goãm̄ure game serẽbasaque. M̄ua eropa arĩ serẽbasacũ m̄ua serẽbasanirãre Goãm̄u taugũcumĩ. Õarire iirã m̄ua árĩcũ Goãm̄ure m̄ua turaro serẽbasadiro dopa ta iigũcumĩ Goãm̄u. Eropiro m̄ua erãre serẽbasari bu árĩri árĩbeaa. <sup>17</sup> Goãm̄u ya weremũhtadigu m̄uru Elia m̄uru mari iro dopa masũ árĩñumi. Eropigu masa ñero iira dipuwaja “Deco aribiricãporo,” arĩ turaro serẽñumi Goãm̄ure. ĩgu eropa arĩ serẽcu uhre bojori gohra gaji bojori deco deco aribiriyoro i yebaguere. <sup>18</sup> Eropigu dipaturi Goãm̄ure deco ĩgu aridore serẽcũ deco mereyoro daja. Eropiro dipaturi i yebaguere yucu bugũ dũca dũcacũyoro. Eropiro Goãm̄ure mari serẽri bu árĩri árĩbeaa.

<sup>19</sup> Yu acawererã, m̄ua mera majagu Goãm̄u yare diaye maja árĩrire duhudigu Goãm̄u yare dipaturi ĩgu gameborore ĩgure wererã, õaro iirã iiaa m̄ua. <sup>20</sup> Eropirã ire masique m̄ua: Goãm̄ure duhudigure Goãm̄ure dipaturi gamecũ iirã, peamegue wabodigure taricũ iirã iica m̄ua. Eropigu baja ĩgu ñeri iirare Goãm̄u cãdijicũ iirãca m̄ua ĩgure.



# 1 San Pedro

## *Jesu gaji macari wanirãre gojabeoñumi Pedro*

<sup>1</sup> Yũhũ Pedro Jesucristo ïgũ buhedore apidigũ ta ãhraa. Eropigũ mũare yoaro maja macarigue wanirãre, Ponto yebague wanirãre, Galacia yebague, Capadocia yebague, Asia yebague, Bitinia yebague wanirã sãre mũare árĩpehrerãre gojabeogũ iiaa yũhũ. Mũare òadore gojabeoa yũhũ. <sup>2</sup> Negohraguere Goãmũ mari Pagũ “Òpa iigũra,” ïgũ arĩdiro dopa ta mũare beyerũ. Ïgũ beyera pũhrũ ïgũ Espiritu Santo mera mũare Goãmũ yarã árĩmorãre acupũ. Òpa ta acupũ ïgũ Jesucristore òaro yũhrimorã mũa árĩboro dopa. Ïgũ di cóãro mera ñerire coenirã mũa árĩboro dopa iipũ. Eropirã Goãmũ ïgũ mahiri mera òaro árĩque mũa.

## *Jesu yarã árĩrã marire ùmarogue ïgũ aĩgãborore corerã iiaa mari, arĩ gojañumi Pedro*

<sup>3-5</sup> Goãmũ marire turaro mojomoro ïagũ, Jesucristo sĩridigũ ïgũ masa mũriaro mera marire òarã gohrotocũ iimi. Eropa iigũ ïgũ gohrotori mera Goãmũ porã ta wahaa mari. Eropa warã ïgũ mera eropa mari òaro árĩniguicãborore òaro masia mari. Eropigũ mũare ïgũ òari opaburire odiagu mũare coregũ iimi. Iri mũare ïgũ oburi ne pehresome. Eropigũ ïgũre mũa umupeorãre Goãmũ ïgũ turari mera mũare ïhadibugũ, taricũ iigũcumi. Pehrerinũ árĩcũ mũare ïgũ taurare masicũ iigũcumi ïgũ. Eropirã ïgũ marire òaro mojomoro ïacũ ïarã, ïgũre Goãmũre mari Opũ Jesucristo Pagũre “Òagũ, turagũ ãhrimi,” arĩ umupeoro gahmea marire.

<sup>6</sup> Eropa ïgũ taumorã árĩrã bũrigã mucubiriro gahmea. Mero i yeba mũa árĩropẽ, bajasuburi mũa ñero tariquererã ta bũrigã mucubiriro gahmea. <sup>7</sup> Eropa ñero tariquererã ta Goãmũre cóãbirã mũa árĩrã “Queoro Jesucristore umupeoa gũa,” arĩmasia mũa ïgũre. Mũa ñero tariquererã Jesucristore umupeoniguicũ mũa umupeoripũ yuju diaye árĩbeaa. Eropigũ mũa ñero taricũ ïagũ “¿Árĩro ta mũa yũre umupeori?” arĩ queoñagũ iimi Goãmũ mũare. Mũa eropa ñero tarirã diaye ta Cristore òaro umupeoniguicũ “Òaro iiaabũ mũa,” arĩgũcumi Cristo mũare. Eropigũ Jesucristo dujarigũ mũa ïgũre òaro umupeoniguinirãre òaro ïagũcumi mucubiriri mera.

<sup>8</sup> Ïgũre Jesucristore ïabiriquererã mahia mũa. Eropirã dohpaguere ïgũre ïabiriquererã ta ïgũre “Diaye ta iigũ ãhrimi,” arĩ umupeoa. Eropa umupeorã turaro mucubiria mũa. Mũa eropa mucubirirã mũa Goãmũ pohro mucubiriboro dopa ta mucubiria. Mũare eropa mucubiricũ iimi Goãmũ. Eropirã turaro mucubiria. <sup>9</sup> Eropigũ Goãmũ mũare peamegue wabonirãre taricũ iigũcumi mũa ïgũre òaro umupeoro mera.

<sup>10</sup> Goãmũ ïgũ masare eropa tauborore iribojegue Goãmũ yare weremũhtanirã irire masidiarã serẽpi ïamũriñuma. <sup>11</sup> Cristo ïgũ ñero tariborore, ïgũ sĩridigũ masa mũriaborore, árĩpehrerã tauro opũ ïgũ árĩborore erã ero coregue ta weremũhtañuma. Jesucristo ïgũ Espiritu Santo ïgũ itamuri mera eropa wereñuma erã. Erã eropa weremũhtaquererã erã wererare masibiriñuma. Eropirã erã wererare òaro masidiarã serẽpi ïamũriñuma erã Goãmũre. <sup>12</sup> Iri erã werera Jesucristo ariburi erã ya árĩburi árĩbiriyo. Mari òaro árĩburi árĩyo. Iri erãre masicũ iĩñumi Goãmũ. Eropirã dohpaguere ùmarogue obeodigũ Espiritu Santo ïgũ itamuri mera òari buherire mũare gũa werea. Iribojegue mũa ya árĩburire erã weremũhtara iri ta árĩcãro tiiaa dohpaguere gũa mũare wereri. Iri buherire anyua sã bũrigã masidiariñuma.

*Goãmũ marire ñeri marirã árdoremi, arĩ gojañumi Pedro*

<sup>13</sup> Eropirã òarire guña masi árĩyũque mũa. Eropirã guhyadiaro árĩque. Cristo ĩgu dujaricũ Goãmũ mũaare ĩgu òaro tauborore guñaque. Eropirã irire òaro mucubirimũhtarã coreque. <sup>14</sup> Iribojegue Goãmũre masinibirãgue ñerire ƣaribejarã árĩmarinirã árĩribũ mũa. Dohpague ire iibiricãque. Eropirã majirã erã pagũ sũmarãre òaro yũhriro dopa ta Goãmũre òaro yũhrique daja. <sup>15</sup> Eropirã ĩgu yarã árĩmorãre mũaare sihubedigũ ñeri marigũ ĩgu árĩro dopa ta mũa sã ñeri marirã ta árĩque. Eropirã òari dihtare iirã árĩque. <sup>16</sup> Eropã ta arĩ gojañuma Goãmũ yare erã gojarapũgue: “Ñeri marigũ ãhraa yũhũ. Yũ eropa árĩcũ mũa sã ñeri marirã árĩque,” arĩmi Goãmũ, arĩ gojañuma.

<sup>17</sup> ĩgu Goãmũ mari Pagũ yujurãyeri árĩpehrerã erã iirare ĩagũ yujuro mera beyemi ĩgu erãre. ĩgu eropiũgu árĩcũ ĩgũre “Ahũ,” arĩdiarã òaro iiquenerire ƣaribejarã árĩmarine. I yeba mũa árĩropẽ guhyadiaro mera òaro iique mũa. <sup>18</sup> Mũa ñecũ sũmarã mũa erã árĩricũri ne duhpiburi árĩbiriyoro. Mũa sã erã iidiro dopa ta iinirã mũa árĩquerecũ ta Cristo mũaare ĩgu yarã árĩmorãre iimi. Mari wajamorire ĩgu wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Irere òaro masia mũa. Eropã wajayebasagũ ĩgu niyeru mera, oro mera wajayebasabirimi. Niyeru, oro sã dederea waroca. <sup>19</sup> ĩgu di cóãra mera ta wajayebasami mari ñeri iira dipuwajare. Ovejagã erã Goãmũre obodigũ òagũ ĩgu árĩdiro dopa ta Jesucristo òagũ ñeri marigũ árĩdigũ arĩmi. <sup>20</sup> Iribojeguerẽ i yebare ĩgu ĩhacũnuguboro coregue Jesucristo ĩgu eropa waborore masituhapũ mari Pagũ Goãmũ. Dohpaguepũre pehrerĩ coregã árĩcũ, Cristo sĩribasami mũaare mũa ya árĩburire. <sup>21</sup> Eropirã Jesucristo ĩgu itamuro mera Goãmũre umupeoa mũa. Goãmũpũ Cristore sĩridigũre masudigũ arĩmi. Eropigũ ĩgũre ƣamarogue apigũ, árĩpehrerãre ĩgũre umupeocũ iipũ mari Pagũ. ĩgu eropiicũ ĩgũre mari Pagũre “Diaye ta iigu ãhrimi,” arĩ umupeoa mũa. Mũa eropa umupeocũ òaro iimi mũaare. Eropirã mũa ĩgu mera òaro árĩniguiborore òaro masia mũa.

<sup>22</sup> Òari buherire diaye majare yũhrirã mũa ñerire duhunirã ãhraa mũa. Eropã árĩrã, diaye ta mari acawererã Jesu yarãre mahi umupeomasia mũa. Eropirã mũa mera majarãre mũa sĩporãri mera turaro mahi umupeoque. <sup>23</sup> Mũa dipaturĩ masa dehyoaro dopa ta Goãmũ porã wahabũ mũa. Mari pagũ sũmarã mera masa dehyoanirã árĩrã, pũhrũ sĩria warãca. Iri iro dopa árĩbeaa Goãmũ porã mũa wacũ. Goãmũ mera árĩniguicãrãca. Goãmũ ĩgu buheri mera ĩgu porã wahabũ mũa. Iri buheri pehrebiriburi buheri marire Goãmũ mera eropa árĩniguicũ iiaa. <sup>24</sup> Òpã ãhraa Goãmũ yare erã gojarapũ:

Árĩpehrerã masa taa iro dopa wahama. Eropiro òari erã opari sã gori iro dopa ãhraa.

Taa masa, sĩria wahaa. Gori sã masa, sĩria wahaa. Iri taa iro dopa ta mari masa sã wahaa. <sup>25</sup> Mari Opũ ya buheripũ ne pehresome. ĩgu arĩdiro dopa ta eropa waroca, arĩ gojañuma.

Iri buheri mũaare erã werera òari buheri ta Jesucristo marire tauburi buheri ta ãhraa.

## 2

<sup>1</sup> Eropirã árĩpehreri ñeri iirire, erã pũrũpũ erã ñero ii corerire, gajirã gajinore opacũ ĩhaturirire, gajirã ñeri quere moarire, irire duhuque mũa. <sup>2-3</sup> Mari Opũ mũaare òaro ĩgu iirire dabero masituhaa mũa. Eropirã ne masa dehyoarãgã apĩcore erã gamero dopa ta mũa sã òari buherire Goãmũ yare turaro gameque. Eropã ĩgu yare gamerã mũa ĩgũre mũa guñaturanemorãca. ĩgu yarã òaro pee masirã árĩrãca.

*Cristo ojocaricũ iigu utãye iro dopa árĩgu ãhrimi, arĩ gojañumi Pedro*

<sup>4</sup> Cristo ojocaricũ iigu utãye iro dopa árĩgu ãhrimi. Masa Cristore gamebirima. Erã gamebiriqerrecũ Goãmũpũ ĩgu Pagũpũ ĩgũre beyedigũ árĩmi. Ōatariagũ ãhrimi. ĩgu eropa árĩgu árĩcũ ĩgũre gameque. <sup>5</sup> Eropirã mũa Jesu yarã árĩrã mera Goãmũ ãhrimi. Eropirã yujuro mera ĩgu yare õaro iirã árĩque mũa. ĩgu ya árĩburire mũa ĩmorãre beyedigũ árĩmi. Eropirã mũa Jesucristo itamuri mera ĩgu yare õaro iirã ĩgu Goãmũre mucubiricũ iiaa. <sup>6</sup> Ōpa ãhraa Jesucristore Goãmũ yare erã gojarapũ:

Cristo utãye iro dopa yũ beyedigũ ãhrimi. Eropigũ õatariagũ ãhrimi. ĩgu mariro yaharã wamasibeamã. Eropigũ ĩgũre Jerusalengue dohpague apigũ iiaa. ĩgu masare õaro árĩcũ iigũcumĩ. Eropirã ĩgũre umupeorã mucubirinĩguirãcoma, arĩmi Goãmũ, arĩ gojañuma Goãmũ yare weremũhtanirãgue.

<sup>7</sup> ĩgũre umupeorãpũ “Ōatariagũ ãhrimi,” arĩrãcoma. ĩgũre umupeobirãpũ ñero warãcoma. Erãre õpa ãhraa Goãmũ yare erã gojarapũgue:

Ihĩ Cristo utãye iro dopa ta Goãmũ beyedigũ ãhrimi. ĩgu Goãmũ beyedigũ árĩqerrecũ masa ĩgũre gamesome. ĩgũre gamebiriqerrecũ Goãmũ ĩgũre opũ acumi árĩpehrerãre dorebure, arĩ gojañuma.

<sup>8</sup> Ō sãre arãa Goãmũ yare erã gojarapũ:

ĩgu utãye iro dopa árĩgũre gamebirã dederea warãcoma, arĩ gojañuma iribojegũere. Eropa gojarã Jesucristore masa gamebiriburire õpa arĩ gojamũhtañuma. Erã ĩgũre gamebirã Goãmũ ya buherire yũhribirima. Cristore gamebirã, ĩgũre tarinũgarã, Goãmũ pohrogue ejasome erã. Erã eropa waborore apipũ Goãmũ erãre.

### *Ōpa ãhrima Goãmũ yarã, arĩ gojañumi Pedro*

<sup>9</sup> Mũapũ Goãmũ ĩgu beyenirã ãhraa. ĩgu mari Opũ ĩgu yarã pahia ĩgu yare itamurã ãhraa mũa. Eropirã ĩgu ya curu majarã ñeri marirã Goãmũ yarã ta ãhraa mũa. Eropigũ mũare naitĩaro árĩbonirãre boyoropũ árĩmorãre, ñerire iibirimorãre, õaripũre ĩmorãre aĩdigũ árĩmi mũare. Eropa ta aĩdigũ árĩmi Goãmũ mũa ĩgu õarire ĩgu õaro iirare gajirãre weremorãre. <sup>10</sup> Ero coregue duhpimorã árĩbirimũribũ mũa. Dohpague tamerare Goãmũ yarã ãhraa mũa. Ero core mũaremojomoro ĩabupũ marinimi mũare dohpa. Dohpaguepũre mũare Goãmũmojomoro ĩagũ ãhrimi.

### *Goãmũ yare iirã árĩque mũa, arĩ gojañumi*

<sup>11</sup> Yũ mahirã, mũa i mũre wari masa iro dopa ãhraa dohpague. Goãmũ pohro wamorã ta ãhraa. Mũa eropa árĩrã árĩcũ, ire turaro werea mũare: Mũa ñeri mũaribejarire iibiricãque. Iri ñerire mũaribejarã, ñerã warã iica mũa. <sup>12</sup> Goãmũre gamebirã watope árĩrã õaro iirã árĩque mũa gũare werewũari arĩrã. Mũa eropa iirã árĩcũ mũare dohpague ñero werewũadiaquererã mũa õaro iirire masirãcoma erã. Eropa masirã erã Goãmũre “Ōagũ, turagũ ãhrimi,” arĩrãcoma. Ōpa ta arĩrãcoma Cristo ĩgu i yebague ĩgu dujaricũ.

<sup>13</sup> Mari Opũ yare iirã árĩrã õ majarã oparã sãre yũhrique mũa. I yeba majagũre mũa árĩpehrerã tauro opũ árĩgũre ĩgu sãre yũhrique. <sup>14</sup> Goãmũ erã oparãre apipũ tarinũgarãre dipuwaja moamorãre. Eropigũ õaro iirãre “Ōaro iibũ mũa,” arĩdoregũ apipũ erãre. ĩgu eropa apicũ erãre yũhrique mũa. <sup>15</sup> Mũa õaro iicũ ĩarã, pee masibirã erã sihajaro mũare weresãdiaquererã ta weresãmasibeamã. Eropigũ mũa õaro iicũ gahmemi Goãmũ.

<sup>16</sup> Mũa ñesũ sũmarã árĩricũri doca árĩnirãre Goãmũ mũare taudigũ árĩmi. Eropa taunirã árĩqererã ta, “Gũare doreri marã. Eropirã gũa ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã ãhraa gũa,” arĩ pepique mũa. Eropa arĩ pepirã ĩgu dorerire iique mũa. <sup>17</sup> Árĩpehrerã masare mahi

umupeoque. Mari acawererã Jesu yarãre mahi umupeoque. Goãmure gũhyadiaro ãaque. I yebe majagu opa sãre umupeoque.

*Cristo ñero tarigu ãgu yujuro bojediro dopa ta yujuro bojeque mua sã, arã gojañumi Pedro*

<sup>18</sup> Mua pohro majarãre weregu iiaa dohpaguere. Mua ðaro umupeori mera mua oparãre yũhrirã árĩque. Óarã, muare ðaro iirã mera dihtare yũhrirã árĩbircãque. Mua mera guarã sãre yũhrique mua. <sup>19</sup> Mua ñero iibiriquerẽcũ, muare erã dipuwaja moabocoma. Erã eropa dipuwaja moarare Goãmũ ãgu gamero dopa ta irire mua yujuro bojecũ “Óaro iiabũ mua,” arĩgucumi Goãmũ muare. <sup>20</sup> Mua ñero iira wajapu erã muare dipuwaja moasũcũ irire mua yujuro bojequerẽcũ Goãmũ “Óaro iiabũ mua,” arĩsome. Mari ðaro iiquererã erã dipuwaja moasũcũ irire mari ðaro mera guaro mariro árĩcũ yujuro bojecũ Goãmũ marire ðaro ãhasuagucumi. <sup>21</sup> Eropa iimorãre ãgu yarã árĩdoremi Goãmũ muare. Cristo sã mua ya árĩburire ñero tarimi mua ãgure ãhacũboro dopa. <sup>22</sup> ãgu ne ñero iibirimi. Eropigu ne gũyabirimi. <sup>23</sup> ãgure turicũ, ãgupu erãre ne turi gamebirimi. ãgure erã ñero iiquerẽcũ ta “Muare ñero iigura,” ne arĩbirimi ãgu. Eropigu “Ahũ queoro dipuwaja moagu ãhrimi. ãgugue amugucumi,” arĩ pepiñumi ãgu. Eropirã mari sãre ãgu iidiro dopa ta iiro gahmea. <sup>24</sup> ãgu Cristo ãgu basi crusague mari ñeri dipuwaja sĩrimi. Eropa sĩrimi dipaturi mari ñerire iibiriboro dopa, Goãmũ gameripure mari iiboro dopa. ãgu ñero camicumi marire peamegue wabonirãre marire taricũ iibu. <sup>25</sup> Oveja erã dedereboro dopa ta mua sã peamegue dederebonirã árĩribũ. Dohpaguepũre Cristore umupeorã ãgu yarã wahabũ pare. Eropigu ovejare ãhadibugũ iro dopa Cristo muare ãhadibumi. Mua sĩporã mera dederebiriborore ðaro ãhadibumi.

### 3

*Mojoto dirirãre ðpa iiro gahmea erãre, arã gojañumi Pedro*

<sup>1</sup> Eropigu pohro majarãre yũ dorediro dopa ta mua marasã nomere doregura. Mua marapu sumarãre ðaro yũhrique erã Goãmũ buherire erã gameboro dopa. Yujurãyeri mua marapu sumarã Goãmũ buherire gamebirã ãhrima. Erãre mua yũhricũ ãarã Goãmũ ya buherire gamebocoma erã. Eropirã iri buherire mua erãre werebiriquerẽcũ ta ãgu yare gamebocoma erã. <sup>2</sup> Eropa ta gamebocoma mua erãre ðaro iirire, mua umupeori sãre ãarã. <sup>3</sup> Mua nome, mua poarire wũapuwea seapanirã nome, oro dari bũyanirã nome, ðari suhri sañanirã nome árĩdiarire guñabircãque mua. Mua ya dupũ masare ãhasuacũ iibircãque. <sup>4</sup> Eropa iibirã ðpa iique. Mua pepiri ðaro árĩcũ guñaque. Eropirã mua gũhyadiarã nome iro dopa gajirãre nijiyajaro mera iirã nome árĩque. Gũhyadiaro mera weretamurã árĩrã ipure masare ãhasuacũ iique. Iripũ pehresome. Iri ðatariari ãhraa Goãmũ ãacũ. <sup>5</sup> Ópa ta iimuriñuma iribojegue majarã nome Goãmũ yarã nome. Erã nome Goãmure umupeorã nome árĩrã, erã marapu sumarãre ðaro yũhrimuriñuma. <sup>6</sup> Eropa Sara igo marapure Abrahãre ðaro mera yũhrimuriñumo. Eropigo ãgure “Opu,” arĩ piyumuriñumo. Eropirã mua ðaro iirã nome árĩrã, gũiri marirã nome árĩrã, Sara árĩdiro dopa ãhraa mua.

<sup>7</sup> Ópa ta mua marapu sumarã sã mua marapo sãre ðaro iique. Erã nome mari ãma iro dopa turarã árĩbeama. Eropirã umupeori mera ðaro iique erã nomere. Goãmũ árĩpehrerinuri ãgu mera mari árĩniguiborore ãgu muare odiro dopa ta ogucumi erã nome sãre. Erã eropa árĩmorã árĩcũ erã nomere ðaro iique. Goãmure mua serẽrere ãgu yũhriboro dopa erã nomere ðaro iique mua.

*Óaro erã iiquerẽcũ ta gajirã erãre erã ñero iirire werepũ Pedro*



<sup>8</sup> I mera weretugura: Mũa árĩpehrerã yujuro mera ðaro árĩque. Eropirã mũa mera majarãre ðaro mojomoro ãarã árĩque. Mũa acawererã Jesu yarãre pepuri majarã game umupeoque. Eropirã ðaro iique erãre. Eropirã “Gajirãre masitaugũ ãhraa,” arĩ pepibirã erã gamero dopa ta iique. <sup>9</sup> Gajirã mũare erã ñero iicũ erãre ñero ii gamebircãque. Mũare erã turicũ erãre turi gamebircãque. Mũare erã eropa iiquerecũ ta ðaro iique erãre. Eropirã ðaro yuhrique erãre. Irire iimorãre ta apimi Goãmũ mũare ðaro iibu. <sup>10</sup> Eropa ta ãhraa Goãmũ yare erã gojarapũ:

Mũa ðaro mucubiriri mera arĩdiarã ne ñero wereniguibircãque. <sup>11</sup> Árĩpehreri ñeri iirire duhucãque. Õaripũre iique. Game mũa basi ãhaturiro mariro árĩque. Irire turaro iique. <sup>12</sup> Õarãre mari Opũ eropa ãhadibuniguicãgũ iimi. Eropigũ ãgũre erã serẽrire eropa peeniguicãgũ iimi. Ñero iirãpũre ãgũ gamebeamĩ, arĩ gojañuma Goãmũ yare gojarapũgũ.

<sup>13</sup> Õarire mũa turaro iidiacũ gajirãpũ mũare ñero iidiaquererã ta ne yujuro bojesome. <sup>14</sup> Õaro mũa iiquerecũ ta mũare erã ñero iicũ ãagũ Goãmũpũ mũare ðaro iigũcumĩ. Eropirã mũare ñero iidiarãre, “Mũare wejẽrãca,” arĩrãre gũibircãque. Eropirã bũjawerebircãque. Irire pee guñaricũbircãque. <sup>15</sup> Eropirã mũa Cristore “Gũa Opũ ãhrimi,” arĩ pepirã, umupeoque ãgũre. Eropirã Cristore mũa umupeorire, Goãmũ mera mũa árĩborore, gajirã mũare serẽpibocoma: Erã mũare serẽpiboro core erãre yuhriburire ðaro guñayuque. Eropa erãre yuhrirã nijiyajaro mera, ðaro umupeori mera wereque erãre. <sup>16</sup> Õarã árĩque. Eropirã “Ñerire iiaa,” arĩ pepisome mũa. Eropirã Cristo yare mũa ðaro iirã árĩcũ gajirã mũare ñeri quere moarã gũhyasũuro warãcoma. <sup>17</sup> Ñerire mari iira dipuwaja mari ñero taricũ ðabeaa marire. Eropiro Goãmũ gamecũ ðarire mari iira dipuwaja mari gajirã mera ñero taricũ ðapũrica iri tamera.

<sup>18</sup> Eropa ta ñero tarimi Cristo. Yujusubu ta árĩpehrerã ñeri dipuwajare sĩrimi ãgũ. Õagũ árĩmi. Eropa árĩgũ ñerã mari árĩcũ mari ya árĩborare ñero tarimi ãgũ. Ñero tarimi ãgũ Goãmũ yarã mari wacũ iibu. ãgũ sĩria wami. Eropa sĩriquerẽcũ ta ãgũ sĩporã ojocariyoro. <sup>19</sup> Eropigũ ãgũ sĩporã mera sĩrinirã mũa erã dipuwaja moaburire corerã erã pohrogue Goãmũ yare werepũ erã sĩporãrire. <sup>20</sup> Erã mũrapũ iribojegue Goãmũre yuhribirimũriñuma. Irisubuguere Noé ãgũ árĩrasubuguere, wũadiru dohodirure dohogũ iĩñumi. Irirure ãgũ dohorisubu Goãmũre yuhribirinirã mũa erã yuhricũ gamerĩñumi. Eropigũ erã yuhriborore yoari boje dipuwaja moabigũ corerĩñumi Goãmũ. Yuhribirimũriñuma. Eropigũ erãre dipuwaja moañumi. Eropirã bajamerãgã ocho dihta dia miririñere tariwereñuma. <sup>21</sup> Miricũ erã taridiro dopa ta marire waĩyecũ peamegue wabonirãre mari tariborore ãhmua. Deco mera marire waĩyecũ mari dupũre mari gũhrarire tu coero dopa árĩbeaa. Marire waĩyecũ ñeri marirã mari árĩborore Goãmũre mari serẽa. Eropirã Jesucristo ãgũ masa mũriara mera peamegue wabonirã taria mari. <sup>22</sup> ãgũ Jesucristo umarogue wadi árĩmi Goãmũ mera dorebu. Eropigũ ãgũ anyua tauro, umaro majarã oparã tauro, árĩpehrerã dorerã tauro erãre doregũ ãhrimi.

## 4

### *Cristo yarã árĩrã ðarire gohrotonirã árĩrãca, arĩ wereñumi*

<sup>1-2</sup> Mari ñero tarirã mari ñero iirire duhucãa mari. Eropa duhucãrã mari dipaturi mari ãaribejarire iibeaa. I yeba mari árĩropẽ Goãmũ gamerire iiniguirãca. Eropirã Cristo ãgũ ñero tarigũ ãgũ gũibiridiro dopa ta mũa sã ñero tariborore gũibircãque. <sup>3</sup> Iribojegue Goãmũre gamebirã erã ñerire ãaribejadiro dopa ta iimũriyoro mũa. Gũhyasũiro mariro ñerire iirã, ñeri ãaribejarire iirã, mereri bosenũri iirã, Goãmũ

dorerire tarinugarã, goãmarã wéanirãpũre umupeorã iimũriyoro. Eropirã iripêta iri ñerire iipurumujucãque pare. <sup>4</sup> Eropirã erã mũraro ta iirãpũ mũa dohpaguere iri ñerire erã mera iibiricũ ïarã erãpũ ïha uca wahama. Eropirã erã mũapũre ñero wereniguirã, querere goroweoma. <sup>5</sup> Erã eropiicũ ïagũ erã ñeri iirare Goãmũpũ serêpi ïagũ, weretaridoregũcumi erãre. ïgũ ojocarirãre, sïriniãrã sãre beyebu ãhrimi. <sup>6</sup> ïgũ eropa beyebu árĩgũ erã sïriniãrãpũre ðari buherire werepũ Goãmũ mera erã ðaro árĩniguiborore. Eropirã i yebare erã árĩpehrerã masa iiro dopa sïriniãrã árĩquerecũ Goãmũ ïgũ mera erã ðaro árĩniguiborore werepũ erãre.

<sup>7</sup> Pehreburinũ merogã duhyaa. Eropirã ðaro pee masirã árĩque. Eropirã Goãmũre serêniguicãque. <sup>8</sup> Gajirãre mari ðaro mahirã baja gajiropa erã marire ñero iiquerecũ ta eropa ïacãa mari. Eropirã mũa mera majarãre bũrigã umupeo mahiniguicãque. <sup>9</sup> Mũa mera majarãre mucubiriri mera mũa ya wirigue ñajaridoreque. <sup>10</sup> Goãmũ ïgũ yarã nũcũre ïgũ yare mũa mohmemasiburi nũcũre apimi. ïgũ eropa apicũ mũa iimasiro dopa ta mũa mera majarãre irire ðaro itamuque. Goãmũ mũa nũcũre mũa ïgũ yare mohmemasiburi nũcũre apimi. ïgũ apirañe mera gajirãre ðaro itamurã, Goãmũ ïgũ apidiro dopa ta ðaro iirã iiaa mũa. <sup>11</sup> Eropirã mũa ðaro wererã árĩrã, Goãmũ ïgũ werebodiropo dopa ta ðaro wereque mũa sã. Masare itamurã árĩrã, Goãmũ ïgũ apira turari mera gajirãre itamuque. Árĩpehreri mũa iira nũcũ Goãmũre masa erã umupeoboro dopa irire iique. Jesucristopũ mũa irire iicũ itamugũcumi. ïgũre árĩpehrerinũri umupeoque. “Õagũ, turagũ ãhrimi,” arĩro gahmea árĩpehrerãre. Eropa ta arĩporo.

### *Jesu yarã erã árĩri dipuwaja erã ñero taririre were gojañumi Pedro*

<sup>12</sup> Yũ mahirã, dohpaguere ñetariaro tarirã, “Gajiropa arĩro wãca yũre,” arĩ guña iibiricãque. Mucubirirã árĩque. <sup>13</sup> Bũjawerebirã ta mucubirirãpũ árĩque. Eropirã “Cristo ïgũ ñero taridiropo dopa ta gũa sã eropa ta wahaa,” arĩ mucubirique mũa. Eropa mucubirirã Cristo ïgũ ðarire ïgũ ïhmugũ dujaricũ mũa turaro mucubirirãca. <sup>14</sup> Cristo yarã mũa árĩri dipuwaja gajirã mũare erã turicũ Goãmũ ïgũ Espiritu Santo ïgũ ðagũ mũa mera árĩgũ iimi. Eropirã ðaro mucubirirã ãhraa mũa. <sup>15</sup> Eropirã masare wejêra waja dipuwajacũrã, yajara waja dipuwajacũrã, ñero iira waja dipuwajacũrã, gajiropa arĩ goroweora waja dipuwajacũrã árĩbiricãque. Iri dipuwaja mũa ñero taricũ ñehe ãhraa. <sup>16</sup> Cristo yarã mũa árĩra wajapũ ñero taricũ ðhaa. Eropirã Cristo yarã mũa árĩcũ ïha ñero iima mũare. Erã eropiicũ gũhyasïribiricãque. Ñero tariquererã ta Cristo yarã mũa árĩre mucubirirã, Goãmũre “Õhaa,” arĩ umupeoque mũa.

<sup>17</sup> Goãmũ ïgũ yarã erã iirare ïgũ beyerisubu arĩro iiaa dohpaguere. Árĩpehrerã mari ïgũ yarã mari iirare ïha serêpimũhtagũcumi. ¿Eropa marire serêpimũhtagũ dohpa iigũcũri ïgũ yarã árĩbirãpũre mũa pepicũ? ïgũre yũhribirinirãpũre turaro dipuwaja moagũcumi. <sup>18</sup> Eropirã ðarã ïgũ yarã eropa ñero tarira pũhrũ Goãmũ erãre tau erãre ïgũ pohro añagũcumi. Goãmũre gamebirãpũ ñetariaro tarirãcoma. Eropirã dederea wa peamegue warãcoma. <sup>19</sup> Eropirã Goãmũ ïgũ gamecũ mũa ñero tarirã árĩrã, ðarire mũa iirare duhubiricãque. Eropirã mũare ïhacũnugudigũre mũare ne duhubigũre ïgũre umupeoro gahmea. “Yũre ïhadibugũcumi,” arĩro gahmea.

## 5

### *Jesu yarã erã iiborore were gojañumi Pedro*

<sup>1</sup> Dohpaguere mũare Jesu yarã oparãre weregũra: Yũhũ Jesu yarã opũ ãhraa. Mũa sã erã oparã ta ãhraa. Mũare yũ iro dopa oparã árĩrãre ire werebu iiaa yũhũ: Cristo ïgũ ñero tarirare ïadigũ árĩgũ, mũa mera umarogue Cristo mera ðaro árĩniguibu árĩgũ ire mũare weregũra: <sup>2</sup> Goãmũ yarã oveja iro dopa ãhrima. Mũapũ ovejare

ĩhadiburã iro dopa ãhraa. Eropirã Goãmũ mũare ĩgu apinirãre ĩgu yarãre ðaro ĩhadibuque mũa. Eropirã Goãmũ ĩgu gamediro dopa ta ðaro sĩporãcũri mera erãre ĩhadibuque. Eropirã erãre ĩhadiburã “Niyerure wajatarãca,” arĩ pepibiricãque mũa. <sup>3</sup> Eropa ĩhadiburã erãre pũriro mera dorebirabiricãque. Eropirã ðaro iique mũa Jesu yarã mũare erã ĩhacũboro dopa. <sup>4</sup> Mũa eropa iirã Cristo marire árĩpehrerãre ĩhadibugũ ĩgu dujaricũ ĩgu mũare ðarire oburire oparãca. Iri mũa opaburi ne pehresome.

<sup>5</sup> Erãre yũ dorero dopa ta mũa mamarã sã erãre mũa oparãre yũhrirã árĩque. Eropirã mũa Jesu yarã árĩpehrerã game yũhri árĩque.

“Ôatariagu ãhraa,” arĩ pepirãre Goãmũ gamebeami. Gajirãre umupeorãpũre “Bu arĩrã ãhraa,” arĩ pepirãpũre ðaro mahi itamumi ĩgu, arĩ gojara ãhraa.

<sup>6</sup> Eropirã Goãmũ turagũpũre mũare dorecũ yũhriique. Eropirã mũa basi “Yũ ðagu ãhraa,” arĩ pepibiricãque. Mũa eropa ðarire iicũ ĩagu Goãmũ ĩgu queoranũ árĩcũ masa ĩhuro mũare “Ôarã ãhrima,” arĩ ĩhmugũcumi. <sup>7</sup> ĩgu mũare wũaro pepi ĩhadibumi. Eropirã ĩgũre guñaturarã, ne wũaro bũjawere guñaricũbiricãque mũapũ.

<sup>8</sup> Mũaare ĩhaturigũ watĩ yee guagu ĩgu ehma baro iro dopa ta ãhrimi. Mũaare ñero iidoregũ goroweodiami. Eropirã pee masi árĩque. <sup>9</sup> Árĩpehrerogue sãre gajirã Jesu yarã eropa dihta teboricũma watĩ goroweodiari mera. Irire masirã ĩgũre yũhribiricãque. Eropirã Cristore umupeorã turaro guñaturaque mũa. <sup>10</sup> Mũa i yeba árĩrisubu dihta watĩ ñero iidorediaro mera teboricũrãca. Merogã ãhraa. Pũhrũ mũa Jesucristo pohro arĩrã, mũare ðarã turarã árĩcũ iigũcumi. Eropigũ mũa sĩñajarã ðaro árĩcũ iigũcumi mũare. ĩgu Jesucristo iira mera árĩpehrerĩnũri mũũsigue mũa ðaro árĩborore mũare apigũcumi. ĩgu Goãmũ ãhrimi árĩpehrerãre mojomoro ĩagu. <sup>11</sup> Eropirã mũũri nũcũ “ĩgu turagu ãhrimi,” arĩ umupeorã ĩgũre. Eropa ta iirã.

### *Ôadoretuñumi Pedro*

<sup>12</sup> ĩpũgãre miripũgãre yũ mũare gojabeocũ Silvanopũ yũre gojabasami. Silvano Jesu yagu yũ acaweregũ Jesure duhubigũ ãhrimi yũ pepicũ. Mũaare ðaro werediaa. Eropigũ “I buheri diaye ta Goãmũ mũare ĩgu mahiri buheri ãhraa,” arĩ weregũ mũare ĩpũre gojabeoa. Eropirã i buheri mera sĩporã turarã árĩque mũa.

<sup>13</sup> Mũaare ĩgu beyediro dopa ta Jesu yarã Babilonia majarã sãre beyedigũ árĩmi Goãmũ. Erã mũare ðadorema. Marco sã yũ magũ iro dopa árĩgu sã mũare ðadoremi.

<sup>14</sup> Mũa mera majarãre bocatĩrirã ðaro mera mojoto ñeaque.

Árĩpehrerã mũare Jesucristo yarãre gũa ðadorea. Eropa ta árĩque. Iripẽta ãhraa.

## 2 San Pedro

### *Jesu yaräre gojabeoñumi daja Pedro*

<sup>1</sup> Yũhũ Simo Pedro Jesucristo ïgũ buhedore ïgũ apidiguã áhraa. Eropiguã ïgũ pohro majaguã ta áhraa. Eropiguã mũare gojabeoa yũhũ. Goãmũ marire taudiguã Jesucristo mera marire árĩpehreräre diaye iiguã áhrimi. Eropa iiguã árĩguã Cristore umupeocũ, ïgũ yarã wacũ iimi mũare. Eropa warã mũa sã gũa iro dopa ta ïgũ yarã áhraa. Mari yujuro mera ïgũ yarã árĩräre mũare gojabeoa. <sup>2</sup> Eropirã Goãmũ sãre mari Opũ Jesucristo sãre masinemorã ïgũ mahiri mera õaro árĩrãca mũa. Eropa õaro mũa árĩboro dopa mũare serẽbasaa Goãmũre yũhũ. Eropa arĩguã mũare õadorea.

### *Õpa áhrima Cristo yarã, arĩ gojañumi Pedro*

<sup>3-4</sup> ïgũ yarã árĩmoräre Cristo marire aĩdigũ árĩmi. ïgũ eropa aĩcũ peerã, ïgũre yũhribũ mari. Eropa yũhrirã Jesucristo õaguã, õarirepa ta ïgũ yarã áhraa. Mari yujuro mera ïgũ yarã árĩrã iimasiguã árĩro dopa ta mari sã ïgũ iro dopa ta árĩmasia. Eropa Goãmũre mari masinemorã, ïgũ turari mera ïgũ gamero dopa ta õarã árĩrãca. ïgũ áhrimi ïgũ yarã árĩmoräre marire aĩdigũ. Õaguã õarire iimasipehogũ ïgũ árĩro dopa ta marire árĩpehreräre aĩdigũ árĩmi. Eropa ta iri ïgũ turari mera marire õatariaro wahabũ. “Õpa ta mũare õaro iigũra,” ïgũ arĩdiro dopa ta marire õatariaro iimi ïgũ. Marire ïgũ eropiicũ i yeba maja ñerire mari ÷aribejarire mari duhucãa. Iri ñeripũ marire goroweotariaca. Eropirã ïgũre yũhrirã árĩrã Goãmũ ïgũ arĩdiro dopa dujarãca mari. <sup>5</sup> Eropirã Cristore umupeorã arĩtuhãa mũa. Eropirã ïgũ turarire oparã õpa iinemoque daja: Õarã árĩque mũa. Eropa õarã árĩrã õaro pee masirã árĩque mũa. <sup>6</sup> Eropa pee masirã árĩrã ñerire iidiaquererã ta Goãmũ ïgũ gameripũre iiniguicãrã árĩque. Eropa iirã Cristo yarã mũa árĩri dipuwaja gajirã mũare ñero iiquerecũ ta eropa yujuro bojeniguicãque mũa. Eropa yujuro bojerã Goãmũre umupeorã, ïgũ gamerire iirã árĩque mũa. <sup>7</sup> Eropa iirã mũa mera majaräre mahi umupeoque. Erãre õaro itamurã árĩque. Eropa iirã árĩpehrerã gajirã sãre mahi umupeoque.

<sup>8</sup> Mũa eropa iinemocũpũre õataria. Mũa eropa iinemorã, õaro iirã árĩrãca. Eropirã mari Opũ Jesucristore õaro guñaturarã ïgũ gamerire õaro iiniguirã árĩrãca mũa. Bu árĩrĩre iisome. <sup>9</sup> Mũa eropa iinemobirã Goãmũ yare ne masibirigohraboia mũa. Eropirã Cristo mũa ñeri iirare ïgũ coerare ne guñabiriboya mũa. Eropa ta cãdijicãdiaboya mũa. <sup>10</sup> Eropirã yũ acawererã, Goãmũ yarã árĩmoräre mũare ïgũ árĩdorecũ yũhrinirã árĩbũ mũa. Eropa yũhrirã árĩrã, ïgũ yare guña duhudiabirã ïgũ gamerire turaro eropa iiniguicãque. Mũa eropa iirã diaye ta Goãmũ mera árĩrãca mũa. Eropirã diaye ta ïgũ beyenirã árĩrãca mũa. Eropirã ñerire iiniguirã árĩsome. <sup>11</sup> Mũa eropa ïgũ gamero dopa ta iirã árĩrã mari Opũ marire taudiguã Jesucristo ïgũ árĩroque õaro warãca mũa. Diaye ta ïgũ yarã mũa árĩcũ ïaguã “Õaro mera yũ mera árĩque mũa,” arĩgũcumĩ Jesu mũare.

<sup>12</sup> Eropiguã mũare ire eropa guñaniguicũ iigũra. I mũare yũ wererare masituhãbũ mũa. Eropa masirã Goãmũ yare mũa peediro dopa ta õaro iirã iiaa mũa. Eropa iirã mũa árĩquerecũ ta i mũare yũ wererare eropa guñanemocũ werenemogũra. <sup>13-14</sup> “Merogã dahyaa mũ sĩrĩboro,” arĩ weremĩ yũre mari Opũ Jesucristo. Eropiguã ojocarinigũ ire yũ mũare wererare eropa guñaniguicãcũ iiniguigũra. Yũ eropa iicũ õapũrica. <sup>15</sup> Eropiguã i yũ were gojara mũare gojapipihogũra yũ sĩrira pũhrũ mũa õaro masĩboro dopa. Eropirã i yũ wererare eropa guñaniguirãca mũa.



*Cristo ïgu turagu árïricurire ïabu yuhũ, arï gojañumi Pedro*

<sup>16</sup> Eropirã mari Opũ Jesucristo ïgu turari sãre, ïgu dujariboro sãre mũare wererã, gũa gamero gũa arï bocarire wererã iibiribũ. Turagu ïgu árïrere gũa basi ta ïabu.

<sup>17</sup> Cristo ïgu turatariagu ïgu árïrere gũare ïhmumi Goãmũ mari Pagũ. ïgu eropa ïhmucũ Cristo ðaro goesiricũ ïabu. ïgu eropa goesiricũ ðpa arïro caribũ: “Ihĩ yũ magũ yũ mahigũ ãhrimi. ïgu mera ðaro mucubiria,” arïro caribũ gũa peecũ.

<sup>18</sup> ðmarogue eropa arïro caricũ peebũ gũa. ðtãgu wecague Goãmũ yagu ðtãgu wecague Cristo mera ejarã eroparicũ peebũ gũa irire.

<sup>19</sup> Irire ïanirã árïrã, Goãmũ yare weremũhtanirã iribojegue majarã erã gojara diaye árïcũ ðaro masia gũa. Erã gojarare mũa ðaro buheniguirã ðaro iirã iica mũa. Iri erã gojara mũare sihãgodiru iro dopa ãhraa. Naitãaroguere ðaro sihãgodiru mera mari ïhamasiro dopa ta erã gojarapũ marire Goãmũ yare ðaro masicũ iiaa. Eropirã ïgu yare eropa buheniguique ne ïgu Jesucristo dujaricũgue. Jesucristo dujaricũ ïgu yare masipehorãca mari pare. <sup>20-21</sup> Yũ werediro tauro ipũre ðaro masique mũa: Iribojegue majarã ðarã Goãmũ yare erã weremũhtarã erã guñabocarire wereniguibiriñuma. Espiritu Santopũ erã Goãmũ yare wereniguiburire erãre masicũ iĩñumi. Eropirã mari erã wereniguiri gojarare buherã mari pepiri mera irire buherã “ðpa arïro iica,” arïmasibirica. Espiritu Santo ïgu itamuri mera mari masia.

## 2

*Goãmũ yare diaye buhebirãre were gojañumi Pedro*

<sup>1</sup> Iribojegue mari acawererã judio masa mera majarã gajirã “Goãmũ yare weremũhtarã ãhraa,” arï gũyamuriñuma. Erã iidiro dopa ta dohpague sãre mũa mera majarãre eropa ta arï gũyarã árïrãcoma. Erã diaye Goãmũ yare buherã arï buheboro dopa ta gũyaripũre buherãcoma. Eropa buherã Cristo yapũre goroweorãcoma. Eropa iirã Cristo erã ya dipuwajare sïribasadigũre guñabirãcoma. Eropirã ïgũre “Gũa Opũ ãhrimi,” arï ne pepisome. Iri árïpehrerire erã eropa iira dipuwajare mata Goãmũ erãre peamegue wadoregũcumi. <sup>2</sup> Eropa erã gũya buhecũ peerã erã, erã ñerire ðaribejaro dopa ta bajarã masa erãre ïhacũ ñero iirãcoma. Erã ñero iicũ ïha gajirã Jesucristo yare diaye majare ñero wereniguirãcoma. <sup>3</sup> Eropirã erã gũyaricũrã niyerure waja gamerã gũyari buherire buherãcoma mũare. Eropa buhera dipuwaja Goãmũ erãre peamegue wadoregũcumi. Iribojegue ta eropa iinirãre dipuwaja moadoretuhañumi ïgu.

<sup>4</sup> Eropa ta iribojegue dipuwaja moadoreñumi ñerã anyua sãre. Erãre peamegue peresu iĩñumi. Eropa iigu i mũmũ pehrerinũ árïcũ erãre dipuwaja moagũcumi. <sup>5</sup> Eropa ta iribojegue majarãre Goãmũre gamebirinirãre dipuwaja moañumi ïgu. Eropigu árïpehrero i yebare miugu, árïpehrerã ñerã masare miu wejẽpehocãñumi. Noé dihtare gajirã siete masa mera tauñumi. Noépũ irisubu majarãre Goãmũ yare ðarire buhemãririñumi. <sup>6</sup> Eropa ta Sodoma waicũri maca majarãre Gomorra waicũri maca majarã sãre Goãmũ dipuwaja moañumi. Iri macarire pa iinirãre dipuwaja moadoretupeame mera ðaro soepehocãñumi. Eropigu pũhrũgue árïmorãre ïgũre gamebirinirãre ïgu dipuwaja moaborore ïhmugũ iĩñumi. Ñerãre ïgu dipuwaja moaborore ïhmugũ iĩñumi “Gũiporo,” arïgu. <sup>7</sup> Eropigu Lote waicũgũre tauñumi. Lotepũ ðagu árïñumi. Eropa arïgu arïgu Sodoma majarã Goãmũ dorerire tarinũgarã ñetariaro erã iicũ ïagu gariborea wañumi. Eropigu mũma erã basi erã ñero iicũ ïagu gariboretaria wañumi ïgu. <sup>8</sup> ïgu ðagu ñerã watope árïñumi. Eropigu mũmũri nũcũ ñetariaro erã iicũ ïagu ñero erã wereniguicũ peegu ñero sïporãcũñumi. <sup>9</sup> ïgũre Goãmũ taucũ ïarã ire masia mari. Goãmũ mari Opũ marire ïgũre gamerãre mari ñerã watope árïcũ marire taugũcumi mari ñero iibiriboro dopa. Eropigu ñerãpũre

erã ñero iira dipuwajacurã árĩcũ apigucumi. Pehrerinũ árĩcũguere erãre dipuwaja moagucumi.

<sup>10</sup> Ñerire turaro ñaribejarã Goãmũ dorerire tarinugarã erã tamerare ñero dipuwaja moagucumi ĩgu. Oã mũa mera majarãre guya buherã ñeri ñaribejarire iirã ne mari Opũre umupeobeama. “Gajirãre mari tarinugaa,” arĩ pepirã àhrima erã. Eropa arĩrã erã deyobirãre ñamaro majarãre, ñerã turarãre ne güibirã ñero arĩ wereyama erãre. Erãpũre tauro dipuwaja moagucumi Goãmũ. <sup>11</sup> Goãmũ yarã anyuapũ ne erã iiro dopa iibeama. Erã tauro turarã àhrima. Eropa turarã árĩquererã ta erã ne wereyari mera ñamaro majarãre ñerã turarãre “Peamegue waporo,” arĩ weresãbeama mari Opũre.

<sup>12</sup> Erã guya buherãpũ nũgu majarã waimurã iro dopa pee masibirã àhrima. Erã gamero dopa ta iima erã. Eropirã erã masibirirare wereya ñero arĩ wereniguicorema. Eropa iirã erã árĩcũ waimurãre mari wejẽro dopa ta Goãmũ erãre peamegue cóagucumi. <sup>13</sup> Eropigũ erã ñero iira dipuwaja dipuwaja moagucumi Goãmũ. Erã ñerire ñaribejataricãma. Eropirã ñerire ñero iiniguicãma. Mũa mera bosenu iiquererã iri bosenu iri ñerire iidiana. Erã eropiirã guhyasĩricũ iima erã querecurã arĩrã.

<sup>14</sup> Eropirã nomere ĩarã ñeadiama erã. Eropirã ñerire eropa iiniguidia. Goãmũ yare dabero masinugarãre ñerire iidorerã, eropa arĩrãre erã ĩhacũcũ iima. Eropirã erã seyaro gajinore, niyeru sãre guya emamehrerã àhrima. Eropirã erã Goãmũ ĩgu dipuwaja moamorã àhrima. <sup>15</sup> Erã diaye majare duhu Balaam ĩgu iidiro dopa iirã iima. Balaam mũrũ Beor mũrũ magũ arĩñumi. ĩgu iribojegue ĩgu ñeri iiri mera niyerure wajatadiariñumi. <sup>16</sup> ĩgu eropa iigu wacũ ĩgu burropũ ĩgure turiñumi. ĩgu burro wereniguimasibigu ĩgu árĩquerecũ ta Goãmũ ĩgure wereniguicũ iinũmi. ĩgu eropa wereniguicũ peegu Balaam turaro ĩgu ñeri iidiarare duhucãñumi.

<sup>17</sup> Erã guyaricurã maũ dipague deco mariro iro dopa àhrima. Deco mariri maũri dipari iri duhriburi arĩbiriro dopa ta erã guyaricurã ne duhpimorã arĩbeama. Eropirã imica cururi miruñe weãbeori cururi gohrotoro dopa ta erã guyaricurã sã erã wereniguirire gohrotoniguima. Eropigũ naitiarogue erã warore amutuhapũ Goãmũ erogue erãre dipuwaja moabu. <sup>18</sup> Erã guyaricurã erã wereniguirire duhriburi gohra arĩbeaa. Masirã iro dopa masare eropa buhemaacãma. Ōpa arĩ buhema erã: “Mari gamero dopa ta mari iicũ õapũrica,” arĩ buherima erã. Erã eropa arĩ buhecũ masa peerã, erã ñaribejarire iidiarã erã ya buherire gahmema. Gajirã masa Goãmũre ne umupeonugarã erã guyaricurire peerã àhrima. Erã ñerire erã duhura pũhrũgã erã guyarire peenugama daja. Eropa peerã Goãmũ yapũre erã peeborapũre peebeama daja. Ñeripũre gohrotoma daja Goãmũ yarã arĩbonirã. <sup>19</sup> Erãre õpa arĩ buhema guyarã: “Mari iidiaro dopa ta mari iimasia,” arĩrima erã. Erã eropa arĩ buhequerecũ ta erã arĩdiro dopa wabeaa erãre. Ōaripũre iidiaquererã iimasibeama. Ñerire yoari boje duhudiabirã, pũhrũ irire duhudiaquererã duhumasibeama. Iri ñeri erãre dorea. Erã ñeri ñaribejarã erãre dorea. Eropiro yujugure ñeripũ tarinugacũ ĩgũpũre ñerire duhumasiya mara. <sup>20</sup> Mari Opũ Jesucristore marire taugure ne masinugarã i yeba maja ñerire duhucãma. Erã eropa duhura pũhrũ dipaturi ñerire gohrotorã daja, ñero gohra dujaboñuma erã. Cristore erã masiboro core erã arĩmũhtadiro tauro ñetariaro dujama pare dipaturi ñerire gohrotorã daja. <sup>21</sup> Eropa ñero dujarã õari buheripũre erã ne masinugabiricũ õatariaboya erãre. Erã Goãmũ dorerire masira pũhrũ irire cóãñirã ñetariaro dujarãcoma. <sup>22</sup> Eropirã dipaturi ñerire gohrotorã, masa nũcũ erã õpa arĩ wereniguidiro dopa ta iirã iima erã. “Diaye etocapi ĩgu etocapirare dipaturi ĩgu basi ta bahami daja. Eropigũ yese ĩgure guhbura pũhrũ dipaturi ĩgu ñeri tarague oyami daja,” arĩ wereniguima masa. Eropa ta iima õarire ne gamenugarã dipaturi ñerire gohrotorã daja.

## 3

*Cristo ïgu i yeba ïgu dujariborore were gojañumi Pedro*

<sup>1</sup> Yũ mahirã, mũare yujupũ gojabeotuhabu. Eropigu ipũre daja dohpaguere mũare gojabeogu iiaa. Eropigu mũare pesubu gojabeogu i árĩpehrerire guñacũ iidiagu iiaa õari dihtare mũa iiboro dopa. <sup>2</sup> Irire guñaque mũa: Iribojegue majarã õarã Goãmũ yare weremũhtanirã erã were gojarare guñaque. Eropirã mari Opũ marire taugũ Cristo ïgu doreri sãre guñaque. Iri dorerire gũa ïgu apinirã mũare buheabu.

<sup>3-4</sup> Eropirã negohrare ire guñamũhtaque: Pehrerinu coregãgue Goãmũ yare wereyarã árĩrãcoma. Erã ñerire ñaribejaniguirã árĩrãcoma. Õpa arĩ wereyarãcoma: “ ‘Cristo dujarigura,’ ïgu arĩqueregu ne dujarisome. ¿Dujaridiaqueregu duhpigu ne deyobeari ïgu? I yeba árĩnũgara pũhrũ mari ñecũ sũmarã mũra erã sĩrira pũhrũ árĩpehrero mũraro ta árĩniguia. Eropigu i yebague dujaribu ne ñmaroguere marimi,” arĩ wereyarã árĩrãcoma. <sup>5</sup> Eropã arĩ wereyarã ipũre ne guñadiabeama erã: Iribojeguere Goãmũ ïgu dorediro mera i yebare ñmũsi sãre ñhacũnuguñumi. Eropã ñhacũnugugũ deco mera i yebare iĩñumi. Eropigu i yeba deco mera árĩcũ iĩñumi. <sup>6</sup> ïgu eropiira pũhrũ i yebare miuñumi. Miugũ i yeba maja dederepehrecũ iĩñumi. <sup>7</sup> Eropigu ïgu ta ñmũsire, i yeba sãre dipaturi dederepehrecũ iigũcumĩ ïgu. Peame mera dederecũ iigũcumĩ. Dohpaguere ïgu ïgu dorero mera i yebare ñmũsi sãre árĩniguicũ iimi dohpa. Eropigu coregu iimi pũhrũ árĩpehrerore soebu. Eropã coregu iimi Goãmũ ïgure gamebirãre dipuwaja moabu. Eropigu ïgu beyerinu árĩcũ soepehocãgũcumĩ. Irisubu erã ñerãre dedeogũcumĩ.

<sup>8</sup> Yũ mahirã, ipũre guñaque mũa: “Yoatariari boje ãhraa,” mari arĩ pepiquerecũ ta, mil bojori yujunũ iro dopa ta ãhraa Goãmũ ïgu ñacũpure. <sup>9</sup> “Goãmũ ïgu arĩdiro dopa ta ne yojaro mera iibeami,” arĩma masa. Eropã árĩbeaa. Masare õaro iidiagu corenigu iimi. Ne yujugũ masure peamegue cóadiabeami ïgu. Eropigu árĩpehrerã erã ñeri iirire bũjawerecũ, ñerire iĩ duhucũ corenimi ïgu dohpa.

<sup>10</sup> Ñamigue yajari bũgu, ïgu guñaña mariro yajagu ñajariro dopa ta Cristo i yebaguere guñaña mariro arigũcumĩ. ïgu aricũ ñmũsi maja pehrea waroca turaro bũsuro mera. Õjũpehrea waroca. I yeba maja sã ñjũpehrea waroca.

<sup>11</sup> “I árĩpehreri pehrea waroca,” Goãmũ ïgu eroparĩcũ peerã ñerire duhu, Goãmũ gameripũre iirã árĩro gahmea marire. <sup>12</sup> Mari Opũ i yebague ïgu dujariborore mũa corerã árĩrã yojaro mera ïgu aricũ iique mũa. Irinũre ñmũsi maja ñjũpehrea waroca. <sup>13</sup> Eropã guhyaro watope ádopa maripũ Goãmũ ïgu arĩ apidiro dopa ta árĩpehrerire ïgu gohrotoburire cohre mucubiriyua mari. Árĩpehreri iri ñjũra pũhrũ õpa árĩroca: Ñmũsi i yeba sã gaji dihta árĩroca. Eropirã irisubuguere õari dihtare iirãcoma árĩpehrerã. Irire ta cohrea mari.

<sup>14</sup> Eropirã yũ mahirã, mari Opũ ïgu dujariborore corerã Goãmũ ïgu ñarore ñeri marirã, ñerire iibirã árĩque mũa. Eropirã Goãmũre ñadiabirã árĩbircãque mũa. Eropirã Goãmũ mera õaro árĩque. <sup>15</sup> Eropirã yoañariri boje ïgu deyobiricũ ñarã õpa masique mũa. Masa erã ñerire bũjawerecũ corenigu iimi dohpa Goãmũ erãre tauborore. Eropã ta arĩ mũare gojabeodigu árĩmi mari mahigu mari acaweregu Pablo. Goãmũ masiri mera irire gojabeodigu árĩmi ïgu. <sup>16</sup> Eropã dihta arĩ gojabeodi árĩmi Pablo ïgu gojabeora nũcũ. Cristo ïgu dujariborore, ñerire iibirã mari árĩboro sãre weregu õpa dihta arĩ gojabeodigu árĩmi ïgu. Yujuyerisuburi diasarire were gojabeodigu árĩmi. Gajirã ne masibirã, pee masibirã gũyari mera ïgu eropã arĩrare gohrotomũrima. Eropirã ïgu eropã werera árĩquerecũ ta gajiroppã arĩ gohroto werecãma erã. Goãmũ yare erã gojarapũgue gaji sãre eropã ta iima erã. Erã eropiicũ ñagu Goãmũ erãre dipuwaja moagu peamegue cóãgũcumĩ.

<sup>17</sup> Yũ acawererã, yũ mahirã, i árĩpehrerire i eropa waboro core weretuhabũ mũare. Eropirã ire masirã òaro iique mũa. Ñerã mũare erã gajiropa arĩ buhecũ, peeigũ árĩmi. Gajirã ne masibirã, pee masibirã gũyari mera ïgũ eropa arĩrare gohrotomũrbiricãque erãre Cristo yare duhuri arĩrã. <sup>18</sup> Eropã duhubirã mari Opũre marire taudigũre Cristore òaro umupeonemoque mũapũ. ïgũre òaro masinemoque. Árĩpehrerinũri ïgũre òaro umupeorã mari. “Òagũ turagũ ãhrimi,” arĩrã mari ïgũre. Eropã ta arĩrã. Iripẽta ãhraa.



## 1 San Juan

### *Ñu Jesucristore were gojara āhraa*

<sup>1</sup> Dohpague ta gúa Jesucristo yare were gojarã iiaa mũare. Mata negue ta árĩdigũ āhrimi ĩgũ. ĩgũ masare mari Pagũ mera eropa árĩniguicũ iigũ āhrimi. ĩgũre ĩabũ gúa. ĩgũ wereniguirire pee gúa ya cuiri mera ĩabũ gúa ĩgũre. Eropirã ĩgũre ĩarã, gúa ya mojotori mera mohmepibũ ĩgũre. <sup>2</sup> ĩgũ masare mari Pagũ mera árĩniguicũ iibu árĩgũ ĩgũ i yebague ĩgũ dehyoami. ĩgũ masa dehyoacũ gúa ĩabũ ĩgũre. Eropirã ĩgũre werea gúa mũare. ĩgũ mũari nũcũ mari Pagũ mera árĩniguicãdigũ mari pohro erami. Eropirã ĩgũre gúa ĩarare werea mũare. <sup>3</sup> Mari Pagũ mera gúa õaro āhraa. ĩgũ magũ Jesucristo mera sãre gúa õaro āhraa. Eropirã mũa sã gúa mera, mari Pagũ mera, ĩgũ magũ mera mũa õaro árĩburire gúa mũa sãre Jesucristore werea. Gúa ĩarare gúa peerare werea. <sup>4</sup> Irire ta gúa gojaa mũa õaro mucubiriburire.

### *Goãmũ mera õaro árĩburi āhraa*

<sup>5</sup> Dohpague ta Jesucristo wereniguirare werea gúa mũare. Iri buherire Jesucristo gũare buhecũ gúa peebũ. Ōpa āhraa. Goãmũ õagũ dihta āhrimi. Ñeripũ ne mara ĩgũre. Irire werea mũare. <sup>6</sup> Eropirã mari ñeri iirire iiniguirã, “Goãmũ mera õaro árĩcãa yũhũ,” arĩquererã mari gũyarã iiaa. Eropirã diaye majare iibea. <sup>7</sup> Eropirã mari Goãmũ iidiro dopa ta mari õarire iiniguirã tamera, Goãmũ mera õaro árĩrã iiaa. Mari basi sã õaro árĩrã iiaa. Eropigũ Jesucristo Goãmũ magũ mari ñeri iirire árĩpehrerire coegũ āhrimi. ĩgũ crusague sĩrigũ ĩgũ dire cóãmi. ĩgũ eropiigũ mari ñeri iirire coeniguicãmi.

<sup>8</sup> Yujugũ “Yũ tamera ne ñerire iibea,” eropa arĩgũ ĩgũ basi ta gũyami. Eropigũ diaye majare pepibeami. <sup>9</sup> Eropirã mari ñero iirare werero gahmea Goãmũre. Eropa wererã mari ñero iira pũhrũ Goãmũre mari weretaripehocãcũ, ĩgũ mari ñero iirare cãdijipehocãgũcumĩ. ĩgũ arĩdiro dopa ta diaye ta iigũ õagũ āhrimi. Eropigũ daja mari ñeri árĩpehreri sãre coeweagũcumĩ. <sup>10</sup> “Árĩpehrerã ñerire iirã āhrima,” arĩtuhajapũ Goãmũ. Eropirã “Ne ñerire iibea yũpũ,” mari arĩrã õaro arĩbeaa mari. Mari eropa arĩrã “Goãmũ gũyaricũgũ āhrimi,” arĩdiarã iiaa. Ōpa arĩrã ĩgũ ya buherire gamebirã āhraa.

## 2

### *Jesucristo marire itamumi, arĩ wereñumi Ñu*

<sup>1-2</sup> Yũ porã, mũa ñerire iibiriboro dopa ire gojagũ iiaa. Yujugũ ñero iirare iicũ Jesucristo itamumi marire mari Pagũ iri ñero iirare cãdijiboro dopa. ĩgũ Jesucristo õagũ Pagũ pohro árĩgũ ĩgũ Pagũre ōpa arĩ serēbasacumi mari ñero iira pũhrũ: “Ihĩ ñero iira dipuwaja moabita ĩgũre,” arĩrã “Goãmũ gũyaricũgũ āhrimi,” arĩdiarã iiaa. Ōpa arĩrã ĩgũ ya buhe arĩcumĩ mari Pagũre. Eropigũ Jesucristo mari ñero iira dipuwaja wajayebasadi árĩmi. Mari ñero iira dihtare wajayebasabiridigũ árĩmi. Árĩpehrero majarãguere erã ñero iirare wajayebasadi árĩmi.

<sup>3</sup> Maripũ Goãmũ dorerire iirã árĩrã “Goãmũre diaye ta masia yũhũ,” arĩ masia mari. <sup>4</sup> Yujugũ Goãmũ dorerire iibigũ, “Yũ sã Goãmũre diaye ta masia yũhũ,” arĩgũ gũyagũ āhrimi. Eropigũ Cristo yare masibeami. iiaa. Ōpa arĩrã ĩgũ ya buhe <sup>5</sup> Goãmũ dorerire iigũpũ ĩgũ Goãmũre õaro mahigũ āhrimi. Eropa árĩgũ ta “Yũhũ Goãmũ

mera ðaro árĩcãgu ãhraa,” arĩ masimi ĩgu. <sup>6</sup> Mari “Goãmũ mera ðaro ãhraa,” arĩrã Jesucristo ĩgu ðaro árĩricũdiro dopa ta iiro gahmea.

### *Goãmũ doreriñe ãhraa*

<sup>7</sup> Yũ acawererã, yũhũ mũare dohpaguere werebeoburi mama doreriñe árĩbeaa. I doreriñe mũa negohraguere Jesu buherire peerañe ta ãhraa. Eropirã iriñe doreriñere peetuhajabũ mũa. <sup>8</sup> Iri doreriñe “Gajirãre mahi umupeoque,” arãa. Cristo iri doreriñere iigu masare umupeomi. Eropiro dohpaguere iri doreriñe mũrañe doreriñe árĩquerero ta mama doreriñe sã ãhraa. Dohpaguere mũa pee masibirirañe pehre wahgãro iiaa ðaro. Jesucristo mũare pee masicũ iigu eratuhami. Eropirã mũa sã masare umupeorã iiaa.

<sup>9</sup> Eropigu yujugu gajigure ĩhaturigu árĩgu ñerire iigu ãhrimi. ĩgu ta “Yũhũ ðarire iigu ãhraa,” arĩmasibeami ĩgu gajigure ĩhaturinijagu. <sup>10</sup> Eropigu yujugu gajirãre mahi umupeogu tamera ðarire iigu ðaro ãhrimi. Eropigu ñerire iibeami. <sup>11</sup> Gajirãre ĩhaturigupũ ñerire iigu ãhrimi. Eropigu ĩgu ðaro iiburire pee masibeami ĩgu.

<sup>12</sup> Yũ porã, Goãmũ mũa ñeri dipuwajare cãdijipehodi árĩmi Cristo ĩgu sĩrirañe mera. Eropa mũa ñerire cãdijisũrã árĩcũ mũare wegũ árĩgu ñerire iigu ãhrimi. ĩgu ta “Yũhũ ðarire iigu ãhraa,” arĩmasibre gojagu iiaa. <sup>13</sup> Mũa pagũ sũmarã sã, mũa Cristore negohraguere árĩdigũre masirã ãhraa pare. Mũa eropa masicũ mũa sãre were gojagu iiaa. Mũa mamarã, mũa watĩre tarinũgabũ mũa. Mũa eropa tarinũgarã árĩcũ mũare were gojagu iiaa.

Yũ porã, mũa mari Pagũre masia. Mũa eropa masirã árĩcũ were gojagu iiaa. <sup>14</sup> Mũa pagũ sũmarã, mũa Cristore negohraguere árĩdigũre masia mũa. Mũa eropa masirã árĩcũ mũare were gojagu iiaa. Mũa mamarã, mũa Goãmũ yare umupeoturã ãhraa. Eropirã ĩgu yare diaye majare iiaa. Goãmũ wereniguirire masia. Mũa eropiirã watĩre tarinũgabũ. Eropigu mũare were gojagu iiaa.

<sup>15</sup> I yebare, i yeba majare gamebircãque. I yeba majare gamerã maripũ mari Pagũre gamebeaa mari. <sup>16</sup> I yeba maja ãhraa: Masa erã ñerire uaribejari, ñero ĩha iidari ãhraa. Eropárĩcũ masa erã ya dihta guña mucubiriri ãhraa. Iri Goãmũ mari Pagũ ya árĩbeaa. Iri árĩpehreri i yeba maja ãhraa. <sup>17</sup> Eropirã i yeba majare iirã erã ñero iidari mera dederea wahama i yeba mera. Goãmũ yapũ pehresome. Eropirã Goãmũ yare iirãpũ Goãmũ mera árĩniguicãrãcoma.

### *Diaye maja árĩri, diaye maja árĩbiriri ãhraa, arĩ gojañumi Ñũ*

<sup>18</sup> Yũ porã, i mũũ pehrebro merogã duhyaa. “Cristore ĩhaturidigu gohra arigũcumi,” arĩ Jesu yarã mũare weretuhajama. Dohpaguere Cristore ĩhaturirã bajarã árĩtuhajama. Eropirã dohpaguere i mũũ pehburinũ merogã ero duhyacũ mari masia. <sup>19</sup> Oã Cristore ĩhaturirãpũ mari mera árĩquererã mari yarã diaye árĩbeama. Eropirã marire cohã wiriama. Erã mari yarã árĩrã mari mera dujaboãñuma. Eropirã marire cohã wiriama. Erã eropa wiriacũ mari mera majarã erã árĩbirirare masia mari.

<sup>20</sup> Mũapũre Cristo Espĩritu Santore mũare otuhajadi árĩmi. Eropigu Espĩpehreri i yeba maja ãhraa. ĩritu Santo mũa mera ãhrimi. ĩgu árĩro mera mũa árĩpehreri diaye maja árĩrere masia. <sup>21</sup> Eropigu yũ mũare weregũ, “Diaye maja árĩrere masibea mũa,” arĩbeaa yũhũ. Mũa diaye maja árĩrere masirã gũyacũ sãre masia. Eropigu mũare werea yũhũ.

<sup>22</sup> Ihĩ diaye majare masibigu ãhrimi gũyagupũ. “Jesucristo Goãmũ magũ árĩbeami,” arĩgũpũ gũyagu ãhrimi. ĩgu Cristore ĩhaturigu ãhrimi ĩgu. Eropigu mari Pagũre ĩgu magũ sãre “Erã diaye ta árĩbeama,” arĩgu Cristore ĩhaturigu ta ãhrimi. <sup>23</sup> Ōpa ãhraa: Jesure gamebigupũ mari Pagũ sãre gamebeami. Jesure umupeogu mari Pagũ sãre umupeomi.

<sup>24</sup> Negohraguere mũa Goãmũ yare peebu. Irire ðaro guñaque. Irire guñarã Jesucristo mera ðaro árĩrãca. Eropirã mari Pagũ mera sãre ðaro árĩrãca. <sup>25</sup> Jesucristo marire weremi: Õpa ãhraa ãgũ werera: “Mũa umuri nuca Goãmũ mera árĩrãca,” arĩ werepimi Jesu marire.

<sup>26</sup> Gajirã mũare gũyadjarima. Eropigũ mũare were gojaa. <sup>27</sup> Mũapure Cristo Espĩritu Santore otuhajami. Espĩritu Santo mũa mera árĩnguimi. Eropigũ Espĩritu Santo mũa mera árĩgũ diaye majare mũare masicũ iimi. Espĩritu Santo mũare buhecũ ãha gajigũ mũare buhegure amabeaa mũa. Árĩpehrerire diaye maja árĩrĩre buhemi mũare Espĩritu Santoru. Gũyarire ne buhebeamĩ ãgũ. Eropirã Espĩritu Santo ãgũ mũare buhediro dopa ta Jesucristo yare peerã ãgũ mera ðaro árĩque.

<sup>28</sup> Eropirã, yũ porã, Jesucristo mera majarã árĩque. Mũa eropiirã Cristo ãgũ dujaririnũ árĩcũ ne gũisome ãgure. Eropirã ãgũ dujaririnũ árĩcũ mũa gũhyasĩriri mariro árĩrãca. <sup>29</sup> Cristo Goãmũ magũ ãgũ ðari dihta iidigũ árĩcũ mũa masia. Irire masirã iri sãre masia mũa. “Árĩpehrerã diaye maja ðarire iirã Goãmũ porã ta ãhrima,” arĩ masia mũa.

### 3

#### *Mũa ta Goãmũ porã ãhraa, arĩ werera ãhraa*

<sup>1</sup> Goãmũ mahitaricãmi marire. Eropigũ ãgũ marire “Mũa yũ porã ta ãhraa,” arĩmi. Eropirã ãgũ porã ta ãhraa mari. I yeba majarã ñerã Goãmũre masibeamã. Eropirã erã mari sãre masibeamã Goãmũ porã mari árĩcũ. <sup>2</sup> Yũ mahirã, dohpague Goãmũ porã ãhraa mari. Pũhrugue mari dohpa árĩburire mari ðaro masibeamã dohpa. Cristo dehyoacũ daja diaye ta irire masirãca. ãgũ árĩricurire ãha masirãca. Eropirã Cristo marire dehyoacũ daja ãgũ iro dopa ta mari gohroto árĩrãca. Eropirã ãgũ ðagũ iiro dopa ta iirãca pare. Irire masia mari. <sup>3</sup> Eropã masirã ñerire duhu Cristo ãgũ árĩro dopa ta ðarire iidiaa dohpague sãre.

<sup>4</sup> Árĩpehrerã ñerire iirã Goãmũ dorerire tarinũgarã ãhrima. Ñero iiri Goãmũ dorerire tarinũgari ãhraa. <sup>5</sup> Cristo márĩburire mari ðaro masibeamã dohpa. Cristo dehyoacũ daja diaye ta irire masirãca. ãgũ árĩricurire ãha masirãca. Eropirã Cristo marire dehyoacũ daja ãgũ iro dopa ta mari gohroto árĩrãca. Eropirã ãgũ ðagũ iiro dopa ta iirãca pare. Irire ari masa ñerire cóãbu eramĩ. ãgũpure ñeri ne mara. Mũa irire masia. <sup>6</sup> Eropirã árĩpehrerã Cristo mera majarã árĩrã erã sã ñerire eropa iiniguicãbeama. Ñerire eropa iiniguicãrã Cristore ne masibeamã. Eropã iirã Cristo yarã árĩbeama. <sup>7</sup> Yũ buherã, mũare gũyarãre peebiricãque. Árĩpehrerã diaye majare iirã, Cristo iro dopa ðarã ãhrima. <sup>8</sup> Ñerire eropa iiniguicãgũ watĩ yagũ ãhrimi. Watĩ tamera mata ñerire iinũgadigũ árĩñumi. Eropigũ Goãmũ magũ Jesucristo watĩ dorerire cóãgũ eramĩ.

<sup>9</sup> Eropirã Goãmũ porã ãgũ árĩrĩre opama. Eropirã erã ñerire eropa iiniguicãbeama. Goãmũ erã Pagũ árĩcũ erãpũ ñerire iiniguicãmasibeamã. <sup>10</sup> Õpa Goãmũ porã árĩrãre, watĩ porã árĩrã sãre masirãca. Watĩ porã Goãmũ porã iro dopa ta árĩbeama. Diaye maja árĩrĩre iibirã, gajirãre umupeobirã Goãmũ porã árĩbeama.

#### *Mũa mera majarãre mahi umupeoque, arĩ werera ãhraa*

<sup>11</sup> “Mari mera majarãre mahi umupeoro gahmea,” ne arĩ buhecũ peeabu mũa. <sup>12</sup> Eropirã mari Caĩn iribojegue majagũ ãgũ ñero iidiro dopa ta ñerire iibiricãrã. ãgũ Caĩn watĩ yagũ árĩdi ãgũ pagũ magure wejẽcãñumi. Caĩn ñerire iimuriñumi. ãgũ pagũ magupũ ðarire iimuriñumi. ãgũ eropa ðarire iira dipuwaja Caĩnpũ ãgure ãhaturĩñumi. Eropigũ ãgure wejẽcãñumi.

<sup>13</sup> Eropirã i ɯmɯ majarã ñero iiricurã mari ðarire iicũ ïha ïhaturima marire. Eropirã “¿Duhpirã yare ïhaturiri erã?” arĩrire masirãca. <sup>14</sup> Negohrare mari Goãmɯ yare iibirã árĩnirã mari dederebonirã árĩribɯ. Dohpaguere pare Goãmɯ yare iirã árĩrã ïgɯ mera árĩniguimorã ãhraa. Eropirã ïgɯ itamuri mera Jesu yarãre mahi umupeorã ãhraa. Eropã umupeorã árĩrã “Goãmɯ yarã ãhraa,” arĩ masia mari. Masare mahibirã peamegue wamorã ãhrima. <sup>15</sup> Eropirã erã erã mera majarãre ïhaturirãpɯ masare wejẽrã iro dopa ta iima Goãmɯ ïgɯ ïacũ. Masare wejẽrã ɯmarogue árĩmorã árĩbeama. Irere ðaro masia mɯa. <sup>16</sup> Cristo ïgɯ sĩrirañere guñarã marire ïgɯ mahira gohrare masia. Cristo mari masare mahitarigɯ mari dipuwajare aĩ mari Goãmɯ mera árĩniguiborore sĩrimi. Mari sã gajirãre itamugɯ sĩribu ta árĩqueregɯ mari acawererãre mahi itamuro gahmea. <sup>17</sup> Yujugɯ baja opagɯ Jesucristo yagure mojomorocugure ïaqueregɯ ta ïgure mojomoro ïabigɯ Goãmɯre mahibeami ïgɯ. <sup>18</sup> Yɯ porã, mari “Yɯhɯ masare umupeoa,” mari arĩ wererã erãre itamuro gahmea. Erãre itamubirã erãre mahi umupeobirã iiaa.

### *Gũiro mariro Goãmɯ pohro árĩmasia mari*

<sup>19</sup> Eropã gajirãre mahi umupeorã, “Mari diaye ta Goãmɯ yarã ãhraa,” arĩmasia. <sup>20</sup> Eropirã mari basi “Gajino yɯ ñero iira dipuwaja árĩca yare,” arĩ pepiquererã ta Goãmɯ mera ðaro sĩporãcurã árĩmasia. Goãmɯpɯ árĩpehrerire masigɯ ðaro masimi mari sĩporãrere. <sup>21</sup> Eropirã mari “Ñeri dipuwaja marica yare,” arĩ pepirã ðarire iirã Goãmɯ mera mari gũiro mariro árĩmasia. <sup>22</sup> Goãmɯ ïgɯ dorerire ïgɯ gamerire mari iicũ ïgure mari serẽri nɯcure ogɯcumi marire. <sup>23</sup> Õpa doremi ïgɯ marire: “Goãmɯ magɯ Jesucristore umupeoque. Eropirã mɯa mera majarãre mahi umupeoque Cristo marire ïgɯ doremi dopa ta,” arĩ doremi marire. <sup>24</sup> Goãmɯ dorerire iirã Goãmɯ mera ðaro árĩcãa mari. ïgɯ Goãmɯ sã mari mera ðaro ãhrimi. Goãmɯ ïgɯ Espĩritu Santore obeomi marire. Mari mera árĩgɯ “Goãmɯ yɯ mera ãhrimi,” mari arĩ masiburire Espĩritu Santo marire masicũ iimi.

## 4

### *Goãmɯ yarã gohrare masiro gahmea marire, arĩ werera ãhraa*

<sup>1</sup> Yɯ mera majarã, dohpaguere i ɯmure bajarã gɯyarã ãhrima, “Goãmɯ yare wererã ãhraa,” arĩquererã. Eropirã gajirã mɯa watopegue Goãmɯ yare buherã aricũ ðaro ïaque erãre. “¿Erã buheri noa buheri ãhriri?” arĩ ïaque. “¿Erã Goãmɯ yarã ãhriri?” arĩ ïaque. <sup>2</sup> Õpa masique erãre serẽpirã: “¿Jesucristo i yebague aridigɯ diaye ta masɯ gohra árĩyuri?” arĩ serẽpiñaque erãre. Mɯa eroparĩcũ pee erã Goãmɯ yarã árĩrã “Masɯ ta árĩñumi Jesu,” arĩ yɯhrirãcoma. <sup>3</sup> Erã Goãmɯ yarã árĩbirãpɯ “Jesucristo masɯ gohra árĩbiriñumi,” arĩ yɯhrirãcoma. Erã eropa arĩ yɯhricũ “Erã ya pepiri Cristore ïhaturigɯ ya dorero dopa ta ãhraa,” arĩ masirãca mɯa. “Cristore ïhaturigɯ arigɯcumi,” peetuhajabɯ mɯa. Eropigɯ ïgɯ ya buheri i yebaguere arĩtuhajaa.

<sup>4</sup> Yɯ porã, Goãmɯ yarã ãhraa mɯarɯ. Eropirã mɯa Goãmɯ yare were gɯyarãre tarinɯgatuhajabɯ. Mɯa mera árĩgɯ Espĩritu Santopɯ watĩ tauro ãhrimi. Watĩ i ɯmɯ majarã yagɯ ãhrimi. Eropirã mɯare gɯyarãre tarinɯga, erãre peebirabɯ mɯa. <sup>5</sup> Gɯyarãpɯ i ɯmɯ majarã ãhrima. Eropirã erã i ɯmɯ majare gɯyarire buhecũ i ɯmɯ majarã dihta erãre peema. <sup>6</sup> Maripɯ Goãmɯ yarã ãhraa. Eropirã Goãmɯre masirãpɯ marire peema. Gajirãpɯ Goãmɯ yarã árĩbirãpɯ marire peebeama. Eropirã ðpa arĩ masia mari. “Erã Goãmɯ yare peerã Goãmɯ doreri diaye majare opama. Erã Goãmɯ yare peebirãpɯ watĩ doreri gɯyari majare opama,” arĩ masia mari.

### *Goãmɯ árĩpehrerãre bɯrigã mahiniguigɯ ãhrimi, arĩ werera ãhraa*



<sup>7</sup> Yũ mahirã, mari gajirãre mahicũ Goãmũ iigu ãhrimi. Īgu eropárĩcũ ĩarã mari mera majarãre mahirã. Masare õaro mahirãpũ Goãmũ porã ãhrima. Eropirã erã Goãmũre õaro masima. <sup>8</sup> Masare árĩpehrerãre Goãmũ bũrigã mahiniguigu ãhrimi. Īgu eropa mahiniguigu árĩcũ masare mahibirãpũ Goãmũre masibeama. <sup>9</sup> Goãmũ marire ĩgu mahirãre ĩhmudi árĩmi ĩgu magũre obeogu. Īgu magũre yujugu ta árĩgũre marire taubu obeodi árĩmi i yebaguere. Eropa obeogu marire ĩgu mahirire masicũ iidi árĩmi. <sup>10</sup> Īgu magũre obeora mahiri gohra ãhraa. Mari masa Goãmũre mahibiriquerecũ ĩgu Goãmũpũ marire bũrigã mahidi árĩmi. Eropigu ĩgu magũre obeodi árĩmi mari ñerire cóãbure. Īgu magũre obeora iri ta ãhraa marire ĩgu mahiri gohra.

<sup>11</sup> Eropirã, yũ mahirã, Goãmũ bũrigã marire mahicũ ĩarã mari sã mari mera majarãre mahirã. <sup>12</sup> Masapũ ne mari Pagũre Goãmũre ĩabeama. Īgũre ĩabirã mari árĩquerecũ ta mari mera majarãre mari mahicũ Goãmũpũ mari mera õaro eropa árĩniguicãmi. Eropigu ĩgu mari mera árĩgu marire gajirãre õaro mahinemocũ iimi. <sup>13</sup> Goãmũ marire ĩgu Espĩriture ohami. Eropirã ĩgu Espĩriture mari oparã “Goãmũ mari mera õaro ãhrimi,” arĩ masia mari. <sup>14</sup> Mari Pagũ ĩgu magũre i yeba majarãre taubure ĩgu obeocũ gũa ĩabũ. Eropirã irire ĩanirã gajirãguere irire werea gũa. <sup>15</sup> “Jesucristo Goãmũ magũ ta ãhrimi,” arĩgu ĩgu ta Goãmũ mera õaro árĩgu iimi. Eropigu Goãmũ sã ĩgu mera õaro árĩcãgu iimi.

<sup>16</sup> Eropirã Goãmũ marire mahirire masia mari. Eropirã marire diaye ta mahigu ĩgu árĩcũ masia mari. Goãmũ masare árĩpehrerãre bũrigã mahiniguicãgu ãhrimi. Eropirã masare mahiniguirãpũ Goãmũ mera õaro ãhrima. Goãmũ sã erã mera õaro ãhrimi. <sup>17</sup> I yeba árĩdigũ Cristo Goãmũre gajirã sãre ĩgu mahidiro dopa ta mari sã Goãmũre gajirã sãre mahia. Eropirã mari eropa mahirã mahinemoa, dipuwaja moarinũ árĩcũ mari gũibiriboro dopa. <sup>18</sup> Eropirã mari Goãmũre mahirã gũibeaa. “Goãmũ marire bũrigã mahimi,” arĩ õaro masirã gũisome pare. “Mata Goãmũ yũre dipuwaja moagũcumi,” arĩ pepirãpũ gũia mari. Mari eropa pepirã Goãmũ marire ĩgu mahirire õaro masibeaa.

<sup>19</sup> Marire Goãmũ mahimũhtami. Eropirã mari sã ĩgũre mahia. <sup>20</sup> Yujugu masũ gajigũre ĩhaturigu árĩqueregu “Yũ sã Goãmũre mahia,” arĩgu gũyagu ãhrimi. Gajigũre ĩhaturigu Goãmũre mahibeami ĩgu. Gajigũre ĩgu masigu árĩqueregu ta mahibigu Goãmũ sãre ĩgu ne ĩabigũre mahimasibeami ĩgu. <sup>21</sup> Eropa ãhraa marire Cristo ĩgu doreri: Goãmũre mahirã árĩrã mũa pohro árĩrã sãre mahi umupeoque.

## 5

### *Goãmũ porã árĩrã Goãmũ dorerire iima, arĩ werera ãhraa*

<sup>1</sup> Árĩpehrerã Jesupũre “Cristo ãhrimi. Goãmũ obeodigu ire bũrigã mahimi,” arĩãhrimi,” arĩrã Goãmũ porã ta ãhrima. Gajirã pagũre mahirã ĩgu porã sãre mahia mari. Eropa ta mari mari Pagũre Goãmũre mahirã, ĩgu porã sãre mahia. <sup>2</sup> Eropirã Goãmũ porãre mari mahirire mari õpa masirãca: Goãmũre mahi, ĩgu dorerire õaro ii, ĩgu porã sãre mari mahirã iiaa. <sup>3-4</sup> Īgu dorerire õaro iirã Goãmũre mahirã iiaa mari. Marire Goãmũ ĩgu dorerire iicũ teboricũsũya mara. Eropirã mari árĩpehrerã Goãmũ porã árĩrã, i mũmũ maja ñerire eropa iiniguicãsome. Goãmũre umupeorã ne ñerire gamebeaa. Eropirã ĩgũre mari umupeora pũhrũ ñerire iidiabeaa. <sup>5</sup> Ñerire gamebirã õpa arĩrã ãhraa mari Jesucristore. “Jesu Goãmũ magũ ta ãhrimi,” arĩ umupeorã ta ãhraa. Eropa arĩrã árĩrã ñerire gamebirã ãhraa mari.

### *Goãmũ magũ árĩricũrũre werera ãhraa*

<sup>6</sup> Jesucristo i yebague erami. I yebaguere árĩgu deco mera waĩyesũmi. Deco dihta árĩbeaa. Pũhrũ sĩrigũ ĩgu di cóãmi. Eropirã Jesucristore ĩgu deco mera waĩyecũ ĩha ĩgu ya di cóãcũ ĩha “Ĩgu Goãmũ magũ ta àhrimi,” arĩ masia mari. Jesucristo árĩricũre diaye ta marire árĩpehrerãre masicũ iimi Espĩritu Santo. Espĩritu Santo diaye majare marire masicũ iimi. <sup>7-8</sup> Ũmarogue sãre irire “Jesucristo Goãmũ magũ ta àhrimi,” arĩ wererã Ƴrerã àhrima. Mari Pagũ, ĩgu magũ, Espĩritu Santo erã ta àhrima. Erã Ƴrerã ta àhrima. Eropirã yujugũ iro dopa ta àhrima. I yebague sãre “Jesucristo Goãmũ magũ àhrimi,” arĩ masisũa. ĩgu magũ ĩgu árĩricũre Espĩritu Santo marire masicũ iimi. Eropi Jesure deco mera ĩgu waĩyerare masirã “Ĩgu Goãmũ magũ àhrimi,” arĩ mari masia. Eropirã mari árĩburire Jesu sĩrigũ ĩgu di cóãrañere ĩha masirã “Goãmũ magũ ta àhrimi,” arĩ masia mari. Iri mera marire masiro gahmea. <sup>9</sup> Mari masa dihta wereniguicũ mari peea. Eropirã marire Goãmũpũ ĩgu magũ árĩricũre wereniguicũ ðaro peero gahmea. <sup>10</sup> Eropirã Goãmũ magũre umupeorã ĩgu Jesure were buherire ðaro peema. “Diaye ta àhraa,” arĩ pepima erã Jesu yare buherire. Goãmũ ĩgu magũ yare “Diaye árĩbeaa,” arĩ pepirãpũ “Goãmũ gũyagũ àhrimi,” arĩrã àhrima erã. Goãmũ ĩgu magũre arĩ wererire peebirã àhrima. <sup>11</sup> Goãmũ marire Ƴmũri nũcũ ĩgu mera mari árĩniguicũ iigũcumi. Goãmũ magũre gamerã árĩrã mari árĩcũ ĩgu mera eropa árĩniguicũ iigũcumi marire. I àhraa Goãmũ magũre ĩgu wereri. <sup>12</sup> Eropirã Goãmũ magũre umupeorã Goãmũ mera árĩniguicãrãca. Eropirã gajirã ĩgũre gamebirãpũ ĩgu mera árĩsome.

### *Weretu ĩgu gojara àhraa*

<sup>13</sup> Mũa Goãmũ magũre umupeorã ĩgũre peerã mũa Goãmũ mera eropa árĩniguicãrãca. Mũa Goãmũ mera árĩburire ðaro masicũ mũare were gojagũ iiaa.

<sup>14</sup> Mari, mari dohpa árĩrĩre Goãmũre serẽrã ĩgu gamediro dopa ta mari serẽcũ ĩgu marire ðaro peenũrugũcumi. Eropa mari serẽrã, “Diaye ta ðaro peemi ĩgu,” arĩ masia mari. <sup>15</sup> ĩgũre mari eropa serẽcũ ĩgu marire peemi. ĩgu pee mari serẽropẽ ta ogũcumi. ĩgu eropa peecũ masirã ĩgũre mari serẽropẽ ta ĩgu obu árĩcũ sãre masia mari.

<sup>16</sup> Mari mera majagũ gajigũ Jesucristore umupeogu ñerire ĩgu iigu árĩcũ ĩha ĩgũre Goãmũre serẽbasaro gahmea. Eropa serẽcũ Goãmũ ĩgũre taugũcumi ĩgu dedereborañere. Gaji ñero iiri àhraa. Iri ñero iirire gajigũ ĩgu iigu árĩcũ ĩha Goãmũ ĩgũre dedereburiñere taubeami. Eropigũ mũ acaweregu iri ñerire iicũ Goãmũ taubiriburire iicũ “Ĩgũre Goãmũre serẽbasaque,” arĩbeaa yũhũ mũare. <sup>17</sup> Árĩpehreri ñero iiri ñetariari àhraa Goãmũ ĩgu ĩacũ. Eropa árĩquerecũ gaji ñeri iiri peamegue wacũ iibeaa masare.

<sup>18</sup> Goãmũ magũ Jesucristo Goãmũ porãre ðaro cãhmotami. Eropigũ watĩpũ Goãmũ porãre ñero iirire doremasibeami. Eropirã Jesucristo cãhmotari mera Goãmũ porã ne ñero iirire eropa iiniguicãbeama. Irĩre mari masia.

<sup>19</sup> Mari Goãmũ porã àhraa. Watĩ i Ƴmũ majarã opu àhrimi. Iri sãre masia mari.

<sup>20</sup> Goãmũ magũ i yebague aridi Goãmũre ðaro masicũ iimi ĩgu marire. Eropirã Goãmũre “Diaye ta àhrimi,” arĩ masia mari. Eropirã Goãmũ magũ Jesucristo yarã àhraa mari. Eropirã Goãmũ mera mari ðaro árĩniguicãrã iiaa. Ihĩ diaye ta Goãmũ gohra ta àhrimi. Eropirã ĩgu mera árĩniguicãrãca.

<sup>21</sup> Yũ buherã, goãmarã wéanirãre “Goãmũ àhrimi,” arĩ umupeobiricãque. Goãmũ dihtare umupeoque. Iripẽta àhraa.

## 2 San Juan

*Gajirãre were gojañumi Ñu. Jesu yare, diaye mahiri sãre wereñumi*

<sup>1-2</sup> Yũhũ bugũ mũre Goãmu beyedigore mũ porã sãre ipũre gojabeoa. Jesucristo yare diaye majare opaa mari. Iri mari mera árĩniguicãroca. Eropigũ diaye ta mahia yũhũ mũare. Yũ dihta mahibea mũare. Gajirã Jesu yare masirã sã diaye ta mũare mahima. <sup>3</sup> Goãmu mari Pagũ, Jesucristo ãgũ magũ mera diaye ãgũ mahiri mera marire õaro iigũcumi. Eropigũ marire mojomoro ãagũcumi. Eropigũ marire õaro árĩcũ iigũcumi ãgũ.

<sup>4</sup> Mari Pagũ marire ãgũ dorediro dopa ta mũ porã yujurãyeri ãgũ yare õaro yũhrirã árĩcũ peebũ. Eropa peegũ mucubiriabũ. <sup>5</sup> Eropigũ, acawerego, mari mera majarãre mahi umupeodorea marire. Yũ doreri mama doreriñe árĩbeaa. Iri doreriñe marire mata árĩtuhaya. <sup>6</sup> Eropirã Goãmu dorerire iipehorã mari ãgũre mahia. Eropiro iri doreriñe ãhraa mũa negohrare peerañe. Gajirãre eropa mahiniguicãrã árĩque.

*Bajarã gũyaricũrã árĩrãcoma, arĩ werera ãhraa*

<sup>7</sup> Bajarã gũyarã i mũmu majarãre buherã wahama. “Jesucristo i yebaguere aridigũ masũ dupũ gohra árĩgũ aribiriñumi,” arĩma. Erã gũyarã Cristore ãhaturigũ iro dopa ta iima. <sup>8</sup> Eropirã õaro pee masique mũa. Mũare gũyarãre peebiricãque Goãmu mũare ãgũ õaro iiburire cóãri arĩrã. Erãre peebiricũ Goãmu mũa õari iira waja obeogũcumi mũare.

<sup>9</sup> Árĩpehrerã Jesucristo buherire peenirã irire cóãrã Goãmu yarã árĩbeama pare. Jesucristo buherire õaro peenũrũrãpũ Goãmu mari Pagũ yarã ãhrima. Goãmu magũ Jesucristo yarã sã ãhrima. <sup>10</sup> Eropirã mũa yujugũ Jesucristo ya buherire gamebigũ gaji buherire buhegũ mũa pohro eracũ ãgũre game bocatĩribiricãque. Mũa ya wirigue ñajadorebiricãque. <sup>11</sup> Gaji buherire buhegũ Jesucristo yare umupeobigũ ñero iigũ ãhrimi. Eropirã mũa ãgũre bocatĩri serẽrã ñero iidigũre itamurã iiaa. Eropirã ãgũre bocatĩri serẽbiricãque.

*Were gojatura ãhraa*

<sup>12</sup> Baja yũhũ mũare werediaqueregũ ta irire paperapũgue gojabeodiabirica. Yũ basi ta mũare ãagũ wadiaca. Mũare ãagũ weretamugũca mari õaro mucubiriburire.

<sup>13</sup> Mũ pagũ mago Goãmu beyedigo igo porãpũ mũare õadorema. Iripẽta ãhraa.

### 3 San Juan

*Gaji carta gojañumi daja Ñu. Gayo ïgu ðaro iirare wereñumi*

<sup>1</sup> Yũhũ buꝑũ mũre Gayore diaye ta yũ mahigũre ipũre gojabeoa.

<sup>2</sup> Yũ mahigũ, mũhũ Goãmũre ðaro umupeocũ masia yũhũ. Mũhũ Goãmũ mera ðaro árĩro dopa ta mũ dũpũ sã ðaro árĩcũ serẽbasaa yũhũ Goãmũre. <sup>3</sup> Gajirã Jesucristo yarã yũ pohro erarã mũ árĩricũre yũre wereama. Cristo gamerire diaye mũ iirare wereama erã yũre. Erã eropa werecũ peegũ bũrigã mucubiriabũ yũhũ. <sup>4</sup> Jesucristo yarã yũ buhenirã Jesucristo yare diaye ta árĩre erã iicũ pee bũrigã mucubiria yũhũ.

<sup>5</sup> Yũ mahigũ, mũhũ Jesucristo yarãre itamugũ ðaro iiaa mũhũ. Jesucristo yarã mũ ïha masibirã sãre itamugũ ðatariaro iiaa. <sup>6</sup> Erãpũ erãre mũ umupeorare wereama gũare Jesucristo yarã gamenererogue. Eropigũ Goãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa iigũ ðaro iigũ árĩgũca mũhũ. Eropa ta marire itamuro gahmea Goãmũ yare buherãre. <sup>7</sup> Erã Jesucristo ya árĩburire buhe curirã warã, Jesucristore umupeobirãpãre erã itamurire ne serẽbeama. <sup>8</sup> Eropirã marire Jesucristo yare buhe curirãre itamuro gahmea. Erãre eropa itamurã erã iiro dopa ta mari sã Goãmũ yare buherire itamurã iiaa.

*Diotrefe ïgu ñero iira ãhrraa*

<sup>9</sup> Eoãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa ro majarãre Jesucristo yarãre yũ gojarapũre gojabeorabũ. Diotrefepũ ïgu basi erã opũ árĩdiagũ yũ wererare peediabiripũ. <sup>10</sup> Eropigũ mũa pohro yũ ejara pũhrũ ïgu iirare werepehogũra. Gũare ñero wereniguipũ. Eropigũ Jesucristo yare buhe curirãre bocatĩribiripũ. Gajirã ero árĩrã erãre bocatĩridiacũ gamebiripũ. Gajirãpũ erã buhe curirãre bocatĩricũ ïha ïgu Diotrefe erã bocatĩrira waja erãre cohã wiupũ Jesucristo yarã gamenereri wihigue.

<sup>11</sup> Yũ mahirã, ñero iirãre ïhacũbiricãque. Õaro iirãre ïhacũque. Õarire iirã Goãmũ yarã ãhrrima. Ñerire iirã Goãmũre masibeama.

*Demetrio ïgu ðari iira ãhrraa*

<sup>12</sup> Árĩpehrerã “Demetrio ðagũ ãhrrimi,” arĩma. Eropirã ïgu iirire ïarã ðaro ïgu iira árĩcũ masima masa. Gũa sã ïgu ðaro iirare eropa ta werea. Gũa wereniguiripũ diaye árĩcũ masia mũa.

*Ñu weretura ãhrraa*

<sup>13</sup> Mũare baja werediarabũ. Irire gojasome. <sup>14</sup> Merogã pũhrũ mũare ïagũ wadiaca. Eropirã mari basi weretamurãca.

<sup>15</sup> Õaro árĩque mũhũ. Mari mera majarã Jesucristo yarã mũre ðadorema. Ero majarã mari mera majarã sã ðaporo. Iripẽta ãhrraa.



## San Judas

### *Juda Jesu yaräre gojabeoñumi*

<sup>1</sup> Yuhũ Juda Santiago pagũ magũ Jesucristo pohro majagũ mũare Jesu yaräre ipũre gojabeoa. Mũare mari Pagũ Goãmũ ĩgũ beyenirã áhraa. Eropirã ĩgũ mahiri mera õaro áhraa mũa. Eropigũ mũare Jesucristo ĩhadibumi mũa ñerire iibiriborore. <sup>2</sup> Õadorea mũare. Goãmũ itamuro mera õaro árĩque mũa. Eropigũ Goãmũre mojomoro ĩhadore, mũare mahidoregũ serẽbasaa yuhũ Goãmũre. Mũa gajirã mera õaro áhri erãre mahiborore serẽbasaa Goãmũre.

### *Gũyarã erã buherire werenũgañumi Juda*

<sup>3</sup> Goãmũ marire peamegue wabonirãre ĩgũ itamuripũre turaro gojabeodiarabũ mũare, yũ mahirãre. Eropa gojadiaqueregũ ta dohpaguere gũyari buherire gamedorebigũ mũare gojabeoa. Gajirã mũa pohro ejanirã erã gũyari buherire mũa peebiriboro dopa mũare gojabeoa dohpaguere. Eropirã Jesucristo ya buheripũre buhe tarinũgaque. I buheripũre peerã, mari Goãmũre õaro umupeoa. I buheripũ Jesu ĩgũ apinirã ĩgũ yaräre erã buhera eropa árĩniguicãro iiaa gohroto marĩro. <sup>4</sup> Bajamerãgã masa ñerã ĩha masiya marirã mũa pohro ejanirã árĩma. Mũa mera árĩrã erã buherire buhe gũyama gũare ĩha masiri arĩrã. Õpa arĩ buhema: “Goãmũ yarã mũa árĩcũ, ĩgũ mahimi mũare. Eropigũ nome mera mũa ñero iicũ ĩgũ mũare ne dipuwaja moasome,” arĩ buherima erã. Eropirã mari Opũre yujugũ ta árĩgũre Jesucristore “Goãmũ magũ árĩbeamĩ,” arĩ buherima erã. Eropa arĩ buherãre Goãmũ ĩgũ dipuwaja moaborore wereñumi iribojegũere ĩgũ yare erã gojarapũgue.

<sup>5</sup> Dohpaguere gajire guñacũ iidiaa mũare. Ire mũa masiquerecũ ta dipaturi mũare ire guñacũ iidiaa. Goãmũ ĩgũ yaräre Egipto árĩnirãre ĩgũ wiura pũhrũ erã mera majarã ĩgũre umupeobirinirãre Goãmũ wejẽñumi. <sup>6</sup> Eropirã mũa gajirã sãre guñaque. Gajirã anyuapũ Goãmũ doreri iinirã, pũhrũ iidibiriñuma. Eropirã erã ĩgũ árĩdore apidiro sãre erã árĩdiabiriñuma. Eropirã erã árĩdirore cóãcãñuma erã. Erã eropa cóãcũ ĩagũ Goãmũ erãre naitĩarogue erãre peresu iinũmi. Eropirã erã pehrerinũ core comedare dirinirã iro dopa árĩniguicãrãcoma. Eropigũ pehrerinũ árĩcũ dipuwaja moagũcumĩ Goãmũ erãre. <sup>7</sup> Eropa ta ñero iinũma gajirã sã. Erã sãre guñaque mũa. Erã Sodoma waĩcũri maca majarã, Gomorra waĩcũri maca majarã iri macari pohro árĩri macari majarã sã nome mera ñero iimũriñuma. Eropirã gajiropa árĩri sãre iinũma. Erã mũapũ erã basi ta erã dũpũ mera ñero iinũma. Nome sã eropa ta iinũma erã seyaro. Erã eropa iira dipuwaja Goãmũ erãre soepehocãñumi. Erãre soegũ Goãmũ árĩpehrerã ĩgũre tarinũgarãre ĩgũ dipuwaja moaburire ĩhmũgũ iinũmi. Erãre ĩgũ dipuwaja moari peame ne yarisome.

<sup>8</sup> Erã Goãmũre tarinũganirã iidiro dopa dohpague sã eropa ta iiniguicãma gũyarire buherã. Erã pee masibirã iro dopa ta erã dũpũ mera ñero iima. Eropirã mari Opũ dorerire gamebeama erã. Eropirã deyobirãre, mũaro oparãre, turarãre erãpũ ñero werenigũ corema. <sup>9</sup> Õagũ anyua opũpũ Migue waĩcũgũ ĩgũ turagũ árĩqueregũ ta watĩpũre ñero werenigũ corebiripũ. ĩgũ Moise dũpũ mũararore gamegũ, watĩ mera game dũyasopũ. Turagũ árĩqueregũ ta ĩgũ watĩ tauro “Yũ tamera turaa,” arĩ pepibiripũ. Eropigũ ĩgũ gamero watĩre “Peamegue waporũ,” arĩ weresãbiripũ Goãmũre. Eropigũ õpa arĩpũ watĩre. “Goãmũgue mũre turiporo,” arĩpũ Migue watĩre. <sup>10</sup> Oã gũyarãpũ erã masibirãre ñero werenigũ corema. Eropirã waimũrã pee masibirã erã gamero ñero iiro dopa ta erã gũyari wererãpũ eropa iimaacãma. Eropa iirã árĩrã peamegue warãcoma.

<sup>11</sup> Erã ta ñero tarirãcoma. Caín iribojegue majagu iidiro dopa ta ñero iima erã. Eropirã Balam sã ïgu iidiro dopa ta erã niyerure mahi, aidiarã gúyarire buhema. Eropirã niyeru aïri dihtare pepima erã. Eropirã iribojegue majagu Coré waïcugú ïgu opure Moiserë ïgu cóãdorediagú ïgu iidoreldiro dopa ta erã sã Jesure eropa ta cóãdoreldama. Eropirã ïgu iidiro dopa ta erã sã peamegue warãcoma. <sup>12</sup> Erã mure gúya wererãpu mua game mahi ii ïhmuburi bosenure barã, umupeori mariro erã erã gamero bira, erã seyaro ta barire bapehocãma gajirãre oro mariro. Eropirã ñerire iirã erã mua bosenure ðarinuri waborañere goroweoma. Deco mariri imica cururi iri mari otera itamubiro dopa ta erã gúyarire buherã ne mure itamubeama. Eropiro iri imica cururi miruñe weãcũ eropa gohrotoniguiro dopa ta erã gúyarã sã erã wereniguirire gohrotonigucãma. Yucu ðucacubiriri yucu duhpiburi árĩbiro dopa erã duhpimorã árĩbeama. Erã buheri mera gajirãre Goãmure umupeocã iibeama. Yucugú ðuca maricã ïha mari duha peamegue soe cóãcãa irigure. Eropa ta Goãm erãre gúyarãre peamegue cóãgucumi. <sup>13</sup> Pãgúri pumarare pamujupira iro dopa erã ñerire gúhyasurire wereniguima. Necãmu yuridija ïgu pehrero dopa ta erã sã pehrea warãcoma. Erã eropa ñero iira dipuwaja dederea warãcoma. Goãm erãre dipuwaja moacã naitãroque árĩnigucãrãcoma.

<sup>14-15</sup> Enoco iribojegue majagu Adán pãhrũ siete cururi pãhrũ majagu ðpa arĩmuriñumi. “Peeque yure. Goãm bajarã ïgu anyua ðarã mera árĩpehrerã ñerãre erã ñerire iira dipuwaja moagu arigucumi. Eropigu árĩpehrerã Goãmure ïhaturirãre erã ñeri iira dipuwajare erãre masicũ iigu arigucumi Goãm. Eropigu Goãmure erã ñero wereniguira dipuwaja sãre erãre masicũ iigu arigucumi,” arĩmuriñumi Enoco murũ. <sup>16</sup> Erã gúyarã gajirãre ðyaso ñero werenigui corerã, erã ñero ðaribejari dihtare iirã ãhrima erã. Eropirã “Gajirãre masitarinugaa gaa,” arĩrima erã. Eropirã erã gamero dopa iidiarã gajinore emadiarã, peemaja ðaro wereniguima masare.

### *Jesu yarãre werenemoñumi Juda*

<sup>17</sup> Mari Opũ Jesucristo buhedore ïgu apinirã erã buherare guñaque murũ, yũ mahirã. <sup>18</sup> Õpa arĩma erã mure. “I yeba pehrebro coregã Goãmure ñero arĩ wereyarã árĩrãcoma. Eropirã erã Goãmure gamebirã, ñerire erã ðaribejarire iirãcoma erã,” arĩ werema Jesu ïgu apinirã mure. <sup>19</sup> Jesu yarãre erã basi erã game ïhaturicũ iima erã gúya wererãpu. Eropirã ñerã erã ñeri ðaribejarire iirã árĩrã, Espiritu Santore ne opabeama erã.

<sup>20</sup> Murũ yũ mahirã, Jesucristo ya buherire ðaro peenemoque guñaturarã mua árĩboro dopa. Iri buheripũ ðataria. Espiritu Santo itamuri mera Goãm mere wereniguique mua. <sup>21</sup> Goãm mure burigã mahimi. Eropirã ïgu mure mahiniguiboro dopa ñeri mariro árĩnigucãque Goãm ïgu dorero dopa. Eropirã Jesucristo mere mua eropa árĩniguiburire coreque. ïgu marire mojomoro ïagu ðmaroguerë eropa árĩnigucũ iigucumi.

<sup>22</sup> Cristo yare peediabiriñarirãre mojomoro ïaque. Eropirã erãre Jesucristo ya diaye árĩrere wereque. <sup>23</sup> Erãre peamegue wabonirãre Goãmure itamucũ iique mua. Gajirã ñerire iirã wahama. Erã ñerire dooque. Erãpũre mojomoro ïaque mua. Erãre itamurã mua sã ðaro iique erã ñeri iirire ïhacũri arĩrã. Gãhraricuri suhrirere mua gamebiro dopa ta, gajirã erã ñeri iirire gamebircãque irire pehreri arĩrã.

### *Juda Goãmure ïgu umupeori ãhrũ ðmaroguerë eropa árĩnigucãa*

<sup>24-25</sup> Goãm mari Opũ marire ïhadibumasimi ñerire mari iibiriboro dopa. Eropigu ïgu marire ñeri dipuwaja marirãre ðmarogue ïgu pohrogue apimasimi. Eropa marire ïgu erogue apicũ mari mucubirirãca. ïgu Goãm yujugu ta ãhrimi. Eropigu peamegue wabonirãre taugu ãhrimi ïgua. ïgũpũ iribojegue dohpague sãre

õatariagu, mari tauro opa árĩgu, turatariagu, árĩpehrerãre doregu ãhrimi. Īgu eropa  
árĩgu árĩcũ Jesucristo yarã árĩã ĩgare umupearã. Eropa ta iirã. Iripẽta ãhraa.

## Apocalipsis

*Puhrugueru I umu dohpa waborore marire masicũ iimi Jesucristo, arĩ gojañumi Ñu*

<sup>1</sup> Ipũ mera Jesucristo igu yarãre masicũ iirare were gojabeogu iiaa. Mari Pagu Goãmupũ irire weredoregu apipũ Jesucristore. Igu yarãre igu pohro majarãre masicũ iidoregu apipũ. Eropigu puhru waburire marire masicũ iidoregu apipũ Jesucristore. Eropigu Jesucristo marire eropa masicũ iibu igu anyure obeodigu árĩmi yure Ñure irire weredoregu. <sup>2</sup> Eropigu yuhu Ñu baja iamuh̄tabu Goãmũ igu dohpa iiburire. Goãmũ igu wereniguiri sãre peeabũ. Eropigu árĩpeh̄reri yu ãarare yu peerare were gojabeogu iiaa. Jesucristo igu basi ta diaye arĩrare were gojabeogu iiaa.

<sup>3</sup> Ipũ mera puhrugue dohpa waburire were gojagu iiaa. Merogã duhyaro iiaa iri árĩpeh̄rero eropa waboro. Eropirã árĩpeh̄rerã ipũre buherã, yu wererire ðaro yuh̄rirã ðaro mucubirirã árĩrãcoma.

*Siete iglesia majarãre Jesu yarã gamenererãre gojabeopũ Ñu*

<sup>4</sup> Yuhu Ñu mũare siete cururi majarãre Jesu yarãre Asia yeba majarãre gojabeoa. Goãmũ igu mahiri mera mũare ðadorea. Eropirã igu itamuri mera ðaro árĩque mũa. Igu negohraguere eropa árĩniguidigu árĩñumi. Dohpague sãre eropa ta árĩniguimi. Puhrugue sãre eropa ta árĩniguigucumi. Goãmũ igu opu doaro core Espĩritu Santo ahrimi. Siete suburi maja turari árĩpeh̄reri opagu ahrimi. Igu mera sãre yu mũare ðadorea daja. <sup>5</sup> Cristo igu mahiri mera mũare ðadorea daja. Igu Cristo Goãmũ yare guyarõ mariro weregu ahrimi. Eropigu igu s̄ridigu igu masa mũariadigu ne dipaturi s̄risome igu. Igu yarã waborore masa mũariamuh̄tadigu ahrimi. Eropigu i yeba majarã árĩpeh̄rerã oparã tauro opu ahrimi igu. Marire mahigu igu di cóara mera mari ñeri iirare cóadi árĩmi igu. <sup>6</sup> Eropa cóagu marire oparã wamorãre wacũ iidigu árĩmi igu. Eropigu marire pahia masare Goãmũre serẽbasarã wamorã sãre wacũ iidigu árĩmi. Eropigu Goãmũ mari Pagu yare iimorãre wacũ iidigu árĩmi igu eropa s̄rigu. Igu eropa iidigũre ðaro werenigui umupeoro gahmea árĩpeh̄rerinũri. Árĩpeh̄rerã tauro opu eropa árĩniguimi igu. Eropa ta árĩporo.

<sup>7</sup> ðaro pee masi coreque mũa. Imica cururi weca دچارigucumi Cristo. Igu eropa aricũ ãarãcoma árĩpeh̄rerã. Igũre crusague pabia wejẽnirã mũra sã ãarãcoma. Eropirã igu aricũ ãarã i yeba majarã árĩpeh̄reri cururi majarã orerãcoma guirã. Eropa ta árĩporo.

<sup>8</sup> ðpa arĩmi mari Opu Goãmũ: “Yuhu árĩpeh̄rerire ihacũnugudigu ahraa. Eropigu árĩpeh̄rerire peh̄recũ iibu ahraa, arĩmi. Iribojegue sãre eropa árĩniguimuribũ. Dohpague sãre eropa ahraa. Puhrugue sãre árĩgũra,” arĩmi Goãmũ.

*Jesucristore gosesirigũre yu ihabũ, arĩ werepũ Ñu*

<sup>9</sup> Yuhu Ñu mũa acaweregu Jesu yagu ahraa. Eropigu mũa iro dopa ta yu sã Jesu ya árĩburire yu iira dipuwaja ñero taribũ. Eropigu mũa iro dopa ta yure erã ñero iiquerecũ igu itamuri mera Jesure cóãbiribũ. Mari yujuro mera igu Opu arĩro majarã árĩmorã ahraa. Yaha yeba majarã erã cóãdigu árĩgu Patmo waĩcũri nũgũrogue ahraa. Goãmũ yare Jesucristo igu werera sãre gajirãre yu wereri dipuwaja õgue erã cóãbeodigu ahraa. <sup>10</sup> Ohõ yujunũ soorinũ arĩcũ Espĩritu Santo yure quẽrogue ihmuami. Igu eropa ihmucũ yu purupurũ burigã wereniguiri busuro dopa carabũ.



Corneta turaro busuro dopa eropa ta busuro carabu igu wereniguicũ. <sup>11</sup> Ōpa arĩgu carami yu peecũ:

—Yũhu árĩpeherrerire ñhacũnugudigu añhraa. Eropigu yũhu árĩpeherrerire pehrecũ iibu añhraa. Dohpague mu ñaburire gojaripũgue goja aĩque. Mu eropa goja aĩra puhru siete cururi majarãre Goãmu yarãre oboeque iripũre. Erã siete cururi majarã Asia yeba árĩri macari majarã añhrima. Eropigu Efeso majarãre, Esmirna majarãre, Pérgamo majarãre, Tiatira majarãre, Sardis majarãre, Filadelfia majarãre, Laodicea majarãre mu ñaburire gojabeoque, arĩgu carami yure.

<sup>12</sup> Igu eroparĩcũ peegu majinugajabu yure wereniguigure ñabu. Eropa majinugajagu siete sihãgori yucure erã duhpeora yucure oro mera erã iira yucure ñhabu.

<sup>13</sup> Iri yucu watope masu iro dopa bejagure ñhabu yũhu. Igu yoari suhriro sañagu añhrami. Igu guburigue dijimerejabu igu suhriro. Eropigu oro mera erã iira gasiro mera igu coretihbire tuãdiudigu añhrami. <sup>14</sup> Eropiro igu poari yaji poari iro dopa boreabu. Igu cuiri peame porã iro dopa goseabu. <sup>15</sup> Igu guburi bronce waĩcũri come timura come iro dopa goesiriabu. Eropiro igu wereniguiri baja utã dipabu iro dopa busuro carabu. <sup>16</sup> Igu mojoto diaye maja mojotopu siete necã opãmi. Eropiro igu disirore ñoserimiji pepũri usirimiji cuũuami. Eropiro abe umu majagu igu cuimijuro dopa igu diapo turaro goesiriamu.

<sup>17</sup> Eropigu igure ñagu uca waha igu guburi pohro mehmerejabu sĩrigu iro dopa. Yu eropa mehmerejacũ ñagu igu, igu mojoto diayepu mera yure duhpeo õpa arãmi:

—Ucabita. Yu árĩpeherrerire ñhacũnugudigu añhraa. Eropigu árĩpeherrerire pehrecũ iibu añhraa. <sup>18</sup> Ojocariniguigu añhraa yũhu. Sĩridigu árĩribu. Dohpaguere ñaque. Árĩpeherrerinũri eropa ojocariniguicãa yũhu. Sĩridi dipaturi masagu dipaturi masare sĩribiricũ iimasia yũhu. Eropigu masare peamegue wabiricũ iigu añhraa yũhu. <sup>19</sup> Eropigu dohpague mu ñarare gojaque. Puhrugue eropa waboro sãre ñagu gojaque. <sup>20</sup> Oã siete necãre yu mojoto diayepu oparãre weregura mure. Eropigu siete sihãgori yucure erã duhpeora yucu oro yucu sãre weregura. Yu õpa arĩ wererire iribojegue majarãre ne werebirimũribu. Ōpa añhraa iri: Siete necã siete cururi majarã yaharã oparã árĩrã iro dopa añhrima. Eropiro siete sihãgori yucure erã duhpeora yucu siete cururi majarã yaharã iro dopa añhrima, arãmi yure Jesucristo.

## 2

### *Efeso majarãre Jesu yarãre gojanugadoreñumi Ñure*

<sup>1</sup> Eropa arĩtuhaja õpa arĩnemoami yure gojadoregu:

—Efeso majarã yaharãre, erã opu sãre õpa yu arĩrire arĩ gojabeoque mũhu. Yũhu mojoto diayepu siete necãre opagu añhraa. Eropigu siete sihãgori yucu watope curigu añhraa. Eropa curigu arĩgu mũare õpa arĩ werea: <sup>2</sup> Árĩpeherreru mũa iirare masipehoa. Yaha árĩburire turaro mohmeabu mũa. Yure mũa umupeo duhubirabu. Ñerire iirãre mũa ñadiabirabu. Eropirã “Jesu buhedoregu igu apinirã añhraa,” arĩmaacãnirãre queoro erã buhebiricũ ñarã, guyarã erã árĩcũ masiabu mũa. <sup>3</sup> Yahare mũa iira dipuwaja mũa ñero tariquererã erã guyarãre tarinugabu mũa. Eropirã yure ne duhubirabu mũa. “Irire gariborea waca pare,” arĩbirabu mũa. <sup>4</sup> Eropa mũa õarã árĩquererã ta yujuñere õaro iibea mũa. I añhraa iri: Yure õaro mũa mahimũhtadiro dopa dohpaguere iibea mũa. <sup>5</sup> Yure mũa umupeomũhtarare guñaque mũraro ta daja. Dohpaguere mũa yure umupeobiriqueyarire guñaque. Eropirã mũa irire mũa ñeri iirare bujawereque. Irire duhuque. Eropa duhurã yahare mũa iimũhtadiro dopa ta iique daja. Mũa ñeri iirare mũa duhubiricũ ñagu, yujugu mũa yagure sihãgodigure aĩ cóãgura. Eropa iigu mũa yuju curu majarãre cóãgura. Mũa ñeri iirare duhubiricũ mũa yaha curu majarã arĩñirãre duhpehrecũ iigura. <sup>6</sup> Yure umupeobiriqueyarã

áríquererã ta ire ðaro iibũ mũa: Nicolaita yare buherãre ñerãre ñadiabeaa mũa. Yũ sã erãre ñadiabeaa. <sup>7</sup> Gamiricũrã ãhraa mũa. Eropirã peeque. Mũare yaha curu majarãre Espíritu Santo ñgu wererare peeque mũa sã. Òpa arĩmi ñgu: “Árĩpehrerã Jesure umupeo duhubirãre Goãmũ ya pohe majagu dũcare paraíso majagu dũcare badoregũra. Irigu dũca ojocaririre odigu ãhraa,” arĩmi Espíritu Santo, arĩ were gojabeoque Efeso majarã yaharãre erã opu sãre, arãmi yũre Jesucristo.

*Esmirna majarãre Jesu yarãre gojabeodoreñumi Ñure*

<sup>8</sup> —Esmirna majarã yaharãre erã opu sãre ðpa yũ arĩrere gojabeoque mũhũ, arãmi yũre Jesucristo. Yũhũ árĩpehrerire ñhacũnugudigu ãhraa. Eropigu árĩpehreri pehrecũ iibu ãhraa. Sírĩa wabũ. Dipaturi ojocaria daja. Eropigu ðpa arĩ werea mũare: <sup>9</sup> Mũa ñero tarirare masia. Mojomorocũrã mũa árĩcũ sãre masia. Eropa mojomorocũrã áríquererã ta ñgu wereniguirire peerã Goãmũ yare ðarire wũaro opaa mũa. Gajirãpũ mũare ñhaturirã mũare erã ñero quere moarare masia. Erã “Gũa judio masa Goãmũ yarã ãhraa,” arĩquererã gũyarã iima. Erã Satanare umupeorã ãhrima. <sup>10</sup> Dohpaguere mũa ñero tariburire gũibiricãque. Peeque mũa. Watĩ mũare Goãmũre duhudoregũ yujurãyeri mũa mera majarãre peresu iidoregũcumi. Diez nũri gohra ñero tarirãca mũa. Erã eropa ñero iicũ mũare erã wejẽdiaquerecũ ta yũre yaha sãre ne cóãbiricãque. Mũa yũre eropa cóãbiricũ ñagu árĩpehrerinũri mũare ðaro árĩcũ iigũra. <sup>11</sup> Gamiricũrã ãhraa mũa. Eropirã peeque. Mũare yaha curu majarãre Espíritu Santo ñgu wererare peeque mũa. Òpa arĩmi ñgu: “Árĩpehrerã Jesure umupeo duhubirã peameguere wasome,” arĩmi Espíritu Santo, arĩ gojabeoque Esmirna majarã yaharãre erã opu sãre, arãmi Jesucristo yũre.

*Pérgamo majarãre Jesu yarãre gojabeodoreñumi Ñure*

<sup>12</sup> —Pérgamo majarã yaharã erã opu sãre ðpa yũ arĩrere gojabeoque mũhũ, arãmi yũre Jesucristo. Yũhũ ñoserimijire pepũri usirimijire opagu ãhraa. Mũare ðpa arĩ weregũra: <sup>13</sup> Mũa árĩrore masia. Erogue mũa ya maca majarã opu Satana ãhrimi. Erã Satanare umupeoquecũ mũapũ yũre umupeoa. Erã mũa mera majagu mũrũre Antipa mũrũre yahare ðaro weredigu mũrũre wejẽma. Ñgũre erã wejẽcũ ñaquererã ta yũre ne umupeo duhubirabũ mũa. <sup>14</sup> Mũa eropa umupeo duhubiriquererã merogã yũre tarinũgabũ mũa. Yujurãyeri mũa mera majarã Balaam ya buherire gahmema. Iribojegue majagu ñgu Balaam waĩcũgũ ðpa arĩmũriñumi Israe masare ñhaturirã erã opuere: “Israe masare tarinũgadiagu ðpa iique. Goãmarã wéanirãre mũa orare barire badoreque erãre. Eropigu nome mera ñero iicũ iique erãre,” arĩ weremũriñumi Balaam gajirã opuere Balaco waĩcũgũre. Iribojegue ñgu eropa ñero iidorediro dopa ta dohpague sãre ñero iicũ iima yujurãyeri mũa mera majarãre. <sup>15</sup> Eropirã erã iro dopa ta gajirã mũa mera majarã Nicolaita buherire gahmema. Iri buheri sãre ñadiabeaa yũhũ. <sup>16</sup> Eropirã mũa iri ñeri iirire duhuque mũa. Mũa eropa duhubiricũ ñagu yojaro mera mũa pohrogue wagũ, eropa ñero iirã mera gamequeãgũca. Yũhũ disirogue cuñurimiji ñoserimiji mera gamequeãgũca erã mera. <sup>17</sup> Gamiricũrã ãhraa mũa. Eropirã mũa ya curu majarãre yaharãre Espíritu Santo ñgu wererare peeque mũa. Òpa arĩmi ñgu: “Árĩpehrerã Jesure umupeo duhubirãre mana waĩcũri barire umaro maja barire ogũra. Utã boreriyeri sãre ogũra erãre. Iri utãyeri mama waĩre yũ gojaturayeri árĩroca. Gajirã iri waĩre ne masisome. Iri utãyerire aĩrã dihta iri waĩre masirãcoma,” arĩmi Espíritu Santo, arĩ gojabeoque Pérgamo majarãre erã opu sãre, arãmi yũre Jesucristo.

*Tiatira majarã sãre Jesu yarãre gojabeodoreñumi Ñure*

<sup>18</sup> —Tiatira majarã yaharã erã opu sãre ðpa yũ arĩrere gojabeoque mũhũ, arãmi daja yũre Jesucristo. Yũhũ Goãmũ magũ yũ cuiiri peame porã iro dopa gosesirigu

ãhraa. Eropiro yu guburi bronca waĩcari come erã timura iro dopa goesiria. Mũare õpa arĩ werea: <sup>19</sup> Mũa iirare masia yuhũ. Goãmure masa sãre mũa umupeorare, yure mũa cóãbirirare, gajirãre mũa itamurare, ñero tariquererã mũa yure duhubirirare masia. Negohraguere mũa iidiro tauro dohpaguepũre õaro iinemorã iiaa mũa. Iri sãre masia yuhũ. <sup>20</sup> Mũa eropa õaro iirã árĩquererã ta õpa yure tarinũgabũ mũa: Jezabe waĩcũgo “Goãmũ yare werego ãhraa,” arĩ gũyago mũa watope ta ãhrimo. Mũare igo ñero buhecũ peerã igore turibirabũ mũa. Eropa gũya buhego yaharãre yu pohro majarãre nome mera ñero iicũ iimo. Eropigo goãmarã wéanirãre erã orare barire badoremo igo yaharãre. <sup>21</sup> Igo ñerire igo bujawereborore coreniribũ. Yu eropa corequerecũ igo ñero iirire duhudiabiramo. <sup>22</sup> Eropirã yure peeque mũa. Igo dorecũcũ iigũra. Igo mera ñero iinirã sãre dorecũcũ iigũra. Eropirã erã burigã ñero tarirãcoma. Eropa ta iigũca erãre igo mera erã ñero iirare erã bujawerebircũ, irire erã duhubiricũ. <sup>23</sup> Eropigũ igo porãre wejẽgũra. Yu eropa iicũ ãarã árĩpehrerã yaharã yu õaro masirire masirãcoma. Masa erã pepiri sãre erã uaribejari sãre masia. Yu eropa masicũ masirãcoma erã igore yu eropa dipuwaja moacũ. Árĩpehrerã mũa ñerire iira dipuwaja, dipuwaja moagũra mũare. Eropigũ mũa õarire iira wajapũre õaro iigũra mũare. <sup>24</sup> Mũa Tiatira majarã gajirã mũa mera majarã igo ya buherire gamebirabũ. Mũapũ Satana ya buherire “Wũaro igũ masiri ãhraa,” erã arĩrãre gamebirabũ mũa. Eropigũ mũapũre gajino mũa iiburire dorenemosome yuhũ. <sup>25</sup> Dorenemobiriqueregũ iñe dihtare dorea mũare: Mũa pohroque yu dujariboro core yu buherire mũa masirare ne merogã mera cãdijibiricãque. <sup>26-27</sup> Árĩpehrerã ñerire tarinũganirãre, yu gamerire eropa iiniguirãre oparã árĩmorãre acugũra. Yu Pagũ igũ yure opũ acudiro dopa ta mũare oparã acugũra yu sã. Árĩpehreri yeba majarã tauro arĩrã oparã árĩmorã acugũra mũare. Eropa oparã ñajarã, mũa doca arĩrãre árĩpehreri yeba majarãre turaro dorerãca. Eropa turaro dorerã mũare tarinũganirã mata pehrea wacũ iirãca mũa erãre. <sup>28</sup> Eropigũ mũare yahare ne duhubirirãre boyomũriridirure ogũra. Eropigũ mũa mera árĩgũca yuhũ. <sup>29</sup> Gamiricũrã ãhraa mũa. Eropirã mũa ya curu majarãre yaharãre Espĩritu Santo igũ wererare peeque mũa, arĩ gojabeoque Tiatira majarãre, arãmi yure Jesucristo.

### 3

#### *Sardis majarãre Jesu yarãre gojabeodoreñumi Ñure Jesucristo*

1 —Sardis majarã yaharãre erã oparã sãre õpa yu arĩrãre gojabeoque mũhũ, arãmi daja yure Jesucristo. Yuhũ igũ Espĩritu Santo siete suburi maja turarire opaa. Eropigũ siete necãre opaa. Mũare õpa arĩ werea: Mũa iirare masia. Õpa arĩ pepirima mũare gajirã: “Erã Goãmũ yare õaro iipehorã ãhrima,” arĩ pepirima mũare. Erã eropa arĩ pepiquerecũ, Goãmũ yare õaro iibeaa mũapũ. <sup>2</sup> Eropirã mũa iirare õaro guñaque mũa. Goãmũ yare mũa masirare õaro guñaque daja cãdijiro mariro. Goãmũ igũ ãacũ õaro iipehobirabũ mũa. <sup>3</sup> Eropirã yahare mũa peemũhtarare mũararo ta õaro guñaque mũa daja. Eropa guñarã yahare iique mũa daja. Mũa ñeri iirare duhuque. Yu arĩro dopa mũa iibiricũ guñaña mariro mũare dipuwaja moagũra. Yajari masũ igũ guñaña mariro igũ yajagũ ñajaro dopa ta mũare guñaña mariro dipuwaja moagũ arigũca. <sup>4</sup> Yujurãyeri mũa mera majarã Sardis majarã ñero erã iirire ãhacũbeama. Eropa õarã arĩrã, boreri suhriro sañarã yu mera curirãcoma. <sup>5</sup> Árĩpehrerã yahare duhubirã eropa ta boreri suhri sañarã árĩniguirãcoma. Eropirã yu mera eropa árĩniguimorã erã waĩre yu gojaturipũgue erã sã erã waĩre gojatunirã arĩrãcoma. Erã erã waĩre yu gojaturare coesome yuhũ. Yu Pagũ igũ ãhabeorogue, anyua sã erã ãhabeorogue, “Yaharã ãhrima,” arĩ weregũca erãre. <sup>6</sup> Gamiricũrã ãhraa mũa.

Eropirã mũa ya cururi majarãre yaharãre Espíritu Santo ïgu wererare peeque mũa, arĩ gojabeoque Sardis majarãre yaharãre erã opu sãre, arãmi yũre Jesucristo.

*Filadelfia majarãre Jesu yarãre gojabeodoreñumi Ñure*

<sup>7</sup> —Filadelfia majarã yaharã erã opu sãre òpa yũ arĩrire arĩ gojabeoque mũhũ, arãmi daja yũre Jesucristo. Yũhũ ñeri marigu ãhraa. Diaye maja weregu ãhraa. Davi murũ iribojegue majagu opu masare ïgu dorediro dopa ta turari mera doregũra yũ sã. Iri turari mera iidorecũ ne gajirã irire cãhmotamasibeama. Yũ iidorebircũ ne gajirã irire iimasibeama. <sup>8</sup> Árĩpehreri mũa iirire masia yũhũ. Guñaturabiriñarirã árĩquererã ta yaha buherire òaro peeabũ mũa. Yũre waĩpeo duhubirabũ mũa erã muare ñero iidiaquerecũ ta. Eropigu yahare iimorã apiabũ muare. Eropirã yũ dorerire mũa iicũ gajirã cãhmotamasibeama muare. <sup>9</sup> Gajirã mũa pohro árĩrã “Gua judio masa Goãmu yarã ãhraa,” arĩquererã ta guyarã ãhrima. Goãmu yarã árĩbeama. Satanare umupeorã ãhrima. Eropigu erãpũre mũa core mereja muare erã umupeocũ iigũra erãre. Yũ eropiicũ ïarã yũ muare mahirire masirãcoma erã. <sup>10</sup> Muare yahare yũ duhudorebircũ peerã òaro yũhriabũ mũa yũre. Mũa eropa iicũ ïagu i yeba majarã árĩpehrerã erã ñero tariburisubu árĩcũ muare ïhadibugũra. Irisubu árĩpehrerã erã ñero tariburisubu árĩroca. <sup>11</sup> Merogã duhyaa i yebague yũ dujariboro. Yahare mũa masirare cãdijibircãque. Eropirã yũre eropa yũhringuicãque mũa wajataborore dedeori arĩrã. <sup>12</sup> Eropigu yahare duhubirãre yũ Pagu ya wihi majarã apigũra erãre. ïgu ya wihi maja borari iro dopa árĩcũ apigũra erãre. Eropirã Goãmu mera majarã eropa árĩniguirãcoma. Eropirã Goãmu yũ Pagu yarã waĩcũrã, ïgu ya maca majarã waĩcũrã sã árĩrãcoma. ïgu ya maca mama maca Jerusalén árĩroca. Iri maca umarogue Goãmu pohrogue dijariri maca árĩroca. Yũ waĩ sãre mama waĩ opagũca. Iri waĩ sãre waĩcũrãcoma yaharã. <sup>13</sup> Gamiricũrã ãhraa mũa. Eropirã mũa ya cururi majarãre, yaharãre Espíritu Santo ïgu wererare peeque mũa, arĩ gojabeoque Filadelfia majarãre yaharãre erã opu sãre, arãmi yũre Jesucristo.

*Laodicea majarãre Jesu yarãre gojabeodoreñumi Ñure Jesucristo*

<sup>14</sup> —Laodicea majarãre yaharã erã opu sãre òpa yũ arĩrire gojabeoque mũhũ, arãmi daja yũre Jesucristo. Yũ arĩro dopa ta iigu ãhraa yũhũ. Eropigu guyarõ mariro yũ ïarare eropa wereniguigu ãhraa. Árĩpehrerire mari Pagu ïgu ïhacũnugurare iibasagu ãhraa yũhũ. <sup>15</sup> Árĩpehreri mũa iirare masia yũhũ. Mũa “Jesu yarã ãhraa gua,” arĩquererã yũre merogã umupeoa. Yũre mũa merogã umupeorã mũa árĩcũ yũhũ gamebeaa muare. Mũa “Jesure umupeobeaa gua,” arĩbeaa mũa. “Jesure umupeorã ãhraa gua,” arĩquererã ta yũre òaro umupeobeaa. Mũa yũre umupeodiaro dopa ta yũre wũaro umupeocũ òaboaya. <sup>16</sup> Mũa eropa yũre òaro umupeobircũ ïagu mũare gamebirigohracãgũra. <sup>17</sup> Eropirã òpa arĩ pepiraa mũa: “Árĩpehrerire opaa. Ne gajino duhyabeaa guare,” arĩ pepiraa mũa. Eropa arĩquererã mojomorocũrã iro dopa ta ãhraa mũa yũ ïacũ. Duhyataria muare. Eropirã ne moonijarã, suhri marirã, cuiiri ïhajabirã iro dopa ãhraa mũa yũ ïacũ. Muare duhyarire masibeaa mũa. <sup>18</sup> Mũa eropa masibirã árĩcũ ïagu òpa arĩ weregũra muare: Muare duhyarire masique. Eropirã yũre serẽque. Oro gohrare mũa asũro dopa ta òarire yũ oparire yũpũre aĩque mũa. Muare yũre òaro umupeocũ iigũra. Eropirã diaye ta Goãmu ya mera wũaro oparãca mũa. Eropirã yũ sũrira mera mũa ñero iirare cóãnirã árĩque mũa. Eropirã suhri sañarã erã guhyasĩribiro dopa ta mũa ñeri iirare cóãnirã òarire iimorã árĩrã guhyasĩrisome mũa. Eropirã mũa cuiiri ococũra pũhrũ òaro muare deyoro dopa ta Goãmu yare òaro peeque mũa òaro masiboro dopa. <sup>19</sup> Árĩpehrerã yũ mahirãre erã ñero iirare werea. Eropigu yũ mahirãre



dipuwaja moaa gajisubu eräre itamubu. Eropirã yũpũre turaro gameque. Eropirã mũa ñerire bũjawere duhuque. <sup>20</sup> Peeque yũre. Mũa wirire bihara wirire yũ ejanũgaja ñajadiabodiro dopa ta mũa mera árĩdiagũ coregũ iiaa. Yũ eropa árĩdiacũ peerã yũre mũa mera árĩdoreque. Yaharã árĩque. Mũa eropa árĩdorecũ mũa mera árĩgũra. Eropigũ mari sihu baro dopa ta mũa mera õaro árĩgũra. Eropirã yũ mera õaro árĩrãca mũa. <sup>21</sup> Ñerire yũ tarinũgara pũhrũ yũ Pagũ opũ ãgũ doaro pohro doaa yũ sã dorebu. Eropa ta mũa sã ñerire mũa tarinũgara pũhrũ yũ opũ doaro pohro doarãca doremorã. Mũare yũ pohro doacũ iigũra. <sup>22</sup> Gamiricũrã ãhraa mũa. Eropirã mũa ya cururi majarãre yaharãre Espĩritu Santo ãgũ wererare peeque mũa, arĩ gojabeoque Laodicea majarãre yaharã erã opũ sãre, arãmi Jesucristo yũre.

## 4

### *Umarogue Goãmũre erã mereja umupeorare ãapũ Ñũ*

<sup>1</sup> Yũre ãgũ eropa arĩ werera pũhrũ umũsiguere pãgũra disiporore ãhabũ. Dipaturi corneta turaro bũsũro watope turaro werenigũri bũsũro carabũ yũ peecũ. Õpa arĩro carabũ yũre:

—Õgue mũririque. I yũ wereburi pũhrũguere waroca. Eropa waborore mũre ãhmũgũra. Yũ arĩdiro dopa ta eropa waroca, arĩro carabũ umarogue.

<sup>2</sup> ãgũ eropa arĩ werecũ ta erogue mũrijagũ Espĩritu Santo ãgũ turari mera ãagũ ãiabũ. Eropigũ opũ doarore umarogue ãhabũ. Ero yujugũ doãmi. <sup>3</sup> Eropigũ õaro gosesirigũ doãmi. Jaspe waĩcũri utãye gosesiriro dopa ta, cornalina waĩcũri utãye gosesiriro dopa ta õaro gosesirigũ doãmi ãgũ. Eropigũ õaro gosesiriri bero esmeralda iro dopa gosesiriri bero pohecague doãmi ãgũ. <sup>4</sup> Eropigũ ãgũ doaro tũrore yuju bero ãhabũ oparã doari berorire. Veinticuatro gohra ãhrabũ. Iri oparã doarire veinticuatro gohra Jesu yarã oparã doãma. Boreri suhricũrã ãhrama. Eropirã oparã erã peyari berorire oro berorire peyanirã ãhrama erã. <sup>5</sup> Doariñe yũ ãamũhtarañegue miamaabũ. Eropiro gajiropa werenigũri bũsũro carabũ. Bupu sã bũsũgũ carami. Iri doaro core siete sihãgori yucũ ãhrabũ. Iri siete sihãgori yucũ Espĩritu Santo ãgũ siete suburi maja turari opari iro dopa ãhrabũ. <sup>6</sup> Eropiro ãgũ doaro core wũariya ãhrabũ. Vidrio iro dopa árĩriya ãhrabũ. Õaro deco sũririya ãhrabũ.

ãgũ doaro pohro wapicũrã gajiropa bejarã ãhrama. Ojocarirã ãhrama. Erã diaporire erã pũrũpũrũre baja cuiricũrã ãhrama. <sup>7</sup> Yũ ãamũhtadigũ gajiropa bejagũ yee diagũ iro dopa bejagũ ãhrami. ãgũ pũhrũ árĩgũ wecũ iro dopa bejagũ ãhrami. Erã pũhrũ árĩgũ masũ diapo iro dopa diapocũgũ ãhrami. Erã urerã pũhrũ árĩgũ gaa ãgũ quẽ dũpũre sũegũ iro dopa ãhrami. <sup>8</sup> Erã wapicũrã nũcũ seis quẽ dũpũricũrã ãhrama. Eropiro erã quẽ dũpũri pepũrigue ta baja cuiricũri quẽ dũpũri ãhrabũ. Eropirã umũri nũcũ, ñamiri nũcũ eropa bayanigũirã iiaa. Ne baya duhubirama. Õpa arĩ bayãma:

Õagũ, õagũ, õagũ Goãmũ mari Opũ turatariagũ ãhrimi. ãgũ iribojegue eropa ta árĩnigũicãpũ. Dohpague sãre eropa ta árĩnigũimi. Pũhrũgue sãre eropa árĩnigũicãgũcumĩ, arĩ bayanigũirã iiaa.

<sup>9</sup> Eropa bayarã erã wapicũrã gajiropa bejarã ãgũ turarire bayarã iiaa. Eropirã ãgũre árĩpehrerĩnũri árĩnigũigũre “Õhaa,” arĩrã umupeorã iiaa. <sup>10</sup> Erã eropa baya umupeocũ ãarã veinticuatro Jesu yarã oparãpũ opũ doaro core mereja, ãgũre umupeoama. ãgũ árĩpehrerĩnũri árĩnigũigũ ãhrimi. Eropa umupeorã erã oparã erã peyari berorire ãgũ doaro core mehpeoama. Eropa mehpeorã õpa arãma erã:

<sup>11</sup> Mũhũ Goãmũ gũa opũ gohra ãhraa. Turagũ õagũ ãhraa mũhũ. Mũhũ gũa umupeogũ árĩgũ ta iiaa. Mũre eropa umupeoro gahmea gũare. Árĩpehrerire

ĩhacũnugudigu ãhraa mũhũ. Mũ gamediro dopa ta iri árĩpehrerire ĩhacũnuguyoro mũhũ, arãma erã Goãmũre ero doagũre.

## 5

### *Gojarapũ tũrara tũrure cordero sãre werepũ Nũ*

<sup>1</sup> Pũhrũ ero doadigu ĩgu mojoto diayerũ ĩgu oparipũre gojarapũre ĩhabũ. Iripũ perũri ĩgu gojarapũ ĩgu tũrara tũru ãhrabũ. Eropiro siete suburi pihañari mera ĩgu pihañara tũru ãhrabũ. <sup>2</sup> Eropigu turagu anyure ĩhabũ. ĩgu turaro wereniguiri mera õpa arĩ wereami:

—I tũrure pihañarare õagu dihta pãñamasimi. ¿Nihipũ ãhriri iripũre pãbu? arãmi ĩgu anyu.

<sup>3</sup> Eropa arĩqueregu ta iri tũrure pãñabure bocabirami. Eropa õagũre bocabirami. Ũmarogue i yebague ojocarirã watope, sĩrinirã watope ne iri tũrure pãñabu marami. Eropigu iri tũru majare buhebu marami. <sup>4</sup> Eropigu iripũre pãñabodigũre erã bocabiricũ ĩagu turaro oreabũ yũpũ. <sup>5</sup> Yũ eropa orecũ ĩagu yujugu erã Jesu yarã oparã mera majagu õpa arãmi yũre:

—Orebiricãque. Iri tũrure ñearire yujugu pãñamasimi. ĩgu Juda ya curu majagu turagu ãhrimi. ĩgu opũ Davi pãrami árĩturiagu ãhrimi. Watĩre tarinũgadigu ãhrimi ĩgu. Eropigu ĩgu iri tũrure siete ñearire pãmasigu ãhrimi, arãmi ĩgu yũre.

<sup>6</sup> ĩgu eroparĩcũ peegu opũ ĩgu doaro core Cordero ĩgu niguicũ ĩhabũ. Wapicũrã gajiropa bejarã, Jesu yarã oparã sã erã watope niguiami ĩgu Cordero. ĩgu eropa niguiqueregu ĩgu masa erã wejẽdigũ mũrũ dopa dehyoami. Siete cusaricũgu, siete cuiricũgu ãhrami. Iri siete cuiri ĩgu Espĩritu Santo ĩgu siete suburi maja turari ãhrabũ ĩgu árĩpehrero ĩhamasiburi. Espĩritu Santo árĩpehrero i yebaguere Goãmũ ĩgu obeodigu ãhrimi. <sup>7</sup> Eropigu Corderopũ opũ doaro pohrogue ejagu, ero doagũre ĩgũre ĩgu diayerũ opara tũrure tũaweã aĩami. <sup>8</sup> ĩgu eropa tũaweã aĩcũ ĩarã wapicũrã gajiropa bejarã, veinticuatro Jesu yarã oparã sã Cordero core mereja ĩgũre umupeoama. Erã Jesu yarã oparã árĩpehrerã arpa waĩcũri buamutĩrere opãma. Oropari sãre opãma. Iripari incienso ujutũriripari dihta ãhrabũ. Iri incienso Goãmũ yarã ĩgũre erã serẽra ãhrabũ. <sup>9-10</sup> Eropa ĩgũre umupeorã õpa arĩ mama bayarire bayãma erã Corderore:

Erã wejẽdigũ mũhũ ãhraa. Eropigu mũ ya di mera masa ñeri iirare coeabũ mũhũ Goãmũ yarã erã árĩboro dopa. Eropigu masare árĩpehreri cururi majarãre yujurãyerire, árĩpehrerã yare wereniguirãre, árĩpehreri yeba majarãre erã ñero iirare wajayebasabũ. Eropa iigu erãre oparã árĩmorã, pahia masare Goãmũre serẽbasarã árĩmorã sã arĩcũ ĩhabũ. Eropigu i yeba majarã weca oparã árĩmorã acubũ mũhũ guare. Eropa iigu arĩdigũ iri tũrure aĩ pãñamasibu ãhraa mũhũ, arĩ bayãma erã Corderore.

<sup>11</sup> Yũ ĩagu daja bajarãre millones anyua majarãre ĩhabũ. Opũ doarore, wapicũrã gajiropa bejarãre, veinticuatro Jesu yarã oparãre anyuapũ erãre gãhrisianũgajãma. Erã anyua majarã turaro mera erã bayacũ ĩhabũ. <sup>12</sup> Őpa arĩ turaro bayapeoama erã: Cordero, mũhũ erã wejẽdigũ arĩgu árĩpehrerãre doremasibu, árĩpehrerire opamasibu ãhraa. Eropigu masipehogũ, turatariagu ãhraa mũhũ. Mũ eropa arĩgu ãhraa masa erã ñerire erã iira dipuwaja erã wejẽdigũ. Eropirã gua mũre umupeorãca. “Őtariagu ãhrimi,” arĩrãca mũre. Mũre õaro wereniguirãca, arĩ bayãma anyua majarã.

<sup>13</sup> Eropigu gajirã erã bayacũ peeabũ. Árĩpehrerã i yeba majarã, umaro majarã sã, ojocarirã, sĩrinirã, wũariya majarã sã, árĩpehrerogue arĩrã õpa arĩ bayarã carama:

Goãmure ïgu doarogue doagure, Cordero sãre õaro wereniguirãca. Muare umupe-orãca. “Õatariarã àhrima. Turatariarã àhrima,” arĩrã árĩpehrerinuri eropa arĩniguicãrãca muare, arĩ bayapeorã carama.

<sup>14</sup> Eropirã erã wapicurã gajiropa bejarã erã eropa arĩ bayacũ peerã “Eropa ta arĩ bayaporo,” arãma. Eropirã Jesu yarã oparãpũ mereja Goãmure, Cordero sãre umupeoama.

## 6

### *Papera tũrure ïgu aĩra tũrure pihañarare pãmi Cordero, arĩ werepũ Ñu*

<sup>1</sup> Pũhrũ papera tũrure ïgu aĩgãra tũrure Cordero pihañamũhtarañere pãmi. ïgu eropa pãcũ ïhabũ. ïgu eropa pãra pũhrũ yujugũ gajiropa bejarã mera majagũ “Ïagũ arique,” arãmi. Eropa arĩgu bupu busũro dopa ta wereniguiami. <sup>2</sup> ïgu eropa arĩra pũhrũ ïhabũ yũhũ. Boregũ cabayure ïhabũ. ïgu weca peyagũ buiri berore opãmi. ïgure opu peyari berore ohami gajigũpũ. ïgu eropa ora pũhrũ ïgũpũ ïgure ïhaturirãre tarinũgagũ wahãmi.

<sup>3</sup> Pũhrũ yujuñe pihañarañere pãtuhaja Cordero gajiñe pihañarañere pãmi daja. ïgu eropa pãra pũhrũ gajigũ gajiropa bejarã mera majagũ “Ïagũ arique,” ïgu arĩcũ peeabũ daja. <sup>4</sup> Eropigũ gajigũ cabayure diagure ïhabũ daja. ïgu weca peyagũre turarire ohami gajigũpũ. I yeba majarãre erã basi gamewejẽcũ iibure apiami ïgure. Eropirã árĩpehrero majarã gamewejẽrãcoma i yebague. Eropigũ wuarimiji ñoserimijire ohami ïgure.

<sup>5</sup> Pũhrũ peñere pãtuhaja Cordero gajiñere pãmi daja. Eropigũ gajigũ gajiropa bejarã mera majagũ ïgu sã “Ïagũ arique,” arĩcũ peeabũ daja. ïgu eropa arĩra pũhrũ cabayu ñigũre ïhabũ. ïgu weca peyagũ nucuri queoriñere opãmi. <sup>6</sup> ïgure yũ ïara pũhrũ gajiropa bejarã watope õpa busũro carabũ:

—Trigo cebada sã pehrea waroca. Eropiro iri waja pagari arĩroca. Eropirã yujunũ mohmeri waja mera trigore yuju kilo ta asũrãcoma. Yujunũ mohmeri waja mera cebada yerire uñre kilo ta asũrãcoma. Bari moari uypũ, vino sã baja arĩcãniroca, arĩro carabũ.

<sup>7</sup> Pũhrũ uñreñere pãtuhaja Cordero gajiñere pãmi daja. ïgu eropa pãra pũhrũ gajigũ gajiropa bejarã mera majagũ arĩtugũ ïgu sã “Ïagũ arique,” ïgu arĩcũ peeabũ daja. <sup>8</sup> ïgu eroparĩcũ peegũ borewijigũ cabayure ïhabũ. ïgu weca peyagũ siririñe waĩcuami. Eropigũ ïgu pũhrũ arigũ peame waĩcuami. Eropigũ erãre cabayua weca peyarãre turarire ohami corderopũ. Wapicurã masa arĩcũ yujugũ erã mera majagũre wejẽdoreami. Eropa ta árĩpehrero i yebaguere yujurãyeri masare wejẽdoreami. Gamewejẽri mera, oaboari mera, dorecũri mera, waimarã nũgũri majarã guarã mera, yujurãyeri masare erã wejẽburire apiami erã perãre.

<sup>9</sup> Pũhrũ wapicuriñere pãtuhaja gajiñere pãmi daja Cordero. ïgu eropa pãcũ Goãmure umupeoburi mesa doca Jesu yarãre erã wejẽnirãre erã siporãrĩre ïhabũ. Goãmũ yare erã werera dipuwaja, “Jesu yarã àhraa,” arĩ erã werera dipuwaja gajirã erã wejẽnirã àhrama. <sup>10</sup> Erã gaguiniguirã õpa Goãmure erã arĩcũ peeabũ:

—Mũhũ gua Opũ ñeri marigũ, gũyaro mariro mũ arĩro dopa ta iigũ àhraa mũhũ. ¿Eropigũ i yeba majarãre gũare wejẽnirãre dohpãrĩcũ dipuwaja moagũcũri mũhũ erãre? arĩ gaguiniguiama erã.

<sup>11</sup> Eropigũ erãre boreri suhri yoari suhrire ohami. Erãre eropa ogũ õpa arãmi erãre:

—Soonique dohpa. Gajirã mũa acawererã Jesu yarã mũa iidiro dopa ta dohpague sãre õari buherire buhenirã iima masare. Muare wejẽdiro dopa ta erã sãre erã

wejëpehoboro duhyaa dohpa. Eropirã erãre árïpehrerãre erã wejëboro core merogã corenique mua, arãmi erãre.

<sup>12</sup> Pũhrũ cinco ñearire pãtuhaja Cordero gajiñe ñeariñere pãcũ ñhabũ daja. Iriñere ñgu pãcũ ta, turaro yeba ñohmeabũ. Eropigũ umũ majagũ abe ñigu guhyaro wahãmi. Ñiriñe suhriro iro dopa ta bejagũ ñgu guhyaro wahãmi. Eropigũ abe ñami majagũ di iro dopa ta diagũ guhyaro wahãmi. <sup>13</sup> Eropirã necã yebague yuhridija wahãma. Yucũgũ dũcare miruñe weãburiboro dopa ta necã yuhridija wahãma. <sup>14</sup> Eropiro umũsi dederea wahabũ. Paperapũre mari tũrabeo dedeodiro dopa ta dederea wahabũ umũsi. Eropiro árïpehreri utã yucũ sã árïpehreri nugurori sã gajipũgue ejanũgaja waha wahabũ. <sup>15</sup> Eropa wacũ ñarã i yeba majarã tauro oparã, utã yucũ maja wiri poheca maja goberigue duhrirã wahãma. Gajirã oparã, surara oparã, doberi oparã, turarã, árïpehrerã erã pohro majarã, erã pohro majarã árïbirã sã yujuro ta duhrirama. <sup>16</sup> Eropirã duhrirã utã yucũre utã sãre õpa arãrama:

—Gua weca yuhridijari wejẽcãque. Sihire opũre ñgu doaro doagũre gũitaria. Cordero guare ñero dipuwaja moagũcumi. <sup>17</sup> Guare árïpehrerãre turaro dipuwaja moaburinũ árïtuhajaa. Eropirã ñgu dipuwaja moaborore ne bocatũsome gua. Eropa dipuwaja moari arãrã gua weca yuhridijari wejẽcãque, arãrama utã yucũre árïpehrerã.

## 7

### *Israe masa diaporire Goãmũ ñgu waĩ tuhaborore werepũ Ñũ*

<sup>1</sup> Pũhrũ wapicũrã anyuare ñhabũ. Erã árïpehrerogue wahãma. Yujugũ nortepũ wagũ erogue arirañere miruñere aribiricũ iiami. Gajigũ surgue, gajigũ abe mũririogue, gajigũ abe ñajarogue waha ñgu iro dopa ta miruñere aribiricũ iiaa erã sã. Eropiro i yebague, wũariyague sãre ne miruñe aribiricũ iiaa. Ne yujugũ yucũgũre miruñe weã ñohmecũ iibirama. <sup>2</sup> Eropigũ gajigũ anyure ñhabũ daja. Abe mũririogue arigũ iiami ñgu. Goãmũ ojocariniugũ ñgu waĩ aĩturiñere sello waĩcũriñere aĩgãrigũ iiami ñgu. Eropa aĩgãrigũ gajirã anyua wapicũrãre ñgu gaguinigiãmi. Erã anyuapũ i yebare, wũariya sãre ñero wacũ Goãmũ ñgu iidorenirã ãhrama erã. <sup>3</sup> Erãre gaguinigũ õpa arãmi ihĩ anyu:

—Corenique. Goãmũ pohro majarãre erã diaporire ñgu waĩ aĩturiñere tuhunimorã iiaa gua. Gua eropa tuhoboro core i yebare, wũariyare, yucũ sãre ñero wacũ iibiricãque mua dohpa, arãmi ñgu gajirã wapicũrã anyuare.

<sup>4</sup> Eropigũ Goãmũ ñgu waĩ mera erã diaporire erã tuhumorã “Oã nũcũ ãhrama,” arĩ wereami yũre yujugũ. Israe masa doce cururi majarã ciento cuarenta y cuatro mil gohra masa erã tuhumorã árĩñorã. <sup>5</sup> Oã árĩñorã erã tuhumorã: Doce mil masa Judã pãramerã árĩturiarã erã tuhumorã árĩñorã. Doce mil masa Ruben pãramerã árĩturiarã árĩñorã erã tuhumorã. Gajirã doce mil masa Gad pãramerã árĩturiarã árĩñorã erã tuhumorã. <sup>6</sup> Gajirã Aser pãramerã árĩturiarã doce mil gohra, gajirã doce mil gohra Neftalĩ pãramerã árĩturiarã, gajirã doce mil Manase pãramerã árĩturiarã erã tuhumorã árĩñorã. <sup>7</sup> Gajirã doce mil masa Simeo pãramerã árĩturiarã, gajirã doce mil masa Levĩ pãramerã árĩturiarã, gajirã doce mil masa Isaca pãramerã árĩturiarã árĩñorã erã tuhumorã. <sup>8</sup> Gajirã doce mil masa Zabulon pãramerã árĩturiarã, gajirã doce mil masa Josã pãramerã árĩturiarã, gajirã doce mil masa Benjami pãramerã árĩturiarã, erã tuhumorã árĩñorã. Erã nũcũ árïpehrerã masa ciento cuarenta y cuatro mil gohra árĩñorã erã tuhumorã.

### *Bajarã boreri suhricũrãre werepũ Ñũ*

<sup>9</sup> Pũhrũ masa bajarãre ñhabũ. Árïpehreri yeba majarãre, árïpehreri cururi majarãre, árïpehrerã yare wereniguirãre, árïpehreri macari majarãre, yujurãyerire



Cristo gamerã dihtare erã niguirãre ìhabũ. Opũ ìgũ doaro pohro, Cordero core niguiama erã masa. Bajarã masa àhrama. Eropirã erãre queorã bocatũurã mejeta àhrama. Boreri suhricũrã àhrama erã. Eropirã mijipũrire opãma. <sup>10</sup> Eropirã erã árìpehrerã òpa arì gaguiniguiama:

Goãmũ àhrimi marire taugũ. Ìgũ, ìgũ doaro doagũ àhrimi. Cordero sã marire taugũ àhrimi, arì gaguiniguiama erã.

<sup>11</sup> Eropirã árìpehrerã anyua, Jesu yarã oparã, gajiropa bejarã mera Opũ ìgũ doaro tũrore yuju bero niguiama. Eropa niguirã ìgũ doaro core mereja, Goãmũre umupeqoama. <sup>12</sup> Òpa arì umupeqoama erã:

Eropa ta àhraa. Goãmũ gũa Opũre mũre òaro wereniguiã. Òatariagũ àhraa mũhũ. Masipehogũ àhraa mũhũ. Mũre “Òhaa,” arãa. Mũre umupeoa. Turatariagũ àhraa mũhũ. Mũ turari mera iigũ àhraa mũhũ. Mũre eropa arìrã árìpehrerĩnũri eropa mũre arĩniguirãca. Eropa ta iirã, arì umupeqoama erã Goãmũre.

<sup>13</sup> Eropigũ yujugũ Jesu yarã oparã mera majagũ yũre wereami:

—¿Oã boreri suhricũrãre masiri mũhũ? ¿Erã aridirore masiri mũhũ? arì serẽpiami yũre.

<sup>14</sup> Ìgũ eroparĩcũ peegũ,

—Masibea, arì yũhriabũ yũpũ.

—¿Noa àhriri erã? arì serẽpiabũ ìgũre.

Yũ eroparĩcũ peegũ òpa arãmi yũre:

—Oã ñetariaro tarirĩnũri arĩcũ yujuro bojerã àhriima, arãmi ìgũ yũre. Erã suhrire coewearo dopa ta Cordero ìgũ di cóãra mera erã ñerire coenirã àhriima. Eropirã òari boreri suhricũrã àhriima. <sup>15</sup> Eropa ìgũ coenirã arìrã Goãmũ ìgũ doaro core ìgũre eropa umupeoniguiãca. Òmũri ñamiri nũcũ ìgũre eropa umupeoniguiãca pahia Goãmũ wihigue erã iiro dopa ta. Eropigũ erã mera eropa arĩniguiũ erãre ìtamugũcumi Goãmũ gajiropa wari arìgũ. <sup>16</sup> Eropirã ne dipaturi oaboasome erã. Eropirã ne ñemesibusome. Ne abe mũmũ majagũ asiriñere pabusome erã. Turaro asiri erã ñero taricũ iisome. <sup>17</sup> Opũ doaro core niguiũ Cordero erãre ìhadibugũcumi. Ovejare ìhadibugũ iro dopa erãre ìhadibugũcumi. Eropigũ maurigã dipague ojocaricũ iiriyarigã dipague erãre mũhta wahgãgũcumi oveja ìhadibugũ iiro dopa ta. Eropigũ eropa mucubiricũ iigũcumi erãre. Eropirã umarogue arìrã ne dipaturi oresome erã, arãmi Jesu yarã oparã mera majagũ yũre.

## 8

### *Seis papera erã pihãnarare pãtuhaja gajĩñere pãpehopũ Cordero*

<sup>1</sup> Seis papera erã pihãnarare pãtuhagũ dũhyarañere pãtuhami Cordero. Ìgũ eropa pãtuhacũ yuju hora deco umarogue ne ejarimaria wahabũ. <sup>2</sup> Eropigũ siete anyuare Goãmũ pohro niguirãre ìhabũ. Eropigũ erãre siete cornetarire ohami gajigũ. <sup>3</sup> Gajigũ anyu oropari incienso dicũburipari opadigũ Goãmũre umupeqori mesa pohrogue eja, niguiami. Ero ìgũ niguiãca baja inciensore ìgũre ohama. Árìpehrerã Goãmũ yarã ìgũre erã serẽra mera moreburi inciensore ohama. Eropigũ oro mera iira mesague, Goãmũ ìgũ doaro pohro arìri mesague iri incienso Goãmũre soe mujuburi àhrabũ. <sup>4</sup> Eropigũ anyu ìgũ oparapari maja inciensore mesa weca pohsiri peo soeami. Ìgũ eropa soera pũhrũ iri incienso maja imica Goãmũ yarã ìgũre erã serẽra mera mũria wahabũ Goãmũ pohrogue. <sup>5</sup> Eropa wara pũhrũ ìgũ anyu i mesa maja nitire iriparigũe aĩ pohsãtuhaja, yebague pohmehdijucãmi. Ìgũ eropa pohmehdijucã miãmi. Turaro bupu paãmi. Eropiro gajiropa busũmaa, yeba ñohmemaabũ.

### *Cornetarire werepũ Nũ*

<sup>6</sup> Pũhrũ siete anyua yujurãyeri erã cornetarire purimorã iiama.

<sup>7</sup> Yujugũ anyu ãgũ yarure purimũhtami. ãgũ eropa puricũ decoyeri yũsariyeri peame mera, di mera moreriyeri yebague yurimerejabũ. Iriyeri yurimerejacũ ta yeba ũjua wahabũ. Ipẽ ũjuaabũ: I yeba deco ejaboro pohro gohra ũjua wahabũ. Eropiro iripẽta yucũ sã taa yahsari sã ũjua wahabũ.

<sup>8</sup> Anyu yujugũ ãgũ eropa purimũhtara pũhrũ gajigũ anyu ãgũ yaru cornetare puriami daja. ãgũ eropa puricũ wũadigũ utãgũ iro dopa bejadigũ õaro ũjũniguidigũ wũariyaguere mihrua dijabũ. Eropiro yeba ũjudiropẽ ta wũariya diya poya wahabũ.

<sup>9</sup> Eropirã wũariya majarã wai sã deco mera ejarã gohra yujupũ majase majarã sãria wahãma. Eropiro iri nũcũ gasi ta dohori gasi miria wahabũ wũariyaguere.

<sup>10</sup> Perã anyua erã purira pũhrũ gajigũ anyu sã ãgũ yaru cornetare puriami daja. ãgũ eropa puricũ wũadiru necãru, sihãdiru dopa ta bejadiru yebaguere yurimereja wahabũ. I yeba maja diarire maũ diparire yujupũ majase majare yurimerejabũ necãru. <sup>11</sup> Eropiro iri nũcũ maũri ta sũiriyari dujabũ. Eropa wacũ bajarã masa iri decore sũiri decore ihrinijarã sãria wahãma. Iriuru necãru sũidiru waĩcũabũ.

<sup>12</sup> Ũrerã anyua erã purira pũhrũ gajigũ anyu sã ãgũ yaru cornetare puriami daja. ãgũ eropa puricũ abe umũ majagũ, ñami majagũ sã deco erabonirã gohra poya wahãma. Necã majarã sã deco erabonirã dipuru ta poya wahãma. Eropiro umũgue wãpicũri horari gohra abe ne boyobirami. Ñami sãre wãpicũri horari gohra abe ñami majagũ, necã sã ne boyobirama.

<sup>13</sup> Pũhrũ ãhamemujuabũ daja. Ũmarogue gaa wũwahgãgũre ãhabũ. Eropigũ ãgũ gaguiniguicũ peeabũ. Őpa arãmi ãgũ:

—Ñetariaa. Ñetariaa. Ũrerã anyua purinibeama dohpa. Erã purira pũhrũ ñetariaro waroca. Eropa wacũ i yeba arĩrã ñetariaro warãcoma, arĩ dijuami ãgũ.

## 9

<sup>1</sup> Pũhrũ wãpicũrã anyua erã purira pũhrũ gajigũ anyu ãgũ yaru cornetare puriami daja. ãgũ eropa puricũ necãru iro dopa bejagũ arĩgũ anyu umarogue arĩdigũ yebague yuhridijaricũ ãhabũ. Eropigũ ãgũre peame gobe ũhcãri gobe maja sawire ohami gajigũ. <sup>2</sup> Eropigũ ãgũ iri gobere pãgũcũ peame imica wiriabũ. Wũari peame imica iro dopa ta wũaro imica wiriabũ iri gobere. Eropiro iri imica mata abe umũ majagũre, umaro sãre dederea wacũ iiabũ. <sup>3</sup> Eropirã iri imica pohecague arĩrã poreroa yebague wũdijarama. Eropirã coreba erã bũrigã pũriro dopa ta erã bũrigã pũriama. <sup>4</sup> Eropigũ taare, yucũre, gaji taare ñero iidorebirami erãre. Masa dihtare ñero iidoreami erãre. Goãmũ ãgũ waĩ aĩturiñere erã diaporire tuhuya marirã dihtare ñero iidoreami erãre poreroare. <sup>5</sup> Eropa ñero iidorequeregũ ta erãre wejẽdorebirami. Erãre wejẽdorebiriquiregũ ta cinco aberi gohra masare bũrigã pũricũ iidoreami. Coreba toarã erã pũriro dopa ta pũricũ iirã ãhrama poreroa sã.

<sup>6</sup> Irinũrire erãre erã pũriro iicũ masa sãridiarãcoma. Erã eropa sãridiaquerecũ ta erãre sãridoresome Goãmũ.

<sup>7</sup> Oã poreroapũ cabayua iro dopa dehyoama. Surara cabayuare erã come suhri cãhmotari suhri sãnirã dopa ta dehyoama erã poreroa. Erã dipu weca oparã erã peyari berori oro berori iro dopa peyãma. Erã diapori masa diapori iro dopa bejãma.

<sup>8</sup> Erã poari nome poari iro dopa ãhrabũ. Eropirã erã gũcũri yeea gũcũri iro dopa ãhrabũ. <sup>9</sup> Sãporã cãhmotari gasiro come gasiro iro dopa cãhmotama erã coretihbire. Eropiro erã wũcũ bajarã cabayua omarã erã omaro dopa erã wũuri dũpũri bũsũabũ. Cabayua tũruri gasire tararã erã gamewejẽrogue warã erã bũsũro dopa ta bũsũabũ poreroa wũuri dũpũri. <sup>10</sup> Eropirã coreba ãgũ pĩgurucũro dopa ta toadiru ãgũ oparo

dopa ta āhrabū erā poreroa. Eropirā erā pore mera masare cinco aberi gohra pūricū toáma. <sup>11</sup> Eropirā erā opū āhrami. Ɔhcāri gobe opū āhrami erā opū. Īgū anyu mūrū āhrami. Hebreo ya mera Abadón waĩcūami Īgū. Griego ya mera Apolión waĩcūami. Apolión, mari ya mera arĩrā, “Ñero goroweogu” waĩcūgū iimi.

<sup>12</sup> Poreroa masare erā ñero pūricū toara pūhrū i ñero erā tarimūhtadiro pehrea wahabū. Iri pūhrū pesubu ñero tarinirācoma daja masa.

<sup>13</sup> Pūhrū yuju mojtocū majarā anyua erā purira pūhrū gajigū anyu Īgū yaru cornetare puriami daja. Īgū eropa puricū Goāmū core niguiri mesague oro mera iira mesague wereniguiri būsuro carabū. Iri mesa maja sari wapicūri sarogue wereniguiri būsuro carabū. <sup>14</sup> Eropa wereniguiri cornetare purigūre anyure ōpa wereniguiri mera būsuro carabū:

—Wuariyague Eufrate waĩcūriyague peresu árĩnirāre anyuare wiuque. Erā wapicūrā anyua āhrima, arĩro carabū.

<sup>15</sup> Eroparĩcū peegū anyupū erāre wapicūrāre wiuami bajarā masare wejēmorāre. I bojorire, inure, i horare queoro corerā iiama erā wiumorā wapicūrā anyua. Erā coreldiro sihajaa. Eropirā wejēnūgagārĩrā iiama. Árĩpehrerā deco mera erabonirāre masare wejēmorā āhrama. <sup>16</sup> Eropigū erā anyua yarā surara, “Oā nūcū āhrima,” erā arĩcū peeabū. Erā cabayua weca peyarā āhrama. Doscientos millones surara āhrama.

<sup>17</sup> Eropigū cabayua erā weca peyarā yū ĩanirā ōpa dehyoama. Erā sīporārire cāhmotari suhri come suhri diari suhri, yahsari suhri, boreri suhri suhricūama. Eropirā cabayuapū erā dipu yeea diarā iro dopa dehyoama. Erā disirogue peame, imica, azufre ũjūri imica sã wiriabū. <sup>18</sup> Eropiro cabayua disiro wiriri mera masare wejēabū. Árĩpehrerā masa deco erabonirāre masa bajarāre wejēama. Eropirā peame mera imica mera, azufre ũjūri imica mera bajarā masare wejēama. <sup>19</sup> Erā cabayua erā disiro wiriri mera wejēama. Eropirā erā pore mera sã wejēama daja. Erā pore ojogorogue añaa dipu dopa bejabū. Eropirā iri pore mera camicūcū iiama erā masare.

<sup>20</sup> Bajarā masa erā wejē dūhanirāpū erā mera majarāre wejēcū ĩaquererā erā ñeri iirare ne duhubirama. Watēare umupeo duhubirama. Erā goāmarā wéanirāre umupeo duhubirama. Erā wéanirāpū oro mera, plata mera, bronce mera, utā mera, yucū mera erā wéanirā āhrama. Erā wéanirā ojocaribirama. Peebirama. Nohmebirama. Erā eropa árĩquerecū ta erāre masa umupeoama. <sup>21</sup> Eropirā erā wejē dūhanirā gaji ñeri sãre ne bŭjawerebirama. Masare erā wejērare, erā nome mera erā ñero iirare, erā yajara sãre ne bŭjawere duhubirama erā.

## 10

### *Miri tūrugāre papera tūrugāre aĩgārimi anyu*

<sup>1</sup> Pūhrū gajigū turagū anyu ũmarogue دچارicū ĩhabū. Imica curu watope āhrami. Eropigū buibūgūda Īgū dipuru weca peyabū. Īgū diapo ũmū majagū abe iro dopa goesiriabū. Īgū ñigari peame iro dopa goseabū. <sup>2</sup> Eropigū miri tūrugāre papera tūrugāre Īgū pāra tūrugāre opāmi Īgū. Īgū guburu diayepū maja guburu mera wuariyague cūhrapi niguiami. Īgū guburu copū maja guburupū yebague cūhrapi niguiami. <sup>3</sup> Eropa niguigū yeea erā gaguiniguiri dopa ta Īgū turaro gaguiniguiami. Īgū eropa gaguiniguira pūhrū siete bupua wereniguirā carirama. <sup>4</sup> Erā eropa wereniguicū peegū gojanūgarabū yūhū. Yū eropa gojanūgacū ta ũmarogue yūre wereniguiri carabū.

—Siete bupua erā arĩrare gajirāre werebita. Eropigū irire goja aĩbita, arĩro carabū yūre.

<sup>5</sup> Īḡu eropa arīra pūhrū wūariyague niguidiḡu, yeba niguidiḡu anyu ĭḡu mojoto diayerū mera sīme mujuami ūmarogue. <sup>6</sup> Eropa sīme mujugū Goāmū eropa ojocariniḡu wāī mera wāīpeoami. Īḡu Goāmūpū árīpehrerire, ūmūsi, ūmūsi majarāre, i yebare, i yeba árīrāre, pagayarire, pagayari majarāre iḡu āhrimi. Eropiḡu ōpa arāmi anyu:

—Goāmū mera diaye arīḡu iiaa. Iripēta corerāra. <sup>7</sup> Seis anyua erā corneta dipurure erā purira pūhrū gajigū anyu ĭḡu puritucū Goāmū iribojegue ĭḡu “Ōpa iḡura,” ĭḡu arīdiro dopa ta iḡucumi. Iribojegue masare irire ōaro werebiripū. Pūhrū ĭḡu pohro majarāre, ĭḡu yare weremūhtarāre ōaro werepehopū ĭḡu. Iri ĭḡu werepirare dohpaguere iḡucumi, arāmi anyu.

<sup>8</sup> Īḡu eropa arīra pūhrū ūmarogue yūre wereniguidiro dopa ta dipaturi wereniḡu carami daja. Ōpa arīḡu carami yūre:

—Wūariyague niḡuḡu yebague niḡuḡu sihī anyu pohrogue waque. Eropa wagū papera tūrugāre ĭḡu opari tūrugāre aīque, arīḡu carami yūre. <sup>9</sup> Īḡu eroparīcū peegū anyu pohrogue wahabū. Īḡare papera tūrugāre yū serēcū peegū ōpa arī yūhriami yūre:

—Aīque. Eropiḡu i papera tūrugāre baque mūhū. Mū ne bacū mome iro dopa ōaro imisīroca. Mū parugue mū acura pūhrū sūia waroca, arāmi yūre.

<sup>10</sup> Īḡu eroparīcū peegū iri tūrugāre anyure yū aīra pūhrū bahabū. Yū ne bacū mome iro dopa imisīabū. Yū ba acura pūhrū yū parugue sūiro carabū yūre. <sup>11</sup> Yū eropa bara pūhrū ōpa arāmi yūre:

—Dipaturi bajarā masare, macari majarāre, yebari majarāre, baja disirori wereniḡuirāre, erā tauro oparā sāre pūhrū erā dohpa waborore wereyumuhtaque, arāmi yūre.

## 11

### *Perā Goāmū yare weremorāre were gojapū Nū marire*

<sup>1</sup> Pūhrū yūre queodigūre odoreami Goāmū. Tuadigūpē yoadiḡu āhrabū iriḡu. Iriḡu odoreḡu ōpa arāmi yūre:

—Yaha wihire queogū waque. Iri wihi majañe yūre umupeori mesa sāre queoque. Eropiḡu iri wihiguere masare yūre umupeorā sāre queoque. <sup>2</sup> Disiporo wirinūgaropūre queobita. Iripūyū yūre gamebirā erā cūhrapirapūyū āhraa. Erā cuarenta y dos aberi gohra Goāmū ya macare iri maca majarā sāre ñero iirācoma. Eropiḡu queobita iripūyūre. <sup>3</sup> Eropiḡu yahare wererāre perāre obeogura. Mil doscientos sesenta nūri gohra yahare wererācoma. Co suhri sañanirā árīrācoma erā yū weredorenirā, arī wereami yūre.

<sup>4</sup> —I yeba majarā tauro opū pohro pegū olivo wāicūri yucū niguiā. Pegū sihāgori yucū sā iri yucū pohro niguiā. Iri yucū oā perā yahare weremorā iro dopa āhraa, arī wereami daja yūre. <sup>5</sup> Eropirā erāre īhaturirā erāre erā ñero iidiacū erā disirogue pea porā wirimaaro soe wejēpehocāroca erāre īhaturirāre. Eropa ta erāre ñero iirāre wejērācoma erā perā. <sup>6</sup> Eropiro erā perā erā deco aridorebiriḡū deco arisome. Eropiro yahare erā wereropē deco arisome. Eropirā maūrire diyari poyacū iirācoma erā. Eropirā i yebare ñero wacū iirācoma erā. Árīpehreri dohpa árīrore, dohpa árīrāre, masare ñero wacū iirācoma erā. Erā noho gamero iidiaropē eropa ñero wacū iirācoma i yebare.

<sup>7</sup> Erā Goāmū yare weretuhajacū ūhcāri gobegue arīḡu ñegū nūḡu majagū wiriḡucumi. Eropiḡu Goāmū yare wererā erā perā mera gamequeāḡucumi. Eropa gamequeāḡu turatarinūgagū erāre wejēcāḡucumi. <sup>8</sup> Īḡu eropa wejēra pūhrū erā yā dūpūri mūra wūari maca maja mague oyaroca. Mari Opūre Jesucristore erā



pabia wejēra maca āhraa iri maca. Iri maca majarā ñerā árĩrā, Sodoma majarā mura, Egipto majarā mura iro dopa āhrama. <sup>9</sup> Erā dɔpuri mura oyaro ɔhrenɔ ɔaro oya, gajinɔ deco erā ya dɔpuri mura iri mare oyaroca. Eropirā árĩpehleri yeba majarā yujurāyeri, árĩpehleri cururi majarā yujurāyeri, árĩpehlerā yare wereniguirā yujurāyeri iri nɔcɔ nuri gohra erā ya dɔpuri murare ĩarācoma. Eropirā iri nɔcɔ nuri gohra erāre yaadoresome. <sup>10</sup> Erā perā Goāmɔ yare weremɔhtanirā i yeba majarāre erā ñero iira dipuwaja moanirā árĩrācoma. Eropirā erā eropa sĩrinirā árĩcũ ĩarā árĩpehleri majarā mucubirirācoma. Eropa mucubirirā bosenu ii, erā basi gajinore eropa ocārācoma.

<sup>11</sup> Erā eropa iiquerecũ ɔhrenɔ pɔhrɔ gajinɔ deco gohra Goāmɔ erāre masugucumi daja. Ĩgɔ eropa masucũ erā dipaturi wahgānɔgajarācoma. Erā eropa wahgānɔgajacũ ĩarā árĩpehlerā buriḡā gũirācoma erāre. <sup>12</sup> Pɔhrɔ ɔmarogue buriḡā erāre perāre wereniguicũ peerācoma masa. Ōpa arĩri bɔsuroca erāre:

—Ōgue mɔririque mɔa, arĩri bɔsuroca.

Erāre eropa arĩ wereniguirire bɔsucũ peerā imica cururi watope mɔria warācoma. Erāre doonirā mura erā mɔriacũ ĩarācoma. <sup>13</sup> Erā eropa mɔriarisubu yeba turaro ñohmeroca. Eropa ñohmecũ ta iri maca maja wiri baja wiri mihrua dija waroca. Eropirā yeba ñohmero mera siete mil masa sĩria warācoma. Gajirā dɔhyarāpɔ ɔca wa, Goāmɔre ɔmaro majagure “Turagɔ āhrimi,” arĩ umupeorācoma pare ĩgure.

<sup>14</sup> I árĩpehleri eropa wara pɔhrɔ pesubu masa erā ñero tarituhajanirā árĩrācoma. Eropa tarira pɔhrɔḡā ta dipaturi masa mata daja ñero tarirācoma.

### *Seis corneta dipurure erā purira pɔhrɔ gajigɔ puripɔ*

<sup>15</sup> Pɔhrɔ seis corneta dipurure erā purira pɔhrɔ gajigɔ anyu ĩgɔ yarure puriami. Ĩgɔ eropa puricũ ɔmarogue turaro wereniguiro carabɔ. Ōpa arĩro carabɔ: Dohpague mari Pagɔ, Cristo mera i yeba majarā tauro opɔ árĩḡucumi. Eropigɔ eropa opɔ árĩniguigucumi Goāmɔ, arĩro carabɔ.

<sup>16</sup> Eropirā Goāmɔ core oparā doarigie doarā veinticuatro Jesu yarā oparā Goāmɔ core mereja, ĩgure umupeoama. <sup>17</sup> Eropa umupeorā Ōpa arāma:

Gɔa opɔ Goāmɔ, turatariagɔ āhraa mɔhɔ. Mɔhɔ negohraguere eropa árĩmɔriyoro. Eropigɔ dohpague sāre eropa árĩniguia. Pɔhrɔḡue árĩḡuca mɔhɔ. Mɔ turari mera masa erā opɔ mɔ árĩnɔgacũ, “Ōhaa,” arāa gɔa mure. <sup>18</sup> Árĩpehlerā i yeba majarā mure gamebirā mɔ mera guarima. Dohpaguere erāre mɔ dipuwaja moaburisubu āhraa. Sĩrinirā sāre mɔ dipuwaja moaburisubu āhraa. Eropiro mɔ yarāpɔre ɔarire erā iira wajare mɔ oburinosubu āhraa. Yujurāyeri erā mɔ yare weremɔhtanirā árĩma. Eropirā erā gajirā mɔ yarā mera árĩpehlerā mure ɔaro umupeonirā árĩma. Eropigɔ oparāre, bu árĩrā sāre mɔ yarā erā árĩcũ ĩha ɔaro iiguca mɔhɔ erāre. Eropiro i yeba majarāre goroweocorerāre mɔ cóāburisubuno arĩro iiaa dohpaguere, arĩ umupeoama Jesu yarā oparā Goāmɔre.

<sup>19</sup> Erā eropa arĩ umupeora pɔhrɔ ɔmaro maja wihi Goāmɔ ya wihi ĩgɔ pāḡura wihi ĩhabɔ. Eropirā iri wihi arĩri comorore ĩhabɔ gɔa. Iri comoro pohecague Goāmɔ “Masare itamugura,” ĩgɔ arĩ werepirapũ sañabɔ. Gɔa eropa ĩacũ ta miamaa, bupu paamaa, gajiroa bɔsɔmaa, i yeba ñohmemaa wahabɔ. Deco yɔsariyeri deco buriḡā ɔmarogue dijaribɔ.

## 12

*Nomeore, pĩru sāre werepɔ Ñu*

<sup>1</sup> Puhru i yeba dohpa waborore umarogue dehyoabu yare. Eropa dehyoari guhyadiaro maja ahrabu. Opa iamuhtabu: Umarogue nomeore ihabu. Igo suhriro abe umu majagu iro dopa gosesiriabu. Eropigo abe namu majagu weca niguiamo. Opu igu peyarino berore doce neca opari berore peyadigo niguiamo. <sup>2</sup> Eropiro igo poracuboro meroga duhyabu. Eropigo igo niji wahgugo puriro mera gaguiniguiamo. <sup>3</sup> Puhru dipaturi ihabu daja umarogue: Wuagu purure diagure ihabu. Siete dipu dipucugu ahrami. Aripehreri igu dipu opara era peyarino berore peyara dipu dihta ahrabu. Eropigu diez cusaricugu ahrami igu. <sup>4</sup> Igu piguru mera neca dipurure wejēsiri medijuami. Aripehrera necare deco gohra wejēsiri medijuami. Eropigu nomeo poracugo pohro niguiami piru. Igo maguga dehyoacu babu iirami. <sup>5</sup> Meroga puhrugā ta masa dehyoatuhami majiguga. Aripehreri yeba majara opu aribu ahrami iguga. Igu eropa opu turagu aricu masa igure tarinugarā yujuro bojesome. Igu eropa masa dehyoacu ta Goamu igu doaro pohrogue igugare aibeocami. <sup>6</sup> Igu eropa iicu nomeopu masa marirogue purure duhriga wahamo. Goamu igu amuyudirogue duhriga wahamo igo. Eroguere mil doscientos sesenta nari gohra Goamu igore ihadibumi.

<sup>7</sup> Eropira umarogue gamewejenugama. Migue waicugu anyu igu yara anyua sa piru mera gamequeama. Era eropa gamequeacu piru igu yara anyua mera Miguere gamequeami. <sup>8</sup> Eropira Migue sa purure tarinugama. Eropigu purure igu yare anyuare umaroguere arinmodorebirami. <sup>9</sup> Eropigu wuagu purure cocami Goamu. Igu piru wati ta arigu iiami. Satana waicugu ahrimi. Iribojeguere igu piru dupu dopa deyogu arinumi. Eropigu aripehreri yeba majara guyagu ahrimi. Goamu igure cocu igu yara anyua mera yebague cohā dijuami.

<sup>10</sup> Puhru umarogue turaro wereniguicu peeabu:

—Dohpaguere mari Pagu masare taumi pare. Dohpagu tamerare mari Pagu mari Opu arigu ahrimi igu turare ihmubu. Eropigu igu obeodigu Cristo sa igu opu arire igu turare ihmumi aripehrera. Watire umarogue aridigure cohā dijuami i yebague. Eropigu igu turare ihmumi mari Pagu. Igu watipu umuri nucu, namiri nucu Jesu yare, “Oa nera ahri,” ar wesaigu iimi mari Pagu. Eropigu mari acawerera Jesu yare wesaigu arimi. <sup>11</sup> Cristo Cordero waicugu igu di coaro mera mari acawerera igure umupearā era neri iirare coasunira arima. Eropa arira watire tarinugama. Eropira oari buherire werera, watire tarinugama. Igu yare werera dipuwaja gajira era wejediaquerecu ta, Cristo yare duhubira arira igure tarinugama. <sup>12</sup> Eropira mua umaro majara mucubirique. Watire igu yebague cohā dijucu irā mucubirique. Mua yeba majarapu, wariya majara sa mojomorocura waraca mua. Mua pohrogue dijami wati. Igure dipuwaja moaboro meroga duhyaa. Eropigu guataricami igu. Mua pohrogue igu ejacu mojomorocuro dujacu iigucumi igu mure, ar gaguiniguiro caricu peeabu.

<sup>13</sup> Eropigu purupu cohā dijudigu nomeore, majiguga pagore nurusia wahgami. <sup>14</sup> Eropigu Goamu gaa wuagu que dure ohami igore masa marirogue igo wu duhri wahgaboro dopa. Erogu igo ejara puhru ure bojori oaro gaji bojori deco gohra oaro ihadibuami Goamu igore. Igu eropa ihadibucu piru igore nero iimasibirami. <sup>15</sup> Ero igo aricu igu puru igore miudiagu wuro decore etocabeocami. <sup>16</sup> Igu eropa iquerecu yepu igore itamuabu. Piru igu disiro wiriri decore yepu yehrimaa wa uju aibeocabu. <sup>17-18</sup> Eropa wacu igu puru guatariami. Eropa guagu yujurayeri igo paramera arituriera mera gamewejegu wahami. Erapu Goamu dorere iira ahrama. Jesu yare oari buherire ne duhubira ahrama. Era mera gamewejegu wahami. Eropigu piru wariya turo pohro niguiami.

## 13

*Perã nuęu majarãre werepũ Nũ*

<sup>1</sup> Wũariya tũro niguęu, nuęu majagu iriya árĩęure ĩęu wahgãpacũ ĩhabũ. ĩęu siete dipu, diez gohra cusaricęu aħrami. ĩęu cusari oparã erã peyarino berori peyãmi. Eropiro ĩęu dipure ĩęu waĩre ĩęu gojatura aħrabũ. ĩęu waĩ iri ñeri waĩ árĩro Goãmure ĩhaturiri waĩ aħrabũ. <sup>2</sup> Eropigu ĩęu nuęu majagu yee dorogu guagu iro dopa bejãmi. Eropigu bugu iro dopa guburicęu aħrami. Eropigu yee wũagũro iro dopa disirocęu aħrami. Eropigu pĩrupũ ĩęu turarire ohami nuęu majagure. Eropa ogu ĩęure ĩęu opu doaro apigu ĩęu iro dopa ta masa bajarãre dorecũ iiãmi pĩru nuęu majagure. <sup>3</sup> ĩęu nuęu majagu dipuru yuju dipuru camirocãri dipuru dopa bejabũ. Iri camiro ĩęure wejẽbocurira camiro árĩquerero yarira camiro aħrabũ. Iri dipuru ojocaricũ ĩarã, uca wahãma i yeba majarã árĩpehrerã. Eropa ĩha ucarã, nuęu majagure “Turagu aħrimi,” arĩ umupeoama. Eropirã ĩęu yarã wahãma masa. <sup>4</sup> Eropirã nuęu majagure pĩru ĩęu turarire ocũ ĩarã masapũ ĩęure pĩrure mereja umupeoama. Eropirã nuęu majagu sãre mereja ĩęure umupeoama. Eropa umupeorã õpa arãma:

—Ne gajigu mũ iro dopa turagu marimi. Gajigu mũre ne tarinũgamasibeami, arĩ umupeoama masa nuęu majagure.

<sup>5</sup> Eropigu ĩęu nuęu majagu “Turatariagu aħrimi,” erã ĩęure arĩquerecũ ta, ĩęu Goãmure ñero wereniguiquerecũ ta eropa pepicãnimi Goãmũpũ. Eropigu cuarenta y dos aberi gohra ĩęu nuęu majagu masare dorenigucumi. Iripẽta ĩęu opu árĩcũ gahmemi Goãmũ. <sup>6</sup> Eropigu Goãmure ñero wereniguiami ĩęu. ĩęu waĩre, ĩęu wihire, uamarogue ĩęu árĩro, ĩęu pohro majarã sãre ñero wereniguiami nuęu majagu. <sup>7</sup> Eropigu Goãmũ yarãre gamewejęu erãre tarinũgãmi. ĩęu eropa tarinũgaquerecũ ta eropa ĩacãniami Goãmũ. Goãmũ ĩęu eropa iidorebircũre iisome ĩęu. Eropigu árĩpehrerã i yeba majarã tauro opu árĩnirami nuęu majagu. Árĩpehreri cururi majarã, árĩpehreri yebari majarã tauro, árĩpehreri macari majarã tauro, árĩpehrerã yare wereniguirã tauro opu árĩnirami ĩęu. <sup>8</sup> Eropirã árĩpehrerã i yeba majarã ĩęu nuęu majagu pohro mereja ĩęure umupeorãcoma Goãmũ yarã árĩbirãpũ. I yebare Goãmũ ĩęu ĩhacũnuguboro core ĩęu yarã árĩmorãre ĩęu mera árĩniguimorãre erã waĩre gojatutuhanũmi. Iripũ ĩęu eropa gojaturapũ Cordero erã wejẽdigu yapũ aħraa. Iripũ erã waĩre gojatubirã dihta Goãmũ yarã árĩbirã nuęu majagure umupeorãcoma.

<sup>9</sup> Gamiricũrã aħraa mũa. Eropirã peeque mũa Jesu yarã árĩrã. <sup>10</sup> Árĩpehrerã mũare peresu iinirãre erã sãre peresu iigucumi pũhrũ. Árĩpehrerã masare ñose wejẽnirãre erã sãre ñose wejẽgucumi pũhrũ. Irire masirã mari Goãmũ yarã ñero tariquererã ta ĩęure cóãbircãrã. Eropirã yujuro boje ĩęure guñaturarã.

<sup>11</sup> Pũhrũ gajigu nuęu majagure ĩhabũ daja. Yeba pohecague ĩęu árĩdigu ĩęu wiriricũ ĩhabũ. Pecusaro oveja cusaro iro dopa bejari cusaro cusarocęu aħrami. Eropa árĩquereęu pĩru iro dopa wereniguiami. <sup>12</sup> Eropigu nuęu majagu árĩmũhtadigupũ pũhrũ árĩdigure opu acuami. ĩęu eropa opu acugupũ árĩpehreri yeba majarãre árĩmũhtadire umupeodoreami. Árĩmũhtadi nuęu majagu erã wejẽbocuridi camiro yaridigu aħrami. <sup>13</sup> Eropigu pũhrũ árĩdigu deyoro moarire ii ĩhmuami masa erã ĩha ucaboro dopa. Eropa iigu masa erã ĩaro peame wũari peame uamarogue dijaricũ iiãmi. <sup>14</sup> Eropigu árĩmũhtadigu ĩęu ĩhuro gajigu nuęu majagupũ deyoro moari mera masare gũyãmi, “Ihĩ mũa umupeobu aħrimi,” arĩęu. Eropigu ĩęu gajigu nuęu majagu árĩmũhtadigure wéadoreami masare. ĩęu árĩmũhtadigu ñoserimiji mera erã ñosedigu árĩquereęu ta ojocarigu aħrami. ĩęu iro dopa bejagure ta wéadoreami gajigu nuęu majagu masare. Erã eropa iicũ ĩagu Goãmũ dooquereęu ta eropa ĩacãniami. <sup>15</sup> Eropigu pũhrũ árĩdigu nuęu majagupũ árĩmũhtadire

wéadigũre ojocaricã iiami masare ãgũ doreboro dopa. Eropigũ wéadigũpũ erã ãgũre umupeobirãre wejêdoreami. <sup>16</sup> Eropigũ árĩpehrerãre erã mojotori diayerũ sãre ãgũ waĩre gojatudoreami nũgũ majagũ pũhrũ árĩdigũ. Erã mojotorire gojatubirinirãre erã diaporire gojatudoreami ãgũ waĩre. Bu árĩrãre, oparãre, doberi oparãre, mojomorocũrãre, erã pohro majarãre, erã pohro majarã árĩbirãre, árĩpehrerãre ãgũ waĩre gojatudoreami. <sup>17</sup> ãgũ árĩmũhtadigũ nũgũ majagũ ãgũ waĩre, ãgũ numerore gojatubirãre ne asũdorebirami. Eropigũ erãre duadorebirami.

<sup>18</sup> Irire õaro masique mũa. Pee masirã árĩrã nũgũ majagũ ãgũ numerore õaro ãha masique. Iri numero ũa waĩ iro dopa ãhraa. Iri numero seiscientos sesenta y seis gohra ãhraa.

## 14

### *Goãmũ ãgũ taunirã mama bayariñere bayañorã*

<sup>1</sup> Pũhrũ Siõn waĩcũdigũ utãgũ weca niguĩgũre Corderore ãhabũ. ãgũ mera ciento cuarenta y cuatro mil masa ãhrama. Erã ãgũ ya waĩre ãgũ Pagũ ya waĩ sãre erã diaporire erã gojatunirã ãhrama. <sup>2</sup> Erãre yũ ãacũ ta ũamarogue bũsũro carabũ. Wũari utãmu bũsũro dopa ta, bupu ãgũ wũaro bũsũro dopa ta bũsũro carabũ. Eropigũ arpa waĩcũrĩre erã bũamũtẽro dopa ta bũsũro carabũ. <sup>3</sup> Erã ciento cuarenta y cuatro mil masa bayarã ãhrama. Ero opũ ãgũ doaro pohro wapicũrã gajiropa bejarã, Jesu yarã oparã sã core bayarã ãhrama erã. Erã bayariñe mama bayariñe ãhrabũ. Iri bayarire erã dihta masiama. Cristo ãgũ taunirã dihta iri bayarire masiama. Erã i yeba árĩnirã mũra ãgũ aĩ mujunirã ãhrama. <sup>4</sup> “Ne ñerire iisome,” arĩnirã ñerire iibirinirã ãhrama. Ne erã yujusubugã nome mera ñero iibirinirã ãhrama. Eropirã Corderore ãhacũnirã árĩrã, ãgũ yare eropa iiniguimũrama. Eropigũ erãre ñerã watope árĩnirãre ãgũ taumorãre aĩami Goãmũpũ. Eropa ãgũ taunirã árĩrã, Goãmũ yarã árĩmorã, Cordero yarã sã árĩmũhtanirã ãhrama. <sup>5</sup> Eropirã erã mera majarã ne yujugũ gũyagũ marami. Eropirã Goãmũ ãgũ pepicũ ñeri iira dipuwaja marirã ãhrama erã.

### *Urerã anyua weremedijuñorã*

<sup>6</sup> Pũhrũ ũamarogue wũũgũre anyure ãhabũ. ãgũ i yeba majarãre árĩpehreri cururi majarãre, árĩpehrerã yare wereniguirãre, árĩpehreri yebari majarãre õari buherire werebu ãhrami. Iri buheri ne gohrotobea. Eropa árĩniguicãa. <sup>7</sup> Eropigũ anyu gaguinigũ õpa arĩ medijuami:

—Goãmũre gũique. “Turatariagũ, õatariagũ ãhrimi,” arĩ umupeoque ãgũre. Dohpaguere masare ãgũ dipuwaja moaburibusu árĩro iiaa. ãgũ ũamũsire, yebare, pagayarire, mũtayarigã sãre iidigũ ãhrimi. Eropirã ãgũre mereja umupeoque, arĩ gaguinigui dijuami anyu.

<sup>8</sup> ãgũ eropa arĩra pũhrũ gajigũ anyu ũamaro wũũgũ õpa arĩ medijuami:

—Erãre cóãcãmi. Wũari maca Babilonia waĩcũri maca majarãre cóãcãmi Goãmũ. Erã ãgũ cóãnirãpũ árĩpehrerã gajirãre ñero iicũ iima. Masa erãre ãhacũrã, ñerire ũaribejarã, goãmarã wéanirãre umupeoma. Merericũrã vinore erã turaro ũaribejaro dopa ta erã ñerire turaro ũaribejama Babilonia majarãre ãhacũrã, arĩ were medijuami gajigũ anyu.

<sup>9-10</sup> Erã perã anyua eropa arĩra pũhrũ gajigũ anyu erã pũhrũ wũũgũ gaguinigui õpa arĩ medijuami ãgũ sã:

—Árĩpehrerã nũgũ majagũre umupeorãre, ãgũre wéadigũre umupeorãre erã diaporire, erã mojotorire ãgũ waĩre gojatunirãre dipuwaja moagũcumĩ Goãmũ. Erã mera guagũ erã tamerare turaro dipuwaja moagũcumĩ Goãmũ. Eropigũ Goãmũ erãre bũrigã dipuwaja moaniguigũcumĩ cãdijiro mariro. Nũgũ majagũre umupeorã árĩpehrerã peamegue warãcoma. Erogue bũrigã pũriroca erãre. Azufre waĩcũri



mera erã dihura peame árĩroca. Goãmũ yarã anyua, Cordero sã erã ìhuro ñero tarirãcoma erã. <sup>11</sup> Iri peame eropa imicacũniguicãroca. Ne yarisome. Erãre eropa pũriniguicũ iiroca. Árĩpehrerã nuũ majagũre mereja umupeorãre eropa pũriniguiroca. Ùmuri sãre, ñamiri sãre eropa pũriniguicãroca sooro mariro erãre. Ìũ nuũ majagũre ìũ wéadigũre umupeorã, ìũ waĩre erã gojatunirã sã, eropa ta ñero tarirãcoma, arĩ medijuami anyu.

<sup>12</sup> Eropigũ õpa arĩ werea mũare ire: Mũa erã eropa ñero tariborore masirã, Goãmũ yarã ìũ dorerire iirã, Jesure cóãbirã árĩrã, ìũ yare duhubiricãque. Ñero tarirã árĩquererã ta Goãmũ yare duhubiricãque, arãa yũhũ mũare.

<sup>13</sup> Pũhrũ ùmarogue yũre wereniguiro caracũ peeabũ daja. Òpa arãmi yũre:

—Ire gojaque mũhũ. Goãmũ yarã ìũre cóãbirã árĩnirã dohpaguere mũa sĩrira pũhrũ sãre õaro mucubirirã árĩrãca mũa, arĩ medijugũ carami yũre. Ìũ eropa arĩra pũhrũ Espĩritu Santopũ õpa arĩnemoami daja:

—Eropa ta àhraa. Diaye ta àhraa. Erã turaro erã mohmerire duhpiicã soorãcoma. Ùmarogue erã wacũ õaro erã iirare guñagũcumi Goãmũ. Eropigũ erãre õaro ìũcumi. Eropirã erã mucubirirã árĩrãcoma, arĩnemoami Espĩritu Santo.

*Pohe maja oteri dũcare mari beye aĩro dopa ta Goãmũ ìũ yarãre beye aĩũcumi. Ñerãpũre boje beye dobogũcumi, arĩ gojañumi Ñũ*

<sup>14</sup> Pũhrũ imica curu boreri curure ìhabũ. Iri curu weca masũ dopa bejagũ doãmi. Ìũ oro bero opũ ìũ peyarino berore peyãmi. Eropigũ matamiji usiri mijire opãmi ìũ. <sup>15</sup> Pũhrũ gajigũ anyu Goãmũ wihigue árĩdigũ wirirami. Eropa wiririgũ turaro gaguiniami imica curu weca doagũre:

—Mũhũ matamiji mera pohe maja dũcare i yeba maja dũcare tabe aĩpehocãque. Dohpaguere mũ queodiro ejaa. Dũca boretuhabũ, arãmi anyu.

<sup>16</sup> Ìũ eroparĩcũ peegũ ìũ matamiji mera i yebare tãranũgami ìũ imica curu weca doagũ. Eropa tãranũgagũ i yeba maja dũcare aĩro dopa iiami.

<sup>17</sup> Pũhrũ gajigũ anyu sã Goãmũ wihigue árĩdigũ wirirami. Ìũ sã matamiji usirimijire opãmi. <sup>18</sup> Eropigũ gajigũ anyu Goãmũre umupeori mesa pohrogue árĩdigũ wirirami. Ìũpũ mesa maja peamere ìhadibugũ àhrami. Eropa wiririgũ matamiji usirimiji opagũre gaguiniguiami:

—Mũhũ matamiji mera i yeba árĩri pohere, igui pohe maja dũcare aĩque. Iguipũ ñiituhabũ, arĩ gaguiniguiami.

<sup>19</sup> Ìũ eroparĩcũ peegũ anyu ìũ matamiji mera i yebare tãragũ, iguitõrĩre wĩrita aĩami. Ìũ eropa iira pũhrũ iritõrĩre iguitõrĩre ìũ ñatĩarogue cõhãmi. Ìũ eropa ñatĩaro dopa ta Goãmũ ìũre gamebirãre turaro guagũ, dipuwaja moagũcumi. <sup>20</sup> Iri maca tũro pohro erã ñatĩaro iri iguitõrĩre ñatĩama. Ero erã ñatĩacũ igui deco wiriro dopa di wĩriabũ. Trescientos kilõmetros yoariya, yuju metro õaro gaji metro deco ùhcãriya àhrabũ di mera. Irĩre ìha masiabũ. Yujunũ anyu Goãmũre gamebirãre ñerĩre iinirãre gameneo erã ñeri iira dipuwaja moagũcumi. Ìũ eropiicũ masa bajarã sĩrirãcoma. Eropa sĩrirã di pagari cóãrãcoma, arĩ masiabũ yũhũ.

## 15

*Masa erã ñero tariborore anyua apituñorã masare*

<sup>1</sup> Pũhrũ ùmarogue gajiropa árĩrore ìhabũ. Gũhyadiaro árĩro i yebague dohpa waborore ìhmuriñe àhrabũ. Òpa ìhabũ: Siete anyua àhrama. Goãmũ guagũ siete suburi masare dipuwaja moatubu iiami. Eropirã erã siete anyuapũ dipuwaja moadore ìũ apimorã àhrama.

<sup>2</sup> Anyuare yu ĩara pũhrũ wũariyare õaro deco suririya dopa árĩriyare ĩhabũ. Iriya peame mera árĩriya āhrabũ. Eropigũ iriya pohro niguirāre nũgũ majagũre ĩgũre wéadigũ sāre tarinũganirāre ĩhabũ. Erā nũgũ majagũ numerore ĩgũ ya waĩ maja numerore gojatudorebirinirā āhrama. Ero niguirā arpa waĩcũri bũamũtũre opáma. Iri bũamũtũri Goāmũ ĩgũ ora āhrabũ. <sup>3</sup> Eropirā Goāmũ pohro majagũ Moise ya bayarire bayarā iama. Cordero ya bayariñe sāre bayarā iama. Ōpa arĩ bayáma: Gua opu mũhũ Goāmũ turatariagu āhraa. Mũ iirare ĩarā ĩha uca wahaa gũa. Mũ iira õataria. Mũhũ árĩpehreri yeba majarā tauro opu āhraa. Ōaro gũyaro mariro diaye iiaa mũhũ. <sup>4</sup> Árĩpehrerā mũre gũima. Árĩpehrerā mũre “Turagũ āhrimi,” arĩrācoma. Mũ dihta ñeri marigũ āhraa. Árĩpehrerā i yeba majarā mũ pohrogue ejarā mereja mũre umupeorācoma. Eropa ta iirācoma erā árĩpehrerā õaro mũ iirare ĩarā, arĩ bayarā iama erā.

<sup>5</sup> Pũhrũ umarogue ĩhamemujugũ, Goāmũ ya wihire pāgũra wihire ĩhabũ. Iri wihigue Goāmũ ĩgũ doreri ĩgũ gojara mijiri utā mijiri erā dibura mijiri āhrabũ. <sup>6</sup> Iri wihire yu ĩacũ ta siete anyua iri wihi pohecague árĩnirā wirirama. Erā Goāmũ ĩgũ dipuwaja moadoregũ ĩgũ apimorā āhrama. Erā nũcũ erā dipuwaja moaburire opáma erā anyua. Ōari suhri, boreri suhricũrā āhrama. Eropiro erā coretihbi weca oro gasiro mera tuādiunirā āhrama. <sup>7</sup> Iri wihigue árĩnirā erā wiriricũ wapicũrā gajiropa bejarā mera majagũ erāre siete anyuare oroparire ohami. Iripari Goāmũ gua ĩgũ dipuwaja moadoburi mera õaro ujuturiabũ iripari. ĩgũ Goāmũ eropa árĩniguigũ āhrimi. <sup>8</sup> ĩgũ iriparire erāre ocũ ta Goāmũ wihi pohecague ĩgũ goesiriri mera ĩgũ turari mera imicacũ sehya wahabũ. Iri wihi eropa imicacũ sehya wacũ iri wihire ne yujugũ ñaja masiya marabũ. Siete anyua Goāmũ dipuwaja moadoregũ ĩgũ apidiro dopa ta erā masare dipuwaja moatura pũhrũ dipaturi iri wihigue ñajamasirācoma daja. ĩgũ dipuwaja moaboro core ñaja masiya mara. apidiro dopa ta erā masare dipuwaja moatura pũhrũ dipaturi iri wihigue ñajamasirācoma daja. ĩgũ dipuwaja moaboro core ñaja masiya mara.

## 16

### *Goāmũ masare ĩgũ dipuwaja moaborore wererũ*

<sup>1</sup> Pũhrũ Goāmũ wihigue turaro wereniguiro carabũ. Siete anyuare wererũ iigu carami:

—Goāmũ ĩgũre tarinũganirā mera guami. Eropirā ĩgũ dipuwaja moadorerare iique. Eropirā dohpaguere siete pari dicũre yebague pisiri medijurā waque i yeba majarāre, arĩ wereniguiro carami.

<sup>2</sup> Eroparĩcũ peegũ árĩmũhtadigũ anyu ĩgũ oparipa dicũre yebague pisiri medijuami. ĩgũ eropa pisiri medijucũ nũgũ majagũ waĩre gojatunirā ĩgũre wéadigũre umupeonirā ñero camicũama. Iri cami turaro pũriyoro erāre.

<sup>3</sup> ĩgũ eropa pisirira pũhrũ gajigũ anyu daja ĩgũ oparipa dicũre pisiri medijuami daja wũariyague. ĩgũ eropa pisiricũ iriya diya wahabũ. Sĩridigũ di iro dopa āhrabũ iri di. Eropa wacũ iriya pohecague árĩnirā sĩripehrea waháma.

<sup>4</sup> Perā eropa pisiri dijura pũhrũ gajigũ anyu ĩgũ oparipa dicũre pisiri medijuami daja maurigue, iri mauri diparigue sāre. ĩgũ eropa pisiricũ mauri diyari dihta wahabũ. <sup>5</sup> Eropa wacũ ĩagũ gajigũ anyu maurire coregũ õpa arĩgũ carami:

—Goāmũ, mũhũ ñeri marigũ āhraa. Dohpague sāre eropa árĩniguicāgũ āhraa mũhũ. Iribojegue sāre eropa árĩniguicāmũribũ mũhũ. Eropigũ dipuwaja moagũ diyarire iigu diaye iiabũ mũhũ. <sup>6</sup> Nũgũ majagũ yarāpũ mũ yarāre wejērā di cóacũ iima. Mũ yare wererā sāre wejērā di cóacũ iima erā. Erā eropa wejērā dipuwaja

iriyari diyari wahabũ erã ihriburi. Ōpa ta mũ iicũ gahmeama erã, arĩgũ carami maurire coregũ anyu.

<sup>7</sup> Īgũ eropa arĩra pũhrũ Goãmũre umupeori mesague wereniguiro carabũ daja:

—Eropa ta ãhraa. Goãmũ gũa opũ turatariagu ãhraa mũhũ. Gũyaro mariro, queoro masare beye, dipuwaja moaa mũhũ, arĩ wereniguiro carabũ.

<sup>8</sup> Ūrerã anyua erã pisirira pũhrũ gajigũ anyu ĩgũ oparipa dicũrire pisiri medijuami daja. Abe mũmũ majagũ weca pisiri medijuami. Īgũ eropa pisiricũ abere masare turaro asicũ iiami Goãmũ. <sup>9</sup> Eropigũ abe mũmũ majagũ masare turaro asiami. Erãre eropa asicũ erã Goãmũ erãre ĩgũ dipuwaja moadorecũ masirã, ĩgũre ñero wereniguiama masa. Eropa ñero tariquererã ta erã ñero iirare ne bũjawerebirama. Eropirã duhubirama. Goãmũre “Turagũ ãhrimi,” arĩ umupeodiabirama.

<sup>10</sup> Wapicũrã anyua erã pisirira pũhrũ gajigũ anyu daja ĩgũ oparipa dicũrire pisiri medijuami daja. Nũgũ majagũ ĩgũ doaro weca pisiri medijuami. Opũ doaro ãhrabũ ĩgũ doaro. Īgũ eropa pisirira pũhrũ ĩgũ yarã árĩri yebague naitĩaro wahabũ. Eropirã ĩgũ yarã masa ñero pũricũ gũcũrire cũridihuama. <sup>11</sup> Erãre ñero pũricũ ta, erã ñero camicũrã ta Goãmũre umaro majagũre ñero wereniguiama. Erã ñero iirapũre bũjawerebirama. Eropirã irire duhubirama.

<sup>12</sup> Yuju mojtocũ majarã anyua erã pisirira pũhrũ gajigũ anyu daja ĩgũ oparipa dicũrire pisiri medijuami daja. Eufrate waĩcũriya wũariyague pisiri medijuami. Īgũ eropa pisiricũ iriya bojomerea wahabũ. Abe mũririro majarã oparã erã gamewejẽrã warã erã iriya taribujariboro dopa eropa iiami.

<sup>13</sup> Pũhrũ ũrerã watẽare tarumũrã iro dopa bejarãre ĩhabũ. Yujugũ tarubũgũ pĩru pohecague árĩdigũ ĩgũ disirogue wirirami. Gajigũ tarubũgũ watĩ nũgũ majagũ disirogue wirirami. Gajigũ tarubũgũ watĩ daja “Goãmũ yare weregũ ãhraa,” arĩ gũyadigũ ya disirogue wirirami. <sup>14</sup> Eropirã erã ũrerã watẽa tarumũrã iro dopa bejarã deyoro moarire ii ĩhmurã ãhrama. Eropirã árĩpehrero majarã oparãre gamenerecũ iiaama erã basi Goãmũ mera gamewejẽdorera. Erã eropa gamewejẽburinũ Goãmũ turatariagu árĩpehrerãre ĩgũ dipuwaja moaburinũ, pehreburinũ árĩroca.

<sup>15</sup> Ero coregue ōpa arĩmi Jesu gũare: Īaque mũa. Yajari masũ ĩgũ yajagũ ariro dopa ta yũ sã guñaña mariro arigũca. Yũ ariborore ōaro coredigũ mucubirigũ árĩgũcumĩ. Īgũ yaha árĩburire iinigidigũ ñeri marigũ mucubirigũcumĩ. Yũ mera árĩgũcumĩ. Eropa iidigũ árĩgũ yũ dujaricũ gũhyasĩrisome ĩgũ, arĩmi Jesu gũare.

<sup>16</sup> Eropirã ũrerã watẽa i yeba majarã tauro oparãre gamewejẽcũ iituhãma. Erã gamewejẽro Hebreo ya disiro mera Armagedón waĩcũa.

<sup>17</sup> Seis anyua erã pisirira pũhrũ daja gajigũ anyu ĩgũ oparipa dicũrire imica cururi weca pisiri medijuami daja. Īgũ eropa pisirira pũhrũ Goãmũ wihigue ĩgũ opũ doarogue turaro wereniguiro carabũ:

—Iripẽta árĩroca, arĩro carabũ.

<sup>18</sup> Īgũ eroparĩcũ ta miamaa, bupu pamaa, gajiropa busumaa, gũhyaro yeba ñohmeabũ. I yeba masa erã árĩnũgara pũhrũ eropa siari ñohmehirabũ i yeba. Gajisubũ ñohmediro tauro gũhyaro yeba ñohmemaabũ. <sup>19</sup> Eropa ñohmecũ wũari macare Babilonia waĩcũri macare ũhrema yehremaa wahabũ. Eropiro paga macari i yeba árĩri macari dija wahabũ. Eropigũ Babilonia waĩcũri maca majarãre wũari maca majarãre guñãmi Goãmũ erãre dipuwaja moabu. Erã ñerire iiri dipuwaja erã mera turaro guãmi. Eropa guagu erãre bũrigã dipuwaja moãmi. <sup>20</sup> Īgũ eropa iicũ árĩpehreri nũgũri, ũtã yucũ sã pehrea wahabũ. Eropiro ne marabũ. <sup>21</sup> Eropiro decoyeri pagayeri yũsariyeri yebague masa weca دچارabũ. Árĩpehreri decoyeri cuarenta kilo nũcũriyeri ãhrabũ. Erã weca iri eropa دچارicũ Goãmũ erãre ĩgũ turaro dipuwaja moacũ masirã ñero wereniguiama masa Goãmũre.

## 17

*Ñerire iigore dipuwaja moadoregucumi, arĩ werepũ Ñu*

<sup>1</sup> Pũhrũ siete parire oparã anyua mera majagũ yũ pohrogue eragũ õpa arãmi yũre:

—Īagũ arique. Diari bajayari weca doagore ũama mera ñero iiricudigore Goãmu ĩgũ dipuwaja moaborore ĩagũ arique mũhũ. <sup>2</sup> I yeba majarã oparã igo mera ñero iiro dopa ta igo yapũre gamema. Goãmũpũre gamebirama. I yeba majarãre igo sihu merẽcũ iiro dopa ta, erã mera igo ñero iiro dopa ta igo masare ñero iirire ũaribejacũ iimo igo. Eropa iigo arĩpehreri ñerire erã iicũ iimũrimo igo masare, arĩ wereami anyu yũre.

<sup>3</sup> ĩgũ eropa arĩra pũhrũ Espĩritu Santo yũre deyoro moarire ĩacũ iiami. Eropigũ anyu masa marirogue aĩ wahgãmi yũre. Ero igo nomeore ĩhabũ. Igo nũgũ majagũ diagũ weca peyago ãhramo. Nũgũ majagũpũ ĩgũ dũpũ baja waĩ erã gojatudigũ ãhrami. Iri waĩ ñeri waĩ Goãmũre ñeri wereniguiiri waĩ ãhrabũ. Eropigũ siete dipucũgũ, diez gohra cusaricũgũ ãhrami nũgũ majagũ. <sup>4</sup> Eropigo nomeopũ õaro yahsari suhri oparã erã sañarino suhrire sañadigo ãhramo. Diari suhri sãre sañadigo ãhramo. Baja orore, wajacũri ũtãre, perlayeri sãre tuhura suhriore sañadigo ãhramo igo. Eropigo oropare opãmo igo. Iripare dicũri ñeri igo iira ãhrabũ. Ñero iigo bũrigã ñero iidigo arĩmo igo. Iri ñeri Goãmũ ĩgũ ĩadiabirira ãhrabũ. <sup>5</sup> Igo diapo igo waĩ erã gojatudigo ãhramo. Iri waĩre õaro masibea mari. Õpa arĩ gojatura ãhrabũ igo diapogue: “Wũari maca Babilonia ãhrimo. Igo arĩpehreri ñeri iinũgadigo ãhrimo. Arĩpehrero majarã erã ñerire, Goãmũre erã gamebiririre iinũgadigo ãhrimo. Eropirã erã igore ĩhacũrã ñetariaro iirã iima,” arĩ, igo diapore erã gojatudigo ãhramo. <sup>6</sup> Eropa igore ĩagũ igo bajarã Goãmũ yarãre igo wejẽdigo arĩcũ masiabũ yũhũ. Mererã erã mucubiriro dopa ta igo erãre wejẽgo erã di cóacũ ĩago mucubiridigo ãhramo igo. Jesure erã cóãbiriri dipuwaja erãre wejẽdigo ãhramo igo.

Igore ĩagũ, ĩha ũaca wahabũ. <sup>7</sup> Eropigũ ĩgũ anyu arãmi yũre:

—¿Duhpigũ ĩha ũaca wahari mũhũ? arãmi yũre. —Mũ masibirirare mũre ĩhmugũra. Igo nomeore mũre weregũra. Igo peyagũ sãre weregũra. ĩgũ nũgũ majagũ ãhrimi. Eropigũ siete dipucũgũ, diez cusaricũgũ ãhrimi. <sup>8</sup> ĩgũ mũ ĩadigũ iribojegue arĩdigũ arĩmi. Dohpaguere marimi ĩgũ. Pũhrũ ĩgũ ũhcãri gobegue arĩdigũ wiriri dehyoagũcumi daja. ĩgũ eropa wiririra pũhrũ dederebu peamegue wagũcumi. I yeba majarã ĩgũ dehyoacũ ĩha ũaca wa, ĩgũre umupeorãcoma. I yeba arĩboro core Goãmũ ĩgũ yarã arĩmorãre erã waĩre gojatudigũ arĩmi. ĩgũ gojatubirirã ãhrima nũgũ majagũre umupeorã. ĩgũpũ iribojegue arĩdi arĩmi. Dohpaguepũre marimi. Pũhrũ dipaturi dehyoagũcumi daja. Eropirã masa ĩgũ dehyoacũ ĩarã, ĩha ũaca warãcoma.

<sup>9</sup> “Dohpaguere yũ wereburire õaro masidiarã, õaro peerãca mũa, arĩnemoami yũre daja. Eropirã pee masirã arĩque mũa. Nũgũ majagũ dipu, siete dipu siete ũtã yucũ iro dopa ãhraa. Iri ũtã yucũ weca peyamo igo ñero iiricũgo. <sup>10</sup> Iri dipu siete oparã sã iro dopa ãhraa. Bajarã masa tauro oparã ãhrima. Cinco oparãre cóãtuhama. Gajigũ erã pũhrũ arĩgũ opũ ãhrimi dohpaguere. Gajigũpũ pũhrũ opũ ñajagũcumi. Eropa ñajagũ merogã opũ arĩgũcumi ĩgũ. <sup>11</sup> Eropigũ nũgũ majagũ diagũ core arĩdigũ, dohpaguere marigũ erã siete oparã pũhrũ opũ arĩgũcumi. Siete oparã mera majagũ ãhrimi. Pũhrũ peamegue dederea wagũcumi.

<sup>12</sup> “Nũgũ majagũ cusari diez cusari diez oparã iro dopa ãhraa. Bajarã masa tauro oparã ãhrima. Erã oparã ñajanibeama dohpa. Pũhrũgue oparã ñajarã merogã oparã arĩrãcoma. Yoari boje oparã arĩdoresome erãre. Eropa oparã arĩrã nũgũ majagũ mera oparã arĩrãcoma. <sup>13</sup> Erã diez oparã yujuro mera pepirã arĩrãcoma. Eropirã



erã nũgu majagũre erã ya yebari majarã tauro opu acurãcoma. <sup>14</sup> Eropirã Cordero mera gamewejẽ warãcoma erã. Erã eropa gamewejẽquerecũ ta Cordero ĩgu beyenirã mera ĩgũre ne cóãbirinirã mera erãre tarinũgarãcoma. ĩgu arĩpehrerã gajirã tauro opu àhrimi. Eropigu erãre tarinũgagũcumĩ,” arãmi anyu yũre.

<sup>15</sup> Ire yũre werenemoami anyu:

—Ñero iiricũgo maũri weca doago iimo. Iri maũri õpa iro dopa àhraa: Baja yebari majarã, baja cururi majarã, baja disiri wereniguirã iro dopa àhraa iri maũri. Erã bajarã weca àhrimo igo. <sup>16</sup> Nũgu majagu, diez oparã mera ñero iiricũgore ĩhaturirãcoma. Erã diez oparã nũgu majagu mera igore goroweopeho igo yare emapehocã, suhri marigo cóãrãcoma igore. Eropa iirã igo dũpũre barãcoma. Erã eropa iira pũhrũ igore soepehocãrãcoma. <sup>17</sup> Erã diez oparã yujuro mera pepirã nũgu majagũre erã ya yebari majarã tauro opu acurãcoma. Erã eropa iicũ apimi Goãmũ ĩgu gamediro dopa ta iibure. Eropigu nũgu majagũpu opu arĩgũcumĩ. Arĩpehreri Goãmũ ĩgu iribojegue ĩgu werediro dopa ta ĩgu iira pũhrũ nũgu majagũre cóãgũcumĩ. <sup>18</sup> Igo mũ ĩadigo mera õpa arĩ buhema: Igo wũari maca Babilonia waĩcũri maca iro dopa àhrimo. Arĩpehrerã gaji macari majarã tauro àhrima iri maca majarã, arãmi anyu yũre.

## 18

### *Babilonia waĩcũri maca cohoyoro*

<sup>1</sup> Pũhrũ gajigu anyure umarogue دچارigũre ĩhabũ. ĩgu opu gohra àhrami. Eropigu ĩgu goesiriri arĩpehrerogũre õaro boyoro wahabũ. <sup>2</sup> ĩgu eropa dijara pũhrũ turaro gaguinigui wereami:

—Cóãcãmi. Babilonia waĩcũri macare wũari macare iri maca majarã sãre cóãcãmi. Dohpagũre watẽa bajarã ñerã dũpu deyobirã sã iri maca mũraro arĩrã iima. Ñerã mirimagũ porã majarã sã masa erã ĩha doorã iri maca mũrarore arĩrã iima. <sup>3</sup> Iri maca majarã mũra arĩpehreri yebari majarãre goroweonirã arĩma. Eropirã baja yebari majarã tauro oparã iri maca majarãre pee Goãmũre cóãnirã arĩma. Erã ñeri uaribejarire iidiarã cóãnirã arĩma Goãmũre. Iri maca majarã baja gajinore wajapagari duarire gamenirã arĩma. Eropirã gaji macari majarã erãre duarã pagari dihta wajatanirã arĩma, arĩ wereami anyu.

<sup>4</sup> Pũhrũ dipaturi umarogue wereniguicũ peeabũ. Õpa arĩro carabũ iri macare cóãboro core ĩgu wereniguirire:

—Mũa yaharã, iri maca majarã mera arĩbiricãque mũa. Iri maca majarã mera mũa arĩcũ mũa sãre dipuwaja moagũcumĩ. Eropirã iri macague ñero iirire ĩhacũbiricãque. <sup>5</sup> Ero ñero iira baja arĩcãa. Iri maca majarã yoari boje bũrigã ñerire iituhajama. Eropigu yũhũ Goãmũ iripẽta erã ñero iicũ gahmea. Eropigu erãre dipuwaja moagũca. <sup>6</sup> Iri maca turaro dipuwajacũporo. Ero majarã masare erã ñero iidiro dopa ta erã sãre ñero taricũ iiporo. Masare erã ñero iidiro dopa ta erã tauro erãre ñero dipuwaja moaporo, arĩro carabũ. <sup>7</sup> Iri maca majarã “Õarã àhraa gũa,” arĩ pepirima. Eropa arĩ pepirã, wajapagarire wũaro opãma erã. Erã wajapagarire wũaro erã oparopẽ ta turaro ñero taricũ iiporo. Eropirã erãre bũjawerecũ iiporo. Erã basi õpa arĩ pepirima erã: “Gũa i yebari majarã oparã arĩrã iiaa. Mojomorocũrã arĩbeaa. Eropirã ne ñero tarisome gũa,” arĩ pepirima erã. <sup>8</sup> Eropa arĩ erã pepirã arĩcũ yujunũ erãre guñaña mariro dipuwaja moaburinũ arĩroca, arĩro carabũ. Irinũ sĩriri, dorecũri, co oreri, oaboari arĩroca. Eropigu iri macare soepehocãgũcumĩ, arĩro carabũ. Mũa opu Goãmũ iri macare dipuwaja moadoregũ turatariagu àhrimi. Eropigu eropa ta ĩgu arĩdiro dopa ta iri macare dipuwaja moadoregũcumĩ, arĩro carabũ umarogue.

<sup>9</sup> Eropirã Goãmũ iri macare ãgũ dipuwaja moacũ ãha i yeba majarã oparã burigã bujawere orerãcoma. Erã iri maca majarã mera ñerire iirã õaro mucubirirã árĩmürinirã árĩma. Eropirã iri maca ùjucũ ãarã orerãcoma erã. <sup>10</sup> ãgũ iri macare eropa soecũ ãarã oparã gajĩ yeba majarã yorogue ãhabeoniguirãcoma gũa sãre dipuwaja moari arĩrã. Ero ãhabeoniguirã õpa arĩrãcoma:

—Ade. Mojomorocũri maca ãhraa Babilonia. Si maca wũari maca turari maca arĩrabũ. Mata yojaro mera si macare dipuwaja moami, arĩrãcoma erã.

<sup>11</sup> I yeba majarã doberi duarã iri maca ùjucũ ãarã burigã bujawere orerãcoma erã sã. Iri maca pehrecũ ãarã, erã ya doberire asũrã maricũ ãarã bujawere orerãcoma. Eropirã orerãcoma. <sup>12</sup> Erã aĩgãrirare, orore, platare, wajacũri utãre, perla waĩcũri dipu sãre asũrã marirãcoma. Eropi gajĩ erã aĩgãrirare suhri õarire wajapagarire, yahsari suhrire, oparã erã sañari suhri dopa bejarire, seda waĩcũri suhrire, diari suhrire asũrã marirãcoma. Eropi gajĩ erã aĩgãrirare yucũ poresuri yucũre asũrã marirãcoma. Eropi gajire erã aĩgãrirare marfil waĩcũri mera erã iirare, wajacũri yucũ mera erã iirare, bronce mera erã iirare, come mera erã iirare, marmol mera erã iirare asũrã marirãcoma. <sup>13</sup> Eropi erã aĩgãrirare canela waĩcũri, gajĩ bari usuricũ iirire, incienso, mirra waĩcũri poresurire, gajĩ poresurire asũrã marirãcoma. Eropi gajĩ erã aĩgãrirare vinore, uyũre, trigo pogare, trigore, wecũare, ovejare, cabayuare, tũruri gasire, pohro majarãre asũrã marirãcoma. Eropirã bujawererãcoma doberi duari masa. <sup>14</sup> Eropirã õpa arĩrãcoma erã iri maca majarã mũrare:

—Ade. Ñetariaro wahari erã. Árĩpehreri erã mahira mũra pehrea wahaa. Eropiro árĩpehreri erã õarire erã wajapagari opara pehrea wahaa. Eropirã iri dipaturi bocosome mari, arĩrãcoma doberi duari masa.

<sup>15</sup> Erã iri macare doberi duarã wũaro wajatamürinirã árĩma. Eropirã erã iri macare yorogue ãhu niguirãcoma gũa sãre dipuwaja moari arĩrã ucãrã. Eropa ãhabeorã iri macare burigã bujawere orerãcoma. <sup>16</sup> Õpa arĩrãcoma iri macare:

—Ade. Ñetariaro wahaa iri maca wũari maca. Si maca majarã õarire opamüririma. Nomeo õari suhrire, wajapagari suhrire, yahsari suhrire, diari suhri sãre sañago dopa õarire opamüririma. Eropirã oro wajapagari utã, perla dipu waĩcũri tuhura suhriro sañamürima. Wũaro opamürima si maca majarã. <sup>17</sup> Eropiro mata si maca wũaro dobericũri maca dederea wahaa, arĩrãcoma iri macare.

Eropirã árĩpehrerã dohori gasi mera curirã, iri gasi oparã, erã umã, gajirã wũariyague mohme wajatarã sã iri macare yorogue ãhu niguirãcoma erã sã. <sup>18</sup> Ero ãhabeorã iri macare ùjucũ ãarã õpa arĩ gaguiniguirãcoma:

—Paga macari si maca iro dopa arĩri macari ne gajĩ maca mara, arĩ gaguiniguirãcoma erã. <sup>19</sup> Eropa bujawererã arĩrã erã dipu weca nicure ñaji peorãcoma. Eropirã co orerã õpa arĩrãcoma:

—Ade. Ñetariaro wahaa si maca mũraro. Õari maca arĩribũ. Árĩpehrerã dohori gasi oparã wũariyague curirã si maca maja doberi mera õaro wajataribũ mari. Eropiro mata si maca dederepehrea wahaa, arĩrãcoma gasi majarã, arĩ werero carabũ yũre umarogue.

<sup>20</sup> —Iri macare ãgũ cóãcũ ãarã mucubirique mũa, umaro majarãpũ, arĩro carabũ. —Goãmũ yarã, Jesu ãgũ apinirã, ãgũ yare weremũhtanirã árĩpehrerã mũa mucubirique. Iri maca majarã mũare ñero taricũ iima. Erã eropa iira dipuwaja, dipuwaja moami Goãmũ. Eropirã mucubirique mũa, arĩro carabũ.

<sup>21</sup> Eropa arĩ wereniguirare peera pũhrũ õpa ãhabũ yũhũ. Turagũ anyu wũariye utãyere aĩ wahgũ, wũariyague mehyuami. Eropa mehyugũ õpa arãmi:

—Iye utãye yuriñajadiro dopa ta wũari maca Babilonia waĩcũri maca turaro yuhridijaro busũroca. Eropa yuhridijara pũhrũ iri macare dipaturi ãasome mũa. <sup>22</sup> Iri macare dederea wacũ iigacumi. Eropiro ne iri macare bayarire mũa peediro dopa

árísome. Arpa buamutēri, flauta dipurure, corneta sãre ne dipaturi peeya mariroca. Eropirã iri maca maricũ ero mohmenirã dipaturi erore mohmesome. Eropiro trigo yeri utã mera erã oera sã ne peeya mariroca. <sup>23</sup> Iri maca boyo oyadiro dopa ne árísome. Eropirã mojoto dirinirã erã mucubiri wereniguidiro dopa ne dipaturi árísome. Iri maca majarã doberi duarã asũrã mera gajirã tauro opamurima erã. Eropirã iri maca majarã yeea erã purisiriri mera árĩpehrero majarãre guyamurima. Eropirã ñerire uribeja, Goãmurure gamebirimurima masa, arãmi yure turagu anyu. <sup>24</sup> Iri maca majarã Goãmũ yare weremũhtanirãre gajirã igũ yarã sãre árĩpehrero majarãre wejẽmurinirã arĩma. Erã eropa wejẽra dipuwaja, gajĩ ñero iira dipuwaja sãre dipuwaja moãmi Goãmũ iri macare.

## 19

<sup>1</sup> Babilonia macare igũ cóarare yũ ñara pũhrũ umarogue bajarã gaguiniguirã carama yũ peecũ. Ōpa arĩ gaguiniguirã carama:

Aleluya. Goãmure ðaro wereniguirã. Goãmũ marire taugũ aħrimi. Igũre ðaro umupeorã. Turatariagu aħrimi igũ. <sup>2</sup> Gũyaro mariro queoro iigũ masare dipuwaja moami igũ. Ñeri dipuwaja moorãre erãre dipuwaja moabemi. Igo nomeo ñerire iiricũgo Babilonia waĩcũri maca aħrimo. Iri maca majarãre ihacũrã i yeba majarã ñero iimurima. Eropigu iri maca majarãre dipuwaja moami Goãmũ. Eropigu igũ dorerire iinirãre igũ pohro majarãre erã wejẽra dipuwaja dipuwaja moami igũ, arĩ gaguiniguirã carama.

<sup>3</sup> Dipaturi gaguiniguirã carama daja:

—Aleluya. Goãmure ðaro wereniguirã. Iri maca ñero iira maca igũ soera maca eropa imicacũnigũicãroca, arĩ gaguiniguirã carama.

<sup>4</sup> Eropirã veinticuatro Jesu yarã oparã, wapicũrã gajiropa bejarã mera mereja, Goãmure mari Pagũre igũ doaro doagũre umupeoama. Ōpa arĩ umupeoama erã:

—Amén. Aleluya. Eropa aħraa. Mari Pagũre ðaro wereniguirã, arãma erã.

<sup>5</sup> Pũhrũ opu doarogue ðpa arĩro carabũ:

Mari Opu Goãmure umupeoque. Mũa igũ pohro majarã, igũre umupeorã bu arĩrã, oparã sã árĩpehrerã mũa igũre ðaro werenigũique, arĩro carabũ.

### *Cordero igũ mojoto diriburinũ bosẽnure werepũ Ñũ*

<sup>6</sup> Pũhrũ bajarã masa erã wereniguirã caracũ peeabũ. Erã utãmu iro dopa bupu iro dopa busũrã carama yũ peecũ. Ōpa arĩ gaguiniguirã carama:

Aleluya. Goãmure ðaro wereniguirã. Igũ mari Opuopũ opu ñajatuhami. Turatariagu aħrimi igũ. <sup>7-8</sup> Cordero igũ mojoto diriburi bosẽnũ aħraa dohpaguere. Igũ mojoto diribo ðaro amudigogue aħrimo. Igo ðari suhrirore gũhrari mariri suhrirore sañatuhamo. Iri suhriro Goãmũ yarã ðarire erã iira iro dopa aħraa. Eropirã mucubirirã mari. Goãmure “Ōatariagu aħrimi,” arĩ umupeorã mari igũre, arĩ wereniguirã carama.

<sup>9</sup> Erã eropa arĩra pũhrũ anyupũ arãmi yure:

—Ire goja aĩque. “Cordero igũ mojoto diriri bosẽnure igũ sihubeonirã mucubirirã aħrima,” arĩ goja aĩque, arãmi yure anyu.

Eropa arĩgu ta ðpa arĩnemoami:

—Diaye ta aħraa i yũ werera. Goãmũ ya werenigũiri aħraa, arĩnemoami yure.

<sup>10</sup> Igũ eroparĩcũ peegu igũre mereja umupeobu iirabũ. Yũ merejacũ gohra ðpa arãmi yure:

—Yure mereja umupeobita. Mũ arĩro dopa ta Goãmũ pohro majagu ta aħraa yũ sã. Mũ acawerã Jesu yarã árĩpehrerã igũ ya buherire werenirã iro dopa yũ sã Goãmũ

pohro majagu āhraa. Eropigu Goāmure mereja ĩgure umupeoque, arāmi yare anyu.

Goāmure yare weremūhtanirā iribojegue majarā Espiritu Santo ĩgu itamuro mera Jesu ya buherire ta wereyuñuma.

### *Cabayu boregu weca peyagure werepu Ñu*

<sup>11</sup> Pūhrū umaro pārimaacū ĩhabū. Ero cabayu boregu āhrami. ĩgu weca peyagu ōpa waĩcuami: ĩgu arĩro dopa ta iigu diaye iigu waĩcuami ĩgu. Eropigu masare dipuwajare moagu ĩgu ĩhaturirā mera gamewejēgu ōaro gūyaro mariro iiامي. <sup>12</sup> ĩgu cuiri peame porā iro dopa āhrabū. Eropiro ĩgu dipuru weca baja oparā peyari berori āhrabū. Eropigu ĩgu dūpūre ĩgu waĩre gojatudigu āhrami. Iri waĩre ĩgu dihta masiami. Gajirā masibirama. <sup>13</sup> ĩgu sañariñe yoariñe di tuyariñe āhrabū. ĩgu ōpa waĩcuami: Goāmure ya wereniguirire weregu waĩcuami ĩgu. <sup>14</sup> Eropirā ĩgu yarā surara umarogue majarā ĩgure nūrsiāma. Borerā cabayua weca peyarā āhrama. Ōari suhrire boreri suhrire, gūhrari mariri suhrire sañanirā āhrama. <sup>15</sup> ĩgu erā opu wamūhtadigu ĩgu disiro ñoserimiji usirimiji cuñuami. Irimiji i yeba majarāre ĩgu tarinūgaburimiji āhrabū. Eropigu ĩgu turari mera ĩgu dorecū ne yujugu ĩgure tarinūgagu ĩgure bocatūsosome. Igui dipurure erā ñatĩacū igui deco wiriro dopa ta i yeba majarā ñerāre di wiriroca ĩgu erāre dipuwaja moacū. Goāmure erā mera guami. ĩgu eropa guagu arĩcū cabayua weca peyagu dipuwaja būrigā moagucumi. <sup>16</sup> ĩgu suhriro, ĩgu ñigagu sāre iri waĩre gojatudigu āhrami: “Arĩpehrerā gajirā tauro opu waĩcuami,” arĩ gojatudigu āhrami.

<sup>17</sup> Pūhrū abegue niguigure anyu niguigure ĩhabū. Arĩpehrerā umarogue wūurāre goro porā majarāre gaguiniguibeoami ĩgu. Ōpa arĩ turaro gaguiniguibeoami erāre:

—Gamenererā arique. Goāmure ĩgu bosenu wūari bosenu barā arique. <sup>18</sup> Baja yebari majarā tauro oparā mūrare, surara oparā mūrare, surara bajarā mūrare, cabayua mūrare, erā weca peyarā mūrare, arĩpehrerā gajirā masa mūrare, pohro majarā mūrare, pohro majarā arĩbirā mūrare, gajirā oparā mūrare, bu arĩrā mūrare barā arique. Erā arĩpehrerā dūpū mūrare barā arique, arĩ gaguiniguibeoami anyu goro porā majarāre.

<sup>19</sup> Eropigu nūgu majagure, i yeba majarā tauro oparā erā surara bajarā sāre ĩhabū. Erā gamenerenirā āhrama cabayu weca peyagu mera ĩgu surara bajarā mera gamewejēmōrā. <sup>20</sup> Erā eropa gamewejēcū cabayu weca peyagu nūgu majagure peresu iiامي. Gajigu “Goāmure yare wereniguigu āhraa,” arĩ gūyadigu sāre peresu iiامي. ĩgu gūyadigupu nūgu majagu ĩgu ĩhuro deyoro moarire iibasadigu āhrami. ĩgu deyoro moari mera nūgu majagu ĩgu waĩre tūyanirāre, ĩgu masu wēadigūre umupeorāre gūyadigu āhrami. “I Goāmure ya āhraa,” arĩgu gūyamūridigu āhrami. Erāre perāre ĩgu peresu iira pūhrū erāre ojocarirāre ta peamegue cōhāmi. Iri peame wūariya iro dopa wūari peame azufre mera ũjuri peame āhrabū. <sup>21</sup> Eropigu dūhyarāre erā surara arĩnirāre ñoserimiji mera ĩgu disiro cuñurimiji mera wejēami cabayua weca peyagupu. Eropa ĩgu wejēra pūhrū goro porā majarā erā dūpū mūrare barā yapitaria wahāma.

## 20

### *Mil bojori gohra Cristo ĩgu yarā mera masare doregucumi, arĩ gojañumi Ñu*

<sup>1</sup> Pūhrū gajigu anyu umarogue ĩgu دچارicū ĩhabū. Ũhcāri gobe maja sawire, wūarida comeda sāre opāmi ĩgu. <sup>2</sup> Eropa دچارigu pĩrure ñeāmi ĩgu. ĩgu pĩru iribojegue pĩru dūpūcūgu arĩgu, watĩ Satana waĩcūgu āhrami. ĩgure ñeagu dihriami mil bojori gohra peresu iibu. <sup>3</sup> Eropa dirituha ũhcāri gobegue cohā dijuami ĩgu i yeba



majaräre mil bojori gohra ïgu gøyamasibiriborore. Eropa cóätuhagu iri gobere biha, sawi biacãmi. Eropigü mil bojori pührü dipaturi ïgüre bajamenurigã wiunigücümi daja.

<sup>4</sup> Pührü oparã doarire ïhabü. Iri doarire doarã säre ïhabü. Eräre masare erã beyedoboborore apiami Cristo. Gajirã säre ïhabü. Eräpü Jesu yare Goãmü yare erã werera dipuwaja eräre dipure tabe cóänirã ährama. Nügü majagure, ïgu wéadigü säre ne umupeobirininã ährama. Eropirã erã diaporire erã mojotori säre ïgu waïre gojatudorebirininã ährama erã. Eropirã gajirã eräre wejëninã árïma. Eräre wejëra pührü masa mürã wanirã árïma. Masa mürã erã mil bojori gohra Cristo mera oparã árïrãcoma. <sup>5</sup> Gajirã Cristo yarã sïrinirã mürã masa mürãbirama dohpa. Erã wejenirã erã masa mürã pührü mil bojori oparã erã árïra pührü gajirã sã masa mürãrãcoma. Eropirã erã wejëninã mürã Cristo pührü masa mürãmühtarã árïrãcoma. <sup>6</sup> ïgu masumühtanirãpü turaro mucubirã árïrãcoma. Ñeri marirã árïrãcoma erã. Eropirã peamegue wasome erã. Eropirã Goãmü yare Cristo yare erã sã serëbasarã pahia árïrãcoma erã. Eropirã erã masa mürãmühtarã mil bojori gohra Cristo mera masa tauro oparã árïrãcoma.

### *Satana dederea wagücümi, arï gojañumi Ñu*

<sup>7</sup> Mil bojori pührü Satanare peresu árïgüre wiugücümi. <sup>8</sup> ïgu eropa wirira pührü árïpehrero i yeba majaräre gøyagü wagücümi ïgu, “Ina gamewejërã warã,” arïgu. Gog waïcürãre, Magog waïcürã säre gøyagü wagücümi. Eropirã erã ïgu gøyarire peerã, erã surara majaräre gameneorãcoma gamewejëmorã. Erã surara majarã bajarã gohra árïrãcoma. Wüariya maja imipa árïro ütãburuyeri nücü dopa erã surara bajarã árïrãcoma

<sup>9</sup> Eropirã i yebaguere wasirirã, Goãmü yarã erã árïri macare Goãmü ïgu mahiri macare cãhmotanugajarãcoma. Erã eropa cãhmotanugajara pührü Goãmü eräre umaro maja peame mera soe mehdijucãgücümi. <sup>10</sup> Eropa warã pührü watire eräre gøyagüre peamegue cóãgücümi. Iri peame wüariya iro dopa árïri peame azufre mera üjuri peame ährabü. Erogue nügü majagure “Goãmü yare weregü ähraa,” arï gøyagüre cóätuhajami. Ero erã árïcũ umuri nücü püriroca eräre.

### *Masare Goãmü dipuwaja moatugücümi, arï gojañumi Ñu*

<sup>11</sup> Pührü wüaro opu ïgu doarore òaro borero ïhabü. Iri doaro weca doagu säre ïhabü. Eropiro ïgu árïroque mata i yeba umaro sã dederea wahabü. Ne deyobirabü pare. <sup>12</sup> Eropigü opu pohro sïrinirã mürã erã niguicũ ïhabü. Erã bu árïrã, oparã mürã sã ährama. Ero erã niguicũ ïgu gojaturapürire pãgüami. Iripüri masa erã iirare ïgu gojaturapüri ährabü. Eropigü ïgu opu beyegü iripüre ïatüha erã iirare masiami. Irire masigü sïrinirãre beyeami ñerã, òarã. Pührü gajipü säre pãgüami. Iripü Goãmü mera eropa árïniguimorãre erã waïre erã gojaturapü ährabü. <sup>13</sup> Wüariyague miri sïrinirã mürã, diague erã cóänirã mürã sã masa mürã wahãma. Eropirã yeba pohecague árïninã mürã, sïrinirã erã árïroque árïninã mürã sã masa mürã wahãma. Erã eropa mürãjacũ ero doagu erã iirare masigü eräre beyeami. Óarãre, ñerãre beyeami. <sup>14</sup> Pührü sïririñere, sïrinirã erã árïro säre cóãcãmi Goãmü dipaturi mari sïribiriboro dopa. Peamegue iirare cóãcãmi. Iri peame wüariya iro dopa árïri peame ährabü. Goãmüre gamebirãpü peamegue warã dipaturi sïrirã dopa wahama. <sup>15</sup> Eropigü ïgu mera árïniguimorã erã waïre Goãmü ïgu gojaturapü árïpehrerã gojatusüya marirãpüre peamegue cõhãmi ïgu.

## 21

*Umaro, yeba säre mamare gohrotogücümi Goãmü, arï gojañumi Ñu*

<sup>1</sup> Pũhrũ Ʃmaro, yeba sãre mamare ĩgu gohrotorare ĩhabũ. Árímuhtara mũra Ʃmaro, yeba, pagayari sã pehrea wahabũ. Marabũ. <sup>2</sup> Eropĩgu yũhũ Ñũ õari macare, mama macare Jerusalén waĩcũri macare ĩhabũ. Iri maca Ʃmarogue Goãmũ pohrogue dijaricũ ĩhabũ. Õaro dehyoabũ iri maca. Mojoto diribo igo marapũre mucubiriborore õari suhri sã igore õaro amuro dopa ãhrabũ iri maca. Õpa iro dopa ta iri macare amuyudi árími Goãmũ ĩgu yarãre mucubiricũ iibu. <sup>3</sup> Irire yũ ĩara pũhrũ opũ doarogue gaguiniguicũ peeabũ:

—Īaque. Dohpaguere masa watope árígu iimi Goãmũ. Erã mera árígućumi ĩgu. Eropirã ĩgu yarã árírãcoma erã. Eropĩgu Goãmũ ĩgu basi erã mera majagu árígu, erã yagu Goãmũ árígućumi. <sup>4</sup> Eropĩgu eropa mucubiriniguicũ iigućumi ĩgu erãre. Eropirã dipaturi bũjaweresome erã. Eropirã ne dipaturi sĩrisome erã. Ne ñero sĩporãcũri, co oreri, pũriri sã mariroca erãre. I árípehreri iribojegue maja pehrea waroca erãre, arĩ gaguiniguigu ćarami.

<sup>5</sup> Pũhrũ opũ doarogue doagu õpa arãmi:

—Īaque. Árípehrerire mama gohrotocũ iiguća, arãmi.

Īgu eropa arĩra pũhrũ yũre õpa arãmi daja:

—Yũ arĩrire goja aĩque. Yũ arĩri diaye ta ãhraa. Eropiro yũ arĩdiro dopa ta eropa waroca. Eropĩgu yũ arĩrire goja aĩque, arãmi yũre.

<sup>6</sup> Pũhrũ õpa arãmi daja yũre:

—Iripẽta áríca. Yũ árípehrerire ĩhacũnugudigu ãhraa. Eropĩgu árípehrerire pehrecũ iibu ãhraa daja. Nemesiburã erã turaro ihridiario dopa ta yũ pohrogue wadiarã Jesure gamerãcoma. Eropirã Jesure yũhrirãcoma. Īgu ojocaririre oro deco iro dopa ãhrimi. Īgũre gamerãre waja gamero mariro yũ mera eropa áriniguiborore ogũra erãre. <sup>7</sup> Árípehrerã ñero tariquererã yũre umupeoduhubirãre õpa iigũra: Erã Goãmũ árigũra. Eropirã erãpũ yũ porã árírãcoma. <sup>8</sup> Erã eropa áríquerecũ masare gũi yaharare duhurã, yahare gamebirã, ñetariarire iirã, masare wejẽrã, nome mera ñero iirã, Ʃma mera ñero iirã nome, yeea, goãmarã wéanirãre umupeorã, árípehrerã gũyarã peamegue warãcoma. Ero wũariya iro dopa áríri peame azufre mera ũjũri peame ãhraa. Erogu warã dipaturi erã sĩriro dopa ta warã iirãcoma, arãmi yũre.

### *Mama maca Jerusalénre wererũ*

<sup>9</sup> Pũhrũ yujugu anyu yũ pohrogue erãmi. Īgu siete pari opanirã mera majagu ãhrami. Īgu dipuwaja moadoregu ĩgu apinirã mera majagu sã ĩgu anyua mera majagu ãhrami. Eropa eragu õpa arãmi yũre:

—Īagu arique. Cordero ĩgu mojoto diribore ĩhmugũca mũre, arãmi anyu yũre.

<sup>10</sup> Eropĩgu Espĩritu Santo yũre Goãmũ ya macare ĩacũ iiami. Eropĩgu Ʃmadigu Ʃtãgu wecague yũre aĩ mũriãmi. Erogu Goãmũ ya macare Jerusalénre õari macare ĩhmuami yũre. Iri maca ĩgu mojoto diribo iro dopa ãhrabũ. Goãmũ pohrogue Ʃmarogue dijariro iiabũ iri maca. <sup>11</sup> Goãmũ ĩgu goesiriri mera goesiriabũ iri maca. Wajacũri Ʃtã iro dopa goesiriabũ. Jaspe waĩcũri Ʃtã goesiriro dopa goesiriabũ. Eropiro vidrio iro dopa õaro deco sũriabũ iri maca. <sup>12</sup> Eropiro wũari sãriro Ʃmari sãriro erã sãri sãra maca ãhrabũ. Doce gohra disipororicũabũ iri sãriro. Iri disiporore cohreama anyua. Iri maca disiporori bihariserigue Israe masa cururi doce cururi nũcũ erã waĩ tuhyabũ. <sup>13</sup> Abe mũrireropũ iri sãriro opabũ Ʃhre disiporo. Surpũ Ʃhre disiporo opabũ. Nortepũre Ʃhre disiporo opabũ. Abe ñajaropũ sãre Ʃhre disiporo opabũ. Árípehrero doce disiporori gohra opabũ iri sãriro. <sup>14</sup> Iri sãriro doce Ʃtã weca peyabũ. Iri Ʃtã nũcũ Cordero ĩgu apinirã doce ĩgu apinirã gũa yujurãyeri waĩ tuhyabũ.

<sup>15</sup> Eropigu anyu yure weregu queodigu oro mera erã iidigure opami. Iri macare, iri maca maja disiporori sare, iri sãriro sare queobu iiami. <sup>16</sup> “Iri maca yoaropẽ ta ehyaa,” arãmi queotuhagu. “Umaro sã iripẽta umaa,” arãmi. Eropigu anyu igu queodigu mera iri macare queoami. Iri maca dos mil doscientos kilõmetros yoari maca ahrabu. Iripẽta ehyari maca ahrabu. Iripẽta umaro ahrabu. <sup>17</sup> Eropigu iri maca maja sãrirore queoami anyu. “Sesenta y cuatro metros umaa,” arãmi. Mari masa queoro dopa ta queogu iiami igu.

<sup>18</sup> Iri sãriro jaspe waicuri utã mera igu iira sãriro ahrabu. Eropiro iri macapu oro mera igu iira maca ahrabu. Iri oro guhrari mariri arĩro õaro deco suriabu. <sup>19</sup> Iri sãriro doca arĩri utãre baja gajiropa arĩriyeri tuhyabu õaro deyoboro dopa. Iriyeri wajapagariyeri ahrabu. Iriyeri tuyara utã sãriro doca oyari utã doce utã ahrabu. Arĩmũhtari yegue jaspe waicuri utãyeri tuhyabu. Iriye puhru maja yeguerere safiro waicuri utãyeri tuhyabu. Peye puhru maja yeguerere ágata waicuri tuhyabu. Uhyeye puhru yeguerere esmeralda waicuri utãyeri tuhyabu. <sup>20</sup> Wapicuriye utãye puhru maja yeguerere õnice waicuri utãyeri tuhyabu. Yuju mojutocu maja pehreri utã puhru maja yeguerere cornalina waicuri utãyeri tuhyabu. Seis puhru majaye utãyeguerere crisólito waicuri utãyeri tuhyabu. Siete puhru arĩriye utãyeguerere berilo waicuri utãyeri tuhyabu. Ocho puhru arĩriyeguerere topacio waicuri utãyeri tuhyabu. Nueve puhru arĩriyeguerere crisoprasa waicuri utãyeri tuhyabu. Diez puhru arĩriyeguerere jacinto waicuri utãyeri tuhyabu. Once puhru arĩriyeguerere amatista waicuri utãyeri utuyabu. <sup>21</sup> Eropiro doce disiporori doce perla mera igu iiraseri ahrabu. Iriseri nucũ yujuye perlaye mera igu iira dihta ahrabu. Eropiro iri maca wari maha oro mera igu iira maha ahrabu. Iri oro guhrari mariri oro ahrabu. Eropiro õaro deco suriri maha ahrabu iri maha.

<sup>22</sup> Iri macare Goãmu wihire iabirabu. Marabu. Iri maca arĩpehrerogue mari Opure Goãmu turatariagure, Cordero sare umupeoama masa. Eropiro iri maca arĩpehrero Goãmu ya wihi iro dopa ahrabu. <sup>23</sup> Eropigu iri maca Goãmu igu gosesiriri mera õaro boyoabu. Cordero sã sihãgodiru iro dopa boyoami. Eropirã abe umu majagu sare ñami majagu sare ero boyocũ gamebirama. <sup>24</sup> Eropirã i yeba majarã Goãmu Cordero sã boyori mera arĩrãcoma Goãmu igu taunirã. Eropirã arĩpehreri yeba majarã oparã iri macague õatariari erã oparire aĩrã erarãcoma. <sup>25</sup> Eropiro umure iri maca maja disiporori pãgũra disiporori arĩroca. Eroguere ne ñami mariroca. Eropirã iri disiporore ne bihasome. Eropiro toyoniguia. <sup>26</sup> Eropirã baja yebari majarã õarire erã oparire iri macague aĩrã erarãcoma. <sup>27</sup> Ñeripure iri macaguere ne aĩsome. Guhyasĩricũ iirã, ñerire iirã, ne iri macaguere wasome. Guyarã sã wasome. Cordero igu gojarapũ erã waĩ gojatusũnirã dihta iri macaguere warãcoma. Iripũ igu taurã erã waĩre igu gojaturapũ ahraa. Iripũgue erã waĩ gojatusũnirã eropa arĩniguicãrãcoma igu mera.

## 22

<sup>1</sup> Puhru õariyare ojocaricũ iiriyare ihmuami yure anyu. Iriya deco suririya Goãmu, Cordero sã erã doarogue aririya ahrabu. <sup>2</sup> Eropiro iri maca deco yuriabu iriya. Iriya pepuri masegue ojocaricũ iiri yucu niguiabu. Iri yucu aberi nucũ ducacua. Yuju bojorire doce suburi ducacua. Eropirã iri yucu maja pũri mera õaro oocurãcoma masa i yeba majarã. <sup>3</sup> Iri macare ne pũriri mariroca. Iri maca Goãmu igu opu arĩro arĩroca. Cordero igu opu arĩro sã arĩroca iri maca. Eropirã igu pohro majarã arĩrã igu pohro mereja igure umupeorãcoma. <sup>4</sup> Erã Goãmure õaro ñaniguicãrãcoma. Eropirã erã diaporire erã igu waĩre tuyasũrã arĩrãcoma. <sup>5</sup> Eroguere ñami ne mariroca. Eropirã sihãgori dipurure gamesome ero arĩrã. Abe igu boyocũ sare

gamesome. Mari Opu Goamu igu boyoro ariroca. Eropira iri maca arira gajira tauro opara eropa ariniguiracoma.

*Jesucristo i yebague igu dujariboro meroga dahyaa, arĩ gojanumi Nu*

<sup>6</sup> Puhru anyu yure opa arami:

—Arĩpehrerire mu iha gojara diaye ahraa. Eropiro gua mure eropa aridiro dopa ta eropa waroca. Mari Opu Goamu igu yare weremhtarare masicu igu ahrimi. Iguru dohpaguere yure igu yagu anyure obeomi igu pohro majarare masicu iibu. Puhru maja dohpa waborore masicu iibu, igu yure igu yagu anyure obeomi, arami anyu yure.

<sup>7</sup> Jesuru opa arami:

—Peeque mua. Meroga dahyaa yu dujariboro. Ipu maja weremhtarire tarinugabirinira mucubirira ariracoma, arami Jesu.

<sup>8</sup> Yuhu Nu i arĩpehrerire yu goja airare peeabu. Eropigu irire ihabu. Eropigu yu peera puhru, yu iara puhru yure ihmudigu anyu pohro merejarabu umupeobu. <sup>9</sup> Yu eropa icu igu opa arami yure:

—Yure mereja umupeobita. Mu iro dopa ta yu sa Goamu pohro majagu ta ahraa. Mu acawererã Goamu yare weremhtarã, arĩpehrerã ipu maja dorerire iira sa era ariro dopa ta yu sa Goamu pohro majagu ta ahraa. Eropigu Goamure mereja igure umupeoqe, arami anyu yure.

<sup>10</sup> Eropigu opa arĩ werenemoami yure:

—Ipu mu goja airapu puhru maja dohpa waborore werea. Eropa waboro meroga dahyaa. Eropa aricu ipu wererare dibubita mahu. <sup>11</sup> Irisubu yu wererisubure nerapu eropa iiniguicoma nerire. Oarapu oaro iiniguima. Eropira erapu neri marira ariracoma, arami yure anyu.

<sup>12</sup> Opa arami Jesu:

—Peeque mua. Meroga dahyaa yu dujariboro. Mure yahare yu wajayeborore aigaribu iiaa. Eropigu oarire mua iira waja mure oaro igura. <sup>13</sup> Yuhu arĩpehrerire ihacunugudigu ahraa. Eropigu arĩpehrerire pehrecu iibu ahraa.

<sup>14</sup> “Arĩpehrerã guhari mariri suhrire sanirã ariro dopa ta era neri iirare coenira iri macaguere ejaracoma. Eropira iri maca maja yucu ojocaricu iiri yucu ducare baracoma. Eropira mucubirira ariracoma era. <sup>15</sup> Iri macague ejabirapu opa ahriima: Netariã, yea sa, nome mera nero iira, uma mera nero iira nome, masare wejera, goamarã weanirare umupeora, guyaricura sa ahriima iri macague ejabira, arami Jesu.

<sup>16</sup> Eropigu opa arĩnemoami Jesu yure:

—Yuhu Jesu yahagu anyure obeobu mure yahare ipu majare werebure. Opu Davi arituriagu parami ahraa yuhu. Yuhu boyomuridiru iro dopa arigu mure oaro aricu igu ahraa, arĩ werenemoami Jesu.

<sup>17</sup> Espiritu Santo Jesure “Dujarique,” arimi. Jesu yara sa igu mojoto diribo dopa arira, “Dujarique,” arima. Arĩpehrerã era “Dujarique,” era aricu peerã sa, “Dujarique,” ariporo Jesure. Nemesiburã decore era turaro gamero dopa ta Goamu pohroque wadiarã Jesure turaro gameporo. Igu ojocaricu iiri deco iro dopa ahrimi. Igu gamere waja gamero mariro amarogue era eropa ariniguicaborore ogucumi Goamu.

<sup>18</sup> Yuhu Nu arĩpehrerã ipu maja wererire, Goamu yare weremhtarare penirare opa arĩ mure guhyadiaro mera weregura. I buheri mera gaji buheri mera moresu werenemora Goamure tarinugarã iima. Era eropa tarinugacu igu arĩpehreri ipu igu dipuwaja moaburire igu werero dopa ta apigucumi era sare. Eropigu eropa era sare



dipuwaja moagucumi. <sup>19</sup> Eropirã ipũ maja wererire i Goãmũ yare weremũhtarare goroweorã Goãmũre tarinũgarã árĩrãcoma. Erã eropa tarinũgacũ ãagũ ojocaricũ iiri yucũ dũcare erãre badoresome. Eropirã Goãmũ mera árĩniguisome erã. Eropirã ãgũ ya macague õari macague wasome erã. Iri yucũre, iri maca sãre ipũ mera erã wererague ãhraa.

<sup>20</sup> Árĩpehreri ipũ majare weregũ Jesucristo õpa arĩmi.

—Eropa ta ãhraa. Merogã dũhyaa yũ i yebague dujariboro, arĩmi ãgũ.

Eropigũ yũpũ õpa arĩtugũ iiaa.

—Eropa ta ãique. Gũa Opũ Jesu dujarique, arãa yũhũ.

<sup>21</sup> Mari Opũ Jesu ãgũ itamuro mera árĩpehrerã mũa Goãmũ yarã õaro ãrique. Eropa ta árĩrã. Iripẽta ãhraa.